

Htawm Seunga ' na ' gawm '

Blang Pulang New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Mahtae.....	4
Maku´	45
Lu´ka.....	69
Yo´han.....	110
Peue caee	141
Ro´ma	179
1 Kaw´rinhtu´	198
2 Kaw´rinhtu´	215
Galati´	226
E´fe´su´	233
Hpi´li´pi´	239
Kaw´law´sae´	244
1 Hte´saló´ni´	249
2 Hte´saló´ni´	253
1 Ti´mo´se.....	255
2 Ti´mo´se	260
Ti´tas´	264
Hpi´le´mon.....	267
Hebrae´	268
Yakop´	281
1 Petru´	286
2 Petru´	291
1 Yo´han	294
2 Yo´han.....	299
3 Yo´han.....	300
Yu´da.....	301
Htawm Tuh´ri tuil´	303

Mahtae

Ceucat Eun Yesu ' na ' ce

1 ⁴Aen ' meuh a muis ce ceucat Eun Yesu ' Hkrit na ' ce.
Yesu ' meuh Eun peue suip ' ceucat eun Davit ',
Davit ' eun meuh peue suip ' ceucat eun Abraham.

²Abraham eun meuh kuiing ' eun I ' cak ' .
I ' cak ' eun meuh kuiing ' eun Yakop ' .
Yakop ' eun meuh kuiing ' eun Yu ' dah mae ' awng ' eun na ' ce.

³Yu ' dah eun meuh kuiing ' ka Hparae ' mae ' Sera ' .
Ma ka ka muis Taman.

Hparae ' eun meuh kuiing ' eun Hes ' ron.
Hes ' ron eun meuh kuiing ' eun Ram.

⁴Ram eun meuh kuiing ' eun Ami ' nada ' .
Ami ' nada ' eun meuh kuiing ' eun Nason.
Nason eun meuh kuiing ' eun Salamon.

⁵Salamon eun meuh kuiing ' eun Baw ' ya ' . Ma eun ka muis Rahab.

Baw ' ya ' eun meuh kuiing ' eun Obet. Ma eun ka muis Ru ' hta ' . Obet eun meuh kuiing ' eun Yesae ' .⁶Yesae ' eun meuh kuiing ' eun hkun ' haw ' hkam ' Davit ' .

Davit ' eun meuh kuiing ' eun Saw ' lamon. Ma eun Saw ' lamon ka tawn meuh beun ' eun U ' ri ' ya.

⁷Saw ' lamon eun meuh kuiing ' eun Rehoboam.
Rehoboam eun meuh kuiing ' eun Abi ' ya.
Abi ' ya eun meuh kuiing ' eun Asa.

⁸Asa eun meuh kuiing ' eun Yaw ' sahpa ' .
Yaw ' sahpa ' eun meuh kuiing ' eun Yeho ' ram.
Yeho ' ram eun meuh kuiing ' eun U ' siya ' .

⁹U ' siya ' eun meuh kuiing ' eun Yo ' tam.
Yo ' tam eun meuh kuiing ' eun Ahas.
Ahas eun meuh kuiing ' eun Hesaki ' .

¹⁰Hesaki ' eun meuh kuiing ' eun Manase.
Manase eun meuh kuiing ' eun Amon.
Amon eun meuh kuiing ' eun Yo ' si ' .

¹¹Yo ' si ' eun meuh kuiing ' ce Yehkaw ' ni ' bae awng ' eun na ' ce. A meuh cu yam meuh ce mhai ' nang kuiing ' Babu ' lon na ' .

¹²Hawc ' ka yam meuh ce mhai ' nang kuiing ' Babu ' lon na ' ,

Yehkaw ' ni ' eun meuh kuiing ' eun Shealtiel ' .
Shealtiel ' eun meuh kuiing ' eun Yeru ' babel.

¹³Yeru ' babel eun meuh kuiing ' eun Abi ' o ' .
Abi ' o ' eun meuh kuiing ' eun E ' lakim.
E ' lakeng eun meuh kuiing ' eun Ashaw.

¹⁴Ashaw eun meuh kuiing ' eun Sado ' .
Sado ' eun meuh kuiing ' eun Akim.
Akim eun meuh kuiing ' eun E ' li ' o ' .

¹⁵E ' li ' o ' eun meuh kuiing ' eun E ' lasa.
E ' lasa eun meuh kuiing ' eun Mahtan.
Mahtan eun meuh kuiing ' eun Yakop ' .

¹⁶Yakop ' eun meuh kuiing ' eun Yo ' saep. Yo ' saep eun meuh me eun Mari ' . Mari ' eun meuh ma Eun Yesu ' ku ' klawng peue Eun muis Hkrit † na ' Eun.

¹⁷Kop awn ' na, tang ' neum cu eun Abraham na ' rot ti cu eun Davit ' na ' a kue ' kul ' pun ' cu. Tang ' neum cu eun Davit ' na ' rot ti yam meuh ce mhai ' nang kuiing ' Babu ' lon na ' a kue ' kul ' pun ' cu. Tang ' neum yam meuh ce mhai ' leuvaee nang kuiing ' Babu ' lon na ' rot ti cu Eun Hkrit na ' a kue ' kul ' pun ' cu.

Yesu ' Hkrit keut ' Eun

¹⁸Lawng Yesu ' Hkrit keut ' Eun na ' yeuh a ki ' , Mari ' ma Eun na ' meuh eun kon ' hk'ih ' yeuh kati ri kaw ti Yo ' saep eun. Daecti yam un ' nang ut ' ka tiduih ' seun ' hpo ' me na ' , Mari ' eun nyhel ' kopti meuh a Cit ' seunga ' chak ' na ' .¹⁹Kopti Yo ' saep seula eun na ' meuh eun peue leupaws seumeu ' eun un ' sum ' kah kon ' hk'ih ' ri na ' eun kaic nanggal ' peue na ' , eun kuit ri kaw dit ' ti yeuh kati na ' hawc ' .

²⁰Daecti yam buih kuit eun a yeuh keutit ' na ' , in ' hpom Eun Peucawo ' ti peue eun pucti lih lah ' a hk'a ' naee vang it ' eun ri leumu na ' , "Yo ' saep kon ' Davit ' , pawlaee lhat ' ri kaw mi ti Mari ' eun meuh beun ' ri. Nyhel ' eun kon ' nang keuteul ri na ' meuh a kopti Cit ' seunga ' chak ' na ' .²¹Kaw eun keut ' kon ' me ti peue. Mi na ' kah

† A ' ko ' Mesi ' ya, vangdoh ' ka "Hkrit" (leukah ' Helasa ') mae ' "Mesi ' ya" (leukah ' Hebrae ') na ' a meuh "peue pun ri leuk ri uin ' ."

ri ghuk ' Eun muis Yesu ' †, kopti kaw Eun teum ' kawm peue ceu ri na ' ce lawtpon hk'ai ' map ' ri na ' ."

²² Ceu nang aen ' ce gawm ' euc ' meuh a neumneum seun ' ku ' Peucawo ' lah ' Eun ri uin ' ri suip Eun ri cu peue suip leukah ' ri na ' eun na ' .²³ Eun lah ' , "Keue ' , kon ' hk'ih ' plot ' lon ti peue na ' kaw eun nyhel ' . Eun na ' keut ' kon ' me ti peue. Peue kaw lah ' Eun muis I ' - manuela ' . " † (Vangdoh ' ka na ' a lah ' , "Peucawo ' ut ' Eun mae ' e ' .")

²⁴ Yam Yo ' saep hk'awn ' eun hk'ai ' it ' ri na ' , eun ku hot ' ri yeuh seun ' ku ' in ' hpom Eun Peucawo ' na ' tuil ' eun leukah ' ri heun na ' . Eun ti Mari ' eun meuh beun ' ri .²⁵ Daecti eun hkuin ' nang it ' mae ' heun cu yam Kon ' me awn ' un ' nang keut ' Eun na ' . Kon ' me awn ' na ' Eun tawl ' keut ' , Yo ' saep eun ghuk ' Eun muis Yesu ' .

Peue kue ' cu ' yi na ' ing ' ce ri kon ' nyom aet ' Yesu ' Eun

2 Hawc ' ka yam Yesu ' keut ' Eun nang yung ' Baelae- haem kuing ' Yu ' da hk'a ' naee cu eun hkun ' haw ' hkam ' Herot ' na ' , a kue ' peue kue ' cu ' yi ce kuh ' neum hk'a ' lih seunyi na ' ce heul ' rot nang veng Yeru ' salaem na ' .² Ce mhaing ' , "Kon ' nyom aet ' keut ' Eun kaw meuh Hkun ' haw ' hkam ' ce peue Yu ' da na ' Eun ci ' ut ' tawngnhaw ' ? Yam ut ' ye hk'a ' lih seunyi na ' pun ye ri nyu seumeueng ' Eun na ' . Ye kaw heul ' faee ' Eun ."

³ Yam hkun ' haw ' hkam ' Herot ' mhawng ' eun leukah ' awn ' a na ' , eun hpum ' suksak nyawk ' . Saec ' meuh peue veng Yeru ' salaem na ' ce gawm ' euc ' ce ku pa ' ri hpum ' suksak mae ' heun yeut .⁴ Cawo ' Herot ' eun klawng ro ' ce peue jhawp ' rit keuting ce peue Yu ' da mae ' ro ' ce peue guil leukah ' ritroe ce na ' ce hk'om . Eun mhaing ' ce , "Mesi ' ya † Eun ci ' kaw keut ' tawngnhaw ' ?" ⁵ Ce top ' a ri heun , "Kaw Eun keut ' nang yung ' Baelae- haem kuing ' Yu ' da na ' , kopti peue suip leukah ' Eun Peucawo ' na ' tem ' eun ri uin ' a yeuhki ' ,

⁶ 'Yung ' Baelae- haem ut ' nang kuing ' Yu ' dah na ' mi , hpaw mi ca ' kaw aet ' hk'ai ' peue hk'a ' naee vang u ' peung ce kuing ' Yu ' da na ' ,

kopti Cawo ' u ' peung ti peue na ' kaw Eun pucti lih hk'a ' naee mi .

Eun kaw meuh nang teuk ' va peue ceu Ui ' I ' sarela ' na ' ce seun ' cawo ' go ' kon ' yung ' na ' teuk ' va eun kon ' yung ' ri na ' ko ' . " †

† "Yesu " na ' meuh a leukah ' Helasa ' , a ing ' neum leukah ' Hebrae ' lah ' ri meuh "Yaw ' su " na ' , vangdoh ' ka na ' a meuh "Peucawo ' Cawo ' htut . " †† I ' saya ' 7:14 † A ' ko ' Hkrit †† Mi ' hka 5:2

⁷ Hawc ' ko ' , cawo ' Herot ' eun klawng geup ' peue kue ' cu ' yi na ' ce ing ' ri ti . Eun mhaing ' ce ri yam seumeueng ' na ' puc a ri lih meulamlam ri na ' .⁸ Hawc ' ko ' , eun kah ce heul ' nang yung ' Baelae- haem na ' . Eun tuil ' leukah ' lah ' a ri ce , "Heul ' sok ri nom ' nawk kon ' nyom aet ' awn ' Eun reu ' . Hawc ' pun pe ' ri nyu Eun na ' , saec ' ui ' ri punta kaw ui ' heul ' faee ' Eun na ' , pe ' na ' tang ing ' lah ' ui ' mhawng ' a awh ."

⁹ Hawc ' pun ce ri mhawng ' leukah ' tuil ' eun hkun ' haw ' hkam ' na ' , ce tang suip hk'a ' ri na ' heul ' . Seumeueng ' pun ce ri nyu neum hk'a ' lih seunyi na ' a va ce heul ' rot ti heul ' kuit ' a ring hk'a ' pang vang ut ' Eun kon ' nyom na ' .¹⁰ Yam pun ce ri nyu seumeueng ' na ' , ce ren ' kawm nyawk ' .¹¹ Yam ing ' lec ce hk'a ' naee nya na ' , ce pun ri nyu kon ' nyom na ' Eun mae ' ma Eun Mari ' ka . Ce nghup ' ri faee ' Eun . Ce tuh ' a ' up ' ka lapsawng ' ri na ' , ce tan a ri Heun . Lapsawng ' na ' a meuh hk'il ' , Law ' ban † mae ' Mu ' ra †† .¹² Yam pun ce leukah ' tuil ' sati un ' kah ce ing ' hk'eup ' cawo ' Herot ' eun hk'a ' - naee vang it ' ce ri leumu na ' , ce ing ' hk'a ' tawk seubu ri kuing ' ri na ' .

Hk'uih heul ' nang kuing ' E ' ji ' tu '

¹³ Hawc ' ka yam peue kue ' cu ' yi na ' keutah ce ing ' na ' , in ' hpom Eun Peucawo ' ti peue eun pucti lih tuil ' leukah ' ri Yo ' saep eun hk'a ' naee vang it ' eun ri leumu na ' . Eun lah ' , "Kuh ' reu ' , va kon ' nyom na ' Eun mae ' ma Eun ka hk'uih heul ' nang kuing ' E ' ji ' tu ' na ' reu ' . Ut ' teh ' rot ti yam na ' ui ' tang lah ' a ri mi . Kopti cawo ' Herot ' buih sok eun ri kaw toh kon ' nyom na ' Eun ."

¹⁴ Bul awn ' na , Yo ' saep eun kuh ' va kon ' nyom na ' Eun mae ' ma Eun ka heul ' nang kuing ' E ' ji ' tu ' na ' .¹⁵ Ce ut ' teh ' rot ti cawo ' Herot ' yeum eun . Aen ' a meuh neumneum htonnuk hot ' seun ' ku ' Peucawo ' lah ' Eun ri uin ' ri suip Eun ri cu peue suip leukah ' ri na ' eun . Eun lah ' , "Klawng Ui ' kon ' me ri na ' Eun pucti heul ' hk'ai ' kuing ' E ' ji ' tu ' na ' hawc ' . " ††

Cawo ' Herot ' toh eun kon ' nyom na ' ce

¹⁶ Yam cawo ' Herot ' yawng eun peue kue ' cu ' yi na ' chi ' lai ce ri na ' , eun seungeueng ' nyawk ' . Eun tuil ' leukah ' kah peue suik ' ri na ' ce heul ' toh kon ' nyom me ku ' a ' yu lal ' neum lih hk'a ' col nang yung ' Baelae- haem na ' mae ' yung ' keunam caonao ' na ' ce gawm ' euc ' . Kopti hkawp ' § sawn ' eun ku ' lah ' ce peue kue ' cu ' yi na ' a cawp ' yam awn ' a na ' .¹⁷ Aen ' a meuh

‡‡ Ten tu ' hom ' muis Law ' ban ††† Hku ' puis hom ' muis Mu ' ra ††† Ho ' se 11:1 § A ' ko ' mhin '

neumneum htonnuk hot ' seun ' ku ' Yerami ' peue suip leukah ' Eun Peucawo ' na ' lah ' eun,

¹⁸ "Pun ri mhawng ' seng ' hk'a ' naee yung ' Ramah.

A meuh seng ' ta ' ul ' aec ' rak yam.

Rahkela ' tuk ka ri kon ' ri na ' ce, ka yam.

Kopti un ' laee kue ' ka kon ' na ' ,

a ' nhaw ' hkuin ' cang cop ' ka hpum ' sam ' ran." †

Tang ing ' kuing ' I ' sarela '

¹⁹ Hawc ' ka cawo ' Herot ' yeum eun na ' , in ' hpom Eun Peucawo ' ti peue eun pucti lih ri Yo ' saep eun hk'a ' naee vang it ' eun ri leumu nang kuing ' E ' ji ' tu ' na ' . ²⁰ Eun lah ' , "Kuh ' reu ' , va kon ' nyom na ' Eun mae ' ma Eun ka tang ing ' kuing ' I ' sarela ' na ' reu ' . Kopti cawo ' Herot ' eun mae ' peue co ' ca ' ri kaw toh kon ' nyom na ' yeum ce hawc ' ."

²¹ Kop awn ' na, Yo ' saep eun yuk ri va kon ' nyom na ' Eun mae ' ma Eun ka tang ing ' nang kuing ' I ' sarela ' na ' . ²² Daecti yam Yo ' saep pun eun ri mhawng ' Ahke-laas ' tang u ' peung eun kuing ' Yu ' da na ' tang ' kuing ' ri cawo ' Herot ' eun na ' , eun lhat ' . Eun un ' hat ' ri ing ' teh ' . Yam pun eun ri mhawng ' leukah ' tuil ' sati hk'a ' -naee it ' eun ri leumu na ' , eun tang ing ' nang kuing ' Galilae ' na ' . ²³ Eun ing ' ut ' nang veng Nasaraet ' . Aen ' a meuh neumneum htonnuk hot ' seun ' ku ' Peucawo ' lah ' Eun ri uin ' ri suip Eun ri cu peue suip leukah ' ri na ' eun. A lah ' , "Kaw peue klawng Eun meuh peue veng Nasaraet ' ."

Yo ' han cawo ' tuil ' hk'a ' cum ' mhe ' eun hk'a '

3 Hk'a ' naee yam awn ' na, Yo ' han cawo ' tuil ' hk'a ' cum ' eun ing ' sangsawn ' leukah ' mun ' ren ' kaw na ' nang vang hk'oh ' hk'oeng ' nang kuing ' Yu ' da na ' .

² Eun lah ' , "Kopti kuing ' pang mao ' na ' kaw a hk'aws ' rot hawc ' na ' , taws ' hpum ' fuin map ' ri na ' reu ' ."

³ Yo ' han aen ' meuh eun ku ' I ' saya ' peue suip leukah ' Eun Peucawo ' na ' lah ' eun a rot ri heun na ' eun. Eun lah ' ,

"Seng ' eun peue ti peue na ' ta ' ul ' eun ri lah ' a vang hk'oh ' hk'oeng ' na ' . Eun lah ' ,

'Mhe ' hk'a ' pun Peucawo ' Eun reu ' .

Pleng ' hk'a ' Eun na ' seumeu ' reu ' .'" †

⁴ Hk'o eun Yo ' han na ' meuh a huik ' kalaok ' a pleng ' ri. Eun mawt nyawng ri na ' ri sae ' caet ' hak ' . Ku ' hk'a eun na ' a meuh a 'htul mae ' leum ' cing ' peuyhel ' ut ' nang hk'i na ' . ⁵ Peue veng Yeru ' salaem, peue kuing ' Yu ' da ku duih ' mae ' peue ut ' keunam caonao ' ka

klong ' Yaw ' dan ku duih ' na ' ce pucti ing ' taws ' hpum ' fuin map ' ri na ' ri Yo ' han eun. ⁶ Yam sawng ' -sawng ' hawc ' ce taws ' hpum ' fuin map ' ri na ' gawm ' euc ' na ' , Yo ' han eun tuil ' hk'a ' cum ' na ' ri ce nang klong ' Yaw ' dan na ' .

⁷ Daecti yam Yo ' han nyu eun peue Hparisae ' mae ' peue Sadu ' kae ' heun ' peue na ' ing ' ce vang tuil ' eun hk'a ' cum ' na ' , eun lah ' a ri ce, "Kon ' hk'i ka seueueng ' sa ' hao ' na ' pe ' , a ' nhaw ' ci ' tuil ' sati kah pe ' hk'uih hk'ai ' hk'a ' seungeueng ' Eun Peucawo ' na ' ?" ⁸ Punta kaw a meuh sa ' hki ' ka taws ' pe ' hpum ' fuin pe ' map ' ri hawc ' na ' , yeuh ku ' chak ' na ' reu ' . ⁹ Pawlaee han ' mae ' Abraham meuh eun kuing ' pe ' nang hpum ' ri. Kaw ui ' lah ' a ri pe ' , Peucawo ' kaw Eun cang pleng ' seumu aen ' ce meuh kon ' hk'i eun Abraham yeut. ¹⁰ Maet ' -maen ' , mue ' na ' uin ' a ri keunam kleum ' hku ' na ' hawc ' . Kleum ' un ' pli ' ku ' chak ' na ' ku kleum ' ka, kah ri gawl ri tec a, dum a hk'a ' naee ngawl.

¹¹ Tuil ' ui ' hk'a ' cum ' na ' ri pe ' ri leuum ' na ' a meuh sa ' hki ' ka taws ' pe ' hpum ' fuin pe ' map ' ri na ' . Daecti ku ' kaw ing ' hot ' ui ' na ' kue ' Eun ti ' ca keuting hk'ai ' ui ' . Pal yawo kaw ui ' un ' kuing ' ri jang ' jhaep ' Eun na ' . Eun kaw tuil ' hk'a ' cum ' na ' ri pe ' ri Cit ' seunga ' chak ' na ' mae ' ri ngawl na ' . ¹² Eun jhawp ' yai ' yuip. Eun kaw yuip ri tec vang cap ' ngho ' ri na ' hk'el ' seunga ' . Hawc ' Eun hk'on ' ro ngho ' ri na ' , Eun na ' peus ri uin ' a nang htuim ' . Daecti dep ' ngho ' na ' Eun kaw dum a hk'a ' naee ngawl un ' cang laic na ' ."

Yesu ' rap Eun ri ti hk'a ' cum '

¹³ Hawc ' ko ' , punta Yesu ' kaw Eun rap ri ti hk'a ' cum ' na ' ri Yo ' han eun na ' , Eun ing ' neum kuing ' Galilae ' ing ' ri klong ' Yaw ' dan na ' . ¹⁴ Daecti Yo ' han eun hk'o ' hk'ang ham ' Eun lah ' , "Htuk ' ui ' ri rap ri ti hk'a ' cum ' na ' ri Mi, Mi vae ' ing ' ri ui ' , tup na ' a kuing ' aw?"

¹⁵ Yesu ' Eun top ' a ri heun, "Maet ' maen ' , hk'o ' mi yeuh a ri Ui ' reu ' . Kopti htuk ' e ' ri yeuh ku ' Peucawo ' sum ' kah Eun e ' yeuh na ' ce ku ceu ka." Hawc ' ko ' , Yo ' han eun ku sahpaw ' ri tuil ' hk'a ' cum ' na ' ri Heun.

¹⁶ Yam Yesu ' hawc ' Eun rap ri ti hk'a ' cum ' na ' Eun keulawn ' pucti hk'ai ' leuum ' na ' , kuing ' pang mao ' na ' a dah ' . Hawc ' ko ' , Eun pun ri nyu Cit ' seunga ' Eun Peucawo ' na ' seun ' a gui ' na ' a lih ut ' mae ' Heun.

¹⁷ Seng ' na ' a laws ' lih neum kuing ' pang mao ' . A lah ' , "Hkaen ' meuh Eun Kon ' me leumeus ' Ui ' . Eun hit ' ri hpum ' Ui ' nyawk ' ."

† Yerami ' 31:15 †† I ' saya ' 40:3

Yesu ' pun Eun ri hkam ' hk'a ' cop ' long

4 Hawc ' awn ' na, punta Yesu ' kaw Eun pun ri hkam ' hk'a ' cop ' long ka seuca ' rai na ' , Cit ' seunga ' na ' a va Eun heul ' nang vang hk'oh ' hk'oeng ' na ' .² Hawc ' ka eut ' Eun ku ' hk'a ri na ' pun pun ' kul ' sum ' pun ' kul ' seunyi na ' , Eun heul ' sum ' som ' .³ Hawc ' ko ' , cawo ' cop ' long na ' a ing ' lah ' a ri Heun, "Mi lawn meuh Kon ' ai ' Eun Peucawo ' ko ' , tuil ' leukah ' Mi ri seumu aen ' ce kah a meuh ku ' hk'a reu ' ."

⁴ Yesu ' Eun top ' a, "Nang htawm Seunga ' na ' tem ' a ri yeuhki ' , 'Peue un ' a ' yu im ' peue ri ku ' hk'a na ' palkoe, daecti a ' yu im ' peue ri leukah ' lih neum moeng Eun Peucawo ' na ' ku moeng ka.'[†]"

⁵ Hawc ' ko ' , seuca ' rai na ' a tang va Eun huk ' nang veng Yeru ' salaem veng seunga ' chak ' na ' . A kah Eun cawng pang seubul ka nya hk'o ' mun ' keuting na ' .⁶ A lah ' a ri Heun, "Mi lawn meuh Kon ' ai ' Eun Peucawo ' ko ' , yawt ' Mi hk'ui ' reu ' . Kopti nang htawm Seunga ' na ' tem ' a ri yeuhki ' , 'Peucawo ' kaw Eun tuil ' leukah ' ri in ' hpom ri na ' ce, kah ce rokxa ' Mi.

Punta cung Mi na ' kaw a un ' cang pen seumu na ' , in ' hpom na ' ce kaw ko ' ri cem Mi.'^{††}"

⁷ Yesu ' Eun top ' a, "Nang htawm Seunga ' na ' a ku tem ' ri yeuhki ' , 'Pawlaee long Cawo ' Peucawo ' mi na ' Eun.'[‡]"

⁸ Hawc ' ko ' , seuca ' rai na ' a tang va Eun huk ' pang gong lung ' nyawk ' na ' . A tuil ' Eun nawk kuing ' ut ' nang lok na ' gawm ' euc ' mae ' munhpung ' hkuru ka na ' gawm ' euc ' .⁹ A lah ' , "Mi lawn seukluin ri faee ' ui ' ko ' , kaw ui ' tuil ' Mi is ' ceu nang aen ' ce gawm ' euc ' ."

¹⁰ Yesu ' Eun lah ' , "Satan, hk'uih hk'ai ' Ui ' reu ' . Kopti nang htawm Seunga ' na ' tem ' a ri yeuhki ' , 'Kaw mi kah ri faee ' Cawo ' Peucawo ' ri na ' Eun, yeuh mhai ' Eun na ' palkoe.'^{‡†}"

¹¹ Hawc ' ko ' , seuca ' rai na ' a pucti heul ' hk'ai ' Heun. In ' hpom na ' ce lih yeuh mhai ' Eun.

Yesu ' tang ' Eun ri sangsawn '

¹² Yam Yesu ' mhawng ' Eun lawng hk'awng ' peue Yo ' han eun nang htawng ' na ' , Eun do ri heul ' nang kuing ' Galilae ' na ' .¹³ Eun do ri heul ' hk'ai ' veng Nasaraet ' na ' Eun heul ' ut ' nang veng Kapeni ' um na ' . A meuh veng ut ' keunam glu Galilae ' ut ' hk'a ' naee kuing ' ka Yebulun mae ' kuing ' Natali ' na ' .¹⁴ Aen ' a meuh punta kaw a meuh hot ' seun ' ku ' Peucawo ' lah '

[†] Sawn ' leukah ' mun ' 8:3^{††} Suk ' seun ' 9:11, 12[‡] Sawn ' leukah ' mun ' 6:16^{‡†} Sawn ' leukah ' mun ' 6:13

Eun ri uin ' ri suip Eun ri cu I ' saya ' peue suip leukah ' ri na ' eun. A lah ' ,

¹⁵ "Kuing ' Yebulun na ' mae ' kuing ' Natali ' na ' meuh a hk'a ' hot ' keunam klong ' Yaw ' dan

heul ' ri mha ' seumut '

a meuh kuing ' Galilae ' ce peue un ' meuh peue ceu Yu ' da,

¹⁶ ce meuh peue ut ' vang duim ' lawng na ' , ce pun ri nyu ku ' ceng ' keuting nyawk ' na ' hawc ' .

Peue ut ' hk'a ' ruim rum ka hk'a ' yeum na '

ku ' ceng ' na ' til ' ka rot ri ce hawc ' ."[‡]

¹⁷ Tang ' neum yam awn ' na, Yesu ' Eun tang ' ri sangsawn ' leukah ' mun ' ren ' kaw na ' . Eun lah ' , "Kopti kuing ' pang mao ' na ' kaw a hk'aws ' rot hawc ' na ' , taws ' hpum ' fuin map ' ri na ' reu ' ."

Yesu ' la Eun ri klawng peue pun ' peue na ' ce meuh tapae ' ri

¹⁸ Yam Yesu ' buih heul ' Eun keunam ka glu Galilae ' na ' , Eun nyu peue sok ka ' lal ' peue na ' ka. A meuh Si ' - mon ku ' klawng peue eun muis Petru ' na ' mae ' Andre awng ' eun na ' eun. Ka buih ploe ' reup ri na ' nang glu na ' .¹⁹ Yesu ' Eun lah ' a ri ka, "Hot ' Ui ' reu ' . Kaw Ui ' tuil ' pa ' meuh peue sok peue seun ' sok pa ' ka ' na ' ko ' ."²⁰ Ka keulawn ' tec reup ri na ' , ka hot ' Eun heul ' .

²¹ Yam Yesu ' tang suip Eun hk'a ' ri na ' heul ' na ' , Eun nyu awng ' ec ' seubu lal ' peue na ' ka. A meuh Yakop ' meuh kon ' me eun Yebedae ' mae ' Yo ' han awng ' eun na ' eun. Ka buih leuplu reup ri na ' nang reu na ' mae ' Yebedae ' kuiing ' ka na ' eun. Yesu ' Eun klawng ri ti ka.²² Ka keulawn ' tec reu ri na ' mae ' kuiing ' ri na ' eun, ka hot ' Yesu ' Eun heul ' .

Yesu ' bai ' Eun peue peuyhat na ' ce cuin

²³ Yesu ' Eun heul ' nang kuing ' Galilae ' na ' hk'awp ' . Eun sangsawn ' nang sa ' la vang hk'o ' mun ' ce na ' . Eun sangsawn ' leukah ' mun ' ren ' kaw lawng kuing ' Eun Peucawo ' na ' . Eun bai ' peuyhat ku ceu ce peue na ' cuin.²⁴ Lawng Eun na ' a laws ' heul ' nang kuing ' Su ' ri ' na ' hk'awp ' . Peue va peue peuyhat heun ' ceu na ' ce ing ' tuil ' Eun bai ' ce. Peue peuyhat aen ' ce meuh peue peuyhat sui ' heun ' ceu, peue seuca ' lec, peue kue ' peuyhat lom mae ' peue ti ' cung yeum na ' ce. Eun bai ' ce cuin gawm ' euc ' .²⁵ Peue cum heun ' ing ' neum kuing ' Galilae ' , kuing ' Dekapo ' lis ' , veng Yeru ' salaem, kuing ' Yu ' da mae ' peue ut ' hk'a ' teh ' ka klong ' Yaw ' dan na ' ce ing ' hot ' Yesu ' Eun heul ' .

^{‡‡} I ' saya ' 9:1-2

Yesu ' sangsawn ' Eun leukah ' mun ' pang puim '

5 Yam Yesu ' nyu Eun peue cum heun ' na ' ce, Eun huk ' pang puim ' na ' Eun mok '. Tapae ' Eun na ' ce ing ' ri Heun. ² Eun tang ' ri sangsawn ' ce. Eun lah ' ,

³ "Peue yawng un ' papuing ri Peucawo ' Eun a un ' pun na ' kaw ce pun mun ' ,

kopti kuing ' pang mao ' na ' meuh ka is ' ce.

⁴ Peue kuit nyhap ' kuit yak na ' kaw ce pun mun ' ,

kopti kaw ce pun ri rap ri ti hk'a ' kuit nyawk ' kuit sam ' ran cumyen ' na ' .

⁵ Peue kue ' hpum ' nyom ' jom tem na ' kaw ce pun mun ' ,

kopti kaw ce pun ri rap ri ti bhen ' keute ' na ' meuh a sin ' ce.

⁶ Peue sum ' is ' hk'a ' leupaws seumeu ' na ' kaw ce pun mun ' ,

kopti kaw ce pun ri is ' seun ' ku ' sum ' is ' ce na ' .

⁷ Peue cang tukyak ri peue na ' kaw ce pun mun ' ,

kopti kaw ce tang pun ri rap ri ti hk'a ' tukyak ri ce na ' .

⁸ Peue hpum ' seunga ' chak ' na ' kaw ce pun mun ' ,

kopti kaw ce pun ri nyu Peucawo ' Eun.

⁹ Peue yeuh hk'a ' htuk ' lung ri puri na ' kaw ce pun mun ' ,

kopti kaw ce pun hk'a ' klawng ri meuh kon ' Eun Peucawo ' na ' .

¹⁰ Peue pun ri hkam ' hk'a ' keunhap ' nokneh kopti meuh a hk'a ' leupaws seumeu ' na ' kaw ce pun mun ' ,

kopti kuing ' pang mao ' na ' meuh a is ' ce hawc ' .

¹¹ Yam yeuh peue ku ' un ' nawpsang, keunhap ' nokneh pe ' mae ' lah ' lawng ku ' un ' kue ' un ' meuh na ' ri pe ' kopti meuh a Ui ' ri na ' , kaw pe ' pun mun ' .

¹² Ren ' kawn kuit nyawk ' kuit sam ' ran reu ' , kopti lap-sawng ' keuting na ' kue ' a pun pe ' nang kuing ' pang mao ' na ' . Peue suip leukah ' Eun Peucawo ' ku ' pucti nanggal ' pe ' na ' ce ku pun ri hkam ' hk'a ' keunhap ' nokneh na ' yeut.

Cis ka bhen ' keute '

¹³ Meuh pe ' cis ka bhen ' keute ' na ' . Daecti eum ' ka na ' a lawn cuit ' ko ' , a ci ' kaw cang yeuh ri eum ' bae yeuh sa ' nhaw ' ? A hkuin ' kaw laee kue ' mun ' , a na ' pun ri bah ri tec ri, peue na ' jap ' buin yawo a.

Ku ' ceng ' ka bhen ' keute '

¹⁴ Meuh pe ' ku ' ceng ' ka bhen ' keute ' na ' . Veng tang ' ri pang gong na ' a hkuin ' cang mo ' ri geup ' . ¹⁵ Se-un ' awn ' na, a ' nhaw ' hkuin ' duing tok ' kaw ' ngawl

kuip a ri teng ' saec ' ti peue. Daecti punta kaw a til ' ceng ' ri peue nya na ' ce ku peue na ' , po a pang hpa ' rang na ' . ¹⁶ Seun ' awn ' na, punta peue gawm ' euc ' na ' kaw peue nyu ku ' chak ' yeuh pe ' na ' mae ' kaw peue suk ' seun ' Kuing ' pe ' Cawo ' ut ' nang kuing ' pang mao ' na ' Eun, yeuh ku ' ceng ' pe ' na ' ceng ' nanggal ' peue reu ' .

Leukah ' ritroe

¹⁷ Pawlaee hteum ' Ui ' lih yeuh leukah ' ritroe na ' mae ' leukah ' ce peue suip leukah ' Eun Peucawo ' na ' lu. Hpaw Ui ' ca ' lih yeuh a lu, daecti lih yeuh Ui ' a hton-nuk. ¹⁸ Ui ' lah ' a ri pe ' neumneum, cu yam bhen ' keute ' mae ' mao ' na ' un ' nang lulaic ka heul ' na ' , rot ti yam ku ceu gawm ' euc ' na ' pun a ri hton-nuk hawc ' na ' , tu ' htawm aet ' , a ' ko ' vang mhai ' aet ' ka na ' a hkuin ' kaw rai ' saec ' ti tu ' . ¹⁹ Kop awn ' na, a ' nhaw ' lawn un ' ti a ' ye ' ka leukah ' ritroe vang a ' ye ' aet ' ka hk'ai ' peue na ' seucen, mae ' eun ku sangsawn ' peue yeuh seun ' ku ' yeuh ti na ' ko ' , eun kaw pun hk'a ' sawn ' ri meuh peue aet ' hk'ai ' peue hk'a ' naee kuing ' pang mao ' na ' . Daecti a ' nhaw ' lawn hot ' ri yeuh leukah ' ritroe na ' mae ' sangsawn ' hot ' a ko ' , eun kaw pun hk'a ' sawn ' ri meuh peue keuting hk'a ' naee kuing ' pang mao ' na ' . ²⁰ Kopti Ui ' lah ' a ri pe ' , ' Pe ' lawn un ' kue ' hk'a ' leupaws seumeu ' na ' heun ' hk'ai ' peue Hparisae ' mae ' peue guil leukah ' ritroe na ' ce ko ' , pe ' hkuin ' kaw pun ri lec hk'a ' naee kuing ' pang mao ' na ' neumneum. '

Hk'a ' seungeueng '

²¹ Pun pe ' ri mhawng ' leukah ' lah ' ri ri peue leumah ' na ' ce hawc ' . A lah ' , ' Pawlaee toh peue. † A ' nhaw ' lawn toh peue ko ' , eun kaw pun ri hkam ' hk'a ' taws ' a ' mu na ' . ' ²² Daecti Ui ' lah ' a ri pe ' , ' A ' nhaw ' lawn se-ungeueng ' ri ec ' awng ' ri na ' eun ko ' , eun kaw pun ri hkam ' hk'a ' taws ' a ' mu na ' . A ' nhaw ' lawn tang ' ec ' awng ' ri na ' eun tem ko ' , eun kaw pun ri hkam ' hk'a ' taws ' a ' mu na ' nanggal ' ce muk peue taws ' a ' mu na ' . A ' nhaw ' lawn lah ' ec ' awng ' ri na ' eun meuh peue nga ' ko ' , eun kaw pun ri hkam ' hk'a ' naee ngawl ka keutong ' nyarok na ' . '

²³ Kop awn ' na, yam buih tan pe ' ku ' tan vang dum ri tan ku ' tan na ' pe ' lawn kuit rot ri ec ' awng ' ri na ' se-ungeueng ' ce ri ti kop ku ' ti ri ceu na ' ko ' , ²⁴ puing uin ' ku ' tang pe ' na ' nanggal ' ka vang dum ri tan na ' pe ' na ' puing ing ' yeuh ri htuk ' lung ec ' awng ' ri na ' ce. Hawc ' ko ' , pe ' na ' koe huk ' tan ku ' tan ri na ' reu ' .

† Pucti heul ' 20:13

²⁵ Yam ku ' tang ' a ' mu ri pe ' na ' buih va eun pe ' heul ' ri vang taws ' a ' mu na ' , co ' ca ' ri yeuh ri htuk ' lung eun lang ' hk'a ' na ' vaeavae reu ' . A lawn un ' yeuh keutit ' ko ' , kaw eun ap pe ' ri cawo ' taws ' a ' mu na ' eun . Cawo ' taws ' a ' mu na ' eun kaw ap pe ' ri cawo ' htawng ' na ' eun . Cawo ' htawng ' na ' eun kaw seue ' pe ' hk'a ' naee htawng ' na ' . ²⁶ Ui ' lah ' a ri pe ' neumneum , ' Pe ' lawn un ' nang sai ' ku ' ma ri na ' euc ' hklel ' ko ' , pe ' hkuin ' kaw nang cang pun ri pucti lih hk'ai ' htawng ' na ' .

Hk'a ' len ' cu

²⁷ Leukah ' lah ' , ' Pawlaee len ' cu ' , † na ' pun pe ' ri mhawng ' a hawc ' . ²⁸ Daecti Ui ' lah ' a ri pe ' , ' A ' nhaw ' lawn keue ' ri beun ' na ' eun mae ' kue ' ri hpum ' hkuit ' nawng ' tang ' na ' ko ' , hkawn ' len ' cu eun mae ' beun ' awn ' eun hk'a ' naee hpum ' ri na ' hawc ' .

²⁹ Ngai ' a ' tawm ' mi na ' a lawn yeuh mi yeuh map ' na ' ko ' , koc ri tec a reu ' . Mi saec ' na ' sum hk'eung ka tu ' ri na ' ti ceu ko ' , a na ' jaen chak ' hk'ai ' pun mi ri lec nang keutong ' nyarok na ' gawm ' tu ' ri na ' . ³⁰ Seun ' awn ' na , ti ' a ' tawm ' mi na ' a lawn yeuh mi yeuh map ' na ' ko ' , reng ' ri tec a reu ' . Mi saec ' na ' sum hk'eung ka tu ' ri na ' ti ceu ko ' , a na ' jaen chak ' hk'ai ' pun mi ri lec nang keutong ' nyarok na ' gawm ' tu ' ri na ' .

Hk'a ' tec puri

³¹ Kue ' a leukah ' lah ' ri yeuhki ' , ' A ' nhaw ' lawn tec beun ' ri na ' eun ko ' , eun kaw kah ri tem ' ri tuil ' licmat tec puri na ' ri beun ' ri na ' eun . ^{†32} Daecti Ui ' lah ' a ri pe ' , ' Pon hk'ai ' meuh a kopti len ' cu na ' a ' nhaw ' lawn tec beun ' ri na ' eun ko ' , hkawn ' yeuh eun beun ' ri na ' eun meuh peue len ' cu . A ' nhaw ' lawn tang ti ri is ' beun ' awn ' eun ko ' , hkawn ' eun ku meuh peue len ' cu yeut .

Leukah ' hkam '

³³ Pun pe ' ri mhawng ' leukah ' lah ' ri ri peue leumah ' na ' ce hawc ' . A lah ' , ' Pawlaee va leukah ' hkam ' pe ' na ' lho ' lhe ' , daecti hot ' ri yeuh a hot ' seun ' leukah ' hkam ' mi ri Peucawo ' Eun na ' reu ' . ³⁴ Daecti Ui ' lah ' a ri pe ' , ' Pawlaee lah ' leukah ' hkam ' na ' saec ' peunae ' . Pawlaee lah ' leukah ' hkam ' na ' ri cu pe ' kuing ' pang mao ' na ' , kopti kuing ' pang mao ' na ' meuh a vang mok ' Eun Peucawo ' . ³⁵ A ' ko ' , pawlaee lah ' leukah ' hkam ' na ' ri cu pe ' bhen ' keute ' na ' , kopti bhen ' keute ' na ' meuh a vang tang ' cung Eun Peucawo ' .

† Pucti heul ' 20:14 †† Sawn ' leukah ' mun ' 24:1

A ' ko ' , pawlaee lah ' leukah ' hkam ' na ' ri cu pe ' veng Yeru ' salaem na ' , kopti veng Yeru ' salaem na ' meuh a veng Eun Peucawo ' Cawo ' Hkun ' haw ' hkam ' keuting na ' . ³⁶ A ' ko ' , pawlaee lah ' leukah ' hkam ' na ' ri cu pe ' cing ' ri na ' , kopti huik ' pe ' na ' ti nyeng yawo a kaw paing a kaw lawng na ' pe ' hkuin ' cang yeuh a . ³⁷ A meuh neum ko ' , lah ' a " meuh neum " , a un ' meuh ko ' , lah ' a " un ' meuh " . Lah ' a lheu ' aen ' a ko ' , meuh a leukah ' ing ' neum seuca ' rai na ' .

Ngai ' tang ' ngai '

³⁸ Leukah ' lah ' , ' Peue lawn yeuh ngai ' pe ' na ' lu ko ' , tang yeuh is ' peue na ' lu , peue lawn yeuh rang ' pe ' na ' lu ko ' , tang yeuh is ' peue na ' lu ' ‡ , na ' pun pe ' ri mhawng ' a hawc ' . ³⁹ Daecti Ui ' lah ' a ri pe ' , ' Pawlaee to ' tam ' peue rai na ' ce . Peue lawn dah beh a ' tawm ' pe ' na ' ko ' , pe ' ku na ' tang hpawt ' ri tung beh a ' ve ' na ' ri peue reu ' . ⁴⁰ Peue lawn tang ' a ' mu tec ' teng ri ti hk'o hk'a ' naee pe ' na ' ko ' , pe ' ku na ' tang tuil ' hk'o dal ' ri na ' ri peue yeut reu ' . ⁴¹ Peue lawn tec ' teng kah pe ' heul ' tuil ' hk'a ' ri ti lak ' ko ' , heul ' mae ' peue lal ' lak ' reu ' . ⁴² Peue hk'o ' ri pe ' na ' tuil ' ce is ' reu ' . Pawlaee hpawt ' ri hk'uih ri peue sum ' keucan ri pe ' na ' ce .

Leumeus ' ransu

⁴³ Leukah ' lah ' , ' Leumeus ' peue ut ' keunam caonao ' ri na ' ce , ces ri ransu ri na ' ce reu ' †† , na ' pun pe ' ri mhawng ' a hawc ' . ⁴⁴ Daecti Ui ' lah ' a ri pe ' , ' Leumeus ' ransu pe ' na ' ce . Hk'o ' mun ' pun peue keunhap ' nokneh pe ' na ' ce reu ' . ⁴⁵ Punta kaw pe ' meuh kon ' Eun A ' kuiing ' ut ' nang kuing ' pang mao ' na ' Eun . Kopti kah Eun seunyi ri na ' pucti ceng ' til ' pun peue rai mae ' peue chak ' na ' ka gawm ' al ' na ' . Eun ku tuil ' lhe ' na ' pun peue leupaws seumeu ' mae ' peue un ' leupaws seumeu ' na ' ka gawm ' al ' yeut . ⁴⁶ Pe ' lawn leumeus ' yawo peue ku ' hk'o ' ce leumeus ' pe ' na ' ce palkoe ko ' , pe ' ci ' kaw pun lapsawng ' keunhaw ' ? Saec ' meuh peue cep ' hkawn ' na ' ce ku yeuh keutit ' yeut , un ' meuh ka aw ? ⁴⁷ Pe ' lawn yeuh yawo a ' mawo ce ec ' awng ' ri na ' palkoe ko ' , pe ' ci ' chae ' kaw chat peue seubu na ' ce yeuh sa ' nhaw ' ? Saec ' meuh peue un ' meuh peue ceu Yu ' da na ' ce ku yeuh keutit ' yeut , un ' meuh ka aw ? ⁴⁸ Kop awn ' na , seun ' Kuing ' pe ' Cawo ' ut ' nang kuing ' pang mao ' na ' chak ' htonnuk Eun na ' , yeuh pe ' chak ' htonnuk yeut reu ' .

‡ Pucti heul ' 21:24 ; Fae ' 24:20 ; Sawn ' leukah ' mun ' 19:21 †† Fae ' 19:18

Tiptan

6 Uin ' sati ri, yam yeuh pe ' ku ' chak ' na ' pawlaee yeuh a mae ' sum ' kah pe ' peue nyu ri hk'o ' cuin. A lawn un ' yeuh keutit ' ko ', na ' pe ' cang un ' pun lap-sawng ' ri Kuiing ' pe ' Cawo ' ut ' nang kuing ' pang mao ' na ' Eun.

²Kop awn ' na, yam tiptan teum ' kawm pe ' peue hk'o ' - tuckyak na ' ce na ', pe ' na ' pawlaee puing ' pi ' tae ' rae ' nanggal ' ri na ' seun ' peue leukah ' seunga ' hpum ' vok ' na ' yeuh ce nang sa ' la vang hk'o ' mun ' na ' mae ' yeuh ce hot ' hk'a ' na '. Yeuh ce keutit ' na ' a meuh kopti sum ' kah ce peue suk ' seun ' ri. Ui ' lah ' a ri pe ' neumneum, peue awn ' sawng ' pun ce ri rap lap-sawng ' meun ri na ' htonnuk hawc '. ³Daecti yam tiptan teum ' kawm pe ' peue hk'o ' tuckyak na ' ce na ', pawlaee kah ti ' a ' ve ' pe ' na ' yawng ku ' yeuh ka ti ' a ' tawm ' pe ' na '. ⁴Ku ' tiptan pe ' na ' kah a meuh ku ' mo ' ri. Kuiing ' pe ' Cawo ' cang nyu ku ' mo ' ri yeuh na ' kaw Eun tuil ' lapsawng ' na ' ri pe '.

Hk'o ' mun '

⁵Yam hk'o ' pe ' mun ' na ', pawlaee va ri yeuh seun ' ku ' peue leukah ' seunga ' hpum ' vok ' na ' yeuh ce na '. Kopti ren ' ce mae ' cawng ri hk'o ' mun ' nang sa ' la vang hk'o ' mun ' na ' mae ' hot ' gah ' hk'a ' na '. Yeuh ce keutit ' na ' a meuh kopti sum ' kah ce peue nyu ri. Ui ' lah ' a ri pe ' neumneum, peue awn ' sawng ' pun ce ri rap lapsawng ' meun ri na ' htonnuk hawc '. ⁶Yam hk'o ' pe ' mun ' na ', lec hk'a ' naee hkawng pe ' na ', sawng ' leu-va ' ka. Hawc ' ko ', hk'o ' mun ' ri Kuiing ' pe ' Cawo ' peue un ' cang nyu peue na ' Eun reu '. Kuiing ' pe ' Cawo ' cang nyu ku ' mo ' ri yeuh na ' kaw Eun tuil ' lapsawng ' na ' ri pe '. ⁷Yam hk'o ' pe ' mun ' na ', pawlaee gawm lah ' ku ' lah ' pe ' hawc ' na ' seun ' ku ' peue un ' meuh peue ceu Yu ' da na ' yeuh ce na '. Yeuh ce keutit ' na ' meuh a kopti hteum ' ce lah ' leukah ' na ' heun ' he-un ' na ' peucawo ' ce na ' eun na ' kawn ' leuceng a. ⁸Pawlaee yeuh seun ' ce ri, kopti Peucawo ' yawng Eun ku ' lo ' pe ' na ' tang ' neum yam kaw pe ' hk'o ' ri Heun na ' hawc '.

⁹Kop awn ' na, htuk ' pe ' ri hk'o ' mun ' yeuhki ', 'Kuiing ' ye ut ' nang kuing ' pang mao ' na ' Mi, kah muis Mi na ' meuh ku ' hkopyawm ' yumyam '.

¹⁰Kah kuing ' Mi na ' lih rot.

Seun ' alo Mi na ' htonnuk a nang kuing ' pang mao ' na ',

kah a htonnuk pang bhen ' keute ' na ' yeut.

¹¹Tuil ' ku ' hk'a lo ' ye na ' ri ye keuyuit.

¹²Seun ' ploe ' ye map ' ce peue yeuh ku ' kleuc ' ri ye na ' ce,

hk'o ' Mi ploe ' map ' ye na ' yeut.

¹³Pawlaee va ye lec hk'a ' naee hk'a ' cop ' long na ', daecti yeuh ye pon hk'ai ' ku ' rai na '.

Kopti kuing ' na ', ti ' ca na ' mae ' munhpung ' na ' meuh a is ' Mi cot ' cu ri. Amin.'

¹⁴Kopti pe ' lawn ploe ' map ' ce peue yeuh ku ' kleuc ' ri pe ' na ' ko ', Kuiing ' pe ' Cawo ' ut ' nang kuing ' pang mao ' na ' Eun ku kaw ploe ' map ' pe ' na ' yeut. ¹⁵Daecti pe ' lawn un ' ploe ' map ' peue na ' ko ', Kuiing ' pe ' na ' Eun ku kaw un ' ploe ' map ' pe ' na ' yeut.

Eut ' ku ' hk'a

¹⁶Yam eut ' pe ' ku ' hk'a ri na ', pawlaee va ri yeuh buh ri na ' mhong ' mhill ' seun ' ku ' peue leukah ' seunga ' hpum ' vok ' na ' yeuh ce na '. Kopti sum ' kah ce peue nyu buih eut ' ce ku ' hk'a ri na ', ce guil ri yeuh buh ri na ' mhong ' mhill '. Ui ' lah ' a ri pe ' neumneum, peue awn ' sawng ' pun ce ri rap lapsawng ' meun ri na ' htonnuk hawc '. ¹⁷Daecti yam eut ' pe ' ku ' hk'a ri na ', hkuc ' buh ri na ', lup huik ' ri na ' ri lamawn reu '. ¹⁸Yeuh keutit ' na ' ko ', a lawn un ' meuh yawo Kuiing ' pe ' Cawo ' un ' cang nyu peue Eun na ', peue hkuin ' kaw ceng ' ri buih eut ' pe ' ku ' hk'a ri. Kuiing ' pe ' Cawo ' cang nyu ku ' mo ' ri yeuh na ' kaw Eun tuil ' lapsawng ' na ' ri pe '.

Hk'on ' ro vahtu ' hk'il ' leumuil ri nang kuing ' pang mao '

¹⁹Pawlaee hk'on ' ro vahtu ' hk'il ' leumuil pun tu ' ri na ' meun pang bhen ' keute ' vang ruiing cang teun ' ka, leuho ' a cang hk'a a na ' mae ' con ' ce cang lec ri ra pun a na '. ²⁰Daecti hk'on ' ro vahtu ' hk'il ' leumuil pun tu ' ri na ' meun nang kuing ' pang mao ' vang ruiing un ' cang teun ' ka, leuho ' a un ' cang hk'a a na ' mae ' con ' ce un ' cang lec ri ra pun a na ' reu '. ²¹Kopti vahtu ' hk'il ' leumuil pe ' na ' a lawn ut ' tawngnhaw ' ko ', hpum ' pe ' na ' a ku kaw ut ' ri ka yeut.

²²Ngai ' na ' meuh a kaw ' ngawl ka jawngkui ' tu ' na '. Ngai ' mi na ' a lawn chak ' ko ', gawm ' jawngkui ' tu ' mi na ' a kaw htonnuk ri ku ' ceng ' na ' yeut. ²³Daecti ngai ' mi na ' a lawn lu ko ', gawm ' jawngkui ' tu ' mi na ' a ku kaw htonnuk ri ku ' duim ' lawng na ' yeut. Ku ' ceng ' hk'a ' naee mi na ' a lawn duim ' lawng ko ', ku ' duim ' lawng na ' a ci ' na ' pe leupeul a ' neng.

²⁴A saec ' meuh a ' nhaw ', eun kaw un ' cang yeuh mhai ' cawo ' lal ' peue. Kopti eun lawn ces ri ku ' ti peue

na' eun ko', eun kaw leumeus' ku' ti peue na' eun. Eun lawn yumyam' ku' ti peue na' eun ko', eun kaw un' nawpsang ku' ti peue na' eun. Pe' kaw un' cang yeuh mhai' ka hk'il' leumuil na' mae' mhai' Eun Peucawo' na' tiduih'.

Pawlaee hki'keung

²⁵ Kop awn' na kaw Ui' lah' a ri pe', pawlaee hki'keung ri ku' hk'a ku' som' kaw pe' hk'a pun a'yu ri na'. Pawlaee hki'keung ri hk'ohk'eung kaw pe' hk'eung pun jawngkui' tu' ri na'. A'yu na' ngos heun' a hk'ai' ku' hk'a na', jawngkui' tu' na' a ngos heun' hk'ai' hk'ohk'eung na', un' meuh ka aw? ²⁶ Keue' ri sim' peul' eo' nang vawo na' reu', a hkuin' jheum', hkuin' vuic, a'ko' a hkuin' hk'on' ro nang htuim'. Daecti A'kuiing' pe' Cawo' ut' nang kuing' pang mao' na' Eun uii' a. Pe' ri, ngos heun' pe' hk'ai' sim' awn' ce, un' meuh ka aw? ²⁷ Hk'a' naee pe', a'nhaw' ci' hki'keung eun cang yeuh a'yu ri na' lang' bae ti nali?

²⁸ A ci' meuh kop keunhaw' pe' vae' hki'keung pun hk'ohk'eung ri na'? Tai lole nang hk'i na' a ci' keuting yeuh sa'nhaw' na' kuit ti nawk a reu'. A hkuin' yeuh kan'. A hkuin' kling' kuii'. ²⁹ Daecti kaw Ui' lah' a ri pe', saec' meuh cawo' Saw' lamon yam hk'eung eun hk'eung hkuru ri na', eun hkuin' nang ngam seun' peutai awn' na saec' ti nok'. ³⁰ Seun' rip a'yu im' seunyaen' a kaw dum ri nang ngawl peunsa' na', Peucawo' yong' Eun a htan' awn' na. Peue kue' hk'a' yum' leng na' pe', Peucawo' kaw Eun un' yong' pe' lheu' awn' a aw? ³¹ Kop awn' na, pawlaee hki'keung ri kaw e' pun ri hk'asom' keunhaw' na', a'ko' kaw e' pun ri cuip' hk'eung keunhaw' na'. ³² Kopti peue un' yawng Peucawo' Eun na' sok ce seun' ceu nang awn' a. A'kuiing' pe' Cawo' ut' nang kuing' pang mao' na' yawng Eun lo' pe' ceu nang awn' ce yeut. ³³ Daecti sok kuing' Eun Peucawo' na' mae' hk'a' leupaws seumeu' Eun na' nanggal' reu'. Hawc' ko', Eun ku kaw tuil' ceu nang awn' ce ri pe' yeut. ³⁴ Kop awn' na pawlaee hki'keung pun peunsa' na', kopti pun peunsa' na' kue' a ri is' ku' hki'keung meun na' hawc'. Ku seunyi na' sawng' kue' a ri is' ku' kuit nyhap' na' meun htonnuk hawc'.

Tang' map' hk'a' pang peue

⁷ Punta Peucawo' kaw Eun un' tang' map' hk'a' pang pe' na', pe' na' pawlaee tang' map' hk'a' pang peue. ² Kopti seun' tang' pe' map' hk'a' pang peue na', Peucawo' Eun ku kaw tang' map' hk'a' pang pe'

seun' awn' a yeut. Pe' lawn tung' a nang keunhaw' ri peue ko', pe' kaw tang pun a nang awn' a.

³ A ci' meuh kop keunhaw', pe' vae' seuluil' hpam' ut' nang ngai' ce ec' awng' ri na', daecti ton hku' ut' nang ngai' pe' na', pe' un' ti a'ye' ka? ⁴ Ton hku' na' a saec' ut' nang ngai' pe' na' laleung, pe' ci' yeuh keunhaw', pe' vae' cang lah' a ri ec' awng' ri na' ce, 'Kaw ui' teum' kawm mi ti ri tec hpam' ut' nang ngai' mi na' ceu?' ⁵ Peue leukah' seunga' hpum' vok' na' pe', ti ri tec ton hku' ut' nang ngai' pe' na' nanggal'. Hawc' ko', pe' na' kawn' cang nyu hpam' ut' nang ngai' ce ec' awng' ri na' meulamlam ri, cang hkaws' ri te a.

⁶ Pawlaee tuil' ku' seunga' chak' na' ri so' na'. Pawlaee nyon ri tuil' seng' seukleu' na' ri lic na'. Gup kaw a chok' chec' buin a. A ku kaw tang hpawt' ri kawk mi.

Hk'o' reu', sok reu', kloh reu'

⁷ Hk'o' reu', kaw mi pun. Sok reu', kaw mi nyu. Kloh leuva' na' reu', kaw a dah' pun mi. ⁸ Kopti peue hk'o' na' ce ku peue kaw ce pun. Peue sok na' ce ku peue kaw ce nyu. Peue kloh leuva' na' ce ku peue a kaw dah' pun ce yeut.

⁹ Hk'a' naee pe' ri, kon' pe' na' eun lawn hk'o' ku' hk'a' ko', kaw pe' tuil' seumu ri heun aw? ¹⁰ A'ko', eun lawn hk'o' ka' ko', kaw pe' tuil' seueueng' ri heun aw? ¹¹ Pe' saec' na' meuh peue rai ko', pe' yawng ri tuil' ku' chak' na' ri kon' ri na' ce yeut. Lheu' awn' na, Kuiing' pe' Cawo' ut' nang kuing' pang mao' na' Eun jaen kaw tuil' ku' chak' lheu' awn' a na' ri peue hk'o' na' ce ku peue ri. ¹² Kop awn' na, yeuh ku' sum' kah pe' peue yeuh ri ti na' ri peue yeut reu'. Aen' meuh a leukah' ritroe na' mae' leukah' sangsawn' ce peue suip leukah' Eun Peucawo' na'.

Leuva' seuep' mae' leuva' vah

¹³ Lec leuva' seuep' na' reu'. Kopti leuva' vah sam' ran ri long na' meuh a hk'a' heul' lec vang lulaic na'. Peue lec leuva' awn' a na' ce kue' heun' nyawk'. ¹⁴ Daecti leuva' hk'a' heul' ri vang a'yu im' na' seuep' ka. Peue sok ri nyu a na' ce leng.

Kleum' ka mae' pli' ka

¹⁵ Uin' sati ri peue guil ri meuh peue suip leukah' Eun Peucawo' na' ce reu'. Hk'a' nok ce na' guil ce ri seun' kon' yung' ko' ing' ri pe', daecti hk'a' naee ce na' ce meuh ruk rai na'. ¹⁶ Ce meuh peue yeuh sa'nhaw' na'

pe' kaw cang yawng a ri kan' ku' yeuh ce na'. Tawn poc' pe' pli' bui ri kleum' kat' na' aw? A' ko', tawn poc' pe' pli' keutuic ri bang' kat' na' yeut aw? ¹⁷Seun' awn' na, kleum' chak' na' pli' a pli' chak' na'. Daecti kleum' un' chak' na' a ku pli' pli' un' chak' na' yeut. ¹⁸Kleum' chak' na' a hkuin' cang pli' pli' un' chak' na'. Kleum' un' chak' na' a ku na' un' cang pli' pli' chak' na' yeut. ¹⁹Kleum' pli' pli' un' chak' ku kleum' na' kaw a pun ri hkam' gawl ri tec ri hk'a' naee ngawl na'. ²⁰Kop awn' na, pe' kaw cang yawng ce ri kan' ku' yeuh ce na'.

²¹Peue klawng Ui' meuh Cawo', Cawo', na' ce ku peue hpaw ce ca' kaw pun ri lec nang kuing' pang mao' na' gawm' euc' ri. Daecti ka meuh yawo pal peue hot' ri yeuh alo Eun Kuing' Ui' Cawo' ut' nang kuing' pang mao' na' kaw ce pun ri lec a. ²²A lawn rot ti yam seunyi taws' a' mu na', peue heun' peue na' ce kaw klawng ri lah' a ri Ui', 'Cawo', Cawo', sangsawn' ye leukah' mun' ren' kawn na' hk'a' naee muis Mi na', ye ku ra ri tec seuca' na' hk'a' naee muis Mi na' mae' ye ku yeuh ku' hk'o' am' keuting heun' ceu na' hk'a' naee muis Mi na', un' meuh ka aw? ²³Yam awn' na, Ui' kaw lah' seumeu' a ri ce, 'Hpaw Ui' ca' yawng pe'. Peue rai na' pe', puc pe' heul' hk'ai' Ui' reu'.

Res nya lal' ceu

²⁴Kop awn' na, peue mhawng' leukah' Ui', leuceng ri hot' ri yeuh a na' ce ku peue ri na' seun' ce peue kue' cu' yi pleng' nya ri pang seumu na'. ²⁵Yam lhe' ka, ba leuum' na' a reng, guil' na' a saec' htuip nya na', daecti kopti res ka nya na' tang' a ri pang seumu na', nya awn' a hkuin' lhu' jah. ²⁶Daecti peue mhawng' leukah' Ui', un' leuceng ri hot' ri yeuh a na' seun' ce peue nga' suisa pleng' nya ri na' nang tak sai na'. ²⁷Yam lhe' ka, ba leuum' na' a reng, guil' na' a htuip nya na', nya awn' a ku lhu' jah heul'. Hk'a' lhu' jah ka awn' a hk'o' lhat' nyawk'.

²⁸Yam Yesu' hawc' Eun lah' ri ceu nang aen' ce na', peue na' ce am' nyawk' ri ku' sangsawn' Eun na'.

²⁹Kopti sangsawn' Eun ce seun' peue kue' ti' ca na' ko', Eun un' seun' peue guil' leukah' ritroe ce na' ce.

Yesu' bai' Eun peue peuyhat naw cuin

8 Yam Yesu' lih Eun neum pang gong na', peue cum heun' na' ce hot' Eun heul'. ²Peue naw ti peue na' eun ing' seukluin ri nanggal' Eun Yesu' na'. Eun hk'o' hk'ang lah', "Cawo', a lawn htuk' hpum' Mi ko', kaw Mi cang yeuh ui' seunga' chak'."

³Yesu' Eun nyat' ti' ri paic' eun. Eun lah', "Htuk' a hpum' Ui' yeut, seunga' chak' reu'." Peuyhat naw eun na' a keulawn' rai'. ⁴Yesu' Eun lah' a ri heun, "Pawlae lah' lawng aen' a ri peue saec' ti peue. Daecti peuyhat mi na' cuin ka hawc' na' punta kaw a meuh sa' hki' ri peue heun' na' ce, heul' tuil' peue jhawp' rit na' ce nyu tu' mi na' mae' heul' tan ku' tan seun' Mo' se tuil' eun ri uin' leukah' to' ri punta kaw yeuh ri seun-ga' chak' na' reu'."

Hk'a' yum' eun po' suik'

⁵Yam Yesu' lec Eun nang veng Kapeni' um na', po' suik' ti peue na' eun ing' hk'o' hk'ang a ri Heun. ⁶Eun lah', "Cawo', mhai' ui' na' ti' cung chuing' eun. Eun it' ti nya. Eun pun ri tukhka nyawk'."

⁷Yesu' Eun lah' a ri heun, "Kaw ui' ing' bai' eun yeut."

⁸Po' suik' na' eun lah' a ri Heun, "Cawo', un' kuing' ui' ri rap ri ti Mi ing' lec nang nya ui' na'. Daecti Mi saec' na' lah' yawo leukah' ti moeng, mhai' ui' na' kaw eun cuin. ⁹Kopti ut' ui' hk'a' ruim peue. Ui' ku kue' peue suik' ut' hk'a' ruim ri yeut. Ui' lawn kah ti peue eun heul' ko', eun ku heul'. Ui' lawn kah ti peue eun ing' ko', eun ku ing'. Ui' lawn kah mhai' ri na' eun yeuh keunhaw' ko', eun ku yeuh a."

¹⁰Yam Yesu' mhawng' Eun leukah' awn' a na', Eun am'. Eun lah' a ri peue cum heun' hot' ri na' ce, "Kaw Ui' lah' a ri pe' neumneum, hpaw Ui' ca' nang duing nyu peue hk'a' naee peue I' sarela' na' kue' ce nang kue' hk'a' yum' heun' nyawk' yeuhko' na' saec' ti peue. ¹¹Ui' lah' a ri pe', 'Peue heun' peue ku' ut' hk'a' lih seunyi na' mae' hk'a' lec seunyi na' kaw ce ing' lec vang ut' a' nhaw' vang ut' nang awn' na' hk'a' naee pawe nang kuing' pang mao' na' mae' Abraham, Yakop', I' cak' ce tiduih'. ¹²Daecti peue I' sarela' na' ce kaw pun ri hkam' nyon ri tec ri vang duim' lawng na'. Teh' na' ce kaw cet rang' ri ta' ul' ri yam."

¹³Hawc' ko', Yesu' Eun lah' a ri po' suik' na' eun, "Ing' ti nya reu'. Kah a meuh seun' yum' mi a na'." Yam awn' na, mhai' eun na' eun keulawn' cuin.

Yesu' bai' Eun peue heun' peue cuin

¹⁴Yam Yesu' lec Eun nang nya eun Petru' na', Eun pun ri nyu a' oe' eun Petru' peuyhat kuc' ha' lok ka. Ka it'.

¹⁵Yesu' Eun paic' ti' ka na', peuyhat kuc' ha' lok ka na' a cuin. Ka kuh'. Hawc' ko', ka nghawm' Yesu' Eun hk'asom'.

¹⁶Yam sumsam ka na', peue va peue seuca' lec heun' peue na' ce ing' ri Yesu' Eun. Yesu' Eun ra ri tec seuca' na' pucti lih ri leukah' ri na'. Eun ku bai' peue peuyhat na' ce cuin ku peue ri. ¹⁷Aen' a meuh punta kaw a meuh neumneum hot' seun' ku' I' saya' peue suip leukah' Eun Peucawo' na' lah' eun a na',
 "Eun peus peuyhat e' na',
 Eun ti ri tec a." †

Hk'a' hot' Yesu' Eun na'

¹⁸Yam Yesu' nyu Eun peue cum heun' na' ut' ce rop ri na', Eun tuil' leukah' lah' ri kaw tang glu na' heul' hk'a' teh'. ¹⁹Hawc' ko', peue guil leukah' ritroe ti peue na' eun lah' a ri Yesu' Eun, "Seura', Mi saec' heul' tawngnhaw', kaw ui' hot' Mi heul' yeut."

²⁰Yesu' Eun top' a, "So' hk'i na' kue' a keutui'. Saec' meuh sim' peul' nang vawo na' a ku kue' han'. Daecti Kon' ai' peue na' Eun ko', hpaw Eun ca' kue' vang uin' cing' ri na'."

²¹Tapae' ku' ti peue na' eun lah' a ri Heun, "Cawo', hk'o' Mi kah ui' ing' puing' kuiing' ui' eun nanggal'."

²²Daecti Yesu' Eun lah' a ri heun, "Peue yeum na' kah ce puing' puri meun reu'."

Yesu' kah Eun guil' na' yut' ti

²³Hawc' ko', Yesu' Eun lec reu na'. Tapae' Eun na' ce ku lec a heul' mae' Heun. ²⁴Guil' lomleng na' a puing' glu na', leuum' na' a baet ti kaw nuk reu na', daecti Yesu' Eun buih it'. ²⁵Tapae' na' ce ing' sawl' Eun. Ce lah', "Cawo', teum' kawm ye vaeveae. Kaw ye cum' cawn."

²⁶Yesu' Eun lah' a ri ce, "Peue kue' hk'a' yum' leng na' pe', a ci' meuh kop keunhaw' pe' vae' lhat' nyawk'?" Hawc' ko', Eun kuh' hae' guil' na' mae' ba leuum' na'. A ku keulawn' dit' ti yen'.

²⁷Tapae' na' ce am' nyawk'. Ce lah', "Hkawn' Eun ci' meuh peue yeuh sa' nhaw' rot ti guil' mae' ba leuum' na' a ku vae' leuceng leukah' Eun na'."

Yesu' bai' Eun peue seuca' lec lal' peue cuin

²⁸Yam Yesu' rot Eun hk'a' teh' glu nang kuing' Gadesenes' †† na', peue seuca' lec lal' peue na' ka pucti neum keutui' leumuic na' ka ing' ri Heun. Kopti sa' hao' nyawk' ka na', a' nhaw' hkuin' laee hat' ri heul' ri caonao' mawn' na' saec' ti peue. ²⁹Ka ta' ul' ri lah', "Kon' ai' Eun Peucawo' na' Mi, Mi ci' ing' lo'

keunhaw' ri ya? Kaw Mi ing' keunhap' nokneh ya nanggal' yam ka na' un' nang rot ka na' aw?"

³⁰Vang un' seungai ka mawn' na', a kue' lic cum keuting ti cum, a saee eo' ri. ³¹Seuca' rai na' ce hk'o' hk'ang a ri Yesu' Eun, "Mi lawn kaw ra ri tec ye ko', hk'o' Mi kah ye heul' lec lic cum teh' ce reu'."

³²Yesu' Eun lah' a ri ce, "Heul' reu'." Seuca' na' a heul' lec lic na'. Lic cum keuting na' a yawt' ti lec leuang' na'. A hk'ui' cum' yeum nang glu na' gawm' euc'. ³³Peue go' lic na' ce hk'ui' ing' lec nang veng na'. Ce eo' ri lah' peue mhawng' lawng awn' a gawm' euc' mae' lawng ka ku' meuh ri peue seuca' lec lal' peue na' ka. ³⁴Peue veng na' ce gawm' euc' ce pucti heul' hk'eup' Yesu' Eun. Yam pun ce ri nyu Eun na', ce hk'o' Eun pucti heul' hk'ai' ti.

Yesu' bai' Eun peue ti' cung chuing' cuin nang veng Kapeni' um

9 Yesu' Eun tang pawk reu na' tang glu na' ing' ri nang veng ri na' †. ²Yam awn' na, peue jong' peue ti' cung chuing' it' nang hk'eung it' ri ing' ri Heun ti peue. Yam Yesu' nyu Eun hk'a' yum' ce na', Eun lah' a ri peue peuyhat na' eun, "A' ai', hpum' sam' ran reu', map' mi na' ploee' a ri hawc'."

³Peue guil leukah' ritroe na' ce ngon' ce sawng' kuit a nang hpum' ri, "Hkawn' buih lah' Eun ku' un' nawp-sang ri Peucawo' Eun."

⁴Yesu' yawng Eun kuit ce a yeuh keutit' nang hpum' ri na', Eun lah' a ri ce, "A ci' meuh kop keunhaw', pe' vae' kuit a nang hpum' ri yeuhki'?" ⁵Map' mi na' ploee' a ri hawc'.' Na' Ui' lah' a yeuh keutit', a na' sam' ran aw? A' ko', 'Kuh' mi na' long hk'a' ing' reu'.' Leukah' nangnhaw' a ci' na' ca ri sam' ran? ⁶Daecti sum' kah Ui' pe' yawng, Kon' ai' peue na' punta kaw Eun ploee' map' na', Eun kue' ti' ca nang lok na'." Hawc' ko', Eun lah' a ri peue ti' cung chuing' na' eun, "Kaw Ui' lah' a ri mi, kuh' klawm' hk'eung it' mi na' ing' ti nya mi reu'." ⁷Peue awn' eun ku kuh' ing' ti nya ri. ⁸Yam peue heun' na' nyu ce a na', ce lhat'. Ce suk' seun' Peucawo' Cawo' tuil' ti' ca yeuhki' na' ri peue na' Eun.

Yesu' klawng Eun ri ti Mahtae eun

⁹Yam Yesu' puc Eun ri heul' hk'ai' mawn' na', Eun nyu peue ti peue muis Mahtae. Eun mok' nang tup' cep' hkawn' na'. Yesu' Eun lah' a ri heun, "Hot' Ui' heul' reu'." Mahtae eun ku kuh' hot' Yesu' Eun heul'.

† I' saya' 53:4†† A'ko' Gerasa'

‡ Veng Eun Yesu' lah' ka na' a meuh veng Kapeni' um.

¹⁰Yam Yesu ' mok ' Eun ri som ' pul nang nya eun Mah-tae na ' , peue cep ' hkawn ' mae ' peue map ' na ' ce he-un ' peue ce ku mok ' ri som ' mae ' Heun mae ' tapae ' Eun na ' ce tiduih ' yeut. ¹¹Yam peue Hparisae ' na ' nyu ce yeuh a keutit ' na ' , ce mhaing ' tapae ' Eun na ' ce, "A ci ' meuh kop keunhaw ' seura ' pe ' na ' Eun vae ' som ' mae ' peue cep ' hkawn ' mae ' peue map ' na ' ce?"

¹²Yam Yesu ' mhawng ' Eun yeuh a keutit ' na ' , Eun lah ' , "Peue ut ' sam ' ran na ' un ' lo ' ce seura ' bai ' , peue peuyhat na ' lo ' ce koe. ¹³Ku ' lah ' ri hk'a ' naee htawm Seunga ' a lah ' , 'Ku ' sum ' is ' Ui ' na ' meuh a hk'a ' tukyak na ' , a hkuin ' meuh hk'a ' tiptan na ' .[†] Ing ' rin ri ti leukah ' aen ' a meuh lamlam ri reu ' , kopti hpaw Ui ' ca ' lih kopti punta kaw Ui ' klawng ri ti peue leupaws seumeu ' na ' ce, daecti lih Ui ' pun peue map ' na ' ce."

Mhaing ' Yesu ' Eun ri lawng eut ' ku ' hk'a

¹⁴Tapae ' eun Yo ' han ^{††} na ' ce ing ' mhaing ' Yesu ' Eun, "Ye ri mae ' peue Hparisae ' na ' eut ' ye ku ' hk'a ri. A ci ' meuh kop keunhaw ' tapae ' Mi na ' ce vae ' un ' eut ' ku ' hk'a ri?"

¹⁵Yesu ' Eun top ' a, "Yam me pen ' na ' kawn ' ut ' eun mae ' peue ing ' hk'a chec ' na ' ce, pe ' ci ' kaw cang kah ce eut ' ku ' hk'a ri na ' yeuh sa ' nhaw ' ? Kaw a rot yam ti peue me pen ' na ' eun gah ' hk'ai ' ku ' hk'a chec ' na ' ce. Yam awn ' na, ce na ' eut ' ku ' hk'a ri yeut.

¹⁶A ' nhaw ' hkuin ' duing leuplu hpen ' hk'u ' na ' ri hk'o hk'im ' . A lawn yeuh keutit ' ko ' , hpen ' hk'u ' na ' a kaw ruit, a na ' yat hk'o hk'im ' na ' gawm res nyawk ' .

¹⁷A ' nhaw ' hkuin ' duing seue ' leuum ' pli ' bui hk'u ' na ' nang huil ' hak ' hk'im ' na ' . A lawn yeuh keutit ' ko ' , leuum ' pli ' bui na ' a kaw res huil ' hak ' na ' . Leuum ' pli ' bui na ' a kaw bah, huil ' hak ' na ' a kaw res. Leuum ' pli ' bui hk'u ' na ' a kaw kah ri seue ' ri nang huil ' hak ' hk'u ' na ' , a na ' cang rokxa ' ri gawm ' lal ' ceu ka."

Kon ' nyom beun ' yeum mae ' beun ' nham ' lih

¹⁸Yam Yesu ' buih lah ' Eun lawng aen ' ce na ' , ro ' ka sa ' la vang hk'o ' mun ' na ' eun ing ' nghup ' ri mae ' Heun. Eun lah ' , "Kon ' beun ' ui ' na ' kawn ' yeum eun. Hk'o ' Mi ing ' tang ' ti ' ri hk'a ' pang eun. Eun na ' tang kuh ' im ' ."¹⁹Yesu ' Eun yuk ri hot ' eun heul ' . Tapae ' Eun na ' ce ku hot ' Eun heul ' .

²⁰Yam buih heul ' ce na ' , a kue ' beun ' nham ' lih pun kul ' leual ' neum ti peue eun ing ' hk'a ' kui ' Eun Yesu ' na ' . Eun paic ' duing ' hk'a ' kui ' ka hk'o [‡] Eun na ' .²¹Eun

[†] Ho ' se 6:6 ^{††} Yo ' han cawo ' tuil ' hk'a ' cum ' [‡] A meuh sawe duing ' hk'a ' kui ' ka hk'o na ' .

kuit a nang hpum ' ri, "Ui ' lawn pun ri paic ' yawo hk'o Eun na ' ko ' , ui ' kaw cuin."

²²Yesu ' Eun hpawt ' ri keue ' , Eun nyu eun. Eun lah ' a ri heun, "Kon ' beun ' Ui ' , hpum ' sam ' ran reu ' . Kopti meuh a hk'a ' yum ' mi na ' , a yeuh mi cuin hawc ' ."²³Yam awn ' na, peuyhat eun beun ' awn ' a keulawn ' cuin.

²³Yam Yesu ' lec Eun nya eun ro ' ka sa ' la vang hk'o ' mun ' na ' , Eun pun ri nyu peue puing ' pi ' ^{‡‡} na ' mae ' peue heun ' na ' glhuit ' deus ' ce na ' ,²⁴Eun lah ' a ri ce, "Puc pe ' heul ' reu ' . Kon ' nyom beun ' aen ' hpaw eun ca ' nang yeum, gup kawn ' it ' eun." Daecti ce va puri ke-unyas cum Yesu ' Eun. ²⁵Hawc ' ka yam peue heun ' na ' puc ce ri heul ' na ' , Eun ing ' lec ri jhawp ' ti ' eun kon ' nyom na ' . Kon ' nyom na ' eun ku kuh ' .²⁶Lawng aen ' a seutuun seutan laws ' hk'awp ' kuing ' awn ' a heul ' .

Yesu ' bai ' Eun peue ngai ' lec ' cuin

²⁷Yam Yesu ' puc Eun ri heul ' hk'ai ' teh ' na ' , peue ngai ' lec ' lal ' peue na ' ka hot ' ri klawng ri lah ' a ri Heun, "Kon ' ai ' Davit ' ^{‡‡} , hk'o ' Mi tukyak ri ya."

²⁸Hawc ' ka Yesu ' ing ' lec Eun nya na ' , peue ngai ' lec ' awn ' ka ing ' ri Heun. Eun mhaing ' ka, "Tup yum ' pa ' cang yeuh Ui ' ceu nang aen ' a aw?"

Ka top ' a, "Cawo ' , yum ' ya a yeut."

²⁹Yesu ' Eun paic ' ngai ' ka na ' , Eun lah ' , "Kah a meuh seun ' hk'a ' yum ' pa ' na ' reu ' ."³⁰Ka ku tang cang nyu hk'a ' ri. Yesu ' Eun deun ' ka meulamlam ri. Eun lah ' , "Pawlaee lah ' a ' nhaw ' mhawng ' lawng aen ' a saec ' ti peue."³¹Daecti ka pucti heul ' lah ' ris lawng Eun Yesu ' na ' a laws ' seutuun seutan hk'awp ' kuing ' awn ' a heul ' .

Yesu ' bai ' Eun peue un ' cang leukah ' cuin

³²Yam buih puc ce ri heul ' na ' , peue va peue seuca ' lec un ' cang leukah ' ing ' ri Yesu ' Eun. ³³Yam hawc ' ra Eun ri tec seuca ' na ' , peue un ' cang leukah ' awn ' eun tawl ' cang leukah ' . Peue cum heun ' na ' ce am ' nyawk ' . Ce lah ' , "Hkuin ' nang duing nyu ku ' yeuhki ' hk'a ' naee peue I ' sarela ' na ' saec ' ti pok."

³⁴Daecti peue Hparisae ' na ' ce lah ' , "Cu Eun ti ' ca ka cawo ' seuca ' na ' Eun ra ri tec seuca ' na ' ."

Peue yeuh kan ' na ' leng ce

³⁵Yesu ' Eun heul ' nang veng nang yung ' na ' hk'awp ' . Eun sangsawn ' nang sa ' la vang hk'o ' mun ' ce na ' . Eun sangsawn ' leukah ' mun ' ren ' kawn lawng kuing ' Eun

^{‡‡} Puing ' pi ' nang pawe peue yeum. ^{‡‡} Peue Yu ' da na ' keutui ' hpum ' ce Hkrit Eun kaw pucti lih neum ceucat eun hkuin ' haw ' hkam ' Davit ' na ' . Kop awn ' na, peue lah ' Hkrit Eun meuh "Kon ' ai ' Davit ' ."

Peucawo' na'. Eun bai' peuyhat ce peue na' cuin. ³⁶Yam nyu Eun peue cum heun' na' ce, kopti hpum' suksak ce un' kue' nang teum' kawm ce seun' kon' yung' un' kue' cawo' go' na', Eun tukyak ri ce nyawk'. ³⁷Eun lah' a ri tapae' ri na' ce, "Ngho' hk'o' vuic na' kue' ka heun', daecti peue vuic ngho' na' ce leng. ³⁸Kop awn' na, hk'o' Cawo' na' na' Eun cus' peue vuic ngho' na' ce heul' ri vang vuic ngho' na' reu'."

Yesu' cus' Eun peue caee kul' leual' peue ri na' ce pucti heul'

10 Yesu' klawng Eun ri cu tapae' kul' leual' peue ri na' ce. Eun tuil' ti' ca ra ri tec seuca' na' mae' ti' ca bai' peue peuyhat cuin na' ri ce.

²Muis ce peue caee kul' leual' peue Eun Yesu' na' ce ku' nanggal' ti peue na' a meuh Si' mon (ku' klawng peue muis Petru') mae' awng' eun muis Andre, Yakop' mae' awng' eun muis Yo' han, ka meuh kon' me eun Yebedae', ³Hpi' lip' mae' Bahto' lome', Hto' mas' mae' Mahtae ku' meuh peue cep' hkawn', Yakop' kon' me eun Alfeas' mae' Htadeas', ⁴Si' mon ku' klawng peue eun meuh peue ritroe reng' na' eun mae' Yu' das' I' sakariot' ku' kaw fuin Yesu' Eun na' eun.

⁵Yesu' cus' Eun peue caee kul' leual' peue na' ce pucti heul'. Eun tuil' leukah' ri ce, "Pawlaee heul' ri peue un' meuh peue ceu Yu' da na' ce, a' ko' pawlaee heul' nang veng ce peue Samari' na'. ⁶Daecti heul' sok kon' yung' rai' heul' ce peue I' sarela' na' reu'. ⁷Yam buih heul' pe' na', pe' na' heul' sangsawn' lah', 'Kuing' ka kuing' pang mao' na' kaw a hk'aws' rot hawc'. ⁸Bai' peue peuyhat na' ce cuin. Yeuh peue yeum na' ce tang kuh' im'. Bai' peue naw na' ce cuin. Ra ri tec seuca' na' ce. Seun' pun hk'o' hk'awng' pe' a, tang tuil' hk'o' hk'awng' a. ⁹Pawlaee seue' leumuil, hk'il', a' ko' tong hk'a' naee sae' caet' pe' na' heul'. ¹⁰Pawlaee reuk huil' heul', a' ko' pawlaee pin' ri is' hk'o' htok', a' ko' jhaep' htok', a' ko' hku' ji hot' hk'a' ri, kopti peue yeuh kan' na' htuk' eun ri pun ngos reng ri.

¹¹Yam lec pe' veng nangnhaw', a' ko' yung' nangnhaw' na', sok peue kuing' hpaw na' eun. Ut' nang nya eun na' rot ti yam puc pe' ri heul' hk'ai' yung' awn' na. ¹²Yam ing' lec pe' nya na', nap mun' ri ce reu'. ¹³Nya awn' a lawn rap ri ti pe' meulamlam ko', kah hk'a' kuit nyawk' kuit sam' ran cumyen' pe' na' kue' ri nya awn' a reu'. Daecti a lawn un' yeuh keutit' ko', kah hk'a' kuit nyawk' kuit sam' ran cumyen' na' keutah ing' ri pe' reu'. ¹⁴Peue lawn un' rap ri ti pe', a' ko' un' leuceng leukah' pe' na' ko', yam puc pe' ri heul'

hk'ai' nya, a' ko' hk'ai' veng awn' a na', raws' ri tec peuluing pit dak cung pe' na' reu'. ¹⁵Ui' lah' a ri pe' neumneum, 'Hk'a' naee seunyi taws' a' mu na', a' mu ka veng So' dom na' mae' veng Gomorah na' a kaw' seuyung' hk'ai' a' mu ka veng awn' na'. ¹⁶Cus' Ui' pe' heul' seun' kon' yung' heul' hk'a' naee mhu' ka ruk na'. Kop awn' na, yeuh ri heng' laet' seun' seueueng' na', yeuh ri un' kue' pit seun' gui' na' reu'.

¹⁷Uin' sati ri ko' reu'. Kaw peue mheut' ri ti pe' heul' nang sa' nam' ka veng na'. Peue kaw ta' faet' pe' hk'a' naee sa' la vang hk'o' mun' na'. ¹⁸Meuh a kopti Ui' ri, pe' kaw pun ri va ri heul' nanggal' ce cawo' veng na' mae' hkun' haw' hkam' na' ce. Pe' kaw kah ri hkam' sa' hki' ri ce mae' ri peue un' meuh peue ceu Yu' da na' ce. ¹⁹Yam mheut' peue pe' na', pawlaee hk-i' keung ri ku' kaw pe' top' mae' ku' kaw pe' lah' na'. Yam rot a yam awn' na, Cit' seunga' chak' na' kaw a tuil' ku' kaw pe' lah' na' ri pe'. ²⁰Kopti hpaw a ca' meuh ku' lah' pe' meun, daecti meuh a ku' Cit' seunga' chak' Eun A' kuiing' pe' na' lah' ka, a suip ri cu pe' lah' a na'.

²¹Awng' ec' na' ce kaw fuin puri rot ti ap ce puri ri peue kue' an' nya na' ce kah peue yeuh ce yeum. Kuing' na' ce kaw fuin kon' ri, kon' na' ce kaw fuin makuiing' ri na' ce rot ti ap ce puri ri peue kue' an' nya na' ce kah peue yeuh ce yeum. ²²Kopti meuh a Ui' ri, peue gawm' euc' peue kaw nyu pe' pereng ri. Daecti peue yeun' hkam a rot tisut' ka na' kaw ce pun ri lawtpon.

²³Peue lawn keunhap' nokneh pe' nang veng ti veng na' ko', hk'uih heul' nang veng tawk' seubu na' reu'. Ui' lah' a ri pe' neumneum, cu yam na' pe' un' nang eo' veng ka I' sarela' na' hk'awp' na', Kon' ai' peue na' kaw Eun lih rot.

²⁴Tapae' na' hpaw eun ca' keuting hk'ai' seura' ri na' eun. Mhai' keuting hk'ai' cawo' ri na' a ku' hkuin' kue'. ²⁵Tapae' na' eun lawn keuteul hpeng seura' ri na' eun mae' mhai' na' eun lawn keuteul hpeng cawo' ri na' eun ko', hk'o' ka hawc'. Peue lawn klawng cawo' nya na' eun meuh Be' el' sebu' ²⁶ko', peue ci' pe na' klawng peue nya peue hk'ul' eun na' ce lheu' aen' na pe a' neng?

²⁶Kop awn' na, pawlaee lhat' ri ce. Ku' kuip ri na' a kaw pun ri tuh' ri. Ku' mo' ri na' a kaw pun ri yawng ri. ²⁷Ku' lah' Ui' ri pe' nang duim' na' tang lah' a vang ceng' na' reu'. Ku' sop' sep' lah' ri nang yhuk' pe' na' tang pao' a pang sebul nya na' reu'. ²⁸Pawlaee lhat' ri peue cang toh yawo jawngkui' tu' na' daecti ce

† Peue ritroe reng na' meuh ce muk peue ham' tap ritroe kuing' na'.

†† Maku' 6:11; Lu' ka 9:5; 10:10-11; Peue caee 13:51 ‡ Maku' 13:13 †† A meuh muis ka Satan na'.

un' cang toh civit na'. Daecti lhat 'til ri Peucawo' Ca-
wo' cang toh civit mae' jawngkui' tu' hk'a' naee keu-
tong' nyarok na' Eun reu'.²⁹ A' raic lal' tu' na' paing'
a ri ti paec, un' meuh ka aw? Daecti a lawn un' meuh alo
Eun Kuing' pe' na' Eun ko', a hkuin' kue' nang
hk'uic' pang bhen' keute' na' saec' ti tu'.³⁰ Saec'
meuh huik' cing' pe' na' ku nyeng ka, mhin' Eun a
gawm' euc' hawc'.³¹ Kop awn' na pawlaee lhat', ngos
heun' pe' hk'ai' a' raic heun' tu' na' ce.

³² A' nhaw' lawn lah' ri rap ri ti Ui' nanggal' to' nha'
ce peue na' ko', Ui' ku kaw lah' ri rap ri ti eun nanggal'
to' nha' Eun A' kuiing' nang kuing' pang mao' na'
yeut.³³ Daecti a' nhaw' lawn lah' ri un' yawng Ui'
nanggal' to' nha' ce peue na' ko', Ui' ku kaw lah' ri
un' yawng eun nanggal' to' nha' Eun A' kuiing' nang
kuing' pang mao' na' yeut.

³⁴ Pawlaee hteum' Ui' ti hk'a' kuit nyawk' kuit
sam' ran cumyen' na' lih pang bhen' keute' na'. Hpaw
Ui' ca' ti hk'a' kuit nyawk' kuit sam' ran cumyen' na'
lih, daecti ti Ui' leungawng na' lih.³⁵ Kopti lih Ui' punta
kaw Ui' yeuh

'kon' me na' eun to' tam' kuiing' ri,

kon' beun' na' eun to' tam' ma ri,

leumeun na' eun to' tam' a' oe' ri,

³⁶ ransu ce na' kaw a meuh peue nya peue hk'ul' ce na'
ce meun.'†

³⁷ A' nhaw' lawn leumeus' makuiing' ri ce lheu' Ui' ri
na' ko', hpaw eun ca' kuing' mae' Ui'. A' nhaw'
lawn leumeus' kon' beun' kon' me ri ce lheu' Ui' ri
na' ko', eun ku un' kuing' mae' Ui'.³⁸ A' nhaw' lawn
un' klawm' kleum' rawng' tawp' ri na' un' hot' Ui'
ko', hpaw eun ca' kuing' mae' Ui'.³⁹ A' nhaw' lawn
jhawp' a' yu ri na' ko', eun kaw pun ri sum a' yu ri.
A' nhaw' lawn sum a' yu ri na' pun Ui' ko', eun kaw
pun a' yu ri.

⁴⁰ A' nhaw' lawn rap ri ti pe' ko', eun ku rap ri ti Ui'.
A' nhaw' lawn rap ri ti Ui' ko', eun ku rap ri ti Cawo'
ku' cus' Ui' lih na' Eun yeut.⁴¹ Peue suip leukah' Eun
Peucawo' na' kopti meuh eun peue suip leukah' Eun
Peucawo' na' a' nhaw' lawn rap ri ti eun ko', ku' rap ri
ti na' eun kaw pun lapsawng' na' seun' peue suip
leukah' Eun Peucawo' na' ce yeut. Peue leupaws se-
umeu' na' kopti meuh eun peue leupaws seumeu' na'
a' nhaw' lawn rap ri ti eun ko', ku' rap ri ti na' eun kaw
pun lapsawng' na' seun' peue leupaws seumeu' na' ce
yeut.⁴² Peue aet' aen' ce kopti meuh ce tapae' Ui' na',
a' nhaw' lawn tuil' ce ri ti ri peue nyui leuum' seucet ti

† Mi' hka 7:6

kawk' ko', Ui' lah' a ri pe' neumneum, lapsawng' eun
peue tuil' leuum' na' hpaw a ca' kaw laee rai'."

Yesu' mae' Yo' han cawo' tuil' hk'a' cum'

11 Yam Yesu' hawc' Eun sangsawn' ri tapae'
kul' leual' peue ri na' ce na', Eun pucti heul'
hk'ai' teh' na'. Eun heul' sangsawn' leukah' mun'
nang yung' nang veng ka kuing' Galilae' na'.

² Yam Yo' han ut' eun nang htawng' eun pun ri
mhawng' lawng ku' yeuh Eun Hkrit na', Eun cus'
tapae' ri na' ce³ heul' mhaing' Yesu' Eun, "Meuh Mi
ku' kaw ing' na' Eun hawc' aw? A' ko', kaw n' kaw ye
ko' nang seubu aw?"

⁴ Yesu' Eun top' a, "Ing' lah' Yo' han eun mhawng'
ku' nyu ku' mhawng' pe' na' reu'.⁵ Peue ngai' lec'
na' tang nyu ce hk'a' ri. Peue cung lu na' ce tang cang
heul'. Peue peuyhat naw na' ce tang chak' ngam. Peue
lhuit' na' ce tang cang mhawng'. Peue yeum na' ce tang
kuh' im'. Peue hk'o' tukyak na' pun ce ri mhawng'
leukah' mun' ren' kawn na'.⁶ Mun' keuting ri peue
un' kangkae ri Ui' na' ce."

⁷ Yam tapae' eun Yo' han na' buih keutah ing' ce na',
Yesu' Eun lah' peue cum heun' na' ce mhawng' lawng
eun Yo' han na'. Eun lah', "Pe' ci' heul' nawk keun-
haw' vang hk'oh' hk'oeng' na'? Heul' nawk pe' guil'
puing' a mae'aw' a fuii' fai' na' aw?⁸ A' ko', pe' ci'
heul' nawk keunhaw'? Heul' nawk pe' peue cuip'
hk'eung chak' hk'eung ngam na' eun aw? Uih', peue
cuip' hk'eung chak' hk'eung ngam na' ut' eun nang
haw' eun hkun' haw' hkam' na'.⁹ A' ko', pe' ci' heul'
nawk keunhaw'? Heul' nawk pe' peue suip leukah' Eun
Peucawo' na' eun aw? Euh, heul' nawk pe' peue suip
leukah' Eun Peucawo' na' eun yeut. Daecti kaw n' lheu'
eun peue suip leukah' Eun Peucawo' na' eun.¹⁰ Eun
meuh peue ku' tem' ri uin' ri nang htawm Seunga'. A
lah' ri yeuhki' na',

'Keue', kaw Ui' cus' peue caee ri na' eun heul' nang-
gal' Mi.

Kaw eun bai mhe' hk'a' Mi na' heul' nanggal'.'††
¹¹ Ui' lah' a ri pe' neumneum, peue keut' lih neum be-
un' na' a hkuin' laee kue' nang keuting hk'ai' Yo' han
cawo' tuil' hk'a' cum' na' eun saec' ti peue. Daecti
peue aet' hk'ai' peue nang kuing' pang mao' na' eun
kawn' keuting hk'ai' Yo' han eun.¹² Tang' neum cu eun
Yo' han cawo' tuil' hk'a' cum' na' rot seunyaen' na',
kuing' pang mao' na' meuh a ku' peue na' sok peue a
mae' hpum' ha' hpum' huk' ri. Peue hpum' ha'
hpum' huk' na' ce rutrim' ri ti a pun.¹³ Kopti leukah' ce

†† Malahki' 3:1

peue suip leukah ' Eun Peucawo ' na ' mae ' htawm ka leukah ' ritroe na ' ce gawm ' euc ' tamnai a lawng ku ' kaw meuh na ' rot ti cu eun Yo ' han na ' .¹⁴ Pe ' lawn sah-paw ' ri rap ri ti a ko ' , peue aen ' meuh eun E ' li ' ya ku ' kaw ing ' na ' eun hawc ' .¹⁵ Peue kue ' yhuk ' na ' leuceng a meulamlam ri reu ' .

¹⁶ Ui ' ci ' kaw keutec peue cu aen ' ce mae ' keunhaw ' ? Seun ' ce kon ' nyom ti cum mok ' nang keulas ce klawng ri lah ' a ri a ' mawo ri na ' ce,

¹⁷ ' Ye saec ' puing ' pi ' pun pe ' ,
pe ' hkuin ' cha ri.

Ye saec ' lah ' cai hpum ' sui ' ,
pe ' hkuin ' hpum ' sui ' .

¹⁸ Kopti Yo ' han ing ' eun, eun un ' hk'asom ' , un ' nyui leuum ' pli ' bui na ' , ce lah ' , ' Seuca ' a lec eun. ' ¹⁹ Kon ' ai ' peue na ' lih Eun, Eun hk'asom ' na ' , ce lah ' , ' Eun meuh peue hk'a pon hk'a lheu ' , nyui leuum ' pli ' bui pon lheu ' , mae ' meuh a ' mawo peue cep ' hkawn ' mae ' peue map ' na ' ce. ' Daecti punta peuyha ' cu ' yi Eun Peucawo ' na ' cawp ' ka na ' , peue rap ri ti peuyha ' cu ' yi Eun na ' ce tuh ' a hawc ' .

Veng un ' taws ' hpum ' fuin map ' ri kaw pun ri kuit nyhap '

²⁰ Ku ' hk'o ' am ' keuting na ' Yesu ' Eun saec ' yeuh a hk'a ' naee veng aen ' ce hk'a ' heun ' ko ' , daecti kopti ce hkuin ' taws ' hpum ' fuin map ' ri na ' , Yesu ' Eun tang ' ri ram ri veng aen ' ce. ²¹ Eun lah ' , " Veng Hko ' rasin, kaw mi pun ri hkam ' hk'a ' jha ' na ' . Saec ' veng Betsai ' da ' na ' , mi ku kaw pun ri hkam ' hk'a ' jha ' na ' yeut. Kopti ku ' hk'o ' am ' yeuh ri nang veng pa ' na ' a lawn yeuh ri nang veng Tai ' ra ' mae ' veng Si ' don na ' ko ' , ce ku na ' taws ' hpum ' fuin map ' ri cuip ' hk'eung htong ' tai ' mok ' nang peuluing [†] leumah ' hawc ' yeut. ²² Ui ' lah ' a ri pa ' , ' Hk'a ' naee seunyi taws ' a ' mu na ' , a ' mu ka veng Tai ' ra ' na ' mae ' veng Si ' don na ' a kaw n ' seuyung ' hk'ai ' a ' mu pa ' na. ' ²³ Veng Kapeni ' um, kaw mi pun ri yuk ri huk ' pang mao ' aw? Uih ' , kaw mi pun ri hk'ui ' lih nang keutong ' nyarok na ' . Kopti ku ' hk'o ' am ' yeuh ri nang veng mi na ' a lawn yeuh ri nang veng So ' dom na ' ko ' , ce ku na ' kaw n ' kue ' rot seunyaen ' yeut. ²⁴ Ui ' lah ' a ri mi, ' Hk'a ' naee seunyi taws ' a ' mu na ' , a ' mu ka veng So ' dom na ' a kaw n ' seuyung ' hk'ai ' a ' mu mi na. ' "

[†] Malahki ' 4:5^{††} Aen ' a meuh sa ' hki ' tuil ' peue nyu ku ' kuit nyhap ' ri na ' .

Ing ' keului ' ri ri Ui '

²⁵ Yam awn ' na, Yesu ' Eun lah ' , " A ' kuiing ' Cawo ' ku- ing ' pang mao ' mae ' bhen ' keute ' na ' Mi, Ui ' suk ' seun ' Mi kopti mo ' Mi lawng aen ' a ri peue kue ' cu ' yi na ' ce mae ' peue cang yawng na ' ce. Daecti Mi tuil ' peue sum ' hpap na ' ce nyu a. ²⁶ A ' kuiing ' , aen ' meuh a ku ' htuk ' hpum ' Mi.

²⁷ Kuiing ' Ui ' ap Eun ku ceu gawm ' euc ' na ' ri Ui ' hawc ' . A lawn un ' meuh A ' kuiing ' Eun ko ' , a ' nhaw ' hkuin ' yawng Kon ' ai ' Eun saec ' ti peue. A lawn un ' meuh Kon ' ai ' Eun mae ' ku ' Kon ' ai ' sum ' tuh ' Eun peue yawng A ' kuiing ' Eun na ' ko ' , a ' nhaw ' hkuin ' yawng A ' kuiing ' Eun saec ' ti peue. "

²⁸ Peue tal na ' mae ' peue peus beus seucen na ' ing ' ri Ui ' reu ' . Kaw Ui ' tuil ' pe ' keului ' ri. ²⁹ Leuceng leukah ' Ui ' na ' hot ' rin ri ti Ui ' , kopti hpum ' Ui ' na ' onawn ' ka. Civit pe ' na ' a kaw pun ri keului ' ri. ³⁰ Kopti leuceng leukah ' Ui ' na ' sam ' ran ka, beus Ui ' na ' a ku seuyung ' .

Yesu ' Cawo ' ka seunyi Sin ' na ' Eun

12 Yam seunyi Sin ' na ' , Yesu ' Eun hpa ' mal ' ngho ' na ' heul ' . Tapae ' Eun na ' ce sum ' som ' . Ce sec ' ti sip ' seukuk ngho ' na ' . ² Yam peue Hparisae ' na ' nyu ce a na ' , ce lah ' a ri Yesu ' Eun, " Keue ' reu ' , tapae ' Mi na ' buih yeuh ce ku ' kleuc ' ri leukah ' ritroe na ' hk'a ' - naee seunyi Sin ' na ' . "

³ Yesu ' Eun top ' a, " Yam Davit ' eun mae ' pu eun na ' sum ' som ' nyawk ' ce na ' , eun ci ' yeuh keunhaw ' na ' un ' duing lip pe ' lawng ka na ' aw? ⁴ Davit ' eun lec hk'a ' naee nya Eun Peucawo ' na ' . Eun ti ri hk'a ' hkawom- un ' tan peue na ' . Eun ku tuil ' pu ri na ' ce hk'a ' a yeut. Hkawomun ' awn ' a lawn un ' meuh yawo peue jhawp ' rit na ' ce ko ' , ce hkuin ' cang hk'a ' a. ⁵ Lawng peue jhawp ' rit na ' yeuh ce kan ' ri na ' hk'a ' naee nya hk'o ' mun ' keuting na ' hk'a ' naee seunyi Sin ' na ' , a meuh ku ' kleuc ' ri leukah ' ritroe na ' daecti ce hkuin ' to ' ri kleuc ' na ' , un ' duing lip pe ' lawng aen ' a nang htawm leukah ' ritroe na ' aw? ⁶ Daecti Ui ' lah ' a ri pe ' , maen ' na ' kue ' a nang keuting hk'ai ' nya hk'o ' mun ' keuting na ' . ⁷ Leukah ' lah ' ri, ' Ku ' sum ' is ' Ui ' na ' meuh a hk'a ' tukyak na ' , a hkuin ' meuh hk'a ' tiptan na ' , [‡] pe ' lawn leuceng pun leukah ' aen ' a ko ' , pe ' hkuin ' kaw duing tang ' map ' ri peue un ' kue ' ku ' kleuc ' na ' ce. ⁸ Kopti Kon ' ai ' peue na ' meuh Eun cawo ' ka seunyi Sin ' na ' . "

[‡] Haw ' se 6:6

⁹Eun pucti heul' hk'ai' mawn' na', Eun lec hk'a' naee sa' la vang hk'o' mun' ce na'. ¹⁰Mawn' na' a kue' peue ti' chuing' ti plak' ti peue. Peue ngon' na' ce buih sok hk'a' kaw ri tang' map' ri Yesu' Eun. Yesu' Eun mhaing' ce, "Bai' peue peuyhat cuin hk'a' naee seunyi Sin' na' kleuc' a leukah' ritroe na' aw?"

¹¹Hawc' ko', Eun lah' a ri ce, "A' nhaw' lawn kue' kon' yung' ti tu', a na' hk'uic' nang lamo' hk'a' naee seunyi Sin' na' ko', kaw eun un' hue' a pucti lih aw?"

¹²Peue na' peue ci' pe ngos heun' hk'ai' kon' yung' na' a' neng? Kop awn' na, yeuh ku' chak' na' hk'a' naee seunyi Sin' na' cawp' a hot' leukah' ritroe na' hawc'."

¹³Hawc' ko', Eun lah' a ri peue awn' eun, "Nyat' ti' mi na' reu'." Eun ku nyat' a. Ti' eun na' a tang chak' seun' hk'a' ti plak' na'. ¹⁴Daecti peue Hparisae' na' ce pucti heul'. Ce ci' kaw cang pun ri toh Yesu' Eun yeuh sa' nhaw' na', ce heul' sa' lit puri.

Mhai' Peucawo' leuk Eun ri uin'

¹⁵Yam Yesu' yawng Eun lawng awn' a na', Eun pucti heul' hk'ai' mawn' na'. Peue heun' na' ce hot' Eun heul'. Eun bai' peuyhat ce na' cuin euc'. ¹⁶Yesu' Eun tuil' leukah' un' kah ce lah' meuh ri a' nhaw' na'.

¹⁷Aen' a meuh neumneum hot' seun' ku' I' saya' peue suip leukah' Eun Peucawo' na' lah' eun yeuhki' na',

¹⁸"Hkaen' meuh Eun mhai' Ui' ku' leuk Ui' ri uin' na' Eun.

Ui' leumeus' Eun. Eun hit' ri hpum' Ui' nyawk'.

Ui' kaw cus' Cit' seunga' ri na' lih hk'a' pang Eun.

Eun kaw pao' lawng ka hk'a' leupaws seumeu' Ui' na' ri peue ceu gawm' euc'.

¹⁹Eun hkuin' kaw kleuc' leumeul a' nhaw', a' ko' hkuin' kaw ta' ul' seng' laws'.

A' nhaw' hkuin' kaw mhawng' seng' klawng Eun nang gon' hk'a'.

²⁰Cu yam un' nang ti Eun hk'a' leupaws seumeu' na' rot ti vang pe na' ko',

maeeaw' kaw hk'aws' beuk' na' Eun hkuin' kaw yeuh a deut,

sae ka kaw' ngawl ha' a kaw hk'aws' laic na' Eun hkuin' kaw juit' a laic.

²¹Peue ceu gawm' euc' na' peue kaw uin' hk'a' keu-tui' hpum' ri na' ri muis Eun na'." †

Yesu' Eun mae' Be' el' sebu'

²²Hawc' awn' na, peue va peue ngai' lec', nga', seuca' a lec eun na' eun ing' ri Yesu' Eun ti peue. Eun bai'

peue awn' eun cuin. Eun cang leukah', cang nyu hk'a' ri.

²³Peue cum heun' na' ce am' nyawk'. Ce lah', "Hkawn' na' Eun chak' cang meuh Kon' ai' eun Davit' na' eun aw'?"

²⁴Yam peue Hparisae' na' pun ce ri mhawng' a na', ce lah', "Peue aen' cu Eun ti' ca ka cawo' seuca' Be' el' sebu' na' Eun ra ri tec seuca' na'."

²⁵Yesu' Eun yawng ku' kuit ce na', Eun lah' a ri ce, "Kuing' ces ri puri meun ku kuing' na' a kaw lulaic.

Nyahk'ul' ces ri puri ku nya na' a hkuin' kaw cang keutawn'.

²⁶Seuca' na' a lawn ra puri hk'uih meun ko', kaw ce taic' jah hk'ai' puri meun yeut. Kuing' ce na' a ci' kaw cang keutawn' yeuh sa' nhaw'?"

²⁷Ui' lawn pu-ing Be' el' sebu' na' Ui' ra ri tec seuca' na' ko', peue pe' na' ce ci' na' puing a' nhaw' ce ra ri tec seuca' na'?"

²⁸Daecti Ui' lawn puing Cit' seunga' Eun Peucawo' na' Ui' ra ri tec seuca' na' ce ko', kuing' Eun Peucawo' na' rot a mae' pe' hawc'.

²⁹Peue lawn un' nang mawt ri uin' peue kaw' reng keuting na' eun nanggal' hawc' ko', a' nhaw' hkuin' kaw cang ing' lec ri rim' ri ti vahtu' hk'il' leumuil ka nya eun na' saec' ti peue. Mawt ri uin' peue kaw' reng keuting na' eun nanggal' hawc', peue na' kaw' cang lec nya eun na' rim' ri ti vahtu' hk'il' leumuil eun na' heul'.

³⁰Peue un' ut' hk'a' Ui' na' meuh ce ransu ri Ui'.

Peue un' hk'on' ro mae' Ui' na' meuh ce peue pun ri taic' jah puin' ri tec.

³¹Kop awn' na Ui' lah' a ri pe', map' yeuh peue na' mae' leukah' un' nawpsang lah' peue na' gawm' euc' ka kaw a cang ploer' ri. Daecti map' un' nawpsang Cit' seunga' na' un' laee cang ploer' a ri.

³²A' nhaw' lawn lah' kleuc' ri Kon' ai' peue na' Eun ko', Peucawo' Eun kaw ploer' map' eun. Daecti a' nhaw' lawn lah' ku' un' nawpsang ri Cit' seunga' chak' na' ko', Eun hkuin' kaw laee ploer' map' eun na' saec' meuh cu maet' maen', a' ko' cu hk'a' cat na'.

³³Kleum' chak' na' pli' a pli' chak', kleum' un' chak' na' pli' a pli' un' chak'. Kopti meuh a pli' ka na', e' cang yawng kleum' ka na'.

³⁴Kon' hk'i ka seueueng' sa' hao' na' pe', meuh pe' peue rai. Kopti moeng na' lah' a ku' nuk pucti lih neum hpum' na', pe' ci' kaw cang lah' ku' chak' na' yeuh sa' nhaw'?"

³⁵Peue chak' na' hue' ce ku' chak' na' lih neum vang uin' ce hk'eung chak' nang tu' ri na'.

Peue rai na' hue' ce ku' rai na' lih neum vang uin' ce hk'eung rai nang tu' ri na'.

³⁶Ui' lah' a ri pe', hk'a' naee seunyi yam taws'

Kleum' chak' na' pli' chak' ka

³³Kleum' chak' na' pli' a pli' chak', kleum' un' chak' na' pli' a pli' un' chak'.

Kopti meuh a pli' ka na', e' cang yawng kleum' ka na'.

³⁴Kon' hk'i ka seueueng' sa' hao' na' pe', meuh pe' peue rai. Kopti moeng na' lah' a ku' nuk pucti lih neum hpum' na', pe' ci' kaw cang lah' ku' chak' na' yeuh sa' nhaw'?"

³⁵Peue chak' na' hue' ce ku' chak' na' lih neum vang uin' ce hk'eung chak' nang tu' ri na'.

Peue rai na' hue' ce ku' rai na' lih neum vang uin' ce hk'eung rai nang tu' ri na'.

† I' saya' 42:1-4

a 'mu na', peue na' kaw peue kah ri ti beus ka leukah' sa 'hao' tawn lah' ce pucti lih na' ku moeng ka. ³⁷ Kopti kaw pe' pun hk'a' ciyang na', a' ko' kaw pe' pun hk'a' lawtpon na', ut' a ri leukah' lah' pe' na' yeut."

Het' keuting eun Yo' na'

³⁸ Yam awn' na, peue Hparisae' mae' peue guil leukah' ritroe na' ce ing' hk'o' a ri Yesu' Eun, "Seura', sum' nyu ye het' keuting yeuh Mi."

³⁹ Eun top' a, "Peue cu aen' meuh ce cat peue rai mae' ce meuh peue fuin Peucawo' Eun. Ce hk'o' het' keuting na', daecti a lawn un' meuh yawo het' keuting eun Yo' na' peue suip leukah' Eun Peucawo' na' eun ko', het' keuting seubu na' un' tuil' a ri ce saec' ti ceu. ⁴⁰ Kopti seun' Yo' na' pun eun ri ut' nang keuteul ka ka' keuting na' pun loe' sum' loe' seunyi na', saec' meuh Kon' ai' peue na' Eun ku kaw pun ri ut' nang keute' pun loe' sum' loe' seunyi. ⁴¹ Seunyi yam taws' a' mu na', peue veng Ni' nave na' ce ku kuh' mae' peue cat aen' ce. Ce kaw taws' a' mu ri ce. Kopti meuh a leukah' mun' sangsawn' eun Yo' na' na', peue veng Ni' nave na' ce taws' hpum' fuin map' ri. Maet' maen', nang keuting hk'ai' Yo' na' eun na' ut' Eun maen' hawc'. ⁴² Seunyi yam taws' a' mu na', nang' haw' hkam' kuing' hk'a' col na' ka kaw kuh' mae' peue cat aen' ce. Ka kaw taws' a' mu ri ce. Kopti punta kaw ka leuceng leukah' cu' yi eun Saw' lamon na', ka ing' neum vang lok na' sut' ka na'. Maet' maen', nang keuting hk'ai' Saw' lamon eun na' ut' Eun maen' hawc'.

⁴³ Yam seuca' rai na' puc a ri lih hk'ai' peue na' eun, a eo' sok vang kaw ri keului' nang vang hk'oh' hk'oeng' na'. Yam sok un' nyu ka vang kaw ri keului' na', ⁴⁴ a lah', 'Kaw ui' tang ing' ti nya vang puc ui' ri lih heul' na'. Yam ing' rot a ri vang ut' hk'im' ri na', a pun ri nyu nya awn' un' kue' a nang ut', a pis' hk'iu' ri seunga' na'. ⁴⁵ Kop awn' na, a heul' klawng seuca' seubu rai hk'ai' ti a' res tu' na' ce ing' lec ri ut' mawn'. Vang tisut' ka na', peue awn' eun lulaic lheu' hk'im'. Peue rai cu maet' maen' na' kaw ce yeuhko' yeut."

Ma Eun Yesu' ka mae' awng' me Eun na' ce

⁴⁶ Yam Yesu' buih sangsawn' Eun peue cum heun' na' ce na', ma Eun ka mae' awng' me Eun na' ce cawng ko' Eun hk'a' nok na'. Ce sum' leukah' mae' Heun.

⁴⁷ Ngon' peue lah' a ri Yesu' Eun, "Ma Mi ka mae' awng' me Mi na' cawng ko' ce Mi hk'a' nok. Ce sum' leukah' mae' Mi."

⁴⁸ Yesu' Eun top' a ri ce, "Ma Ui' mae' awng' me Ui' na' ce ci' meuh a' nhaw'?" ⁴⁹ Eun seuji tapae' ri na' ce. Eun lah', "Hkaen' meuh ce ma Ui' mae' awng' me Ui'. ⁵⁰ Kopti a' nhaw' lawn yeuh alo Eun Kuing' Ui' Ca' wo' ut' nang kuing' pang mao' na' Eun ko', meuh eun ma Ui' mae' awng' me awng' beun' Ui' yeut."

Leukah' leupong' lawng nang puin' ku' seumal

13 Seunyi awn' na Yesu' Eun pucti heul' hk'ai' nya awn' na. Eun heul' mok' keunam ka glu na'. ² Peue cum heun' na' ce ing' cu ri rop Eun. Eun ing' lec ri mok' hk'a' naee ka reu na'. Peue cum heun' na' ce ut' keunam ka glu na'. ³ Eun sangsawn' ce heun' ceu ri leukah' leupong' na'. Eun lah', "Peue sang' mal' ti peue na' heul' puin' eun ku' seumal ri. ⁴ Yam puin' eun ku' seumal na', ngon' a hk'uic' nang gon' hk'a'. Sim' na' a ku seut' ri hk'a' a euc'. ⁵ Ngon' a hk'uic' nang tak seumu vang keute' na' ril' ka. Kopti keute' na' un' leupeul ka, a yao kaws. ⁶ Daecti kopti un' kue' a res na', yam kuc' na' tat' ka a na', a fit' hk'oh' heul'. ⁷ Ngon' a hk'uic' nang tak kat'. Bang' kat' na' a kaws, a ghuium' a. ⁸ Daecti ngon' a hk'uic' vang keute' ngeuo. A pli' tipak' pun, leskul' pun a' ko' leuo' kul' pun. ⁹ Peue kue' yhuk' na' leuceng a meulamlam ri reu'."

¹⁰ Hawc' ko', tapae' Eun na' ce ing' lah' a ri Heun, "A ci' meuh kop keunhaw' Mi vae' lah' leukah' leupong' ri peue aen' ce?"

¹¹ Eun top' a ri ce, "Lawng ka kuing' Eun Peucawo' ku' mo' ri geup' na' kaw pe' kue' ahkvang yawng a. Daecti peue seubu na' ce hkuin' kue' ahkvang yawng a. ¹² Ku' kue' na' ce ko', kaw tang tuil' ce baee. Ce na' kue' lheu' buba ri. Daecti ku' un' kue' na' ce ko', kaw tang hue' ku' kaw' kue' ce na' lih hk'ai' ce. ¹³ Kop awn' na, Ui' lah' leukah' leupong' na' ri ce. 'Ce saec' kue' ngai', ce hkuin' nyu.

Ce saec' leuceng, ce hkuin' mhawng' mae' hkuin' ceng' ri ka.'

¹⁴ Leukah' lah' eun I' saya' peue suip leukah' Eun Peucawo' na' htonnuk a hk'a' naee ce. Eun lah',

'Pe' saec' na' pun ri mhawng' gawm mhawng' a, daecti pe' hkuin' kaw duing ceng' ri ka.

Pe' saec' na' pun ri nyu gawm nyu a, daecti pe' hkuin' kaw duing yawng a.

¹⁵ Kopti hpum' ce peue ceu aen' cen' ka.

Yhuk' ce na' a un' leuceng.

Ngai' ce na' a ku yep ri.

A lawn un' yeuh keutit' ko',

ce kaw pun ri nyu ri ngai' ri na',

mhawng' ri yhuk' ri na',

yawng ri hpum ' ri na ' ,
hpawt ' ce ri ing ' na ' .

Hawc ' ko ' , Ui ' kaw bai ' ce cuin. ' †

¹⁶ Daecti mun ' keuting ri ngai ' pe ' na ' , kopti pun pe ' ri nyu ri ngai ' ri na ' . Mun ' keuting ri yhuk ' pe ' na ' , kopti pun pe ' ri mhawng ' ri yhuk ' ri na ' . ¹⁷ Kopti kaw Ui ' lah ' a ri pe ' neumneum, 'Peue suip leukah ' Eun Peucawo ' na ' ce mae ' peue leupaws seumeu ' na ' ce heun ' peue ce saec ' sum ' nyu seun ' ku ' pun pe ' ri nyu na ' , daecti ce hkuin ' pun ri nyu a. Ce saec ' sum ' mhawng ' seun ' ku ' pun pe ' ri mhawng ' na ' , daecti ce hkuin ' pun ri mhawng ' a. '

Vangdoh ' ka leukah ' leupong ' lawng nang puin ' ku ' seumal

¹⁸ Leuceng ri mhawng ' vangdoh ' ka leukah ' leupong ' lawng nang puin ' ku ' seumal na ' reu ' . ¹⁹ Ku ' seumal hk' uic ' nang gon ' hk'a ' na ' a meuh peue pun ri mhawng ' lawng ka kuing ' pang mao ' daecti ce un ' leuceng pun a na ' , seuca ' rai na ' ing ' ti a ku ' seumal puin ' ri hk'a ' nae hpuim ' ce na ' heul ' . ²⁰ Ku ' seumal hk' uic ' nang tak seumu na ' a meuh peue pun ri mhawng ' leukah ' mun ' ren ' kaw na ' , ce keulawn ' ren ' kaw rap ri ti a. ²¹ Daecti kopti res ka na ' un ' lec ka rui ' na ' , leukah ' mun ' ren ' kaw na ' a ut ' mae ' ce ti cu hkao ' . Yam hk'eup ' ce ku ' kuit nyhap ' , a ' ko ' ku ' keunhap ' nokneh kopti meuh a leukah ' mun ' ren ' kaw na ' , ce ku keulawn ' tecla a. ²² Ku ' seumal hk' uic ' nang tak kat ' na ' a meuh peue pun ri mhawng ' leukah ' mun ' ren ' kaw na ' , daecti ku ' kuit nyhap ' hk'a ' nae yam a ' yu im ' na ' mae ' hk'a ' se ' dai ' vahtu ' hk'il ' leumuil na ' ing ' ghuim ' a leukah ' mun ' ren ' kaw na ' . A yeuh leukah ' mun ' ren ' kaw na ' un ' cang kue ' pli ' . ²³ Ku ' seumal hk' uic ' nang vang keute ' ngeu na ' a meuh peue pun ri mhawng ' leukah ' mun ' ren ' kaw na ' , hawc ' ko ' ce leuceng pun a. A pli ' lheu ' ku ' puin ' ri na ' tipak ' pun, leskul ' pun a ' ko ' leue ' kul ' pun. "

Leukah ' leupong ' lawng puin ' vang ' ri vang puin ' ng- ho '

²⁴ Yesu ' Eun tang sangsawn ' ce ri leukah ' leupong ' seubu na ' bae. Eun lah ' , "Kuing ' pang mao ' na ' seun ' a peue ti peue puin ' eun ku ' seumal chak ' nang mal ' ri na ' . ²⁵ Yam peue na ' pun peue ri it ' na ' , ransu eun na ' eun ra ri ing ' puin ' seumal vang ' ri vang puin ' eun seumal ngho ' na ' . Hawc ' ko ' , eun pucti heul ' . ²⁶ Yam ng-

ho ' na ' kaws ka a puc seukuk pli ' ri na ' , vang ' na ' a ku kaws pucti yeut.

²⁷ Mhai ' na ' ce ing ' lah ' a ri cawo ' mal ' na ' eun, 'Cawo ' , puin ' mi ku ' seumal chak ' nang mal ' ri na ' , un ' meuh ka aw? Vang ' awn ' ce ci ' ing ' neum tawngn-
haw ' ?'

²⁸ Cawo ' mal ' na ' eun top ' a, 'Meuh a ku ' yeuh ce ransu ui ' na ' .'

Mhai ' na ' ce mhaing ' eun, 'Ye lawn heul ' ruic ri tec a, tup na ' a chak ' aw?'

²⁹ Cawo ' na ' eun top ' a, 'Pawlae yeuh a, kopti yam ruic pe ' vang ' na ' , na ' pe ' cang caw ri ruic ngho ' na ' yeut. ³⁰ Tae ' a lak ' keuting tiduih ' gawm ' lal ' ceu rot ri yam vuic ngho ' na ' reu ' . A lawn rot yam vuic ngho ' na ' , kaw ui ' kah peue vuic ngho ' na ' ce vuic ri mawt vang ' na ' meuh mawt ri nanggal ' . Hawc ' ko ' , ui ' na ' kah ce ti ri heul ' dum ri tec a nang ngawl. Hawc ' awn ' na, ui ' kaw vuic ri ti ngho ' na ' ing ' seue ' a hk'a ' nae htuim ' ri na ' . ' "

Leukah ' leupong ' lawng seumal hpapu

³¹ Yesu ' Eun tang sangsawn ' ce ri leukah ' leupong ' seubu na ' bae. Eun lah ' , "Kuing ' pang mao ' na ' seun ' a seumal ka hpapu ti peue ri jheum ' nang val ri na ' . ³² Seumal ka na ' a saec ' aet ' hk'ai ' seumal ku ' seubu na ' ce ko ' , daecti yam kaws ka na ' , a meuh kleum ' keuting hk'ai ' kleum ' ku ' seubu nang val na ' . Kak ' ka na ' ce a keuting, sim ' peul ' eo ' nang vawo na ' a ing ' pleng ' ri is ' han ' hk'a ' pang kak ' ka na ' ce. "

Leukah ' leupong ' lawng paeng hkawomun '

³³ Yesu ' Eun tang sangsawn ' ce ri leukah ' leupong ' seubu na ' bae. Eun lah ' , "Kuing ' pang mao ' na ' seun ' a paeng ku ' beun ' na ' seue ' eun nang moc ' hkawomun ' loe ' teng ' na ' , a yeuh hkawomun ' na ' keulai gawm ' euc ' ri. "

³⁴ Lawng aen ' ce gawm ' euc ' , Yesu ' Eun lah ' yawo leukah ' leupong ' na ' ri ce palkoe. Pon hk'ai ' leukah ' leupong ' na ' Eun hkuin ' lah ' ku ' seubu na ' ri ce. ³⁵ Aen ' meuh a neumneum htonnuk hot ' seun ' ku ' peue suip leukah ' Eun Peucawo ' na ' lah ' eun ri uin ' a na ' . A lah ' ,

"Kaw Ui ' lah ' leukah ' leupong ' na ' .

Ku ' mo ' ri tang ' neum yam hpanpleng ' bhen ' keute ' na ' Ui ' kaw tuh ' a pucti lih. " ††

† I ' saya ' 6:9, 10

†† Suk ' seun ' 78:2

Vangdoh ' ka leukah ' leupong ' lawng puin ' vang ' ri
vang puin ' ngho ' "

³⁶ Hawc ' awn ' na, Yesu ' Eun gah ' hk'ai ' peue cum heun ' na ' ce. Eun ing ' lec hk'a ' naee nya na ' . Tapae ' Eun na ' ce ing ' mhaing ' Eun, "Hk'o ' Mi lah ' ye mhawng ' vangdoh ' ka leukah ' leupong ' lawng puin ' vang ' ri vang puin ' ngho ' na ' ."

³⁷ Eun top ' a, "Peue puin ' ku ' seumal chak ' na ' meuh a Kon ' ai ' peue na ' Eun. ³⁸ Mal ' na ' a meuh bhen ' keute ' na ' . Ku ' seumal chak ' na ' a meuh peue ka kuing ' Eun Peucawo ' na ' ce. Seumal vang ' na ' a meuh peue eun seuca ' rai na ' ce. ³⁹ Ransu ku ' puin ' vang ' na ' a meuh seuca ' rai na ' eun. Yam vuic ngho ' na ' a meuh yam tisut ' na ' . Peue vuic ngho ' na ' a meuh in ' hpom na ' ce.

⁴⁰ Vang ' na ' a lawn pun ri ruic ri dum ri nang ngawl na ' yeuh sa ' nhaw ' ko ' , cu yam tisut ' na ' a ku kaw yeuhko ' yeut. ⁴¹ Kon ' ai ' peue Eun kaw cus ' in ' hpom ri na ' ce eo ' ri ti peue ku ' yeuh peue yeuh map ' a pucti lih na ' ce mae ' peue yeuh ku ' rai na ' ce pucti lih gawm ' euc ' hk'ai ' kuing ' Eun Peucawo ' na ' . ⁴² Hawc ' ko ' , nyon ri seue ' ce nang dom ' ngawl vang ta ' ul ' ri yam cet rang ' ri na ' . ⁴³ Yam awn ' na, peue leupaws seumeu ' na ' ce kaw ceng ' seun ' seunyi hk'a ' naee kuing ' Eun Kuing ' ce na ' . Peue kue ' yhuk ' na ' leuceng a meulamlam ri reu ' .

Leukah ' leupong ' lawng hk'eung hk'il ' leumuil mo ' ri
mae ' lawng seng ' seukleu ' ngos heun ' "

⁴⁴ Kuing ' pang mao ' na ' seun ' a hk'eung hk'il ' leumuil mo ' ri nang na na ' . Yam peue na ' nyu eun a na ' , eun tang suip ri mo ' a. Eun ren ' kawn ing ' paing ' ku ' kue ' ri na ' gawm ' euc ' ka. Hawc ' ko ' , eun ing ' leuvae ri ti na awn ' a.

⁴⁵ Kuing ' pang mao ' na ' seun ' a peue yeuh ka sok seng ' seukleu ' ngos heun ' na ' eun. ⁴⁶ Yam sok nyu eun seng ' seukleu ' ngos heun ' ti gleun ' na ' , eun ing ' paing ' ku ' kue ' ri na ' gawm ' euc ' ka. Hawc ' ko ' , eun ing ' leuvae ri ti seng ' seukleu ' awn ' a.

Leukah ' leupong ' lawng reup

⁴⁷ Kuing ' pang mao ' na ' seun ' a reup ku ' plo ' ri nang mha ' seumut ' pun ka ' ku ceu na ' . ⁴⁸ Yam ka ' na ' nuk a reup na ' , peue sok ka ' na ' ce ol ' reup na ' ing ' ke-unam ka tak sai na ' . Hawc ' ko ' , ce leuk ri ti yawo pal ka ' chak ' na ' seue ' a nang teng ' ri na ' . Ka ' un ' chak ' na ' ce seut ' ri tec a. ⁴⁹ Cu yam tisut ' na ' a ku kaw yeuhko ' "

yeut. In ' hpom na ' ce kaw lih leuk ri tec peue rai na ' ce heul ' hk'ai ' peue leupaws seumeu ' na ' ce. ⁵⁰ Hawc ' ko ' , nyon ri seue ' peue rai na ' ce nang dom ' ngawl vang ta ' ul ' ri yam cet rang ' ri na ' ."

⁵¹ Yesu ' Eun mhaing ' ce, "Leuceng pun pe ' lawng aen ' ce hawc ' aw?"

Ce top ' a, "Leuceng pun ye a hawc ' ."

⁵² Eun lah ' a ri ce, "Kop awn ' na, peue guil leukah ' ritroe ku ' pun ri rin lawng kuing ' pang mao ' ku peue na ' seun ' ce cawo ' nya hue ' hk'eung hk'il ' leumuil hk'u ' mae ' hk'eung hk'il ' leumuil hk'im ' ri na ' pucti lih hk'ai ' vang uin ' ce hk'eung ri na ' ."

Peue veng Nasaraet ' na ' un ' rap ce ri ti Yesu ' Eun

⁵³ Yam Yesu ' hawc ' Eun sangsawn ' ri leukah ' leupong ' aen ' ce na ' , Eun pucti heul ' hk'ai ' mawn ' na ' .

⁵⁴ Yam ing ' rot Eun nang yung ' ri na ' , Eun sangsawn ' peue nang sa ' la vang hk'o ' mun ' ce na ' . Peue na ' ce am ' nyawk ' . Ce lah ' a ri puri, "Peue awn ' Eun ci ' pun peuyha ' cu ' yi mae ' ti ' ca yeuh ku ' hk'o ' am ' aen ' ce neum tawngnhaw ' ? ⁵⁵ Meuh Eun kon ' eun laksa ' ma ' na ' eun, un ' meuh ka aw? Ma Eun ka muis Mari ' , awng ' me Eun na ' ce muis Yakop ' , Yo ' saep, Yu ' das ' mae ' Si ' mon, un ' meuh ka aw? ⁵⁶ Awng ' beun ' Eun na ' ut ' ce mae ' e ' gawm ' euc ' , un ' meuh ka aw? Eun ci ' pun ceu nang aen ' ce neum tawngnhaw ' ?" ⁵⁷ Ce nyu Eun pereng ri.

Daecti, Yesu ' Eun lah ' a ri ce, "Peue suip leukah ' Eun Peucawo ' na ' pun Eun munhpung ' ri na ' ri peue, daecti Eun hkuin ' pun hk'a ' naee vang ut ' ri na ' mae ' hk'a ' naee nyahk'ul ' ri na ' ."

⁵⁸ Kopti un ' kue ' ce hk'a ' yum ' na ' , Eun hkuin ' laee yeuh ku ' hk'o ' am ' na ' heun ' mawn ' .

Yo ' han cawo ' tuil ' hk'a ' cum ' yeum eun

14 Yam awn ' na, Herot ' cawo ' u ' peung kuing ' na ' pun eun ri mhawng ' lawng Eun Yesu ' na ' . ² Eun lah ' a ri mhai ' ri na ' ce, "Hkawn ' meuh Eun Yo ' han cawo ' tuil ' hk'a ' cum ' na ' yeum eun eun tang kuh ' im ' . Kop awn ' na, a yeuh Eun kue ' ti ' ca cang yeuh ku ' hk'o ' am ' na ' ce."

³ Kopti meuh a Herodi ' beun ' eun Hpi ' lip ' ku ' meuh awng ' me eun cawo ' Herot ' na ' , cawo ' Herot ' eun mheut ' ri seue ' Yo ' han eun nang htawng ' . ⁴ Kopti Yo ' han tawn lah ' eun a ri cawo ' Herot ' eun, "Kopti ti mi beun ' eun awng ' ri na ' ka meuh beun ' ri na ' , mi yeuh ku ' kleuc ' ri leukah ' ritroe na ' ."⁵ Cawo ' Herot ' eun saec ' na ' sum ' toh Yo ' han eun ko ' , daecti eun lhat ' ri

peue kuing' na' ce kopti peue kuing' na' sawn' peue Yo' han eun meuh peue suip leukah' Eun Peucawo' na'.

⁶Hk'a' naee pawe seunyi keut' eun cawo' Herot' na', kon' beun' ka Herodi' na' eun cha ri nanggal' ce peue chec' na', a htuk' hpum' eun cawo' Herot' nyawk'.
⁷Cawo' Herot' eun yeuh kati ri kaw tuil' ku' kon' beun' na' hk'o' eun na' ku ceu ka ri heun. ⁸Kon' beun' awn' eun hk'o' a hot' ku' ma eun lah' ka ri heun na'. Eun lah', "Sum' is' ui' cing' eun Yo' han cawo' tuil' hk'a' cum' na' seue' a nang paen' hpan na' tuil' a ri ui' maen' reu'." ⁹Hkun' haw' hkam' Herot' eun kuit nyhap' nyawk'. Daecti kopti hkam' eun a hawc' na' mae' kopti keue' eun ri buh ce peue chec' na', eun tuil' leukah' hot' seun' ku' hk'o' eun kon' beun' na'.
¹⁰Kop awn' na, Yo' han eun pun ri hkam' hk'a' reng' ngok ri na' nang htawng' na'. ¹¹Ce seue' cing' eun Yo' han na' nang paen' hpan na' ing' tuil' a ri kon' beun' na' eun. Kon' beun' na' eun ti ri tuil' a ri ma ri na' ka. ¹²Tapae' eun Yo' han na' ce ing' ti tu' eun na'. Ce heul' puing' a. Hawc' ko', ce heul' lah' a ri Yesu' Eun.

Yesu' tuil' Eun peue hpawn' heng' na' ce som'

¹³Yam Yesu' mhawng' Eun lawng awn' a na', Eun pawk reu na' pucti heul' hk'ai' mawn' na'. Heun ri mae' tapae' Eun na' ce va puri heul' koe ri vang yen' yong na'. Yam peue cum heun' na' pun ce ri mhawng' lawng ka na', ce pucti neum veng na' ce, ce long hk'a' hot' Eun heul'. ¹⁴Yam Yesu' lih Eun hk'ai' reu na', Eun nyu peue cum heun' na' ce. Eun tukyak ri ce nyawk'. Eun bai' peuyhat ce na' cuin.

¹⁵Yam rot a hk'a' pul na', tapae' Eun na' ce ing' lah' a ri Heun, "Maen' na' seungai ka, a kaw hk'aws' fec' hawc'. Kah peue aen' ce heul' eo' ri leuvaee ku' hk'a' nang yung' caonao' na' ce meun reu'."

¹⁶Yesu' Eun lah', "Hpaw ce ca' kaw lo' ri heul'. Pe' ri tuil' ce som' reu'."

¹⁷Tapae' na' ce lah', "Maen' na' gup kue' ye hka-womun' hpawn' meul' mae' ka' lal' tu'."

¹⁸Yesu' Eun lah', "Ti a ing' ri Ui' maen' reu'." ¹⁹Hawc' ko', Eun kah peue cum heun' na' ce mok' pang rip na'. Eun rap ri ti hkawomun' hpawn' meul' mae' ka' lal' tu' awn' na. Eun mung' mao' na'. Eun mun' keuting ri Peucawo' Eun. Hawc' ko', Eun ves hkawomun' na' Eun tuil' a ri tapae' na' ce. Tapae' na' ce gvah ri tuil' a ri peue cum heun' na' ce. ²⁰Na' peue pun ri hk'a' ri sak' gawm' euc' ri ko', tapae' na' ce seut' ku' hk'a' lheu' na' a pun kul' leual' teng' nuk. ²¹Peue hk'a' ku' hk'a' na' ce, me na' ce palkoe beun' mae' kon' nyom na' ce un' sawn' ce ko', ce kue' hpawn' heng' peue.

Yesu' long Eun pang hak' leuum'

²²Yam Yesu' buih am' la Eun peue cum heun' na' ce na', Eun kah tapae' ri na' ce lec reu na' bai heul' hk'a' teh' ka glu na'. ²³Yam Yesu' hawc' am' la Eun peue cum heun' na' ce na', Eun huk' hk'o' mun' pang gong na' koe. Yam duim' ka na', Eun ut' koe ri ka.

²⁴Daecti reu na' a pon tak sai na' heul' seungai hawc'. Kopti guil' na' htuip a reu ce na', ba leuum' na' a htuip reng reu ce na'.

²⁵Yam kaw a hk'aws' ceng' na', Yesu' Eun long pang hak' leuum' na' heul' ri ce. ²⁶Yam tapae' nyu ce long Eun pang hak' leuum' na', ce tok' seupa lhat' nyawk'. Ce aec' rak laws', "Oh', hpet'."

²⁷Daecti Yesu' Eun keulawn' leukah' mae' ce, "Yeuh hpum' pe' na' hat' han' reu'. Meuh ka Ui' ri, pawlaee lhat'."

²⁸Petru' eun lah' a ri Heun, "Cawo', a lawn meuh Mi ri neum ko', kah ui' heul' pang hak' leuum' na' ri Mi."

²⁹Yesu' Eun lah', "Heul' ri' sae."

Kop awn' na, Petru' eun pucti hk'ai' reu na' eun long pang hak' leuum' na' heul' ri Yesu' Eun. ³⁰Daecti yam nyu eun guil' na' reng nyawk' ka na', eun lhat' nyawk'. Yam buih kaw eun cum' na', eun klawng ri lah', "Cawo', teum' kawm ui'."

³¹Yesu' Eun keulawn' nyat' ti' ri jhawp' eun. Eun lah', "Peue kue' hk'a' yum' leng na' mi, a ci' meuh kop keunhaw' mi vae' kangkae."

³²Hawc' Yesu' Eun mae' Petru' lec ka reu na', guil' na' a ku yut' ri. ³³Peue ut' nang reu na' ce ing' seukluin ri faee' Yesu' Eun. Ce lah', "Meuh Mi taeng Kon' ai' Eun Peucawo' neum."

Yesu' bai' Eun peue peuyhat cuin nang veng Genesaret'

³⁴Yam tang ce glu na' heul' hk'a' teh' na', ce tah' reu na' keunam ka veng Genesaret' na'. ³⁵Yam peue ut' mawn' na' pawn ce meuh a Yesu' Eun na', ce ploe' lawng aen' a heul' hk'awp' kuing' ri na'. Peue va peue peuyhat na' ce ing' ri Heun. ³⁶Ce hk'o' Eun na' tuil' peue peuyhat na' ce paic' yawo duing' hk'o ri na'. Peue pun ri paic' a na' ce cuin gawm' euc' ri.

Ku' un' seunga'

¹⁵Peue Hparisae' mae' peue guil leukah' ritroe lih neum veng Yeru' salaem na' ing' mhaing' ce Yesu' Eun, ²"Tapae' Mi na' ce ci' yeuh keunhaw', ce vae' un' hot' ri yeuh ritroe ku' nang kawt tang' ce ri uin' na'? Ce hkuin' hkuc' ti' ri nanggal' ce hk'a' ku' hk'a'."

³Yesu' Eun top' a ri ce, "Kopti meuh a ritroe aen' a, a ci' meuh kop keunhaw' pe' vae' yeuh ku' kleuc' ri leukah' Eun Peucawo' na'?" ⁴Kopti Peucawo' lah' Eun, 'Hkopyawm' yumyam' ri makuiing' mi ka reu'.' [†]Eun ku lah', 'A' nhaw' lawn jha' makuiing' ri ka ko', kuing' eun ri pun ri yeum.' ^{††5}Daecti pe' lah', 'A' nhaw' lawn lah' a ri makuiing' ri ka, "Hk'eung kue' ri ui' ku' kaw kue' mun' pun pa' na' a meuh ku' ap tan ri Peucawo' Eun hawc'." ⁶Kop awn' na, peue awn' eun un' tu-til' munhpung' ri makuiing' ri ka. Kop awn' na, pe' yeuh leukah' Eun Peucawo' na' hk'o' hk'awng' ri jhawp' pe' ri ti ritroe pe' na'.' ⁷Peue cang chi' lai na' pe', ku' I' saya' tamnai eun lawng peue leukah' seunga' hpum' vok' seun' pe' ri na' a cawp' nyawk'. A tem' ri lah',

⁸'Peue aen' suk' seun' ce Ui' ri moeng ri na' palkoe, daecti hpum' ce na' a seungai Ui' nyawk'.

⁹Fae' ce Ui' na' a meuh ku' hk'o' hk'awng', ku' sangsawn' ce na' a meuh yawo ritroe ku' peue sangsawn' peue puri na'.' [‡]

¹⁰Hawc' ko', Yesu' Eun klawng peue cum heun' na' ce ing' ri ti. Eun lah', "Leuceng ri yawng ku' lah' Ui' na' reu', ^{††}'Ku' ing' lec hk'a' naee moeng peue na' a hkuin' yeuh peue un' seunga', daecti meuh a ku' pucti lih hk'ai' moeng peue na' yeuh a peue un' seunga'.'" ^{†††}

¹²Hawc' ko', tapae' na' ce mhaing' Eun, "Yam peue Hparisae' na' mhawng' ce leukah' awn' a na', ce seungeueung' nyawk' na', yawng Mi a yeut aw'?"

¹³Eun top' a, "Kleum' ku' Kuing' Ui' Cawo' ut' kuing' pang mao' na' un' jheum' Eun na', a kaw pun ri ruic ri tec ri gawm' res ri na' ku kleum'. ¹⁴Tae' ce reu'. Meuh ce peue teuk' va peue ngai' lec'. Peue ngai' lec' na' ka lawn teuk' va puri long hk'a' ko', kaw ka heul' hk'uic' nang hk'ok gawm' lal' peue ri."

¹⁵Petru' eun lah', "Hk'o' Mi lah' ye mhawng' vangdoh' ka leukah' leupong' aen' na."

¹⁶Yesu' Eun mhaing' ce, "Un' nang leuceng pun pe' a aw? ¹⁷Ku' lec nang moeng peue na' lih a nang keuteul na'. Hawc' ko', a pucti heul' hk'ai' tu' peue na', un' nyu pe' a aw? ¹⁸Daecti ku' lih neum moeng na' lih a neum hk'a' naee hpum' na'. Ceu nang aen' ce a yeuh peue un' seunga'. ¹⁹Kamkuit rai, toh peue, len' cu, hkuin' nawng' tang', ra hk'eung, hkam' sa' hki' un' kue' un' meuh na' mae' peusah' nyoe peue aen' ce a lih neum hpum' na'. ²⁰Aen' ce a yeuh peue na' peue un' seunga'. Daecti un' hkuic' ti' ri hk'a ku' hk'a na' a hkuin' yeuh peue un' seunga'."

Hk'a' yum' ka beun' kuing' Hkanan

²¹Yesu' Eun pucti heul' hk'ai' mawn' na', Eun heul' lec eung ka veng Tai' ra' mae' veng Si' don na'. ²²Beun' peue Hkanan ti peue ut' mawn' na' ka ing' klawng ri hk'o' hk'ang a ri Yesu' Eun, "Cawo', Kon' ai' eun Davit', hk'o' Mi tukyak ri ui'. Kon' beun' ui' na' pun eun ri hkam' hk'a' tukhka nyawk' na' kopti seuca' rai na' lec ka eun."

²³Yesu' Eun hkuin' top' leukah' ka na' saec' ti moeng. Tapae' Eun na' ce ing' lah' a ri Heun, "Ra ri tec beun' awn' ka ing' reu', kopti hot' ka ri suksak e'."

²⁴Yesu' Eun top' a, "Peucawo' cus' Eun Ui' lih pun kon' yung' rai' ce peue I' sarela' na' palkoe."

²⁵Beun' awn' ka ing' seukluin ri lah' a nanggal' Eun na', "Cawo', hk'o' Mi teum' kawm ui'."

²⁶Yesu' Eun top' a, "Nyon ku' hk'a ce kon' nyom na' ri so' na' hpaw a ca' cawp'."

²⁷Beun' na' ka lah', "Cawo', ku' lah' Mi na' cawp' ka yeut. Daecti so' na' pun a ri hk'a ku' hk'a peuc' hk'uic' hk'a' ruim hpuin' eun cawo' ri na'."

²⁸Yesu' Eun top' a, "Beun', hk'a' yum' pa' na' keuting nyawk' ka, kah a meuh seun' ku' hk'o' pa' na' reu'." Yam awn' na, kon' beun' ka beun' awn' eun keulawn' cuin.

Yesu' bai' Eun peue peuyhat heun' peue cuin

²⁹Yesu' Eun pucti heul' hk'ai' mawn' na', Eun hot' keunam ka glu Galilae' na'. Hawc' ko', Eun huk' pang gong na'. Eun mok' ri ka. ³⁰Peue cum heun' na' ce ing' ri Heun. Ce va peue ti' cung lu, peue ngai' lec', peue nga' mae' peue peuyhat heun' peue na' ce ing' uin' ce mae' cung Eun na'. Eun ku bai' ce cuin. ³¹Yam peue cum heun' na' pun ce ri nyu peue nga' na' tang cang leukah' ce, peue ti' cung lu na' tang cang long ce hk'a', peue ngai' lec' na' tang cang nyu ce hk'a' ri na', ce am' nyawk'. Ce suk' seun' Peucawo' ce peue I' sarela' na' Eun.

Yesu' tuil' Eun peue hpawn' heng' ce hk'asom'

³²Yesu' Eun klawng tapae' ri na' ce ing' ri ti. Eun lah', "Tukyak Ui' ri peue aen' ce, ut' ce mae' Ui' pun a loe' seunyi hawc'. Ce hkuin' kue' ku' hk'a. Ui' hkuin' sum' kah ce ing' yam kawng' buih sum' som' ce na'. Na' ce cang kluit' hot' lang' hk'a' ri."

³³Tapae' Eun na' ce lah', "Vang seungai htan' awn' na, e' ci' kaw pe sok ri tuil' peue peunaw' peunheun' na' ce hk'a hkawomun' hk'o' ce hk'a' tawngnhaw'?"

† Pucti heul' 20:12; Sawng' leukah' mun' 5:16 †† Pucti heul' 21:17; Fae' 20:9 ‡ I' saya' 29:13

³⁴Yesu' Eun mhaing' ce, "Pe' ci' kue' hkawomun' a' neng meul'?"

Ce top' a, "Kue' e' hkawomun' a' res meul' mae' ka' aet' peunaeng'."

³⁵Eun kah peue cum heun' na' ce mok' pang keute' na'. ³⁶Hawc' ko', Eun rap ri ti hkawomun' a' res meul' na' mae' ka' na'. Yam hawc' mun' keuting Eun ri Peucawo' Eun na', Eun ves ri tuil' a ri tapae' ri na' ce. Ce ku gvah ri tuil' a ri peue cum heun' na' ce. ³⁷Peue pun ri hk'a ri sak' ku peue. Hawc' ko', tapae' na' ce eo' ri seut' ku' hk'a lheu' na' a pun a' res teng' nuk. ³⁸Peue hk'a ku' hk'a na' ce kue' hpawn' heng' peue. A hkuin' sawn' beun' mae' kon' nyom na' ce. ³⁹Hawc' Yesu' kah Eun peue cum heun' na' ce keutah ing' na', Eun pawk reu na' heul' nang eung ka veng Magadan na'.

Peue Hparisae' na' hk'o' ce ri nawk het' keuting

16 Peue Hparisae' na' mae' peue Sadu' kae' na' ce ing' long ri nawk Yesu' Eun. Ce hk'o' Eun yeuh ri nawk het' keuting lih neum kuing' pang mao' na'.

²Yesu' Eun top' a, "Yam rot a hk'a' pul na', pe' lah', 'Kopti mao' na' seurak' ka, mao' na' a kaw hk'lel' hk-lawc'." ³Yam rot a hk'a' ngup na', pe' lah', 'Kopti mao' na' seurak' duim' lawng ka, seunyaen' kaw a guil'.' Pe' keue' ri mao' na' pe' cang tamnai ku' kaw a meuh na'. Daecti het' keuting ka sa' hkat' meuyam na' pe' hkuin' cang ti vangdoh' ka na' lih. ⁴Peue cu aen' meuh ce cat peue rai mae' ce meuh peue fuin Peucawo' Eun. Ce hot' ri sok het' keuting na', daecti a lawn un' meuh yawo het' keuting eun Yo' na' na' ko', het' keuting seubu na' un' tuil' a ri ce saec' ti ceu." Hawc' ko', Yesu' Eun gah' heul' hk'ai' ce.

Paeng ce peue Hparisae' mae' peue Sadu' kae'

⁵Yam tang ce glu na' heul' hk'a' teh' na', tapae' na' ce pil kaw ri pin' hkawomun' heul'. ⁶Yesu' Eun lah' a ri ce, "Uin' sati ri ri paeng ce peue Hparisae' mae' peue Sadu' kae' na' reu'."

⁷Tapae' na' ce lah' a ri puri, "Kopti un' pin' e' hka-womun' heul' na', Eun lah' a yeuh keutit'."

⁸Kopti Yesu' yawng Eun ku' lah' ce ri puri na', Eun mhaing' ce, "Peue kue' hk'a' yum' leng na' pe', a ci' meuh kop keunhaw' pe' vae' lah' puri mhawng' lawng un' kue' ri hkawomun' na'?" ⁹Un' nang leuceng pun pe' a aw? Lawng ka hkawomun' hpawn' meul' tuil' peue hpawn' heng' peue na' ce hk'a' a hawc' ko' pe' ci' tang seut' pun ku' lheu' ka na' a' neng teng' na', ¹⁰a' ko' lawng ka hkawomun' a' res meul' tuil' peue

hpawn' heng' peue na' ce hk'a' a hawc' ko' pe' ci' tang seut' pun ku' lheu' ka na' a' neng teng' na', un' laee pawp pe' a aw? ¹¹A ci' meuh kop keunhaw' pe' vae' un' yawng un' lah' Ui' lawng ka hkawomun' na'?

Daecti kah Ui' pe' uin' sati ri ri paeng ce peue Hparisae' na' mae' peue Sadu' kae' na'." ¹²Hawc' ko', ce kawn' leuceng pun un' kah Eun ce uin' sati ri ri paeng seue' ri nang hkawomun' na', daecti Eun kah ce uin' sati ri ri leukah' sangsawn' ce peue Hparisae' na' mae' peue Sadu' kae' na'.

Petru' rap eun ri ti Yesu' meuh Eun Hkrit

¹³Yam heul' rot ce nang eung ka veng Kae' sari' Hpi' li' pi' na', Yesu' Eun mhaing' tapae' ri na' ce, "Peue ci' lah' Kon' ai' peue na' Eun meuh a' nhaw'?"

¹⁴Ce top' a, "Ngon' lah' peue Mi meuh Yo' han cawo' tuil' hk'a' cum' na' eun, ngon' peue lah' Mi meuh E' li' ya eun, ngon' peue lah' Mi meuh Yerami' eun, a' ko' peue suip leukah' Eun Peucawo' ti ri peue na' eun."

¹⁵Yesu' Eun mhaing' ce, "Pe' ri sae, pe' ci' lah' Ui' meuh a' nhaw'?"

¹⁶Si' mon Petru' eun top' a, "Meuh Mi Hkrit. Mi meuh Kon' ai' Eun Peucawo' Cawo' a' yu im' na' Eun."

¹⁷Yesu' Eun lah' a ri heun, "Si' mon kon' me eun Yo' na' na' mi, kah mi pun mun' reu'. Kopti peue hpaw peue ca' tuh' mi nyu yawng lawng aen' na, daecti Kui-ing' Ui' ut' nang kuing' pang mao' na' tuh' Eun mi nyu yawng a. ¹⁸Ui' lah' a ri mi, meuh mi Petru' †. Hk'a' pang seumu aen' a, Ui' kaw tang' muk kon' Hkrit ri na' ri ka. Leuva' ka kuing' yeum †† na' a hkuin' kaw laee cang pe muk kon' Hkrit aen' na. ¹⁹Kaw Ui' tuil' pakhkeuca' ka kuing' pang mao' na' ri mi. Ku' un' kah mi yeuh pang bhen' keute' na', a ku kaw un' cang yeuh ri nang kuing' pang mao' na'. Ku' kah mi yeuh ri pang bhen' keute' na', a ku kaw cang yeuh ri nang kuing' pang mao' na' yeut." ²⁰Hawc' ko', Yesu' Eun tuil' leukah' ri tapae' ri na' ce, un' kah ce lah' peue mhawng' meuh ri Hkrit na'.

Yesu' lah' Eun ce mhawng' lawng kaw ri pun ri yeum

²¹Tang' ri yam awn' na, Yesu' Eun tang' ri ris tapae' ri na' ce mhawng' lawng ku' kaw Eun kah ri huk' nang veng Yeru' salaem na' Eun kaw kah ri pun ri hkam' ku' tukhka na' heun' ceu ri nang kawt, ro' peue jhawp' rit na' mae' peue guil leukah' ritroe na' ce. Eun kaw pun

† Vangdoh' ka na' a lah', seumu. †† A' ko' keutong' nyarok

ri hkam ' toh peue ri. Loe ' seunyi ti seunyi na ', Eun na ' tang kuh ' im '.

²²Petru ' eun yat Yesu ' Eun heul ' hk'a ' ti plak ' na ', eun is ' Yesu ' Eun, "Cawo ', ca ' kaw a duing meuh. Ku ' yeuh keutit ' na ' hpaw a ca ' kaw duing meuh ri Mi."

²³Yesu ' Eun hpawt ' ri keue ' lah ' a ri Petru ' eun, "Satan, hton ' mi ing ' hk'a ' kui ' reu '. Meuh mi seumu kaw yeuh Ui ' seuduih ri htang ' meul. Hpaw mi ca ' kuit seun ' ku ' kuit Eun Peucawo ' na ', daecti kuit mi seun ' peue ko '."

²⁴Hawc ' ko ', Yesu ' Eun lah ' a ri tapae ' ri na ' ce, "A ' nhaw ' lawn sum ' hot ' Ui ' ko ', eun kaw pun ri tec alo ri, klawm ' kleum ' rawng ' tawp ' ri na '. Hawc ' ko ', hot ' Ui ' heul '. ²⁵Kopti a ' nhaw ' lawn sum ' a ' yu pon ko ', eun kaw pun ri sum a ' yu ri. Daecti a ' nhaw ' lawn sum a ' yu ri na ' pun Ui ' ko ', eun kaw pun a ' yu pon.

²⁶Kopti saec ' meuh a ' nhaw ', eun saec ' na ' pun ku ' kue ' pang bhen ' keute ' na ' meuh is ' ti gawm ' euc ' ka, daecti eun lawn sum a ' yu ri na ' ko ', a ci ' kaw kue ' mun ' keunhaw ' pun eun? A ' ko ', a ' nhaw ' ci ' kaw cang ti keunhaw ' a leuploh ' civit ri na ' ? ²⁷Kopti Kon ' ai ' peue na ' kaw Eun lih hk'a ' naee munhpung ' Eun Kuiing ' ri na ' mae ' in ' hpom ri na ' ce tiduih '. Yam awn ' na, Eun kaw tuil ' lapsawng ' na ' ri peue hot ' seun ' ku ' sawng ' yeuh meun peue na '. ²⁸Kaw Ui ' lah ' a ri pe ' neumneum, peue cawng maen ' na ' ce ngon ' nanggal ' yam un ' nang yeum ce na ', ce kaw pun ri nyu Kon ' ai ' peue na ' lih Eun nang kuing ' ri na '."

Yesu ' plin ' Eun ruprang ri

17 Hawc ' ka les seunyi na ', Yesu ' Eun va Petru ', Yakop ' mae ' Yo ' han awng ' eun Yakop ' na ' ce huk ' pang gong lhung ' vang cang ut ' koe ce ri ka na '. ²Yam awn ' na, ruprang Eun na ' a plin ' ri nanggal ' ce na '. Buh Eun na ' a ceng ' seun ' ceng ' ka seunyi na '. Hk'eung Eun na ' a paing hk'aes ' seun ' ku ' ceng ' na '. ³Mo ' se eun mae ' E ' li ' ya eun ka ku pucti nanggal ' ce na ', ka u Yesu ' Eun.

⁴Hawc ' ko ', Petru ' eun lah ' a ri Yesu ' Eun, "Cawo ', ut ' e ' maen ' na ' chak ' ka. A lawn cawp ' alo Mi ko ', kaw ui ' pleng ' tup ' loe ' lhang ', pun Mi ti lhang ', pun Mo ' se ti lhang ', pun E ' li ' ya ti lhang '."

⁵Yam buih leukah ' eun na ', putum ' ceng ' na ' a lih ghuim ' ce. A kue ' seng ' laws ' lih neum putum ' na ', "Peue aen ' meuh Eun Kon ' ai ' leumeus ' Ui ' nyawk '. Eun hit ' ri hpum ' Ui ' nyawk '. Leuceng ri ti leukah ' Eun na ' reu '."

⁶Yam tapae ' na ' pun ce ri mhawng ' a na ', ce lhat ' nyawk '. Ce nghup ' buh ri na ' pang keute ' na '. ⁷Daecti Yesu ' Eun ing ' paic ' ce. Eun lah ', "Kuh ' reu '. Pawlae

lhat '." ⁸Na ' ce vuh ri keue ' ko ', ce hkuin ' laee nyu peue seubu, ce nyu yawo Yesu ' Eun koe.

⁹Yam buih lih ce neum pang gong na ', Yesu ' Eun tuil ' leukah ' ri ce, "Pawlae lah ' a ' nhaw ' mhawng ' lawng ku ' pun pe ' ri nyu na ' saec ' ti peue rot ti yam Kon ' ai ' peue na ' tang kuh ' im ' Eun hk'ai ' vang yeum ri na '."

¹⁰Tapae ' na ' ce mhaing ' Eun, "A ci ' meuh kop keunhaw ' peue guil leukah ' ritroe na ' ce vae ' lah ' E ' li ' ya eun kaw kah ri lih nanggal ' ?"

¹¹Yesu ' Eun top ' a, "Meuh ka neum, E ' li ' ya lih mhe ' eun ri pleng ' ku ceu na ' gawm ' euc ' ka. ¹²Daecti Ui ' lah ' a ri pe ', E ' li ' ya † lih eun hawc '. Peue na ' peue un ' yawng eun. Ce yeuh ku ' sum ' yeuh ri na ' ri heun hawc '. Saec ' meuh Kon ' ai ' peue na ' Eun ku kaw pun ri hkam ' hk'a ' tukhka na ' nang dak ti ' ce na ' yeut." ¹³Hawc ' ko ', tapae ' na ' ce leuceng pun buih lah ' Eun lawng eun Yo ' han cawo ' tuil ' hk'a ' cum ' na ' eun.

Yesu ' bai ' Eun kon ' nyom me seuca ' rai a lec eun

¹⁴Yam lih rot ce ri peue cum heun ' na ' ce na ', a kue ' peue ti peue eun ing ' seukluin ri nanggal ' Eun Yesu ' na '. ¹⁵Eun lah ', "Cawo ', hk'o ' Mi tukyak ri kon ' me ui ' na ' eun. Kue ' eun peuyhat lom, eun tukhka nyawk '. Eun keucu hk'ui ' nang leuum ' hk'ui ' nang ngawl. ¹⁶Ui ' va eun heul ' ri tapae ' Mi na ' ce, daecti ce bai ' eun ce hkuin ' pun eun cuin."

¹⁷Yesu ' Eun top ' a, "Ah ', peue un ' kue ' hk'a ' yum ' cang lho ' lhe ' cu aen ' pe ', Ui ' ci ' kawn ' kaw ut ' ling ' mae ' pe ' a ' neng? Ui ' ci ' kawn ' kaw yeun ' hkam pun pe ' a ' neng? Va kon ' nyom na ' eun ing ' maen ' reu '."

¹⁸Hawc ' ko ', Yesu ' Eun is ' seuca ' rai na '. A ku pucti heul ' hk'ai ' kon ' nyom me awn ' eun. Kon ' nyom awn ' eun keulawn ' cuin.

¹⁹Yam Yesu ' ut ' Eun ti peue koe na ', tapae ' na ' ce ing ' mhaing ' Eun, "A ci ' meuh kop keunhaw ' ye vae ' un ' cang ra ri tec seuca ' awn ' a pun?"

²⁰Eun top ' a, "Meuh a kopti kue ' pe ' hk'a ' yum ' leng na '. Ui ' lah ' a ri pe ' neumneum, pe ' lawn kue ' hk'a ' yum ' keuteul seumal ka hpapu na ' ko ', pe ' kaw cang lah ' a ri gong aen ' a, ' Sat ri heul ' teh ' reu '." A ku kaw sat ri heul ' yeut. A hkuin ' kaw kue ' ku ' kaw pe ' yeuh un ' pun na ' saec ' ti ceu.

²¹Seuca ' yeuhki ' na ' a lawn un ' meuh yawo eut ' ku ' hk'a ri hk'o ' mun ' ra ri tec a na ' ko ', ra ri tec un ' pun a."

† Mahtae 11:14 †† Nang htawm Seunga ' na ' ngon ', un ' kue ' a nambat aet ' 21.

Yesu ' tang lah ' Eun lawng kaw ri pun ri yeum na '

²² Yam ut ' ce tiduih ' nang kuing ' Galilae ' na ' , Yesu ' Eun lah ' a ri tapae ' ri na ' ce, "Kon ' ai ' peue na ' kaw Eun pun ri hkam ' hk'a ' fuin ap peue ri nang ti ' peue.

²³ Peue na ' toh Eun. Loe ' seunyi ti seunyi na ' , Eun na ' tang kuh ' im ' ."

Seue ' hkawn ' ka nya hk'o ' mun ' keuting

²⁴ Hawc ' ka yam rot ce nang veng Kapeni ' um na ' , peue cep ' hkawn ' ka nya hk'o ' mun ' keuting na ' ce ing ' mhaing ' Petru ' eun, "Seura ' mi na ' kaw Eun un ' seue ' hkawn ' ka nya hk'o ' mun ' keuting † na ' aw?"

²⁵ Petru ' eun top ' a, "Kaw Eun seue ' a yeut."

Yam Petru ' ing ' lec eun nang nya na ' , Yesu ' Eun lah ' a nanggal ' , "Si ' mon, mi ci ' kuit a yeuh sa ' nhaw ' , hkun ' haw ' hkam ' ka bhen ' keute ' na ' ce ci ' cep ' hkawn ' ri a ' nhaw ' ? Cep ' ce ri kon ' ri na ' ce aw? A ' ko ' cep ' ce ri peue kuing ' na ' ce aw?"

²⁶ Petru ' eun top ' a, "Cep ' a ri peue kuing ' na ' ce yeut."

Yesu ' Eun lah ' a ri heun, "Yeuh keutit ' ko ' , kon ' ce na ' na ' ce un ' pun ri seue ' .²⁷ Daecti punta kaw e ' un ' cang yeuh ce seungeueng ' ri ti na ' , mi na ' heul ' met ' ka ' nang glu na ' reu ' . Ka ' la mi ri pun nanggal ' na ' vas mi nawk moeng ka na ' , mi na ' nyu paec pun ' htaep ' . Mi na ' ti ri heul ' seue ' a meuh hkawn ' ka nya hk'o ' mun ' keuting na ' pun mi mae ' pun Ui ' reu ' ."

A ' nhaw ' ci ' keuting hk'ai ' peue

18 Yam awn ' na, tapae ' na ' ce ing ' mhaing ' Yesu ' Eun, "Nang kuing ' pang mao ' na ' a ' nhaw ' ci ' keuting hk'ai ' peue?"

² Eun klawng kon ' nyom aet ' ti peue uin ' eun cawng nang ngon ' ce na ' .³ Eun lah ' , "Kaw Ui ' lah ' a ri pe ' neumneum, pe ' lawn un ' leuploh ' hpum ' ri seun ' kon ' nyom aet ' na ' ce ko ' , pe ' hkuin ' kaw duing pun ri lec nang kuing ' pang mao ' na ' .⁴ Kop awn ' na, a ' nhaw ' lawn yeuh hpum ' ri onawn ' seun ' kon ' nyom aet ' aen ' eun ko ' , eun kaw meuh nang keuting hk'ai ' peue nang kuing ' pang mao ' na ' .

⁵ A ' nhaw ' lawn rap ri ti kon ' nyom seun ' aen ' eun hk'a ' naee muis Ui ' na ' ko ' , eun ku rap ri ti Ui ' yeut.⁶ Daecti kon ' nyom aet ' yum ' Ui ' ti ri peue na ' a ' n-haw ' lawn yeuh eun yeuh map ' na ' ko ' , mawt seumu maw ' meul ' keuting na ' pit ngok eun na ' ploer ' eun lec vang rui ' ka mha ' seumut ' na ' , a na ' jaen chak ' .

† Hk'a ' naee leukah ' Helasa ' na ' , hkawn ' lah ' ka na ' a meuh pun ' htaep ' .

⁷ Kopti meuh a ceu nang aen ' yeuh a peue na ' peue yeuh map ' na ' , bhen ' keute ' na ' a pun ri hkam ' hk'a ' jha ' na ' . Daecti peue yeuh ceu nang aen ' ce keut ' meuh pucti lih na ' , kaw ce pun ri hkam ' hk'a ' jha ' na ' .⁸ Ti ' mi na ' , a ' ko ' cung mi na ' a lawn yeuh mi yeuh map ' na ' ko ' , reng ' ri tec a reu ' . Mi saec ' na ' ti ' cung lut ' pun ri lec vang a ' yu im ' cot ' cu na ' , a na ' jaen chak ' hk'ai ' kue ' mi ti ' cung lal ' plak ' mi pun ri lec vang ngawl ha ' cot ' cu na ' .⁹ Ngai ' mi na ' a lawn yeuh mi yeuh map ' na ' ko ' , koc ri tec a reu ' . Mi saec ' na ' kue ' yawo ngai ' ti ' plak ' pun ri lec vang a ' yu im ' cot ' cu na ' ko ' , a na ' jaen chak ' hk'ai ' kue ' mi ngai ' lal ' plak ' mi pun ri nyon ri lec nang keutong ' nyarok ngawl na ' .

Leukah ' leupong ' lawng kon ' yung ' rai '

¹⁰ Uin ' sati pe ' meulamlam ri reu ' . Pawlaee va ri un ' nawpsang ri kon ' nyom aet ' aen ' ce saec ' ti peue. Kaw Ui ' lah ' a ri pe ' neumneum, sawng ' kue ' ce ri is ' in ' h-pom meun ut ' nanggal ' Eun A ' kuiing ' Cawo ' ut ' nang kuing ' pang mao ' na ' Eun. In ' hpom ce na ' ce buih nom ' nawk ce laleung. ††

¹² Pe ' ci ' kuit a yeuh sa ' nhaw ' ? Peue ti ri peue eun lawn kue ' kon ' yung ' tipak ' tu ' daecti a na ' rai ' ti tu ' ko ' , kaw eun un ' hk'ah ' ku ' seudim ' kul ' seudim ' tu ' na ' pang gong na ' , hawc ' ko ' , eun na ' un ' eo ' sok ri nyu ku ' rai ' heul ' ti tu ' na ' aw?¹³ Kaw Ui ' lah ' a ri pe ' neumneum, eun lawn tang nyu kon ' yung ' rai ' awn ' a ko ' , eun na ' ren ' kaw nyawk ' mae ' ku ' rai ' heul ' ti tu ' na ' lheu ' ku ' seudim ' kul ' seudim ' tu ' un ' rai ' na ' ce.¹⁴ Seun ' awn ' a ko ' , Kuiing ' pe ' Cawo ' ut ' nang kuing ' pang mao ' na ' Eun ku un ' sum ' kah kon ' nyom aet ' aen ' ce rai ' heul ' saec ' ti peue.

Ec ' awng ' yeuh ku ' kleuc ' ri e '

¹⁵ Ec ' awng ' mi na ' eun ti ri peue eun lawn yeuh ku ' kleuc ' na ' ri mi ko ' , yam meuh a pa ' ri koe na ' mi na ' heul ' hkop eun mhawng ' ku ' kleuc ' eun na ' ri heun. Eun lawn leuceng ri ti leukah ' mi na ' ko ' , mi na ' tang pun eun keutah meuh ec ' awng ' ri bae.¹⁶ Daecti eun lawn un ' leuceng ri ti leukah ' mi na ' ko ' , punta leukah ' lah ' ri ku moeng na ' kaw a kue ' nang meuh sa ' hki ' ka lal ' loe ' moeng na ' ‡ , va mi is ' pu nang meuh sa ' hki ' ka ti peue, a ' ko ' lal ' peue reu ' .¹⁷ Eun lawn kaw n ' un ' leuceng leukah ' ce na ' ko ' , lah ' muk kon ' Hkrit na ' ce mhawng ' a reu ' . Saec ' meuh leukah ' ce muk kon ' Hkrit na ' eun lawn kaw n ' un ' leuceng a ko ' , yeuh ri sawn '

†† Htawm Seunga ' na ' ngon ' , kue ' a nambat aet ' II. A lah ' , "Kon ' ai ' peue na ' lih Eun punta kaw Eun teum ' kawm peue rai ' heul ' na ' ce lawtpon."

‡ Sawn ' leukah ' mun ' 19:15

eun meuh seun' peue un' meuh peue ceu Yu' da na' ce, a' ko' seun' meuh eun peue cep' hkawn' na' ce reu'.

¹⁸Ui' lah' a ri pe' neumneum, ku' un' kah mi yeuh pang bhen' keute' na', a ku kaw un' cang yeuh ri nang kuing' pang mao' na'. Ku' kah mi yeuh pang bhen' keute' na', a ku kaw cang yeuh ri nang kuing' pang mao' na' yeut.

¹⁹Ui' kaw tang lah' a ri pe' bae, pang bhen' keute' na' peue lal' peue na' pa' lawn hpum' hkaw puri hk'o' ku' ti ri ceu ko', Kuing' ut' nang kuing' pang mao' na' Eun kaw yeuh ri tuil' seun' ku' hk'o' pa' na' ri pa' yeut. ²⁰Kopti a saec' na' meuh tawngnhaw' na' peue lal' loe' peue na' ce lawn hk'om puri hk'a' naee muis Ui' na' ko', Ui' kaw ut' mae' ce mawn' yeut."

Leukah' leupong' lawng mhai' un' cang tukyak

²¹Hawc' ko', Petru' eun ing' mhaing' Yesu' Eun, "Cawo', ec' awng' ui' na' ce lawn yeuh map' na' ri ui' ti pok hawc' ti pok ko', ui' ci' na' kah ri ploer' map' ce na' a' neng pok? Rot a' res pok aw?"

²²Yesu' Eun top' a, "Ui' lah' a ri pe' a hkuin' kaw nang meuh a' res pok koe, daecti a' res pok a' reskul' pok.

²³Kop awn' na, kuing' pang mao' na' seun' a hkun' haw' hkam' ti peue na' sum' sawn' eun ca' lang' ri na' hawc' euc' ri mhai' ri na' ce. ²⁴Yam buih tang' eun ri sawn' ca' lang' na', peue va mhai' kue' ku' ma kul' lan htaep' † ri heun na' eun ing' ri heun. ²⁵Peue awn' kopti sai' un' laee pun eun ku' ma ri na', hkun' haw' hkam' na' eun tuil' leukah' ri kah mhai' ri na' eun heul' ti ri paing' tu' eun hkawn' a bae beun' kon' eun mae' hk'eung vahtu' ku' kue' eun na' ce gawm' euc' sai' ku' ma eun na' ri ka.

²⁶Mhai' awn' eun seukluin ri hk'o' hk'ang a nanggal' eun hkun' haw' hkam' na', 'Cawo', hk'o' mi yeunyang' a ri ui'. Kaw ui' sai' ku' ma ri na' gawm' euc' ka yeut. ²⁷Hkun' haw' hkam' eun tukyak ri heun. Eun a' nuyat ku' ma eun na' hawc' ri heun. Hawc' ko', eun ploer' eun.

²⁸Daecti yam mhai' awn' puc eun ri heul' hk'ai' mawn' na' eun pun ri nyu mhai' pu eun ku' seubu ku' kue' ku' ma tipak' htaep' ri ti na' eun na', eun yat ri met' ri rui' rah' ngok eun na' eun lah', 'Sai' ku' ma mi ri ui' na' vaeevae reu'.

²⁹Mhai' pu eun awn' eun seukluin ri hk'o' hk'ang a ri heun, 'Hk'o' mi yeunyang' a ri ui'. Kaw ui' sai' ku' ma ri na' gawm' euc' ka yeut.'

† A' ko' leskul' lan denarian, ti denarian na' a meuh ngos reng na' ti seun-yi.

³⁰Daecti eun hkuin' yawm' ri ri heun. Eun ti ri heul' seue' hkawn' eun nang htawng' na' rot ti yam sai' eun ku' ma ri na' gawm' euc' ka na'. ³¹Yam mhai' ku' seubu na' nyu ce ku' yeuh eun na', ce nyu a chat nyawk'. Ce va puri heul' ri hkun' haw' hkam' eun. Ce ris eun mhawng' lawng ku' mhai' awn' yeuh eun na' ce gawm' euc' ka.

³²Hawc' ko', hkun' haw' hkam' na' eun klawng mhai' awn' eun ing' ri ti. Eun lah' a ri heun, 'Mhai' rai na' mi, kopti hk'o' hk'ang mi a ri ui' na', ui' a' nuyat ku' ma mi na' hawc' gawm' euc' ka ri mi. ³³Seun' tukyak ui' ri mi na', kaw mi un' htuk' ri tukyak ri mhai' pu mi na' eun yeut aw?' ³⁴Hkun' haw' hkam' na' eun seungeueng' nyawk'. Eun ap peue awn' eun ri ro' ka htawng' na' eun, kah eun keunhap' eun rot ti sai' eun ku' ma ri na' hawc' euc' ka.

³⁵Seun' awn' na, pe' ri ku peue pe' lawn un' ploer' map' ce ec' awng' ri na' ri hpum' ri na' ko', Kuing' ui' ut' nang kuing' pang mao' na' Eun ku kaw yeuhko' ri pe' yeut."

Hk'a' tec puri

19 Yam Yesu' hawc' Eun lah' ri leukah' aen' ce na', Eun pucti heul' hk'ai' kuing' Galilae' na'. Eun heul' rot kuing' Yu' da hk'a' teh' ka klong' Yaw' dan na'. ²Peue cum heun' na' ce hot' Eun heul'. Eun bai' ce cuin teh'.

³Peue Hparisae' na' ce ngon' ce ing' long ri nawk Eun. Ce mhaing' Eun, "A saec' na' meuh lawng keunhaw' na' un' lah', me tec beun' ri na' kleuc' ka ritroe na' aw?" ††

⁴Yesu' Eun top' a, "Un' duing lip pe' a aw, 'Tang' neum yam bhen' keute' na' hpanpleng' a ri na', Peucawo' hpanpleng' Eun me mae' beun'. ⁵Eun lah', 'Kop awn' na, me na' eun kaw gah' hk'ai' makuing' ri ka. Eun heul' kui' ri mae' beun' ri na' eun. Ka kaw meuh nham' keune keuhti.' ⁶Kop awn' na ka hkuin' kaw laee meuh lal' peue, daecti ka meuh yawo ti peue. Kop awn' na, ku' Peucawo' kui' Eun ka meuh tiduih' hawc' na', a' nhaw' pawlaee yah ka hk'ai' puri."

⁷Ce tang mhaing' Eun, "Yeuh keutit' ko', a ci' meuh kop keunhaw' Mo' se eun vae' tuil' leukah' lah', 'Me na' eun lawn tem' ri tuil' licmat tec puri ko', cang tec eun beun' ri yeut.'"

⁸Yesu' Eun lah' a ri ce, "Mo' se tuil' eun ahkvang kah pe' cang tec beun' ri na' a meuh kopti hpum' cen' pe' na'. Daecti yamla ka na' hpaw a ca' yeuh keutit'. ⁹Ui' lah' a ri pe', 'Pon hk'ai' meuh a kopti len' cu na' a' n-

†† Yamla 1:27† Yamla 2:24

haw' lawn tec beun' ri na' eun heul' ti ri is' beun' seubu ko', me awn' meuh eun peue len' cu."

¹⁰Tapae' na' ce lah', "Ti ri is' beun' ti ri is' me na' a lawn kaw yeuh keutit' ko', un' mak' ti yawo na' a jaen chak'."

¹¹Yesu' Eun top' a ri ce, "Leukah' sangsawn' aen' a lawn un' meuh yawo ku' Peucawo' yeuh Eun peue yeuh pun a na' ko', hpaw peue ca' kaw pe hot' ri yeuh pun a ku peue. ¹²Kopti peue ngon' na' meuh ce peue tawn' ri tang' neum yam keut' ri na'. Ngon' peue meuh peue tawn' ri kopti peue ngon' na' yeuh peue a. Ngon' peue meuh peue tang' nha' ri un' sang' nya † ri kopti pun kuing' pang mao' na'. A' nhaw' lawn kaw pe hot' ri yeuh ceu nang aen' a pun ko', yeuh a reu'."

Yesu' nap Eun mun' ri kon' nyom aet'

¹³Hawc' ko', peue va kon' nyom aet' na' ce ing' tuil' Yesu' Eun tang' ti' ri hk'o' mun' pun ce. Daecti tapae' na' ce is' ku' va kon' nyom ing' na' ce.

¹⁴Daecti Yesu' Eun lah', "Tae' kon' nyom aet' na' ce ing' ri Ui' reu', pawlaee ham' ce. Kopti kuing' pang mao' na' meuh a kuing' ce peue ku' seun' kon' nyom aet' aen' ce." ¹⁵Hawc' Yesu' tang' Eun ti' ri hk'a' pang ce na', Eun pucti heul' hk'ai' mawn' na'.

Nang nhum' meuneum

¹⁶Peue ti peue ing' mhaing' eun Yesu' Eun, "Seura', ui' ci' kaw kah ri yeuh ku' chak' ceu nangnhaw' na' ui' na' pun cit' tip a' yu tip cot' cu na'?"

¹⁷Yesu' Eun top' a ri heun, "A ci' meuh kop keunhaw' mi vae' mhaing' ui' ri lawng ku' chak' na' ? Cawo' chak' na' kue' a ti peue yawo. Mi lawn sum' pun cit' tip a' yu tip cot' cu na' ko', leuceng ri ti leukah' ritroe tuil' Eun na' reu'."

¹⁸Eun mhaing' Yesu' Eun, "Leukah' ritroe nangnhaw' na'?"

Yesu' Eun lah', "Pawlaee toh peue, pawlaee len' cu, pawlaee rabawk' peue, pawlaee hkam' sa' hki' un' kue' un' meuh na', ¹⁹hkopyawm' yumyam' ri makui-ing' mi ka' †† mae' 'leumeus' peue ut' keunam caonao' mi na' ce seun' leumeus' mi tu' ri na' yeut reu'." ‡

²⁰Nang nhum' na' eun lah', "Aen' ce gawm' euc' leuceng ui' ri yeuh a hawc'. Ui' ci' kawn' cut ri keunhaw'?"

²¹Yesu' Eun top' a, "Mi lawn sum' meuh peue chak' htonnuk ko', heul' paing' ku' kue' mi na' gawm' euc' ka, gvah ri tuil' peue hk'o' tuckyak na' ce is' a reu'. Mi

† A' ko' yeuh meun ri meuh peue tawn' †† Pucti heul' 20:12-16; Sawm' leukah' mun' 5:16-20 ‡ Fae' 19:18

kaw kue' sin' ngos heun' nang kuing' pang mao' na'. Hawc' ko', mi na' ing' hot' Ui' reu'."

²²Yam nang nhum' na' pun eun ri mhawng' leukah' aen' a na', eun kuit nyhap' mhong' mhil' ing'. Kopti meuh eun peue meuneum nyawk' na'.

²³Yesu' Eun lah' a ri tapae' ri na' ce, "Ui' lah' a ri pe' neumneum, 'Peue meuneum na' kaw ce lec nang kuing' pang mao' na' a nyhap' nyawk'." ²⁴Kaw Ui' lah' a ri pe' bae, 'Kalaok' ti tu' na' kaw a lec muis peunye na' kawn' sam' ran a hk'ai' peue meuneum na' kaw eun lec nang kuing' Eun Peucawo' na'."

²⁵Yam tapae' na' pun ce ri mhawng' leukah' awn' a na', ce am' nyawk'. Ce mhaing' Eun, "Yeuh keutit' ko', a' nhaw' ci' kaw cang pun hk'a' htut lawtpon na'?"

²⁶Yesu' Eun keue' ri ce. Eun lah', "Pun peue na', aen' hpaw a ca' cang meuh. Daecti pun Peucawo' Eun na', cang meuh a ku ceu ka."

²⁷Hawc' ko' Petru' eun lah', "Tec ye ku ceu gawm' euc' na', ye hot' Mi. Ye ci' kaw pun keunhaw'?"

²⁸Yesu' Eun top' a, "Kaw Ui' lah' a ri pe' neumneum, yam bhen' keute' na' tang mhe' hk'u' a ri yam Kon' ai' peue na' mok' Eun pang tenceo' kue' munhpung' ri na', peue hot' Ui' na' pe' kaw pun ri mok' pang ten kul' leual' na' taws' a' mu ri peue I' sarela' kul' leual' ceu na' ce. ²⁹A' nhaw' lawn tecla nya ri, a' ko' ec' awng' ri, a' ko' makuiing' ri, a' ko' kon' hk'i ri, a' ko' mal' na ri kopti pun muis Ui' na' ko', eun kaw pun nammaet ka tipak' pun mae' eun ku kaw pun cit' tip a' yu tip cot' cu ri. ³⁰Daecti peue ut' nanggal' heun' peue na' kaw ce meuh peue ut' hk'a' to'. Peue ut' hk'a' to' heun' peue na' kaw ce meuh peue ut' nanggal'.

Leukah' leupong' lawng nang yeuh kan' nang val pli' bui

20 Kuing' pang mao' na' seun' a cawo' val ti peue puc eun ri heul' peunngup cawo heul' sok peue kaw yeuh kan' nang val pli' bui ri na'. ²Yam hawc' eun sa' lit ri kaw tuil' seunyi ce na' seunyi ka ti htaep' na', eun kah ce heul' yeuh kan' nang val pli' bui ri na'.

³Yam meuh a hk'ao ri seudim' nali peunngup na', eun pucti heul' nyu peue yeng ri cawng hk'o' hk'awng' nang keulas na'. ⁴Eun lah' a ri ce, 'Pawh, heul' yeuh kan' nang val pli' bui ui' na'. Kaw ui' tuil' seunyi pe' na' kuing' hpaw yeut. ⁵Kop awn' na, ce ku heul' yeut.

Yam meuh a mae' som' nyi na' mae' yam meuh a hk'ao ri loe' nali hk'a' pul na', cawo' val na' eun tang pucti heul' yeuh seun' awn' a bae' yeut. ⁶Yam meuh a hk'ao ri hpawn' nali hk'a' pul na', eun pucti heul' nyu peue tit' cawng ce ri cu ri mawn'. Eun mhaing' ce, 'A ci'

yeuh keunhaw' pe' vae' cawng hk'o' hk'awng' mawn' gawm' seunyi?'
 7 Ce top' a, 'Kopti a' nhaw' un' cang' a ye saec' ti peue na'.'

Eun lah' a ri ce, 'Pawh, heul' yeuh kan' nang val pli' bui ui' na'.'

8 Yam rot a hk'a' pul na', cawo' val na' eun klawng ro' ce ku' yeuh kan' na' eun ing' ri ti. Eun lah' a ri heun, 'Klawng peue yeuh kan' na' ce ing' ti seunyi ri na' tang' ri ku' heul' hot' na' ce rot ti ku' heul' nanggal' na' ce.'

9 Ku' kawn' tang' ri yeuh kan' hpawn' nali na' ce pun peue ri ti htaep'. 10 Kop awn' na, ku' tang' ri yeuh kan' nanggal' na' ce hteum' ri kaw pun heun' hk'ai' ku' seubu na' ce. Daecti ce pun peue ri ti htaep' seun' puri euc'. 11 Yam pun ce ri ti seunyi ri na' hawc' na', ce buicbuic lah' cawo' val na' eun, 12 'Ku' heul' yeuh kan' hot' na' gup pun ce ri yeuh kan' ti nali yawo, ce pun seunyi ri na' keuteul ku' hawc' ri ri kuc' sae' caee' yeuh kan' gawm' seunyi na' e'.'

13 Daecti cawo' val na' eun lah' a ri peue hk'a' naee ce na' eun ti peue, 'A' mawo, hpaw ui' ca' to' ri chi' lai ri hk'a' pe'. Lah' deut ui' a kaw meuh seunyi ti htaep', un' meuh ka aw? 14 Ti seunyi mi na' heul' reu'. Lak' sah-paw' ui' ri tuil' seunyi ce ku' heul' yeuh kan' hot' na' keuteul is' mi na' yeut. 15 Kaw ui' lo' leumuil ri na' hot' ku' sum' yeuh ri na', kaw a un' cang aw? A ci' meuh kop keunhaw', mi vae' hkoe' mang' hk'a' hpum' vah ui' na'?'

16 Kop awn' na, peue ut' hk'a' to' na' kaw ce meuh peue ut' nanggal'. Peue ut' nanggal' na' kaw ce meuh peue ut' hk'a' to'."

Yesu' tang lah' Eun lawng kaw ri pun ri yeum na' bae

17 Yam Yesu' buih huk' Eun nang veng Yeru' salaem na', Eun va yawo tapae' kul' leual' peue ri na' ce gveh' hk'a' na koe. Eun lah' a ri ce, 18 "Buih huk' e' nang veng Yeru' salaem. Kon' ai' peue na' kaw Eun pun ri hkam' hk'a' fuin ap peue ri nang dak ti' ce ro' peue jhawp' rit na' mae' peue guil leukah' ritroe na' ce. Ce kaw taws' a' mu tut yeum na' ri Heun. 19 Hawc' ko', ce kaw ap Eun ri peue un' meuh peue ceu Yu' da na' ce. Peue awn' ce kaw lah' ku' pleh ku' jaing, ta' faet' Eun. Hawc' ko', ce kaw tawk' Eun yeum pang kleum' rawng' tawp' na'. Yam meuh a loe' seunyi ka na', Eun na' tang kuh' im'."

Leukah' hk'o' ka a' ma ti peue

20 Hawc' ko', beun' eun Yebedae' na' ka va kon' me ri lal' peue na' ka ing' ri Yesu' Eun. Ma na' ka seukluin ri hk'o' ku' ti ri ceu ri Heun.

21 Yesu' Eun mhaing' ka, "Pa' ci' sum' hk'o' keunhaw'?"

Ka top' a, "Hk'o' Mi tuil' leukah' ri kah kon' me ui' lal' peue aen' ka mok' hk'a' a' tawm' Mi ti peue mae' hk'a' a' ve' Mi ti peue nang kuing' Mi na'."

22 Daecti Yesu' Eun lah' a ri kon' lal' peue na' ka, "Hpaw pa' ca' yawng buih hk'o' ri keunhaw'. Kawk' kaw Ui' nyui na' †lak' kaw pa' cang nyui a aw?"

Ka top' a, "Kaw ya cang nyui a yeut."

23 Yesu' Eun lah' a ri ka, "Kaw pa' kah ri nyui kawk' Ui' na' neumneum yeut. Daecti ku' kaw tuil' a' nhaw' mok' hk'a' a' tawm' hk'a' a' ve' Ui' na', a hkuin' meuh Ui' ri. Daecti vang mok' awn' meuh a is' ce peue ku' Kuing' Ui' rangraen Eun ri uin' pun ce na'."

24 Yam tapae' seubu kul' peue na' mhawng' ce lawng aen' a na', ce seungeueng' ri awng' ec' lal' peue awn' ka. 25 Yesu' Eun klawng tapae' na' ce ing' cu ri tiduih'. Eun lah', "Peue pun an' nya meuh cawo' u' peung peue na' meuh eun cawo' hk'a' pang ce, cawo' hk'a' ruim eun na' ce ku' meuh cawo' hk'a' pang ce yeut, pe' ku yawng a. 26 Daecti pun pe' ri na' a hkuin' yeuh keutit'. A lak' meuh ri is' ti hk'a'. A' nhaw' lawn sum' meuh peue keuting ri pe' ko', eun kaw pun ri yeuh mhai' pe'. 27 A' nhaw' lawn sum' meuh peue nambat keuhti ko', eun kaw pun ri meuh mhai' pe' na'. 28 A seun' Kon' ai' peue na' hpaw Eun ca' lih pun kaw peue yeuh mhai' Eun, daecti lih Eun pun kaw Eun yeuh mhai' peue mae' kaw Eun tuil' a' yu ri na' meuh ngos ka hk'a' htut lawt-pon pun peue heun' na' peue."

Yesu' bai' Eun peue ngai' lec' lal' peue cuin

29 Yam Yesu' Eun mae' tapae' na' kaw ce buih pucti heul' hk'ai' veng Yeri' hko' na', peue cum heun' na' ce hot' ce heul'. 30 Peue ngai' lec' lal' peue na' ka mok' keunam hk'a' na'. Yam mhawng' ka Yesu' buih hpai Eun keunam ri na' heul' na', ka ta' ul' ri lah', "Cawo', Kon' ai' Davit', hk'o' Mi tukyak ri ya."

31 Peue cum heun' na' ce saec' is' ka, kah ka dit' ti. Daecti ka gawm klawng ri lah' laws' a, "Cawo', Kon' ai' Davit', hk'o' Mi tukyak ri ya."

† Vangdoh' ka "kaw' kaw Ui' nyui na'" a meuh "pun ri hkam' ku' tukhka na'".

³² Yesu ' Eun kuit ' . Eun klawng ka ing ' ri ti. Eun mhaing ' ka, "Pa ' ci ' sum ' kah Ui ' yeuh keunhaw ' ri ti?"

³³ Ka lah ' , "Cawo ' , sum ' nyu ya hk'a ' ri."

³⁴ Yesu ' Eun tukyak ri ka. Eun paic ' ngai ' ka na ' , ka keulawn ' cang nyu hk'a ' ri. Ka hot ' Yesu ' Eun heul ' .

Cawo ' pe lec Eun veng Yeru ' salaem

21 Yam huk ' rot ce keunam veng Yeru ' salaem nang yung ' Bethpage ' pang gong Sanlon na ' , Yesu ' Eun cus ' tapae ' lal ' peue na ' ka heul ' . ² Eun lah ' a ri ka, "Heul ' ri yung ' ut ' nanggal ' teh ' a reu ' . Pa ' kaw keulawn ' pun ri nyu rawngla aet ' na ' mawt a ri mae ' ma ri na ' tiduih ' teh ' . Pa ' na ' kah ' ri teuk ' a heul ' maen ' . ³ Peue ti ri peue eun lawn na ' lhon ' ri mhaing ' pa ' ri ku ' ti ri ceu ko ' , pa ' na ' lah ' , 'Cawo ' lo ' Eun a.' Peue awn ' eun kaw keulawn ' kah ' ri tuil ' a ri pa ' ."

⁴ Aen ' meuh a neumneum hot ' seun ' ku ' peue suip leukah ' Eun Peucawo ' na ' lah ' eun ri uin ' na ' . A lah ' ,

⁵ "Lah ' a ri peue veng Yi ' on na ' ce yeuh keutit ' reu ' , 'Keue ' reu ' , Hkun ' haw ' hkam ' pe ' na ' buih ing ' Eun.

Eun hpum ' onawn ' , Eun pawk rawngla na ' ,

Eun pawk rawngla aet ' na ' ing ' ."

⁶ Tapae ' lal ' peue na ' ka ku heul ' hot ' ri yeuh seun ' ku ' Yesu ' tuil ' Eun leukah ' ri na ' . ⁷ Ka teuk ' rawngla ma na ' mae ' kon ' ka na ' ing ' . Ka lhup ' hk'o dal ' ri na ' pang kui ' ka na ' . Yesu ' Eun pawk a. ⁸ Peue cum heun ' na ' ce ti ri tawm hk'o ri na ' nang gon ' hk'a ' na ' . Ngon ' ce taws ' yuim na ' , ce tawm a nang gon ' hk'a ' na ' . ⁹ Peue cum heun ' heul ' nanggal ' mae ' peue heul ' hk'a ' kui ' Eun na ' ce klawng ri lah ' ,

"Hosana, ^{††} ri Kon ' ai ' eun Davit ' na ' Eun.

Nap mun ' ri Cawo ' ing ' hk'a ' ruim muis Eun Peucawo ' na ' Eun. [‡]

Hosana, ri ku ' lhung ' hk'ai ' peue na ' Eun."

¹⁰ Yam Yesu ' huk ' lec Eun nang veng Yeru ' salaem na ' , peue veng na ' ce tuin ' tung seutu in seutan. Ce mhaing ' , "Hkawn ' Eun ci ' meuh a ' nhaw ' ?"

¹¹ Peue cum heun ' na ' ce top ' a, "Hkawn ' meuh a Yesu ' Eun. Eun meuh peue suip leukah ' Eun Peucawo ' ing ' neum veng Nasaraet ' kuing ' Galilae ' na ' ."

Yesu ' yeuh Eun nya hk'o ' mun ' keuting na ' seunga ' chak '

¹² Yesu ' Eun ing ' lec ' nang kang ' hkung ' ka nya hk'o ' mun ' keuting na ' . Eun ra ri tec peue paing ' hk'eung mae ' peue leuvaee hk'eung mawn ' na ' ce pucti heul ' . Eun seukleup ' hpuin ' ce peue leuploh ' leumuil na ' mae ' pang ' mok ' ce peue paing ' gui ' na ' . ¹³ Eun lah ' a ri ce, "Kue ' a leukah ' tem ' ri yeuhki ' , 'Nya Ui ' na ' meuh a vang hk'o ' mun ' " ^{††} , daecti pe ' yeuh a meuh vang hk'on ' ro con ' ."

¹⁴ Peue ngai ' lec ' mae ' peue ti ' cung lu na ' ce ing ' ri Heun nang kang ' hkung ' ka nya hk'o ' mun ' keuting na ' . Eun ku bai ' ce cuin. ¹⁵ Daecti yam peue jhawp ' rit keuting mae ' peue guil leukah ' ritroe na ' pun ce ri nyu ku ' hk'o ' am ' yeuh Eun na ' ce mae ' pun ce ri mhawng ' kon ' nyom na ' klawng ce ri lah ' , "Hosana ri Kon ' ai ' eun Davit ' na ' eun", nang kang ' hkung ' ka nya hk'o ' mun ' keuting na ' , ce seungeueng ' nyawk ' .

¹⁶ Ce mhaing ' Yesu ' Eun, "Un ' mhawng ' Mi ku ' kon ' nyom aen ' klawng ce ri lah ' na ' aw?"

Yesu ' Eun top ' a, "Mhawng ' Ui ' a yeut. Ku ' tem ' ri yeuhki ' na ' un ' duing lip pe ' a aw? A lah ' ,

'Yeuh Mi leukah ' suk ' seun ' na '

pucti lih hk'ai ' moeng ce kon ' nyom mae ' o ' ngak na ' ce hawc ' ."

¹⁷ Hawc ' ko ' , Eun gah ' hk'ai ' ce pucti heul ' hk'ai ' veng na ' . Eun heul ' keului ' ri nang yung ' Betani ' na ' .

Yesu ' Jha ' Eun kleum ' pli ' keutuic

¹⁸ Peunngup cawo yam ceng ' ka na ' , yam Yesu ' tang buih huk ' Eun nang veng na ' bae na ' , Eun sum ' som ' .

¹⁹ Yam pun Eun ri nyu kleum ' pli ' keutuic ut ' keunam hk'a ' ti kleum ' na ' , Eun heul ' ri keunam ka na ' . Daecti Eun nyu pal lha ' ka a un ' kue ' pli ' na ' , Eun lah ' a ri kleum ' pli ' keutuic na ' , "Na ' mi pawlaee pli ' bae." Kleum ' pli ' keutuic awn ' a keulawn ' fit ' hk'oh ' hk'oeng ' heul ' .

²⁰ Yam tapae ' na ' pun ce ri nyu yeuh a keutit ' na ' , ce am ' . Ce lah ' , "A ci ' cang meuh yeuh sa ' nhaw ' kleum ' pli ' keutuic aen ' a vae ' keulawn ' fit ' hk'oh ' hk'oeng ' heul ' ?"

²¹ Yesu ' Eun top ' a, "Kaw Ui ' lah ' a ri pe ' neumneum, pe ' lawn kue ' hk'a ' yum ' un ' kangkae ko ' , gup kaw pe ' cang yeuh yawo ku ' meuh ri kleum ' pli ' keutuic ti lhem ' aen ' a koe na ' a hkuin ' meuh, daecti kaw pe ' cang tuil ' leukah ' ri gong aen ' na, 'Sat ri heul ' hk'uic ' "

[†] Yahkari ' 9:9^{††} Hosana na ' meuh leukah ' Hebrae ' . Vangdoh ' ka na ' a meuh "htut", a keut ' ri meuh leukah ' suk ' seun ' , a seun ' 21:15. [‡] Suk ' seun ' 118:26

^{††} I ' saya ' 56:7^{†††} Yerami ' 7:11^{†††} Suk ' seun ' 8:2

lec nang mha 'seumut ' na ' reu ' , a ku na ' meuh yeuh keutit ' yeut. ²² Hk'a ' naee hk'a ' yum ' pe ' na ' pe ' lawn hk'o ' mun ' hk'o ' ko ' , kaw pe ' pun ku ' hk'o ' ri na ' gawm ' euc ' ka."

Mhaing ' peue lawng Yesu ' pun Eun ti ' ca

²³ Yesu ' lec Eun nang kang ' hkung ' ka nya hk'o ' mun ' keuting na ' . Yam buih sangsawn ' Eun na ' , ro ' peue jhawp ' rit, peue guil leukah ' ritroe mae ' nang kawt na ' ce ing ' mhaing ' Eun, "Mi yeuh ceu nang aen ' ce, Mi ci ' cu ti ' ca keunhaw ' yeuh a? A ' nhaw ' ci ' tuil ' ti ' ca aen ' a ri Mi?"

²⁴ Yesu ' Eun top ' a, "Ui ' ku kaw mhaing ' pe ' ti moeng yeut. Pe ' lawn lah ' Ui ' mhawng ' a ko ' , Ui ' na ' kaw n ' lah ' pe ' mhawng ' Ui ' ci ' pun ti ' ca aen ' a ri a ' nhaw ' Ui ' yeuh ceu nang aen ' ce. ²⁵ A ' nhaw ' ci ' tuil ' ti ' ca tuil ' hk'a ' cum ' na ' ri Yo ' han eun, neum kuing ' pang mao ' aw, a ' ko ' neum peue aw?"

Ce sa ' lit puri lah ' , "E ' lawn top ' lih a neum kuing ' pang mao ' ko ' , Eun kaw tang cang mhaing ' e ' , ' A ci ' yeuh keunhaw ' pe ' vae ' un ' yum ' eun?" ²⁶ Daecti e ' lawn top ' lih a neum peue ko ' , e ' ku lhat ' ri peue cum heun ' na ' ce. Kopti yum ' ce Yo ' han meuh eun peue suip leukah ' Eun Peucawo ' na ' ."

²⁷ Kop awn ' na, ce top ' a ri Heun, "Un ' yawng ye a."

Yesu ' Eun lah ' a ri ce, "Yeuh keutit ' ko ' , Ui ' ku hkuin ' kaw lah ' pe ' mhawng ' cu Ui ' ti ' ca keunhaw ' Ui ' yeuh ceu nang aen ' ce yeut.

Leukah ' leupong ' lawng kon ' me lal ' peue

²⁸ Daecti, pe ' ci ' kuit a yeuh sa ' nhaw ' ? Peue ti peue kue ' eun kon ' me lal ' peue. Eun heul ' lah ' a ri nang ec ' na ' eun, 'Kon ' , heul ' yeuh kan ' nang val pli ' bui na ' seunyaen ' aw?"

²⁹ Kon ' na ' eun lah ' , 'Uih ' , hpaw ui ' ca ' kaw heul ' . Daecti hawc ' ka na ' eun plin ' hpum ' ri na ' , eun heul ' .

³⁰ Hawc ' ko ' , kuiing ' na ' eun tang heul ' lah ' a ri nang awng ' na ' eun seun ' awn ' a yeut. Nang awng ' na ' eun top ' a, 'Kaw ui ' heul ' yeut.' Daecti eun hkuin ' heul ' .

³¹ Kon ' me lal ' peue awn ' ka nangnhaw ' eun ci ' hot ' ri yeuh alo eun kuiing ' ri na ' ?"

Ce top ' a, "Meuh a nang ec ' na ' eun."

Yesu ' Eun lah ' , "Ui ' lah ' a ri pe ' neumneum, peue cep ' hkawn ' mae ' beun ' paing ' tu ' ri na ' kaw ce va puri heul ' lec nang kuing ' Eun Peucawo ' na ' nanggah ' pe ' . ³² Kopti Yo ' han lih seuji eun pe ' nawk hk'a ' leupaws seumeu ' na ' , pe ' hkuin ' yum ' eun, daecti peue cep ' hkawn ' mae ' beun ' paing ' tu ' ri na ' ce yum ' eun.

Pe ' saec ' na ' pun ri nyu ceu nang aen ' ce hawc ' ko ' , pe ' hkuin ' taws ' hpum ' fuin map ' ri yum ' eun.

Leukah ' leupong ' lawng sang ' hpa ' val pli ' bui

³³ Leuceng leukah ' leupong ' seubu na ' , cawo ' val ti peue na ' sang ' eun val pli ' bui. Eun ru a rop. Eun kung ' a is ' keutui ' vang bet ' pli ' bui. Eun pleng ' a is ' tup ' lhung ' vang ko ' . Hawc ' ko ' , eun tuil ' peue sang ' val na ' ce sang ' hpa ' a. Hawc ' ko ' , eun heul ' nang kuing ' tawk seubu. ³⁴ Yam rot a yam poc ' pli ' bui na ' , punta kaw eun ti pli ' ku ' kaw eun htuk ' ri pun na ' , eun kah mhai ' ri na ' ce heul ' ri peue sang ' hpa ' val na ' ce.

³⁵ Daecti peue sang ' hpa ' val na ' ce mheut ' mhai ' awn ' ce. Ku ' ti peue na ' eun ce peum ' eun, ku ' ti peue na ' eun ce toh eun, ku ' seubu ti peue na ' eun ce dhim ' eun yeum ri meul ' seumu na ' . ³⁶ Cawo ' val na ' eun tang kah mhai ' seubu heun ' hk'ai ' ku ' nanggah ' na ' ce heul ' ri ce bae. Daecti peue sang ' hpa ' val na ' ce ku yeuh ce seun ' ku ' nanggah ' na ' ce yeut. ³⁷ Pok tisut ' ka na ' , eun kah kon ' me ri na ' eun heul ' ri ce. Eun lah ' , 'Na ' ce chak ' ri hkopyawm ' ri kon ' me ui ' na ' eun.'

³⁸ Daecti yam peue sang ' hpa ' val na ' nyu ce kon ' me eun cawo ' val na ' eun na ' , ce sa ' lit puri lah ' , 'Peue aen ' meuh eun peue pun sin ' . Pawh, e ' toh eun. E ' na ' rim ' ri ti sin ' eun na ' . ³⁹ Kop awn ' na, ce mheut ' ri jong ' ri tec eun hk'a ' nok ka val na ' . Hawc ' ko ' , ce toh eun yeum.

⁴⁰ Kop awn ' na, yam cawo ' val na ' ing ' eun nang val na ' , eun ci ' na ' kaw yeuh sa ' nhaw ' ri peue sang ' hpa ' val awn ' ce?"

⁴¹ Ce top ' a, "Kaw eun yeuh cae ' ri peue rai awn ' ce. Hawc ' ko ' , yam rot a yam ti ku ' seumal na ' nang seubu ku ' kaw tuil ' pun pun eun cawo ' val na ' ce, eun kaw tuil ' ce sang ' hpa ' val awn ' na."

⁴² Yesu ' Eun mhaing ' ce, "Un ' duing lip pe ' htawm Seunga ' ton aen ' a aw? A lah ' , 'Seumu peue go ' nya na ' tec ce hawc ' na ' , maet ' maen ' meuh a seumu ri kleum ' nang ce ' ka na ' hawc ' .

Cawo ' Peucawo ' yeuh Eun kan ' aen ' na, a meuh ku ' hk'o ' am ' ri ngai ' e ' na ' .[†]

⁴³ Kop awn ' na, Ui ' lah ' a ri pe ' , kuing ' Eun Peucawo ' na ' rup a ri ti ri heul ' hk'ai ' pe ' . A kaw tuil ' ri ri peue cang pli ' na ' ce. ⁴⁴ A ' nhaw ' lawn htang ' meul pang seumu awn ' a ko ' , eun kaw bet ' . Daecti seumu awn ' a lawn hk'uic ' teng ' a ' nhaw ' ko ' , eun kaw bet ' nyai ' ltheo ' ."^{††}

[†] Suk ' seun ' 118:22, 23 ^{††} Nang htawm Seunga ' na ' ngon ' , un ' kue ' a nambat aet ' 44.

⁴⁵ Yam ro' ce peue jhawp' rit mae' peue Hparisae' na' mhawng' ce leukah' leupong' awn' a na', ce yawng Yesu' buih lah' Eun ti ri na'. ⁴⁶ Ce sok hk'a' kaw ri mheut' ri ti Eun. Daecti ce lhat' ri peue heun' na' ce, kopti peue heun' na' sawn' ce Yesu' Eun meuh peue suip leukah' Eun Peucawo' na'.

Leukah' leupong' lawng pawe hk'a' chec'

22 Yesu' Eun tang lah' leukah' leupong' ri ce bae. Eun lah', ² "Kuing' pang mao' na' seun' a hkun' haw' hkam' ti peue na' rangraen eun pawe hk'a' chec' pun kon' me ri na' eun. ³ Eun kah mhai' ri na' ce heul' lah' a ri peue pun eun ri klawng ce hawc' ce kawing' hk'a' chec' na', daecti ce hkuin' ing'.

⁴ Hawc' ko', eun tang kah mhai' ku' seubu ri na' ce heul' lah' a ri peue pun eun ri klawng ce hawc' ce kawing' hk'a' chec' na' ce, 'Pun pawe na' rangraen ui' ku ceu na' euc' hawc'. Nghawm' ui' a' moe mae' sat' seubu ku' uii' ui' kleueng' na' hawc'. Ui' rangraen ku ceu na' meulamlam ri hawc'. Ing' hk'a' pawe na' reu'.

⁵ Daecti ce un' ti lawng aen' a seucen, ce yeuh kan' chin ri na' heul'. Ngon' ce heul' nang mal' ri. Ngon' ce heul' ka. ⁶ Ngon' ce mheut' ri yeuh ku' hk'o' kaic mae' toh mhai' eun hkun' haw' hkam' na' ce.

⁷ Hkun' haw' hkam' na' eun seungeueng' nyawk'. Eun kah muk peue suik' ri na' ce heul' toh ku' meuh nang toh mhai' eun na' ce. Eun ku kah ce dum ri tec veng ce na' yeut.

⁸ Hawc' ko', eun lah' a ri mhai' ri na' ce, 'Rangraen ui' pawe ri na' meulamlam ri hawc', daecti peue klawng ui' kawing' hk'a' pawe ui' na' ce hkuin' kuing' mae' pawe ui' na'. ⁹ Heul' ri gah' hk'a' keuting na' ce. Klawng peue pun pe' ri nyu na' ce ing' hk'a' pawe ui' na' reu'. ¹⁰ Kop awn' na, mhai' eun hkun' haw' hkam' na' ce eo' ri heul' hot' hk'a' na' ce. Peue pun ce ri nyu na' ce, peue chak' un' lah' peue rai un' lah' ce hk'on' ro ce gawm' euc'. Vang hk'a' chec' na' peue chec' na' peue nuknhen' a.

¹¹ Daecti yam hkun' haw' hkam' na' ing' nom' nawk eun peue hk'a' chec' na' peue, eun pun ri nyu peue un' cuip' hk'eung hk'a' chec' ri ti peue. ¹² Kop awn' na, eun mhaing' eun, 'A' mawo, mi hkuin' cuip' hk'eung hk'a' chec' ri, mi ci' ing' lec maen' na' pun yeuh sa' nhaw'?' Peue awn' eun klaee' ri fit', eun un' laee cang lah' ke-unhaw'.

¹³ Hawc' ko', hkun' haw' hkam' na' eun tuil' leukah' ri mhai' ri na' ce, 'Mawt ti' cung eun na' nyon ri tec eun vang duim' lawng ta' ul' aec' rak yam cet rang' ri hk'a' nok na' reu'.

¹⁴ Kopti peue pun ri rap hk'a' klawng na' kue' peue heun', daecti peue pun ri rap hk'a' leuk ri ti na' peue kue' leng."

Seue' hkawn' ri cawo' Kae' sa eun

¹⁵ Peue Hparisae' na' puc ce ri heul' sa' lit puri kaw tung' ri pun Yesu' leukah' kleuc' Eun na'. ¹⁶ Ce kah tapae' ri na' ce mae' peue eun Herot' na' ce heul' mhaing' Yesu' Eun, "Seura', yawng ye meuh Mi peue leupaws seumeu'. Mi sangsawn' a hot' hk'a' Eun Peucawo' na' neumneum. Mi un' meuh mae' hk'a' mawn' hk'a' maen' ri peue. Mi hkuin' keue' ri buh a' nhaw'.

¹⁷ Mi ci' kuit a yeuh sa' nhaw', hk'o' Mi lah' a ri ye, seue' ye hkawn' ri cawo' Kae' sa eun na' cawp' ka aw, un' cawp' ka aw?"

¹⁸ Daecti Yesu' yawng Eun kamkuit rai ce na', Eun lah' a ri ce, "Peue leukah' seunga' hpum' vok' na' pe', a ci' yeuh keunhaw', pe' vae' ing' long ri nawk Ui'?' ¹⁹ Tuil' Ui' nawk paec seue' hkawn' pe' na' ti htaep' reu'." Ce ku ti ri tuil' htaep' na' ri Heun. ²⁰ Eun mhaing' ce, "Htaep' na' a ci' kue' rup a' nhaw', muis a' nhaw'?"

²¹ Ce top' a, "Meuh a cawo' Kae' sa eun."

Hawc' ko', Yesu' Eun lah' a ri ce, "Hk'eung eun cawo' Kae' sa na' tuil' a keutah ri cawo' Kae' sa eun, hk'eung Eun Peucawo' na' tan a keutah ri Peucawo' Eun reu'."

²² Yam pun ce ri mhawng' leukah' awn' a na', ce ku am' nyawk' ri Heun. Ce puc yawo ri heul'.

Lawng tang kuh' im'

²³ Hk'a' naee seunyi awn' na, peue Sadu' kae' lah' tang kuh' im' a un' kue' na' ngon' ce ing' mhaing' Yesu' Eun, ²⁴ "Seura', Mo' se tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a' ko' awng' eun na' eun kaw kah ri tang ti beun' awn' eun.' ²⁵ Kue' a awng' ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. Kop awn' na, eun hk'ah' beun' ri na' eun ri awng' ri na' eun. ²⁶ Lal' peue ti peue na' eun mae' loe' peue ti peue na' eun ka ku seun' awn' a yeut, rot ti a' res peue ti peue na' eun ce ku seun' awn' a. ²⁷ Vang tisut' ka na', beun' awn' eun ku yeum heul'.

²⁸ Yam tang kuh' im' na', beun' awn' eun ci' na' meuh beun' a' nhaw' ri awng' ec' a' res peue awn' ce, kopti ti ce beun' awn' eun meuh beun' ri ku peue ri na'?"

²⁹ Yesu' Eun top' a, "Kleuc' pe' hawc', kopti un' yawng pe' htawm Seunga' na' mae' ti' ca Eun Peucawo' na'. ³⁰ Yam peue yeum na' tang kuh' im' ce na', ti

puri mae' kui' puri na' a hkuin' kaw laee kue', kaw ce keut' ri seun' in' hpom kuing' pang mao' na' ce ko'.³¹ Daecti ku' to' ri lawng tang kuh' im' na' un' duing lip pe' a aw? Peucawo' lah' Eun a ri pe',³² 'Meuh Ui' Peucawo' eun Abraham, Peucawo' eun I'cak' mae' Peucawo' eun Yakop'.[†] Peucawo' hpaw Eun ca' meuh Peucawo' ce peue yeum na', daecti meuh Eun Peucawo' ce peue a' yu im' na'."

³³ Yam peue heun' na' mhawng' ce leukah' sang-sawn' Eun na', ce am' ri ka.

Leukah' ritroe a' ye' keuting hk'ai' peue na'

³⁴ Yam peue Hparisae' na' pun ce ri mhawng' lawng Yesu' yeuh Eun peue Sadu' kae' na' ce dit' ti na', ce ing' hk'om puri tiduih'.³⁵ Hk'a' naee muk ce na' a kue' peue yawng leukah' ritroe ti peue na' eun ing' long ri nawk Yesu' Eun. Eun mhaing' Eun,³⁶ "Seura', hk'a' naee leukah' ritroe na' nangnhaw' na' a ci' a' ye' keuting hk'ai' ka?"

³⁷ Yesu' Eun top' a, "Leumeus' Peucawo' mi na' Eun sut' hpum' ri, sut' civit ri mae' sut' kamkuit ri na' gawm' euc' ka reu'.^{††38} Aen' a meuh leukah' ritroe a' ye' keuting hk'ai' ka ti moeng ka na'.³⁹ Lal' moeng ka na' a ku seun' ti moeng ka na' yeut. A meuh, 'Leumeus' peue ut' keunam caonao' mi na' ce seun' leumeus' mi tu' ri na' yeut reu'.⁴⁰ Leukah' lal' moeng aen' meuh a kleum' ka leukah' ritroe na' mae' leukah' ce peue suip leukah' Eun Peucawo' na' gawm' euc' ka."

Hkrit Eun ci' meuh kon' a' nhaw'?

⁴¹ Yam peue Hparisae' na' buih hk'om ce puri na', Yesu' Eun mhaing' ce,⁴² "Pe' ci' kuit lawng Eun Hkrit^{‡†} na' yeuh sa' nhaw'? Eun ci' meuh Kon' ai' a' nhaw'?"

Ce top' a, "Meuh Eun Kon' ai' eun Davit'."

⁴³ Eun lah', "Yeuh keutit' ko', a ci' meuh kop keunhaw' Davit' eun vae' lah' a hk'a' naee cu ri Cit' seunga' chak' na' eun klawng Eun, 'Cawo'?' Davit' eun lah',

⁴⁴ 'Peucawo' lah' Eun a ri Cawo' ui' na' Eun,

"Mok' hk'a' a' tawm' Ui' na'

rot ti uin' Ui' ransu Mi na' ce

hk'a' ruim dak cung Mi na' reu'."^{‡†}

⁴⁵ Davit' eun ku vae' klawng Eun meuh Cawo', Eun ci' kaw cang meuh kon' eun Davit' yeuh sa' nhaw'?"

⁴⁶ A' nhaw' hkuin' laee cang top' leukah' mhaing' Eun Yesu' na' saec' ti peue. Tang' neum yam awn' na, a' n-

haw' hkuin' laee hat' ri mhaing' Eun bae' saec' ti peue.

Yesu' ram Eun ri peue guil leukah' ritroe mae' peue Hparisae'

²³ Hawc' ko', Yesu' Eun lah' a ri peue cum heun' na' ce mae' tapae' ri na' ce,² "Peue guil leukah' ritroe mae' peue Hparisae' na' mok' ce ri vang mok' eun Mo' se na'.³ Kop awn' na, pe' kaw kah ri leuceng ri yeuh ku' sangsawn' ce na' ku ceu ka, daecti pawlaee yeuh seun' ku' yeuh ce na'. Kopti un' hot' ce ri yeuh se-un' ku' sangsawn' ri na'.⁴ Mawt ce beus seucen na' pang seuplang' peue na'. Daecti ce ri ko', geun' ti' ce na' ti geun' yawo, ce hkuin' teum' kawm peue yuk beus na' ri ka.

⁵ Ku' yeuh ce na' gawm' euc' ka ce yeuh a mae' sum' kah ce peue nyu ri hk'o' cuin. Ce ti tep keuting vang seue' ton leukah' htawm Seunga' na' ce mawt a pit rel' ri na', a' ko' ri plong' ti' ri na'. Ce pleng' sawe ka hk'o' ri na' lang'.⁶ Ce sum' mok' ri vang kue' munhpung' vang hk'asom' na' mae' sum' mok' ri vang mok' a' ye' keuting hk'ai' peue hk'a' naee sa' la vang hk'o' mun' na'.⁷ Ce sum' kah peue luisa ri nang keulas na'. Ce sum' kah peue klawng ri meuh 'seura''^{‡††}.

⁸ Daecti pe' na' pawlaee kah a' nhaw' klawng ri meuh 'seura''. Kopti kue' pe' seura' ti peue yawo. Pe' ri, meuh pe' ec' awng' puri gawm' euc'.⁹ Pang bhen' keute' na' pawlaee klawng a' nhaw' meuh 'a' kuing'' saec' ti peue, kopti kue' pe' A' kuing' ti peue yawo. Eun ut' nang kuing' pang mao' na'.¹⁰ Pawlaee kah a' nhaw' klawng ri meuh 'cawo'', kopti kue' pe' Cawo' ti peue yawo. Eun meuh Hkrit^{‡††}.¹¹ Peue keuting hk'ai' peue hk'a' naee pe' na' kaw eun kah ri yeuh mhai' pe'.

¹² Kopti saec' meuh a' nhaw' eun lawn ti ri keuting lhung' meun ko', eun kaw hkam' hk'a' nuic ri tem na'. Daecti saec' meuh a' nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lhung' na'.

¹³ Peue guil leukah' ritroe mae' peue Hparisae' meuh peue leukah' seunga' hpum' vok' na' pe', kaw pe' pun ri hkam' hk'a' jha' na'. Kopti sawng' pe' leuva' ka kuing' pang mao' na' ri peue. Pe' ri meun, pe' hkuin' lec a. Na' peue kaw lec a, pe' tang un' kah peue lec a.¹⁴ Peue guil leukah' ritroe mae' peue Hparisae' meuh peue leukah' seunga' hpum' vok' na' pe', kaw pe' pun ri hkam' hk'a' jha' na'. Kopti rim' pe' ri ti nya ce a' ya seunao na'. Pe' hk'awng guil ri hk'o' mun'

[†] Pucti heul' 3:6^{††} Sawn' leukah' mun' 6:5[‡] Fae' 19:18^{††} A' ko' Mesi' ya^{‡†} Suk' seun' 110:1

^{‡††} Nang htawm Seunga' na' ngon', a lah' "Rabi'", a meuh leukah' Arame', vanguard' ka na' a lah', seura'.^{‡††} A' ko' Mesi' ya

ling 'lang'. Kop awn 'na, pe 'kaw pun ri hkam 'hk'a 'ciyang na 'lheu 'peue ri.†

¹⁵Peue guil leukah 'ritroe mae 'peue Hparisae 'meuh peue leukah 'seunga 'hpum 'vok 'na 'pe', kaw pe 'pun ri hkam 'hk'a 'jha 'na'. Kopti punta kaw pe 'sang-sawn 'ri pun peue ti ri peue eun ing 'lec ritroe pe 'peue Yu 'da na', pe 'co 'ca 'ri heul 'pang bhen 'keute 'na 'mae 'nang mha 'seumut 'na 'ti duih 'hawc 'ti duih'. Daecti yam pun pe 'peue awn 'eun na', pe 'yeuh eun pun ri lec nang keutong 'nyarok na 'lheu 'pe 'ri lal' pun.

¹⁶Peue teuk 'va peue ngai 'lec 'na 'pe', kaw pe 'pun ri hkam 'hk'a 'jha 'na'. Kopti lah 'pe', 'A 'nhaw 'lawn cu nya hk'o 'mun 'keuting na 'hkam 'a ko', eun saec 'na 'un 'yeuh seun 'ku 'hkam 'ri na', a hkuin 'yeuh ke-unhaw'. Daecti eun lawn cu hk'il 'ka nya hk'o 'mun 'keuting na 'hkam 'a ko', eun kaw kah ri hot 'ri yeuh a seun 'ku 'hkam 'ri na'.¹⁷Peue nga 'ngai 'lec 'na 'pe', a ci 'meuh nangnhaw 'ku 'ca ri kue 'a 'ye 'keuting hk'ai 'ka na '? Hk'il 'na 'aw, a 'ko 'nya hk'o 'mun 'keuting ku 'yeuh hk'il 'na 'seunga 'chak 'na 'aw?

¹⁸Pe 'ku tang lah', 'A 'nhaw 'lawn cu vang dum ri tan ku 'tan na 'hkam 'a ko', eun saec 'na 'un 'yeuh seun 'ku 'hkam 'ri na', a hkuin 'yeuh keunhaw'. Daecti eun lawn cu ku 'tan uin 'ri hk'a 'pang vang dum ri tan awn 'a hkam 'a ko', eun kaw kah ri hot 'ri yeuh a seun 'ku 'hkam 'ri na'.¹⁹Peue ngai 'lec 'na 'pe', a ci 'meuh nangnhaw 'ku 'ca ri kue 'a 'ye 'keuting hk'ai 'ka na '? Ku 'tan na 'aw, a 'ko 'vang dum ri tan ku 'yeuh ku 'tan na 'seunga 'chak 'na 'aw?²⁰Kop awn 'na, peue cu vang dum ri tan na 'hkam 'a na 'eun ko', eun ku hkam 'ri cu vang dum ri tan na 'mae 'ku 'uin 'ri hk'a 'pang vang dum ri tan na 'ku ceu ka yeut.²¹Peue cu nya hk'o 'mun 'keuting na 'hkam 'a na 'eun ko', eun ku hkam 'ri cu nya hk'o 'mun 'keuting na 'mae 'Cawo 'ut 'hk'a 'nae ka na 'Eun yeut.²²Peue cu kuing 'pang mao 'na 'hkam 'a na 'eun ko', eun ku hkam 'ri cu tenceo 'Eun Peucawo 'na 'mae 'Cawo 'mok 'hk'a 'pang ka na 'Eun yeut.

²³Peue guil leukah 'ritroe mae 'peue Hparisae 'meuh peue leukah 'seunga 'hpum 'vok 'na 'pe', kaw pe 'pun ri hkam 'hk'a 'jha 'na'. Kopti a 'lhuing', in 'hk'im na 'mae 'hk'eung hom 'seue 'nang ku 'hk'a na 'ku ceu ka pe 'tan a kul 'pun ti pun ri Peucawo 'Eun. Daecti ku 'kue 'hk'a 'nae leukah 'ritroe ku 'a 'ye 'keuting hk'ai 'ceu nang awn 'ce na 'pe tecla a. Aen 'ce a meuh hk'a 'leupaws seumeu', hk'a 'tukyak mae 'hk'a 'kati keutawn 'na'. Pe 'htuk 'ri yeuh ku 'hk'a 'nanggal 'na', mae 'ku 'hk'a 'kui 'na 'pe 'ku na 'htuk 'ri un

tecla a.²⁴Peue teuk 'va peue ngai 'lec 'na 'pe', to 'rong 'pe 'vavoc na 'daecti pe 'gleut jawng tu 'ka kalaok 'na'.

²⁵Peue guil leukah 'ritroe mae 'peue Hparisae 'meuh peue leukah 'seunga 'hpum 'vok 'na 'pe', kaw pe 'pun ri hkam 'hk'a 'jha 'na'. Kopti hpak 'pe 'pal hk'a 'nok ka paen 'kaw 'na', daecti hk'a 'nae ka na 'hk'a 'law 'hpa na 'mae 'hk'a 'hkuit 'nawng 'tang 'na 'a nuknhen 'a.²⁶Peue Hparisae 'ngai 'lec 'na 'pe', hpak 'hk'a 'nae ka paen 'kaw 'na 'nanggal 'reu', hk'a 'nok ka na 'a ku na 'seungawm yeut.

²⁷Peue guil leukah 'ritroe mae 'peue Hparisae 'meuh peue leukah 'seunga 'hpum 'vok 'na 'pe', kaw pe 'pun ri hkam 'hk'a 'jha 'na'. Kopti seun 'pe 'leumuic pok ri paing ri pun 'na'. Hk'a 'nok ka na 'a saec 'ngam nyawk', daecti hk'a 'nae ka na 'seuang 'peue yeum na 'mae 'ku 'hk'aw 'jeuk na 'gawm 'euc 'a nuknhen 'a.

²⁸Seun 'awn 'na, peue nyu hk'a 'nok pe 'na 'seun 'meuh pe 'peue leupaws seumeu 'ko', daecti hk'a 'nae pe 'na 'hk'a 'leukah 'seunga 'hpum 'vok 'na 'mae 'ku 'rai na 'a nuknhen 'a.

²⁹Peue guil leukah 'ritroe mae 'peue Hparisae 'meuh peue leukah 'seunga 'hpum 'vok 'na 'pe', kaw pe 'pun ri hkam 'hk'a 'jha 'na'. Kopti go 'pe 'leumuic ce peue suip leukah 'Eun Peucawo 'na 'mae 'yong 'pe 'leumuic ce peue leupaws seumeu 'na'.³⁰Pe 'lah', 'A lawn meuh ku 'a 'yu im 'ut 'e 'cu ce yam ceucat e 'na 'ce ko', e 'hkuin 'kaw pawng 'ri mae 'ku 'toh peue suip leukah 'Eun Peucawo 'na 'ce'.³¹Lah 'pe 'a yeuh keutit 'na 'lak 'meuh a hkam 'meun pe 'sa 'hki 'meuh ri kon 'hk'i ce peue toh peue suip leukah 'Eun Peucawo 'na 'ce.³²Kop awn 'na, kah pe 'suipe ri yeuh map 'ku 'yeuh ce ceucat pe 'na 'heul 'rot tisut 'ka reu'.

³³Kon 'hk'i ka seueueng 'sa 'hao 'na 'pe', pe 'ci 'kaw cang pon hk'a 'taws 'a 'mu kaw kah pe 'lec keutong 'nyarok na 'yeuh sa 'nhaw '?³⁴Ui 'cus 'peue suip leukah 'Eun Peucawo', peue kue 'cu 'yi mae 'peue guil leukah 'ritroe na 'ce ri pe'. Ngon', pe 'toh ce, tawk 'ce pang kleum 'rawng 'tawp'. Ngon', pe 'ta 'faet 'ce nang sa 'la vang hk'o 'mun 'na 'mae 'pe 'heul 'keunhap 'nokneh ce ti veng hawc 'ti veng.³⁵Kop awn 'na, nham 'ce peue leupaws seumeu 'hk'uic 'pang bhen 'keute 'na 'tang 'neum ri nham 'eun Abela 'peue leupaws seumeu 'na 'rot ti nham 'eun kon 'eun Berehkeya 'muis Yahkari 'ku 'toh pe 'eun nang seuna 'ka nya hk'o 'mun 'keuting mae 'vang dum ri tan ku 'tan na 'a kaw hk'uic 'hk'a 'pang pe'.³⁶Kaw Ui 'lah 'a ri pe 'neum-neum, ceu nang aen 'ce gawm 'euc 'kaw a keut 'meuh ri peue cu aen 'ce.

† Nang htawm Seunga 'na 'ngon', a un 'kue 'nambat aet '14 na'.

Yesu ' leumeus ' Eun veng Yeru ' salaem

³⁷ O ' , veng Yeru ' salaem, veng Yeru ' salaem, toh mi peue suip leukah ' Eun Peucawo ' na ' ce mae ' dhim ' mi peue cus ' ri lih ri mi na ' ce yeum ri seumu laleung. Ui ' saec ' sum ' hk'on ' ro kon ' hk'i mi na ' ce seun ' el ' ma na ' ngom a kon ' ri na ' hk'a ' ruim hk'ec ' ri na ' laleung ko ' , daecti mi un ' kah Ui ' yeuh a. ³⁸ Keue ' reu ' , nya mi na ' tec a ri rang ' hawc ' . ³⁹ Kopti lah ' Ui ' a ri mi, hpaw mi ca ' kaw nang pun ri nyu Ui ' rot ti kaw mi lah ' , 'Suk ' se-un ' Cawo ' ing ' hk'a ' ruim muis Eun Peucawo ' na ' Eun.' †”

Het ' kaw hk'aws ' rot yam tisut '

24 Yam Yesu ' puc Eun ri lih neum nya hk'o ' mun ' keuting na ' , tapae ' na ' ce ing ' ri Heun. Ce hak ' Eun eo ' ri nawk nya hk'a ' naee kang ' hkung ' ka nya hk'o ' mun ' keuting na ' ce. ² Yesu ' Eun lah ' a ri ce, “Pun pe ' ri nyu ceu nang aen ' ce gawm ' euc ' hawc ' , un ' meuh ka aw? Ui ' lah ' a ri pe ' neumneum, seumu aen ' kaw ce un ' lae po ri pang puri saec ' ti meul ' . A kaw pun ri seut ' ri tec ri ku meul ' ri.”

³ Yam Yesu ' mok ' Eun pang gong Sanlon na ' , tapae ' na ' ce ing ' mhaing ' koe Eun, “Hk'o ' Mi lah ' ye mhawng ' a, ceu nang tit ' ce a ci ' kaw keut ' meuh yam-haw ' ? Kaw Mi tang lih na ' mae ' kaw a hk'aws ' rot yam tisut ' na ' , a ci ' kaw kue ' het ' keunhaw ' ?”

⁴ Yesu ' Eun top ' a, “Uin ' sati ri reu ' . Pawlae tuil ' peue cop ' pe ' . ⁵ Peue heun ' na ' kaw ce peus muis Ui ' na ' ce na ' ing ' lah ' , 'Meuh ui ' Hkrit Eun. †” Ce na ' cop ' peue heun ' heun ' na ' ce. ⁶ Pe ' kaw pun ri mhawng ' lawng peueng ' suik ' mae ' lawng suik ' kaw a keut ' na ' . Uin ' sati ri, pawlae hpum ' seuyuk. Kopti lawng aen ' kaw a kah ri kue ' meuh yeut, daecti a hkuin ' kaw nang rot yam tisut ' ka. ⁷ Peue ti ceu hawc ' ti ceu, kuing ' ti kuing ' hawc ' ti kuing ' , peue kaw kleuc ' puri. A kaw kue ' in ' san ' mae ' ut ' ngeup ' heun ' duih ' . ⁸ Ceu nang aen ' ce gup kaw n ' kaw a meuh yawo kleum ' ka ku ' tukhka na ' seun ' sui ' awng ' na ' ko ' .

⁹ Kopti meuh a Ui ' ri, peue kaw mheut ' pe ' , peue kaw yeuh ku ' tukhka na ' ri pe ' , peue kaw toh pe ' yeum. Peue gawm ' euc ' peue kaw nyu pe ' pereng ri. ¹⁰ Yam awn ' na, peue heun ' peue na ' peue kaw hpawt ' ri tecla hk'a ' yum ' na ' . Peue kaw fuin ri puri mae ' peue kaw ces ri puri. ¹¹ Peue guil ri meuh peue suip leukah ' Eun Peucawo ' na ' ce kaw pucti heun ' . Ce kaw cop ' peue kleuc ' hk'a ' ri heun ' peue. ¹² Kopti ku ' rai na ' baet a ri kue ' heun ' na ' ,

hk'a ' leumeus ' keus peue peue heun ' na ' a baet ri yawm ' heul ' . ¹³ Daecti peue yeun ' hkam a rot tisut ' ka na ' kaw ce pun ri lawtpon. ¹⁴ Punta kaw a meuh sa ' hki ' pun peue gawm ' euc ' na ' , leukah ' mun ' ren ' kaw n lawng kuing ' Eun Peucawo ' na ' a kaw pun ri pao ' ri hk'awp ' pang bhen ' keute ' na ' . Hawc ' ko ' , yam tisut ' na ' a kaw rot.

¹⁵ Kop awn ' na, yam nyu pe ' ku ' hk'aw ' jeuk yeuh ku ' lulaic na ' ut ' a hk'a ' naee vang seunga ' chak ' na ' hot ' seun ' ku ' Dayela ' peue suip leukah ' Eun Peucawo ' lah ' eun ri uin ' na ' ‡ (peue lip htawm aen ' a na ' , co ' -ca ' ri yawng a reu '), ¹⁶ peue ut ' nang kuing ' Yu ' da na ' kah ce hk'uih huk ' pang gong na ' reu ' . ¹⁷ Peue ut ' pang a ' ras ' na ' ce pawlae lih ti hk'eung ti ri ceu pucti lih hk'ai ' nya na ' . ¹⁸ Saec ' meuh peue ut ' nang mal ' na ' ce pawlae ing ' ti hk'o keuting ri na ' . ¹⁹ Sa ' hkat ' yam awn ' na kaw a meuh ku ' hk'o ' lhat ' keuting pun a ' ya nyhel ' mae ' nang kue ' kon ' pui na ' ce. ²⁰ Yam kaw pe ' pun ri hk'uih aen ' punta kaw a un ' keut ' kue ' yam kawt ' na ' , a ' ko ' hk'a ' naee seunyi Sin ' na ' , pe ' na ' hk'o ' mun ' reu ' . ²¹ Kopti, yam awn ' kaw a meuh yam tukhka nyhap ' nyawk ' . Ku ' keunhaw ' un ' lae keutec pun a ri mae ' ka tang ' neum bhen ' keute ' na ' pun a ri hpanpleng ' ri na ' . Saec ' hk'a ' nanggal ' ka heul ' , a hkuin ' kaw lae kue ' bae. ²² Yam awn ' a lawn un ' pun ri yeuh ri dot ' ko ' , a ' nhaw ' hkuin ' kaw lawtpon a saec ' ti peue. Daecti kopti meuh a peue pun ri leuk ri ti na ' ce, meuyam awn ' a pun ri yeuh ri dot ' . ²³ Yam rot a yam awn ' na, peue ti ri peue eun lawn lah ' a ri pe ' , 'Keue ' reu ' , Hkrit ut ' Eun maen ' , a ' ko ' 'Ut ' Eun mawn ' , pe ' na ' pawlae leuceng a. ²⁴ Kopti peue guil ri meuh Hkrit Eun mae ' peue guil ri meuh peue suip leukah ' Eun Peucawo ' na ' kaw ce pucti lih. A lawn kaw cang ko ' , punta kaw ce cop ' ri pun peue Peucawo ' leuk Eun ri ti na ' ce, ce kaw yeuh het ' keuting mae ' ku ' hk'o ' am ' na ' ce. ²⁵ Keue ' reu ' , lah ' Ui ' ri uin ' a ri pe ' tang ' neum cawo ka hawc ' .

²⁶ Kop awn ' na, peue lawn lah ' a ri pe ' , 'Peue awn ' ut ' Eun nang vang hk'oh ' hk'oeng ' na. Pe ' na ' pawlae pucti heul ' . Peue lawn lah ' , 'Ut ' Eun nang hkawng hk'a ' naee na ' . Pe ' na ' pawlae yum ' a. ²⁷ Kopti seun ' cak ' cal ' na ' ceng ' a hk'a ' lih seunyi a cang nyu ri rot hk'a ' lec seunyi na ' , yam Kon ' ai ' peue kaw Eun tang lih na ' a ku kaw seun ' awn ' a yeut. ²⁸ Tu ' yeum na ' a lawn kue ' tawngnhaw ' ko ' , raeng na ' a kaw cu ri ri ka.

²⁹ Yam meuyam ka seunyi ka ku ' tukhka nyhap ' nyawk ' awn ' hawc ' ka na ' , 'Seunyi na ' a na ' keulawn ' duim ' lawng,

† Suk ' seun ' 118:26 †† A ' ko ' Mesi ' ya

‡ Dayela ' 9:27; 11:31; 12:11

a 'chi' na' a hkuin' kaw laee ceng'.
 Seumeueng' na' a na' hk'uic' lih neum pang mao'
 na',
 ti 'ca ka mao' na' ku ceu ka a kaw pun ri keuyuih' fui-
 i' fai'.'†

³⁰Yam awn' na, het' Eun Kon' ai' peue na' a kaw puc-
 ti lih neum pang mao' na'. Peue ceu pang bhen' keute'
 ku ceu na' peue kaw pet yam. Peue kaw pun ri nyu Kon'
 ai' peue na' lih Eun hk'a' naee putum' neum pang mao'
 na' ri munhpung' ti 'ca keuting ri na'. ³¹Eun kaw cus'
 in' hpom ri na' ce lih mae' seng' pi' tae' rae' laws'
 nyawk' na'. Ce kaw heul' hk'on' ro peue leuk Eun ri ti
 na' ce tang' neum rot ri hkop' lok dal mao' pun' hon'
 pun' ce' na'.

³²Rin ri ti leukah' leupong' lawng kleum' pli' keutuic'
 na' reu'. Yam gluh' ka na', pe' yawng meun kaw a
 hk'aws' rot yam kuc'. ³³Seun' awn' na, yam pun pe' ri
 nyu ceu nang awn' kue' meuh ka na', pe' kaw yawng
 kaw Eun hk'aws' rot, Eun rot keunam ka leuva' na' haw-
 c'. ³⁴Kaw Ui' lah' a ri pe' neumneum. Cu yam peue
 maet' maen' na' un' nang pon ce na', ceu nang aen' ce
 gawm' euc' a kaw meuh neum. ³⁵Mao' na' mae'
 bhen' keute' na' kaw a rai', daecti leukah' Ui' na' a
 hkuin' kaw rai'.

**Seunyi meuyam awn' a 'nhaw' hkuin' yawng a saec' ti
 peue**

³⁶A 'nhaw' hkuin' yawng seunyi meuyam awn' na
 saec' ti peue. Saec' meuh in' hpom kuing' pang mao'
 na' ce mae' Kon' ai' na' Eun ku hkuin' yawng a.
 A 'kuiing' yawng Eun a koe. ³⁷Seun' ku' meuh hk'a'-
 naee seunyi cu eun No' ah na', a ku kaw meuh hk'a' naee
 seunyi Eun Kon' ai' peue na' yeut. ³⁸Kopti nanggal' ka
 yam leuum' na' un' nang htum' ka na', peue na' ce
 hk'asom', pen' vel, ti beun' ti me rot ti seunyi No' ah lec
 eun nang reu na'. ³⁹Cu yam leuum' na' un' nang htum'
 a ri tec peue na', peue hkuin' nang yawng ku' kaw kue'
 meuh na' saec' ti ceu. Seunyi yam Kon' ai' peue puc
 Eun ri na', a ku kaw seun' awn' a yeut. ⁴⁰Yam awn' na,
 me lal' peue ut' tiduih' nang na na' ka. Ku' ti peue na'
 eun kaw pun ri ti ri huk', ku' ti peue na' eun kaw pun ri
 uin' ri ut'. ⁴¹Beun' lal' peue maw' moc' tiduih' na'
 ka. Ku' ti peue na' eun kaw pun ri ti ri huk', ku' ti peue
 na' eun kaw pun ri uin' ri ut'.

⁴²Kop awn' na, saec' meuh yamnhaw' ko' a reu',
 kopti un' yawng pe' seunyi yam Cawo' ri na' kaw Eun
 tang lih na'. ⁴³Yeuh pe' leuceng pun aen' na, cawo' nya
 na' eun lawn yawng yam con' na' kaw ce ing' ri ti

yamnhaw' ka peunpul na' ko', eun kaw hk'awn' ko'
 meulamlam ri. Eun hkuin' kaw kah a 'nhaw' cang toe' ri
 ing' lec nya ri na'. ⁴⁴Kop awn' na saec' pe' ri, pe' ku
 kaw kah ri rangraen ri meulamlam ri. Kopti Kon' ai' peue
 na' kaw Eun lih yam un' pawn pe' kui' ri na'.

Mhai' kati keutawn' mae' mhai' kati un' keutawn'

⁴⁵A 'nhaw' ci' meuh mhai' kati keutawn' kue' cu 'yi
 ku' cawo' na' tuil' eun eun meuh ro' gvah ku' hk'a' ri
 mhai' ri cawp' meu cawp' yam ri na' eun? ⁴⁶Yam cawo'
 na' ing' nyu eun mhai' na' yeuh eun ko' na', mhai'
 awn' eun kue' mun' keuting. ⁴⁷Kaw Ui' lah' a ri pe'
 neumneum, cawo' na' kaw eun kah mhai' awn' eun
 rokxa' vahtu' hk'il' leumuil ri na' gawm' euc' ka.

⁴⁸Daecti mhai' awn' eun lawn meuh mhai' un' chak',
 eun na' kuit a hk'a' naee hpum' ri yeuh keutit', 'Cawo'
 ui' na' kawm' kaw eun yak ing' rot. ⁴⁹Hawc' ko', eun
 tang' ri peum' klaee' mhai' pu ri na' ce. Eun hk'asom'
 nyui plai' mae' a 'mawo yuic' ri plai' ri na' ce ko',
⁵⁰yam cawo' eun na' tang ing' rot eun yam mhai' awn'
 un' keutui' hpum' un' pawn eun kui' ri na', ⁵¹cawo'
 na' kaw eun ciyang eun reng, ra eun ut' vang ut' ce peue
 leukah' seunga' hpum' vok' na'. Mawn' na' a kaw
 kue' hk'a' ta' ul' ri yam cet rang' ri na'.

Leukah' leupong' lawng kon' hk'ih' plot' lon kul' peue

25 Yam awn' na, kuing' pang mao' na' seun' a
 kon' hk'ih' plot' lon kul' peue ce sawng' pin'
 kaw' ngawl ri kaw heul' rap seula pen' na' eun ko'.
²Ku' hpawn' peue na' ce nga' suisa. Ku' hpawn' peue
 na' ce kue' cu 'yi. ³Ku' nga' suisa na' ce sawng' pin'
 kaw' ngawl ri na' heul', daecti ce hkuin' pin' lamawn
 ka heul'. ⁴Ku' kue' cu 'yi na' ce pin' kaw' ngawl ri
 na' heul', ce ku pin' ri pu lamawn nang kong' heul'.
⁵Seula pen' na' kopti un' pao ing' rot eun na', ce it'
 jing' heul' pun ri it'.

⁶Yam rot a peunnuik' na', peue klawng ri lah', 'Seula
 pen' na' ing' rot eun hawc'. Pucti lih heul' rap ri ti eun
 reu'.

⁷Hawc' ko', kon' hk'ih' plot' lon na' ce sawng' kuh'
 rangraen kaw' ngawl ri na'. ⁸Ku' nga' suisa na' ce
 lah' a ri ku' kue' cu 'yi na' ce, 'Hk'o' pe' gvah ri tuil'
 ye is' lamawn ri na' ngon', kaw' ngawl ye na' kaw a
 hk'aws' laic hawc'.

⁹Ku' kue' cu 'yi na' ce top' a, 'Ca' kaw a cang, lhat'
 ye lamawn ri na' un' kum ka ye ri mae' pe' ri. Na' pe'
 heul' leuvaee lamawn pun ti ri cawo' paing' lamawn
 na' ce, a na' chak'.

† I' saya' 13:10; 34:4

¹⁰ Yam buih heul' leuvaee ce na', seula pen' na' eun ing' rot. Kon' hk'ih' plot' lon ku' rangraen ri hawc' na' ce heul' tiduih' mae' seula pen' na' eun hk'a' naee vang hk'a' chec' na'. Hawc' ko', leuva' na' a sawng' ri.

¹¹ Hawc' ka na', kon' hk'ih' plot' lon hpawn' peue ku' heul' leuvaee lamawn na' ce ing' klawng ri lah', 'Cawo', cawo', hk'o' mi tah' leuva' na' ri ye.'

¹² Daecti eun lah' a ri ce, 'Ui' lah' a ri pe' neumneum, hpaw ui' ca' yawng pe.'

¹³ Kop awn' na, kopti un' yawng pe' seunyi meuyam awn' kaw a rot yamnhaw' na', saec' meuh yamnhaw', ko' a reu'.

Leukah' leupong' lawng mhai' loe' peue

¹⁴ Kuing' pang mao' na' seun' a peue ti peue kaw eun pucti heul', eun klawng mhai' ri na' ce, eun tawm' ap ce rokxa' vahtu' hk'il' leumuil ri na' ce. ¹⁵ Eun tuil' leumuil ri ku' ti peue na' eun hpawn' talan †, ku' ti peue na' eun lal' talan, ku' ti peue na' eun ti talan hot' seun' ku' yawng ku' cang ce na'. Hawc' ko', eun pucti heul'. ¹⁶ Ku' pun hpawn' talan na' eun keulawn' heul' yeuh ka. Eun tang pun nammaet ka na' hpawn' talan.

¹⁷ Seun' awn' na, ku' pun lal' talan na' eun ku' pun nammaet ka lal' talan. ¹⁸ Daecti ku' pun yawo ti talan na' eun kung' ri puing' ri mo' leumuil eun cawo' ri na' nang keute' na'.

¹⁹ Hawc' ka na' ling', cawo' na' eun tang ing'. Eun sawn' ca' lang' leumuil na' ri mhai' ri na' ce. ²⁰ Ku' pun leumuil hpawn' talan na' eun pin' leumuil ri na' ing' mae' nammaet pun eun hpawn' talan na'. Eun lah', 'Cawo', tuil' mi leumuil ri ui' hpawn' talan. Keue', tang pun ui' nammaet ka na' hpawn' talan.'

²¹ Cawo' eun na' eun top' a ri heun, 'Chak' ka, meuh mi mhai' chak' mhai' kati keutawn'. Kopti kati keutawn' mi ri ku' aet' na', ui' kaw tang' ri uin' mi meuh nang rokxa' hk'eung keuting na'. Kah mi ren' kawn tiduih' mae' cawo' ri na' eun reu'.

²² Ku' pun leumuil lal' talan na' eun ku' ing' lah', 'Cawo', tuil' mi leumuil ri ui' lal' talan. Keue', tang pun ui' nammaet ka na' lal' talan.'

²³ Cawo' eun na' eun top' a ri heun, 'Chak' ka, meuh mi mhai' chak' mhai' kati keutawn'. Kopti kati keutawn' mi ri ku' aet' na', ui' kaw tang' ri uin' mi meuh nang rokxa' hk'eung keuting na'. Kah mi ren' kawn tiduih' mae' cawo' ri na' eun reu'.

²⁴ Hawc' ko' ku' pun leumuil ti talan na' eun ku' ing' lah', 'Cawo', yawng ui' meuh mi peue hkan' reng. Mi vuic ri ti vang un' jheum'. Mi hk'on' ro ri ti vang un'

puin'. ²⁵ Ui' lhat' yeuh ri leumuil mi na' rai', ui' heul' puing' leumuil ti talan mi na' nang keute'. Keue', aen' meuh a leumuil mi na'.

²⁶ Cawo' na' eun top' a, 'Mhai' rai keunah na' mi, yawng mi vuic ui' ri ti vang un' jheum'. Ui' hk'on' ro ri ti vang un' puin' na'. ²⁷ Yeuh keutit' ko', mi na' htuk' ri heul' seue' leumuil ui' na' hk'a' naee nya leumuil na'. Yam tang ing' ui' na', ui' ku' na' pun leumuil ri na' mae' nammaet ka.'

²⁸ Kop awn' na, ti leumuil ti talan eun na' hk'ai' heun, tuil' a ri ku' kue' kul' talan na' eun reu'. ²⁹ Kopti, ku' kue' na' ce ko', kaw tang tuil' ce baee. Ce na' kue' lheu' buba ri. Daecti ku' un' kue' na' ce ko', kaw tang hue' ku' kawn' kue' ce na' lih hk'ai' ce. ³⁰ Nyon ri tec mhai' un' kue' peuehot' aen' eun vang duim' lawng hk'a' nok vang kaw kue' hk'a' ta' ul' ri yam cet rang' ri na' reu'.

Taws' a' mu ri peue ceu gawm' euc'

³¹ Yam Kon' ai' peue lih Eun hk'a' naee munhpung' ri na' mae' in' hpom na' ce tiduih' gawm' euc' na', Eun kaw mok' pang tenceo' ri na' hk'a' naee munhpung' ka kuing' pang mao' na'. ³² Peue ceu gawm' euc' na' peue kaw ing' cuhk'on' ri nanggal' Eun na'. Hawc' ko', Eun kaw gvah peue hk'ai' puri seun' peue go' kon' yung' na' gvah eun kon' yung' na' mae' a' pe na' ko'. ³³ Kon' yung' na' Eun kaw uin' a hk'a' a' tawm' ri. A' pe na' Eun kaw uin' a hk'a' a' ve' ri.

³⁴ Hawc' ko', Hkun' haw' hkam' na' Eun kaw lah' a ri peue ut' hk'a' a' tawm' ri na' ce, 'Peue pun mun' ri Kuing' Ui' Eun na' pe', ing' ti sin' pe' na' reu'. Sin' awn' meuh a kuing' ku' rangraen ri uin' ri pun pe' tang' neum yam bhen' keute' na' pun a ri hpanpleng' ri na'. ³⁵ Kopti yam sum' som' Ui' na', pe' tuil' Ui' som'. Yam sum' nyui Ui' leuum' na', pe' tuil' Ui' nyui. Yam meuh Ui' peue leuvok un' duing nyu na', pe' rap ri ti Ui'. ³⁶ Yam ut' gung' gang' ui' na', pe' tuil' Ui' is' hk'ohk'eung. Yam peuyhat Ui' na', pe' nom' -nawk Ui'. Yam ut' Ui' nang htawng' na', pe' heul' glue ri Ui'.

³⁷ Yam awn' na, peue leupaws seumeu' na' ce kaw mhaing' Eun, 'Cawo', yam nyu ye sum' som' Mi ye tuil' Mi som' na', a' ko' yam nyu ye sum' nyui Mi leuum' ye tuil' Mi nyui na', a ci' meuh yamnhaw'? ³⁸ Yam nyu ye meuh Mi peue leuvok ye rap ri ti Mi na', a' ko' yam nyu ye ut' gung' gang' mi ye tuil' Mi is' hk'ohk'eung na', a ci' meuh yamnhaw'? ³⁹ Yam nyu ye peuyhat Mi, a' ko' yam ut' Mi nang htawng' ye heul' glue ri Mi na', a ci' meuh yamnhaw'?

† Leumuil ti talan na' meuh a ngos reng na' 20 neum.

⁴⁰Hkun 'haw 'hkam ' na ' Eun kaw top ' a, 'Ui ' lah ' a ri pe ' neumneum. Ku ' yeuh pe ' a ri peue aet ' hk'ai ' peue hk'a ' naee ec ' awng ' Ui ' ti peue na ' eun na ' , pe ' ku yeuh a ri Ui ' yeut.'

⁴¹Hawc ' ko ' , Eun kaw lah ' a ri peue ut ' hk'a ' a ' ve ' ri na ' ce, 'Peue pun ri hkam ' hk'a ' jha ' na ' pe ' , puc pe ' heul ' hk'ai ' Ui ' reu ' . Heul ' lec hk'a ' naee ngawl ha ' cot ' cu vang pun ri rangraen ri uin ' ri pun seuca ' rai na ' mae ' tapae ' ka na ' ce na ' . ⁴²Kopti yam sum ' som ' Ui ' na ' , pe ' hkuin ' tuil ' Ui ' som ' . Yam sum ' nyui Ui ' leu-um ' na ' , pe ' hkuin ' tuil ' Ui ' nyui. ⁴³Yam meuh Ui ' peue leuvok na ' , pe ' hkuin ' rap ri ti Ui ' . Yam ut ' gung ' gang ' ui ' na ' , pe ' hkuin ' tuil ' Ui ' is ' hk'ohk'eung. Yam peuyhat Ui ' na ' mae ' yam ut ' Ui ' nang htawng ' na ' , pe ' hkuin ' heul ' glue ri Ui ' .'

⁴⁴Hawc ' ko ' , ce kaw mhaing ' Eun, 'Cawo ' , yam nyu ye sum ' som ' Mi, a 'ko ' sum ' nyui Mi leuum ' , a 'ko ' meuh Mi peue leuvok, a 'ko ' ut ' gung ' gang ' Mi, a 'ko ' peuyhat Mi, a 'ko ' ut ' Mi nang htawng ' ye un ' heul ' yeuh mhai ' ri Mi na ' , a ci ' meuh yamnhaw ' ?'

⁴⁵Eun kaw top ' , 'Ui ' lah ' a ri pe ' neumneum. Ku ' un ' yeuh pe ' a ri peue aet ' hk'ai ' peue hk'a ' naee peue aen ' ce ti ri peue na ' eun na ' , pe ' ku hkuin ' yeuh a ri Ui ' yeut.'

⁴⁶Hawc ' ko ' , peue aen ' ce kaw kah ri pucti heul ' rap ri ti hk'a ' ciyang cot ' cu na ' . Daecti peue leupaws seumeu ' na ' ce kaw pun ri lec vang a 'yu im ' cot ' cu na ' ."

Mhe ' hk'a ' kan ' kaw toh Yesu ' Eun

26 Yam Yesu ' hawc ' Eun lah ' ri lawng awn ' ce gawm ' euc ' na ' , Eun lah ' a ri tapae ' ri na ' ce, ²"A lawn bae lal ' seunyi ko ' , yawng pe ' pawe vel nya na ' kaw a rot. Yam awn ' na, Kon ' ai ' peue na ' Eun kaw pun ri ap ri tawk ' ri pang kleum ' rawng ' tawp ' na ' ."

³Yam awn ' na, ro ' peue jhawp ' rit keuting na ' ce mae ' nang kawt hk'a ' naee ce peue Yu ' da na ' ce hk'om puri nang haw ' eun peue jhawp ' rit keuting muis Kayafas ' na ' . ⁴Hk'a ' naee vang hk'a ' vok ' hk'a ' chi ' lai na ' ce sa ' lit puri mhe ' hk'a ' kan ' kaw mheut ' ri toh Yesu ' Eun. ⁵Ce lah ' a ri puri, "Mak ' nang yeuh a hk'a ' naee yam ka pawe na ' , peue heun ' na ' na ' peue cang yeuh ku ' suksak."

Beun ' pok lamawn ri Yesu ' Eun

⁶Yam Yesu ' mok ' Eun nang nya eun Si ' mon ku ' meuh peue naw na ' eun nang yung ' Betani ' na ' , ⁷yam Yesu ' buih mok ' Eun ri som ' na ' , beun ' ti peue na ' ka pin ' lamawn hom ' ngos heun ' seue ' ri nang kong ' seumu

na ' ing ' . Ka lhuik ' lamawn hom ' na ' ri cing ' Eun Yesu ' na ' .

⁸Yam tapae ' na ' nyu ce a na ' , ce seungeueng ' . Ce lah ' , "A ci ' yeuh keunhaw ' , ka vae ' yeuh lamawn hom ' awn ' a meuh ku ' hk'o ' hk'awng ' ? ⁹Na ' ka paing ' lamawn hom ' awn ' a ka na ' pun ngos ka na ' heun ' he-un ' . Ka na ' htuk ' ri gvah ri tuil ' a ri peue hk'o ' tukyak na ' ce."

¹⁰Daecti Yesu ' yawng Eun ku ' kuit ce na ' , Eun lah ' a ri ce, "A ci ' meuh kop keunhaw ' pe ' vae ' suksak beun ' aen ' ka? Yeuh ka ku ' chak ' na ' ri Ui ' hawc ' . ¹¹Peue hk'o ' tukyak na ' ut ' ce mae ' pe ' laleung. Daecti Ui ' ri, Ui ' hkuin ' kaw ut ' mae ' pe ' laleung. ¹²Lhuik ' ka lamawn hom ' ri tu ' Ui ' aen ' a na ' , meuh a ku ' rangraen ri uin ' punta yam na ' peue puing ' tu ' Ui ' na ' .

¹³Kaw Ui ' lah ' a ri pe ' neumneum, leukah ' mun ' ren ' kawm aen ' a saec ' na ' lah ' ri heul ' tawngnhaw ' ka pang bhen ' keute ' na ' ko ' , punta kaw peue kuit rot ri beun ' aen ' ka na ' , kan ' yeuh ka ri uin ' aen ' kaw peue suip ri ris a heul ' yeut."

Yu ' das ' kuit deut eun ri kaw fuin Yesu ' Eun

¹⁴Hawc ' awn ' na, hk'a ' naee tapae ' kul ' leual ' peue na ' ce ku ' muis Yu ' das ' I ' sakariot ' na ' eun heul ' ri ro ' peue jhawp ' rit na ' ce. ¹⁵Eun mhaing ' ce, "Ui ' lawn ap fuin Yesu ' Eun ri pe ' ko ' , pe ' ci ' kaw tuil ' ui ' is ' a ' neng?" Kop awn ' na, ce tuil ' eun is ' leumuil leuo ' kul ' htaep ' . ¹⁶Tang ' neum yam awn ' na, eun sok yam htuk ' lai ri kaw ap fuin Eun ri ce na ' .

Yesu ' hk'a Eun pawe vel nya na ' mae ' tapae ' ri na ' ce

¹⁷Seunyi la ka pawe un ' seue ' hkawomun ' is ' paeng na ' , tapae ' na ' ce ing ' mhaing ' Yesu ' Eun, "Mi ci ' sum ' kah ye rangraen vang kaw e ' hk'asom ' pawe vel nya na ' tawngnhaw ' ?"

¹⁸Eun lah ' , "Heul ' lah ' a ri peue nang veng ti peue na ' eun yeuh keutit ' , 'Seura ' lah ' Eun, yam tang ' ri uin ' ri pun Ui ' na ' kaw a hk'aws ' rot hawc ' . Ui ' kaw hk'a pawe vel nya na ' tiduih ' mae ' tapae ' ri na ' ce nang nya mi na ' .'" ¹⁹Kop awn ' na, tapae ' na ' ce heul ' yeuh a hot ' seun ' ku ' Yesu ' kah Eun ce yeuh na ' . Ce heul ' rangraen pawe vel nya na ' .

²⁰Yam fec ' ka na ' , Yesu ' Eun mok ' ri som ' keunam hpuin ' na ' mae ' tapae ' kul ' leual ' peue ri na ' ce.

²¹Yam buih som ' ce na ' , Yesu ' Eun lah ' , "Ui ' lah ' a ri pe ' neumneum, hk'a ' naee pe ' ri ti peue kaw eun fuin Ui ' ."

²²Tapae ' na ' ce kuit nyhap ' nyawk '. Ce lah ' a ri Heun ti peue hawc ' ti peue, "Cawo ', hkuin ' a na ' un ' meuh ui ' ri ah?"

²³Yesu ' Eun top ' a, "Ku ' ruim ri som ' paen ' mae ' Ui ' na ' meuh eun nang kaw fuin Ui '. ²⁴Kon ' ai ' peue na ' Eun kaw kah ri hot ' seun ' ku ' tem ' ri uin ' ri na '. Daecti peue fuin Kon ' ai ' peue na ' eun kaw pun ri hkam ' hk'a ' jha ' na '. Peue awn ' eun lawn na ' un ' keut ' ko ', a jaen na ' chak ' pun heun."

²⁵Yu ' das ' ku ' ap fuin Eun na ' eun lah ', "Seura ', hkuin ' a na ' un ' meuh ui ' ri ah?"

Yesu ' Eun top ' a, "Meuh a mi ri."

Hk'a pawe Eun Yesu '

²⁶Yam mok ' ce ri som ' na ', Yesu ' Eun ti hkawomun ' na ' Eun mun ' keuting ri Peucawo ' Eun. Hawc ' ko ', Eun ves ri tuil ' a ri tapae ' ri na ' ce. Eun lah ', "Ti ri hk'a a reu '. Aen ' meuh a tu ' Ui '."

²⁷Hawc ' ko ', Eun ti kawc ' na ', Eun mun ' keuting ri Peucawo ' Eun. Hawc ' ko ', Eun tuil ' a ri ce. Eun lah ', "Ti ri nyui a ku peue ri reu '. ²⁸Aen ' meuh a nham ' Ui ', a meuh nham ' kati sat ' ca '. A lhae ' bah pun kaw a ploer map ' pun peue heun ' heun ' na ' peue. ²⁹Ui ' lah ' a ri pe ' , a lawn un ' nang rot ti seunyi pun Ui ' ri nyui leuum ' pli ' bui hk'u ' mae ' pe ' nang kuing ' Eun A ' kuing ' na ' ko ', Ui ' hkuin ' kaw lae nyui leuum ' pli ' bui na ' bae."

³⁰Yam hawc ' ce lah ' ri cai suk ' seun ' na ', ce pucti heul ' pang gong Sanlon na '.

Yesu ' lah ' Eun lawng Petru ' kaw eun tecla ri

³¹Yam awn ' na, Yesu ' Eun lah ' a ri tapae ' ri na ' ce, "Bul seunyaen ' , pe ' ri gawm ' euc ' kaw pe ' tecla Ui '. Kopti tem ' a ri yeuhki ' ,

'Kaw Ui ' toh cawo ' go ' kon ' yung ' na ' eun.

Kon ' yung ' na ' ce kaw taic ' jah hk'ai ' puri heul ' . ' †

³²Daecti hawc ' ka tang kuh ' im ' Ui ' na ' , Ui ' kaw bai heul ' nang kuing ' Galilae ' na ' nanggal ' pe ' ."

³³Petru ' eun lah ' , "Peue saec ' na ' tecla Mi gawm ' euc ' ri, daecti ui ' hkuin ' kaw duing tecla Mi."

³⁴Yesu ' Eun lah ' a ri heun, "Ui ' lah ' a ri mi neum-neum, bul seunyaen ' nanggal ' el ' un ' nang leuo ' ka na ' , kaw mi lah ' ri un ' yawng Ui ' hton loe ' pok."

³⁵Daecti Petru ' eun lah ' , "Ui ' saec ' na ' yeum mae ' Mi, ui ' hkuin ' kaw lah ' ri un ' yawng Mi." Saec ' meuh tapae ' seubu na ' ce gawm ' euc ' ce ku lah ' a yeuh keutit ' yeut.

Yesu ' heul ' hk'o ' Eun mun ' vang muis Gesemani '

³⁶Hawc ' awn ' na, Yesu ' Eun mae ' tapae ' na ' ce heul ' ri vang muis Gesemani ' na ' . Eun lah ' a ri ce, "Yam heul ' hk'o ' Ui ' mun ' teh ' na ' , pe ' ri pe ' na ' mok ' maen ' awh." ³⁷Eun va Petru ' mae ' kon ' me eun Yebe-dae ' lal ' peue na ' ce heul ' mae ' ti. Eun hpum ' lu kuit nyhap ' nyawk ' . ³⁸Eun lah ' a ri ce, "Hpum ' lu kuit nyhap ' Ui ' nyawk ' , a hk'o ' Ui ' kaw yeum. Ko ' maen ' na ' mae ' Ui ' meulamlam ri reu ' ."

³⁹Hawc ' ko ' , Eun sat ri heul ' peunaeng ' . Eun nghup ' buh ri na ' pang keute ' na ' . Eun hk'o ' mun ' lah ' , "A ' kuing ' , a lawn kaw cang ko ' , hk'o ' Mi ti kawc ' ka hk'a ' tukhka aen ' na heul ' hk'ai ' Ui ' . Daecti pawlae kah a meuh alo Ui ' , kah a htonnuk hot ' alo Mi na ' ."

⁴⁰Yam tang ing ' rot Eun mae ' tapae ' na ' ce na ' , Eun pun ri nyu buih it ' nyum ce. Eun lah ' a ri Petru ' eun, "Kaw pe ' ko ' mae ' Ui ' ti nali yawo ka un ' pun aw?"

⁴¹Punta kaw mi un ' pun ri hk'ui ' hk'a ' nae ' hk'a ' cop ' -long na ' , hk'o ' mun ' ko ' reu ' . Civit mi na ' a saec ' ran-graen ri, daecti tu ' mi na ' a kaw ' kaw ' reng kloe."

⁴²Eun tang heul ' hk'o ' mun ' lal ' pok ti pok. Eun lah ' , "A ' kuing ' , Ui ' lawn kaw pon un ' pun kawc ' aen ' na, Ui ' kaw kah ri nyui a ko ' , kah a htonnuk hot ' alo Mi na ' reu ' ."

⁴³Yam tang ing ' rot Eun bae na ' , Eun pun ri nyu kaw ' meung ce it ' nyum ri kopti un ' sum ' plang ' ce ngai ' ri na ' . ⁴⁴Eun tae ' ce, Eun tang heul ' hk'o ' mun ' bae loe ' pok ti pok seun ' pok nanggal ' na ' .

⁴⁵Hawc ' ko ' , Eun tang ing ' ri tapae ' na ' ce. Eun lah ' , "Kaw ' meung pe ' it ' ri keului ' ri aw? Keue ' reu ' , yam ka na ' rot a de. Kon ' ai ' peue na ' kaw Eun pun fuin peue ri ap ri nang ti ' ce peue map ' na ' hawc ' . ⁴⁶Kuh ' , heul ' pawh. Ku ' fuin Ui ' na ' ing ' rot eun hawc ' ."

Mheut ' ri ti Yesu ' Eun

⁴⁷Yam buih leukah ' Eun na ' , Yu ' das ' ku ' meuh tapae ' hk'a ' nae ' tapae ' kul ' leual ' peue na ' eun ing ' . Peue jang ' leungawng mae ' peue jang ' hku ' cum he-un ' na ' ce ku hot ' eun ing ' . Peue cum awn ' ce meuh peue ku ' cus ' ce ro ' peue jhawp ' rit keuting mae ' ro ' kan nang kawt ce peue Yu ' da na ' ce. ⁴⁸Ku ' fuin Eun na ' eun yeuh het ' ka ri ce lah ' , "Ui ' lawn huit ' a ' n-haw ' ko ' , meuh ka hkawn ' Eun hawc ' . Mheut ' ri ti Eun awh." ⁴⁹Yu ' das ' eun keulawn ' ing ' ri Yesu ' Eun. Eun lah ' , "Seura ' ."

⁵⁰Yesu ' Eun lah ' a ri heun, "A ' mawo, yeuh ku ' kaw mi ing ' yeuh na ' reu ' ."

† *Yahkari ' 13:7*

Hawc' ko', peue awn' ce ing' mheut' Yesu' Eun.
⁵¹Peue ut' mae' Yesu' Eun ti peue na' eun htut' leungawng ri bhat' yhuk' eun mhai' eun peue jhawp' rit keuting na' deut.

⁵²Yesu' Eun lah' a ri heun, "Tang sawm' leungawng mi na' nang bhawk' ri na' reu'. Kopti peue jhawp' leungawng na' peue gawm' euc' kaw peue pun ri yeum ri leungawng na'.⁵³Hteum' mi Ui' lawn hk'o' A' kuing' Eun cus' in' hpom kul' leual' muk ce keulawn' lih ko', a kaw un' cang aw?⁵⁴Daecti a lawn yeuh keutit' ko', a ci' kaw cang meuh hot' seun' ku' lah' ka nang htawm Seunga' na' a lah', 'kaw a kah ri meuh yeuhki', na' yeuh sa' nhaw'?"

⁵⁵Hawc' ko', Yesu' Eun lah' a ri peue muk heun' na' ce, "Meuh Ui' peue fuin kuing' aw, pe' vaee' jang' leungawng jang' hku' ing' mheut' Ui'? Mok' Ui' ri sangsawn' nang kang' hkung' ka nya hk'o' mun' keuting na' keuyuit, pe' hkuin' mheut' ri ti Ui'.⁵⁶Daecti aen' ce gawm' euc' meuh a punta kaw a htonnuk hot' seun' ku' peue suip leukah' Eun Peucawo' lah' ri hk'a' naee htawm Seunga' na'." Hawc' ko', tapae' Eun na' ce tecla Eun gawm' euc' ri. Ce hk'uih hk'ai' Heun.

Yesu' cawng Eun nanggal' ce muk peue hk'om kan' na'

⁵⁷Peue mheut' Yesu' eun na' va ce Eun heul' ri nya eun Kayafas' peue jhawp' rit keuting na' eun. Mawn' na' peue guil leukah' ritroe mae' ro' kan nang kawt ce peue Yu' da na' ce ing' hk'om puri ri ka.⁵⁸Daecti Petru' eun ut' vang ca ri seungai na' eun hot' Eun heul' rot ti kang' hkung' ka nya eun peue jhawp' rit keuting na'. Punta kaw eun nyu yawng ku' yeuh ce na' rot ti sut' ka na', eun ing' mok' mae' peue ko' nya na' ce.

⁵⁹Ro' peue jhawp' rit mae' muk peue hk'om kan' na' ce co' ca' ri sok sa' hki' un' kue' un' meuh ku' kaw hk'o' toh Yesu' Eun na'.⁶⁰Daecti ce saec' kue' nang hkam' sa' hki' un' kue' un' meuh na' heun' peue, ce hkuin' nyu sa' hki' kaw hk'o' toh Eun saec' ti ceu.

Vang tisut' ka na' a kue' peue lal' peue⁶¹ka pucti hkam' sa' hki' lah', "Hkawn' lah' Eun, 'Ui' ri, cang yeuh Ui' nya hk'o' mun' keuting Eun Peucawo' na' lu. Hawc' ko', Ui' kaw tang pleng' a bae' hk'a' naee ka loe' seunyi na'."

⁶²Hawc' ko', peue jhawp' rit keuting na' eun kuh' cawng ri mhaing' Yesu' Eun, "Kaw Mi un' top' a saec' ti moeng aw? A' mu tang' peue ri Mi na', Mi ci' kaw lah' a yeuh sa' nhaw'?"⁶³Daecti Yesu' Eun dit' ti.

Peue jhawp' rit keuting na' eun lah', "Hk'a' naee muis Eun Peucawo' a' yu im' na' Mi na' hkam' lah' e'

mhawng' a, 'Meuh Mi Hkrit †, Kon' ai' Eun Peucawo' na' Eun aw?'"

⁶⁴Yesu' Eun lah', "Euh, meuh Ui' seun' ku' lah' mi na' yeut. Ui' lah' a ri pe', hk'a' nanggal' na' kaw pe' pun ri nyu Kon' ai' peue na' mok' Eun hk'a' ti' a' tawm' Eun Cawo' ti' ca keuting na', mae' pe' kaw pun ri nyu lih Eun hk'a' naee putum' ka kuing' pang mao' na'."

⁶⁵Hawc' ko', peue jhawp' rit keuting na' eun res hk'o' ri na'. Eun lah', "Lah' Eun leukah' un' nawpsang ri Peucawo' Eun. E' ci' kaw lo' sa' hki' keunhaw' na' bae? Keue', pun pe' ri mhawng' lah' Eun leukah' un' nawpsang ri Peucawo' Eun hawc'.⁶⁶Pe' ci' kaw kuit a yeuh sa' nhaw'?"

Ce top' a, "Kuing' Eun ri yeum."

⁶⁷Hawc' ko', ce htueng' buh Eun na' ri nyel' ri. Ce klaee' Eun. Ngon' ce dah Eun ri ti' ri.⁶⁸Hawc' ko', ce lah', "Hkrit, a' nhaw' ci' klaee' Mi, cop, lah' a."

Petru' tecla eun Yesu' Eun

⁶⁹Yam Petru' mok' eun nang kang' hkung' hk'a' nok ka nya na', beun' mhai' ti peue na' ka ing' lah' a ri heun. Ka lah', "Mi ri, ut' mi mae' Yesu' peue Galilae' na' Eun yeut."

⁷⁰Daecti Petru' eun htu' hting' lah' a nanggal' ce peue heun' na', "Hpaw ui' ca' yawng ku' lah' pa' na'."

⁷¹Hawc' ko', eun pucti heul' ri leuva' ru na'. Beun' mhai' ku' seubu na' ka nyu eun. Ka lah' a ri peue ut' mawn' na' ce, "Hkawn' eun ku ut' mae' Yesu' peue veng Nasaraet' na' Eun yeut."

⁷²Petru' eun tang htu' hting' ka bae. Eun hkam' a lah', "Hpaw ui' ca' yawng hkawn' Eun."

⁷³Hawc' ka na' bae ti hk'ao, peue cawng keunam mawn' na' ce lah' a ri Petru' eun, "Neum, meuh mi cum ce ti peue yeut. Pal yawo mhawng' e' seng' leukah' mi na', yawng e' a."

⁷⁴Eun tang sae' caee' hkam' a ri ti meun, "Hpaw ui' ca' yawng hkawn' Eun."

Yam awn' na, el' na' a keulawn' leuo'.⁷⁵Petru' eun kuit rot ri ku' Yesu' lah' Eun ri ti yeuh keutit' na', "Nanggal' el' un' nang leuo' ka na', kaw mi guil ri un' yawng Ui' loe' pok." Petru' eun pucti heul' hpum' sic' sawng' yam hk'a' nok na'.

† A' ko' Mesi' ya, nambat aet' 68 na' a ku yeuhki' yeut

Va Yesu ' Eun heul ' ri cawo ' Pi ' lat

27 Yam ceng ' ka na ' , ro ' peue jhawp ' rit mae ' ro ' kan nang kawt ce peue Yu ' da na ' ce kuit a deut kaw ri toh Yesu ' Eun. ²Ce mawt ri va ri heul ' ap Eun ri cawo ' Pi ' lat cawo ' veng na ' eun.

Yu ' das ' seurot ' eun ngok ri yeum meun

³Yam Yu ' das ' ku ' fuin Yesu ' Eun na ' pun eun ri nyu taws ' peue a ' mu kaw toh Yesu ' Eun na ' , eun gal ' ri hkoc ' hpum ' sui ' nyawk ' . Eun pin ' leumuil leueo ' kul ' htaep ' na ' keutah ing ' tuil ' a ri ro ' peue jhawp ' rit mae ' ro ' kan nang kawt na ' ce. ⁴Eun lah ' , "Yeuh ui ' map ' na ' hawc ' kopti fuin ui ' peue un ' kue ' ku ' kleuc ' na ' Eun rot ri htan yeum na ' ."

Ce top ' a , "Aen ' a ci ' ceu ' ye ri yeuh sa ' nhaw ' ? Lak ' meuh a ku ' yeuh meun mi a."

⁵Kop awn ' na , Yu ' das ' eun nyon leumuil awn ' a hk'a ' naee nya hk'o ' mun ' keuting na ' . Hawc ' ko ' , eun pucti heul ' seurot ' ngok ri yeum meun.

⁶Ro ' peue jhawp ' rit na ' ce seut ' leumuil awn ' a . Ce lah ' , "Leumuil aen ' kopti meuh a leumuil ngos nham ' na ' , uin ' a mae ' leumuil tan ka nya hk'o ' mun ' keuting na ' kleuc ' a leukah ' ritroe na ' ." ⁷Kop awn ' na , ce sa ' lit a deut kaw ti leumuil awn ' a heul ' leuvaee bhen ' keute ' ce peue pleng ' keutong ' na ' . A kaw meuh bhen ' keute ' leumuic vang puing ' ce peue veng seubu ing ' ut ' mawn ' na ' ce. ⁸Kop awn ' na , peue lah ' bhen ' keute ' awn ' a meuh bhen ' keute ' nham ' rot seunyaen ' . ⁹Aen ' a htonnuk hot ' seun ' ku ' Yerami ' peue suip leukah ' Eun Peucawo ' lah ' eun na ' . Eun lah ' , "Ti ce leumuil leueo ' kul ' htaep ' ku ' meuh ngos ka tu ' Eun na ' hot ' seun ' ngos ku ' peue I ' sarela ' ngon ' na ' tang ' ce ri uin ' a na ' ¹⁰a heul ' leuvaee bhen ' keute ' ce peue pleng ' keutong ' na ' hot ' seun ' leukah ' tuil ' Eun Peucawo ' ri ui ' na ' ." †

Cawo ' Pi ' lat mhaing ' eun Yesu '

¹¹Yam Yesu ' cawng Eun nanggal ' eun Pi ' lat cawo ' veng na ' , cawo ' veng na ' eun mhaing ' Eun , "Meuh Mi hkun ' haw ' hkam ' ce peue Yu ' da na ' aw?"

Yesu ' Eun top ' a , "Euh , seun ' a ku ' lah ' mi na ' yeut."

¹²Yam ro ' peue jhawp ' rit keuting na ' mae ' ro ' kan nang kawt na ' tang ' ce a ' mu ri Heun na ' , Eun un ' top ' a saec ' ti moeng. ¹³Kop awn ' na , cawo ' Pi ' lat eun mhaing ' Eun , "Buih tang ' ce map ' ri Mi na ' , un ' "

mhawng ' Mi a aw?" ¹⁴Daecti Yesu ' Eun un ' top ' a saec ' ti moeng na ' . Cawo ' Pi ' lat eun am ' nyawk ' .

Taws ' a ' mu yeum ri Yesu ' Eun

¹⁵Yam yeuh pawe vel nya na ' a kue ' ritroe cawo ' veng na ' ploer ' eun peue htawng ' ti peue seun ' ku ' peue kuing ' na ' hk'o ' ce na ' . ¹⁶Yam awn ' na , a kue ' peue htawng ' tut seucen nyawk ' muis Yesu ' Barabas ' ti peue.

¹⁷Yam peue cum heun ' na ' ing ' hk'om ce puri tiduih ' gawm ' euc ' na ' , cawo ' Pi ' lat eun mhaing ' ce , "Pe ' ci ' sum ' kah ui ' ploer ' a ' nhaw ' pun pe ' , Barabas ' eun aw , a ' ko ' Yesu ' ku ' lah ' peue meuh Hkrit na ' Eun aw?"

¹⁸Aen ' meuh a kopti cawo ' Pi ' lat yawng eun ro ' peue jhawp ' rit na ' ap ce Yesu ' Eun ri ti kopti hkoe ' mang ' ce Eun na ' .

¹⁹Yam cawo ' Pi ' lat buih mok ' eun pang ten taws ' a ' - mu ri na ' , beun ' eun na ' ka kah mhai ' ri na ' eun heul ' lah ' a ri heun , "Pawlaee heul ' ceu ' peue leupaws seumeu ' awn ' Eun . Kopti meuh a peue awn ' Eun na ' , ui ' leumu un ' chak ' . A yeuh ui ' hpum ' un ' sam ' ran nyawk ' ."

²⁰Daecti ro ' peue jhawp ' rit mae ' ro ' kan nang kawt na ' ce cu ' peue cum heun ' na ' ce hk'o ' cawo ' Pi ' lat eun ploer ' Barabas ' eun , Yesu ' Eun na ' toh ri.

²¹Cawo ' Pi ' lat eun mhaing ' ce , "Pe ' ci ' sum ' kah ui ' ploer ' nangnhaw ' ri peue lal ' peue awn ' ka?"

Ce top ' a , "Barabas ' eun."

²²Cawo ' Pi ' lat eun mhaing ' ce , "A lawn yeuh keutit ' ko ' , Yesu ' ku ' lah ' peue meuh Hkrit na ' Eun , pe ' ci ' sum ' kah ui ' yeuh sa ' nhaw ' ri Heun?"

Ce klawng ri lah ' a gawm ' euc ' ri , "Tawk ' Eun yeum pang kleum ' rawng ' tawp ' reu ' ."

²³Cawo ' Pi ' lat eun mhaing ' ce , "A ci ' meuh kop keunhaw ' ? Eun ci ' yeuh ku ' kleuc ' keunhaw ' ?"

Daecti ce klawng ri lah ' laws ' a bae , "Tawk ' Eun yeum pang kleum ' rawng ' tawp ' reu ' ."

²⁴Yam cawo ' Pi ' lat nyu eun ka un ' laee meuh na ' daecti a na ' keut ' ri meuh ku ' suksak na ' , eun ti leuum ' hkuc ' ti ' ri nanggal ' ce na ' . Eun lah ' , "Hpaw ui ' ca ' kue ' hk'a ' kleuc ' ri hk'a ' yeum Eun peue aen ' Eun . Kah pe ' ti beus ka na ' heul ' meun reu ' ."

²⁵Peue gawm ' euc ' na ' ce top ' a , "Kah hk'a ' kleuc ' ka hk'a ' yeum Eun na ' rot hk'a ' pang ye mae ' hk'a ' pang kon ' hk'i ye na ' ce reu ' ."

²⁶Hawc ' ko ' , cawo ' Pi ' lat eun ploer ' Barabas ' eun ri ce . Daecti eun kah peue ta ' faet ' Yesu ' Eun . Hawc ' ko ' , eun ap ce tawk ' Eun pang kleum ' rawng ' tawp ' na ' .

† Yakhari ' 11:12, 13; Yerami ' 19:1-13, 32:6-9

Peue suik ' na ' lah ' ce ri pleh keunyas Yesu ' Eun

²⁷ Hawc ' ko ' , peue suik ' eun cawo ' Pi ' lat na ' ce va Yesu ' Eun heul ' nang kang ' hkung ' ka haw ' eun na ' . Ce klawng peue suik ' nang tawp na ' ce ing ' cu ri rop Yesu ' Eun gawm ' euc ' ri. ²⁸ Ce hpuic ' hk'o Eun na ' , ce tuil ' Eun cuip ' hk'o dal ' seurak ' nyawk ' na ' . ²⁹ Hawc ' ko ' , ce taing ' nhul ' kat ' na ' seun ' cui ' maw hk'il ' na ' ce chuip ' a ri cing ' Eun na ' . Ce ti ri seue ' Eun jhawp ' hkawn na ' hk'a ' ti ' a ' tawm ' Eun na ' . Hawc ' ko ' , ce seukluin ri nanggal ' Eun na ' . Ce lah ' ri pleh keunyas ri Heun, "Hkun ' haw ' hkam ' ce peue Yu ' da, kah Mi mun ' keuting reu ' ." ³⁰ Ce htueng ' Eun ri nyel ' ri. Ce ti ri ta ' - faet ' cing ' Eun na ' ri hkawn na ' ti pok hawc ' ti pok. ³¹ Yam hawc ' ce lah ' ri pleh keunyas Eun na ' , ce hpuic ' ri tec hk'o dal ' na ' . Ce tang tuil ' Eun cuip ' hk'eung ri na ' . Hawc ' ko ' , punta kaw ce heul ' tawk ' Eun pang kleum ' rawng ' tawp ' na ' , ce va Eun pucti heul ' .

Tawk ' Yesu ' Eun pang kleum ' rawng ' tawp '

³² Yam buih puc ce ri heul ' na ' , ce nyu peue ing ' neum veng Sai ' rin ' ti peue na ' eun. Eun muis Si ' mon. Ce yat ri tec ' eun klawm ' kleum ' rawng ' tawp ' Eun Yesu ' na ' . ³³ Yam rot ce vang lah ' peue meuh Kolakohta ' na ' (vangdoh ' ka na ' a meuh "vang doh cing ' ") , ³⁴ ce ti ri tuil ' leuum ' pli ' bui hkawo ' ri mae ' jhin ' na ' ri Heun. Hawc ' cim Eun a na ' , Eun hkuin ' nyui a. ³⁵ Yam hawc ' ce tawk ' ri Eun pang kleum ' rawng ' tawp ' na ' , ce cop puri gvah hk'eung Eun na ' . ³⁶ Hawc ' ko ' , ce mok ' ri ko ' kawm Eun mawn ' . ³⁷ Hk'a ' pang ka cing ' Eun na ' , ce tem ' tu ' htawm tang ' map ' na ' ri Heun. Ce tem ' a lah ' , "Hkaen ' meuh Eun Yesu ' , Hkun ' haw ' hkam ' ce peue Yu ' da." ³⁸ Ce ku tawk ' peue con ' lal ' peue na ' ka pang kleum ' rawng ' tawp ' mae ' Heun, hk'a ' a ' tawm ' Eun na ' ti peue hk'a ' a ' ve ' Eun na ' ti peue yeut. ³⁹ Peue heul ' ing ' na ' ce vai ' vuit ' cing ' ri, ce lah ' leukah ' un ' nawpsang ri Heun. ⁴⁰ Ce lah ' , "Cawo ' ku ' kaw yeuh nya hk'o ' mun ' keuting na ' lu, hawc ' ko ' tang pleng ' a hk'a ' nae loe ' seunyi na ' Mi, teum ' kawm htut tu ' Mi na ' meun reu ' . Mi lawn meuh Kon ' ai ' Eun Peucawo ' ko ' , lih hk'ai ' kleum ' rawng ' tawp ' na ' reu ' ." ⁴¹ Ro ' peue jhawp ' rit, peue guil leukah ' ritroe na ' mae ' ro ' kan nang kawt na ' ce ku lah ' ri pleh keunyas Yesu ' Eun yeut. ⁴² Ce lah ' , "Eun teum ' kawm htut peue ri pun, daecti Eun hkuin ' cang teum ' kawm htut meun ti ri pun. Eun lawn meuh hkun ' haw ' hkam ' ce peue I ' sarela ' na ' ko ' , kah Eun keulawn ' lih hk'ai ' kleum ' rawng ' tawp ' na ' maet ' maen ' reu ' . E ' ku na ' yum '

Eun. ⁴³ Yum ' Eun Peucawo ' Eun. Peucawo ' na ' Eun lawn kawm ' lo ' Eun ko ' , kah Eun teum ' kawm Eun maet ' - maen ' reu ' , kopti tup lah ' Eun, ' Meuh Ui ' Kon ' ai ' Eun Peucawo ' , na ' ." ⁴⁴ Saec ' meuh peue con ' ku ' tawk ' ri pang kleum ' rawng ' tawp ' mae ' Heun na ' ka ku lah ' leukah ' un ' nawpsang heun ' ceu na ' ri Heun yeut.

Yesu ' yeum Eun

⁴⁵ Tang ' neum peunnyi rot hk'a ' pul loe ' nali na ' , bhen ' keute ' na ' a duim ' lawng euc ' . ⁴⁶ Yam rot a hk'a ' pul loe ' nali na ' , Yesu ' Eun klawng ri lah ' seng ' laws ' , "E ' lo ' i ' , E ' lo ' i ' lama sabak ' htani ' ?" Vangdoh ' ka na ' a lah ' , "Peucawo ' Ui ' , Peucawo ' Ui ' , a ci ' meuh kop keunhaw ' Mi vae ' tecla Ui ' ?" †

⁴⁷ Yam peue cawng keunam mawn ' na ' ce ngon ' pun ce ri mhawng ' leukah ' awn ' a na ' , ce lah ' , "Klawng Eun E ' li ' ya eun."

⁴⁸ Hk'a ' nae muk ce na ' peue ti peue na ' eun keulawn ' hk'uuh heul ' ti nya tuetai cup a nang leuum ' pli ' bui na na ' eun pak ' a ri hkawn na ' eun tuil ' Yesu ' Eun nyui a. ⁴⁹ Daecti peue seubu na ' ce lah ' , "Pawlaee cheun ' Eun, E ' li ' ya eun ci ' na ' kaw lih teum ' kawm Eun un ' teum ' , e ' na ' puing ko ' ri nawk a."

⁵⁰ Yam Yesu ' hawc ' Eun tang klawng ri lah ' seng ' laws ' bae ti pok na ' , Eun hpum ' deut.

⁵¹ Yam awn ' na, hpen ' kang ' nang nya hk'o ' mun ' keuting na ' a res meuh lal ' glawk ' neum hk'a ' tuh rot hk'a ' col. A in ' san ' , seumu na ' ce a taic gvah ' hk'ai ' puri. ⁵² Keutui ' leumuic na ' ce a duh ' . Tu ' yeum ce peue seunga ' chak ' Eun Peucawo ' na ' a tang a ' yu im ' heun ' peue. ⁵³ Hawc ' ka yam Yesu ' tang kuh ' im ' Eun na ' , ce pucti lih hk'ai ' keutui ' leumuic na ' . Ce huk ' nang veng Yeru ' salaem seunga ' chak ' na ' . Ce tuil ' peue nyu ri heun ' peue.

⁵⁴ Yam po ' suik ' mae ' peue suik ' ku ' ko ' kawm Yesu ' Eun na ' pun ce ri nyu in ' san ' ka mae ' ku ' keut ' meuh ku ' seubu na ' ce na ' , ce tok ' seupa lhat ' . Ce lah ' , "Peue aen ' meuh Eun taeng Kon ' ai ' Eun Peucawo ' neumneum."

⁵⁵ Beun ' na ' ce ngon ' ce ut ' vang ca ri seungai na ' , ce ko ' ri nawk Eun. Punta kaw ce ko ' ri yeuh mhai ' Eun Yesu ' na ' , ce hot ' Eun tang ' neum kuing ' Galilae ' na ' .

⁵⁶ Ce ri a meuh Mari ' peue veng Magadala ' , Mari ' ma ka Yakop ' mae ' Yo ' saep mae ' ma ce kon ' me eun Yebedae ' na ' ce.

† Suk ' seun ' 22:1

Puing ' Yesu ' Eun

⁵⁷Yam kaw a hk'aws ' fec ' na ' , a kue ' peue meuneum ti peue eun ing ' neum veng Ari ' mahtia eun muis Yo ' saep. Eun ku meuh tapae ' Eun Yesu ' yeut. ⁵⁸Eun heul ' hk'o ' tu ' Eun Yesu ' na ' ri cawo ' Pi ' lat eun. Cawo ' Pi ' lat eun ku tuil ' leukah ' ri tuil ' Eun yeut. ⁵⁹Kop awn ' na, Yo ' saep eun ti tu ' Eun Yesu ' na ' lih. Eun bawl ' tu ' Eun na ' ri hpen ' linin seunga ' na ' . ⁶⁰Eun seue ' Eun nang leuang ' jhec ' ri meuh keutui ' leumuic kaw n ' hk'u ' is ' heun meun na ' . Hawc ' ko ' , eun cut ' ri dho ' keutui ' na ' ri meul ' seumu keuting na ' . Eun keutah ing ' . ⁶¹Mari ' peue veng Magadala ' mae ' Mari ' nang seubu na ' ka mok ' ri ring nanggal ' ka keutui ' leumuic vang un ' de un ' seungai ka na ' .

Ko ' kaw n keutui ' leumuic

⁶²Hawc ' ka na ' ti seunyi na ' ko ' , meuh a seunyi hawc ' ka seunyi rangraen ri kaw yeuh pawe na ' , peue jhawp ' rit keuting mae ' peue Hparisae ' na ' ce va puri heul ' ri cawo ' Pi ' lat eun. ⁶³Ce lah ' , "Cawo ' , kuit rot ye ri peue cang chi ' lai aen ' yam kaw n ' a ' yu im ' Eun na ' lah ' Eun, 'Hawc ' ka loe ' seunyi na ' , Ui ' na ' tang kuh ' im ' . ' ⁶⁴Kop awn ' na, hk'o ' mi tuil ' leukah ' kah peue suik ' mi na ' ce ko ' kaw n keutui ' leumuic na ' meulamlam ri rot loe ' seunyi. A lawn un ' yeuh keutit ' ko ' tapae ' Eun na ' na ' ce cang ing ' ra ri ti tu ' Eun na ' , hawc ' ko ' ce na ' cang eo ' ri lah ' hkaen ' tang kuh ' im ' Eun hawc ' ri peue cum heun ' na ' peue. Hk'a ' chi ' lai pok aen ' a na ' a na ' cang lheu ' reng nyawk ' hk'ai ' hk'a ' chi ' lai pok nanggal ' na ' ."

⁶⁵Cawo ' Pi ' lat eun lah ' a ri ce, "Ti peue suik ' ko ' kaw n na ' ce heul ' . Ko ' kaw n a reng meulamlam ri seun ' ku ' cang yeuh pun pe ' na ' reu ' ."

⁶⁶Kop awn ' na, ce heul ' nom ' nawk keutui ' leumuic na ' meulamlam ri tawk ' a is ' ta ' ra ' mae ' kah peue ko ' kaw n a.

Yesu ' tang kuh ' im ' Eun

28 Hawc ' ka seunyi Sin ' †, peunngup cawo ka seunyi nanggal ' ka vung na ' ††, Mari ' peue veng Magadala ' mae ' Mari ' nang seubu na ' ka heul ' nawk keutui ' leumuic na ' .

²Yam awn ' na, a keulawn ' in ' san ' keuting nyawk ' . In ' hpom Eun Peucawo ' ti peue na ' eun lih neum kuing ' pang mao ' . Eun cut ' ri tec meul ' seumu dho ' ka keutui ' leumuic na ' . Eun mok ' hk'a ' pang ka meul ' seumu awn ' na. ³Ruprang eun na ' a seun ' cak ' cal ' .

† Seunyi Sin ' ce peue Yu ' da na ' a meuh seunyi les e ' na ' . †† Seunyi nanggal ' ka vung ce peue Yu ' da na ' a meuh seunyi Sin ' e ' na ' .

Hk'ohk'eung eun na ' a paing seun ' seudap ' ko ' . ⁴Peue ko ' kaw n na ' ce lhat ' keuyuing ' ri in ' hpom na ' eun. Ce yeum jawng.

⁵In ' hpom na ' eun lah ' a ri beun ' lal ' peue awn ' ka, "Pawlaee lhat ' . Yawng ui ' heul ' sok pa ' Yesu ' ku ' tawk ' peue yeum pang kleum ' rawng ' tawp ' na ' Eun. ⁶Hpaw Eun ca ' laee ut ' maen ' . Seun ' lah ' Eun ri uin ' a na ' , kuh ' im ' Eun hawc ' . Ing ' nawk vang uin ' peue Eun na ' reu ' . ⁷Vaeveae, pa ' na ' ing ' lah ' a ri tapae ' Eun na ' ce yeuh keutit ' , 'Kuh ' im ' Eun hawc ' . Buih heul ' Eun nang kuing ' Galilae ' nanggal ' pe ' . Kaw pe ' nyu Eun teh ' . ' Ui ' lih lah ' a ri pe ' hawc ' ."

⁸Kop awn ' na, ka pucti lih hk'ai ' keutui ' leumuic na ' vaeveae. Ka ku lhat ' ka ku ren ' nyawk ' , ka hk'uih ing ' ris tapae ' na ' ce mhawng ' a. ⁹Yam awn ' na, Yesu ' Eun keulawn ' ing ' leukah ' mae ' ka. Ka ing ' jhawp ' cang Eun na ' , ka faee ' Eun. ¹⁰Hawc ' ko ' , Yesu ' Eun lah ' a ri ka, "Pawlaee lhat ' . Ing ' lah ' a ri ec ' awng ' Ui ' na ' ce. Kah ce heul ' nang kuing ' Galilae ' na ' reu ' . Kaw ce pun ri hk'eup ' Ui ' teh ' ."

Leukah ' lah ' ce peue suik ' ko ' kaw n

¹¹Yam buih ing ' ka na ' , peue suik ' ko ' kaw n na ' ce ing ' lah ' ris lawng ku ' meuh na ' ri peue jhawp ' rit keuting na ' ce nang veng na ' . ¹²Hawc ' ka yam peue jhawp ' rit keuting na ' sa ' lit mhe ' ce hk'a ' kan ' na ' mae ' ro ' kan nang kawt na ' ce na ' , ce tuil ' leumuic ri peue suik ' na ' ce heun ' heun ' . ¹³Ce deun ' ce, "Na ' pe ' heul ' lah ' a ri peue yeuh keutit ' , 'Tapae ' Eun na ' heul ' ra ce ri ti tu ' Eun na ' yam buih it ' ye peunsum ' na ' . ' ¹⁴Lawng aen ' a lawn na ' lhon ' ri lec yhuk ' eun cawo ' veng na ' ko ' , punta kaw a un ' cang rot ri pe ' na ' , ye na ' lah ' a tang ' pe ' ."

¹⁵Kop awn ' na, peue suik ' na ' ce rap ri ti leumuic ce na ' , ce hot ' ri yeuh a seun ' ku ' deun ' ce na ' . Lawng aen ' a seutu in seutan laws ' hk'a ' naee ce peue Yu ' da na rot seunyaen ' .

Leukah ' tawm ' keuting Eun Yesu '

¹⁶Tapae ' kul ' ti peue na ' ce heul ' nang kuing ' Galilae ' na ' . Ce heul ' rot ri gong vang Yesu ' hpawt ' Eun ce na ' . ¹⁷Yam nyu ce Eun na ' , ce nghup ' ri faee ' Eun. Daecti ngon ' ce kaw n ' kangkae ri Heun. ¹⁸Yesu ' Eun sat ri ing ' de ce. Eun lah ' , "Ti ' ca ka kuing ' pang mao ' na ' mae ' bhen ' keute ' na ' gawm ' euc ' pun a ri ap ri ri Ui ' hawc ' ."

¹⁹Kop awn ' na, pe ' na ' heul ' yeuh peue ceu gawm ' euc ' na ' peue meuh tapae ' Ui ' reu ' . Tuil ' hk'a ' cum ' na ' ri ce hk'a ' naee ‡ muis Eun A ' kuiing ' Kon ' ai ' "

‡ Peue caee 8:16; Ro ' ma 6:3; 1 Kaw ' rinhtu ' 1:13; Galati ' 3:27

maee ' Cit ' seunga ' chak ' na ' reu '.²⁰Sangsawn ' ce Kaw Ui ' ut ' maee ' pe ' laleung rot ti yam ka bhen ' yum ' leukah ' sangsawn ' Ui ' ri pe ' na ' gawm ' euc ' ka. keute ' aen ' sut ' ka."

Maku´

Yo´han cawo´ tuil´ hk'a´ cum´

1 Leukah´ mun´ ren´ kaw n lawng Eun Yesu´ Hkrit
Kon´ ai´ Peucawo´ na´ tang´ a ri yeuhki´.
²Nang htawm eun I´ saya´ ku´ meuh peue suip leukah´
Eun Peucawo´ na´ tem´ a ri uin´ ri yeuhki´,
“Kaw Ui´ cus´ peue caee ri na´ eun heul´ nanggal´ Mi.
Eun kaw bai mhe´ hk'a´ Mi na´.”[†]
³Eun klawng ri lah´ a nang vang hk'oh´ hk'oeng´ na´
yeuh keutit´,
‘Mhe´ hk'a´ pun Peucawo´ Eun reu´.
Yeuh hk'a´ na´ seumeu´ pun Eun reu´.’^{††}
⁴Yo´han cawo´ tuil´ hk'a´ cum´ puc eun ri nang vang
hk'oh´ hk'oeng´ na´. Punta kaw peue pun hk'a´ ploee´
map´ ri na´, eun sangsawn´ lawng taws´ hpum´ fuin
map´ ri rap ri ti hk'a´ cum´ na´.⁵Peue kuing´ Yu´ da
maee´ peue veng Yeru´ salaem na´ ce gawm´ euc´ ce in-
g´ ri Yo´han eun. Yam sawng´ ris ce map´ ri hawc´ na´,
Yo´han eun tuil´ hk'a´ cum´ na´ ri ce nang klong´
Yaw´ dan na´.⁶Yo´han hk'eung eun hk'eung huik´
kalaok´ na´. Eun mawt sae´ caet´ hak´. Eun hk'a´ a´ htul
maee´ leuum´ cing´ peuyhel´ ut´ nang hk'i na´ ce.⁷Eun
sangsawn´ lah´, “A kaw kue´ Peue ing´ hk'a´ kui´ ui´ ti
peue, ti´ ca Eun na´ a keuting hk'ai´ ui´. Pal yawo kaw
ui´ un´ kuing´ ri gaw´ ri kah´ mu´ jhaep´ Eun na´.
⁸Tuil´ ui´ hk'a´ cum´ na´ ri pe´ ri leuum´ na´, daecti
Eun kaw tuil´ hk'a´ cum´ na´ ri pe´ ri Cit´ seunga´
chak´ na´.”

Yesu´ rap Eun ri ti hk'a´ cum´

⁹Yam awn´ na, Yesu´ Eun pucti neum veng Nasaraet´
kuing´ Galilae´ na´, Eun ing´ rap ri ti hk'a´ cum´ ri
Yo´han eun nang klong´ Yaw´ dan na´.¹⁰Yam Yesu´ keu-
lawn´ puc Eun ri lih neum leuum´ na´, Eun pun ri nyu
kuing´ pang mao´ na´ a dah´. Cit´ seunga´ na´ a seun´
gui´ na´ a lih ut´ maee´ Heun.¹¹Hawc´ ko´, seng´ na´ a
laws´ lih neum pang mao´. A lah´, “Meuh Mi Kon´ me
Ui´, Ui´ leumeus´ Mi nyawk´. Mi hit´ ri hpum´ Ui´
nyawk´.”

† Malahki´ 3:1†† I´ saya´ 40:3

Yesu´ pun Eun ri hkam´ hk'a´ cop´ long

¹²Hawc´ ko´, Cit´ seunga´ na´ a keulawn´ va Eun
heul´ nang vang hk'oh´ hk'oeng´ na´.¹³Eun pun ri
hkam´ hk'a´ cop´ long ka Satan na´ pun´ kul´ seunyi
teh´. Eun ut´ maee´ sat´ hk'i na´ ce. Hawc´ ko´, in´ h-
pom ce lih yeuh mhai´ Eun.

¹⁴Hawc´ hk'awng´ peue Yo´han eun nang htawng´
na´, Yesu´ Eun heul´ nang kuing´ Galilae´ na´. Eun
sangsawn´ leukah´ mun´ ren´ kaw n Eun Peucawo´ na´.
¹⁵Eun lah´, “Rot a yam ka hawc´, kuing´ Eun Peucawo´
na´ rot a de hawc´. Taws´ hpum´ fuin map´ ri yum´
leukah´ mun´ ren´ kaw n na´ reu´.”

Yesu´ klawng Eun tapae´ kaw n la ri pun´ peue

¹⁶Yam Yesu´ heul´ Eun keunam ka glu Galilae´ na´,
Eun nyu Si´ mon maee´ awng´ eun na´ eun muis Andre.
Ka buih ploee´ reup nang glu na´, kopti meuh ka peue sok
ka´.¹⁷Yesu´ Eun lah´ a ri ka, “Hot´ Ui´ reu´. Kaw Ui´ tu-
il´ pa´ meuh peue sok peue seun´ sok pa´ ka´ na´ ko´.”
¹⁸Ka keulawn´ tec reup ri na´, ka hot´ Eun heul´.

¹⁹Yam Yesu´ tang suip Eun hk'a´ ri na´ heul´ na´, Eun
nyu Yakop´ meuh kon´ me eun Yebedae´ maee´ Yo´han
meuh awng´ eun Yakop´ na´ ut´ ka nang reu na´. Ka
buih leuplu reup ri.²⁰Yesu´ Eun keulawn´ klawng ri ti ka.
Ka tec Yebedae´ kuing´ ri na´ eun maee´ peue rapcang´
na´ ce nang reu na´, ka hot´ Yesu´ Eun heul´.

Yesu´ ra Eun ri tec seuca´ rai

²¹Yesu´ Eun maee´ tapae´ Eun na´ ce heul´ nang veng
Kapeni´ um na´. Yam rot a seunyi Sin´ na´, Yesu´ Eun in-
g´ lec nang sa´ la vang hk'o´ mun´ na´. Eun tang´ ri
sangsawn´ peue.²²Peue am´ ri ku´ sangsawn´ Eun na´
nyawk´ kopti sangsawn´ Eun ce seun´ peue kue´ ti´ ca
na´ ko´, Eun un´ seun´ peue guil leukah´ ritroe na´ ce.
²³Yam awn´ na, nang sa´ la vang hk'o´ mun´ na´ a kue´
peue seuca´ rai lec ti peue. Eun klawng ri lah´ a,²⁴“Yesu´
peue veng Nasaraet´, Mi ci´ lo´ keunhaw´ ri ye? Kaw Mi
ing´ yeuh ye lu aw? Yawng ui´ Mi. Meuh Mi peue seunga´
chak´ Eun Peucawo´.”

²⁵ Yesu´ Eun hae´ eun. Eun lah´, “Dit´ mi. Puc mi heul´ hk'ai´ heun reu´.” ²⁶ Seuca´ rai na´ a yeuh peue awn´ eun keuyuing´ glhawk glhawk, ta´ ul´ aec´ rak. Hawc´ ko´, a pucti heul´ hk'ai´ heun.

²⁷ Peue gawm´ euc´ na´ ce am´ nyawk´. Ce lah´ a ri puri, “Aen´ a ci´ meuh ku´ yeuh sa´ nhaw´? Meuh a ku´ sangsawn´ hk'u´. A ku kue´ ti´ ca. A rot ti tuil´ Eun leukah´ ri seuca´ rai na´, a ku leuceng a yeut.” ²⁸ Lawng Eun na´ a keulawn´ seutuin seutan heul´ nang kuing´ Galilae´ na´ hk'awp´.

Yesu´ bai´ Eun peue peuyhat cuin heun´ peue

²⁹ Yam puc ce ri lih neum sa´ la vang hk'o´ mun´ na´, Yesu´ Eun mae´ tapae´ Eun na´ ce bae Yakop´ mae´ Yo´ han ce va puri ing´ lec nang nya ka Si´ mon mae´ Andre na´. ³⁰ A´ oe´ eun Si´ mon peuyhat kuc´ ha´ lok ka, ka it´. Ce ris Yesu´ Eun mhawng´ a. ³¹ Yesu´ Eun ing´ jhawp´ ti´ ka na´, Eun vuh ka kuh´. Peuyhat kuc´ ha´ lok ka na´ a cuin. Ka nghawm´ ce hk'asom´.

³² Yam seunyi lec ka a sumsam na´, peue va peue peuyhat mae´ peue seuca´ lec na´ ce ing´ ri Yesu´ Eun.

³³ Peue veng na´ ce gawm´ euc´ ce ing´ cu ri keunam ka leuva´ na´. ³⁴ Yesu´ Eun bai´ peue peuyhat heun´ ceu na´ ce cuin heun´ peue. Eun ku ra ri tec seuca´ na´ pucti lih heun´ tu´. Daecti Yesu´ Eun un´ kah seuca´ na´ leukah´, kopti Yesu´ Eun ci´ meuh a´ nhaw´ na´ yawng ce a yeut.

Yesu´ heul´ hk'o´ mun´ vang cumyen´

³⁵ Peunngup cawo yam un´ nang ceng´ ka na´, Yesu´ Eun kuh´ heul´ hk'ai´ nya na´. Eun heul´ ri vang yen´ yong na´, Eun heul´ hk'o´ mun´. ³⁶ Si´ mon eun mae´ peue ut´ mae´ heun na´ ce heul´ sok Yesu´ Eun. ³⁷ Yam nyu ce Yesu´ Eun na´, ce lah´ a ri Heun, “Sum´ meuh a´ nhaw´ ce ku buih sok Mi.”

³⁸ Yesu´ Eun top´ a, “Punta kaw Ui´ sangsawn´ peue ut´ nang yung´ caonao´ tawk seubu na´ ce na´, e´ na´ heul´ ri ka pawh. Lih Ui´ kopti punta kaw Ui´ yeuh kan´ aen´ na´.” ³⁹ Kop awn´ na, Eun heul´ nang kuing´ Galilae´ na´ hk'awp´. Eun sangsawn´ nang sa´ la vang hk'o´ mun´ ce na´. Eun ra ri tec seuca´ heun´ tu´ na´.

Yesu´ bai´ Eun peue naw cuin

⁴⁰ Peue naw ti peue na´ eun ing´ seukluin ri nanggal´ Eun Yesu´. Eun hk'o´ hk'ang a ri Yesu´ Eun, “A lawn htuk´ hpum´ Mi ko´, kaw Mi cang yeuh ui´ seunga´ chak´.”

⁴¹ Kopti Yesu´ tukyak Eun ri heun na´, Eun nyat´ ti´ ri paic´ eun. Eun lah´, “Htuk´ a hpum´ Ui´ yeut, seunga´ chak´ reu´.” ⁴² Peuyhat naw eun na´ a keulawn´ rai´, eun cuin.

⁴³ Yesu´ Eun keulawn´ cus´ eun heul´, Eun tuil´ leukah´ reng ri heun, ⁴⁴ “Pawlaee lah´ lawng aen´ a ri peue saec´ ti peue. Daecti peuyhat mi na´ cuin ka hawc´ na´ punta kaw a meuh sa´ hki´ ri peue heun´ na´ ce, heul´ tuil´ peue jhawp´ rit na´ ce nyu tu´ mi na´ mae´ heul´ tan ku´ tan seun´ Mo´ se tuil´ eun ri uin´ leukah´ to´ ri punta kaw yeuh ri seunga´ na´ reu´.” ⁴⁵ Daecti eun pucti heul´ sae´ caee´ lah´ peue mhawng´ lawng aen´ na´ hk'awp´. A yeuh Yesu´ Eun un´ laee cang lec nang veng na´ glih´ gleueng´. Eun ut´ nang vang geup´ hk'a´ nok veng na´. A saec´ yeuh sa´ nhaw´, peue ut´ ku duih´ na´ ce ku kawm´ meung ing´ ri ri Heun.

Yesu´ bai´ Eun peue ti´ cung chuing´ cuin

2 Hawc´ awn´ na lal´ loe´ seunyi yam Yesu´ tang ing´ Eun nang veng Kapeni´ um na´ bae, peue pun ri mhawng´ ing´ Eun ti nya na´. ² Kop awn´ na, peue cum heun´ na´ ce ing´ cu hk'on´ ri mawn´, saec´ meuh hk'a´ nok bawl´ leuva´ na´ a ku hk'o´ a un´ laee kue´ vang ut´ yeut. Yesu´ Eun sangsawn´ leukah´ mun´ ren´ kaw na´ ri ce. ³ A kue´ peue pun´ peue ce jong´ peue ti´ cung chuing´ ti peue ing´ ri Heun. ⁴ Daecti ce un´ cang ing´ ri Yesu´ Eun kopti peue na´ nuknhen´ nyawk´ ce na´. Kop awn´ na, ce huk´ yah pang lhung´ ka nya na´ roc´ ring vang Yesu´ ut´ Eun na´. [†] Hawc´ ko´, ce ploe´ peue ti´ cung chuing´ awn´ eun lih gawm´ hk'eung it´ eun na´. ⁵ Yam Yesu´ nyu Eun hk'a´ yum´ ce na´, Eun lah´ a ri peue ti´ cung chuing´ na´ eun, “A´ ai´, map´ mi na´ ploe´ a ri hawc´.”

⁶ Peue guil leukah´ ritroe mok´ mawn´ na´ ce ngon´ ce sawng´ kuit a nang hpum´ ri, ⁷ “A ci´ meuh kop keunhaw´ peue awn´ Eun vae´ lah´ a yeuh keutit´. Buih lah´ Eun ku´ un´ nawpsang ri Peucawo´ Eun. A lawn un´ meuh yawo Peucawo´ Eun koe ko´, a´ nhaw´ hkuin´ cang ploe´ map´ na´ gah´.”

⁸ Ku´ buih kuit ce hk'a´ naee hpum´ ri na´, Yesu´ Eun keulawn´ yawng a hk'a´ naee cit´ ri. Eun lah´, “A ci´ meuh kop keunhaw´, pe´ vae´ kuit a nang hpum´ ri yeuhki´? ⁹ ‘Map´ mi na´ ploe´ a ri hawc´.’ Na´ Ui´ lah´ a yeuh keutit´ ri peue ti´ cung chuing´ na´ eun, a na´ sam´ ran aw? A´ ko´, ‘Kuh´ klawm´ hk'eung it´ mi na´ long hk'a´ ing´ reu´.’ Leukah´ nangnhaw´ a ci´ na´ ca ri sam´ ran? ¹⁰ Daecti sum´ kah Ui´ pe´ yawng, Kon´ ai´

[†] Nya ce peue I´ sarela´ na´ seubul keuleung ka. A lawn rot yam ron ko´, ce huk´ it´ ri ka. Ce tawm hku´ na´, ce lup a ri tuic´.

peue na´ punta kaw Eun ploë´ map´ na´, Eun kue´ ti´ ca nang lok na´.” Hawc´ ko´, Eun lah´ a ri peue ti´ cung chuing´ na´ eun, ¹¹“Kaw Ui´ lah´ a ri mi, kuh´ klawm´ hk'eung it´ mi na´ ing´ ti nya mi reu´.” ¹²Eun ku kuh´ klawm´ hk'eung it´ ri na´ pucti heul´ nanggal´ ce peue cum heun´ na´. Peue heun´ na´ ce am´. Ce suk´ seun´ Peucawo´ Eun. Ce lah´, “E´ hkuin´ nang duing nyu ku´ yeuhko´ saec´ ti pok.”

Yesu´ klawng Eun Levi´ eun

¹³Yesu´ Eun tang heul´ keunam glu na´ bae. Peue cum heun´ na´ ce ing´ ri Heun. Eun tang´ ri sangsawn´ ce.

¹⁴Yam tang heul´ Eun hk'a´ nanggal´ na´, Eun nyu Levi´ kon´ me eun Alfeas´ na´ mok´ eun nang tup´ cep´ hkawn´ na´. Yesu´ Eun lah´ a ri heun, “Hot´ Ui´ heul´ reu´.” Levi´ eun ku kuh´ hot´ Yesu´ Eun heul´.

¹⁵Yam Yesu´ mok´ Eun ri som´ pul nang nya eun Levi´ na´, peue cep´ hkawn´ mae´ peue map´ na´ ce heun´ peue ce ku mok´ ri som´ mae´ Heun mae´ tapae´ Eun na´ ce tiduih´ yeut, kopti peue hot´ Yesu´ Eun na´ heun´ ce. ¹⁶Yam peue guil leukah´ ritroe ku´ meuh peue Hparisae´ na´ nyu ce Yesu´ som´ Eun mae´ peue map´ mae´ peue cep´ hkawn´ na´ ce tiduih´ na´, ce mhaing´ tapae´ Eun na´ ce, “A ci´ meuh kop keunhaw´ Eun vae´ som´ mae´ peue cep´ hkawn´ mae´ peue map´ na´ ce?”

¹⁷Yam Yesu´ mhawng´ Eun yeuh a keutit´ na´, Eun lah´ a ri ce, “Peue ut´ sam´ ran na´ un´ lo´ ce seura´ bai´, peue peuyhat na´ lo´ ce koe. Hpaw Ui´ ca´ lih kopti punta kaw Ui´ klawng ri ti peue leupaws seumeu´ na´ ce, daecti lih Ui´ pun peue map´ na´ ce.”

Mhaing´ Yesu´ Eun ri lawng eut´ ku´ hk'a

¹⁸Yam awn´ na, tapae´ eun Yo´ han na´ ce mae´ tapae´ ce peue Hparisae´ na´ ce buih eut´ ku´ hk'a ri. Ngon´ ce ing´ mhaing´ Yesu´ Eun, “Tapae´ eun Yo´ han na´ ce mae´ tapae´ ce peue Hparisae´ na´ ce buih eut´ ku´ hk'a ri, a ci´ meuh kop keunhaw´ tapae´ Mi na´ ce vae´ un´ eut´ ku´ hk'a ri?”

¹⁹Yesu´ Eun top´ a, “Yam me pen´ na´ kawn´ ut´ eun mae´ peue ing´ hk'a chec´ na´ ce na´, pe´ ci´ kaw cang kah ce eut´ ku´ hk'a ri yeuh sa´ nhaw´? Yam kawn´ ut´ eun mae´ ce na´, ce hkuin´ kaw nang cang eut´ ku´ hk'a ri. ²⁰Daecti kaw a rot yam ti peue me pen´ na´ eun gah´ hk'ai´ ku´ hk'a chec´ na´ ce. Yam awn´ na, ce na´ eut´ ku´ hk'a ri yeut.”

²¹“A´ nhaw´ hkuin´ duing leuplu hpen´ hk'u´ na´ ri hk'o´ hk'im´. A lawn yeuh keutit´ ko´, hpen´ hk'u´ na´ a

kaw ruit, a na´ yat hk'o´ hk'im´ na´ gawm res nyawk´.

²²Lheu´ awn´ na, a´ nhaw´ hkuin´ duing seue´ leuum´ pli´ bui hk'u´ nang huil´ hak´ hk'im´ na´. A lawn yeuh keutit´ ko´, leuum´ pli´ bui na´ a kaw res huil´ hak´ na´. Leuum´ pli´ bui na´ mae´ huil´ hak´ na´ a kaw lu gawm´ lal´ ceu ri. Leuum´ pli´ bui hk'u´ na´ a kaw kah ri seue´ ri nang huil´ hak´ hk'u´ na´ palkoe.”

Cawo´ ka seunyi Sin´

²³Hk'a´ naee seunyi Sin´ ti seunyi na´, Yesu´ Eun hpa´ mal´ ngho´ na´ heul´. Yam long ce hk'a´ heul´ na´, tapae´ Eun na´ ce sec´ seukuk ngho´ na´. ²⁴Peue Hparisae´ na´ ce lah´ a ri Yesu´ Eun, “Keue´ reu´, a ci´ meuh kop keunhaw´ ce vae´ yeuh ku´ kleuc´ ri leukah´ ritroe na´ hk'a´ naee seunyi Sin´ na´?”

²⁵Yesu´ Eun top´ a, “Yam Davit´ eun mae´ pu eun na´ sum´ som´ nyawk´ ce un´ kue´ ku´ hk'a´ na´, eun ci´ yeuh keunhaw´ na´ un´ duing lip pe´ lawng ka na´ aw?”

²⁶Cu yam Abiahta meuh eun peue jhawp´ rit keuting na´, Davit´ eun lec hk'a´ naee nya Eun Peucawo´ na´. Eun ti ri hk'a´ hkawomun´ tan ri Peucawo´ Eun na´, eun ku tuil´ pu ri na´ ce hk'a´ a yeut. Hkawomun´ awn´ a lawn un´ meuh yawo peue jhawp´ rit na´ ce ko´, a´ nhaw´ hkuin´ cang hk'a´ a.”

²⁷Hawc´ ko´, Eun lah´ a ri ce, “Seunyi Sin´ na´ pleng´ a ri pun peue, peue na´ peue hkuin´ pleng´ ri pun seunyi Sin´ na´. ²⁸Kop awn´ na, Kon´ ai´ peue na´ meuh Eun Cawo´ ka seunyi Sin´ na´.”

Peue ti´ chuing´ ti peue

3 Yesu´ Eun tang lec hk'a´ naee sa´ la vang hk'o´ mun´ na´ bae ti pok. Mawn´ na´ a kue´ peue ti´ chuing´ ti plak´ ti peue. ²Peue ngon´ na´ ce buih sok hk'a´ kaw ri tang´ map´ ri Yesu´ Eun. Eun ci´ kaw bai´ un´ bai´ peue peuyhat hk'a´ naee seunyi Sin´ na´, ce hot´ ri htom´ Eun. ³Yesu´ Eun lah´ a ri peue ti´ chuing´ na´ eun, “Kuh´ ing´ cawng nanggal´ maen´.”

⁴Hawc´ ko´, Yesu´ Eun mhaing´ ce, “Hk'a´ naee leukah´ ritroe na´ a ci´ kah e´ yeuh keunhaw´ hk'a´ naee seunyi Sin´ na´? Htuk´ ri yeuh ku´ chak´ aw? A´ ko´, htu´ ri yeuh ku´ lu aw? Htuk´ ri yeuh a´ yu peue pon aw? A´ ko´, htu´ ri yeuh a´ lu aw?” Daecti ce dit´ ti.

⁵Yesu´ Eun hpawt´ ti keue´ ri ce rop mae´ seungeueng´ ri. Kopti hpum´ cen´ ce na´, Yesu´ Eun hpum´ lu nyawk´. Eun lah´ a ri peue ti´ chuing´ na´ eun, “Nyat´ ti´ mi na´ reu´.” Eun ku nyat´ a. Ti´ eun na´ a cuin yawo.

⁶Peue Hparisae' na' ce pucti heul'. Ce ci' kaw cang pun ri toh Yesu' Eun yeuh sa' nhaw' na', ce heul' sa' lit puri mae' peue eun Herot' na' ce.

Peue cum heun' na' hot' ce Yesu' Eun

⁷Yesu' Eun mae' tapae' Eun na' ce heul' ri glu na'. Peue cum heun' ing' neum kuing' Galilae' na' ce hot' Eun. ⁸Yam peue heun' na' pun ce ri mhawng' lawng ku' yeuh Eun Yesu' na', peue cum heun' ing' neum kuing' Yu'da, veng Yeru' salaem, kuing' I'du' me mae' hk'a' teh' ka klong' Yaw'dan na', gawm' peue ing' neum veng Tai'ra' mae' veng Si'don na' ce va puri ing' ri Heun. ⁹Kopti meuh a peue cum heun' awn' ce na' punta kaw ce un' cang tawk' net Yesu' Eun na', Eun kah tapae' ri na' ce rangraen reu aet' na' ti lihang' pun ri. ¹⁰Kopti bai' Eun peue na' ce cuin heun' na', punta peue peuyhat na' kaw ce pun ri paic' Eun na', ce tawk' ri ing' ri Heun. ¹¹Saec' meuh yamnhaw' yam seuca' rai na' pun ce ri nyu Yesu' Eun na', ce ing' nghup' ri nanggal' Eun. Ce klawng ri lah', "Meuh Mi Kon' ai' Eun Peucawo'." ¹²Daecti Yesu' Eun tuil' leukah' reng na' ri ce, Eun un' kah ce lah' meuh ri a' nhaw'.

Yesu' leuk Eun ri ti peue caee ri kul' leual' peue na' ce

¹³Yesu' huk' Eun pang gong na'. Eun klawng peue htuk' hpum' ri na' ce. Ce ku ing' ri Heun. ¹⁴Eun tang' peue kul' leual' peue na' ce meuh peue caee ri. Eun kah ce ut' mae' ti. Eun kaw cus' ce heul' sangsawn' leukah' mun' ren' kaw na'. ¹⁵Eun tuil' ti'ca kaw cang ra ri tec seuca' na' ri ce. ¹⁶Peue caee Eun Yesu' kul' leual' peue awn' ce a meuh Si'mon (ku' Yesu' ghuk' Eun eun muis Petru'), ¹⁷Yakop' kon' me eun Yebedae' mae' Yo'han awng' eun Yakop' (ku' Yesu' ghuk' Eun ka muis Bo'aneyes', vangdoh' ka na' a lah' kon' neumhk'i), ¹⁸Andre, Hpi'lip', Bahto'lome', Mah-tae, Hto'mas', Yakop' kon' me eun Alfeas', Htadeas', Si'mon ku' klawng peue eun meuh peue ritroe reng na' eun ¹⁹mae' Yu'das' I'sakariot' ku' kaw fuin Yesu' Eun na' eun.

Yesu' Eun mae' ro' seuca' muis Be'el' sebu'

²⁰Hawc' awn' na, Yesu' Eun tang lec nang nya na'. Peue cum heun' na' ce tang cu ri ing' bae, a hk'o' Yesu' Eun mae' tapae' Eun na' ce un' lae tawn ri hk'asom'. ²¹Yam peue nya peue hk'ul' Eun Yesu' na' pun ce ri mhawng' lawng awn' a na', ce lah', "Ma'rat Eun hawc'." Ce ing', ce kaw ing' mawt ri ti Eun.

²²Peue guil leukah' ritroe lih neum veng Yeru' salaem na' ce lah', "Ro' ka seuca' muis Be'el' sebu' na' lec ka Eun. Eun cu ti'ca ka na' Eun ra ri tec seuca' na'."

²³Yesu' Eun klawng ce ing'. Hawc' ko', Eun lah' a ri ce ri leukah' leupong' na', "Ro' ka seuca' na' a ci' kaw ra ri tec seuca' na' yeuh sa' nhaw'?" ²⁴Kuing' ti kuing' na' a lawn ces ri puri meun ko', kuing' awn' a hkuin' kaw cang keutawn'. ²⁵Nyahk'ul' ti nya na' a lawn ces ri puri meun ko', nyahk'ul' awn' a hkuin' kaw cang keutawn'. ²⁶Seuca' na' a lawn to'tam' puri meun mae' ces ri puri meun ko', a hkuin' kaw cang keutawn'. A kaw lulaic heul'. ²⁷Neumneum ka na' ko', peue lawn un' nang mawt ri uin' peue kaw' reng keuting na' eun nanggal' hawc' ko', a'nhaw' hkuin' kaw cang ing' lec ri rim' ri ti vahtu' hk'il' leumuil ka nya eun na' saec' ti peue. ²⁸Kaw Ui' lah' a ri pe' neumneum, map' yeuh peue na' mae' leukah' un' nawpsang lah' peue na' gawm' euc' ka kaw a cang ploer' ri. ²⁹Daecti saec' meuh a'nhaw', eun lawn un' nawpsang Cit' seunga' chak' na' ko', map' eun na' a hkuin' kaw cang ploer' ri, eun kaw pun ri hkam' map' cot'cu na'."

³⁰Kopti lah' ce seuca' a lec Eun na', Eun lah' a yeuh keutit'.

Ma Eun Yesu' mae' awng' me Eun na' ce

³¹Ma Eun Yesu' mae' awng' me Eun na' ce ing' rot. Ce cawng hk'a' nok. Ce kah peue ing' klawng Yesu' Eun. ³²Peue cum heun' na' ce mok' rop Eun. Ce lah' a ri Heun, "Ma Mi ka mae' awng' me Mi na' buih ko' ce Mi hk'a' nok."

³³Yesu' Eun mhaing' ce, "Ma Ui' mae' awng' me Ui' na' ce ci' meuh a'nhaw'?"

³⁴Hawc' ko', Eun hpawt' ri keue' ri peue mok' rop ri na' ce. Eun lah', "Hkaen' meuh ce ma Ui' mae' awng' me Ui'." ³⁵A'nhaw' lawn yeuh alo Eun Peucawo' na' ko', meuh eun ma Ui' mae' awng' me awng' beun' Ui' yeut."

Leukah' leupong' lawng puin' ku' seumal

4 Yesu' tang sangsawn' Eun ce keunam glu na' bae. Peue cum heun' na' ce ing' cu ri tawk' net Eun a hk'o' Eun ing' lec ri mok' nang reu na'. Peue cum heun' na' ce ut' keunam ka glu na'. ²Eun sangsawn' ce heun' ceu ri leukah' leupong' na'. Eun sangsawn' ce yeuh keutit', ³"Leuceng a reu'. Peue sang' mal' ti peue na' heul' puin' eun ku' seumal ri. ⁴Yam puin' eun ku' seumal na', ngon' a hk'uic' nang gon' hk'a'. Sim' na' a

† Nang htawm Seunga' na' ngon', a lah' a yeuh keutit', "Satan na' a ci' kaw ra ri tec Satan na' yeuh sa' nhaw'?"

ku seut´ ri hk'a a euc´. ⁵ Ngon´ a hk'uic´ nang tak seumu vang keute´ na´ ril´ ka. Kopti keute´ na´ un´ leupeul ka, a yao kaws. ⁶ Daecti kopti un´ kue´ a res na´, yam kuc´ na´ tat´ ka a na´, a fit´ hk'oh´ heul´. ⁷ Ngon´ a hk'uic´ nang tak kat´. Bang´ kat´ na´ a kaws, a ghuim´ a. A hkuin´ cang pli´, ⁸ Daecti ngon´ a hk'uic´ vang keute´ ngeuo. A kaws, a keuting. A pli´ leuo´ kul´ pun, leskul´ pun rot tipak´ pun.”

⁹ Hawc´ ko´, Yesu´ Eun lah´, “Peue kue´ yhuk´ kaw leuceng na´ leuceng a meulamlam ri reu´.”

¹⁰ Yam ut´ koe ce na´, tapae´ kul´ leual´ peue na´ mae´ peue ut´ rop Eun na´ ce ing´ mhaing´ Eun ri lawng ka leukah´ leupong´ awn´ na. ¹¹ Eun top´ a ri ce, “Lawng ka kuing´ Eun Peucawo´ ku´ mo´ ri geup´ na´ kaw pe´ kue´ ahkvang yawng a. Daecti peue seubu na´ ce ko´, Ui´ kaw lah´ lawng ku ceu na´ ri ce ri leukah´ leupong´ na´ palkoe. ¹² Kopti,

‘Ce saec´ keue´, ce hkuin´ nyu.

Ce saec´ mhawng´, ce hkuin´ ceng´.

A lawn un´ yeuh keutit´ ko´, ce kaw tang hpawt´ ri ing´, ce kaw pun ploé´ map´ ri.”†

¹³ Hawc´ awn´ na Yesu´ Eun lah´ a ri ce, “Un´ nang ceng´ pe´ ri leukah´ leupong´ na´ aw? A lawn yeuh keutit´ ko´, pe´ ci´ kaw cang ceng´ ri leukah´ leupong´ ku´ seubu na´ ce yeuh sa´ nhaw´? ¹⁴ Peue sang´ mal´ na´ puin´ eun leukah´ mun´ ren´ kawn na´. ¹⁵ Peue ngon´ na´ ce seun´ ku´ seumal puin´ ri nang gon´ hk'a´ na´, yam keulawn´ pun ce ri mhawng´ leukah´ mun´ ren´ kawn na´, Satan na´ a ing´ ti leukah´ mun´ puin´ ri hk'a´ nae ce na´ heul´. ¹⁶ Peue ngon´ na´ ce seun´ ku´ seumal puin´ ri nang tak seumu na´, yam pun ce ri mhawng´ leukah´ mun´ ren´ kawn na´, ce keulawn´ ren´ kawn rap ri ti a. ¹⁷ Daecti kopti res ka na´ un´ lec ka rui´ na´, leukah´ mun´ ren´ kawn na´ a ut´ mae´ ce ti cu hkao´. Yam hk'eup´ ce ku´ kuit nyhap´, a´ ko´ ku´ keunhap´ nokneh kopti meuh a leukah´ mun´ ren´ kawn na´, ce ku keulawn´ tecla a. ¹⁸ Peue ngon´ na´ ce seun´ ku´ seumal puin´ ri nang tak kat´ na´. Ce mhawng´ leukah´ mun´ ren´ kawn na´, ¹⁹ daecti ku´ kuit nyhap´ hk'a´ nae yam a´ yu im´ na´, hk'a´ ren´ kawn mae´ hk'il´ leumuil na´ mae´ hk'a´ se´ dai´ vahtu´ hk'il´ leumuil na´ ing´ ghuim´ a leukah´ mun´ ren´ kawn na´. A yeuh leukah´ mun´ ren´ kawn na´ un´ cang kue´ pli´. ²⁰ Peue seubu na´ ce seun´ ku´ seumal puin´ ri nang vang keute´ ngeuo na´. Ce mhawng´ leukah´ mun´ ren´ kawn na´, hawc´ ko´ ce rap ri ti a. A pli´ lheu´ ku´ puin´ ri na´ leuo´ kul´ pun, leskul´ pun rot tipak´ pun.”

Tok´ kaw´ ngawl un´ duing kuip a

²¹ Yesu´ Eun lah´ a ri ce, “Tok´ pe´ kaw´ ngawl na´ kuip pe´ a ri keutong´, a´ ko´ uin´ pe´ a hk'a´ ruim cong it´ na´ aw? Daecti po pe´ a pang hpa´ rang na´, un´ meuh ka aw? ²² Kopti ku´ mo´ ri na´ a kaw pun ri tuh´ ri. Ku´ kuip ri na´ a kaw pun ri ti ri ing´ vang ceng´ na´.

²³ Peue kue´ yhuk´ kaw leuceng na´ leuceng a reu´.”

²⁴ Eun tang lah´ a ri ce bae, “Kuit ti nawk ku´ pun pe´ ri mhawng´ na´ meulamlam ri reu´. Pe´ lawn tung´ a nang keunhaw´ ri peue ko´, pe´ kaw tang pun a nang awn´ a. Pe´ kaw tang pun a bae lheu´ awn´ na yeut.

²⁵ Ku´ kue´ na´ ce ko´, kaw tang tuil´ ce bae. Ku´ un´ kue´ na´ ce ko´, kaw tang hue´ ku´ kaw´ kue´ ce na´ lih hk'ai´ ce.”

Leukah´ leupong´ lawng ku´ seumal kaws

²⁶ Yesu´ Eun ku lah´, “Kuing´ Eun Peucawo´ na´ seun´ a peue ti peue puin´ eun ku´ seumal pang bhen´ keute´ na´. ²⁷ Gawm´ sum´ gawm´ seunyi yam it´ eun un´ lah´ yam kuh´ eun un´ lah´, ku´ seumal na´ a kaws a keuting. Eun saec´ un´ yawng kaw a kaws yeuh sa´ nhaw´.

²⁸ Bhen´ keute´ na´ a yeuh a kaws meuh rong´ ri. Hawc´ ko´, a lih seukuk ri. Hawc´ ko´, a kue´ kui´ nuk seukuk ka na´. ²⁹ Yam hk'o´ ka na´, kopti rot a yam vuic ka hawc´ na´, eun ku vuic a ri guc´ ri na´.”

Leukah´ leupong´ lawng seumal hpapu

³⁰ Eun tang lah´, “Kuing´ Eun Peucawo´ na´ a ci´ seun´ un´ keunhaw´? A´ ko´, e´ ci´ kaw lo´ leukah´ leupong´ ceu nangnhaw´ ris a? ³¹ Kuing´ Eun Peucawo´ na´ seun´ a seumal ka hpapu na´. Yam jheum´ a ri pang bhen´ keute´ na´, a meuh ku´ seumal aet´ hk'ai´ ku´ seumal seubu na´ ce. ³² Daecti yam kaws ka na´, a meuh kleum´ keuting hk'ai´ kleum´ ku´ seubu nang val na´. Kak´ ka na´ ce a keuting, sim´ peul´ eo´ nang wawo na´ ce ing´ pleng´ ri is´ han´ hk'a´ nae rum ka na´ ce.”

³³ Yesu´ Eun ku lah´ leukah´ leupong´ seun´ aen´ na hot´ ku´ ceng´ ce ri ka na´ heun´ ceu ri ce. ³⁴ Eun lah´ yawo leukah´ leupong´ na´ ri ce palkoe. Daecti yam ut´ Eun mae´ tapae´ ri na´ ce koe na´, Eun ris ce mhawng´ vangdoh´ ka na´ gawm´ euc´ ka.

Yesu´ ham´ Eun guil´ na´

³⁵ Seunyi awn´ na yam hk'a´ pul ka na´, Yesu´ Eun lah´ a ri tapae´ ri na´ ce, “Pawh, e´ tang glu na´ heul´ hk'a´ teh´.” ³⁶ Ce va Yesu´ Eun lec hk'a´ nae reu na´. Ce hk'ah´ peue cum heun´ na´ ce. Reu seubu na´ a ku hot´

† I´ saya´ 6:9,10

ce heul´ yeut. ³⁷ Guil´ lomleng keuting na´ a puing´ ri ing´. Ba leuum´ na´ a htuip ri lec reu na´ a hk'o´ reu na´ daee cum´. ³⁸ Yesu´ Eun it´ ti gung hk'a´ seuta´ ka reu na´. Tapae´ na´ ce ing´ sawl´ Eun. Ce lah´, “Cawo´, un´ kuit nyhap´ Mi ri kaw e´ cum´ nang leuum´ na´ aw?”

³⁹ Yesu´ Eun kuh´ ham´ guil´ na´ mae´ ba leuum´ na´. Eun lah´, “Keulawn´ yut´ ti reu´.” Guil´ na´ a ku keulawn´ yut´ ti. A yen´ ku ceu ri.

⁴⁰ Yesu´ Eun lah´ a ri tapae´ ri na´ ce, “A ci´ meuh kop keunhaw´ pe´ vae´ lhat´? Un´ nang kue´ pe´ hk'a´ yum´ aw?”

⁴¹ Tapae´ na´ ce lhat´ ruing nyawk´. Ce lah´ a ri puri, “Hkawn´ Eun ci´ meuh a´ nhaw´ rot ti guil´ mae´ ba leuum´ na´ a ku vae´ leuceng leukah´ Eun na´.”

Yesu´ bai´ Eun peue seuca´ lec cuin

5 Yam rot ce hk'a´ teh´ ka glu nang kuing´ Gerasa´ na´, ² yam Yesu´ puc Eun ri lih hk'ai´ reu na´, a kue´ peue seuca´ rai lec ti peue. Eun pucti lih neum keutui´ leumuic na´, eun buih ing´ ri Heun. ³ Eun ut´ nang keutu-i´ leumuic na´ palkoe. Peue saec´ mawt eun ri mu´ lhec´, daecti peue mawt eun peue hkuin´ pun eun keutawn´ saec´ ti peue. ⁴ Kopti peue saec´ tawn mawt ti´ cung eun na´ ri mu´ lhec´ heun´ pok, daecti eun ku peut´ mu´ lhec´ na´ deut. A´ nhaw´ hkuin´ kue´ kawl´ reng cang yeuh eun o´.

⁵ Eun ta´ ul´ klawng nang keutui´ leumuic na´ mae´ pang caw´ vawc gong na´ gawm´ sum´ gawm´ seunyi. Eun ti ri htue´ tu´ ri na´ ri seumu na´. ⁶ Yam nyu eun Yesu´ ing´ Eun neum seungai na´, eun hk'uih ing´ seuk-luin ri nanggal´ Eun. ⁷ Eun ta´ ul´ klawng ri lah´ laws´ a, “Yesu´, Kon´ ai´ Eun Peucawo´ Cawo´ lhung´ hk'ai´ peue na´ Mi, Mi ci´ lo´ keunhaw´ ri ui´? Punta kaw Mi un´ keunhap´ nokneh ui´ na´, hk'o´ Mi yeuh kati ri Peucawo´ Eun reu´.”

⁸ Eun lah´ a yeuh keutit´ kopti Yesu´ lah´ Eun a ri heun, “Seuca´ hk'aw´ jeuk na´ mi, puc mi heul´ hk'ai´ peue awn´ eun reu´.” ⁹ Hawc´ ko´, Yesu´ Eun mhaing´ eun, “Mi ci´ muis keunhaw´?”

Eun top´ a, “Kopti heun´ tu´ ye, ui´ muis Cum.” ¹⁰ Eun hk'o´ hk'ang Yesu´ Eun un´ ra ri hk'uih hk'ai´ vang ut´ awn´ na.

¹¹ Vang un´ seungai ka mawn´ na´, a kue´ lic cum keuting ti cum a saee eo´ ri pang gong na´. ¹² Seuca´ na´ ce hk'o´ hk'ang a ri Yesu´ Eun, “Hk'o´ Mi kah ye heul´ lec lic cum teh´ ce reu´.” ¹³ Yam Yesu´ kah Eun ce heul´ na´, seuca´ na´ ce pucti heul´ hk'ai´ peue awn´ eun, ce heul´ lec lic na´. Hawc´ ko´, lic cum kue´ hk'ao lal´ heng´ tu´

na´ ce yawt´ ti hk'uih´ hk'ai´ leuang´ na´, ce hk'uih´ yeum nang glu na´ gawm´ euc´.

¹⁴ Peue go´ lic na´ ce hk'uih ing´ eo´ ri lah´ peue mhawng´ lawng awn´ a nang veng nang yung´ na´ hk'awp´. A ci´ meuh ku´ yeuh sa´ nhaw´, peue heun´ na´ ce va puri heul´ nawk a. ¹⁵ Yam heul´ rot ce ri Yesu´ Eun na´, ce pun ri nyu peue ku´ seuca´ rai cum heun´ lec ka eun na´ cuip´ eun hk'ohk'eung ri eun pawn kui´ ri mok´ mawn´, ce lhat´ nyawk´. ¹⁶ Peue pun ri nyu lawng peue seuca´ lec ka na´ eun mae´ lawng ka lic na´ ce ris peue heul´ nawk na´ ce mhawng´ a.

¹⁷ Kop awn´ na, ce hk'o´ hk'ang Yesu´ Eun pucti heul´ hk'ai´ vang ut´ ri na´. ¹⁸ Yam Yesu´ kaw Eun lec hk'a´ -naee reu na´, peue ku´ seuca´ rai tawn lec ka eun na´ eun ing´ hk'o´ hk'ang ri kaw hot´ Eun heul´. ¹⁹ Yesu´ Eun un´ kah eun hot´ ri heul´. Daecti Eun lah´, “Ing´ ti nya mi, lawng Peucawo´ Eun ci´ teum´ kawm mi a´ neng mae´ Eun ci´ tukyak ri mi yeuh sa´ nhaw´ na´, ing´ ris peue nya peue hk'ul´ mi na´ ce mhawng´ a reu´.” ²⁰ Eun ku pucti heul´ ris peue mhawng´ lawng Yesu´ teum´ kawm eun ri a´ neng na´ nang kuing´ Dekapo´ lis´ na´. Peue gawm´ euc´ na´ ce am´ nyawk´.

Kon´ nyom beun´ yeum mae´ beun´ nham´ lih

²¹ Yesu´ Eun pawk reu heul´ hk'a´ tawk seubu ka glu na´. Yam kaw n´ ut´ Eun keunam ka ba leuum´ na´, peue cum heun´ na´ ce ing´ cu ri mae´ Heun. ²² Ro´ ka sa´ la vang hk'o´ mun´ muis Yai´ ras´ na´ eun ing´ mawn´. Yam nyu eun Yesu´ Eun na´, eun nghup´ ri mae´ cung Eun na´. ²³ Hawc´ ko´, eun hk'o´ hk'ang a ri Yesu´ Eun mae´ hpum´ ha´ ron ri. Eun lah´, “Kon´ beun´ ui´ na´ kaw eun yeum. Punta kaw eun cuin a´ yu im´ na´, hk'o´ Mi ing´ tang´ ti´ ri hk'a´ pang eun reu´.” ²⁴ Kop awn´ na, Yesu´ Eun ku heul´ mae´ heun.

Peue cum heun´ na´ ce ku tawk´ net hot´ Eun heul´.

²⁵ A kue´ beun´ nham´ lih pun kul´ leual´ neum ti peue.

²⁶ Eun pun ri tukhka nyawk´. Eun euc´ paec heun´ ri kop-ti heul´ ri ri seura´ bai´ heun´ peue, a hk'o´ paec eun euc´ hklel´. A htuk´ ri meuh hk'ao cuin ka, daecti eun gawm keucu. ²⁷ Yam mhawng´ eun lawng Eun Yesu´ na´, eun hot´ to´ Eun Yesu´ na´ heul´ meu peue cum heun´ na´ ce. Eun paic´ hk'o´ Eun na´. ²⁸ Kopti kuit eun, “Ui´ lawn pun ri paic´ yawo hk'o´ Eun na´ ko´, ui´ kaw cuin.”

²⁹ Nham´ lih hk'ai´ heun na´ a keulawn´ yat´, eun mhawng´ tu´ ri na´ cuin ka hawc´.

³⁰ Yesu´ Eun keulawn´ mhawng´ ti´ ca ri na´ puc a ri hk'ai´ ti. Eun hpawt´ ti keue´ ri peue cum heun´ na´ ce. Eun mhaing´ ce, “A´ nhaw´ ci´ paic´ hk'o´ Ui´ na´?”

³¹Tapae' Eun na' ce top' a, "Tup nyu Mi peue cum heun' na' tawk' net ce ri. A ci' meuh kop keunhaw' Mi vae mhaing' peue ri, 'A'nhaw' ci' paic' Ui'?"

³²Daecti punta Yesu' kaw Eun pun ri nyu peue yeuh ku' yeuhki' na' eun, Eun meung hpawt' ti keue' rop ce.

³³Kopti beun' awn' yawng eun ku' meuh hk'a' naee tu' ri na' meulamlam ri na', eun lhat' keuyuing'. Eun ing' nghup' ri nanggal' Eun Yesu' na'. Eun ris Eun mhawng' lawng ku' meuh neum na' gawm' euc' ka.

³⁴Yesu' Eun lah' a ri heun, "Kon' beun' Ui', kop meuh a hk'a' yum' mi na', a yeuh mi cuin hawc'. Kuit nyawk' kuit sam' ran pon ku' kuit nyhap' kuit yak na' ing' reu'."

³⁵Yam kawn' buih leukah' Eun na', peue heul' neum nya eun Yai' ras' ro' ka sa' la vang hk'o' mun' na' ce ing' lah', "Kon' beun' mi na' yeum eun hawc'. Mi ci' meung suksak ri Seura' Eun meuh keunhaw' bae?"

³⁶Yesu' Eun hkuin' leuceng leukah' lah' ce na', daecti Eun lah' a ri ro' ka sa' la vang hk'o' mun' na' eun, "Pawlaee kuit nyhap', yum' yawo palkoe reu'." ³⁷A lawn un' meuh Petru', Yakop' mae' Yo' han awng' eun Yakop' tit' ce ko', Eun un' kah ku' seubu na' ce hot' ri heul' saec' ti peue. ³⁸Yam ing' rot ce ti nya eun ro' ka sa' la vang hk'o' mun' na', Yesu' Eun pun ri nyu peue na' aec' rak ta' ul' ce ri yam. ³⁹Eun ing' lec nya na'. Hawc' ko', Eun lah' a ri ce, "A ci' yeuh keunhaw' pe' vae' aec' rak ta' ul' ri yam? Kon' nyom aen' hpaw eun ca' nang yeum, gup kawn' it' eun." ⁴⁰Daecti ce va puri keunyas cum Yesu' Eun.

Hawc' Yesu' kah Eun ce pucti heul' na', Eun va makuing' eun kon' nyom na' ka mae' tapae' ku' ut' mae' Heun na' ce ing' lec vang ut' eun kon' nyom na'. ⁴¹Yesu' Eun jhawp' ti' eun kon' nyom na', Eun lah', "Tali' ta Hkum." (Vangdoh' ka na', "Kon' beun', lah' Ui' a ri mi kuh' reu'.") ⁴²Kon' nyom beun' na' eun keulawn' kuh' lawng' laeng' ri heul' (A'yu eun na' a pun kul' leual' neum.) Peue awn' ce am' nyawk' ri lawng awn' na. ⁴³Yesu' Eun tuil' leukah' reng ri ce, un' kah ce ris lawng aen' na ri peue saec' ti peue. Eun kah ce ti ri tuil' kon' nyom na' eun hk'a' ku' hk'a.

Peue veng Nasaraet' na' un' rap ce ri ti Yesu' Eun

6 Yesu' Eun pucti heul' neum teh' na', Eun ing' ri yung' vang ut' ri na'. Tapae' Eun na' ce ku hot' Eun ing'. ²Yam rot a seunyi Sin' na', Eun sangsawn' nang sa' la vang hk'o' mun' na'. Peue pun ri mhawng' a na' ce am' nyawk'.

Ce lah', "Peue awn' Eun ci' pun ku' yeuhki' na' neum tawngnhaw' ? Cu' yi pun Eun na' a ci' meuh cu' yi

yeuh sa' nhaw', a cang yeuh a rot ti ku' hk'o' am' ?

³Meuh Eun laksa' ma', un' meuh ka aw? Eun meuh kon' ka Mari', ec' ce Yakop', Yo' saep, Yu' das' mae' Si' mon, un' meuh ka aw? Awng' beun' Eun na' ut' ce mae' e', un' meuh ka aw? Ce nyu Eun pereng ri."

⁴Yesu' Eun lah' a ri ce, "Peue suip leukah' Eun Peuca-wo' na' pun Eun munhpung' ri na' ri peue, daecti Eun hkuin' pun hk'a' naee vang ut' ri na', hk'a' naee ec' awng' ri na' mae' hk'a' naee nyahk'ul' ri na'." ⁵A lawn un' meuh yawo tang' Eun ti' ri hk'a' pang ce peue peuyhat bai' ce cuin na' ngon' ko', Eun hkuin' laee pen' yeuh ku' hk'o' am' na' mawn' saec' ti ceu.

⁶Yesu' Eun am' ri un' cang yum' ce.

Yesu' cus' Eun tapae' kul' leual' peue na' ce pucti heul'

Hawc' awn' na, Yesu' Eun heul' sangsawn' ti yung' hawc' ti yung'. ⁷Eun klawng tapae' kul' leual' peue na' ce ing' ri ti. Eun cus' ce pucti heul' meuh ku ri. Eun tuil' ti' ca cang pe seuca' rai na' ri ce.

⁸Eun tuil' leukah' ri ce. Eun lah', "A lawn un' meuh yawo hku' ji ko', pawlaee pin' keunhaw' heul' saec' ti ceu. Pawlaee pin' ku' hk'a, pawlaee pin' huil', pawlaee seue' paec' hk'a' naee sae' caet' pe' na' heul'. ⁹Cuip' jhaep' heul', daecti pawlaee rangraen hk'o' lheu' ku' cuip' pe' na' heul'. ¹⁰Yam pun pe' ri lec nya nangnhaw' na', ut' yawo nang nya awn' a palkoe rot ti puc' pe' ri heul' hk'ai' veng awn' a na' reu'. ¹¹Saec' meuh tawngnhaw' peue lawn un' rap ri ti pe', a' ko' un' leuceng leukah' pe' na' ko', yam puc' pe' ri heul' hk'ai' veng awn' a na', punta kaw a meuh sa' hki' Peucawo' kaw Eun ciyang ce na', raws' ri tec peuluing pit dak cang pe' na' reu'."

¹²Tapae' na' ce pucti heul' sangsawn' kah peue taws' hpum' fuin map' ri. ¹³Ce ra ri tec seuca' na' heun' tu'. Ce lhuik' peue peuyhat heun' peue na' ce ri lamawn, ce bai' ce cuin.

Yo' han cawo' tuil' hk'a' cum' yeum eun

¹⁴Kopti lawng Eun Yesu' na' seutu in seutan laws' ka heul' na', hkun' haw' hkam' Herot' eun pun ri mhawng' a. Ngon' peue lah', "Yesu' Eun meuh Yo' han cawo' tuil' hk'a' cum' na' yeum eun, eun tang kuh' im'. Kop awn' na, a yeuh Eun kue' ti' ca cang yeuh ku' hk'o' am' na' ce."

¹⁵Ngon' peue lah', "Eun meuh E' li' ya eun."

Peue seubu na´ ce ngon´ ce lah´, “Eun meuh peue suip leukah´ Eun Peucawo´ seun´ peue suip leukah´ Eun Peucawo´ leumah´ na´ ce yeut.”

¹⁶ Daecti yam cawo´ Herot´ pun eun ri mhawng´ a na´, eun lah´, “Peue aen´ meuh eun Yo´han ku´ kah ui´ peue reng´ ngok eun na´ eun. Eun tang kuh´ im´ hawc´.”

¹⁷ Kopti cawo´ Herot´ eun meun kah eun peue heul´ mheut´ ri seue´ Yo´han eun nang htawng´ kopti cawo´ Herot´ ti eun Herodi´ beun´ eun Hpi´lip´ ku´ meuh awng´ ri na´ ka meuh beun´ ri na´. ¹⁸ Kopti Yo´han tawn lah´ eun a ri cawo´ Herot´ eun, “Kopti ti mi beun´ eun awng´ ri na´ ka meuh beun´ ri na´, mi yeuh ku´ kleuc´ ri leukah´ ritroe na´.” ¹⁹ Kop awn´ na, Herodi´ ka ces ri Yo´han eun. Ka sum´ toh eun, daecti a hkuin´ cang.

²⁰ Kopti cawo´ Herot´ lhat´ eun ri Yo´han eun, eun roksa´ eun kopti yawng eun Yo´han meuh eun peue leu-paws seumeu´, peue seunga´ chak´ na´. Yam cawo´ Herot´ pun eun ri mhawng´ leukah´ sangsawn´ eun Yo´han na´, hpum´ eun na´ a saec´ suksak, daecti eun kaw n´ sum´ leuceng a.

²¹ Vang tisut´ ka na´, a rot yam htuk´ lai ri Herodi´ ka. Hk'a´ naee pawe seunyi keut´ eun cawo´ Herot´ na´, eun klawng hkun´ keuting, po´ suik´ keuting mae´ ro´ kan ut´ nang kuing´ Galilae´ na´ ce ing´ hk'asom´ tiduih´.

²² Yam kon´ beun´ ka Herodi´ ing´ cha eun ri na´, a htuk´ hpum´ eun cawo´ Herot´ mae´ peue chec´ na´ ce nyawk´.

Kop awn´ na, cawo´ Herot´ eun lah´ a ri kon´ beun´ na´ eun, “Hk'o´ ku´ sum´ is´ mi na´ reu´, seun´ hk'o´ mi a na´ ui´ kaw tuil´ a ri mi.” ²³ Lheu´ awn´ na eun hkam´ a, “Mi saec´ hk'o´ keunhaw´, ui´ kaw tuil´ a ri mi gawm´ euc´, rot ti kuing´ ui´ na´ ti plak´, ui´ kaw tuil´ a ri mi yeut.”

²⁴ Kon´ beun´ na´ eun heul´ mhaing´ ma ri ka, “Ui´ ci´ na´ htuk´ ri hk'o´ keunhaw´?”

Ma eun ka lah´, “Hk'o´ cing´ eun Yo´han cawo´ tuil´ hk'a´ cum´ na´ reu´.”

²⁵ Eun keutah ing´ lah´ a ri hkun´haw´ hkam´ eun, “Sum´ is´ ui´ cing´ eun Yo´han cawo´ tuil´ hk'a´ cum´ na´ seue´ a nang paen´ hpan na´ tuil´ a ri ui´ maet´ -maen´ reu´.” ²⁶ Hkun´haw´ hkam´ Herot´ eun kuit nyhap´ nyawk´. Daecti kopti hkam´ eun a hawc´ na´ mae´ kopti keue´ eun ri buh ce peue chec´ na´, eun un´ laee cang lheu´ ku´ hk'o´ eun kon´ beun´ na´. ²⁷ Kop awn´ na, eun keulawn´ tuil´ leukah´ kah peue suik´ ri na´ eun heul´ reng´ ri ti cing´ eun Yo´han na´ ing´. Peue suik´ na´ eun ku heul´ reng´ cing´ eun Yo´han na´ nang htawng´ na´. ²⁸ Hawc´ ko´, eun seue´ cing´ na´ nang paen´ hpan na´ ing´ tuil´ a ri kon´ beun´ na´ eun.

Kon´ beun´ na´ eun ti ri tuil´ a ri ma ri ka. ²⁹ Yam tapae´ eun Yo´han na´ pun ce ri mhawng´ lawng awn´ a na´, ce ing´ ti ri heul´ seue´ tu´ yeum eun na´ nang keutui´ leumuic na´.

Yesu´ tuil´ Eun peue hpawn´heng´ na´ ce som´

³⁰ Peue caee Eun Yesu´ na´ ce ing´ cu ri mae´ Yesu´ Eun. Ce ris Eun mhawng´ ku´ yeuh ku´ sangsawn´ ri na´ ce gawm´ euc´ ka. ³¹ Kopti yam awn´ na peue na´ heul´ heul´ ing´ ing´ ce heun´ nyawk´, ce hkuin´ laee tawn ri hk'asom´. Yesu´ Eun lah´ a ri tapae´ ri na´ ce, “E´ heul´ keului´ ri nang vang yen´ yong ti duih´ na´ pawh.”

³² Kop awn´ na, ce pawk reu heul´ ri nang vang yen´ yong ti duih´ na´. ³³ Daecti peue heun´ peue pun ri nyu puc ce ri heul´ na´ ce pawn ce. Peue ut´ ku veng na´ ce va puri hk'uih heul´ rot teh´ nanggal´. ³⁴ Yam Yesu´ lih Eun hk'ai´ reu na´, Eun nyu peue cum heun´ na´ ce. Kopti se-un´ ce kon´yung´ un´ kue´ cawo´ go´ na´, Eun tuckyak ri ce nyawk´. Eun tang sangsawn´ ce ri lawng heun´ ceu na´.

³⁵ Yam rot a hk'a´ pul na´, tapae´ Eun na´ ce ing´ lah´ a ri Heun, “Maen´ na´ seungai ka, a kaw hk'aws´ fec´ hawc´. ³⁶ Kah peue aen´ ce heul´ eo´ ri leuvaee ku´ hk'a´ nang yung´ caonao´ na´ ce meun reu´.”

³⁷ Daecti Eun top´ a, “Pe´ ri tuil´ ce som´ reu´.”

Tapae´ eun na´ ce lah´, “Kaw e´ ti paec leual´ pak´ htaep´ † e´ na´ heul´ leuvaee ri tuil´ ce hk'a´ ku´ hk'a´ aw?”

³⁸ Yesu´ Eun mhaing´ ce, “Pe´ ci´ kue´ hkawomun´ a´ neng meul´, heul´ nom´ nawk a reu´.”

Yam pun ce ri yawng a na´, ce tang ing´ lah´, “Kue´ a hkawomun´ hpawn´ meul´ mae´ ka´ lal´ tu´.”

³⁹ Hawc´ ko´, Yesu´ Eun kah tapae´ ri na´ ce kah peue heun´ na´ ce mok´ meuh cum ri pang rip seungal na´.

⁴⁰ Ce ku mok´ meuh cum ri, cum ka tipak´ peue, a´ ko´ cum ka hpawn´ kul´ peue. ⁴¹ Hawc´ Yesu´ ti Eun hka-womun´ hpawn´ meul´ mae´ ka´ lal´ tu´ na´ ing´ na´, Eun mung´ mao´ na´, Eun mun´ keuting ri Peuca-wo´ Eun. Hawc´ ko´, Eun ves ri tuil´ hkawomun´ na´ ri tapae´ ri na´ ce. Ce gvah a ri peue heun´ na´ ce. Yesu´ Eun ku gvah ka´ lal´ tu´ na´ ri peue heun´ na´ ce hk'aw-p´ yeut. ⁴² Peue gawm´ euc´ na´ ce pun ri hk'a´ ri sak´ ku peue ri. ⁴³ Tapae´ na´ ce seut´ hkawomun´ mae´ ka´ ku´ lheu´ ka na´ a pun kul´ leual´ teng´ nuk. ⁴⁴ Peue hk'a´ ku´ hk'a´ na´ ce, me na´ ce palkoe, ce kue´ hpawn´heng´ peue.

† Paec ti htaep´ na´ meuh a ngos reng peue ti peue yeuh eun kan´ ti seunyi.

Yesu' Eun long pang hak' leuum'

⁴⁵ Yam Yesu' buih am' la Eun peue cum heun' na' ce, Eun keulawn' kah tapae' ri na' ce lec reu na' bai heul' hk'a' teh' glu nang veng Betsai' da' na'. ⁴⁶ Hawc' gah' Eun hk'ai' peue cum heun' na' ce, Eun huk' hk'o' mun' pang gong na'.

⁴⁷ Yam duim' ka na', reu ce tapae' na' a rot nang ngon' ka glu na'. Yesu' Eun ut' koe keunam hk'a' - maen' ka glu na'. ⁴⁸ Eun nyu tapae' ri na' sae' caee' ce fai' reu na' heul', kopti guil' reng na' ing' htuip a ce. Yam kaw a hk'aws' ceng' na', Yesu' Eun long pang hak' leuum' na' heul' ri ce. Eun kaw pukal' ce, ⁴⁹ daecti yam nyu ce long Eun pang hak' leuum' na', ce hteum' Eun meuh hpet'. Ce aec' rak laws', ⁵⁰ kopti nyu ce Eun gawm' euc' ti, ce tok' seupa lhat' nyawk'.

Yam awn' na, Eun keulawn' leukah' mae' ce, "Yeuh hpum' pe' hat' han' reu'. Meuh ka Ui' ri, pawlaee lhat'." ⁵¹ Hawc' ko', Eun ing' lec reu na' mae' ce, guil' na' a ku yut' ri. Ce am' nyawk'. ⁵² Ce ku un' nang ceng' ri lawng ka hkawomun' na'. Hpum' ce na' a cen'.

⁵³ Yam tang ce glu na' heul' hk'a' teh' na', ce tah' reu na' keunam ka veng Genesaret' na'. ⁵⁴ Pal yawo kaw n' puc ce ri lih hk'ai' reu na', peue pawn Yesu' Eun. ⁵⁵ Peue awn' ce hk'uih heul' ku duih' ka kuing' na'. Ce jong' peue peuyhat na' ce gawm' hk'eung it' ri na' ing' ri vang mhawng' ce Yesu' kaw Eun heul' na'. ⁵⁶ Yesu' Eun saec' heul' tawngnhaw', nang yung' un' lah', nang veng un' lah', nang pang' un' lah', peue ku jong' peue peuyhat na' ce ing' vang cu hk'on' peue ri na'. Ce hk'o' Eun na' tuil' peue peuyhat na' ce paic' yawo duing' hk'o' ri na'. Peue pun ri paic' a na' ce cuin gawm' euc' ri.

Ku' seunga' mae' ku' un' seunga'

7 Peue Hparisae' mae' peue guil leukah' ritroe lih neum veng Yeru' salaem na' ing' cu ce ri rop Yesu' Eun. ² Ce pun ri nyu tapae' Eun na' ce ngon' hk'a' ce ku' hk'a, ce un' hkuc' ti' ri. A sawn' ri meuh "ku' un' seunga'". ³ (A kue' ritroe a' ta' a' ya ce yeuh ce ing' ti cu hawc' ti cu na', peue Hparisae' mae' peue Yu' da na' ce gawm' euc' ce lawn un' nang hkuc' ti' ri hot' ritroe ka na' ko', ce hkuin' hk'a ku' hk'a. ⁴ Yam ing' ce neum keulas ri na', ce lawn un' nang saic' ku' ti ri na' ko', ce hkuin' nang hk'a a yeut. Lheu' awn' na, ce kaw n' kue' ritroe seubu heun' ceu, u' hpama ri, rit hpak' kaw k', hk-vak mae' hk'eung hk'a seubu na' ce.)

⁵ Kop awn' na peue Hparisae' mae' peue guil leukah' ritroe na' ce mhaing' Yesu' Eun, "Tapae' Mi na' ce ci'

yeuh keunhaw', ce vae' un' hot' ri yeuh ritroe ku' nang kawt tang' ce ri uin' na' ? Ce hk'a ku' hk'a ri na' ri ti' un' seunga' ri." ⁶ Yesu' Eun top' a, "Ku' I' saya' tamnai eun lawng peue leukah' seunga' hpum' vok' se-un' pe' ri na' a cawp' nyawk'. A tem' ri lah', 'Peue aen' suk' seun' ce Ui' ri moeng ri na' palkoe, daecti hpum' ce na' a seungai Ui' nyawk'. ⁷ Fae' ce Ui' na' a meuh ku' hk'o' hk'awng', ku' sangsawn' ce na' a meuh yawo ritroe ku' peue sangsawn' peue puri na'." †

⁸ Pe' tecla leukah' Eun Peucawo' na', pe' jhawp' ritroe ce peue na'."

⁹ Hawc' ko', Yesu' Eun tang lah' a ri ce, "Punta kaw pe' hot' ritroe ri na' meun, pe' chanan tecla leukah' Eun Peucawo' na'. ¹⁰ Kopti Mo' se lah' eun, 'Hkopy-awm' yumyam' ri makuiing' mi ka reu' "†, eun ku lah', 'A' nhaw' lawn jha' makuiing' ri ka ko', kuing' eun ri pun ri yeum.' ‡ Daecti pe' lah', 'A' nhaw' lawn lah' a ri makuiing' ri ka, "Hk'eung kue' ri ui' ku' kaw kue' mun' pun pa' na' a meuh Kolban'" (vangdoh' ka na' a lah' ku' ap tan ri Peucawo' Eun hawc'), ¹² hawc' ko' pe' hkuin' kah eun teum' kawm makuiing' ri ka saec' peunae'. ¹³ Kop awn' na, pe' yeuh leukah' Eun Peucawo' na' hk'o' hk'awng' ri jhawp' pe' ri ti ritroe ri ing' ti cu hawc' ti cu na'. Ku' seun' awn' a na' pe' ku kaw n' yeuh a heun' ceu yeut."

¹⁴ Hawc' awn' na, Yesu' Eun klawng peue cum heun' na' ce ing' ri ti. Eun lah', "Pe' ri gawm' euc' leuceng ri yawng ku' lah' Ui' na' reu'. ¹⁵ Ku' kue' hk'a' nok ing' lec ri yeuh hk'a' naee tu' peue meuh 'ku' un' seunga' na' a hkuin' kue' saec' ti ceu. Daecti ku' yeuh eun meuh 'ku' un' seunga' na' meuh a ku' lih neum tu' eun na' hawc'."

¹⁶ ††† Yam gah' Eun hk'ai' peue cum heun' na' ce Eun ing' lec nang nya na', tapae' Eun na' ce mhaing' Eun ri lawng leukah' leupong' aen' na. ¹⁸ Yesu' Eun mhaing' ce, "Un' nang leuceng pun pe' a aw? Ku' kue' hk'a' nok ing' lec ri yeuh hk'a' naee tu' peue meuh 'ku' un' seunga' na' a hkuin' kue' saec' ti ceu na', un' nyu pe' a aw? ¹⁹ Kopti hpaw a ca' pun ri lec hk'a' naee hpum', daecti lec a hk'a' naee keuteul na', hawc' ko' a pucti heul' hk'ai' tu' na'." (Seun' Yesu' lah' Eun a yeuh keutit' na', Eun sum' lah' ku' hk'a na' gawm' euc' ka a hkuin' to' ri meuh "ku' un' seunga'".)

²⁰ Eun tang lah', "Ku' lih neum tu' eun na', a jaen meuh ku' yeuh eun meuh 'ku' un' seunga' na'." ²¹ Kopti

† I' saya' 29:13 †† Pucti heul' 20:12; Sawn' leukah' mun' 5:16 ‡ Pucti heul' 21:17; Fae' 20:9 †† Nang htawm Seunga' na' ngon', a kue' nambat aet' aen' na. 16 A' nhaw' kue' yhuk' cang mhawng' ko', leuceng a reu'.

ku´ pucti lih neum tu´ lih neum hpum´ na´ ce a meuh kamkuit rai, hk'a´ len´ cu, rabawk´ peue, toh peue, hk'a´ hkuit´ nawng´ tang´, ²² ta´ nha´, sum´ yeuh peue lu, hpum´ un´ leupaws seumeu´ ri leumuil, kang´ kala, hkoe´ mang´, lah´ leukah´ nyoe, pak´ keutuin, nga´ su- isa. ²³ Ku´ rai aen´ ce gawm´ euc´ ka lih a neum hk'a´ - nae na´, a yeuh peue meuh´ ku´ un´ seunga´.”

Hk'a´ yum´ ka beun´ veng Su´ ri´ hpe´ ni´ si´

²⁴ Yesu´ Eun pucti heul´ hk'ai´ mawn´ na´, Eun heul´ nang veng Tai´ ra´ na´. † Eun heul´ lec nang nya ti nya. Eun saec´ un´ sum´ kah peue yawng a, daecti Eun hkuin´ cang mo´ ri pun. ²⁵ A kue´ beun´ ti peue, seuca´ rai na´ a lec kon´ beun´ ka na´ eun. Yam mhawng´ ka lawng Eun Yesu´ na´, ka keulawn´ ing´ nghup´ ri mae´ cung Eun na´. ²⁶ Beun´ awn´ ka meuh peue Helasa´. Ka keut´ nang veng Su´ ri´ hpe´ ni´ si´ na´. Ka ing´ hk'o´ hk'ang Yesu´ Eun ra ri tec seuca´ rai na´ lih hk'ai´ kon´ beun´ ri na´ eun.

²⁷ Yesu´ Eun lah´ a ri ka, “Htuk´ ri tuil´ kon´ nyom na´ ce som´ ri sak´ nanggal´. Un´ htuk´ ri tuil´ so´ na´ hk'a´ ku´ hk'a´ ce kon´ nyom na´.”

²⁸ Beun´ na´ ka lah´, “Cawo´, meuh ka yeut. Daecti saec´ meuh so´ ut´ hk'a´ ruim hpuin´ na´, a pun ri hk'a´ ku´ hk'a´ lheu´ ce kon´ nyom na´.”

²⁹ Hawc´ ko´, Yesu´ Eun lah´ a ri ka, “Ing´ reu´. Kopti meuh a ku´ top´ pa´ na´, seuca´ na´ a lih hk'ai´ kon´ beun´ pa´ na´ eun hawc´.”

³⁰ Beun´ awn´ ka ku ing´ ti nya ri. Ka ing´ pun ri nyu kon´ beun´ ri na´ it´ eun nang hk'eung it´ na´. Seuca´ na´ a pucti heul´ hk'ai´ heun hawc´.

Yesu´ bai´ Eun peue lhuit´ un´ cang leukah´ meulam- lam ri

³¹ Hawc´ ko´, Yesu´ Eun pucti heul´ hk'ai´ veng Tai´ ra´ na´ Eun hpa´ veng Si´ don na´ heul´. Eun heul´ keunam ka glu Galilae´ na´ Eun rot nang kuing´ Dekapo´ lis´ na´. ³² Mawn´ na´, peue va peue lhuit´ un´ cang leukah´ meulam lam ri ti peue ing´ ri Yesu´ Eun. Ce hk'o´ Yesu´ Eun tang´ ti´ ri hk'a´ pang eun.

³³ Hawc´ Yesu´ va Eun peue awn´ eun pucti heul´ hk'ai´ peue cum heun´ na´ ce na´, Eun cuk´ yhuk´ eun na´ ri geun´ ti´ ri na´. Hawc´ ko´, eun htueng´ ri paic´ dak´ eun na´. ³⁴ Eun mung´ mao´ na´, Eun seului ri ghuih´ hpum´ ri. Eun lah´ a ri heun, “E´ fahta´” (vang- doh´ ka na´ a lah´, “Dah´ reu´.”) ³⁵ Yam awn´ na, lhuit´

eun peue awn´ a cuin, dak´ eun na´ a ku keuceum. Eun tang´ ri cang leukah´ meulam lam ri.

³⁶ Yesu´ Eun tuil´ leukah´ un´ kah ce ris lawng aen´ na ri peue saec´ ti peue. Daecti na´ Eun ham´ ce a´ neng, ce gawm ris lawng aen´ na heul´ hk'awp´. ³⁷ Peue cum he- un´ na´ ce am´ nyawk´. Ce lah´, “Yeuh Eun ku´ chak´ na´ palkoe. Saec´ meuh peue lhuit´ na´, Eun yeuh eun cang mhawng´. Peue un´ cang leukah´ na´, Eun ku yeuh eun cang leukah´.”

Yesu´ tuil´ Eun peue hpawn´ heng´ ce hk'asom´

8 Yam awn´ na, peue cum heun´ seubu ti cum na´ ce ing´ cu ri. Kopti un´ kue´ ce ku´ hk'a´ na´, Yesu´ Eun klawng tapae´ ri na´ ce ing´ ri ti. Eun lah´, ² “Tukyak Ui´ ri peue aen´ ce, ut´ ce mae´ Ui´ pun a loe´ seunyi hawc´. Ce hkuin´ kue´ ku´ hk'a´. ³ Ui´ kaw kah ce ing´ yam kaw n´ buih sum´ som´ ce na´ ko´, ce ku na´ cang kluit´ hot´ lang´ hk'a´ ri ing´, kopti ngon´ ing´ ce neum vang seungai na´.”

⁴ Tapae´ Eun na´ ce lah´, “Vang seungai htan´ awn´ na, e´ ci´ kaw pe sok ri tuil´ hkawomun´ hk'o´ ce hk'a´ tawngnhaw´?”

⁵ Yesu´ Eun mhaing´ ce, “Pe´ ci´ kue´ hkawomun´ a´ - neng meul´?”

Ce top´, “Kue´ e´ hkawomun´ a´ res meul´.”

⁶ Eun kah peue cum heun´ na´ ce mok´ pang keute´ na´. Hawc´ ti Eun hkawomun´ a´ res meul´ na´ Eun mun´ keuting ri Peucawo´ Eun na´, Eun ves ri tuil´ a ri tapae´ ri na´ ce. Eun kah ce gvah ri tuil´ a ri peue cum he- un´ na´ ce. ⁷ Ce ku kue´ ka´ aet´ lal´ loe´ tu´. Pun ka´ na´, Eun ku mun´ keuting ri Peucawo´ Eun. Hawc´ ko´, Eun kah ta´ pae´ na´ ce eo´ gvah a yeut. ⁸ Peue cum he- un´ na´ ce pun ri hk'a´ ri sak´. Hawc´ ko´, tapae´ na´ ce eo´ ri seut´ ku´ hk'a´ lheu´ na´ a pun a´ res teng´ nuk.

⁹ Me na´ ce kue´ hpawn´ heng´ peue. Hawc´ kah Eun ce ing´ na´, ¹⁰ Eun ku lec reu na´ mae´ tapae´ ri na´ ce. Ce heul´ nang veng Dalmanuhta na´.

Peue Hparisae´ hk'o´ ce het´ keuting

¹¹ Peue Hparisae´ na´ ing´ htu´ hting´ ce Yesu´ Eun. Punta kaw ce long ri nawk Eun na´, ce hk'o´ Eun yeuh het´ keuting lih neum kuing´ pang mao´ na´. ¹² Eun seu- luit ri ghuih´ hpum´ ri. Eun lah´, “A ci´ meuh kop keun- haw´, peue sa´ hkat´ maet´ maen´ na´ pe´ vae´ hk'o´ ri nawk het´ ku´ hk'o´ am´? Kaw Ui´ lah´ a ri pe´ neum- neum, peue sa´ hkat´ maet´ maen´ na´ ce kaw un´ pun ri nyu het´ keuting na´ saec´ ti ceu.” ¹³ Hawc´ ko´, Yesu´

† Nang htawm Seunga´ na´ ngon´, a tem´ ri lah´ veng Tai´ ra´ mae´ veng Si´ don na´.

Eun pucti heul' hk'ai' ce. Eun lec reu na' heul' hk'a' te-
h' ka leuum' na'.

Paeng ce peue Hparisae' mae' cawo' Herot'

¹⁴Tapae' na' pil ce kaw ri pin' hkawomun' heul'.
Hk'a' naee reu na' a kue' yawo hkawomun' ti meul'.

¹⁵Yesu' Eun tuil' sati ce. Eun lah', "Uin' sati ri ri paeng
ce peue Hparisae' mae' cawo' Herot' na' reu'."

¹⁶Kop awn' na, ce lah' a ri puri, "Kopti un' kue' e'
hkawomun' na', Eun lah' a yeuh keutit'."

¹⁷Kopti Yesu' yawng Eun ku' lah' ce na', Eun lah' a ri
ce, "A ci' meuh kop keunhaw', pe' vae' lah' puri
mhawng' lawng un' pin' ri hkawomun'? Un' nang nyu,
un' nang ceng' pe' aw? Hpum' pe' na' cen' ka aw?

¹⁸⁻¹⁹Pe' saec' kue' ngai', daecti un' nyu pe' aw? Pe'
saec' kue' yhuk', daecti un' mhawng' pe' aw? Yam ves
Ui' ri tuil' hkawomun' hpawn' meul' na' ri peue
hpawn' heng' peue na' ce na', pe' ci' tang seut' ri pun
ku' lheu' ka na' a' neng teng' na', un' pawn pe' a
aw?"

Ce top' a, "Kul' leual' teng'."

²⁰Eun mhaing' ce, "Yam ves Ui' ri tuil' hkawomun'
a' res meul' na' ri peue hpawn' heng' peue na' ce, pe'
ci' tang seut' ri pun a' neng teng'?"

Ce top' a, "A' res teng'."

²¹Eun lah' a ri ce, "Un' nang ceng' pe' aw?"

Yesu' bai' Eun peue ngai' lec' nang veng Bet' sai' da'

²²Yam ing' rot ce nang veng Betsai' da' na', peue va
peue ngai' lec' ti peue ce ing' hk'o' Yesu' Eun paic'
eun. ²³Yesu' Eun teuk' ti' eun peue ngai' lec' na', Eun
va eun heul' hk'a' nok yung' na'. Eun htueng' ri nang
ngai' eun na'. Hawc' ko', Eun tang' ti' ri hk'a' pang
eun. Eun mhaing' eun, "Mi ci' nyu keunhaw'?"

²⁴Eun keue'. Eun lah', "Nyu ui' peue na' seun' ce
kleum' hku' ko', ce heul' heul' ing' ing'."

²⁵Yesu' Eun tang paic' ngai' eun na' baee ti pok. Hawc'
c' ko', ngai' eun na' a ku blas'. Sai' ngai' eun na' a
chak', a cang nyu ku ceu na' meulamlam ri. ²⁶Yesu' Eun
kah eun ing' ti nya. Eun tuil' leukah' ri heun, "Pawlaee
ing' nang yung' na'."

Petru' rap eun ri ti Yesu' meuh Eun Hkrit

²⁷Yesu' Eun mae' tapae' Eun na' heul' ce nang
yung' kue' hk'a' naee kuing' Kae' sari' Hpi' li' pi' na'.
Yam long ce hk'a' heul' na', Eun mhaing' tapae' ri na'
ce, "Peue ci' lah' Ui' meuh a' nhaw'?" ²⁸Ce top' a,
"Ngon' lah' peue Mi meuh Yo' han cawo' tuil' hk'a'

cum' na' eun, ngon' peue lah' Mi meuh E' li' ya eun,
ngon' peue lah' Mi meuh peue suip leukah' Eun Peuca-
wo' ti ri peue na' eun."

²⁹Yesu' Eun mhaing' ce, "Pe' ri sae, pe' ci' lah' Ui'
meuh a' nhaw'?"

Petru' eun top' a, "Meuh Mi Hkrit."

³⁰Yesu' Eun tuil' leukah' un' kah ce lah' peue
mhawng' a saec' ti peue.

Yesu' ris Eun ce mhawng' lawng kaw ri pun ri yeum

³¹Hawc' awn' na, Eun tang sangsawn' tapae' ri na'
ce, "Kon' ai' peue na' kaw Eun pun ri hkam' ku' tukhka
na' heun' ceu. Nang kawt, ro' peue jhawp' rit mae'
peue guil leukah' ritroe na' ce kaw un' rap ri ti Eun. Eun
kaw pun ri hkam' toh peue ri. Na' a rot loe' seunyi ko',
Eun na' tang kuh' im'." ³²Eun ris lawng aen' a glih'-
gleueng'. Hawc' ko', Petru' eun yat Yesu' Eun heul'
hk'a' ti plak' na', eun is' Yesu' Eun.

³³Daecti yam Yesu' hpawt' Eun ri keue' ri tapae' ri
na' ce na', Eun is' Petru' eun, "Satan, hton' mi ing'
hk'a' kui' reu'. Hpaw mi ca' kuit seun' ku' kuit Eun
Peucawo' na', daecti kuit mi seun' peue ko'."

³⁴Hawc' ko', Eun klawng peue cum heun' na' mae'
tapae' na' ce ing' ri ti. Eun lah', "A' nhaw' lawn sum'
hot' Ui' ko', eun kaw pun ri tec alo ri, klawm' kleum'
rawng' tawp' ri, hawc' ko' hot' Ui' heul'. ³⁵Kopti a' n-
haw' lawn sum' a' yu pon ko', eun kaw pun ri sum' a' yu
ri na'. Daecti a' nhaw' lawn sum' a' yu ri pun Ui' mae'
leukah' mun' ren' kawn na' ko', eun kaw pun a' yu
pon. ³⁶Kopti saec' meuh a' nhaw', eun saec' na' pun
ku' kue' pang bhen' keute' na' meuh is' ti
gawm' euc' ka, daecti eun lawn sum' a' yu ri na' ko', a
ci' kaw kue' mun' keunhaw' pun eun? ³⁷A' ko', a' n-
haw' ci' kaw cang ti keunhaw' a leuploh' a' yu ri na'?'
³⁸Peue ut' hk'a' naee sa' hkat' lheu' ri map' mae'
sa' hkat' seungai Peucawo' Eun na' pe', a' nhaw' lawn
kaic ri Ui' mae' leukah' Ui' na' ko', yam Kon' ai'
peue na' lih Eun mae' munhpung' Eun A' kuiing' na'
mae' munhpung' ce in' hpom seunga' chak' na', Eun
kaw kaic ri peue awn' eun yeut."

9 Hawc' ko', Eun lah' a ri ce, "Kaw Ui' lah' a ri pe'
neumneum, peue cawng maen' na' ce ngon' nang-
gal' yam un' nang yeum ce na', ce kaw pun ri nyu ku-
ing' Eun Peucawo' na' lih a mae' ti' ca ri."

Yesu' plin' Eun ruprang ri

²Hawc' ka les seunyi na', Yesu' Eun va Petru', Yakop'
mae' Yo' han ce huk' pang gong lhung' vang cang ut'

koe ce ri ka na'. Yam awn' na, ruprang Eun na' a plin' ri nanggal' ce na'.³ Hk'eung Eun na' a paing hk'aes' yhupyhap. Peue bhen' keute' na' peue a'nhaw' hkuin' kaw cang sak a paing seun' awn' a pun.⁴ E'li'ya eun mae' Mo' se eun ka ku pucti nanggal' ce na', ka u Yesu' Eun.

⁵ Petru' eun lah' a ri Yesu' Eun, "Seura', ut' e' maen' na' chak' ka. Pawh, e' na' pleng' tup' loe' lhang', pun Mi ti lhang', pun Mo' se ti lhang', pun E'li'ya ti lhang'."⁶ (Kopti lhat' nyawk' ce na', eun hkuin' laee yawng kaw ri lah' keunhaw'.)

⁷ Hawc' ko', putum' na' a lih ghui'm' ce. A kue' seng' laws' lih neum putum' na', "Peue aen' meuh Eun Kon' ai' leumeus' Ui'. Leuceng ri ti leukah' Eun na' reu'."

⁸ Na' ce keulawn' keue' rop ri ko', ce hkuin' laee nyu peue seubu saec' ti peue, ce nyu yawo Yesu' Eun koe.

⁹ Yam buih lih ce neum pang gong na', Yesu' Eun tuil' leukah' ri ce. Eun un' kah ce ris peue mhawng' lawng ku' pun ce ri nyu na' ri peue saec' ti peue rot ti yam Kon' ai' peue na' tang kuh' im' Eun hk'ai' vang yeum ri na'.

¹⁰ Ce uin' lawng aen' na hk'a' naee hpum' ri na'. Ce mhaing' puri ri vangdoh' ka lawng "tang kuh' im' hk'ai' vang yeum" na'.¹¹ Ce mhaing' Eun, "A ci' meuh kop keunhaw' peue guil leukah' ritroe na' ce vae' lah' E'li'ya eun kaw kah ri lih nanggal'?"

¹² Yesu' Eun top' a, "Meuh ka neum, E'li'ya lih eun nanggal' neum. Eun lih mhe' ri pleng' ku ceu na' gawm' euc' ka. Yeuh keutit' ko', a ci' meuh kop keunhaw' a vae' tem' ri uin' ri Kon' ai' peue na' kaw Eun kah ri hkam' ku' tukhka nyawk' mae' hk'a' tecla na'?"
¹³ Daecti kaw Ui' lah' a ri pe', E'li'ya lih eun hawc'. Peue awn' yeuh ce ku' sum' yeuh ri na' ri heun hawc' seun' kue' ka lawng eun na' a tem' ri uin' ri na'."

Yesu' bai' Eun kon' nyom me seuca' rai a lec eun

¹⁴ Yam ing' rot ce ri tapae' seubu na' ce na', ce pun ri nyu peue cum heun' na' rop ce tapae' na' ce. Peue guil leukah' ritroe na' ce buih htu' hting' ce.¹⁵ Yam peue cum heun' na' keulawn' pun ce ri nyu Yesu' Eun gawm' euc' ri na', ce am' nyawk'. Ce hk'uih heul' rap Eun.

¹⁶ Yesu' Eun mhaing' ce, "Pe' ci' buih htu' hting' puri lawng keunhaw'?"

¹⁷ Hk'a' naee ce peue cum heun' na' ku' ti peue na' eun top' a, "Seura', va ui' kon' me ri na' eun ing' ri Mi. Seuca' na' a lec eun, a yeuh eun un' cang leukah'.¹⁸ A saec' meuh yamnhaw' yam seuca' na' lec ka eun na', a

yeuh eun tawngtawt pang bhen' keute' na', bai na' a ru' ri lih hk'ai' moeng eun na', eun cet rang' ri, tu' eun na' a kaw'. Hk'o' ui' tapae' Mi na' ce ra ri tec seuca' awn' a yeut, daecti ce yeuh un' pun a."

¹⁹ Yesu' Eun top' a, "Ah', peue un' kue' hk'a' yum' cu aen' pe', Ui' ci' kaw'n' kaw ut' ling' mae' pe' a' neng? Ui' ci' kaw'n' kaw yeun' hkam pun pe' a' neng? Va kon' nyom na' eun ing' ri Ui' reu'."

²⁰ Ce ku va kon' nyom na' eun ing'. Yam seuca' na' pun a ri nyu Yesu' Eun na', a keulawn' yeuh kon' nyom na' eun raws' ri tawngtawt bhawl' bhael' ri pang bhen' keute' na'. Bai na' a ru' ri lih hk'ai' moeng eun na'.

²¹ Yesu' Eun mhaing' kuiing' eun kon' nyom na' eun, "Yeuh eun ki' na', a ci' ling' a' neng hawc'?" Eun top' a, "Meuh a tang' neum yam kaw'n' aet' eun na'.²² Punta kaw a toh eun, hk'a' naee ngawl un' lah' hk'a' naee leu-um' un' lah' a keucu yeuh eun hk'ui' hk'a' naee ka. Daecti Mi lawn kaw cang teum' kawm ye ko', hk'o' Mi tukyak teum' kawm ye."

²³ Yesu' Eun lah', "A ci' meuh kop keunhaw', mi vae' lah', 'Mi lawn kaw cang teum' ye ko'?' Cang Ui' yeut. Pun peue yum' na' ce, ku ceu gawm' euc' na' cang meuh ka yeut."

²⁴ Kuiing' eun kon' nyom na' eun keulawn' klawng ri lah', "Yum' ui' yeut. Vang yum' ui' un' nuk ka na', hk'o' Mi teum' kawm ui' yeuh ui' yum' a nuk."

²⁵ Yam Yesu' nyu eun peue cum heun' na' cu ce ri ing' na', Eun is' seuca' rai na', "Seuca' un' cang leukah' lhuit' aen' mi, kaw Ui' tuil' leukah' ri mi pucti heul' hk'ai' heun reu', pawlaee ing' lec hk'a' naee eun na' bae."²⁶ Seuca' na' a ta' ul' laws'. A yeuh kon' nyom na' eun raws' ri keuyuing' nyawk'. Hawc' ko', a pucti heul'. Kon' nyom na' eun un' laee cheun' ri seun' peue yeum. A hk'o' peue heun' na' ce lah', "Yeum eun hawc'."

²⁷ Daecti Yesu' Eun jhawp' ti' eun na', Eun teuk' kon' nyom na' eun kuh' cawng.²⁸ Hawc' Yesu' ing' lec Eun nang nya na', tapae' Eun na' ce jom ri mhaing' Eun, "A ci' meuh kop keunhaw' ye vae' un' cang ra ri tec seuca' awn' a pun?"

²⁹ Yesu' Eun top' a, "Seuca' yeuhki' na' cang ra ri tec a kopti hk'o' mun' na' palkoe."

Yesu' tang ris Eun lawng kaw ri pun ri yeum

³⁰ Yesu' Eun mae' tapae' Eun na' ce pucti heul' neum mawn' na', ce hpa' kuing' Galilae' na' heul'. Yesu' Eun hkuin' sum' kah a'nhaw' yawng vang ut' ce na',³¹ kopti buih sangsawn' Eun tapae' ri na' ce. Eun lah' a ri ce, "Kon' ai' peue na' kaw Eun pun ri hkam'

hk'a´ fuin ap peue ri nang ti´ peue. Peue na´ toh Eun. Hawc´ ka loe´ seunyi na´, Eun na´ tang kuh´ im´.”

³² Daecti ce saec´ un´ ceng´ ri vangdoh´ ka ku´ sum´ lah´ Eun na´, ce kaw mhaing´ Eun ce lhat´.

A´nhaw´ ci´ keuting hk'ai´ peue

³³ Ce ing´ rot nang veng Kapeni´ um na´. Yam ut´ Eun nang nya na´, Eun mhaing´ ce, “Pe´ ci´ htu´ hting´ puri kop keunhaw´ lang´ hk'a´ na´?” ³⁴ Daecti ce dit´ ti, kopti lang´ hk'a´ na´ htu´ hting´ ce puri kop lawng a´nhaw´ ci´ keuting hk'ai´ peue na´.

³⁵ Hawc´ mok´ Eun na´, Eun klawng tapae´ kul´ leual´ peue na´ ce. Eun lah´, “A´nhaw´ lawn sum´ meuh peue nambat keuhti ko´, eun kaw pun ri meuh peue tisut´, pun ri meuh mhai´ peue gawm´ euc´.”

³⁶ Eun ti kon´ nyom aet´ ti peue uin´ eun cawng nang ngon´ ce na´. Hawc´ cem Eun kon´ nyom na´ eun Eun lah´ a ri ce, ³⁷ “A´nhaw´ lawn rap ri ti kon´ nyom seun´ aen´ eun hk'a´ nae muis Ui´ na´ ko´, eun ku rap ri ti Ui´ yeut. A´nhaw´ lawn rap ri ti Ui´ ko´, eun hkuin´ rap ri ti Ui´ koe, daecti eun ku rap ri ti Cawo´ ku´ cus´ Ui´ lih na´ Eun yeut.”

Peue un´ to´ tam´ Ui´ na´ meuh ce peue ut´ hk'a´ Ui´

³⁸ Yo´han eun lah´, “Seura´, nyu ye peue ti peue eun cu muis Mi na´ eun ra ri tec seuca´ na´, kopti un´ ut´ eun hk'a´ nae cum e´ na´, ye ham´ eun.”

³⁹ Yesu´ Eun lah´, “Pawlae ham´ eun. A´nhaw´ lawn cu muis Ui´ na´ yeuh ku´ hk'o´ am´ ko´, ti yam yawo eun na´ lah´ lawng ku´ un´ chak´ to´ ri ri Ui´ na´ a hkuin´ kue´ saec´ ti peue. ⁴⁰ Kopti a´nhaw´ lawn un´ to´ tam´ Ui´ ko´, meuh eun peue ut´ hk'a´ Ui´. ⁴¹ Kaw Ui´ lah´ a ri pe´ neumneum, saec´ meuh a´nhaw´ eun lawn tuil´ pe´ nyui leuum´ ti kaw´ hk'a´ nae muis Ui´ na´ kopti meuh pe´ peue Eun Hkrit na´ ko´, lapsawng´ eun na´ a kaw un´ rai´ neum.

Ku´ yeuh peue yeuh map´

⁴² Kon´ nyom aet´ yum´ Ui´ ti ri peue na´ a´nhaw´ lawn yeuh eun yeuh map´ na´ ko´, mawt seumu maw´ meul´ keuting na´ pit ngok eun na´ ploer´ eun lec nang mha´ seumut´ na´, a na´ jaen chak´. ⁴³ Ti´ mi na´ a lawn yeuh mi yeuh map´ na´ ko´, reng´ ri tec a reu´. Mi saec´ na´ ti´ lut´ pun ri lec vang a´yu im´ na´ ko´, a na´ jaen chak´ hk'ai´ kue´ mi ti´ lal´ plak´ mi pun ri lec nang keutong´ nyarok vang ngawl un´ laee cang laic na´.

⁴⁴ ^{†45} Cung mi na´ a lawn yeuh mi yeuh map´ na´ ko´,

† Nang htawm Seunga´ na´ ngon´, a kue´ nambat aet´ aen´ na. ⁴⁴ Mawn´ na´, rec ce na´ a un´ laee cang yeum, ngawl na´ a un´ laee cang laic.

reng´ ri tec a reu´. Mi saec´ na´ cung lut´ pun ri lec vang a´yu im´ na´ ko´, a na´ jaen chak´ hk'ai´ kue´ mi cung lal´ plak´ mi pun ri lec nang keutong´ nyarok na´.

⁴⁶ ^{††47} Ngai´ mi na´ a lawn yeuh mi yeuh map´ na´ ko´, koc ri tec a reu´. Mi saec´ na´ kue´ yawo ngai´ ti´ plak´ pun ri lec vang a´yu im´ na´ ko´, a na´ jaen chak´ hk'ai´ kue´ mi ngai´ lal´ plak´ mi pun ri lec nang keutong´ nyarok na´. ⁴⁸ Mawn´ na´,

‘Rec ce na´ a un´ laee cang yeum, ngawl na´ a un´ laee cang laic.’ [‡]

⁴⁹ Peue gawm´ euc´ peue kaw pun ri rap saic´ ri seunga´ ri ngawl seun´ hkawo´ peue cis na´.

⁵⁰ Cis na´ meuh a ku´ chak´, daecti eum´ ka na´ a lawn cuit´ ko´, a ci´ kaw cang yeuh ri eum´ baee yeuh sa´n-haw´? Kah hk'a´ nae pe´ na´ kue´ cis, yeuh ri ut´ tiduih´ cumyen´ reu´.”

Yesu´ sangsawn´ Eun lawng tec puri

10 Yesu´ Eun pucti neum teh´ na´, Eun heul´ nang kuing´ Yu´da. Hawc´ ko´, Eun tang klong´ Yaw´-dan na´ heul´ hk'a´ teh´. Peue cum heun´ na´ ce cu ri ing´ ri Heun. Eun ku sangsawn´ ce seun´ ku´ tawn yeuh ri na´.

² Peue Hparisae´ na´ ce ngon´ ce ing´ long ri nawk Eun ri leukah´ mhaing´, “Me tec beun´ ri na´ kleuc´ ka ritroe na´ aw?”

³ Yesu´ Eun top´ a, “Mo´se eun ci´ tuil´ leukah´ yeuh sa´nhaw´?”

⁴ Ce lah´, “Mo´se tuil´ eun ahkvang ka, ‘Me na´ eun lawn tem´ ri tuil´ licmat tec puri ko´, cang tec eun beun´ ri yeut.’”

⁵ Yesu´ Eun lah´, “Kopti hpum´ cen´ pe´ na´, Mo´se eun lut tem´ ri tuil´ ritroe aen´ na. ⁶ Daecti tang´ neum yam bhen´ keute´ na´ hpanpleng´ a ri na´, Peucawo´ hpanpleng´ Eun me mae´ beun´. ^{†7} Kop awn´ na, me na´ eun kaw gah´ hk'ai´ makuiing´ ri ka. Eun heul´ kui´ ri mae´ beun´ ri na´ eun. ⁸ Ka kaw meuh nham´ keune keuhti. [‡] Kop awn´ na ka hkuin´ kaw laee meuh lal´ peue, daecti ka meuh yawo ti peue. ⁹ Kop awn´ na, ku´ Peucawo´ kui´ Eun ka meuh tiduih´ hawc´ na´, a´n-haw´ pawlae yah ka hk'ai´ puri.”

¹⁰ Yam tang lec ce hk'a´ nae nya na´, tapae´ Eun na´ ce mhaing´ Eun ri lawng aen´ na. ¹¹ Eun top´ a, “A´nhaw´ lawn tec beun´ ri, hawc´ ko´ eun ti ri is´ beun´ seubu ko´, eun ku len´ cu hk'a´ pang beun´ ri. ¹² A´nhaw´ lawn

†† Nang htawm Seunga´ na´ ngon´, a kue´ nambat aet´ aen´ na. ⁴⁶ Mawn´ na´, rec ce na´ a un´ laee cang yeum, ngawl na´ a un´ laee cang laic. [‡] I´ saya´ 66:24 †† Yamla 1:27 †† Yamla 2:24

tec me ri, hawc´ ko´ eun ti ri is´ me seubu ko´, eun ku len´ cu hk'a´ pang me ri yeut.”

Yesu´ nap Eun mun´ ri kon´ nyom aet´

¹³Va peue ri ing´ tuil´ Yesu´ Eun paic´ kon´ nyom aet´ na´ ce. Daecti tapae´ na´ ce is´ ce. ¹⁴Yam Yesu´ pun Eun ri nyu a na´, a un´ htuk´ hpum´ Eun. Eun lah´ a ri ce, “Tae´ kon´ nyom aet´ na´ ce ing´ ri Ui´ reu´, pawlaee ham´ ce. Kopti kuing´ Eun Peucawo´ na´ meuh a kuing´ ce peue ku´ seun´ kon´ nyom aet´ aen´ ce. ¹⁵Ui´ lah´ a ri pe´ neumneum, a´ nhaw´ lawn un´ rap ri ti kuing´ Eun Peucawo´ na´ seun´ kon´ nyom aet´ na´ ce ko´, eun hkuin´ kaw duing pun ri lec nang kuing´ Eun Peucawo´ na´.” ¹⁶Hawc´ ko´, Eun cem kon´ nyom aet´ na´ ce. Eun tang´ ti´ ri hk'a´ pang ce, Eun nap mun´ ri ce.

Nang nhum´ meuneum

¹⁷Yam Yesu´ puc Eun ri long hk'a´ na´ heul´, peue ti peue eun ing´ seukluin ri nanggal´ Eun na´. Eun mhaing´ Eun, “Seura´ chak´, ui´ ci´ kaw kah ri yeuh sa´ nhaw´ ui´ na´ pun cit´ tip a´ yu tip cot´ cu na´?”

¹⁸Yesu´ Eun top´ a, “A ci´ meuh kop keunhaw´ mi vae´ lah´ Ui´ chak´? A lawn un´ meuh yawo Peucawo´ Eun ko´, a´ nhaw´ hkuin´ chak´ saec´ ti peue.

¹⁹Mi ku yawng leukah´ ritroe aen´ na, ‘Pawlaee toh peue, pawlaee len´ cu, pawlaee ra, pawlaee hkam´ sa´ hk-i´ un´ kue´ un´ meuh, pawlaee chi´ lai ri ti is´ peue, hkopyawm´ yumyam´ ri makuiing´ mi ka.”†

²⁰Eun lah´, “Seura´, aen´ ce gawm´ euc´ leuceng ri hot´ ui´ ri yeuh a tang´ neum yam kawn´ aet´ ui´ na´ hawc´.”

²¹Yesu´ Eun keue´ ri heun. Eun leumeus´ eun. Eun lah´, “Kawn´ cut mi ti ceu. Heul´ paing´ ku´ kue´ mi na´ gawm´ euc´ ka gvah ri tuil´ peue hk'o´ tuckyak na´ ce is´ a reu´. Mi kaw kue´ sin´ ngos heun´ nang kuing´ pang mao´ na´. Hawc´ ko´, mi na´ ing´ hot´ Ui´ reu´.”

²²Yam pun eun ri mhawng´ leukah´ aen´ a na´, eun kuit nyhap´ mhong´ mhil´ ing´ kopti meuh eun peue meuneum nyawk´ na´.

²³Hawc´ Yesu´ keue´ Eun rop na´, Eun lah´ a ri tapae´ ri na´ ce, “Peue meuneum na´ kaw ce lec nang kuing´ Eun Peucawo´ na´ a nyhap´ nyawk´.”

²⁴Tapae´ na´ ce am´ ri ku´ sangsawn´ Eun na´. Daecti Yesu´ Eun tang lah´, “Kon´, kaw lec nang kuing´ Eun Peucawo´ na´ nyhap´ nyawk´ ka. ²⁵Kalaok´ ti tu´ na´ kaw a lec muis peunye na´ kawn´ sam´ ran a hk'ai´ peue

meuneum na´ kaw eun lec nang kuing´ Eun Peucawo´ na´.”

²⁶Tapae´ na´ ce jaen gawm am´ nyawk´. Ce lah´ a ri puri, “Yeuh keutit´ ko´, a´ nhaw´ ci´ kaw cang pun hk'a´ htut lawtpon na´?”

²⁷Yesu´ Eun keue´ ri ce. Eun lah´, “Pun peue na´, aen´ hpaw a ca´ cang meuh. Daecti pun Peucawo´ Eun na´, cang meuh a ku ceu ka.”

²⁸Petru´ eun lah´, “Tec ye ku ceu gawm´ euc´ na´, ye hot´ Mi.”

²⁹Yesu´ Eun top´ a, “Kaw Ui´ lah´ a ri pe´ neumneum, a´ nhaw´ lawn tecla nya ri, a´ ko´ ec´ awng´ ri, a´ ko´ makuiing´ ri, a´ ko´ kon´ hk'i´ ri, a´ ko´ mal´ na ri na´ kopti pun Ui´ mae´ leukah´ mun´ ren´ kawn na´ ko´, ³⁰hk'a´ naee cu cat aen´ na eun kaw pun nammaet ka tipak´ pun (nya, ec´ awng´, ma, kon´ hk'i, na mal´ mae´ gawm´ ku´ tukhka.) Cu hk'a´ cat na´ eun na´ eun kaw pun cit´ tip a´ yu tip cot´ cu ri. ³¹Daecti peue ut´ nanggal´ heun´ peue na´ kaw ce meuh peue ut´ hk'a´ to´. Peue ut´ hk'a´ to´ heun´ peue na´ kaw ce meuh peue ut´ nanggal´.”

Yesu´ tang lah´ Eun lawng kaw ri pun ri yeum na´ bae

³²Yam buih huk´ ce nang veng Yeru´ salaem na´, Yesu´ Eun heul´ nanggal´. Tapae´ na´ ce am´, saec´ meuh peue hot´ ce heul´ na´ ce lhat´. Eun va tapae´ kul´ leual´ peue na´ ce heul´ kuit´ keunam ka hk'a´ na´. Hawc´ ko´, Eun ris ce mhawng´ lawng ku´ kaw meuh ri Heun na´. ³³Eun lah´, “Buih huk´ e´ nang veng Yeru´ salaem. Kon´ ai´ peue na´ kaw Eun pun ri hkam´ hk'a´ fuin ap peue ri nang dak ti´ ce ro´ peue jhawp´ rit na´ mae´ peue guil leukah´ ritroe na´ ce. Ce kaw taws´ a´ mu tut yeum ri Heun. Hawc´ ko´, ce kaw ap Eun ri peue un´ meuh peue ceu Yu´ da na´.

³⁴Peue awn´ ce kaw lah´ ku´ pleh ku´ jaing, htuing´, ta´ faet´ Eun. Hawc´ ko´, ce kaw toh Eun. Hawc´ ka na´ loe´ seunyi na´, Eun na´ tang kuh´ im´.”

Ku´ hk'o´ ka Yakop´ mae´ Yo´ han

³⁵Yam awn´ na, Yakop´ mae´ Yo´ han ku´ meuh kon´ me eun Yebedae´ na´ ka ing´ lah´ a ri Yesu´ Eun, “Seura´, seun´ ku´ hk'o´ ya ti ri ceu na´ sum´ kah ya Mi yeuh a.”

³⁶Eun lah´, “Pa´ ci´ sum´ kah Ui´ yeuh keunhaw´ pun pa´?”

³⁷Ka lah´, “Yam pun Mi munhpung´ ri na´, hk'o´ Mi tuil´ ya mok´ hk'a´ a´ tawm´ Mi ti peue hk'a´ a´ ve´ Mi ti peue awh.”

† Pucti heul´ 20:12-16; Sawm´ leukah´ mun´ 5:16-20

³⁸ Yesu´ Eun lah´, “Hpaw pa´ ca´ yawng buih hk'o´ ri keunhaw´. Kawk´ nyui Ui´ na´, lak´ kaw pa´ cang nyui a aw? Hk'a´ cum´ rap Ui´ na´, lak´ kaw pa´ cang rap a aw?”

³⁹ Ka top´ a, “Kaw ya cang hkam´ a pun yeut.” Yesu´ Eun lah´, “Kawk´ nyui Ui´ na´ kaw pa´ pun ri nyui a, hk'a´ cum´ rap Ui´ ri ti na´ pa´ ku kaw pun ri rap ri ti a.”
⁴⁰ Daecti ku´ kaw tuil´ pa´ mok´ hk'a´ a´ tawm´ hk'a´ a´ ve´ Ui´ na´, a hkuin´ meuh Ui´ ri. Daecti vang mok´ awn´ a meuh a is´ ce peue ku´ Peucawo´ rangraen Eun ri uin´ pun ce na´.”

⁴¹ Yam tapae´ seubu kul´ peue na´ mhawng´ ce lawng aen´ a na´, ce seungeueng´ ri Yakop´ mae´ Yo´ han ka.
⁴² Yesu´ Eun klawng tapae´ na´ ce ing´ cu ri tiduih´. Eun lah´, “Peue pun an´ nya meuh cawo´ u´ peung ce peue un´ meuh peue ceu Yu´ da na´ meuh eun cawo´ hk'a´ pang ce, cawo´ hk'a´ ruim eun na´ ce ku meuh cawo´ hk'a´ pang ce yeut, pe´ ku yawng a.”
⁴³ Daecti pun pe´ ri na´ a hkuin´ yeuh keutit´. A lak´ meuh ri is´ ti hk'a´. A´ nhaw´ lawn sum´ meuh peue keuting ri pe´ ko´, eun kaw pun ri yeuh mhai´ pe´.
⁴⁴ A´ nhaw´ lawn sum´ meuh peue nambat keuhti ko´, eun kaw pun ri meuh mhai´ ri peue gawm´ euc´.
⁴⁵ Kopti Kon´ ai´ peue na´ hpaw Eun ca´ lih pun kaw peue yeuh mhai´ Eun, daecti lih Eun pun kaw Eun yeuh mhai´ peue mae´ kaw Eun tuil´ a´ yu ri na´ meuh ngos ka hk'a´ htut lawtpon pun peue heun´ na´ peue.”

Peue ngai´ lec´ muis Batimeas´ tang nyu eun hk'a´ ri

⁴⁶ Hawc´ awn´ na, Yesu´ Eun mae´ tapae´ Eun na´ ce ing´ rot nang veng Yeri´ hko´ tiduih´ mae´ peue cum heun´ na´ ce. Yam puc ce ri heul´ hk'ai´ veng na´, Peue ngai´ lec´ muis Batimeas´ meuh kon´ eun Timeas´ na´ eun mok´ ri hk'o´ keunam hk'a´ na´.

⁴⁷ Yam pun eun ri mhawng´ Yesu´ peue veng Nasaraet´ ing´ Eun na´, eun klawng ri lah´, “Yesu´ Kon´ ai´ Davit´, hk'o´ Mi tukyak ri ui´.”

⁴⁸ Peue heun´ na´ ce saec´ is´ eun, kah eun dit´ ti. Daecti eun gawm klawng ri lah´ laws´ a, “Kon´ ai´ Davit´, hk'o´ Mi tukyak ri ui´.”
⁴⁹ Yesu´ Eun kuit´. Eun tuil´ leukah´ lah´, “Klawng eun ing´ maen´ reu´.” Peue heun´ na´ ce klawng ri lah´ a ri peue ngai´ lec´ na´ eun, “Ren´ kawn reu´, kuh´ vae, buih klawng Eun mi.”

⁵⁰ Peue ngai´ lec´ na´ eun hpuic´ ri tec hk'o´ dal´ ri na´. Hawc´ ko´, eun seuvuin ri kuh´ ing´ ri Yesu´ Eun.

⁵¹ Yesu´ Eun mhaing´ eun, “Mi ci´ sum´ kah Ui´ yeuh keunhaw´ ri ti?”

Peue ngai´ lec´ na´ eun top´ a, “Seura´, sum´ nyu ui´ hk'a´ ri.”

⁵² Yesu´ Eun lah´, “Heul´ reu´, hk'a´ yum´ mi na´ yeuh a mi cuin hawc´.” Eun keulawn´ nyu hk'a´ ri. Eun hot´ Yesu´ Eun hot´ hk'a´ na´ heul´.

Cawo´ pe lec Eun veng Yeru´ salaem

11 Yam Yesu´ Eun mae´ tapae´ Eun na´ huk´ rot ce keunam veng Yeru´ salaem nang yung´ Bethpage´ mae´ yung´ Betani´ pang gong Sanlon na´, Eun cus´ tapae´ lal´ peue na´ ka heul´.
² Eun lah´ a ri ka, “Heul´ ri yung´ ut´ nanggal´ teh´ a reu´. Yam heul´ lec pa´ yung´ teh´ a na´, pa´ kaw pun ri nyu rawngla aet´ a´ n-haw´ un´ nang duing pawk a na´ mawt a ri teh´. Pa´ na´ kah´ ri teuk´ a heul´ maen´.
³ Peue ti ri peue eun lawn na´ lhon´ ri mhaing´ pa´, ‘A ci´ yeuh keunhaw´ pa´ vae´ yeuh ku´ yeuhki´?’ pa´ na´ lah´, ‘Cawo´ lo´ Eun a. Ti yam na´ ya tang ing´ tuil´ a maen´.’”

⁴ Yam heul´ ka na´, ka nyu rawngla aet´ na´ mawt a ri ri hk'a´ nok ka leuva´ ru mae´ hk'a´ na´. Yam buih kah´ ka a na´,
⁵ peue cawng mawn´ na´ ce ngon´ ce lah´, “A ci´ yeuh keunhaw´, pa´ vae´ kah´ mu´ ka rawngla aet´ awn´ na?”
⁶ Ka ku lah´ a seun´ ku´ Yesu´ tuil´ Eun leukah´ ri ka na´. Ce ku kah ka teuk´ a heul´.
⁷ Ka teuk´ rawngla aet´ na´ ing´ ri Yesu´ Eun. Hawc´ ce lhup´ hk'o´ dal´ ri na´ pang kui´ ka na´, Yesu´ Eun pawk a.
⁸ Peue heun´ na´ ce ti ri tawm hk'o´ ri na´ nang gon´ hk'a´ na´. Ngon´ ce taws´ yuim na´, ce tawm a nang gon´ hk'a´ na´.
⁹ Peue cum heun´ heul´ nanggal´ mae´ peue heul´ hk'a´ kui´ Eun na´ ce klawng ri lah´,
“Hosana, †

nap mun´ ri Cawo´ ing´ hk'a´ ruim muis Eun Peucawo´ na´ Eun. ††

¹⁰ Nap mun´ ri kuing´ eun kuiing´ e´ Davit´ ku´ kaw ing´ na´ reu´.

Hosana, suk´ seun´ Peucawo´ lhung´ hk'ai´ peue Eun.”

¹¹ Yesu´ Eun huk´ lec nang veng Yeru´ salaem na´. Eun huk´ nang nya hk'o´ mun´ keuting na´. Eun heul´ eo´ ri nawk ku ceu na´ ce. Daecti kop kaw a fec´ na´, Eun pucti lih hk'ai´ mawn´ na´. Eun lih nang yung´ Betani´ mae´ tapae´ kul´ leual´ peue na´ ce.

Yesu´ Jha´ Eun kleum´ pli´ keutuic

¹² Yam ceng´ ka yam buih puc ce ri hk'ai´ yung´ Betani´ na´, Yesu´ Eun sum´ som´.
¹³ Eun nyu kleum´ pli´ keutuic lha´ kluim´ vang seungai na´ ti kleum´. A ci´ na´ kue´ pli´ un´ kue´, Eun heul´ nom´ a. Kopti un´ meuh a

† Hosana na´ meuh a leukah´ Hebrae´, vangdoh´ ka na´ a lah´, “Htut ye.”

†† Suk´ seun´ 118:25, 26

yam pli´ ka, yam nyu Eun pal lha´ ka a un´ kue´ pli´ na´, ¹⁴Eun lah´ a ri kleum´ pli´ keutuic na´, “Tang´ neum seunyaen´ na´, peue hkuin´ kaw laee pun ri hk'a pli´ mi saec´ ti peue.” Tapae´ Eun na´ ce ku mhawng´ ku´ lah´ Eun na´ yeut.

Yesu´ yeuh Eun nya hk'o´ mun´ keuting na´ seunga´

¹⁵Yam rot ce nang veng Yeru´ salaem na´, Yesu´ Eun ing´ lec´ nang kang´ hkung´ ka nya hk'o´ mun´ keuting na´. Eun ra ri tec peue paing´ hk'eung mae´ peue leu- vae´ hk'eung mawn´ na´ ce pucti heul´. Eun seukleup´ hpuin´ ce peue leuploh´ leumuil na´ mae´ pang´ mok´ ce peue paing´ gui´ na´. ¹⁶Eun un´ kah´ a´nhaw´ pin´ hk'eung ti ri ceu lec lih kang´ hkung´ ka nya hk'o´ mun´ keuting na´. ¹⁷Eun sangsawn´ ce,

“Nya Ui´ na´ kaw a pun ri lah´ ri meuh nya vang hk'o´ mun´ pun peue ceu ku ceu´†, a tem´ ri uin´ ri yeuhki´, un´ meuh ka aw?

Daecti pe´ yeuh a meuh´vang hk'on´ ro con´††.”

¹⁸Ro´ peue jhawp´ rit mae´ peue guil leukah´ ritroe na´ pun ce ri mhawng´ leukah´ awn´ a na´. Kop awn´ na ce tang´ ri sok hk'a´ kaw ri toh Eun, kopti lhat´ ce ri Heun, kopti peue heun´ na´ am´ ce ri ku´ sangsawn´ Eun na´.

¹⁹Yam meuh a hk'a´ pul na´, Yesu´ Eun mae´ tapae´ Eun na´ ce pucti heul´ hk'a´ nok ka veng na´.

Kleum´ pli´ keutuic na´ yeum hk'oh´ ka

²⁰Yam ceng´ ka yam buih long ce hk'a´ heul´ na´, ce nyu kleum´ pli´ keutuic na´ yeum hk'oh´ a rot ri res ri na´. ²¹Petru´ eun kuit rot eun lah´ a ri Yesu´ Eun, “Seu- ra´, keue´ reu´. Kleum´ pli´ keutuic jha´ Mi na´ yeum hk'oh´ ka hawc´.”

²²Yesu´ Eun top´ a, “Yum´ Peucawo´ Eun reu´. ²³Kaw Ui´ lah´ a ri pe´ neumneum, a´nhaw´ lawn tuil´ leukah´ ri gong aen´ na, ‘Sat ri heul´ hk'uic´ lec nang mha´ seumut´ na´ reu´’, eun lawn un´ kangkae hk'a´ - naee hpum´ ri daecti eun na´ yum´ seun´ ku´ lah´ eun na´ kaw a meuh ko´, a kaw meuh neum yeut. ²⁴Kop awn´ na kaw Ui´ lah´ a ri pe´, pe´ saec´ na´ hk'o´ keunhaw´ un´ lah´, yum´ kaw pe´ pun a reu´. Hawc´ ko´, pe´ kaw pun a yeut. ²⁵Yam cawng pe´ ri hk'o´ mun´ na´, punta Kuing´ pe´ Cawo´ ut´ nang kuing´ pang mao´ na´ kaw Eun ploee´ map´ pe´ na´, ploee´ map´ ce peue yeuh ku´ kleuc´ ri pe´ na´ ce reu´.” †

† I´ saya´ 56:7†† Yerami´ 7:11‡ Nanghtawm Seunga´ na´ ngon´, a kue´ nambat aet´ aen´ na. ²⁶Daecti pe´ lawn un´ ploee´ map´ peue na´ ko´, saec´ meuh Kuing´ Cawo´ pe´ ut´ nang kuing´ pang mao´ na´ Eun ku kaw un´ ploee´ map´ pe´ na´ yeut.

Mhaing´ peue lawng Yesu´ pun Eun ti´ ca

²⁷Yam tang ing´ rot ce nang veng Yeru´ salaem na´ bae e yam Yesu´ buih eo´ Eun nang kang´ hkung´ ka nya hk'o´ mun´ keuting na´, ro´ peue jhawp´ rit, peue guil leukah´ ritroe mae´ nang kawt na´ ce ing´ mhaing´ Eun,

²⁸“Mi yeuh ceu nang aen´ ce, Mi ci´ cu ti´ ca keunhaw´ yeuh a? A´nhaw´ ci´ tuil´ ti´ ca aen´ a ri Mi?” ²⁹Yesu´ Eun top´ a, “Ui´ ku kaw mhaing´ pe´ ti moeng yeut. Pe´ na´ lah´ Ui´ mhawng´ a. Hawc´ ko´, Ui´ na´ kawn´ lah´ pe´ mhawng´ Ui´ ci´ pun ti´ ca aen´ a ri a´nhaw´ Ui´ yeuh ceu nang aen´ ce.

³⁰A´nhaw´ ci´ tuil´ ti´ ca tuil´ hk'a´ cum´ na´ ri Yo´han eun, neum kuing´ pang mao´ aw, a´ko´ neum peue aw? Lah´ Ui´ mhawng´ a reu´.” ³¹Ce sa´ lit puri lah´, “E´ lawn top´ lih a neum kuing´ pang mao´ ko´, Eun kaw tang cang mhaing´ e´, ‘A ci´ yeuh keunhaw´ pe´ vae´ un´ yum´ Yo´han eun?”

³²Daecti e´ lawn top´ lih a neum peue ko´, ...” (Ce lhat´ ri peue heun´ na´ ce, kopti peue gawm´ euc´ na´ yum´ ce Yo´han meuh eun peue suip leukah´ Eun Peucawo´ neumneum na´.) ³³Kop awn´ na, ce top´ a ri Heun, “Un´ yawng ye a.”

Yesu´ Eun lah´ a ri ce, “Yeuh keutit´ ko´, Ui´ ku hkuin´ kaw lah´ pe´ mhawng´ cu Ui´ ti´ ca keunhaw´ Ui´ yeuh ceu nang aen´ ce yeut.”

Leukah´ leupong´ lawng sang´ hpa´ val pli´ bui

12 Hawc´ ko´, Eun sangsawn´ leukah´ leupong´ ri peue heun´ na´ ce. Eun lah´, “Peue ti peue sang´ eun val pli´ bui. Eun ru a rop. Eun kung´ a is´ keutui´ vang bet´ pli´ bui. Eun pleng´ a is´ tup´ lung´ vang ko´. Hawc´ ko´, eun tuil´ peue sang´ val na´ ce sang´ hpa´ a. Hawc´ ko´, eun heul´ nang kuing´ tawk seubu. ²Yam rot a yam poc´ pli´ bui na´, punta kaw eun ti pli´ ku´ kaw eun htuk´ ri pun na´, eun kah mhai´ ri na´ eun heul´ ri peue sang´ hpa´ val na´ ce. ³Daecti peue sang´ hpa´ val na´ ce mheut´ ri peum´ eun, ce ploee´ eun ing´ neh. ⁴Eun tang kah mhai´ seubu na´ eun heul´ ri ce bae. Daecti ce ku peum´ cing´ eun, yeuh ku´ hk'o´ kleh´ ri heun.

⁵Cawo´ val na´ eun kah mhai´ seubu na´ eun heul´ ri ce bae ti peue. Ce ku toh eun yeum. Cawo´ val na´ eun tang kah mhai´ seubu heun´ peue na´ ce heul´. Ngon´, ce peum´ ce. Ngon´, ce toh ce yeum. ⁶Cawo´ val na´ eun vang yawo nang kaw heul´ ti peue koe. Eun meuh kon´ me leumeus´ eun na´ eun. Eun kah eun heul´ pok tisut´

ka na' kopti hteum' eun, 'Na' ce chak' ri hkopyawm' ri kon' me ui' na' eun.'

⁷Daecti peue sang' val na' ce lah' a ri puri, 'Peue aen' meuh eun peue pun sin'. Pawh, e' toh eun. Sin' eun na' a na' meuh is' e'.'

⁸Kop awn' na, ce mheut' ri toh eun. Hawc' ko', ce ol' ri tec eun hk'a' nok ka val na'. ⁹Kop awn' na, cawo' val na' eun ci' kaw yeuh sa' nhaw' ri ce? Kaw eun tang ing' toh peue sang' hpa' val awn' ce. Hawc' ko', eun kaw tang tuil' nang seubu ce sang' hpa' val awn' na. ¹⁰Un' duing lip pe' htawm Seunga' ton aen' a aw?

A lah', 'Seumu peue go' nya na' tec ce hawc' na', maet' maen' meuh a seumu kleum' ka nya vang a' ye' keuting hk'ai' seumu seubu na' hawc'.'

¹¹Cawo' Peucawo' yeuh Eun kan' aen' na, a meuh ku' hk'o' am' ri ngai' e' na'."†

¹²Kopti yawng ce leukah' leupong' awn' lah' a ti ri na', ce sok hk'a' kaw ri mheut' ri ti Eun. Daecti kopti lhat' ce ri peue heun' na' ce, ce gah' heul' hk'ai' Heun.

Seue' hkawn' ri cawo' Kae' sa eun

¹³Hawc' awn' na, punta kaw ce ti leukah' Yesu' lah' kleuc' Eun na', ce kah peue Hparisae' na' ce mae' peue eun Herot' na' ce heul' ri Heun ngon'. ¹⁴Ce ing' lah' a ri Heun, "Seura', yawng ye meuh Mi peue leupaws seumeu'. Mi un' meuh mae' hk'a' mawn' hk'a' - maen' ri peue. Mi hkuin' keue' ri buh a' nhaw', daecti Mi sangsawn' a hot' hk'a' Eun Peucawo' na' neum-neum. Seue' ye hkawn' ri cawo' Kae' sa eun na' cawp' ka aw, un' cawp' ka aw? ¹⁵Kaw ye htuk' ri seue' a ri cawo' Kae' sa eun aw, a' ko' un' seue' aw?"

Daecti Yesu' yawng Eun meuh ce peue leukah' seunga' hpum' vok' na', Eun lah' a ri ce, "A ci' yeuh keunhaw', pe' vae' sok ku' kleuc' Ui'. Tuil' Ui' nawk paec ti htaep' reu'." ¹⁶Ce ku ti ri tuil' htaep' na' ri Heun. Eun mhaing' ce, "Htaep' na' a ci' kue' rup a' nhaw', muis a' nhaw'?"

Ce top' a, "Meuh a cawo' Kae' sa eun."

¹⁷Hawc' ko', Yesu' Eun lah' a ri ce, "Hk'eung eun cawo' Kae' sa na' tuil' a keutah ri cawo' Kae' sa eun. Hk'eung Eun Peucawo' na' tan a keutah ri Peucawo' Eun reu'."

Ce ku am' nyawk' ri Heun.

Lawng tang kuh' im'

¹⁸Peue Sadu' kae' lah' tang kuh' im' a un' kue' na' ngon' ce ing' mhaing' Yesu' Eun, ¹⁹"Seura', Mo' se

tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a' ko' awng' eun na' eun kaw kah ri tang ti beun' awn' eun.'

²⁰Kue' a awng' ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. ²¹Rot ti A'nyi na' eun ti beun' eun nawepi ri na' eun, daecti eun ku yeum yam un' nang kue' ri kon'. Rot ti Aisam' na' eun ku seun' awn' a yeut. ²²Rot ti gawm' a' res peue ce un' tawn ri kue' kon', ce yeum gawm' euc' ri. Vang tisut' ka na', beun' awn' eun ku yeum. ²³Yam tang kuh' im' na', beun' awn' eun ci' na' meuh beun' a' nhaw' ri ce, kopti ti ce beun' awn' eun gawm' a' res peue ri na'?"

²⁴Yesu' Eun top' a, "Kleuc' pe' hawc'. Yeuh pe' ko' na' meuh a kopti un' yawng pe' htawm Seunga' na' mae' ti' ca Eun Peucawo' na', un' meuh ka aw? ²⁵Yam peue yeum na' tang kuh' im' ce na', ti puri mae' kui' puri na' a hkuin' kaw lae' kue', kaw ce keut' ri seun' in' hpom kuing' pang mao' na' ce ko'. ²⁶Ku' to' ri lawng tang kuh' im' tem' ri nang htawm eun Mo' se ku' tem' a lawng bang' kat' na', ku' Peucawo' lah' Eun ri heun, 'Meuh Ui' Peucawo' eun Abraham, Peuca-wo' eun I'cak' mae' Peucawo' eun Yakop' na'', un' duing lip pe' a aw? ²⁷Un' meuh Eun Peucawo' ce peue yeum na', daecti meuh Eun Peucawo' ce peue a' yu im' na'. Kuit kleuc' pe' nyawk'."

Leukah' ritroe a' ye' keuting hk'ai' peue na'

²⁸Peue guil leukah' ritroe ti peue na' ing' mhawng' eun htu' hting' ce puri. Eun nyu Yesu' top' Eun a chak' nyawk'. Eun ku mhaing' Yesu' Eun, "Hk'a' nae' leukah' ritroe na' gawm' euc' ka, nangnhaw' na' a ci' a' ye' keuting hk'ai' ka?"

²⁹Yesu' Eun top' a, "Leukah' ritroe ku' a' ye' keuting hk'ai' peue na', 'Peue I' sarela' na' pe', leuceng a reu'. Cawo' Peucawo' e' na' meuh Eun Cawo' Peucawo' ti peue koe. ³⁰Leumeus' Cawo' Peucawo' mi na' Eun ri sut' hpum' ri, sut' civit ri, sut' kamkuit ri, sut' kaw' reng ri na' gawm' euc' ka reu'. ³¹Lal' moeng ti moeng ka na', 'Leumeus' peue ut' keunam caonao' mi na' ce seun' leumeus' mi tu' ri na' yeut reu'. Leukah' ritroe ku' keuting hk'ai' leukah' lal' moeng aen' a na' hpaw a ca' lae' kue'."‡

³²Peue guil leukah' ritroe na' eun lah', "Seura', leukah' Mi na' cawp' ka nyawk'. Lah' Mi Peucawo' Eun meuh Peucawo' ti peue koe, lheu' Heun ri a un' lae'

† Suk' seun' 118:22, 23

‡† Pucti heul' 3:6‡ Sawn' leukah' mun' 6:4‡† Sawn' leukah' mun' 6:5‡† Fae' 19:18

kue´ nang seubu saec´ ti peue na´ cawp´ ka. ³³ Leumeus´ Peucawo´ Eun ri sut´ hpum´ ri, sut´ cu´ yi ri, sut´ kaw´ reng ri na´ gawm´ euc´ ka, leumeus´ peue ut´ ke-unam caonao´ mi na´ ce seun´ leumeus´ mi tu´ ri na´ yeut ko´, kue´ ka a´ ye´ keuting hk'ai´ ku´ dum ri tan mae´ ku´ tan na´ gawm´ euc´ ka.”

³⁴ Yam Yesu´ nyu Eun top´ eun a mae´ kue´ ri cu´ yi na´, Eun lah´ a ri heun, “Hpaw mi ca´ lae seungai kuing´ Eun Peucawo´ na´.” Tang´ neum yam awn´ na, a´ nhaw´ hkuin´ lae hat´ ri mhaing´ Eun bae saec´ ti peue.

Hkrit Eun ci´ meuh kon´ a´ nhaw´?

³⁵ Yam Yesu´ buih sangsawn´ Eun ce nang kang´ hkung´ ka nya hk'o´ mun´ keuting na´, Eun mhaing´ ce, “Peue guil leukah´ ritroe na´ lah´ ce Hkrit Eun meuh kon´ ai´ eun Davit´ na´, a ci´ kaw cang meuh yeuh sa´ nhaw´?” ³⁶ Davit´ eun ku lah´ a hk'a´ naee cu ri Cit´ seunga´ chak´ na´ yeuhki´,

‘Peucawo´ lah´ Eun a ri Cawo´ ui´ na´ Eun,
“Mok´ hk'a´ a´ tawm´ Ui´ na´
rot ti uin´ Ui´ ransu Mi na´ ce

hk'a´ ruim dak cung Mi na´ reu´.”†

³⁷ Tu´ eun Davit´ na´ eun ku vae´ klawng Eun meuh Cawo´, Eun ci´ kaw cang meuh kon´ eun Davit´ yeuh sa´ n-haw´?”

Peue cum heun´ na´ ce ren´ kawn leuceng leukah´ Eun na´.

Yesu´ is´ Eun peue guil leukah´ ritroe na´ ce

³⁸ Yam Yesu´ buih sangsawn´ Eun na´, Eun lah´, “Uin´ sati ri peue guil leukah´ ritroe na´ ce reu´. Sum´ cuip´ ce hk'o´ dal´ eo´ ri. Ce sum´ kah peue luisa ri nang keulas na´. ³⁹ Ce sum´ mok´ ri vang mok´ a´ ye´ keuting hk'ai´ peue hk'a´ naee sa´ la vang hk'o´ mun´ na´ mae´ vang hk'asom´ na´. ⁴⁰ Ce rutrim´ ri ti nya ce a´ ya seunao na´. Ce yeuh ri hk'o´ mun´ ling´ lang´ sum´ kah peue nyu ri. Ce kaw pun ri hkam´ hk'a´ ciyang reng na´ lheu´ peue ri.”

A´ ya seunao tan paec

⁴¹ Yesu´ mok´ Eun nanggal´ vang tan leumuil ka nya hk'o´ mun´ keuting na´. Eun ko´ ri nawk peue heun´ na´ seue´ ce leumuil. Peue meuneum heun´ peue na´ ce ti leumuil ing´ heun´ heun´, ce ing´ buit ri seue´ a.

⁴² Daecti a´ ya seunao hk'o´ tukyak ti peue na´ ka ing´ tan paec seurak´ lal´ paec, paec lal´ paec na´ a ngos leng

nyawk´. ⁴³ Yesu´ Eun klawng tapae´ ri na´ ce. Hawc´ ko´, Eun lah´ a ri ce, “Kaw Ui´ lah´ a ri pe´ neumneum, a´ ya seunao hk'o´ tukyak aen´ tan ka ri vang tan leumuil ka nya hk'o´ mun´ keuting na´ heun´ hk'ai´ peue gawm´ euc´. ⁴⁴ Kopti ce ri, hue´ ce a lih vang kue´ ri heun´ na´ ce tan a. Daecti beun´ aen´ ka ko´, ka saec´ hk'o´ tukyak, ka ku tan ku´ kaw uui´ a´ yu ri na´ gawm´ euc´.”

Het´ kaw hk'aws´ rot yam tisut´

13 Yam Yesu´ puc Eun ri lih neum nya hk'o´ mun´ keuting na´, tapae´ ti peue na´ eun lah´, “Seura´, keue´ reu´. Seumu aen´ ce keuting, nya aen´ ce chak´ ngam nyawk´.”

² Yesu´ Eun top´ a, “Nyu pe´ nya aen´ ce keuting nyawk´, un´ meuh ka aw? Seumu aen´ kaw ce un´ lae po ri pang puri saec´ ti meul´. A kaw pun ri seut´ ri tec ri ku meul´ ri.”

³ Yam Yesu´ mok´ Eun pang gong Sanlon vang to´ tat ka nya hk'o´ mun´ keuting na´, Petru´, Yakop´, Yo´ han mae´ Andre ce ing´ mhaing´ koe Eun, ⁴ “Hk'o´ Mi lah´ ye mhawng´ a, ceu nang tit´ ce a ci´ kaw keut´ meuh yamnhaw´? Punta kaw e´ yawng yam awn´ kaw a hk'aws´ meuh na´, a ci´ kaw kue´ het´ keunhaw´?”

⁵ Yesu´ Eun lah´ a ri ce, “Uin´ sati ri reu´. Pawlae tuil´ peue cop´ pe´. ⁶ Peue heun´ na´ kaw ce peus muis Ui´ na´ ce na´ ing´ lah´, ‘Meuh ui´ Heun ri.’ Ce na´ cop´ peue heun´ heun´ na´ ce. ⁷ Yam pun pe´ ri mhawng´ lawng peueng´ suik´ mae´ lawng suik´ kaw a keut´ na´, pawlae hpum´ seuyuk. Kopti lawng aen´ kaw a kah ri kue´ meuh yeut, daecti a hkuin´ kaw nang rot yam tisut´ ka. ⁸ Peue ti ceu hawc´ ti ceu, kuing´ ti kuing´ hawc´ ti kuing´, peue kaw kleuc´ puri. A kaw kue´ in´ san´ mae´ ut´ ngeup´ heun´ duih´. Ceu nang aen´ ce gup kaw n´ kaw a meuh kleum´ ka ku´ tukhka na´ ce.

⁹ Uin´ sati ri ko´ reu´. Kaw peue mheut´ ri ti pe´ heul´ nang sa´ nam´ ka veng na´. Peue kaw ta´ faet´ pe´ hk'a´ naee sa´ la vang hk'o´ mun´ na´. Meuh a kopti Ui´ ri, pe´ kaw pun ri va ri heul´ nanggal´ ce cawo´ veng na´ mae´ hkun´ haw´ hkam´ na´ ce. Pe´ kaw kah ri hkam´ sa´ hki´ na´ ri ce. ¹⁰ Leukah´ mun´ ren´ kawn na´ kaw a kah ri sangsawn´ ri peue ceu gawm´ euc´ na´ ce nanggal´. ¹¹ Saec´ meuh yamnhaw´ yam mheut´ peue pe´ huk´ vang taws´ a´ mu na´, pawlae hki´ keung ri ku´ kaw pe´ lah´ na´. Lah´ yawo pal ku´ tuil´ Eun pe´ lah´ yam awn´ a na´ reu´, kopti hpaw a ca´ meuh ku´ lah´ pe´ meun, daecti meuh a ku´ lah´ ka Cit´ seunga´ chak´ na´.

† Suk´ seun´ 110:1

¹²Awng' ec' na' ce kaw fuin puri rot ti yeuh ce puri yeum, kuiing' na' ce kaw fuin kon' ri, kon' na' ce kaw fuin makuiing' ri na' ce rot ti hk'o' a ce yeum. ¹³Kopti meuh a Ui' ri, peue gawm' euc' peue kaw nyu pe' pereng ri. Daecti peue yeun' hkam a rot tisut' ka na' kaw ce pun ri lawtpon. †

¹⁴Yam nyu pe' ku' hk'aw' jeuk yeuh ku' lulaic na' †† ut' a vang un' htuk' a ri ut' na', (peue lip htawm aen' a na', co' ca' ri yawng a reu') peue ut' nang kuing' Yu' da na' kah ce hk'uih huk' pang gong na' reu'. ¹⁵Peue ut' pang a' ras' na' ce pawlaee lih hk'a' col, a' ko' pawlaee lec ri ti hk'eung ti ri ceu pucti lih hk'ai' nya na'.

¹⁶Saec' meuh peue ut' nang mal' na' ce pawlaee ing' ti hk'o' keuting ri na'. ¹⁷Sa' hkat' yam awn' na kaw a meuh ku' hk'o' lhat' keuting pun a' ya nyhel' mae' nang kue' kon' pui na' ce. ¹⁸Ceu nang aen' ce punta kaw a un' keut' kue' yam kawt' na', hk'o' mun' reu'. ¹⁹Kop-ti, yam awn' kaw a meuh yam tukhka nyhap' nyawk' ku' keunhaw' un' laee keutec pun a ri mae' ka. Tang' neum yam Peucawo' hpanpleng' Eun bhen' keute' na' rot seunyaen' na', a hkuin' nang duing kue'. Saec' hk'a' nanggal' ka heul' na', a hkuin' kaw laee kue' bae. ²⁰Cawo' Peucawo' Eun lawn un' yeuh yam awn' na dot' ko', a' nhaw' hkuin' kaw lawtpon a saec' ti peue. Daecti kopti meuh a peue leuk Eun ri ti na' ce, Eun kaw yeuh meuyam awn' a dot'. ²¹Yam rot a yam awn' na, peue ti ri peue eun lawn lah' a ri pe', 'Keue' reu', Hkrit ut' Eun maen'', a' ko' 'Keue' reu', ut' Eun mawn'', pe' na' pawlaee leuceng a. ²²Kopti peue guil ri meuh Hkrit Eun mae' peue guil ri meuh peue suip leukah' Eun Peucawo' na' kaw ce pucti lih. A lawn kaw cang ko', punta kaw ce cop' ri pun peue Peucawo' leuk Eun ri ti na' ce na', ce kaw yeuh het' keuting mae' ku' hk'o' am' na' ce. ²³Kop awn' na, uin' sati pe' reu'. Lah' Ui' ri uin' a ri pe' tang' neum cawo ka hawc'.

²⁴Daecti hk'a' naee meuyam awn' na yam ku' tukhka nyhap' nyawk' awn' hawc' ka na',

seunyi na' a na' duim' lawng,

a' chi' na' a hkuin' kaw laee ceng'.

²⁵Seumeueng' na' a na' hk'uic' lih neum pang mao', ti' ca ka mao' na' ku ceu ka a kaw pun ri keuyuih' fui- i' fai'. ††

²⁶Yam awn' na, peue kaw pun ri nyu Kon' ai' peue lih Eun hk'a' naee putum' na' ri munhpung' ti' ca keuting ri na'. ²⁷Eun kaw cus' in' hpom ri na' ce heul' hk'on' ro peue leuk Eun ri ti na' ce tang' neum rot ri hkop' lok dal mao' pun' hon' pun' ce' na'.

²⁸Rin ri ti leukah' leupong' lawng kleum' pli' keutuic na' reu'. Yam gluh' ka na', pe' yawng meun kaw a hk'aws' rot yam kuc'. ²⁹Seun' awn' na, yam pun pe' ri nyu ceu nang awn' kue' meuh ka na', pe' kaw yawng kaw Eun hk'aws' rot, Eun rot keunam ka leuva' na' hawc'. ³⁰Kaw Ui' lah' a ri pe' neumneum. Cu yam peue maet' maen' na' un' nang pon ce na', ceu nang aen' ce gawm' euc' a kaw meuh neum. ³¹Mao' na' mae' bhen' keute' na' kaw a rai', daecti leukah' Ui' na' a hkuin' kaw rai'.

Seunyi meuyam awn' na a' nhaw' un' yawng a saec' ti peue

³²A' nhaw' hkuin' yawng seunyi meuyam awn' a saec' ti peue. Saec' meuh in' hpom na' ce mae' Kon' ai' Eun hkuin' yawng a. A' kuiing' yawng Eun a koe.

³³Uin' sati ri, pawn kui' ri ko' reu'. Yam awn' a kaw rot yamnhaw', pe' hkuin' yawng a. ³⁴Seun' a peue ti peue puc eun ri heul' kuing' tawk seubu ko'. Eun ap kan' ku' mhai' na' kaw ce htuk' ri yeuh na' ri ce ti peue hawc' ti peue. Eun ku tawm' peue ko' leuva' na' eun ko' a meulamlam ri.

³⁵Kop awn' na, saec' meuh yamnhaw' ko' a reu', kopti un' yawng pe' yam cawo' nya na' kaw eun tang ing' na', a na' meuh peunpul un' yawng, peunsum' un' yawng, yam el' leuo' un' yawng, a' ko' a na' meuh peungup cawo un' yawng. ³⁶Eun lawn htip' rip ri ing' rot ko', pawlaee uin' eun ing' nyu it' nyum pe'. ³⁷Ku' lah' Ui' ri pe' na', lah' Ui' a ri peue gawm' euc' yeut, 'Uin' sati ri ko' reu'.'"

Ro' na' sa' lit ce ri kaw toh Yesu' Eun

14 Bae lal' seunyi na', kaw a rot yam pawe vel nya mae' yam pawe un' seue' hkawomun' is' paeng na'. Ro' peue jhawp' rit na' ce mae' peue guil leukah' ritroe na' ce hk'a' naee vang hk'a' vok' hk'a' chi' lai na' ce sok hk'a' kaw ri mheut' ri toh Yesu' Eun. ²Ce lah' a ri puri, "Daecti mak' nang yeuh a hk'a' naee yam ka pawe na', peue heun' na' na' peue cang yeuh ku' suksak."

Beun' yung' Betani' lhuik' lamawn ri Yesu' Eun

³Yam Yesu' mok' Eun ri som' keunam hpuin' nang nya eun Si' mon ku' meuh peue naw na' eun nang yung' Betani' na', beun' ti peue na' ka pin' lamawn hom' ngos heun' seue' ri nang kong' seumu na' ing'. A pleng' ri neum ku' hom' seunga' na'. Ka tuh' hpa' ka na', ka lhuik' a ri cing' Eun Yesu' na'.

† Mahtae 10:22 †† Dayela' 9:27; 11:31; 12:11 †† Maku' 2:4 †† I' saya' 13:10; 34:4

⁴Peue ut´ mawn´ na´ ce a un´ htuk´ hpum´ ce ngon´ . Ce lah´ a ri puri, “A ci´ yeuh keunhaw´ , ka vae´ yeuh lamawn hom´ awn´ a meuh ku´ hk'o´ hk'awng´ ?”⁵ Na´ ka paing´ lamawn hom´ awn´ a ka na´ pun ngos ka na´ a ta ngos reng na´ ti neum. Ka na´ htuk´ ri gvah ri tuil´ a ri peue hk'o´ tukyak na´ ce.” Hawc´ ko´ , ce is´ beun´ awn´ ka nyawk´ .

⁶Daecti Yesu´ Eun lah´ , “Tae´ ka reu´ . A ci´ meuh kop keunhaw´ pe´ vae´ suksak ka? Beun´ aen´ yeuh ka ku´ chak´ na´ ri Ui´ hawc´ .”⁷Peue hk'o´ tukyak na´ ut´ ce mae´ pe´ laleung. Pe´ sum´ teum´ kawm ce yamn-haw´ , pe´ ku kaw cang teum´ kawm ce. Daecti Ui´ ri, Ui´ hkuin´ kaw ut´ mae´ pe´ laleung.⁸ Beun´ aen´ yeuh ka seun´ ku´ yeuh pun ri na´ hawc´ . Lhuik´ ka lamawn hom´ ri tu´ Ui´ aen´ a na´ , meuh a ku´ rangraen ri uin´ punta yam na´ peue puing´ tu´ Ui´ na´ .⁹ Kaw Ui´ lah´ a ri pe´ neumneum, leukah´ mun´ ren´ kawn aen´ a saec´ na´ lah´ ri heul´ tawngnhaw´ ka pang bhen´ keute´ na´ ko´ , punta kaw peue kuit rot ri beun´ aen´ ka na´ , kan´ yeuh ka ri uin´ aen´ kaw peue suip ri ris a heul´ yeut.”

Yu´ das´ kuit deut eun ri kaw fuin Yesu´ Eun

¹⁰Hawc´ awn´ na, Yu´ das´ I´ sakariot´ ku´ meuh hk'a´ naee tapae´ kul´ leual´ peue na´ punta kaw eun ap fuin Yesu´ Eun ri ro´ ce peue jhawp´ rit na´ , eun heul´ ri ce. ¹¹Yam pun ce ri mhawng´ leukah´ eun na´ , ce ren´ kawn nyawk´ . Ce yeuh kati kaw tuil´ eun is´ leu-muil. Kop awn´ na, eun sok yam htuk´ lai ri kaw ap fuin Eun ri ce na´ .

Yesu´ hk'a´ Eun pawe vel nya na´ mae´ tapae´ ri na´ ce

¹²Seunyi la ka pawe un´ seue´ hkawomun´ is´ paeng na´ , tam´ ritroe ka na´ ko´ kah ri tan kon´ yung´ ka pawe vel nya na´ , tapae´ na´ ce ing´ mhaing´ Yesu´ Eun, “Mi ci´ sum´ kah ye rangraen vang kaw e´ hk'asom´ pawe vel nya na´ tawngnhaw´ ?”

¹³Eun ku kah tapae´ ri na´ ka heul´ lal´ peue. Eun lah´ a ri ka, “Ing´ lec nang veng na´ reu´ . A´ ta´ gui keutong´ leuum´ ti peue na´ kaw eun ing´ hk'eup´ pa´ . Pa´ na´ hot´ ri lec nya lec eun na´ reu´ .”¹⁴ Pa´ na´ lah´ a ri cawo´ ka nya lec eun na´ , “Seura´ mhaing´ Eun hkawng ut´ chec´ vang kaw Eun hk'a´ pawe vel nya tiduih´ mae´ tapae´ Eun na´ ce, a ci´ meuh tawngnhaw´ ?”

¹⁵Eun kaw va ri tuil´ pa´ nawk hkawng keuting htan hk'a´ tuh hk'iu´ ri rangraen ri uin´ ri meulamlam ri na´ , rangraen pawe vel nya na´ ri ka reu´ .”¹⁶ Tapae´ lal´ peue na´ ka ku ing´ lec nang veng na´ , ka hk'eup´ seun´ a ku´

Yesu´ lah´ Eun na´ . Kop awn´ na, ka rangraen pawe vel nya na´ ri ka.

¹⁷Yam fec´ ka na´ , Yesu´ Eun ing´ meuh tapae´ kul´ leual´ peue na´ ce. ¹⁸Yam buih mok´ ce ri som´ mae´ hpuin´ na´ , Yesu´ Eun lah´ , “Ui´ lah´ a ri pe´ neumneum, hk'a´ naee pe´ ri ti ri peue kaw eun fuin Ui´ . A meuh ku´ buih som´ mae´ Ui´ na´ eun.”

¹⁹Ce kuit nyhap´ nyawk´ . Ce lah´ a ri Heun ti peue hawc´ ti peue, “Hkuin´ a na´ un´ meuh ui´ ri ah?”

²⁰Eun top´ a, “Heun ri meuh eun hk'a´ naee tapae´ kul´ leual´ peue na´ eun, a meuh ku´ ruim ri som´ paen´ mae´ Ui´ na´ eun. ²¹Kon´ ai´ peue na´ Eun kaw kah ri hot´ seun´ ku´ tem´ ri uin´ ri na´ . Daecti peue fuin Kon´ ai´ peue na´ eun kaw pun ri hkam´ hk'a´ jha´ na´ . Peue awn´ eun lawn na´ un´ keut´ ko´ , a na´ jaen chak´ pun heun.”

Hk'a´ pawe Eun Yesu´

²²Yam mok´ ce ri som´ na´ , Yesu´ Eun ti hkawomun´ na´ Eun mun´ keuting ri Peucawo´ Eun. Hawc´ ko´ , Eun ves ri tuil´ a ri tapae´ ri na´ ce. Eun lah´ , “Ti ri hk'a´ a reu´ . Aen´ meuh a tu´ Ui´ .”

²³Hawc´ ko´ , Eun ti kaw´ na´ , Eun mun´ keuting ri Peucawo´ Eun. Hawc´ ko´ , Eun tuil´ a ri ce. Ce nyui kaw´ awn´ na gawm´ euc´ ri.

²⁴Eun lah´ a ri ce, “Aen´ meuh a nham´ Ui´ , a meuh nham´ kati sat´ ca´ . A lhaee´ bah pun peue heun´ heun´ na´ peue. ²⁵Kaw Ui´ lah´ a ri pe´ neumneum, a lawn un´ nang rot ti seunyi pun Ui´ ri nyui leuum´ pli´ bui hk'u´ nang kuing´ Eun Peucawo´ na´ ko´ , Ui´ hkuin´ kaw laee nyui leuum´ pli´ bui na´ bae.”

²⁶Yam hawc´ ce lah´ ri cai suk´ seun´ na´ , ce pucti heul´ pang gong Sanlon na´ .

Yesu´ lah´ Eun lawng Petru´ kaw eun tecla ri

²⁷Yesu´ Eun lah´ a ri tapae´ ri na´ ce, “Pe´ ri gawm´ euc´ kaw pe´ tecla Ui´ . Kopti tem´ a ri yeuhki´ , ‘Kaw Ui´ toh cawo´ go´ kon´ yung´ na´ eun.

Kon´ yung´ na´ ce kaw taic´ jah hk'ai´ puri heul´ .”[†]
²⁸Daecti hawc´ ka tang kuh´ im´ Ui´ na´ , Ui´ kaw bai heul´ nang kuing´ Galilae´ na´ nanggal´ pe´ .”

²⁹Petru´ eun lah´ , “Peue saec´ na´ tecla Mi gawm´ euc´ ri, daecti ui´ hkuin´ kaw tecla Mi.”

³⁰Yesu´ Eun top´ a, “Kaw Ui´ lah´ a ri mi neumneum, bul seunyaen´ nanggal´ el´ un´ nang leuo´ ka lal´ pok na´ , kaw mi lah´ ri un´ yawng Ui´ hton loe´ pok.”

† Yahkari´ 13:7

³¹Daecti Petru´ eun lah´ hkam´ a ri Heun, “Ui´ saec´ na´ yeum mae´ Mi, ui´ hkuin´ kaw lah´ ri un´ yawng Mi.” Saec´ meuh tapae´ seubu na´ ce gawm´ euc´ ce ku lah´ a yeuh keutit´ yeut.

Yesu´ hk'o´ Eun mun´ vang muis Gesemani´

³²Ce heul´ rot ri vang muis Gesemani´ na´. Yesu´ Eun lah´ a ri tapae´ na´ ce, “Yam heul´ hk'o´ Ui´ mun´ na´, pe´ ri pe´ na´ mok´ maen´ awh.” ³³Eun va Petru´, Yakop´ mae´ Yo´ han ce heul´ mae´ ti. Eun hpum´ lu kuit nyhap´ nyawk´. ³⁴Eun lah´ a ri ce, “Hpum´ lu kuit nyhap´ Ui´ nyawk´, a hk'o´ Ui´ kaw yeum. Ko´ maen´ na´ meulamlam ri reu´.”

³⁵Hawc´ ko´, Eun sat ri heul´ peunaeng´. Eun nghup´ ri hk'o´ mun´ pang keute´ na´. A lawn kaw cang ko´, Eun hk'o´ meuyam aen´ na pon hk'ai´ ti. ³⁶Eun hk'o´ mun´ lah´, “Aba´ †, A´ kuiing´, cang yeuh Mi ku ceu na´ gawm´ euc´ ka. Hk'o´ Mi ti kaw´ aen´ na heul´ hk'ai´ Ui´. Daecti pawlae´ kah a meuh alo Ui´, kah a htonnuk hot´ alo Mi na´.”

³⁷Yam tang ing´ rot Eun mae´ tapae´ na´ ce na´, Eun pun ri nyu buih it´ nyum ce. Eun lah´ a ri Petru´ eun, “Si´ mon, kawm´ meung mi it´ ri aw? Kaw mi ko´ ti nali yawo ka un´ pun aw? ³⁸Punta kaw mi un´ pun ri hk'ui´ hk'a´ nae´ hk'a´ cop´ long na´, hk'o´ mun´ ko´ reu´. Civit mi na´ a saec´ rangraen ri, daecti tu´ mi na´ a kawm´ kaw´ reng kloe.”

³⁹Hawc´ ko´, Eun tang heul´ hk'o´ mun´ seun´ ku´ hk'o´ eun nanggal´ na´ bae´ ti pok. ⁴⁰Yam tang ing´ rot Eun bae´ na´, Eun pun ri nyu kawm´ meung ce it´ nyum ri kopti un´ sum´ plang´ ce ngai´ ri na´. Ce hkuin´ lae´ yawng kaw ri lah´ keunhaw´ ri Heun.

⁴¹Yam tang ing´ rot Eun bae´ loe´ pok na´, Eun lah´ a ri ce, “Kawm´ meung pe´ it´ ri keului´ ri aw? Peunaw´ reu´. Rot a yam ka hawc´. Keue´ reu´, Kon´ ai´ peue na´ kaw Eun pun fuin peue ri ap ri nang ti´ ce peue map´ na´ hawc´. ⁴²Kuh´, heul´ pawh. Ku´ fuin Ui´ na´ ing´ rot eun hawc´.”

Mheut´ Yesu´ Eun

⁴³Yam buih leukah´ Eun na´, Yu´ das´ ku´ meuh tapae´ hk'a´ nae´ tapae´ kul´ leual´ peue na´ eun ing´. Peue jang´ leungawng mae´ peue jang´ hku´ ti cum na´ ce ku hot´ eun ing´. Peue cum awn´ ce meuh peue ku´ cus´ ce ro´ peue jhawp´ rit keuting, peue guil leukah´ ritroe mae´ ro´ kan nang kawt na´ ce.

⁴⁴Ku´ fuin Eun na´ eun yeuh het´ ka ri ce lah´, “Ui´ lawn huit´ a´ nhaw´ ko´, meuh ka hkawn´ Eun hawc´. Mheut´ ri va Eun heul´ ko´ kawm´ Eun meulamlam ri awh.” ⁴⁵Yu´ das´ eun keulawn´ ing´ ri Yesu´ Eun. Eun lah´, “Seura´.” Hawc´ ko´, eun huit´ Eun. ⁴⁶Ce mheut´ Yesu´ Eun. ⁴⁷Ku´ cawng keunam ce ti peue na´, eun htut´ leungawng na´ eun bhat´ yhuk´ eun mhai´ eun peue jhawp´ rit keuting na´ boc´.

⁴⁸Yesu´ Eun lah´, “Meuh Ui´ peue fuin kuing´ aw, pe´ vae´ jang´ leungawng jang´ hku´ ing´ mheut´ Ui´? ⁴⁹Ut´ Ui´ mae´ pe´ nang kang´ hkung´ ka nya hk'o´ mun´ keuting na´ keuyuit, pe´ hkuin´ mheut´ ri ti Ui´. Daecti Htawm Seunga´ na´ kaw a kah ri htonnuk.”

⁵⁰Hawc´ ko´, tapae´ Eun na´ ce tecla Eun gawm´ euc´ ri. Ce hk'uih hk'ai´ Heun.

⁵¹Nang nhum´ ti peue na´ eun seubhae´ hpen´ linin koe, eun hot´ Yesu´ Eun heul´. Na´ ce kaw mheut´ eun, ⁵²eun gloh´ gleh´ ri tec hpen´ na´, eun hk'uih heul´ tu´ seurak´ ri.

Yesu´ cawng Eun nanggal´ ce muk peue hk'om kan´ na´

⁵³Ce va Yesu´ Eun heul´ ri peue jhawp´ rit keuting na´ eun. Ro´ peue jhawp´ rit na´ ce, peue guil leukah´ ritroe na´ ce mae´ ro´ kan nang kawt na´ ce ing´ hk'om puri mawn´ gawm´ euc´ ri. ⁵⁴Petru´ eun ut´ vang ca ri seungai na´, eun hot´ Yesu´ Eun heul´ rot ti kang´ hkung´ ka nya eun peue jhawp´ rit keuting na´. Eun ing´ mok´ ri cuil ngawl mae´ peue ko´ nya hk'o´ mun´ keuting na´ ce.

⁵⁵Ro´ peue jhawp´ rit mae´ muk peue hk'om kan´ na´ ce co´ ca´ ri sok sa´ hki´ kuing´ ri toh Yesu´ Eun, daecti ce hkuin´ nyu sa´ hki´ ka saec´ ti ceu. ⁵⁶Peue hkam´ sa´ hki´ un´ cawp´ un´ meuh na´ heun´ ce yeut, daecti sa´ hki´ hkam´ ce na´ a hkuin´ maen puri.

⁵⁷Ngon´ ce kuh´ cawng ri tang´ hkam´ sa´ hki´ un´ cawp´ un´ meuh na´ ri Heun, ⁵⁸“Pun ye ri mhawng´ lah´ Eun a yeuh keutit´, ‘Kaw Ui´ yeuh nya hk'o´ mun´ keuting ku´ pleng´ peue ri ti´ ri aen´ na lu. Hawc´ ko´, hk'a´ nae´ ka loe´ seunyi na´, Ui´ kaw tang pleng´ nya hk'o´ mun´ keuting seubu bae´ ti lhang´, a hkuin´ kaw meuh ku´ peue pleng´ peue ri ti´ ri.” ⁵⁹Ce saec´ hkam´ sa´ hki´ yeuh keutit´ ko´, daecti sa´ hki´ hkam´ ce na´ a ko´ ri kah´ puri.

⁶⁰Hawc´ ko´, peue jhawp´ rit keuting na´ eun kuh´ cawng nanggal´ ce muk peue hk'om kan´ na´. Eun mhaing´ Yesu´ Eun, “Kaw Mi un´ top´ a saec´ ti moeng aw? A´ mu tang´ peue ri Mi na´, Mi ci´ kaw lah´ a yeuh sa´ nhaw´?” ⁶¹Daecti Yesu´ Eun dit´ ti. Eun hkuin´ top´ leukah´ eun na´.

† Meuh a leukah´ Arame´, vangdoh´ ka na´ a meuh “a´ kuiing´”.

Peue jhawp´ rit keuting na´ eun tang mhaing´ Eun bae ti pok, “Meuh Mi Hkrit, Kon´ ai´ Eun Peucawo´ Cawo´ suk´ seun´ peue na´ Eun aw?”

⁶² Yesu´ Eun lah´, “Euh, meuh Ui´ yeut. Pe´ kaw pun ri nyu Kon´ ai´ peue na´ mok´ Eun hk'a´ ti´ a´ tawm´ Eun Cawo´ ti´ ca keuting na´, mae´ pe´ kaw pun ri nyu lih Eun hk'a´ naee putum´ ka kuing´ pang mao´ na´.”

⁶³ Kop awn´ na, peue jhawp´ rit keuting na´ eun res hk'o ri na´. Eun lah´, “E´ ci´ kawn´ kaw lo´ sa´ hki´ keunhaw´ na´ bae? ⁶⁴ Pun pe´ ri mhawng´ lah´ Eun leukah´ un´ nawpsang ri Peucawo´ Eun hawc´, pe´ ci´ kaw kuit a yeuh sa´ nhaw´?”

Ce ri gawm´ euc´, ce sahpaw´ Eun kuing´ ri yeum. ⁶⁵ Hawc´ ko´, ngon´ ce htueng´ Eun ri nyel´ ri. Ce kang´ ngai´ Eun na´, ce nu´ Eun. Hawc´ ko´, ce lah´ ri pleh jaing Eun, “Cop, a´ nhaw´ ci´ klaee´ Mi?” Peue ko´ Eun na´ ce va ri heul´ klaee´ Eun.

Petru´ guil eun ri un´ yawng Yesu´ Eun

⁶⁶ Yam Petru´ ut´ eun plak´ hk'a´ col ka kang´ hkung´ nya na´, a kue´ beun´ mhai´ eun peue jhawp´ rit keuting ti peue na´ ka ing´ mawn´. ⁶⁷ Yam pun ka ri nyu Petru´ mok´ eun ri cuil ngawl na´, ka seuluil´ eun.

Ka lah´, “Mi ku meuh peue ut´ mae´ Yesu´ peue veng Nasaraet´ na´ Eun yeut.”

⁶⁸ Daecti Petru´ eun htu´ hting´ lah´, “Hpaw ui´ ca´ yawng ku´ lah´ pa´ na´.” Hawc´ ko´, eun pucti heul´ hk'ai´ leuva´ ing´ ri na´. Hawc´ ko´, el´ na´ a leuo´.

⁶⁹ Yam beun´ mhai´ awn´ tang nyu ka eun mawn´ bae na´, ka tang lah´ a ri peue cawng keunam mawn´ na´ ce bae, “Hkawn´ eun ku meuh cum ce ti peue yeut.” ⁷⁰ Daecti Petru´ eun tang htu´ hting´ ka bae.

Hawc´ ka na´ bae ti hk'ao, peue cawng keunam mawn´ na´ ce lah´ a ri Petru´ eun, “Neum, meuh mi cum ce ti peue yeut, kopti meuh mi peue Galilae´ na´.”

⁷¹ Eun tang sae´ caee´ hkam´ a ri ti meun, “Hpaw ui´ ca´ yawng ku´ lah´ pe´ na´ Eun.”

⁷² Yam awn´ na, el´ na´ a keulawn´ leuo´ rot lal´ pok. Petru´ eun kuit rot ri ku´ Yesu´ lah´ Eun na´, “Nanggal´ el´ un´ nang leuo´ ka rot lal´ pok na´, kaw mi guil ri un´ yawng Ui´ loe´ pok.” Petru´ eun yam mae´ hpum´ sui´ ri.

Cawo´ Pi´ lat mhaing´ eun Yesu´ Eun

15 Yam ceng´ ka na´, ro´ peue jhawp´ rit, peue guil leukah´ ritroe, ro´ kan nang kawt mae´ muk peue hk'om kan´ na´ ce kuit a deut. Ce mawt Yesu´ Eun, hawc´ ko´ ce va ri heul´ ap Eun ri cawo´ Pi´ lat eun.

² Cawo´ Pi´ lat eun mhaing´ Eun, “Meuh Mi hkun´ haw´ hkam´ ce peue Yu´ da na´ aw?”

Yesu´ Eun top´ a, “Euh, seun´ a ku´ lah´ mi na´ yeut.”

³ Ro´ peue jhawp´ rit keuting na´ ce tang´ a´ mu ri Heun heun´ ceu. ⁴ Kop awn´ na cawo´ Pi´ lat eun lah´ a ri Heun bae ti pok, “Kaw Mi un´ laee top´ keunhaw´ a aw? Keue´ reu´, tang´ ce map´ ri Mi heun´ ceu.”

⁵ Daecti Yesu´ Eun un´ nang top´ a saec´ ti moeng. Cawo´ Pi´ lat eun am´ nyawk´.

Taws´ a´ mu yeum ri Yesu´ Eun

⁶ Yam yeuh pawe vel nya na´ a kue´ ritroe cawo´ veng na´ ploee´ eun peue htawng´ ti peue seun´ ku´ peue kuing´ na´ hk'o´ ce na´. ⁷ A kue´ peue htawng´ muis Barabas´ ti peue. Eun ut´ hk'a´ naee muk ce peue fuin kuing´ na´. Eun toh peue yam fuin ce kuing´ na´.

⁸ Peue cum heun´ na´ ce huk´ hk'o´ cawo´ Pi´ lat eun yeuh a seun´ ku´ tawn yeuh eun na´ ri ce. ⁹ Cawo´ Pi´ lat eun mhaing´ ce, “Sum´ kah pe´ ui´ ploee´ hkun´ haw´ hkam´ ce peue Yu´ da na´ Eun ri pe´ aw?”

¹⁰ Kopti cawo´ Pi´ lat yawng eun ro´ peue jhawp´ rit na´ ap ce Yesu´ Eun ri ti kopti hkoe´ mang´ ce Eun na´.

¹¹ Daecti ro´ peue jhawp´ rit na´ ce cu´ peue cum heun´ na´ ce hk'o´ cawo´ Pi´ lat eun ploee´ Barabas´ eun tang´ Yesu´ Eun.

¹² Cawo´ Pi´ lat eun mhaing´ ce, “A lawn yeuh keutit´ ko´, ku´ lah´ pe´ meuh hkun´ haw´ hkam´ ce peue Yu´ da na´ Eun, pe´ ci´ sum´ kah ui´ yeuh sa´ nhaw´ ri Heun?”

¹³ Ce klawng ri lah´, “Tawk´ Eun yeum pang kleum´ rawng´ tawp´ na´ reu´.”

¹⁴ Cawo´ Pi´ lat eun mhaing´ ce, “A ci´ meuh kop keunhaw´? Eun ci´ yeuh ku´ kleuc´ keunhaw´?” Daecti ce klawng ri lah´ laws´ a bae, “Tawk´ Eun yeum pang kleum´ rawng´ tawp´ na´ reu´.”

¹⁵ Punta cawo´ Pi´ lat kaw eun yeuh ku´ htuk´ hpum´ ce peue cum heun´ na´, eun ploee´ Barabas´ eun ri ce. Hawc´ ko´, eun kah peue ta´ faet´ Yesu´ Eun. Eun ap ce tawk´ Eun pang kleum´ rawng´ tawp´ na´.

Peue suik´ na´ lah´ ce ri pleh keunyas Yesu´ Eun

¹⁶ Peue suik´ na´ ce va Yesu´ Eun heul´ nang kang´ hkung´ ka haw´ eun cawo´ keuting na´. Ce klawng peue suik´ nang tawp na´ ce ing´ cu ri gawm´ euc´. ¹⁷ Ce ti ri tuil´ Eun cuip´ hk'o dal´ yawtmong na´. Ce ku taing´ nhul´ kat´ na´ seun´ cui´ maw hk'il´ na´ ce chuip´ a ri cing´ Eun na´. ¹⁸ Hawc´ ko´, ce klawng ri lah´ a ri Heun, “Hkun´ haw´ hkam´ ce peue

Yu´ da, kah Mi mun´ keuting reu´.”¹⁹ Ce ti ri ta´ faet´ cing´ Eun na´ ri hkawn na´ ti pok hawc´ ti pok. Ce htueung´ Eun ri nyel´ ri, seukluin ri faee´ Eun.²⁰ Yam hawc´ ce lah´ ri pleh keunyas Eun na´, ce hpuic´ ri tec hk'o dal´ yawtmong na´. Ce tang tuil´ Eun cuip´ hk'eung ri na´. Hawc´ ko´, punta kaw ce heul´ tawk´ Eun pang kleum´ rawng´ tawp´ na´, ce va Eun pucti heul´.

Tawk´ Yesu´ Eun pang kleum´ rawng´ tawp´

²¹ A kue´ peue veng Sai´ rin´ muis Si´ mon ku´ meuh kuiing´ ka Alek´ sando´ mae´ Ru´ fas´ na´ caw eun ri ing´ neum yung´ hk'a´ nok veng na´, peue suik´ na´ ce yat ri tec´ eun klawm´ kleum´ rawng´ tawp´ Eun Yesu´ na´.²² Ce va Yesu´ Eun heul´ vang lah´ peue meuh Kola kohta´ na´ (vangdoh´ ka na´ a meuh “Vang doh cing´”).²³ Ce ti ri tuil´ leuum´ pli´ bui hkawo´ ri mae´ mu´ ra na´ ri Heun, daecti Eun hkuin´ nyui a.²⁴ Ce tawk´ Eun pang kleum´ rawng´ tawp´ na´. Hawc´ ko´, a´ n-haw´ kaw htuk´ ri pun hk'eung Eun na´, ce cop puri gvah a.

²⁵ Yam tawk´ ce Eun pang kleum´ rawng´ tawp´ na´, meuh ka peunngup seudim´ nali.²⁶ Ce tem´ tu´ htawm tang´ map´ na´ ri Heun. Ce tem´ a lah´, “Hkun´ haw´ hkam´ ce peue Yu´ da.”²⁷ Ce ku tawk´ peue con´ lal´ peue na´ ka pang kleum´ rawng´ tawp´ mae´ Heun, hk'a´ a´ a´ tawm´ Eun na´ ti peue hk'a´ a´ a´ ve´ Eun na´ ti peue yeut.²⁸ ^{†29} Peue heul´ ing´ na´ ce vai´ vuit´ cing´ ri, ce lah´ leukah´ un´ nawpsang ri Heun. Ce lah´, “Cawo´ ku´ kaw yeuh nya hk'o´ mun´ keuting na´ lu, hawc´ ko´ tang pleng´ a hk'a´ naee loe´ seunyi na´ Mi,³⁰ lih hk'ai´ kleum´ rawng´ tawp´ na´ teum´ kawm htut tu´ Mi na´ meun reu´.”

³¹ Peue jhawp´ rit keuting na´ mae´ peue guil leukah´ ritroe na´ ce ku lah´ ri pleh keunyas Yesu´ Eun yeut. Ce lah´, “Eun teum´ kawm htut peue ri pun, daecti Eun hkuin´ cang teum´ kawm htut meun ti ri pun.³² Kah Hkrit hkun´ haw´ hkam´ ce peue I´ sarela´ na´ Eun keulawn´ lih hk'ai´ kleum´ rawng´ tawp´ na´ maet´ maen´ reu´. E´ ku na´ pun ri nyu pun ri yum´ Eun.” Saec´ meuh ku´ tawk´ ri pang kleum´ rawng´ tawp´ mae´ Heun na´ ka ku lah´ leukah´ un´ nawpsang heun´ ceu na´ ri Heun yeut.

Yesu´ yeum Eun

³³ Tang´ neum peunnyi rot hk'a´ pul loe´ nali na´, bhen´ keute´ na´ a duim´ lawng euc´.

† Nang htawm Seunga´ na´ ngon´, a kue´ nambat aet´ aen´ na. 28 Seun´ lah´ a ri nang htawm Seunga´ na´ a htonnuk neum, “Peue sawn´ Eun meuh peue ut´ hk'a´ nok ka ritroe kuing´.” (I´ saya´ 53:12)

³⁴ Yam rot a hk'a´ pul loe´ nali na´, Yesu´ Eun klawng ri lah´ seng´ laws´, “E´ lo´ i´, E´ lo´ i´ lama sabak´ h-tani´?” Vangdoh´ ka na´ a lah´, “Peucawo´ Ui´, Peucawo´ Ui´, a ci´ meuh kop keunhaw´ Mi vae´ tecla Ui´?”^{††}

³⁵ Yam peue cawng keunam mawn´ na´ ce ngon´ pun ce ri mhawng´ leukah´ awn´ a na´, ce lah´, “Ceng a, klawng Eun E´ li´ ya eun.”

³⁶ Peue ti peue eun hk'uih heul´ ti nya tuetai cup a nang leuum´ pli´ bui na na´ eun pak´ a ri hkawn na´ eun tu-il´ Yesu´ Eun nyui a. Peue awn´ eun lah´, “Pawlaee che-un´ Eun, E´ li´ ya eun ci´ na´ kaw lih ti Eun lih un´ lih, e´ na´ puing ko´ ri nawk a.”

³⁷ Hawc´ Yesu´ klawng Eun ri lah´ seng´ laws´ na´, Eun hpum´ deut.

³⁸ Hpen´ kang´ nang nya hk'o´ mun´ keuting na´ a res meuh lal´ glawk´ neum hk'a´ tuh rot hk'a´ col.³⁹ Yam po´ suik´ cawng nanggal´ Eun Yesu´ na´ pun eun ri mhawng´ seng´ klawng Eun na´, eun lah´, “Peue aen´ meuh Eun taeng Kon´ ai´ Eun Peucawo´ neumneum.”

⁴⁰ Beun´ na´ ce ngon´ ce ut´ vang ca ri seungai na´, ce ko´ ri nawk a. A meuh Mari´ peue veng Magadala´, Salome mae´ Mari´ ma ka Yakop´ aet´ mae´ Yo´ ses ce.⁴¹ Beun´ awn´ ce hot´ Yesu´ Eun, ce teum´ kawm ku´ lo´ Eun nang kuing´ Galilae´ na´. Saec´ meuh beun´ seubu huk´ mae´ Heun nang veng Yeru´ salaem heun´ peue na´, ce ku ut´ teh´ yeut.

Puing´ Yesu´ Eun

⁴² Seunyi awn´ a meuh seunyi rangraen pawe (a meuh seunyi nanggal´ ka seunyi Sin´ na´). Kop awn´ na, yam kaw a hk'aws´ fec´ na´,⁴³ Yo´ saep peue veng Ari´ mahtia eun hpum´ hat´ han´ heul´ hk'o´ ri ti tu´ Eun Yesu´ na´ ri cawo´ Pi´ lat eun. Yo´ saep eun meuh peue muis laws´ ut´ nang muk ce peue taws´ kan´ na´. Eun meuh peue keutui´ hpum´ ko´ kuing´ Eun Peucawo´ na´.⁴⁴ Cawo´ Pi´ lat nguit eun pun ri ri mhawng´ Yesu´ yeum Eun hawc´ na´. Eun kah peue heul´ klawng po´ suik´ na´ eun ing´. Eun mhaing´ eun, “Yeum neum Eun hawc´ aw?”

⁴⁵ Yam pun eun ri mhawng´ a ri po´ suik´ eun yeuh keutit´ na´, eun tuil´ tu´ Eun Yesu´ na´ ri Yo´ saep eun.

⁴⁶ Kop awn´ na, Yo´ saep eun ti tu´ Eun Yesu´ na´ lih. Eun bawl´ tu´ Eun na´ ri hpen´ linin leuvaee ri ri uin´ na´. Eun seue´ Eun nang leuang´ jhec´ ri meuh keutui´ leumuic´ na´. Hawc´ ko´, eun cut´ ri dho´ keutui´ na´ ri meul´ seumu.⁴⁷ Mari´ peue veng Magadala´ mae´ Mari´ ma eun Yo´ ses ka ku nyu vang uin´ ce tu´ Eun na´.

†† Suk´ seun´ 22:1

Yesu´ tang kuh´ im´ Eun

16 Yam seunyi Sin´ na´ hawc´ ka na´, Mari´ peue veng Magadala´, Mari´ ma eun Yakop´ mae´ Salome na´ ce heul´ leuvaee lamawn hom´ kaw ri lhuik´ tu´ Eun Yesu´ na´. ²Peunngup cawo ka seunyi keuhti ka vung yam seunyi lih ka na´, ce heul´ ri keutui´ leumuic na´. ³Ce mhaing´ puri, “A´nhaw´ ci´ na´ teum´ kawm e´ cut´ ri tec meul´ seumu dho´ ka keutui´ leumuic na´?”

⁴Daecti yam seucon´ ce a na´, ce nyu meul´ seumu keuting nyawk´ awn´ cut´ a ri tec ri hawc´. ⁵Yam ing´ lec ce hk'a´ naee ka keutui´ leumuic na´, ce nyu nang nhum´ cuip´ hk'o dal´ paing ti peue tit´ mok´ eun hk'a´ a´ tawm´ na´. Ce tok´ seupa ruing nyawk´.

⁶Eun lah´, “Pawlaee tok´ seupa ruing. Heul´ sok pe´ Yesu´ peue veng Nasaraet´ taw´ peue yeum pang kleum´ rawng´ tawp´ na´ Eun. Kuh´ im´ Eun hawc´, hpaw Eun ca´ laee ut´ maen´. Ing´ nawk vang uin´ peue Eun na´ reu´. ⁷Pe´ na´ ing´ lah´ a ri tapae´ Eun na´ ce mae´ Petru´ eun yeuh keutit´, ‘Buih heul´ Eun nang ku-ing´ Galilae´ nanggal´ pe´. Pe´ kaw nyu Eun teh´ seun´ lah´ Eun a ri pe´ hawc´ na´.’”

⁸Beun´ awn´ ce tok´ seupa ruing lhat´ keuyuing´ pucti lih hk'ai´ keutui´ leumuic na´ vaeveae. Kopti lhat´ nyawk´ ce na´, ce un´ lah´ keunhaw´ ri a´nhaw´.

Yesu´ tuil´ Eun Mari´ peue veng Magadala´ ka nyu ri

⁹Peunngup cawo ka seunyi keuhti ka vung yam Yesu´ kuh´ im´ Eun na´, Eun tuil´ Mari´ peue veng Magadala´ na´ ka nyu ri nanggal´. Beun´ awn´ ka meuh ku´ Yesu´ tawn ra Eun ri tec seuca´ a´ res tu´ lih hk'ai´ ka na´.

¹⁰Mari´ ka heul´ ris peue tawn ut´ mae´ Yesu´ Eun na´ ce mhawng´ a. Ce buih hpum´ sui´ hpum´ tuk yam.

¹¹Yam mhawng´ ce lawng Yesu´ im´ Eun na´ mae´ lawng Mari´ pun ka ri nyu Eun na´, ce hkuin´ yum´ a.

Yesu´ tuil´ Eun tapae´ lal´ peue ka nyu ri

¹²Hawc´ awn´ na, Yesu´ Eun tuil´ tapae´ lal´ peue ri na´ ka nyu ruprang seubu ri na´ yam buih long ka hk'a´ heul´ hk'a´ nok ka veng na´. ¹³Ka tang ing´ ris peue seubu na´ ce mhawng´ a, daecti ce ku un´ yum´ a yeut.

Yesu´ tuil´ Eun tapae´ ri na´ ce nyu ri

¹⁴Hawc´ awn´ na, Yesu´ Eun tuil´ tapae´ kul´ ti peue ri na´ ce nyu tu´ ri na´ yam buih som´ ce na´. Eun is´ ce kopti un´ kue´ ce hk'a´ yum´, mae´ kopti lheu´ ce leukah´ ce un´ yum´ ku´ lah´ ce peue pun ri nyu Eun hawc´ tang kuh´ im´ Eun na´.

¹⁵Eun lah´ a ri ce, “Heul´ pang bhen´ keute´ na´ ku duih´ ka, lah´ peue gawm´ euc´ peue mhawng´ leukah´ mun´ ren´ kawm na´ reu´. ¹⁶A´nhaw´ lawn yum´, rap ri ti hk'a´ cum´ na´ ko´, eun kaw pun hk'a´ htut lawtpon na´. Daecti pun ce peue un´ yum´ na´, ce kaw pun ri hkam´ hk'a´ taws´ a´ mu na´. ¹⁷Pun ce peue yum´ na´ a kaw kue´ het´ keuting yeuhki´, ce na´ cu muis Ui´ na´ ce na´ ra ri tec seuca´, ce na´ lah´ leukah´ hk'u´ heun´ ceu, ¹⁸ce na´ mheut´ seueueng´ ri ti´ ri, ce saec´ na´ hk'a´ yun´, ce hkuin´ kaw yeuh keunhaw´ ri ka, ce na´ tang´ ti´ ri hk'a´ pang peue peuyhat, peuyhat ce peue awn´ a ku na´ cuin´.”

Yesu´ huk´ Eun kuing´ pang mao´

¹⁹Yam Cawo´ Yesu´ hawc´ lah´ Eun a ri ce na´, Peucawo´ Eun yuk Eun huk´ nang kuing´ pang mao´. Eun mok´ hk'a´ a´ tawm´ Eun Peucawo´ na´. ²⁰Hawc´ ko´, tapae´ na´ ce pucti heul´ sangsawn´ leukah´ mun´ ren´ kawm na´ ku duih´ hk'awp´. Cawo´ Peucawo´ Eun yeuh kan´ mae´ ce. Eun htawhkam leukah´ ri na´ ri yeuh Eun het´ keuting pucti lih na´. †

† Nang htawm Seunga´ na´ ngon´, a hkuin´ kue´ nambat aet´ 16:9-20 aen´ ce.

Lu'ka

Leukah' la ri tem' ri tuil' ri Htaw' hpi' lu eun

1 Htaw' hpi' lu, peue heun' peue na' ce seun' pen' yeuh cang yeuh ce a, ce tem' lawng ku' kue' ku' meuh hk'a' naee e' na' ce hawc'.² Ce tem' a seun' peue guil leukah' mun' ren' kawn na' lah' ce e' mhawng' lawng ku' pun ce ri nyu a tang' neum yamla ka ri na' hawc'.³ Kopti saec' ui' ri, ui' ku sawn' ri nawk caet ri nawk ku' kue' ku' meuh tang' neum yamla ka ri na' ce hawc'. Punta kaw a kue' mun' pun mi, ui' kaw htuk' ri lah' a meuh htan ri ri mi.⁴ Tem' ui' a yeuhki' na' ko', meuh a punta kaw mi yawng lawng ku' lah' peue ri mi aen' cawp' nyawk' ka meulamlam ri na'.

Yo' han cawo' tuil' hk'a' cum' kaw eun keut'

⁵ Yam hkun' haw' hkam' Herot' u' peung eun kuing' Yu' da na', a kue' peue jhawp' rit ti peue. Eun muis Yahkari'. Eun ut' hk'a' naee muk eun peue jhawp' rit muis Abi' ya na'. Beun' eun na' eun meuh ceucat Aron. Eun muis E'li' sabae'.⁶ Ka meuh peue leupaws seumeu' nanggal' Eun Peucawo' gawm' lal' peue ri. Ka hot' leukah' ritroe Eun Peucawo' na' gawm' euc' ka. Ka yeuh a un' laee kue' vang cut vang yawm'.⁷ Daecti ka un' kue' kon', kopti E'li' sabae' meuh eun peue tan' na'. Ka ku kawt gawm' lal' peue ri hawc'.

⁸ A rot yam muk Yahkari' na' yeuh ce kan' na', eun yeuh kan' ka peue jhawp' rit ri nanggal' Eun Peucawo' na',⁹ seun' peue jhawp' rit na' kue' ce rit ka, ce pawk' muis puri. A caw Yahkari' eun. Eun ing' lec ri dum ku' tu' hom' nang nya hk'o' mun' keuting Eun Peucawo' na'.¹⁰ Yam buih dum eun ri tan ku' tu' hom' na', peue heun' na' ce hk'o' mun' hk'a' nok.

¹¹ Yam awn' na, in' hpom Eun Peucawo' eun pucti lih cawng hk'a' a' tawm' ka vang dum ri tan ku' tu' hom' na'.¹² Yam Yahkari' pun eun ri nyu eun na', eun tok' seu- pa lhat'.¹³ Daecti in' hpom na' eun lah' a ri heun, "Yahkari', pawlaee lhat'. Peucawo' mhawng' eun seng' hk'o' mun' mi na' hawc'. Beun' mi E'li' sabae' kaw eun kue' kon' me pun mi ti peue. Mi kaw pun ri ghuk' kon' me awn' eun muis Yo' han.¹⁴ Kaw mi pun ku' ren' kawn heun' nyawk'. Kopti kon' nyom awn' keut'

eun na', peue heun' ce kaw pun hk'a' ren' kawn.¹⁵ Kopti kaw eun meuh peue lhung' peue keuting nanggal' Eun Peucawo' na', eun hkuin' kaw kah ri nyui leuum' pli' bui mae' ku' cang yuic' na'. Tang' neum ing' tang' eun bat' ti' san' hti ri na', eun kaw pun Cit' seunga' chak' na' htonnuk.

¹⁶ Eun kaw va peue I' sarela' na' ce tang hpawt' ri ing' ri Cawo' Peucawo' ri na' Eun heun' heun'.¹⁷ Hk'a' naee vang cu eun cit' mae' ti' ca seun' E'li' ya eun na', eun kaw meuh cawo' heul' nanggal' Eun Peucawo'. Punta kaw eun mhe' rangraen ri uin' ce meuh peue ceu pun Cawo' Eun na', eun kaw mhe' kuiing' kon' na' ka htuk' lung puri bae, mae' peue lheu' leukah' na' kaw ce pun cu' yi ce peue leupaws seumeu' na'."†

¹⁸ Yam awn' na, Yahkari' eun lah' a ri in' hpom na' eun, "Ui' ci' kaw cang yawng a yeuh sa' nhaw'? Kopti kawt ui' hawc'. Saec' beun' ui' na' eun ku a' yu cae' hawc'."

¹⁹ In' hpom na' eun tang top' a, "Meuh ui' Gabela', ui' cawng nanggal' Eun Peucawo'. Eun ploe' ui' lih tu- il' leukah' ren' kawn aen' na ri mi.²⁰ Ku' lah' ui' na' a lawn rot yam ri ko', a kaw htonnuk. Kopti un' yum' mi a na', lawng aen' na rot ti seunyi na' a keut' kue', mi kaw dak' kawl', un' cang leukah'."

²¹ Kopti Yahkari' ut' eun nang nya hk'o' mun' keuting na' ling' na', peue ko' eun na' ce kvang' mawo.²² Na' eun pucti lih, eun un' laee cang leukah' mae' ce. Ce yawng kue' eun ku' nyu nang nya hk'o' mun' keuting na' ti ri ceu. Eun un' laee cang leukah'. Eun kvae' ce nawk ti' ri.

²³ Yam seunyi yam yeuh eun kan' na' hawc' ka na', eun tang ing' ti nya.²⁴ Hawc' awn' na, beun' eun E'li' sabae' na' eun nyhel'. Eun lhit' ri ti nya rot hpawn' chi'.²⁵ Eun lah', "Peucawo' yeuh Eun pun ui' yeuhki' hawc'. Seunyi maet' maen' aen' na, tuil' Eun ui' nyu hk'a' leumeus' keus ri na' hawc'. Eun ti ri tec ku' cae' mae' peue ui' na'."

† Malahki' 4:5-6

Yesu' kaw Eun keut'

²⁶ Yam rot a les chi' na', Peucawo' Eun cus' in 'hpom muis Gabela' na' eun lih nang kuing' Galilae' veng Nasaraet' na' ²⁷ri beun' plot' lon muis Mari' na' eun. Eun yeuh kati ri kaw ti Yo' saep ku' meuh ceucat hkun' haw' hkam' Davit' na' eun hawc'. ²⁸ Yam in 'hpom na' rot eun ri heun na', Eun lah', "Beun' hit' hpum' Peucawo' na' mi, mun' keuting reu'. Cawo' Peucawo' ut' Eun mae' mi."

²⁹ Kopti meuh a leukah' eun in 'hpom awn' na, Mari' eun kangkae nyawk'. Eun kuit ri mhawng' a nang hpum' ri, "Leukah' nap aen' a ci' sum' lah' keunhaw'?" ³⁰ In 'hpom na' eun tang lah' a ri heun, "Mari', pawlae lhat'. Kopti hit' mi hpum' Eun Peucawo' na', ³¹ kaw mi nyhel', mi kaw keut' kon' me. Mi kaw kah ri ghuk' Eun muis Yesu'. ³² Kon' me awn' kaw Eun meuh Peue keuting. Peue kaw klawng Eun meuh Kon' me Eun Peucawo' lhung' hk'ai' ku ceu gawm' euc'. Cawo' Peucawo' Eun kaw tuil' tenceo' mok' kuing' eun Davit' na' ri kon' me awn' Eun. ³³ Eun kaw u' peung ceucat eun Yakop' na' ce cot' cu ri. Kuing' eun na' a kaw un' lae kue' vang sut'."

³⁴ Mari' eun mhaing' in 'hpom na' eun, "Kopti kaw n' plot' lon ui', lawng aen' a ci' kaw cang meuh yeuh sa' nhaw'?"

³⁵ In 'hpom na' eun tang top' a ri heun, "Cit' seunga' chak' Eun Peucawo' na' kaw a lih hk'a' pang mi. Ti' ca Eun Cawo' lhung' hk'ai' peue na' a kaw kuipkang' mi. Kop awn' na, kon' me seunga' chak' kaw keut' awn' Eun, peue kaw klawng Eun meuh Kon' ai' Eun Peucawo'. ³⁶ Saec' meuh ec' awng' mi E'li' sabae' eun, meuh eun peue tan', eun ku kawt. Daecti eun nyhel' a pun les chi' hawc'. ³⁷ Kopti ku' Peucawo' un' cang yeuh Eun na' a un' kue' saec' ti ceu."

³⁸ Mari' eun tang lah', "Meuh ui' mhai' Eun Peucawo'. Seun' ku' lah' mi na', kah a meuh hk'a' naee ui' reu'." Hawc' ko', in 'hpom na' eun pucti heul'.

Mari' heul' glue eun ri E'li' sabae' eun

³⁹ Yam awn' na, Mari' eun kuh' heul' vaeveae ri veng nang gong nang bue' kue' nang kuing' Yu' dah na'.

⁴⁰ Eun lec nang nya eun Yahkari' na'. Eun lah' leukah' hk'eup' puri na' ri E'li' sabae' eun. ⁴¹ Yam E'li' sabae' pun eun ri mhawng' leukah' lah' eun Mari' na', kon' nyom ut' nang keuteul eun na' eun keulawn' jhuis' jhas' ri. Cit' seunga' chak' na' a htonnuk hk'a' naee eun E'li' sabae' na'. ⁴² Eun klawng ri lah' seng'

laws', "Pun mi mun' heun' hk'ai' beun' seubu na' ce. Saec' meuh kon' kaw mi keut' na' Eun ku pun mun' heun' yeut. ⁴³ A ci' meuh kop keunhaw', ui' saee' pun mun' ? Kopti ma Eun Cawo' ui' na' ing' eun ri ui' na'. ⁴⁴ Yam mhawng' ui' leukah' lah' mi ri ui' na', kon' nyom ut' nang keuteul ui' na' eun keulawn' ren' kawn jhuis' jhas' ri. ⁴⁵ Beun' yum' leukah' lah' Eun Cawo' a kaw htonnuk ri ti na' mi, pun mi mun'."

Leukah' cai suk' seun' Mari'

⁴⁶ Mari' eun lah',

"Hpum' ui' na' suk' seun' a Peucawo' Eun.

⁴⁷ Ui' ku ren' kawn nyawk' hk'a' naee Cawo' htut ui' Peucawo' Eun,

⁴⁸ kopti keue' nyu Eun ri mhai' tem nyawk' ri na' Eun hawc' na'.

Tang' neum maet' maen' na',

peue ti cu hawc' ti cu ce kaw lah' ui' meuh beun' mun' keuting.

⁴⁹ Kopti Cawo' ti' ca keuting yeuh Eun ku' keuting pun ui' hawc'.

Muis Eun na' a seunga' chak'.

⁵⁰ Hk'a' tukyak Eun na' a kaw kue' hk'a' pang ce peue hkopyawm' ri Heun na' ce ti cu hawc' ti cu.

⁵¹ Yeuh Eun ku' ti' ca keuting na' ri ti' ri hawc'.

Eun yeuh peue hpum' lhung' hpum' keuting hk'a' naee kamkuit ri na' ce taic' jah hk'ai' puri hawc'.

⁵² Eun ruic' cawo' na' ce hk'uic' hk'ai' ten ri, daecti Eun yuk peue tem na' ce lhung'.

⁵³ Eun tuil' peue ngeup' ri na' ce hk'a' ku' hk'a' chak' na',

daecti Eun kah peue meuneum na' ce heul' jawngkui' tu' seurak' ri.

⁵⁴ Eun teum' kawm mhai' ri peue I' sarela' na' ce.

Eun keutui' hpum' hk'a' tukyak Eun

⁵⁵ ri Abraham eun mae' kon' hk'i eun na' ce cot' cu ri seun' ku' lah' Eun ri a' ta' a' ya e' na' ce na'."

⁵⁶ Hawc' Mari' ut' eun mae' E'li' sabae' eun hk'ao loe' chi' na', eun keutah ing' ti nya ri.

Yo' han cawo' tuil' hk'a' cum' keut' eun

⁵⁷ A rot yam E'li' sabae' kue' eun kon' na', eun kue' kon' me. ⁵⁸ Yam ec' awng' caonao' ka na' mhawng' ce lawng Cawo' yeuh Eun hk'a' tukyak ri ka na', ce ku ren' kawn mae' ka yeut.

⁵⁹ Yam rot a seudi' seunyi na', ce ing' tuil' kon' nyom na' eun ton' duing' hak' ri. Yam kaw ce ghuk' eun muis

Yahkari ' seun ' kuiing ' ri eun na ' ,⁶⁰ ma eun ka lah ' , "Ui-
h ' , htuk ' ri ghuk ' eun muis Yo ' han."

⁶¹ Ce lah ' a ri ka , "Ec ' awng ' pa ' na ' ce hkuin ' muis
yeuhko ' saec ' ti peue."

⁶² Kop awn ' na , ce kvaee ' ti ' ri mhaing ' kuiing ' eun
na ' eun , "Mi ci ' sum ' ghuk ' kon ' nyom na ' eun muis
keunhaw ' ?" ⁶³ Eun mhaing ' vang kaw tem ' tu ' ri ce . Eun
tem ' a , "Kaw eun muis Yo ' han." Yam nyu ce a na ' , ce
am ' gawm ' euc ' ri . ⁶⁴ Yam awn ' na , Yahkari ' eun keu-
lawn ' cang leukah ' . Eun lah ' leukah ' suk ' seun ' Peuca-
wo ' Eun . ⁶⁵ Peue ut ' keunam mawn ' na ' ce lhat ' . Lawng
aen ' a seutuin seutan eo ' nang gong nang bue ' ka ku-
ing ' Yu ' da na ' ku duih ' ka . ⁶⁶ Peue pun ri mhawng ' a
na ' ce kuit a nang hpum ' ri ku peue ri , "Hk'a ' nha ' eun
kon ' nyom aen ' na , eun ci ' na ' kaw meuh peue yeuh
sa ' nhaw ' ?" Kopti ti ' ca Eun Peucawo ' na ' kue ' a mae ' e
heun .

Leukah ' suk ' seun ' Yahkari '

⁶⁷ Cit ' seunga ' chak ' na ' htonnuk a ri Yahkari ' ku '
meuh kuiing ' eun Yo ' han na ' eun . Eun lah ' leukah ' lih
neum Peucawo ' Eun ,

⁶⁸ "Suk ' seun ' Peucawo ' ce peue I ' sarela ' na ' Eun
reu ' ,

kopti ing ' teum ' kawm htut Eun peue ceu ri na ' ce
lawtpon hawc ' .

⁶⁹ Tuil ' Eun Cawo ' teum ' kawm htut ti ' ca keuting pun
e ' keut ' kue '

hk'a ' naee nya eun mhai ' Mi Davit ' na ' hawc ' .

⁷⁰ (A seun ' ku ' lah ' Eun Peucawo ' ri peue suip leukah '
seunga ' chak ' Eun tang ' neum leumah ' na ' ce .)

⁷¹ Eun teum ' kawm htut e ' hk'ai ' dak ti ' ce ransu e ' na '
maee ' ku ' nyu ce e ' pereng ri na ' ce .

⁷² A meuh yeuh Eun hk'a ' tukyak Eun ri a ' ta ' a ' ya e '
na ' ce pucti lih glih ' gleueng ' ,

maee ' kuit rot ri kati seunga ' chak ' Eun Peucawo '
na ' .

⁷³ Kati sat ' ca ' awn ' na ko ' , a meuh ku ' tang ' Eun ri
uin ' ri a ' ta ' e ' Abraham eun na ' .

⁷⁴ Punta kaw e ' yeuh kan ' Eun na ' , e ' na ' un ' lhat ' .

Eun teum ' kawm htut e ' hk'ai ' dak ti ' ce ransu e ' na '
ce .

⁷⁵ Rot ti a ' yu e ' sut ' ka na ' , e ' kaw meuh peue leupaws
seumeu ' seunga ' chak ' nanggal ' Eun Peucawo ' .

⁷⁶ Kon ' ui ' , kaw peue klawng mi meuh peue suip
leukah ' Eun Cawo ' lhung ' hk'ai ' peue na ' .

Kopti kaw mi heul ' nanggal ' Eun Peucawo ' , mi kaw
bai mhe ' hk'a ' Eun .

⁷⁷ Punta peue ceu Eun na ' kaw ce yawng lawng kopti
ploe ' Eun map ' ce na ' ,

ce kawm ' tawl ' pun hk'a ' htut lawtpon na ' .

⁷⁸ Kopti meuh a hk'a ' tukyak onawn ' Eun Peucawo ' e '
na ' ,

ku ' ceng ' kuing ' pang mao ' na ' a kaw lih ceng '
hk'a ' pang e ' .

⁷⁹ A kaw til ' ku ' ceng ' ri peue ut ' nang duim ' lawng ,
maee ' peue ut ' hk'a ' ruim rum ka a ' lawng hk'a '
yeum na ' ce .

A kaw teuk ' va e ' heul ' hk'a ' vang kuit nyawk ' kuit
sam ' ran na ' ."

⁸⁰ Kon ' nyom na ' eun gawm ut ' gawm keuting . Civit
eun na ' a ku gawm ut ' gawm kue ' kaw ' reng . Rot ti se-
unyi puc eun ri nanggal ' ce peue I ' sarela ' na ' , eun ut '
vang hk'oh ' hk'oeng ' na ' palkoe .

Yesu ' keut ' Eun

2 Hk'a ' naee meuyam awn ' na , cawo ' keuting Kae ' sa
Aw ' gas ' tas ' eun tuil ' leukah ' ri vang peue Ro ' ma
na ' u ' peung ce gawm ' euc ' ka na ' , ce kah ri ti muis
ca ' lang ' ri .² Ti muis ca ' lang ' pok aen ' na ko ' , a meuh
pok nanggal ' yam cawo ' Ku ' rini ' meuh eun cawo '
nang kuing ' Su ' ri ' na ' .³ Kop awn ' na , peue
gawm ' euc ' ce sawng ' sawng ' heul ' seue ' muis ri nang
veng a ' nhaw ' veng nang awn ' .

⁴ Saec ' meuh Yo ' saep eun kopti meuh eun ceucat eun
Davit ' na ' , eun pucti neum kuing ' Galilae ' veng
Nasaraet ' . Eun huk ' nang kuing ' Yu ' da veng eun Davit '
muis veng Baelaehaem na ' .⁵ Ku ' yeuh eun kati ri kaw ti
Mari ' eun na ' ka va puri heul ' seue ' muis ri tiduih ' .
Mari ' eun buih nyhel ' .⁶ Na ' ka ut ' nang veng Baelae-
haem na ' , a rot yam Mari ' kue ' eun kon ' .⁷ Eun la ri
kue ' Kon ' ai ' . Ka bawl ' Eun ri om ' , hawc ' ka uin ' Eun
it ' nang dong ' som ' ka a ' moe na ' . Kopti nya it ' chec '
na ' un ' laee kue ' a vang ut ' pun ka na ' .

In ' hpom na ' lih ce ri peue go ' kon ' yung ' na ' ce

⁸ Keunam vang un ' de un ' seungai ka veng na ' , peue
go ' kon ' yung ' na ' ce ko ' muk kon ' yung ' ri na ' nang
mal ' peunpul .⁹ Yam awn ' na , in ' hpom Eun Cawo ' Peu-
cawo ' eun pucti lih keunam ce na ' . Ku ' ceng ' munh-
pung ' Eun Cawo ' na ' a ceng ' til ' rop ce . Ce lhat '
nyawk ' .¹⁰ In ' hpom na ' eun lah ' a ri ce , "Pawlaee lhat ' .
Lih lah ' ui ' leukah ' ren ' kawm keuting ri pe ' . A meuh
ku ' ren ' kawm keuting pun peue gawm ' euc ' .¹¹ Seun-
yaen ' , Cawo ' teum ' kawm htut pe ' lawtpon na ' keut '
Eun pun pe ' nang veng eun Davit ' na ' hawc ' . Meuh Eun

Cawo' Hkrit. ¹²A kaw kue' het' pun pe' yeuhki', pe' kaw pun ri nyu kon' nyom na' bawl' Eun ri om'. Eun it' nang dong' som' ka a' moe na'."

¹³In 'hpom muk heun' na' ce keulawn' pucti mae' in 'hpom awn' eun. Ce suk' seun' Peucawo' Eun. Ce lah' a,

¹⁴"Kah Peucawo' ut' lhung' hk'ai' peue na' Eun kue' munhpung' reu'.

Saec' pang bhen' keute' na', kah peue htuk' hpum' Eun na' ce kue' hk'a' kuit nyawk' kuit sam' ran cumyen' reu'."

¹⁵Hawc' in 'hpom na' huk' ce kuing' pang mao' na', peue go' kon' yung' na' ce lah' a ri puri, "E' lak' heul' nom' nawk' lawng ku' meuh ku' Peucawo' lah' Eun ri e' na' nang veng Baelaehaem na' pawh."

¹⁶Hawc' ko', ce heul' vaevae. Ce heul' nyu Mari', Yo' saep ka mae' kon' nyom na' it' eun nang dong' som' ka a' moe na'. ¹⁷Na' ce nyu Eun hawc', ce tang lah' ris peue ku peue ce mhawng' lawng Eun na' seun' ku' in 'hpom na' lah' ce na'. ¹⁸Peue pun ri mhawng' ku' lah' ce peue go' kon' yung' na' ce am' gawm' euc' ri. ¹⁹Mari' ka pawn lawng aen' ce gawm' euc'. Ka kuit ti mhawng' a nang hpum' ri meulamlam ri. ²⁰Peue go' kon' yung' na' ce tang ing' suk' seun' Peucawo' Eun, kopti ku' pun ce ri mhawng' pun ce ri nyu na' ce gawm' euc' ka, meuh a seun' ku' in 'hpom na' lah' ce ri ce na'.

Ap Yesu' Eun nang nya hk'o' mun' keuting na'

²¹Yam kon' nyom na' pun Eun seudi' seunyi na', a rot yam ton' ce duing' hak' Eun na', ce ghuk' Eun muis Yesu'. Muis aen' na ko', in 'hpom eun ghuk' a tang' neum ma Eun un' nang nyhel' ka Eun nang keuteul ri na'.

²²Na' a rot yam Mari' kaw ka yeuh hk'a' seunga' chak' seun' leukah' ritroe tuil' eun Mo'se na', Mari' mae' Yo' saep ka va ri huk' ap kon' nyom na' Eun ri Peucawo' Eun nang veng Yeru' salaem ^{†23} seun' leukah' ritroe Eun Peucawo' na' tem' a ri yeuhki' na', "Ku' meuh kon' ai' ku peue na' ce, pun ri ap ce ri Peucawo' Eun" ^{††24} Ka ku dum ri tan ku' tan seun' leukah' ritroe Eun Peucawo' na' tem' a ri yeuhki' na', "Gui' ti ku, un' meuh ko', a' tuic seuyang lal' tu'." †

²⁵Yam awn' na, a kue' peue ut' nang veng Yeru' salaem ti peue. Eun muis Si' me' on. Eun meuh peue leupaws seumeu' yumyam' Peucawo' Eun. Eun buih ko' yam Peucawo' kaw Eun ti peue I' sarela' na' ce pon hk'a' tukhka na'. Cit' seunga' chak' na' a ut' mae'

heun. ²⁶Cit' seunga' chak' na' a yeuh eun yawng, eun lawn un' nang pun ri nyu Hkrit ku' tuil' Eun Cawo' Peucawo' na' Eun ko', eun kaw un' nang yeum. ²⁷Eun lec nang kang' hkung' ka nya hk'o' mun' keuting na', kopti Cit' seunga' na' va ka eun na'. Punta makuiing' Eun Yesu' kaw ka yeuh a ri kon' nyom na' Eun seun' kue' a leukah' ritroe ka na', ka va kon' nyom aet' Yesu' Eun lec nang kang' hkung' ka nya hk'o' mun' keuting na'. ²⁸Si' me' on eun cem ri neng' kon' nyom aet' na' Eun. Hawc' ko', eun suk' seun' Peucawo' Eun. Eun lah',

²⁹"Cawo', seun' leukah' kati mi na' kue' ka, maet' maen' kah mhai' Mi na' eun ing' mae' kuit nyawk' kuit sam' ran cumyen' ri reu'.

³⁰Kopti nyu ui' hk'a' htut lawtpon Mi na' ri ngai' ri hawc'.

³¹Hk'a' htut aen' na rangraen Mi a nanggal' peue ku ceu hawc'.

³²Meuh a ku' ceng' til' peue un' meuh peue ceu Yu' da na' ce gawm' euc'.

A meuh munhpung' pun peue ceu Mi I' sarela' na' ce."

³³Makuiing' na' ka am' ri lah' eun lawng Eun kon' nyom na'. ³⁴Hawc' ko', Si' me' on eun nap mun' ri ka. Eun lah' a ri ma Eun Mari' ka, "Kopti kon' nyom aen' Eun, peue I' sarela' na' ce kaw htang' meul heun' heun', ce kaw tang kuh' heun' heun'. Eun kaw meuh het' kaw peue ham' tap ri. ³⁵Ku' kuit peue nang hpum' ri na', Eun kaw hue' a pucti lih glih' gleueng'. Pa' ku na' pun ri kuit nyhap' nyawk' seun' seugon' sawt' a hpum' pa' na' roc' ko'."

³⁶A kue' beun' suip leukah' Eun Peucawo' muis Ana' ti peue. Ka meuh kon' beun' eun Hpanoe. Ka meuh peue ceu Acheu. Ka ku kawt nyawk' hawc'. Hawc' ti ka ri is' me na', ka gup pun ri ut' mae' heun a' res neum. ³⁷Ka meuh a' ya seunao rot ti a' yu ri pun a seudi' kul' pun' neum. Ka hkuin' duing rang' nya hk'o' mun' keuting na'. Ka eut' ku' hk'a' ri, peunsum' peunnyi ka hk'o' mun' fae' Peucawo' Eun. ³⁸Yam awn' na, ka ing' ri Mari' mae' Yo' saep ka. Hawc' ka mun' keuting ri Peucawo' Eun na', ka lah' peue mhawng' lawng Eun kon' nyom na' ri peue keutui' hpum' ko' hk'a' htut ri veng Yeru' salaem na' ku peue ce.

Keutah ing' nang veng Nasaraet'

³⁹Yam Mari' mae' Yo' saep yeuh ka seun' kue' a leukah' ritroe Eun Peucawo' gawm' euc' ka hawc' na', ka keutah ing' vang ut' ti nang kuing' Galilae' veng Nasaraet' na'. ⁴⁰Kon' nyom awn' Eun baet ti keuting.

† Fae' 12:2-8 †† Pucti heul' 13:2, 12 † Fae' 12:8

Kawl' reng Eun a ku keuting yeut. Eun kue' cu' yi hton-nuk. Mun' Eun Peucawo' na' a kue' hk'a' pang Eun.

Kon' nyom aet' Yesu' kawn' ut' Eun nang nya hk'o' mun' keuting

⁴¹Makuiing' Yesu' ka huk' nang veng Yeru' salaem yam pawe vel nya na' ku neum. ⁴²Yam Yesu' a' yu Eun pun a kul' leual' neum na', ce huk' nang veng Yeru' salaem na' seun' tawn huk' ka ku neum na'. ⁴³Yam seunyi pawe na' hawc' ka na', ce keutah ing'. Kon' nyom aet' Yesu' Eun kawn' ut' nang veng Yeru' salaem na'. Daecti makuiing' Eun ka hkuin' yawng a. ⁴⁴Makuiing' Eun ka hteum' Eun keutah ing' mae' peue heun' na' ce ti ri cum. Na' ka ing' ti seunyi hk'a', ka tang' eo' ri sok Eun mae' ec' awng' a' mawo Eun na' ce. ⁴⁵Kopti un' nyu ka Eun na', ka tang huk' sok Eun nang veng Yeru' salaem na' bae. ⁴⁶Yam sok ka Eun rot loe' seunyi na', ka hk'eup' Eun nang kang' hkung' ka nya hk'o' mun' keuting na'. Eun mok' nang seuna' ce seura' na'. Eun leuceng ku' lah' ce na'. Eun ku mhaing' ce. ⁴⁷Peue pun ri mhawng' ku' lah' Eun na' ku peue, ce am' ri top' Eun na mae' heng' yawng ri. ⁴⁸Yam makuiing' Eun pun ka ri nyu Eun na', ka am' nyawk'. Ma Eun ka lah' a ri Heun, "A' ai', Mi ci' yeuh keunhaw', Mi vae' yeuhki' ri ya? Kuing' Mi eo' sok ya Mi mae' kuit nyhap' kuit yak ri."

⁴⁹Eun top' a, "A ci' meuh kop keunhaw', pa' vae' eo' sok Ui' ? Un' yawng pa' kaw Ui' kah ri ut' nang nya Eun Kuing' Ui' na' aw?" ⁵⁰Daecti makuiing' Eun ka un' doh' ri ku' lah' Eun na'.

⁵¹Hawc' ko', Yesu' Eun keutah ing' mae' ka nang veng Nasaraet'. Eun leuceng leukah' ka makuiing' ri meulamlam ri. Ma Eun ka pawn ri uin' lawng aen' na nang hpum' ri gawm' euc' ka. ⁵²Peuyha' cu' yi Eun mae' tu' Eun Yesu' na' keuting ka na'. Eun htuk' hpum' Eun Peucawo', Eun ku htuk' hpum' peue yeut.

Yo' han cawo' tuil' hk'a' cum' rangraen eun hk'a'

3 Yam cawo' keuting Kae' sa Tiberi' as' u' peung eun kuing' na' gawm' euc' ka a pun kul' hpawn' neum na', Pontias' Pi' lat eun meuh kon' eun cawo' nang kuing' Yu' da na', Herot' eun meuh kon' eun cawo' nang kuing' Galilae' na, Hpi' lip' awng' eun Herot' na' eun meuh kon' eun cawo' nang kuing' I' tu' rael' mae' kuing' Trahkaw' nitis' na', Lisantias' eun meuh kon' eun cawo' nang kuing' Abi' le na', ²Anas' eun mae' Kayafas' ka meuh peue jhawp' rit keuting. Yam awn' na, Peucawo' Eun tuil' leukah' ri na' ri Yo' han ku' meuh

kon' eun Yahkari' na' ri vang hk'oh' hk'oeng' na'. ³Eun heul' nang kuing' ut' hot' keunam ka klong' Yaw' dan na' ku duih' ka. Eun pao' ri lah', "Taws' hpum' fuin map' ri rap ri ti hk'a' cum' na' reu'. Peucawo' kaw Eun plo' map' pe' na'." ⁴Seun' nang htawm eun I' saya' ku' meuh peue suip leukah' Eun Peucawo' na' tem' a ri na',

"Peue ti peue pao' eun nang vang hk'oh' hk'oeng' na'. Eun lah', 'Mhe' hk'a' pun Peucawo' Eun reu'.

Pleng' hk'a' Eun na' seumeu' reu'.

⁵Kah hk'ok na' nuk ku duih' ka,

gong na' mae' leuang' na' kah a tem ku meul' ka, hk'a' vok' na' lat a seumeu',

tang mhe' hk'a' lhung' tem na' seudap' raphpeng reu'.

⁶Peue gawm' euc' ce kaw pun ri nyu hk'a' htut lawtpon Eun Peucawo' na'.'†

⁷Yo' han eun lah' a ri peue cum heun' kaw ing' rap ri ti hk'a' cum' ri heun na' ce, "Kon' hk'i ka seueueng' sa' hao' na' pe', punta kaw pe' pon hk'a' seungeueng' kaw ing' rot na', a' nhaw' ci' deun' pe' ?" ⁸Kop awn' na, kaw a meuh sa' hki' ka taws' pe' hpum' fuin pe' map' ri hawc' na', yeuh ku' chak' na' reu'. Pawlae han' mae' Abraham meuh eun kuiing' pe' nang hpum' ri. Ui' lah' a ri pe', Peucawo' kaw Eun cang pleng' seumu aen' ce meuh kon' hk'i eun Abraham yeut.

⁹Maet' maen', mue' na' uin' a ri keunam kleum' hku' na' hawc'. Kleum' un' pli' ku' chak' na' ku kleum' ka, kah ri gawl ri tec a, dum a hk'a' naee ngawl."

¹⁰Peue cum heun' na' ce lah', "Yeuh keutit' ko', ye ci' na' htuk' ri yeuh sa' nhaw' ?"

¹¹Eun top' a, "Peue kue' hk'o' lal' hpuin' na' ce, gvah ku' un' kue' hk'o' na' ce is' reu'. Saec' meuh peue kue' ku' hk'a' na' ce, yeuh a seun' awn' na yeut."

¹²Saec' meuh peue cep' hkawn' na' ce ku ing' hk'o' ri rap ri ti hk'a' cum' ri heun yeut. Ce mhaing' eun, "Seura', ye ci' na' htuk' ri yeuh sa' nhaw' ?"

¹³Eun lah' a ri ce, "Pawlae cep' hkawn' pe' na' pon lheu'." ¹⁴Saec' meuh peue suik' na' ce ku mhaing' eun, "Ye ri sae, ye ci' na' htuk' ri yeuh sa' nhaw' yeut?"

Eun top' a, "Pawlae rutrim' ri ti is' peue. Pawlae lah' ku' un' kue' un' meuh chi' lai ri hk'a' peue. Cu leumuil ngos reng pun pe' na' hit' hpum' ri reu'."

¹⁵Yam peue heun' na' keutui' hpum' ko' ce Hkrit Eun na', ce kuit a nang hpum' ri, "Yo' han eun ci' na' meuh Hkrit eun meuh un' meuh?" ¹⁶Yo' han eun lah' a ri ce, "Tuil' ui' hk'a' cum' na' ri pe' ri leuum' na'. Daecti ku' ti' ca keuting hk'ai' ui' na' buih ing' Eun hawc'.

† I' saya' 40:3-5

Pal yawo kaw ui ' un ' kuing ' ri kah ' mu ' jhaep ' Eun na ' . Eun kaw tuil ' hk'a ' cum ' na ' ri pe ' ri Cit ' seunga ' chak ' na ' mae ' ri ngawl na ' .¹⁷ Eun jhawp ' yai ' yuip . Eun kaw yuip ri tec vang cap ' ngho ' ri na ' hklel ' seunga ' . Hawc ' Eun na ' hk'on ' ro ngho ' na ' , Eun na ' peus ri uin ' a nang htuim ' na ' . Daecti dep ' ngho ' na ' Eun kaw dum a hk'a ' nae ngawl un ' cang laic na ' ."¹⁸ Lheu ' awn ' na , Yo ' han eun ku sangsawn ' ce ri ku ' seubu heun ' ceu mae ' leukah ' mun ' ren ' kawn na ' .

¹⁹ Kopti Yo ' han ram eun ri cawo ' Herot ' ti eun beun ' eun awng ' ri muis Herodi ' na ' mae ' ku ' rai yeuh eun na ' ce na ' ,²⁰ Herot ' eun seue ' Yo ' han eun nang htawng ' . Ku ' rai yeuh eun aen ' a lheu ' ku ' yeuh eun nanggal ' na ' .

Yesu ' rap Eun ri ti hk'a ' cum '

²¹ Hawc ' peue gawm ' euc ' na ' rap ce ri ti hk'a ' cum ' na ' , Yesu ' Eun ku rap ri ti hk'a ' cum ' na ' yeut . Yam buih hk'o ' Eun mun ' na ' , kuing ' pang mao ' na ' a dah ' .²² Cit ' seunga ' na ' a ruprang seun ' gui ' na ' , a lih ut ' mae ' Heun . Seng ' na ' a laws ' lih neum kuing ' pang mao ' . A lah ' , "Meuh Mi Kon ' ai ' leumeus ' Ui ' . Mi hit ' ri hpum ' Ui ' nyawk ' ."

Ceucat Eun Yesu ' na ' ce

²³ Yam Yesu ' la Eun ri yeuh kan ' mun ' na ' , a ' yu Eun na ' a pun hk'ao ri leuo ' kul ' neum . Peue hteum ' Yesu ' Eun meuh kon ' Yo ' saep .

Yo ' saep eun meuh kon ' Heli .²⁴ Heli eun meuh kon ' Mathtat ' .
Mathtat ' eun meuh kon ' Levi ' . Levi ' eun meuh kon ' Melchi ' .
Melchi ' eun meuh kon ' Yanai ' . Yanai ' eun meuh kon ' Yo ' saep .

²⁵ Yo ' saep eun meuh kon ' Mahtahti ' as ' . Mahtahti ' as ' eun meuh kon ' Amo ' .
Amo ' eun meuh kon ' Nahum . Nahum eun meuh kon ' E ' sali ' .
E ' sali ' eun meuh kon ' Nagai ' .²⁶ Nagai ' eun meuh kon ' Mat ' .
Mat ' eun meuh kon ' Mahtahti ' as ' . Mahtahti ' as ' eun meuh kon ' Semi ' .
Semi ' eun meuh kon ' Yo ' sec . Yo ' sec eun meuh kon ' Yo ' da .

²⁷ Yo ' da eun meuh kon ' Yo ' hana ' . Yo ' hana ' eun meuh kon ' Resa ' .

Resa ' eun meuh kon ' Yeru ' babel . Yeru ' babel eun meuh kon ' Shealtiel ' .

Shealtiel ' eun meuh kon ' Neri ' .²⁸ Neri ' eun meuh kon ' Melchi ' .

Melchi ' eun meuh kon ' A ' di ' . A ' di ' eun meuh kon ' Ko ' sam .

Ko ' sam eun meuh kon ' El ' madam . El ' madam eun meuh kon ' E ' ra ' .

²⁹ E ' ra ' eun meuh kon ' Yaw ' su ' . Yaw ' su ' eun meuh kon ' E ' lesa .

E ' lesa eun meuh kon ' Yaw ' rim . Yaw ' rim eun meuh kon ' Mathtat ' .

Mathtat ' eun meuh kon ' Levi ' .³⁰ Levi ' eun meuh kon ' Si ' me ' on .

Si ' me ' on eun meuh kon ' Yu ' dah . Yu ' dah eun meuh kon ' Yo ' saep .

Yo ' saep eun meuh kon ' Yo ' nam . Yo ' nam eun meuh kon ' E ' lakim .

³¹ E ' lakim eun meuh kon ' Me ' le ' a . Me ' le ' a eun meuh kon ' Mena .

Mena eun meuh kon ' Matahta ' . Matahta ' eun meuh kon ' Natan .

Natan eun meuh kon ' Davit ' .³² Davit ' eun meuh kon ' Yesae ' .

Yesae ' eun meuh kon ' Obet . Obet eun meuh kon ' Baw ' ya ' .

Baw ' ya ' eun meuh kon ' Samon . Samon eun meuh kon ' Nason .

³³ Nason eun meuh kon ' Ami ' nada ' . Ami ' nada ' eun meuh kon ' Ram .

Ram eun meuh kon ' Hes ' ron . Hes ' ron eun meuh kon ' Hparae ' .

Hparae ' eun meuh kon ' Yu ' dah .³⁴ Yu ' dah eun meuh kon ' Yakop ' .

Yakop ' eun meuh kon ' I ' cak ' . I ' cak ' eun meuh kon ' Abraham .

Abraham eun meuh kon ' Tera . Tera eun meuh kon ' Naho .

³⁵ Naho eun meuh kon ' Seru ' . Seru ' eun meuh kon ' Re ' u .

Re ' u eun meuh kon ' Pele ' . Pele ' eun meuh kon ' Ebeu .

Ebeu eun meuh kon ' Chelah ' .³⁶ Chelah ' eun meuh kon ' Kai ' nan .

Kai ' nan eun meuh kon ' Afasat ' . Afasat ' eun meuh kon ' Chem .

Chem eun meuh kon ' No ' ah . No ' ah eun meuh kon ' Lame ' .

† Vangdoh ' ka ngawl lah ' ka na ' kue ' a lal ' ceu . 1. Yesu ' kaw Eun yeuh peue seunga ' chak ' . 2. Ngawl na ' a lah ' hk'a ' ciyang Eun Peucawo ' na ' .

³⁷Lame' eun meuh kon' Metusela'. Metusela' eun meuh kon' E'nawk'.

E'nawk' eun meuh kon' Yaret'. Yaret' eun meuh kon' Mahalalel.

Mahalalel eun meuh kon' Kai'nan.³⁸ Kai'nan eun meuh kon' E'nos'.

E'nos' eun meuh kon' Seta', Seta' eun meuh kon' Adam.

Adam eun meuh kon' Peucawo'.

Yesu' pun Eun ri hkam' hk'a' cop'long

4 Yesu' kue' Eun Cit' seunga' chak' na' htonnuk. Yam ing' Eun neum klong' Yaw'dan na', Cit' seunga' na' a va Eun heul' nang vang hk'oh' hk'oeng' na'.² Teh' na', cawo' ka seuca' rai na' a cop' Eun ri ka pun' kul' seunyi. Seunyi yam awn' na, Eun un' hk'a' keunhaw'. Yam seunyi awn' euc' ka na', Eun sum' som'.

³Yam awn' na, cawo' ka seuca' rai na' a lah' a ri Heun, "Mi lawn meuh Kon' ai' Eun Peucawo' ko', tuil' leukah' Mi ri seumu aen' na kah a meuh ku' hk'a' reu'."

⁴Daecti Yesu' Eun top' a, "Nang htawm Seunga' na' tem' a ri yeuhki', 'Peue un' a'yu im' peue ri ku' hk'a' na' palkoe.'"[†]

⁵Hawc' ko', cawo' ka seuca' rai na' a tang va Eun huk' nang vang lhung' na'. A tuil' Eun nawk kuing' ut' nang lok na' gawm' euc' hk'a' naee ti yam na'.⁶ A lah', "An' nya na' mae' hk'a' meuneum aen' ce gawm' euc' ka, kaw ui' tuil' a ri Mi. Aen' ce kopti ap a ri meuh is' ui' hawc' na', ui' sum' tuil' a' nhaw' is' a ko', ui' tuil' a pun.⁷ Kop awn' na, Mi lawn faee' ui' ko', aen' ce gawm' euc' a kaw meuh is' Mi."

⁸Daecti Yesu' Eun top' a ri ka, "Nang htawm Seunga' na' tem' a ri yeuhki', 'Kaw mi kah ri faee' Cawo' Peucawo' ri na' Eun, yeuh mhai' Eun na' palkoe.'"^{††}

⁹Hawc' ko', cawo' ka seuca' rai na' a tang va Eun huk' nang veng Yeru' salaem na'. A kah Eun cawng pang seubul ka nya hk'o' mun' keuting na'. A lah' a ri Heun, "Mi lawn meuh Kon' ai' Eun Peucawo' ko', yawt' Mi hk'uic' reu'.¹⁰ Kopti nang htawm Seunga' na' tem' a ri yeuhki',

'Peucawo' kaw Eun tuil' leukah' ri in' hpom ri na' ce. Eun kaw kah ce rokxa' Mi.

¹¹Punta cung Mi na' kaw a un' cang pen seumu na', in' hpom na' ce kaw ko' ri cem Mi.'"[‡]

¹²Yesu' Eun top' a, "Nang htawm Seunga' na' tem' a ri yeuhki', 'Pawlaee long Cawo' Peucawo' mi na' Eun.'"[‡]

‡

¹³Hawc' cawo' ka seuca' rai na' cop' long ka Eun ri ku ceu na', a pucti heul' hk'ai' Heun. A jing yam kaw htuk' lai na' ti vut ti yam.

Yesu' la Eun ri yeuh kan' mun' nang kuing' Galilae'

¹⁴Yesu' Eun keutah ing' nang kuing' Galilae'. Ti' ca ka Cit' seunga' chak' na' a htonnuk hk'a' naee Heun.

Lawng Eun na' a seutu in seutan laws' heul' nang kuing' caonao' na' ku duih' ka.¹⁵ Eun sangsawn' nang sa' la vang hk'o' mun' ce na' heun' duih'. Peue suk' seun' Eun gawm' euc' ri.

Peue Nasaraet' na' un' rap ce ri ti Yesu' Eun

¹⁶Eun keutang rot nang veng Nasaraet' vang keuting ri na'. A rot seunyi Sin' ^{‡‡}na', Eun lec nang sa' la vang hk'o' mun' seun' ku' tawn yeuh Eun na'. Punta kaw Eun lip htawm Seunga' na', Eun kuh' cawng.¹⁷ Hawc' ko', ce tuil' bawl' htawm eun peue suip leukah' Eun Peucawo' htawm I' saya' na' ri Heun. Eun glas a, Eun sok ri nyu vang tem' a ri yeuhki' na',

¹⁸"Cit' seunga' Eun Peucawo' na' kue' a hk'a' pang Ui'.

Punta kaw Ui' suip ri tuil' leukah' mun' ren' kawn na' ri peue hk'o' tuckyak na' ce na',

Eun leuk ri ti Ui' hawc'.

Eun saec' cus' Ui' heul' na' meuh a punta kaw Ui' pao' peue hk'awng' ri na' kaw ce ploe' ri,

maee' peue ngai' lec' na' kaw ce nyu hk'a' ri bae, maee' peue pun ri hkam' hk'a' keunhap' nokneh na' kaw ce ploe' ri,

¹⁹maee' kaw Ui' pao' lawng rot a meuyam Cawo' kaw eun htut peue ri na' ce."^{‡‡‡}

²⁰Hawc' ko', Eun tang bawl' ri tuil' htawm awn' na ri ku' yeuh kan' nang sa' la vang hk'o' mun' na' eun. Hawc' ko', Eun mok'. Ngai' ce peue ut' nang sa' la vang hk'o' mun' na' a keue' ri Heun ku peue ri.²¹ Eun tang lah' a ri ce, "Leukah' htawm Seunga' pun pe' ri mhawng' na' htonnuk a seunyaen' hawc'."

²²Peue gawm' euc' na' ce suk' seun' Eun. Ce am' ri leukah' hk'o' leuceng mun pucti lih hk'ai' moeng Eun na'. Ce lah' a ri puri, "Hkaen' un' meuh a kon' me eun Yo' saep na' Eun aw?"

²³Yesu' Eun lah' a ri ce, "Yawng Ui' na' pe' sum' lah' leukah' lat aen' a ri Ui' yeuh keutit' yeut, 'Cawo' bai', bai' vang sui' mi na' meun reu'. Seun' mhawng'

† Sawn' leukah' mun' 8:3†† Sawn' leukah' mun' 6:13‡ Suk' seun' 9:11, 12‡‡ Sawn' leukah' mun' 6:16

‡‡ Seunyi Sin' na' meuh a seunyi keului' ce peue Yu' da na'. Ce kam' hk'a' naee seunyi aen' na. Seunyi Sin' ce peue Yu' da na' meuh a les seunyi na'. A meuh seunyi tisut' ka vung ce peue Yu' da na'. ‡‡‡ I' saya' 6:1, 2

ye ku' yeuh Mi hk'a' naee veng Kapeni' um na' yeuh a vang ut' Mi na' yeut reu'."

²⁴ Yesu' Eun tang suip ri lah', "Kaw Ui' lah' a ri pe' neumneum, vang ut' Eun peue suip leukah' Eun Peucawo' na' un' rap ce ri ti Eun. ²⁵ Daecti kaw Ui' lah' a ri pe' neumneum ri bae, cu eun E'li'ya na' nang kuing' ce I'sarela' na' a lheu' ri a'ya seunao. Yam mao' na' sawng' a ri a un' lhe' pun loe' neum pai' na', kuing' na' gawm' euc' ka a meuh ut' ngeup' keuting. ²⁶ Peucawo' Eun hkuin' kah E'li'ya eun heul' ri a'nhaw' saec' ti peue. Daecti Eun kah eun heul' ri a'ya seunao ut' nang kuing' Si'don veng Sarehpat' na' ka koe. ²⁷ Saec' meuh cu eun E'li'sae' ku' meuh peue suip leukah' Eun Peucawo' na', nang kuing' ce I'sarela' na', a ku kue' peue peuyhat naw heun' peue yeut. Daecti ce hkuin' kue' nang kaw pun ri cuin saec' ti peue. A meuh yawo peue kuing' Su'ri' muis Naman eun ti peue koe pun eun ri cuin." †

²⁸ Yam peue ut' nang sa'la vang hk'o' mun' na' pun ce ri mhawng' ku' lah' Eun na', ce seungeueng' nyawk' gawm' euc' ri. ²⁹ Ce yuk ri kuh', ce ra Eun heul' hk'a' nok ka veng na'. Ce va ri kaw heul' cut' Eun hk'uic' hk'ai' leuang' ri gong ka veng na'. ³⁰ Daecti Eun lec nang seuna' ce na'. Eun pucti lawt mawn' na' heul'.

Peue seuca' hk'aw' jeuk lec

³¹ Hawc' ko', Eun lih nang veng Kapeni' um kuing' Galilae' na'. A rot seunyi Sin' na', Eun sangsawn' ce. ³² Ce am' ri ku' sangsawn' Eun na', kopti leukah' sangsawn' eun na' kue' a ti'ca na'.

³³ Nang sa'la vang hk'o' mun' awn', a kue' peue ti peue. Seuca' hk'aw' jeuk a lec eun. Eun ta'ul' ri lah', ³⁴ "O', Yesu' peue veng Nasaraet', Mi ci' kaw ing' hkvi ye meuh keunhaw'? Kaw Mi ing' yeuh ye lu aw? Yawng ui' meuh Mi peue seunga' chak' Eun Peucawo' yeut."

³⁵ Hawc' ko', Yesu' Eun hae' eun. Eun lah', "Dit' mi. Puc mi heul' hk'ai' heun reu'." Na' hawc' ko', seuca' awn' a yeuh peue awn' eun htang' meul nanggal' ce na'. A pucti heul' hk'ai' heun. A un' yeuh eun sui' saec' peunae'.

³⁶ Ce am' nyawk' gawm' euc' ri. Ce lah' a ri puri, "Leukah' awn' na, a ci' meuh leukah' keunhaw'? Eun tuil' leukah' ri seuca' rai awn' ce hk'a' naee munhpung' ti'ca ri na', ce ku pucti heul'." ³⁷ Lawng Eun na' a seutu in seutan laws' heul' keunam caonao' ka mawn' na' hk'awp'.

Yesu' bai' Eun peue peuyhat heun' ceu na' cuin

³⁸ Yam puc Eun ri lih neum sa'la vang hk'o' mun' na', Eun ing' lec nang nya eun Si'mon na'. A'oe' eun Si'mon peuyhat kuc' ha'lok ka nyawk'. Ce hk'o' Yesu' Eun hpot' ka. ³⁹ Yesu' eun cawng keunam ka'ya na'. Eun kah peuyhat kuc' ha'lok ka na' pucti lih. Peuyhat kuc' halok na' a rai'. Ka keulawn' kuh' nghawm' ce hk'asom'.

⁴⁰ Yam seunyi lec ka na', peue va peue peuyhat heun' ceu na' ce ing' ri Yesu' Eun. Eun tang' ti' ri hk'a' pang ce ku peue ri. Ce cuin gawm' euc' ri. ⁴¹ Saec' meuh seuca' na' ce pucti heul' hk'ai' peue heun' na' ce. Ce ta'ul' ri lah', "Mi ri meuh Mi Kon' ai' Eun Peucawo'." Daecti Yesu' Eun hae' ce. Eun un' kah ce leukah' bae, kopti yawng ce Yesu' meuh Eun Hkrit na'.

Yesu' sangsawn' Eun leukah' mun' heun' duih'

⁴² Yam ceng' sumsam ka na', Yesu' Eun pucti heul' neum mawn' na'. Eun heul' vang yen' yong na'. Peue cum heun' na' ce sok Eun. Yam hk'eup' ce Eun na', ce un' sum' ploe' Eun. ⁴³ Daecti Eun lah' a ri ce, "Ui' ku kaw kah ri eo' sangsawn' leukah' mun' ren' kawn lawng kuing' Eun Peucawo' na' nang veng seubu na' ce yeut. Kopti Peucawo' cus' Eun Ui' kaw lih yeuhki' na'." ⁴⁴ Kop awn' na, Eun eo' sangsawn' leukah' mun' ren' kawn na' nang sa'la vang hk'o' mun' ce peue kuing' Yu'da na'.

Yesu' la Eun ri klawng tapae' cum nanggal' na' ce

5 A kue' ti seunyi, yam Yesu' buih cawng Eun keunam glu Genesaret' na', peue cum heun' na' ce nui ri ing' leuceng leukah' Eun Peucawo' na' ri Heun. ² Eun pun ri nyu reu lal' lam na' tah' ka ri keunam leuum' na'. Daecti peue sok ka' na' ce pucti lih hk'ai' reu ri na' euc'. Ce buih saic' reup ri na'. ³ Eun lec nang reu ti lam na'. A meuh reu eun Si'mon. Yesu' Eun hk'o' Si'mon eun sat reu ri na' heul' nang leuum' na' bae peunaeng'. Hawc' ko', Eun mok' ri sangsawn' peue cum heun' na' ce nang reu na'.

⁴ Na' Eun hawc' sangsawn' ce, Eun lah' a ri Si'mon eun, "Sat pe' heul' reup ri na' vang rui' ka leuum' na' reu'."

⁵ Si'mon eun top' a, "Cawo', sae' caee' ye reup ri gawm' sum', daecti ye un' pun ka' saec' ti tu'. Kopti lah' Mi a na', ye kaw ploe' reup ri na'."

⁶ Na' ce yeuh keutit' ko', ce pun ka' heun' nyawk'. A hk'o' reup ce na' la ri res. ⁷ Kop awn' na, ce faic' ti' ri

† 1 Hkun'haw' hkam' 1:1-16 †† 2 Hkun'haw' hkam' 5:1-14

klawng a' mawo ut' nang reu seubu na' ce ing' teum' kawm ri. A' mawo ce na' ce ku ing'. Kopti pun ce ka' na' nuk reu lal' lam awn' na, a hk'o' reu na' jom ri cum'.

⁸Yam Si' mon Petru' nyu eun a na', eun nghup' ri mae' ngai' ngong Eun Yesu' na'. Eun lah', "Cawo', hk'o' Mi pucti heul' hk'ai' ui' reu', kopti meuh ui' peue map' keuting na'." ⁹Si' mon eun mae' pu ut' mae' heun na' ce am' nyawk' gawm' euc' ri kopti pun ce ka' heun' nyawk' na'. ¹⁰Kon' eun Yebedae' muis Yakop' mae' Yo' han, ka meuh pu yeuh kan' mae' Si' mon eun, ka ku am' nyawk' yeut. Yesu' Eun lah' a ri Si' mon eun, "Pawlae lhat', nanggal' aen' na meuh mi peue sok ka', daecti tang' neum maet' maen' na' heul', kaw mi meuh nang sok peue." ¹¹Hawc' ce tah' ri uin' reu ri na' keunam leuum' na', ce tec ku ceu ri na' gawm' euc' ka. Ce hot' Yesu' Eun heul'.

Yesu' bai' Eun peue peuyhat naw cuin

¹²Yam Yesu' ut' Eun nang veng ti veng na', a kue' peue peuyhat naw gawm' tu' ri ti peue. Yam nyu eun Yesu' Eun na', eun nghup' ri pang keute' na'. Eun hk'o' a, "Cawo', a lawn htuk' hpum' Mi ko', kaw Mi cang yeuh ui' seunga' chak'."

¹³Yesu' Eun nyat' ti' ri paic' eun. Eun lah' a ri heun, "Htuk' a hpum' Ui' yeut, seunga' chak' reu'." Peuyhat naw eun na' a keulawn' rai'.

¹⁴Yesu' Eun tuil' leukah' ri heun, "Pawlae lah' lawng aen' a ri peue saec' ti peue. Daecti peuyhat mi na' cuin ka hawc' na' punta kaw a meuh sa' hki' ri peue heun' na' ce, heul' tuil' peue jhawp' rit na' ce nyu tu' mi na' mae' heul' tan ku' tan seun' Mo' se tuil' eun ri uin' leukah' to' ri punta kaw yeuh ri seunga' chak' na' reu'." †

¹⁵Daecti kopti lawng Eun Yesu' na' gawm seutu in seutan laws' a heul' ku duih' ka na', peue cum heun' na' ce cu ri ing' leuceng leukah' Eun na'. Ngon' ce ku ing' bai' peuyhat ri. ¹⁶Daecti Yesu' Eun ren' ri heul' hk'o' mun' nang vang yen' yong na'.

Yesu' bai' Eun peue ti' cung chuing' cuin

¹⁷A kue' ti seunyi, yam Yesu' buih sangsawn' Eun ce na', peue Hparisae' mae' peue guil leukah' ritroe na' ce ku mok' mawn' yeut. Ce ing' neum yung' ku yung' kue' nang kuing' Galilae', kuing' Yu' da mae' veng Yeru' salaem na'. Punta kaw Eun bai' peuyhat na' cuin, ti' ca Eun Peucawo' na' a kue' ri Heun. ¹⁸Yam awn' na,

peue jong' peue ti' cung chuing' it' nang hk'eung it' ri ing' ti peue. Ce sok hk'a' kaw ri jong' ri ing' uin' eun nanggal' Eun Yesu' na'. ¹⁹Kopti peue cum heun' na' ut' ce nuk na', yam un' yawng ce kaw ri ti eun ing' yeuh sa' nhaw' na', ce huk' yah pang lhung' ka nya na'. Ce ploe' peue peuyhat awn' eun lih nanggal' Eun Yesu' na' gawm' hk'eung it' eun na' nang ngon' ce peue heun' na'.

²⁰Yam Yesu' nyu Eun hk'a' yum' ce na', Eun lah' a ri peue peuyhat na' eun, "A' mawo, map' mi na' ploe' a ri hawc'."

²¹Peue Hparisae' mae' peue guil leukah' ritroe na' ce sawng' kuit a nang hpum' ri, "Peue lah' ku' un' nawp- sang ri Peucawo' Eun peue aen' Eun ci' meuh a' nhaw' ? A lawn un' meuh Peucawo' Eun koe, a' nhaw' ci' cang ploe' map' na' gah'?"

²²Kopti Yesu' yawng Eun kuit ce a yeuh keutit' nang hpum' ri na', Eun lah' a ri ce, "A ci' meuh kop keun- haw', pe' vae' kuit a nang hpum' ri yeuhki' ?" ²³"Map' mi na' ploe' a ri hawc'." Na' Ui' lah' a yeuh keutit', a na' sam' ran aw? A' ko', 'Kuh' mi na' long hk'a' ing' reu'.' Leukah' nangnhaw' a ci' na' ca ri sam' ran?

²⁴Daecti sum' kah Ui' pe' yawng, Kon' ai' peue na' punta kaw Eun ploe' map' na', Eun kue' ti' ca nang lok na'." Hawc' ko', Yesu' Eun lah' a ri peue ti' cung chu- ing' na' eun, "Kaw Ui' lah' a ri mi, kuh' klawm' hk'eung it' mi na' ing' ti nya mi reu'." ²⁵Eun keulawn' kuh' nanggal' ce na'. Eun klawm' hk'eung it' ri na' suk' seun' Peucawo' Eun ing' ti nya ri. ²⁶Peue gawm' euc' na' ce am' nyawk'. Ce suk' seun' Peuca- wo' Eun. Ce lhat' nyawk'. Ce lah', "Seunyaen', pun e' ri nyu ku' hk'o' am' na' hawc'."

Yesu' klawng Eun Levi' eun

²⁷Hawc' ko', Yesu' Eun pucti heul'. Eun nyu peue cep' hkawn' muis Levi' na' mok' eun vang cep' hkawn' ri na'. Eun lah' a ri heun, "Hot' Ui' heul' reu'." ²⁸Eun tec ku' kue' ri na' gawm' euc' ka. Eun kuh' hot' Yesu' Eun heul'.

²⁹Hawc' ko', Levi' eun yeuh pawe hk'asom' keuting pun Yesu' Eun nang nya ri na'. Muk heun' ce peue cep' hkawn' na' mae' peue seubu na' ce mok' ri som' tiduih' yeut. ³⁰Peue Hparisae' mae' peue guil leukah' ritroe na' ce tawk tapae' Eun Yesu' na' ce. Ce lah', "A ci' meuh kop keunhaw', pe' vae' mok' ri som' mae' peue cep' hkawn' mae' peue map' na' ce?"

³¹Yesu' Eun top' a ri ce, "Peue ut' sam' ran na' un' lo' ce seura' bai'. Peue peuyhat na' lo' ce koe. ³²Hpaw Ui' ca' lih kopti punta kaw Ui' klawng ri ti peue leupaws

† Fae' 14:1-32

seumeu' na' ce, daecti punta peue map' na' kaw ce taws' hpum' fuin map' ri na', Ui' lih."

Mhaing' Yesu' Eun ri lawng eut' ku' hk'a

³³Ce mhaing' Eun, "Tapae' eun Yo' han na' ce ren' ri eut' ku' hk'a ri hk'o' mun'. Saec' meuh tapae' ce peue Hparisae' na' ce ku yeuh seun' awn' na yeut. Daecti tapae' Mi na' ce vae' kawn' hk'asom'."

³⁴Yesu' Eun top' a, "Yam me pen' na' kawn' ut' eun mae' peue ing' hk'a chec' na' ce na', kaw pe' cang kah ce eut' ku' hk'a ri pun aw? ³⁵Daecti kaw a rot yam ti peue me pen' na' eun gah' hk'ai' ku' hk'a chec' na' ce. Yam awn' na, ce na' eut' ku' hk'a ri yeut."

³⁶Hawc' ko', Yesu' Eun keutec leukah' leupong' na'. Eun lah', "Hpen' ka hk'o' hk'u' na' a' nhaw' hkuin' duing ti ri leuplu a ri hk'o' hk'im' na' saec' ti peue. A lawn yeuh keutit' ko', hk'o' hk'u' na' kaw a roc' vawo. Lheu' awn' na, hpen' hk'u' na' a' hkuin' kaw hpaw mae' hk'o' hk'im' na'. ³⁷A' nhaw' hkuin' duing seue' leuum' pli' bui hk'u' nang huil' hak' hk'im' na'. A lawn yeuh keutit' ko', leuum' pli' bui hk'u' na' a' kaw res huil' hak' na'. Leuum' pli' bui na' a' kaw bah. Huil' hak' na' a' ku kaw lu. ³⁸Leuum' pli' bui hk'u' na' a' kaw kah ri seue' ri nang huil' hak' hk'u' na'. ³⁹A sum' meuh a' nhaw', eun lawn nyui leuum' pli' bui hk'im' na' hawc' ko', eun un' lae' sum' nyui leuum' pli' bui hk'u' na'. Kopti lah' eun, 'Ku' hk'im' na' a' ca ri chak'."

Leukah' mhaing' lawng seunyi Sin'

6 Yam meuh a seunyi Sin' na', Yesu' Eun hpa' mal' ngho' na' heul'. Tapae' Eun na' ce sec' ti sip' seukuk ngho' na'. ²Peue Hparisae' na' ce ngon' ce lah', "A ci' meuh kop keunhaw', pe' vae' yeuh ku' kleuc' ri leukah' ritroe na' hk'a' naee seunyi Sin' na'?"

³Yesu' Eun top' a ri ce, "Yam Davit' eun mae' pu eun na' sum' som' nyawk' ce na', eun ci' yeuh keunhaw' na' un' duing lip pe' lawng ka na' aw? ⁴Davit' eun lec hk'a' naee nya Eun Peucawo' na'. Eun ti ri hk'a' hkawom-un' tan peue na'. Eun ku tuil' pu ri na' ce hk'a' a yeut. Hkawomun' awn' a lawn un' meuh yawo peue jhawp' rit na' ce ko', a' nhaw' hkuin' cang hk'a' a." ⁵Yesu' Eun lah' a ri ce, "Kon' ai' peue na' meuh Eun Cawo' ka seunyi Sin' na'."

Peue ti' chuing' ti plak'

⁶A rot seunyi Sin' bae' ti sin', Yesu' Eun lec ri sang-sawn' ce nang sa' la vang hk'o' mun' na'. Mawn' na' a' kue' peue ti' a' tawm' chuing' ti peue. ⁷Peue Hparisae' mae' peue guil leukah' ritroe na' ce buih sok hk'a' kaw ri tang' map' ri Yesu' Eun. Eun ci' kaw bai' un' bai' peue peuyhat hk'a' naee seunyi Sin' na', ce hot' ri htom' Eun. ⁸Daecti Yesu' Eun yawng ku' kuit ce na'. Eun lah' a ri peue ti' chuing' na' eun, "Kuh' ing' cawng nanggal' ce peue heun' na' reu'." Eun ku ing' cawng yeut.

⁹Hawc' ko', Yesu' Eun lah' a ri ce, "Ui' seumhaing' pe'. Hk'a' naee leukah' ritroe na' a' ci' kah e' yeuh keunhaw' hk'a' naee seunyi Sin' na'? Htuk' ri yeuh ku' chak' aw? A' ko', htu' ri yeuh ku' lu aw? Htuk' ti yeuh a' yu peue pon aw? A' ko', htu' ri yeuh a' lu aw?"

¹⁰Eun keue' ri ce rop. Hawc' ko', Eun lah' a ri peue ti' chuing' awn' eun, "Nyat' ti' mi na' reu'." Eun ku nyat' a. Ti' eun na' a' cuin yawo. ¹¹Peue Hparisae' mae' peue guil leukah' ritroe na' ce seungeueng' nyawk'. Ce ci' kaw htu' ri yeuh sa' nhaw' ri Yesu' Eun na', ce sa' lit puri.

Yesu' leuk Eun ri ti peue caee ri kul' leual' peue na' ce

¹²A kue' ti seunyi, Yesu' Eun huk' hk'o' mun' pang gong na'. Eun hk'o' mun' ri Peucawo' Eun gawm' bul rot ti ceng' ka. ¹³Yam ceng' ka na', Eun klawng ri cu tapae' ri na' ce. Eun leuk ce kul' leual' peue. Eun tuil' ce meuh peue caee ri. ¹⁴Peue awn' ce a' meuh Si' mon ku' Yesu' kawn' ghuk' Eun muis Petru' mae' awng' eun muis Andre, Yakop' mae' Yo' han, Hpi' lip' mae' Bah-to' lome', ¹⁵Mahtae mae' Hto' mas', Yakop' kon' me eun Alfeas' mae' Si' mon ku' klawng peue eun meuh peue ritroe reng na' eun, ¹⁶Yu' das' kon' me eun Yakop' mae' Yu' das' I' sakariot' ku' kaw fuin Yesu' Eun na' eun.

Yesu' sangsawn' Eun leukah' mun' mae' bai' peue cuin

¹⁷Hawc' ko', Yesu' Eun mae' peue caee Eun na' ce lih cawng nang keuleung na'. Tapae' muk heun' Eun na' ce mae' peue cum heun' ut' nang kuing' Yu' da ku duih', veng Yeru' salaem, veng ut' keunam mha' seumut' na', veng Tai' ra' mae' veng Si' don na' ce. ¹⁸Punta kaw ce leuceng leukah' Eun mae' kaw Eun bai' peuyhat ce cuin na', ce cu ri mae' Heun. Saec' meuh peue hkam' ku' seuca' rai keunhap' a ri na' ce ko', Eun ku bai' ce

† 1 Samoela' 21:1-6 †† Levi' 4:9

cuin yeut. ¹⁹Peue cum heun ' na ' ce gawm ' euc ' , ce co ' - ca ' ri kaw pun ri paic ' Eun. Kopti ti ' ca na ' puc a ri lih hk'ai ' Heun na ' , a yeuh ce cuin ku peue ri.

Pun mun ' mae ' kuit nyhap '

²⁰Yesu ' Eun keue ' ri tapae ' ri na ' ce. Eun lah ' a, "Peue hk'o ' tukyak na ' pe ' , kaw pe ' pun mun ' .
Kopti Kuing ' Eun Peucawo ' na ' meuh ka is ' pe ' .
²¹Peue ngeup ' ri maet ' maen ' na ' pe ' , kaw pe ' pun mun ' .
Kopti kaw pe ' pun ri hk'asom ' ri sak ' .
Peue yam maet ' maen ' na ' pe ' , kaw pe ' pun mun ' .
Kopti kaw pe ' pun ri keunyas.
²²Meuh a kopti Kon ' ai ' peue na ' Eun,
peue na ' ces ri pe ' , sawn ' ri tec pe ' ,
chaw hkamram pe ' mae ' yeuh muis pe ' na ' lu,
kaw pe ' pun mun ' .
²³A lawn rot ti seunyi awn ' a ko ' , ren ' kawn kuit nyawk ' kuit sam ' ran ceng ' cha ri reu ' . Kopti lapsawng ' keuting na ' kue ' ka pun pe ' nang kuing ' pang mao ' na ' . Kopti a ' ta ' a ' ya ce na ' yeuh ce ko ' ri peue suip leukah ' Eun Peucawo ' na ' ce yeut.
²⁴Daecti peue meuneum na ' pe ' , kaw pe ' pun ri hkam ' hk'a ' jha ' na ' .
Kopti pun pe ' hk'a ' kuit nyawk ' na ' hawc ' .
²⁵Peue pun ri hk'asom ' ri sak ' maet ' maen ' na ' pe ' , kaw pe ' pun ri hkam ' hk'a ' jha ' na ' .
Kopti kaw pe ' pun ri ngeup ' ri.
Peue keunyas maet ' maen ' na ' pe ' ,
kaw pe ' pun ri hkam ' hk'a ' jha ' na ' .
Kopti kaw pe ' pun ku ' tuk, pe ' na ' yam.
²⁶Peue gawm ' euc ' , peue lawn suk ' seun ' pe ' lah ' pe ' chak ' ko ' , kaw pe ' pun ri hkam ' hk'a ' jha ' na ' .
Kopti a ' ta ' a ' ya ce na ' yeuh ce ko ' ri peue guil ri meuh peue suip leukah ' Eun Peucawo ' na ' ce yeut."

Leumeus ' ransu ri

²⁷"Daecti kaw Ui ' lah ' a ri ku ' pun ri mhawng ' a na ' pe ' , leumeus ' ransu pe ' na ' ce reu ' . Yeuh ku ' chak ' na ' ri peue nyu pe ' pereng ri na ' ce reu ' .
²⁸Nap mun ' ri peue jha ' pe ' na ' ce reu ' . Hk'o ' mun ' pun peue keunhap ' nokneh pe ' na ' ce reu ' .
²⁹Peue lawn dah beh pe ' na ' ti plak ' ko ' , pe ' ku na ' tang hpawt ' ri tung beh hk'a ' ti plak ' na ' ri peue reu ' . Peue lawn ti hk'o dal ' mi na ' ko ' , pe ' ku ' na ' tang tuil ' hk'o hk'a ' naee ri na ' ri peue yeut reu ' .
³⁰Peue hk'o ' ri pe ' na ' tuil ' ce is ' ku peue ce reu ' . Peue lawn ti hk'eung mi na ' ko ' , pawlaee

hk'o ' a keutah. ³¹Yeuh ku ' sum ' kah pe ' peue yeuh ri ti na ' ri peue yeut reu ' .

³²Pe ' lawn leumeus ' peue leumeus ' pe ' na ' ce palkoe ko ' , a ci ' kaw kue ' mun ' keunhaw ' pun pe ' ? Saec ' meuh peue map ' na ' ce ku leumeus ' peue leumeus ' ri na ' ce yeut. ³³Pe ' lawn tang yeuh ku ' chak ' ri peue yeuh ku ' chak ' ri pe ' na ' ce palkoe ko ' , a ci ' kaw kue ' mun ' keunhaw ' pun pe ' ? Saec ' meuh peue map ' na ' ce ku yeuh seun ' awn ' na yeut. ³⁴Pe ' lawn tuil ' peue keucan ma pe ' keutui ' hpum ' yawo kaw peue tang sai ' pun a na ' ko ' , a ci ' kaw kue ' mun ' keunhaw ' pun pe ' ? Saec ' meuh peue map ' na ' ce ku tuil ' puri keucan ma ce keutui ' hpum ' kaw ri pun a keutah htonnuk yeut. ³⁵Daecti leumeus ' ransu pe ' na ' ce, yeuh ku ' chak ' ri ce, tuil ' peue keucan ma un ' keutui ' hpum ' kaw peue sai ' a. Hawc ' ko ' , pe ' kaw pun lapsawng ' keuting na ' , pe ' kaw meuh kon ' Eun Cawo ' lhung ' hk'ai ' peue na ' Eun. Kopti cang tukyak Eun ri peue un ' yawng kun mae ' peue sa ' hao ' na ' ce. ³⁶Yeuh pe ' meuh peue cang tukyak seun ' Kuing ' pe ' na ' meuh Eun Cawo ' cang tukyak na ' reu ' .

Lawng taws ' a ' mu hk'a ' pang peue

³⁷Pawlaee taws ' a ' mu hk'a ' pang peue. Pe ' lawn un ' taws ' a ' mu ri peue ko ' , a ' nhaw ' hkuin ' kaw taws ' a ' mu ri pe ' . Pawlaee tang ' map ' ri peue. Pe ' lawn un ' tang ' map ' ri peue ko ' , a ' nhaw ' hkuin ' kaw tang ' map ' ri pe ' . Ploe ' map ' peue reu ' , map ' pe ' na ' a kaw ploer ' ri yeut. ³⁸Tuil ' ri peue reu ' , pe ' kaw pun a yeut. Kaw ce tung ' a nang ku ' keuting. Ce na ' rui ' rah ' nuic a cen ' nhen ' nuk veh. Ce kaw htok ' a pang leu'vang pe ' na ' . Kopti pe ' lawn tung ' a nang keunhaw ' ri peue ko ' , pe ' kaw tang pun a nang awn ' a."

³⁹Yesu ' Eun ku lah ' leukah ' leupong ' aen ' a ri ce, "Peue ngai ' lec ' na ' kaw ce cang va peue ngai ' lec ' long hk'a ' aw? Kaw ka heul ' hk'uic ' nang hk'ok gawm ' lal ' peue ri, un ' meuh ka aw? ⁴⁰Tapae ' na ' hpaw eun ca ' keuting hk'ai ' seura ' ri na ' eun. Daecti tapae ' rin ri ti htonnuk na ' ce ku peue, kaw ce seun ' seura ' ri na ' eun yeut.

⁴¹A ci ' meuh kop keunhaw ' , pe ' vae ' seuluil ' hpam ' ut ' nang ngai ' ce ec ' awng ' ri na ' , daecti ton hku ' ut ' nang ngai ' pe ' na ' , pe ' un ' ti a ' ye ' ka? ⁴²Pe ' saec ' un ' to ' ri nyu ton hku ' ut ' a nang ngai ' ri na ' , pe ' ci ' yeuh keunhaw ' , pe ' vae ' cang lah ' a ri ec ' awng ' ri na ' ce, 'A ' mawo, kaw ui ' teum ' kawm mi ti ri tec hpam ' ut ' nang ngai ' mi na ' ceu?' Peue leukah ' seunga ' hpum ' vok ' na ' pe ' , ti ri tec ton hku ' ut ' nang ngai ' pe ' na ' nanggal ' . Hawc ' ko ' , pe ' na ' kawn ' cang nyu

hpam' ut' nang ngai' ce ec' awng' ri na' meulamlam ri, cang hkaws' ri tec a.

Kleum' ka mae' pli' ka

⁴³Kleum' chak' na' a un' pli' pli' un' chak'. Kleum' un' chak' na' a un' pli' pli' chak'. ⁴⁴Kopti meuh a pli' ka na', e' cang yawng kleum' ka na' ku kleum' ka. Peue hkuin' duing poc' pli' keutuic ri kleum' kat'. Peue hkuin' duing poc' pli' bui ri bang' kat' yeut. ⁴⁵Peue chak' na' hue' ce ku' chak' na' lih neum vang uin' ce hk'eung chak' nang hpum' ri na'. Peue rai na' hue' ce ku' rai na' lih neum vang uin' ce hk'eung rai nang hpum' ri na'. Kopti moeng na' lah' a ku' nuk pucti lih neum hpum' na'.

Res nya lal' ceu

⁴⁶Pe' ci' yeuh keunhaw', pe' vae' klawng Ui' meuh Cawo', Cawo', daecti pe' hkuin' hot' ri yeuh seun' ku' lah' Ui' na' ? ⁴⁷Peue ing' ri Ui', mhawng' leukah' Ui', leuceng ri hot' ri yeuh a na' ce ku peue ri na', ce ci' seun' peue yeuh sa' nhaw' kaw Ui' lah' pe' mhawng' a ceu. ⁴⁸Seun' ce peue pleng' nya ri. Ce kung' a rui' tang' res ka na' pang seumu na'. Yam leuum' na' nui a ri huk' na', ba leuum' reng na' a saec' htuip nya awn' a na', kopti tang' a ri keutawn' na', a hkuin' lae fuii' - fai'. ⁴⁹Daecti peue mhawng' leukah' Ui', un' hot' ri yeuh a na' seun' ce peue pleng' nya ri un' kue' res, yeng ri tang' a pang bhen' keute' na'. Yam ba leuum' reng na' htuip a nya awn' a na', a keulawn' lhu' jah heul'. Hk'a' lhu' jah ka awn' a hk'o' lhat' nyawk'."

Hk'a' yum' eun po' suik'

7 Yam Yesu' hawc' Eun sangsawn' ri peue heun' na' ce ri leukah' awn' na gawm' euc' ka na', Eun tang heul' nang veng Kapeni' um na'. ²A kue' peue ti peue. Eun meuh mhai' eun po' suik' na'. Po' suik' na' eun leumeus' eun nyawk'. Eun caw ri peuyhat kaw yeum. ³Yam po' suik' na' mhawng' eun lawng Eun Yesu' na', eun kah nang kawt ce peue Yu' da na' ce heul' ngon', heul' hk'o' hk'ang Yesu' Eun ing' bai' mhai' ri na' eun cuin. ⁴Yam heul' rot ce ri Yesu' Eun na', ce sae' caee' hk'o' hk'ang a ri Heun. Ce lah', "Po' suik' aen' eun ko', meuh eun peue kuing' Mi ri teum' kawm ti peue yeut. ⁵Kopti leumeus' eun peue ceu ye na'. Eun ku pleng' ye is' sa' la vang hk'o' mun' yeut." ⁶Kop awn' na, Yesu' Eun hot' ce ing'.

Yam kaw Eun hk'aws' ing' rot ti nya eun po' suik' na', po' suik' na' eun kah a' mawo ri na' ce heul' lah'

a ri Yesu' Eun, "Cawo', pawlaee ing' Mi tal. Kopti un' kuing' ui' ri rap ri ti Mi ing' lec nang nya ri na'. ⁷Saec' tu' ui' na' ui' ku un' kuing' ri heul' ri Mi yeut. Daecti Mi saec' na' lah' yawo leukah' ti moeng, mhai' ui' na' kaw eun cuin. ⁸Kopti ut' ui' hk'a' ruim peue. Ui' ku kue' peue suik' ut' hk'a' ruim ri yeut. Ui' lawn kah ti peue eun heul' ko', eun ku heul'. Ui' lawn kah ti peue eun ing' ko', eun ku ing'. Ui' lawn kah mhai' ri na' eun yeuh keunhaw' ko', eun ku yeuh a."

⁹Yam Yesu' mhawng' Eun leukah' awn' a na', Eun am' ri heun. Eun hpawt' ti keue' ri lah' a ri peue cum heun' hot' ri na' ce, "Kaw Ui' lah' a ri pe', hpaw Ui' ca' nang duing nyu peue kue' hk'a' yum' heun' nyawk' yeuhko' hk'a' naee peue I' sarela' na' ce saec' ti peue." ¹⁰Yam peue caee eun po' suik' na' tang ing' rot ce ti nya na', ce pun ri nyu mhai' na' cuin eun.

Yesu' kah Eun kon' me ka' ya seunao na' eun kuh' im'

¹¹Hawc' awn' na un' ling', Eun heul' nang veng Nain' na'. Tapae' Eun na' mae' peue cum heun' na' ce ku hot' Eun heul' yeut. ¹²Yam rot Eun keunam ka leu- va' veng na', ce buih klawm' nang nhum' yeum ti peue pucti lih hk'ai' veng na'. Ma eun ka meuh a' ya seunao. Ka kue' kon' me ti peue awn' eun. Peue veng cum heun' na' ce ku hot' a' ya seunao awn' ka heul'. ¹³Yam Cawo' Yesu' nyu Eun beun' awn' ka, Eun tuckyak ri ka nyawk'. Eun lah' a ri ka, "Pawlaee yam."

¹⁴Hawc' ko', Yesu' Eun heul' keunam ce na'. Eun paic' kawm' klawm' ce na'. Ku' klawm' na' ce ku cawng. Yesu' Eun lah', "Nang nhum', kaw Ui' lah' a ri mi, kuh' reu'." ¹⁵Peue yeum awn' eun ku kuh' mok' ri leukah'. Yesu' Eun tuil' eun keutah ri ma eun ka.

¹⁶Peue gawm' euc' na' ce lhat' nyawk'. Ce suk' seun' Peucawo' Eun. Ce lah', "Peue suip leukah' Eun Peuca- wo' keuting na' puc Eun ri hk'a' naee e' hawc'. Peuca- wo' lih teum' kawm Eun peue ceu ri na' ce hawc'."

¹⁷Lawng ku' yeuh Eun Yesu' awn' a seutu in seutan nang kuing' Yu' da na' ku duih' ka eo' kuing' keunam caonao' na' gawm' euc' ka.

Yesu' Eun mae' Yo' han cawo' tuil' hk'a' cum'

¹⁸Yam tapae' eun Yo' han na' heul' lah' ce Yo' han eun mhawng' lawng awn' na gawm' euc' ka na', Yo' han eun klawng tapae' ri na' ka lal' peue. ¹⁹Eun kah ka heul' mhai' Yesu' Eun, "Meuh Mi ku' kaw ing' na' Eun hawc' aw? A' ko', kawm' kaw ye ko' nang seubu aw?"

²⁰ Yam peue lal' peue awn' heul' rot ka ri Yesu' Eun na', ka lah' a ri Heun, "Yo' han cawo' tuil' hk'a' cum' kah eun ya heul' mhaing' Mi. Meuh Mi ku' kaw ing' na' Eun hawc' aw? A' ko', kawn' kaw ye ko' nang seubu aw?"

²¹ Yam awn' na, Eun bai' peue peuyhat heun' ceu na' ce cuin heun'. Eun ku ra ri tec seuca' yeut. Saec' meuh peue ngai' lec' na' ce, Eun ku bai' ce nyu hk'a' ri heun' yeut. ²² Kop awn' na, Eun top' a ri tapae' lal' peue na' ka, "Ing' lah' Yo' han eun mhawng' ku' nyu ku' mhawng' pa' na' reu'. Peue ngai' lec' na' tang nyu ce hk'a' ri. Peue cung lu na' ce tang cang heul'. Peue peuyhat naw na' ce tang chak' ngam. Peue lhuit' na' ce tang cang mhawng'. Peue yeum na' ce tang kuh' im'. Peue hk'o' tukyak na' pun ce ri mhawng' leukah' mun' ren' kawn na'. ²³ Mun' keuting ri peue un' kangkae ri Ui' na' ce."

²⁴ Hawc' tapae' eun Yo' han na' keutah ka ing' na', Yesu' Eun lah' peue cum heun' na' ce mhawng' lawng eun Yo' han na'. Eun lah', "Pe' ci' heul' nawk keunhaw' vang hk'oh' hk'oeng' na' ? Heul' nawk pe' guil' puing' a maeaw' a fuii' fai' na' aw? ²⁵ A' ko', pe' ci' heul' nawk keunhaw' ? Heul' nawk pe' peue cuip' hk'eung chak' hk'eung ngam na' ce aw? Uih', peue cuip' hk'eung ngos, hk'a' pon hk'a' lheu', yeuh pon yeuh lheu' na' ut' ce nang haw' eun hkun' haw' hkam' na'. ²⁶ A' ko', pe' ci' heul' nawk keunhaw' ? Heul' nawk pe' peue suip leukah' Eun Peucawo' na' eun aw? Euh, heul' nawk pe' peue suip leukah' Eun Peucawo' na' eun yeut. Daecti kawn' lheu' eun peue suip leukah' Eun Peucawo' na' eun. ²⁷ Yo' han meuh eun peue ku' tem' ri uin' ri nang htawm Seunga' na'. A lah' ri yeuhki' na', 'Kaw Ui' cus' peue caee ri eun heul' nanggal' Mi.

Kaw eun bai mhe' hk'a' Mi heul' nanggal' .^{††}
²⁸ Ui' lah' a ri pe', 'Peue keut' lih neum beun' na' a hkuin' laee kue' nang keuting hk'ai' Yo' han eun saec' ti peue. Daecti peue aet' hk'ai' peue nang Kuing' Eun Peucawo' na' eun kawn' keuting hk'ai' Yo' han eun.' "

²⁹ Yam peue gawm' euc' mae' peue cep' hkawn' na' pun ce ri mhawng' a na', ce lah' ku' yeuh Eun Peucawo' na' seumeu' cawp' nyawk' ka. Kopti meuh ce peue rap ri ti hk'a' cum' ri Yo' han eun na'. ³⁰ Daecti alo Eun Peucawo' pun peue Hparisae' mae' peue yawng leukah' ritroe na', ce un' rap ri ti a. Ce un' rap ri ti hk'a' cum' ri Yo' han eun.

³¹ Yesu' Eun tang lah', "Kop awn' na, Ui' ci' kaw keutec peue cu aen' ce mae' keunhaw' ? Ce ci' seun'

keunhaw' ? ³² Seun' ce kon' nyom ti cum mok' ri klawng puri nang keulas na'. Ce klawng ri lah',

'Ye saec' puing' pi' pun pe',
pe' hkuin' cha ri.

Ye saec' lah' cai hpum' sui',
pe' hkuin' yam.'

³³ Kopti Yo' han cawo' tuil' hk'a' cum' ing' eun, eun un' hk'asom', un' nyui leuum' pli' bui na', pe' lah', 'Seuca' a lec eun.' ³⁴ Kon' ai' peue na' lih Eun, Eun hk'asom' na', pe' lah', 'Eun meuh peue hk'a' pon hk'a' lheu', nyui leuum' pli' bui pon lheu', mae' meuh a' - mawo peue cep' hkawn' mae' peue map' na' ce.' ³⁵ Daecti punta peuyha' cu' yi Eun Peucawo' na' cawp' ka na', peue rap ri ti peuyha' cu' yi Eun na' ce tuh' a hawc' ."

Beun' map' lhuik' lamawn ri Yesu' Eun

³⁶ Peue Hparisae' na' klawng eun Yesu' Eun ing' som' pul mae' ti. Yesu' Eun ku ing' lec nang nya eun peue Hparisae' na'. Eun mok' ri teul ri keunam hpuin' na'.

³⁷ Nang veng awn', a kue' beun' tawn yeuh ku' rai ti peue. Yam pun eun ri yawng Yesu' mok' Eun ri som' nang nya eun peue Hparisae' na', eun ti lamawn hom' seue' ri nang kong' seumu na' ing' ri Heun. ³⁸ Eun cawng ri yam hk'a' kui' Eun Yesu' mae' cung Eun na'. Eun jam leuum' ngai' ri na' ri cung Eun Yesu' na'. Eun ot' a ri huik' ri, nghup' ri huit' a. Hawc' ko', eun pok lamawn hom' na' ri ka.

³⁹ Yam ku' klawng Yesu' Eun peue Hparisae' na' pun eun ri nyu a na', eun kuit a nang hpum' ri, "Peue aen', Eun lawn meuh peue suip leukah' Eun Peucawo' ko', Eun ku na' yawng beun' paic' Eun aen' eun ci' meuh a' nhaw' ? Eun ci' meuh peue yeuh sa' nhaw' ? Kopti meuh eun beun' map' na' ."

⁴⁰ Yesu' Eun lah' a ri heun, "Si' mon, kue' Ui' ku' kaw lah' ri mi."

Si' mon eun lah', "Seura', lah' a reu' ."

⁴¹ Yesu' Eun lah', "Kue' a peue lal' peue. Ka ma leumuil ri cawo' leumuil na' eun. Ku' ti peue na' eun ma hpawn' pak' htaep'. Nang ti peue na' eun ma hpawn' kul' htaep'. ⁴² Kopti un' laee lhum' ka ri sai' leumuil ma ri na' gawm' lal' peue ri na', cawo' leumuil awn' eun a' nuyat leumuil ma ka na' hawc' gawm' lal' peue ka. Kop awn' na, a' nhaw' ci' na' ca ri leumeus' eun heun' ri ka?"

⁴³ Si' mon eun top' a, "Kuit ui', ku' pun ri pon leumuil ma heun' na' eun na' ca ri leumeus' eun heun' ."

Yesu' Eun tang lah', "Seun' ku' lah' mi na' cawp' ka yeut."

† I' saya' 35:5, 6; 61:1†† Malahki' 3:1

⁴⁴Hawc' ko', Yesu' Eun hpawt' ri keue' ri beun' awn' eun. Eun lah' a ri Si' mon eun, "Nyu mi beun' awn' eun aw? Yam ing' Ui' nang nya mi na', mi hkuin' tuil' leuum' hkuc' cung ri Ui'. Daecti beun' aen' eun ko', jam eun ri hkuc' cung Ui' ri leuum' ngai' ri. Hawc' ko', eun ot' a ri huik' ri na'. ⁴⁵Mi hkuin' nghup' ri huit' Ui'. Daecti tang' neum la Ui' ri ing' lec nang nya na', eun un' laee keului' nghup' ri huit' cung Ui' na'. ⁴⁶Mi hkuin' pok lamawn ri cing' Ui'. Daecti eun pok lamawn hom' ri cung Ui'. ⁴⁷Kop awn' na, Ui' kaw lah' a ri mi. Kopti pun eun ri pon map' ri heun' na', eun yeuh hk'a' leumeus' keus ri heun' na' lih. Ku' pun ri pon map' leng na', eun leumeus' leng yeut."

⁴⁸Hawc' ko', Yesu' Eun tang lah' a ri beun' awn' eun, "Map' mi na' plo' a ri hawc'."

⁴⁹Peue mok' ri som' mae' Heun na' ce lah' a ri puri, "Peue cang plo' map' aen' Eun, Eun ci' meuh a' n-haw'?"

⁵⁰Yesu' Eun lah' a ri beun' awn' eun, "Kopti meuh a hk'a' yum' mi na', mi pun hk'a' htut lawtpon na' hawc'. Kuit nyawk' kuit sam' ran cumyen' ing' reu'."

Beun' hot' Yesu' Eun na' ce

8 Hawc' awn' na, Yesu' Eun heul' ti veng hawc' ti veng, ti yung' hawc' ti yung'. Eun sangsawn' leukah' mun' ren' kawng Kuing' Eun Peucawo' na'. Tapae' kul' leual' peue na' ce ku heul' mae' Heun. ²Beun' ku' Yesu' ra Eun ri tec seuca' rai na' mae' beun' ku' Yesu' bai' Eun peuyhat ce cuin na' ce ku hot' Eun heul' yeut. A ku meuh Mari' ku' klawng peue meuh peue veng Magadala' ku' Yesu' ra Eun ri tec seuca' a' res tu' lih hk'ai' heun na' eun. ³A ku meuh Yo'hanna' beun' eun Hku'sa' cawo' roksa' hk'eung eun Herot', meuh Su'sana', meuh beun' seubu heun' peue na' ce. Ce lo' ku' kue' ri na' ce teum' kawm Yesu' Eun mae' tapae' Eun na' ce.

Leukah' leupong' lawng peue puin' ku' seumal

⁴Yam peue ti veng hawc' ti veng mae' peue cum heun' na' ing' cu ce ri rot mae' Yesu' Eun na', Eun lah' leukah' leupong' ri ce, ⁵"Peue sang' mal' ti peue na' heul' puin' eun ku' seumal ri. Yam puin' eun ku' seumal na', ngon' a hk'uic' nang gon' hk'a'. Peue jap' buin a. Sim' peul' nang vawo na' a ku seut' ri hk'a a euc'. ⁶Ngon' a hk'uic' nang tak seumu. Yam kaws ka na', kopti keute' na' un' cum ka na', a fit' hk'oh'. ⁷Ngon' a hk'uic' nang tak kat'. Kopti kaws a mae' bang' kat' na', bang' kat' na' a ghuim' a. ⁸Ngon' a hk'uic' vang

keute' ngeuo. Yam kaws ka na', a pli' lheu' ku' puin' ri na' tipak' pun."

Hawc' lah' Eun a yeuh keutit' na', Eun klawng ri lah', "Peue kue' yhuk' kaw leuceng na' leuceng a meulamlam ri reu'."

Vangdoh' ka leukah' leupong' na'

⁹Tapae' na' ce mhaing' Eun, "Vangdoh' ka leukah' leupong' na' a ci' meuh keunhaw'?" ¹⁰Eun top' a, "Lawng ka kuing' Eun Peucawo' ku' mo' ri geup' na' kaw pe' kue' ahkvang yawng a. Daecti peue seubu na' ce ko', Ui' kaw kah ri lah' leukah' leupong' na' ri ce palkoe punta kaw a seun' ku' lah' ri hk'a' naee htawm Seunga' na',

'Ce saec' keue', ce hkuin' nyu.

Ce saec' mhawng', ce hkuin' yawng a.'†

Yesu' Eun lah' vangdoh' ka leukah' leupong' lawng peue puin' ku' seumal

¹¹Vangdoh' ka leukah' leupong' na' ko', ku' seumal na' meuh a leukah' Eun Peucawo' na'. ¹²Ku' hk'uic' nang gon' hk'a' na' meuh a peue mhawng' leukah' na', daecti punta kaw ce un' yum' a, ce na' un' pun hk'a' htut lawtpon na', seuca' na' a ing' ti leukah' mun' awn' na lih hk'ai' hpum' ce na'. ¹³Ku' hk'uic' nang tak seumu na' meuh a peue pun ri mhawng' leukah' na' ce ren' kawng rap ri ti a. Daecti kopti un' kue' a res na', ce yum' a ti cu hkao'. Yam hk'eup' ce hk'a' cop' long na', ce tang kleuc' hk'a' ri. ¹⁴Ku' hk'uic' nang tak kat' na' meuh a peue pun ri mhawng' leukah' na', daecti yam a' yu im' ce pang bhen' keute' na', kopti ku' kuit nyhap' mae' hk'a' meuneum mae' hk'a' ren' kawng munkvaen na' ghuim' a ce na', ce un' cang keuting. ¹⁵Ku' hk'uic' pang bhen' keute' ngeuo na' meuh a peue pun ri mhawng' leukah' na', hawc' ko' ce roksa' a hk'a' naee hpum' seumeu' hpum' chak' ri na'. Hk'a' naee vang yeun' hkam na', ce pli'.

Tok' kaw' ngawl un' duing kuip a

¹⁶A' nhaw' hkuin' duing tok' kaw' ngawl kuip a ri keutong', hkuin' duing uin' a ruim cong. Daecti peue ing' lec na' kaw ce nyu ceng' ka na', po a pang hpa' rang † na'. ¹⁷Kopti ku' mo' ri na' a kaw pun ri tuh' ri. Ku' kuip ri na' a kaw pun ri yawng ri. A kaw pun ri ti ri ing' vang ceng' na'. ¹⁸Kop awn' na, ku' pun pe' ri mhawng' na' leuceng a meulamlam ri. Kopti ku' kue' na' ce ko', kaw

† I' saya' 6:9†† Vangdoh' ka hpa' rang na' meuh a vang pang kaw' ngawl.

tang tuil' ce baee. Ku' un' kue' na' ce ko', kaw tang hue' ku' kuit ce ri kawn' kue' na' lih hk'ai' ce."

Ma Eun Yesu' ka mae' awng' me Eun na' ce

¹⁹Yam awn' na, ma Eun Yesu' ka mae' awng' me Eun na' ce ing' ri Heun. Kopti peue na' heun' ce na', ce un' cang ing' ri Heun. ²⁰Ngon' peue lah' a ri Yesu' Eun, "Ma Mi ka mae' awng' me Mi na' cawng ko' ce Mi hk'a' nok. Ce sum' nyu Mi."

²¹Eun lah' a ri ce, "Peue mhawng' leukah' Eun Peucawo' leuceng ri ti a na' ce ko', meuh ce Ma Ui' mae' awng' me Ui'."

Yesu' kah Eun guil' na' yut' ti

²²A kue' ti seunyi, Yesu' Eun lec reu na' mae' tapae' ri na' ce. Eun lah' a ri ce, "E' tang glu na' heul' hk'a' te- h' pawh." Hawc' ko', reu na' a heul'. ²³Yam reu na' buih heul' ka na', Yesu' Eun pun ri it'. Yam awn' na, guil' lomleng na' a puing' glu na', leuum' na' a baet ti kaw nuk reu na'. Ce kaw hk'aws' pun ri lu.

²⁴Tapae' Eun na' ce ing' sawl' Eun. Ce lah', "Cawo', Cawo', kaw e' hk'aws' cum' cawn." Yesu' Eun kuh' kah guil' na' mae' ba leuum' na' yut' ti. A ku keulawn' dit' ti yen' ku ceu ka. ²⁵Hawc' ko', Yesu' Eun lah' a ri ce, "Hk'a' yum' pe' na' a ci' kue' tawngn- haw'?"

Ce lhat', ce am'. Ce mhaing' puri, "Hkawn' Eun ci' meuh a' nhaw'? Eun tuil' leukah' ri guil' mae' leu- um' na' a ku vae' leuceng leukah' Eun na'."

Yesu' bai' Eun peue seuca' lec na' eun cuin

²⁶Reu ce na' a heul' rot nang kuing' Gerasa'. Kuing' Gerasa' na' a ring kuing' Galilae' na'. ²⁷Yam Yesu' huk' Eun vang meuh bhen' keute' na', peue seuca' lec ut' nang veng na' eun ing' ri Heun. Peue awn' eun un' laee cuip' hk'eung, un' laee ut' nang nya ling' hawc'. Daecti eun ut' nang keutui' leumuic na'. ²⁸Yam nyu eun Yesu' Eun na', eun klawng seng' laws'. Eun nghup' ri keunam cung Eun Yesu' na'. Eun ta' ul' ri lah', "Yesu', Kon' ai' Eun Peucawo' Cawo' lhung' hk'ai' peue na' Mi, Mi ci' ing' lo' keunhaw' ri ui'? Kaw ui' hk'o' a ri Mi, pawlaee keunhap' nokneh ui'." ²⁹A lah' a yeuh keu- tit' na', kopti Yesu' kah Eun seuca' rai na' lih hk'ai' heun. Nanggal' aen' na, kopti seuca' awn' jhawp' ka eun heun' pok na', peue saec' hk'awng' eun, mawt ti' cung eun na' ri mu' lhec', ko' kawn eun, daecti eun peut' mu' lhec' na' deut. Seuca' awn' na, a val eun heul' nang vang hk'oh' hk'oeng' na'.

³⁰Yesu' Eun mhaing' eun, "Mi ci' muis keunhaw'?"

Eun top' a, "Muis ui' Cum." Kopti seuca' na' ut' a hk'a' naee eun heun' nyawk' na'. ³¹A hk'o' hk'ang Yesu' Eun un' kah ri heul' nang puin ka keutong' nyarok na'.

³²Teh' na', a kue' lic cum keuting ti cum a saee eo' ri pang gong na'. Yam seuca' na' hk'o' a ri heul' lec lic awn' a na', Eun ku tuil' ahkvang ka. ³³Kop awn' na, seuca' na' a pucti lih hk'ai' peue awn' eun. Hawc' a heul' lec lic na', lic cum keuting na' a yawt' ti lec leuang' na'. A hk'uc' cum' yeum nang glu na' gawm' euc'.

³⁴Yam peue go' lic na' pun ce ri nyu a na', ce hk'uih in- g' eo' ri lah' ris peue mhawng' lawng awn' na nang veng nang yung' na' hk'awp'. ³⁵Peue heun' na' ce heul' nawk ku' meuh na'. Yam heul' rot ce mae' Yesu' Eun na', ce pun ri nyu seuca' na' puc a ri lih hk'ai' peue awn' eun. Eun mok' keunam cung Eun Yesu' na'. Eun cuip' hk'eung ri. Eun tang pawn kui' ri. Ce lhat' nyawk'. ³⁶Peue pun ri nyu a na' ce ris peue he- un' na' ce mhawng' lawng eun peue seuca' lec na' eun ci' cuin yeuh sa' nhaw'. ³⁷Kopti peue ut' nang kuing' Gerasa' na' lhat' nyawk' ce gawm' euc' ri na', ce hk'o' Yesu' Eun pucti heul' hk'ai' ti. Kop awn' na, Yesu' Eun lec reu na' keutah ing'.

³⁸Peue seuca' lih a hk'ai' heun na' eun hk'o' ri hot' Yesu' Eun. Daecti Yesu' Eun lah' a ri heun, ³⁹"Peucawo' Eun ci' teum' kawm mi yeuh sa' nhaw' na', ing' ris a ti nya reu'." Kop awn' na, eun ku pucti heul' eo' ris peue mhawng' lawng Yesu' Eun ci' yeuh pun eun a' neng na' hk'awp' veng na'.

Kon' nyom beun' yeum mae' beun' nham' lih

⁴⁰Yam Yesu' tang ing' rot Eun na', peue cum heun' na' ce ren' kawn rap ri ti Eun, kopti keutui' hpum' ko' ce Eun na'. ⁴¹Ro' ka sa' la vang hk'o' mun' muis Yai' ras' na' eun ing' nghup' ri mae' cung Eun Yesu' na'. Eun hk'o' hk'ang Yesu' Eun ing' ti nya ri. ⁴²Kopti kue' eun kon' beun' ti peue. A' yu eun a pun kul' leual' neum. Eun kaw yeum.

Yam Yesu' buih heul' Eun na', peue cum heun' na' ce tawk' net Eun heul'. ⁴³Teh' na', a kue' beun' nham' lih pun kul' leual' neum ti peue. A hkuin' kue' peue bai' eun cuin. ⁴⁴Eun ing' paic' duing' hk'a' kui' ka hk'o Eun Yesu' na', nham' lih hk'ai' heun na' a keulawn' yat'.

⁴⁵Yesu' Eun mhaing' ce, "A' nhaw' ci' paic' Ui'?"

Yam peue heun' na' lah' ce ri un' paic' Eun na', Petru' eun lah', "Cawo', peue cum heun' na' buih tawk' net cheun' ce Mi ceu."

⁴⁶Daecti Yesu' Eun tang lah', "Kue' a peue paic' Ui'. Kopti yawng Ui' ti' ca ri na' puc a ri lih hk'ai' Ui' na'."

⁴⁷Yam beun'awn' yawng eun kaw a un'cang mo'ri na', eun lhat' keuyuing' ruing ing' nghup' ri nanggal' Eun Yesu' na'. Eun ci' paic' Yesu' Eun kop keunhaw' na' mae' eun ci' keulawn' cuin yeuh sa'nhaw' na', eun lah' a ri Yesu' Eun nanggal' ce peue cum heun' na'.
⁴⁸Yesu' Eun lah' a ri heun, "Kon' beun' Ui', kopti meuh a hk'a' yum' mi na', a yeuh mi cuin hawc'. Kuit nyawk' kuit sam'ran ing' reu'."

⁴⁹Yam Yesu' buih lah' Eun a yeuh keutit' na', peue heul' neum nya eun ro' ka sa' la vang hk'o' mun' na' eun heul' lah' a ri Yai' ras' eun. Eun lah', "Kon' beun' mi na' yeum eun hawc'. Pawlaee suksak seura' Eun bae."

⁵⁰Yam Yesu' mhawng' Eun leukah' awn' na, Eun lah' a ri Yai' ras' eun, "Pawlaee lhat', yum' palkoe. Kon' beun' mi na' kaw eun cuin yeut."

⁵¹Yam Yesu' ing' rot Eun ti nya eun Yai' ras' na', a lawn un' meuh Petru', Yo'han, Yakop' na' ce mae' makuiing' eun kon' nyom na' ka koe ko', Eun hkuin' kah a'nhaw' ing' lec nya na' saec' ti peue.
⁵²Yam awn' na, kopti meuh a kon' beun' awn' eun, peue nu' nuk' ri ta'ul' ri yam gawm' euc' ti. †Yesu' Eun lah', "Pawlaee yam. Un' yeum eun, gup kaw n' it' eun."

⁵³Kopti yawng ce kon' beun' awn' yeum neum eun na', ce keunyas Yesu' Eun.
⁵⁴Yesu' Eun jhawp' ti' eun kon' beun' awn' na, Eun lah', "Kon' beun', kuh' reu'."
⁵⁵Civit eun na' a ku ing', eun keulawn' kuh'. Yesu' Eun kah ce tuil' eun hk'a' ku' hk'a'.
⁵⁶Makuiing' eun kon' nyom na' ka am' nyawk'. Daecti Yesu' Eun un' kah ka lah' a'nhaw' mhawng' lawng aen' na.

Yesu' cus' Eun tapae' kul' leual' peue na' ce pucti heul'

9 Yesu' klawng Eun ri cu tapae' kul' leual' peue ri na' ce. Hawc' ko', Eun tuil' ti' ca ra ri tec seuca' gawm' euc' na' mae' ti' ca bai' peue peuyhat cuin na' ri ce.
²Eun cus' ce pucti heul' sangsawn' lawng kuing' Eun Peucawo' na', kah ce bai' peue peuyhat na' ce cuin.
³Eun lah' a ri ce, "Pawlaee pin' keunhaw' pun hk'a' heul' pe' na'. Hku' ji un' lah', huil' un' lah', ku' hk'a' un' lah', paec un' lah', hk'o na' lheu' ti hpuin' na' pawlaee pin' a heul'.
⁴Pe' lawn lec nang nya nangn-haw' ko', ut' nang nya awn' na rot ti heul' pe' hk'ai' veng awn' na.
⁵Peue lawn un' rap ri ti pe' ko', yam puc pe' ri heul' hk'ai' veng awn' a na', punta kaw a meuh sa' hki' Peucawo' kaw Eun ciyang ce na', raws' ri tec peuluing pit dak cung pe' na' reu'."
⁶Kop awn' na, tapae' na' ce pucti heul' sangsawn' leukah' mun'

ren' kaw n' na'. Ce bai' peue peuyhat na' ce cuin ku duih' ku yung'.

⁷Yam Herot' cawo' u' peung kuing' na' pun eun ri mhawng' lawng aen' ce gawm' euc' na', eun kuit un' doh' nyawk'. Kopti ngon' lah' peue Yo'han eun yeum, eun tang kuh' im' na'.
⁸Ngon' peue lah' E'li'ya eun tang pucti. Ngon' peue lah' peue suip leukah' Eun Peucawo' leumah' ti ri peue na' tang kuh' im' eun.

⁹Herot' eun lah', "Reng' ui' ngok eun Yo'han hawc'. Kop awn' na pun ui' ri mhawng' lawng ku' yeuh keutit' na', peue aen' eun ci' na' meuh a'nhaw'?" Hawc' ko', eun sok ri kaw nyu Yesu' Eun.

Yesu' tuil' Eun peue hpawn' heng' na' ce som'

¹⁰Yam peue caee Eun Yesu' na' tang ing' rot ce na', ce ing' ris Yesu' Eun mhawng' lawng ku' yeuh ri na' ce. Hawc' Eun va ce heul' koe nang veng Betsai' da' na'.

¹¹Daecti yam peue heun' na' yawng ce a, ce hot' Yesu' Eun heul'. Eun rap ri ti ce. Eun sangsawn' ce ri lawng kuing' Eun Peucawo' na'. Ku' htuk' ri bai' ri na' ce, Eun ku bai' ce cuin.

¹²Yam hk'a' pul ka na', tapae' kul' leual' peue na' ce ing' ri Heun. Ce lah', "Kah peue heun' aen' ce heul' sok vang it' vang som' nang yung' nang pang' keunam caonao' na' ce reu'. Maen' na' kopti meuh a vang hk'oh' hk'oeng' na'."

¹³Daecti Eun lah' a ri ce, "Pe' ri tuil' ce som' reu'."

Ce tang lah' a ri Heun, "E' lawn un' heul' leuvaee ku' hk'a' pun peue heun' na' ce ko', gup kue' e' hkawom-un' hpawn' meul' mae' ka' lal' tu'."
¹⁴(Kopti me na' ce palkoe, kue' ce hk'ao hpawn' heng' peue.)

Daecti Yesu' Eun lah' a ri tapae' ri na' ce, "Gvah peue aen' ce mok' meuh cum, meuh cum ri hk'ao hpawn' kul' peue reu'."
¹⁵Tapae' na' ce ku yeuh a seun' awn' na. Hawc' ko', ce mok' gawm' euc' ri.
¹⁶Hawc' Yesu' Eun ti hkawomun' hpawn' meul' mae' ka' lal' tu' awn' a na', Eun mung' mao' na', Eun mun' keuting ri Peucawo' Eun. Eun ves ri tuil' a ri tapae' na' ce. Eun kah ce eo' tuil' a ri peue cum heun' na' ce.
¹⁷Na' peue pun ri hk'a' ri sak' gawm' euc' ri ko', tapae' na' ce seut' ku' hk'a' lheu' na' a pun kul' leual' teng' nuk.

Petru' rap eun ri ti Yesu' meuh Eun Hkrit

¹⁸Yam Yesu' hk'o' Eun mun' koe mae' tapae' ri ce na', Yesu' Eun mhaing' tapae' na' ce, "Peue heun' na' ce ci' lah' Ui' meuh a'nhaw'?"

¹⁹Ce top' a, "Ngon' lah' peue Mi meuh Yo'han cawo' tuil' hk'a' cum' na' eun. Ngon' peue lah' Mi meuh

† Yam peue Yu' da na' yeum ce, ec' awng' na' ce nu' nuk' ri yam.

E'li'ya eun. Ngon' peue lah' Mi meuh peue suip leukah' Eun Peucawo' leumah' ti ri peue eun tang kuh'im'."

²⁰Yesu' Eun mhaing' ce, "Pe' ri sae, pe' ci' lah' Ui' meuh a'nhaw'?"

Petru' eun top' a, "Meuh Mi Hkrit Eun Peucawo'."

Yesu' lah' Eun lawng kaw ri pun ri yeum

²¹Eun deun' ce ri leukah' reng, Eun un' kah ce ris lawng aen' a ri peue. ²²Hawc' ko', Eun lah', "Kon' ai' peue na' kaw Eun pun ri hkam' ku' tukhka na' heun' ceu. Nang kawt, ro' peue jhawp' rit mae' peue guil leukah' ritroe na' ce kaw un' rap ri ti Eun. Eun kaw pun ri hkam' toh peue ri. Loe' seunyi ti seunyi na', Eun na' tang kuh'im'."

²³Hawc' ko', Eun lah' a ri ce gawm' euc' ce, "A'n-haw' lawn sum' hot' Ui' ko', eun kaw pun ri tec alo ri, klawm' kleum' rawng'tawp' ri na' keuyuit. Hawc' ko' hot' Ui' heul'." ²⁴Kopti a'nhaw' lawn sum' a'yu pon ko', eun kaw pun ri sum' a'yu ri. Daecti a'nhaw' lawn sum' a'yu ri na' pun Ui' ko', eun kaw pun a'yu pon. ²⁵Kopti saec' meuh a'nhaw', eun saec' na' pun ku' kue' pang bhen' keute' na' meuh is' ti gawm' euc' ka na', daecti a'yu eun na' a lawn sum ko', a ci' kaw kue' mun' keunhaw' pun eun? ²⁶Kopti a'n-haw' lawn kaic ri Ui' mae' leukah' Ui' na' ko', yam Kon' ai' peue na' lih Eun mae' munhpung' ri mae' munhpung' Eun A'kuiing' mae' munhpung' ce in'h-pom seunga' chak' na', Eun kaw kaic ri peue awn' eun. ²⁷Kaw Ui' lah' a ri pe' neumneum, peue cawng maen' na' ce ngon' nanggal' yam un' nang yeum ce na', ce kaw pun ri nyu kuing' Eun Peucawo' na'."

Yesu' plin' Eun rup ri

²⁸Hawc' Yesu' lah' Eun a yeuh keutit' na', a pun hk'ao seudi' seunyi na'. Eun va Petru', Yo'han mae' Yakop' ce huk' hk'o' mun' pang gong na'. ²⁹Yam buih hk'o' Eun mun' na', buh Eun na' a plin' rup ri. Hk'eung Eun na' a ceng' seungung seun' ceng' cak'cal' na'. ³⁰A kue' me lal' peue, a meuh Mo'se eun mae' E'li'ya eun. ³¹Ka pucti hk'a' naee munhpung' ka kuing' pang mao' na', ka u Yesu' Eun. Ce u lawng Yesu' kaw Eun yeum na'. Eun kaw yeuh alo Eun Peucawo' na' htonnuk nang veng Yeru' salaem na'. ³²Petru' eun mae' a'mawo eun na' ka, ce it' jing' nyawk'. Daecti yam tang hk'awn' ce meulamlam ri na', ce pun ri nyu munhpung' Eun Yesu' na' mae' peue cawng keunam Eun lal' peue na' ka. ³³Yam peue lal' peue awn' kaw ka gah' hk'ai'

Yesu' Eun na', Petru' eun lah' a ri Yesu' Eun, "Cawo', ut' e' maen' na' chak' ka. Pawh, e' na' pleng' tup' loe' lhang', pun Mi ti lhang', pun Mo'se ti lhang', pun E'li'ya ti lhang'." (Eun un' yawng ku' lah' ri na' meuh a keunhaw'.)

³⁴Yam buih leukah' eun na', putum' na' a lih ghuim' ce. Yam ut' ce hk'a' naee putum' na', ce lhat' nyawk'. ³⁵A kue' seng' laws' lih neum putum' na', "Peue aen' meuh Eun Kon' ai' leuk Ui' ri ti. Leuceng ri ti leukah' Eun na' reu'." ³⁶Yam seng' na' hawc' ka na', ce nyu Yesu' Eun ti peue koe. Tapae' na' ce uin' lawng aen' a nang hpum' ri koe. Hk'a' naee meuyam awn' na, ce un' lah' a'nhaw' mhawng' ku' nyu ri na' saec' ti peue.

Yesu' bai' Eun kon' nyom me seuca' rai a lec eun

³⁷Hawc' ka na' ti seunyi yam lih ce neum pang gong na', peue cum heun' na' ce ing' ri Yesu' Eun. ³⁸Hk'a' naee peue cum heun' awn' ce, a kue' a'ta' ti peue. Eun klawng ri lah', "Seura', kaw ui' hk'o' Mi ing' nawk kon' me ui' na' eun, kopti meuh eun kon' ti peue ui'." ³⁹Seuca' na' lec ka eun, eun keulawn' aec' rak. A yeuh eun to' tet' raws' ri, baikeutam' na' a ru' ri lih hk'ai' moeng eun na'. Seuca' na' a un' chae' pucti heul' hk'ai' heun. A gawm yeuh eun lu. ⁴⁰Hk'o' ui' tapae' Mi na' ce ra ri tec seuca' awn' a yeut, daecti ce yeuh un' pun a."

⁴¹Yesu' Eun lah', "Peue un' kue' hk'a' yum' cu aen' pe', Ui' ci' kaw' kaw ut' ling' mae' pe' a' neng? Ui' ci' kaw' kaw yeun' hkam pun pe' a' neng? Va kon' mi na' eun ing' maen' reu'." ⁴²Saec' meuh yam kon' nyom awn' buih ing' eun na', seuca' na' a yeuh eun cing' kus to' tet' raws' ri pang keute' na'. Daecti Yesu' Eun is' seuca' rai na'. Eun bai' kon' nyom na' eun cuin. Hawc' ko', Eun tang ap eun ri kuing' eun na' eun. ⁴³Peue gawm' euc' na' ce am' ri ti' ca keuting lhung' Eun Peucawo' na'.

Yesu' tang lah' Eun lawng kaw ri pun ri yeum na'

Yam peue heun' na' buih am' ce ri lawng ku' yeuh Eun Yesu' na', Eun lah' a ri tapae' ri na' ce, ⁴⁴"Leuceng ri pawn leukah' kaw Ui' lah' ri pe' na' meulamlam ri reu'. Kon' ai' peue na' kaw peue fuin ri ap Eun nang ti' peue." ⁴⁵Daecti ce un' ceng' ri leukah' awn' na, kopti punta kaw ce un' ceng' ri leukah' na', a lah' geup' ri ri ce. Daecti ce un' hat' ri mhaing' Eun ri lawng ka na'.

A'nhaw'ci'kawkeutinghk'ai'peue?

⁴⁶Tapae'na'htu'hting'cepuri koplawnga'nhaw'ci'kawkeutinghk'ai'peue. ⁴⁷KoptiYesu'yawngEun kuitce nanghpum'rina', Eunti kon'nyoming'uin'eun cawngmae'ti ti peue. ⁴⁸Hawc'ko', Eunlah'arice, "A'nhaw'lawn rap ri ti kon'nyom aen'eun hk'a'naeemuisUi'na'ko', eunku rap ri ti Ui'yeut. A'nhaw'lawn rap ri ti Ui'ko', eunku rap ri ti Cawo'ku'cus'Ui'lihna'Eunyeut. Koptiku'meuhpeueaet' hk'ai'peue ri pe'na'eun, meuh eun peue keutinghk'ai'peue."

Peue un'hkat'hkan pe'na'meuhcehk'a'pe'

⁴⁹Yo'han eunlah', "Cawo', nyu ye peue ti peue eun rari tec seuca' hk'a'naeemuisMina'. Kopti un'meuh eun cum ye na', ye ham'eun."

⁵⁰Yesu'Eunlah', "Pawlaee ham'eun, kopti peue un'hkat'hkan pe'na'meuhcehk'a'pe'."

Peue yung'Samari'tiyung'na'un'rapce ri ti Yesu'Eun

⁵¹Yam kaw a hk'aws'rot yam Yesu'kaw Eun pun hk'a'yuk ri huk'nang kuing'pang mao'na', Eunkaw huk'nang veng Yeru'salaem na'Eun kuit a deut. ⁵²Eun kah peue ri na'ce bai heul'anggal'. Punta kaw ce rangraen pun Yesu'Eun na', ce heul'lec yung'ce peue Samari'tiyung'na'. ⁵³Daecti peue awn'ce un'rap ri ti Yesu'Eun, kopti kaw Eun caw ri huk'nang veng Yeru'salaem na'. ⁵⁴Ku'meuh tapae'Yesu'muis Yakop'mae'Yo'han na'yam pun ka ri nyu yeuh a keutit'na', ka lah', "Cawo', lak'sum'kah Mi ya na'kah ngawl a lih neum kuing'pang mao'na' hk'ue ce aw?" ⁵⁵Daecti Yesu'Eun hpawt'ti keue'rika, Eun is'ka. ⁵⁶Hawc'ko', ce tang heul' hk'a'yung'tawk seubu na'.

Peue sum'hot'Yesu'Eun na'ce

⁵⁷Yam buih heul'ce lang' hk'a'na', ku'ti peue na'eunlah'ari Yesu'Eun, "Misaec'heul'tawngnhaw', kaw ui'hot'Miheul'yeut."

⁵⁸Yesu'Eun top'a, "So' hk'i na' kue' a keutui'. Saec'meuh sim'peul'nang vawo'na'aku kue'han'. Daecti Kon'ai'peue na'Eun ko', Eun un'kue'vang uin'cing'."

⁵⁹Yesu'Eun tang lah'ari ku'seubu ti peue na'eun, "Hot'Ui'reu'." Daecti eun top'a, "Cawo', hk'o'Mi kah ui'ing'puing'kuiing'ui'eun nanggal'."

⁶⁰Yesu'Eunlah'ari heun, "Peue yeum na'kah ce puing'puri meun reu'. Daecti mi ri ko', mi na'heul'lah'lawng kuing'Eun Peucawo'na'reu'."

⁶¹Ku'seubu ti peue na'eun tang lah', "Cawo', kaw ui'hot'Mi yeut, daecti hk'o'Mi kah ui'ing'tawm'peue nya ri na'ce nanggal'."

⁶²Yesu'Eunlah', "Peue jhawp'kan htaee'hpawt'ti keue' hk'a'kui'ri na'ce ko', un'kuing'ce ri yeuh kan'pun kuing'Eun Peucawo'na'."

Yesu'kah Eun tapae'a'reskul'lal'peue na'ce heul'

10 Hawc'awn'na, Yesu'Eun leuk tapae'seubu bae a'reskul'lal'peue. Eun kah ce bai heul'anggal'ri duih'ka lal'peue ku veng ku yung'vang kaw Eun heul'na'. ²Eunlah'arice, "Ngho' hk'o'vuic na'kue'ka heun', daecti peue vuic ngho'na'ce leng. Kop awn'na, punta kaw Eun cus'peue vuic ngho'na'ce heul'ri vang vuic ngho'na', hk'o'ari Cawo'ce peue vuic ngho'na'Eun reu'. ³Heul'reu', cus'Ui'pe'heul'seun'kon'yung'heul' hk'a'naeemhu'karuk na'. ⁴Pawlaee pin'tep paec, huil', mae'jhaep'. Pawlaee leukah'mae'peue hot' hk'a'.

⁵Yam kaw pe'lec nya nangnhaw'na', pe'na'lah'ayeuheutit'anggal', 'Kah hk'a'kuit nyawk'kuit sam'ran cumyen'na'kue' hk'a'naeemnya aen'na reu'. ⁶Alawn kue'peue leumeus' hk'a'kuit nyawk'kuit sam'ran cumyen'ut'mawn'ko', hk'a'kuit nyawk'kuit sam'ran cumyen'pe'na'kaw a ut'mae'heun. Alawn un'kue'ko', hk'a'kuit nyawk'kuit sam'ran cumyen'na'akaw tang ing'ri pe'. ⁷Ut' hk'a'naeemnya awn'na, hk'a'ku' hk'a'ngghawm'ce pe' hk'a'na'yeut, kopti peue yeuh kan'na'htuk'eun ri pun ngos reng ri. Pawlaee do ri heul'ti nya hawc'ti nya.

⁸Yam lec pe'veng nangnhaw', ce lawn rap ri ti pe'ko', hk'a'ku' hk'a'bang'ce ri pe'na'reu'. ⁹Bai'peue peuyhat ut'mawn'na'ce cuin yeut. Lah'arice yeuh keutit', 'Kuing'Eun Peucawo'na'ut'a keunam pe'hawc'. ¹⁰Daecti yam lec pe'veng nangnhaw'na', ce lawn un'rap ri ti pe'ko', pucti heul'lah'a nang gon' hk'a'na'yeuh keutit', ¹¹'Saec'meuh peuluing nang veng pe'pit dak cung ye na', ye kaw goh'ri hk'ah'a meuh het'kaw pe'pun hk'a'ciyang na'. Daecti htuk'pe'ri yawng kuing'Eun Peucawo'na'ut'a keunam pe'hawc'. ¹²Lah'Ui'ari pe', 'Hk'a'naeemseunyi taws'a'mu na', a'mu ka veng So'dom na'akawn'seuyung' hk'ai'a'mu ka veng awn'na.'

Veng un' yum' na'

¹³Veng Hko' rasin, kaw mi pun ri hkam' hk'a' jha' na'. Saec' veng Betsai' da' na', mi ku kaw pun ri hkam' hk'a' jha' na' yeut. Kopti ku' hk'o' am' yeuh ri nang veng pa' na', a lawn yeuh ri nang veng Tai' ra' mae' veng Si' don na' ko', ce ku na' taws' hpum' fuin map' ri cuip' hk'eung hting' tai' mok' nang peuluing leumah' hawc' yeut. ¹⁴Daecti hk'a' naee seunyi taws' a' mu na', a' mu ka veng Tai' ra' na' mae' veng Si' don na' a kawn' seuyung' hk'ai' a' mu pa' na'. ¹⁵Veng Kapeni' um, kaw mi pun ri yuk ri huk' pang mao' aw? Uih', kaw mi pun ri hk'uic' lih nang keutong' nyarok na'.

¹⁶Peue leuceng leukah' pe' na' leuceng ce leukah' Ui' yeut. Peue un' rap ri ti pe' na' ce ku un' rap ri ti Ui' ri yeut. Peue un' rap ri ti Ui' na' ce ku un' rap ri ti Cawo' ku' cus' Ui' lih na' Eun yeut."

Tapae' a' reskul' lal' peue na' tang ing' rot ce

¹⁷Yam tapae' a' reskul' lal' peue na' ren' kawn ing' rot ce na', ce lah', "Cawo', kopti meuh a muis Mi na' seuca' na' ut' a hk'a' ruim ye yeut."

¹⁸Yesu' Eun top' a ri ce, "Pun Ui' ri nyu Satan na' hk'uic' a lih neum kuing' pang mao' seun' cak' cal' na'. ¹⁹Tuil' Ui' ti' ca jap' buin seueueng' na' mae' keutam' tim' na', mae' pe ti' ca ka ransu na' gawm' euc' ka ri pe'. Saec' meuh keunhaw' a kaw un' cang yeuh pe' sui'. ²⁰A saec' yeuh sa' nhaw', pawlaee ren' kawn mae' seuca' na' ut' a hk'a' ruim pe'. Daecti ren' kawn mae' muis pe' na' tem' a ri nang kuing' pang mao' na' reu'."

Yesu' ren' kawn Eun

²¹Yam awn' na, Yesu' Eun ren' kawn hk'a' naee Cit' seunga' chak' na'. Eun lah', "A' kuiing' Cawo' kuing' pang mao' mae' bhen' keute' na' Mi, Ui' suk' seun' Mi kopti mo' Mi lawng aen' a ri peue kue' cu' yi na' ce mae' peue cang yawng na' ce. Daecti Mi tuil' kon' nyom na' ce nyu a. A' kuiing', aen' meuh a ku' htuk' hpum' Mi.

²²Kuiing' Ui' ap Eun ku ceu gawm' euc' na' ri Ui' hawc'. A lawn un' meuh A' kuiing' Eun ko', a' nhaw' hkuin' yawng Kon' ai' Eun saec' ti peue. A lawn un' meuh Kon' ai' Eun mae' ku' Kon' ai' sum' tuh' Eun peue yawng A' kuiing' Eun na', a' nhaw' hkuin' yawng A' kuiing' Eun saec' ti peue."

²³Hawc' ko', Eun hpawt' ti keue' hk'a' ce tapae' ri na'. Eun lah' a ri ce koe, "Mun' keuting ri ngai' pun ri

nyu seun' ku' nyu pe' na' reu'. ²⁴Kaw Ui' lah' a ri pe', 'Peue suip leukah' Eun Peucawo' na' ce mae' hkuin' haw' hkam' na' ce heun' peue ce saec' sum' nyu seun' ku' pun pe' ri nyu na', daecti ce hkuin' pun ri nyu a. Ce saec' sum' mhawng' seun' ku' pun pe' ri mhawng' na', daecti ce hkuin' pun ri mhawng' a."

Leukah' leupong' lawng Peue Samari' hpum' chak'

²⁵Peue yawng leukah' ritroe ti peue na' sum' long eun ri nawk Yesu' Eun. Eun kuh' lah', "Seura', ui' ci' kaw kah ri yeuh sa' nhaw' ui' na' pun cit' tip a' yu tip cot' cu na'?"

²⁶Yesu' Eun top' a, "Hk'a' naee leukah' ritroe na', a ci' tem' ri yeuh sa' nhaw'? Mi ci' lip ri yawng a yeuh sa' nhaw'?"

²⁷Eun tang top' a, "Kaw mi kah ri leumeus' Peucawo' ri na' Eun sut' hpum' ri, sut' civit ri, sut' kawl' reng ri, sut' kamkuit ri na' gawm' euc' ka. †Leumeus' peue ut' keunam caonao' mi na' ce seun' leumeus' mi tu' ri na' yeut." ††

²⁸Yesu' Eun lah', "Top' cawp' mi a yeut. Mi na' heul' yeuh seun' awn' na reu'. Mi kaw pun cit' civit im' na'."

²⁹Daecti peue awn' kopti sum' tuh' eun meuh ri tu' leupaws seumeu' na', eun tang mhaing' Yesu' Eun, "Peue keunam caonao' ui' na' ce ci' meuh a' nhaw'?"

³⁰Yesu' Eun top' a, "Peue ti peue yam kuh' eun neum veng Yeru' salaem eun lih veng Yeri' hko' na', eun hk'eup' con'. Con' na' ce hpuic' ri tec hk'eung eun na'. Ce peum' eun daee yeum. Hawc' ko', ce hk'uih' hk'ai' heun. ³¹Peue jhawp' rit ti peue na' eun caw ri long hk'a' awn' na. Yam nyu eun peue sui' awn' eun na', eun vel ti plak' eun na' heul'. ³²Saec' meuh peue Levi' na' eun ku seun' awn' eun yeut. Yam heul' rot eun mawn', eun nyu peue sui' awn' eun na', eun vel ti plak' eun na' heul' yeut. ³³Daecti peue Samari' na' eun long hk'a' awn' na, eun rot mae' peue sui' awn' eun. Na' eun nyu eun, eun tuckyak ri heun nyawk'. ³⁴Eun heul' pok kop vang sui' eun na' ri lamawn mae' leuum' pli' bui. Hawc' ko', eun yuk ri po peue awn' eun pang kui' ka rawngla ri na'. Eun va ri heul' rokxa' eun nang nya chec' na'. ³⁵Na' rot peunsa', eun hue' ri tuil' leumuil lal' htaep' ri peue rokxa' nya chec' na' eun. Eun lah', 'Rokxa' eun. Yam tang ing' ui' na', ui' kaw tang sai' ku' euc' mi na' lheu' awn' na."

³⁶Mi ci' kuit ku' loe' peue na' nangnhaw' eun meuh peue ut' keunam caonao' eun peue hk'eup' con' na' eun?"

† Sawn' leukah' mun' 6:5 †† Fae' 19:18

³⁷Peue yawng leukah ' ritroe na ' eun top ' a, "Meuh a ku ' tulyak ri heun na ' eun." Yesu ' Eun lah ' a ri heun, "Mi ku na ' heul ' yeuh seun ' awn ' na yeut."

Nang nya ka Mahta ' mae ' Mari '

³⁸Yam Yesu ' long Eun hk'a ' heul ' mae ' tapae ' ri na ', ce lec nang yung ' ti yung '. Beun ' muis Mahta ' na ' eun rap ri ti Eun ing ' ti nya ri. ³⁹Beun ' awn ' eun kue ' awng ' ti peue. Eun muis Mari '. Mari ' eun mok ' ri leuceng leukah ' Eun Cawo ' Yesu ' keunam cung Eun na '.

⁴⁰Daecti Mahta ' eun buih hpum ' suksak ri kan ' ran-graen ku ' hk'a ku ' som ' na '. Eun ing ' lah ' a ri Yesu ' Eun, "Cawo ', awng ' ui ' na ' uin ' eun ui ' yeuh kan ' palkoe, un ' kuit Mi a meuh keunhaw ' aw? Lah ' a ri heun, kah eun teum ' kawm ui '."

⁴¹Cawo ' Eun top ' a, "Mahta ', Mahta ', hki ' keung kuit nyhap ' mi ri heun ' ceu. ⁴²Daecti ku ' lo ' na ' kue ' a ti ceu koe. Mari ' leuk eun ri ti ku ' chak ' lheu ' ku ' chak ' na ' hawc '. Peue hkuin ' kaw cang rutrim ' ri ti a hk'ai ' heun saec ' ti peue."

Yesu ' guil Eun lawng hk'o ' mun '

11 A kue ' ti seunyi, Yesu ' Eun buih hk'o ' mun ' ti dui-h ' . Hawc ' hk'o ' Eun mun ' na ', tapae ' ti peue na ' eun ing ' mhaing ' Eun, "Cawo ', guil ye ri hk'o ' mun ' se-un ' Yo ' han guil eun tapae ' ri na ' ce yeut." ²Eun lah ' a ri ce, "Yam hk'o ' pe ' mun ' na ', hk'o ' a yeuhki ' reu ', 'A ' kuiing ',

kah muis Mi na ' meuh ku ' hkopyawm ' yumyam '.

Kah kuing ' Mi na ' lih rot.

³Tuil ' ku ' hk'a lo ' ye na ' ri ye keuyuit.

⁴Ploe ' map ' ye na ',

kopti ye ku ploe ' map ' ce peue yeuh ku ' kleuc ' ri ye na ' ce ku peue.

Pawlae va ye lec hk'a ' naee hk'a ' cop ' long na '."

⁵Hawc ' ko ', Eun lah ' a ri ce, "U ' hpama ri, hk'a ' naee pe ' ri ti ri peue eun kue ' a ' mawo ti peue. Eun heul ' lah ' a ri heun yam nuik ' ka na ', 'A ' mawo, hk'o ' mi tuil ' ui ' keucan hkawomun ' loe ' meul '. ⁶Kopti a ' mawo ui ' na ' eo ' eun ri eun caw ri rot ri ui ' na ', ui ' un ' kue ' ku ' kaw tuil ' eun hk'a saec ' ti ceu."

⁷A ' mawo ut ' nang nya na ' eun top ' a, 'Pawlae suk-sak ui '. Sot ui ' leuva ' ri hawc '. Kon ' nyom ui ' na ' it ' ce mae ' ui ' vang it ' hawc '. Ui ' kaw un ' cang kuh ' tu-il ' mi is ' keunhaw '. ⁸Kaw Ui ' lah ' a ri pe ', eun saec ' un ' kuh ' tuil ' hkawomun ' kopti meuh eun a ' mawo eun na ', daecti kopti a ' mawo eun na ' sae ' caee ' eun hk'o ' ri na ', eun kaw kuh ' tuil ' ku ' lo ' eun a ' mawo ri na '.

⁹Kop awn ' na kaw Ui ' lah ' a ri pe ', 'Hk'o ' reu ', kaw pe ' pun. Sok reu ', kaw pe ' nyu. Kloh leuva ' na ' reu ', a kaw dah ' pun pe '. ¹⁰Kopti peue hk'o ' na ' ce ku peue kaw ce pun. Peue sok na ' ce ku peue kaw ce nyu. Peue kloh leuva ' na ' ce ku peue a kaw dah ' pun ce yeut."

¹¹Hk'a ' naee pe ' ri ku ' meuh a ' kuiing ' na ', kon ' pe ' na ' eun lawn hk'o ' ka ' ko ', kaw pe ' tuil ' seueueng ' † ri heun aw?" ¹²A ' ko ' eun lawn hk'o ' keutawm ' ko ', kaw pe ' tuil ' keutam ' tim ' ri heun aw? ¹³Pe ' saec ' na ' meuh peue rai ko ', pe ' yawng ri tuil ' ku ' chak ' na ' ri kon ' ri na ' ce yeut. Lheu ' awn ' na, Kuiing ' pe ' Cawo ' ut ' nang kuing ' pang mao ' na ' Eun jaen kaw tuil ' Cit ' se-unga ' chak ' ri peue hk'o ' na ' ce ku peue ri.

Yesu ' Eun mae ' Be ' el ' sebu '

¹⁴Yesu ' buih ra Eun ri tec seuca ' nga ' na '. Yam seuca ' na ' puc a ri lih na ', peue un ' cang leukah ' awn ' eun tang cang leukah '. Peue heun ' na ' ce am '. ¹⁵Daecti ngon ' ce lah ', "Peue awn ', cu Eun ti ' ca ka cawo ' seuca ' Be ' el ' sebu ' na ' Eun ra ri tec seuca ' na '." ¹⁶Peue seubu na ' ce sum ' long ri nawk Eun. Ce hk'o ' Eun yeuh het ' keuting lih neum kuing ' pang mao ' na '.

¹⁷Yesu ' Eun yawng ku ' kuit ce na ', Eun lah ' a ri ce, "Kuing ' ces ri puri meun ku kuing ' na ' a kaw lulaic. Nyahk'ul ' ces ri puri na ' a kaw gluh. ¹⁸Seuca ' na ' a lawn ces ri puri meun ko ', kuing ' ce na ' a ci ' kaw cang keutawn ' yeuh sa ' nhaw '? Lah ' Ui ' a yeuh keutit ' na ' kopti lah ' pe ' Ui ' puing Be ' el ' sebu ' na ' Ui ' ra ri tec seuca ' na '. ¹⁹Ui ' lawn puing Be ' el ' sebu ' na ' Ui ' ra ri tec seuca ' na ' ko ', tapae ' pe ' na ' ce ci ' na ' puing a ' nhaw ' ce ra ri tec seuca ' na '? Kop awn ' na, kaw ce meuh nang taws ' a ' mu ri pe '. ²⁰Daecti Ui ' lawn puing geun ' ti ' Eun Peucawo ' na ' Ui ' ra ri tec seuca ' na ' ce ko ', kuing ' Eun Peucawo ' na ' rot a mae ' pe ' hawc '.

²¹Yam peue kawl ' reng keuting na ' kue ' eun hk'eung an ' nya htonnuk eun ko ' kaw nya ri na ', hk'eung eun na ' a kaw plot ' lon. ²²Daecti yam peue kawl ' reng keuting hk'ai ' heun na ' eun lawn ing ' tuik ' ri pe eun ko ', eun kaw ti hk'eung an ' nya papuing eun na ' heul '. Hawc ' ko ', eun ku na ' gvah hk'eung rim ' pun ri na ' ri puri na ' ce.

²³Peue un ' ut ' hk'a ' Ui ' na ' meuh ce ransu ri Ui '. Peue un ' hk'on ' ro mae ' Ui ' na ' meuh ce peue taic ' jah puin ' ri tec.

† Peue Yu ' da na ' un ' hk'a ce keune seueueng '. Ce lawn hk'a a ko ', a kleuc ' ritroe ce.

Seuca' rai tang ing'

²⁴ Yam seuca' rai na' puc a ri lih hk'ai' peue na' eun na', a eo' sok vang kaw ri keului' nang vang hk'oh' hk'oeng' na'. Yam sok un' nyu ka vang kaw ri keului' na', a lah', 'Kaw ui' tang ing' ti nya vang puc ui' ri lih heul' na'.²⁵ Yam ing' rot a ri vang ut' hk'im' ri na', a pun ri nyu nya awn' pis' hk'iu' a ri seunga'.²⁶ Kop awn' na, a heul' klawng seuca' seubu rai hk'ai' ti a' res tu' na' ce ing' lec ri ut' mawn'. Vang tisut' ka na', peue awn' eun lulaic lheu' hk'im'."

Taengtaeng ren' kawn neum

²⁷ Yam Yesu' buih lah' Eun a yeuh keutit' na', a kue' beun' ti peue eun klawng ri lah' seng' laws' nang peue cum heun' awn' ce, "Ma keut' Mi, uii' Mi na' kaw ka pun ri ren' kawn nyawk'."

²⁸ Yesu' Eun top' a, "Ren' kawn lheu' awn' a na' meuh a peue leuceng ri ti ri yeuh leukah' Eun Peucawo' na'."

Het' keuting eun Yo' na'

²⁹ Yam peue heun' na' gawm ut' gawm heun' ce na', Yesu' Eun lah', "Peue cu aen' meuh ce cat peue rai. Ce hk'o' het' keuting, daecti a lawn un' meuh yawo het' keuting eun Yo' na' na' ko', het' keuting seubu na' un' tuil' a ri ce saec' ti ceu.³⁰ Kopti seun' Yo' na' meuh eun het' keuting pun peue veng Ni' nave na', saec' meuh Kon' ai' peue na' Eun ku meuh het' keuting pun ce peue cat aen' ce yeut.³¹ Seunyi yam taws' a' mu na', nang' haw' hkam' kuing' hk'a' col na' ka kaw kuh' mae' peue cat aen' ce. Ka kaw taws' a' mu ri ce. Kopti punta kaw ka leuceng leukah' cu' yi eun Saw' lamona', ka ing' neum vang lok na' sut' ka na'. Maet' maen', nang keuting hk'ai' Saw' lamona' eun na' ut' Eun maen' hawc'.³² Seunyi yam taws' a' mu na', peue veng Ni' nave na' ce ku kuh' mae' peue cat aen' ce. Ce kaw taws' a' mu ri ce. Kopti meuh a leukah' mun' sangsawn' eun Yo' na' na', peue veng Ni' nave na' ce taws' hpum' fuin map' ri. Maet' maen', nang keuting hk'ai' Yo' na' eun na' ut' Eun maen' hawc'."

Kawk' ngawl jawngkui' tu'

³³ "A' nhaw' hkuin' duing tok' kawk' ngawl uin' a vang geup', hkuin' duing kuip a ri teng' saec' ti peue. Daecti punta peue ing' lec na' kaw ce nyu ku' ceng' na', po a pang hpa' rang na'.³⁴ Ngai' mi na' meuh a kawk' ngawl ka jawngkui' tu' mi na'. Ngai' mi na' a

lawn chak' ko', gawm' jawngkui' tu' mi na' a ku kaw ceng' htonnuk. Daecti ngai' mi na' a lawn un' chak' ko', duim' lawng na' a kaw nuknhen' tu' mi na'.³⁵ Kop awn' na, punta ku' ceng' kue' hk'a' naee mi na' kaw a un' cang meuh ku' duim' lawng na', uin' sati ri reu'.³⁶ Gawm' tu' mi na' a lawn ceng' htonnuk ko', a un' laee kue' ku' duim' lawng saec' ti duih' ko', gawm' tu' mi na' a kaw ceng' meulamlam ri seun' kaw k' ngawl til' a mi na'."

Ku' kuit nyhap' les ceu

³⁷ Yam Yesu' hawc' lah' Eun a na', peue Hparisae' na' eun klawng Yesu' Eun ing' som' mae' ti. Kop awn' na, Eun ing' mok' ri som' mae' hpuin' na'.³⁸ Kopti peue Hparisae' na' nyu eun Yesu' un' hkuc' Eun ti' ri yam un' nang som' na', eun am' ri Heun.

³⁹ Cawo' Yesu' Eun lah' a ri heun, "Peue Hparisae' na' pe', hpak' pe' pal hk'a' nok ka paen' kaw k' na', daecti hk'a' naee pe' na' hk'a' law' hpa na' mae' ku' rai na' a nuknhen' a.⁴⁰ Peue nga' suisa na' pe', Peucawo' Cawo' hpanpleng' hk'a' nok na' Eun ku hpanpleng' hk'a' naee na', un' meuh ka aw?"

⁴¹ Daecti tuil' ku' kue' hk'a' naee paen' na' ri peue hk'o' tuckyak na' ce reu'. Pe' lawn yeuh keutit' ko', a kaw seunga' chak' pun pe' ku ceu.

⁴² Peue Hparisae' na' pe', kaw pe' pun ri hkam' hk'a' jha' na'. Kopti a' lhuing', in' hk'im na' mae' tui' lha' seungal na' ku ceu ka pe' tan a kul' pun ti pun ri Peucawo' Eun. Daecti hk'a' leupaws seumeu' mae' hk'a' leumeus' keus Eun Peucawo' na', pe' tecla a. Pe' htuk' ri yeuh ku' hk'a' nanggal' na', mae' ku' hk'a' kui' na' pe' htuk' ri un' tecla a.

⁴³ Peue Hparisae' na' pe', kaw pe' pun ri hkam' hk'a' jha' na'. Kopti pe' sum' mok' ri vang mok' a' ye' keuting hk'ai' peue hk'a' naee sa' la vang hk'o' mun' na' mae' sum' kah peue luisa ri nang keulas na'.

⁴⁴ Kaw pe' pun ri hkam' hk'a' jha' na'. Kopti seun' a meuh pe' leumuic un' laee kue' sa' hki' na'. Peue un' yawng meuh a leumuic, peue jap' buin hk'a' pang ka na' heul'."

⁴⁵ Yam awn' na, peue yawng leukah' ritroe ti peue na' eun lah', "Seura', lah' Mi ku' yeuhko' na' Mi ku lah' ku' un' nawpsang ri ye yeut."

⁴⁶ Yesu' Eun lah', "Saec' meuh ku' yawng leukah' ritroe na' pe', kaw pe' pun ri hkam' hk'a' jha' na'. Kopti tuil' pe' peue peus beus kaw peue un' pe na'. Daecti pe' ri, pal yawo geun' ti' pe' na' pe' un' cheun' a teum' kawm peue.

⁴⁷Kaw pe' pun ri hkam' hk'a' jha' na'. Kopti go' pe' leumuic ce peue suip leukah' Eun Peucawo' ku' ceucat pe' toh ce leumah' na'. ⁴⁸Kopti hkam' pe' sa'hki' kan' ku' yeuh ce ceucat ri na' a htuk' hpum' pe'. Ce toh peue suip leukah' Eun Peucawo' na', pe' go' leumuic ce na'. ⁴⁹Kop awn' na, hk'a' naee leukah' peuyha' cu' yi Eun Peucawo' na' a lah' ri yeuh keutit', 'Kaw Ui' cus' peue suip leukah' Eun Peucawo' mae' peue caee na' ce heul' ri ce. Ngon' ce kaw toh ce, ngon' ce kaw ke-unhap' ce.' ⁵⁰Kop awn' na, peue cat aen' ce kaw pun ri hkam' tuttam ka nham' peuc' ce peue suip leukah' Eun Peucawo' na' ce gawm' euc' tang' neum yam hpan-pleng' bhen' keute' na'. ⁵¹A meuh tang' neum nham' eun Abela' na' rot ti nham' eun Yahkari' ku' toh peue eun seuna' ka vang dum ri tan ku' tan mae' vang hk'o' mun' na'. Kaw Ui' lah' a ri pe', peue cat aen' ce kaw pun ri hkam' tuttam ka na' ku' ceu ka.

⁵²Peue yawng leukah' ritroe na' pe', kaw pe' pun ri hkam' hk'a' jha' na'. Kopti jhawp' pe' pakhkeuca' ka peuyha' cu' yi na' heul'. Tu' pe' na' a un' lec a, daecti pe' tang ham' peue buih lec a na' ce."

⁵³Yam Yesu' puc Eun ri heul' neum mawn' na', peue Hparisae' na' ce mae' peue guil leukah' ritroe na' ce tang gawm to' tam' Eun. Ce mhaing' lawng heun' ceu na' ri Heun. ⁵⁴Ce kaw ri kaw ko' ri ti Yesu' leukah' kleuc' Eun.

Uin' sati ri peue leukah' seunga' hpum' vok' na' ce reu'

12 Yam awn' na yam peue heun' heng' na' tawk' net chok' chec' ce puri ing' cu ri na', Yesu' Eun lah' a ri tapae' ri na' ce nanggal', "Uin' sati ri paeng ce peue Hparisae' na', meuh ce peue leukah' seunga' hpum' vok'. ²Ku' kuip ri na' a kaw pun ri tuh' ri. Ku' mo' ri na' a kaw pun ri yawng ri. ¹³Ku' lah' pe' nang duim' na' peue kaw pun ri mhawng' a vang ceng' na'. Ku' sop' sep' pe' ri lah' nang hkawng hk'a' naee na' kaw a pun ri pao' ri pang sebul nya na'.

Htuk' ri lhat' ri a' nhaw'?

⁴A' mawo, kaw Ui' lah' a ri pe', pawlae lhat' ri peue cang toh jawngkui' tu' na' hawc' ce un' laee cang yeuh keunhaw' baee na'. ⁵Daecti pe' ci' kaw htuk' ri lhat' ri a' nhaw' kaw Ui' lah' pe' mhawng' a, lhat' til ri Peucawo' toh jawngkui' tu' hawc' Eun kue' ti' ca kaw nyon pe' hk'a' naee keutong' nyarok na' Eun reu'. ⁶A' raic hpawn' tu' na' paing' a ri lal' paec, un' meuh ka aw?

† Ku' kuip ri na' Peucawo' Eun kaw tuh' a ku' ceu ka, ku' mo' ri na' Eun yawng a ku' ceu ka.

A' raic awn' na Peucawo' Eun un' pil a saec' ti tu'.

⁷Saec' meuh huik' cing' pe' na' ku nyeng ka, mhin' Eun a gawm' euc' hawc'. Pawlae lhat', ngos heun' pe' hk'ai' a' raic heun' tu' na' ce.

Rap ri ti Yesu' Eun nanggal' peue

⁸Kaw Ui' lah' a ri pe', a' nhaw' lawn lah' ri rap ri ti Ui' nanggal' to' nha' ce peue na' ko', Kon' ai' peue Eun ku kaw lah' ri rap ri ti eun nanggal' to' nha' ce in' hpom Eun Peucawo' na' yeut. ⁹Daecti a' nhaw' lawn lah' ri un' yawng Ui' nanggal' to' nha' ce peue na' ko', Kon' ai' peue Eun ku kaw lah' ri un' yawng eun nanggal' to' nha' ce in' hpom Eun Peucawo' na' yeut. ¹⁰A' nhaw' lawn lah' kleuc' ri Kon' ai' peue na' Eun ko', Peucawo' Eun kaw plo' map' eun. Daecti a' n-haw' lawn lah' ku' un' nawpsang ri Cit' seunga' chak' na' ko', Eun hkuin' kaw laee plo' map' eun.

¹¹Yam va peue pe' heul' nang sa' la vang hk'o' mun' mae' hkun' cawo' mae' nang kue' ti' ca na', pawlae hki' keung ri ku' kaw pe' top' mae' ku' kaw pe' lah' na'. ¹²Kopti Cit' seunga' chak' na' kaw a guil pe' ri ku' kaw pe' htuk' ri lah' yam awn' na."

Leukah' leupong' lawng peue meuneum nga' suisa

¹³Nang peue cum heun' na' a kue' peue ti peue eun lah' a ri Yesu' Eun, "Seura', hk'o' Mi kah nawepi ui' eun gvah sin' na' ri ui'."

¹⁴Yesu' Eun top' a, "A' pu', a' nhaw' ci' tuil' Ui' meuh nang kaw taws' a' mu, a' ko' nang kaw gvah sin' ri pa'?" ¹⁵Hawc' ko', Eun tang lah' a ri peue heun' na' ce, "Sawng' uin' sati ri meulamlam ri hk'a' ta' nha' ri ku' ceu na' ce. Un' a' yu im' peue ri lheu' ri vahtu' hk'il' leumuil na'."

¹⁶Hawc' ko', Eun lah' leukah' leupong' aen' a ri ce, "Bhen' keute' eun peue meuneum ti peue na' vahtu' hk'il' leumuil ka na' chak' nyawk' ka. ¹⁷Peue meuneum awn' eun kuit a nang hpum' ri, 'Ui' ci' kaw yeuh sa' n-haw'?' Ui' hkuin' kaw laee kue' vang uin' vahtu'."

¹⁸Hawc' ko', eun kuit a, 'Kaw ui' yeuh keutit' ceu. Kaw ui' lhu' htuim' ri na', ui' na' pleng' htuim' keuting lheu' aen' na. Ui' kaw seue' ku' seumal mae' vahtu' hk'il' leumuil ri na' gawm' euc' hk'a' naee ka. ¹⁹Yam awn' na, ui' kaw lah' a ri tu' ri na' meun, "Hk'on' ro mi ri uin' ku' chak' na' htonnuk pun ri heun' neum hawc'. Ut' sa' sa' munkvaen hk'a' reu'."

²⁰Daecti Peucawo' Eun lah' a ri heun, 'Peue suisa, bul seunyaen', civit mi na' kaw a ti ri keutah hk'ai' mi. Kop awn' na, a' nhaw' ci' kaw pun ku' hk'on' ro mi na'?"

²¹Peue hk'on 'ro vahtu 'hk'il 'leumuil pun tu 'ri meun daecti eun un 'yeuh ku 'a 'ye 'keuting pun Peucawo 'Eun na ', a seun 'lawng eun peue awn 'na."

Pawlaee hki 'keung

²²Hawc 'ko ', Yesu 'Eun lah 'a ri tapae 'ri na 'ce, "Kop awn 'na kaw Ui 'lah 'a ri pe ', pawlaee hki 'keung ri ku 'hk'a ku 'som 'kaw pe 'hk'a pun a 'yu ri na '. Pawlaee hki 'keung ri hk'ohk'eung kaw pe 'hk'eung pun jawngkui 'tu 'ri na '.²³A 'yu na 'ngos heun 'a hk'ai 'ku 'hk'a na ', jawngkui 'tu 'na 'a ngos heun 'hk'ai 'hk'ohk'eung na '.²⁴Kuit ti nawk ngak 'na 'reu ', a hkuin 'jheum ', hkuin 'vuic, hkuin 'kue 'htuim 'nya vang uin 'ku 'hk'a. Daecti Peucawo 'Eun uii 'a. Pe 'ri, pe 'ci 'pe ngos heun 'hk'ai 'sim 'awn 'na 'a neng?²⁵Hk'a 'naee pe ', a ci 'kue 'a 'n-haw 'kopti hki 'keung eun na ', eun cang yeuh a 'yu ri na 'lang 'baee ti sok '?²⁶Kopti saec 'meuh ku 'aet 'na 'un 'cang yeuh pe 'a, pe 'ci 'hki 'keung ri ku 'seubu na 'meuh keunhaw '?

²⁷Kuit ti nawk peutai na 'a ci 'keuting yeuh sa 'nhaw '? A hkuin 'yeuh kan '. A hkuin 'kling 'kuii '. Daecti kaw Ui 'lah 'a ri pe ', saec 'meuh cawo 'Saw 'lamon yam hk'eung eun hk'eung hkuru ri na ', eun hkuin 'nang ngam seun 'peutai awn 'na saec 'ti nok '.²⁸Seun 'rip a 'yu im 'seunyaen 'a kaw dum ri nang ngawl peunsa 'na ', Peucawo 'yong 'Eun a htan 'awn 'na. Peue kue 'hk'a 'yum 'leng na 'pe ', Peucawo 'Eun ci 'kaw yong 'pe 'lheu 'awn 'na pe 'a neng?²⁹Pe 'ci 'kaw hk'a keunhaw 'na ', pawlaee kuit a nang hpum 'ri laleung, pawlaee hki 'keung pun a.³⁰Kopti peue bhen 'keute 'un 'yawng Peucawo 'Eun ku duih 'na 'sok ce seun 'ceun nang awn 'a. Kuiing 'pe 'yawng Eun lo 'pe 'awn 'a yeut.³¹Daecti sok kuing 'Eun Peucawo 'na 'reu '. Hawc 'ko ', Eun kaw tuil 'ceun nang awn 'a ri pe 'yeut.

Hk'eung hk'il 'leumuil nang kuing 'pang mao '

³²Muk kon 'yung 'aet ', pawlaee lhat '. Kopti Kuiing 'pe 'kaw Eun tuil 'pe 'is 'kuing 'awn 'na, a htuk 'hpum 'Eun.³³Paing 'vahtu 'hk'il 'leumuil pe 'na 'tan a ri peue hk'o 'tukyak na 'ce reu '. Sawng 'rangraen tep paec un 'cang deut pun ri meun reu '. Hk'on 'ro vahtu 'hk'il 'leumuil pe 'na 'nang kuing 'pang mao 'vang un 'laee euc ', vang con 'un 'cang de ce, vang ruiing un 'cang teun 'ka na 'reu '.³⁴Kopti vahtu 'hk'il 'leumuil pe 'na 'a lawn ut 'tawngnhaw 'ko ', hpum 'pe 'na 'a ku kaw ut 'ri ka yeut.

Mhai 'rangraen ri meulamlam ri

³⁵Cuip 'hk'eung kaw ri yeuh mhai 'peue na 'rangraen ri meulamlam ri. Co kaw 'ngawl pe 'na 'ceng 'reu '.³⁶Yeuh pe 'seun 'nang yeuh kan 'rangraen ri ko 'cawo 'kaw ing 'neum vang hk'a chec 'na 'ce. Punta yam cawo 'na 'ing 'toe 'eun leuva 'na ', ce ku kaw cang tah 'leuva 'na 'keulawn 'dah 'pun eun.³⁷Yam cawo 'na 'ing 'nyu eun mhai 'rangraen ri ko 'na 'ce na ', mhai 'awn 'ce kue 'mun 'keuting. Kaw Ui 'lah 'a ri pe 'neumneum, cawo 'na 'kaw eun cuip 'hk'eung kaw ri yeuh mhai 'rangraen ri, eun kaw kah mhai 'na 'ce mok 'keunam hpuin 'na '. Hawc 'ko ', eun kaw yeuh mhai 'ce.³⁸Saec 'meuh yam un 'nang nuik 'ka na ', a 'ko 'yam nuik 'n-ha 'ka na ', yam cawo 'na 'ing 'nyu eun rangraen ce ri na ', mhai 'awn 'ce kue 'mun 'keuting.³⁹Yeuh pe 'leuceng pun aen 'na, cawo 'nya na 'eun lawn yawng yam con 'na 'kaw ce ing 'ri ti ko ', eun hkuin 'kaw kah a 'n-haw 'cang toe 'ri ing 'lec nya ri na '.⁴⁰Saec 'pe 'ri, pe 'ku kaw kah ri rangraen ri meulamlam ri. Kopti Kon 'ai 'peue na 'kaw Eun lih yam un 'pawp pe 'kui 'ri na '."

Mhai 'kati keutawn 'maee 'mhai 'kati un 'keutawn '

⁴¹Petru 'eun mhaing ', "Cawo ', lah 'Mi leukah 'le-pong 'aen 'a ri ye palkoe aw, a 'ko 'lah 'Mi a ri peue gawm 'euc 'aw?"

⁴²Cawo 'Yesu 'Eun top 'a, "A 'nhaw 'ci 'meuh peue kati keutawn 'kue 'cu 'yi rokxa 'vahtu 'hk'il 'leumuil ku 'cawo 'na 'tuil 'eun eun meuh ro 'gvah ku 'hk'a ri mhai 'ri na 'ce cawp 'meu cawp 'yam ri na 'eun?⁴³Yam cawo 'na 'ing 'nyu eun mhai 'na 'yeuh eun ko 'na ', mhai 'awn 'eun kue 'mun 'keuting.⁴⁴Kaw Ui 'lah 'a ri pe 'neumneum, cawo 'na 'kaw eun kah mhai 'awn 'eun rokxa 'vahtu 'hk'il 'leumuil ri na 'gawm 'euc 'ka.⁴⁵Daecti mhai 'awn 'eun lawn kuit, 'Yam cawo 'ui 'na 'kaw eun ing 'na 'kawn 'kaw a ling '. Hawc 'ko ', eun tang 'ri peum 'klaee 'mhai 'beun 'mhai 'me na 'ce, ut 'ri hk'asom ', yuic 'ri plai 'ko ',⁴⁶yam cawo 'eun na 'tang ing 'rot eun yam mhai 'awn 'un 'keutui 'hpum 'un 'pawp eun kui 'ri na ', cawo 'na 'kaw eun ciyang eun reng, ra eun ut 'maee 'peue un 'yum 'na 'ce.

⁴⁷Mhai 'na 'eun saec 'yawng alo eun cawo 'ri na ', daecti eun lawn un 'rangraen un 'yeuh alo eun na 'ko ', eun kaw pun ri hkam 'hk'a 'ta 'faet 'heun 'ti 'na '.

⁴⁸Daecti mhai 'un 'yawng caw ri yeuh ku 'kleuc 'htuk 'ri hkam 'hk'a 'ta 'faet 'na 'eun ko ', kaw eun pun ri hkam 'hk'a 'ta 'faet 'na 'leng. Ku 'pun beus heun 'na ', Peucawo 'Eun kaw keutui 'hpum 'eun heun '. Peue

pun ri rap ri ti ku' ap ri tuil' heun' na' eun, Peucawo' Eun jaen gawm kaw keutui' hpum' eun heun'.

Kopti meuh a Yesu' Eun, peue kaw taic' jah hk'ai' puri

⁴⁹Punta kaw Ui' ti ngawl lih pang bhen' keute' na', Ui' lih. Sum' kah Ui' ngawl awn' na ha' hawc'.

⁵⁰Daecti hk'a' cum' kaw Ui' rap ri ti na' kue' a keuhti. Hk'a' cum' awn' a lawn un' nang hawc' ko', hpum' Ui' na' a kuit nyhap' nyawk'. ⁵¹Hteum' pe' Ui' ti hk'a' kuit nyawk' kuit sam' ran cumyen' na' lih pang bhen' keute' na' aw? Un' meuh, Ui' lah' a ri pe', ti Ui' hk'a' taic' jah hk'ai' puri na' lih. ⁵²Tang' neum maet' maen' na', peue hpawn' peue ut' nang nya ti lhang' na' ce kaw taic' jah hk'ai' puri, loe' peue to' - tam' lal' peue mae' lal' peue to' tam' loe' peue. ⁵³Ce kaw taic' jah hk'ai' puri, kuiing' kaw to' tam' kon' me, kon' me kaw to' tam' kuiing', ma kaw to' tam' kon' beun', kon' beun' kaw to' tam' ma, a' oe' kaw to' - tam' leumeun, leumeun kaw to' tam' a' oe'."

Pawn sa' hkat' meuyam na'

⁵⁴Eun lah' a ri peue cum heun' na' ce, "Yam nyu pe' putum' na' huk' a neum hk'a' lec seunyi na', pe' keulawn' lah' a kaw lhe'. A ku lhe'. ⁵⁵Yam nyu pe' guil' na' puing' a ri huk' neum hon' hk'a' col na', pe' lah' a kaw nghawo' ron. A ku meuh yeuh keutit'. ⁵⁶Peue leukah' seunga' hpum' vok' na' pe', yam keue' pe' ri bhen' keute' mao' na', pe' cang pawn meuyam na'. Daecti pe' ci' yeuh keunhaw', pe' vae' un' cang pawn sa' hkat' meuyam maet' maen' na'?"

Yeuh ri htuk' lung peue tang' a' mu ri mi na' eun

⁵⁷A ci' meuh kop keunhaw' pe' vae' un' cang taws' ku' cawp' na' meun? ⁵⁸Yam ku' tang' a' mu ri mi na' buih heul' pa' ri cawo' taws' a' mu na' eun na', co' - ca' ri yeuh ri htuk' lung eun lang' hk'a' na' reu'. A lawn un' yeuh keutit' ko', eun kaw teuk' yat mi heul' ri cawo' taws' a' mu na' eun. Cawo' taws' a' mu na' eun kaw ap mi ri cawo' htawng' na' eun. Cawo' htawng' na' eun kaw seue' mi hk'a' naee htawng' na'. ⁵⁹Kaw Ui' lah' a ri mi, mi lawn un' nang sai' ku' ma ri na' hawc' saec' ti paec ko', mi hkuin' kaw pun ri pucti lih hk'ai' htawng' na'."

Un' taws' hpum' fuin map' ri ko' kaw pun ri lu

13 Yam awn' na, ngon' ce ris Yesu' Eun mhawng' lawng cawo' Pi' lat hkawo' eun nham' ce peue Galilae' na' mae' ku' tan ri na' tiduih'. ²Yesu' Eun

top' a, "Kopti peue Galilae' awn' pun ce ri htarong hk'a' lulaic yeuhko' na', pe' hteum' map' ce na' a keuting hk'ai' peue Galilae' seubu na' ce aw? ³Kaw Ui' lah' a ri pe', un' meuh. Daecti saec' pe' ri, pe' lawn un' taws' hpum' fuin map' ri na' ko', pe' ku kaw pun ri lulaic yeut. ⁴A' ko', peue kul' seudi' peue ku' nya lhung' nang yung' Silo' am na' cung' kus geut' a ce yeum na'. Pe' hteum' tut ce na' heun' hk'ai' peue ut' nang veng Yeru' salaem gawm' euc' na' ce aw? ⁵Kaw Ui' lah' a ri pe', un' meuh. Daecti saec' pe' ri, pe' lawn un' taws' hpum' fuin map' ri ko', pe' ku kaw pun ri lulaic yeut."

Leukah' leupong' lawng kleum' pli' keutuic un' pli'

⁶Hawc' ko', Eun lah' leukah' leupong' aen' na, "Peue ti peue, eun jheum' kleum' pli' keutuic ti kleum' nang val pli' bui ri na'. Eun heul' nom' pli' ka na', daecti eun un' duing nyu pli' ka. ⁷Kop awn' na, eun lah' a ri ku' rokxa' val na' eun, 'Heul' nom' ui' kleum' pli' keutuic aen' na pun a loe' neum hawc', daecti ui' un' duing nyu pli' ka. Gawl ri tec a reu'. Uin' a jeh' bhen' keute' na' hk'o' hk'awng' meuh keunhaw'?"

⁸Daecti ku' rokxa' val na' eun top' a, 'Cawo', puing uin' a bae' neum aen'. Kaw ui' kung' ri seue' keunam kleum' ka na' is' ngeuo. ⁹A lawn pli' ko', a ku na' chak'. Daecti a lawn un' pli' ko', ui' na' koe gawl ri tec a."

Yesu' bai' Eun beun' gaw' cuin seunyi Sin'

¹⁰Yam Yesu' buih sangsawn' Eun nang sa' la vang hk'o' mun' hk'a' naee seunyi Sin' na', ¹¹nang mawn' na' a kue' beun' seuca' lec pun kul' seudi' neum ti peue. Seuca' na' a yeuh ka gaw', ka un' cang vuh ri seumeu' saec' peunae'. ¹²Yam Yesu' nyu Eun beun' awn' ka na', Eun klawng ka ing' nanggal' ce na'. Eun lah', "Beun', peuyhat pa' na' cuin ka hawc'." ¹³Hawc' ko', Eun tang' ti' ri hk'a' pang ka. Beun' awn' ka keulawn' vuh nyawng ri na' lhaem'. Ka suk' seun' Peucawo' Eun.

¹⁴Kopti Yesu' bai' Eun peue peuyhat cuin hk'a' naee seunyi Sin' na', ro' ka sa' la vang hk'o' mun' na' eun seungeueng'. Eun lah' a ri peue cum heun' na' ce, "Seunyi htuk' ri yeuh kan' na' kue' a les seunyi ceu, kop awn' na ing' bai' pe' cuin yam awn' na, pawlaee ing' seunyi Sin' seun' seunyaen' na'." ¹⁵Cawo' Yesu' Eun tang top' a ri heun, "Peue leukah' seunga' hpum' vok' na' pe', a lawn meuh seunyi Sin' ko', pe' ri ku peue kah' pe' a' moe mae' rawngla ri pucti lih hk'ai' kok ri, pe' va ri heul' tuil' a nyui leuum', un' meuh ka aw? ¹⁶Kon' beun' ceucat Abraham aen' ka Satan na' mawt a ka

ling' pun kul' seudi' neum, kah' ri ploé' ka hk'a' naee seunyi Sin' na' un' cawp' ka aw'?"

¹⁷ Yam lah' Eun a yeuh keutit' na', peue ces ri Heun na' ce kaic gawm' euc' ri. Daecti peue cum heun' na' ce ren' kawn maeé' ku' hk'o' am' yeuh Eun na'.

Leukah' leupong' lawng seumal hpapu

¹⁸ Hawc' ko', Yesu' mhaing' Eun, "Kuing' Eun Peucawo' na' a ci' seun' keunhaw'?' Uí' ci' kaw keutec a maeé' keunhaw'?' ¹⁹ Kuing' Eun Peucawo' na' seun' a peue ti peue jheum' eun seumal ka hpapu nang val ri na'. A kaws meuh kleum' ri. Sim' peul' eo' nang vawo na' a ing' pleng' ri is' han' hk'a' pang kak' ka na' ce."

Leukah' leupong' lawng paeng ka hkawomun'

²⁰ Eun tang mhaing' baeé' ti pok, "Uí' ci' kaw keutec kuing' Eun Peucawo' na' maeé' keunhaw'?' ²¹ Kuing' Eun Peucawo' na' seun' a paeng ku' beun' na' seue' eun nang moc' hkawomun' loe' teng' na', a yeuh hka-womun' na' keulai gawm' euc' ri."

Leuva' seuep'

²² Hawc' awn' na yam Yesu' heul' Eun nang veng Yeru' salaem na', Eun sangsawn' peue nang yung' nang veng hot' hk'a' heul' ri na'. ²³ Ngon' ce mhaing' Yesu' Eun, "Cawo', peue pun hk'a' htut lawtpon na' leng ce aw'?" Yesu' Eun top' a ri ce, ²⁴ "Punta kaw pe' cang pun ri lec leuva' seuep' na' co' ca' a sae' caee' reu'. Kopti lah' Uí' a ri pe', peue heun' na' ce saec' sum' lec a, daecti ce un' cang lec a. ²⁵ Yam cawo' nya na' kuh' sawng' eun leuva' na' ko', pe' kaw cawng ri kloh leuva' na' hk'o' hk'ang a hk'a' nok, 'Cawo', hk'o' mi tah' leuva' na' ri ye ti aet'."

Daecti cawo' nya na' eun kaw top' a, 'Ca' yawng ui' heul' pe' neum tawngnhaw', ui' hkuin' yawng pe'."

²⁶ Yam awn' na, pe' kaw tang lah', 'Tawn pun ye ri hk'asom' maeé' mi hawc'. Mi ku sangsawn' ye hot' hk'a' ye na' ce yeut."

²⁷ Daecti eun kaw top' a, 'Ca' yawng ui' heul' pe' neum tawngnhaw', ui' hkuin' yawng pe'. Peue yeuh ku' rai na' pe' gawm' euc', pucti hk'uih heul' hk'ai' ui' reu'."

²⁸ Yam nyu pe' Abraham, I' cak', Yakop' maeé' peue suip leukah' Eun Peucawo' ut' ce nang kuing' Eun Peucawo' na' gawm' euc' ri na', pe' kaw cet rang' ri ta' ul' ri yam. Kopti kaw pe' pun ri hkam' nyon peue ri tec tu' pe' na' hk'a' nok na'. ²⁹ Peue ut' hk'a' lih seunyi, hk'a' lec seunyi maeé' hk'a' tuh hk'a' col na' kaw ce in-

g' lec vang ut' a' nhaw' vang ut' nang awn' hk'a' naee pawe nang kuing' Eun Peucawo' na'. ³⁰ Neumneum ka na' ko', peue ut' hk'a' to' na' kaw ce meuh peue ut' nanggal'. Peue ut' nanggal' na' kaw ce meuh peue ut' hk'a' to'."†

Yesu' tukyak Eun ri veng Yeru' salaem

³¹ Yam awn' na, peue Hparisae' na' ngon' ce ing' lah' a ri Yesu' Eun, "Puc Mi hk'uih heul' hk'ai' maen' na' heul' tawk seubu reu'. Cawo' Herot' sum' toh eun Mi."

³² Yesu' eun top' a, "Heul' lah' a yeuh keutit' ri so' hk'i teh' a reu', 'Seunyaen' maeé' peunsa' na', kaw Uí' ra ri tec seuca' na' maeé' bai' peue peuyhat na' ce cuin. A lawn rot loe' seunyi ko', kan' ui' na' a kaw htonnuk."

³³ Daecti Uí' kawn' kaw htuk' lo' ri heul' seunyaen', peunsa' maeé' leuku' na'. Kopti un' kue' a peue suip leukah' Eun Peucawo' yeum hk'a' nok ka veng Yeru' salaem na' saec' ti peue.

³⁴ O', veng Yeru' salaem, veng Yeru' salaem, toh mi peue suip leukah' Eun Peucawo' na' ce maeé' dhim' mi peue cus' ri lih ri mi na' ce yeum ri seumu laleung. Uí' saec' sum' hk'on' ro kon' hk'i mi na' ce seun' el' ma na' ngom a kon' ri na' hk'a' ruim hk'ec' ri na', daecti mi un' kah Uí' yeuh a. ³⁵ Keue' reu', nya mi na' tec a ri rang' hawc'. Lah' Uí' a ri mi, yam nyu mi Uí' baeé' na', mi kaw lah', 'Nap mun' ri Cawo' ing' hk'a' ruim muis Eun Peucawo' na' Eun.' A lawn un' nang rot ti yam awn' na ko', mi kaw un' nang nyu Uí'."††

Yesu' bai' Eun peue bui' nyhel' peuyong cuin

14 Seunyi Sin' ti seunyi na', yam Yesu' heul' som' Eun nang nya eun ro' Hparisae' ti peue na', ce hot' ri htom' Eun meulamlam ri. ² Peue bui' nyhel' peuyong ti peue na' eun bai ut' nanggal' Eun. ³ Yesu' Eun mhaing' peue yawng leukah' ritroe maeé' peue Hparisae' na' ce, "Bai' peue peuyhat hk'a' naee seunyi Sin' na' kleuc' ka leukah' ritroe aw, un' kleuc' ka aw'?" ⁴ Daecti ce dit' ti. Kop awn' na, Yesu' Eun vuh eun kuh'. Eun bai' eun cuin. Hawc' ko', Eun kah eun heul'.

⁵ Hawc' ko', Eun mhaing' ce, "Hk'a' naee pe' ri ti ri peue, kon' pe', a' ko' a' moe pe' na' a lawn hk'uic' nang lamo' hk'a' naee seunyi Sin' na' ko', kaw pe' un' keulawn' hue' a pucti lih aw'?" ⁶ Ce un' laee kue' ku' kaw lah' saec' peunae'.

† Peue a' ye' keuting na' ce kaw pun ri meuh peue un' a' ye' keuting, peue un' a' ye' keuting na' ce kaw pun ri meuh peue a' ye' keuting.

†† Suk' seun' 118:26

Leukah' sangsawn' peue chec' mae' cawo' nya

⁷Yam Yesu' nyu Eun chec' na' leuk ce vang mok' kue' munhpung' na', Eun lah' leukah' leupong', ⁸“Peue lawn klawng mi heul' vang hk'a chec' na' ko', pawlaee leuk vang mok' kue' munhpung' na'. Kopti na' eun cang klawng nang kue' an' nya keuting hk'ai' mi. ⁹A lawn yeuh keutit' ko', cawo' nya klawng mi na' eun kaw ing' lah' a ri mi, ‘Tuil' vang mok' mi na' ri heun reu'. Yam awn' na, mi na' klaee' ri mhong' pun ri sat ri heul' mok' vang htan tem hk'ai' peue na'. ¹⁰Daecti yam klawng peue mi na', heul' mok' vang un' kue' munhpung' na'. Punta cawo' nya na' kaw eun ing' lah' a ri mi, ‘A' mawo, ing' mok' vang chak' hk'ai' maen' na' reu'. Yam awn' na, mi kaw pun munhpung' ri nanggal' peue chec' seubu na' ce gawm' euc'. ¹¹Kopti saec' meuh a' nhaw' eun lawn ti ri keuting lhung' meun ko', eun kaw hkam' nuic ri tem na'. Daecti saec' meuh a' nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lhung' na'.”

¹²Hawc' ko', Yesu' Eun lah' a ri peue klawng na' eun, “Yam klawng mi peue som' ngup un' lah', som' pul un' lah', pawlaee klawng a' mawo, ec' awng' mae' peue meuneum ut' caonao' mi na' ce. Mi lawn yeuh keutit' ko', ce kaw cang top' kun mi, klawng mi yeut. ¹³Daecti yam yeuh mi pawe hk'asom' na', klawng peue hk'o' - tuckyak, peue ti' cung lu mae' peue ngai' lec' na' ce reu'. ¹⁴Mi kaw pun mun' keuting. Ce saec' un' cang top' kun mi na', daecti Peucawo' Eun kaw tang top' mun' kun ri mi yam peue leupaws seumeu' na' tang kuh' im' ce na'.”

Leukah' leupong' lawng pawe hk'asom' keuting

¹⁵Ku' mok' ri som' mawn' na' yam mhawng' eun leukah' awn' a na', eun lah' a ri Yesu' Eun, “Mun' keuting ri peue kaw pun ri hk'asom' nang kuing' Eun Peucawo' na' ce.”

¹⁶Yesu' Eun lah' a ri heun, “Peue ti peue na' buih ran-graen eun pawe hk'asom' keuting. Eun klawng peue chec' heun' nyawk'. ¹⁷Yam kaw a rot yam hk'asom' na', eun kah mhai' ri na' eun heul' lah' a ri peue chec' klawng ri na' ce, ‘Ing' pawh, maet' maen' hawc' ui' rangraen ka gawm' euc' hawc'.”

¹⁸Daecti ce hk'o' ri un' heul' gawm' euc' ri. Ku' ti peue na' eun lah', ‘Kopti kawn' leuvaee ui' na ti bhen' na', ui' lo' ri heul' nawk a. Hk'o' a ri mi, ui' hkuin' kaw cang heul' nang pawe na'.”

¹⁹Ku' ti peue na' eun lah', ‘Kopti kawn' leuvaee ui' a' moe hpawn' ku na', ui' kaw heul' hk'vuk' a. Hk'o' a ri mi, ui' hkuin' kaw cang heul' nang pawe na'.”

²⁰A kue' bae' ti peue, eun lah', ‘Kopti kawn' pen' hk'u' ui' na', ui' hkuin' kaw cang heul'.”

²¹Mhai' na' eun ing' lah' lawng awn' ce ri cawo' ri na' eun. Cawo' nya na' eun seungeueng' nyawk'. Eun lah' a ri mhai' awn' eun, ‘Heul' hot' ri klawng peue hk'o' tuckyak, peue ti' cung lu, peue ngai' lec' na' ce hot' hk'a' aet' hk'a' keuting ka nang veng na' vaevae' reu'.”

²²Mhai' na' eun lah', ‘Cawo', yeuh ui' seun' ku' lah' mi na' hawc', daecti a kawn' kue' vang mok'.”

²³Cawo' na' eun tang lah' a ri mhai' ri na' eun, ‘Heul' klawng peue hot' hk'a' keuting hk'a' aet' ka hk'a' nok veng na' ce ing' nuk nya ui' na' reu'. ²⁴Ui' lah' a ri pe', peue chec' klawng ui' na' un' kue' ce nang heul' pun ri cim ku' hk'a' ui' na' saec' ti peue.”

Ngos kaw meuh tapae'

²⁵Peue cum heun' na' buih heul' ce mae' Yesu' Eun tiduih'. Eun hpawt' ri keue' lah' a ri ce, ²⁶“Peue ing' ri Ui' na' eun lawn un' leumeus' Ui' heun' hk'ai' makuuing', beun' kon', ec' awng' mae' a' yu ri ko', eun kaw un' cang meuh tapae' Ui'. ²⁷A' nhaw' lawn un' klawm' kleum' rawng' tawp' ri na' un' hot' Ui' ko', hpaw eun ca' kaw cang meuh tapae' Ui'.”

²⁸U' hpama ri, hk'a' naee pe' ri ti ri peue, eun lawn sum' pleng' nya lhung' ko', ngos ka na' a ci' kaw hk'o' un' hk'o' rot ti pleng' eun nya na' hawc' kaw eun un' mok' ri sawn' a aw? ²⁹Kopti eun saec' pun ri go' res ka na', eun lawn un' hawc' pleng' a ko', peue nyu a na' ku peue ce kaw chaw hkamram eun. Ce na' lah', ³⁰‘Hkawn' eun tang' res nya ri na', daecti eun un' cang hawc' pleng' ka.”

³¹Un' meuh ko', yam hkun' haw' hkam' ti peue na' kaw eun suik' ri hkun' haw' hkam' seubu na' eun na', peue suik' hk'a' heun timhuin' na' ce ci' kaw pe peue suik' seubu lal' mhuin' na' ce pe un' pe, kaw eun un' mok' ti sawn' a aw? ³²Eun lawn yawng kaw ri un' pe ko', yam hkun' haw' hkam' seubu na' kawn' ing' eun neum seungai na', eun kaw kah peue caee ri na' eun heul' hk'o' eun keului' suik' ri na'.”

³³Seun' awn' na, hk'a' naee pe' ri saec' meuh a' n-haw', eun lawn un' tec ku' kue' ri na' gawm' euc' ka ko', eun kaw un' cang meuh tapae' Ui'.”

Cis cuit'

³⁴ Cis na' meuh a ku' chak' yeut. Daecti eum' ka na' a lawn cuit' ko', a ci' kaw cang yeuh ri eum' bae yeuh sa' nhaw'? ³⁵ Pun bhen' keute' un' lah', pun kaw a meuh ngeuo un' lah', kopti un' laee kue' a peuehot' na', a ti ri tec ri.

Peue kue' yhuk' kaw leuceng na' leuceng a meulam-lam ri reu'."

Leukah' leupong' lawng kon' yung' rai'

15 Peue cep' hkawn' mae' peue map' na' ce ing' cu ri leuceng leukah' Eun Yesu' na'. ² Daecti peue Hparisae' mae' peue guil leukah' ritroe na' ce buicbuic lah', "Peue aen' Eun vae' rap ri ti peue map' hk'asom' mae' ce?"

³ Hawc' ko', Yesu' Eun ris leukah' leupong' aen' na ri ce, ⁴ "U' hpama ri, hk'a' naee pe' ri ti ri peue, eun lawn kue' kon' yung' tipak' tu' daecti a na' rai' ti tu' ko', kaw eun un' hk'ah' ku' seudim' kul' seudim' tu' na' vang go' ri na', hawc' ko', eun na' un' eo' sok ri nyu ku' rai' na' aw'? ⁵ Yam nyu eun kon' yung' awn' a na', eun ren' kawn nyawk' po a pang seuplang' ri na' ⁶ ing' ti nya. Hawc' ko', eun klawng a' mawo mae' peue caonao' ri na' ce ing' cu ri lah', 'Ing' ren' kawn mae' ui' vae. Sok ui' ri nyu kon' yung' rai' ri na' hawc'.' ⁷ Seun' awn' na, Ui' lah' a ri pe', 'Kopti peue map' ti peue na' taws' eun hpum' ri na', nang kuing' pang mao' na' a ku kaw kue' hk'a' ren' kawn heun' hk'ai' peue leupaws seumeu' seudim' kul' seudim' peue na' un' lo' ce ri taws' hpum' fuin map' ri na'."

Leukah' leupong' lawng leumuil rai'

⁸ Ku' ti lawng ka na', beun' ti peue ka lawn kue' leumuil kul' htaep' daecti a na' rai' ti htaep' ko', kaw ka un' tok' kaw' ngawl pis' nya na' un' sok a rot ti nyu ka a aw'? ⁹ Yam nyu ka leumuil awn' a na', ka klawng a' mawo mae' peue caonao' ri na' ce ing' cu ri lah', 'Ing' ren' kawn mae' ui' vae. Sok ui' ri nyu leumuil rai' ri na' hawc'.' ¹⁰ Seun' awn' na, Ui' lah' a ri pe', 'Kopti peue map' ti peue na' taws' eun hpum' fuin map' ri na', hk'a' naee in' hpom Eun Peucawo' na' ce ku ren' kawn.'"

Leukah' leupong' lawng kon' me rai'

¹¹ Yesu' Eun tang lah' a bae, "Peue ti peue kue' eun kon' me lal' peue. ¹² Nang awng' na' eun lah' a ri kuiing' ri eun, 'A' kuiing', hk'o' mi gvah sin' kaw ui' "

htuk' ri pun na' ri ui' reu'.' Kop awn' na, kuiing' na' eun gvah sin' na' ri kon' lal' peue ri na' ka.

¹³ Na' un' ling', nang awng' na' eun ti vahtu' hk'il' leumuil ri na' gawm' euc', eun heul' nang kuing' seungai. Eun heul' cai' ri hk'a' vahtu' hk'il' leumuil ri na' gawm' euc' ka ri ku' ren' kawn pon lheu' na'. ¹⁴ Yam cai' eun leumuil ri na' euc' na', nang kuing' awn' a rot ut' ngeup' keuting ku duih'. Eun tang' ri cuthkuin'. ¹⁵ Kop awn' na, eun heul' hk'o' ri yeuh kan' mae' peue ti peue nang kuing' awn' na. Peue awn' eun kah eun ui' i' lic nang val. ¹⁶ Eun saec' sum' hk'a' a' lum hk'a' ka lic na', daecti peue un' tuil' eun hk'a' keunhaw' saec' ti peue.

¹⁷ Yam kuit doh' eun na', eun lah', 'Kuiing' ui' na' kue' eun peue rapcang' heun', ce lheu' hk'a' lheu' som' ri. Daecti ui' vae' ngeup' ri kaw yeum maen'.

¹⁸ Kaw ui' tang ing' lah' a ri kuiing' ui' eun, "A' kuiing', map' ui' ri Peucawo' Eun mae' mi ri hawc'."

¹⁹ Un' laee kuing' ui' mae' klawng ui' meuh kon' mi na'. Kah ui' meuh seun' peue rapcang' mi ti peue na' eun reu'." ²⁰ Hawc' ko', eun yuk ri ing' ri kuiing' ri na' eun. Yam kawn' ut' eun vang seungai na', kuiing' eun na' eun seucon' ri tuckyak ri heun. Eun hk'uih heul' cem ri huit' kon' me ri na' eun.

²¹ Kon' na' eun lah' a ri kuiing' ri na' eun, 'A' kuiing', map' ui' ri Peucawo' Eun mae' mi ri hawc'. Un' laee kuing' ui' mae' klawng ui' meuh kon' mi na'."

²² Daecti kuiing' na' eun lah' a ri mhai' na' ce, 'Vae-vae, ti hk'o' chak' hk'ai' peue na' ing' tuil' eun cuip' a, chui' plok' ti' na' ri geun' ti' eun na', chui' jhaep' na' ri cung eun na'. ²³ Teuk' ri ing' nghawm' kon' a' -moe uii' ri kleueng' na'. E' na' yeuh pawe hk'asom' ren' kawn. ²⁴ Kopti kon' ui' aen' yeum eun hawc', daecti eun tang im' bae. Eun rai' hawc', daecti tang nyu eun bae.' Kop awn' na, ce tang' yeuh pawe hk'asom' ren' kawn.

²⁵ Yam awn' na, nang ec' na' eun ut' nang mal'. Yam ing' rot eun keunam nya na', eun mhawng' seng' keul ce hk'uing' seng' cha ce ri na'. ²⁶ Kop awn' na, eun klawng ri mhai' mhai' ti peue na' eun a ci' meuh keunhaw'. ²⁷ Mhai' na' eun top' a, 'Awn' mi na' tang ing' eun hawc'. Kuiing' mi eun kah ce nghawm' kon' a' -moe uii' ri kleueng' na' kopti pun eun eun ing' mae' sa' pa sam' ran ri na'."

²⁸ Nang ec' na' eun seungeueng' nyawk'. Eun un' laee va ri ing' nang nya. Kop awn' na, kuiing' na' eun pucti lih hk'o' a ri heun. ²⁹ Daecti eun top' a ri kuiing' ri eun, 'Keue' reu', yeuh ui' mhai' mi heun' neum hawc' ui' hkuin' duing lheu' leukah' mi saec' ti moeng. Daecti pal

yawo kon ' a ' pe aet ' ti tu ' na ' mi hkuin ' duing tuil ' ui ' yeuh hk'a ' ren ' kaw n ri ka mae ' a ' mawo ri na ' ce.
³⁰ Daecti yam kon ' mi awn ' eo ' eun ri cai ' ri tec hk'il ' leumuil mi na ' ri beun ' paing ' tu ' ri na ' ce euc ' hawc ' eun tang ing ' ti nya na ' , mi ta nghawm ' kon ' a ' moe ui ' i ' ri kleueng ' na ' pun heun .'

³¹ Kuing ' na ' eun lah ' , 'Kon ' , ut ' mi mae ' ui ' laleng . Hk'eung kue ' ui ' na ' gawm ' euc ' ka meuh a is ' mi .
³² E ' htuk ' ri yeuh ku ' ren ' kaw n , kopti awng ' mi aen ' yeum eun hawc ' daecti eun tang im ' bae na ' . Eun rai ' hawc ' , daecti tang hk'eup ' nyu eun hawc ' .'

Leukah ' leupong ' lawng nang un ' leupaws seumeu ' roksa ' vahtu ' hk'il ' leumuil

16 Yesu ' Eun lah ' a ri tapae ' ri na ' ce , "Kue ' a peue meuneum ti peue , peue ing ' lah ' eun mhawng ' lawng peue roksa ' vahtu ' hk'il ' leumuil eun na ' cai ' eun ri tec vahtu ' hk'il ' leumuil eun na ' .² Kop awn ' na , eun klawng peue roksa ' vahtu ' hk'il ' leumuil ri na ' eun ing ' ri ti . Eun mhaing ' eun , 'Mi ci ' kaw lah ' a yeuh sa ' nhaw ' pun ui ' ri mhawng ' lawng mi na ' ? Tuil ' ca ' lang ' roksa ' vahtu ' hk'il ' leumuil mi na ' ri ui ' . Kopti kaw mi un ' laee pun ri yeuh kan ' roksa ' vahtu ' hk'il ' leumuil ui ' na ' bae na ' .'

³ Yam awn ' na , ku ' roksa ' vahtu ' hk'il ' leumuil awn ' eun kuit a nang hpum ' ri , 'Ui ' ci ' kaw htuk ' ri yeuh sa ' nhaw ' , cawo ' ui ' na ' kaw eun ti ui ' lih hk'ai ' kan ' ri na ' . Ui ' kaw kung ' bhen ' keute ' , ui ' ku un ' kue ' kaw l ' reng . Ui ' kaw eo ' hk'o ' ri hk'a , ui ' ku kaic ri peue .
⁴ Yam hawc ' lih ui ' hk'ai ' kan ' ri na ' , punta kaw peue tang rap ri ti ui ' nang nya ri na ' ui ' kaw yeuh sa ' nhaw ' na ' , yawng ui ' a hawc ' .'

⁵ Kop awn ' na , eun klawng peue kue ' ku ' ma ri cawo ' eun na ' ce ing ' ri ti ti peue hawc ' ti peue . Eun mhaing ' ku ' nanggal ' na ' eun , 'Mi ci ' kue ' ku ' ma ri cawo ' ui ' na ' eun a ' neng?'

⁶ Eun top ' a , 'Kue ' ui ' ku ' ma lamawn hku ' sanlon tipak ' pung ' .'

Peue roksa ' vahtu ' hk'il ' leumuil na ' eun lah ' a ri heun , 'Ti ca ' lang ' mi na ' ing ' mok ' vaeveae mhe ' ri tem ' a meuh hpawn ' kul ' pung ' reu ' .'

⁷ Hawc ' ko ' , eun tang lah ' a ri nang ti peue na ' eun , 'Mi ci ' kue ' ku ' ma ri cawo ' ui ' na ' eun a ' neng?'

Eun top ' a , 'Kue ' ui ' ku ' ma ngho ' tipak ' htong ' .'

Peue roksa ' vahtu ' hk'il ' leumuil na ' eun lah ' a ri heun , 'Ti ca ' lang ' mi na ' ing ' mhe ' ri tem ' a meuh seudi ' kul ' htong ' reu ' .'

⁸ Cawo ' na ' eun suk ' seun ' peue roksa ' vahtu ' hk'il ' leumuil un ' leupaws seumeu ' awn ' eun , kopti cang yeuh

eun a mae ' heng ' laet ' ri na ' . Kopti peue bhen ' keute ' na ' heng ' laet ' ce hk'a ' naee vang ka ce to ' ku ' seun ' ce ri na ' hk'ai ' peue ku ' ceng ' na ' ce .⁹ Lah ' Ui ' a ri pe ' , 'Lo ' hk'il ' leumuil bhen ' keute ' na ' sok a ' mawo reu ' . Yam hk'il ' leumuil na ' euc ' ka na ' , punta kaw Eun rap ri ti mi lec vang ut ' cot ' cu na ' .'

¹⁰ Peue yum ' pun hk'a ' naee ku ' aet ' na ' eun , eun ku yum ' pun hk'a ' naee ku ' keuting na ' yeut . Peue un ' leupaws seumeu ' hk'a ' naee ku ' aet ' na ' eun , eun ku un ' leupaws seumeu ' hk'a ' naee ku ' keuting na ' yeut .¹¹ Kop awn ' na , pe ' lawn meuh peue yum ' un ' pun hk'a ' naee hk'il ' leumuil bhen ' keute ' na ' ko ' , a ' nhaw ' ci ' kaw ap pe ' roksa ' hk'il ' leumuil caetcaet ka pang mao ' na ' ?
¹² Punta kaw pe ' roksa ' hk'il ' leumuil peue na ' , peue lawn yum ' un ' pun pe ' ko ' , a ' nhaw ' ci ' kaw pen ' ap hk'il ' leumuil na ' meuh is ' pe ' ?'

¹³ A saec ' meuh a ' nhaw ' , eun kaw un ' cang yeuh mhai ' cawo ' lal ' peue . Kopti eun lawn ces ri ku ' ti peue na ' eun ko ' , eun kaw leumeus ' ku ' ti peue na ' eun . Eun lawn yumyam ' ku ' ti peue na ' eun ko ' , eun kaw un ' nawpsang ku ' ti peue na ' eun . Pe ' kaw un ' cang yeuh mhai ' ka hk'il ' leumuil na ' mae ' mhai ' Eun Peucawo ' na ' tiduih ' .'

Leukah ' ritroe mae ' kuing ' Eun Peucawo '

¹⁴ Yam peue Hparisae ' ku ' leumeus ' leumuil na ' pun ce ri mhawng ' lawng ku ' Yesu ' lah ' Eun gawm ' euc ' na ' , ce sa ' leuhkok ' ceul sum ' keunyas Eun .¹⁵ Yesu ' Eun lah ' a ri ce , "Pe ' saec ' yeuh ri seun ' peue leupaws seumeu ' nanggal ' peue ko ' , daecti Peucawo ' yawng Eun hpum ' pe ' na ' yeut . Ku ' tang ' peue ngos heun ' na ' meuh a ku ' hk'aw ' jeuk hk'i ' ngai ' Eun Peucawo ' .'

¹⁶ Leukah ' ritroe na ' mae ' leukah ' ce peue suip leukah ' Eun Peucawo ' na ' pao ' ris a ri ing ' rot cu eun Yo ' han na ' . Tang ' neum yam awn ' na , leukah ' mun ' ren ' kaw n lawng kuing ' Eun Peucawo ' na ' a ku pao ' ris ri ing ' yeut . Peue gawm ' euc ' ce tawk ' net puri lec kuing ' awn ' na .¹⁷ Bhen ' keute ' mae ' mao ' na ' kaw a rai ' na ' kaw a sam ' ran hk'ai ' vang mhai ' aet ' kue ' hk'a ' naee htawm leukah ' ritroe na ' kaw a hk'uic ' rai ' na ' .'

Yesu ' sangsawn ' Eun lawng tec beun '

¹⁸ A ' nhaw ' lawn tec beun ' ri , hawc ' ko ' eun ti ri is ' beun ' seubu ko ' , len ' cu eun . Me ti beun ' tec me ri na ' eun ko ' , eun ku len ' cu yeut .

Peue meuneum mae' Lasaru'

¹⁹ Kue' a peue meuneum ti peue. Eun cuip' hk'eung yawtmong na' mae' hk'eung hpen' linin chak' na' eun ren' kawn hk'a suk' hk'a munkvaen keuyuit. ²⁰ Mae' bawl' leuva' ru eun na', a kue' peue hk'o' ri hk'a muis Lasaru'. Eun sui' bhuic' gawm' tu' ri, eun hkawthkaet ri mawn'. ²¹ Eun sum' hk'a ku' hk'a hk'uic' hk'a' ruim hpuin' eun peue meuneum awn' na. Saec' meuh so' na' a ing' laet vang sui' eun na'.

²² A rot ti seunyi, peue hk'o' ri hk'a awn' eun yeum. In' hpom ce uin' eun mae' Abraham eun. Peue meuneum na' eun ku yeum. Peue puing' eun. ²³ Yam ut' eun nang kuing' yeum na', eun pun ri hkam' ku' tukhka reng nyawk' na', eun mung' ri nyu Abraham eun seungai nung'. Lasaru' eun ku ut' mae' Abraham eun. ²⁴ Kop awn' na, eun klawng ri lah' a ri heun, 'A' kuiing' Abraham, hk'o' mi tukyak ri ui'. Kopti pun ui' ri tukhka nang ngawl aen' na nyawk' na', mi na' kah Lasaru' eun cup geun' ti' ri nang leuum' na', eun na' jam a seucet dak' ui' na'.

²⁵ Daecti Abraham eun top' a, 'A' ai', un' pawn mi yam a' yu im' mi na' pun mi ku' chak' na', daecti Lasaru' eun pun ku' un' chak' na'. Maet' maen' pun eun ri ut' vang kuit nyawk' kuit sam' ran na', mi ri mi pun ku' tukhka nyhap' na'. ²⁶ Lheu' awn' na, a kue' ruik' keuting kat' seuna' e' na'. Kop awn' na, a' nhaw' saec' sum' heul' neum maen' na' heul' ri mi, peue un' cang heul'. A' nhaw' saec' sum' ing' neum teh' na' ing' ri ui', peue ku kaw un' cang ing' yeut.'

²⁷ Peue meuneum na' eun top' a, 'A' kuiing', a lawn yeuh keutit' ko', hk'o' mi kah Lasaru' eun ing' ti nya eun kuiing' ui' na', ²⁸ kopti kawn' kue' ui' awng' me hpawn' peue. Punta kaw ce un' pun ri rot vang tukhka aen' a na', kah Lasaru' eun ing' deun' sati ce reu'.

²⁹ Abraham eun tang top' a, 'Kue' ce leukah' eun Mo' se mae' leukah' ce peue suip leukah' Eun Peucawo' na' hawc', uin' ce lak' leuceng leukah' ce na' reu'.

³⁰ Peue meuneum na' eun tang lah', 'Un' meuh, kuiing' Abraham, peue tang kuh' im' na' eun lawn heul' ri ce ko', kaw ce taws' hpum' fuin map' ri yeut.'

³¹ Abraham eun lah' a ri heun, 'Ce lawn un' leuceng leukah' eun Mo' se na' mae' leukah' ce peue suip leukah' Eun Peucawo' na' ko', peue yeum na' eun saec' na' tang kuh' im', ce hkuin' kaw yum' a.'"

Map'

17 Yesu' Eun lah' a ri tapae' ri na' ce, "Hk'ai yeuh peue yeuh map' na' kaw a kue' neum. Daecti peue tung' hk'ai yeuh peue yeuh map' na', kaw eun pun ri hkam' hk'a' jha' na'. ² Mawt ri tuik' seumu maw' na' ri ngok eun na' ploee' eun nang mha' seumut' na' ko', a na' jaen chak' hk'ai' uin' eun yeuh peue aet' ti peue na' eun yeuh map' na'. ³ Kop awn' na, uin' sati ri meulamlam ri meun reu'.

Ec' awng' mi na' eun lawn kleuc' ko', sangsawn' mhe' eun. Eun lawn taws' hpum' fuin map' ri ko', ploee' map' eun. ⁴ Ce saec' kleuc' mi seunyi ka' a' res pok, daecti ce lawn ing' lah' a ri mi a' res pok ko', 'Taws' ui' hpum' fuin map' ri hawc'', mi ku na' ploee' map' ce na'."

Hk'a' yum'

⁵ Peue caee Eun Yesu' na' ce lah' a ri Heun, "Hk'o' Mi yeuh hk'a' yum' ye na' gawm heun'."

⁶ Yesu' Eun top' a, "Pe' lawn kue' hk'a' yum' keuteul seumal ka hpapu na' ko', pe' kaw cang lah' a ri kleum' a' mon aen' na, 'Heul' jheum' ri nang mha' seumut' na' gawm' ngul ri na' reu'', a ku kaw leuceng ku' lah' pe' na' yeut.

Beus mhai'

⁷ U' hpama ri, hk'a' naee pe' ri ti ri peue, eun lawn kue' mhai' htaee' na, a' ko' mhai' go' kon' yung' ti peue ko', yam mhai' awn' ing' eun neum mal' ri na', 'Ing' mok' ri hk'asom' reu'', cawo' na' kaw eun lah' a yeuh keutit' ri mhai' ri na' eun aw? ⁸ Cawo' na' kaw eun lah', 'Raen ku' hk'a' pun ui' reu'. Rangraen tu' mi na' meulamlam ri ko' ui' rot ti sak' som' ui'. Ui' lawn sak' som' hawc' ko', mi na' kawn' pun ri som'', un' meuh ka aw? ⁹ Kopti mhai' awn' yeuh eun a seun' ku' lah' eun na', kaw eun lah' mun' keuting ri mhai' ri na' eun aw? ¹⁰ Saec' pe' ri, pe' lawn hawc' yeuh ku' Peucawo' kah Eun ri yeuh na' gawm' euc' ka ko', pe' na' htuk' ri lah' a yeuh keutit', 'Meuh ye mhai' hk'o' hk'awng'. Ye yeuh beus ri na' palkoe.'"

Bai' peue naw kul' peue cuin

¹¹ Yam Yesu' buih heul' Eun nang veng Yeru' salaem na', Eun hot' mhuil' kuing' Samari' na' mae' kuing' Galilae' na'. ¹² Yam lec Eun nang yung' ti yung' na', peue naw kul' peue na' ce cawng ri ko' Eun vang seun-

gai na'.¹³ Ce klawng ri lah' laws', "Cawo' Yesu', hk'o' Mi tukyak ri ye."

¹⁴ Yam Yesu' nyu Eun ce na' Eun lah', "Heul' tuil' peue jhawp' rit na' ce nyu tu' pe' na' reu'." Yam buih heul' ce na', ce cuin.

¹⁵ Hk'a' naee ku' kul' peue awn' ce, ku' ti peue na' yam nyu eun tu' ri na' cuin ka hawc' na', eun tang ing' lah' seng' laws' suk' seun' Peucawo' Eun.¹⁶ Eun nghup' buh ri na' mae' cung Eun Yesu' na', eun mun' keuting ri Heun. Peue awn' eun meuh peue Samari'.

¹⁷ Yesu' Eun lah', "Ku' cuin na' kue' ce kul' peue, un' meuh ka aw? Ku' seudim' peue na' ce ci' ut' tawngnhaw'?"¹⁸ A lawn un' meuh yawo peue ceu seubu ti peue aen' eun ko', un' kue' a nang keutah ing' suk' seun' mun' Eun Peucawo' saec' ti peue aw?"¹⁹ Hawc' ko', Yesu' Eun lah' a ri heun, "Kuh' heul' reu', hk'a' yum' mi na' yeuh a mi cuin hawc'."

Kuing' Eun Peucawo' lih ka

²⁰ A kue' ti pok, peue Hparisae' na' ce mhaing', "Kuing' Eun Peucawo' na' a ci' kaw lih yamnhaw'?" Yesu' Eun top' a, "Kuing' Eun Peucawo' na' kaw a un' lih seun' ku' cang nyu pe' na'.²¹ A' nhaw' hkuin' kaw lah', 'Kue' a maen', a' ko' 'Kue' a teh'. Kopti kuing' Eun Peucawo' na' kue' a hk'a' naee pe' ri."

²² Hawc' ko', Eun lah' a ri tapae' ri na' ce, "Yam awn' a kaw rot yam sum' nyu pe' seunyi Eun Kon' ai' peue ti seunyi na', daecti pe' kaw un' nyu a.²³ Peue kaw lah' a ri pe', 'Ut' Eun teh', a' ko' 'Ut' Eun mawn'. Daecti pawlaee hot' ce heul'.²⁴ Kopti hk'a' naee seunyi Eun Kon' ai' peue na', a kaw seun' cak' cal' na' til' ka ti plak' mao' na' a ceng' rot hk'a' ti plak' ka na' ko'.

²⁵ Daecti nanggal' awn' na, Eun kaw n' kaw kah ri hkam' ku' tukhka heun' ceu na', mae' peue cu aen' tecla ce ri na'.

²⁶ Seun' ku' meuh hk'a' naee seunyi cu eun No' ah na', a ku kaw meuh hk'a' naee seunyi Eun Kon' ai' peue na' yeut.²⁷ Peue na' ce hk'asom', pen' vel ti beun' ti me rot ti seunyi No' ah lec eun nang reu na'. Hawc' awn' na, leu-um' na' a htu' ce lulaic gawm' euc'.

²⁸ A ku seun' cu Law' ta na' yeut, peue hk'asom', paing' leuvaee, puin' jheum', pleng' nya.²⁹ Daecti seunyi yam Law' ta puc eun ri neum veng So' dom na', ngawl mae' mat na' a lih seun' lhe' neum pang mao' ko'. A yeuh ce lulaic gawm' euc' ri.

³⁰ Seunyi yam Kon' ai' peue puc Eun ri lih na', a ku kaw seun' awn' a yeut.³¹ Seunyi awn' na, peue ut' pang

† Seunyi Eun Kon' ai' peue na' meuh a seunyi yam Cawo' Yesu' kaw Eun tang lih.

a' ras' na' ce pawlaee ing' ti vahtu' hk'il' leumuil hk'a' naee nya ri na'. Seun' awn' na, saec' meuh peue ut' nang mal' na' ce, htuk' ri un' ing' ti hk'eung ri yeut.³² Kuit rot ri beun' Law' ta na' ka reu'.³³ Peue co' -ca' a' yu ri pon na', kaw ce sum a' yu ri. Peue sum a' yu ri na', kaw ce pun a' yu pon.³⁴ Ui' lah' a ri pe', bul awn' na, peue lal' peue it' nang hk'eung it' tiduih' na' ka, ku' ti peue na' eun kaw pun ri ti ri huk', ku' ti peue na' eun kaw pun ri uin' ri ut'.³⁵ Beun' lal' peue maw' moc' tiduih' na' ka, kaw ti eun heul' ti peue, uin' eun ti peue.

³⁶ Peue lal' peue ut' nang mal' na' ka, kaw ti eun heul' ti peue, uin' eun ti peue."³⁷ Ce mhaing' Eun, "A ci' kaw meuh tawngnhaw',

Cawo'?" Eun top' a, "Tu' yeum na' a lawn kue' tawngnhaw' ko', raeng na' a kaw cu ri ri ka."

Leukah' leupong' lawng a' ya seunao un' kleh' un' mhong'

18 Hawc' ko', Yesu' lah' Eun leukah' leupong' sangsawn' tapae' ri na' kaw ce un' kleh' ri hk'o' ri mun' laleung na'.² Eun lah', "Veng ti veng na' kue' a cawo' taws' a' mu ti peue. Eun meuh peue un' lhat' til ri Peucawo' Eun, un' keue' ri buh peue.³ Nang veng awn' na, a kue' a' ya seunao ti peue. Ka heul' hk'o' a ri cawo' taws' a' mu awn' eun tam' teuk, 'Hk'o' mi taws' a' mu ui' na' leupaws seumeu' reu'."

⁴ Cawo' taws' a' mu awn' eun un' cheun' ri ri ka ti cu hkao'. Daecti vang tisut' ka na', eun kuit a nang hpum' ri, 'Ui' saec' un' lhat' til ri Peucawo' Eun, un' keue' ri buh a' nhaw' ko',⁵ daecti kopti a' ya seunao aen' ti yam ti yam ko' ka ri suksak ui' na', punta kaw ka un' laee ing' hkvi ui' bae na', ui' kaw tuil' hk'a' leupaws seumeu' na' ri ka."

⁶ Cawo' Yesu' Eun tang lah', "Leuceng ku' lah' eun cawo' taws' a' mu un' leupaws seumeu' aen' na reu'.⁷ Peue Peucawo' leuk Eun ri ti na' ce lawn hk'o' hk'ang ri Heun peunsum' peunnyi ko', kaw Eun un' tuil' hk'a' leupaws seumeu' na' ri ce aw? Kaw Eun hkawe ri ling' aw?⁸ Ui' lah' a ri pe', kaw ce pun hk'a' leupaws seumeu' na' vaeavaee Eun kaw nom' nawk ce. Daecti yam Kon' ai' peue tang lih Eun na', kaw n' kaw Eun nyu peue yum' pang bhen' keute' na' aw?"

†† Hk'a' naee nambat aet' 34, 35, 36 na', Peucawo' Eun kaw ti peue ti peue, uin' ti peue.

Leukah' leupong' lawng peue Hparisae' mae' peue cep' hkawn'

⁹ Punta peue nawp ri leupaws seumeu' meun daecti chaw peue seubu na' peue, Yesu' Eun ris leukah' leupong' aen' na, ¹⁰ "Peue lal' peue na' huk' hk'o' ka mun' nang nya hk'o' mun' keuting na'. Nang ti peue na' eun meuh peue Hparisae', ku' ti peue na' eun meuh peue cep' hkawn'. ¹¹ Peue Hparisae' na' eun kuh' cawng ri hk'o' mun' lah' lawng tu' ri meun, 'O', Kuing' Peucawo', mun' keuting ui' ri Mi kopti un' seun' ui' peue seubu na' ce, meuh ce peue con', peue rai, peue len' cu mae' peue cep' hkawn' aen' eun. ¹² Ui' eut' ku' hk'a ri vung ka lal' pok. Ku' pun ui' na' gawm' euc' ka, ui' tan a kul' pun ti pun.'

¹³ Daecti peue cep' hkawn' na' eun cawng vang seungai na'. Saec' meuh mao' na' eun un' hat' ti mung' a, daecti eun nu' nuk' ri na' lah', 'O', Peucawo', hk'o' Mi tukyak ri meuh ui' peue map' keuting.'

¹⁴ Ui' lah' a ri pe', Yam peue awn' ing' eun ti nya ri na', Peucawo' Eun sawn' eun meuh peue leupaws seumeu' nanggal' ri hk'ai' peue seubu na' eun. Kopti saec' meuh a' nhaw' eun lawn ti ri keuting lhung' meun ko', eun kaw hkam' hk'a' nuic ri tem na'. Daecti saec' meuh a' nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lhung' na'."

Yesu' nap Eun mun' ri kon' nyom aet'

¹⁵ Peue neng' ri ing' tuil' Yesu' Eun paic' kon' nyom na' ce. Yam tapae' na' nyu ce a na', ce is' ce. ¹⁶ Daecti Yesu' Eun klawng kon' nyom aet' na' ce ing' ri ti, "Tae' kon' nyom aet' na' ce ing' ri Ui' reu', pawlaee ham' ce. Kopti kuing' Eun Peucawo' na' meuh a kuing' ce peue ku' seun' kon' nyom aet' aen' ce. ¹⁷ Ui' lah' a ri pe' neumneum, a' nhaw' lawn un' rap ri ti kuing' Eun Peucawo' na' seun' kon' nyom aet' na' ce ko', eun hkuin' kaw duing pun ri lec nang kuing' Eun Peucawo' na'."

Hkun' meuneum

¹⁸ Hkun' ti peue na' mhaing' eun Yesu' Eun, "Seura' chak', ui' ci' kaw kah ri yeuh sa' nhaw' ui' na' pun cit' tip a' yu tip cot' cu na'?"

¹⁹ Yesu' Eun top' a, "A ci' meuh kop keunhaw' mi vae' lah' Ui' chak'? A lawn un' meuh yawo Peucawo' Eun ko', a' nhaw' hkuin' chak' saec' ti peue. ²⁰ Yawng mi ku' lah' ka leukah' ritroe na', 'Pawlaee len' cu, pawlaee toh peue, pawlaee rabawk' peue, pawlaee

hkam' sa' hki' un' kue' un' meuh, hkopyawm' ri makuiing' mi ka.'†"

²¹ Hkun' awn' eun lah', "Aen' ce gawm' euc' leuceng ui' ri yeuh a tang' neum yam kawn' aet' ui' na' hawc'."

²² Yam Yesu' mhawng' Eun leukah' awn' a na', Eun lah' a ri heun, "Kawn' cut mi ti ceu. Heul' paing' ku' kue' mi na' gawm' euc' ka, gvah ri tuil' peue hk'o' - tukyak na' ce is' a reu'. Mi kaw kue' sin' ngos heun' nang kuing' pang mao' na'. Hawc' ko', mi na' ing' hot' Ui' reu'."

²³ Yam pun eun ri mhawng' leukah' aen' a na', eun kuit nyhap' nyawk'. Kopti meuh eun peue meuneum nyawk' na'. ²⁴ Yesu' Eun keue' ri heun. Eun lah', "Peue meuneum na' kaw ce lec nang kuing' Eun Peucawo' na' a nyhap' nyawk'. ²⁵ Neumneum ka na' ko', kalaok' ti tu' na' kaw a lec muis peunye na' kawn' sam' ran a hk'ai' peue meuneum na' kaw eun lec nang kuing' Eun Peucawo' na'."

²⁶ Ku' mhawng' a na' ce mhaing' Eun, "Yeuh keutit' ko', a' nhaw' ci' kaw cang pun hk'a' htut lawtpon na'?"

²⁷ Yesu' Eun top' a, "Ku' peue un' cang yeuh peue meuh na', Peucawo' cang yeuh Eun a meuh."

²⁸ Petru' eun lah' a ri Heun, "Tec ye ku' kue' ri na' ku ceu ka, ye hot' Mi."

²⁹ Yesu' Eun lah' a ri ce, "Ui' lah' a ri pe' neumneum, a' nhaw' lawn tecla nya ri, a' ko' beun' ri, a' ko' ec' awng' ri, a' ko' makuiing' ri, a' ko' kon' hk'i ri ce kop pun kuing' Eun Peucawo' na' ko', ³⁰ eun kaw pun nammaet ka heun' pun hk'a' naee cu cat aen' na mae' eun kaw pun cit' tip a' yu tip cot' cu na' hk'a' naee cu cat na' ri na'."

Yesu' tang lah' Eun lawng kaw ri pun ri yeum na' bae

³¹ Yesu' va Eun tapae' kul' leual' peue ri na' ce gveh' hk'a' na'. Eun lah' a ri ce, "Buih huk' e' nang veng Yeru' salaem. Lawng Eun Kon' ai' peue ku' peue suip leukah' Eun Peucawo' tem' ce na' gawm' euc' ka na' kaw a htonnuk. ³² Peue kaw ap Eun nang dak ti' ce peue un' meuh peue ceu Yu' da na'. Ce kaw lah' ku' pleh ku' jaing, ku' un' nawpsang, htueng', ta' faet' Eun. Hawc' ko', ce kaw toh Eun. ³³ Yam meuh a loe' seunyi ka na', Eun na' tang kuh' im'."

³⁴ Tapae' na' ce leuceng un' pun lawng aen' na saec' peunae'. Vangdoh' ka leukah' awn' na, a geup' ri ce. Ce un' yawng Yesu' buih lah' Eun lawng keunhaw'.

† Pucti heul' 20:12; Sawn' leukah' mun' 5:16-20

Yesu ' bai ' Eun peue ngai ' lec ' cuin

³⁵ Yam Yesu ' rot Eun keunam veng Yeri ' hko ' na ' , peue ngai ' lec ' ti peue na ' eun mok ' ri hk'o ' ri hk'a keunam hk'a ' na ' . ³⁶ Yam mhawng ' eun peue cum heun ' na ' hpai ce ri heul ' na ' , eun mhaing ' ce, "A ci ' meuh keunhaw ' ?" ³⁷ Ce lah ' a ri heun, "Yesu ' peue veng Nasaraet ' buih hpai Eun heul ' ."

³⁸ Eun klawng ri lah ' , "Yesu ' Kon ' ai ' Davit ' , hk'o ' Mi tukyak ri ui ' ."

³⁹ Peue heul ' nanggal ' na ' ce saec ' is ' eun, kah eun dit ' ti. Daecti eun gawm klawng ri lah ' laws ' a, "Kon ' ai ' Davit ' , hk'o ' Mi tukyak ri ui ' ."

⁴⁰ Yesu ' Eun kuit ' . Eun kah ce va eun ing ' ri ti. Yam ing ' rot eun keunam Eun na ' , Yesu ' Eun mhaing ' eun, ⁴¹ "Mi ci ' sum ' kah Ui ' yeuh keunhaw ' ri ti?"

Eun lah ' , "Cawo ' , sum ' nyu ui ' hk'a ' ri."

⁴² Yesu ' Eun lah ' a ri heun, "Nyu hk'a ' ri reu ' . Hk'a ' yum ' mi na ' yeuh a mi cuin hawc ' ."⁴³ Eun keulawn ' cang nyu hk'a ' ri. Eun hot ' Yesu ' Eun heul ' . Eun suk ' seun ' Peucawo ' Eun. Yam peue gawm ' euc ' na ' nyu ce a na ' , ce ku suk ' seun ' Peucawo ' Eun.

Sakae ' peue cep ' hkawn '

19 Yesu ' lec Eun nang veng Yeri ' hko ' na ' . Yam buih hpa ' Eun a heul ' na ' ,² mawn ' na ' a kue ' peue muis Sakae ' ti peue. Eun meuh ro ' peue cep ' hkawn ' . Eun meuneum nyawk ' .³ Sum ' nyu eun Yesu ' Eun ci ' na ' meuh a ' nhaw ' . Daecti Sakae ' na ' meuh eun peue tem, eun un ' cang nyu Yesu ' Eun. Kopti peue heun ' na ' tawk ' net ce puri na ' .⁴ Kop awn ' na, punta kaw eun nyu Yesu ' Eun na ' , eun hk'uih heul ' nanggal ' . Eun heul ' huk ' kleum ' keutuic keunam hk'a ' vang Yesu ' kaw Eun ing ' na ' .

⁵ Yam Yesu ' rot Eun mawn ' na ' , Eun mung ' ri lah ' a ri heun, "Sakae ' , lih vaeveae. Kaw Ui ' pun ri ing ' it ' ti nya mi seunyaen ' ."⁶ Kop awn ' na, Sakae ' eun keulawn ' lih ren ' kawn rap ri ti Eun.

⁷ Yam peue heun ' na ' pun ce ri nyu a na ' , ce meunui ' meunui ' lah ' , "Eun vae ' heul ' meuh chec ' peue map ' ."

⁸ Daecti Sakae ' eun cawng ri lah ' a ri Yesu ' Eun, "Cawo ' , keue ' reu ' , tang ' neum maet ' maen ' na ' kaw ui ' gvah vahtu ' hk'il ' leumuil ri na ' ri peue hk'o ' tukyak na ' ce hpa ' hk'eung. Ui ' lawn caw ri chi ' lai ri ti is ' peue ko ' , ui ' kaw tang sai ' a pun ' pun."

⁹ Yesu ' Eun lah ' a ri heun, "Seunyaen ' , Peucawo ' htut Eun nyahk'ul ' aen ' a hawc ' . Kopti peue aen ' eun ku

meuh kon ' eun Abraham yeut. ¹⁰ Kopti punta kaw Eun sok ri teum ' kawm htut peue rai ' na ' ce lawtpon na ' , Kon ' ai ' peue Eun lih."

Leukah ' leupong ' lawng leumuil kul ' cawe

¹¹ Yam buih leuceng ce leukah ' awn ' a na ' , kopti kaw Eun hk'aws ' rot keunam veng Yeru ' salaem na ' , ce hteum ' kuing ' Eun Peucawo ' na ' a kaw keulawn ' pucti lih na ' . Yesu ' Eun lah ' leukah ' leupong ' ri ce. ¹² Eun lah ' , "Peue meuh ceu hkun ' ti peue na ' heul ' eun nang kuing ' seungai punta kaw eun ti an ' nya hkun ' haw ' hkam ' na ' , hawc ' ko ' , eun kaw tang ing ' na ' .¹³ Kop awn ' na, eun klawng mhai ' ri na ' ce kul ' peue. Eun tuil ' leumuil ri ce ti peue ti cawe. Hawc ' ko ' , eun tawm ' ri uin ' leukah ' ri ce, 'Pe ' na ' ka leumuil aen ' na rot yam ing ' rot ui ' ."

¹⁴ Daecti peue hk'a ' ruim eun na ' ce ces ri heun. Ce ploee ' peue tang ' tu ' ri na ' eun hot ' eun heul ' lah ' , 'Un ' sum ' is ' ye kaw eun meuh hkun ' haw ' hkam ' u ' peung hk'a ' pang ye.'

¹⁵ A saec ' yeuh sa ' nhaw ' , eun pun an ' nya hkun ' haw ' hkam ' na ' eun tang ing ' ti nya. Eun kah peue heul ' klawng mhai ' tuil ' eun leumuil ri ce na ' ce ing ' hk'eup ' ri. Eun sum ' yawng ce ci ' maet a ' neng.

¹⁶ Mhai ' ku ' nanggal ' na ' eun ing ' lah ' , 'Cawo ' , heul ' ka ui ' leumuil ti cawe mi na ' ui ' tang pun nammaet ka kul ' cawe.'

¹⁷ Cawo ' na ' eun lah ' , 'Chak ' ka, mhai ' chak ' ui ' . Kopti leupaws seumeu ' mi hk'a ' nae ku ' aet ' na ' , mi na ' u ' peung veng kul ' veng na ' reu ' .'

¹⁸ Lal ' peue ti peue na ' eun ing ' lah ' , 'Cawo ' , heul ' ka ui ' leumuil ti cawe mi na ' ui ' tang pun nammaet ka hpawn ' cawe.'

¹⁹ Cawo ' na ' eun lah ' , 'Mi na ' u ' peung veng hpawn ' veng na ' reu ' .'

²⁰ Hawc ' ko ' , mhai ' nang ti peue na ' eun ing ' lah ' , 'Cawo ' , maen ' , leumuil ti cawe mi na ' . Kao ui ' ri uin ' a nang hpen ' na ' .²¹ Lhat ' ui ' ri mi, kopti meuh mi peue hkan ' reng. Mi seut ' ri ti vang un ' uin ' . Mi vuic ri ti vang un ' puin ' .'

²² Cawo ' na ' eun lah ' , 'Mhai ' rai aen ' mi, kaw ui ' taws ' a ' mu ri leukah ' lah ' mi na ' . Yawng mi meuh ui ' peue hkan ' reng. Ui ' seut ' ri ti vang un ' uin ' . Ui ' vuic ri ti vang un ' puin ' na ' .²³ A ci ' yeuh keunhaw ' , mi vae ' un ' tuil ' leumuil ui ' na ' ri peue keucan leumuil na ' ce? Mi lawn yeuh a seun ' awn ' na ko ' , yam tang ing ' rot ui ' na ' , ui ' ku na ' tang pun leumuil ri na ' keutah mae ' nammaet ka na ' .'

²⁴ Hawc' ko', eun lah' a ri peue cawng keunam na' ce, 'Ti leumuil ti cawe eun na' hk'ai' heun, tuil' a ri ku' kue' kul' cawe na' eun reu'.'

²⁵ Peue awn' ce lah', 'Cawo', kue' eun leumuil kul' cawe hawc'.'

²⁶ Eun top' a, 'Lah' ui' a ri pe', ku' kue' na' ce ku' peue ce kaw tang tuil' ce bae, daecti ku' un' kue' na' ce ku' kawng' vang ce na' a kaw tang hue' ri lih hk'ai' ce. ²⁷ Pun peue meuh ransu ri ui' ku' un' sum' kah ui' u' peung hk'a' pang ri na' ce ko', va ri ing' toh ce nanggal' ui' mawn' reu'.'

Cawo' pe lec Eun nang veng Yeru' salaem

²⁸ Hawc' Yesu' lah' Eun a yeuh keutit' na', Eun tang suip hk'a' ri na' huk' nang veng Yeru' salaem na'.

²⁹ Yam huk' rot Eun nang yung' Bethpage' mae' yung' Betani' pang gong Sanlon na', Eun cus' tapae' lal' peue na' ka heul'. Eun lah' a ri ka, ³⁰ "Heul' ri yung' ut' nanggal' teh' a reu'. Yam heul' lec pa' yung' teh' a na', pa' kaw pun ri nyu rawngla aet' a' nhaw' un' nang duing pawk a na' mawt a ri teh'. Pa' na' kah' ri teuk' a heul' maen'. ³¹ Peue ti ri peue eun lawn na' lhon' ri mhaing' pa', 'A ci' yeuh keunhaw', pa' vae' kah' a?' pa' na' lah', 'Cawo' lo' Eun a.'

³² Yam tapae' cus' Eun lal' peue na' heul' ka na', ka pun ri nyu seun' a ku' lah' Eun na'. ³³ Yam buih kah' ka rawngla aet' na', cawo' ka na' ce mhaing' ka, "A ci' meuh kop keunhaw', pa' vae' kah' rawngla aet' na'?"

³⁴ Ka top' a, "Cawo' lo' Eun a."

³⁵ Hawc' ka teuk' rawngla aet' na' ing' ri Yesu' Eun na', ce lhup' hk'o dal' ri na' pang kui' ka na'. Yesu' Eun pawk a. ³⁶ Yam pawk Eun a heul' na', ce sawng' tawm hk'o ri na' nang gon' hk'a' na' heul'.

³⁷ Yam kaw Eun rot juil ka gong Sanlon na', tapae' cum heun' na' ce ren' kawng klawng laws' suk' seun' Peucawo' Eun kopti pun ce ri nyu ku' hk'o' am' yeuh Eun gawm' euc' na'.

³⁸ Ce lah', "Nap mun' ri Hkun' haw' hkam' ing' hk'a' ruim muis Eun Peucawo' na' Eun. †

Kah a kue' hk'a' kuit nyawk' kuit sam' ran cumyen' nang kuing' pang mao' na'. Pang lhung' hk'ai' peue na' kah Peucawo' Eun kue' munhpung'."

³⁹ Peue Hparisae' ut' nang peue cum heun' na' ngon' ce lah' a ri Yesu' Eun, "Seura', kah tapae' Mi na' ce dit' ti reu'."

⁴⁰ Eun top' a, "Kaw Ui' lah' a ri pe', ce lawn dit' ti ko', seumu na' ce kaw klawng."

† Suk' seun' 118:26

⁴¹ Eun rot mae' veng na'. Yam pun Eun ri nyu veng Yeru' salaem na', Eun yam ri veng na'. ⁴² Eun lah' a ri veng Yeru' salaem na', "Seunyaen', sum' kah Ui' veng Yeru' salaem na' mi yawng ku' kaw tuil' hk'a' kuit nyawk' kuit sam' ran cumyen' ri mi na', daecti maet' maen' ceu nang awn' ce a geup' ri ngai' mi na' hawc'. ⁴³ Seunyi yam awn' na' kaw a rot yam ransu mi na' kaw ce kung' ri is' tawp suik' ri mi, ce na' vet mi rop. ⁴⁴ Ce kaw yat ti dhim' mi pang bhen' keute' na', mi ri mae' kon' hk'i mi hk'a' naee hkui veng mi na'. Ce kaw un' lae uin' seumu na' po ri hk'a' pang puri saec' ti meul', kopti un' pawn mi yam Peucawo' lih Eun ri mi na'."

Yesu' huk' Eun nang nya hk'o' mun' keuting

⁴⁵ Hawc' awn' na, Eun lec nang kang' hkung' ka nya hk'o' mun' keuting na'. Eun ra ri tec peue paing' hk'eung na' ce pucti heul'. ⁴⁶ Eun lah' a ri ce, "Kue' a leukah' tem' ri yeuhki', 'Nya Ui' na' meuh a vang hk'o' mun' ††, daecti pe' yeuh a meuh vang hk'on' ro con'." ‡

⁴⁷ Eun sangsawn' nang nya hk'o' mun' keuting na' ku seunyi. Daecti ro' peue jhawp' rit keuting na' ce mae' peue guil leukah' ritroe na' ce mae' ro' kan peue kuing' na' ce sok hk'a' kaw ri toh Eun. ⁴⁸ Daecti ce un' nyu hk'a' kaw ri toh Eun, kopti peue gawm' euc' na' sum' leuceng ce leukah' sangsawn' Eun na' nyawk'.

Leukah' mhaing' lawng ti' ca Eun Yesu'

20 Kue' a ti seunyi yam Yesu' buih sangsawn' Eun peue heun' na' ce ri leukah' mun' ren' kawng nang kang' hkung' ka nya hk'o' mun' keuting na', ro' peue jhawp' rit, peue guil leukah' ritroe mae' nang kawt na' ce cu ri huk' mae' Heun. ² Ce lah' a ri Heun, "Mi na' lah' ye mhawng', Mi yeuh ceu nang aen' ce na', Mi ci' cu ti' ca keunhaw' yeuh a? A' nhaw' ci' tuil' ti' ca aen' a ri Mi?"

³ Yesu' Eun top' a, "Ui' ku kaw mhaing' pe' ti moeng yeut. Pe' na' lah' Ui' mhawng', ⁴ 'A' nhaw' ci' tuil' ti' ca tuil' hk'a' cum' na' ri Yo' han eun, neum kuing' pang mao' aw, a' ko' neum peue aw?"

⁵ Ce sa' lit puri lah', "E' lawn top' lih a neum kuing' pang mao' ko', Eun kaw tang cang mhaing' e', 'A ci' yeuh keunhaw' pe' vae' un' yum' eun?" ⁶ Daecti e' lawn top' lih a neum peue ko', peue heun' na' ce ku kaw cang dhim' e' ri seumu. Kopti yum' ce Yo' han meuh eun peue suip leukah' Eun Peucawo' na'."

†† I' saya' 56:7‡ Yerami' 7:11

⁷Kop awn' na, ce top' a ri Heun, "Un' yawng ye pun Eun a neum tawngnhaw'."

⁸Yesu' Eun lah', "Yeuh keutit' ko', Ui' ku hkuin' kaw lah' pe' mhawng' cu Ui' ti' ca keunhaw' Ui' yeuh ceu nang aen' ce yeut."

Leukah' leupong' lawng sang' hpa' val pli' bui

⁹Hawc' ko', Eun sangsawn' leukah' leupong' ri peue heun' na' ce. Eun lah', "Peue ti peue na' sang' eun val pli' bui, eun tuil' peue sang' val na' ce sang' hpa' a. Hawc' ko', eun heul' nang kuing' tawk seubu ling'.

¹⁰Yam rot a yam poc' pli' bui na', punta kaw eun ti pli' ku' kaw eun htuk' ri pun na', eun kah mhai' ri na' eun heul' ri peue sang' hpa' val na' ce. Daecti peue sang' hpa' val awn' ce peum' eun, ce ploë' eun ing' neh.

¹¹Eun tang kah mhai' seubu na' eun heul' ri ce baeë. Daecti ce ku peum' eun, yeuh ku' hk'o' kleh' ri heun. Hawc' ko', ce ploë' eun ing' neh yeut. ¹²Eun ku tang kah mhai' hton loë' peue ri na' eun heul' baeë. Ce ku peum' eun sui'. Hawc' ko', ce ti ri tec eun.

¹³Hawc' ko', cawo' ka val pli' bui na' eun lah', 'Ui' ci' kaw htuk' ri yeuh sa' nhaw'? Kaw ui' kah kon' me leumeus' ri na' eun heul' ri ce ceu. Na' ce chak' ri hkopyawm' ri heun.'

¹⁴Daecti yam peue sang' hpa' val na' nyu ce kon' me eun cawo' val na' eun na', ce sa' lit puri lah', 'Peue aen' meuh eun peue pun sin'. Pawh, e' toh eun. Sin' eun na' a na' meuh is' e'.' ¹⁵Kop awn' na, ce jong' ri tec eun hk'a' nok ka val na'. Hawc' ko', ce toh eun yeum. Kop awn' na, cawo' val na' eun ci' kaw yeuh sa' nhaw' ri ce? ¹⁶Kaw eun tang ing' toh peue sang' hpa' val awn' ce. Hawc' ko', eun kaw tang tuil' nang seubu ce sang' hpa' val awn' na." Yam peue heun' na' pun ce ri mhawng' leukah' awn' a na', ce lah', "Pawlaee kah a meuh yeuh keutit'."

¹⁷Yesu' Eun seuluil' ce. Eun lah', "Leukah' tem' ri aen' na, a ci' sum' lah' keunhaw'?"

'Seumu peue go' nya na' tec ce hawc' na', maet' maen' meuh a seumu kleum' ka nya vang a' ye' keuting hk'ai' seumu seubu na' hawc'.'[†]

¹⁸A' nhaw' lawn htang' meul pang seumu awn' a ko', eun kaw bet'. Daecti seumu awn' a lawn hk'uic' teng' a' nhaw' ko', eun kaw bet' nyai' ltheo'."

¹⁹Peue guil leukah' ritroe na' ce maeë' ro' peue jhawp' rit keuting na' ce keulawn' sok hk'a' kaw ri mheut' ri ti Eun, kopti yawng ce leukah' leupong' awn' lah' a ti ri na'. Daecti ce lhat' ri peue heun' na' ce.

Seue' hkawn' ri cawo' Kae' sa eun

²⁰Ce ploë' peue htom' jem' na' ce yeuh ri seun' meuh ri peue leupaws seumeu' heul' htom' de Eun. Ce keutu- i' hpum' kaw ri mhawng' Yesu' leukah' kleuc' Eun na'. Punta kaw ce tuil' Eun hkam' hk'a' taws' a' mu hk'a' ruim ti' ca hkun' cawo' na'. ²¹Peue htom' jem' na' ce ing' mhaing' Eun, "Seura', yawng ye sangsawn' lah' Mi ku' seumeu'. Mi un' meuh maeë' hk'a' mawn' hk'a' maen', daecti Mi sangsawn' a hot' hk'a' Eun Peucawo' na' neumneum. ²²Kaw ye htuk' ri seue' hkawn' ri cawo' Kae' sa eun aw, a' ko' un' seue' aw?"

²³Kopti Yesu' yawng Eun tung' ce ri ri ti na', Eun lah' a ri ce, ²⁴"Tuil' Ui' nawk paec ti htaep', htaep' na' a ci' kue' rup a' nhaw', muis a' nhaw'?"

²⁵Ce top' a, "Meuh a cawo' Kae' sa eun." Hawc' ko', Yesu' Eun lah', "Hk'eung eun cawo' Kae' sa na' tuil' a keutah ri cawo' Kae' sa eun. Hk'eung Eun Peucawo' na' tan a keutah ri Peucawo' Eun."

²⁶Kopti un' cang pun ce leukah' kleuc' lah' Eun nang- gal' peue heun' na', ce dit' ti. Kopti am' ce ri leukah' top' Eun na'.

Tang kuh' im' maeë' ti puri

²⁷Peue Sadu' kae' lah' tang kuh' im' a un' kue' na' ce ngon' ce ing' mhaing' Yesu' Eun, ²⁸"Seura', Mo' se tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a' ko' awng' eun na' eun kaw kah ri tang ti beun' awn' eun.' ²⁹Kue' a awng' ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. ³⁰Rot ti A' nyi na' eun, ³¹rot ti Aisam' na' eun ce ti beun' awn' eun. Awng' ec' awn' ce rot a' res peue ce ti beun' awn' eun. Ce un' tawn ri kue' kon', ce yeum gawm' euc' ri. ³²Vang tisut' ka na', beun' awn' eun ku yeum. ³³Yam tang kuh' im' na', beun' awn' eun ci' na' meuh beun' a' nhaw' ri ce, kopti ti ce beun' awn' eun gawm' a' res peue ri na'?"

³⁴Yesu' Eun top' a, "Peue cu cat maet' maen' na', ti puri maeë' kui' puri na' kue' ka. ³⁵Daecti peue kuing' ri pun hk'a' tang kuh' im' cu cat na' na' ce ko', ti puri maeë' kui' puri na' a hkuin' kaw laee kue'. ³⁶Ce ku un' laee pun ri yeum baeë, kopti kaw ce keut' ri seun' in' hpom na' ce. Ce meuh kon' hk'i Eun Peucawo', kopti meuh ce kon' tang kuh' im' na'. ³⁷Daecti hk'a' naee lawng bang' yuim na', Mo' se eun ku tuh' e' nyu peue yeum na' kaw ce tang kuh' im' yeut, kopti klawng eun

[†] Suk' seun' 118:22

Peucawo' Eun meuh Peucawo' eun Abraham, Peucawo' eun I'cak' mae' Peucawo' eun Yakop'.^{†38} Peucawo' un' meuh Eun Peucawo' ce peue yeum na', daecti meuh Eun Peucawo' ce peue a'yu im' na'. Kopti pun Peucawo' Eun na', peue gawm'euc' a'yu im' peue."

³⁹Peue guil leukah' ritroe na' ngon' ce lah', "Seura', ku' lah' Mi na' cawp' nyawk' ka."⁴⁰ Tang' neum yam awn' a na', a'nhaw' hkuin' laee hat' ri mhaing' Eun bae saec' ti peue.

Hkrit Eun ci' meuh kon' a'nhaw'?

⁴¹Hawc' ko', Eun lah' a ri ce, "Lah' peue Hkrit Eun meuh Kon' ai' eun Davit' na', a ci' kaw cang meuh yeuh sa'nhaw'?"⁴² Kopti tu' eun Davit' na' lah' eun a hk'a'nae htawm Suk'seun' na' yeuhki', 'Peucawo' lah' Eun a ri Cawo' ui' na' Eun, "Mok' hk'a' a' tawm' Ui' na'

⁴³rot ti yeuh Ui' ransu Mi na' ce meuh vang tang' cung Mi."††

⁴⁴Davit' eun ku vae' klawng Eun meuh Cawo', Eun ci' kaw cang meuh kon' eun Davit' yeuh sa'nhaw'?"

⁴⁵Yam peue gawm'euc' na' leuceng ce a na', Yesu' Eun lah' a ri tapae' ri na' ce,⁴⁶ "Uin' sati ri peue guil leukah' ritroe na' ce reu'. Sum' cuip' ce hk'o dal' eo' ri. Ce sum' kah peue luisa ri nang keulas. Ce sum' mok' ri vang mok' a'ye' keuting hk'ai' peue hk'a'nae sa'la vang hk'o' mun' na' mae' vang hk'asom' na'.⁴⁷ Ce rutrim' ri ti nya ce a'ya seunao. Ce yeuh ri hk'o' mun' ling' lang' sum' kah peue nyu ri. Ce kaw pun ri hkam' hk'a' ciyang reng na' lheu' peue ri."

Paec tan a'ya seunao

21 Yam Yesu' seucon' Eun na', Eun nyu peue me-uneum na' seue' ce leumuil tan hk'a'nae vang tan leumuil ka nya hk'o' mun' keuting na'.² Eun ku nyu a'ya seunao hk'o' tukyak na' seue' ka paec aet' lal' paec yeut.³ Eun lah', "Kaw Ui' lah' a ri pe' neumneum, a'ya seunao hk'o' tukyak aen' tan ka heun' hk'ai' peue gawm'euc'.⁴ Kopti ce ri, hue' ce a lih vang kue' ri heun' na' ce tan a. Daecti beun' aen' ka ko', ka saec' hk'o' -tukyak, ka ku tan ku' kaw uii' a'yu ri na' gawm'euc' ka."

Het' kaw hk'aws' rot yam tisut'

⁵Ku' yong' ka nya hk'o' mun' keuting seumu chak' ngam mae' ku' tan ri Peucawo' Eun aen' ce na', yam tapae' na' ngon' lah' ce a ri puri na', Yesu' Eun lah' a,

⁶"Ku' pun pe' ri nyu aen' ce, kaw a rot yam seumu po ri hk'a' pang puri na' un' laee vang a saec' ti meul'. A kaw pun ri seut' ri tec ri ku meul' ri."

⁷Ce mhaing' Eun, "Seura', ceu nang tit' ce a ci' kaw meuh yamnhaw'? Punta kaw e' yawng yam awn' kaw a hk'aws' meuh na', a ci' kaw kue' het' keunhaw'?"

⁸Eun top' a, "Punta kaw peue un' cang cop' ri ti pe' na', uin' sati ri reu'. Kopti peue heun' na' kaw ce peus muis Ui' na' ce na' ing' lah', 'Meuh ui' Heun ri', mae' 'Yam ka na' kaw a hk'aws' rot hawc'. Pe' na', pawlaee hot' ce heul'.⁹ Yam pun pe' ri mhaing' lawng peuing' suik' mae' kuing' na' fuin a ri na', pawlaee hpum' seuyuk. Lawng aen' kaw a kah ri meuh nanggal', daecti a hkuin' kaw nang keulawn' rot yam tisut' na'."

¹⁰Hawc' ko', Eun lah' a ri ce, "Peue ti ceu hawc' ti ceu, kuing' ti kuing' hawc' ti kuing', peue kaw kleuc' puri.

¹¹A kaw kue' in' san' keuting heun' pok, ut' ngeup' mae' peuyhat' a'nga heun' duih'. Ku' hk'o' lhat' nyawk' mae' het' keuting neum pang mao' na' a kaw pucti.

¹²Daecti nanggal' yam aen' ce gawm'euc' un' nang meuh ka na', peue kaw mheut' ri keunhap' pe'. Ce kaw cus' pe' heul' nang sa'la vang hk'o' mun' na' mae' nang htawng' na'. Ce kaw va pe' heul' ri hkun' haw' hkam' mae' cawo' veng na' ce. Aen' ce gawm'euc' a meuh kopti muis Ui' na'.¹³ A meuh kopti aen' na, pe' kaw pun ri hkam' sa' hki' ri ce.¹⁴ Daecti kuit a deut nang hpum' pe' na' nanggal', kaw pe' un' hki' keung ri ku' kaw ri top' kah' na'.¹⁵ Kopti punta ransu pe' na' kaw ce un' cang htu' hting' to' tam' pun pe' na', Ui' kaw tuil' cu' yi leukah' ri pe'.¹⁶ Saec' meuh makuing', awng' ec', ec' awng' mae' a' mawo pe' na' ce kaw fuin pe'. Ce kaw toh pe' yeum ngon'.

¹⁷Kopti meuh a Ui' ri, peue gawm'euc' peue kaw nyu pe' pereng ri.¹⁸ Daecti huik' cing' pe' na' a hkuin' kaw lu saec' ti nyeng.¹⁹ Kopti cang hpum' keutawn' pe' na', pe' kaw pun ri a'yu im'.

²⁰Yam pun pe' ri nyu muk suik' na' rop ce nang veng Yeru' salaem na', pe' kaw yawng veng awn' kaw a hk'aws' rot yam lu ka.²¹ Yam awn' na, peue ut' nang kuing' Yu' da na' kah ce hk'uih huk' nang gong, peue ut' nang veng na' kah ce pucti hk'uih, peue ut' hk'a' nok veng na' ce pawlaee tang ing' nang veng.²² Kopti sa' hkat' yam awn' na meuh ka sa' hkat' yam ciyang, aen' a meuh punta ku' tem' ri nang htawm na' kaw a htonnuk na'.²³ Sa' hkat' yam awn' na kaw a meuh ku' hk'o' lhat' keuting pun a'ya nyhel' mae' nang kue' kon' pui na' ce. Ku' kuit nyhap' nyawk' na' kaw a rot pang bhen' keute' aen' na. Hk'a' seungeueng' peulel

† Pucti heul' 3:6†† Suk'seun' 110:1

Eun Peucawo' na' kaw a rot hk'a' pang peue aen' ce.

²⁴ Ce kaw pun ri yeum ri leungawng. Peue kaw mheut' ce meuh peue htawng' teuk' ce heul' ku kuing'. Peue ceu seubu na' ce kaw jap' buin veng Yeru' salaem na' rot ti sa' hkat' ce na' htonnuk ka.

²⁵ A kaw kue' het' hk'a' naee seunyi, a' chi', se-umeueng' na' ce. Pang bhen' keute' na', peue ceu ku ceu peue kaw kuit nyhap' kuit yak kvang' mawo ri mha' -seumut' na', mae' ba leuum' na' seng' laws' ka.

²⁶ Peue kaw un' pawn kui' ri, kopti lhat' nyawk' peue ri ku' kaw kue' pang bhen' keute' na' kopti ti' ca ka mao' na' ku ceu ka a kaw pun ri keuyuih' fuui' fai' †.

²⁷ Yam awn' na, peue kaw pun ri nyu Kon' ai' peue na' lih Eun hk'a' naee putum' na' ri munhpung' ti' ca keuting ri na'. ²⁸ Yam ceu nang tit' tang' a ri kue' meuh na', pe' na' kuh' cawng ri mung' reu'. Kopti de mi kaw ri pun hk'a' htut lawtpon na' hawc'."

²⁹ Yesu' keutec Eun leukah' leupong' ri ce, "Keue' ri kleum' pli' keutuic na' mae' kleum' hku' na' ce gawm' euc' ka reu'. ³⁰ Yam gluh' ka na', pe' yawng meun kaw a hk'aws' rot yam kuc'. ³¹ Seun' awn' na, yam pun pe' ri nyu ceu nang awn' kue' meuh ka na', pe' kaw yawng kuing' Eun Peucawo' na' kaw a hk'aws' rot hawc'.

³² Kaw Ui' lah' a ri pe' neumneum, cu yam peue maet' maen' na' un' nang pon ce na', ceu nang aen' ce gawm' euc' a kaw meuh neum. ³³ Mao' na' mae' bhen' keute' na' kaw a rai', daecti leukah' Ui' na' a hkuin' kaw rai'.

³⁴ Uin' sati ri meulamlam ri reu', un' meuh ko', kaw pe' hk'ui' hpum' ri ku' ren' kawn pang bhen' keute' na', ku' cang yuic' mae' ku' kuit nyhap' ri a' yu pe' na'. Seunyi yam awn' na kaw a rot pang pe' yam un' pawn pe' kui' ri seun' hk'i' pe' hk'ai' na'. ³⁵ Kopti seunyi me yam awn' na kaw a rot hk'a' pang peue ut' pang bhen' keute' na' peue gawm' euc'. ³⁶ Punta kaw pe' cang pon ku' kaw meuh awn' ce gawm' euc' na' mae' kaw pe' cang cawng nanggal' Eun Kon' ai' peue na', saec' yamnhaw', ko' meulamlam ri hk'o' mun' reu'."

³⁷ Yesu' Eun sangsawn' nang kang' hkung' ka nya hk'o' mun' keuting na' keuyuit. Eun heul' it' pang gong Sanlon na' ku bul. ³⁸ Punta kaw ce leuceng Eun na', peue gawm' euc' na' ce ing' cu ri nang kang' hkung' ka nya hk'o' mun' keuting na' tang' neum peunngup cawo na'.

Yu' das' kuit deut eun ri kaw fuin Yesu' Eun

22 Maet' maen' kaw a hk'aws' rot pawe un' seue' hkawomun' is' paeng na', a lah' ri meuh pawe vel nya. ² Ro' peue jhawp' rit na' ce mae' peue guil leukah' ritroe na' sok ce hk'a' kaw ri toh Yesu' Eun, kopti lhat' ce ri ku' peue heun' na' kaw ce yeuh na'. ³ Hawc' ko', Satan na' a lec hk'a' naee eun Yu' das' ku' muis I' sakariot' na'. Eun meuh tapae' hk'a' naee tapae' kul' leual' peue na' ce. ⁴ Yu' das' eun heul' ri ro' peue jhawp' rit na' ce mae' ro' peue ko' nya hk'o' mun' keuting na' ce. Eun ci' kaw fuin Yesu' Eun yeuh sa' nhaw' na', eun sa' lit a ri ce. ⁵ Ce ren' kawn nyawk'. Ce sahpaw' ri kaw tuil' eun is' leumuil. ⁶ Eun ku sahpaw' ri ti a. Punta kaw eun ap fuin Yesu' Eun ri ce yam peue heun' na' un' ut' ce na', eun sok yam htuk' lai ri na'.

Som' pul pok tisut'

⁷ Yam rot a seunyi pawe un' seue' hkawomun' is' paeng na', a meuh yam kah ri tan kon' yung' ka pawe vel nya na'. ⁸ Yesu' Eun lah' a ri Petru' eun mae' Yo' han eun, "Heul' rangraen ku' hk'a' pawe vel nya pun e' reu'."

⁹ Ka mhaing' Yesu' Eun, "Mi ci' sum' kah ya na' rangraen a tawngnhaw'?"

¹⁰ Yesu' Eun top' a, "Yam lec pa' nang veng na', a ta' gui keutong' leuum' ti peue na' kaw eun ing' hk'eup' pa'. Pa' na' hot' ri lec nya lec eun na'. ¹¹ Pa' na' mhaing' cawo' nya na' eun, 'Seura' mhaing' Eun hkawng ut' chec' vang kaw Eun hk'a' pawe vel nya tiduih' mae' tapae' Eun na' ce, a ci' meuh tawngnhaw'?"

¹² Eun kaw tuil' pa' nawk hkawng keuting htan hk'a' tuh hk'iu' ri meulamlam ri na', rangraen pawe vel nya na' ri ka reu'."

¹³ Ka ku heul' hk'eup' seun' a ku' Yesu' lah' Eun na'. Kop awn' na, ka rangraen pawe vel nya na' ri ka.

¹⁴ Yam rot a yam ka na', Yesu' Eun mae' peue caee na' ce ku mok' ri som' mae' hpuin' na'. ¹⁵ Eun lah' a ri ce, "Yam un' nang hk'eup' Ui' ku' tukhka na', Ui' sum' hk'a' pawe vel nya aen' na mae' pe' nyawk'. ¹⁶ Kaw Ui' lah' a ri pe', rot ti pawe vel nya na' htonnuk a nang kuing' Eun Peucawo' na', Ui' hkuin' kaw laee hk'a' pawe vel nya na' bae."

¹⁷ Hawc' Eun ti kaw' na', Eun mun' keuting ri Peucawo' Eun. Hawc' ko', Eun lah', "Gvah pe' nyui kaw' aen' na reu'. ¹⁸ Kaw Ui' lah' a ri pe', rot ti kuing' Eun Peucawo' na' un' nang rot ka na', Ui' hkuin' kaw laee nyui leuum' pli' bui na' bae."

† I' saya' 13:10; 34:4

¹⁹Hawc' Eun ti hkawomun' na', Eun mun' keuting ri Peucawo' Eun. Hawc' ko', Eun ves ri tuil' hkawomun' na' ri ce. Eun lah', "Aen' meuh a tu' Ui', Ui' tuil' a ri pe'. Punta kaw pe' kuit rot ri Ui' na', pe' na' yeuh aen' a reu'."

²⁰Seun' awn' na, yam sak' som' pul ce na', Eun ti kaw' na', Eun lah', "Kawk' aen' meuh a kati sat' ca' hk'u' hk'a' naee nham' Ui'. A bah lhaee' pun pe'."

²¹Daecti ku' kaw fuin Ui' na' eun ku ruim hpuin' som' mae' Ui'. ²²Kon' ai' peue na' Eun kaw hot' seun' ku' tang' ri uin' ri na'. Daecti peue fuin Kon' ai' peue na' eun kaw pun ri hkam' hk'a' jha' na'." ²³Tapae' na' ce mhaing' puri, "Hk'a' naee e', a' nhaw' ci' kaw yeuh ku' yeuh keutit' na'?"

²⁴Ce ku htu' hting' puri, "Hk'a' naee e', a' nhaw' ci' kaw keuting hk'ai' peue?" ²⁵Yesu' Eun lah' a ri ce, "Hkun' haw' hkam' ce peue ceu seubu na' u' peung ce hk'a' pang ce. Ku' caee ti' ca ri hk'a' pang ce na' ce lah' meun ri meuh cawo' mun'. ²⁶Daecti pe' htuk' ri un' meuh yeuh keutit'. Lheu' awn' na, ku' keuting hk'ai' peue hk'a' naee pe' na' eun ko', eun htuk' ri yeuh ri seun' nang aet' hk'ai' peue. Saec' meuh cawo' u' peung peue na' eun, yeuh ri seun' mhai' reu'. ²⁷Kopti ku' mok' mae' hpuin' na' eun mae' ku' yeuh mhai' eun na' eun, a' nhaw' ci' keuting ri ka? Meuh a ku' mok' mae' hpuin' na' eun, un' meuh ka aw? Daecti yam ut' Ui' hk'a' naee pe' na', Ui' yeuh ri seun' mhai' ko'."

²⁸Meuh pe' peue ut' mae' Ui' yam pun Ui' ri hkam' ku' tukhka na'. ²⁹Seun' Kuing' Ui' tuil' Eun kuing' na' ri Ui' na', Ui' ku kaw tuil' kuing' na' ri pe'. ³⁰Kop awn' na, pe' kaw pun ri hk'asom' mae' hpuin' Ui' nang kuing' Ui' na'. Pe' kaw pun ri mok' pang ten na' taws' a' mu ri peue I' sarela' kul' leual' ceu na' ce.

³¹Si' mon, Si' mon, Satan na' hk'o' pun a ri kaw hk'eung' pe' seun' gu' ngho' na' hk'eung' a ri na' hawc'. ³²Daecti, Si' mon, punta hk'a' yum' mi na' kaw a un' lhu' jah na', hk'o' Ui' mun' pun mi hawc'. Yam tang hpawt' mi ri ing' hawc' na', mi na' tuil' kaw' reng ce ec' awng' ri na' reu'."

³³Daecti Petru' eun lah', "Cawo', saec' meuh nang htawng' un' lah', vang yeum un' lah', rangraen ui' ri kaw hot' Mi hawc'."

³⁴Yesu' Eun top' a, "Petru', kaw Ui' lah' a ri mi, bul seunyaen' nanggal' el' un' nang leuo' ka na', kaw mi lah' ri un' yawng Ui' hton loe' pok."

³⁵Hawc' ko', Eun mhaing' ce, "Yam un' kah Ui' pe' pin' tep paec, huil' mae' jhaep' heul' na', kaw' kue' pe' ku' cut ti ri ceu aw?"

Ce top' a, "Uih', un' kue' ka saec' ti ceu."

³⁶Eun lah', "Daecti maet' maen', nang kue' tep paec pin' a heul', nang kue' huil' ku pin' a heul'. A' nhaw' un' nang kue' leungawng ko', paing' hk'o' ri leuvae ri is' leungawng reu'. ³⁷Tem' a ri uin' ri kue' yeuhki', 'Kaw peue sawn' ri uin' Eun mae' peue yeuh kleuc' ri leukah' ritroe na' ce.'† Kaw Ui' lah' a ri pe', leukah' tem' ri na' kaw a pun ri htonnuk nang Ui'. Cawp' ka yeut, lawng Ui' a tem' ri na' kaw a kah ri htonnuk."

³⁸Tapae' na' ce lah', "Cawo', keue' reu', kue' a leungawng maen' lal' hten'."

Eun top' a, "Hk'o' ka hawc'."

Yesu' hk'o' Eun mun' pang gong Sanlon

³⁹Hawc' awn' na, Eun pucti heul' pang gong Sanlon seun' ku' tawn yeuh Eun na'. Tapae' Eun na' ce ku hot' Eun heul' yeut. ⁴⁰Yam rot ce teh' na', Eun lah' a ri ce, "Punta kaw pe' un' pun ri hk'uic' hk'a' naee hk'a' cop' long na', hk'o' mun' reu'." ⁴¹Neum vang tapae' na' ut' ce na' hk'ao ti cu nyon seumu na', Eun heul' seukluin ri hk'o' mun' lah' a, ⁴²"A' kuiing', a lawn htuk' hpum' Mi ko', hk'o' Mi ti kaw' aen' na heul' hk'ai' Ui'. Daecti pawlaee kah a meuh alo Ui', kah a htonnuk hot' alo Mi na'." ⁴³In' hpom ti peue na' eun pucti lih tuil' kaw' reng Eun. ⁴⁴Kopti Yesu' kuit nyhap' Eun nyawk' na', Eun gawm sae' caee' hk'o' mun' ri. Leuum' ron Eun na' a lih seun' nham', a jam pang keute' na'."

⁴⁵Yam hawc' Eun hk'o' mun' ri na', Eun yuk ti ing' ri tapae' ri na' ce. Eun ing' nyu tapae' ri na' it' ce. Kopti hpum' lu nyawk' ce na', ce kluit' kloe. ⁴⁶Eun mhaing' ce, "Pe' ci' yeuh keunhaw', pe' vae' kaw' meung it' ri? Punta kaw pe' un' pun ri hk'uic' hk'a' naee hk'a' cop' long na', kuh' hk'o' mun' reu'."

Mheut' Yesu' Eun

⁴⁷Yam kaw' buih lah' Eun a na', hk'a' naee tapae' kul' leual' peue ku' muis Yu' das' na' eun va peue cum heun' na' ce ing'. Punta kaw eun huit' Yesu' Eun, eun ing' keunam Eun na'. ⁴⁸Daecti Yesu' Eun mhaing' eun, "Yu' das', kaw mi fuin Kon' ai' peue na' Eun ri huit' ri na' aw?"

⁴⁹Yam peue hot' Yesu' Eun na' pun ce ri nyu a ci' kaw meuh ku' yeuh sa' nhaw' na', ce lah', "Cawo', kaw e' bhat' ce ri leungawng na' a chak' aw?" ⁵⁰Hawc' ko', tapae' ti peue na' eun bhat' yhuk' a' tawm' eun mhai' eun peue jhawp' rit keuting na' deut.

† I' saya' 53:12

⁵¹Daecti Yesu' Eun lah', "Peunaw', pawlaee yeuh a bae." Hawc' ko', Eun paic' yhuk' eun mhai' awn' na. Eun bai' eun cuin.

⁵²Hawc' ko', Yesu' Eun lah' a ri peue kaw ing' mheut' ri, meuh ro' peue jhawp' rit, peue ko' nya hk'o' mun' keuting na' mae' nang kawt na' ce, "Meuh Ui' peue fuin kuing' aw, pe' vae' jang' leungawng jang' hku' ing'?" ⁵³Ut' Ui' mae' pe' nang kang' hkung' ka nya hk'o' mun' keuting na' keuyuit, pe' hkuin' mheut' ri ti Ui'. Daecti yam maet' maen' na' a meuh yam pe', a meuh yam ti' ca duim' lawng na' u' peung ka."

Petru' guil eun ri un' yawng Yesu' Eun

⁵⁴Ce mawt ri va Yesu' Eun heul' ri nya eun peue jhawp' rit keuting na'. Petru' eun ut' vang ca ri seungai na' eun hot' ce heul'. ⁵⁵Daecti yam puing' ce ri cuil ngawl nang ngon' keuleung ka sa' nam' na', Petru' eun ku ing' mok' mae' ce. ⁵⁶Beun' meuh mhai' ti peue na' yam nyu ka Petru' mok' eun ri ceng' ka ngawl na', ka seu-luil' eun. Ka lah', "Hkawn' eun ku ut' mae' Heun yeut." ⁵⁷Daecti Petru' eun htu' hting' ka, eun lah', "Kon' beun', hpaw ui' ca' yawng Eun."

⁵⁸Hawc' awn' na ti yam, ku' seubu ti peue na' eun tang nyu Petru' eun. Eun lah', "Mi ku meuh cum ce ti peue yeut." Petru' eun lah', "Hkawn' mi, hpaw a ca' meuh ui' ri."

⁵⁹Bae hk'ao ti nali na', ku' seubu ti peue na' eun lah' reng ri htawhkam a, "Hkawn' meuh eun peue ut' mae' Heun neum, kopti meuh eun peue Galilae' na'." ⁶⁰Petru' eun top' a, "Hkawn' mi, hpaw ui' ca' yawng ku' lah' mi na'." Yam Petru' un' nang hawc' eun lah' ri a na', el' na' a keulawn' leuo'. ⁶¹Yam awn' na, Yesu' Eun hpawt' ti keue' ri Petru' eun. Petru' eun kuit rot ri ku' Yesu' lah' Eun ri ti yeuh keutit' na', "Bul seunyaen' nanggal' el' un' nang leuo' ka na', kaw mi guil ri un' yawng Ui' loe' pok." ⁶²Petru' eun pucti heul' hpum' sic' sawng' yam hk'a' nok na'.

Lah' ri pleh keunyas Yesu' Eun

⁶³Peue ko' kawn Yesu' Eun na' ce lah' ri pleh keunyas Eun, peum' Eun. ⁶⁴Ce mawt ngai' Eun na', hawc' ko', ce mhaing' Eun, "A' nhaw' ci' klaee' Mi, cop, lah' a." ⁶⁵Ce lah' leukah' un' nawpsang hk'omhk'uik na' ri Heun.

Muk peue taws' kan' na' taws' ce a' mu ri Yesu' Eun

⁶⁶Yam ceng' ka na', muk peue taws' kan' nang kawt ce peue Yu' da na' ce mae' ro' peue jhawp' rit na' ce

mae' peue guil leukah' ritroe na' yam ing' hk'om ce puri na', ce va Yesu' Eun ing' nanggal' ce na'. ⁶⁷Muk peue taws' kan' na' ce lah', "Mi lawn meuh Hkrit ko', lah' a ri ye." Yesu' Eun top' a, "Ui' lawn lah' a ri pe' ko', pe' ku kaw un' yum' a. ⁶⁸Ui' lawn mhaing' pe' ko', pe' ku kaw un' top' a. ⁶⁹Daecti tang' neum seunyaen' na', Kon' ai' peue na' kaw Eun mok' hk'a' a' tawm' Eun Peucawo' Cawo' ti' ca keuting na'."

⁷⁰Ce ri gawm' euc', ce mhaing' Eun, "A lawn yeuh keutit' ko', meuh Mi Kon' ai' Peucawo' aw?"

Eun top' a, "Meuh Ui' seun' ku' lah' pe' na' cawp' ka yeut."

⁷¹Hawc' ko', ce lah', "E' ci' kawn' kaw lo' sa' hki' bae yeuh sa' nhaw' ? Kopti pun e' ri mhawng' ku' lah' meun Eun ri moeng ri na' hawc'."

Va Yesu' Eun heul' ri cawo' Pi'lat

23 Hawc' ko', peue hk'om na' ce gawm' euc' ce yuk ri kuh' va Yesu' Eun heul' ri cawo' Pi'lat eun. ²Ce tang' a' mu ri Heun. Ce lah', "Pun ye ri yawng peue aen' cu' Eun ku' kleuc' ri peue ceu ye na' ce. Eun ham' peue seue' hkawn' ri cawo' Kae' sa eun na' ce. Eun ku lah' meun ri meuh Hkrit, meuh hkun' haw' hkam' yeut."

³Kop awn' na, cawo' Pi'lat eun mhaing' Yesu' Eun, "Meuh Mi hkun' haw' hkam' ce peue Yu' da na' aw?"

Yesu' Eun top' a, "Euh, seun' a ku' lah' mi na' yeut."

⁴Hawc' ko', cawo' Pi'lat eun pao' a ri peue jhawp' rit keuting mae' peue cum heun' na' ce, "Hpaw ui' ca' nyu ku' kleuc' Eun peue aen' na'."

⁵Daecti ce gawm sae' caee' lah', "Eo' Eun ri cuk' cic' sangsawn' peue gawm' kuing' Yu' da na' tang' neum hot' hk'a' kuing' Galilae' na' rot maen'."

Va Yesu' Eun heul' ri cawo' Herot'

⁶Yam cawo' Pi'lat pun eun ri mhawng' leukah' awn' a na', eun mhaing' ce, "Meuh Eun peue Galilae' aw?"

⁷Yam cawo' Pi'lat yawng eun Yesu' meuh Eun peue ut' nang kuing' u' peung eun cawo' Herot' na', eun kah ce va Eun heul' ri cawo' Herot' eun. Yam awn' na, cawo' Herot' eun ku ut' nang veng Yeru' salaem na'.

⁸Yam cawo' Herot' nyu eun Yesu' Eun na', eun ren' kawn nyawk'. Kopti sum' nyu eun Yesu' Eun na' a ling' hawc'. Seun' tawn mhawng' eun lawng Eun Yesu' na', eun kuit ri kaw pun ri nyu ku' hk'o' am' yeuh Eun ti ri ceu na'. ⁹Eun saec' mhaing' Yesu' Eun ri ku' heun' ceu na', daecti Yesu' Eun un' top' a saec' ti moeng.

¹⁰Ro' peue jhawp' rit keuting na' ce mae' peue guil leukah' ritroe na' ce cawng mawn', ce sae' caee' tang'

map' ri Yesu' Eun hk'o' ri kaw yeum. ¹¹ Cawo' Herot' eun mae' peue suik' eun na' ce lah' Eun meuh ku' pleh jaing keunyas un' nawpsang Eun. Ce tuil' Eun cuip' hk'eung ngam na'. Hawc' ko', eun tang kah ce va Eun heul' ri cawo' Pi'lat eun. ¹² Seunyi awn' na, cawo' Herot' eun mae' cawo' Pi'lat ka tang meuh a' mawo. Kopti nanggal' aen' na, meuh ka ransu ri puri na'.

Taws' a' mu yeum ri Yesu' Eun

¹³ Cawo' Pi'lat eun klawng ro' peue jhawp' rit keuting na' ce, ro' kan na' ce mae' peue heun' na' ce cu ri. ¹⁴ Eun lah' a ri ce, "Pe' va peue aen' Eun ing' ri ui' maen'. Pe' lah' Eun meuh nang va peue fuin kuing'. Ui' saec' hki' mhaing' Eun nanggal' pe' hawc' na', daecti ui' hkuin' nyu ku' kleuc' seun' ku' tang' pe' ri Heun na' saec' ti ceu. ¹⁵ Saec' meuh cawo' Herot' eun, kop un' nyu eun map' ri Heun na', eun tang ploec' Eun ing' ri ui' bae seun' nyu pe' a na'. Eun hkuin' yeuh ku' kaw hk'o' ri yeum saec' ti ceu. ¹⁶ Kop awn' na, kaw ui' ta' veut ri ploec' Eun."

¹⁷ Yam pawe vel nya na' ku pok ka, cawo' Pi'lat eun kah ri ploec' peue htawng' na' ce ti ri peue. ¹⁸ Ce klawng ri lah' a gawm' euc' ri ti meu, "Dap' ri tec peue awn' Eun. Ploec' Barabas' eun ri ye." ¹⁹ (Barabas' eun ko', pun eun ri ut' nang htawng' kopti meuh eun peue fuin ri nang veng awn' na. Eun ku toh peue yeut.)

²⁰ Kopti cawo' Pi'lat sum' ploec' eun Yesu' Eun na', eun tang hpawe ce bae.

²¹ Daecti ce ta' ul' ri lah', "Tawk' Eun yeum pang kleum' rawng' tawp' na' reu', tawk' Eun yeum pang kleum' rawng' tawp' na' reu'." ²² Cawo' Pi'lat eun lah' a ri ce loe' pok ti pok, "A ci' meuh kop keunhaw'? Eun ci' yeuh ku' kleuc' keunhaw'? Ui' hkuin' nyu yeuh Eun ku' kleuc' kaw hk'o' ri yeum saec' ti ceu. Kop awn' na, kaw ui' ta' veut ri ploec' Eun."

²³ Daecti ce gawm sae' caee' ta' ul' ri lah' tawk' Eun pang kleum' rawng' tawp' na'. Seng' ce na' a pe. ²⁴ Kop awn' na, punta cawo' Pi'lat kaw eun yeuh a seun' ku' lah' ce na', eun taws' a deut. ²⁵ Seun' hk'o' ce a na', eun ploec' peue fuin kuing' toh peue ut' nang htawng' na' eun. Hawc' ko', seun' ku' sum' yeuh ce na', eun ap Yesu' Eun ri ce.

Tawk' Yesu' Eun pang kleum' rawng' tawp'

²⁶ Yam va ce Yesu' Eun pucti heul' na', ce yat ri tec' Si' mon peue veng Sai' rin' ing' neum yung' hk'a' nok veng na' eun klawm' kleum' rawng' tawp' na' hot' Yesu' Eun heul'. ²⁷ Peue cum heun' na' ce hot' Eun

heul'. Beun' na' ce ta' ul' ri yam kop Heun ri. ²⁸ Yesu' Eun hpawt' ri keue' ri lah' a ri beun' na' ce, "Kon' be- un' veng Yeru' salaem na' pe', pawlaee yam pun Ui'. Yam pun tu' pe' na' mae' kon' hk'i' pe' na' ce reu'. ²⁹ Kopti seunyi meuyam awn' kaw a rot, a meuh yam kaw pe' lah', 'Mun' keuting ri beun' tan' na' ce mae' keuteul un' duing nyhel' na' mae' pui kon' nyom un' duing pui ce na' reu'." ³⁰ Yam awn' na, ce kaw lah' a ri gong leuang' na' ce, 'Lhu' ghuim' ye reu'.'

Ce kaw lah' a ri gong aet' na' ce, 'Ghuim' htum' ye reu'.'†

³¹ Kopti ce lawn yeuhki' ri hku' seungal na', hku' hk'oh' na' a ci' na' yeuh sa' nhaw'?"

³² Ce ku va peue rai lal' peue kaw toh ri mae' Heun na' ka heul' yeut. ³³ Yam rot ce vang lah' peue muis Dohcing' na', ce tawk' Eun pang kleum' rawng' tawp' mae' peue con' lal' peue na' ka. Ce tawk' ku' ti peue na' eun hk'a' a' tawm' Eun na', ku' ti peue na' eun hk'a' a' ve' Eun na'. ³⁴ Yesu' Eun lah', "A' kuing', ploec' map' ce na' reu'. Kopti un' yawng ce ku' yeuh ri na'." Hawc' ko', ce cop puri gvah hk'eung Eun na'.

³⁵ Peue heun' na' ce cawng ri keue'. Ro' kan na' ce lah' ku' pleh jaing keunyas Eun. Ce lah', "Eun teum' kawm htut peue ri lawtpon pun. Eun lawn meuh Hkrit meuh peue Peucawo' leuk Eun ri ti ko', tae' Eun lak' teum' kawm htut ri lawtpon meun reu'."

³⁶ Saec' meuh peue suik' na' ce ku ing' pleh jaing ke- unyas Eun. Ce ing' tuil' leuum' pli' bui na' ri Heun. ³⁷ Ce lah', "Mi lawn meuh hkun' haw' hkam' ce peue Yu' da ko', teum' kawm htut tu' Mi na' lawtpon meun reu'."

³⁸ A tem' ri hk'a' pang cing' Eun na' yeuh keutit', "Hkaen' meuh Eun Hkun' haw' hkam' ce peue Yu' da na'."

³⁹ Peue con' tawk' ri pang kleum' rawng' tawp' na' eun lah' leukah' un' nawpsang ri Yesu' Eun, "Meuh mi Hkrit, un' meuh ka aw? Teum' kawm htut tu' mi na' mae' ya ri lawtpon reu'."

⁴⁰ Daecti ku' ti peue na' eun tawk' eun lah', "Un' lhat' til mi ri Peucawo' Eun aw? Kopti mi tup hkam' hk'a' taws' a' mu seun' Heun ri. ⁴¹ Seun' pun a' ri hkam' a yeuhki' na' cawp' ka yeut. Kopti kuing' a mae' ku' yeuh a' na', a' pun ri hkam' a. Daecti peue aen' Eun un' yeuh ku' kleuc' saec' peunae'."

⁴² Hawc' ko', eun lah', "Yesu', yam ing' lec Mi nang kuing' ri na', hk'o' Mi kuit rot ri ui' yeut."

† Haw' se 10:8

⁴³ Yesu' Eun top' a, "Kaw Ui' lah' a ri mi neum. Seun-yaen', kaw mi pun ri ut' mae' Ui' tiduih' vang ren' kaw n kuit sam' ran muis Paradi' su' † na'."

Yesu' yeum Eun

⁴⁴ Yam awn' na, a meuh hk'ao ri peunnyi keuting na'. Bhen' keute' na' a duim' lawng euc' rot hk'a' pul loe' nali na', ⁴⁵ kopti seunyi na' a yut' ceng' ri na'. Hpen' kang' nang nya hk'o' mun' keuting na' a res meuh lal' glawk'. ⁴⁶ Yesu' Eun klawng ri lah' seng' laws', "A' kui-ing', kaw Ui' ap civit ri na' nang ti' Mi." Hawc' lah' Eun a yeuh keutit' na', Eun hpum' deut.

⁴⁷ Yam po' suik' na' pun eun ri nyu yeuh a keutit' na', eun suk' seun' Peucawo' Eun. Eun lah', "Peue aen' meuh Eun taeng peue leupaws seumeu' neumneum."

⁴⁸ Yam peue kaw meuh sa' hki' cu ri ing' na' pun ce ri nyu yeuh a keutit' na', ce kuit nyhap' dah nuk' ri ing'.

⁴⁹ Daecti peue yawng Yesu' Eun na' ce mae' beun' hot' Eun tang' neum kuing' Galilae' na' ce cawng ri seucon' Eun vang ca ri seungai na'.

Puing' Yesu' Eun

⁵⁰ A kue' peue muis Yo' saep ti peue. Eun meuh peue ut' nang muk ce peue taws' kan' na'. Eun meuh peue chak' peue leupaws seumeu'. ⁵¹ Eun un' sahpaw' kan' taws' ce deut na' mae' ku' yeuh ce na'. Eun ing' neum veng Ari' mahtia kuing' Yu' da. Eun meuh peue keutui' hpum' ko' kuing' Eun Peucawo'. ⁵² Eun heul' hk'o' ri ti tu' Eun Yesu' na' ri cawo' Pi' lat eun. ⁵³ Hawc' ko', eun ti tu' Eun Yesu' na' lih. Eun bawl' tu' Eun na' ri hpen' linin, seue' Eun nang leuang' jhec' ri meuh keutui' leumuic na'. Keutui' leumuic awn' a hkuin' nang duing seue' peue yeum saec' ti peue. ⁵⁴ Seunyi awn' a meuh seunyi rangraen pawe. A kaw hkaws' rot seunyi Sin' na'.

⁵⁵ Beun' hot' Yesu' Eun tang' neum kuing' Galilae' na' ce ku hot' Yo' saep eun ing' nyu keutui' leumuic na' yeut. Ce ci' uin' tu' Eun Yesu' na' yeuh sa' nhaw' na', ce ku pun ri nyu a. ⁵⁶ Hawc' awn' na, ce ing' rangraen bai' hom' mae' lamawn hom' na'. Daecti ce keului' ri nang seunyi Sin' na' tam' ritroe ri.

Yesu' tang kuh' im' Eun

24 Peunngup cawo ka seunyi nanggal' ka vung na', beun' na' ce pin' bai' hom' rangraen ri na' heul' nang keutui' leumuic na'. ² Ce pun ri nyu meul' seumu dho' ka keutui' leumuic na' cut' a ri tec ri hawc'. ³ Daecti yam ing' lec ce hk'a' naee ka na', ce un' laee

nyu tu' Eun Yesu' na'. ⁴ Yam buih kuit nyhap' kvang' mawo ce ri lawng aen' a na', a keulawn' kue' peue lal' peue ka cuip' hk'eung seungung seun' cak' cal' pucti cawng mae' ce. ⁵ Beun' na' ce lhat', ce nghup' ti pang keute' na'. Daecti peue lal' peue na' ka lah' a ri ce, "A ci' meuh kop keunhaw', pe' vae' heul' sok peue im' ri vang ut' peue yeum?" ⁶ Hpaw Eun ca' laee ut' maen', kuh' im' Eun hawc'. Kuit rot ri leukah' lah' Eun ri pe' yam kaw n' ut' Eun mae' pe' nang kuing' Galilae' na' reu'. ⁷ Lah' Eun, "Kon' ai' peue na' kaw Eun pun ri hkam' hk'a' ap ri nang dak ti' ce peue map' na', hkam' tawk' peue ri pang kleum' rawng' tawp' na'. Na' a rot loe' seunyi ko', Eun na' tang kuh' im'." ⁸ Yam awn' na, ce tang kuit rot ri ku' lah' Eun Yesu' na'.

⁹ Hawc' ing' ce neum keutui' leumuic na', ce ing' ris tapae' kul' ti peue na' ce mae' peue seubu na' ce mhawng' lawng awn' na. ¹⁰ Beun' ing' ris peue caee na' ce mhawng' lawng awn' a na' a meuh Mari' ku' meuh peue veng Magadala', Yo' hanna', Mari' ku' meuh ma Yakop' mae' beun' seubu na' ce. ¹¹ Daecti ce un' yum' ku' lah' ce beun' na', kopti seun' a ku' kaw un' duing meuh ko'. ¹² Daecti Petru' eun yuk ri kuh' hk'uih heul' ri keutui' leumuic na'. Eun gaw' ri nom' a. Eun nyu hpen' linin na' uin' a ri koe. Eun ing' kuit ri am' ri lawng ku' meuh na'.

Lang' hk'a' yung' E' ma' us'

¹³ Hk'a' naee seunyi awn' na, tapae' lal' peue na' ka buih hot' hk'a' heul' nang yung' E' ma' us' na'. Yung' E' ma' us' na' a seungai veng Yeru' salaem na' a res lak'. ¹⁴ Ka u puri lawng ku' meuh na' ce gawm' euc' ka. ¹⁵ Yam buih u ka puri lawng awn' a na', Yesu' Eun ku ing' long hk'a' heul' meu ka. ¹⁶ Daecti Eun yeuh ka un' pawn ri.

¹⁷ Yesu' Eun mhaing' ka, "Yam long pa' hk'a' heul' na', pa' ci' u puri lawng keunhaw'?"

Ka cawng ri mhong' mhil'. ¹⁸ Ku' muis Hkleo' pas' na' eun mhaing' Eun, "Chec' ing' nang veng Yeru' salaem un' yawng lawng ku' meuh nang veng a' loe' seunyi na' meuh a Mi ri ti peue koe aw?"

¹⁹ Yesu' Eun tang mhaing' ka, "A ci' meuh lawng keunhaw'?"

Ka top' a, "Meuh a lawng Eun Yesu' peue veng Nasaraet' na'. Eun meuh peue suip leukah' Eun Peucawo'. Eun kue' ti' ca keuting hk'a' naee ku' lah' ku' yeuh Eun nanggal' Eun Peucawo' na' mae' nanggal' peue gawm' euc'. ²⁰ Ro' peue jhawp' rit keuting na' ce mae' ro' kan ye na' ce taws' a' mu yeum ri Heun. Ce tawk' Eun pang kleum' rawng' tawp' na'. ²¹ Daecti ye

† Tuh' ri tuil' 2:7

ku tawn keutui' hpum' meuh Eun Cawo' kaw teum' kawm htut peue I' sarela' na' ce lawtpon. Tang' neum lawng aen' meuh ka na', pun ka loe' seunyi seunyaen' hawc'.²² Lheu' awn' na, beun' ut' nang muk ye na' ce ngon' ce ku yeuh ku' hk'o' am' ri ye. Peunngup cawo awm, ce heul' nang keutui' leumuic na'²³ daecti ce un' laee nyu tu' Eun na'. Ce ing' lah' nyu ri het' in' hpom lah' peue ka lah' Eun kawm' im' yeut.²⁴ Peue ye na' ce ngon' heul' ce nang keutui' leumuic na', ce ku pun ri nyu seun' a ku' lah' ce beun' na', daecti ce un' laee nyu Eun."

²⁵ Yesu' Eun lah' a ri ka, "Peue nga' aen' pa', saec' hpum' pa' na' a ku yak yum' leukah' lah' ce peue suip leukah' Eun Peucawo' na' gawm' euc' ka.²⁶ Hkrit kaw Eun pun ri tukhka yeuhki', hawc' ko', Eun na' pun ri lec nang munhpung' ri, un' meuh ka aw?"²⁷ Hawc' ko', Eun lah' ka mhawng' vangdoh' ka htawm Seunga' vang lah' a lawng Eun na' tang' neum Mo' se eun mae' peue suip leukah' Eun Peucawo' ku' seubu na' ce gawm' euc' ka.

²⁸ Yam kaw ka hk'aws' rot ti yung' vang kaw ri heul' na', Yesu' Eun rang ri kaw heul' nanggal'.²⁹ Daecti ka sae' caee' hk'o' lah' a ri Heun, "Puing ing' ut' mae' ya, seunyi na' kaw a hk'aws' lec, a kaw fec' hawc'." Kop awn' na, Eun ku ing' keului' ri mae' ka.

³⁰ Yam mok' Eun ri som' mae' ka na', Eun ti hka-womun' na' Eun mun' keuting ri Peucawo' Eun. Hawc' ko', Eun ves ri tuil' hkawomun' na' ri ka.³¹ Yam awn' na, ngai' ka na' a ceng', ka pawn meuh a Yesu' Eun. Yesu' Eun keulawn' rai' nanggal' ka na'.³² Ka lah' a ri puri, "Yam leukah' Eun mae' a' hot' hk'a' heul' na' mae' yam lah' Eun a' mhawng' vangdoh' ka leukah' htawm Seunga' na', a yeuh a' hpum' huk' nyawk', un' meuh ka aw?"

³³ Ka keulawn' yuk ri ing' nang veng Yeru' salaem na'. Ka ing' pun ri nyu tapae' kul' ti peue na' ce mae' peue heun' na' hk'om ce puri.³⁴ Ce buih lah' a ri puri, "Meuh a neum, Yesu' tang kuh' im' Eun hawc'. Tuil' Eun Si'-mon eun nyu tu' ri na'."³⁵ Hawc' ko', ka ku ris ce mhawng' lawng ku' hk'eup' ka lang' hk'a' na' mae' pawn ka meuh a Yesu' Eun yam ves Eun hkawomun' na'.

Yesu' tuil' Eun tapae' na' ce nyu tu' ri

³⁶ Yam buih lah' ce a ri puri yeuh keutit' na', Yesu' Eun ku cawng nang ngon' ce na'. Eun lah', "Kah hk'a' kuit nyawk' kuit sam' ran cumyen' na' kue' ri pe' reu'."

³⁷ Ce lhat' ruing, ce hteum' ri nyu seuca'.³⁸ Eun lah' a ri ce, "A ci' meuh kop keunhaw', pe' vae' hpum' suk-sak? A ci' yeuh keunhaw', pe' vae' hpum' kangkae?"³⁹ Kue' ri ti' cung Ui' na' reu', meuh ka Ui' ri neum. Hpui' hpal' paic' ri nawk Ui' reu'. Seuca' na' hpaw a ca' kue' keune seuang' seun' nyu pe' Ui' ri kue' Ui' na'."

⁴⁰ Hawc' lah' Eun a yeuh keutit' na', Eun tuil' ce nawk ti' cung ri na'.⁴¹ Yam un' nang yum' ce meulam-lam ri na', kopti ce ku ren' ce ku am' na'. Eun mhaing' ce, "Kue' pe' ku' hk'a' ti ri ceu aw?"⁴² Ce ku tuil' ka' ngat' na' ri Heun ti glawk'.⁴³ Hawc' ko', Eun ti ri hk'a' a nanggal' ce na'.

⁴⁴ Eun lah' a ri ce, "Aen' meuh a ku' lah' Ui' ri pe' yam kawm' ut' Ui' mae' pe' na'. Ku' tem' ri lah' lawng Ui' nang htawm ritroe eun Mo' se na', nang htawm ce peue suip leukah' Eun Peucawo' na' mae' nang htawm Suk' seun' na' kaw a kah ri htonnuk."

⁴⁵ Hawc' awn' na, punta kaw ce yawng vangdoh' ka htawm Seunga' na', Eun tuh' hpum' ce na'.⁴⁶ Eun lah' a ri ce, "Nang htawm Seunga' na' tem' a ri yeuhki', 'Hkrit kaw Eun pun ri hkam' ri tukhka. Na' a rot loe' seunyi ko', Eun na' tang kuh' im'."⁴⁷ Tang' neum veng Yeru' salaem na', lawng taws' hpum' fuin map' na' mae' lawng plo' map' na' kah ri sangsawn' a hk'a' ruim muis Eun ri peue ceu gawm' euc'.⁴⁸ Meuh pe' sa' hki' ka lawng aen' ce.⁴⁹ Kaw Ui' bu' ku' Kuiing' Ui' yeuh Eun kati ri na' ri pe'.' Rot ti na' pe' pun ti' ca neum pang lhung' na', pe' na' ko' nang veng aen' na reu'."

Yesu' huk' Eun kuing' pang mao'

⁵⁰ Hawc' va Eun ce heul' rot keunam yung' Betani' na', Eun yuk ti' ri nap mun' ri ce.⁵¹ Yam buih nap Eun mun' ri ce na', Eun gah' hk'ai' ce. Eun pun ri rap ri ti yuk ri huk' kuing' pang mao' na'.⁵² Ce suk' seun' fae' Eun. Hawc' ko', ce ren' kawm keuting nyawk' tang ing' nang veng Yeru' salaem na'.⁵³ Ce ut' nang nya hk'o' mun' keuting na' laleung, ce suk' seun' Peucawo' Eun.

Yo 'han

Leukah ' Eun Peucawo ' na ' keut ' a ri meuh nham ' ke-
une

1 Tang ' neum yamla ka na ' , kue ' a Leukah ' . Leukah ' awn ' Eun ut ' mae ' Peucawo ' Eun. Leukah ' awn ' Eun meuh Peucawo ' Eun.

²Eun ut ' mae ' Peucawo ' Eun tang ' neum yamla ri na ' . ³Ku ceu gawm ' euc ' na ' a pun ri hpanpleng ' ri ri Heun. Ku ' pun ri hpanpleng ' ri na ' a hkuin ' kue ' ku ' un ' pun ri hpanpleng ' ri ri Heun na ' saec ' ti ceu. ⁴Eun meuh Cawo ' tuil ' hk'a ' a ' yu im ' . Hk'a ' a ' yu im ' awn ' a meuh ku ' ceng ' ce peue na ' . ⁵Ku ' ceng ' na ' a til ' lec hk'a ' naee ka hk'a ' duim ' lawng na ' , daecti hk'a ' duim ' lawng na ' a un ' pe ku ' ceng ' awn ' na.

⁶Kue ' a peue Peucawo ' cus ' Eun lih ti peue eun muis Yo 'han. ⁷Neum heun ri na ' punta peue gawm ' euc ' na ' kaw peue yum ' , eun lih meuh nang hkam ' sa ' hki ' ka lawng ku ' ceng ' awn ' na. ⁸Tu ' eun na ' meun, eun hkuin ' caee meuh ku ' ceng ' awn ' na. Eun gup meuh ya-wo nang hkam ' sa ' hki ' ka ku ' ceng ' na ' .

⁹Ku ' ceng ' neumneum ku ' tuil ' ku ' ceng ' ri peue ku peue na ' buih lih a pang bhen ' keute ' na ' hawc ' †.

¹⁰Eun ut ' pang bhen ' keute ' na ' . Bhen ' keute ' na ' a saec ' pun ri suip ri hpanpleng ' ri ri Heun ko ' , daecti bhen ' keute ' na ' a un ' yawng Eun. ¹¹Eun saec ' lih ri vang ut ' meun ri na ' , daecti peue Eun na ' ce un ' rap ri ti Eun. ¹²Daecti peue rap ri ti Eun, peue yum ' muis Eun na ' peue gawm ' euc ' , Eun tuil ' ahkvang meuh kon ' Eun Peucawo ' na ' ri peue. ¹³A hkuin ' meuh kon ' neum hk'a ' ceucat ††, a 'ko ' neum alo hk'a ' nham ' keune ce peue na ' , a 'ko ' neum alo eun me na ' , daecti a meuh ku ' keut ' lih neum Peucawo ' Eun na ' .

¹⁴Leukah ' awn ' keut ' a ri meuh nham ' keune. A lih ut ' hk'a ' naee e ' . E ' pun ri nyu munhpung ' Eun na ' , a meuh munhpung ' Eun Kon ' ai ' ti peue koe ku ' lih neum A 'kuiing ' Eun na ' . Eun htonnuk ri mun ' sin ' mae ' ku ' neumneum na ' .

† A 'ko ' , aen ' meuh a ku ' ceng ' neumneum ku ' tuil ' ku ' ceng ' ri peue ing ' lec pang bhen ' keute ' ku peue na ' peue. †† Leukah ' Helasa ' na ' a lah ' , neum hk'a ' nham ' keune.

¹⁵Yo 'han eun hkam ' sa ' hki ' lawng Eun na ' . Eun pao ' ri lah ' , "Aen ' meuh a ku ' tawn lah ' ui ' na ' Eun hawc ' , 'Ku ' ing ' hot ' ui ' na ' keuting Eun hk'ai ' ui ' , kopti Eun kue ' meuh nanggal ' ui ' hawc ' .'" ¹⁶E ' ri gawm ' euc ' , e ' pun mun ' na ' ti pok hawc ' ti pok neum mun ' htonnuk Eun na ' . ¹⁷Leukah ' ritroe na ' tuil ' a ri ri e ' neum Mo 'se eun, daecti mun ' sin ' mae ' hk'a ' neumneum na ' a tuil ' ri ri e ' neum Yesu ' Hkrit Eun. ¹⁸A 'nhaw ' hkuin ' duing nyu Peucawo ' Eun, daecti Kon ' ai ' ku ' ut ' mae ' A 'kuiing ' na ' Eun yeuh e ' nyu Eun glih ' -gleueng ' .

Yo 'han cawo ' tuil ' hk'a ' cum ' lah ' eun ri un ' meuh
Hkrit Eun

¹⁹Aen ' meuh a leukah ' Yo 'han hkam ' eun sa ' hki ' yam peue Yu ' da ut ' nang veng Yeru ' salaem na ' kah ce peue jhawp ' rit mae ' peue Levi ' na ' ce heul ' mhaing ' Yo 'han eun ci ' meuh a 'nhaw ' na ' . ²⁰Eun un ' mo ' ku ' neum na ' , daecti eun tuh ' a glih ' gleueng ' . Eun lah ' , "Ca ' meuh ui ' Hkrit † Eun."

²¹Ce mhaing ' eun, "Yeuh keutit ' ko ' , mi ci ' meuh a 'n-haw ' ? Meuh mi E ' li ' ya eun aw?"

Eun top ' a, "Ca ' meuh ui ' ."

Yam mhaing ' ce, "Meuh mi peue suip leukah ' Eun Peucawo ' tit ' Eun aw? ††"

Eun tang top ' a, "Uih ' ."

²²Vang tisut ' ka na ' ce lah ' , "Yeuh keutit ' ko ' , mi ci ' meuh a 'nhaw ' ? Kaw ye tang kah ri ing ' lah ' peue cus ' ye heul ' na ' ce mhawng ' a, mi ci ' kaw lah ' meun ri meuh a 'nhaw ' , mi na ' lah ' a."

²³Yo 'han eun ti leukah ' I ' saya ' peue suip leukah ' Eun Peucawo ' na ' eun top ' a ri ce, "Meuh ui ' ku ' ut ' nang hk'i eun klawng ri pao ' , 'Mhe ' hk'a ' Eun Peucawo ' na ' seumeu ' reu ' , †† na ' eun."

²⁴Peue Hparisae ' ku ' cus ' peue ce heul ' na ' ce ngon ' , ²⁵ce mhaing ' Yo 'han eun, "Mi lawn un ' meuh Hkrit Eun, un ' meuh E ' li ' ya eun, a 'ko ' un ' meuh peue suip

‡ A 'ko ' Mesi 'ya, "Hkrit" na ' a meuh leukah ' Helasa ' , "Mesi 'ya" na ' a meuh leukah ' Hebrae ' , vangdoh ' ka na ' a lah ' , "Peue pun ri lhuik ' ri ri lamawn." Eun meuh ku ' Peucawo ' leuk Eun ri uin ' . †† Sawn ' leukah ' mun ' 18:15,18 †† I ' saya ' 40:3

leukah ' Eun Peucawo ' tit ' Eun ko ' , a ci ' meuh kop ke-unhaw ' , mi vae ' tuil ' hk'a ' cum ' na ' ri peue?"

²⁶ Yo 'han eun top ' a, "Ui ' tuil ' hk'a ' cum ' na ' ri pe ' ri leuum ' na ' , daecti a kue ' peue hk'a ' naee pe ' ti peue pe ' un ' yawng Eun. ²⁷ Eun meuh peue ing ' hot ' ui ' . Pal yawo kaw ui ' un ' kuing ' ri kah ' mu ' jhaep ' Eun na ' ."

²⁸ Lawng aen ' na a keut ' kue ' nang yung ' Betani ' hk'a ' lih seunyi ka klong ' Yaw ' dan vang Yo 'han tuil ' eun hk'a ' cum ' na ' .

Yesu ' meuh Eun Kon ' yung ' aet ' Eun Peucawo '

²⁹ Hawc ' awn ' na ti seunyi, Yo 'han nyu eun Yesu ' buih ing ' Eun ri ti na ' . Eun lah ' , "Keue ' ri Kon ' yung ' aet ' Eun Peucawo ' Cawo ' rap ri ti map ' ka bhen ' keute ' na ' heul ' na ' Eun reu ' . ³⁰ Meuh Eun ku ' tawn lah ' ui ' ri pe ' , 'Eun meuh peue ing ' hot ' ui ' , daecti Eun keuting hk'ai ' ui ' , kopti kue ' Eun tang ' neum yam un ' nang keut ' ui ' na ' hawc ' . ³¹ Ui ' hkuin ' yawng Eun, daecti punta peue I ' sarela ' na ' kaw ce pun ri nyu Eun glih ' -gleueng ' na ' , ui ' tuil ' hk'a ' cum ' na ' ri pe ' ri leuum ' na ' ."

³² Hawc ' ko ' , Yo 'han eun hkam ' sa ' hki ' lah ' , "Pun ui ' ri nyu Cit ' seunga ' na ' seun ' a gui ' , a lih neum kuing ' pang mao ' na ' . A lih ut ' mae ' Heun. ³³ 'Mi lawn nyu Cit ' seunga ' na ' lih ut ' a mae ' a ' nhaw ' ko ' , hkawn ' meuh Eun Cawo ' kaw tuil ' hk'a ' cum ' ri peue ri Cit ' seunga ' chak ' na ' Eun hawc ' , Peucawo ' Cawo ' kah ui ' tuil ' hk'a ' cum ' ri peue ri leuum ' na ' Eun lawn un ' lah ' a ri ui ' yeuh keutit ' ko ' , ui ' hkuin ' kaw duing yawng hkawn ' meuh Eun a ' nhaw ' . ³⁴ Pun ui ' ri nyu a hawc ' . Ui ' meuh sa ' hki ' ka, hkawn ' meuh Eun Kon ' ai ' Eun Peucawo ' ."

Muk la ri meuh tapae ' Eun Yesu ' nanggal ' na ' ce

³⁵ Hawc ' ka na ' ti seunyi, Yo 'han eun tang cawng mae ' tapae ' ri lal ' peue na ' ka teh ' . ³⁶ Yam nyu eun Yesu ' ing ' Eun na ' , eun lah ' , "Keue ' ri Kon ' yung ' Eun Peucawo ' na ' reu ' ."

³⁷ Yam tapae ' lal ' peue na ' mhawng ' ka leukah ' lah ' eun na ' , ka hot ' Yesu ' Eun heul ' . ³⁸ Yam Yesu ' hpawt ' Eun ri keue ' Eun nyu hot ' ka ri na ' , Eun mhaing ' ka, "Pa ' ci ' kaw lo ' keunhaw ' ?"

Ka tang top ' a, "Rabi ' (vangdoh ' ka Rabi ' na ' lah ' a seura '), Mi ci ' ut ' tawngnhaw ' ?"

³⁹ Yesu ' Eun lah ' , "Ing ' nawk a reu ' ."

Kop awn ' na ka hot ' Eun heul ' , ka pun ri nyu vang ut ' Eun na ' . Ka keulawn ' ut ' mae ' Yesu ' Eun seunyi awn ' na. A meuh hk'ao pun ' nali hk'a ' pul na ' .

⁴⁰ Peue pun ri mhawng ' leukah ' eun Yo 'han ka hot ' Yesu ' Eun heul ' awn ' ka ku ' ti peue na ' a meuh Andre ku ' meuh awng ' eun Si ' mon Petru ' na ' eun. ⁴¹ Nambat keuhti ka ku ' yeuh eun na ' , eun ing ' lah ' Si ' mon ec ' ri na ' eun mhawng ' , "Pun ya ri nyu Mesi ' ya Eun hawc ' ."

(Mesi ' ya na ' lah ' a Hkrit Eun.) ⁴² Hawc ' ko ' , eun va ec ' ri na ' eun heul ' ri Yesu ' Eun.

Yesu ' Eun keue ' ri Si ' mon eun. Eun lah ' , "Meuh mi Si ' mon kon ' eun Yo 'han na ' eun. Mi kaw pun ri ghuk ' ri muis Kefas ' " (vangdoh ' ka Kefas ' na ' a lah ' Petru ').

Klawng Hpi ' lip ' mae ' Nahtanela ' ka

⁴³ Hawc ' ka na ' ti seunyi, Yesu ' Eun kaw heul ' nang kuing ' Galilae ' na ' , Eun kuit a deut. Yam hk'eup ' Eun Hpi ' lip ' eun na ' , Eun lah ' a ri heun, "Hot ' Ui ' reu ' ."

⁴⁴ Hpi ' lip ' eun meuh peue veng Betsai ' da ' seun ' Andre mae ' Petru ' ka. ⁴⁵ Yam Hpi ' lip ' sok eun ri hk'eup ' Nahtanela ' eun na ' , eun lah ' a ri heun, "Peue ku ' Mo ' se tem ' eun ri uin ' lawng Eun nang htawm leukah ' ritroe na ' mae ' ku ' peue suip leukah ' Eun Peucawo ' na ' ce ku tem ' ri uin ' na ' , pun e ' ri nyu Eun hawc ' . Eun meuh Yesu ' kon ' eun Yo 'saep peue veng Nasaraet ' na ' Eun."

⁴⁶ Nahtanela ' eun mhaing ' eun, "Ku ' chak ' na ' kaw a duing cang pucti nang veng Nasaraet ' na ' aw?"

Hpi ' lip ' eun top ' a, "Ing ' nawk a maen ' reu ' ."

⁴⁷ Yam Yesu ' nyu Eun Nahtanela ' ing ' eun ri ti na ' , Eun lah ' lawng eun na ' yeuhki ' , "Hkawn ' meuh eun taeng peue I ' sarela ' neum, hk'a ' naee eun na ' a hkuin ' kue ' hk'a ' vok ' vek ' na ' saec ' peunae ' ."

⁴⁸ Nahtanela ' eun mhaing ' Eun, "Mi ci ' yawng ui ' yeuh sa ' nhaw ' ?" Yesu ' Eun top ' a, "Pun Ui ' ri nyu mi yam kawn ' mok ' mi hk'a ' ruim ka kleum ' pli ' keutuic na ' nanggal ' yam Hpi ' lip ' un ' nang klawng eun mi na ' hawc ' ."

⁴⁹ Hawc ' ko ' , Nahtanela ' eun lah ' a ri Heun, "Rabi ' , meuh Mi Kon ' ai ' Eun Peucawo ' , Mi meuh Hkun ' haw ' hkam ' ye peue I ' sarela ' na ' ."

⁵⁰ Yesu ' Eun lah ' , "Yum ' mi kopti lah ' Ui ' ri nyu mi hk'a ' ruim ka kleum ' pli ' keutuic na ' aw? Mi ku kaw nyu ku ' keuting hk'ai ' aen ' a yeut. ⁵¹ Yesu ' Eun tang suip ri lah ' , "Kaw Ui ' lah ' a ri pe ' neumneum, kaw pe ' pun ri nyu kuing ' pang mao ' na ' dah ' ka, in ' hpom Eun Peucawo ' ce na ' huk ' huk ' lihlih hk'a ' pang Eun Kon ' ai ' peue na ' ."

† Kefas ' na ' a meuh leukah ' Arame ' , Petru ' na ' a meuh leukah ' Helasa ' . Vangdoh ' ka muis lal ' muis aen ' na a lah ' seumu.

Yesu ' yeuh Eun leuum ' na ' meuh leuum ' pli ' bui

2 Hawc ' awn ' na loe ' seunyi na ' , a kue ' pawe hk'a chec ' nang yung ' Kana ' kuing ' Galilae ' na ' . Ma Eun Yesu ' ka ut ' mawn ' .² Peue ku klawng Yesu ' Eun mae ' tapae ' Eun na ' ce ing ' hk'a chec ' yeut .³ Yam leuum ' pli ' bui na ' euc ' ka na ' , ma Eun Yesu ' ka lah ' a ri Heun , "Leuum ' pli ' bui ce na ' euc ' ka ."

⁴ Yesu ' Eun lah ' , "Ma , pawlaee lah ' ku ' kaw Ui ' htuk ' ri yeuh na ' , yam Ui ' na ' un ' nang rot ka ."

⁵ Ma Eun Yesu ' ka lah ' a ri mhai ' na ' ce , "Hot ' ri yeuh ku ' kah Eun pe ' yeuh na ' reu ' ."

⁶ Mawn ' na ' a kue ' htam seumu les meul ' . A meuh htam ku ' peue ceu Yu ' da na ' lo ' ce yam yeuh ce rit hk'a ' seunga ' seungawm na ' . Htam ti meul ' na ' a kui ' leuum ' na ' lal ' loe ' glawm ' † .

⁷ Yesu ' Eun lah ' a ri mhai ' na ' ce , "Cin ri seue ' leuum ' na ' nuk htam na ' ce reu ' ."

Kop awn ' na , ce cin ri seue ' leuum ' na ' nuk hpeng moeng ka htam na ' .

⁸ Hawc ' ko ' , Yesu ' Eun lah ' a ri ce , "Cit ri heul ' tuil ' a ri ro ' cat ' kan ' na ' eun reu ' ."

Ce ku ti ri heul ' tuil ' a .

⁹ Ro ' cat ' kan ' na ' eun cim ri nawk leuum ' keut ' ri meuh leuum ' pli ' bui na ' . Eun un ' yawng leuum ' pli ' bui awn ' pun a ri neum tawngnhaw ' . Daecti mhai ' cin ri seue ' leuum ' na ' ce yawng vang pun a ri na ' yeut . Ro ' cat ' kan ' na ' eun klawng ri mhaing ' nang nhum ' pen ' na ' eun ,

¹⁰ "A saec ' meuh a ' nhaw ' , tuil ' peue peue nyui leuum ' pli ' bui chak ' na ' nanggal ' , yam peue chec ' na ' pun ce ri nyui heun ' hawc ' na ' , koe tuil ' ce nyui ku ' ca ri ngos leng na ' . Daecti mi ri , mi vae ' kaw ' roksa ' leuum ' pli ' bui chak ' hk'ai ' peue na ' rot maet ' maen ' ."

¹¹ Aen ' meuh a het ' keuting ku ' Yesu ' la Eun ri yeuh a pok nanggal ' na ' . Eun yeuh a nang yung ' Kana ' kuing ' Galilae ' na ' . Kopti yeuh Eun aen ' a na ' , a yeuh munhpung ' Eun na ' pucti lih . Tapae ' Eun na ' ce ku kue ' hk'a ' yum ' hk'a ' naee Heun .¹² Hawc ' awn ' na , Eun lih nang veng Kapeni ' um na ' mae ' ma mae ' awng ' me Eun na ' ce , mae ' tapae ' ri na ' ce tiduih ' . Ce ut ' mawn ' lal ' loe ' seunyi .

Yesu ' yeuh Eun nya hk'o ' mun ' keuting na ' seunga ' chak '

¹³ Yam kaw a hk'aws ' rot ri pawe vel nya ce peue Yu ' da na ' , Yesu ' Eun huk ' nang veng Yeru ' salaem na ' .¹⁴ Nang kang ' hkung ' ka nya hk'o ' mun ' keuting na ' , Eun pun ri nyu peue paing ' a ' moe , kon ' yung ' mae ' gui ' na ' ce .

† A kue ' hk'ao 75 a ' ko ' 115 lit '

Ngon ' ce mok ' mae ' hpuin ' leuploh ' leumuil ri na ' .¹⁵ Eun ti ri yeuh mu ' na ' meuh ku ' ta ' faet ' . Hawc ' ko ' , Eun ra ri tec peue awn ' ce gawm ' euc ' gawm ' kon ' yung ' gawm ' a ' moe ce na ' pucti heul ' hk'ai ' kang ' hkung ' ka nya hk'o ' mun ' keuting na ' . Eun bah ri tec paec ce peue leuploh ' leumuil na ' . Eun cut ' hpuin ' ce na ' glhawp ri .¹⁶ Eun lah ' a ri peue paing ' gui ' na ' ce , "Ti ceu nang aen ' ce heul ' hk'ai ' maen ' na ' reu ' . A ci ' yeuh keunhaw ' pe ' vae ' hat ' ri yeuh nya Eun Kuing ' Ui ' na ' meuh keulas?"

¹⁷ Tapae ' na ' ce kuit rot ri leukah ' tem ' ri nang htawm Seunga ' na ' , a lah ' , "Hpum ' ha ' ron Ui ' pun nya Mi na ' nyawk ' ."

¹⁸ Peue Yu ' da na ' ce lah ' a ri Heun , "Punta kaw Mi tuil ' ye nyu kue ' Mi ahkvang kaw yeuh ceu nang aen ' ce na ' , Mi ci ' kue ' ku ' kaw yeuh ye nawk het ' keuting keunhaw ' ?"

¹⁹ Yesu ' Eun top ' a , "Yeuh nya hk'o ' mun ' keuting aen ' a lu reu ' , kaw Ui ' tang vuh a hk'u ' hk'a ' naee loe ' seunyi na ' ."

²⁰ Peue Yu ' da na ' ce top ' a , "Nya hk'o ' mun ' keuting aen ' kaw ' pleng ' a ri ling ' pun pun ' kul ' les neum . Kaw Mi vuh a hk'u ' hk'a ' naee loe ' seunyi na ' yawo aw?"

²¹ Daecti nya hk'o ' mun ' keuting ku ' Yesu ' lah ' Eun a rot ri ka na ' , a meuh tu ' Eun na ' .²² Hawc ' yam tang kuh ' im ' Eun hk'ai ' vang yeum ri na ' , tapae ' Eun na ' ce kuit rot ri ku ' lah ' Eun ri uin ' na ' . Kop awn ' na , ce yum ' leukah ' htawm Seunga ' na ' mae ' ku ' Yesu ' lah ' Eun na ' .

²³ Yam kaw ' ut ' Eun nang veng Yeru ' salaem hk'a ' - naee yam pawe vel nya na ' , peue heun ' na ' ce nyu het ' keuting yeuh Eun na ' , ce yum ' hk'a ' naee muis Eun na ' .

²⁴ Daecti Yesu ' Eun un ' yum ' ce , kopti yawng Eun a ' - cang ' ce peue na ' .²⁵ Kopti ku ' kue ' hk'a ' naee peue na ' a meuh keunhaw ' na ' yawng meun Eun a na ' , Eun hkuin ' kaw lo ' a ' nhaw ' ing ' lah ' ri mhawng ' lawng ce peue na ' .

Yesu ' sangsawn ' Eun Ni ' hko ' demas '

3 A kue ' peue Hparisae ' muis Ni ' hko ' demas ' . Eun meuh muk ce peue u ' peung peue ceu Yu ' da na ' ce .² Eun ing ' lah ' a ri Yesu ' Eun peunsum ' na ' , "Rabi ' , yawng ye meuh Mi seura ' lih neum Peucawo ' Eun . Kopti Peucawo ' Eun lawn un ' ut ' mae ' peue ko ' , a ' nhaw ' hkuin ' cang yeuh het ' keuting seun ' ku ' yeuh Mi na ' saec ' ti peue ."

†† Suk ' seun ' 69:9

³Yesu ' Eun top ' a, "Kaw Ui ' lah ' a ri mi neumneum, a 'nhaw ' lawn un ' nang keut ' hk'u ' bae ko ' , eun hkuin ' kaw pun ri nyu kuing ' Eun Peucawo ' na ' ."

⁴Ni ' hko ' demas ' eun mhaing ' Eun, "Peue kawt hawc ' na ' eun ci ' kaw cang keut ' hk'u ' bae yeuh sa 'nhaw ' ? Kaw eun tang cang lec keuteul ka ma ri eun na ' tang keut ' bae lal ' pok ti pok aw?"

⁵Yesu ' Eun top ' a, "Kaw Ui ' lah ' a ri mi neumneum. A 'nhaw ' lawn un ' keut ' hk'a ' naee leuum ' mae ' hk'a ' naee Cit ' seunga ' na ' ko ' , eun hkuin ' kaw cang pun ri lec nang kuing ' Eun Peucawo ' na ' .⁶Nham ' keune na ' lak ' keut ' a nham ' keune, daecti Cit ' seunga ' na ' a lak ' keut ' Cit ' seunga ' na ' .⁷Pawlae am ' ri lah ' Ui ' mi kaw kah ri keut ' hk'u ' bae ti pok na ' .⁸Guil ' na ' a sum ' puing ' heul ' hk'a 'nhaw ' na ' cang ka. Mi saec ' mhawng ' seng ' ka guil ' na ' , daecti mi hkuin ' pen ' lah ' ing ' a neum hk'a 'nhaw ' , a 'ko ' heul ' a hk'a 'nhaw ' . Peue keut ' neum Cit ' seunga ' ku peue na ' peue ku seun ' awn ' a yeut."

⁹Ni ' hko ' demas ' eun tang mhaing ' Eun, "Aen ' ce a ci ' kaw cang meuh yeuh sa 'nhaw ' ?"

¹⁰Yesu ' Eun top ' a, "Mi tup meuh seura ' ce peue I ' sarela ' na ' , mi kaw n ' kaw un ' leuceng pun lawng aen ' a aw ' ?¹¹Kaw Ui ' lah ' a ri mi neumneum, 'Lah ' e ' lawng ka ku ' yawng ri na ' , e ' hkam ' sa 'hki ' lawng ka ku ' tawn nyu ri na ' . Daecti pe ' vae ' un ' rap ri ti leukah ' hkam ' sa 'hki ' ye na ' .'¹²Lah ' Ui ' ku ' to ' ri ri bhen ' keute ' na ' , mi lawn na ' un ' yum ' a ko ' , Ui ' saec ' na ' lah ' ku ' to ' ri ri kuing ' pang mao ' na ' , mi ci ' kaw cang yum ' a yeuh sa 'nhaw ' ?¹³A lawn un ' meuh Kon ' ai ' peue lih neum kuing ' pang mao ' na ' Eun ko ' , a 'nhaw ' hkuin ' duing huk ' rot kuing ' pang mao ' na ' saec ' ti peue.¹⁴Seun ' Mo ' se yuk eun seueueng ' nang vang hk'oh ' hk'oeng ' na ' , saec ' meuh Kon ' ai ' peue na ' Eun ku kaw pun ri rap ri ti hk'a ' yuk ri huk ' na ' yeut,¹⁵punta peue yum ' Eun na ' kaw ce pun cit ' tip ' a 'yu tip cot ' cu na ' ku peue ri na ' .

¹⁶Kopti Peucawo ' leumeus ' Eun peue bhen ' keute ' na ' , Eun hkam ' ri tuil ' Kon ' ai ' ti peue ri na ' Eun. Punta peue yum ' Kon ' ai ' Eun na ' ku peue kaw ce un ' lulaic, daecti ce kaw pun cit ' tip ' a 'yu tip cot ' cu na ' .¹⁷Kopti Peucawo ' Eun hkuin ' cus ' Kon ' ai ' ri na ' Eun lih pang bhen ' keute ' na ' punta kaw Eun taws ' a 'mu ri bhen ' keute ' na ' , daecti a meuh punta kaw Eun teum ' kawm bhen ' keute ' na ' lawtpon ri Kon ' ai ' ri na ' Eun.¹⁸A 'nhaw ' lawn yum ' Eun ko ' , eun hkuin ' kaw pun ri hkam ' hk'a ' taws ' a 'mu na ' . Daecti a 'nhaw ' lawn un ' yum ' ko ' , eun kaw pun ri hkam ' hk'a ' taws ' a 'mu na ' kopti un ' yum ' eun muis Eun Kon ' ai ' ti peue Eun Peucawo '

na ' Eun.¹⁹Hk'a ' taws ' a 'mu na ' meuh a yeuhki ' , ku ' ceng ' na ' ing ' lec a pang bhen ' keute ' na ' , daecti peue na ' peue leumeus ' hk'a ' duim ' lawng na ' lheu ' ku ' ceng ' na ' kopti hk'a ' yeuh peue na ' rai ka.²⁰Peue yeuh ku ' rai ku peue na ' nyu ce ku ' ceng ' na ' pereng ri. Kopti lhat ' ce ku ' yeuh ri na ' kaw a pun ri tuh ' ri glih ' - gneueng ' na ' , ce kaw un ' ing ' lec hk'a ' naee ku ' ceng ' na ' .²¹Daecti a 'nhaw ' lawn a 'yu im ' hk'a ' naee hk'a ' leupaws seumeu ' na ' ko ' , punta ku ' yeuh eun na ' cu eun Peucawo ' Eun eun yeuh a na ' kaw a tuh ' ri glih ' - gneueng ' na ' , eun kaw ing ' lec hk'a ' naee ku ' ceng ' na ' ."

Yo 'han cawo ' tuil ' hk'a ' cum ' hkam ' eun sa 'hki ' lawng Eun Yesu '

²²Hawc ' awn ' na, Yesu ' Eun mae ' tapae ' Eun na ' ce heul ' nang yung ' hk'a ' naee ka kuing ' Yu ' da na ' . Eun ut ' mae ' ce mawn ' , Eun tuil ' hk'a ' cum ' ri peue.

²³Saec ' meuh Yo 'han eun ku buih tuil ' hk'a ' cum ' ri peue nang yung ' Ai ' non keunam ka yung ' Salim na ' . Kopti teh ' na ' lheu ' a ri leuum ' na ' , peue ing ' rap ri ti hk'a ' cum ' na ' ri heun un ' lae htawt ' deut.²⁴(Aen ' a meuh nanggal ' yam Yo 'han un ' nang lec eun htawng ' na ' .)²⁵Tapae ' eun Yo 'han na ' ce ngon ' , ce htu ' hting ' peue Yu ' da na ' eun ri lawng hk'a ' saic ' ri seunga ' hot ' leukah ' ritroe na ' .²⁶Ce ing ' lah ' a ri Yo 'han eun, "Rabi ' , peue tawn ut ' mae ' mi hk'a ' teh ' ka klong ' Yaw ' dan ku ' hkam ' mi sa 'hki ' rot ri Heun na ' Eun, Eun buih tuil ' hk'a ' cum ' . Peue buih heul ' ri Heun ku peue."

²⁷Yo 'han eun top ' a, "A lawn un ' meuh ku ' Peucawo ' tuil ' Eun neum kuing ' pang mao ' na ' ko ' , peue hkuin ' cang pun keunhaw ' .²⁸Saec ' pe ' ri meun, pe ' ku kaw cang hkam ' sa 'hki ' ri leukah ' lah ' ui ' yeuhki ' na ' , 'Hpaw ui ' ca ' meuh Hkrit Eun, daecti ui ' pun ri cus ' ri lih nanggal ' Eun.'²⁹Kon ' hk'ih ' kaw ti ri is ' me na ' meuh eun is ' eun seula na ' . Pu eun seula kaw ti ri is ' beun ' na ' , ko ' eun ri leuceng leukah ' eun seula na ' . Yam pun eun ri mhawng ' leukah ' eun na ' , pu na ' eun ren ' kaw nyawk ' . Ui ' ku ren ' kaw seun ' awn ' na yeut. Maet ' maen ' , hk'a ' ren ' kaw ui ' na ' a htonnuk hawc ' .³⁰Heun ri kaw Eun baet ti huk ' hawn ' , ui ' ri kaw ui ' baet ti yawm ' heul ' .

³¹Ku ' lih neum pang lhung ' na ' , pun Eun ri ut ' hk'a ' - pang ku ceu na ' . Ku ' lih neum bhen ' keute ' na ' , eun meuh is ' ka bhen ' keute ' na ' . Eun leukah ' seun ' peue ing ' neum bhen ' keute ' na ' . Ku ' lih neum kuing ' pang mao ' na ' , Eun ut ' hk'a ' pang ku ceu gawm ' euc ' na ' .³²Eun hkam ' sa 'hki ' ka ku ' pun Eun ri nyu pun Eun ri mhawng ' na ' , daecti a un ' kue ' nang rap ri ti leukah '

hkam ' sa ' hki ' Eun na ' saec ' ti peue. ³³Peue rap ri ti sa ' hki ' hkam ' Eun na ', htawhkam eun Peucawo ' meuh Eun neum. ³⁴Peue Peucawo ' cus ' Eun na ', lah ' Eun leukah ' Eun Peucawo ' na '. Kopti Peucawo ' tuil ' Eun Cit ' seunga ' ri na ' Eun un ' laee peutat a. ³⁵A ' kuiing ' leumeus ' Eun Kon ' ai ' na ' Eun. Eun tuil ' ku ceu na ' nang dak ti ' Eun Kon ' ai ' na '. ³⁶A ' nhaw ' lawn yum ' Kon ' ai ' na ' Eun ko ', eun kaw pun cit ' tip a ' yu tip cot ' cu na '. Daecti a ' nhaw ' lawn un ' rap ri ti Kon ' ai ' na ' Eun ko ', eun kaw un ' pun ri nyu a ' yu na ', kopti hk'a ' seungeueng ' Eun Peucawo ' na ' kaw n ' ut ' a mae ' heun na '."

Yesu ' leukah ' Eun mae ' beun ' peue Samari '

4 Peue Hparisae ' na ' pun ce ri mhawng ' Yesu ' baet Eun ri kue ' tapae ' heun ' mae ' tuil ' Eun hk'a ' cum ' na ' heun ' hk'ai ' Yo ' han eun na '. ²Neumneum ka na ', tu ' Eun Yesu ' na ' Eun hkuin ' tuil ' hk'a ' cum ' na ', tapae ' Eun na ' tuil ' ce a. ³Yam Yesu ' yawng Eun peue Hparisae ' na ' pun ce ri mhawng ' yeuh a keutit ' na ', Eun pucti heul ' neum kuing ' Yu ' da na ' Eun tang huk ' nang kuing ' Galilae ' na ' bae ti pok.

⁴Eun kah ri hpa ' kuing ' Samari ' na '. ⁵Kop awn ' na, Eun lec nang veng Si ' hka ut ' nang kuing ' Samari ' na '. A de bhen ' keute ' ku ' Yakop ' tuil ' eun kon ' me ri Yo ' saep eun is ' a na '. ⁶Lamo ' eun Yakop ' na ' a kue ' mawn '. Kopti Yesu ' long Eun hk'a ' Eun tal na ', Eun mok ' keunam ka lamo ' na '. Yam awn ' a meuh hk'ao yam peunnyi keuting na '.

⁷Yam beun ' peue Samari ' na ' heul ' cin ka leuum ' na ', Yesu ' Eun lah ' a ri ka, "Hk'o ' pa ' tuil ' Ui ' nyui leuum ' ti aet '." ⁸(Yam awn ' na, tapae ' Eun na ' ce heul ' leuvaee ku ' hk'a nang veng.)

⁹Beun ' peue Samari ' na ' ka top ' a ri Heun, "Meuh Mi peue Yu ' da, ui ' meuh beun ' peue Samari '. A ci ' yeuh keunhaw ', Mi vae ' hk'o ' ri nyui leuum ' ri ui '?" (Kopti peue Yu ' da na ' un ' yeuh ce a ' mawo ce peue Samari ' na '.)

¹⁰Yesu ' Eun top ' a ri ka, "Pa ' lawn na ' yawng ku ' Peucawo ' kaw Eun tuil ' na ' mae ' Cawo ' ku ' hk'o ' ri nyui leuum ' ri pa ' na ' Eun ko ', na ' pa ' chak ' cang hk'o ' ri Heun. Eun ku na ' chak ' cang tuil ' pa ' is ' leuum ' civit im ' na '."

¹¹Beun ' na ' ka top ' a, "Cawo ', Mi hkuin ' kue ' ku ' cit leuum '. Lamo ' aen ' a ku rui ' nyawk '. Mi ci ' kaw ti leuum ' civit im ' tit ' a neum tawngnhaw '?" ¹²Keuting Mi hk'ai ' Yakop ' a ' ta ' keuting ku ' tuil ' lamo ' aen ' a ri e ' na ' eun aw? Tu ' eun Yakop ' na ' mae ' kon ' lhan ' eun

na ' ce gawm ' sat ' hkawn ' eun na ' ce ku nyui leuum ' ka lamo ' aen ' na."

¹³Yesu ' Eun top ' a, "Peue nyui leuum ' aen ' a ku peue na ' kaw n ' kaw ce sum ' nyui leuum ' bae. ¹⁴Daecti peue nyui leuum ' tuil ' Ui ' na ' ce hkuin ' kaw laee sum ' nyui leuum ' bae. Neumneum ka na ', leuum ' tuil ' Ui ' ri ce na ' kaw a yeuh civit ce na ' seun ' keutui ' leuum ' peueng ' ri huk ' hk'a ' naee tu ' ce na '. A kaw tuil ' ce is ' cit ' tip a ' yu tip cot ' cu na '."

¹⁵Beun ' na ' ka lah ' a ri Heun, "Cawo ', punta kaw ui ' un ' laee sum ' nyui leuum ' un ' laee nyu ri heul ' cin leuum ' maen ' tam ' teuk na ', hk'o ' Mi tuil ' leuum ' tit ' a ri ui '."

¹⁶Yesu ' Eun lah ' a ri ka, "Ing ' klawng me pa ' na ' eun heul ' maen '."

¹⁷Ka lah ', "Hpaw ui ' ca ' kue ' me."

Yesu ' Eun lah ' a ri ka, "Lah ' pa ' ri un ' kue ' me na ', cawp ' ka. ¹⁸Neumneum ka na ', tawn pa ' ri kue ' me hpawn ' peue hawc '. Ku ' ut ' mae ' pa ' maet ' maen ' na ' eun ku hkuin ' meuh me pa '. Leukah ' kaw n ' lah ' pa ' na ' meuh a neum yeut."

¹⁹Beun ' na ' ka lah ', "Cawo ', yawng ui ' meuh Mi peue suip leukah ' Eun Peucawo '. ²⁰A ' ta ' a ' ya ye na ' faee ' ce pang gong aen ' na, daecti peue Yu ' da na ' pe ' lah ' peue kaw kah ri heul ' faee ' nang veng Yeru ' salaem palkoe."

²¹Yesu ' Eun lah ', "Beun ', yum ' Ui ' reu '. Kaw a hk'aws ' rot yam kaw pe ' un ' laee pun ri faee ' A ' kuiing ' Eun pang gong aen ' na, a ' ko ' nang veng Yeru ' salaem na '. ²²Peue Samari ' na ' faee ' pe ' ku ' un ' yawng ri na '. Daecti ye faee ' Peucawo ' Cawo ' ye yawng Eun na ', kopti hk'a ' htut lawtpon na ' ing ' a neum peue Yu ' da na ' ye. ²³Daecti yam awn ' kaw a hk'aws ' rot hawc '. Maet ' maen ' rot a yam peue faee ' neumneum na ' kaw ce faee ' A ' kuiing ' Eun ri cit ' mae ' ri hk'a ' neumneum na '. Kopti meuh ce peue faee ' seun ' ku ' A ' kuiing ' sok Eun na '. ²⁴Peucawo ' meuh Eun cit '. Peue faee ' Eun na ' ce kaw kah ri faee ' Eun ri cit ' mae ' ri hk'a ' neumneum na '."

²⁵Beun ' na ' ka lah ', "Yawng ui ' Mesi ' ya (ku ' lah ' peue meuh Hkrit na ' Eun) buih lih Eun. Eun lawn lih rot ko ', Eun na ' lah ' ye mhawng ' ku ceu."

²⁶Yesu ' Eun lah ' a ri beun ' na ' ka, "Ku ' buih leukah ' pa ' mae ' Ui ' aen ', meuh Ui ' Heun ri hawc '."

Tapae ' na ' ing ' rot ce ri Yesu ' Eun

²⁷Yam awn ' na, tapae ' Eun na ' ce ing ' rot. Ce am ' ri pun ce ri hk'eup ' leukah ' Eun mae ' beun ' awn ' ka. Daecti ce hkuin ' kue ' nang mhaing ' Eun, "Eun ci ' na "

lo ' keunhaw ' ?", a ' ko ' "A ci ' na ' meuh kop keunhaw ' ,
Eun vae ' leukah ' mae ' beun ' awn ' ka?"

²⁸ Hawc ' ko ' , beun ' awn ' ka hk'ah ' ri uin ' keutong ' leuum ' ri na ' , ka ing ' lah ' a ri peue nang veng na ' ce ,
²⁹ "Ing ' maen ' , ing ' nawk Cawo ' lah ' ku ' tawn yeuh ui ' ku ceu na ' ri ui ' na ' Eun , na ' Eun cang meuh Hkrit † Eun un ' yawng." ³⁰ Peue veng na ' ce pucti neum veng na ' ce ing ' ri Yesu ' Eun .

³¹ Yam awn ' na , tapae ' na ' ce lah ' , "Rabi ' , hk'o ' a ri Mi , hk'a ku ' hk'a reu ' ."

³² Daecti Yesu ' Eun lah ' a ri ce , "Kue ' Ui ' ku ' hk'a un ' yawng pe ' na ' ."

³³ Tapae ' na ' ce mhaing ' puri , "Ti ri peue na ' eun ing ' tuil ' Eun hk'a ku ' hk'a hawc ' aw?"

³⁴ Yesu ' Eun lah ' , "Ku ' hk'a Ui ' na ' ko ' , meuh a hot ' ri yeuh alo Eun ku ' cus ' Ui ' lih na ' mae ' yeuh kan ' Eun na ' htonnuk na ' . ³⁵ Lah ' pe ' , 'A lawn rot pun ' chi ' ko ' , a kaw rot yam vuic ngho ' , un ' meuh ka aw? Daecti , Ui ' lah ' a ri pe ' , 'Plang ' ngai ' ri seucon ' mal ' na ' reu ' . Ngho ' na ' seunyl ka , a hk'o ' sum ' vuic hawc ' ."

³⁶ Maet ' maen ' , peue vuic ngho ' na ' buih ti eun ngos reng ri , eun buih hk'on ' ro pli ' punta cit ' tip a ' yu tip cot ' cu ri na ' . Kop awn ' na , peue puin ' na ' mae ' peue vuic na ' kaw ka ren ' kaw tiduih ' na ' . ³⁷ A meuh neum seun ' ku ' lah ' ka , 'Puin ' a ti peue , vuic a ti peue ' , na ' .

³⁸ Cus ' Ui ' pe ' heul ' vuic ku ' un ' lae nyu ri euc ' kaw ' reng ri na ' . Peue seubu na ' htalikawm ' hkam ' ce ri yeuh kan ' , pe ' pun ri rap ri ti mun ' na ' neum ku ' yeuh ce euc ' kaw ' reng ri na ' ."

Peue Samari ' na ' yum ' ce Yesu ' Eun heun ' peue

³⁹ Peue Samari ' ut ' nang veng awn ' ce yum ' Yesu ' Eun heun ' peue , kopti leukah ' hkam ' sa ' hki ' ka beun ' awn ' lah ' ka , "Lah ' Eun ku ' tawn yeuh ui ' na ' ce ku ceu ka ri ui ' ."⁴⁰ Kop awn ' na yam peue Samari ' na ' ing ' rot ce mae ' Heun na ' , ce hk'o ' hk'ang Eun ut ' ri ti . Eun ku ut ' mawn ' lal ' seunyi . ⁴¹ Kopti meuh a leukah ' Eun na ' , peue seubu na ' ce ku yum ' Eun heun ' peue .

⁴² Ce lah ' a ri beun ' awn ' ka , "Tang ' neum maet ' - maen ' na ' , a hkuin ' cae ri meuh yum ' ye Eun kopti leukah ' pa ' na ' palkoe . Maet ' maen ' pun ye ri mhawng ' a tam ' tu ' ri hawc ' , ye yawng meuh Eun taeng Cawo ' teum ' kawm htut bhen ' keute ' na ' lawt-pon."

Yesu ' bai ' Eun kon ' me eun cawo ' yeuh kan ' kuing ' na ' cuin

⁴³ Hawc ' awn ' na lal ' seunyi , Yesu ' Eun pucti heul ' hk'ai ' mawn ' na ' . Eun huk ' nang kuing ' Galilae ' .
⁴⁴ (Ku ' Yesu ' sum ' lah ' Eun na ' meuh a , peue suip leukah ' Eun Peucawo ' na ' un ' pun Eun munhpung ' ri neum vang ut ' ri na ' .) ⁴⁵ Yam huk ' rot Eun nang kuing ' Galilae ' na ' , peue Galilae ' na ' ce rap ri ti Eun . Kopti tawn nyu ce ku ' hk'o ' am ' heun ' ceu yeuh Eun nang veng Yeru ' salaem yam pawe vel nya na ' , kopti caw ce ri ut ' teh ' yeut na ' .

⁴⁶ Eun ing ' rot nang yung ' Kana ' kuing ' Galilae ' na ' bae . Yung ' aen ' a meuh vang yeuh Eun leuum ' na ' meuh leuum ' pli ' bui na ' . A kue ' cawo ' yeuh kan ' kuing ' ti peue nang veng Kapeni ' um na ' . Kon ' me eun na ' eun peuyhat , eun it ' . ⁴⁷ Yam cawo ' awn ' mhawng ' eun Yesu ' kuh ' Eun neum kuing ' Yu ' da Eun tang huk ' rot nang kuing ' Galilae ' na ' , eun ing ' hk'o ' hk'ang Yesu ' Eun ing ' bai ' kon ' me ku ' kaw hk'aws ' yeum hawc ' ri na ' eun .

⁴⁸ Yesu ' Eun lah ' a ri heun , "Pe ' lawn un ' pun ri nyu het ' keuting na ' mae ' ku ' hk'o ' am ' na ' ko ' , pe ' hkuin ' kaw duing yum ' ."

⁴⁹ Cawo ' yeuh kan ' kuing ' na ' eun lah ' , "Cawo ' , pu- ing ing ' maen ' nanggal ' . Kon ' ui ' na ' kaw eun hk'aws ' yeum."

⁵⁰ Yesu ' Eun top ' a , "Ing ' reu ' , kon ' mi na ' kaw eun a ' yu im ' ."

Cawo ' awn ' eun yum ' ku ' Yesu ' lah ' Eun na ' , eun ing ' ti nya ri . ⁵¹ Yam kawm ' buih ing ' rot eun lang ' hk'a ' na ' , mhai ' eun na ' ce heul ' hk'eup ' eun . Ce lah ' lawng kon ' me eun na ' cuin eun hawc ' na ' ri heun . ⁵² Yam mhaing ' eun ce ri kon ' eun na ' eun ci ' cuin yamnhaw ' na ' , ce top ' a , "Cuin eun peunku ' sak ' som ' nyi ti nali na ' ."

⁵³ Hawc ' ko ' , kuiing ' na ' eun pawn cawp ' a yam Yesu ' lah ' Eun ri heun , "Kon ' mi na ' kaw eun a ' yu im ' " , na ' . Kop awn ' na , heun ri mae ' peue nya peue hk'ul ' eun na ' ce yum ' gawm ' euc ' ri .

⁵⁴ Aen ' a meuh het ' keuting ku ' Yesu ' yeuh Eun lal ' pok ti pok yam huk ' Eun neum kuing ' Yu ' da Eun huk ' kuing ' Galilae ' na ' .

Bai ' peue peuyhat cuin keunam glu

5 Hawc ' awn ' na , punta Yesu ' kaw Eun heul ' ri pawe ce peue Yu ' da na ' , Eun huk ' nang veng Yeru ' salaem na ' . ² Nang veng Yeru ' salaem keunam ka

† A ' ko ' Mesi ' ya

bawl' leuva' muis Leuva' Kon'yung' na' a kue' glu ti meul', leukah' Arame' ka na' a lah' ri meuh Bet' sah-ta'. A kue' sa' la hpawn' lhang' rop glu awn' na. ³Peue peuyhat, peue ngai' lec', peue ti' cung vok', ti' cung chuing' na' ce it' hk'a' naee ka sa' la awn' ce. ⁴Yam cang rot a yam ka na', in' hpom Eun Peucawo' ti peue eun lih kvaee' glu na'. Yam leuum' na' hpo' lok ka na', ku' pun ri lec glu na' nanggal' na' eun saec' peuyhat ceu nangnhaw', eun pun ri cuin. ⁵Mawn' na', a kue' peue peuyhat pun leuae' kul' seudi' neum ti peue. ⁶Yam Yesu' pun Eun ri nyu it' eun na' mae' pun Eun ri yawng yeuh eun ko' ling' lang' hawc' na', Eun lah' a ri heun, "Sum' cuin mi hk'ai' peuyhat ri na' aw?"

⁷Peue peuyhat na' eun top' a, "Cawo', yam leuum' na' hpo' lok ka na', a hkuin' kue' nang kaw teum' kawm ui' lec nang glu na' saec' ti peue. Yam kaw ui' co' ca' ri lec a na', ku' seubu na' eun lec a nanggal' ui' hawc'."

⁸Hawc' ko', Yesu' Eun lah' a ri heun, "Kuh' reu', mi na' ti hk'eung it' mi na' heul' reu'." ⁹Peue awn' eun keulawn' cuin. Eun ti hk'eung it' ri na', eun dang ri heul'.

Seunyi yam awn' a meuh seunyi Sin'. ¹⁰Peue Yu' da na' ce lah' a ri peue cuin awn' eun, "Seunyaen' meuh a seunyi Sin', leukah' ritroe na' a ham' un' kah mi ti hk'eung it' ri heul'."

¹¹Daecti eun top' a ri ce, "Ku' bai' ui' cuin na' lah' Eun a ri ui', 'Ti hk'eung it' mi na' heul' reu'."

¹²Kop awn' na, ce mhaing' eun, "Ku' lah' a ri mi Eun kah mi ti hk'eung it' ri heul' na', Eun ci' meuh a' n-haw'?"

¹³Daecti peue cuin awn' eun hkuin' yawng Eun, kopti Yesu' rai' Eun heul' hk'a' naee peue heun' na' ce hawc' na'.

¹⁴Hawc' awn' na un' ling', Yesu' Eun tang pun ri hk'eup' eun nang nya hk'o' mun' keuting na' bae. Eun lah' a ri heun, "Keue', ut' sam' ran mi cawn. Cu yeuh map' mi na' reu'. A lawn un' yeuh keutit' ko', ku' rai lheu' ku' hk'im' na' na' a cang tang ing' keut' ri mi."

¹⁵Peue awn' eun heul'. Eun lah' ku' bai' ri cuin na' meuh a Yesu' Eun, eun lah' a ri peue Yu' da na' ce.

¹⁶Kop awn' na, kopti Yesu' yeuh Eun ceu nang aen' a hk'a' naee seunyi Sin' na', peue Yu' da na' ce keunhap' nokneh Eun. ¹⁷Yesu' Eun lah' a ri ce, "Kuiing' Ui' na' yeuh Eun kan' ri na' keuyuit laleung rot seunyaen'. Ui' ku' buih yeuh kan' seun' Heun ri yeut." ¹⁸Kop awn' na, peue Yu' da na' ce gawm sae' caee' ri sok hk'a' kaw ri toh Yesu' Eun na' ri ku' hk'a' ku' ceu na' kopti Yesu' Eun

hkuin' caee yeuh ku' kleuc' ri ritroe ka seunyi Sin' na' palkoe, daecti Eun ku' klawng Peucawo' na' Eun meuh kuiing' ri, aen' a meuh yuk Eun tu' ri na' hpeng Peucawo' Eun na'.

Kon' ai' kue' Eun ti' ca

¹⁹Yesu' Eun top' a ri ce, "Ui' lah' a ri pe' neumneum, Kon' ai' Eun hkuin' cang yeuh keunhaw' na' meun koe. Cang yeuh Eun pal ku' nyu Eun A' kuiing' ri yeuh Eun na' palkoe, kopti A' kuiing' na' Eun lawn yeuh keunhaw' ko', Kon' ai' na' Eun ku' yeuh a yeut. ²⁰Kopti A' kuiing' leumeus' Eun Kon' ai' na' Eun. Eun tuil' Kon' ai' Eun nyu ku' yeuh ri na' ku' ceu ka. Kaw' kaw Eun tuil' Kon' ai' Eun nyu ku' keuting lheu' hk'ai' ceu nang aen' ce na' bae, pe' kaw am' ri ka. ²¹Kopti A' kuiing' Eun lawn yeuh peue yeum na' ce tang kuh' im' yeuh sa' nhaw' na' ko', Kon' Ai' Eun ku' kaw tuil' a' yu ri peue htuk' hpum' Eun na' ce yeuhko' yeut.

²²Lheu' awn' na, A' kuiing' Eun hkuin' taws' a' mu ri a' nhaw' saec' ti peue, daecti ap Eun hk'a' taws' a' mu na' ri Kon' ai' na' Eun gawm' euc' ka. ²³Aen' a meuh punta peue gawm' euc' na' kaw peue tuil' munhpung' na' ri Kon' ai' Eun seun' tuil' peue a ri A' kuiing' na' Eun. A' nhaw' lawn un' tuil' munhpung' na' ri Kon' ai' Eun ko', eun ku' un' tuil' a ri A' kuiing' Cawo' cus' Kon' ai' Eun lih na' Eun yeut.

²⁴Ui' lah' a ri pe' neumneum, 'A' nhaw' lawn leuceng leukah' Ui' na' mae' yum' Cawo' cus' Ui' lih na' Eun ko', eun kaw kue' cit' tip' a' yu tip cot' cu na'. Eun kaw un' laee pun ri hkam' hk'a' taws' a' mu na'. Eun pun ri lawtpon hk'ai' hk'a' yeum na', eun pun ri lec hk'a' naee hk'a' a' yu im' na' hawc'." ²⁵Ui' lah' a ri pe' neumneum, 'Kaw a hk'aws' rot yam ka hawc'. Maet' maen' rot a yam peue yeum na' kaw ce pun ri mhawng' leukah' Eun Kon' ai' Eun Peucawo' na' hawc'.' Peue pun ri mhawng' a na' kaw ce kue' a' yu, ²⁶kopti A' kuiing' Eun lawn kue' a' yu hk'a' naee tu' ri na' meun yeuh sa' nhaw' ko', Eun ku' tuil' Kon' ai' na' Eun kue' a' yu hk'a' naee tu' Eun na' meun seun' awn' a yeut. ²⁷Kopti meuh Eun Kon' ai' peue na', A' kuiing' Eun tuil' Eun kue' an' nya ti' ca kaw taws' a' mu na'.

²⁸Pawlaee am' ri leukah' aen' na, kopti kaw a rot yam peue ut' nang leumuic ri na' kaw ce pun ri mhawng' seng' Eun Kon' ai' na'. ²⁹Kaw ce pucti lih. Peue yeuh ku' chak' na' ce kaw tang a' yu im', peue yeuh ku' rai na' ce kaw tang kuh' im' pun ri hkam' hk'a' taws' a' mu na'. ³⁰Ui' hkuin' cang yeuh keunhaw' na' ri tu' ri na' meun palkoe. Ui' taws' a' mu na' hot' seun' ku'

† Nanghtawm Seunga' na' ngon', a hkuin' kue' nambat aet' 5:4.

pun Ui ' ri mhawng ' na ' palkoe. Leukah ' taws ' a ' mu
Ui ' na ' leupaws seumeu ' ka, kopti Ui ' hkuin ' caee yeuh
ku ' hit ' hpum ' ri na ' , daecti yeuh Ui ' ku ' hit ' hpum '
Eun Cawo ' cus ' Ui ' lih na ' Eun.

Leukah ' hkam ' sa ' hki ' lawng Eun Yesu '

³¹Ui ' lawn hkam ' sa ' hki ' lawng tu ' ri na ' meun ko ' ,
leukah ' hkam ' sa ' hki ' Ui ' na ' a hkuin ' chae ' e'
hk'o ' yum ' . ³²Kue ' a nang hkam ' sa ' hki ' ri lawng Ui '
na ' ti peue. Ui ' yawng leukah ' hkam ' eun sa ' hki ' ri
lawng Ui ' na ' hk'o ' a yum ' .

³³Cus ' pe ' peue heul ' ri Yo ' han eun. Yo ' han eun
hkam ' sa ' hki ' ka lawng ku ' meuh neum na ' . ³⁴A
hkuin ' caee meuh, rap Ui ' ri ti leukah ' hkam ' sa ' hki '
ce peue na ' . Daecti lah ' Ui ' a rot ri lawng aen ' a na ' , a
meuh punta kaw pe ' lawtpon. ³⁵Yo ' han seun ' eun
kaw ' ngaw ku ' buih ha ' reung tuil ' ku ' ceng ' na ' .
Pe ' peusah ' ri ren ' mae ' ku ' ceng ' eun na ' ti vut ti
yam.

³⁶Kue ' Ui ' leukah ' hkam ' sa ' hki ' seucen hk'ai '
leukah ' hkam ' sa ' hki ' eun Yo ' han na ' . Kopti kan '
A ' kuiing ' kah Eun Ui ' yeuh htonnuk ku ' buih yeuh Ui '
na ' meuh meun a sa ' hki ' ka A ' kuiing ' cus ' Eun Ui ' lih
na ' . ³⁷Saec ' meuh A ' kuiing ' Cawo ' cus ' Ui ' lih na '
Eun ku hkam ' sa ' hki ' pun Ui ' yeut. Pe ' hkuin ' duing
mhawng ' seng ' leukah ' Eun na ' mae ' nyu ruprang
Eun na ' saec ' ti pok. ³⁸Kopti un ' yum ' pe ' Cawo ' cus '
Ui ' lih na ' Eun, leukah ' Eun na ' a ku un ' ut ' hk'a ' naee
pe ' . ³⁹Kopti kuit pe ' ri kaw pun cit ' tip a ' yu tip cot ' cu
na ' ri htawm Seunga ' na ' , pe ' co ' ca ' ri rin a. Aen ' ce
meuh a htawm Seunga ' ku ' hkam ' sa ' hki ' ka lawng
Ui ' na ' yeut. ⁴⁰Daecti punta kaw pe ' pun hk'a ' a ' yu
im ' na ' , pe ' hkuin ' yawm ' ri ing ' ri Ui ' .

⁴¹Hpaw Ui ' ca ' rap ri ti hk'a ' suk ' seun ' lih neum peue
na ' , ⁴²daecti yawng Ui ' pe ' ri. Yawng Ui ' un ' kue ' pe '
hk'a ' leumeus ' keus Eun Peucawo ' na ' hk'a ' naee
hpum ' pe ' na ' . ⁴³Lih Ui ' hk'a ' naee muis Eun A ' kui-
ing ' Ui ' na ' , pe ' un ' rap ri ti Ui ' . Daecti peue seubu ti
peue na ' eun lawn lih hk'a ' naee muis ri na ' meun ko ' ,
pe ' kaw rap ri ti eun. ⁴⁴Pe ' lawn rap ri ti hk'a ' suk ' seun '
pe ' puri na ' meun daecti pe ' un ' sok hk'a ' suk ' seun '
lih neum Peucawo ' ti peue yawo na ' Eun ko ' , pe ' ci '
kaw cang yum ' yeuh sa ' nhaw ' ?

⁴⁵Daecti pawlaee hteum ' Ui ' kaw tang ing ' saw ' tang '
pe ' ri A ' kuiing ' Eun. Ku ' saw ' tang ' pe ' na ' meuh a
Mo ' se ku ' papuing pe ' na ' eun. ⁴⁶Pe ' lawn yum '
Mo ' se eun ko ' , Pe ' ku na ' htuk ' ri yum ' Ui ' ri yeut,
kopti tem ' eun lawng Ui ' na ' yeut. ⁴⁷Daecti kopti un '

yum ' pe ku ' tem ' eun na ' , pe ' ci ' kaw cang yum ' ku '
lah ' Ui ' na ' yeuh sa ' nhaw ' ?"

Yesu ' tuil ' Eun peue hpawn ' heng ' na ' ce som '

6 Hawc ' awn ' na, Yesu ' Eun tang glu Galilae ' (peue
ku lah ' a meuh glu Tiberias ') na ' heul ' hk'a ' teh ' .

²Peue cum heun ' na ' ce ku hot ' Eun heul ' , kopti nyu ce
het ' keuting yeuh Eun ri peue peuyhat na ' ce na ' . ³Haw-
c ' ko ' , Yesu ' Eun huk ' pang gong na ' , eun mok ' mae ' e'
tapae ' ri na ' ce. ⁴Yam awn ' a kaw hk'aws ' rot yam yeuh
pawe vel nya ce peue Yu ' da na ' .

⁵Yam Yesu ' seucon ' Eun ri nyu peue cum heun ' na '
ing ' ce ri ti na ' , Eun lah ' a ri Hpi ' lip ' eun, "E ' ci ' kaw
heul ' leuvae ku ' hk'a tawngnhaw ' e ' na ' tuil ' peue
awn ' ce hk'a?" ⁶Mhaing ' Eun Hpilip ' eun yeuhko ' na '
meuh a sum ' long Eun ri nawk eun. Kopti ku ' kaw Eun
yeuh keunhaw ' na ' lah ' Eun ri uin ' a nanggal ' hawc ' .

⁷Hpi ' lip ' eun top ' a ri Heun, "E ' saec ' na ' leuvae
ku ' hk'a ri leumuil leual ' pak ' htaep ' ko ' , a hkuin ' kaw
duing hk'o ' peue awn ' ce hk'a peue ce ti beh."

⁸Tapae ' Eun ti peue muis Andre ku ' meuh awng ' eun
Si ' mon Petru ' na ' eun lah ' a, ⁹"Maen ' na ' kue ' a kon '
nyom ti peue, eun kue ' hkawomun ' hkawocung '
hpawn ' meul ' mae ' ka ' aet ' lal ' tu ' . Daecti a ci ' kaw
duing kum peue peunaw ' peunheun ' awn ' ce yeuh
sa ' nhaw ' ?"

¹⁰Yesu ' Eun lah ' , "Kah peue mok ' reu ' ." Mawn ' na ' a
lheu ' ri rip. Ce mok ' gawm ' euc ' ri. Me na ' ce palkoe, ce
kue ' hk'ao ri hpawn ' heng ' peue. ¹¹Hawc ' ko ' , Yesu '
Eun ti hkawomun ' na ' , Eun mun ' keuting ri Peucawo '
Eun. Eun gvah ri tuil ' a ri peue mok ' na ' ce, kah ce hk'a a
tam ' hpum ' ri. Eun ti ka ' na ' yeuh a seun ' awn ' a yeut.

¹²Yam hk'a ce ri sak ' hawc ' na ' , Eun lah ' a ri tapae '
na ' ce, "Tang seut ' ri hk'on ' ro ku ' lheu ' ka na ' ce reu ' ,
pawlaee uin ' a sum." ¹³Kop awn ' na, ce tang seut ' ri
hk'on ' ro ku ' lheu ' ka hkawomun ' hkawocung '
hpawn ' meul ' na ' , a pun kul ' lal ' teng ' .

¹⁴Yam peue heun ' na ' pun ce ri nyu het ' keuting yeuh
Eun Yesu ' na ' , ce tang lah ' a ri puri, "Peue aen ' meuh
Eun peue suip leukah ' Eun Peucawo ' Cawo ' kaw lih
pang bhen ' keute ' tit ' Eun neumneum." ¹⁵Yam Yesu '
yawng Eun peue awn ' kuit ce ri kaw ing ' tec ' ri meuh
hkun ' haw ' hkam ' na ' , Eun vel ce. Eun huk ' pang gong
na ' koe.

Yesu ' long Eun pang hak ' leuum '

¹⁶Yam fec ' ka na ' , tapae ' Eun na ' ce lih nang glu na ' .

¹⁷Ce lec reu na ' ce tang glu na ' heul ' nang veng

Kapeni 'um na '. Yam awn ' a fec ' duim ' lawng hawc ', Yesu ' Eun un ' nang ing ' rot mae ' ce. ¹⁸ Kopti guil ' lom- leng keuting ka nyawk ', ba leuum ' na ' a hpo ' lok nui ri huk '. ¹⁹ Yam fai ' ce reu ri na ' heul ' hk'ao ri loe ' lak ' pun ' lak ' na ', ce pun ri nyu Yesu ' long Eun pang hak ' leuum ' na ' Eun ing ' rot keunam ka reu ce na '. Ce tok ' seupa lhat ' nyawk '. ²⁰ Daecti Yesu ' Eun lah ' a ri ce, "Meuh a Ui ' ri, pawlae lhat '." ²¹ Hawc ' ko ', ce ren ' kawn rap ri ti Eun nang reu ri na '. Reu ce na ' a keu- lawn ' heul ' rot vang kaw ce heul ' na '.

Peue cum heun ' na ' sok ce Yesu ' Eun

²² Hawc ' ka na ' ti seunyi, peue cum heun ' ut ' hk'a ' teh ' glu na ' ce pun ri nyu reu ti lam yawo na ' tah ' a ri teh ' yam cawo ka na ', Yesu ' Eun ku hkuin ' lec reu na ' mae ' tapae ' ri na ' ce. Tapae ' na ' ce heul ' koe. ²³ Reu seubu ing ' neum veng Tiberias ' na ' a ing ' rot vang un ' lae tup seungai a vang Yesu ' mun ' keuting Eun ri Peuca- wo ' Eun hawc ' peue heun ' na ' ce hk'a hkawomun ' na '. ²⁴ Yam pun ce ri nyu Yesu ' Eun mae ' tapae ' Eun na ' un ' lae ut ' ce mawn ' na ', ce ku lec ri pawk reu na ' ing ' sok Yesu ' Eun nang veng Kapeni ' um na '.

Yesu ' meuh Eun ku ' hk'a a ' yu im '

²⁵ Yam peue heun ' na ' nyu ce Yesu ' Eun hk'a ' teh ' ka glu na ', ce mhaing ' Eun, "Rabi ', Mi ci ' ing ' maen ' yamnhaw '?"

²⁶ Yesu ' Eun top ' a, "Ui ' lah ' a ri pe ' neumneum, sok pe ' Ui ' na ' a hkuin ' meuh kopti pun pe ' ri nyu het ' keuting na ', daecti kopti meuh a pun pe ' ri hk'a ri sak ' ri hkawomun ' na '. ²⁷ Pawlae sae ' cae ' co ' ca ' ri sok ku ' hk'a cang lulaic heul ' na ', daecti sok ri yeuh ri pun ku ' hk'a cit ' tip a ' yu tip cot ' cu ku ' Kon ' ai ' peue kaw Eun tuil ' a ri pe ' na ' reu '. Kuing ' Peucawo ' tawk ' Eun ta ' ra ' htawhkam Eun a ri Kon ' ai ' peue na ' Eun hawc '."

²⁸ Hawc ' ko ', ce mhaing ' Eun, "Punta kaw ye yeuh kan ' cawp ' alo Eun Peucawo ' na ', ye ci ' na ' htuk ' ri yeuh keunhaw '?"

²⁹ Yesu ' Eun top ' a, "Kan ' Eun Peucawo ' na ' meuh a yum ' ku ' cus ' Eun lih na ' Eun."

³⁰ Kop awn ' na, ce mhaing ' Eun, "Punta kaw ye pun ri nyu, ye na ' yum ' Mi, Mi ci ' kaw yeuh het ' keuting keun- haw ' ? Mi ci ' kaw yeuh keunhaw ' ? ³¹ A ' ta ' a ' ya ye na ' pun ce ri hk'a gleun ' mana ' nang vang hk'oh ' hk'oeng ' na ' seun ' ku ' tem ' a ri uin ' ri na ', 'Eun tuil ' ku ' hk'a lih neum kuing ' pang mao ' na ' ri ce.' †"

³² Yesu ' Eun lah ' a ri ce, "Ui ' lah ' a ri pe ' neumneum, ku ' tuil ' ku ' hk'a lih neum kuing ' pang mao ' ri pe ' na ', hpaw a ca ' meuh Mo ' se eun, daecti ku ' tuil ' taeng- taeng ku ' hk'a lih neum kuing ' pang mao ' ri pe ' na ' meuh a Kuing ' Ui ' Eun. ³³ Kopti ku ' hk'a Peucawo ' tuil ' Eun na ' meuh a Cawo ' lih neum kuing ' pang mao ' Ca- wo ' tuil ' a ' yu im ' ri bhen ' keute ' na ' Eun."

³⁴ Ce lah ', "Cawo ', tang ' neum maet ' maen ' na ', hk'o ' Mi tuil ' ku ' hk'a awn ' a ri ye."

³⁵ Yesu ' Eun lah ', "Meuh Ui ' ku ' hk'a a ' yu im '. Peue ing ' ri Ui ' na ' ce hkuin ' kaw lae ngeup ' ri. Peue yum ' Ui ' na ' ce hkuin ' kaw lae sum ' nyui leuum '. ³⁶ Daecti seun ' lah ' Ui ' a ri pe ' hawc ' na ', pe ' saec ' pun ri nyu Ui ', daecti pe ' hkuin ' nang yum ' Ui '. ³⁷ Peue A ' kuiing ' tuil ' Eun ri Ui ' na ' ce gawm ' euc ', kaw ce ing ' ri Ui '. Peue ing ' ri Ui ' na ' Ui ' hkuin ' kaw tecla ce. ³⁸ Kopti lih Ui ' neum kuing ' pang mao ' na ', Ui ' hkuin ' cae kaw lih yeuh a hot ' alo ri na ' meun, daecti kaw Ui ' yeuh a hot ' alo Eun Cawo ' cus ' Ui ' lih na ' Eun. ³⁹ Alo Eun Ca- wo ' cus ' Ui ' lih na ' ko ', meuh a un ' kah Eun Ui ' va peue tuil ' Eun ri Ui ' na ' ce lulaic heul ' saec ' ti peue, daecti Eun kaw kah peue awn ' ce tang kuh ' im ' hk'a ' - nae seunyi tisut ' na '. ⁴⁰ Kopti A ' kuiing ' Ui ' na ' kue ' Eun alo kah peue pun ri nyu Kon ' ai ' Eun yum ' Eun na ' ce kue ' cit ' tip a ' yu tip cot ' cu na ', mae ' kah ce tang kuh ' im ' hk'a ' nae seunyi tisut ' na '."

⁴¹ Yam awn ' na, kopti Yesu ' lah ' Eun, "Meuh Ui ' ku ' hk'a lih neum kuing ' pang mao ' na ' ", peue Yu ' da na ' ce tang ' ri sop ' sep ' lah ' a ri puri. ⁴² Ce lah ', "Peue aen ' meuh Eun Yesu ' kon ' eun Yo ' saep na ' Eun, un ' meuh ka aw? E ' ku yawng makuiing ' Eun ka. Eun ci ' kaw cang lah ', 'Lih Ui ' neum kuing ' pang mao ' ' na ' yeuh sa ' n- haw '?"

⁴³ Yesu ' Eun top ' a, "Cu sop ' sep ' pe ' na ' reu '. ⁴⁴ A lawn un ' meuh ku ' A ' kuiing ' Cawo ' cus ' Ui ' lih na ' teuk ' va Eun ce ing ' ri Ui ' na ' ko ', a ' nhaw ' hkuin ' kaw cang ing ' rot ri Ui ' saec ' ti peue. Peue ing ' rot ri Ui ' na ', Ui ' kaw yeuh ce tang kuh ' im ' hk'a ' nae seunyi tisut ' na '. ⁴⁵ Nang htawm ce peue suip leukah ' Eun Peuca- wo ' na ' tem ' a ri, 'Peucawo ' kaw Eun sangsawn ' ce gawm ' euc ' . †† Peue pun ri mhawng ' pun ri rin ri A ' kui- ing ' Eun na ' ce ku peue kaw ce ing ' ri Ui '. ⁴⁶ Ku ' lih neum Peucawo ' Eun na ' Eun koe yawo tawn nyu Eun A ' kuiing ' Eun, nang seubu a ' nhaw ' hkuin ' duing nyu A ' kuiing ' Eun saec ' ti peue. ⁴⁷ Ui ' lah ' a ri pe ' neum- neum, peue yum ' na ' kue ' ce cit ' tip a ' yu tip cot ' cu na '. ⁴⁸ Meuh Ui ' ku ' hk'a a ' yu im '. ⁴⁹ A ' ta ' a ' ya pe ' na ' ce saec ' na ' pun ri hk'a gleun ' mana ' nang vang

† Pucti heul ' 16:14, 15; Nehami ' 9:15; Suk ' seun ' 78:24,25; 105:40

†† I ' saya ' 54:13

hk'oh 'hk'oeng' na' ko', daecti ce ku kaw'n' pun ri yeum. ⁵⁰Daecti aen' a meuh ku' hk'a lih neum kuing' pang mao' na', a'nhaw' lawn pun ri hk'a a ko', eun kaw un' laee pun ri yeum. ⁵¹Meuh Ui' ku' hk'a lih neum kuing' pang mao'. A'nhaw' lawn pun ri hk'a ku' hk'a aen' a ko', eun kaw a'yu im' heul' cot' cu ri. Ku' hk'a aen' a meuh keune †Ui'. Punta peue bhen' keute' aen' kaw a pun a'yu na', Ui' kaw tuil' a."

⁵²Hawc' ko', peue Yu'da na' ce htu'hting' puri lah', "Peue aen' Eun ci' kaw cang tuil' e' hk'a keune ri na' yeuh sa'nhaw'?"

⁵³Yesu' Eun lah' a ri ce, "Ui' lah' a ri pe' neumneum, pe' lawn un' hk'a keune un' nyui nham' Eun Kon' ai' peue na' ko', pe' ku hkuin' kue' a'yu hk'a'nae ri na' yeut. ⁵⁴A'nhaw' lawn hk'a keune nyui nham' Ui' na' ko', eun kaw kue' cit' tip a'yu tip cot' cu na'. Ui' kaw yeuh eun kuh' im' hk'a'nae seunyi tisut' na'. ⁵⁵Kopti keune Ui' na' meuh a taengtaeng ku' hk'a, nham' Ui' na' a ku meuh taengtaeng ku' nyui. ⁵⁶A'nhaw' lawn hk'a keune nyui nham' Ui' na' ko', eun kaw ut' hk'a'nae Ui', Ui' ku kaw ut' hk'a'nae heun. ⁵⁷Seun' A'kui-ing' Cawo' a'yu im' na' cus' Eun Ui' lih mae' a'yu im' Ui' kopti Heun ri na' ko', saec' meuh peue hk'a Ui' na' ce ku kaw a'yu im' kopti Ui' ri yeut. ⁵⁸Aen' a meuh ku' hk'a lih neum kuing' pang mao'. A'ta' a'ya pe' na' hk'a ce gleun' mana', ce ku kaw'n' pun ri yeum. Daecti peue hk'a ku' hk'a aen' a na' ce kaw a'yu im' heul' cot' cu ri." ⁵⁹Eun lah' lawng aen' a yam sangsawn' Eun nang sa'la vang hk'o' mun' nang veng Kapeni' um na'.

Tapae' heun' peue na' yut' ce hot' ri Yesu' Eun

⁶⁰Yam tapae' Eun na' ce heun' peue pun ce ri mhawng' leukah' awn' a na', ce lah', "Leukah' sangsawn' aen' nyhap' nyawk' ka, a'nhaw' ci' kaw rap ri ti pun a?"

⁶¹Yam Yesu' yawng Eun tapae' ri na' buih vuinvaw ce ri lawng aen' a na', Eun lah' a ri ce, "Lawng aen' yeuh a pe' hpum' un' sam' ran aw? ⁶²Pe' lawn nyu Kon' ai' peue na' huk' Eun ri vang tawn ut' Eun na' ko', pe' ci' na' kuit a yeuh sa'nhaw'?" ⁶³Cit' seunga' na' tuil' a a'yu na'. Nham' keune na' a hkuin' kue' peuehot'. Leukah' lah' Ui' a ri pe' na' meuh a cit' mae' a'yu. ⁶⁴Daecti hk'a'nae pe' ri ngon', pe' un' yum'." Kopti hk'a'nae ce, a'nhaw' ci' kaw un' yum', a'nhaw' ci' kaw fuin Eun na', Yesu' yawng Eun a tang' neum yamla a ri na' hawc'. ⁶⁵Yesu' Eun suip ri lah', "Kopti meuh a aen' na, Ui' lah' a ri pe', A' lawn un' meuh ku' A'kui-

ing' kah Eun ce ing' ri Ui' na' ko', a'nhaw' hkuin' cang ing' ri Ui' saec' ti peue."

⁶⁶Tang' neum yam awn' na, tapae' Eun na' ce tang pucti heul' hk'ai' Heun heun' peue, ce hkuin' laee suip ri hot' Yesu' Eun.

⁶⁷Yesu' Eun mhaing' tapae' kul' leual' peue na' ce, "Saec' meuh pe' ri, kaw pe' tang keutah ing' yeut aw?"

⁶⁸Si' mon Petru' eun top' a, "Cawo', ye ci' kaw'n' kaw heul' mae' a'nhaw'? Kue' Mi leukah' cit' tip a'yu tip cot' cu na'. ⁶⁹Yum' ye yawng ye meuh Mi Cawo' seunga' chak' Eun Peucawo'."

⁷⁰Hawc' ko', Yesu' Eun top' a, "Leuk Ui' ri ti pe' kul' leual' peue na', un' meuh ka aw? Daecti ku' ti peue hk'a'nae pe' na' meuh eun seuca' rai." ⁷¹(Eun sum' lah' a pun ri Yu'das' kon' eun Si' mon I' sakariot' na' eun. Yu'das' eun saec' meuh tapae' na' ti peue hk'a'nae tapae' kul' leual' peue na' ce, daecti hk'a' nanggal' ka na' eun kaw fuin Yesu' Eun.)

Yesu' huk' Eun nang pawe tup'

7 Hawc' awn' na, Yesu' Eun heul' nang kuing' Galilae' na' ti duih' hawc' ti duih'. Daecti Eun tang' nha' ri gveung kaw ri un' heul' nang kuing' Yu'da na' kopti peue Yu'da na' sok ce ri kaw toh Eun na'. ²Daecti yam pawe tup' ce peue ceu Yu'da na' kaw a hk'aws' rot na', ³awng' Eun Yesu' na' ce lah' a ri Heun, "Punta tapae' Mi na' kaw ce nyu ku' hk'o' am' yeuh Mi na' ce, Mi na' htuk' ri pucti heul' hk'ai' maen' na' heul' nang kuing' Yu'da. ⁴Sum' kah peue yawng ku' yeuh ri yeuh yen' a na', a hkuin' kue' a'nhaw' saec' ti peue. Kopti kaw'n' buih yeuh Mi ceu nang aen' ce na', tuh' bhen' keute' na' nyu a reu'." ⁵Kopti pal yawo awng' Eun na' ce meun, ce hkuin' yum' Eun.

⁶Kop awn' na, Yesu' Eun lah' a ri ce, "Yam htuk' lai a ri Ui' na' un' nang rot ka. Pe' ri ko', saec' meuh yamn-haw' a ku htuk' lai pun pe'. ⁷Bhen' keute' na' hpaw a ca' ces ri pe', daecti ces a ri Ui', kopti hkam' Ui' sa' hk'i' ku' bhen' keute' na' yeuh ka na' rai ka na'. ⁸Pe' ri heul' hk'a'nae pawe na' reu', hpaw Ui' ca' kaw nang heul'. Kopti yam htuk' lai ri Ui' na' un' nang rot ka."

⁹Hawc' lah' Eun a yeuh keutit' na', Eun kaw'n' ut' nang kuing' Galilae' na'.

¹⁰Daecti hawc' awng' Eun na' heul' ce nang pawe na', Eun ku dit' ti yen' heul', un' va a glih'. ¹¹Peue Yu'da na' ce eo' ri jem' Eun hk'a'nae pawe awn' na. Ce mhaing' puri, "Peue tit' Eun ci' na' ut' tawngnhaw'?"

¹²Peue cum heun' na' ce sae' caee' ri sop' sep' lah' lawng Eun na'. Ngon' ce lah', "Meuh Eun peue chak'."

† A'ko' tu'

Ngon ' ce htu ' hting ' lah ' , "Un ' meuh, cop ' Eun peue ceu." ¹³ Daecti a ' nhaw ' hkuin ' hat ' ri lah ' a glih ' - gleueng ' kopti lhat ' ce ri ro ' ri na ' ce.

Yesu ' sangsawn ' Eun nang pawe

¹⁴ Yam pawe na ' buih rot a nang ngon ' ka na ' , Yesu ' Eun huk ' nang kang ' hkung ' ka nya hk'o ' mun ' keuting na ' . Eun tang ' ri sangsawn ' . ¹⁵ Peue Yu ' da na ' ce am ' , ce mhaing ' puri, "Hkawn ' Eun ci ' na ' pun cu ' yi awn ' a yeuh sa ' nhaw ' , Eun hkuin ' duing rin htawm?"

¹⁶ Yesu ' Eun top ' a, "Leukah ' sangsawn ' Ui ' na ' hpaw a ca ' meuh is ' Ui ' meun, daecti lih a neum Cawo ' cus ' Ui ' lih na ' Eun. ¹⁷ A ' nhaw ' lawn leuk ri ti kaw ri yeuh a hot ' alo Eun Peucawo ' na ' ko ' , leukah ' sangsawn ' Ui ' na ' lih a neum Peucawo ' Eun aw, a ' ko ' lih a neum Ui ' ri meun aw na ' , eun ku kaw yawng a yeut. ¹⁸ Peue kuit ri lah ' meun na ' lah ' eun ri seue ' munhpung ' hk'a ' naee tu ' ri na ' meun, daecti peue yeuh kan ' pun munhpung ' Eun Cawo ' cus ' eun lih na ' eun ko ' , meuh eun peue ka ku ' neumneum na ' . Hk'a ' chi ' lai na ' a hkuin ' kue ' hk'a ' naee heun. ¹⁹ Mo ' se tuil ' eun leukah ' ritroe na ' ri pe ' , un ' meuh ka aw? Daecti hk'a ' naee pe ' ri, pe ' hkuin ' kue ' nang rokxa ' leukah ' ritroe na ' saec ' ti peue. A ci ' meuh kop keunhaw ' , pe ' vae ' co ' ca ' ri kaw toh Ui ' ?"

²⁰ Peue cum heun ' na ' ce top ' a, "Seuca ' lec a Mi. A ' n-haw ' ci ' kaw toh Mi?"

²¹ Yesu ' Eun top ' a, "Yeuh Ui ' ku ' hk'o ' am ' ti ceu, pe ' ku am ' ri ka gawm ' euc ' . ²² Kopti Mo ' se kah eun pe ' ton ' duing ' hak ' ri na ' (neumneum ka na ' ko ' , hk'a ' ton ' duing ' hak ' na ' a hkuin ' ing ' neum Mo ' se eun, ing ' a neum a ' ta ' a ' ya pe ' na ' ce) pe ' ku ton ' duing ' hak ' ce kon ' nyom na ' hk'a ' naee seunyi Sin ' na ' .

²³ Punta kaw pe ' un ' laee yeuh kleuc ' ri leukah ' ritroe eun Mo ' se na ' , pe ' ton ' duing ' hak ' ce kon ' nyom na ' hk'a ' naee seunyi Sin ' na ' . A ci ' meuh kop keunhaw ' , pe ' vae ' seungeueng ' ri bai ' Ui ' peue peuyhat gawm ' tu ' ri na ' eun cuin hk'a ' naee seunyi Sin ' na ' ? ²⁴ Pawlaee taws ' a ' mu na ' hot ' ku ' pun pe ' ri nyu pal hk'a ' nok na ' koe, daecti taws ' a hot ' cawp ' hk'a ' neumneum na ' reu ' ."

Yesu ' meuh Eun Hkrit aw?

²⁵ Yam awn ' na, peue veng Yeru ' salaem na ' ce ngon ' ce lah ' , "Ku ' co ' ca ' ce ri kaw toh Eun na ' , un ' meuh a hkawn ' Eun aw? ²⁶ Keue ' reu ' , leukah ' Eun glih ' - gleueng ' , daecti a ' nhaw ' hkuin ' lah ' keunhaw ' ri Heun. Hkun ' cawo ' na ' ce chak ' yawng meuh Eun Hkrit

hawc ' awh ' ? ²⁷ Daecti peue aen ' Eun ci ' ing ' neum tawngnhaw ' na ' , yawng e ' a yeut. Yam Hkrit kaw Eun lih na ' , a hkuin ' kaw kue ' nang yawng ing ' Eun neum tawngnhaw ' ."

²⁸ Kop awn ' na, yam Yesu ' buih sangsawn ' Eun nang kang ' hkung ' ka nya hk'o ' mun ' keuting na ' , Eun ta ' ul ' ri lah ' , "Meuh ka yeut, yawng pe ' Ui ' yeut. Ui ' ci ' ing ' neum tawngnhaw ' na ' , pe ' ku yawng a. Ui ' hkuin ' yeng ri lih meun, daecti Cawo ' cus ' Ui ' lih na ' kati keutawn ' Eun. Pe ' hkuin ' yawng Eun. ²⁹ Daecti Ui ' ri, Ui ' yawng Eun, kopti lih Ui ' neum Heun, Eun cus ' Ui ' lih."

³⁰ Yam mhawng ' ce yeuh a keutit ' na ' , ce co ' ca ' ri kaw mheut ' Eun. Daecti a ' nhaw ' hkuin ' mheut ' Eun saec ' ti peue, kopti un ' nang rot a yam Eun Yesu ' na ' . ³¹ Daecti peue cum heun ' na ' ce yum ' Eun heun ' peue. Ce lah ' , "Yam Hkrit na ' Eun lih na ' , kaw Eun yeuh het ' keuting heun ' ceu hk'ai ' peue aen ' Eun aw?"

³² Yam peue Hparisae ' na ' pun ce ri mhawng ' peue cum heun ' na ' sop ' sep ' ce lawng Eun yeuh keutit ' na ' , ro ' ce peue jhawp ' rit keuting na ' ce mae ' peue Hparisae ' na ' ce cus ' peue ko ' kaw nya hk'o ' mun ' keuting na ' ce heul ' mheut ' Eun.

³³ Yesu ' Eun lah ' , "Ui ' ut ' mae ' pe ' ti vut ti yam yawo, hawc ' ko ' , Ui ' kaw tang ing ' ri Cawo ' cus ' Ui ' lih na ' Eun. ³⁴ Pe ' kaw hot ' ri sok Ui ' , daecti pe ' hkuin ' kaw nyu Ui ' . Vang ut ' Ui ' na ' , pe ' hkuin ' kaw cang huk ' ri ka."

³⁵ Kop awn ' na, peue Yu ' da na ' ce lah ' a ri puri, "Peue aen ' Eun ci ' kuit ri kaw heul ' vang kaw e ' sok un ' cang nyu Eun na ' tawngnhaw ' ? Na ' Eun kaw heul ' ut ' mae ' peue ri ku ' taic ' jah heul ' ut ' mae ' peue Helasa ' na ' ce, hawc ' ko ' , Eun na ' chak ' kaw sangsawn ' peue Helasa ' na ' ce awh ' ? ³⁶ Eun lah ' , ' Pe ' kaw hot ' ri sok Ui ' , daecti pe ' hkuin ' kaw nyu Ui ' . Vang ut ' Ui ' na ' , pe ' hkuin ' kaw cang huk ' ri ka, ku ' lah ' Eun aen ' , Eun ci ' na ' sum ' lah ' keunhaw ' ?"

³⁷ Hk'a ' naee seunyi tisut ' meuh seunyi a ' ye ' keuting ka pawe na ' , Yesu ' Eun cawng ri ta ' ul ' ri lah ' , "A ' n-haw ' lawn sum ' nyui leum ' ko ' , ing ' ri Ui ' , nyui a. ³⁸ A saec ' meuh a ' nhaw ' , eun lawn yum ' Ui ' ko ' , seun ' lah ' a ri nang htawm Seunga ' na ' , klong ' kue ' leu-um ' civit im ' na ' a kaw pucti lih lhaee ' neum hpum ' eun na ' ."³⁹ Lah ' Eun a yeuhki ' na ' , Eun sum ' lah ' a rot ti Cit ' seunga ' na ' . Peue yum ' Eun na ' kaw ce pun ri rap ri ti a hk'a ' nanggal ' ka. Yam awn ' na, Cit ' seunga ' na ' a hkuin ' nang tuil ' ri, kopti un ' nang yeum Eun, Eun un ' nang pun munhpung ' ri na ' ri Peucawo ' Eun nang kuing ' pang mao ' na ' ."

⁴⁰ Yam mhawng ' ce lah ' Eun a yeuh keutit ' na ' , ngon ' ce lah ' , "Peue aen ' meuh Eun taengtaeng peue suip leukah ' Eun Peucawo ' na ' Eun hawc ' ."

⁴¹ Ngon ' ce lah ' , "Peue aen ' meuh Eun Hkrit."

Daecti ngon ' ce mhaing ' , "Hkrit Eun ci ' kaw cang pucti lih neum kuing ' Galilae ' na ' yeuh sa ' nhaw ' ?" ⁴² Nang htawm Seunga ' na ' lah ' , 'Hkrit kaw Eun pucti lih neum ceucat Eun Davit ' neum veng Baelaehaem vang ut ' Eun Davit ' na ' , un ' meuh ka aw?" ⁴³ Kopti meuh a lawng aen ' na, peue heun ' na ' ce jah hk'ai ' puri. ⁴⁴ Ngon ' ce sum ' mheut ' Eun, daecti a hkuin ' kue ' nang mheut ' Eun.

Ro 'kan ce peue Yu 'da na ' un ' yum ' ce Yesu ' Eun

⁴⁵ Vang tisut ' ka na ' , peue ko ' kawn nya hk'o ' mun ' keuting na ' ce keutah ing ' ri ro ' peue jhawp ' rit keuting mae ' peue Hparisae ' na ' ce. Ro ' peue jhawp ' rit keuting mae ' peue Hparisae ' na ' ce mhaing ' peue ko ' kawn nya hk'o ' mun ' keuting na ' ce, "A ci ' yeuh keunhaw ' , pe ' vae ' un ' mheut ' Eun ing ' maen ' ?"

⁴⁶ Peue ko ' kawn nya hk'o ' mun ' keuting na ' ce top ' a, "A hkuin ' kue ' nang leukah ' seun ' hkawn ' Eun saec ' ti peue."

⁴⁷ Peue Hparisae ' na ' ce lah ' , "Saec ' meuh pe ' ri, cop ' Eun ri pun pe ' hawc ' yeut aw?" ⁴⁸ Ro 'kan na ' ce, a 'ko ' peue Hparisae ' na ' ce ti ri peue, kue ' a nang yum ' Eun yeut aw?" ⁴⁹ Ca ' kue ' ka. Peue aen ' ce hkuin ' yawng leukah ' ritroe na ' saec ' peunae ' . Kaw ce pun ri hkam ' hk'a ' jha ' na ' ."

⁵⁰ Ni ' hko ' demas ' ku ' ing ' ri Yesu ' Eun nanggal ' aen ' ce na ' , eun ku meuh peue hk'a ' naee muk ce ti peue. Eun mhaing ' lah ' , ⁵¹ "Leukah ' ritroe e ' na ' ko ' , e ' lawn un ' nang pun ri mhawng ' ku ' lah ' meun peue ku ' yeuh ri na ' ko ' , cang taws ' e ' a ' mu ri peue aw?"

⁵² Ce top ' a, "Mi ri, meuh mi peue ing ' neum kuing ' Galilae ' na ' yeut aw? Sok mi nawk a nang htawm Seunga ' na ' reu ' , mi ku na ' pun ri nyu peue suip leukah ' Eun Peucawo ' na ' un ' lih ce neum kuing ' Galilae ' na ' saec ' ti peue."

⁵³ Hawc ' awn ' na, ce sawng ' sawng ' ing ' ti nya ri. †

8 Daecti, Yesu ' Eun huk ' pang gong Sanlon na ' . ² Yam ceng ' ka na ' , Eun tang ing ' nang kang ' hkung ' ka nya hk'o ' mun ' keuting na ' bae. Peue heun ' na ' ce ing ' cu ri rop Eun. Yesu ' Eun mok ' , Eun tang ' ri sangsawn ' ce. ³ Peue guil leukah ' ritroe na ' ce mae ' peue Hparisae ' na ' ce va beun ' ing ' ti peue. Kopti len ' cu eun, peue mheut ' eun. Ce kah eun cawng nanggal ' ce peue cum heun ' na ' . ⁴ Ce lah ' a ri Yesu ' Eun, "Seura ' ,

mheut ' ye beun ' aen ' eun yam buih len ' cu eun na ' .

⁵ Hk'a ' naee leukah ' ritroe eun Mo ' se na ' , kah ka e ' dhim ' beun ' yeuh ku ' yeuhki ' na ' eun yeum ri meul ' seumu, Mi ri, Mi ci ' kaw lah ' a yeuh sa ' nhaw ' ?"

⁶ Mhaing ' ce Eun yeuhki ' na ' , meuh a kopti tung ' ce ri kaw tang ' map ' ri Heun. Daecti Yesu ' Eun gaw ' ri hkaws ' hkaes ' bhen ' keute ' na ' ri geun ' ti ' ri na ' .

⁷ Kopti sae ' caee ' ce ri mhaing ' Eun na ' , Eun vuh ri lah ' a ri ce, "Hk'a ' naee pe ' , a ' nhaw ' ci ' un ' kue ' map ' , kah eun meuh nang dhim ' eun nanggal ' reu ' ." ⁸ Hawc ' ko ' , Eun tang gaw ' ri hkaws ' hkaes ' bhen ' keute ' na ' bae.

⁹ Yam pun ce ri mhawng ' leukah ' awn ' a na ' , a tang ' ri nang kawt hk'ai ' ce na ' ce baet ti pucti heul ' ti peue hawc ' ti peue a heul ' vang yawo Yesu ' Eun mae ' beun ' cu ri cawng mawn ' na ' eun koe. ¹⁰ Yesu ' Eun tang vuh ri mhaing ' eun, "Beun ' , ce ci ' heul ' hk'a ' nhaw ' euc ' ? A ' nhaw ' un ' tang ' ce map ' ri mi saec ' ti peue aw?"

¹¹ Beun ' na ' eun lah ' , "Uih ' , ca ' tang ' ce." Yesu ' Eun lah ' , "Ui ' ku hkuin ' kaw tang ' map ' ri mi. Heul ' reu ' , tecla hk'a ' a ' yu im ' map ' mi na ' reu ' ."

Leukah ' hkam ' sa ' hki ' Eun Yesu ' na ' yum ' pun ka

¹² Yam Yesu ' tang lah ' Eun a ri peue cum heun ' na ' ce bae na ' , Eun lah ' , "Meuh Ui ' ku ' ceng ' ka bhen ' keute ' na ' . Peue hot ' Ui ' na ' ce hkuin ' kaw laee long hk'a ' naee hk'a ' duim ' lawng na ' , daecti ce kaw kue ' ku ' ceng ' ka hk'a ' civit na ' ."

¹³ Peue Hparisae ' na ' ce lah ' a ri Heun, "Keue ' , hkam ' Mi sa ' hki ' pun tu ' ri na ' meun. Leukah ' hkam ' sa ' hki ' i ' Mi na ' yum ' un ' pun ka."

¹⁴ Yesu ' Eun top ' a, "Ui ' saec ' na ' hkam ' sa ' hki ' pun tu ' ri na ' meun ko ' , daecti leukah ' hkam ' sa ' hki ' Ui ' na ' yum ' pun ka yeut. Kopti Ui ' ing ' neum tawngnhaw ' na ' mae ' Ui ' kaw heul ' tawngnhaw ' na ' , yawng Ui ' a. Daecti Ui ' ing ' neum tawngnhaw ' na ' mae ' Ui ' kaw heul ' tawngnhaw ' na ' , hpaw pe ' ca ' yawng a. ¹⁵ Taws ' pe ' a ' mu hot ' a ' cang ' ce peue na ' , Ui ' hkuin ' taws ' a ' mu ri a ' nhaw ' . ¹⁶ Daecti Ui ' lawn na ' taws ' a ' mu ko ' , hk'a ' taws ' a ' mu Ui ' na ' cawp ' ka. Kopti hpaw Ui ' ca ' yeng ri yeuh a koe, A ' kuing ' Cawo ' cus ' Ui ' lih na ' ut ' Eun mae ' Ui ' . ¹⁷ Saec ' meuh hk'a ' naee htawm leukah ' ritroe pe ' na ' meun, a ku tem ' ri lah ' leukah ' hkam ' sa ' hki ' ka peue lal ' peue na ' yum ' pun ka yeut. ¹⁸ Hkam ' Ui ' sa ' hki ' pun tu ' ri na ' meun. Ku ' meuh sa ' hki ' Ui ' ku ' seubu ti peue na ' a meuh A ' kuing ' Cawo ' cus ' Ui ' lih na ' Eun."

† Nang htawm Seunga ' na ' ngon ' , un ' kue ' a Yo 'han 7:53-8:11

¹⁹Hawc´ko´, ce mhaing´Eun, “Kuiing´Mi na´Eun ci´ut´tawngnhaw´” Yesu´Eun top´a, “Ui´ri un´lah´Kuiing´Ui´Eun un´lah´, un´yawng pe´Ya. A lawn na´meuh yawng pe´Ui´ko´, pe´ku na´yawng Kuiing´Ui´na´Eun.” ²⁰Yesu´lah´Eun a yeuh keutit´na´a meuh yam sangsawn´Eun nang nya hk'o´mun´keuting keunam ka laem uin´hk'eung dum ri tan na´. Kopti yam Eun na´un´nang rot ka na´, a hkuin´kue´nang mheut´ri ti Eun saec´ti peue.

²¹Yesu´Eun tang lah´a ri ce bae, “Kaw Ui´heul´. Pe´kaw hot´ri sok Ui´, daecti pe´kaw pun ri yeum hk'a´naee map´ri na´. Vang heul´Ui´na´, pe´hkuin´kaw cang heul´ri ka.”

²²Kopti meuh a leukah´aen´a na´, peue Yu´da na´ce mhaing´puri ri ka, “Kaw Eun toh meun ri aw? Na´chak´meuh kopti lah´Eun, ‘Vang heul´Ui´na´, pe´hkuin´kaw cang heul´ri ka na´.’?”

²³Yesu´Eun tang suip ri lah´, “Ing´pe´neum hk'a´col. Ui´lih neum pang lhung´. Pe´meuh is´ka bhen´keute´aen´na. Ui´ri, Ui´hkuin´meuh is´ka bhen´keute´aen´na. ²⁴Lah´Ui´a ri pe´hawc´, kaw pe´pun ri yeum hk'a´naee map´ri na´. Pe´lawn un´yum´meuh Ui´Heun ri ko´, pe´kaw pun ri yeum hk'a´naee map´ri na´neumneum.”

²⁵Ce mhaing´Eun, “Mi ci´meuh a´nhaw´?” Yesu´Eun top´a, “Seun´aku´lah´Ui´ri pe´nanggal´aen´a na´. ²⁶Kawn´kue´Ui´leukah´ku´kaw Ui´taws´a´mu ri pe´na´heun´ce. Daecti Cawo´cus´Ui´lih na´hk'o´Eun yum´nyawk´. Ku´pun Ui´ri mhawng´ri Heun na´, Ui´lah´a ri peue bhen´keute´na´peue.”

²⁷Ce hkuin´yawng lah´Eun lawng Eun Kuiing´ri na´Eun ri ti. ²⁸Kop awn´na Yesu´Eun lah´, “Hawc´yuk pe´Kon´ai´peue na´Eun huk´pang kleum´rawng´tawp´na´, pe´na´kawn´yawng meuh Ui´ku´lah´Ui´ri meuh na´Eun. Hpaw Ui´ca´yeng ri yeuh a meun, daecti lah´Ui´a hot´pal ku´sangsawn´Eun Kuiing´Ui´na´. ²⁹Cawo´ku´cus´Ui´lih na´ut´Eun mae´Ui´. Kopti yeuh Ui´ku´htuk´hpum´Eun na´laleung, Eun hkuin´tecla Ui´ut´koe.” ³⁰Yam lah´Eun leukah´aen´ce na´, peue heun´peue na´ce kue´hk'a´yum´hk'a´naee Heun.

Ceucat eun Abraham

³¹Yesu´lah´Eun a ri peue Yu´da ku´yum´Eun na´ce, “Pe´lawn jhawp´leukah´sangsawn´Ui´na´keutawn´ko´, meuh pe´tapae´Ui´neumneum. ³²Pe´na´yawng hk'a´neumneum na´. Hk'a´neumneum na´a kaw yeuh pe´meuh peue pon.”

³³Ce top´a, “Meuh ye ceucat eun Abraham. Ye hkuin´duing meuh mhai´a´nhaw´. Mi ci´kawn´kaw lah´ye meuh peue pon yeuh sa´nhaw´?”

³⁴Yesu´Eun top´a, “Kaw Ui´lah´a ri pe´neumneum. Peue yeuh map´na´ce ku peue, meuh ce mhai´ka map´na´. ³⁵Mhai´na´eun hkuin´pun ri ut´ti nya na´cot´cu ri, daecti kon´na´eun meuh peue nya na´cot´cu ri.

³⁶Kop awn´na, Kon´ai´na´Eun lawn teum´kawm pe´meuh peue pon ko´, pe´kaw meuh peue pon na´neumneum. ³⁷Yawng Ui´meuh pe´ceucat eun Abraham yeut. Daecti kopti un´yum´pe´leukah´sangsawn´Ui´na´, pe´rangraen ri kaw toh Ui´. ³⁸Buih lah´Ui´ku´pun Ui´ri nyu yam ut´Ui´maee´A´kuiing´Eun na´ri pe´. Pe´ku yeuh ku´pun pe´ri mhawng´ri a´kuiing´pe´na´eun na´.”

³⁹Ce top´a, “Abraham meuh eun kuiing´ye.” Yesu´Eun lah´, “Pe´lawn na´meuh kon´eun Abraham ko´, pe´ku na´yeuh seun´ku´yeuh eun na´yeut. ⁴⁰Daecti Ui´meuh nang lah´ris pe´mhawng´hk'a´neumneum Eun Peucawo´na´, pe´vae´sae´cae´sok ri yeuh ri kaw pun ri toh Ui´. Abraham ca´yeuh eun ko´. ⁴¹Lak´yeuh meun pe´seun´ku´yeuh eun kuiing´ri na´.” Ce lah´, “Hpaw ye ca´meuh kon´jang´. Kue´ye kuiing´ti peue koe. A meuh Peucawo´Eun.”

Kon´seuca´rai

⁴²Yesu´Eun lah´a ri ce, “Peucawo´Eun lawn na´meuh kuiing´pe´ko´, pe´ku na´leumeus´Ui´ri yeut, kopti puc Ui´ri lih neum Heun ri na´. Maet´maen´, ut´Ui´maen´hawc´. Hpaw Ui´ca´yeng ri lih meun, daecti cus´Eun Ui´lih. ⁴³A ci´meuh kop keunhaw´, pe´vae´un´ceng´ri ku´lah´Ui´na? Meuh a kopti un´cang eut´pe´hpum´ri leuceng ku´lah´Ui´na´. ⁴⁴Meuh pe´is´eun seuca´rai kuiing´ri na´eun. Pe´sum´hot´ri yeuh alo eun kuiing´ri na´. Seuca´rai na´meuh eun nang toh peue tang´neum yam la ka na´. Kopti hk'a´neumneum na´un´kue´a hk'a´naee eun seuca´rai na´, eun un´jhawp´ri ti hk'a´neumneum na´. Yam lah´eun leukah´chi´lai na´, eun lah´a hot´seun´ku´kue´nang hpum´ri na´, kopti seuca´rai na´meuh eun nang chi´lai na´maee´eun meuh kuiing´ka hk'a´chi´lai na´. ⁴⁵Daecti kopti lah´Ui´hk'a´neumneum na´, pe´un´yum´Ui´. ⁴⁶Hk'a´naee pe´, a´nhaw´ci´cang tuh´pe´nyu kue´Ui´map´? Ui´lawn na´lah´hk'a´neumneum na´ko´, a ci´yeuh keunhaw´, pe´vae´un´yum´Ui´? ⁴⁷Peue meuh is´Eun Peucawo´na´, leuceng eun ku´lah´Eun Peucawo´na´. Un´leuceng pe´ri ti na´meuh a kopti un´meuh pe´is´Eun Peucawo´na´.”

Yesu ' ris Eun lawng tu ' ri na ' meun

⁴⁸Peue Yu ' da na ' ce top ' a ri Heun, "Seun ' lah ' ye Mi meuh peue Samari ' mae ' meuh peue seuca ' lec na ' , cawp ' ka yeut, un ' meuh ka aw?"

⁴⁹Yesu ' Eun top ' a, "Seuca ' hpaw a ca ' lec Ui ' . Daecti tuil ' Ui ' munhpung ' Eun Kuing ' Ui ' na. Pe ' ri, pe ' yeuh munhpung ' Ui ' na ' lu. ⁵⁰Hpaw Ui ' ca ' sok ri tuil ' tu ' meun ri na ' is ' munhpung ' , daecti a kue ' nang sok ri tuil ' a ri Ui ' ti peue. Eun meuh nang taws ' a ' mu. ⁵¹Ui ' lah ' a ri pe ' neumneum, a ' nhaw ' lawn hot ' ri yeuh ku ' lah ' Ui ' na ' ko ' , eun hkuin ' kaw laee pun ri yeum."

⁵²Yam peue Yu ' da na ' pun ce ri mhawng ' aen ' ce na ' , ce ta ' ul ' ri lah ' , "Maet ' maen ' yawng ye meuh Mi peue seuca ' lec hawc ' . Abraham yeum eun hawc ' . Peue suip leukah ' Eun Peucawo ' na ' ce ku yeum hawc ' . Mi vae ' kawn ' lah ' , ' A ' nhaw ' lawn hot ' ri yeuh ku ' lah ' Mi na ' ko ' , eun hkuin ' kaw laee pun ri yeum. ⁵³Keuting Mi hk'ai ' kuiing ' e ' Abraham eun aw? Yeum eun hawc ' . Saec ' meuh peue suip leukah ' Eun Peucawo ' na ' ce ku yeum hawc ' . Mi ci ' hteum ' ri meuh a ' nhaw ' ?"

⁵⁴Yesu ' Eun top ' a, "Ui ' lawn tang ' tu ' ri na ' kue ' munhpung ' meun ko ' , munhpung ' awn ' a kaw meuh ku ' hk'o ' hk'awng ' . Kuing ' Ui ' ku ' lah ' pe ' meuh Peucawo ' ri na ' meuh Eun ku ' tuil ' munhpung ' Ui ' na ' Eun. ⁵⁵Daecti pe ' saec ' na ' un ' yawng Eun, Ui ' yawng Eun. Ui ' lawn lah ' ri un ' yawng Eun ko ' , Ui ' ku na ' meuh peue chi ' lai seun ' pe ' ri yeut. Daecti yawng Ui ' Eun. Ui ' hot ' ri yeuh ku ' lah ' Eun na ' . ⁵⁶Kuing ' pe ' Abraham ren ' kawn eun mae ' kaw ri pun ri nyu seun ' yam Ui ' na ' . Eun pun ri nyu a hawc ' , eun ku ren ' kawn."

⁵⁷Peue Yu ' da na ' ce lah ' a ri Heun, "A ' yu Mi a hkuin ' nang pun hpawn ' kul ' neum, Mi ca ' vae ' nyu Abraham eun aw?" ⁵⁸Yesu ' Eun top ' a, "Ui ' lah ' a ri pe ' neumneum, tang ' neum yam Abraham un ' nang keut ' eun na ' , kue ' meuh Ui ' hawc ' ." ⁵⁹Yam pun ce ri mhawng ' leukah ' aen ' a na ' , ce seut ' meul ' seumu kaw ri dhim ' Eun na ' , daecti Yesu ' Eun lhawt ' lhaet ' ri pucti heul ' hk'ai ' nya hk'o ' mun ' keuting na ' .

Yesu ' bai ' Eun peue ngai ' fec ' tang ' neum yam keut ' ri

9 Yam Yesu ' long Eun hk'a ' heul ' na ' , Eun pun ri nyu peue ngai ' fec ' tang ' neum yam keut ' eun na ' ti peue. ²Tapae ' Eun na ' ce mhaing ' Yesu ' Eun, "Rabi ' , peue aen ' ngai ' fec ' eun tang ' neum yam keut ' eun na ' , a ci ' meuh kopti map ' a ' nhaw ' ? Meuh a kopti

map ' eun aw, a ' ko ' meuh a kopti map ' ka makuiing ' eun aw?"

³Yesu ' Eun top ' a, "A hkuin ' meuh kopti map ' heun. A ku hkuin ' meuh kopti map ' ka makuiing ' eun. Daecti ceu nang aen ' keut ' meuh ka na ' meuh a punta kaw peue nyu kan ' Eun Peucawo ' na ' puc a ri lih hk'a ' naee a ' yu eun na ' . ⁴Cu yam kawn ' buih meuh a yam ka peun ' nyi na ' , e ' kaw kah ri yeuh kan ' Eun Cawo ' ku ' cus ' e ' lih na ' Eun. Kaw a hk'aws ' rot yam ka peunpul na ' hawc ' . A ' nhaw ' hkuin ' kaw laee cang yeuh kan ' hk'a ' naee yam awn ' na. ⁵Yam kawn ' buih ut ' Ui ' pang bhen ' keute ' na ' , Ui ' meuh ku ' ceng ' ka bhen ' keute ' na ' ."

⁶Hawc ' lah ' Eun a yeuh keutit ' na ' , Eun htueng ' nyel ' ri na ' ri bhen ' keute ' na ' , Eun yeuh a meuh keute ' peu ' . Eun pok a ri ngai ' eun peue ngai ' fec ' na ' . ⁷Yesu ' Eun lah ' a ri heun, "Heul ' hkuc ' a nang glu Silo ' am na ' reu ' ." (Vangdoh ' ka Silo ' am na ' a lah ' "cus ' heul ' ") Peue awn ' eun ku heul ' hkuc ' ri tec keute ' peu ' na. Yam buih ing ' eun ti nya ri na ' , eun nyu hk'a ' ri.

⁸Peue ut ' keunam caonao ' nya eun na ' mae ' peue tawn nyu hk'o ' eun ri hk'a na ' ce mhaing ' puri, "Peue awn ' un ' meuh a ku ' tawn mok ' ri hk'o ' ri hk'a na ' eun aw?" ⁹Ngon ' ce lah ' , "Meuh."

Ngon ' ce lah ' , "Un ' meuh, buh ka na ' gup seun ' a puri."

Daecti eun htawhkam tu ' ri na ' meun lah ' , "Ku ' lah ' pe ' na ' meuh a ui ' ri hawc ' ."

¹⁰Ce mhaing ' eun, "Yeuh keutit ' ko ' , mi ci ' yeuh sa ' n-haw ' mi nyu hk'a ' ri?"

¹¹Eun top ' a, "Ku ' klawng peue muis Yesu ' na ' pok Eun ngai ' ui ' na ' ri keute ' peu ' na ' . Eun kah ui ' heul ' hkuc ' a nang glu Silo ' am na ' . Kop awn ' na, ui ' heul ' hkuc ' a, ui ' cang nyu hk'a ' ri."

¹²Ce mhaing ' eun, "Eun ci ' ut ' tawngnhaw ' ?"

Eun top ' a, "Ca ' yawng ui ' a."

Peue Hparisae ' na ' caet ce ri nawk lawng bai ' ngai ' fec ' cuin na '

¹³Ce va peue tawn ngai ' fec ' na ' eun heul ' ri peue Hparisae ' na ' ce. ¹⁴Seun ' yam Yesu ' yeuh Eun keute ' peu ' Eun bai ' peue ngai ' fec ' na ' eun cuin na ' , a meuh seun ' yam Sin ' . ¹⁵Kop awn ' na, peue Hparisae ' na ' ce ku mhaing ' eun ci ' yeuh sa ' nhaw ' eun nyu hk'a ' ri na ' . Eun top ' a, "Pok Eun keute ' peu ' na ' ri ngai ' ui ' na ' . Ui ' heul ' hkuc ' ri tec a. Maet ' maen ' ui ' nyu hk'a ' ri hawc ' ."

¹⁶Peue Hparisae ' na ' ce ngon ' ce lah ' , "Peue tit ' hpaw Eun ca ' lih neum Peucawo ' Eun, kopti Eun hkuin ' rokxa ' ritroe ka seunyi Sin ' na ' ."

Daecti ngon ' ce lah ' , "Peue map ' na ' Eun ci ' kaw cang yeuh het ' keuting yeuhki ' na ' yeuh sa ' nhaw ' ?" Kop awn ' na, ce gvah muk gvah cum ri na ' .

¹⁷Vang tisut ' ka na ' , ce mhaing ' peue ngai ' fec ' na ' eun bae, "Mi ci ' kaw lah ' lawng Eun ku ' bai ' ngai ' mi ceng ' na ' yeuh sa ' nhaw ' ?"

Eun top ' a, "Meuh Eun peue suip leukah ' Eun Peucawo ' ."

¹⁸Ro ' ce peue Yu ' da na ' ce un ' yum ' peue awn ' tawn ngai ' fec ' eun, eun tang nyu hk'a ' ri na ' rot ti klawng ce makuiing ' eun ka ing ' . ¹⁹Ce mhaing ' ka, "Hkawn ' meuh eun kon ' me pa ' neum aw? Ku ' lah ' pa ' eun ngai ' fec ' tang ' neum yam keut ' eun na ' , a meuh hkawn ' eun hawc ' aw? Maet ' maen ' , eun ci ' yeuh sa ' nhaw ' , eun tang nyu hk'a ' ri?"

²⁰Makuiing ' eun na ' ka top ' a, "Yawng ya hkaen ' meuh eun kon ' me ri, eun ngai ' fec ' tang ' neum yam keut ' eun na ' . ²¹Daecti maet ' maen ' eun ci ' na ' yeuh sa ' nhaw ' eun nyu hk'a ' ri, a ' ko ' a ' nhaw ' ci ' na ' bai ' ngai ' eun na ' cuin na ' , ya tup hkuin ' yawng a yeut. Mhaing ' ri nawk eun reu ' . Keuting eun hawc ' , eun ku na ' cang ris meun a yeut." ²²Makuiing ' eun na ' ka saec ' mae lah ' a yeuhko ' na ' , kopti lhat ' ka ri ro ' ce peue Yu ' da na ' ce, kopti taws ' ce a deut a ' nhaw ' lawn rap ri ti Yesu ' meuh Eun Hkrit na ' ko ' , kaw eun pun ri hkam ' hk'a ' ra ri tec ri hk'ai ' sa ' la vang hk'o ' mun ' ce na ' .

²³Kop awn ' na, makuiing ' eun na ' ka lah ' a ri ce, keuting eun hawc ' , mhaing ' ri nawk eun reu ' .

²⁴Kop awn ' na, ce tang klawng peue tawn ngai ' fec ' na ' eun ing ' bae lal ' pok ti pok. Ce lah ' , "Tuil ' munhpung ' ri Peucawo ' Eun ri lah ' mi ku ' neumneum na ' reu ' . Yawng ye peue awn ' meuh Eun peue map ' ."

²⁵Peue tawn ngai ' fec ' na ' eun top ' a, "Hpaw ui ' ca ' yawng meuh un ' meuh Eun peue map ' . Yawng ui ' ti ceu, tawn ngai ' fec ' ui ' , daecti maet ' maen ' ui ' nyu hk'a ' ri hawc ' ."

²⁶Hawc ' ko ' , ce mhaing ' eun, "Eun ci ' yeuh keunhaw ' ri mi? Eun ci ' yeuh sa ' nhaw ' ri ngai ' mi na ' a ceng ' ?"

²⁷Eun top ' a, "Lah ' ui ' pe ' mhawng ' a hawc ' , pe ' hkuin ' leuceng a. A ci ' yeuh keunhaw ' , pe ' vae ' gawm sum ' mhawng ' a? Sum ' meuh pe ' tapae ' Eun yeut aw?"

²⁸Kop awn ' na, ce chaw hkamram un ' nawpsang peue tawn ngai ' fec ' na ' eun. Ce lah ' , "Mi ri meuh mi tapae ' Eun. Ye ri ye meuh tapae ' eun Mo ' se. ²⁹Yawng ye Peucawo ' leukah ' Eun mae ' Mo ' se eun. Daecti ye hkuin ' yawng Heun ri ing ' Eun neum tawngnhaw ' ."

³⁰Peue tawn ngai ' fec ' na ' eun top ' a, "Hk'o ' a am ' nyawk ' , pe ' hkuin ' yawng ing ' Eun neum tawngnhaw ' , daecti Eun bai ' ngai ' fec ' ui ' na ' ceng ' . ³¹Yawng e ' Peucawo ' un ' leuceng Eun leukah ' ce peue map ' na ' . Eun leuceng leukah ' ce peue a ' yu im ' hk'a ' naee hk'a ' Eun na ' mae ' peue hot ' ri yeuh alo Eun na ' ce. ³²Lawng nang bai ' peue ngai ' fec ' tang ' neum yam keut ' ri cuin na ' , a ' nhaw ' hkuin ' duing mhawng ' a. ³³Peue awn ' Eun lawn un ' meuh nang lih neum Peucawo ' Eun ko ' , Eun hkuin ' kaw cang yeuh keunhaw ' pun."

³⁴Ce htu ' hting ' eun ce lah ' , "Deum mi ri hk'a ' naee map ' na ' tang ' neum yam keut ' mi na ' , mi ci ' mhawng ' ri ara yeuh sa ' nhaw ' , mi kaw sangsawn ' ye?" Hawc ' ko ' , ce ra eun pucti heul ' hk'ai ' sa ' la vang hk'o ' mun ' na ' .

Ngai ' fec ' hk'a ' civit

³⁵Yesu ' mhawng ' Eun ra peue ri tec peue awn ' eun. Yam Yesu ' tang hk'eup ' Eun peue awn ' eun na ' , Eun mhaing ' eun, "Lak ' yum ' mi Kon ' ai ' peue na ' Eun aw?"

³⁶Peue awn ' eun mhaing ' Eun, "Cawo ' , Kon ' ai ' peue na ' Eun ci ' meuh a ' nhaw ' ? Lah ' ui ' mhawng ' Eun, kaw ui ' yum ' Eun." ³⁷Yesu ' Eun lah ' , "Pun mi ri nyu Eun hawc ' . Meuh Eun ku ' buih leukah ' mae ' mi maet ' -maen ' aen ' Eun hawc ' ."

³⁸Peue awn ' eun lah ' , "Cawo ' , yum ' ui ' yeut." Hawc ' ko ' , eun nghup ' ri faee ' Yesu ' Eun.

³⁹Yesu ' Eun lah ' , "Lih Ui ' pang bhen ' keute ' na ' punta kaw Ui ' taws ' a ' mu punta kaw yeuh peue ngai ' fec ' na ' kaw ce nyu hk'a ' ri na ' mae ' punta kaw yeuh peue nyu hk'a ' ri na ' kaw ce ngai ' fec ' na ' ."

⁴⁰Peue Hparisae ' ut ' keunam Eun na ' ce ngon ' , yam pun ce ri mhawng ' leukah ' awn ' a na ' , ce mhaing ' Eun, "A meuh keunhaw ' ? Meuh ye peue ngai ' fec ' aw?"

⁴¹Yesu ' Eun lah ' , "Pe ' lawn ngai ' fec ' ko ' , hpaw pe ' ca ' kaw kue ' map ' . Daecti kopti lah ' pe ' ri nyu hk'a ' ri na ' , map ' pe ' na ' a kaw ' kue ' ."

Leukah ' leupong ' lawng kon ' yung ' mae ' cawo ' go ' ka

10 Ui ' lah ' a ri pe ' neumneum, peue un ' ing ' lec hk'a ' leuva ' ka kok kon ' yung ' na ' , daecti eun huk ' ri lec hk'a ' tawk seubu na ' meuh eun peue con ' peue ra. ²Daecti peue ing ' lec hk'a ' leuva ' na ' meuh eun cawo ' go ' ka kon ' yung ' na ' . ³Peue ko ' leuva ' na ' eun tah ' leuva ' na ' ri heun. Kon ' yung ' na ' a leuceng leukah ' eun. Eun klawng muis ka kon ' yung ' ri na ' ti tu ' "

hawc' ti tu'. Eun va kon'yung' ri na' ce pucti heul'.
⁴Hawc' va eun kon'yung' ri na' ce pucti heul' euc' na', eun heul' nanggal' ka kon'yung' ri na'. Kopti kon'yung' Eun na' yawng a leukah' eun na', a hot' eun heul'.⁵ Daecti kon'yung' na' a hkuin' duing hot' peue un' yawng ri na' eun. Lheu' awn' na, a sawm hk'uih ri heun kopti un' yawng a leukah' eun na'."
⁶Yesu' lah' Eun leukah' leupong' aen' a ri ce, daecti Eun ci' lah' lawng keunhaw' na', ce hkuin' leuceng pun a.

⁷Kop awn' na Yesu' Eun tang lah' a bae, "Ui' lah' a ri pe' neumneum, meuh Ui' leuva' ka kon'yung' na'.
⁸Peue ing' nanggal' Ui' na' meuh ce peue con' peue ra. Daecti, kon'yung' na' a hkuin' leuceng leukah' ce.
⁹Ui' meuh leuva' awn' na. A'nhaw' lawn ing' lec Ui' ko', eun kaw pun ri lawtpon. Eun kaw lec lih a. Eun kaw nyu rip seungal vang saee chak' na'.¹⁰Peue con' na' ing' eun punta kaw eun ing' ra, ing' toh mae' ing' yeuh ku' lulaic na' palkoe. Ui' ri, Ui' lih punta kaw ce pun a'yu ri, a meuh a'yu htonnu' na'.

¹¹Meuh Ui' Cawo' go' kon'yung' chak'. Cawo' go' kon'yung' chak' na' eun hkam' ri sum a'yu ri na' pun kon'yung' ri na' ce.¹²Peue rapcang' go' kon'yung' na' eun hkuin' meuh cawo' ka kon'yung' na'. Kop awn' na, yam ruk na' ing' ka na', eun tec muk ka kon'yung' na', eun hk'uih. Hawc' ko', ruk na' a ing' lec ri yeuh muk ka kon'yung' na' lulaic, hk'akcak' puri.
¹³Peue awn' eun hk'uih, kopti meuh eun peue rapcang' na'. Eun un' hki'keung ri kon'yung' na'.

¹⁴Meuh Ui' Cawo' go' kon'yung' chak'. Ui' yawng kon'yung' ri na' ce, kon'yung' Ui' na' ce ku yawng Ui' ri¹⁵ seun' A'kuiing' yawng Eun Ui' na', Ui' ku yawng A'kuiing' Eun. Ui' hkam' ri sum a'yu ri na' pun kon'yung' ri na' ce.¹⁶Ui' ku kaw n' kue' kon'yung' nang seubu ku' un' meuh is' ka kok aen' na, Ui' kaw kah ri heul' va ce ing' yeut. Kon'yung' tit' ce ku kaw leuceng leukah' Ui'. Ce kaw pawng' ri meuh ti muk mae' muk aen' ce. Ce kaw kue' yawo Cawo' go' ti peue.¹⁷Kuiing' Ui' leumeus' Eun Ui' na' meuh a kopti hkam' Ui' ri sum a'yu ri punta kaw Ui' tang pun a'yu awn' a keutah bae na'.¹⁸A'nhaw' hkuin' rutrim' ri ti a'yu Ui' na' hk'ai' Ui', daecti sah paw' Ui' ri hkam' ri sum ri na' meun. Kue' Ui' ti' ca kaw hkam' ri sum a'yu ri na', mae' ti' ca kaw rap ri ti a'yu tang keutah bae na'. Pun Ui' leukah' tuil' aen' a ri Kuiing' Ui' Eun."

¹⁹Leukah' aen' a yeuh peue Yu' da na' ce tang gvah muk gvah cum ri na' bae.²⁰Peue heun' na' ce lah', "Seuca' lec ka Eun, eun buicbuic lah' leukah' un' ceng' un' saee'. Leuceng leukah' Eun na' meuh keunhaw'?"

²¹Daecti peue seubu na' ce lah', "Aen' hpaw a ca' meuh leukah' peue seuca' lec. Seuca' na' kaw a cang yeuh peue ngai' fec' na' eun nyu hk'a' ri aw?"

Peue Yu' da na' un' yum' ce Yesu' Eun

²²A rot yam yeuh pawe suk' seun' nya hk'o' mun' keuting nang veng Yeru' salaem na'. A meuh yam kawt'.
²³Yesu' Eun buih lawng' laeng' ri hot' nang a'ras' rum Saw' lamon nang kang' hkung' ka nya hk'o' mun' keuting na'.²⁴Peue Yu' da na' ce ing' rop Eun. Ce lah', "Mi ci' kaw n' kaw uin' ye kangkae ri ti ling' a' neng? Mi lawn meuh Hkrit neum ko', lah' seumeu' ye mhawng' a reu'."

²⁵Yesu' Eun top' a, "Lah' Ui' pe' mhawng' a hawc', daecti pe' un' yum' Ui'. Ku' hk'o' am' yeuh Ui' hk'a' naee muis Eun Kuiing' Ui' na' hkam' a sa' hki' lawng Ui' na' hawc'.²⁶Daecti un' yum' pe' Ui' kopti un' meuh pe' kon'yung' Ui' na'.²⁷Kon'yung' Ui' na' leuceng ce leukah' Ui' na'. Ui' yawng kon'yung' awn' ce. Ce ku hot' Ui'.²⁸Ui' tuil' a'yu cot' cu na' ri ce. Ce hkuin' kaw laee duing lulaic heul'. A'nhaw' hkuin' kaw cang rim' ri ti ce hk'ai' dak ti' Ui' na'.
²⁹Kuiing' Ui' ku' ap kon'yung' awn' ce ri Ui' na' keuting Eun hk'ai' ku ceu gawm' euc' na'. A'nhaw' hkuin' kaw cang rim' ri ti kon'yung' awn' ce hk'ai' dak ti' Eun Kuiing' Ui' na'.³⁰Ui' ri mae' A'kuiing' meuh ya ti peue."

³¹Pok aen' na, peue Yu' da na' ce seut' meul' seumu kaw dhim' Yesu' Eun bae.³²Daecti Yesu' Eun lah' a ri ce, "Yeuh Ui' pe' nawk ku' chak' heun' ceu lih neum A'kuiing' Eun na' hawc'. A ci' meuh kopti ku' chak' ceu nangnhaw' na', pe' vae' seut' meul' seumu pe' kaw dhim' Ui'?"

³³Peue Yu' da na' ce top' a, "Hpaw ye ca' kaw dhim' Mi ri meul' seumu kopti yeuh Mi ku' chak' na'. Daecti kaw ye dhim' Mi kopti un' nawpsang Mi Peucawo' Eun na'. Chae' gup meuh Mi peue yawo, daecti Mi sawn' meun tu' ri na' meuh Peucawo' Eun."

³⁴Yesu' Eun top' a ri ce, "Hk'a' naee htawm leukah' ritroe pe' na' Peucawo' lah' Eun a yeuh keutit', 'Lah' Ui', pe' meuh Cawo' †, un' meuh ka aw? ³⁵Yawng e' ku' hk'a' naee htawm Seunga' na' lah' ka na' mae' ku' Peucawo' klawng Eun ce meuh Cawo' na' meuh a ku' neumneum.³⁶Kopti A'kuiing' leuk Eun ri cus' Ui' lih pang bhen' keute' na', na' Ui' lah' ri meuh Kon' ai' Eun Peucawo' ko', a ci' meuh kop keunhaw' pe' vae' lah' Ui' un' nawpsang Peucawo' Eun? ³⁷Ui' lawn un' yeuh ku' yeuh Eun Kuiing' Ui' na' ko', pawlae

† Suk' seun' 82:6

yum ' Ui '. ³⁸ Daecti Ui ' lawn yeuh a ko ', pe ' saec ' na ' un ' yum ' Ui ', yum ' ku ' yeuh Ui ' na ' reu '. Yeuh keutit ' ko ', na ' pe ' leuceng pun yawng A ' kuiing ' ut ' Eun hk'a ' naee Ui ', Ui ' ut ' hk'a ' naee A ' kuiing ' Eun na ' ."

³⁹ Pok aen ' na, ce co ' ca ' ri kaw mheut ' Eun bae, daecti Eun pucti heul ' hk'ai ' ce.

⁴⁰ Hawc ' awn ' na, Yesu ' Eun tang klong ' Yaw ' dan na ' , Eun keutah ing ' vang Yo ' han tawn tuil ' eun hk'a ' cum ' nanggal ' aen ' ce na ' . ⁴¹ Peue heun ' na ' ce ing ' ri Heun. Ce lah ' , "Yo ' han eun saec ' un ' duing yeuh het ' keuting na ' , daecti ku ' Yo ' han lah ' eun ku ' to ' ri lawng Eun peue aen ' Eun na ' meuh a ku ' neum gawm ' euc ' ."

⁴² Peue ing ' yum ' Yesu ' Eun heun ' peue ri mawn ' na ' .

Lasaru ' yeum eun

11 A kue ' peue ti peue eun muis Lasaru ' . Eun buih peuyhat. Eun ing ' neum yung ' Betani ' vang ut ' ka ec ' ri Mari ' mae ' Mahta ' na ' ka. ² Mari ' aen ' eun meuh beun ' ku ' pok lamawn hom ' ri Yesu ' Eun, hawc ' ko ' , eun ot ' cung Eun na ' ri huik ' ri na ' eun. Lasaru ' awng ' eun na ' eun buih peuyhat. ³ Kop awn ' na, ec ' eun lal ' peue na ' ka cus ' kah peue heul ' lah ' a ri Yesu ' Eun, "Cawo ' , peue leumeus ' Mi ti peue na ' buih peuyhat eun."

⁴ Yam Yesu ' pun Eun ri mhawng ' leukah ' awn ' a na ' , Eun lah ' , "Peuyhat tit ' hpaw a ca ' kaw hk'o ' eun yeum. Daecti punta Peucawo ' Eun mae ' Kon ' ai ' Eun na ' kaw Ka pun munhpung ' ri kopti ceu nang aen ' a na ' , peuyhat tit ' a keut ' kue ' ."

⁵ Yesu ' leumeus ' Eun Mahta ' eun mae ' awng ' beun ' eun na ' eun mae ' Lasaru ' eun. ⁶ Daecti yam mhawng ' Eun Lasaru ' peuyhat eun na ' , Eun cu ri ut ' vang ut ' ri na ' bae lal ' seunyi.

⁷ Hawc ' awn ' na, Yesu ' Eun lah ' a ri tapae ' ri na ' ce, "Pawh, e ' keutah ing ' nang kuing ' Yu ' da."

⁸ Tapae ' Eun na ' ce lah ' , "Daecti Rabi ' , nyiawn ' seuno ' peue Yu ' da na ' co ' ca ' ce ri kaw dhim ' Mi ri meul ' seumu. Mi kaw keutah ing ' teh ' bae aw?"

⁹ Yesu ' Eun top ' a, "Peunnyi na ' kue ' a kul ' leual ' nali, un ' meuh ka aw? Peue long hk'a ' peunnyi na ' eun hkuin ' cang seuduih ri, kopti nyu eun hk'a ' ri ri ku ' ceng ' ka bhen ' keute ' aen ' na. ¹⁰ Eun cang seuduih ri yam long eun hk'a ' peunsum ' na ' , kopti un ' kue ' eun ku ' ceng ' na ' ."

¹¹ Hawc ' lah ' Eun a yeuh keutit ' na ' , Eun suip ri lah ' a ri ce bae, "A ' mawo e ' Lasaru ' pun eun ri it ' hawc ' , daecti Ui ' kaw ing ' teh ' , Ui ' na ' ing ' sawl ' eun kuh ' ."

¹² Tapae ' na ' ce lah ' a ri Heun, "Cawo ' , eun lawn pun ri it ' ko ' , na ' eun sam ' ran hawc ' ."

¹³ Yesu ' lah ' Eun

lawng Lasaru ' yeum eun na ' , daecti tapae ' na ' ce hteum ' Eun lah ' eun kawn ' yeng ri it ' .

¹⁴ Kop awn ' na, Yesu ' Eun lah ' seumeu ' a ri ce, "Lasaru ' yeum eun hawc ' . ¹⁵ Meuh a kopti pe ' ri, punta kaw pe ' yum ' na ' , un ' pun Ui ' ri ut ' teh ' na ' , a yeuh Ui ' ren ' . Pawh, e ' ing ' ri heun."

¹⁶ Hto ' mas ' ku ' klawng peue eun meuh kon ' seuklap ' na ' eun lah ' a ri tapae ' seubu na ' ce, "Pawh, e ' ing ' yeut, ing ' yeum mae ' Heun tiduih ' ."

Yesu ' tuil ' Eun kawl ' reng ka ec ' eun Lasaru ' na '

¹⁷ Yam Yesu ' ing ' rot Eun na ' , Eun pun ri yawng puing ' ce Lasaru ' eun nang leumuic pun pun ' seunyi hawc ' .

¹⁸ Yung ' Betani ' na ' a seungai veng Yeru ' salaem na ' hk'ao lal ' lak ' . ¹⁹ Peue Yu ' da heun ' peue na ' ce ing ' ri Mahta ' mae ' Mari ' ka. Ce ing ' tuil ' kawl ' reng ka kopti Lasaru ' awng ' ka na ' yeum eun na ' . ²⁰ Yam Mahta ' mhawng ' eun lawng Yesu ' buih ing ' Eun na ' , eun heul ' rap ri ti Eun. Daecti Mari ' eun kawn ' ut ' ti nya.

²¹ Mahta ' eun lah ' a ri Yesu ' Eun, "Cawo ' , Mi lawn caw ri ut ' maen ' ko ' , awng ' ui ' na ' eun hkuin ' kaw yeum.

²² Daecti yawng ui ' saec ' meuh maet ' maen ' , Mi lawn hk'o ' ku ' ti ri ceu ri Peucawo ' Eun ko ' , kaw Eun tuil ' a ri Mi yeut."

²³ Yesu ' Eun lah ' a ri heun, "Awn ' mi na ' kaw eun tang kuh ' im ' yeut."

²⁴ Mahta ' eun top ' a, "Yawng ui ' kaw eun tang kuh ' im ' bae hk'a ' naee seunyi tang kuh ' im ' seunyi tisut ' na ' ."

²⁵ Yesu ' Eun lah ' a ri heun, "Meuh Ui ' Cawo ' yeuh peue yeum na ' ce tang kuh ' im ' na ' mae ' Cawo ' tuil ' a ' yu ri ce na ' . Peue yum ' Ui ' na ' ce saec ' yeum heul ' , ce kaw a ' yu im ' . ²⁶ Saec ' meuh a ' nhaw ' , eun lawn yum ' Ui ' yam a ' yu im ' ri na ' ko ' , eun hkuin ' kaw pun ri yeum. Yum ' mi a yeuh keutit ' aw?"

²⁷ Eun top ' a, "Cawo ' , yum ' ui ' a yeut. Yum ' ui ' meuh Mi Hkrit. Mi meuh Kon ' ai ' Eun Peucawo ' Cawo ' lih pang bhen ' keute ' na ' Eun."

²⁸ Hawc ' Mahta ' lah ' eun a yeuh keutit ' na ' , eun ing ' jom ri klawng Mari ' awng ' ri na ' eun. Eun lah ' , "Seura ' ing ' rot Eun maen ' hawc ' . Eun mhaing ' ui ' ri mi."

²⁹ Yam Mari ' pun eun ri mhawng ' leukah ' awn ' a na ' , eun keulawn ' yuk ri heul ' ri Yesu ' Eun. ³⁰ Yam awn ' na, Yesu ' Eun hkuin ' nang ing ' lec yung ' na ' , Eun kawn ' ut ' vang Mahta ' heul ' hk'eup ' eun Eun na ' . ³¹ Yam peue Yu ' da ku ' ing ' tuil ' kawl ' reng eun Mari ' nang nya na ' pun ce ri nyu Mari ' keulawn ' yuk eun ri heul ' na ' , ce ku hot ' eun heul ' kopti hteum ' ce eun kaw heul ' yam nang leumuic na ' .

³² Yam Mari' heul' rot eun ri vang Yesu' ut' Eun eun nyu Yesu' Eun na', eun nghup' ri keunam cung Eun Yesu' na', eun lah', "Cawo', Mi lawn caw ri ut' maen' ko', awng' ui' na' eun hkuin' kaw yeum."

³³ Yam Yesu' pun Eun ri nyu Mari' eun mae' peue Yu'da hot' eun heul' na' yam ce na', Eun ku kuit nyhap' hpum' lu nyawk'. ³⁴ Eun mhaing' ce, "Pe' ci' uin' eun tawngnhaw'?"

Ce top' a, "Cawo', ing' nawk eun reu'."

³⁵ Yesu' Eun yam.

³⁶ Hawc' ko', peue Yu'da na' ce lah', "Keue', Eun ci' pe leumeus' eun a' neng."

³⁷ Daecti ngon' ce lah', "Eun cang yeuh peue ngai' fec' na' ce nyu hk'a' ri, kaw Eun un' cang yeuh peue awn' eun un' yeum aw?"

Yesu' yeuh Eun Lasaru' eun tang kuh' im'

³⁸ Pok aen' na, Yesu' Eun tang hpum' sui' nyawk' bae ti pok. Eun ing' ri keutui' leumuic na'. Keutui' leumuic awn' a meuh keutui' leuang'. Peue dho' keutui' ing' lec ka na' ri meul' seumu. ³⁹ Yesu' Euh lah', "Cut' ri tec meul' seumu dho' ka na' reu'." Mahta' ec' eun ku' yeum na' eun lah', "Daecti Cawo', seunyaen' na' eun chak' ri seue' hawc', kopti ut' eun nang keutui' leumuic na' pun a pun' seunyi hawc'."

⁴⁰ Hawc' ko', Yesu' Eun lah', "Lah' Ui' a ri mi hawc', mi lawn yum' ko', kaw mi pun ri nyu munhpung' Eun Peucawo' na', un' meuh ka aw?"

⁴¹ Kop awn' na, ce ku cut' ri tec meul' seumu na'. Hawc' ko', Yesu' Eun mung' mao' na', Eun lah', "A' kuiing', kopti leuceng Mi leukah' Ui' na', Ui' mun' keuting ri Mi. ⁴² Yawng Ui' leuceng Mi leukah' Ui' na' lalung. Daecti lah' Ui' a yeuh keutit' na' meuh a punta peue buih cawng maen' na' kaw ce yum' cus' Mi Ui' lih na'."

⁴³ Hawc' lah' Eun a yeuh keutit' na', Eun klawng ri lah' laws', "Lasaru', puc mi lih reu'." ⁴⁴ Peue yeum awn' eun ku pucti lih. Hpen' linin na' a bawl' ti' cung eun na', buh eun na' a ku bawl' ri ri hpen'. Yesu' Eun lah' a ri ce, "Kah' hpen' eun na' plo' eun reu'."

Rangraen hk'a' kaw toh Yesu' Eun

⁴⁵ Kop awn' na, peue Yu'da heun' peue ku' ing' glue ri Mari' eun na' ce caw ri nyu ku' Yesu' yeuh Eun na', ce yum' Eun. ⁴⁶ Daecti ngon' ce heul' saw' lawng ku' Yesu' yeuh Eun na' ri peue Hparisae' na' ce. ⁴⁷ Hawc' ko', ro' peue jhawp' rit na' ce mae' peue Hparisae' na' ce klawng muk peue hk'om kan' na' ce hk'om puri.

Ce lah', "E' ci' kaw htuk' ri yeuh sa' nhaw'? Peue awn' buih yeuh Eun het' keuting na' heun' ceu. ⁴⁸ E' lawn kaw tae' Eun suip ri yeuh ku' yeuh ri na' heul' ko', kaw peue heul' yum' Eun gawm' euc'. Hawc' ko', peue Ro' ma na' ce na' ing' lec ri yeuh nya hk'o' mun' keuting na' mae' kuing' e' na' lulaic heul'."

⁴⁹ Hawc' awn' na, hk'a' naee muk ce na' ku' muis Kayafas' eun meuh ro' peue jhawp' rit keuting ce hk'a' naee neum awn' a na' eun lah', "Un' yawng pe' keunhaw' saec' peunae'. ⁵⁰ Un' kuit doh' pe', peue ti peue eun lawn yeum pun peue heun' ko', na' a chak' pun pe' hk'ai' kuing' na' lulaic ka gawm' euc' na'."

⁵¹ Eun hkuin' lah' leukah' aen' ce hot' kamkuit ri na' meun, daecti lah' eun a hot' mae' an' nya meuh eun ro' peue jhawp' rit keuting hk'a' naee neum awn' a na'. Eun tamnai Yesu' kaw Eun yeum pun peue ceu Yu'da na' ce. ⁵² A hkuin' kaw meuh pal pun peue ceu awn' ce koe, daecti Eun ku yeum pun kon' Eun Peucawo' ku' taic' jah heul' hk'ai' puri na', punta kaw Eun va ri ing' hk'on' ro ce meuh yawo ti muk na'. ⁵³ Kop awn' na, tang' neum seunyi awn' a na', ce rangraen hk'a' kaw ri toh Eun.

⁵⁴ Kop awn' na, Yesu' Eun un' laee heul' ing' glih' - gleueng' hk'a' naee muk ce peue Yu'da na' bae. Eun pucti heul' neum mawn' na'. Eun heul' ut' nang veng E' fraim', a de vang hk'oh' hk'oeng' na'. Eun ut' mae' tapae' ri na' ce teh'.

⁵⁵ Yam kaw a hk'aws' rot ri pawe vel nya ce peue Yu'da na', peue cum heun' ing' neum veng tawk seubu na' punta kaw peue ing' yeuh hk'a' seunga' chak' na' hot' ritroe ka na', peue huk' nang veng Yeru' salaem na' yam pawe vel nya na' un' nang rot ka. ⁵⁶ Ce ca ri jem' Yesu' Eun. Yam cawng ce nang nya hk'o' mun' keuting na', ce lah' a ri puri, "Pe' ci' kuit a yeuh sa' nhaw'? Kaw Eun un' ing' nang pawe aen' a aw?" ⁵⁷ Ro' peue jhawp' rit keuting na' ce mae' peue Hparisae' na' punta kaw ce mheut' ri pun Yesu' Eun na', ce tuil' leukah' ri, a' nhaw' lawn yawng ut' Eun tawngnhaw' ko', eun kaw kah ri lah' ce mhawng' a.

Pok Yesu' Eun ri lamawn hom' nang yung' Betani'

12 Nanggal' ka yam pawe vel nya na' un' nang rot ka les seunyi na', Yesu' Eun rot nang yung' Betani' vang ut' eun Lasaru' ku' Yesu' tang yeuh Eun eun kuh' im' na'. ² Ce yeuh pawe hk'asom' pul tuil' munhpung' Eun Yesu'. Mahta' eun ko' ri nom' nawk yeuh mhai'. Lasaru' eun ku mok' ri som' mae' peue seubu na' ce mae' Yesu' Eun. ³ Mari' eun ti lamawn hom' seunga' chak' ngos heun' nyawk' na' hk'ao ri hk'eung lit' na', eun lhuik' ri pok a ri cung Eun Yesu' na', eun ot' a ri

huik´ri na´. Hom´ka lamawn hom´na´a hom´hk'awp´hk'a´naee nya na´.

⁴Daecti tapae´Eun Yesu´ti peue muis Yu´das´I´sakariot´ku´kaw fuin Eun hk'a´nha´ka na´eun htu´hting´lah´a,⁵“A ci´yeuh keunhaw´, mi vae´hkuin´paing´lamawn hom´aen´a gvah ri tuil´a ri peue hk'o´tukyak na´ce? Lamawn hom´aen´kawn´meuh a ngos reng na´ti neum†.”⁶Lah´eun a yeuh keutit´na´hpaw eun ca´caee kuit pun peue hk'o´tukyak na´ce, daecti kopti meuh eun nang rabawk´na´. Meuh eun nang kawp´huil´paec, eun tawn ti ri cai´paec ka na´.

⁷Yesu´Eun top´a, “Tae´eun reu´, yeuh eun ki´na´meuh a punta rangraen eun a pun seunyi na´Ui´puing´ri na´.”⁸Kue´a peue hk'o´tukyak mae´pe´laleung, daecti Ui´hkuin´kaw ut´maee´pe´laleung.”

Sa´lit puri kaw toh Lasaru´eun

⁹Yam peue Yu´da cum heun´na´pun ce ri mhawng´Yesu´ut´Eun mawn´na´, ce ku va puri ing´mawn´. A hkuin´meuh kopti ing´ce mawn´pun Yesu´Eun palkoe, daecti a ku meuh punta kaw ce nyu Lasaru´ku´Yesu´yeuh Eun eun tang kuh´im´na´eun yeut.¹⁰Kop awn´na, ro´peue jhawp´rit keuting na´ce ku rangraen hk'a´kaw ri toh Lasaru´eun yeut.¹¹Kopti Lasaru´meunang meuh eun kleum´ka yeuh peue Yu´da heun´peue na´ce plin´hpum´ri ing´yum´Yesu´Eun na´.

Ing´lec nang veng Yeru´salaem na´seun´Cawo´pe ko´

¹²Hawc´ka na´ti seunyi, peue cum heun´ing´nang pawe na´ce pun ri mhawng´Yesu´buih huk´Eun nang veng Yeru´salaem na´.¹³Ce jang´kan lha´ka hkeung´na´, ce heul´rap ri ti Eun. Ce ta´ul´ri lah´,

“Hosana,

nap mun´ri Cawo´ing´hk'a´ruim muis Eun Peucawo´na´Eun.

Nap mun´ri Hkun´haw´hkam´ce peue I´sarela´na´Eun.”

¹⁴Yesu´Eun hk'eup´rawngla aet´ti tu´na´. Eun pawk a seun´ku´tem´a ri nang htawm Seunga´na´,

¹⁵“Kon´beun´Yi´on, pawlaee lhat´.

Keue´reu´, Hkun´haw´hkam´mi na´buih ing´Eun.

Eun pawk rawngla aet´na´ing´.”††

¹⁶Nanggal´aen´na, tapae´na´ce hkuin´nang leuceng pun lawng aen´ce gawm´euc´ka. Daecti hawc´ka yam Yesu´pun Eun ri rap ri ti munhpung´ri na´, ce tawl´kuit

rot ri lawng aen´to´a ri ri Heun a pun ri tem´ri uin´ri, ce ku yeuh seun´awn´a. Ce tuil´munhpung´Eun yeut.

¹⁷Peue cum heun´ku´ut´maee´Yesu´Eun yam klawng Eun Lasaru´eun pucti lih hk'ai´keutui´leumuic ri Eun tang yeuh eun kuh´im´na´, ce suip ri hkam´sa´hki´ka lawng aen´a heul´.¹⁸Kopti peue cum heun´na´pun ce ri mhawng´lawng ku´yeuh Eun het´keuting aen´a na´, ce cu ri ing´ri Heun.¹⁹Kop awn´na, peue Hparisae´na´ce lah´a ri puri, “Nyu pe´a aw, hpaw e´ca´kaw laee cang yeuh keunhaw´na´pun? Keue´reu´, bhen´keute´gawm´euc´na´hot´ka Eun heul´hawc´.”

Yesu´tamnai Eun lawng kaw ri pun ri yeum

²⁰Peue huk´faee´nang pawe na´ngon´ce meuh peue Helasa´.²¹Peue Helasa´na´ce heul´hk'eup´Hpi´lip´ku´ing´neum veng Betsai´da´kuing´Galilae´na´eun. Ce hk'o´a ri heun, “Seura´, sum´hk'eup´ye Yesu´Eun.”²²Hpi´lip´eun ku heul´lah´a ri Andre eun. Hawc´ko´, ka va puri heul´lah´Yesu´Eun mhawng´a.

²³Yesu´Eun top´a, “Rot a yam Kon´ai´peue kaw Eun pun ri rap ri ti munhpung´ri hawc´.”²⁴Ui´lah´a ri pe´neumneum, ngho´seumal na´a lawn un´hk'uic´ri yeum pang bhen´keute´na´ko´, kaw a cu ri meuh yawo ti gleun´. Daecti a lawn yeum ko´, a kaw keut´ri meuh pli´ri puc seumal ri na´baee heun´heun´.²⁵Peue leumeus´a´yu ri na´, kaw eun sum a´yu ri. Seun´awn´na, peue ces ri a´yu ri pang bhen´keute´aen´a na´, kaw eun rokso´pun a´yu ri, eun kaw kue´a´yu cot´cu na´.

²⁶Peue yeuh mhai´Ui´na´, kaw eun kah ri hot´Ui´. Ui´lawn ut´tawngnhaw´ko´, mhai´Ui´na´eun ku kaw ut´ri ka. Kuing´Ui´kaw Eun tuil´munhpung´na´ri peue yeuh mhai´Ui´na´eun.

²⁷Maet´maen´, hpum´Ui´na´kuit nyhap´nyawk´ka. Ui´ci´kaw htuk´ri lah´a yeuh sa´nhaw´? Kaw Ui´lah´a yeuhki´aw, ‘A´kuing´, hk'o´Mi teum´kawm Ui´pon yam aen´a reu´. Un´meuh, rot Ui´hk'a´naee yam aen´a na´meuh a kopti ceu nang aen´na.²⁸A´kuing´, hk'o´Mi yeuh muis Mi na´pun munhpung´ri reu´.”

Hawc´ko´, a kue´seng´laws´lih neum kuing´pang mao´na´, a lah´, “Yeuh Ui´muis awn´a pun munhpung´ri hawc´. Ui´kaw tang yeuh a pun munhpung´na´baee.”²⁹Yam peue cum heun´ut´mawn´na´pun ce ri mhawng´seng´awn´a na´, ce lah´neumhk'i´ka. Ngon´ce lah´in´hpom ti peue na´leukah´eun mae´Heun.

³⁰Yesu´Eun lah´, “Seng´laws´awn´hpaw a ca´meuh pun Ui´, meuh a pun pe´.”³¹Maet´maen´, rot a yam taws´a´mu ri bhen´keute´aen´a hawc´. Cawo´u´pe-

† Leukah´Helasa´na´lah´a, 300 denarian †† Yahkari´9:9

ung bhen ' keute ' aen ' kaw a pun ri hkam ' hk'a ' ra ri tec ra ri hk'uih na '. ³² Daecti yam pun Ui ' ri rap ri ti hk'a ' yuk ri huk ' hk'ai ' bhen ' keute ' tawk ' ri pang kleum ' rawng ' tawp ' na ', Ui ' kaw teuk ' yat peue gawm ' euc ' na ' peue ing ' ri ti.' ³³ Lah ' Eun a yeuh keutit ' na ' meuh a punta kaw Eun tuh ' peue nyu kaw ri yeum yeuh sa ' n-haw ' na '.

³⁴ Peue cum heun ' na ' ce lah ', "Pun ye ri yawng hk'a ' -naee htawm leukah ' ritroe na ' lah ' ka, Hkrit Eun kaw a 'yu im ' cot ' cu. A ci ' yeuh keunhaw ', Mi vae ' lah ' Kon ' ai ' peue Eun kaw pun ri rap ri ti hk'a ' yuk ri huk ' na ' ? A 'nhaw ' ci ' meuh Kon ' ai ' peue tit ' Eun?"

³⁵ Yesu ' Eun top ' a, "Gup kaw pe ' kue ' ku ' ceng ' na ' ti vut ti yam. Suip ri long hk'a ' heul ' yam kawn ' kue ' a ku ' ceng ' nanggal ' yam hk'a ' duim ' lawng na ' un ' nang rot ka na '. Peue long hk'a ' hk'a ' naee hk'a ' duim ' lawng na ' hpaw eun ca ' yawng buih heul ' ri hk'a ' nhaw '. ³⁶ Punta kaw pe ' meuh kon ' ka ku ' ceng ' na ', yam ku ' ceng ' na ' buih kue ' ka na ', papuing ku ' ceng ' na ' reu '." Yam Yesu ' hawc ' Eun leukah ' ri na ', Eun pucti heul '. Eun heul ' mo ' ri hk'ai ' peue awn ' ce.

Peue Yu ' da na ' kawn ' meung ce un ' yum ' ri

³⁷ Yesu ' Eun saec ' yeuh ce nawk ku ' hk'o ' am ' na ' tam ' ngai ' ce na ', ce kawn ' meung un ' nang yum ' ri Eun. ³⁸ Aen ' meuh a hot ' seun ' leukah ' lah ' eun I ' saya ' peue suip leukah ' Eun Peucawo ' na '. Eun lah ', "Cawo ' Peucawo ', a 'nhaw ' ci ' kaw yum ' leukah ' ye na ' ?

Ti ' ca Mi na ' a ci ' kaw tuh ' a 'nhaw ' nyu a?" †

³⁹ Kop awn ' na, ce yum ' un ' pun kopti I ' saya ' lah ' eun ton seubu na ',

⁴⁰ "punta kaw ce un ' cang nyu ri ngai ' ri, un ' cang leuceng pun ri hpum ' ri, un ' yawm ' ri hpawt ' ri ing '.

Eun yeuh ngai ' ce na ' yep ri duim ' lawng, yeuh hpum ' ce na ' cen '.

Hawc ' ko ', Ui ' kaw bai ' ce cuin." ††

⁴¹ I ' saya ' lah ' eun a yeuh keutit ' na ' meuh a kopti pun eun ri nyu munhpung ' Eun Yesu ' na '. Eun lah ' a rot ri Heun.

⁴² Saec ' yeuh sa ' nhaw ', hk'a ' naee yam awn ' na, nang meuh ro ' yum ' Eun na ' a kue ' heun ' peue. Daecti ce un ' hat ' ri yeuh a pucti lih, kopti lhat ' ce peue Hparisae ' na ' ra ce ri tec ri hk'ai ' sa ' la vang hk'o ' mun ' na '.

⁴³ Kopti leumeus ' ce hk'a ' suk ' seun ' ce peue na ' lheu ' hk'ai ' hk'a ' suk ' seun ' Eun Peucawo ' na '.

⁴⁴ Yesu ' Eun klawng ri lah ' laws ' a, "Peue yum ' hk'a ' -naee Ui ' na ', hpaw eun ca ' yum ' hk'a ' naee Ui ' palkoe, daecti eun ku yum ' Cawo ' cus ' Ui ' lih na ' Eun yeut.

⁴⁵ Peue nyu Ui ' na ', eun ku nyu Cawo ' cus ' Ui ' lih na ' Eun yeut. ⁴⁶ Punta peue yum ' Ui ' ku peue na ' kaw ce un ' pun ri ut ' hk'a ' naee hk'a ' duim ' lawng na ', Ui ' lih pang bhen ' keute ' aen ' na hk'a ' naee meuh ri ku ' ceng ' na '.

⁴⁷ Peue mhawng ' leukah ' Ui ' un ' hot ' ri yeuh a na ' ce ko ', Ui ' hkuin ' kaw taws ' a ' mu ri ce, kopti hpaw Ui ' ca ' lih punta kaw Ui ' taws ' a ' mu, daecti lih Ui ' punta kaw Ui ' teum ' kawm bhen ' keute ' na ' lawtpon. ⁴⁸ Kue ' a nang kaw taws ' a ' mu ri peue un ' rap ri ti Ui ' mae ' un ' rap ri ti leukah ' Ui ' na ' ce hawc '. Awn ' a meuh leukah ' lah ' Ui ' na ', a kaw taws ' a ' mu ri ce hk'a ' naee seunyi tisut ' na '. ⁴⁹ Kopti hpaw Ui ' ca ' lah ' a hot ' se-un ' ku ' sum ' lah ' Ui ' na ', daecti A ' kuiing ' Cawo ' cus ' Ui ' lih na ' tuil ' Eun leukah ' Ui ' kaw lah ' keunhaw ' mae ' lah ' a yeuh sa ' nhaw ' na '. ⁵⁰ Yawng Ui ' leukah ' tuil ' Eun na ' meuh a hk'a ' a 'yu im ' cot ' cu na '. Kop awn ' na, ku ' lah ' Ui ' na ' ku ceu ka a meuh ku ' kah Eun Ui ' lah '."

Yesu ' hkuc ' Eun cung ce tapae ' na '

13 Yam kaw a hk'aws ' rot ri pawe vel nya na ', Yesu ' Eun yawng rot a yam kaw ri hk'akcak ' bhen ' keute ' aen ' a Eun na ' huk ' ri A ' kuiing ' Eun na ' hawc '. Kopti leumeus ' Eun peue ut ' pang bhen ' keute ' aen ' peue na ', maet ' maen ' Eun ku yeuh hk'a ' leumeus ' keus nyawk ' nyaec ' ri na ' pucti lih glih ' gleueng ' ri ce.

² Yam Yesu ' Eun mae ' tapae ' Eun na ' buih som ' pul ce na ', punta Yu ' das ' I ' sakariot ' kon ' eun Si ' mon na ' kaw eun fuin Yesu ' Eun na ', seuca ' rai na ' a yeuh eun kuitdoh ' ri ka hawc '. ³ Yesu ' yawng Eun A ' kuiing ' ap Eun ku ceu gawm ' euc ' na ' ut ' hk'a ' ruim ka ti ' ca ri na '. Eun ku yawng lih ri neum Peucawo ' Eun mae ' Eun buih keutah huk ' ri Peucawo ' Eun. ⁴ Kop awn ' na, Eun kuh ' hk'ai ' hpuin ' som ' ce na '. Eun hpuic ' hk'o dal ' ri na ', Eun mawt vaicing ' na ' ri nyawng ri na '. ⁵ Hawc ' ko ', Eun seue ' leuum ' na ' nang paen ' keuting na ', Eun hkuc ' cung ce tapae ' ri na ', Eun ot ' a ri vaicing ' mawt Eun ri nyawng ri na '.

⁶ Yam rot a ri Si ' mon Petru ' eun na ', eun lah ', "Cawo ', kaw Mi hkuc ' cung ui ' na ' aw?"

⁷ Yesu ' Eun top ' a, "Maet ' maen ', un ' nang ceng ' mi ri ku ' yeuh Ui ' na ', daecti hk'a ' nanggal ' ka na ', na ' mi tawl ' ceng ' ri ka."

⁸ Petru ' eun lah ', "Mak ' yeuh a, hpaw Mi ca ' kaw cang hkuc ' cung ui ' na '."

† I ' saya ' 53:1†† I ' saya ' 6:10

Yesu´ Eun lah´, “Ui´ lawn un´ hkuc´ cung mi na´ ko´, un´ kue´ mi hk'a´ to´ ri ri Ui´.”

⁹ Si´ mon Petru´ eun top´ a, “Cawo´, yeuh keutit´ ko´, a hkuin´ kaw meuh cung ui´ na´ palkoe, hkuc´ a gawm´ ti´ gawm´ cing´ ui´ na´ yeut reu´.”

¹⁰ Yesu´ Eun top´ a, “Peue huim´ ri hawc´ na´ kopti seunga´ eun gawm´ tu´ ri na´ hawc´, eun kaw lo´ ri hkuc´ yawo cung ri na´ palkoe. Pe´ ku seunga´ hawc´, a saec´ na´ un´ meuh pe´ ku peue ri.” ¹¹ A´nhaw´ kaw fuin Eun na´, kopti yawng Eun a, Eun lah´, “Pe´ hkuin´ seunga´ ku peue ri.”

¹² Yam hawc´ Eun hkuc´ ri cung ce na´, Eun tang cuip´ hk'o dal´ ri na´, Eun tang ing´ mok´ vang mok´ ri na´. Hawc´ ko´, Eun mhaing´ ce, “Leuceng pun pe´ ku´ yeuh Ui´ ri pe´ na´ aw? ¹³ Klawng pe´ Ui´ meuh ‘seura´’ mae´ ‘cawo´’. Kopti meuh Ui´ a na´, a ku cawp´ yeut.

¹⁴ Ui´ saec´ na´ meuh cawo´ pe´ seura´ pe´, daecti Ui´ hkuc´ cung pe´, pe ku na´ htuk´ ri hkuc´ cung puri yeut.

¹⁵ Yeuh Ui´ ri uin´ hk'a´ kaw pe´ hot´ ri yeuh seun´ ku´ yeuh Ui´ pun pe´ na´ hawc´. ¹⁶ Ui´ lah´ a ri pe´ neumneum, mhai´ na´ hpaw eun ca´ keuting hk'ai´ cawo´ ri na´ eun. Saec´ meuh peue cae na´ eun ku hkuin´ keuting hk'ai´ cawo´ cus´ ri heul´ na´ eun. ¹⁷ Yawng pe´ lawng aen´ ce hawc´, pe´ lawn hot´ ri yeuh a ko´, Peucawo´ Eun kaw nap mun´ ri pe´.

Yesu´ tamnai Eun lawng kaw peue fuin ri

¹⁸ Hpaw Ui´ ca´ lah´ pe´ ku peue ri. Yawng Ui´ peue leuk Ui´ ri ti na´ ce ku peue, daecti punta kaw a meuh hot´ seun´ ku´ htawm Seunga´ na´ tem´ a ri yeuhki´ na´, ‘Ku´ mok´ ri som´ mae´ Ui´ na´, eun kaw fuin Ui´.’†

¹⁹ Punta yam ceu nang aen´ na´ a keut´ ri meuh na´, pe´ kaw yum´ meuh Ui´ Hkrit Eun. Maet´ maen´, buih lah´ Ui´ pe´ mhawng´ nanggal´ ka ceu nang aen´ un´ nang keut´ meuh ka na´. ²⁰ Ui´ lah´ a ri pe´ neumneum, a´nhaw´ lawn rap ri ti peue cus´ Ui´ heul´ na´ eun ko´, eun ku rap ri ti Ui´ yeut. A´nhaw´ lawn rap ri ti Ui´ ko´, eun ku rap ri ti Cawo´ ku´ cus´ Ui´ lih na´ Eun yeut.”

²¹ Hawc´ Yesu´ lah´ Eun ceu nang aen´ ce na´, Eun kuit nyhap´ nang hpum´ ri. Eun lah´, “Ui´ lah´ a ri pe´ neumneum, hk'a´ nae pe´ ri ti peue kaw eun fuin Ui´.”

²² Tapae´ na´ ce sawng´ keue´ ri puri. Ce un´ yawng Yesu´ Eun ci´ na´ sum´ lah´ a´nhaw´ ri ce. ²³ Tapae´ ku´ Yesu´ leumeus´ Eun ti peue na´ eun buih mok´ ri som´ teul ri keunam Eun Yesu´ na´. ²⁴ Si´ mon Petru´ eun nguihnguih cing´ ri na´ ri tapae´ awn´ eun. Hawc´ ko´,

† Suk´seun´ 41:9

eun lah´ a ri heun, “Cheu mi mhaing´ ri nawk Eun, Eun ci´ sum´ lah´ a´nhaw´?”

²⁵ Hawc´ ko´, tapae´ awn´ eun teul ri de Yesu´ Eun. Eun mhaing´ Eun, “Cawo´, eun ci´ meuh a´nhaw´?”

²⁶ Yesu´ Eun top´ a, “Meuh a ku´ ti Ui´ hkawomun´ glawk´ aen´ a, Ui´ cup a nang leuum´ ku´ pawn´ na´ Ui´ tuil´ a ri heun na´ eun.” Hawc´ ko´, Eun ti hkawomun´ ti glawk´ na´ cup a nang leuum´ ku´ pawn´ na´ Eun tuil´ a ri Yu´ das´ kon´ eun Si´ mon I´ sakariot´ na´ eun. ²⁷ Yam Yu´ das´ ti eun hkawomun´ na´, Satan na´ a keulawn´ lec hk'a´ nae eun na´.

Yesu´ Eun lah´ a ri heun, “Mi ci´ kaw buih yeuh keunhaw´ na´, heul´ yeuh a vae reu´.” ²⁸ Daecti a ci´ na´ yeuh sa´nhaw´, Yesu´ Eun vae´ lah´ a yeuh keutit´ ri heun, peue mok´ ri som´ mae´ hpuin´ na´ ce hkuin´ leuceng pun a saec´ ti peue. ²⁹ Kopti Yu´ das´ meuh eun nang roksa´ huil´ paec na´, ngon´ ce hteum´ Yesu´ Eun na´ kah eun heul´ leuvaee ku´ lo´ hk'a´ nae pawe na´ ti ri ceu, a´ko´, kah eun heul´ tan ri peue hk'o´ tukyak na´ ce. ³⁰ Yam Yu´ das´ ti eun hkawomun´ ti glawk´ awn´ a na´, eun keulawn´ pucti heul´. Yam awn´ na, a meuh peunsum´.

Yesu´ tamnai Eun Petru´ kaw eun tecla ri

³¹ Hawc´ puc eun ri heul´ na´, Yesu´ Eun lah´, “Maet´ maen´, Kon´ ai´ peue na´ pun Eun munhpung´ ri hawc´. Peucawo´ Eun ku pun munhpung´ ri na´ kopti Kon´ ai´ peue na´ Eun. ³² Peucawo´ Eun lawn pun munhpung´ ri na´ kopti Kon´ ai´ peue na´ Eun ko´, Peucawo´ Eun ku kaw kah Kon´ ai´ peue na´ Eun pun munhpung´ ri na´ yeut. Eun kaw kah Kon´ ai´ peue na´ Eun keulawn´ pun munhpung´ ri na´.

³³ Kon´ Ui´ na´ pe´, hpaw Ui´ ca´ kaw pun ri ut´ mae´ pe´ ling´. Kaw pe´ hot´ ri sok Ui´, daecti seun´ tawn lah´ Ui´ a ri peue ceu Yu´ da na´ ce mae´ seun´ kaw Ui´ tang lah´ a ri pe´ maet´ maen´ na´, vang kaw Ui´ heul´ na´ pe´ hkuin´ kaw cang heul´ ri ka.

³⁴ Kaw Ui´ tuil´ leukah´ ritroe hk'u´ ri pe´, a meuh leumeus´ pu pe´ ti peue hawc´ ti peue reu´. Leumeus´ pu pe´ ti peue hawc´ ti peue seun´ leumeus´ Ui´ pe´ na´ reu´. ³⁵ Pe´ lawn leumeus´ puri ti peue hawc´ ti peue ko´, peue gawm´ euc´ na´ peue kaw yawng meuh pe´ tapae´ Ui´.”

³⁶ Si´ mon Petru´ eun mhaing´ Yesu´ Eun, “Cawo´, Mi ci´ kaw heul´ tawngnhaw´?”

Yesu´ Eun top´ a, “Vang kaw Ui´ heul´ na´, maet´ maen´, hpaw mi ca´ kaw nang cang heul´ ri ka. Daecti hk'a´ nanggal´ ka na´, kaw mi hot´ Ui´ heul´ yeut.”

³⁷Petru' eun mhaing', "Cawo', a ci' meuh kop keunhaw', ui' kaw un' nang cang hot' Mi heul' maet' - maen' ? Kaw ui' hkam' ri sum a' yu ri na' pun Mi."

³⁸Yesu' Eun top' a, "Kaw mi hkam' ri sum a' yu ri na' pun Ui' neum aw? Ui' lah' a ri mi neumneum, yam el' na' un' nang leuo' ka na', kaw mi lah' ri un' yawng Ui' hton loe' pok.

Yesu' tuil' Eun kaw' reng ce tapae' na'

14 Pawlaee va hpum' pe' na' kuit nyhap' kuit yak. Papuing Peucawo' Eun reu'. Papuing Ui' ri yeut reu'. ²Nang nya Eun Kuing' Ui' na' kue' a hkawng heun'. A lawn na' un' kue' ko', na' Ui' lah' a ri pe' hawc'. Buih huk' Ui' nung', Ui' huk' rangraen vang ut' pun pe'. ³Hawc' huk' rangraen Ui' vang ut' pun pe' na', Ui' kaw tang lih rap ri ti pe' huk' ut' mae' ti. Kop awn' na, Ui' lawn ut' tawngnhaw' ko', pe' ku na' pun ri ut' ri ka. ⁴Pe' ku yawng hk'a' ka vang kaw Ui' huk' na' yeut."

Yesu' meuh Eun hk'a' kaw huk' ri A' kuiing' Eun

⁵Hto' mas' eun lah', "Cawo', Mi ci' kaw huk' tawngnhaw' na', ye hkuin' yawng a. Ye ci' kaw cang yawng hk'a' awn' na yeuh sa' nhaw'?"

⁶Yesu' Eun top' a, "Meuh Ui' hk'a', hk'a' leupaws seumeu' mae' hk'a' a' yu im' na'. A' nhaw' lawn un' ing' ri Ui' ko', eun hkuin' kaw cang rot ri A' kuiing' Eun. ⁷Pe' lawn yawng Ui' neumneum ko', pe' ku na' yawng Kuing' Ui' Eun yeut. Tang' neum maet' maen' na' heul', kaw pe' yawng A' kuiing' Eun, pe' ku pun ri nyu Eun hawc'."

⁸Hpi' lip' eun lah', "Cawo', hk'o' Mi tuil' ye nyu A' kuiing' Eun. Yeuh keutit' na' a na' htonnuk nyawk' pun ye."

⁹Yesu' Eun top' a, "Hpi' lip', ut' Ui' mae' pe' ling' peunaw' hawc' na', un' nang yawng mi Ui' aw? Peue pun ri nyu Ui' na', eun ku pun ri nyu A' kuiing' Eun. A ci' meuh kop keunhaw', mi vae' lah', 'Tuil' ye nyu A' kuiing' Eun?' ¹⁰Ut' Ui' hk'a' nae' A' kuiing' Eun mae' A' kuiing' Eun ut' hk'a' nae' Ui' na', un' yum' pe' a aw? Leukah' lah' Ui' ri pe' na', hpaw a ca' meuh leukah' Ui' palkoe, daecti a ku meuh leukah' Eun A' kuiing' Cawo' ut' hk'a' nae' Ui' ku' buih yeuh kan' Eun na' Eun. ¹¹Yam lah' Ui' ut' Ui' hk'a' nae' A' kuiing' Eun mae' A' kuiing' Eun ku ut' hk'a' nae' Ui' na', yum' Ui' reu'. Un' meuh ko', yum' kan' ku' yeuh Ui' na' reu'. ¹²Ui' lah' a ri pe' neumneum, peue yum' Ui' na' eun kaw yeuh ku' buih yeuh Ui' na'. Saec' meuh

ku' keuting lheu' hk'ai' ceu nang aen' ce na', eun kaw yeuh a yeut, kopti buih huk' Ui' ri A' kuiing' Eun na'.

¹³Punta Kon' ai' na' kaw Eun tuil' munhpung' ri A' kuiing' Eun na', Ui' kaw yeuh ku' hk'o' pe' hk'a' - nae' muis Ui' na' ku ceu ka. ¹⁴Ku' hk'o' pe' ri Ui' hk'a' nae' muis Ui' na' ku ceu ka na', Ui' kaw yeuh a yeut.

Yesu' tuil' Eun kati kaw tuil' Cit' seunga'

¹⁵Pe' lawn leumeus' Ui' ko', pe' kaw leuceng ri ti leukah' tuil' Ui' na'. ¹⁶Ui' kaw hk'o' a ri A' kuiing' Eun. Eun kaw tuil' pe' is' Cawo' seubu kaw teum' kawm pe' ti peue. Eun kaw ut' mae' pe' cot' cu ri. ¹⁷Eun meuh Cit' seunga' ka hk'a' neumneum na'. Bhen' keute' na' a hkuin' rap ri ti Eun pun, kopti bhen' keute' na' un' nyu un' yawng ka Eun na'. Pe' ri, pe' yawng Eun, kopti ut' Eun mae' pe'. Eun ku kaw ut' hk'a' nae' pe' yeut. ¹⁸Ui' hkuin' kaw tecla pe' meuh kon' due'. Ui' kaw tang lih ri pe'. ¹⁹Un' ling' ko', bhen' keute' na' a hkuin' kaw laee pun ri nyu Ui'. Daecti pe' kaw pun ri nyu Ui', kopti a' yu im' Ui' na', pe' ku kaw a' yu im' yeut. ²⁰Seunyi awn' na, pe' kaw yawng ut' Ui' hk'a' nae' A' kuiing' Eun, pe' ut' hk'a' - nae' Ui' mae' Ui' ut' hk'a' nae' pe' na'. ²¹A' nhaw' lawn rap ri ti a mae' leuceng ri ti leukah' tuil' Ui' na' ko', meuh eun peue leumeus' Ui'. Kuing' Ui' Eun kaw leumeus' peue leumeus' Ui' na' eun. Ui' ku kaw leumeus' eun. Ui' kaw tuil' eun nyu tu' Ui' na'."

²²Hawc' ko', Yu' das' (ku' un' meuh Yu' das' I' sakariot') na' eun lah', "Cawo', a ci' meuh kop keunhaw', Mi vae' sum' tuil' ye nyu tu' ri na', daecti Mi un' tuil' bhen' keute' na' ce nyu a?"

²³Yesu' Eun top' a, "A' nhaw' lawn leumeus' Ui' ko', eun kaw leuceng ri ti leukah' sangsawn' Ui' na'. Kuing' Ui' Eun kaw leumeus' eun. Kuing' Ui' Eun mae' Ui' ri, Ya kaw ing' ri heun, ut' mae' heun. ²⁴A' nhaw' lawn un' leumeus' Ui' ko', eun kaw un' leuceng ri ti leukah' sangsawn' Ui' na'. Leukah' pun pe' ri mhawng' aen' hpaw a ca' meuh leukah' Ui' meun, daecti a meuh leukah' Eun A' kuiing' Cawo' cus' Ui' lih na' Eun.

²⁵Ceu nang aen' ce gawm' euc' lah' Ui' a ri pe' hawc' yam kawn' ut' Ui' mae' pe' na'. ²⁶Daecti Cit' seunga' chak' ku' teum' kawm ku' A' kuiing' cus' Eun lih hk'a' nae' muis Ui' na' Eun kaw guil pe' ri ceu nang aen' ce. Eun kaw yeuh pe' kuit rot ri ku' tawn lah' Ui' ri pe' na' ce ku ceu ka. ²⁷Ui' tuil' hk'a' kuit nyawk' kuit sam' ran cumyen' na' ri pe'. Hk'a' kuit nyawk' kuit sam' ran cumyen' tuil' Ui' na', a hkuin' seun' ku' tu-

il' ka bhen' keute' na'. Pawlaee kah hpum' pe' na' kuit nyhap', pawlaee lhat'.

²⁸ Pun pe' ri mhawng' lah' Ui', 'Buih hk'akcak' Ui' pe', mae' buih keutah ing' Ui' ri pe'.' Pe' lawn leumeus' Ui' ko', pe' kaw ren' kawn mae' buih huk' Ui' ri A'kuiing' Eun, kopti A'kuiing' keuting Eun hk'ai' Ui' na'. ²⁹ Punta yam ceu nang aen' keut' kue' a neumneum na' pe' kaw yum' a na', Ui' lah' a ri pe' maet' - maen' nanggal' yam ceu nang aen' un' nang keut' kue' ka na'. ³⁰ Tang' neum maet' maen' na' heul', Ui' hkuin' kaw laee chae' leukah' mae' pe', kopti cawo' u' peung ka bhen' keute' aen' kaw eun buih ing' na'. Eun hkuin' kue' ti' ca hk'a' pang Ui'. ³¹ Daecti punta bhen' keute' na' kaw a rin ri yawng leumeus' Ui' A'kuiing' Eun na', Ui' hot' ri yeuh ku' A'kuiing' kah Eun Ui' yeuh na' meulamlam ri ku ceu na'.

Kuh', heul' pawh.

Yesu' meuh Eun nhul' pli' bui

15 Meuh Ui' nhul' pli' bui neumneum na'. Kuiing' Ui' Eun meuh Cawo' rokso' a. ² Eun taws' ri tec kak' Ui' un' pli' na' ce. Daecti kak' pli' na' punta kaw a gawm pli' heun' na', Eun cip' ri tec kak' aet' hpam' ka na' ce. ³ Pe' seunga' ri kopti leukah' lah' Ui' ri pe' na' hawc'. ⁴ Ut' hk'a' naee Ui' reu'. Ui' ku kaw ut' hk'a' naee pe'. Seun' kak' un' to' ri ri nhul' ri na' un' cang pli' meun ka na', pe' lawn un' ut' hk'a' naee Ui' ko', pe' ku kaw un' cang pli' meun yeut.

⁵ Meuh Ui' nhul' pli' bui, pe' meuh kak' ka na'. A'nhaw' lawn ut' hk'a' naee Ui' mae' Ui' ku ut' hk'a' - naee heun ko', eun kaw pli' heun' heun'. Kopti pe' lawn hk'akcak' Ui' ko', pe' hkuin' kaw cang yeuh keunhaw' na' pun. ⁶ A'nhaw' lawn un' ut' hk'a' naee Ui' ko', seun' eun kak' hkam' hk'a' nyon peue ri tec ri fit' hk'oh' na' ko'. Kak' awn' ce kaw pun ri hkam' hk'a' hk'on' ro ri nyon ri ha' hk'ue ri ngawl na'. ⁷ Pe' lawn ut' hk'a' naee Ui' mae' leukah' Ui' na' a ku ut' hk'a' naee pe' ko', hk'o' ku' sum' is' pe' na' reu', kaw pe' pun a.

⁸ Yam pli' pe' heun' heun' na', tuil' a munhpung' ri Kuiing' Ui' Eun, pe' ku yeuh meun meuh ri tapae' Ui' na' pucti lih.

⁹ A'kuiing' Eun lawn leumeus' Ui' yeuh sa' nhaw' ko', Ui' ku leumeus' pe' yeuhko' yeut. Ut' hk'a' naee hk'a' leumeus' keus Ui' na' reu'. ¹⁰ Pe' lawn leuceng ri ti leukah' tuil' Ui' na' ko', pe' ku na' ut' hk'a' naee hk'a' leumeus' keus Ui' na' seun' leuceng Ui' ri ti leukah' tuil' Eun A'kuiing' na' mae' ut' Ui' hk'a' - naee hk'a' leumeus' keus Eun na'. ¹¹ Lah' Ui' a ri pe'

yeuhki' na' a meuh punta hk'a' ren' kawn Ui' na' kaw a ut' hk'a' naee pe', mae' punta hk'a' ren' kawn pe' na' kaw a htonnuk na'. ¹² Leukah' tuil' Ui' na' meuh a leumeus' pu pe' ti peue hawc' ti peue seun' leumeus' Ui' pe' na' ko'. ¹³ A'nhaw' hkuin' kue' hk'a' leumeus' keus keuting hk'ai' hk'a' leumeus' keus aen' a saec' ti peue, a meuh peue ti ri peue eun hkam' ri sum a'yu ri meun pun a' mawo ri na' ce. ¹⁴ Pe' lawn hot' ri yeuh leukah' tuil' Ui' ri pe' na' ko', pe' ku na' meuh a' mawo Ui'. ¹⁵ Ui' hkuin' kaw laee suip ri lah' pe' meuh mhai' bae, kopti mhai' na' eun hkuin' yawng ku' yeuh eun cawo' ri na'. Daecti kaw Ui' lah' pe' meuh a' mawo, kopti ku' pun Ui' ri mhawng' neum A'kuiing' Eun ku ceu na', Ui' yeuh pe' yawng a hawc'. ¹⁶ Hpaw pe' ca' leuk ri ti Ui', daecti leuk Ui' ri ti pe' mae' kah pe' heul' yeuh ri pli', a meuh pli' keutawn' seupit. Hawc' ko', ku' hk'o' pe' ku ceu hk'a' naee muis Ui' na', A'kuiing' Eun kaw tuil' a ri pe'. ¹⁷ Aen' a meuh leukah' tuil' Ui' na', a meuh leumeus' pu pe' ti peue hawc' ti peue reu'.

Bhen' keute' ces ri tapae' na' ce

¹⁸ Bhen' keute' na' a lawn ces ri pe' ko', yeuh ri pawn a, ces a ri Ui' nanggal'. ¹⁹ Pe' lawn meuh is' ka bhen' keute' na' ko', bhen' keute' na' a kaw leumeus' pe' kopti meuh pe' is' ka na'. Daecti ut' mok' pe' na', pe' hkuin' meuh is' ka bhen' keute' na' kopti leuk Ui' ri ti pe' lih hk'ai' bhen' keute' na' hawc'. Kop awn' na, bhen' keute' na' a nyu pe' pereng ri. ²⁰ Kuit rot ri leukah' tawn lah' Ui' ri pe' na', 'Mhai' na' hpaw eun ca' keuting hk'ai' cawo' ri na' eun.'† Peue bhen' keute' na' ce lawn keunhap' Ui' ko', ce ku na' keunhap' pe' yeut. Ce lawn leuceng leukah' sangsawn' Ui' na' ko', ce ku na' leuceng leukah' sangsawn' pe' na' yeut.

²¹ Kopti meuh a muis Ui' na', ce kaw yeuhki' ri pe'. Kopti un' yawng ce Cawo' ku' cus' Ui' lih na' Eun. ²² Ui' lawn un' lih lah' ce mhawng' a ko', ce hkuin' kaw kue' ku' kleuc' ri map' na'. Daecti maet' maen' ce hkuin' laee kue' ku' kaw ploh' pleh' ri ri map' ri na'. ²³ Peue ces ri Ui' na' ce ku ces ri Kuiing' Ui' Eun yeut. ²⁴ Ui' yeuh kan' ku' peue seubu na' un' duing yeuh peue na' hk'a' naee ce ri. Ui' lawn un' yeuh ceu nang aen' a ko', ce hkuin' kaw kue' ku' kleuc' ri map' na'. Daecti maet' maen' pun ce ri nyu ku' hk'o' am' aen' ce hawc', daecti ce kawn' ces ri Ui' mae' Kuiing' Ui' Eun.

²⁵ Daecti aen' ce a meuh punta kaw a meuh neumneum hot' seun' ku' tem' ri hk'a' naee htawm leukah' ritroe

† Yo'han 13:16

ce na '. A lah ', 'Ce ces ri Ui ' ri ku ' un ' kue ' tu ' hkeul ' na ' . †

Kan ' Cit ' seunga ' chak '

²⁶Ui ' kaw cus ' Cawo ' teum ' kawm lih neum A ' kui- ing ' Eun na ' ri pe '. Eun meuh Cit ' seunga ' chak ' ka hk'a ' neumneum ku ' lih neum A ' kuiing ' Eun na '. Yam na ' Eun lih rot hawc ' na ', Eun kaw hkam ' sa ' hki ' lawng Ui ' na '. ²⁷Kopti ut ' pe ' mae ' Ui ' tang ' neum yamla a ri na ', pe ' ku na ' kah ri hkam ' sa ' hki ' pun Ui ' yeut.

16 Punta kaw pe ' un ' tecla hk'a ' yum ' na ', Ui ' lah ' lawng aen ' ce gawm ' euc ' ri pe '. ²Ce kaw ra ri tec pe ' hk'ai ' sa ' la vang hk'o ' mun ' na '. Neumneum ka na ' ko ', ti seunyi ka, ku ' toh pe ' na ' kaw ce hteum ' ri buih yeuh kan ' Eun Peucawo ' na '. ³Yeuh ce keutit ' na ' meuh a kopti un ' yawng ce A ' kuiing ' Eun mae ' Ui ' ri na '. ⁴Lah ' Ui ' lawng aen ' a ri pe ' na ' meuh a kopti yam awn ' na ' a rot yam ka na ', pe ' kaw kuit rot ri tawn tuil ' Ui ' sati pe ' hawc ' na '. Ui ' hkuin ' lah ' pe ' mhawng ' lawng awn ' a yam cawo ka na ' meuh a kopti kaw n ' ut ' Ui ' mae ' pe ' yam awn ' a na ' .

⁵Maet ' maen ', kaw Ui ' ing ' ri Cawo ' cus ' Ui ' lih na ' Eun. Daecti, 'Cawo ', Mi ci ' kaw buih heul ' tawng- haw ' ? ' na ', pe ' hkuin ' kue ' nang mhaing ' Ui ' saec ' ti peue. ⁶Kopti tawn lah ' Ui ' lawng aen ' a ri pe ' hawc ' na ', pe ' kue ' hk'a ' kuit nyhap ' kuit yak na ' htonnuk hk'a ' nae ri. ⁷Daecti kaw Ui ' lah ' ku ' neumneum na ' ri pe ', hk'akcak ' Ui ' pe ' na ' a meuh punta ku ' chak ' pun pe '. Ui ' lawn un ' hk'akcak ' pe ' ko ', Cawo ' teum ' kawm na ' Eun hkuin ' kaw lih ri pe '. Daecti Ui ' lawn hk'akcak ' pe ' ko ', Ui ' kaw cus ' Eun lih ri pe '. ⁸Yam Cawo ' na ' lih rot Eun na ', Eun kaw yeuh bhen ' keute ' na ' yawng ku ' kleuc ' ri na ', yawng hk'a ' leupaws seumeu ' na ' mae ' yawng hk'a ' taws ' a ' mu na '. ⁹Yeuh ce yawng ku ' kleuc ' ri na ', meuh a kopti un ' yum ' ce Ui ' na '. ¹⁰Yeuh ce yawng hk'a ' leupaws seumeu ' na ', meuh a kopti buih ing ' Ui ' ri A ' kuiing ' Eun vang kaw pe ' un ' lae cang nyu Ui ' bae na '. ¹¹Yeuh ce yawng hk'a ' taws ' a ' mu na ', meuh a kopti hkun ' cawo ' u ' peung bhen ' keute ' aen ' pun eun ri hkam ' hk'a ' taws ' a ' mu na ' hawc ' .

¹²Kawn ' kue ' Ui ' ku ' kaw lah ' ri pe ' heun ', a kawn ' lheu ' hk'ai ' ku ' kaw pe ' cang rap ri ti maet ' maen ' na '. ¹³Daecti yam Cit ' seunga ' ka hk'a ' neumneum na ' lih rot Eun na ', Eun kaw va pe ' ing ' lec hk'a ' nae hk'a ' neumneum gawm ' euc ' na '. Eun hkuin ' yeng ri lah ' meun a, daecti Eun kaw lah ' yawo pal ku ' pun Eun ri

mhawng ' na ' mae ' ku ' kaw keut ' kue ' na '. ¹⁴Eun kaw ti ri tuil ' munhpung ' ri Ui ' ri ti Eun ku ' meuh is ' Ui ' na ' Eun tuh ' pe ' nyu a na '. ¹⁵Ku ' meuh is ' Eun A ' kuiing ' na ' ku ceu ka, a ku meuh is ' Ui '. Kop awn ' na, Ui ' lah ', Cit ' seunga ' na ' Eun ti ku ' meuh is ' Ui ' na ' Eun tuh ' pe ' nyu a.

Hk'a ' kuit nyhap ' na ' keut ' a ri meuh hk'a ' ren ' kaw n

¹⁶Un ' ling ', pe ' hkuin ' kaw lae pun ri nyu Ui '. Hawc ' ka na ' un ' ling ', pe ' kaw tang pun ri nyu Ui ' ."

¹⁷Tapae ' Eun na ' ngon ' ce lah ' a ri puri, "Eun ci ' na ' sum ' lah ' keunhaw ', Eun lah ', 'Un ' ling ', pe ' hkuin ' kaw lae pun ri nyu Ui '. Hawc ' ka na ' un ' ling ', pe ' kaw tang pun ri nyu Ui ' . Eun ku lah ', 'kopti buih ing ' Ui ' ri A ' kuiing ' Eun na ' ?'" ¹⁸Ce suip ri mhaing ' puri, "Eun ci ' na ' sum ' lah ' keunhaw ', Eun lah ', 'un ' ling ' '. E ' hkuin ' leuceng pun ku ' lah ' Eun na ' ."

¹⁹Kopti Yesu ' yawng Eun sum ' mhaing ' ce ri ri lawng aen ' a na ', Eun lah ' a ri ce, "Mhaing ' pe ' puri ri vang- doh ' ka ku ' lah ' Ui ', 'Un ' ling ', pe ' hkuin ' kaw lae pun ri nyu Ui '. Hawc ' ka na ' un ' ling ', pe ' kaw tang pun ri nyu Ui ' , na ', un ' meuh ka aw?" ²⁰Ui ' lah ' a ri pe ' neumneum, kaw pe ' pun ri ta ' ul ' ri yam, yam bhen ' keute ' na ' kaw n ' buih ren ' kaw n ka na '. Pe ' kaw pun ri kuit nyhap ' kuit yak, daecti hk'a ' kuit nyhap ' kuit yak pe ' na ' a kaw keut ' ri meuh hk'a ' ren ' kaw n. ²¹Beun ' kaw buih keut ' kon ' na ' pun eun ri sui ' nyawk ' kopti rot a yam ka hawc ' na '. Daecti yam kon ' na ' keut ' eun lih hawc ' na ', ka pil hk'a ' sui ' ka na ' kopti ren ' ka mae ' kon ' ti peue na ' keut ' eun pang bhen ' keute ' na '. ²²Pe ' ku seun ' awn ' a yeut. Yam maet ' maen ' na ' meuh a yam kuit nyhap ' kuit yak pe ', daecti Ui ' kaw tang lih ri pe ' bae. Pe ' kaw ren ' kaw n. A ' nhaw ' hkuin ' kaw cang ti hk'a ' ren ' kaw n pe ' na ' hk'ai ' pe '. ²³Seunyi awn ' na, pe ' hkuin ' kaw lae mhaing ' Ui ' ri keunhaw ' bae. Ui ' lah ' a ri pe ' neumneum, ku ' hk'o ' pe ' hk'a ' - nae muis Ui ' na ', A ' kuiing ' Eun kaw tuil ' a ri pe '. ²⁴Rot maet ' maen ', pe ' hkuin ' nang duing hk'o ' ku ' ti ri ceu hk'a ' nae muis Ui ' na ' saec ' ti ceu. Hk'o ' reu ', kaw pe ' pun. Hk'a ' ren ' kaw n pe ' na ' kaw a htonnuk.

²⁵Ui ' saec ' lo ' leukah ' leupong ' na ' lah ' a ri pe ', daecti un ' ling ', Ui ' hkuin ' kaw lae lo ' a bae. Kaw Ui ' lah ' lawng Eun Kuiing ' Ui ' na ' seumeu ' ri pe '. ²⁶Seun- yi awn ' na, pe ' kaw hk'o ' ri A ' kuiing ' Eun hk'a ' nae muis Ui ' na '. Ui ' hkuin ' lah ' ri kaw hk'o ' pun pe ' na ' ri A ' kuiing ' Eun. ²⁷Saec ' A ' kuiing ' Eun ku leumeus ' pe ' kopti leumeus ' pe ' Ui ' na ' mae ' pe ' yum ' lih Ui ' neum A ' kuiing ' Eun na '. ²⁸Lih Ui ' neum A ' kuiing ' Eun, Ui ' lih pang bhen ' keute ' na '. Maet ' maen ', Ui '

† Suk ' seun ' 35:19; 69:4

kaw tang buih heul ' hk'ai ' bhen ' keute ' na ' Ui ' ing ' ri A ' kuiing ' Eun.

²⁹Hawc ' ko ' , tapae ' Eun Yesu ' na ' ce lah ' , "Maet ' - maen ' , lah ' seumeu ' Mi a , Mi un ' lo ' leukah ' leupong ' na ' .³⁰Maet ' maen ' , yawng ye yawng Mi ku ceu na ' . Mi hkuin ' laee lo ' nang kaw ing ' mhaing ' ri . Ceu nang aen ' ce a yeuh ye yum ' lih Mi neum Peucawo ' Eun."

³¹Yesu ' Eun lah ' , "Vang tisut ' ka na ' , pe ' ku na ' yum ' yeut .³²Daecti yam awn ' buih ing ' ka , a ing ' rot hawc ' . A meuh yam kaw pe ' sawng ' hk'akcak ' puri ing ' ti nya ri . Pe kaw tec a vang Ui ' ri koe . Daecti Ui ' hkuin ' kaw ut ' koe kopti A ' kuiing ' ut ' Eun mae ' Ui ' na ' .

³³Punta kaw pe ' kue ' hk'a ' kuit nyawk ' kuit sam ' ran cumyen ' hk'a ' naee Ui ' na ' , Ui ' lah ' lawng aen ' ce ri pe ' . Pe ' kaw kue ' hk'a ' kuit nyhap ' kuit yak hk'a ' pang bhen ' keute ' aen ' na . Daecti , hpum ' sam ' ran reu ' . Pe Ui ' bhen ' keute ' na ' hawc ' ."

Yesu ' hk'o ' Eun mun ' pun tu ' ri

17 Hawc ' Yesu ' lah ' Eun ceu nang aen ' ce na ' , Eun mung ' mao ' na ' Eun hk'o ' mun ' ,

"A ' kuiing ' , rot a yam ka hawc ' . Punta Kon ' ai ' kaw Eun tuil ' munhpung ' ri Mi na ' , kah Kon ' ai ' Mi na ' Eun pun munhpung ' ri reu ' .²Kopti tuil ' Mi Kon ' ai ' Eun kue ' ti ' ca hk'a ' pang peue gawm ' euc ' na ' a meuh punta Kon ' ai ' kaw Eun tuil ' cit ' tip a ' yu tip cot ' cu na ' ri peue tuil ' Mi ri Heun na ' ce .³Aen ' meuh a cit ' tip a ' yu tip cot ' cu . A meuh yawng ce taengtaeng Peucawo ' ti peue na ' Eun , mae ' yawng ce Yesu ' Hkrit ku ' cus ' Mi lih na ' Eun .⁴Ui ' pun ri tuil ' munhpung ' ri Mi pang bhen ' keute ' na ' ri yeuh Ui ' kan ' tuil ' Mi ri Ui ' na ' htonnuk gawm ' euc ' ka na ' .⁵A ' kuiing ' , maet ' maen ' , kah Mi pun munhpung ' ri nanggal ' Mi na ' reu ' . A meuh munhpung ' kue ' Ui ' mae ' Mi tang ' neum yam bhen ' keute ' na ' un ' nang hpanpleng ' a ri na ' .

Yesu ' hk'o ' Eun mun ' pun tapae ' ri na ' ce

⁶Tuh ' yeuh Ui ' peue tuil ' Mi ri Ui ' neum bhen ' keute ' aen ' ce yawng muis Mi na ' hawc ' . Ce meuh is ' Mi . Mi tuil ' ce ri Ui ' . Ce leuceng ri ti leukah ' Mi na ' .⁷Maet ' maen ' , yawng ce ku ' tuil ' Mi ri Ui ' na ' gawm ' euc ' ka lih a neum Mi ri hawc ' .⁸Kopti tuil ' Ui ' leukah ' tuil ' Mi ri Ui ' na ' ri ce hawc ' na ' . Ce ku leuceng ri ti a . Lih Ui ' neum Mi ri na ' , ce yawng a neumneum . Ce ku yum ' cus ' Mi Ui ' lih na ' .⁹Kopti meuh ce is ' Mi na ' , Ui ' hk'o ' mun ' pun ce . Hpaw Ui ' ca ' buih hk'o ' mun ' pun bhen ' keute ' na ' , daecti hk'o ' Ui '

mun ' pun peue tuil ' Mi ri Ui ' na ' ce .¹⁰Ku ' kue ' Ui ' ku ceu na ' meuh a is ' Mi . Ku ' kue ' Mi ku ceu na ' a ku meuh is ' Ui ' . Ui ' pun munhpung ' ri neum ce ri .¹¹Ui ' hkuin ' kaw laee suip ri ut ' pang bhen ' keute ' na ' bae , daecti ce kaw n ' kaw ut ' pang bhen ' keute ' na ' . Buih ing ' Ui ' ri Mi . A ' kuiing ' seunga ' chak ' , punta kaw ce meuh yawo ti muk seun ' A ' ri meuh A ' ti peue yawo na ' , hk'o ' Mi kang ' rukum rokxa ' ce ri ti ' ca ka muis Mi na ' reu ' . A meuh muis ku ' tuil ' Mi ri Ui ' na ' .¹²Yam ut ' Ui ' mae ' ce na ' , Ui ' kang ' rukum rokxa ' ce mae ' yeuh ce sa ' pa sam ' ran ri muis tuil ' Mi ri Ui ' na ' . Ce hkuin ' kue ' nang lulaic heul ' saec ' ti peue , a lawn un ' meuh yawo ku ' kaw htuk ' ri lulaic heul ' punta kaw a meuh neumneum hot ' seun ' ku ' lah ' ka hk'a ' naee htawm Seunga ' na ' eun na ' .

¹³Maet ' maen ' , buih ing ' Ui ' ri Mi . Daecti punta hk'a ' ren ' kaw n Ui ' na ' kaw a htonnuk hk'a ' naee ce na ' , Ui ' lah ' ceu nang aen ' ce yam buih ut ' Ui ' pang bhen ' keute ' na ' .¹⁴Ap Ui ' leukah ' Mi na ' ri ce hawc ' . Kopti un ' meuh ce is ' ka bhen ' keute ' na ' seun ' Ui ' ri un ' meuh Ui ' is ' ka na ' ko ' , bhen ' keute ' na ' a ces ri ce .¹⁵Hpaw Ui ' ca ' hk'o ' mun ' kah Mi ti ce heul ' hk'ai ' bhen ' keute ' na ' , daecti hk'o ' Ui ' Mi kang ' rukum ce hk'ai ' seuca ' rai na ' .¹⁶Ce hkuin ' meuh is ' ka bhen ' keute ' na ' seun ' Ui ' ri un ' meuh Ui ' is ' ka na ' ko ' .¹⁷Hk'o ' Mi yeuh ce seunga ' chak ' ri hk'a ' neumneum na ' reu ' . Leukah ' Mi na ' meuh a ku ' neumneum .¹⁸Ui ' cus ' ce heul ' pang bhen ' keute ' na ' seun ' cus ' Mi Ui ' lih ri ka na ' ko ' .¹⁹Punta kaw ce pun ri saic ' ri seunga ' chak ' ri hk'a ' neumneum na ' , kopti meuh a ce ri , Ui ' saic ' ri seunga ' chak ' meun .

Yesu ' hk'o ' Eun mun ' pun peue yum ' na ' ce

²⁰Hpaw Ui ' ca ' hk'o ' mun ' pun peue aen ' ce koe , daecti Ui ' hk'o ' mun ' pun peue kaw ing ' yum ' Ui ' ri leukah ' ce na ' yeut .²¹Ui ' hk'o ' mun ' punta gawm ' euc ' ce kaw ce meuh yawo ti peue na ' . A ' kuiing ' , punta bhen ' keute ' na ' kaw a yum ' cus ' Mi Ui ' lih na ' , seun ' ut ' Mi hk'a ' naee Ui ' mae ' Ui ' ut ' hk'a ' naee Mi yeuh sa ' nhaw ' na ' ko ' , kah ce ut ' hk'a ' - naee Mi mae ' hk'a ' naee Ui ' seun ' awn ' a yeut reu ' .²²Punta gawm ' euc ' ce kaw ce meuh yawo ti peue seun ' Mi ri mae ' Ui ' ri meuh A ' ti peue yawo na ' ko ' , munhpung ' tuil ' Mi ri Ui ' na ' Ui ' tuil ' a ri ce hawc ' .²³Ui ' ut ' hk'a ' naee ce mae ' Mi ku ut ' hk'a ' naee Ui ' . Punta bhen ' keute ' na ' kaw a yawng cus ' Mi Ui ' lih na ' mae ' Mi ku leumeus ' ce seun ' leumeus ' Mi Ui ' na ' ko ' , kah ce pawng ' pa ' puri htonnuk meuh yawo ti peue reu ' .

† A ' ko ' "Maet ' maen ' , yum ' pe ' hawc ' aw?"

²⁴A 'kuiing', Ui ' sum ' kah peue tuil ' Mi ri Ui ' na ' ce ut ' mae ' ti vang ut ' Ui ' na ' mae ' sum ' kah ce nyu munhpung ' Ui ' ku ' tuil ' Mi ri Ui ' na ' kopti leumeus ' Mi Ui ' tang ' neum nanggal ' ka yam un ' nang hpanpleng ' Mi bhen ' keute ' na '.

²⁵A 'kuiing' Cawo ' leupaws seumeu ', bhen ' keute ' na ' a saec ' na ' un ' yawng Mi, daecti Ui ' yawng Mi. Yawng ce cus ' Mi Ui ' lih. ²⁶Punta hk'a ' leumeus ' keus tuil ' Mi ri Ui ' na ' kaw a ut ' mae ' ce na ' mae ' punta Ui ' ku kaw ut ' mae ' ce na ', Ui ' yeuh ce yawng Mi. Ui ' kaw yeuh peue suip ri gawm yawng Mi heul ' .

Mheut ' Yesu ' Eun

18 Hawc ' Yesu ' hk'o ' Eun mun ' na ', Eun pucti tang klong ' Hkidron na ' heul ' mae ' tapae ' ri na ' ce. Ce heul ' lec val hku ' sanlon na '.

²Yu ' das ' ku ' fuin Eun na ' eun ku yawng val awn ' na kopti Yesu ' ren ' Eun ri heul ' hk'eup ' tapae ' ri na ' ce mawn ' na '. ³Kop awn ' na, Yu ' das ' eun va muk peue suik ' mae ' peue yeuh kan ' ce ro ' peue jhawp ' rit mae ' peue Hparisae ' na ' ce heul ' nang val awn ' na. Ce pin ' bin ' ngawl, kaw ' ngawl mae ' hk'eung an ' nya na ' heul ' .

⁴Yesu ' Eun yawng ku ' kaw buih meuh ri ti na ' ku ceu ka. Kop awn ' na, Eun pucti mhaing ' ce, "Pe ' ci ' heul ' sok a ' nhaw ' ?"

⁵Ce top ' a, "Sok ye Yesu ' peue veng Nasaraet ' na ' Eun."

Yesu ' Eun lah ' , "Meuh Ui ' Heun ri hawc ' ." (Yu ' das ' ku ' fuin Eun na ' eun ku cawng mae ' ce.) ⁶Yam Yesu ' lah ' Eun, "Meuh Ui ' Heun ri hawc ' " na ' , ce hton ' ri ing ' hk'a ' kui ' ri ce cung ' kus pang keute ' na ' .

⁷Yesu ' Eun tang mhaing ' ce bae, "Pe ' ci ' heul ' sok a ' nhaw ' ?"

Ce lah ' , "Sok ye Yesu ' peue veng Nasaraet ' na ' Eun."

⁸Yesu ' Eun lah ' , "Lah ' Ui ' a ri pe ' hawc ' , meuh Ui ' Heun ri. Pe ' lawn hot ' ri sok Ui ' ko ' , pe ' na ' tae ' peue aen ' ce." ⁹Aen ' a meuh punta kaw a meuh neumneum hot ' seun ' ku ' tawn lah ' Eun na ' , "Peue tuil ' Mi ri Ui ' na ' ce hkuin ' kaw pun ri lulaic heul ' saec ' ti peue." †

¹⁰Hawc ' ko ' , Si ' mon Petru ' eun htut ' leungawng ri bhat ' mhai ' eun peue jhawp ' rit keuting na ' eun. A bhat ' yhuk ' a ' tawm ' eun na ' deut. Mhai ' awn ' eun muis Malhkas ' .

¹¹Yesu ' Eun tuil ' leukah ' ri Petru ' eun, "Ri ' leungawng mi na ' reu ' . Kaw Ui ' un ' nyui kaw ' A ' kuiing ' tuil ' Eun ri Ui ' na ' aw?"

Va Yesu ' Eun heul ' ri Anas ' eun

¹²Hawc ' ko ' , muk peue suik ' , po ' suik ' keuting mae ' peue yeuh kan ' ce peue Yu ' da na ' ce mheut ' ri mawt Yesu ' Eun. ¹³Ce va Eun heul ' ri Anas ' eun nanggal ' .

Anas ' eun meuh a ' pu ' eun Kayafas ' . Kayafas ' na ' eun meuh peue jhawp ' rit keuting hk'a ' naee neum awn ' a.

¹⁴Kayafas ' eun meuh ku ' tawn tuil ' kamkuit ri ro ' ce peue Yu ' da na ' . Eun lah ' , "Kah peue ti peue koe na ' eun yeum tang ' peue ceu ri na ' ko ' , a jaen chak ' nyawk ' ."

Petru ' tecla eun Yesu ' Eun pok nanggal '

¹⁵Si ' mon Petru ' eun mae ' tapae ' seubu na ' ka hot ' Yesu ' Eun heul ' . Kopti tapae ' awn ' yawng eun peue jhawp ' rit keuting na ' eun, eun hot ' Yesu ' Eun ing ' rot nang kang ' hkung ' ka nya eun peue jhawp ' rit keuting na ' . ¹⁶Daecti Petru ' eun pun ri ko ' hk'a ' nok ka leuva ' ru na ' . Tapae ' ku ' yawng peue jhawp ' rit keuting na ' eun pucti heul ' hk'a ' nok. Eun heul ' leukah ' mae ' beun ' yeuh kan ' nang leuva ' ru na ' eun. Hawc ' ko ' , eun va Petru ' eun ing ' lec hk'a ' naee na ' .

¹⁷Beun ' ko ' leuva ' na ' eun mhaing ' Petru ' eun, "Mi ku meuh tapae ' Eun ti peue, un ' meuh ka aw?"

Eun top ' a, "Uih ' , ca ' meuh ui ' ."

¹⁸Yam awn ' a kawt ' nyawk ' . Punta kaw ce seueul ' na ' , mhai ' na ' ce mae ' peue yeuh kan ' na ' ce ti keusaws ' , ce puing ' ngawl. Ce cawng ri cuil ngawl na ' rop. Petru ' eun ku cawng ri cuil a mae ' ce.

Peue jhawp ' rit keuting na ' mhaing ' eun Yesu ' Eun

¹⁹Yam awn ' na, peue jhawp ' rit keuting na ' eun mhaing ' Yesu ' Eun ri lawng ce tapae ' Eun na ' mae ' lawng ka leukah ' sangsawn ' Eun na ' .

²⁰Yesu ' Eun top ' a, "Sangsawn ' Ui ' bhen ' keute ' na ' glih ' gleueng ' hawc ' . Ui ' sangsawn ' hk'a ' naee sa ' la vang hk'o ' mun ' na ' , a ' ko ' hk'a ' naee nya hk'o ' mun ' keuting na ' laleung. Mawn ' na ' a meuh vang peue Yu ' da na ' ing ' hk'om ce puri. Ui ' hkuin ' duing mo ' ri lah ' a saec ' ti ceu. ²¹A ci ' meuh kop keunhaw ' , mi vae ' mhaing ' Ui ' ? Heul ' mhaing ' peue pun ri leuceng a ri Ui ' na ' ce reu ' . Ui ' ci ' lah ' keunhaw ' na ' ce yawng a."

²²Yam Yesu ' lah ' Eun a yeuh keutit ' na ' , peue yeuh kan ' ku ' cawng keunam Eun na ' eun dah buh Eun Yesu ' na ' . Eun lah ' , "Top ' Mi leukah ' peue jhawp ' rit keuting yeuhko ' aw?"

²³Yesu ' Eun lah ' , "Ui ' lawn lah ' ku ' kleuc ' ti ri ceu ko ' , seuji sa ' hki ' kleuc ' ka na ' reu ' . Daecti Ui ' lawn lah ' ku ' neumneum ko ' , a ci ' meuh kop keunhaw ' mi

† Yo 'han 6:39; 17:12

vae ' dah Ui ' ?" ²⁴ Hawc ' ko ' , Anas ' eun kah ce va Yesu ' Eun heul ' gawm ' mu ' ri na ' ri peue jhawp ' rit keuting Kayafas ' eun.

Petru ' tecla eun Yesu ' Eun bae

²⁵ Yam Si ' mon Petru ' cawng eun ri cuil ngawl na ' , peue ti peue na ' eun mhaing ' eun, "Mi ku meuh tapae ' Eun ti peue yeut, un ' meuh ka aw?"

Petru ' eun htu ' hting ' lah ' , "Uih ' , ca ' meuh ui ' ."

²⁶ Mhai ' ku ' seubu eun peue jhawp ' rit keuting ku ' meuh ec ' awng ' eun ku ' Petru ' bhat ' eun yhuk ' eun deut na ' eun htawhkam a lah ' , "Nyu ui ' ut ' mi mae ' Heun nang val hku ' sanlon na ' , un ' meuh ka aw?"

²⁷ Petru ' eun tang htu ' hting ' eun. Yam awn ' na, el ' na ' a keulawn ' leuo ' .

Cawo ' Pi ' lat mhaing ' eun Yesu '

²⁸ Hawc ' awn ' na, ce va Yesu ' Eun pucti heul ' hk'ai ' nya eun Kayafas ' na ' , ce va Eun heul ' ri haw ' eun cawo ' veng ku ' meuh peue Ro ' ma na ' eun. Yam awn ' a meuh peunngup cawo. Punta kaw ce un ' cang pit ku ' hk'aw ' jeuk hot ' leukah ' ritroe na ' kopti tu ' ce na ' sawng ' sum ' lec ce ri hk'a ' hk'a ' naee pawe vel nya na ' , ce hkuin ' ing ' lec nang haw ' na ' . ²⁹ Kop awn ' na, cawo ' Pi ' lat eun pucti lih mhaing ' ce, "Pe ' ci ' kue ' ku ' tang ' a ' mu keunhaw ' ri hkawn ' Eun?"

³⁰ Ce top ' a, "Hkaen ' Eun lawn un ' yeuh ku ' rai ko ' , hpaw ye ca ' kaw va ri ing ' ap Eun ri mi."

³¹ Cawo ' Pi ' lat eun lah ' , "Va pu pe ' va ri heul ' taws ' a ' mu ri Heun hot ' ritroe pe ' na ' meun reu ' ."

Peue Yu ' da na ' ce htu ' hting ' lah ' , "Daecti hot ' ritroe kuing ' na ' ko ' , hpaw ye ca ' kaw cang toh a ' nhaw ' saec ' ti peue." ³² Ceu nang aen ' keut ' kue ' ka na ' a meuh punta kaw a meuh neum seun ' ku ' Yesu ' tawn lah ' Eun ri ci ' kaw yeum yeuh sa ' nhaw ' na ' .

³³ Cawo ' Pi ' lat eun ing ' lec nang haw ' ri na ' . Hawc ' ko ' , eun tuil ' leukah ' kah ce va Yesu ' Eun ing ' ri ti. Eun mhaing ' Yesu ' Eun, "Meuh Mi hkun ' haw ' hkam ' ce peue Yu ' da na ' aw?"

³⁴ Yesu ' Eun mhaing ' eun, "Awn ' meuh a kamkuit mi meun aw, a ' ko ' lah ' peue mi mhawng ' lawng Ui ' na ' aw?"

³⁵ Cawo ' Pi ' lat eun top ' a, "Meuh ui ' peue Yu ' da aw? Peue ceu Mi na ' ce mae ' peue jhawp ' rit keuting na ' ap ce Mi ri ui ' . Mi ci ' eo ' yeuh ku ' kleuc ' keunhaw ' ?"

³⁶ Yesu ' Eun lah ' , "Kuing ' Ui ' na ' hpaw a ca ' meuh is ' ka bhen ' keute ' aen ' na. Kuing ' Ui ' na ' a lawn meuh is ' ka bhen ' keute ' aen ' na ko ' , punta peue Yu ' -

da na ' kaw ce un ' cang mheut ' ri ti Ui ' na ' , peue Ui ' na ' ce na ' peueing ' ham ' tap ce. Daecti kuing ' Ui ' na ' ing ' a neum tawk seubu."

³⁷ Cawo ' Pi ' lat eun lah ' , "Yeuh keutit ' ko ' , na ' Mi meuh Hkun ' haw ' hkam ' ?"

Yesu ' Eun top ' a, "Lah ' mi Ui ' meuh Hkun ' haw ' hkam ' na ' cawp ' ka. Neumneum ka na ' ko ' , kopti meuh a ceu nang aen ' a na ' , Ui ' lih keut ' . Punta kaw Ui ' hkam ' sa ' hki ' lawng hk'a ' neumneum na ' , Ui ' lih pang bhen ' keute ' aen ' na. Peue ut ' hk'a ' ka hk'a ' neumneum na ' ce ku peue leuceng ce Ui ' ."

³⁸ Cawo ' Pi ' lat eun mhaing ' , "Hk'a ' neumneum na ' a ci ' meuh keunhaw ' ?" Hawc ' mhaing ' eun yeuh keutit ' na ' , eun tang pucti lih ri peue Yu ' da na ' ce. Eun lah ' a ri ce, "A lawn seun ' ku ' nyu ui ' na ' ko ' , hpaw ui ' ca ' nyu ku ' kleuc ' Eun hkawn ' a. ³⁹ Daecti hot ' leukah ' ritroe pe ' na ' ko ' , a tang ' ri uin ' kah ui ' ploec ' peue htawng ' ti ri peue na ' eun ri pe ' hk'a ' naee yam yeuh pawe vel nya na ' . Lak ' kaw pe ' sum ' kah ui ' ploec ' "

Hkun ' haw ' hkam ' ce peue Yu ' da aen ' Eun ri pe ' aw?"

⁴⁰ Ce ta ' ul ' ri lah ' , "Un ' meuh, ca ' meuh a hkawn ' Eun. Ploe ' Barabas ' eun ri ye." Barabas ' na ' eun meuh peue fuin kuing ' .

Taws ' a ' mu kaw tawk ' Yesu ' Eun pang kleum ' rawng ' tawp '

19 Hawc ' awn ' na, cawo ' Pi ' lat eun kah peue suik ' ri na ' ce ta ' faet ' Yesu ' Eun. ² Peue suik ' na ' ce taing ' nhul ' kat ' na ' seun ' cui ' maw hk'il ' na ' ce chuip ' a ri cing ' Eun na ' . Hawc ' ko ' , ce tuil ' Eun cuip ' hk'o dal ' yawtmong na ' . ³ Ce ing ' lah ' a ri Heun ti pok hawc ' ti pok, "Hkun ' haw ' hkam ' ce peue Yu ' da, kah Mi mun ' keuting reu ' ." Hawc ' ko ' , ce dah buh Eun na ' .

⁴ Cawo ' Pi ' lat eun tang pucti lih bae ti pok. Eun lah ' a ri peue Yu ' da na ' ce, "Keue ' reu ' , kaw ui ' va ri lih tuil ' Eun ri pe ' . Pe ' kaw pun ri yawng un ' nyu ui ' ku ' kleuc ' hk'a ' naee Heun saec ' ti ceu hot ' seun ' ku ' tang ' pe ' a ' mu ri Heun na ' ."⁵ Yesu ' Eun cuip ' cui ' maw kat ' , cuip ' hk'o dal ' yawtmong na ' pucti lih. Cawo ' Pi ' lat eun lah ' a ri ce, "Ut ' Eun maen ' hawc ' ."

⁶ Yam ro ' peue jhawp ' rit na ' mae ' peue yeuh kan ' na ' keulawn ' pun ce ri nyu Yesu ' Eun na ' , ce ta ' ul ' lah ' , "Tawk ' Eun pang kleum ' rawng ' tawp ' na ' reu ' . Tawk ' Eun pang kleum ' rawng ' tawp ' na ' reu ' ."

Daecti cawo ' Pi ' lat eun top ' a, "Ti pe ' heul ' tawk ' meun Eun pang kleum ' rawng ' tawp ' na ' reu ' . Hpaw ui ' ca ' nyu ku ' kleuc ' keunhaw ' hk'a ' naee Heun."

⁷Peue Yu 'da na ' ce lah ' , "Kue ' ye leukah ' ritroe. Hot ' leukah ' ritroe na ' ko ' , kaw Eun pun ri yeum. Kopti lah ' meun Eun ri meuh Kon ' ai ' Eun Peucawo ' na ' ."

⁸Yam cawo ' Pi ' lat pun eun ri mhawng ' leukah ' awn ' a na ' , eun jaen gawm lhat ' nyawk ' . ⁹Eun tang ing ' lec nang haw ' na ' , eun mhaing ' Yesu ' Eun, "Mi ci ' lih neum tawngnhaw ' ?" Daecti Yesu ' Eun hkuin ' top ' ke-unhaw ' ri heun. ¹⁰Cawo ' Pi ' lat eun tang lah ' , "Kaw Mi un ' leukah ' mae ' ui ' aw? Kue ' ui ' ti ' ca kaw ploe ' Mi, a ' ko ' kaw tawk ' Mi yeum pang kleum ' rawng ' tawp ' na ' , un ' yawng Mi a aw?"

¹¹Yesu ' Eun top ' a, "Ti ' ca pang lhung ' na ' a lawn un ' lih ko ' , hpaw mi ca ' kue ' ti ' ca hk'a ' pang Ui ' . Kop awn ' na, peue ti ri ap Ui ' ri mi na ' , jaen kue ' ce ku ' kleuc ' heun ' ."

¹²Tang ' neum yam awn ' na, cawo ' Pi ' lat eun sok hk'a ' kaw ri ploe ' Yesu ' Eun. Daecti peue Yu ' da na ' ce hkuin ' yut ' ta ' ul ' ri lah ' , "Mi lawn ploe ' peue aen ' Eun ko ' , mi hkuin ' kaw meuh a ' mawo eun cawo ' Kae ' sa. A ' nhaw ' lawn lah ' meun ri meuh hkun ' haw ' hkam ' ko ' , meuh eun ransu eun hkun ' haw ' hkam ' Kae ' sa."

¹³Yam cawo ' Pi ' lat pun eun ri mhawng ' leukah ' awn ' a na ' , eun va Yesu ' Eun pucti lih. Hawc ' ko ' , eun mok ' pang ten taws ' a ' mu vang klawng peue muis Kang ' hkung ' Seumu na ' (leukah ' Arame ' ka na ' a lah ' Gabahta '). ¹⁴Seunyi awn ' a meuh seunyi rangraen pawe vel nya na ' . A meuh hk'ao ri yam peunnyi keuting na ' .

Cawo ' Pi ' lat eun lah ' a ri peue Yu ' da na ' ce, "Hkaen ' meuh Eun hkun ' haw ' hkam ' pe ' ."

¹⁵Daecti ce ta ' ul ' ri lah ' , "Va Eun heul ' . Va Eun heul ' . Tawk ' Eun pang kleum ' rawng ' tawp ' na ' reu ' ."

Cawo ' Pi ' lat eun mhaing ' ce, "Kaw pe ' kah ui ' tawk ' hkun ' haw ' hkam ' pe ' na ' Eun pang kleum ' rawng ' tawp ' na ' aw?"

Ro ' peue jhawp ' rit keuting na ' ce top ' a, "Lheu ' si ' hkun ' haw ' hkam ' Kae ' sa eun ko ' , hpaw ye ca ' kue ' hkun ' haw ' hkam ' ."

¹⁶Vang tisut ' ka na ' , cawo ' Pi ' lat eun ap ce tawk ' Yesu ' Eun pang kleum ' rawng ' tawp ' na ' .

Tawk ' Yesu ' Eun pang kleum ' rawng ' tawp '

¹⁷Kop awn ' na, peue suik ' na ' ce va Yesu ' Eun pucti heul ' . Eun klawm ' kleum ' rawng ' tawp ' ri na ' heul ' vang muis Doh Cing ' na ' (leukah ' Arame ' ka na ' a lah ' Kolakohta '). ¹⁸Teh ' na ' , ce tawk ' Eun pang kleum ' rawng ' tawp ' mae ' peue lal ' peue na ' ka, ka tawk ' ri hk'a ' mawn ' hk'a ' maen ' Eun na ' . Yesu ' Eun ut ' nang ngon ' ka na ' .

¹⁹Cawo ' Pi ' lat eun kah ce tem ' tu ' na ' ri pen ' na ' ce tawk ' a ri pang kleum ' rawng ' tawp ' na ' . A tem ' ri lah ' , "Yesu ' peue veng Nasaraet ' , Hkun ' haw ' hkam ' ce peue Yu ' da." ²⁰Kopti vang tawk ' ce Yesu ' Eun pang kleum ' rawng ' tawp ' na ' de a veng na ' mae ' kopti tu ' tem ' ri awn ' a tem ' leukah ' Arame ' , Latin mae ' Helasa ' na ' , peue Yu ' da heun ' peue na ' ce pun ri lip tu ' tem ' ri awn ' na. ²¹Ro ' peue jhawp ' rit ce peue Yu ' da na ' ce tawk lah ' a ri cawo ' Pi ' lat eun, "Pawlae tem ' a lah ' , 'Hkun ' haw ' hkam ' ce peue Yu ' da.' Tem ' a lah ' , 'Hkawn ' lah ' meun Eun ri meuh Hkun ' haw ' hkam ' ce peue Yu ' da.'"

²²Cawo ' Pi ' lat eun top ' a, "Tu ' tem ' ui ' hawc ' na ' , tae ' a reu ' ."

²³Yam peue suik ' na ' hawc ' ce tawk ' ri Yesu ' Eun pang kleum ' rawng ' tawp ' na ' , ce gvah hk'o Eun na ' meuh pun ' glawk ' . Ce ti a heul ' peue ti glawk ' . Ce ku ti hk'o hk'a ' naee Eun na ' yeut. Hk'o awn ' a hkuin ' kue ' seuang ' cing ri, a taing ' ri meuh hpen ' na ' ti glawk ' tang ' neum ngok ka na ' rot ti cung ka na ' .

²⁴Ce lah ' a ri puri, "Pawlae res a, a ' nhaw ' ci ' kaw pun a, e ' cop puri ri ka pawh."

Aen ' a meuh punta kaw a meuh neum seun ' ku ' tem ' ri hk'a ' naee htawm Seunga ' na ' . A lah ' , "Ce ti ri heul ' gvah hk'o Ui ' na ' ."

Hawc ' ko ' , ce ti ri cop puri ri hk'o Ui ' na ' .[†] Aen ' a meuh ku ' yeuh ce peue suik ' na ' .

²⁵Peue cawng keunam kleum ' rawng ' tawp ' Eun Yesu ' na ' a meuh ma Eun Yesu ' ka, awng ' beun ' ka na ' eun, Mari ' beun ' eun Klopas ' na ' eun mae ' Mari ' peue Magadala ' na ' eun. ²⁶Yam Yesu ' nyu Eun ma ri ka mae ' tapae ' leumeus ' ri na ' cawng ka keunam ri na ' , Eun lah ' a ri ma ri ka, "Ma leumeus ' Ui ' , hkawn ' meuh a kon ' me pa ' na ' eun." ²⁷Hawc ' ko ' , Eun lah ' a ri tapae ' ri na ' eun, "Hkawn ' meuh a ma mi ka." Tang ' neum yam awn ' na, tapae ' awn ' eun rap ri ti ma Eun Yesu ' ka ing ' ut ' ti nya ri na ' .

Yesu ' yeum Eun

²⁸Hawc ' ko ' , yam Yesu ' yawng Eun ku ceu na ' hton-nuk ka hawc ' euc ' na ' mae ' punta kaw a meuh neum-neum hot ' seun ' htawm Seunga ' na ' , Eun lah ' , "Sum ' nyui Ui ' leuum ' ."²⁹Mawn ' na ' a kue ' awm ' seue ' leuum ' pli ' bui na na ' ti meul ' . Ce ti ri cup nya tuetai na ' nang leuum ' pli ' bui na na ' , ce pak ' a ri duing ' ka maeew ' na ' , ce cus ' a tuih hoeng ' Eun na ' . ³⁰Hawc ' Yesu ' pun Eun ri nyui leuum ' na ' , Eun lah ' , "Yeuh Ui ' "

[†] Suk ' seun ' 22:18

kan ' na ' euc ' hawc ' .” Hawc ' ko ' , Eun gaw ' cing ' ri na ' , Eun hpum ' deut .

³¹Seunyi awn ' a meuh seunyi rangraen pawe na ' . Peunsa ' ka na ' a kaw meuh seunyi Sin ' keuting . Kopti peue Yu ' da na ' un ' sum ' uin ' ce tu ' peue yeum pang kleum ' rawng ' tawp ' hk'a ' naee seunyi Sin ' na ' , punta kaw ce peum ' cung ce ku ' tawk ' ri na ' beuk ' na ' , ce na ' ti tu ' ce na ' lih hk'ai ' kleum ' rawng ' tawp ' na ' , ce heul ' hk'o ' a ri cawo ' Pi ' lat eun . ³²Kop awn ' na , ku ' pun ri tawk ' ri pang kleum ' rawng ' tawp ' mae ' Yesu ' Eun nanggal ' ti peue na ' peue suik ' na ' ce heul ' peum ' cung eun na ' beuk ' . Hawc ' ko ' , ce ku peum ' cung eun ku ' seubu ti peue na ' beuk ' . ³³Daecti yam rot ce ri Yesu ' Eun na ' , kopti pun ce ri nyu yeum Eun hawc ' na ' , ce hkuin ' laee peum ' cung Eun na ' . ³⁴Daecti peue suik ' ti peue na ' eun sawt ' seuang ' hk'uk ' Eun Yesu ' na ' ri bles na ' . Nham ' na ' mae ' leuum ' na ' a keulawn ' pucti lih . ³⁵Peue pun ri nyu ceu nang awn ' a na ' ce meuh sa ' hki ' ka . Leukah ' hkam ' sa ' hki ' ce na ' a meuh ku ' neumneum . Ce yawng ku ' lah ' ri na ' meuh a ku ' neumneum . Hkam ' ce sa ' hki ' na ' a meuh punta pe ' ku kaw yum ' a na ' yeut . ³⁶Ceu nang aen ' keut ' kue ' ka na ' a meuh punta kaw a meuh neumneum hot ' seun ' htawm Seunga ' na ' lah ' , “Seuang ' Eun na ' a hkuin ' kaw pun ri beuk ' saec ' keuhti .” ³⁷Nang htawm Seunga ' tawk seubu na ' a lah ' , “Kaw ce cu ri nawk peue sawt ' ce na ' Eun .” ††

Puing ' Yesu ' Eun

³⁸Hawc ' awn ' na , Yo ' saep peue veng Ari ' mahtia na ' eun heul ' hk'o ' ri ti tu ' Eun Yesu ' na ' ri cawo ' Pi ' lat eun . Yo ' saep meuh eun tapae ' Eun Yesu ' , daecti kopti lhat ' eun ri peue Yu ' da na ' ce , eun un ' va peue yawng meuh ri tapae ' Eun Yesu ' na ' . Hawc ' cawo ' Pi ' lat tuil ' eun ahkvang ka na ' , Yo ' saep eun heul ' ti tu ' Eun Yesu ' na ' lih . ³⁹Ni ' hko ' demas ' ku ' tawn ing ' ri Yesu ' Eun peunsum ' nanggal ' aen ' a na ' eun ku ing ' mawn ' yeut . Eun pin ' ku ' hom ' na ' ing ' hk'ao ri leuae ' kul ' pun ' ki ' lo ' na ' . Ku ' hom ' aen ' a meuh Mu ' ra hkawo ' ri mae ' hku ' hom ' na ' . ⁴⁰Yo ' saep eun mae ' Ni ' hko ' demas ' ka ti tu ' Eun Yesu ' na ' lih . Hawc ' ko ' , ka bawl ' tu ' Eun na ' ri hpen ' linin seue ' ku ' hom ' na ' hot ' seun ' ritroe puing ' peue yeum ce peue ceu Yu ' da na ' ko ' . ⁴¹Vang tawk ' ce Yesu ' Eun na ' a kue ' val ti bhen ' . Nang val awn ' a kue ' keutui ' leuang ' vang puing ' peue yeum ti keutui ' . A meuh keutui ' kawn ' hk'u ' , a ' nhaw ' hkuin ' nang duing puing ' ri hk'a ' naee ka . ⁴²Kopti seunyi awn ' meuh a seunyi rangraen ce peue ceu

Yu ' da na ' , mae ' kopti keutui ' na ' caw a ri ut ' keunam mawn ' na ' , ka uin ' tu ' Eun Yesu ' na ' ri ka .

Yesu ' tang kuh ' im ' eun

20 Peunngup cawo ka seunyi nanggal ' ka vung yam un ' nang ceng ' ka na ' , Mari ' peue veng Magadala ' eun kuh ' heul ' nang keutui ' leuang ' meuh leumuic na ' . Eun pun ri nyu seumu dho ' ka keutui ' leumuic na ' sat a ri hk'ai ' keutui ' leumuic na ' hawc ' . ²Kop awn ' na , eun hk'uih ing ' lah ' a ri Si ' mon Petru ' eun mae ' tapae ' seubu ku ' Yesu ' leumeus ' Eun na ' ka , “Ti ce Peucawo ' Eun heul ' hk'ai ' keutui ' leuang ' na ' hawc ' . Ui ' hkuin ' yawng na ' ce ti Eun heul ' hk'a ' nhawc ' .” ³Kop awn ' na , Petru ' eun mae ' tapae ' seubu na ' ka pucti heul ' ri keutui ' leuang ' na ' . ⁴Ka hk'uih heul ' , daecti kopti tapae ' awn ' hk'uih vae eun hk'ai ' Petru ' eun na ' , eun heul ' rot ti keutui ' leuang ' na ' nanggal ' . ⁵Na ' eun gaw ' ri nom ' keutui ' na ' , eun pun ri nyu hpen ' linin na ' uin ' a ri . Daecti eun hkuin ' ing ' lec hk'a ' naee keutui ' na ' . ⁶Hawc ' ko ' , Si ' mon Petru ' ku ' heul ' hot ' na ' eun hk'uih seumeu ' heul ' lec hk'a ' naee ka keutui ' leuang ' na ' . Eun pun ri nyu hpen ' linin na ' uin ' a ri . ⁷Hpen ' bawl ' cing ' Eun Yesu ' na ' a un ' laee ut ' mae ' hpen ' seubu na ' . A top ri uin ' ri tawk seubu na ' . ⁸Rot vang tisut ' ka na ' , tapae ' rot ti keutui ' leuang ' nanggal ' na ' eun ku ing ' lec hk'a ' naee ka na ' . Eun pun ri nyu a , eun yum ' a . ⁹(Ka hkuin ' nang leuceng pun htawm Seunga ' na ' lah ' ka Yesu ' kaw Eun kah ri tang kuh ' im ' na ' .) ¹⁰Hawc ' ko ' , tapae ' awn ' ka tang sawng ' ing ' ti nya ri .

Yesu ' tuil ' Eun Mari ' peue Magadala ' eun nyu tu ' ri

¹¹Mari ' eun cawng ri yam hk'a ' nok ka keutui ' leuang ' na ' . Yam kawn ' buih yam eun na ' , eun gaw ' ri nom ' hk'a ' naee ka keutui ' leuang ' na ' . ¹²Eun pun ri nyu in ' h-pom cuip ' hk'eung paing lal ' peue na ' mok ' ka ri vang tawn uin ' peue tu ' Eun Yesu ' na ' . Ku ' ti peue na ' eun mok ' hk'a ' cing ' Eun na ' , ku ' ti peue na ' eun mok ' hk'a ' cung Eun na ' .

¹³In ' hpom na ' ka mhaing ' Mari ' eun , “Beun ' , mi ci ' yam kop keunhaw ' ?”

Mari ' eun top ' a , “Ti ce Peucawo ' Ui ' na ' Eun heul ' hawc ' . Ui ' hkuin ' yawng na ' ce heul ' uin ' Eun tawngnhawc ' .” ¹⁴Hawc ' ko ' , Mari ' eun tang hpawt ' ri keue ' . Eun pun ri nyu Yesu ' cawng Eun mawn ' . Daecti eun hkuin ' yawng meuh a Yesu ' Eun .

¹⁵Yesu ' Eun lah ' , “Beun ' , mi ci ' yam kop keunhaw ' ? Mi ci ' buih sok a ' nhawc ' ?”

† Pucti heul ' 12:46; Nang hk'i 9:12; Suk ' seun ' 34:20 †† Yahkari ' 12:10

Mari ' eun hteum ' Eun meuh nang roksa ' val. Kop awn ' na eun lah ' a ri Heun, "A ' ta ' , Mi lawn ti Eun heul ' ko ' , Mi ci ' uin ' Eun tawngnhaw ' , mi na ' lah ' ui ' mhawng ' a. Kaw ui ' heul ' ti Eun ing ' ."

¹⁶ Yesu ' Eun lah ' a ri heun, "Mari ' ."

Mari ' eun hpawt ' ti keue ' ri Heun. Eun lah ' leukah ' Arame ' , "Raboni" (Vangdoh ' ka na ' a lah ' , seura ').

¹⁷ Yesu ' Eun lah ' , "Pawlaee yat Ui ' kopti un ' nang ing ' Ui ' ri A ' kuiing ' Eun. Heul ' lah ' a ri ec ' awng ' Ui ' na ' ce, ' Buih kaw Ui ' ing ' ri A ' kuiing ' Ui ' A ' kuiing ' pe ' , Peucawo ' Ui ' Peucawo ' pe ' na ' Eun. "

¹⁸ Kop awn ' na, Mari ' peue Magadala ' na ' eun heul ' lah ' lawng aen ' a ri tapae ' na ' ce, "Pun ui ' ri nyu Yesu ' Eun hawc ' . " Eun ku ris ce mhawng ' ku ' Yesu ' lah ' Eun ri ti na ' ce.

Yesu ' tuil ' Eun tapae ' na ' ce nyu tu ' ri

¹⁹ Peunpul ka seunyi Sin ' na ' , yam tapae ' na ' cu ce ri tiduih ' na ' , ce sot leuva ' na ' kopti lhat ' ce ri ro ' ce peue Yu ' da na ' . Yesu ' Eun ing ' lec ri cawng nang ngon ' ce na ' . Eun lah ' , "Kah hk'a ' kuit nyawk ' kuit sam ' ran cumyen ' na ' kue ' ri pe ' reu ' . " ²⁰ Hawc ' lah ' Eun a yeuh keutit ' na ' , Eun tuil ' ce nawk dak ti ' ri na ' mae ' hk'a ' seuang ' hk'uk ' ri na ' . Yam tapae ' na ' pun ce ri nyu Yesu ' Eun hawc ' na ' , ce ren ' kawn nyawk ' .

²¹ Yesu ' Eun tang lah ' a bae, "Kah hk'a ' kuit nyawk ' kuit sam ' ran cumyen ' na ' kue ' ri pe ' reu ' . A ' kuiing ' Eun ci ' cus ' Ui ' lih yeuh sa ' nhaw ' na ' , Ui ' ku kaw cus ' pe ' heul ' yeuhko ' yeut. " ²² Hawc ' lah ' Eun a yeuh keutit ' na ' , Eun ghuih ' hpum ' ri hk'a ' pang ce. Eun lah ' , "Rap ri ti Cit ' seunga ' chak ' na ' reu ' . ²³ Pe ' lawn plo ' map ' a ' nhaw ' ko ' , hkawn ' eun kaw pun hk'a ' plo ' map ' na ' . Pe ' lawn un ' plo ' map ' eun ko ' , eun hkuin ' kaw pun hk'a ' plo ' map ' na ' . "

Yesu ' tuil ' Eun Hto ' mas ' eun nyu tu ' ri

²⁴ Hto ' mas ' (ku ' klawng peue meuh kon ' seuklap ') ku ' meuh tapae ' ti peue hk'a ' naee tapae ' kul ' leual ' peue na ' , eun caw ri un ' ut ' mae ' ce yam Yesu ' ing ' Eun ri ce na ' . ²⁵ Kop awn ' na, tapae ' seubu na ' ce lah ' a ri Hto ' mas ' eun, "Pun ye ri nyu Yesu ' Eun hawc ' . "

Daecti Hto ' mas ' eun lah ' a ri ce, "Ui ' lawn un ' nang pun ri nyu roe vang tawk ' peue cai ' ri dak ti ' Eun na ' mae ' un ' nang pun ri cuk ' keutui ' ka cai ' na ' ri geun ' ti ' ri na ' mae ' un ' nang pun ri cuk ' hk'a ' seuang ' hk'uk ' Eun na ' ko ' , ui ' hkuin ' kaw nang yum ' a. "

²⁶ Hawc ' ka na ' ti sin ' , tapae ' Eun na ' ce ut ' tiduih ' nang nya awn ' na bae. Hto ' mas ' eun ku ut ' mae ' ce.

Leuva ' na ' ce a saec ' sawng ' ri sot ri ko ' , daecti Yesu ' Eun ing ' lec ri cawng nang ngon ' ce na ' . Eun lah ' , "Kah hk'a ' kuit nyawk ' kuit sam ' ran cumyen ' na ' kue ' ri pe ' reu ' . " ²⁷ Hawc ' ko ' , Eun lah ' a ri Hto ' mas ' eun, "Nyat ' geun ' ti ' mi na ' maen ' , keue ' ri dak ti ' Ui ' na ' , ti ti ' mi na ' cuk ' ri nawk hk'a ' seuang ' hk'uk ' Ui ' na ' reu ' . Pawlaee kangkae, yum ' reu ' . "

²⁸ Hto ' mas ' eun lah ' , "Cawo ' Ui ' , Peucawo ' Ui ' . "

²⁹ Hawc ' ko ' , Yesu ' Eun lah ' a ri heun, "Kopti pun mi ri nyu Ui ' na ' , mi yum ' . Kah hk'a ' ren ' kawn na ' kue ' ri peue saec ' un ' pun ri nyu, daecti ce yum ' na ' ce. "

³⁰ Yesu ' yeuh Eun het ' keuting ku ' seubu na ' heun ' ceu nanggal ' ce tapae ' ri na ' . Ceu nang awn ' ce a hkuin ' laee pun ri tem ' ri nang htawm aen ' na. ³¹ Daecti lawng aen ' pun a ri tem ' ri uin ' ri na ' a meuh punta kaw pe ' yum ' Yesu ' meuh Eun Hkrit, Eun meuh Kon ' ai ' Eun Peucawo ' na ' . Kopti meuh a hk'a ' yum ' na ' , pe ' kaw pun a ' yu hk'a ' naee muis Eun na ' . "

Am ' ri pun ri ka ' heun '

21 Hawc ' awn ' na, Yesu ' Eun tang tuil ' tapae ' na ' ce nyu tu ' ri na ' bae nang glu Tiberias ' (a ' ko ' , glu Galilae ') na ' . Lawng ka na ' a kue ' yeuhki ' . ² Si ' mon Petru ' , Hto ' mas ' (ku ' klawng peue meuh kon ' seuklap '), Nahtanela ' peue yung ' Kana ' kuing ' Galilae ' , kon ' me lal ' peue eun Yebedae ' mae ' tapae ' seubu lal ' peue na ' ce ut ' tiduih ' . ³ Si ' mon Petru ' eun lah ' a ri ce, "Kaw ui ' heul ' sok ka ' . " Ce lah ' , "Ye ku kaw heul ' yeut. " Kop awn ' na, ce heul ' lec nang reu na ' . Gawm ' sum ' , ce hkuin ' pun keunhaw ' .

⁴ Yam ceng ' ka na ' , Yesu ' Eun cawng keunam ka ba leuum ' na ' . Daecti tapae ' na ' ce hkuin ' yawng meuh a Yesu ' Eun.

⁵ Yesu ' Eun ta ' ul ' ri mhaing ' ce, "A ' mawo, un ' pun pe ' ka ' aw? "

Ce top ' a, "Uih ' , ca ' pun ye. "

⁶ Eun lah ' a ri ce, "Ploe ' reup pe ' na ' hk'a ' a ' tawm ' ka reu na ' reu ' , kaw pe ' pun ka ' . " Na ' ce plo ' reup na ' , ce pun ka ' heun ' , a hk'o ' ce ol ' un ' laee pe reup na ' .

⁷ Hawc ' ko ' , tapae ' ku ' Yesu ' leumeus ' Eun na ' eun lah ' a ri Petru ' eun, "Meuh a Yesu ' Eun. " Yam Si ' mon Petru ' keulawn ' pun eun ri mhawng ' meuh a Yesu ' Eun na ' , eun seumaic ri cuip ' hk'o dal ' ri na ' (kopti hpuic ' eun ri uin ' hk'o ri na '). Hawc ' ko ' , eun yawt ' ti lec nang leuum ' na ' . ⁸ Tapae ' seubu na ' ce mok ' nang reu ri na ' , ce va a hot ' ce ing ' rot mae ' reup nuknhen ' meuh ka ' na ' . Kopti un ' seungai ce tak sai na ' , a na ' gup meuh yawo hk'ao ri hpawn ' kul ' tawp ' na ' . ⁹ Yam huk ' ce nang

tak sai na', ce pun ri nyu keusaws' puing' ri meuh ngawl na' ngat' a ka' hk'a' pang ngawl na'. A ku kue' hka-womun' yeut.

¹⁰Yesu' Eun lah' a ri ce, "Ti ka' kawn' pun pe' na' ing' maen' ngon'."

¹¹Si' mon Petru' eun huk' nang reu na', eun ol' reup na' huk' nang tak sai na'. A kue' ka' keuting nuk reup na', mhin' ri pun a kue' tipak' hpawn' kul' leuo' tu'. Saec' pun ka' peunaw' peunheun' ko', reup na' a hkuin' res. ¹²Yesu' Eun lah' a ri ce, "Ing' som' ngup tiduih' pawh." Kopti tapae' na' yawng ce meuh a Yesu' Eun na', a hkuin' kue' nang hat' ri mhaing' Eun saec' ti peue, "Mi ci' meuh a' nhaw'?" ¹³Yesu' Eun ing' ti ri tuil' hkawomun' na' ri ce. Eun ku ti ri tuil' ka' na' yeut. ¹⁴Aen' a meuh Yesu' tuil' Eun tapae' na' ce nyu tu' ri loe' pok ti pok hawc' tang kuh' im' Eun hk'ai' vang yeum ri na'.

Yesu' kah Eun Petru' eun tang yeuh kan' mhai' na' bae

¹⁵Hawc' ce sak' som' ri na', Yesu' Eun lah' a ri Si' mon Petru' eun, "Si' mon kon' Yo' han, lak' leumeus' mi Ui' lheu' hk'ai' ceu nang aen' ce neumneum aw?"

Eun top' a, "Meuh, yawng Mi leumeus' ui' Mi yeut." Yesu' Eun lah', "Uii' kon' yung' aet' Ui' na' ce reu'."

¹⁶Yesu' Eun tang lah' a ri heun bae, "Si' mon kon' Yo' han, lak' leumeus' mi Ui' neumneum aw?"

Eun top' a, "Meuh, yawng Mi leumeus' ui' Mi yeut." Yesu' Eun lah', "Roksa' kon' yung' Ui' na' ce reu'."

¹⁷Yesu' Eun tang lah' a ri heun hton loe' pok, "Si' mon kon' Yo' han, lak' leumeus' mi Ui' aw?"

Kopti Yesu' mhaing' Eun, "Lak' leumeus' mi Ui' aw?" hton loe' pok na', Petru' eun hpum' lu. Eun top' a, "Ca-

wo', yawng Mi ku ceu gawm' euc' na'. Mi yawng leumeus' ui' Mi."

Yesu' eun lah', "Uii' kon' yung' Ui' na' ce reu'." ¹⁸Ui' lah' a ri pe' neumneum, yam kawn' nhum' mi na', hk'eung mi hk'eung ri meun. Mi heul' ri vang sum' heul' ri na'. Daecti yam kawt mi na', mi na' yuk ti' ri, peue seubu peue na' tuil' mi cuip' hk'eung. Peue kaw va mi heul' ri vang un' sum' heul' mi na'." ¹⁹Yesu' lah' Eun a yeuh keutit' na' meuh a punta kaw Eun lah' Petru' kaw eun tuil' munhpung' ri Peucawo' Eun ri eun ci' kaw pun ri yeum yeuh sa' nhaw' na'. Hawc' ko', Yesu' Eun lah' a ri heun, "Hot' Ui' reu'."

²⁰Petru' eun hpawt' ri eun nyu tapae' ku' Yesu' leumeus' Eun na' buih hot' eun ri ing'. (Tapae' awn' eun a meuh ku' mok' ri teul ri Yesu' Eun yam som' pul ce, eun mhaing' Yesu' Eun, "Cawo', ku' kaw fuin Mi na' a ci' meuh a' nhaw'?") ²¹Yam Petru' pun eun ri nyu eun na', eun mhaing' Yesu' Eun, "Cawo', hkawn' eun sae. Eun ci' kaw pun ri yeuh sa' nhaw'?"

²²Yesu' Eun top' a, "Ui' lawn sum' kah eun ut' rot ti yam ing' Ui' na' ko', a ci' kaw to' ri ri mi yeuh sa' nhaw'? Kaw mi kah ri hot' Ui'." ²³Kop awn' na, a seutuin seutan lah' ri hk'a' nae ec' awng' na' ce tapae' awn' kaw eun un' pun ri yeum. Neumneum ka na' ko', Yesu' Eun hkuin' lah' kaw eun un' pun ri yeum, gup lah' Eun, "Ui' lawn sum' kah eun ut' rot ti yam ing' Ui' na' ko', a ci' kaw to' ri ri mi yeuh sa' nhaw'?"

²⁴Meuh a tapae' awn' eun hawc' meunang hkam' eun sa' hki' ka lawng awn' na, eun ku tem' a hk'a' nae htawm na'. Yawng ye leukah' hkam' sa' hki' eun na' meuh a neumneum.

²⁵Yesu' yeuh Eun ku' seubu na' ce heun' ceu. A lawn na' tem' ku' yeuh Eun na' gawm' euc' ri ko', ui' kuit bhen' keute' na' gawm' euc' ka a hkuin' na' laee kui' htawm kaw tem' ri awn' na.

Peue caee

Kaw tuil ' Cit ' seunga ' na ' lih

1 Htaw ' hpi ' lu, lawng ku ' Yesu ' la Eun ri yeuh mae ' sangsawn ' Eun na ' tang ' neum kleum ' ka na ' 2 rot ri huk ' Eun kuing ' pang mao ' na ' Eun cu Cit ' seunga ' chak ' na ' Eun tuil ' leukah ' ri peue caee leuk ri na ' ce, ui ' tem ' ri tuil ' a ri mi nang htawm nanggal ' na ' hawc ' . 3 Hawc ' hkam ' Eun ku ' tukhka na ' , Eun tuil ' peue awn ' ce nyu tu ' ri na ' . Punta kaw ce cang yum ' kawn ' im ' neum Eun na ' , Eun tuil ' ce nyu sa ' hki ' heun ' ceu. Eun tuil ' ce nyu ri hk'a ' naee yam pun ' kul ' seunyi na ' , Eun lah ' ris ce mhawng ' lawng kuing ' Eun Peucawo ' na ' . 4 Ti pok yam buih som ' Eun mae ' ce na ' , Eun tuil ' leukah ' ri ce, "Paw nang pucti heul ' hk'ai ' veng Yeru ' salaem na ' , daecti rot ri pun pe ' lapsawng ' leukah ' kati Kuing ' Ui ' ku ' pun pe ' ri mhawng ' ri Ui ' na ' nuk ka na ' , puing ko ' a reu ' . 5 Kopti Yo ' han tuil ' eun hk'a ' cum ' na ' ri pe ' ri leuum ' , daecti un ' ling ' , pe ' kaw pun ri rap ri ti hk'a ' cum ' na ' ri Cit ' seunga ' chak ' na ' ."

Yesu ' huk ' Eun kuing ' pang mao '

6 Kop awn ' na yam buih hk'om ce puri na ' , ce mhaing ' Eun, "Cawo ' , maet ' maen ' kaw Mi tang tang ' hk'u ' kuing ' ce peue I ' sarela ' na ' aw?"

7 Yesu ' Eun lah ' a ri ce, "Kaw pe ' un ' lo ' ri yawng meuh yam ku ' A ' kuing ' tang ' Eun hk'a ' naee ti ' ca ri na ' . 8 Daecti yam Cit ' seunga ' chak ' na ' lih a hk'a ' pang pe ' na ' , pe ' kaw pun ti ' ca na ' . Pe ' kaw meuh nang hkam ' sa ' hki ' Ui ' tang ' neum veng Yeru ' salaem na ' rot kuing ' Yu ' da, kuing ' Samari ' rot vang bhen ' keute ' na ' sut ' ka na ' ."

9 Hawc ' lah ' Eun a yeuh keutit ' na ' , Eun pun ri yuk ri huk ' nanggal ' to ' nha ' ce na ' . Putum ' na ' a ghuim ' Eun rot ri un ' laee nyu ce Eun.

10 Na ' ce buih mung ' ri seuluil ' mao ' na ' yam huk ' Eun na ' , peue cuip ' hk'eung paing lal ' peue na ' ka keulawn ' pucti cawng keunam ce na ' . 11 Ka lah ' a ri ce, "Peue Galilae ' na ' pe ' , pe ' ci ' yeuh keunhaw ' pe ' vae ' buih cawng ri mung ' mao ' na ' maen ' ? Yesu ' gah ' hk'ai ' pe ' huk ' lec kuing ' pang mao ' aen ' Eun ko ' , kaw Eun

tang lih bae seun ' nyu pe ' huk ' lec Eun kuing ' pang mao ' na ' ."

Nang ten Yu ' das ' I ' sakariot ' eun

12 Hawc ' awn ' na, ce lih neum gong Sanlon na ' ce tang ing ' nang veng Yeru ' salaem na ' . Gong awn ' a un ' seungai veng Yeru ' salaem na ' , a meuh hk'a ' cang long hk'a ' naee seunyi Sin ' . 13 Yam ing ' rot ce nang veng na ' , ce huk ' nang hong ' htan hk'a ' tuh vang ut ' ce na ' . A meuh Petru ' , Yo ' han, Yakop ' , Andre, Hpi ' lip ' , Hto ' mas ' , Bahto ' lome ' , Mahtae, Yakop ' kon ' eun Alfeas ' , Si ' mon Yelot ' , mae ' Yu ' das ' kon ' eun Yakop ' na ' ce. 14 Ce tang ' hpum ' ri meuh ti meul ' hk'o ' mun ' tiduih ' gawm ' euc ' mae ' beun ' na ' ce mae ' Mari ' ma Eun Yesu ' na ' ka mae ' awng ' me Eun Yesu ' na ' ce laleung.

15 Hk'a ' naee seunyi meuyam awn ' na, Petru ' eun kuh ' cawng nang ngon ' ce peue yum ' na ' (ce kue ' hk'ao ri pak ' leual ' kul ' peue.) 16 Eun lah ' , "Ec ' awng ' na ' pe ' , lawng eun Yu ' das ' ku ' va peue mawt Yesu ' Eun na ' seun ' Cit ' seunga ' chak ' na ' cu a moeng eun Davit ' na ' a lah ' ri tem ' ri nang htawm Seunga ' leumah ' na ' kaw a kah ri htonnuk neum. 17 Yu ' das ' eun ko ' , ut ' eun nang muk e ' . Eun meuh nang yeuh kan ' mae ' e ' ti peue yeut."

18 (Yu ' das ' ti eun paec lapsawng ' pun ri hk'a ' naee vang un ' leupaws seumeu ' na ' , eun leuvaee bhen ' keute ' ti bhen ' . Eun htang ' meul dhim ' cing ' ri na ' ri ka, keuteul eun na ' a gvah ' , vec eun na ' a pucti lih gawm ' euc ' . 19 Peue veng Yeru ' salaem na ' pun ce ri mhawng ' lawng aen ' na ku peue ri. Kop awn ' na, leukah ' ce na ' ce lah ' bhen ' keute ' awn ' a meuh Akel-dama ' . Vangdoh ' ka na ' a lah ' bhen ' keute ' nham ' .)

20 Petru ' eun lah ' , "Kopti tem ' a ri nang htawm Suk ' seun ' na ' ,

'Kah vang ut ' eun na ' yen ' yong.

A ' nhaw ' pawlaee ut ' ri ka saec ' ti peue', †† mae '

'Kah peue seubu eun ten an ' nya eun na ' reu ' . ‡

† Meuh a hk'a ' seungai hpawn ' pak ' tawp ' . †† Suk ' seun ' 69:25

‡ Suk ' seun ' 109:8

²¹Kop awn ' na, kah ri leuk peue ti peue. Peue awn ' eun kaw kah ri meuh ku ' ut ' mae ' e ' keuyuit yam Yesu ' kaw n ' ut ' Eun mae ' e ' na ' ²²tang ' neum rap Eun ri ti hk'a ' cum ' na ' mae ' Yo ' han eun rot ri yuk Eun ri huk ' hk'ai ' e ' na ' . Kopti peue awn ' kaw eun kah ri meuh nang hkam ' sa ' hki ' mae ' e ' lawng Yesu ' kuh ' im ' Eun na ' ."

²³Kop awn ' na, ce lah ' muis peue lal ' peue. Ku ' ti peue na ' eun meuh Yo ' saep, peue ku klawng eun meuh Basabas ' (muis seubu eun na ' a meuh Yu ' tas '). Lal ' peue ti peue na ' eun meuh Mahti ' as ' . ²⁴Hawc ' ko ' , ce hk'o ' mun ' lah ' , "Peucawo ' , yawng Mi hpum ' peue na ' ku peue. ²⁵Kopti Yu ' das ' tec eun kan ' peue caee Eun Yesu ' na ' eun heul ' vang heul ' ri na ' hawc ' , punta peue lal ' peue aen ' ka Mi ci ' kaw leuk ri ti nangnhaw ' ri ka eun na ' ten kan ' peue caee Eun Yesu ' na ' , hk'o ' Mi seudec ' ri tuil ' a ri ye reu ' ."²⁶Hawc ' ko ' , ce pawk ' ri caw Mahti ' as ' eun. Kop awn ' na, eun lec cum ce peue caee Eun Yesu ' kul ' ti peue na ' .

Cit ' seunga ' chak ' na ' lih ka

2 Yam rot a seunyi pawe Peteko ' te na ' , ce cu ri tiduih ' gawm ' euc ' ri vang ti duih ' na ' . ²Yam awn ' na, a keulawn ' kue ' seng ' laws ' lih neum kuing ' pang mao ' na ' seun ' guil ' lomleng keuting ko ' . A lih nuk hk'a ' naee nya vang buih mok ' ce na ' . ³Ce nyu piu ' ngawl seun ' a dak ' na ' . A gvah ri keului ' ri hk'a ' pang ce ku peue. ⁴Cit ' seunga ' chak ' na ' a nuk hk'a ' naee ce gawm ' euc ' . Ce tang ' ri lah ' leukah ' seubu heun ' ceu na ' seun ' ku ' Cit ' seunga ' chak ' na ' kah a ce lah ' ris na ' .

⁵Yam awn ' na, peue Yu ' da ku ' yumyam ' Peucawo ' Eun ing ' neum kuing ' ku kuing ' hk'a ' pang bhen ' keute ' na ' ce ing ' nang veng Yeru ' salaem na ' . ⁶Yam mhawng ' ce seng ' leukah ' awn ' a na ' , peue cum heun ' na ' ce kvang ' ce ing ' cu ri kopti sawng ' mhawng ' ce leukah ' ri is ' a ' nhaw ' is ' nang awn ' na ' . ⁷Ce am ' , ce mhaing ' puri, "Ku ' leukah ' na ' un ' meuh ce peue Galilae ' aw? ⁸A ci ' yeuh sa ' nhaw ' , e ' vae ' sawng ' pun ri mhawng ' leukah ' kuing ' vang ut ' ri na ' ? ⁹E ' meuh peue Pati ' , peue Medi ' , peue Elam meuh peue ut ' kuing ' Meso ' po ' tami ' , peue Yu ' da mae ' peue Kapa-dosia, peue Pontas ' mae ' peue ut ' kuing ' Asa ' , ¹⁰peue Fi ' cia ' mae ' peue Pamhpi ' li ' , peue E ' ji ' tu ' mae ' peue ut ' nang kuing ' Li ' bia ' keunam veng Sai ' rin ' na ' ce meuh peue chec ' ing ' neum veng Ro ' ma na ' .

¹¹(gawm ' peue Yu ' da mae ' peue ing ' lec ritroe ce peue Yu ' da na '), peue kaw ' Kret ' mae ' peue Arap ' , sawng ' mhawng ' e ' ris ce lawng kan ' keuting Eun Peucawo ' na ' ri leukah ' e ' na ' meun."¹²Ce kvang ' mawo

gawm ' euc ' ri. Ce mhaing ' puri, "A ci ' meuh ku ' yeuh sa ' nhaw ' ?"

¹³Daecti ngon ' ce chaw hkamram ce. Ce lah ' , "Ca ce ri nyui plai ' heun ' ."

Petru ' sangsawn ' eun leukah ' mun ' seunyi Peteko ' te

¹⁴Yam awn ' na, Petru ' eun cawng mae ' peue caee Eun Yesu ' kul ' ti peue na ' ce. Eun klawng ri lah ' laws ' a ri peue cum heun ' na ' ce, "Peue kuing ' Yu ' da mae ' peue ut ' nang veng Yeru ' salaem na ' pe ' gawm ' euc ' , kaw ui ' lah ' pe ' mhawng ' lawng aen ' na, pe ' na ' leuceng a meulamlam ri reu ' . ¹⁵Peue aen ' hpaw ce ca ' yuic ' ri plai ' seun ' ku ' kuit pe ' na ' . Maet ' maen ' kaw n ' meuh ka peunngup seudim ' nali. ¹⁶Daecti lawng aen ' a meuh a seun ' ku ' peue suip leukah ' Eun Peucawo ' Yaw ' la ' lah ' eun na ' ,

¹⁷'Peucawo ' lah ' Eun, "Hk'a ' naee meuyam tisut ' ka na ' ,

Ui ' kaw kah Cit ' seunga ' ri na ' lih hk'a ' pang peue ceu gawm ' euc ' .

Kon ' beun ' kon ' me pe ' na ' ce kaw sangsawn ' leukah ' mun ' ren ' kaw n ' na ' .

Nang nhum ' pe ' na ' ce kaw nyu ku ' limit.

Peue kawt pe ' na ' ce kaw leumu.

¹⁸Yam seunyi meuyam awn ' rot ka na ' ,

Ui ' kaw kah Cit ' seunga ' ri na ' lih hk'a ' pang mhai ' beun ' mhai ' me Ui ' na ' ce.

Ce kaw sangsawn ' leukah ' mun ' ren ' kaw n ' na ' .

¹⁹Ui ' kaw tuil ' pe ' nyu ku ' hk'o ' am ' hk'a ' tuh na ' nang kuing ' pang mao ' .

mae ' het ' keuting hk'a ' ruim pang bhen ' keute ' na ' ,

a kaw meuh nham ' , ngawl mae ' tu ' ngawl.

²⁰Yam seunyi keuting kue ' munhpung ' Eun Peucawo ' na ' un ' nang rot ka na ' ,

seunyi na ' a kaw duim ' lawng,

a ' chi ' na ' a kaw meuh nham ' .

²¹Peue klawng muis Eun Peucawo ' na ' ce ku peue, ce kaw pun hk'a ' htut lawtpon na ' ."[†]

²²Peue I ' sarela ' na ' pe ' , leuceng leukah ' aen ' a reu ' . Yesu ' peue veng Nasaraet ' meuh Eun peue Peucawo ' htawhkam Eun pe ' ri ku ' hk'o ' am ' mae ' het ' keuting na ' . Peucawo ' cu Eun, Eun yeuh a nanggal ' pe ' seun ' ku ' yawng pe ' na ' hawc ' .²³Seun ' Peucawo ' yawng Eun a Eun tang ' ri uin ' a nanggal ' hawc ' na ' , Yesu ' aen ' Eun pun ri hkam ' hk'a ' ap Eun ri pe ' . Pe ' teum ' kawm reum peue rai na ' ce, pe ' tawk ' Eun yeum pang kleum ' rawng ' tawp ' na ' .²⁴Daecti Peucawo ' Eun

† Yaw ' la ' 2:28-32

tang yeuh Eun kuh ' im ' , yeuh Eun lawtpon hk'ai ' hk'a ' tukhka na ' mae ' hk'a ' yeum na ' . Kopti hk'a ' yeum na ' mawt un ' pun ka Eun. ²⁵ Hkun ' haw ' hkam ' Davit ' eun ku lah ' lawng Eun na ' yeuhki ' ,

' A saec ' meuh yamnhaw ' nyu ui ' Peucawo ' ut ' Eun nanggal ' ri na ' .

Kopti ut ' Eun hk'a ' a ' tawm ' ui ' na ' ,
ui ' kaw un ' fuii ' fai ' .

²⁶ Kop awn ' na , hpum ' ui ' na ' a ren ' kawn , moeng ui ' na ' a ren ' kawn ,

tu ' ui ' na ' a ku kaw ut ' ri keutui ' hpum ' .

²⁷ kopti kaw Mi un ' tecla ui ' nang leumuic na ' ,

Mi ku kaw un ' tecla peue seunga ' chak ' Mi na ' eun seueum ' yeut.

²⁸ Mi tuil ' ui ' nawk hk'a ' civit im ' na ' hawc ' ,

Mi kaw yeuh hk'a ' ren ' kawn ui ' na ' htonnuk nanggal ' Mi. †

²⁹ Ec ' awng ' na ' pe ' , lah ' ui ' a ceng ' saec ' ri pe ' .

Davit ' a ' ta ' keuting e ' na ' yeum eun , peue puing ' eun hawc ' . Saec ' meuh keutui ' leumuic eun na ' , a ku kue ' mawn ' rot seunyaen ' yeut. ³⁰ Daecti meuh eun peue suip leukah ' Eun Peucawo ' . Eun yawng Peucawo ' yeuh Eun ri tuil ' kati ri ti. Hk'a ' naee ceucat eun na ' ti peue , Eun kaw tuil ' Eun mok ' tenceo ' ri na ' . ³¹ Kopti Davit ' bai yawng eun a nanggal ' na ' , eun lah ' lawng Hkrit kaw Eun tang kuh ' im ' na ' yeuhki ' , ' Peucawo ' Eun kaw un ' tecla Eun nang leumuic. Tu ' Eun na ' Eun kaw un ' kah a seueum ' yeut. ³² Peucawo ' kah Eun Yesu ' awn ' Eun kuh ' im ' . Meuh e ' nang hkam ' sa ' hki ' ka lawng ku ' meuh neum aen ' na gawm ' euc ' ri. ³³ Yam pun Eun hk'a ' tang ' ri lhung ' keuting hk'a ' a ' tawm ' Eun Peucawo ' na ' , seun ' A ' kuiing ' tuil ' Eun kati ri , Eun pun Cit ' seunga ' chak ' na ' ri Heun. Hawc ' ko ' , Eun kah Cit ' seunga ' na ' lih seun ' pun pe ' ri mhawng ' , pun pe ' ri nyu a maet ' maen ' na ' . ³⁴ Davit ' eun saec ' un ' nang huk ' ku- ing ' pang mao ' , daecti eun ku lah ' a ,

' Peucawo ' lah ' Eun a ri Cawo ' ui ' na ' Eun ,
' Mok ' hk'a ' a ' tawm ' Ui ' na ' .

³⁵ rot ti uin ' Ui ' ransu Mi na ' ce hk'a ' ruim dak cung Mi na ' reu ' . ††

³⁶ Kop awn ' na peue I ' sarela ' na ' pe ' gawm ' euc ' , yawng pawn aen ' na meulamlam ri reu ' . Peucawo ' kah Eun Yesu ' ku ' tawk ' pe ' pang kleum ' rawng ' tawp ' aen ' Eun meuh Cawo ' meuh Hkrit. "

³⁷ Yam peue awn ' mhawng ' ce leukah ' awn ' a na ' , a pen hpum ' ce na ' nyawk ' . Ce mhaing ' Petru ' eun mae ' peue caee Eun Yesu ' ku ' seubu na ' ce ,

' Peucawo ' lah ' Eun a ri Cawo ' ui ' na ' Eun ,
' Mok ' hk'a ' a ' tawm ' Ui ' na ' .

³⁵ rot ti uin ' Ui ' ransu Mi na ' ce hk'a ' ruim dak cung Mi na ' reu ' . ††

³⁶ Kop awn ' na peue I ' sarela ' na ' pe ' gawm ' euc ' , yawng pawn aen ' na meulamlam ri reu ' . Peucawo ' kah Eun Yesu ' ku ' tawk ' pe ' pang kleum ' rawng ' tawp ' aen ' Eun meuh Cawo ' meuh Hkrit. "

³⁷ Yam peue awn ' mhawng ' ce leukah ' awn ' a na ' , a pen hpum ' ce na ' nyawk ' . Ce mhaing ' Petru ' eun mae ' peue caee Eun Yesu ' ku ' seubu na ' ce ,

" Ec ' awng ' na ' pe ' , e ' ci ' kaw htuk ' ri yeuh sa ' n- haw ' ? "

³⁸ Petru ' eun top ' a ri ce , " Punta map ' pe ' na ' kaw a gah ' , pe ' ri ku peue taws ' hpum ' fuin map ' ri rap ri ti hk'a ' cum ' hk'a ' ruim muis Eun Yesu ' Hkrit na ' reu ' . Hawc ' ko ' , pe ' kaw pun lapsawng ' Cit ' seunga ' chak ' na ' . ³⁹ Leukah ' kati aen ' meuh a pun pe ' mae ' kon ' lhan ' pe ' na ' ce rot ri peue ut ' vang seungai na ' ce gawm ' euc ' . A meuh pun peue Peucawo ' klawng Eun ri ti na ' ce gawm ' euc ' yeut. "

⁴⁰ Petru ' eun deun ' sati ce rengreng ri leukah ' seubu heun ' ceu. Eun lah ' , " Roksa ' tu ' pe ' na ' yeuh ri pon peue rai cat aen ' ce reu ' . " ⁴¹ Peue leuceng leukah ' eun na ' ce rap ri ti hk'a ' cum ' . Hk'a ' naee seunyi awn ' na , peue meuh tapae ' na ' ce kue ' bae hk'ao loe ' heng ' peue.

Peue yum ' na ' yeuh ce a ' mawo puri

⁴² Ce leuceng leukah ' sangsawn ' ce peue caee Eun Yesu ' na ' , ce yeuh a ' mawo puri. Ce ves hkawomun ' na ' tiduih ' . Ce hk'o ' mun ' tiduih ' . ⁴³ Kopti peue caee Eun Yesu ' na ' yeuh ce ku ' hk'o ' am ' mae ' het ' keuting heun ' ceu pucti lih na ' , ce lhat ' ku peue ri. ⁴⁴ Peue yum ' na ' ce yeuh ri meuh ti mhu ' ti cum , ce meuh cawo ' ka vahtu ' hk'il ' leumuic ri na ' tiduih ' . ⁴⁵ Ce paing ' vahtu ' hk'il ' leumuic ri na ' , ce gvah a ri puri hot ' ku ' lo ' ce na ' . ⁴⁶ Ce huk ' cu ri nang nya hk'o ' mun ' keuting na ' ku seunyi. Ce ku ves hkawomun ' na ' nang nya ri na ' . Ce ren ' kawn leuong ' leuah ' hk'a ku ' hk'a tiduih ' . ⁴⁷ Ce suk ' seun ' Peucawo ' Eun , a htuk ' hpum ' peue gawm ' euc ' . Peucawo ' Eun yeuh peue pun hk'a ' htut lawtpon na ' ce heun ' hk'a ' naee muk ce na ' ku seunyi.

Petru ' bai ' eun peue cung lu cuin

3 A kue ' ti seunyi yam hk'o ' mun ' hk'a ' pul loe ' nali na ' , Petru ' eun mae ' Yo ' han ka buih huk ' nang nya hk'o ' mun ' keuting na ' . ² Peue cung lu tang ' neum yam keut ' ri na ' eun peue jong ' ri ing ' uin ' eun keunam bawl ' leuva ' ka nya hk'o ' mun ' keuting muis " Leuva ' Ngam " na ' ku seunyi , punta kaw eun hk'o ' ri hk'a ri peue lec nang nya hk'o ' mun ' keuting na ' ce. ³ Yam pun eun ri nyu Petru ' eun mae ' Yo ' han kaw ka lec nang nya hk'o ' mun ' keuting na ' , eun hk'o ' paec ri ka. ⁴ Petru ' eun mae ' Yo ' han ka seuluil ' eun. Petru ' eun lah ' , " Keue ' ri ya reu ' . " ⁵ Kop awn ' na , eun ku seuluil ' ka. Eun hteum ' ri kaw pun ku ' ti ri ceu ri ka.

⁶ Hawc ' ko ' , Petru ' eun lah ' , " Un ' kue ' ui ' hk'il ' leumuic , daecti ku ' kue ' ui ' na ' ui ' kaw tuil ' a ri mi.

† Suk ' seun ' 16:8-11 †† Suk ' seun ' 110:1

Hk'a' naee muis Eun Yesu' Hkrit peue veng Nasaraet' na', long hk'a' heul' reu'." ⁷ Petru' eun teuk' ri yuk ti' hk'a' a' tawm' eun na'. Cung mae' ngok cung eun na' a keulawn' kue' kaw' reng. ⁸ Eun keulawn' yawt' ri kuh' cawng tang' ri heul'. Hawc' ko', eun ing' lec hk'a' naee hkum ka nya hk'o' mun' keuting na' mae' ka. Eun seuyawng' ri heul' suk' seun' mun' Eun Peucawo'. ⁹ Yam peue heun' na' nyu ce long eun hk'a' eun suk' seun' Peucawo' Eun na', ¹⁰ ce pawn meuh a ku' mok' ri hk'o' ri hk'a' keunam bawl' leuva' Ngam ka nya hk'o' mun' keuting na' eun. Ce am' nguikvang' nyawk' ri ku' meuh ri peue awn' eun na'.

Petru' sangsawn' eun leukah' mun' ri peue heun'

¹¹ Yam peue awn' buih jhawp' eun ti' eun Petru' na' mae' ti' eun Yo' han na', peue heun' na' ce am'. Ce hk'uih ing' ri ce vang klawng ce muis a' ras' rum Saw' lamon na'. ¹² Yam Petru' nyu eun yeuh a ko' na', eun lah' a ri ce, "Peue I' sarela' na' pe', a ci' meuh kop keunhaw', pe' vae' am' ri lawng aen' na? A ci' meuh kop keunhaw', pe' vae' keue' ri ya a seun' yeuh ya peue aen' eun tang cang heul' ri ti' ca ri mae' ku' chak' ri na'?" ¹³ Peucawo' ce Abraham, I' cak', Yakop' mae' Peucawo' ce a' ta' a' ya e' na' yeuh Eun mhai' ri Yesu' Eun pun munhpung' ri. Ap pe' ri kaw toh Eun. Cawo' Pi' lat eun saec' kuit kaw ri plo' Eun, daecti pe' tecla Eun nanggal' eun cawo' Pi' lat. ¹⁴ Pe' tecla Cawo' seunga' chak' leupaws seumeu' na' Eun, pe' hk'o' ri ti' peue toh peue na' eun tang' Eun. ¹⁵ Pe' saec' toh Cawo' civit im' na' Eun, daecti Peucawo' Eun tang yeuh Eun kuh' im' hk'ai' vang yeum ri na'. Ye meuh nang hkam' sa' hki' ka lawng aen' na. ¹⁶ Peue pun pe' ri nyu yawng aen' kopti yum' eun muis Eun Yesu' na', eun kue' kaw' reng. Kopti muis Eun Yesu' mae' hk'a' yum' ku' lih neum Eun na', a yeuh peue aen' eun cuin seun' nyu pe' a na'.

¹⁷ Ec' awng' na' pe', yawng ui' kopti un' yawng pe' a na' pe' yeuh a. Saec' ro' pe' na' ce ku seun' awn' a yeut. ¹⁸ Daecti Peucawo' kah Eun lawng aen' a meuh pun ta ku' peue suip leukah' Eun na' lah' ce a tang' neum leumah' na' kaw a kah ri htonnuk, Hkrit Eun kaw pun ri hkam' ku' tukhka na'. ¹⁹ Kop awn' na punta Peucawo' kaw Eun saic' ri tec map' pe' na', taws' hpum' fuin map' ri hpawt' ri ing' ri Peucawo' Eun reu'. Pe' lawn yeuh keutit' ko', hk'a' kuit sam' ran na' a kaw lih neum Peucawo' Eun, ²⁰ Eun kaw cus' Yesu' Cawo' tang' Eun ri uin' meuh Hkrit pun pe' na' Eun ri pe'. ²¹ Yesu' Eun kaw kah ri ut' nang kuing' pang mao' na' rot ri yam Peucawo' na' Eun plin' ku ceu gawm' euc' na' meuh

ku' hk'u' seun' uin' Eun kati ri peue suip leukah' seun- ga' chak' ri leumah' na' ce. ²² Kopti Mo' se lah' eun, 'Cawo' Peucawo' pe' na' kaw Eun tang' ri uin' peue suip leukah' ri nang seun' ui' ri pun pe' ti' peue neum ec' awng' pe' na' ce meun. Pe' kaw pun ri leuceng ku' lah' eun ri pe' na' ce ku ceu ka. ²³ A' nhaw' lawn un' leuceng leukah' eun ko', eun kaw pun ri hkam' reng' ri tec ri hk'ai' ceucat ri na' ce.' †

²⁴ Neumneum ka na' ko', peue suip leukah' Eun Peucawo' ku peue tang' neum Samoela' eun ing', ce tamnai lawng ka meuyam aen' ce gawm' euc' na'. ²⁵ Meuh pe' kon' hk'i' ce peue suip leukah' Eun Peucawo' na', pe' ku lec hk'a' naee kati sat' ca' Peucawo' tuil' Eun ri a' ta' a' ya pe' na' ce yeut. Eun lah' a ri Abraham eun, 'Peue ceu pang bhen' keute' gawm' euc' na' kaw ce pun mun' kop ceucat mi na' ce.' †²⁶ Yam Peucawo' yuk Eun mhai' ri na' Eun huk' hawc' na', punta kaw Eun nap mun' ri pe', Eun cus' Eun ri pe' nanggal'. Yeuh pe' hpawt' ri hk'ai' ku' rai na' ku peue ri."

Cawo' ce peue Yu' da na' tang' ce a' mu ri Petru' eun mae' Yo' han ka

4 Yam Petru' eun mae' Yo' han buih sangsawn' ka peue heun' na' ce na', peue jhawp' rit, ro' peue ko' nya hk'o' mun' keuting na' ce mae' peue Sadu' kae' na' ce ing' ri ka. ² Ce seungeueng' ri ka, kopti peue caee Eun Yesu' na' sangsawn' lah' ka leukah' mun' ren' kawn lawng Yesu' yeum Eun hawc' Eun tang kuh' im' na' ri peue heun' na' ce na'. ³ Ce mheut' Petru' eun mae' Yo' han ka. Kopti fec' ka na', ce seue' ka nang htawng' rot peunsa'. ⁴ Daecti peue pun ri mhawng' leukah' sangsawn' na' ce yum' heun' peue. Peue yum' na' a' ta' me na' ce koe ce keut' ri kue' hk'ao hpawn' heng' peue.

⁵ Na' rot peunsa', cawo' ce peue Yu' da, ro' kan nang kawt mae' peue guil leukah' ritroe na' ce hk'om puri nang veng Yeru' salaem na'. ⁶ Peue jhawp' rit keuting muis Anas' eun mae' Kayafas', Yo' han, Alek' sando' mae' ceucat peue jhawp' rit keuting na' ce gawm' euc' ce ku ing' hk'om mawn' yeut. ⁷ Ce kah peue va Petru' eun mae' Yo' han ka ing' nanggal' ri na'. Ce mhaing' ka, "Pa' ci' cu ti' ca keunhaw', muis a' nhaw' pa' yeuh ceu nang aen' ce?"

⁸ Yam awn' na, Petru' eun kue' Cit' seunga' chak' na' htonnuk. Eun lah' a ri ce, "Cawo' peue I' sarela' mae' ro' kan nang kawt na' pe', ⁹ seunyaen' pe' lawn klawng ri mhaing' ya kopti lawng yeuh ya ku' tuckyak ri peue cung lu na' eun mae' hki' mhaing' pe' ya eun ci'

† Sawn' leukah' mun' 18:15, 18, 19 †† Yamla 22:18; 26:4

cuin yeuh sa 'nhaw' na 'ko',¹⁰ pe 'ri mae' peue I 'sarela' na 'pe' gawm 'euc' yawng ceu nang aen 'na reu', peue cawng nanggal 'pe' aen 'pun eun ri cuin kop-ti meuh a muis Eun Yesu 'Hkrit peue veng Nasaraet' ku 'tawk' pe 'yeum pang kleum' rawng 'tawp' na 'Eun, daecti Peucawo 'Eun kah Eun kuh 'im' hawc' .¹¹ Yesu 'Eun meuh

seumu tec ce peue go 'nya na',
daecti Eun meuh seumu kleum 'vang reng ka nya na' hawc' ."[†]

¹²Nang seubu a 'nhaw' hkuin 'kaw cang teum 'kawm htut e' lawtpon pun, muis seubu kaw cang teum 'kawm htut pe' lawtpon pun na 'Eun hkuin 'laee tuil' a ri peue ut 'hk'a' ruim mao' na 'peue saec' ti peue.

¹³Yam nyu ce Petru 'eun mae' Yo 'han hpum 'hat 'han' ka na', ce yawng meuh ka peue sum 'hpap un' duing rin htawm, ce am 'ri ka. Hawc' ko', ce tawl 'pawm tawn ut' ka mae' Yesu 'Eun. ¹⁴Kopti nyu ce peue cuin na 'cawng eun keunam ka na', ce un 'laee cang lah' ke-unhaw' bae. ¹⁵Hawc' ko', ce kah ka pucti heul 'hk'ai' vang hk'om na'. Ce sa 'lit puri lah', ¹⁶"E' ci' kaw yeuh sa 'nhaw' ri peue aen 'ka? Peue ut 'nang veng Yeru' salaem na' pun ce ri yawng yeuh ka ku 'hk'o' am' na' pucti hkaem hawc'. E' un 'laee cang htu' hting' a. ¹⁷Daecti punta kaw e' yut' lawng aen 'kaw a un 'laee seutu in seutan nang peue heun 'na' ce na', e' kaw kah ri ham' ka un 'laee kah ka lah' muis aen 'a ri a 'nhaw' bae."

¹⁸Hawc' ko', ce tang klawng ka ing' ri ti bae. Ce tuil' leukah' ri ka, "Pawlae lah', pawlae sangsawn' peue ri muis Eun Yesu 'na' bae saec' peunae' ."¹⁹ Daecti Petru 'eun mae' Yo 'han ka top' a ri ce, "Nanggal' Eun Peuca-wo' na', leuceng leukah' pe' na' lheu' leukah' Eun Peucawo' na' a ci' na' cawp' un' cawp', kuit a deut meun reu' .²⁰ Kopti kaw ya kah ri lah' ku' pun ya ri nyu, pun ya ri mhawng' na' ."

²¹Hawc' ce geut' ka ri leukah' rengreng na', ce plo e' ka. Kopti peue gawm 'euc' na' suk 'seun' ce mun' Eun Peucawo' ri lawng ku' meuh na', ce ci' kaw ciyang ka yeuh sa 'nhaw' na', ce un 'cang kuit a deut. ²²Kopti peue pun ri cuin hk'o' am' aen', a 'yu eun pun 'kul' neum pai' hawc' .

Leukah' hk'o' mun' ce peue yum'

²³Hawc' plo e' ce ka na', ka tang ing' ri puri na' ce. Ka ris ce mhawng' lawng ku' lah' ce ro' peue jhawp' rit na' mae' peue nang kawt na' ce gawm 'euc' ka. ²⁴Yam pun ce ri mhawng' a na', ce uin' hpum' ri meuh ti

† Suk 'seun' 118:22

meul' hk'o' mun' ri Peucawo' Eun, "Cawo' ti' ca keut-ing, meuh Mi Cawo' hpanpleng' mao', bhen' keute', mha' seumut', mae' ku' kue' hk'a' naee ka na' ce gawm 'euc' .²⁵ Cu Mi Cit' seunga' chak' lah' ri moeng eun mhai' Mi Davit' ku' meuh a' ta' keuting ye na' eun yeuhki',

'A ci' meuh kop keunhaw', peue ceu na' ce vae' se-ungeueng' ?

A ci' meuh kop keunhaw', peue na' ce vae' raen hk'a' kan' hk'o' hk'awng' ?

²⁶Punta kaw ce ham' tap Peucawo' Eun mae' ku' lhuik' Eun ri uin' ri lamawn na' Eun, hkun' haw' hkam' pang bhen' keute' mae' cawo' u' peung na' ce pong puri tiduih' ."^{††}

²⁷Neumneum ka na' ko', punta kaw ce ham' tap mhai' seunga' chak' ku' lhuik' Mi ri uin' ri lamawn Yesu 'Eun na', cawo' Herot' mae' cawo' Pontias' Pi' lat eun ka hk'om puri mae' peue un' meuh peue ceu Yu' da mae' peue ceu I 'sarela' na' ce hk'a' naee veng aen' na. ²⁸Ku' yeuh ce na' meuh a seun' ku' ti' ca Mi na' mae' alo Mi kuit ka a deut a kaw meuh tang' neum leumah' na' .²⁹ Peucawo', maet' maen' kuit ri mhawng' leukah' geut' ce na'. Hk'o' Mi teum' kawm mhai' Mi na' ce ri hpum' hat' han' cang lah' ris leukah' Mi na' reu' .

³⁰Hk'o' Mi nyat' ti' ri bai' peuyhat na' cuin. Hk'o' Mi yeuh het' keuting mae' ku' hk'o' am' ri muis Eun Yesu' mhai' seunga' chak' Mi na' Eun reu' ."

³¹Hawc' hk'o' ce mun' na', vang hk'om ce puri na' a keuyuih' keuyah'. Cit' seunga' chak' na' a nuk hk'a' naee ce gawm 'euc' . Ce lah' ris leukah' Eun Peucawo' na' mae' hpum' hat' han' ri.

Peue yum' na' gvah ce vahtu' hk'il' leumuil ri na' ri puri

³²Peue yum' na' ce gawm 'euc', kamkuit hpum' ce na' a meuh ti meul'. Ce un' hkvet' hk'vawn vahtu' hk'il' leumuil ri puri. Daecti ku' kue' ce na' ku' ceu ka, ce gvah puri. ³³Hk'a' naee ti' ca keuting na', peue caee Eun Yesu' na' ce hkam' sa' hki' lawng Yesu' kuh' im' Eun na' lalung. Mun' sin' heun' na' a kue' ri ce ku' peue.

³⁴Nang muk ce na', a un' laee kue' nang cuthkuin' saec' ti peue. Kopti ku' kue' bhen' keute' na' ce un' lah', ku' kue' nya na' ce un' lah', ce paing' a. ³⁵Ce ti ri ing' uin' leumuil pun ri na' mae' cung ce peue caee Eun Yesu' na'. Hawc' ko', ce gvah a hot' seun' ku' lo' ri na' ku' peue ri.

†† Suk 'seun' 2:1, 2

³⁶ Yam awn ' na, a kue ' peue Levi ' muis Yo ' saep ut ' nang kaw ' kuing ' Sai ' plas ' ti peue. Peue caee Eun Yesu ' na ' ce klawng eun meuh Banabas ' (vangdoh ' ka na ' a lah ' kon ' tuil ' kawl ' reng). ³⁷ Eun paing ' bhen ' keute ' ri ti bhen '. Hawc ' ko ', eun ti leumuil na ' ing ' uin ' a mae ' cung ce peue caee Eun Yesu ' na ' .

Anani ' mae ' Sahpi ' ra

5 A kue ' peue muis Anani ' ti peue. Beun ' eun na ' ka muis Sahpi ' ra. Ka ku paing ' bhen ' keute ' ri na ' ti bhen ' yeut. ² Eun uin ' leumuil na ' pun ka ti pun. Beun ' eun na ' ka ku yawng a. Leumuil lheu ' na ' Anani ' eun heul ' uin ' a mae ' cung ce peue caee Eun Yesu ' na ' .

³ Petru ' eun lah ' , "Anani ' , a ci ' meuh kop keunhaw ' , Satan na ' a vae ' yeuh mi kuit doh ' ri kaw mi chi ' lai Cit ' seunga ' chak ' na ' mae ' kaw mi ti ri uin ' ngos bhen ' keute ' na ' pun pa ' ti pun? ⁴ Yam un ' nang paing ' mi bhen ' keute ' awn ' a na ' , un ' meuh ka is ' mi aw? Hawc ' paing ' mi a na ' , leumuil na ' a ut ' nang dak ti ' mi, un ' meuh ka aw? A ci ' meuh kop keunhaw ' , a vae ' yeuh mi kuit doh ' kaw mi yeuhki ' ? Un ' chi ' lai mi peue, daecti chi ' lai mi Peucawo ' Eun."

⁵ Yam Anani ' pun eun ri mhawng ' leukah ' awn ' a na ' , eun keulawn ' cung ' kus yeum. Peue pun ri mhawng ' lawng awn ' a gawm ' euc ' na ' ce lhat ' nyawk ' . ⁶ Hawc ' ko ' , nang nhum ' na ' ce ing ' puc ri, ce bawl ' ri klawm ' ri heul ' puing ' eun.

⁷ Hawc ' awn ' na hk'ao loe ' nali na ' , beun ' eun na ' ka ing ' rot. Ka un ' nang yawng ku ' meuh awn ' na. ⁸ Petru ' eun mhaing ' ka, "Lah ' ui ' mhawng ' a, ngos bhen ' keute ' paing ' pa ' na ' meuh a peunaw ' yawo aw?"

Ka top ' a, "Euh, pun a peunaw ' ."

⁹ Petru ' eun lah ' a ri ka, "A ci ' meuh kop keunhaw ' , pa ' vae ' hot ' hpum ' puri long ri nawk Cit ' seunga ' Eun Peucawo ' na ' ? Keue ' reu ' , peue heul ' puing ' me pa ' na ' ing ' rot ce bawl ' leuva ' na ' hawc ' . Ce ku kaw tang klawm ' pa ' ri heul ' yeut."

¹⁰ Beun ' awn ' ka keulawn ' cung ' kus yeum keunam cung eun Petru ' na ' . Yam nang nhum ' na ' nyu ce beun ' awn ' yeum ka na ' , ce ing ' klawm ' ri heul ' puing ' ka keunam eun me ka na ' . ¹¹ Muk kon ' Hkrit na ' ce mae ' peue pun ri mhawng ' lawng aen ' na gawm ' euc ' na ' ce lhat ' nyawk ' .

Peue caee Eun Yesu ' na ' yeuh ce het ' keuting mae ' ku ' hk'o ' am ' heun '

¹² Peue caee Eun Yesu ' na ' ce yeuh het ' keuting mae ' ku ' hk'o ' am ' nanggal ' ce peue heun ' na ' heun ' ceu.

Peue yum ' na ' ce ing ' cu hk'on ' ri pang a ' ras ' rum eun Saw ' lamon na ' laleung. ¹³ Peue seubu na ' ce saec ' yumyam ' ce nyawk ' , daecti ce un ' hat ' ri ing ' pawng ' ri mae ' ce saec ' ti peue. ¹⁴ A saec ' yeuh sa ' nhaw ' , a kue ' beun ' me ing ' yum ' Peucawo ' Eun heun ' peue. Ce gawm ing ' pawng ' ri mae ' ce heun ' . ¹⁵ Kopti peue caee eun Yesu ' na ' yeuh ce ku ' hk'o ' am ' na ' , peue klawm ' peue peuyhat na ' ce nang hk'eung it ' ti un ' lah ' , pang cong ri un ' lah ' , uin ' ce nang gon ' hk'a ' na ' , punta yam Petru ' long eun hk'a ' na ' , vang leng ka a ' lawng eun na ' a cang pen peue peuyhat na ' ce un ' yawng. ¹⁶ Peue cum heun ' ut ' nang veng kue ' keunam veng Yeru ' salaem na ' ce ing ' cu ri. Ce va peue peuyhat mae ' peue seuca ' rai lec na ' ce ing ' . Ce cuin gawm ' euc ' ri.

Peue caee Eun Yesu ' na ' pun ce ri hkam ' ku ' keunhap ' nokneh

¹⁷ Yam awn ' na, peue jhawp ' rit keuting na ' eun mae ' a ' mawo eun ut ' nang muk ce peue Sadu ' kae ' na ' ce hkoe ' mang ' peue caee Eun Yesu ' na ' ce nyawk ' . ¹⁸ Ce mheut ' ri seue ' ce nang htawng ' lhong ' na ' . ¹⁹ Daecti peunsum ' na ' , in ' hpom Eun Peucawo ' na ' eun lih tah ' leuva ' ka htawng ' na ' . Eun va ce pucti heul ' . ²⁰ In ' h-pom na ' eun lah ' , "Heul ' cawng ri lah ' ris lawng a ' yu hk'u ' aen ' na htonnuk ri peue heun ' na ' ce nang kang ' hkung ' ka nya hk'o ' mun ' keuting na ' reu ' .

²¹ Yam ceng ' ka na ' , ce ing ' lec nang nya hk'o ' mun ' keuting na ' seun ' ku ' pun ce ri mhawng ' na ' . Ce tang ' ri sangsawn ' peue.

Yam peue jhawp ' rit keuting na ' eun mae ' pu eun na ' ing ' rot ce na ' , ce klawng muk peue hk'om kan ' na ' ce hk'om puri. Muk peue hk'om kan ' na ' a meuh nang kawt ce peue I ' sarela ' na ' ce. Hawc ' ko ' , ce kah peue heul ' klawng peue caee Eun Yesu ' na ' ce nang htawng ' ."

²² Daecti yam peue ko ' nya hk'o ' mun ' keuting na ' heul ' rot ce nang htawng ' na ' , ce un ' lae nyu peue caee Eun Yesu ' na ' ce. Ce ing ' lah ' a, ²³ "Kawn ' nyu ye htawng ' na ' sot a ri keutawn ' . Peue ko ' na ' ce ku kawn ' cawng ko ' mae ' leuva ' ka na ' . Daecti yam tah ' ye leuva ' na ' , ye un ' lae nyu peue hk'a ' naee ka saec ' ti peue." ²⁴ Yam ro ' peue ko ' nya hk'o ' mun ' keuting na ' eun mae ' ro ' peue jhawp ' rit na ' pun ce ri mhawng ' leukah ' awn ' a na ' , ce kuit un ' doh ' nguikvang ' lah ' , "Lawng aen ' a ci ' na ' kaw tang meuh ku ' yeuh sa ' n-haw ' ?"

²⁵ Hawc ' ko ' , peue ti peue eun ing ' lah ' , "Keue ' reu ' , peue hk'awng ' pe ' hk'a ' naee htawng ' na ' buih cawng ce ri sangsawn ' peue heun ' na ' ce nang kang ' hkung ' "

ka nya hk'o ' mun ' keuting na '." ²⁶ Yam awn ' na, ro ' peue ko ' nya hk'o ' mun ' keuting na ' eun mae ' peue yeuh kan ' na ' ce heul ' va peue caee Eun Yesu ' na ' ce ing ' . Kopti lhat ' ce ri peue heun ' na ' kaw ce dhim ' ri ri seumu na ' , ce un ' yeuh ku ' reng ri ce.

²⁷ Ce va ri ing ' tuil ' peue caee Eun Yesu ' na ' ce nanggal ' ce muk peue hk'om kan ' na ' , punta peue jhawp ' rit keuting na ' kaw eun hki ' mhaing ' ce. Eun mhaing ' ce, ²⁸ "Un ' laee kah ye pe ' cu muis aen ' na sangsawn ' peue saec ' peunae ' , daecti yeuh pe ' leukah ' sangsawn ' ri na ' nuk nang veng Yeru ' salaem na ' hawc ' . Kopti meuh ka yeum eun peue awn ' na, pe ' kuit ri kaw tang cu ' ku ' kleuc ' ri ye."

²⁹ Petru ' eun mae ' peue caee Eun Yesu ' na ' ce top ' a, "Kaw ye kah ri leuceng leukah ' Eun Peucawo ' na ' lheu ' leukah ' peue na ' . ³⁰ Yesu ' ku ' tawk ' pe ' yeum pang kleum ' rawng ' tawp ' na ' Peucawo ' a ' ta ' a ' ya ye na ' Eun yeuh Eun kuh ' im ' hawc ' . ³¹ Punta peue I ' sarela ' na ' kaw ce taws ' hpum ' fuin map ' ri pun ploee ' map ' ri na ' , Peucawo ' Eun yuk Yesu ' Eun huk ' ut ' hk'a ' a ' tawm ' ri, uin ' Eun meuh Cawo ' u ' peung Cawo ' htut. ³² Ye meuh nang hkam ' sa ' hki ' ka lawng aen ' na. Cit ' seunga ' chak ' Eun Peucawo ' tuil ' Eun ri peue leuceng leukah ' Eun na ' a ku hkam ' sa ' hki ' ka yeut."

³³ Yam mhawng ' ce leukah ' awn ' a na ' , ce seungeueng ' nyawk ' . Ce sum ' toh peue caee Eun Yesu ' na ' ce. ³⁴ Daecti a kue ' peue Hparisae ' muis Gamalela ' ti peue. Eun meuh nang guil leukah ' ritroe, peue gawm ' euc ' na ' ce yumyam ' eun. Eun kuh ' cawng nang muk ce muk peue hk'om kan ' na ' . Eun kah ce va peue caee Eun Yesu ' na ' ce pucti heul ' hk'a ' nok ti yam.

³⁵ Hawc ' ko ' , eun lah ' , "Peue I ' sarela ' na ' pe ' , kuit ri mhawng ' ku ' nawp pe ' ri kaw yeuh ri peue aen ' ce na ' meulamlam ri reu ' . ³⁶ Nanggal ' aen ' na, Htu ' das ' eun pucti lah ' ri meuh peue keuting. Peue hot ' eun na ' ce kue ' hk'ao pun ' pak ' peue. Hawc ' toh peue eun na ' , peue hot ' eun na ' ce taic ' jah gawm ' euc ' ri. ³⁷ Hawc ' awn ' na, Yu ' das ' peue Galilae ' eun tang pucti hk'a ' naee yam peue kuing ' na ' seue ' ce muis ri na ' . Eun va peue ti cum na ' ce yeuh ku ' suksak kuing ' . Peue ku toh eun yeut. Peue hot ' eun na ' ce ku taic ' jah gawm ' euc ' ri.

³⁸ Kop awn ' na, kaw ui ' tuil ' kamkuit pe, pawlaee yeuh keunhaw ' ri peue aen ' ce, tae ' ce. Kopti ku ' kuit ku ' yeuh ce na ' a lawn meuh ku ' lih neum peue ko ' , lak ' na ' a ut ' a na ' rai ' meun. ³⁹ Daecti a lawn meuh ku ' lih neum Peucawo ' Eun ko ' , pe ' hkuin ' kaw ham ' ce pun. Tam na ' pe ' cang meuh nang ham ' tap Peucawo ' Eun law."

⁴⁰ Ce leuceng leukah ' eun na ' . Hawc ' ko ' , ce tang klawng peue caee Eun Yesu ' na ' ce ing ' . Ce ta ' veut ce, tuil ' leukah ' un ' laee kah ce lah ' muis Eun Yesu ' na ' bae. Hawc ' ko ' , ce ploee ' ce.

⁴¹ Peue caee Eun Yesu ' na ' ce ren ' kawn pucti heul ' hk'ai ' muk peue hk'om kan ' na ' ce, kopti pun ce ri hkam ' ku ' hk'o ' kaic ku ' tukhka na ' kopti meuh a muis awn ' na. Ce sawn ' a top ' ngos ri nyawk ' . ⁴² Ku seunyi nang kang ' hkung ' ka nya hk'o ' mun ' keuting na ' mae ' nang nya na ' , ce sangsawn ' leukah ' mun ' lawng Yesu ' meuh Eun Hkrit na ' ce un ' duing keului ' ri.

Leuk peue a ' res peue

6 Yam awn ' na yam tapae ' na ' tawl ' heun ' ce na ' , peue Yu ' da ku ' jhawp ' ritroe ce peue Helasa ' na ' ce vuin ri peue Yu ' da ku ' jhawp ' ritroe ce peue Hebrae ' na ' ce. Kopti yam gvah ce ku ' hk'a ku seunyi na ' , a ' ya seunao ce na ' un ' pun ce ku ' hk'a meulamlam ri na ' . ² Kop awn ' na, peue caee Eun Yesu ' kul ' leual ' peue na ' ce klawng tapae ' na ' ce ing ' hk'om tiduih ' gawm ' euc ' . Ce lah ' , "Hk'ah ' ye kan ' sangsawn ' leukah ' Eun Peucawo ' na ' hawc ' ye yeuh kan ' gvah ku ' hk'a na ' , un ' cawp ' ka yeut. ³ Ec ' awng ' na ' pe ' , leuk ri ti peue hk'a ' naee pe ' a ' res peue. Ce kaw kah ri meuh ku ' yawng peue, meuh ce nang kue ' Cit ' seunga ' htonnuk, nang kue ' cu ' yi na ' . Ye na ' tuil ' ce yeuh kan ' awn ' na. ⁴ Ye kaw hk'o ' mun ' yeuh kan ' leukah ' mun ' awn ' na palkoe meulamlam ri."

⁵ Ku ' lah ' ce na ' a htuk ' hpum ' ce peue hk'om na ' gawm ' euc ' . Ce leuk ku ' kue ' hk'a ' yum ' kue ' Cit ' seunga ' htonnuk muis Satehpan na ' eun, mae ' Hpi ' lip ' , Plo ' hko ' ras ' , Ni ' hkan, Ti ' mon, Pamenas ' mae ' Ni ' hko ' las ' meuh peue veng Anhti ' ok eun ing ' lec ritroe ce peue Yu ' da na ' . ⁶ Ce va peue a ' res peue aen ' ce ing ' ri peue caee Eun Yesu ' na ' ce. Hawc ' tang ' ce ti ' ri hk'a ' pang ce na ' , ce hk'o ' mun ' pun ce.

⁷ Kop awn ' na, leukah ' Eun Peucawo ' na ' a laws ' pucti heul ' . Tapae ' nang veng Yeru ' salaem na ' ce gawm yao heun ' nyawk ' . Peue jhawp ' rit heun ' heun ' na ' ce ku ing ' leuceng ri yum ' yeut.

Mheut ' Satehpan eun

⁸ Munhpung ' ti ' ca Eun Peucawo ' na ' a htonnuk hk'a ' naee Satehpan eun. Eun yeuh ku ' hk'o ' am ' mae ' het ' keuting na ' heun ' ceu nanggal ' peue. ⁹ Daecti peue muk sa ' la vang hk'o ' mun ' muis Mhai ' Pon na ' ce, meuh ce peue Yu ' da ing ' neum veng Sai ' rin ' , veng Alek ' sandrian, kuing ' Si ' li ' si ' mae ' kuing ' Asa ' na ' ,

ce htú 'hting' Satehpan eun. ¹⁰ Daecti ce un ' cang pe cu 'yi eun na ' mae' ku ' Cit ' seunga ' cu ' ka eun lah ' na '.

¹¹ Hawc ' ko ', ce ra ri sa ' lit peue lah ', "Pun ye ri mhawng ' Satehpan lah ' eun ku ' un ' nawpsang ri Mo ' se eun mae' Peucawo ' Eun."

¹² Kop awn ' na, ce heul ' cu ' peue kuing ', nang kawt mae' peue guil leukah ' ritroe na ' ce. Hawc ' ko ', ce mheut ' Satehpan eun. Ce va eun heul ' nanggal ' ce muk peue hk'om kan ' na ' . ¹³ Ce pleng ' ri meuh nang hkam ' sa ' hki ' chi ' lai ngon ' . Ce lah ', "Peue aen ' lah ' eun ku ' un ' nawpsang ri vang seunga ' chak ' na ' mae' leukah ' ritroe na ' un ' htawt ' un ' deut. ¹⁴ Kopti pun ye ri mhawng ' lah ' eun, "Yesu ' peue veng Nasaraet ' na ' kaw Eun yeuh nya hk'o ' mun ' aen ' na lu. Rit Mo ' se tuil ' eun ri e ' na ' , Eun ku kaw plin ' a yeut."

¹⁵ Peue ut ' hk'a ' naee muk peue hk'om kan ' na ' ce gawm ' euc ' ce keue ' ri Satehpan eun. Ce pun ri nyu buh eun na ' seun ' a buh in ' hpom na ' ko ' .

Leukah ' Satehpan lah ' eun ri muk peue hk'om kan '

7 Hawc ' ko ', peue jhawp ' rit keuting na ' eun mhaing ' Satehpan eun, "Seun ' a ku ' tang ' ce na ' aw?" ² Satehpan eun top ' a, "Ec ' awng ' mae' nang kawt na ' pe ' , hk'o ' pe ' leuceng a. Peucawo ' munhpung ' keuting Eun pucti lih ri kuiing ' e ' Abraham eun yam kawm ' ut ' eun nang kuing ' Meso ' po ' tami ' nanggal ' yam un ' nang heul ' ut ' eun nang veng Haran na ' . ³ Peucawo ' Eun lah ', "Tecla kuing ' mi na ' bae' peue ceu mi na ' ce, heul ' vang ut ' peue un ' meuh peue ceu mi vang kaw Ui ' tuil ' mi nyu na ' reu ' ."[†]

⁴ Kop awn ' na, eun pucti neum kuing ' Hke ' den na ' eun heul ' tang ' ri ut ' nang veng Haran na ' . Hawc ' kuiing ' eun yeum eun na ' , Peucawo ' Eun cus ' eun heul ' ut ' vang ut ' pe ' maet ' maen ' aen ' na. ⁵ Daecti sin ' pe-un dak cung yawo, Peucawo ' Eun un ' tuil ' a ri heun nang kuing ' aen ' na. Daecti Peucawo ' Eun tuil ' kati kaw tuil ' ce is ' kuing ' aen ' a ri heun mae' kon ' hk'i eun na ' ce. Saec ' yam awn ' na Abraham eun hkuin ' nang kue ' kon ' . ⁶ Peucawo ' Eun lah ' a ri heun, "Kon ' hk'i mi na ' ce kaw pun ri meuh peue leuvok nang kuing ' peue. Ce kaw pun ri meuh mhai ' hkam ' hk'a ' keunhap ' nokneh rot pun ' pak ' neum. ⁷ Daecti Ui ' kaw ciyang peue ceu ku ' kah ce meuh mhai ' awn ' ce. Hawc ' ko ', kon ' hk'i mi na ' ce kaw pucti hk'ai ' kuing ' awn ' na, ce na ' tang ing ' faee ' Ui ' maen ' ."^{††} Hawc ' ko ', Eun tuil ' kati sat ' ca ' ton ' duing ' hak ' na ' ri Abraham eun. Hawc ' awn ' na, Abraham eun ku pun kon ' me muis I ' cak ' eun. Yam pun

† Yamla 12:1†† Yamla 15:13, 14

eun seudi ' seunyi na ' , eun ton ' duing ' hak ' eun. Hawc ' awn ' na, I ' cak ' eun kue ' kon ' me muis Yakop ' . Yakop ' eun meuh kuiing ' ce a ' ta ' keuting kul ' leual ' peue na ' .

⁹ A ' ta ' keuting awn ' ce kopti mang ' ce Yo ' saep eun, ce paing ' eun meuh mhai ' nang kuing ' E ' ji ' tu ' na ' . Daecti Peucawo ' Eun ut ' mae' heun. ¹⁰ Eun yeuh eun pun ri pon ku ' tukhka na ' gawm ' euc ' ka. Eun tuil ' eun kue ' cu ' yi, kah eun pun ku ' chak ' neum hkun ' haw ' hkam ' Hparaw ' kuing ' E ' ji ' tu ' eun. Hkun ' haw ' hkam ' eun tuil ' eun u ' peung kuing ' E ' ji ' tu ' na ' gawm ' haw ' ri na ' euc ' .

¹¹ Hawc ' awn ' na, kuing ' E ' ji ' tu ' na ' mae' kuing ' Hkanaan na ' a rot ut ' ngeup ' keuting, a tukhka nyawk ' . A ' ta ' keuting e ' na ' ce sok ku ' hk'a ku ' som ' , ce un ' pun. ¹² Yam Yakop ' pun eun ri yawng nang kuing ' E ' ji ' tu ' na ' kue ' a ku ' hk'a ku ' som ' na ' , eun ploee ' a ' ta ' keuting e ' na ' ce heul ' teh ' pok nanggal ' na ' . ¹³ Yam tang heul ' ce bae' lal ' pok ti pok na ' , Yo ' saep eun tuil ' ec ' ri na ' ce yawng tu ' ri na ' . Hkun ' haw ' hkam ' Hparaw ' eun ku pun ri yawng lawng peue nya peue hk'ul ' eun Yo ' saep na ' ce. ¹⁴ Hawc ' ko ', Yo ' saep eun kah peue heul ' va kuiing ' ri Yakop ' eun mae' peue nya ri na ' ce ing ' ri ti gawm ' euc ' . Ce kue ' a ' reskul ' hpawn ' peue. ¹⁵ Kop awn ' na, Yakop ' eun ku heul ' ut ' nang kuing ' E ' ji ' tu ' na ' . Tu ' eun na ' mae' a ' ta ' keuting e ' na ' ce ku yeum teh ' gawm ' euc ' ri. ¹⁶ Peue klawm ' tu ' ce na ' ing ' nang veng Senghkeng, ing ' pu-ing ' ce nang keutui ' leumuic Abraham leuvaee eun hk'ai ' leumuil ti meul ' ri kon ' hk'i eun Hamol na ' ce nang veng Senghkeng na ' .

¹⁷ Kati Eun Peucawo ' yeuh Eun ri Abraham eun na ' yam kaw a hk'aws ' htonnuk na ' , peue ceu e ' na ' ce baet ri heun ' nang kuing ' E ' ji ' tu ' na ' nyawk ' . ¹⁸ Rot ri hkun ' haw ' hkam ' un ' yawng Yo ' saep eun na ' yuk eun ri u ' peung kuing ' E ' ji ' tu ' na ' , ¹⁹ cawo ' awn ' eun hpum ' vok ' ces ri peue ceu e ' na ' ce. Eun keunhap ' a ' ta ' keuting e ' na ' ce, kah ce tec o ' ngak kawm ' keut ' na ' ce yeum.

²⁰ Yam awn ' na, Mo ' se eun keut ' . Eun kue ' juik hk'ai ' kon ' seubu na ' ce. Ce uii ' eun pun loe ' chi ' nang nya kuiing ' eun na ' . ²¹ Yam heul ' tec ce eun na ' , kon ' beun ' hkun ' haw ' hkam ' Hparaw ' na ' eun seut ' ri uii ' eun, sawn ' eun meuh kon ' ri. ²² Mo ' se eun pun ri rin cu ' yi ce peue E ' ji ' tu ' na ' gawm ' euc ' ka. Vang leukah ' leupong eun mae' vang yeuh eun kan ' na ' eun kue ' ti ' ca nyawk ' .

²³ Yam a ' yu eun pun a pun ' kul ' neum na ' , eun kuit a deut nang hpum ' ri eun kaw eo ' glue ri ec ' awng ' peue

ceu I 'sarela ' ri na ' ce.²⁴ Eun nyu peue E 'ji 'tu ' na ' buih keunhap ' eun peue I 'sarela ' na ' eun. Eun heul ' teum 'kawm peue I 'sarela ' na ' eun. Eun top ' a tang ' eun, eun toh peue E 'ji 'tu ' na ' eun.²⁵ Eun saec ' hteum ' ec 'awng ' ri na ' ce kaw yawng Peucawo ' cu Eun ri eun kaw teum 'kawm htut ce lawtpon na ' , daecti ce un ' yawng a.²⁶ Hawc ' awn ' na ti seunyi, Mo 'se eun nyu peue I 'sarela ' lal ' peue na ' kleuc ' ka puri. Eun ham ' ka lah ' a ri ka, 'A 'mawo, meuh pa ' ec 'awng ' . A ci ' yeuh keunhaw ' , pa ' vae ' kleuc ' puri?

²⁷ Daecti ku ' buih klaee ' na ' eun cut ' ri tec Mo 'se eun. Hawc ' ko ' , eun lah ' , 'A 'nhaw ' ci ' uin ' mi meuh cawo ' mae ' nang taws ' a 'mu ri ya?²⁸ Sum ' toh mi ui ' seun ' toh mi peue E 'ji 'tu ' na ' eun peunku ' na ' aw?'^{†29} Yam Mo 'se pun eun ri mhawng ' leukah ' awn ' a na ' , eun hk'uih heul ' nang kuing ' Mi 'den. Eun tang ' ri ut ' teh ' seun ' peue leuvok ko ' . Eun kue ' kon ' me lal ' peue.

³⁰ Hawc ' ka pun 'kul ' neum na ' , in 'hpom eun pucti ri heun nang bang ' yuim ngawl ha ' ka nang vang hk'oh 'hk'oeng ' keunam gong Si 'nai na ' .³¹ Yam Mo 'se pun eun ri nyu a na ' , eun am ' ri ka. Yam buih sat eun ri heul ' nawk a de na ' , eun mhawng ' leukah ' Eun Peucawo ' na ' laws ' ka puc ri,³² 'Meuh Ui ' Peucawo ' ce a 'ta ' keuting mi, Peucawo ' ce Abraham, I 'cak ' mae ' Yakop ' .^{††} Mo 'se eun lhat ' ruing, eun un ' laee hat ' ri keue ' .

³³ Hawc ' ko ' , Peucawo ' Eun lah ' a ri heun, 'Hpuic ' jhaep ' mi na ' reu ' , kopti buih cawng mi pang vang seung ' ga ' chak ' na ' .³⁴ Pun Ui ' ri nyu ku ' tukhka ku ' kleh ' k-lai ' ce peue ceu Ui ' na ' nang kuing ' E 'ji 'tu ' na ' hawc ' . Pun Ui ' ri mhawng ' seng ' nyel ce na ' hawc ' . Punta kaw Ui ' ploee ' ce pon na ' , Ui ' lih. Ing ' maen ' , maet ' -maen ' kaw Ui ' cus ' mi keutah ing ' nang kuing ' E 'ji 'tu ' na ' .[‡]

³⁵ Meuh a Mo 'se aen ' eun ku ' peue I 'sarela ' na ' un ' sahpaw ' ce eun na ' . Ce lah ' , 'A 'nhaw ' ci ' uin ' mi meuh cawo ' mae ' nang taws ' a 'mu?' Peucawo ' cu Eun in 'hpom ku ' pucti ri Mo 'se eun nang bang ' yuim na ' , Eun cus ' meun Mo 'se eun meuh cawo ' mae ' nang htut ce.³⁶ Mo 'se eun teuk ' va peue I 'sarela ' na ' ce pucti hk'ai ' kuing ' E 'ji 'tu ' na ' . Eun yeuh ku ' hk'o ' am ' mae ' het ' keuting nang mha ' seumut ' Seurak ' , nang kuing ' E 'ji 'tu ' na ' mae ' yam ut ' ce nang vang hk'oh 'hk'oeng ' na ' pun pun 'kul ' neum na ' .

³⁷ Meuh a Mo 'se aen ' lah ' eun a ri peue I 'sarela ' na ' ce, 'Peucawo ' kaw Eun cus ' peue suip leukah ' ri nang seun ' ui ' ri ti peue pun pe ' lih neum hk'a ' naee ec 'awng ' pe ' na ' ce.'^{††38} Mo 'se aen ' ut ' eun mae ' muk peue na '

ce nang vang hk'oh 'hk'oeng ' na ' , mae ' in ' hpom ku ' leukah ' mae ' heun pang gong Si 'nai na ' , mae ' a 'ta ' keuting e ' na ' ce. Eun ku rap ri ti leukah ' a 'yu im ' kaw suip ri to ' ri ri e ' heul ' na ' yeut.

³⁹ Daecti a 'ta ' keuting e ' na ' ce un ' leuceng ri ti leukah ' eun na ' . Ce un ' rap ri ti eun. Ce kue ' hpum ' sum ' tang keutah ing ' nang kuing ' E 'ji 'tu ' na ' .⁴⁰ Ce lah ' a ri Aron eun, 'Pleng ' peucawo ' kaw teuk ' va e ' heul ' hk'a ' nanggal ' reu ' . Kopti Mo 'se teuk ' va eun ye neum kuing ' E 'ji 'tu ' na ' , un ' yawng ye yeuh eun sa 'nhaw ' ?'^{††41} Yam awn ' na, ce pleng ' ruphtu kon ' a ' -moe ti tu ' . Ce dum ri tan sat ' na ' ri ka. Ce yeuh pawe munkvaen mae ' ku ' pleng ' meun ce ri ti ' ri na ' .

⁴² Daecti Peucawo ' Eun eung ' kui ' ri ri ce. Eun tae ' ce faee ' ku ' ceng ' kue ' pang mao ' na ' . A seun ' ku ' tem ' ri nang htawm ce peue suip leukah ' Eun Peucawo ' yeuhki ' na ' ,

'Peue I 'sarela ' na ' pe ' , yam ut ' pe ' nang vang hk'oh 'hk'oeng ' na ' pun pun 'kul ' neum na ' , pe ' hkuin ' duing dum ri tan sat ' na ' mae ' ku ' tan na ' ri Ui ' .

⁴³ Pe ' klawm ' tup ' Molec ' na '

mae ' seumeueng ' eun peucawo ' Rehpan pe ' na ' hot ' ri.

A meuh ruphtu pleng ' pe ' ri faee ' heun ' ceu.

Kop awn ' na, Ui ' kaw cus ' pe ' heul ' meuh mhai ' nang kuing ' seungai^{†††} hk'ai ' kuing ' Babu 'lon na ' .'

⁴⁴ A 'ta ' keuting e ' na ' ce ku kue ' tup ' kati sat ' ca ' nang vang hk'oh 'hk'oeng ' na ' . A pleng ' ri seun ' ku ' Peucawo ' lah ' Eun ri Mo 'se pun eun ri nyu a na ' .⁴⁵ Yam pun ce tup ' awn ' na, hk'a ' ruim vang u ' peung eun Yaw 'su ' na ' , a 'ta ' keuting e ' na ' ce ku ti tup ' awn ' na hot ' ri yam ing ' lec ce kuing ' ce peue un ' meuh peue ceu Yu 'da ku ' Peucawo ' ra Eun ri tec ce nanggal ' ce na ' . Tup ' awn ' na kue ' rot cu eun hkun 'haw 'hkam ' Davit ' na ' yeut.⁴⁶ Hkun 'haw 'hkam ' Davit ' eun meuh peue htuk ' hpum ' Eun Peucawo ' . Eun saec ' hk'o ' ri pleng ' nya vang ut ' Eun Peucawo ' Yakop ' na ' ,⁴⁷ daecti ku ' pun ri pleng ' nya pun Peucawo ' Eun na ' a meuh hkun 'haw 'hkam ' Saw 'lamon eun.

⁴⁸ Saec ' yeuh sa 'nhaw ' , Peucawo ' Cawo ' lhung ' hk'ai ' peue na ' Eun, hpaw Eun ca ' ut ' nang nya pleng ' peue na ' . Seun ' ku ' lah ' ce peue suip leukah ' Eun Peucawo ' na ' ,

⁴⁹ 'Peucawo ' Eun lah ' , "Kuing ' pang mao ' na ' a meuh tenceo ' Ui ' .

Bhen ' keute ' na ' a meuh vang tang ' cung Ui ' .

Pe ' ci ' kaw pleng ' nya yeuh sa 'nhaw ' pun Ui ' ?

† Pucti heul ' 2:14 †† Pucti heul ' 3:6 ‡ Pucti heul ' 3:5, 7, 8, 10

†† Sawn ' leukah ' mun ' 18:15 ††† Pucti heul ' 32:1 †††† Amo ' 5:25

Vang keului ' Ui ' na ' , a ci ' kaw meuh tawngnhaw ' ?
⁵⁰ Aen ' ce gawm ' euc ' , un ' meuh a ku ' pleng ' Ui ' ri
 ti ' ri aw? " †

⁵¹ Peue cing ' cen ' , hpum ' lheu ' leukah ' mae ' yhuk ' un ' leuceng na ' pe ' , pe ' ku seun ' a ' ta ' keuting ri na ' ce yeut. Ce ham ' tap Cit ' seunga ' chak ' na ' laleung.
⁵² Peue suip leukah ' Eun Peucawo ' ku ' a ' ta ' keuting pe ' un ' keunhap ' ce na ' , a ci ' kue ' a ' nhaw ' ? Saec ' meuh peue tamnai lawng peue leupaws seumeu ' kaw Eun lih na ' , a ' ta ' keuting pe ' na ' ce ku toh ce yeut. Maet ' - maen ' , pe ' fuin Eun , pe ' toh Eun. ⁵³ Suip pe ' ri pun leukah ' ritroe ri in ' hpom na ' ce, daecti pe ' un ' leuceng a. "

Dhim ' Satehpan eun yeum ri seumu

⁵⁴ Yam mhawng ' ce leukah ' awn ' a na ' , ce se-ungeuing ' nyawk ' cet rang ' ri ri Satehpan eun. ⁵⁵ Daecti Satehpan eun kue ' Cit ' seunga ' chak ' na ' htonnuk. Eun mung ' mao ' na ' , eun pun ri nyu munhpung ' Eun Peucawo ' na ' mae ' Yesu ' cawng Eun hk'a ' a ' tawm ' Eun Peucawo ' na ' . ⁵⁶ Eun lah ' , " Keue ' reu ' , pun ui ' ri nyu mao ' na ' dah ' ka, Kon ' ai ' peue na ' buih cawng Eun hk'a ' a ' tawm ' Eun Peucawo ' na ' . "

⁵⁷ Yam awn ' na, ce dho ' yhuk ' ri ti reng ri ho ' hae ' . Ce hk'uih ing ' lec ri Satehpan eun. ⁵⁸ Ce ol ' eun heul ' hk'a ' nok ka veng na ' . Ce va puri dhim ' eun ri seumu. Yam awn ' na, peue hkam ' sa ' hki ' chi ' lai na ' ce hpuic ' ri uin ' hk'o ri keunam cung eun nang nhum ' muis Saw ' lu na ' .

⁵⁹ Yam buih dhim ' ce Satehpan eun ri seumu na ' , Satehpan eun hk'o ' mun ' lah ' , " Cawo ' Yesu ' , hk'o ' Mi rap ri ti civit ui ' na ' . " ⁶⁰ Hawc ' ko ' , eun seukluin ri klawng ri lah ' , " Cawo ' , pawlaee tang ' map ' aen ' na hk'a ' pang ce. " Hawc ' ko ' , eun hpum ' deut.

8 Saw ' lu eun ku ut ' mawn ' . Satehpan yeum eun na ' a ku htuk ' hpum ' eun yeut.

Saw ' lu keunhap ' eun muk kon ' Hkrit na ' ce

Yam awn ' na, hk'a ' keunhap ' keuting na ' a keut ' kue ' ri muk kon ' Hkrit ut ' nang veng Yeru ' salaem na ' ce. A lawn un ' meuh peue caee Eun Yesu ' na ' ce ko ' , muk kon ' Hkrit na ' ce gawm ' euc ' ce taic ' jah hk'uih heul ' ut ' nang kuing ' Yu ' da na ' mae ' kuing ' Samari ' na ' ku duih ' ka. ² Peue yumyam ' Peucawo ' Eun na ' ce heul ' puing ' Satehpan eun, ce aec ' rak yam eun nyawk ' . ³ Daecti Saw ' lu eun tang ' ri yeuh muk kon '

Hkrit na ' ce lu. Eun eo ' ri lec nya na ' ti nya hawc ' ti nya. Eun yat ri heul ' seue ' beun ' me na ' ce nang htawng ' .

Leukah ' mun ' ren ' kawn na ' laws ' a heul ' nang kuing ' Samari '

⁴ Peue taic ' jah hk'uih heul ' na ' ce heul ' sangsawn ' leukah ' mun ' ren ' kawn na ' vang heul ' ri na ' ku duih ' ka. ⁵ Hpi ' lip ' eun lih sangsawn ' lawng Eun Hkrit na ' nang kuing ' Samari ' na ' ti veng. ⁶ Yam peue heun ' na ' pun ce ri mhawng ' ku ' sangsawn ' eun na ' mae ' het ' keuting yeuh eun na ' , ce leuceng leukah ' eun na ' meulamlam ri gawm ' euc ' . ⁷ Seuca ' rai na ' a aec ' rak pucti heul ' hk'ai ' peue heun ' peue. Peue ti ' cung chuing ' na ' mae ' peue lucat na ' ce ku cuin heun ' peue. ⁸ Kop awn ' na, nang veng awn ' a kue ' ku ' ren ' kawn heun ' nyawk ' .

Si ' mon peue yeuh kahta '

⁹ Nang veng awn ' na, a kue ' peue muis Si ' mon ti peue. Tang ' neum nanggal ' aen ' na, eun yeuh kahta ' . Eun yeuh peue Samari ' na ' ce gawm ' euc ' ce am ' ri ku ' yeuh ri na ' . Eun tang ' meun ri meuh peue keuting lhung ' . ¹⁰ Saec ' meuh peue sum ' hpap peue kue ' muis na ' ce ku leuceng leukah ' eun na ' . Ce suk ' seun ' lah ' , " Peue aen ' meuh eun peue ti ' ca keuting Eun Peucawo ' , klawng eun muis " Ti ' ca Keuting. " ¹¹ Kopti am ' ce ri kah-ta ' yeuh eun na ' ling ' hawc ' na ' , ce hot ' eun. ¹² Daecti yam Hpi ' lip ' sangsawn ' eun ce ri leukah ' mun ' ren ' kawn lawng kuing ' Eun Peucawo ' na ' mae ' muis Eun Yesu ' Hkrit na ' , ce ku yum ' Hpi ' lip ' eun. Ce rap ri ti hk'a ' cum ' na ' gawm ' beun ' gawm ' me ri. ¹³ Saec ' meuh Si ' mon eun ku yum ' , eun rap ri ti hk'a ' cum ' na ' . Eun hot ' Hpi ' lip ' eun heul ' ku duih ' . Eun am ' ri het ' keuting mae ' ku ' hk'o ' am ' nyu ri na ' ce nyawk ' .

¹⁴ Yam peue caee Eun Yesu ' ut ' nang veng Yeru ' salaem na ' pun ce ri mhawng ' lawng peue Samari ' na ' rap ce ri ti leukah ' Eun Peucawo ' na ' hawc ' na ' , ce cus ' Petru ' eun mae ' Yo ' han ka heul ' ri ce. ¹⁵ Yam heul ' rot ka na ' , ka hk'o ' mun ' pun kaw ce pun Cit ' seunga ' chak ' na ' , ¹⁶ kopti Cit ' seunga ' chak ' na ' un ' nang lih a hk'a ' pang ce saec ' ti peue, kawn ' rap ce ri ti yawo hk'a ' cum ' na ' hk'a ' naee muis Eun Yesu ' na ' palkoe. ¹⁷ Hawc ' ko ' , Petru ' eun mae ' Yo ' han ka tang ' ti ' ri hk'a ' pang ce. Ce pun Cit ' seunga ' chak ' na ' .

¹⁸ Kopti peue caee Eun Yesu ' na ' tang ' ka ti ' ri ce pun Cit ' seunga ' chak ' na ' , yam Si ' mon pun eun ri nyu a na ' , eun ing ' mhaing ' ri tuil ' leumuil ri ka. ¹⁹ Eun lah ' , " Punta peue tang ' ui ' ti ' ri hk'a ' pang ce ku peue na '

† I ' saya ' 66:1, 2

kaw ce pun Cit ' seunga ' chak ' na ' , hk'o ' pa ' tuil ' ti ' - ca aen ' na ri ui ' yeut."

²⁰ Petru ' eun top ' a, "Kopti kuit mi ri kaw cang leuvaee lapsawng ' Eun Peucawo ' na ' hk'ai ' leumuil na ' , kah leumuil mi na ' lu mae ' tu ' mi na ' reu ' .²¹ Kopti hpum ' mi na ' un ' seumeu ' ka nanggal ' Eun Peucawo ' na ' , kaw mi pawng ' ri yeuh kan ' aen ' a un ' kue ' pun mi.
²² Ku ' rai aen ' a taws ' hpum ' fuin map ' mi ri ka, hawc ' ko ' hk'o ' mun ' ri Peucawo ' Eun reu ' . Na ' Eun ploer ' map ' ku ' kuit mi nang hpum ' ri yeuhki ' na ' un ' yawng.²³ Kopti pun ui ' ri nyu ku ' hkoe ' mang ' na ' nuk a hk'a ' nae mi na ' , map ' na ' a mawt mi."

²⁴ Hawc ' ko ' , Si ' mon eun top ' a, "Punta ku ' lah ' pa ' na ' kaw a un ' cang rot pang ui ' saec ' ti ceu na ' , hk'o ' mun ' pun ui ' ri Peucawo ' Eun reu ' ."

²⁵ Yam Petru ' eun mae ' Yo ' han hkam ' ka sa ' hki ' sangsawn ' leukah ' Eun Peucawo ' hawc ' na ' , ka keutah ing ' huk ' nang veng Yeru ' salaem. Yam hot ' ka hk'a ' ing ' na ' , ka sangsawn ' leukah ' mun ' ren ' kawn na ' nang yung ' ce peue Samari ' na ' heun ' yung ' ing ' .

Hpi ' lip ' eun mae ' ro ' roksa ' vahtu ' hk'il ' leumuil peue kuing ' Ehti ' opya

²⁶ Yam awn ' na, in ' hpom Eun Peucawo ' na ' eun tuil ' leukah ' ri Hpi ' lip ' eun, "Lih hon ' hk'a ' col, lih ri hk'a ' un ' kue ' peue ut ' heul ' ri veng Yeru ' salaem a heul ' doh ' ri veng Gasa na ' reu ' ."²⁷ Kop awn ' na, Hpi ' lip ' eun pucti heul ' . Lang ' hk'a ' na ' , eun heul ' hk'eup ' peue kuing ' Ehti ' opya ti peue. Peue awn ' eun meuh peue tawn ' ri. Eun meuh ro ' roksa ' vahtu ' hk'il ' leumuil ka nang ' haw ' hkam ' kuing ' Ehti ' opya muis Kandas na ' . Eun ing ' neum heul ' faee ' ri nang veng Yeru ' salaem na ' .²⁸ Yam buih ing ' eun na ' , eun mok ' ri lip htawm peue suip leukah ' Eun Peucawo ' htawm I ' saya ' na ' nang law ka rawng ri na ' .²⁹ Cit ' seunga ' na ' a lah ' a ri Hpi ' lip ' eun, "Heul ' ri keunam ka law ka rawng teh ' a reu ' ."

³⁰ Kop awn ' na, Hpi ' lip ' eun hk'uih heul ' keunam ka law ka rawng na ' . Eun mhawng ' seng ' peue lip eun htawm peue suip leukah ' Eun Peucawo ' htawm I ' saya ' na ' . Eun mhaing ' eun, "Lak ' yawng mi ku ' lah ' ka htawm lip mi aen ' na aw?"

³¹ Eun top ' a, "Peue lawn un ' ris ui ' mhawng ' vangdoh ' ka na ' ko ' , ui ' ci ' kaw cang yawng a yeuh sa ' n-haw ' ?" Hawc ' ko ' , eun klawng Hpi ' lip ' eun huk ' mok ' mae ' ti nang law na ' .

³² Htawm Seunga ' buih lip eun na ' a meuh ton aen ' na, "Teuk ' Eun heul ' seun ' kon ' yung ' kaw nghawm ' ri na ' .

Seun ' kon ' yung ' na ' dit ' a ri ri peue cip ' huik ' ri na ' eun,

Eun ku un ' ang ' moeng ri.

³³ Yam hkam ' Eun ku ' keunhap ' peue ri na ' , Eun hkam ' a ' mu un ' cawp ' un ' seumeu ' na ' .

Eun hkuin ' kue ' ceucat, kopti tec peue a ' yu Eun hk'ai ' bhen ' keute ' na ' hawc ' ."[†]

³⁴ Ro ' roksa ' vahtu ' hk'il ' leumuil na ' eun mhaing ' Hpi ' lip ' eun, "Hk'o ' mi lah ' ui ' mhawng ' a, peue suip leukah ' Eun Peucawo ' aen ' eun ci ' buih lah ' lawng a ' nhaw ' , lah ' eun lawng tu ' ri na ' meun aw, a ' ko ' lah ' eun lawng nang seubu ti ri peue aw?"³⁵ Kop awn ' na, Hpi ' lip ' eun tang ' a ri htawm Seunga ' ton aen ' na eun lah ' ris leukah ' mun ' ren ' kawn lawng Eun Yesu ' na ' ri heun.

³⁶ Yam buih hot ' ka hk'a ' heul ' na ' , ka rot vang kue ' leuum ' ti duih ' na ' . Ro ' roksa ' vahtu ' hk'il ' leumuil na ' eun lah ' , "Kue ' reu ' , mawn ' na ' kue ' a leuum ' . A ci ' kue ' keunhaw ' kaw un ' kah ui ' rap ri ti hk'a ' cum ' na ' ?"^{†38} Hawc ' ko ' , eun kah law na ' kuit ' . Hpi ' lip ' eun mae ' ro ' roksa ' vahtu ' hk'il ' leumuil na ' eun ka lih lec nang leuum ' na ' . Hpi ' lip ' eun tuil ' hk'a ' cum ' ri heun.³⁹ Yam puc ka ri hk'ai ' leuum ' na ' , Cit ' seunga ' Eun Peucawo ' na ' a keulawn ' ti Hpi ' lip ' eun heul ' . Ro ' roksa ' vahtu ' hk'il ' leumuil na ' eun un ' lae nyu eun. Daecti, eun tang ren ' kawn suip hk'a ' ri na ' heul ' .⁴⁰ Saec ' yeuh sa ' nhaw ' , peue nyu Hpi ' lip ' eun nang veng Asotas ' na ' . Eun heul ' sangsawn ' leukah ' mun ' ren ' kawn nang veng na ' ku duih ' rot ri veng Kae ' sari ' na ' .

Saw ' lu ing ' meuh eun peue yum '

9 Hk'a ' nae yam awn ' na, Saw ' lu eun blih ' ri lah ' ri kaw toh tapae ' Eun Peucawo ' na ' ce. Eun heul ' ri peue jhawp ' rit keuting na ' eun.² Punta kaw eun mheut ' ri va ku ' pun eun ri hk'eup ' beun ' me hot ' hk'a ' ka ritroe aen ' a na ' ce ing ' nang veng Yeru ' salaem seun ' peue htawng ' na ' , eun heul ' hk'o ' lai kaw eun tuil ' a ri sa ' la vang hk'o ' mun ' kue ' nang veng Damas ' kas ' na ' ku duih ' ka.³ Yam Saw ' lu buih kaw eun hk'aws ' heul ' rot nang veng Damas ' kas ' na ' , a keulawn ' kue ' ku ' ceng ' lih neum pang mao ' na ' , a htawng ' eun rop.⁴ Eun cung ' kus pang keute ' na ' . Eun pun ri mhawng ' leukah ' na ' lah ' ka a ri ti, "Saw ' lu, Saw ' lu, a ci ' meuh kop keunhaw ' , mi vae ' keunhap ' Ui ' ?"

[†] I ' saya ' 53:7, 8^{††} Nang htawm Seunga ' seubu na ' kue ' a nambat aet ' aen ' na yeut. ³⁷ Hpi ' lip ' eun lah ' , "Mi lawn yum ' nang hpum ' ri gawn ' euc ' ko ' , mi kaw pen ' rap ri ti hk'a ' cum ' na ' yeut." Eun top ' a, "Yum ' ui ' Yesu ' Hkrit meuh Eun Kon ' ai ' Eun Peucawo ' ."

⁵Saw 'lu eun mhaing ' Eun, "Cawo ' , Mi ci ' meuh a ' n-haw ' ?" Cawo ' Eun top ' a, "Meuh Ui ' Yesu ' ku ' buih keunhap ' mi na ' Eun. ⁶Maet ' maen ' , kuh ' ing ' lec nang veng na ' reu ' . Mi kaw htuk ' ri yeuh sa ' nhaw ' na ' , a kaw kue ' peue lah ' a ri mi."

⁷Peue hot ' Saw 'lu eun heul ' na ' ce cawng dit ' ti mawn ' , ce un ' cang leukah ' . Ce saec ' mhawng ' leukah ' awn ' a na ' , daecti ce un ' nyu a ' nhaw ' saec ' ti peue. ⁸Saw 'lu eun kuh ' . Daecti yam plang ' eun ngai ' ri na ' , eun un ' nyu keunhaw ' saec ' ti ceu. Kop awn ' na, ce teuk ' ti ' eun na ' heul ' lec nang veng Damas ' kas ' na ' .

⁹Eun ngai ' fec ' . Eun un ' laee hk'asom ' pun loe ' seunyi.

¹⁰Nang veng Damas ' kas ' na ' a kue ' tapae ' ti peue, eun muis Anani ' . Peucawo ' Eun klawng Anani ' eun nang limit na ' , "Anani ' ."

Eun top ' a, "Euh ' , Cawo ' ."

¹¹Peucawo ' Eun lah ' a ri heun, "Kuh ' long hk'a ' heul ' ri nya eun Yu ' das ' hk'a ' lah ' peue meuh hk'a ' seumeu ' na ' reu ' . Hawc ' ko ' , heul ' mhaing ' ri sok peue muis Saw 'lu peue veng Tarsas ' na ' eun. Kopti buih hk'o ' eun mun ' . ¹²Hk'a ' naee limit eun na ' , punta ngai ' eun na ' kaw a ceng ' bae na ' , eun nyu peue muis Anani ' tang ' eun ti ' ri hk'a ' pang ri."

¹³Anani ' eun top ' a, "Cawo ' , pun ui ' ri mhawng ' lawng eun peue aen ' a mae ' ku ' rai yeuh eun ri peue Mi nang veng Yeru ' salaem na ' heun ' ceu hawc ' . ¹⁴Punta kaw eun mawt ri ti peue klawng muis Mi na ' ce gawm ' euc ' na ' , eun ing ' nang ti ' ca eun peue jhawp ' rit keuting na ' maen ' ."

¹⁵Daecti Peucawo ' Eun lah ' a ri Anani ' eun, "Heul ' ya-wo reu ' , punta kaw eun ti muis Ui ' na ' heul ' ri peue un ' meuh peue ceu Yu ' da na ' mae ' hkun ' haw ' hkam ' ce na ' mae ' peue I ' sarela ' na ' ce, peue aen ' meuh eun hk'eung leuk Ui ' ri uin ' hawc ' . ¹⁶Kopti meuh a muis Ui ' na ' , eun kaw pun ri tukhka a ' neng, Ui ' kaw yeuh eun nyu a."

¹⁷Hawc ' ko ' , Anani ' eun heul ' ri nya awn ' na. Eun heul ' lec ' nya na ' . Eun tang ' ti ' ri hk'a ' pang Saw 'lu eun. Eun lah ' , "Awng ' ui ' Saw 'lu, punta kaw mi nyu hk'a ' ri bae mae ' punta Cit ' seunga ' na ' kaw a hton-nuk hk'a ' naee mi na ' , Yesu ' ku ' tuil ' mi nyu ri lang ' hk'a ' yam buih ing ' mi maen ' na ' Eun, cus ' Eun ui ' ing ' ri mi."¹⁸A keulawn ' kue ' ku ' seun ' gop ' bhuic ' hk'ai ' ngai ' eun Saw 'lu na ' , eun tawl ' nyu hk'a ' ri bae. Eun kuh ' rap ri ti hk'a ' cum ' . ¹⁹Hawc ' hk'asom ' eun na ' , eun tang kue ' kawl ' reng bae.

Saw 'lu ut ' eun nang veng Damas ' kas '

Saw 'lu eun ut ' mae ' tapae ' na ' ce nang veng Damas ' kas ' na ' heun ' seunyi. ²⁰Eun keulawn ' tang ' ri sangsawn ' lawng Yesu ' meuh Eun Kon ' ai ' Eun Peuca-wo ' na ' nang sa ' la vang hk'o ' mun ' na ' ce. ²¹Peue pun ri mhawng ' a na ' ce am ' gawm ' euc ' . Ce lah ' , "Peue aen ' meuh eun ku ' yeuh peue klawng muis Eun Yesu ' nang veng Yeru ' salaem na ' ce lu na ' , un ' meuh ka aw? Punta kaw eun mheut ' ri va peue awn ' ce heul ' ri ro ' peue jhawp ' rit na ' ce seun ' peue htawng ' na ' ko ' , eun ing ' maen ' , un ' meuh ka aw?" ²²Daecti hk'a ' civit eun Saw 'lu na ' a gawm ut ' gawm keuting. Eun yeuh peue Yu ' da ut ' nang veng Damas ' kas ' na ' ce mawo, ce un ' laee cang htu ' hting ' ri ku ' tuil ' eun ce nyu sa ' hki ' ka lawng Yesu ' meuh Eun Hkrit na ' .

²³Yam pon a ing ' heun ' seunyi na ' , peue Yu ' da na ' ce sa ' lit puri kaw toh Saw 'lu eun. ²⁴Daecti Saw 'lu eun pun ri yawng kan ' sa ' lit ce puri na ' . Punta peue Yu ' da na ' kaw ce toh eun na ' , ce ko ' nang leuva ' ka veng na ' gawm ' sum ' gawm ' seunyi. ²⁵Daecti tapae ' eun Saw 'lu na ' ce va eun pucti heul ' peunsum ' . Ce seue ' eun nang a ' hk'ui, ce ruic ' eun hk'a ' keutui ' ka hkui veng na ' .

Saw 'lu ut ' eun nang veng Yeru ' salaem

²⁶Yam Saw 'lu ing ' rot eun nang veng Yeru ' salaem na ' , eun co ' ca ' ri kaw ing ' pawng ' ri mae ' tapae ' na ' ce. Daecti ce lhat ' ri heun gawm ' euc ' , ce un ' yum ' meuh eun tapae ' neumneum. ²⁷Daecti Banabas ' eun va eun heul ' hk'eup ' peue caee Eun Yesu ' na ' ce. Lawng Saw 'lu nyu eun Yesu ' Eun lang ' hk'a ' na ' mae ' lawng Yesu ' leukah ' Eun mae ' heun yeuh sa ' nhaw ' na ' , mae ' lawng cu eun muis Eun Yesu ' na ' eun sangsawn ' leukah ' mun ' ri hpum ' hat ' han ' ri nang veng Damas ' kas ' na ' yeuh sa ' nhaw ' na ' , Banabas ' eun ris ce mhawng ' a. ²⁸Kop awn ' na, Saw 'lu eun pun ri ut ' mae ' ce. Eun un ' laee hki ' keung lec lih nang veng Yeru ' salaem na ' . Eun leukah ' hk'a ' naee muis Eun Peuca-wo ' ri hpum ' hat ' han ' ri. ²⁹Eun htu ' hting ' peue Yu ' da ku ' lah ' leukah ' Helasa ' na ' ce, daecti ce co ' ca ' ri kaw toh eun. ³⁰Yam ec ' awng ' na ' yawng ce lawng awn ' a na ' , ce va Saw 'lu eun heul ' nang veng Kae ' sari ' na ' . Hawc ' ko ' , ce suip eun ri reu ing ' rot nang veng Tarsas ' na ' .

³¹Hawc ' awn ' na, muk kon ' Hkrit ut ' nang kuing ' Yu ' da, kuing ' Galilae ' mae ' kuing ' Samari ' na ' ce ku duih ' , ce kue ' hk'a ' kuit nyawk ' kuit sam ' ran. Cit ' se-

unga ' chak ' na ' a tuil ' kawl ' reng ce. Ce reng keuting. Ce lhat ' til ri Peucawo ' Eun, ce baet ri heun ' .

Bai ' Ai ' nes eun cuin

³² Yam Petru ' heul ' eun ti duih ' hawc ' ti duih ' na ' , eun heul ' glue ri peue Eun Peucawo ' ut ' nang veng Li ' - da na ' ce. ³³ Mawn ' na ' , eun pun ri nyu peue muis Ai ' nes ti peue. Eun ti ' cung chuing ' . Eun it ' ri vang it ' ri na ' pun seudi ' neum. ³⁴ Petru ' eun lah ' a ri heun, "Ai ' nes, Yesu ' Hkrit bai ' Eun mi cuin, kuh ' top hk'eung it ' mi na ' reu ' ." Eun ku keulawn ' kuh ' . ³⁵ Peue ut ' nang veng Li ' da na ' ce mae ' peue ut ' nang keuleung ka Saron na ' ce gawm ' euc ' ce pun ri nyu peue awn ' eun. Ce plin ' hpum ' ri ing ' hk'a ' Eun Peucawo ' na ' .

Dawkas tang kuh ' im ' ka

³⁶ Nang veng Yu ' pe na ' , a kue ' tapae ' beun ' ti peue muis Tabi ' hta ' (leukah ' Helasa ' ka, a meuh Dawkas). Ka yeuh kan ' chak ' na ' mae ' ka teum ' kawm peue hk'o ' tuckyak na ' ce laleung. ³⁷ Yam awn ' na , ka peuyhat, ka yeum. Ce huim ' tu ' yeum ka na ' , ce uin ' ka nang hkawng htan hk'a ' tuh na ' . ³⁸ Veng Li ' da na ' a de veng Yu ' pe na ' . Kop awn ' na yam tapae ' na ' mhawng ' ce Petru ' ut ' eun nang veng Li ' da na ' , ce cus ' me lal ' peue na ' ka heul ' hk'o ' hk'ang eun. Ka lah ' , "Keulawn ' hot ' ya heul ' vaevae." ³⁹ Petru ' eun hot ' ka heul ' . Yam ing ' rot ce na ' , ce va Petru ' eun huk ' nang hkawng htan hk'a ' tuh na ' . Beun ' seunao na ' ce rop Petru ' eun. Ce yam, ce tuil ' Petru ' eun nawk hk'eung cing ka Dawkas yam kawm ' ut ' ka na ' .

⁴⁰ Petru ' eun kah ce pucti lih hk'ai ' hkawng na ' gawm ' euc ' ri. Hawc ' ko ' , eun seukluin ri hk'o ' mun ' . Eun hpawt ' ri hk'a ' ka peue yeum na ' . Eun lah ' , "Tabi ' hta ' , kuh ' reu ' ." Beun ' awn ' ka plang ' ngai ' ri na ' . Yam nyu ka Petru ' eun na ' , ka kuh ' mok ' . ⁴¹ Petru ' eun jhawp ' ti ' ka na ' , eun vuh ka kuh ' cawng. Hawc ' ko ' , eun klawng peue yum ' mae ' beun ' seunao na ' ce ing ' . Eun ap beun ' tang kuh ' im ' awn ' ka ri ce. ⁴² Lawng aen ' a seutu in seutan nang veng Yu ' pe na ' ku duih ' ka. Peue heun ' na ' ce ing ' yum ' Peucawo ' Eun. ⁴³ Petru ' eun ut ' mae ' Si ' mon ku ' meuh peue pleng ' hak ' na ' meuh hk'eung lo ' na ' eun nang veng Yu ' pe na ' heun ' seunyi.

Petru ' eun mae ' Kawneli '

10 Nang veng Kae ' sari ' na ' kue ' a po ' suik ' ti peue muis Kawneli ' . Eun ut ' nang tawp lah ' peue meuh Muk Suik ' It ' tali na ' . ² Heun ri mae ' peue nya peue

hk'ul ' eun na ' ce gawm ' euc ' ce meuh peue tam ' mun ' tam ' sin ' ri lhat ' til ri Peucawo ' Eun. Eun hpum ' vah teum ' kawm peue hk'o ' tuckyak na ' ce. Eun hk'o ' mun ' ri Peucawo ' Eun laleung. ³ A kue ' ti seunyi yam meuh a hk'ao loe ' nali hk'a ' pul na ' , nang limit eun na ' eun pun ri nyu in ' hpom Eun Peucawo ' ti peue meulamlam ri. In ' hpom na ' eun lih ri heun, eun lah ' , "Kawneli ' ."

⁴ Kawneli ' eun seuluil ' eun mae ' lhat ' ri. Eun mhaing ' eun, "Cawo ' , a ci ' meuh keunhaw ' ?"

In ' hpom na ' eun top ' a, "Seng ' hk'o ' mi mun ' na ' mae ' hk'a ' teum ' kawm mi peue hk'o ' tuckyak na ' huk ' rot a nanggal ' Eun Peucawo ' seun ' meuh a ku ' tan kuit rot ri mi na ' hawc ' . ⁵ Maet ' maen ' cus ' peue heul ' nang veng Yu ' pe, heul ' va peue muis Si ' mon ku ' klawng peue meuh Petru ' na ' eun ing ' reu ' . ⁶ Buih ut ' eun nang nya eun Si ' mon ku ' meuh nang pleng ' hak ' na ' . Nya eun na ' a ut ' keunam ka mha ' seumut ' na ' ."

⁷ Yam in ' hpom ku ' leukah ' mae ' heun na ' keutah eun ing ' na ' , Kawneli ' eun klawng mhai ' lal ' peue mae ' peue suik ' meuh mhai ' eun ku ' meuh peue tam ' mun ' tam ' sin ' ti peue na ' ce ing ' . ⁸ Eun ris lawng ku ' meuh ku ceu na ' ri ce. Hawc ' ko ' , eun kah ce heul ' nang veng Yu ' pe na ' .

Limit eun Petru '

⁹ Hawc ' ka na ' ti seunyi yam meuh a hk'ao peunnyi keuting na ' , yam peue awn ' kaw ce hk'aws ' heul ' rot keunam veng Yu ' pe na ' , punta Petru ' kaw eun hk'o ' mun ' na ' , eun huk ' ri htan keuleung ka seubul nya na ' .

¹⁰ Eun kluit ' , eun sum ' hk'a ku ' hk'a. Yam buih rangraen ce ku ' hk'a na ' , eun pun ri nyu limit. ¹¹ Eun nyu mao ' na ' dah ' ka. Ku ' seun ' hpen ' keuting mawt ce ' ri pun ' plak ' na ' a ruic ' ri lih pang bhen ' keute ' na ' . ¹² Hk'a ' - naee ka na ' a kue ' sat ' cung pun ' plak ' , sat ' muilmal sat ' leun ri pang bhen ' keute ' na ' mae ' sim ' peul ' eo ' nang vawo na ' ce ku ceu ka. ¹³ Hawc ' ko ' , a kue ' seng ' ti seng ' lah ' a ri heun, "Petru ' , kuh ' nghawm ' mi hk'a pawn ' a reu ' ."

¹⁴ Petru ' eun top ' a, "Uih ' Cawo ' , un ' duing hk'a ui ' ku ' hk'aw ' jeuk ku ' un ' seunga ' na ' saec ' ti pok."

¹⁵ Seng ' na ' a lah ' a ri heun lal ' pok ti pok, "Ku ' Peuca- wo ' saic ' Eun seunga ' hawc ' na ' , pawlaee lah ' a meuh ku ' hk'aw ' jeuk."

¹⁶ A meuh seun ' awn ' na hton loe ' pok ka na ' , hpen ' keuting awn ' na keulawn ' ti ri keutah huk ' pang mao ' .

¹⁷ Yam Petru ' buih mawo eun ri vangdoh ' ka limit aen ' na, peue eun Kawneli ' cus ' eun heul ' na ' ce sok ri nyu nya eun Si ' mon na ' . Ce cawng keunam bawl ' leuva '

na'.¹⁸ Ce klawng ri mhaing' lah', "Si' mon ku' lah' peue meuh Petru' na' ut' eun maen' aw?"

¹⁹ Yam Petru' buih kuit eun lawng limit na', Cit' seunga' na' a lah' a ri heun, "Si' mon, peue loe' peue na' buih sok ce mi.²⁰ Kop awn' na, kuh' lih hk'a' col reu'. Pawlaee kangkae ri kaw mi heul' mae' ce, kopti cus' ui' ce ing' ri mi."

²¹ Petru' eun lih. Eun lah' a ri ce, "Peue sok pe' na' meuh a ui' ri hawc'. A ci' meuh kop keunhaw', pe' vae' ing' maen'?"

²² Ce top' a, "Ing' ye neum po' suik' Kawneli' eun. Meuh eun peue leupaws seumeu' lhat' til ri Peucawo' Eun. Eun ku meuh ku' peue Yu' da na' hkopyawm' yumyam' ce gawm' euc'. Punta kaw eun leuceng leukah' mi na', in' hpom seunga' chak' na' eun lih kah eun heul' pang' mi ing' ti nya eun na'."

Petru' eun nang nya eun Kawneli'

²³ Hawc' ko', Petru' eun rap ri ti ce ing' meuh chec' ri nang nya na'. Hawc' ka na' ti seunyi, Petru' eun tang heul' mae' ce. Ec' awng' ut' nang veng Yu' pe na' ce ngon' ce ku hot' eun heul' yeut.²⁴ Hawc' ka na' ti seunyi, Petru' eun ing' rot nang veng Kae' sari' na'.

Kawneli' eun buih ko' ri rap ri ti ce. Eun pang' ec' awng' mae' a' mawo ri na' ce hk'on' ri.²⁵ Yam Petru' ing' lec eun nya na', Kawneli' eun hk'eup' eun. Eun nghup' ri keunam cung eun Petru' na' mae' hkopyawm' ri.²⁶ Daecti Petru' eun teuk' eun kuh'. Eun lah', "Kuh' cawng reu', ui' ri, ui' ku meuh peue yeut."

²⁷ Yam Petru' u ka puri ing' lec nang nya na', eun pun ri nyu peue heun' na' cu ce ri.²⁸ Petru' eun lah' a ri ce, "Peue Yu' da ti peue na' eun lawn yeuh a' mawo ri peue un' meuh peue ceu Yu' da na' ko', a' ko' glue ri heun ko', pe' ku yawng kleuc' eun ritroe ri na'. Daecti punta kaw ui' un' htuk' ri klawng peue ti ri peue eun meuh peue hk'aw' jeuk peue un' seunga' na', Peucawo' tuil' Eun ui' nyu a hawc'.²⁹ Kop awn' na yam pang' pe' ui' ing' na', ui' ku un' laee ploh' pleh' ri, ui' ing'. Ui' sum' mhaing' pe', 'A ci' meuh kop keunhaw', pe' vae' heul' pang' ui' ing'?"

³⁰ Kawneli' eun top' a, "Yam pon a ing' pun' seunyi na', yam buih hk'o' ui' mun' ti nya yam hk'a' pul loe' nali yam maet' maen' aen' na, a keulawn' kue' peue cuip' hk'eung ceng' ti peue, eun cawng nanggal' ui' na'.³¹ Eun lah', 'Kawneli', Peucawo' mhawng' Eun seng' hk'o' mi mun' na' mae' kuit rot Eun ri ku' teum' kawm mi peue hk'o' tuckyak na' ce hawc'.³² Cus' peue heul' nang veng Yu' pe na', heul' va peue muis Si' mon ku' klawng peue meuh Petru' na' eun ing' reu'.

Buih ut' eun nang nya eun Si' mon ku' meuh nang pleng' hak' na' eun. Nya eun na' a ut' keunam ka mha' seumut' na'.³³ Kop awn' na, ui' keulawn' cus' peue ri na' ce heul' pang' mi. Mun' keuting ri ing' mi. Punta kaw ye leuceng ku' Peucawo' kah Eun mi lah' ri ye na' ce ku ceu ka na', maet' maen' ye ut' nanggal' Eun Peucawo' gawm' euc' ri hawc'."

³⁴ Hawc' ko', Petru' eun tang' ri lah', "Maet' maen', pun ui' ri ceng' ri Peucawo' un' keue' Eun ri vang ces vang leumeus' ri peue neumneum hawc'.³⁵ Daecti Eun rap ri ti peue ceu ku ceu ku' lhat' til ri Heun na' mae' ku' yeuh ku' leupaws seumeu' na' ce.³⁶ Pe' ku yawng lawng leukah' tuil' Eun ri peue I' sarela' na' ce. A meuh leukah' mun' ren' kawm to' ri hk'a' kuit nyawk' kuit sam' ran cumyen' ku' suip ri ris ri neum Yesu' Hkrit meuh Eun Peucawo' peue gawm' euc' na'.³⁷ Pe' ku yawng lawng ku' meuh nang kuing' Yu' da tang' neum kuing' Galilae' na' ku duih' hk'a' kui' hawc' ka tuil' hk'a' cum' sangsawn' eun Yo' han na'.³⁸ A meuh lawng Peucawo' tang' Eun ri uin' Yesu' peue veng Nasaraet' na' Eun ri cu Eun Cit' seunga' chak' na' mae' ti' ca ri na', mae' lawng heul' Eun ti duih' hawc' ti duih', Eun yeuh ku' chak' mae' bai' Eun peue ut' hk'a' ruim ti' ca ka Satan na' ce ku peue ri, kopti Peucawo' ut' Eun mae' Heun.

³⁹ Ye meuh nang hkam' sa' hki' ka ku' yeuh Eun nang kuing' ce peue Yu' da na' mae' nang veng Yeru' salaem na' ku ceu ka. Ce toh ri tuik' Eun hk'a' pang' kleum' hku'.⁴⁰ Daecti loe' seunyi ka na', Peucawo' Eun tang yeuh Eun kuh' im', Eun tuil' peue nyu tu' ri na'.⁴¹ Peue hkuin' caee ri nyu Eun gawm' euc'. Ku' Peucawo' leuk Eun ri uin' ce kaw meuh nang hkam' sa' hki' na' ce nyu Eun koe. Peue aen' meuh a ye ri, ye hk'asom' mae' Heun hawc' kuh' im' Eun hk'ai' hk'a' yeum ri na'.⁴² Eun tuil' leukah' ri ye, kah ye sangsawn' leukah' mun' ren' kawm na' ri peue heun' na' ce. Eun kah ye meuh nang hkam' sa' hki' ka lawng meuh Eun ku' Peucawo' tang' Eun Eun meuh nang taws' a' mu ri peue im' mae' peue yeum na' ce.⁴³ Peue suip leukah' Eun Peucawo' na' ce gawm' euc' ce hkam' sa' hki' ka lawng Eun na'. Ce lah', 'Peue yum' Eun na' ce ku peue kaw ce pun ploeh' map' ri muis Eun na'."

⁴⁴ Yam Petru' buih lah' eun leukah' aen' a na', Cit' seunga' chak' na' a lih hk'a' pang' peue pun ri mhawng' leukah' aen' a na' ce gawm' euc' ri.⁴⁵ Peue yum' ce ton' duing' hak' ri hawc' ku' hot' Petru' eun na' ce am' nyawk' ri Peucawo' Eun ku vae' buit Cit' seunga' chak' na' lih hk'a' pang' peue un' meuh peue ceu Yu' da na' ce.⁴⁶ Kopti pun ce ri mhawng' peue awn' lah'

ce leukah ' peue ceu heun ' ceu suk ' seun ' Peucawo ' Eun na ' .

Hawc ' ko ' , Petru ' eun lah ' , ⁴⁷ "Peue aen ' kaw ce un ' pun ri rap ri ti hk'a ' cum ' ri leuum ' na ' , a ' nhaw ' ci ' kaw ham ' tap ce? Ce ku pun Cit ' seunga ' chak ' na ' se-un ' ye ri yeut." ⁴⁸ Kop awn ' na, Petru ' eun kah ce rap ri ti hk'a ' cum ' na ' hk'a ' naee muis Eun Yesu ' Hkrit na ' . Hawc ' ko ' , ce hk'o ' Petru ' eun ut ' mae ' ti lal ' loe ' seunyi.

Petru ' eun ris ce mhawng ' lawng ku ' yeuh ri

11 Peue caee Eun Yesu ' na ' mae ' ec ' awng ' ut ' nang kuing ' Yu ' da na ' ce ku duih ' ce pun ri mhawng ' lawng peue un ' meuh peue ceu Yu ' da na ' ce ku rap ri ti leukah ' Eun Peucawo ' na ' . ² Kop awn ' na yam Petru ' huk ' eun nang veng Yeru ' salaem na ' , peue Yu ' da yum ' pun ri ton ' duing ' hak ' ri na ' ce ram ri he-un. ³ Ce lah ' , "Lec mi nang nya ce peue un ' meuh peue ceu Yu ' da na ' , mi hk'asom ' mae ' ce."

⁴ Kop awn ' na, Petru ' eun lah ' ris lawng ti ceu hawc ' ti ceu na ' tang ' neum yamla ka na ' ri ce. Eun lah ' a, ⁵ "Yam buih hk'o ' ui ' mun ' nang veng Yu ' pe na ' , ui ' pun ri nyu limit. Ku ' seun ' hpen ' keuting mawt ce ' ri pun ' plak ' na ' a ruic ' ri lih neum pang mao ' na ' lih ri vang ut ' ui ' na ' . ⁶ Yam seuluil ' ui ' hk'a ' naee ka na ' , ui ' pun ri nyu sat ' cung pun ' plak ' ka pang bhen ' keute ' na ' , sat ' nang hk'i, sat ' muilmal sat ' leun ri na ' mae ' sim ' peul ' eo ' nang vawo na ' ce. ⁷ Hawc ' ko ' , ui ' pun ri mhawng ' seng ' na ' lah ' ka a ri ui ' , 'Petru ' , kuh ' ng-hawm ' mi hk'a pawn ' a reu ' .

⁸ Ui ' top ' a, 'Uih ' Cawo ' , ku ' hk'aw ' jeuk mae ' ku ' un ' seunga ' na ' un ' duing lec a moeng ui ' na ' saec ' ti pok.'

⁹ Seng ' na ' a tang laws ' neum pang mao ' na ' lal ' pok ti pok, 'Ku ' Peucawo ' saic ' Eun seunga ' hawc ' na ' , pawlaee lah ' a meuh ku ' hk'aw ' jeuk.' ¹⁰ A meuh seun ' awn ' na hton loe ' pok ka na ' , a tang ti ri keutah huk ' pang mao ' .

¹¹ Yam awn ' na, peue cus ' ri heul ' ri ui ' neum veng Kae ' sari ' loe ' peue na ' ce kuit ' keunam nya vang ut ' ui ' na ' . ¹² Cit ' seunga ' na ' a lah ' a ri ui ' , 'Pawlaee kangkae, heul ' mae ' ce reu ' . ' Ec ' awng ' les peue aen ' ce ku hot ' ui ' heul ' . Ye heul ' lec nya eun peue awn ' na. ¹³ Eun ris ye mhawng ' lawng pun eun ri nyu in ' hpom puc eun ri nang nya ri na ' . In ' hpom na ' eun lah ' , 'Cus ' peue heul ' klawng Si ' mon ku ' klawng peue meuh Petru ' na ' eun nang veng Yu ' pe na ' reu ' . ¹⁴ Eun kaw ris mi mhawng ' lawng ku ' ti ceu. Kopti meuh a lawng aen ' na,

tu ' mi na ' mae ' peue nya peue hk'ul ' mi na ' pe ' gawm ' euc ' kaw pe ' pun hk'a ' htut lawtpon na ' .'

¹⁵ Yamla ui ' ri lah ' ris a na ' , Cit ' seunga ' chak ' na ' a lih hk'a ' pang ce seun ' lih ka hk'a ' pang e ' nanggal ' aen ' a na ' . ¹⁶ Yam awn ' na, ui ' kuit rot ri leukah ' Yesu ' lah ' Eun, 'Yo ' han tuil ' eun hk'a ' cum ' na ' ri pe ' ri leu-um ' . Daecti pe ' kaw pun ri rap ri ti hk'a ' cum ' na ' ri Cit ' seunga ' chak ' na ' .' ¹⁷ Kop awn ' na, Peucawo ' Eun lawn tuil ' lapsawng ' ri ce keuteul puri seun ' tuil ' Eun ri e ' ku ' yum ' Yesu ' Hkrit Eun na ' e ' ko ' , ui ' ci ' meuh a ' nhaw ' , ui ' vae ' kaw kuit ri to ' tam ' Peucawo ' Eun."

¹⁸ Yam mhawng ' ce lawng aen ' a na ' , ce un ' laee kue ' ku ' kaw ram ri heun baee. Ce suk ' seun ' Peucawo ' Eun. Ce lah ' , "Yeuh keutit ' ko ' , saec ' meuh peue un ' meuh peue ceu Yu ' da na ' ce, Peucawo ' Eun ku kah ce taws ' hpum ' fuin map ' ri lec nang civit im ' na ' yeut."

Muk kon ' Hkrit nang veng Anhti ' ok

¹⁹ Yam awn ' na, peue taic ' jah heul ' kopti lawng Sateh-pan hkam ' eun ku ' keunhap ' na ' ce heul ' rot nang kuing ' Hpi ' ni ' sia, kaw ' kuing ' Sai ' plas ' na ' mae ' veng Anhti ' ok na ' . Ce lah ' ris leukah ' mun ' ren ' kaw na ' ri peue Yu ' da na ' ce koe. ²⁰ Daecti ku ' ing ' neum kaw ' kuing ' Sai ' plas ' mae ' veng Sai ' rin ' na ' ce ing ' rot veng Anhti ' ok na ' . Ce ku lah ' ris leukah ' mun ' lawng Eun Cawo ' Yesu ' na ' ri peue Helasa ' na ' ce yeut. ²¹ Peuca-wo ' Eun teum ' kawm ce. Peue heun ' na ' ce yum ' . Ce plin ' hpum ' ri ing ' hk'a ' Eun Peucawo ' na ' .

²² Yam lawng aen ' rot a ri muk kon ' Hkrit nang veng Yeru ' salaem na ' ce na ' , ce cus ' Banabas ' eun heul ' nang veng Anhti ' ok na ' . ²³ Yam rot eun teh ' na ' , eun pun ri nyu sa ' hki ' ka mun ' Eun Peucawo ' na ' . Eun ren ' kaw nyawk ' . Punta kaw ce hpum ' keutawn ' seupit ri Cawo ' Yesu ' Eun na ' , eun tuil ' kaw ' reng ri ce gawm ' euc ' . ²⁴ Banabas ' eun meuh peue chak ' , eun htonnuk ri Cit ' seunga ' chak ' na ' mae ' hk'a ' yum ' na ' . Peue heun ' na ' ce tang ing ' yum ' Cawo ' Yesu ' Eun.

²⁵ Hawc ' ko ' , Banabas ' eun heul ' sok Saw ' lu eun nang veng Tarsas ' na ' . ²⁶ Yam pun eun ri nyu eun na ' , eun va eun ing ' nang veng Anhti ' ok na ' . Ka hk'om mae ' muk kon ' Hkrit na ' ce mae ' sangsawn ' peue cum heun ' na ' ce ti neum nuk. Muis lah ' tapae ' na ' ce meuh kon ' Hkrit na ' , a la ri lah ' ri nanggal ' nang veng Anhti ' ok na ' .

²⁷ Yam awn ' na, peue suip leukah ' Eun Peucawo ' na ' ce ngon ' , ce lih neum veng Yeru ' salaem na ' ce rot nang veng Anhti ' ok na ' . ²⁸ Hk'a ' naee ce ri, ku ' muis Agabas ' na ' eun kuh ' tamnai ri Cit ' seunga ' na ' . Eun lah ' a kaw

kue' ku' ut' ngeup' keuting ri pang bhen' keute' vang peue suik' Ro' ma na' u' peung ce na' gawm' euc' ka. (Ku' ut' ngeup' keuting awn' na, a pucti meuh cu eun cawo' Hkaodi' as' na'.)²⁹ Kop awn' na, tapae' na' kaw ce pawng' puri teum' kawm ec' awng' ut' nang kuing' Yu' da na' ce seun' sawng' kue' ce kaw' reng na', ce kuit a deut.³⁰ Ce yeuh a seun' awn' na. Ce bu' lap-sawng' na' ri Banabas' eun mae' Saw' lu ka ri ro' kan nang kawt ce muk kon' Hkrit na' ce.

Petru' lawtpon eun htawng' ri ku' hk'o' am'

12 Yam awn' na, punta hkun' haw' hkam' Herot' kaw eun keunhap' peue ut' hk'a' naee muk kon' Hkrit na' ce, eun mheut' ri ti ce.² Eun kah peue bhat' Yakop' ec' Yo' han na' eun yeum ri leungawng.³ Yam nyu eun htuk' a hpum' ce peue Yu' da na', eun ku kah peue mheut' ri ti Petru' eun yeut. Lawng aen' a keut' kue' yam pawe un' seue' hkawomun' is' paeng na'.⁴ Hawc' eun mheut' ri ti Petru' eun ko', eun seue' eun nang htawng' na'. Eun kah peue suik' pun' cum na' ce ko' eun pok ka ti cum, cum ka pun' peue. Eun kuit ri kaw hue' ri taws' a' mu ri Petru' eun nanggal' ce peue heun' na' yam pawe vel nya na' hawc' ka na'.

⁵ Kop awn' na, Petru' eun pun ri hk'awng' ri nang htawng' na'. Daecti muk kon' Hkrit na' ce sae' caee' hk'o' mun' pun eun ri Peucawo' Eun.

⁶ Bul nanggal' ka yam cawo' Herot' kaw eun hue' ri taws' a' mu ri heun na', Petru' eun buih it' nang seu-na' ka peue suik' lal' peue na'. Ce mawt eun ri mu' lhec' lal' nyeng. Peue suik' ko' yam' na' ce ku cawng ri kaw n' nang leuva' htawng' na'.⁷ A keulawn' kue' in' hpom Eun Peucawo' ti peue pucti, ku' ceng' na' a ceng' ing' lec hkawng awn' na. In' hpom na' eun dah lung' kang eun Petru' na', eun sawl' eun kuh'. Eun lah', "Kuh' vaeavae." Hawc' ko', mu' lhec' na' a bhuic' hk'ai' plong' ti' eun na'.

⁸ Hawc' ko', in' hpom na' eun lah' a ri heun, "Mawt sae' caet' mi na', cuip' jhaep' mi na' reu'." Petru' eun ku yeuh a. Hawc' ko', in' hpom na' eun lah', "Cuip' hk'o' keuting mi na'. Hawc' ko', mi na' hot' ui' heul'."⁹ Petru' eun pucti hot' in' hpom na' eun heul' hk'ai' htawng' na'. Daecti eun un' yawng ku' yeuh eun in' hpom na' meuh a ku' neum, eun hteum' ri buih nyu limit.¹⁰ Yam puc ka ri pon peue suik' ko' yam' cum nanggal' mae' cum hot' na' ce na', ka rot ri leuva' lhec' lec nang veng na'. Punta kaw ka lec leuva' na', a dah' meun ri ka. Yam heul' rot ka lang' hk'a' na', in' hpom na' eun keulawn' gah' hk'ai' heun.

¹¹ Yam awn' na, Petru' eun tang pawn kui' ri. Eun lah', "Maet' maen', pun ui' ri yawng Peucawo' cus' Eun in' hpom ri lih teum' kawm ui' pon hk'ai' dak ti' eun cawo' Herot' mae' ku' peue Yu' da na' kuit ce ri kaw yeuh ui' lu na' neum hawc'."

¹² Yam pun eun ri pawn lawng aen' a na', eun heul' ri nya ka Mari' meuh ma eun Yo' han na', peue ku klawng eun meuh Maku' yeut. Nya awn' a meuh vang peue heun' na' hk'om ce puri hk'o' mun'.¹³ Yam Petru' toe' eun leuva' ru ka hkum nya na', mhai' beun' muis Ro' da na' eun ing' ri leuva' na'.¹⁴ Yam pun eun ri mhawng' meuh a seng' eun Petru' na', kopti ren' nyawk' eun, eun un' tah' leuva' na' eun hk'uih ing' lec nya na'. Eun klawng ri lah', "Petru' ut' eun mae' leuva' na'."

¹⁵ Ce lah' a ri heun, "Meuh mi peue ma' rat aw?" Daecti yam gawm lah' eun meuh a neumneum, ce ku lah', "Na' meuh cit' eun Petru' na'."

¹⁶ Daecti Petru' eun kaw n' meung toe' ri leuva' na'. Yam tah' ce leuva' na' ce nyu meuh a heun ri na', ce am' nyawk'.¹⁷ Eun kvae' ti' ri kah ce dit' ti. Hawc' ko', lawng Peucawo' ti Eun eun lih hk'ai' htawng' na' a yeuh sa' nhaw' na', eun ris ce mhawng' a. Eun ku tuil' leukah' ri ce, "Ris Yakop' eun mae' ec' awng' eun na' ce mhawng' lawng aen' na yeut reu'." Hawc' ko', eun tang pucti heul' vang taw' seubu na'.

¹⁸ Yam ceng' ka na', peue suik' na' ce tuin' tung yo' ya' ri Petru' eun ci' na' yeuh sa' nhaw'.¹⁹ Hawc' cawo' Herot' heul' sok eun Petru' eun hk'awp' na', daecti kopti un' laee hk'eup' eun eun na', eun hki' mhaing' peue suik' ko' yam' na' ce. Eun tuil' leukah' kah ce toh ce.

Cawo' Herot' yeum eun

Hawc' awn' na, cawo' Herot' eun kuh' neum kuing' Yu' da na' eun heul' ut' nang veng Kae' sari' na' ti cu hkao'.²⁰ Nanggal' aen' na, cawo' Herot' un' htuk' eun peue veng Tai' ra' mae' peue veng Si' don na' ce. Maet' maen', ce cu peue muis Balatas' ku' meuh mhai' cawo' Herot' yum' pun eun na', ce pong puri ing' ri cawo' Herot' eun. Kopti kaw ce htuk' ri puing kuing' eun cawo' Herot' pun ku' hk'a' ku' som' na', ce ing' hk'o' ri htuk' lung eun.

²¹ Yam rot a seunyi hpawt' eun cawo' Herot' na', eun dok' hk'eung hkun' haw' hkam' ri mok' pang ten na', eun leukah' ri peue heun' na' ce.²² Ce klawng ri lah', "Seng' aen' meuh a seng' Peucawo', un' meuh a seng' peue."²³ Kopti cawo' Herot' un' tuil' eun munhpung' ri

Peucawo' Eun na', in' hpom Eun Peucawo' na' eun keulawn' yeuh eun peuyhat, rec na' a hk'a eun yeum.

²⁴ Daecti leukah' Eun Peucawo' na' a baet ri keuting vah heul'.

Cus' Banabas' eun mae' Saw' lu ka

²⁵ Hawc' Banabas' eun mae' Saw' lu yeuh ka kan' teum' kawm peue na', ka kuh' neum veng Yeru' salaem tang ing' nang veng Anhti' ok na'. Ka ku va Yo' han ku' klawng peue meuh Maku' na' eun hot' ri.

13 Muk kon' Hkrit nang veng Anhti' ok na' ce kue' peue suip leukah' Eun Peucawo' mae' seura'. A meuh Banabas', Si' me' on ku' klawng peue meuh Ni' ga', Lusias' peue kuing' Sai' rin', Mane (ku' keuting mae' cawo' Herot' Anhti' pas' eun) mae' Saw' lu ce. ² Yam buih eut' ce ku' hk'a ri faee' Peucawo' Eun na', Cit' seunga' chak' na' a lah', "Punta Banabas' mae' Saw' lu kaw ka yeuh kan' ku' klawng ui' ka yeuh na', tang' ri uin' ka reu'." ³ Kop awn' na yam hawc' ce eut' ku' hk'a ri hk'o' mun' na', ce tang' ti' ri hk'a' pang ka. Ce cus' ka heul'.

Nang kaw' kuing' Sai' plas'

⁴ Cit' seunga' chak' na' a cus' ka lih nang veng Seluki' na'. Ka pawk reu neum mawn' na', ka heul' nang kaw' kuing' Sai' plas' na'. ⁵ Yam rot ka nang veng Salamis' na', ka sangsawn' leukah' mun' Eun Peucawo' na' nang sa' la vang hk'o' mun' ce peue Yu' da na'. Yo' han eun ku ut' mawn'. Eun meuh nang teum' kawm ka.

⁶ Ce heul' ti duih' hawc' ti duih' nang kaw' awn' na. Yam rot ce nang veng Pahpos' na', ce pun ri hk'eup' peue Yu' da ku' meuh peue cang kahta'. Eun meuh peue guil ri meuh peue suip leukah' Eun Peucawo' muis Ba-Yesu' na'. ⁷ Peue awn' eun meuh peue eun cawo' veng muis Seugi' as' Hpaw' luas' na'. Cawo' veng awn' eun meuh peue heng' yawng. Kopti sum' mhawng' eun lawng leukah' Eun Peucawo' na', eun cus' peue heul' klawng Banabas' eun mae' Saw' lu ka. ⁸ Daecti E' li' mas' (a meuh muis Helasa') peue cang kahta' na' eun ham' tap ka, eun co' ca' ri yeuh cawo' veng na' eun un' yum'. ⁹ Saw' lu ku' lah' peue meuh Paw' lu na' eun htonnu' ri kue' ri Cit' seunga' chak' na'. Eun keue' seumeu' lah' a ri E' li' mas' eun, ¹⁰ "Meuh mi kon' Satan, mi ku meuh ransu ka ku' leupaws seumeu' na' ku ceu ka. Mi cang chi' lai mae' cang yeuh ku' rai. Yeuh mi hk'a' cawp' Eun Peucawo' a vok' na'. Kaw mi un' yut' a aw?" ¹¹ Maet' maen' ti' Eun Peucawo' na' kaw a tawm'

mi. Mi kaw ngai' fec' un' laee nyu ceng' seunyi na' ti vut ti yam."

A keulawn' kue' ku' duim' lawng ghuim' eun. Eun muik' mak' sok ri is' nang kaw teuk' ti' ri na' heul'. ¹² Yam cawo' veng na' nyu eun ku' meuh awn' a na', kopti am' eun ri ku' sangsawn' lawng leukah' Eun Peucawo' na', eun ku yum' yeut.

Nang veng Anhti' ok kuing' Pi' si' di'

¹³ Paw' lu eun mae' a' mawo eun na' ce pawk reu neum nang veng Pahpos' na', ce heul' nang veng Peukah kuing' Pamhpi' li' na'. Yo' han eun gah' hk'ai' ka teh', eun keutah ing' nang veng Yeru' salaem na'. ¹⁴ Neum veng Peukah na', ka suip ri heul' rot nang veng Anhti' ok kuing' Pi' si' di' na'. Yam meuh a seunyi Sin' na', ka lec ri mok' nang sa' la vang hk'o' mun' na'. ¹⁵ Hawc' lip htawm leukah' ritroe mae' htawm ce peue suip leukah' Eun Peucawo' na', ro' ka sa' la vang hk'o' mun' na' ce kah peue heul' lah' a ri ka, "Ec' awng', pe' lawn kue' leukah' kaw tuil' kaw' reng ri peue hk'om na' ce ko', lah' a reu'."

¹⁶ Paw' lu eun kuh' yuk ti' ri. Eun lah', "Peue I' sarela' na' mae' peue un' meuh peue ceu Yu' da ku' faee' Peucawo' Eun na' pe', leuceng ui'. ¹⁷ Peucawo' ce peue I' sarela' na' leuk Eun ri ti a' ta' keuting e' na' ce. Yam ut' ce nang kuing' E' ji' tu' na', Eun kah ce huk' hawn' vah keuting heun'. Eun va ce pucti lih hk'ai' kuing' awn' na ri ti' ca keuting ri na'. ¹⁸ Eun yeun' hkam ku' yeuh ce na' nang vang hk'oh' hk'oeng' na' rot pun' kul' neum. ¹⁹ Eun yeuh peue ceu a' res ceu ut' nang kuing' Hkanaan na' ce lu. Hawc' ko', Eun tuil' kuing' ce peue awn' a meuh sin' ri peue ri na' ce. ²⁰ Lawng aen' a ling' hk'ao pun' pak' hpawn' kul' neum.

Hawc' awn' na, Peucawo' Eun tuil' cawo' taws' a' mu ri ce rot ri cu eun Samoela' meuh peue suip leukah' Eun Peucawo' na' eun. ²¹ Hawc' awn' na, ce hk'o' ri is' hkun' haw' hkam'. Peucawo' Eun tuil' Saw' lu kon' eun Hkis' ceucat eun Benyamin na' eun ri ce. Eun u' peung ce pun pun' kul' neum. ²² Hawc' Peucawo' ti Eun Saw' lu eun hk'uc' na', Eun tang yuk Davit' eun meuh hkun' haw' hkam'. Peucawo' Eun hkam' sa' hki' lawng eun Davit' na'. Eun lah', 'Nyu Ui' Davit' kon' eun Yesae' na' eun htuk' hpum' ri nyawk'. Eun kaw yeuh ku' sum' kah Ui' eun yeuh na' ku ceu ka.'

²³ Neum ceucat eun Davit' na', Peucawo' Eun ti ri tuil' Yesu' Cawo' teum' kawm htut peue I' sarela' na' ce lawtpon na' seun' yeuh Eun kati ri hawc' na'. ²⁴ Nanggal' ka yam Yesu' un' nang tang' Eun ri yeuh kan' na', Yo' han eun sangsawn' lawng taws' hpum' fuin map' ri

na' mae' lawng rap ri ti hk'a' cum' na' ri peue I' sare-
la' na' ce gawm' euc'.²⁵ Yam Yo' han kaw eun hk'aws'
hawc' kan' ku' yeuh ri na', eun lah', 'Pe' ci' hteum'
ui' meuh a' nhaw'? Hpaw ui' ca' meuh peue buih sok
pe' na' Eun. Daecti a kue' peue buih ing' hk'a' kui' ui'
ti peue, ui' un' kuing' ri kaw kah' mu' jhaep' Eun
na'.'

²⁶ Ec' awng' ku' meuh ceucat kon' hk'i eun Abraham
na' mae' peue un' meuh peue ceu Yu' da ku' lhat' til ri
Peucawo' Eun na' pe', leukah' lawng hk'a' htut lawt-
pon aen' lih rot ka na' meuh a kopti e' ri.²⁷ Peue veng
Yeru' salaem na' mae' hkun' cawo' ce na' un' yawng
ce Yesu' meuh Eun a' nhaw'. Ce saec' taws' a' mu
ciyang Eun ko', ce yeuh ku' lah' ce peue suip leukah'
Eun Peucawo' lawng Eun Yesu' ku' lip ce seunyi Sin' ku
sin' na' nuk.²⁸ Ce saec' un' nyu tut kuing' ri yeum ri
Heun, daecti ce hk'o' cawo' Pi' lat eun toh Eun.²⁹ Hawc'
yeuh ce a htonnuk seun' ku' tem' a ri lah' lawng Eun
na' gawm' euc' ka na', ce ti nong Eun na' lih hk'ai'
kleum' hku' na'. Ce seue' Eun nang keutui' leumuic.
³⁰ Daecti Peucawo' Eun tang yeuh Eun kuh' im' hk'ai'
vang yeum ri na'.³¹ Peue tawn hot' Eun tang' neum kuing'
Galilae' na' rot nang veng Yeru' salaem na' ce pun
ri nyu Eun heun' seunyi. Maet' maen', ce meuh nang
hkam' sa' hki' ri peue e' na' ce.

³² Ris ya leukah' mun' ren' kawn aen' a ri pe'. A meuh
kati Peucawo' tuil' Eun ri a' ta' keuting leumah' e' na'
ce.³³ Pun ku' meuh kon' hk'i ce na' e', Peucawo' Eun
yeuh a htonnuk hawc' ri yeuh Eun Yesu' Eun kuh' im'
seun' tem' a ri uin' ri nang htawm Suk' seun' nambat
keuting leual' ka na' a tem' ri,

'Meuh Mi Kon' ai' Ui',

seunyaen' Ui' pun ri meuh Kuing' Mi hawc'.' †

³⁴ Lawng ku' neumneum Peucawo' tang yeuh Eun Yesu'
Eun kuh' im' hk'ai' vang yeum ri, Eun un' lae rot vang
seueum' jah na' a tem' ri nang htawm seubu na' yeuhk-
i',

'Kaw Ui' tuil' mun' seunga' chak' keutawn' seupit
seun' tuil' Ui' kati ri Davit' eun na' ri pe'.' ††

³⁵ Nang tawk seubu ka na' a tem' ri,

'Mi kaw un' kah Peue seunga' chak' ri na' Eun
seueum'.' ‡

³⁶ Kopti yam Davit' yeuh eun ku' cawp' alo Eun Peuca-
wo' nang cu ri na' hawc' na', eun ku yeum. Peue pu-
ing' eun mae' a' ta' keuting leumah' eun na' ce. Tu'
eun na' a ku seueum'.³⁷ Daecti ku' Peucawo' yeuh Eun
kuh' im' na', Eun un' duing seueum'.

³⁸ Kop awn' na ec' awng' na' pe', ui' sum' kah pe'
yawng kopti meuh a Yesu' aen' Eun, pe' pun hk'a'
ploe' map' na'.³⁹ Peue yum' Yesu' Eun na' ce ku peue
ri, ku' leukah' ritroe eun Mo' se un' cang yeuh ka ce pon
a na', ce pun ri pon a gawm' euc' ka.⁴⁰ Uin' sati ri meu-
lamlam ri reu'. Pawlaee kah ku' lah' ce peue suip
leukah' Eun Peucawo' na' meuh ri pe'. A lah',

⁴¹ 'Keue' reu',

peue lah' ku' un' nawpsang na' kaw pe' am', pe'
kaw lulaic.

Kopti kaw Ui' yeuh ku' ti ri ceu hk'a' naee seunyi
meuyam pe' na'.

A saec' na' kue' peue ti ri peue lah' pe' mhawng' a
na' ko',

pe' hkuin' kaw yum' a.' ††

⁴² Yam Paw' lu eun mae' Banabas' puc ka ri heul'
hk'ai' sa' la vang hk'o' mun' na', ce hk'o' ka tang ris
lawng aen' na sin' hot' bae.⁴³ Yam hawc' hk'om ce
na', peue Yu' da mae' peue tam' mun' tam' sin' ing'
lec ritroe ce peue Yu' da na' ce hot' Paw' lu eun mae'
Banabas' ka heun' peue. Ka leukah' mae' ce, ka kah ce
ut' hk'a' naee mun' sin' Eun Peucawo' na' laleung.

⁴⁴ Bae seunyi Sin' hot' na', peue nang veng na' ce
dae ing' cu ri leuceng leukah' Eun Peucawo'
gawm' euc' ri.⁴⁵ Yam peue Yu' da na' nyu ce peue cum
heun' na' ce na', ce hkoe' mang' ka nyawk'. Ce
top' tawt ku' lah' eun Paw' lu na'. Ce lah' leukah' cu'
ku' kleuc' ri heun.

⁴⁶ Paw' lu eun mae' Banabas' ka htu' hting' ce ri
hpum' hat' han' ri. Ka lah', "Kaw ya htuk' ri lah'
leukah' Eun Peucawo' na' ri pe' nanggal'. Daecti pe'
lawn tecla a mae' pe' sawn' meun ri kaw un' kuing' ri
pun cit' tip a' yu tip cot' cu na' ko', ya kaw heul' ri peue
un' meuh peue ceu Yu' da na' ce.⁴⁷ Kopti Peucawo' tuil'
Eun leukah' ri ya yeuhki' na',

'Punta kaw mi ti hk'a' htut lawtpon na' rot ti sut' ka
bhen' keute' na',

Ui' yeuh mi meuh ku' ceng' pun peue un' meuh peue
ceu Yu' da na' ce.' ††

⁴⁸ Yam peue un' meuh peue ceu Yu' da na' pun ce ri
mhawng' leukah' aen' a na', ce ren' kawn yuk leukah'
Eun Peucawo' na' lhung' keuting. Peue hkvet' ti uin' ri
kaw pun cit' tip a' yu tip cot' cu na' ce ku yum'.

⁴⁹ Leukah' Eun Peucawo' na' a laws' heul' hk'awp'
nang kuing' awn' na.⁵⁰ Daecti peue Yu' da na' ce heul'
cu' ci' beun' htan lhung' ku' hkopyawm' Peucawo'
Eun na' mae' a' ta' me ro' kan nang veng awn' ce. Ce
cu' peue awn' ce keunhap' Paw' lu eun mae' Ban-

† Suk' seun' 2:7†† I' saya' 55:3‡ Suk' seun' 16:10

‡† Habaku' 1:5‡† I' saya' 49:6

abas ' ka, ra ka hk'uih hk'ai ' kuing ' awn ' na. ⁵¹ Kop awn ' na, punta kaw a meuh sa ' hki ' un ' rap ka ri ti peue awn ' ce na ' , ka raws ' ri tec peuluung pit dak cung ri na ' . Hawc ' ko ' , ka heul ' nang veng I ' kaw ' ni ' na ' . ⁵² Tapae ' na ' ce htonnuk ri ku ' ren ' kaw na ' mae ' Cit ' seunga ' chak ' na ' .

Nang veng I ' kaw ' ni '

14 Nang veng I ' kaw ' ni ' na ' , Paw ' lu eun mae ' Banabas ' ka ing ' lec nang sa ' la vang hk'o ' mun ' ce peue Yu ' da na ' seun ' ku ' tawn yeuh ka na ' . Kopti sangsawn ' ka mawn ' a lec hpum ' ce nyawk ' na ' , peue Yu ' da na ' ce mae ' peue un ' meuh peue ceu Yu ' da na ' ce ing ' yum ' heun ' peue. ² Daecti punta peue un ' meuh peue ceu Yu ' da na ' kaw ce kue ' hpum ' ces ri peue yum ' na ' ce na ' , peue Yu ' da un ' yum ' na ' ce heul ' cu ' ci ' ce. ³ Paw ' lu eun mae ' Banabas ' ka ku koe ut ' mawn ' ling ' . Ka hpum ' hat ' han ' sangsawn ' ce pun Peucawo ' Eun. Peucawo ' Eun htawhkam lawng mun ' sin ' ri na ' ri kah ka cang yeuh ku ' hk'o ' am ' na ' mae ' het ' keuting na ' ce. ⁴ Peue veng na ' ce gvah ri meuh lal ' muk. Ngon ' ce ut ' hk'a ' ce peue Yu ' da na ' , ngon ' ce ut ' hk'a ' ce peue caee Eun Yesu ' na ' . ⁵ Peue un ' meuh peue ceu Yu ' da na ' ce mae ' peue Yu ' da na ' ce bae ro ' kan ce na ' ce pawng ' puri kaw klaee ' dhim ' Paw ' lu eun mae ' Banabas ' ka ri seumu. ⁶ Daecti kopti yawng ka kan ' awn ' na, ka hk'uih heul ' nang kuing ' Li ' hkaoni ' veng Lis ' tra ' , veng Deube mae ' kuing ' kue ' keunam caonao ' na ' ce. ⁷ Ka suip ri sangsawn ' leukah ' mun ' ren ' kaw na ' nang kuing ' awn ' na.

Dhim ' Paw ' lu eun ri seumu nang veng Lis ' tra '

⁸ Nang veng Lis ' tra ' na ' a kue ' peue cung lu mok ' ri ka ti peue. Eun cung lu tang ' neum yam keut ' ri na ' . Eun un ' duing long hk'a ' saec ' ti pok. ⁹ Eun mok ' ri leuceng leukah ' sangsawn ' eun Paw ' lu na ' . Paw ' lu eun seu-luil ' eun. Yam Paw ' lu yawng eun kue ' eun hk'a ' yum ' kaw cang yeuh eun cuin na ' , ¹⁰ eun klawng ri lah ' laws ' a, "Kuh ' cawng reu .". Eun ku yawt ' ti kuh ' cawng, eun tang ' ri long hk'a ' heul ' .

¹¹ Yam peue cum heun ' na ' nyu ce ku ' yeuh eun Paw ' lu na ' , ce klawng ri lah ' laws ' leukah ' Li ' hkaoni ' na ' , "Muk eun peucawo ' na ' lih yeuh ce ri seun ' peue ri e ' hawc ' .". ¹² Ce klawng Banabas ' eun meuh peucawo ' Sus ' . Kopti Paw ' lu leukah ' eun hk'a ' heun ' na ' , ce klawng eun meuh peucawo ' Heumes ' . ¹³ Peue jhawp ' rit eun peucawo ' Sus ' ut ' nang nya mun ' a un ' seungai veng na ' eun ti a ' moe mae ' hkawt ' peutai ing ' ri leu-

va ' ka veng na ' , kopti heun ri mae ' peue cum heun ' na ' sum ' tan ce ku ' tan ri Paw ' lu eun mae ' Banabas ' ka.

¹⁴ Daecti yam peue caee Eun Yesu ' Banabas ' eun mae ' Paw ' lu pun ka ri mhawng ' lawng awn ' a na ' , ka res hk'eung ri na ' , ka hk'uih ing ' lec nang ngon ' ce peue cum heun ' na ' . Ka ta ' ul ' ri lah ' a, ¹⁵ "Pe ' ri, a ci ' meuh kop keunhaw ' , pe ' vae ' yeuh ku ' yeuhki ' ? Saec ' meuh ya ri, ya ku meuh peue sum ' hpap seun ' pe ' ri yeut. Ya ti leukah ' mun ' ren ' kaw na ' ing ' ri pe ' . Punta kaw pe ' tecla ku ' un ' kue ' mun ' aen ' ce na ' , pe ' na ' ing ' ri Peucawo ' a ' yu im ' na ' Eun. Hpan pleng ' Eun mao ' , bhen ' keute ' , mha ' seumut ' mae ' ku ' kue ' hk'a ' naee awn ' ce gawm ' euc ' ka. ¹⁶ Leumah ' , Peucawo ' Eun tae ' peue ceu na ' ce gawm ' euc ' sawng ' yeuh alo ri na ' heul ' . ¹⁷ Daecti Eun kah a kue ' lawng ku ' kaw hkam ' sa ' hki ' ri ti. Eun yeuh ku ' chak ' ri na ' pucti lih ri tuil ' Eun lhe ' lih neum pang mao ' na ' mae ' yeuh Eun a kue ' meuyam kue ' pli ' kue ' seukuk na ' . Eun tuil ' pe ' is ' ku ' hk'a ku ' som ' htonnuk. Eun tuil ' hpum ' pe ' na ' ren ' kaw n kuit nyawk ' kuit sam ' ran htonnuk." ¹⁸ Ka saec ' lah ' a yeuhko ' , daecti peue cum heun ' na ' kaw ce tan ri ka na ' ka ham ' ce a kaw n ' nyhap ' .

¹⁹ Hawc ' awn ' na, peue Yu ' da ut ' nang veng Anhti ' ok na ' mae ' veng I ' kaw ' ni ' ngon ' na ' ce ing ' cop ' ri pun peue cum heun ' na ' ce ut ' hk'a ' ti. Ce dhim ' Paw ' lu eun ri seumu. Kopti hteum ' ce eun yeum na ' , ce ol ' ri heul ' tec eun hk'a ' nok ka veng na ' . ²⁰ Daecti yam tapae ' na ' ut ' ce rop eun na ' , eun tang kuh ' , keutah ing ' lec nang veng na ' . Hawc ' ka na ' ti seunyi, heun ri mae ' Banabas ' ka heul ' nang veng Deube na ' .

Keutah ing ' nang veng Anhti ' ok kuing ' Su ' ri '

²¹ Ka sangsawn ' leukah ' mun ' nang veng awn ' na, peue heun ' na ' ce tang meuh tapae ' . Hawc ' ko ' , ka keutah ing ' nang veng Lis ' tra ' , veng I ' kaw ' ni ' na ' mae ' veng Anhti ' ok na ' . ²² Punta kaw ka teum ' kawm tapae ' na ' ce reng keuting na ' , tuil ' kaw l ' reng ce kue ' hpum ' keutawn ' hk'a ' naee hk'a ' yum ' na ' . Ka sangsawn ' ce. Ka lah ' , "Punta kaw e ' pun ri lec nang kuing ' Eun Peucawo ' na ' , e ' kaw kah ri hkam ' ku ' tukhka heun ' ceu na ' .". ²³ Paw ' lu eun mae ' Banabas ' ka leuk muk kon ' Hkrit ku cum na ' ce is ' ro ' kan nang kawt. Punta kaw ka ap ce nang ti ' Eun Peucawo ' yum ' ce na ' , ka eut ' ku ' hk'a ri hk'o ' mun ' . ²⁴ Hawc ' ka rot hk'awp ' kuing ' Pi ' si ' di ' na ' , ka ing ' nang kuing ' Pamhpi ' li ' .

²⁵ Yam hawc ' ka sangsawn ' ri leukah ' mun ' nang veng Peukah na ' , ka lih nang veng Atali ' .

²⁶ Neum veng Atali ' na ' , ka tang pawk reu ing ' nang veng Anhti ' ok. A meuh vang ap peue ka hk'a ' naee mun ' sin ' Eun Peucawo ' punta kaw ka yeuh kan ' na ' . Maet ' - maen ' , ka yeuh kan ' awn ' na htonnuk hawc ' . ²⁷ Yam ing ' rot ka mawn ' na ' , ka klawng ri cu muk kon ' Hkrit na ' ce hk'om puri. Ka ris ce mhawng ' lawng ku ' Peucawo ' cu Eun ka yeuh na ' ce, mae ' lawng Peucawo ' tah ' Eun leuva ' hk'a ' yum ' ri peue un ' meuh peue ceu Yu ' da na ' ce. ²⁸ Ka ut ' mae ' tapae ' na ' ce mawn ' ling ' .

Hk'om puri nang veng Yeru ' salaem

15 Peue ut ' nang kuing ' Yu ' da na ' ce ngon ' ce ing ' nang veng Ahti ' ok na ' ce sangsawn ' lah ' a ri ec ' awng ' na ' ce, "Pe ' lawn un ' ton ' duing ' hak ' ri se-un ' Mo ' se tang ' eun ri uin ' ritroe na ' ko ' , pe ' kaw un ' cang pun hk'a ' htut lawtpon na ' ." ² Kopti meuh a leukah ' sangsawn ' aen ' a na ' , Paw ' lu eun mae ' Banabas ' ka htu ' hting ' ce nyawk ' . Kop awn ' na, punta kaw ce huk ' mhaing ' lawng ku ' kleuc ' aen ' a ri peue caee Eun Yesu ' na ' ce mae ' ro ' kan nang kawt na ' ce nang veng Yeru ' salaem na ' , ce leuk Paw ' lu, Banabas ' mae ' peue yum ' na ' ce ngon ' ce huk ' . ³ Muk kon ' Hkrit na ' ce cus ' ce huk ' . Yam hpa ' ce kuing ' Hpi ' ni ' sia na ' mae ' kuing ' Samari ' na ' huk ' , ce lah ' ris lawng peue un ' meuh peue ceu Yu ' da na ' leuploh ' ce hpum ' ri. Lawng aen ' a yeuh ec ' awng ' na ' ce ren ' kawn nyawk ' gawm ' euc ' ri. ⁴ Yam rot ce nang veng Yeru ' salaem na ' , muk kon ' Hkrit na ' ce, peue caee Eun Yesu ' na ' ce mae ' ro ' kan nang kawt na ' ce rap ri ti ce. Ka ris ce mhawng ' lawng ku ' Peucawo ' cu Eun ka yeuh na ' gawm ' euc ' ka.

⁵ Hawc ' ko ' , peue yum ' ut ' nang muk ce peue Hparisae ' na ' ce ngon ' ce kuh ' cawng ri lah ' , "Peue un ' meuh peue ceu Yu ' da na ' ce kaw kah ri ton ' duing ' hak ' ri, ce kaw kah ri hot ' leukah ' ritroe eun Mo ' se na ' ."

⁶ Punta peue caee Eun Yesu ' na ' ce mae ' ro ' kan nang kawt na ' kaw ce sa ' lit lawng ku ' kleuc ' aen ' a na ' , ce hk'om puri. ⁷ Hawc ' sa ' lit ce puri lawng aen ' na he-un ' heun ' na ' , Petru ' eun kuh ' cawng ri lah ' , "Ec ' awng ' na ' pe ' , pe ' ku yawng Peucawo ' leuk Eun ri ti ui ' hk'a ' naee pe ' tang ' neum nanggal ' aen ' na. Eun kah ui ' sangsawn ' leukah ' mun ' ren ' kawn ri peue un ' meuh peue ceu Yu ' da na ' ce, punta kaw ce pun ri mhawng ' , pun ri yum ' a. ⁸ Peucawo ' cang yawng nang hpum ' na ' Eun, rap Eun ri ti ce na ' yeuh Eun a pucti lih ri tuil ' Eun Cit ' seunga ' chak ' na ' ri ce seun ' tuil ' Eun a ri e ' na ' . ⁹ E ' ri mae ' ce ri Peucawo ' Eun un ' sawn ' e ' chat puri, kopti yeuh Eun hpum ' ce na ' seunga '

chak ' ri hk'a ' yum ' na ' hawc ' . ¹⁰ Kop awn ' na, maet ' - maen ' a ci ' meuh kop keunhaw ' pe ' vae ' long ri nawk Peucawo ' Eun ri uin ' ku ' klawm ' na ' pang seuplang ' ce tapae ' na ' ? A ' ta ' a ' ya e ' na ' ce mae ' e ' ri e ' ku un ' pe ku ' klawm ' aen ' na. ¹¹ Pawlaee yeuh a. Yum ' e ' kopti meuh a mun ' Eun Cawo ' Yesu ' na ' , e ' pun hk'a ' htut lawtpon na ' seun ' ce ri."

¹² Peue ing ' hk'om na ' ce dit ' ti leuceng Banabas ' eun mae ' Paw ' lu ris ka lawng het ' keuting na ' mae ' ku ' hk'o ' am ' ku ' Peucawo ' cu Eun ka yeuh ri peue un ' meuh peue ceu Yu ' da na ' ce. ¹³ Yam hawc ' ka leukah ' ri na ' , Yakop ' eun lah ' , "Ec ' awng ' na ' pe ' , leuceng leukah ' ui ' na ' reu ' . ¹⁴ Si ' mon eun ris e ' mhawng ' a hawc ' lawng nanggal ' ka na ' Peucawo ' yeuh Eun hk'a ' tukyak ri na ' pucti lih ri leuk Eun peue un ' meuh peue ceu Yu ' da na ' ce ing ' meuh peue ri ngon ' na ' .

¹⁵ Leukah ' lah ' eun na ' cawp ' a ku ' lah ' ce peue suip leukah ' Eun Peucawo ' tem ' ri nang htawm Seunga ' na ' yeut. A tem ' ri yeuhki ' ,

¹⁶ "Peucawo ' Cawo ' pleng ' ceu nang aen ' ce na ' Eun lah ' a,

"Tang ' neum maet ' maen ' na ' ,
Ui ' kaw tang ing ' pleng ' tup ' cung ' kus eun Davit ' na ' hk'u ' bae.

Saec ' meuh ku ' lhu ' jah na ' , Ui ' kaw tang mhe ' a.
Ui ' kaw tang pleng ' aen ' ce seun ' hk'im ' .

¹⁷ Punta peue kawn ' vang na ' ce
mae ' peue un ' meuh peue ceu Yu ' da ku ' peus muis
Ui ' na ' ce gawm ' euc ' na ' kaw ce sok Peucawo ' Eun." †

¹⁸ Lawng aen ' a yawng ri tang ' neum leumah ' .

¹⁹ Kop awn ' na, kuit ui ' e ' na ' un ' htuk ' ri yeuh ku ' suksak ri peue un ' meuh peue ceu Yu ' da ku ' hpawt ' ri ing ' ri Peucawo ' Eun na ' ce. ²⁰ Daecti e ' na ' kah ri tem ' ri tuil ' lai kah ce vel ku ' hk'a ' kue ' vang ri kopti ruphtu na ' , hk'a ' hkuit ' nawng ' tang ' , hk'a ' keune sat ' seurot ' ngok ri yeum mae ' hk'a ' nham ' , ²¹ kopti tang ' neum leumah ' na ' leukah ' ritroe eun Mo ' se na ' lip a ri nang sa ' la vang hk'o ' mun ' na ' ku Sin ' ku veng na ' ."

Peue hk'om na ' tuil ' ce lai ri peue yum ' un ' meuh peue ceu Yu ' da

²² Hawc ' ko ' , peue caee Eun Yesu ' , ro ' kan nang kawt na ' mae ' muk kon ' Hkrit na ' ce ku peue ce leuk peue hk'a ' naee ce lal ' peue punta kaw ka hot ' Paw ' lu eun mae ' Banabas ' ka heul ' nang veng Anhti ' ok na ' . Ce leuk ri pun Yu ' das ' (klawng peue meuh Basabas ') mae ' Silas ' ka. Peue lal ' peue aen ' ka meuh ro ' hk'a ' -

† Amo ' 9:11, 12

naee ec 'awng ' na ' ce.²³ Ce bu ' lai ri ce heul '. A tem ' ri yeuhki ',

“Lai aen ' meuh a lai heul ' neum peue caee Eun Yesu ' na ' mae ' ro ' kan nang kawt ku ' meuh ec 'awng ' pe ' .

Ec 'awng ' peue yum ' un ' meuh peue ceu Yu ' da ut ' nang veng Anhti 'ok kuing ' Su ' ri ' na ' mae ' kuing ' Si ' li ' si ' na ' pe ' .

²⁴Ye pun ri mhawng ' peue hk'a ' naee ye na ' ce ngon ' ye saec ' un ' kah ce heul ' ri pe ' , daecti ce heul ' . Ce heul ' suksak pe ' ri lah ' ku ' yeuh pe ' hpum ' un ' sam ' ran.²⁵ Kop awn ' na, ye ri gawm ' euc ' ye sahpaw ' ri leuk peue lal ' peue cus ' ka heul ' ri pe ' mae ' a ' mawo leumeus ' e ' Banabas ' eun mae ' Paw ' lu ka.²⁶ Ka meuh peue hat ' ri tan a ' yu ri pun muis Eun Cawo ' e ' Yesu ' Hkrit na ' Eun.²⁷ Kop awn ' na punta nang kaw ris pe ' mhawng ' lawng ku ' tem ' ye nang lai na ' , ye cus ' Yu ' - das ' eun mae ' Silas ' ka heul ' .²⁸ Cit ' seunga ' chak ' na ' mae ' ye ri kaw ye un ' po beus hk'a ' pang pe ' saec ' ti ceu na ' , a htuk ' hpum ' ye. Daecti pe ' kaw kah ri vel ceu nang aen ' ce.²⁹ Kaw pe ' kah ri vel hk'a ku ' hk'a tan ri ruphtu, hk'a nham ' , hk'a keune sat ' seurot ' ngok ri yeum na ' mae ' hk'a ' hkuit ' nawng ' tang ' na ' . Pe ' lawn cang vel ceu nang aen ' ce ko ' , chak ' ka nyawk ' . Kuit nyawk ' kuit sam ' ran reu ' .”

³⁰Peue awn ' ce pucti heul ' , ce heul ' rot nang veng Anhti ' ok na ' . Ce klawng muk kon ' Hkrit na ' ce hk'om. Hawc ' ko ' , ce tuil ' lai awn ' na ri ce.³¹ Yam muk kon ' Hkrit na ' lip ce lai na ' , ce ren ' mae ' tuil ' a kaw l ' reng ri.³² Saec ' Yu ' das ' eun mae ' Silas ' ka kopti meuh ka peue suip leukah ' Eun Peucawo ' na ' , punta kaw ka tuil ' kaw l ' reng yeuh ec 'awng ' na ' ce kaw l ' reng keuting na ' , ka sangsawn ' ce heun ' ceu.³³ Hawc ' ut ' ka mawn ' a koe ling ' na ' , ec 'awng ' na ' ce tang kah ka ing ' ri peue cus ' ka heul ' na ' ce mae ' kuit nyawk ' kuit sam ' ran ri.³⁴ Paw ' lu eun mae ' Banabas ' ka kaw n ' ut ' nang veng Anhti ' ok na ' . Ka ri mae ' peue seubu heun ' peue na ' ce sangsawn ' leukah ' mun ' Eun Peucawo ' na ' tiduih ' .

Kamkuit eun Paw ' lu eun mae ' Banabas ' un ' hot ' a puri

³⁶Hawc ' awn ' na, Paw ' lu eun lah ' a ri Banabas ' eun, “Ec 'awng ' ut ' hk'a ' naee veng vang tawn eo ' sangsawn ' a ' leukah ' mun ' ren ' kaw n na ' , ce ci ' na ' yeuh sa ' nhaw ' , a ' tang heul ' eo ' ri nom ' nawk ce pawh.”

³⁷Banabas ' eun ku sum ' va Yo ' han klawng peue meuh Maku ' na ' eun heul ' yeut.³⁸ Daecti Paw ' lu eun kuit a un ' htuk ' ri va eun heul ' . Kopti pok nanggal ' na ' Yo ' han tecla eun ka nang kuing ' Pamhpi ' li ' na ' , eun un ' laee suip ri yeuh kan ' mae ' ka na ' .³⁹ Ka htu ' ht- ing ' puri nyawk ' , ka gah ' hk'ai ' puri. Banabas ' eun va Maku ' eun pawk reu na ' heul ' nang kaw ' kuing ' Sai ' - plas ' na ' .⁴⁰ Daecti Paw ' lu eun leuk ri ti Silas ' eun ka heul ' . Ec 'awng ' na ' ce ap ka hk'a ' naee mun ' sin ' Eun Peucawo ' na ' .⁴¹ Paw ' lu eun heul ' lec nang kuing ' Su ' ri ' na ' mae ' kuing ' Si ' li ' si ' na ' . Eun yeuh muk kon ' Hkrit na ' ce kaw l ' reng keuting.

Ti ' mo ' se hot ' eun Paw ' lu eun mae ' Silas ' ka

16 Paw ' lu eun heul ' rot nang veng Deube na ' . Hawc ' ko ' , eun heul ' nang veng Lis ' tra ' na ' . Teh ' na ' , tapae ' ti peue ku ' muis Ti ' mo ' se na ' eun ut ' ri ka. Ma eun ka meuh peue Yu ' da, ka meuh peue yum ' . Kuing ' eun na ' eun meuh peue Helasa ' .² Ti ' mo ' se eun meuh peue muis chak ' hk'a ' naee ec 'awng ' ut ' nang veng Lis ' tra ' na ' mae ' veng I ' kaw ' ni ' na ' ce.³ Paw ' lu eun sum ' va Ti ' mo ' se eun hot ' ri heul ' . Kop awn ' na, eun kah eun ton ' duing ' hak ' ri kopti meuh a Peue Yu ' - da ut ' mawn ' na ' ce. Kopti yawng ce kuing ' eun meuh eun peue Helasa ' na ' .⁴ Yam buih heul ' ce nang veng ti veng hawc ' ti veng na ' , ku ' sa ' lit ce peue caee Eun Yesu ' na ' mae ' ro ' kan ut ' nang veng Yeru ' salaem na ' punta kaw peue hot ' ri yeuh a na ' , ce ku suip ri lah ' a heul ' .⁵ Kop awn ' na, hk'a ' yum ' ce muk kon ' Hkrit na ' a baet ri kaw l ' reng keuting. Muk ce muk kon ' Hkrit na ' ce baet ri heun ' ku seunyi.

Paw ' lu nyu eun limit peue Masido ' ni '

⁶Kopti Cit ' seunga ' chak ' na ' un ' kah a ce sangsawn ' leukah ' mun ' ren ' kaw n na ' nang kuing ' Asa ' na ' , Paw ' lu eun mae ' cum eun na ' ce tawl ' heul ' nang ku- ing ' Fi ' cia ' na ' mae ' kuing ' Galati ' na ' ku duih ' ka.⁷ Yam rot ce nang mhuil ' kuing ' Mi ' si ' na ' , ce saec ' co ' ca ' ri kaw lec nang kuing ' Beti ' ni ' na ' , daecti Cit ' seunga ' Eun Yesu ' na ' a un ' tuil ' ahkvang ka ri ce.⁸ Kop awn ' na, ce vel kuing ' Mi ' si ' na ' heul ' , ce lih nang veng Tro ' as ' na ' .⁹ Peunsum ' na ' , Paw ' lu eun nyu limit peue Masido ' ni ' ti peue cawng eun ri hk'o ' a ri ti. Eun lah ' , “Hk'o ' mi ing ' teum ' kawm ye nang kuing ' Masi- do ' ni ' na ' .”¹⁰ Hawc ' Paw ' lu pun eun ri nyu limit na ' , ye keulawn ' rangraen ri kaw heul ' nang kuing ' Masi- do ' ni ' kopti pun ye ri yawng Peucawo ' klawng Eun ri ti

† Nang htawm Seunga ' na ' ngon ' , tang bae a nambat aet ' 34 na ' , 34 “Daecti Silas ' kaw eun tang suip ri ut ' teh ' na ' , eun kuit a deut.”

ye kaw sangsawn ' leukah ' mun ' ren ' kawn na ' ri peue Masido ' ni ' na ' ce.

Li ' di ' leuploh ' ka hpum ' ri

¹¹Tang ' neum veng Tro ' as ' na ' , ye pawk reu na ' se-umeu ' heul ' ri kaw ' Samo ' tras ' na ' . Hawc ' ka na ' ti seunyi, ye rot nang veng Neapolis ' na ' . ¹²Ye tang pucti heul ' neum veng awn ' na, ye rot nang veng Hpi ' li ' pi ' na ' . Veng awn ' a meuh veng tang ' ce peue Ro ' ma na ' . A meuh veng nambat keuhti ka hk'a ' naee kuing ' Masi-do ' ni ' na ' . Ye ku ut ' mawn ' heun ' seunyi yeut.

¹³Yam rot a seunyi Sin ' na ' , ye pucti heul ' hk'a ' nok ka leuva ' veng na ' . Ye kuit a na ' kue ' vang hk'o ' mun ' , ye heul ' keunam ba leuum ' na ' . Ye mok ' ri leukah ' u beun ' heul ' cu ri mawn ' na ' ce. ¹⁴Hk'a ' naee beun ' mok ' ri leuceng leukah ' na ' ce, a kue ' beun ' muis Li ' di ' ti peue. Ka meuh peue veng Tiyatira. Ka paing ' hpen ' yawt-mong. Ka meuh peue faee ' Peucawo ' Eun. Punta kaw ka leuceng leukah ' eun Paw ' lu na ' , Peucawo ' Eun tuh ' hpum ' ka na ' . ¹⁵Yam beun ' awn ' ka mae ' peue nya ka na ' hawc ' ce rap ri ti hk'a ' cum ' ri na ' , ka klawng ye ing ' ti nya ce. Ka lah ' , "Pe ' lawn kuit meuh ui ' peue yum ' Peucawo ' Eun ko ' , ing ' ut ' ri nya ye reu ' ." Ka sae ' -caee ' hk'o ' ri yeuh ri pun ye ing ' ut ' ri nya ce.

Paw ' lu eun mae ' Silas ' lec ka htawng '

¹⁶Ti pok na ' , yam buih heul ' ye nang vang hk'o ' mun ' na ' , beun ' mhai ' ku ' seuca ' yawng mhaw ' na ' lec a ka ti peue na ' ka ing ' hk'eup ' ye. Kopti cang ka mhaw ' seu-lak ' na ' , cawo ' ka na ' eun pun leumuil heun ' . ¹⁷Paw ' lu eun mae ' ye ri beun ' awn ' ka hot ' ye. Ka klawng ri lah ' , "Peue aen ' meuh ce mhai ' Eun Peucawo ' Cawo ' lhung ' hk'ai ' peue na ' . Ce ing ' lah ' pe ' mhawng ' hk'a ' ka hk'a ' htut lawtpon na ' ." ¹⁸Kopti yeuh ka keutit ' heun ' seunyi na ' , a suksak Paw ' lu eun nyawk ' . Vang tistut ' ka na ' , eun hpawt ' ri tuil ' leukah ' ri seuca ' na ' , "Hk'a ' naee muis Eun Yesu ' Hkrit na ' , kaw ui ' tuil ' leukah ' ri mi, 'Puc mi lih hk'ai ' ka reu ' ." Seuca ' na ' a ku keulawn ' pucti lih hk'ai ' ka.

¹⁹Yam cawo ' ka beun ' awn ' pun eun ri nyu kaw ri un ' laee kue ' hk'a ' kaw pun leumuil na ' , ce mheut ' ri ti Paw ' lu eun mae ' Silas ' ka. Ce teuk ' ol ' ka heul ' hk'eup ' peue yeuh kan ' kuing ' na ' ce nang keulas na ' . ²⁰Ce teuk ' ka heul ' ri ro ' kan nang veng na ' ce. Ce lah ' , "Peue aen ' meuh ka peue Yu ' da. Ka buih yeuh ku ' suk-sak nang veng e ' na ' heun ' . ²¹Ka ti ri ing ' sangsawn ' ritroe peue Yu ' da ku ' un ' cawp ' ritroe e ' na ' . A meuh ritroe peue Ro ' ma rap un ' pun yeuh un ' pun e ' na ' ."

²²Peue heun ' na ' ce ku cu ri ing ' lhaw ' ri ri Paw ' lu eun mae ' Silas ' ka. Ro ' kan nang veng na ' ce tuil ' leukah ' kah ce hpuic ' hk'o ka na ' , kah ce ta ' faet ' ka ri hkawn. ²³Hawc ' ta ' faet ' ce ka heun ' heun ' na ' , ce seue ' ka nang htawng ' . Ce tuil ' leukah ' ri ro ' htawng ' na ' eun, ce kah eun ko ' kawn ka meulamlam ri. ²⁴Yam ro ' htawng ' na ' pun eun leukah ' awn ' a na ' , eun uin ' ka ut ' nang hkawng hk'a ' naee ka htawng ' na ' . Eun cip cung ka na ' hk'a ' naee hku ' , yeuh a cin meulamlam ri.

²⁵Hk'ao yam peunngon ' sum ' na ' , Paw ' lu eun mae ' Silas ' ka buih hk'o ' mun ' cai suk ' seun ' Peucawo ' Eun. Peue htawng ' seubu na ' ce ku buih leuceng ka yeut.

²⁶Yam awn ' na, a keulawn ' in ' san ' reng nyawk ' . Pun ka htawng ' na ' a keuyuih ' keuyah ' . Leuva ' ka htawng ' na ' ce a keulawn ' dah ' gawm ' euc ' . Mu ' lhec ' mawt ce peue htawng ' na ' a bhuic ' euc ' . ²⁷Ro ' htawng ' na ' eun kuh ' . Yam nyu eun leuva ' htawng ' na ' dah ' ka na ' , kopti hteum ' eun peue htawng ' na ' ce hk'uih euc ' na ' , eun htut ' vaic ri na ' , eun kaw toh ri yeum meun.

²⁸Daecti Paw ' lu eun klawng ri lah ' laws ' a, "Pawlaee yeuh tu ' mi na ' lu. Kawn ' ut ' ye gawm ' euc ' ri yeut."

²⁹Ro ' htawng ' na ' eun kah ce tok ' ngawl. Hawc ' ko ' , eun ing ' nghup ' ri keuyuing ' ruing nanggal ' ka Paw ' lu eun mae ' Silas ' na ' . ³⁰Hawc ' ko ' , eun va ka puc ri. Eun mhaing ' ka, "Cawo ' , punta kaw ui ' pun hk'a ' htut lawtpon na ' , ui ' ci ' na ' htuk ' ri yeuh sa ' nhaw ' ?"

³¹Ka top ' a, "Yum ' Cawo ' Yesu ' Eun reu ' , mi ri mae ' peue nya peue hk'ul ' mi na ' kaw pe ' pun hk'a ' htut lawtpon na ' ." ³²Hawc ' ko ' , ka sangsawn ' leukah ' Eun Peucawo ' na ' ri ro ' htawng ' na ' eun mae ' peue ut ' nang nya eun na ' ce gawm ' euc ' . ³³Hk'a ' naee nali bul awn ' na, ro ' htawng ' na ' eun va ri heul ' saic ' vang sui ' ka na ' . Hawc ' ko ' , tu ' eun ro ' htawng ' na ' mae ' peue nya peue hk'ul ' eun na ' ce keulawn ' rap ri ti hk'a ' cum ' gawm ' euc ' ri. ³⁴Ro ' htawng ' na ' eun va ka heul ' ri nya ri, eun tuil ' ka hk'asom ' . Ro ' htawng ' na ' eun ren ' kawn nyawk ' , kopti tu ' eun na ' mae ' peue nya peue hk'ul ' eun na ' gawm ' euc ' yum ' ce Peucawo ' Eun hawc ' na ' .

³⁵Yam ceng ' ka na ' , ro ' kan nang veng na ' ce cus ' peue yeuh kan ' na ' ce heul ' ri ro ' htawng ' na ' eun. Ce lah ' , "Ploe ' peue lal ' peue awn ' ka reu ' ." ³⁶Ro ' htawng ' na ' eun lah ' a ri Paw ' lu eun, "Ro ' kan nang veng na ' tuil ' ce leukah ' ploee ' mi mae ' Silas ' eun. Maet ' maen ' pa ' na ' pucti heul ' hk'a ' naee kuit nyawk ' kuit sam ' ran ri reu ' ."

³⁷Daecti Paw ' lu eun lah ' a ri peue yeuh kan ' na ' ce, "Ya saec ' meuh peue Ro ' ma, daecti ce un ' mhaing ' mhil ' ya ce ta ' faet ' ya nanggal ' peue kuing ' . Hawc ' "

ko', ce seue' ya nang htawng'. †Maet' maen' ce' kaw yeng ri ra ri tec yen' ya aw? A hkuin' kaw cang. Kah tu' ce na' ing' va ya pucti reu'."

³⁸Peue yeuh kan' na' ce heul' lah' ris lawng aen' a ri ro' kan nang veng na' ce. Yam pun ce ri mhawng' Paw' lu eun mae' Silas' meuh ka peue Ro' ma na', ce ku tok' seupa. ³⁹Ce ing' hk'o' ka a' nuyat a. Hawc' ce hue' ka lih hk'ai' htawng' na', ce hk'o' ka pucti heul' hk'ai' veng awn' na. ⁴⁰Hawc' Paw' lu eun mae' Silas' puc ka ri lih hk'ai' htawng' na', ka heul' ri nya ka Li' di' na'. Ka hk'eup' ec' awng' na' ce, ka tuil' kaw' reng ce. Hawc' ko', ka pucti heul' hk'ai' veng awn' na.

Nang veng Hte' salo' ni'

17 Yam hawc' ce hpa' veng Afi' po' lis' na' mae' veng Apaw' lonia na' heul' na', ce rot nang veng Hte' salo' ni' na'. Mawn' na' a kue' sa' la vang hk'o' mun' ce peue Yu' da na'. ²Paw' lu eun lec nang sa' la vang hk'o' mun' seun' ku' tawn yeuh eun na'. Eun cu htawm Seunga' na' eun sa' lit a mae' ce pun loe' Sin'. ³Hawc' Hkrit hkam' Eun ku' tukhka Eun tang kuh' im' na', Paw' lu eun tuil' ce nyu a glih' gleueng'. Eun lah', "Yesu' ku' ris ui' pe' mhawng' ti peue aen' Eun ko', meuh Eun Hkrit." ⁴Peue Yu' da na' ce ngon', ce yum'. Ce pawng' Paw' lu eun mae' Silas' ka. Saec' meuh peue Helasa' ku' lhat' til ri Peucawo' Eun na' ce ku yum' heun'. Beun' kue' muis na' ce ku hkuin' caee ri yum' leng.

⁵Daecti peue Yu' da na' ce kue' hpum' hkoe' mang' ka, ce klawng peue rai ut' eo' nang keulas na' ce ing' yeuh ku' suksak nang veng na'. Punta kaw ce teuk' Paw' lu eun mae' Silas' ka heul' nanggal' ce peue heun' na', ce nui ri ing' lec ri sok ka nang nya eun Cesan' na'. ⁶Daecti yam sok un' nyu ce ka na', ce teuk' ol' Cesan' eun mae' ec' awng' eun na' ce ngon' heul' ri peue yeuh kan' nang veng na' ce. Ce klawng ri lah', "Peue aen' meuh ce peue yeuh ku' suksak nang lok na' ku duih' ka, maet' maen' ing' rot ce maen' hawc'. ⁷Cesan' rap eun ri ti ce nang nya ri na'. Peue aen' ce hkat' hkan ritroe eun hkun' haw' hkam' Kae' sa na'. Ce lah' a kaw' kue' hkun' haw' hkam' seubu ti peue, Eun meuh Yesu'." ⁸Yam peue veng na' mae' peue yeuh kan' nang veng na' pun ce ri mhawng' yeuh a keutit' na', ce hpum' ha' ron nyawk'. ⁹Ce kah Cesan' eun mae' ec' awng' seubu na' ce tang' ri uin' leumuil. Hawc' ko', ce plo' ce.

Nang veng Beri'

¹⁰Yam fec' ka na', ec' awng' na' ce keulawn' cus' Paw' lu eun mae' Silas' ka heul' nang veng Beri' na'. Yam rot ka teh' na', ka lec nang sa' la vang hk'o' mun' ce peue Yu' da na'. ¹¹Peue veng Beri' na' ce kue' hpum' cang rap ri ti hk'ai' peue Hte' salo' ni' na' ce kopti rap ce ri ti leukah' aen' na hk'a' naee hpum' huk' ri na'. Punta kaw ce yawng lawng aen' cawp' un' cawp' ka na', ce ras ri nawk htawm Seunga' na' keuyuit. ¹²Peue Yu' da na' ce yum' heun' peue. Saec' meuh beun' ce peue Helasa' ku' kue' muis na' ce ngon' mae' a' ta' me heun' peue na' ce ku yum' yeut.

¹³Yam peue Yu' da ut' nang veng Hte' salo' ni' na' pun ce ri mhawng' lawng Paw' lu buih sangsawn' eun leukah' Eun Peucawo' nang veng Beri' na', ce ku ing' mawn'. Ce ing' cu' peue cum heun' na' ce yeuh ku' suksak na'. ¹⁴Ec' awng' na' ce keulawn' cus' Paw' lu eun heul' keunam ka ba mha' seumut' na'. Daecti Silas' eun mae' Ti' mo' se ka kaw' kuit' nang veng Beri' na'. ¹⁵Peue heul' tuil' Paw' lu eun na' ce heul' tuil' eun rot nang veng Ehten. Hawc' ko', Paw' lu eun tawm' ce ing' kah Silas' eun mae' Ti' mo' se ka rip ri heul' ri ti seun' kaw ka cang heul' na'.

Nang veng Ehten

¹⁶Yam Paw' lu kaw' ko' eun Silas' eun mae' Ti' mo' se ka nang veng Ehten na', kopti pun eun ri nyu nang veng Ehten awn' kue' ka ruphtu nuknhen' a na', eun kleh' nang hpum' ri nyawk'. ¹⁷Kop awn' na, eun sa' lit peue Yu' da na' ce mae' peue Helasa' ku' lhat' til ri Peucawo' Eun na' ce nang sa' la vang hk'o' mun' na'. Eun ku sa' lit peue hk'eup' nyu ri nang keulas keuyuit na' ce yeut. ¹⁸A kue' peue kue' cu' yi ti rit E' pi' ku' li' mae' rit Sato' e na' ce ing' htu' hting' eun. Ngon' ce lah', "Peue awn' eun ci' meunui' meunui' sum' lah' keunhaw'?" Ngon' ce lah', "Seun' a meuh eun nang eo' sangsawn' lawng eun peucawo' kuing' seubu ko'." Ce saec' lah' a yeuhko' na' kopti Paw' lu sangsawn' eun ce ri leukah' mun' ren' kaw' lawng Eun Yesu' mae' lawng tang kuh' im' na'. ¹⁹Kop awn' na, ce ti Paw' lu eun heul' nang vang hk'om muis Areopakas' na'. Ce lah', "Lawng ku' sangsawn' hk'u' buih sangsawn' mi aen' na, lak' kaw mi cang sangsawn' a ri ye yeut aw? ²⁰Kopti ti mi kamkuit ku' un' duing mhawng' un' duing yawng ye na' ing' na', ye ku sum' yawng vangdoh' ka na' yeut." ²¹(Peue veng Ehten mae' peue hk'a' nok ku- ing' ut' teh' na' ce gawm' euc' lheu' si' sa' lit ce

† Lawn ta' faet' peue Ro' ma na' ce yam un' nang taws' a a' mu ri deut ko', a kleuc' ri ritroe ka.

kamkuit hk'u ' na ' mae ' leuceng ce a na ' , ce un ' laee yeuh ku ' seubu saec ' ti ceu keuyuit.)

²²Paw ' lu eun cawng ri leukah ' nanggal ' vang hk'om Areopakas ' na ' , "Peue Ehten na ' pe ' , pun ui ' ri nyu meuh pe ' nang satsana reng hk'a ' naee ku ceu na ' .

²³Kopti yam eo ' nawk ui ' ku ' faee ' pe ' na ' meulamlam ri ti duih ' hawc ' ti duih ' na ' , ui ' pun ri nyu vang dum ri tan ku ' tan ti duih ' a tem ' ri yeuhki ' , 'Meuh a pun Eun Peucawo ' Cawo ' un ' yawng na ' . ' Maet ' maen ' , kaw ui ' lah ' ris pe ' mhawng ' lawng Eun Peucawo ' Cawo ' faee ' pe ' , pe ' un ' yawng na ' Eun.

²⁴Eun meuh Peucawo ' hpanpleng ' bhen ' keute ' mae ' ku ' kue ' hk'a ' pang ka na ' ce gawm ' euc ' . Eun meuh Cawo ' ka pang mao ' na ' mae ' bhen ' keute ' na ' . Eun hkuin ' ut ' nang nya hk'o ' mun ' pleng ' peue na ' . ²⁵Kaw peue yeuh mhai ' Eun ri ti ' ri na ' , Eun un ' lo ' a . Kopti meuh Eun Cawo ' tuil ' a ' yu , tuil ' guil ' ghuih ' hpum ' na ' mae ' ku ' seubu na ' ce gawm ' euc ' ri peue . ²⁶Tang ' a ri peue ti peue rot ri peue ceu ku ceu ut ' pang bhen ' keute ' na ' ku duih ' ka na ' , Eun hpanpleng ' peue . Eun gvah ri uin ' meuyam na ' , gvah ri uin ' mhuil ' kuing ' vang kaw ce htuk ' ri ut ' na ' . ²⁷Peucawo ' yeuh Eun a yeuhki ' na ' , kopti punta kaw peue hot ' ri sok ri nyu Eun . Daecti Eun un ' ut ' seungai ri e ' saec ' ti peue . ²⁸Kopti hk'a ' naee Eun na ' e ' kue ' a ' yu im ' cang cheun ' ri . Seun ' ku ' peue cai pe ' ngon ' lah ' ce a nang leukah ' cai na ' , ' E ' meuh ceucat Eun . ')

²⁹Kop awn ' na , e ' lawn meuh ceucat Eun ko ' , e ' na ' htuk ' ri un ' hteum ' Peucawo ' Eun seun ' hk'il ' , leumuil , seumu ku ' kuit peue ri pleng ' ri ti ' ri meuh ruprang na ' ce . ³⁰Nanggal ' aen ' na kopti peue na ' un ' nang yawng ce a na ' , Peucawo ' Eun un ' tang ' a ' mu ri ce . Daecti maet ' maen ' , Peucawo ' Eun tuil ' leukah ' ri peue ut ' ku duih ' na ' ce gawm ' euc ' , kah ce taws ' hpum ' fuin map ' ri hawc ' . ³¹Kopti hpawt ' Eun seunyi kaw ri taws ' a ' mu hk'a ' naee hk'a ' leupaws seumeu ' ri na ' ri peue bhen ' keute ' hawc ' na ' . Eun leuk peue ti peue kah Eun taws ' a ' mu tang ' ri . Punta lawng aen ' kaw a meuh sa ' hki ' ka ri peue gawm ' euc ' na ' , Peucawo ' Eun yeuh peue aen ' Eun tang kuh ' im ' . "

³²Yam mhawng ' ce lawng tang kuh ' im ' na ' , ngon ' ce hkamram eun . Ngon ' ce lah ' , "Tang sum ' leuceng ye lawng ku ' lah ' mi na ' baee . " ³³Hawc ' ko ' , Paw ' lu eun pucti heul ' hk'ai ' vang hk'om ce na ' . ³⁴Ngon ' ce hot ' Paw ' lu eun heul ' . Hawc ' ko ' , ce yum ' . Peue awn ' ce a meuh Dionesias ' , eun meuh muk hk'om Areopakas ' , meuh beun ' muis Damaris ' baee peue seubu na ' ce ngon ' .

Nang veng Kaw ' rinhtu '

18 Hawc ' awn ' na , Paw ' lu eun pucti heul ' neum veng Ehten na ' , eun heul ' nang veng Kaw ' rinhtu ' na ' . ²Teh ' na ' eun hk'eup ' peue ceu Yu ' da ti peue , eun muis Ahkio ' la ' . Eun meuh peue kuing ' Pawntas ' . Kopti hkun ' haw ' hkam ' Hkaodi ' as ' tuil ' eun leukah ' kah peue Yu ' da na ' ce pucti heul ' hk'ai ' veng Ro ' ma na ' gawm ' euc ' ri na ' , Aku ' la ' eun kaw ' la ri pucti neum kuing ' It ' tali mae ' beun ' ri muis Pli ' si ' la ' na ' ka . Paw ' lu eun heul ' mae ' ka . ³Kopti Paw ' lu meuh eun nang cing hpen ' tup ' seun ' ka ri na ' , eun ku ut ' mae ' ka , yeuh kan ' mae ' ka . ⁴Punta kaw eun sangsawn ' pun peue Yu ' da mae ' peue Helasa ' na ' ce na ' , eun sa ' lit ce nang sa ' la vang hk'o ' mun ' na ' ku Sin ' .

⁵Yam Silas ' eun mae ' Ti ' mo ' se puc ka ri neum kuing ' Masido ' ni ' hawc ' na ' , Paw ' lu eun ku lo ' yam ri na ' htonnuk sangsawn ' leukah ' mun ' ren ' kaw na ' mae ' hkam ' sa ' hki ' lawng Yesu ' meuh Eun Hkrit na ' ri peue Yu ' da na ' ce . ⁶Daecti yam peue Yu ' da na ' ham ' ce Paw ' lu eun na ' , ce lah ' ku ' un ' nawpsang ri heun . Eun raws ' hk'o ri na ' ri ce . Eun lah ' , "Peucawo ' Eun lawn na ' ciyang pe ' ko ' , lak ' meuh a kopti pe ' ri meun , a un ' meuh kopti ui ' ri . Tang ' neum seunyaen ' na ' kaw ui ' heul ' ri peue un ' meuh peue ceu Yu ' da na ' ce . "

⁷Hawc ' ko ' , Paw ' lu eun pucti heul ' hk'ai ' sa ' la vang hk'o ' mun ' awn ' na . Eun heul ' ri nya eun Titias ' Yutas ' na ' . Eun ku meuh peue faee ' Peucawo ' Eun . ⁸Ro ' ka sa ' la vang hk'o ' mun ' muis Hkris ' pas ' na ' eun mae ' peue nya peue hk'ul ' eun na ' ce gawm ' euc ' , ce yum ' Peucawo ' Eun . Saec ' meuh peue Kaw ' rinhtu ' pun ri mhawng ' ku ' sangsawn ' eun Paw ' lu na ' , ce ku yum ' rap ri ti hk'a ' cum ' na ' .

⁹Ti bul na ' , Peucawo ' Eun lah ' a ri Paw ' lu eun hk'a ' - naee ku ' limit eun na ' , "Pawlaee lhat ' , suip ri sangsawn ' a heul ' . Pawlaee dit ' ti , ¹⁰kopti ut ' Ui ' mae ' mi . A ' nhaw ' hkuin ' kaw cang keunhap ' , yeuh mi sui ' saec ' ti peue , kopti peue Ui ' na ' ut ' ce nang veng aen ' na heun ' na ' . " ¹¹Kop awn ' na , Paw ' lu eun ku ut ' ri sangsawn ' leukah ' Eun Peucawo ' na ' mawn ' ti neum pai ' les chi ' .

¹²Yam Galio ' meuh eun cawo ' keuting nang kuing ' Ahkaiya ' na ' , peue Yu ' da na ' ce pawng ' puri kaw yeuh Paw ' lu eun lu . Ce va eun heul ' ri nang vang taws ' a ' mu na ' . ¹³Ce tang ' a ' mu lah ' , "Peue aen ' cop ' eun ri kah peue faee ' Peucawo ' Eun , a kleuc ' ritroe kuing ' ruik ' . "

¹⁴Yam Paw ' lu kaw eun leukah ' na ' , Galio ' eun lah ' a ri peue Yu ' da na ' ce , "Peue Yu ' da na ' pe ' , pe ' lawn kaw tang ' a ' mu keuting un ' lah ' , aet ' un ' lah ' ko ' , ui ' "

kaw htuk' ri leuceng leukah' pe' na' yeut. ¹⁵ Daecti kopti meuh a lawng ku' kleuc' ri leukah', ri muis mae' ritroe pe' na', pe' na' heul' lah' a ri puri meun reu'. Ui' hkuin' kaw taws' a' mu ka lawng aen' na." ¹⁶ Hawc' awn' na, eun kah ce hk'uih hk'ai' vang taws' a' mu na'. ¹⁷ Hawc' ko', ce mheut' ri heul' ta' faet' ro' ka sa' la vang hk'o' mun' muis Sos' htenes' na' eun nanggal' vang taws' a' mu na'. Daecti Galio' eun un' ti a' ye' ka saec' peunae'.

Paw' lu eun tang ing' nang veng Anhti' ok

¹⁸ Paw' lu ut' eun nang veng Kaw' rinhtu' na' ling'. Hawc' ko', eun am' la ec' awng' na' ce, eun pawk reu na' heul' nang kuing' Su' ri'. Pli' si' la' eun mae' Ahkio' la' ka ku hot' eun heul' yeut. Nanggal' yam un' nang pawk eun reu na', eun kon' cing' ri na' nang veng Kechel na', kopti yeuh eun kati sat' ca' ri Peucawo' Eun na'. ¹⁹ Yam rot ce veng E' fe' su' na', Paw' lu eun uin' Pli' si' la' eun mae' A' ku' la' ka ut' mawn'. Heun ri ko', eun heul' lec ri sa' lit mae' peue Yu' da na' ce nang sa' la vang hk'o' mun' na'. ²⁰ Yam peue awn' hk'o' ce Paw' lu eun ut' mae' ti ling' na', daecti eun un' yeuh a. ²¹ Daecti yam kaw eun am' la ce na', eun tuil' kati ri ce lah', "A lawn cawp' alo Eun Peucawo' ko', ui' kaw tang ing' ri pe' bae." Hawc' ko', eun pawk reu na' pucti heul' hk'ai' veng E' fe' su' na'. ²² Yam heul' rot eun nang veng Kae' sari' na', eun huk' hk'eup' muk kon' Hkrit na' ce nang veng Yeru' salaem. Hawc' ko', eun tang heul' nang veng Anhti' ok na'.

²³ Hawc' ut' eun mawn' ti cu hkao' na', eun tang pucti heul' nang kuing' Galati' mae' kuing' Fi' cia' na' hk'awp'. Eun heul' tuil' kaw' reng yeuh tapae' na' ce kaw' reng keuting.

Apaw' lu sangsawn' eun leukah' mun' nang veng E' fe' su'

²⁴ Yam awn' na, peue Yu' da muis Apaw' lu meuh peue veng Alek' sandrian na' eun ing' nang veng E' fe' su' na'. Eun meuh peue chanan leukah', yawng htawm Seunga' na' nyawk'. ²⁵ Eun tawn rin hk'a' naee hk'a' Eun Peucawo' na'. Eun leukah' mae' hpum' huk' ri. Eun saec' yawng yawo pal hk'a' cum' sangsawn' eun Yo' han na' ti ceu koe, daecti eun sangsawn' lawng Eun Yesu' na' cawp' maen. ²⁶ Eun tang' hpum' ri hat' han' leukah' nang sa' la vang hk'o' mun' na'. Yam Pli' si' la' eun mae' Ahkio' la' mhawng' ka ku' sangsawn' eun na', ka klawng eun ing' ti nya ri. Punta

Apaw' lu kaw eun gawm ceng' ri lawng hk'a' Eun Peucawo' na', ka lah' ris sangsawn' eun.

²⁷ Yam Apaw' lu sum' heul' eun nang kuing' Ahkaiya' na', ec' awng' na' ce tuil' kaw' reng eun. Punta tapae' ut' teh' na' kaw ce rap ri ti eun na', ce tem' ri tuil' lai ri ce. Yam rot eun teh' na', kopti meuh a mun' Eun Peucawo' na', peue ing' yum' na' ce eun teum' kawm ce.

²⁸ Kopti htu' hting' reng eun peue Yu' da na' ce nanggal' ce peue heun' na'. Yesu' meuh Eun Hkrit na', eun tuil' ce nyu a nang htawm Seunga' na' meulamlam ri.

Paw' lu ut' eun nang veng E' fe' su'

19 Yam Apaw' lu kaw' ut' eun nang veng Kaw' rinhtu' na', Paw' lu eun heul' hpa' nang ngon' ka kuing' na', eun rot nang veng E' fe' su'. Eun pun ri hk'eup' tapae' na' ce teh' ngon'. ² Eun mhaing' ce, "Yam yum' pe' na', pun pe' Cit' seunga' chak' na' aw?"

Ce top' a, "Uih', ye hkuin' duing mhawng' kue' a Cit' seunga' chak'."

³ Kop awn' na, Paw' lu eun tang mhaing' ce, "Yeuh keutit' ko', pe' ci' rap ri ti hk'a' cum' nangnhaw' na'?"

Ce top' a, "Rap ye ri ti hk'a' cum' eun Yo' han na'."

⁴ Paw' lu eun lah', "Cum' leuum' eun Yo' han na' meuh a hk'a' cum' taws' hpum' fuin map' ri. Yo' han eun lah' a ri peue heun' na' ce. Eun kah ce yum' Cawo' ku' kaw ing' hk'a' kui' ri na' Eun. Cawo' awn' a meuh Yesu' Eun." ⁵ Yam pun ce ri mhawng' leukah' awn' a na', ce rap ri ti hk'a' cum' na' hk'a' naee muis Eun Cawo' Yesu' na'. ⁶ Yam Paw' lu tang' eun ti' ri hk'a' pang ce na', Cit' seunga' chak' na' a lih hk'a' pang ce. Ce lah' leukah' peue ceu heun' ceu na' mae' leukah' tamnai na'. ⁷ Ce ri gawm' euc' ce meuh me, ce kue' hk'ao ri kul' leual' peue na'.

⁸ Paw' lu eun lec nang sa' la vang hk'o' mun' na', eun tang' hpum' ri hat' han' sangsawn' ce pun loe' chi'. Eun sa' lit ce sangsawn' lawng kuing' Eun Peucawo' na' ri ce. ⁹ Daecti ngon' ce hpum' cen', ce hkuin' va ri yum'. Ce saesawm' "hk'a' ka ritroe aen' na" nanggal' ce peue heun' na'. Kop awn' na, Paw' lu eun gvah tapae' ri na' ce pucti heul'. Ce heul' sa' lit puri nang hkawng vang hk'om eun Tirannas' na' keuyuit. ¹⁰ Eun yeuh keutit' pun lal' neum rot ri peue Yu' da mae' peue Helasa' ut' nang kuing' Asa' na' ce gawm' euc' ce pun ri mhawng' leukah' Eun Yesu' na'.

¹¹ Peucawo' Eun cu Paw' lu eun yeuh ku' hk'o' am' na' lheu' pok nanggal' na'. ¹² Yam po peue hpa' cet mae' hpen' hal' tu' Paw' lu tawn paic' eun na' ri hk'a' pang

peue peuyhat na' ce na', ce ku cuin. Seuca' rai na' a ku pucti heul' hk'ai' ce.

¹³ Peue Yu' da na' ce ngon' ce cheu ri cu muis Eun Yesu' na', ce eo' ra ri tec seuca' rai na' pucti heul' hk'ai' peue seuca' lec na' ce ku duih'. Ce tuil' leukah' lah', "Hk'a' naee muis Eun Yesu' ku' Paw' lu sangsawn' eun na', ui' tuil' leukah' kah mi pucti heul'." ¹⁴ Saec' meuh kon' a' res peue eun Sakeva' ku' meuh ro' peue jhawp' rit ce peue Yu' da na' ce ku yeuh keutit' yeut. ¹⁵ Ti seunyi na', seuca' rai na' a top' a ri ce, "Yawng ui' Yesu' Eun yeut. Saec' meuh lawng eun Paw' lu na', ui' ku tawn mhawng' a yeut. Daecti pe' ci' meuh a' nhaw'?" ¹⁶ Hawc' ko', peue seuca' rai lec ka na' eun ku yawt' ri lhaw' ri ri ce. Eun pe ce gawm' euc'. Ce beus nham' ri ut' gung' gang' pun ri pucti hk'uih' heul' hk'ai' nya na'.

¹⁷ Yam peue Yu' da mae' peue Helasa' ut' nang veng E' fe' su' na' ce gawm' euc' pun ce ri yawng lawng aen' a na', ce lhat' nyawk'. Ce yuk muis Eun Cawo' Yesu' na' keuting lhung'. ¹⁸ Maet' maen' peue yum' hawc' na' ce heun' peue, ce ing' ris ku' kleuc' yeuh ri na' glih' gleueng'. ¹⁹ Peue cang kahta' na' ce heun' peue ce ti ri ing' dum bawl' htawm kahta' ri na' nanggal' ce peue heun' na'. Ngos ka htawm awn' na ko', a ngos hpawn' mhuin' draec' ma' ²⁰ Kop awn' na, leukah' Eun Peucawo' na' a puin' ri kuin vah heul', a gawm ti' ca keuting heun'.

²¹ Hawc' ka lawng aen' yeuh a keutit' na', Paw' lu kaw eun hpa' kuing' Masido' ni' mae' kuing' Ahkaiya' na' heul' nang veng Yeru' salaem na' eun kuit a deut. Eun lah', "Hawc' rot ui' teh' na', ui' ku kaw htuk' ri heul' glue nang veng Ro' ma na' yeut." ²² Paw' lu eun cus' nang teum' kawm ri lal' peue ka heul' nang kuing' Masido' ni' na'. A meuh Ti' mo' se eun mae' E' ratas' ka. Daecti heun ri, eun kawn' ut' nang kuing' Asa' na' ti cu hkao'.

Suksak nang veng E' fe' su'

²³ Yam awn' na, kop meuh a "hk'a' ka ritroe aen' na", ku' suksak na' a keut' kue'. ²⁴ A kue' peue tawng' leumuil muis Demetri' as' ti peue. Eun tawng' leumuil na' meuh tup' aet' ka peucawo' ma muis Atemis' na'. Peue tawng' leumuil na' ce ku koe pun leumuil heun' nyawk'. ²⁵ Eun klawng peue tawng' leumuil na' ce mae' peue yeuh kan' to' ri ri kan' awn' ce hk'om. Eun lah', "A' mawo na' pe', meuh a kopti kan' aen' a na', e' meuneum na' yawng pe' a yeut. ²⁶ Paw' lu aen' hpawe eun ce na' punta peue nang veng E' fe' su' aen'

† Draec' ma' na' a meuh htaep' na' ti htaep', a ngos seunyi reng peue ti seunyi.

na mae' nang kuing' Asa' na' kaw a daee meuh ce gawm' euc' kaw ce kleuc' hk'a' ri na', pe' ku pun ri nyu yawng a. Eun lah' ruphtu pleng' peue ri ti' ri na' a un' meuh peucawo'. ²⁷ Ceu nang aen' kaw a yeuh dang ka e' na' lu. A ku kaw yeuh hk'a' yum' ce peue yum' nya hk'o' mun' ka peucawo' ma Atemis' keuting na' kloe. Munhpung' ka peucawo' ma Atemis' ku' peue kuing' Asa' mae' peue pang bhen' keute' faee' ce na', a ku kaw lu yeut."

²⁸ Yam mhawng' ce leukah' awn' a na', ce seungeueng' nyawk'. Ce tang' ri ta' ul' ri lah', "Peucawo' Atemis' ce peue E' fe' su' na' a keuting lhung'."

²⁹ Hawc' ka na' un' ling', a seutuin seutan nang veng awn' na gawm' euc'. Ku' meuh peue long hk'a' mae' Paw' lu eun neum veng Masido' ni' muis Gaias' mae' Aritahkas' na' ka ce yat ka lec vang peue veng na' hk'om ce puri na'. ³⁰ Paw' lu eun saec' sum' lec hk'a' naee ce peue cum heun' na', daecti tapae' na' ce ham' eun.

³¹ Saec' meuh a' mawo eun Paw' lu ku' meuh ro' kan nang kuing' awn' a na' ce ngon', ce tawm' leukah' ri hk'o' eun un' kah eun ing' lec a yeut.

³² Hk'a' naee vang hk'om na' a seutuin seutan nyawk'. Ngon' ce klawng ri lah' a yeuhko', ngon' ce klawng ri lah' a yeuhki'. Peue hk'a' heun' na' ce un' yawng yeuh ri keunhaw' mawn'. ³³ Peue Yu' da na' ce cut' Alek' sando' eun ing' nanggal' ce na'. Eun ci' kaw htuk' ri lah' keunhaw' na', hk'a' naee peue cum heun' na' ce ngon' ce ta' ul' klawng ri tuil' kamkuit eun. Punta kaw eun lah' leukah' kah' tu' ri nanggal' ce peue cum heun' na', eun kvaee' ti' ri kah ce dit' ti. ³⁴ Daecti yam yawng ce meuh eun peue Yu' da na', ce klawng ri lah' leukah' ti moeng gawm' euc' ri hk'ao lal' nali na'. Ce lah', "Peucawo' Atemis' ce peue E' fe' su' na' a keuting lhung'."

³⁵ Peue yeuh kan' nang veng na' eun kah peue cum heun' na' ce dit' ti. Hawc' ko', eun lah' a ri ce, "Peue E' fe' su' na' pe', veng E' fe' su' e' na' meuh ka nang rokxa' nya hk'o' mun' ka peucawo' ma Atemis' keuting na' mae' ruphtu ka Atamis' lih neum pang mao' na', yawng peue a ku peue ri, un' meuh ka aw? ³⁶ Kopti lawng ku' meuh neum aen' un' laee cang htu' hting' pun a ri hawc' na', pe' na' htuk' ri dit' ti. Pawlaee yeng ri yeuh. ³⁷ Peue aen' ce hkuin' rabawk' nya hk'o' mun' na', ce hkuin' un' nawpsang ri peucawo' e' na', daecti pe' teuk' ce ing' maen'. ³⁸ Daecti Demetri' as' eun mae' a' mawo eun ku' meuh peue tawng' leumuil na' ce lawng sum' yeuh leukah' leupong ri peue ti ri peue ko', sa' nam' na' a ku tuh' ri, a ku kue' nang taws' a' mu. Uin' ce lak' to' tam' puri meun reu'. ³⁹ Pe' lawng kue' a' mu ko', pe' kaw htuk' ri heul' sa' lit a vang hk'om taws'

a 'mu na ' tam ' ritroe ka na '. ⁴⁰ Kopti meuh a ku ' keut ' kue ' seunyaen ' aen ' a na ', peue kaw cang tang ' a ' mu hk'a ' pang e ', meuh e ' nang yeuh ku ' suksak veng. Kopti lawng ku ' suksak aen ' a ci ' keut ' kue ' kop keunhaw ' na ', e ' kaw un ' kue ' ku ' kaw top ' a ri peue. ⁴¹ Hawc ' lah ' eun a yeuh keutit ' na ', eun kah hk'om na ' hawc '.

Paw 'lu heul ' eun nang kuing ' Masido 'ni ' mae ' kuing ' Helasa '

20 Yam ku ' seutu in seutan na ' yen ' ka hawc ' na ', Paw 'lu eun klawng ri tuil ' kaw ' reng ce tapae ' ri na. Hawc ' ko ', eun am ' la ce heul ' nang kuing ' Masido 'ni ' na '. ² Eun heul ' ti duih ' hawc ' ti duih ' nang kuing ' Masido 'ni ' na ', eun lah ' leukah ' heun ' heun ' tuil ' kaw ' reng peue. Vang tisut ' ka na ', eun heul ' rot nang kuing ' Helasa '. ³ Eun ut ' teh ' pun loe ' chi '. Kopti yawng eun peue Yu ' da na ' sa ' lit ce puri kaw toh eun yeum na ', eun pawk reu heul ' nang kuing ' Su 'ri ' na '. Eun kuit ri kaw tang ing ' kuing ' Masido 'ni ' na ' eun kuit a deut. ⁴ Peue heul ' mae ' Paw 'lu eun na ' ce a meuh Saw ' pataru ' kon ' me eun Pli ' ras ' peue veng Beri ', Aritahkas ' eun mae ' Sekundas ' peue veng Hte ' salo ' ni ', Gaias ' peue veng Deube, Ti ' mo ' se, Tai ' hki ' kas ' eun mae ' Trofimas ' peue kuing ' Asa ' na ' ka. ⁵ Peue aen ' ce bai heul ' ko ' ye nang veng Tro ' as ' na '. ⁶ Yam pawe un ' seue ' hkawomun ' is ' paeng na ' hawc ' ka na ', ye pawk reu na ' pucti heul ' hk'ai ' veng Hpi ' li ' pi ' na '. A pun hpawn ' seunyi, ye ing ' hk'eup ' nyu ce nang veng Tro ' as ' na '. Ye ut ' teh ' a ' res seunyi.

Yutikas ' tang kuh ' im ' eun nang veng Tro ' as '

⁷ Seunyi keuhti ka vung na ', † ye hk'om puri kaw ves hkawomun ' na '. Paw 'lu eun leukah ' ri peue heun ' na ' ce. Kopti kuit eun kaw ri pucti heul ' peunsa ' ka na ', eun leukah ' mae ' ce rot ri nuik ' ka. ⁸ Nang htan hk'a ' tuh hong ' vang hk'om ye na ' a kue ' kaw ' ngawl heun '. ⁹ Nang nhum ' muis Yutikas ' na ' eun mok ' nang hpa ' pong ' na '. Paw 'lu na ' eun gawm leukah ' ling '. Yutikas ' eun ku gawm it ' jing ' nyawk '. Yam pun eun ri it ' na ', eun hk'uic ' hk'ai ' nya loe ' htan na ' lih rot pang keute '. Na ' ce ing ' cem eun, ce pun ri nyu yeum eun hawc '. ¹⁰ Paw 'lu eun lih nghup ' ri hk'a ' pang eun. Hawc ' ko ', eun cem eun. Eun lah ', "Pawlaee pao, kaw ' kue ' eun hpum '." ¹¹ Hawc ' awn ' na, Paw 'lu eun tang huk ' htan hk'a ' tuh na '. Eun ves ri hk'a ' hkawomun ' na ' ce u puri rot ri ceng ' ka. Hawc ' ko ', eun tawm ' ce, eun

pucti heul ' hk'ai ' ce. ¹² Ce va nang nhum ' kaw ' na ' a ' yu im ' awn ' eun ing ' ti nya eun na ', ce ren ' kaw ' nyawk '.

Kuh ' neum veng Tro ' as ' heul ' nang veng Meletas '

¹³ Punta kaw ye rap ri ti Paw 'lu eun seun ' hpawt ' ye a ri puri na ', ye pawk reu na ' heul ' nang veng Asos ' na '. Kopti Paw 'lu kaw eun long hk'a ' ing ' hk'eup ' ye teh ' na '. ¹⁴ Yam hk'eup ' ye eun nang veng Asos ' na ', ye ku rap ri ti eun lec reu na ' heul ' nang veng Meti ' lene ' na '. ¹⁵ Ye pucti heul ' neum mawn ' na '. Peunsa ' ka na ', ye rot keunam ka kaw ' Hki ' os ' na '. Leuku ' ka na ', ye rot nang kaw ' Samos ' na '. Leucec ' ka na ', ye rot nang veng Meletas ' na '. ¹⁶ Punta Paw 'lu kaw eun un ' laee sum yam ri nang kuing ' Asa ' na ', eun kuit ri kaw pawk reu na ' hpa ' keulawn ' veng E ' fe ' su ' na ' heul '. Kopti a lawn kaw cang meuh ko ', eun sum ' heul ' hk'eup ' seunyi Pe-teko ' te na ' nang veng Yeru ' salaem na ' vaevae.

Paw 'lu leukah ' eun ri ro 'kan nang kawt E ' fe ' su ' na ' ce

¹⁷ Paw 'lu eun ku cus ' peue heul ' klawng ro 'kan nang kawt muk kon ' Hkrit nang veng E ' fe ' su ' na ' ce ing ' ri ti nang veng Meletas ' na '. ¹⁸ Yam ing ' rot ce na ', Paw 'lu eun lah ' a ri ce, "Tang ' neum seunyi yamla ui ' ri rot nang kuing ' Asa ' na ', ui ' ci ' ut ' mae ' pe ' yeuh sa ' nhaw ' na ', pe ' tup yawng a laleung. ¹⁹ Ui ' saec ' na ' pun ri hkam ' hk'a ' cop ' long kopti peue Yu ' da na ' sa ' lit ce puri kaw toh ui ' na ', daecti ui ' yeuh mhai ' Eun Peucawo ' na ' hk'a ' naee vang tang ' ui ' hpum ' ri onawn ' mae ' leuum ' ngai ' ri. ²⁰ Pe ' ku yawng sangsawn ' ui ' leukah ' mun ' kue ' mun ' pun pe ' na ', ui ' un ' laee vel a saec ' ti ceu. Daecti ui ' sangsawn ' a ri pe ' nanggal ' peue cum heun ' na ' mae ' nang nyahk'ul ' pe ' na ' ce yeut. ²¹ Hkam ' ui ' sa ' hki ' ri peue Yu ' da mae ' peue Helasa ' na ' ce. Ce kaw kah ri taws ' hpum ' fuin map ' ri, hpawt ' ri ing ' ri Peucawo ' Eun mae ' yum ' hk'a ' naee Yesu ' Eun.

²² Maet ' maen ' Cit ' seunga ' na ' kah ka ui ' heul ' nang veng Yeru ' salaem. A na ' kaw meuh keunhaw ' ri ui ' teh ' , ui ' hkuin ' yawng a. ²³ Ui ' yawng yawo Cit ' seunga ' chak ' na ' tuil ' a sati ui ' ri nang veng ku veng na ', a lah ' ui ' kaw hk'eup ' htawng ' mae ' ku ' keunhap ' nokneh na ' ko ' ka ui '. ²⁴ Daecti a ' yu ui ' na ' ui ' un ' sawn ' a ngos heun ' ri ti. Ui ' lawn long yawo hk'a ' kaw ui ' pun ri long na ' rot ri sut ' ka mae ' yeuh yawo kan ' meuh sa ' hki ' ka lawng leukah ' mun ' ren ' kaw ' mun ' Eun Peucawo ' ku ' Yesu ' tuil ' Eun ri ui ' na ' hawc ' ko ', na ' a hk'o '.

† Seunyi nanggal ' ka vung ce peue Yu ' da na ' a meuh seunyi Sin ' na '.

²⁵Maet 'maen ' yawng ui ' ku ' pun pe ' ri mhawng ' lawng ku ' eo ' sangsawn ' ui ' lawng ka kuing ' Eun Peucawo ' hawc ' na ' kaw pe ' nyu buh ui ' bae na ' , a un ' laee kue ' saec ' ti peue. ²⁶Kop awn ' na, pao ' ui ' a ri pe ' seunyaen ' , Peucawo ' Eun lawn na ' ciyang pe ' ko ' , a un ' meuh kopti ui ' ri. ²⁷Kopti kaw ui ' sangsawn ' alo Eun Peucawo ' na ' ri pe ' gawm ' euc ' ka, ui ' un ' duing vel a. ²⁸Nom ' nawk tu ' pe ' na ' mae ' muk kon ' yung ' ku ' Cit ' seunga ' chak ' na ' uin ' a pe ' meuh nang nom ' nawk roksa ' na ' ce meulamlam ri reu ' . Meuh nang ko ' kon ' yung ' muk kon ' Hkrit Eun Peucawo ' ku ' Peucawo ' leuvaee Eun hk'ai ' nham ' ri na ' reu ' . ²⁹Yawng ui ' , hawc ' puc ui ' ri heul ' na ' , ruk sa ' hao ' na ' kaw a ing ' lec nang muk pe ' na ' . A kaw un ' laee uin ' muk kon ' yung ' na ' vang saec ' ti tu ' . ³⁰Saec ' meuh hk'a ' - naee pe ' ri, punta kaw pe ' rim ' ri ti tapae ' na ' ce hot ' ri na ' , ngon ' pe ' kaw kuh ' ploh ' pleh ' leukah ' seumeu ' na ' . ³¹Kop awn ' na, rangraen ri ko ' reu ' . Kuit rot ri un ' laee keului ' ui ' ri ui ' tuil ' sati pe ' ku peue ri mae ' leu-um ' ngai ' ri gawm ' sum ' gawm ' seunyi pun loe ' neum na ' reu ' .

³²Maet 'maen ' ap ui ' pe ' ri Peucawo ' Eun mae ' leukah ' mun ' Eun ku ' cang yeuh pe ' huk ' hawn ' , cang kah pe ' is ' sin ' tiduih ' mae ' peue pun ri saic ' ri seunga ' na ' ce gawm ' euc ' . ³³Ui ' hkuin ' se ' dai ' hk'il ' , leumuil mae ' hk'ohk'eung a ' nhaw ' . ³⁴Cu ui ' ti ' ri na ' ui ' sok ku ' lo ' ui ' na ' mae ' ku ' lo ' ce peue ut ' mae ' ui ' na ' ce, pe ' ku yawng a. ³⁵Ku ' pun ui ' ri yeuh pe ' nawk heul ' hawc ' na ' ce ku ceu ka hk'a ' naee vang sae ' - caee ' yeuh kan ' seun ' aen ' a na ' , e ' na ' kah ri teum ' kawm peue kawl ' reng kloe na ' ce. Kuit rot ri ku ' Yesu ' lah ' Eun na ' reu ' . Eun lah ' , 'Tuil ' na ' ko ' , mun ' keuting a hk'ai ' pun na ' . ' ."

³⁶Yam Paw ' lu hawc ' lah ' eun a na ' , eun seukluin ri hk'o ' mun ' mae ' ce gawm ' euc ' . ³⁷Yam buih cem ce ri huit ' Paw ' lu eun na ' , ce yam gawm ' euc ' ri. ³⁸Ku ' yeuh ce mhong ' mhil ' nyawk ' na ' kopti Paw ' lu lah ' eun ce kaw un ' laee pun ri nyu buh ri bae na ' . Hawc ' ko ' , ce heul ' tuil ' hk'a ' eun rot ri reu na ' .

Paw ' lu heul ' eun nang veng Yeru ' salaem

21 Hawc ' gah ' ye hk'ai ' ce na ' , ye pawk reu na ' seumeu ' heul ' ri kaw ' Kos ' na ' . Hawc ' ka na ' ti seunyi, ye heul ' ri kaw ' Rodes ' na ' . Neum teh ' na ' , ye rot nang veng Patara ' na ' . ²Ye nyu reu kaw heul ' ri kuing ' Hpi ' ni ' sia na ' , ye ku pawk reu awn ' a heul ' . ³Hawc ' nyu ye kaw ' kuing ' Sai ' plas ' na ' , ye heul ' hk'a ' col ka na ' ye rot kuing ' Su ' ri ' na ' . Reu na ' a tah ' ri hue ' hk'eung ri na ' nang veng Tai ' ra ' na ' . ⁴Ye hk'eup '

tapae ' na ' ce teh ' . Ye keului ' ri mae ' ce a ' res seunyi. Cit ' seunga ' na ' a cu tapae ' na ' ce hk'o ' hk'ang un ' laee kah Paw ' lu eun heul ' nang veng Yeru ' salaem na ' . ⁵Daecti yam rot a yam ka na ' , ye ku gah ' hk'ai ' ce. Ye suip hk'a ' ri heul ' . Tapae ' na ' ce mae ' beun ' kon ' ce na ' ce tuil ' ye rot hk'a ' nok ka veng na ' . Ye seukluin ri hk'o ' mun ' keunam ka ba mha ' seumut ' na ' . ⁶Hawc ' am ' la ye puri na ' , ye lec reu na ' . Ce ku ing ' ti nya ri.

⁷Neum veng Tai ' ra ' na ' , ye suip ri heul ' rot nang veng Polemas ' na ' . Ye heul ' hk'eup ' ec ' awng ' na ' ce teh ' . Ye keului ' ri mae ' ce ti seunyi. ⁸Hawc ' ka na ' ti seunyi, ye pucti heul ' neum teh ' na ' , ye rot nang veng Kae ' sari ' na ' . Ye keului ' ri nang nya eun Hpi ' lip ' ku ' meuh nang sangsawn ' leukah ' mun ' ren ' kawm. Eun meuh peue ut ' hk'a ' naee muk ce peue a ' res peue † na ' ti peue. ⁹Eun kue ' kon ' beun ' kawm ' meuh kon ' hk'ih ' pun ' peue. Ce meuh beun ' suip leukah ' Eun Peucawo ' .

¹⁰Hawc ' ut ' ye teh ' heun ' seunyi na ' , a kue ' peue suip leukah ' Eun Peucawo ' ing ' neum kuing ' Yu ' da muis Agabas ' ti peue. ¹¹Eun ing ' ri ye. Eun ti sae ' caet ' eun Paw ' lu na ' eun mawt ti ' cung ri na ' ri ka. Hawc ' ko ' , eun lah ' , "Cit ' seunga ' chak ' na ' lah ' ka a yeuh keutit ' , 'Peue Yu ' da ut ' nang veng Yeru ' salaem na ' kaw ce mawt cawo ' ka sae ' caet ' aen ' eun yeuhki ' . Ce kaw ap eun ri peue un ' meuh peue ceu Yu ' da na ' ce. "

¹²Yam pun ye ri mhawng ' leukah ' awn ' a na ' , ye ri mae ' peue ut ' mawn ' na ' ce ye hk'o ' hk'ang Paw ' lu eun un ' laee heul ' nang veng Yeru ' salaem na ' . ¹³Paw ' lu eun top ' a, "A ci ' meuh kop keunhaw ' pe ' vae ' yam, yeuh hpum ' ui ' kaw gvah ' . Un ' mak ' nang lah ' chae ' kaw peue mawt ui ' . Ui ' saec ' na ' pun ri yeum nang veng Yeru ' salaem na ' ko ' , kopti meuh a muis Eun Yesu ' na ' , rangraen ui ' ri hawc ' . " ¹⁴Yam un ' laee leuceng eun leukah ' ye na ' , ye un ' laee hk'o ' hk'ang a ri heun bae. Ye lah ' , "Kah a meuh hot ' alo Eun Peucawo ' reu ' . "

¹⁵Hawc ' ko ' , ye rangraen ri huk ' nang veng Yeru ' salaem na ' . ¹⁶Tapae ' ut ' nang veng Kae ' sari ' na ' ce ku heul ' me ye ngon ' . Ce va ye heul ' keului ' ri nang nya eun Manasan na ' . Eun meuh peue ing ' neum kaw ' kuing ' Sai ' plas ' na ' . Eun meuh tapae ' muk nanggal ' na ' ce.

Paw ' lu rot eun nang veng Yeru ' salaem

¹⁷Yam rot ye nang veng Yeru ' salaem na ' , ec ' awng ' na ' ce ren ' kawm rap ri ti ye. ¹⁸Hawc ' ka na ' ti seunyi, Paw ' lu eun mae ' ye ri ye heul ' hk'eup ' Yakop ' eun. Ro ' kan nang kawt na ' ce ku cu ri mawn ' gawm ' euc ' ri. ¹⁹Hawc ' Paw ' lu lah ' eun leukah ' hk'eup ' puri mae ' ce

† Peue caee 6:5

na', eun ris ce mhawng' lawng ku' Peucawo' yeuh Eun ri muk ce peue un' meuh peue ceu Yu'da na' hk'a' naee kan' yeuh ri na' meulamlam ri.

²⁰ Yam pun ce ri mhawng' a na', ce suk' seun' Peuca-wo' Eun. Ce lah' a ri Paw'lu eun, "Nawepi, peue Yu'da pun ri yum', ce ti leukah' ritroe na' seucen gawm' euc' ri na', ce ci' kue' a' neng heng' peue mi ku nyu a yeut. ²¹ Ce pun ri mhawng' sangsawn' mi peue Yu'da ut' mae' peue un' meuh peue ceu Yu'da na' ce, mi kah ce hpawt' ri hk'uih ri Mo'se eun, un' kah ce ton' duing' hak' ce kon' ri na' mae' un' kah ce hot' ritroe e' na'. ²² E' ci' kaw htuk' ri yeuh sa' nhaw'? Ing' rot mi na' kaw ce yawng a neum yeut. ²³ Kop awn' na, mi na' hot' ri yeuh seun' ku' lah' ye na' reu'. Kue' e' peue yeuh kati sat' ca' pun' peue. ²⁴ Va ce heul' yeuh ritroe yeuh ri seunga' na' tiduih' mae' ce reu'. Punta kaw ce kon' cing' ri na', tuil' ngos ka pun ce reu'. Yeuh keutit' ko', peue kaw pun ri yawng lawng ku' pun ce ri mhawng' lawng mi na' un' meuh ka ku' neumneum. Daecti ce kaw pun ri yawng a' yu im' mi hot' ritroe na' heul' meulamlam ri yeut. ²⁵ Pun ce peue un' meuh peue ceu Yu'da yum' na' ce ko', ye tem' ri tuil' lai ku' hk'o' ye, ye taws' a deut ri ce na' kah ce vel hk'a ku' hk'a tan ri ruphtu, hk'a nham', hk'a keune sat' seurot' ngok ri yeum na' mae' hk'a' hkuit' nawng' tang' na'."

²⁶ Hawc' ka na' ti seunyi, Paw'lu eun va peue pun' peue awn' ce heul' yeuh ritroe yeuh ri seunga' na' tiduih'. Hawc' ko', punta kaw eun pao' peue mhawng' seunyi yam yeuh ce ritroe seunga' na' htonnuk ka na', mae' punta kaw eun tan ku' tan pun ce peue nhaw' peue awn' ri na', eun ing' lec nang nya hk'o' mun' keuting na'.

Mheut' Paw'lu eun

²⁷ Yam kaw a hk'aws' htonnuk a' res seunyi na', peue Yu'da ing' neum kuing' Asa' na' ce pun ri nyu Paw'lu eun nang nya hk'o' mun' keuting na'. Ce heul' cu' ci' peue cum heun' na' ce. Hawc' ko', ce mheut' Paw'lu eun. ²⁸ Ce klawng ri lah', "Peue I' sarela' na' pe', teum' kawm ye vae. Peue aen' meuh eun peue sangsawn' peue ut' ku duih' na' ce hkat' hkan peue ceu e', ritroe e' mae' nya hk'o' mun' keuting e' aen' na. Lheu' awn' na eun va peue Helasa' na' ce ing' lec nang nya hk'o' mun' keuting na'. A yeuh vang seunga' chak' na' hk'aw' jeuk." ²⁹ (Nanggal' aen' na pun ce ri nyu Trofimas' peue E' fe' su' na' ut' eun mae' Paw'lu eun nang veng na'. Kop awn' na, ce hteum' Paw'lu eun va eun ing' lec nang nya hk'o' mun' keuting na'.)

³⁰ Peue veng na' ce seutu in seutan gawm' euc'. Peue cuca ri ing' neum ku hon', ce ing' mheut' Paw'lu eun. Ce ol' eun pucti lih hk'a' nok ka nya hk'o' mun' keuting na', ce keulawn' sawng' leuva' ka na'. ³¹ Yam buih co' ca' ce ri kaw toh Paw'lu eun na', hkao' lawng ku' suksak nang veng Yeru' salaem na' a rot ri po' suik' keuting ce peue suik' Ro' ma na' eun. ³² Eun keulawn' va po' suik' mae' peue suik' ri na' ce lih vang ut' ce peue cum heun' na'. Yam peue yeuh ku' suksak na', pun ce ri nyu po' suik' keuting eun mae' peue suik' eun na' ce, ce yut' klaee' ri Paw'lu eun na'.

³³ Po' suik' keuting na' eun ing' mheut' Paw'lu eun. Eun kah ce mawt eun ri mu' lhec' lal' nyeng. Hawc' ko', eun mhaing' lah', "Eun ci' meuh a' nhaw'? Eun ci' yeuh keunhaw'?" ³⁴ Peue cum heun' na' ce ngon' ce klawng ri lah' a yeuhko', ngon' ce klawng lah' a yeuhki' i', a suksak nyawk'. A yeuh po' suik' na' eun un' cang ti ku' lah' ce na' a ci' meuh keunhaw' neum. Kop awn' na, eun kah ce va Paw'lu eun huk' nang tawp ce peue suik' na'. ³⁵ Yam rot ce ri bong' na', peue suik' na' ce pun ri jong' eun heul' kopti peue cum heun' na' seungeueng' nyawk' ce. ³⁶ Ce hot' ri klawng ri lah' yawo, "Toh eun reu'."

Paw'lu leukah' eun ri peue heun'

³⁷ Yam peue suik' na' kaw ce va Paw'lu eun huk' lec nang tawp ri na', Paw'lu eun mhaing' po' suik' keuting na' eun, "Kaw ui' cang hk'o' ri leukah' ri mi aw'?"

Po' suik' keuting na' eun mhaing' eun, "Lak' yawng mi leukah' Helasa' yeut aw? ³⁸ Un' meuh mi peue E' ji' tu' ku' fuin kuing' mae' va peue rai hpawn' heng' peue ce heul' nang vang hk'oh' hk'oeng' nanggal' aen' a na' eun aw'?"

³⁹ Paw'lu eun top' a, "Meuh ui' peue Yu'da ing' neum veng Tarsas' kuing' Si' li' si' na'. Ui' meuh peue ka veng muis laws' na'. Hk'o' mi tuil' ahkvang kaw ui' leukah' ri peue heun' na' ce."

⁴⁰ Yam po' suik' keuting na' tuil' eun ahkvang ka na', Paw'lu eun cawng ri bong' na' eun yuk ti' ri ri peue heun' na' ce. Yam yen' ce na', eun lah' leukah' Arame'. Eun lah',

22 "Ec' awng' mae' a' kuing' na' pe', hk'o' pe' leuceng leukah' kaw ui' lah' na'."

² Yam mhawng' ce lah' eun leukah' Arame' na' ce dit' ti yen'. Hawc' ko', Paw'lu eun lah' a, ³ "Meuh ui' peue Yu'da keut' nang veng Tarsas' kuing' Si' li' si' na', daecti ui' keuting nang veng Yeru' salaem aen' na. Ui' meuh luksic' eun Gamalela'. Ui' pun ri rin leukah' ritroe ce a' ta' a' ya e' na' meulamlam ri. Ui' ku hpum'

huk' hk'a' naee Peucawo' Eun seun' buih hpum' huk' pe' seunyaen' na' yeut. ⁴Ui' tawn keunhap' peue hot' 'hk'a' ka ritroe aen'' ce rot ri toh ui' ce. Ui' mheut' ri seue' beun' me na' ce nang htawng'. ⁵Saec' meuh peue jhawp' rit keuting mae' muk peue taws' kan' na' kaw ce cang meuh sa' hki' ui' na'. Ui' yeuh a rot ri heul' hk'o' ui' lai ri ce punta kaw ui' heul' tuil' a ri ec' awng' ce ku' ut' nang veng Damas' kas' na' ce. Hawc' ko', punta kaw ui' mheut' peue awn' ce meuh peue htawng' ing' ciyang ce nang veng Yeru' salaem na', ui' heul' nang veng Damas' kas' na'.

Paw' lu ris eun lawng taws' ri hpum' ri

⁶Yam peunnyi keuting yam kaw ui' hk'aws' rot nang veng Damas' kas' na', a keulawn' kue' ku' ceng' reng nyawk' lih neum pang mao' na'. A htawng' ui' rop. ⁷Ui' cung' kus pang keute' na', ui' pun ri mhawng' seng' na' lah' ka ri ui', 'Saw' lu, Saw' lu, a ci' meuh kop keunhaw' mi vae' keunhap' Ui'?'

⁸Ui' mhaing', 'Cawo', Mi ci' meuh a' nhaw'?'

Eun top' a, 'Meuh Ui' Yesu' peue veng Nasaraet' ku' keunhap' mi na' Eun.' ⁹Peue hot' ui' na' ce saec' nyu ku' ceng' awn' a na', daecti ce hkuin' mhawng' leukah' lah' ri ri ui' na'.

¹⁰Ui' mhaing' Eun, 'Cawo', ui' ci' kaw htuk' ri yeuh sa' nhaw'?'

Cawo' Eun lah', 'Kuh' heul' nang veng Damas' kas' na' reu'. Teh' na' kaw a kue' nang kaw lah' mi mhawng' yawng ku' kaw mi htuk' ri yeuh na'. ¹¹Kopti ku' ceng' awn' yeuh ka ngai' ui' fec' na', peue hot' ui' na' ce teuk' ti' ui' na' ing' nang veng Damas' kas' na'.

¹²A kue' peue muis Anani' ti peue eun ing' ri ui'. Eun meuh peue reng hk'a' naee leukah' ritroe na'. Peue Yu' da ut' teh' na' ce gawm' euc' ce yumyam' eun nyawk'. ¹³Eun cawng keunam ui' na', eun lah', 'Awng' ui' Saw' lu, tang cang nyu hk'a' ri reu'. Yam awn' na, ui' ku cang nyu eun.

¹⁴Hawc' ko', eun lah', 'Peucawo' Eun a' ta' a' ya e' na' leuk Eun ri ti mi. Eun kah mi yawng alo ri na', kah mi pun ri nyu hk'a' leupaws seumeu' na' mae' kah mi pun ri mhawng' leukah' lih neum moeng ri na'. ¹⁵Mi kaw pun ri meuh nang hkam' sa' hki' pun Heun nang-gal' peue gawm' euc' ri ku' pun mi ri nyu mhawng' na' ce. ¹⁶Maet' maen' mi ci' kawn' ko' keunhaw'?' Kuh' rap ri ti hk'a' cum' saic' ri tec map' mi na' gawm' euc' ri klawng muis Eun na' reu'.'

Yesu' klawng Eun Paw' lu eun heul' ri peue un' meuh peue ceu Yu' da na' ce

¹⁷Yam keutah ui' ing' rot nang veng Yeru' salaem ui' buih hk'o' mun' nang nya hk'o' mun' keuting na', ui' pun ri nyu limit. ¹⁸Ui' nyu Peucawo' lah' Eun, 'Vaeveae, keulawn' puc mi heul' hk'ai' veng Yeru' salaem na' reu'. Kopti ku' hkam' mi sa' hki' lawng Ui' na', peue aen' kaw ce un' rap ri ti a.'

¹⁹Ui' top' a, 'Cawo', peue aen' yawng ce lawng heul' ui' ri sa' la vang hk'o' mun' na' ti duih' hawc' ti duih', punta kaw ui' seue' peue yum' Mi na' ce nang htawng' mae' ta' faet' ce na'. ²⁰Yam yeuh ce nham' eun Satehpan ku' meuh nang hkam' sa' hki' Mi na' peuc' na', ui' ku cawng keunam ce. Ku' yeuh ce na' a ku htuk' hpum' ui'. Ui' ko' hk'eung ce peue toh eun na' ce.'

²¹Hawc' ko', Peucawo' Eun lah' a ri ui', 'Heul' reu', kaw ui' cus' mi heul' vang seungai ri peue un' meuh peue ceu Yu' da na' ce.'

Paw' lu meuh eun peue Ro' ma

²²Yam leuceng ce leukah' eun Paw' lu na' rot ri leukah' aen' a na', ce klawng ri lah' laws' a, 'Ti ri tec eun hk'ai' pang bhen' keute' na' reu', peue yeuhko' na' un' ku-ing' eun ri a' yu im'.'

²³Yam buih ta' ul' ce na', ce hpuc' hk'o' ri kup' ri puin' keute' na' huk' ang' kat' na', ²⁴po' suik' keuting na' eun kah ce va Paw' lu eun huk' lec nang tawp na'. Eun kah ce ta' faet' eun ri mu', mhaing' eun a ci' meuh kop keunhaw', peue vae' klawng ri lah' ku' yeuhko' ri heun. ²⁵Yam mawt ce ri kaw ta' faet' eun na', Paw' lu eun mhaing' po' suik' cawng keunam ri na' eun, 'Peue Ro' ma na' eun ci' kleuc' un' kleuc' un' nang taws' a' mu ka ta' faet' eun na', cawp' a ritroe ka aw?'

²⁶Yam po' suik' na' mhawng' eun leukah' awn' a na', eun heul' ris a ri po' suik' keuting na' eun. Mhaing' eun, 'Mi ci' kuit ri kaw yeuh sa' nhaw'? Peue aen' meuh eun peue Ro' ma.'

²⁷Po' suik' keuting na' eun ing' mhaing' Paw' lu eun, 'Meuh mi peue Ro' ma aw? Lah' ui' mhawng' a reu'.'

Paw' lu eun top' a, 'Euh, meuh ui' yeut.'

²⁸Po' suik' keuting na' eun lah', 'Punta kaw ui' pun ri meuh peue Ro' ma na', pun ui' ri seue' leumuil he-un'.'

Paw' lu eun top' a, 'Daecti meuh ui' peue Ro' ma tang' neum yam keut' ui' na'.'

²⁹ Peue kaw caet mhaing ' eun na ' ce keulawn ' pucti heul '. Saec ' meuh po ' suik ' keuting na ' kopti pun eun ri kah ce mawt Paw ' lu ku ' meuh peue Ro ' ma na ' eun ri mu ' lhec ' na ' , eun ku tok ' seupa.

Paw ' lu ut ' eun nanggal ' ce muk peue hk'om kan '

³⁰ Hawc ' ka na ' ti seunyi, po ' suik ' keuting na ' eun ploec ' Paw ' lu eun. Kopti sum ' yawng eun a ci ' meuh kop keunhaw ' , peue Yu ' da na ' ce vae ' tang ' a ' mu hk'a ' - pang Paw ' lu eun na ' , eun klawng peue jhawp ' rit keuting na ' ce mae ' muk peue hk'om kan ' na ' ce hk'om puri. Hawc ' ko ' , eun kah ce uin ' Paw ' lu eun cawng nanggal ' ce peue hk'om kan ' na ' .

23 Paw ' lu eun keue ' tam ' ri muk peue hk'om kan ' na ' ce. Eun lah ' , "Ec ' awng ' na ' pe ' , kan ' kaw ui ' htuk ' ri yeuh ri Peucawo ' Eun na ' buih yeuh ui ' a ri hpum ' cang yawng ri na ' rot seunyaen ' ." ² Yam awn ' na , peue jhawp ' rit keuting muis Anani ' na ' eun kah peue cawng keunam Paw ' lu eun na ' ce dah moeng eun Paw ' lu na ' . ³ Hawc ' ko ' , Paw ' lu eun lah ' a ri heun, "Peucawo ' kaw Eun dah mi, peue meuh dal un ' ngam pok ri ri pun ' aen ' mi. Punta kaw mi taws ' a ' mu ri ui ' hot ' leukah ' ritroe na ' , mi mok ' mawn ' . Daecti mi un ' hot ' leukah ' ritroe na ' ri kah mi ce dah ui ' na ' ."

⁴ Peue cawng keunam Paw ' lu eun na ' ce lah ' , "Lah ' mi ku ' un ' nawpsang ri peue jhawp ' rit keuting Eun Peucawo ' na ' eun aw?"

⁵ Paw ' lu eun top ' a, "Ec ' awng ' na ' pe ' , un ' yawng ui ' meuh eun peue jhawp ' rit keuting, kopti kue ' a ku ' tem ' ri lah ' , 'Pawlae lah ' leukah ' rai ri peue u ' peung peue ceu mi na ' ce.' †"

⁶ Yam Paw ' lu pun eun ri yawng peue hk'om na ' meuh ce peue Sadu ' kae ' , ngon ' ce meuh peue Hparisae ' ngon ' na ' , eun lah ' a ri muk peue hk'om kan ' na ' ce, "Ec ' awng ' na ' pe ' , meuh ui ' peue Hparisae ' , kon ' Hparisae ' . Ui ' pun ri hkam ' hk'a ' taws ' a ' mu na ' kop-ti meuh a keutui ' hpum ' ui ' ri hk'a ' tang kuh ' im ' na ' ." ⁷ Yam lah ' eun a yeuh keutit ' na ' , peue Hparisae ' mae ' peue Sadu ' kae ' na ' ce htu ' hting ' puri. Peue hk'om na ' ce gvah ri meuh lal ' cum. ⁸ (Peue Sadu ' kae ' na ' lah ' ce a un ' kue ' hk'a ' tang kuh ' im ' , un ' kue ' in ' hpom, un ' kue ' Cit ' . Daecti peue Hparisae ' na ' ce lah ' aen ' ce gawm ' euc ' kue ' ka.)

⁹ Kop awn ' na , ce seutu in seutan. Peue guil leukah ' ritroe ku ' meuh peue Hparisae ' na ' ce ngon ' , ce yuk ri kuh ' htu ' hting ' blih ' ri. Ce lah ' , "Un ' nyu ye ku ' kleuc ' hk'a ' nae peue aen ' eun saec ' ti ceu. Cit ' un ' lah ' , in ' hpom na ' ce un ' lah ' , ce lawn na ' leukah ' "

maee ' heun ko ' , pe ' ci ' kaw lah ' a yeuh sa ' nhaw ' ?" ¹⁰ Yam htu ' hting ' nyawk ' ce puri a hk'o ' po ' suik ' keuting na ' eun kuit gla ri peue awn ' na ' ce kaw cang ol ' Paw ' lu eun deut meuh nyhic ' ri law na ' , eun kah peue suik ' na ' ce ing ' rim ' ri ti Paw ' lu eun nang ti ' ce na ' . Hawc ' ko ' , eun kah ce va eun huk ' nang tawp na ' .

¹¹ Bul awn ' na, Peucawo ' Eun cawng keunam eun Paw ' lu na ' . Eun lah ' , "Hat ' han ' reu ' . Seun ' pun mi ri hkam ' sa ' hki ' lawng Ui ' na ' nang veng Yeru ' salaem na ' , mi kaw pun ri hkam ' a nang veng Ro ' ma na ' yeut."

Raen ri kaw toh Paw ' lu eun

¹² Peunngup peunsa ' ka na ' , peue Yu ' da na ' ce hk'om puri hkam ' kati sat ' ca ' meun ri tu ' ri tiduih ' . Ce lawn un ' pun ri toh Paw ' lu eun ko ' , ce kaw un ' nyui un ' hk'a keunhaw ' . ¹³ Peue hkam ' a yeuh keutit ' na ' ce kue ' pun ' kul ' peue pai ' . ¹⁴ Ce heul ' hk'eup ' peue jhawp ' rit keuting mae ' ro ' kan nang kawt na ' ce. Ce lah ' , "Hkam ' ye kati sat ' ca ' meun ri tu ' ri tiduih ' hawc ' . Ye lawn un ' pun ri toh Paw ' lu eun ko ' , ye kaw un ' hk'a keunhaw ' . ¹⁵ Kop awn ' na maet ' maen ' , pe ' na ' guil ri seun ' tang sum ' mhaing ' ri Paw ' lu eun meulam lam ri ko ' , pe ' ri mae ' muk peue hk'om kan ' na ' pe ' , pe ' na ' heul ' hk'o ' ri kah po ' suik ' keuting eun tuil ' Paw ' lu eun ri ti. Raen ye ri kaw ko ' toh eun yam un ' nang ing ' rot eun maen ' na ' ."

¹⁶ Daecti kon ' me ka awng ' beun ' eun Paw ' lu na ' pun eun ri yawng lawng awn ' a na ' . Eun huk ' lah ' Paw ' lu eun mhawng ' a nang tawp.

¹⁷ Hawc ' ko ' , Paw ' lu eun klawng po ' suik ' ti peue na ' eun ing ' . Eun lah ' , "Hk'o ' mi va nang nhum ' aen ' eun heul ' ri po ' suik ' keuting na ' eun. Kue ' eun ku ' kaw lah ' ri heun." ¹⁸ Kop awn ' na , po ' suik ' na ' eun va nang nhum ' na ' eun heul ' hk'eup ' po ' suik ' keuting na ' eun.

Po ' suik ' na ' eun lah ' , "Ku ' meuh Paw ' lu peue htawng ' na ' klawng eun ri hk'o ' hk'ang ui ' va nang nhum ' aen ' eun heul ' hk'eup ' mi, kopti kue ' eun ku ' kaw lah ' ri mi na ' ."

¹⁹ Po ' suik ' keuting na ' eun teuk ' ti ' eun nang nhum ' na ' , va eun heul ' vang geup ' na ' . Eun mhaing ' eun, "Mi ci ' sum ' lah ' keunhaw ' ri ui ' ?" ²⁰ Eun top ' a, "Peue Yu ' da na ' guil ce ri seun ' tang sum ' mhaing ' ri Paw ' lu eun meulam lam ri ko ' , ce sa ' lit puri kaw hk'o ' ri kah mi tuil ' Paw ' lu eun ri muk peue hk'om kan ' na ' ce peunsa ' . ²¹ Hk'o ' mi pawlae tuil ' eun, kopti peue pun ' kul ' peue pai ' na ' rangraen ce ri kaw ko ' toh eun. Ce hkam ' kati sat ' ca ' meun ri tu ' ri tiduih ' , ce lawn un ' pun ri toh Paw ' lu eun ko ' , ce kaw un ' nyui un ' hk'a keunhaw ' .

† Pucti heul ' 22:28

Maet 'maen' rangraen ce ri hawc', ko' ce ri kaw leuceng yawo kaw mi tuil' ahkvang ka seun' ku' hk'o' ce na'."

²² Po' suik' keuting na' eun kah nang nhum' na' eun ing'. Eun deun' eun, "Pawlaee lah' a' nhaw' mhawng' lah' mi lawng aen' a ri ui' awh."

Cus' Paw'lu eun heul' nang veng Kae' sari'

²³ Hawc' awn' na, po' suik' keuting na' eun klawng po' suik' lal' peue na' ka ing'. Eun tuil' leukah' lah', "Rangraen peue suik' leual' pak' peue, peue suik' pawk rawng a' reskul' peue mae' peue suik' klawm' bles leual' pak' peue ce na' heul' nang veng Kae' sari' na' bul seunyaen' seudim' nali reu'. ²⁴ Punta kaw pe' va ri heul' tuil' Paw'lu eun ri cawo' keuting Felis' eun sa' pa sam' ran na', rangraen rawng kaw eun pawk na' reu'."

²⁵ Po' suik' keuting na' eun tem' lai yeuhki',

²⁶ "Lai aen' meuh a lai tem' ui' Hkaodi' as' Li' si' as'.

Hk'a' naee vang yumyam' na',

ui' bu' lai aen' a ri mi cawo' veng Felis'.

²⁷ Peue Yu' da na' mheut' ce ri daee toh peue aen' eun, daecti ui' va peue suik' ri na' ce heul' teum' kawm ri pun eun, kopti yawng ui' meuh eun peue Ro' ma na'.

²⁸ Kopti sum' yawng ui' a ci' meuh kop keunhaw', ce vae' tang' a' mu hk'a' pang eun, ui' ku va eun heul' nang muk peue hk'om kan' ce peue Yu' da na' yeut.

²⁹ Ui' pun ri yawng tang' ce map' ri heun kopti meuh a leukah' ritroe ce na' koe. Daecti ui' un' nyu tut kuing' eun ri kaw yeum mae' tut kuing' eun ri kaw ut' nang htawng'. ³⁰ Yam pun ui' ri mhawng' rangraen peue ri kaw toh peue aen' eun na', ui' keulawn' cus' eun heul' ri mi. Ui' ku tuil' leukah' ri peue tang' a' mu hk'a' pang eun na' ce heul' lah' lawng eun na' nanggal' mi."

³¹ Bul awn' na, peue suik' na' ce va Paw'lu eun lih rot nang veng Anhti' paris' na' seun' ku' po' suik' keuting na' tuil' eun leukah' ri na'. ³² Peunngup peunsa' ka na', ce kah peue suik' pawk rawng na' ce suip ri va Paw'lu eun heul', peue suik' seubu na' ce tang huk' nang tawp ri na'. ³³ Yam peue suik' pawk rawng na' rot ce nang veng Kae' sari' na', ce tuil' lai na' ri cawo' veng na' eun. Ce ku ap Paw'lu eun ri heun. ³⁴ Hawc' cawo' veng na' lip eun lai na', eun mhaing' Paw'lu eun, "Mi ci' ing' neum kuing' tawngnhaw'?" Yam yawng eun ing' eun neum kuing' Si' li' si' na', ³⁵ eun lah', "Kaw ui' leuceng lawng a' mu mi na' yam peue tang' a' mu ri mi na' ing' rot ce maen' na' yeut." Hawc' ko',

eun kah ce ko' kawm Paw'lu eun nang haw' eun Herot' na'.

Taws' a' mu ri Paw'lu eun nanggal' cawo' Felis'

24 Yam rot a hpawn' seunyi na', Anani' peue jhawp' rit keuting na' eun muk ro' kan nang kawt mae' peue chanan yeuh a' mu muis Teutulas' na' eun ce lih rot nang veng Kae' sari' na'. Ce tang' a' mu ri Paw'lu eun ri cawo' veng na' eun. ² Yam cawo' veng na' klawng eun Paw'lu eun ing' mawn' na', Teutulas' eun tang' a' mu ri Paw'lu eun. Eun lah' a ri cawo' veng na' eun, "Cawo' Felis', pun ye ri ut' mae' hk'a' kuit nyawk' kuit sam' ran cumyen' ri hk'a' ruim vang u' peung mi na' ling' hawc'. Kopti kuit lang' mi na', peue ceu aen' ye leuploh' plin' ri huk' hawn' vah keuting. ³ Rap ye ri ti a ku duih' ku ceu hk'a' naee vang suk' seun' ye mun' mi na'. ⁴ Daecti punta kaw ye un' suksak mi ling', ui' kaw leukah' peunaeng', hk'o' mi yeunyang' ri leuceng a.

⁵ Ye pun ri yawng peue aen' meuh eun nang yeuh ku' suksak. Eun cu' peue Yu' da ut' pang bhen' keute' na' ce yeuh ku' suksak gawm' euc'. Eun ku meuh ro' ce peue muk Nasaraet' na' ti peue yeut. ⁶ Lheu' awn' na, eun co' ca' ri miccing ka nya hk'o' mun' keuting na'. Kop awn' na, ye mheut' ri ti eun. ⁷¹⁸ Cheu mi hki' mhaing' ri nawk meun eun, mi ku kaw yawng map' tang' ye hk'a' pang eun na' gawm' euc' ka yeut."

⁹ Saec' meuh peue Yu' da ku' teum' kawm puri tang' a' mu hk'a' pang eun na' ce na', ce ku htawhkam aen' ce meuh a neum gawm' euc' yeut.

¹⁰ Yam cawo' veng na' yuk eun ti' ri kah Paw'lu eun leukah' na', Paw'lu eun lah', "Yawng ui' taws' mi a' mu ri peue ceu aen' ce heun' neum hawc', ui' ku ren' kawm mae' kaw ri to' tam' a' mu tang' ce na'.

¹¹ Cawo', lawng heul' hk'o' ui' mun' nang veng Yeru' salaem na' kopti un' nang tang a hk'ai' kul' leual' seunyi na', kawm' kaw mi cang hki' mhaing' ri yawng sam' ran a yeut. ¹² Peue tang' a' mu hk'a' pang ui' na' ce hkuin' duing nyu htu' hting' ui' a' nhaw' nang nya hk'o' mun' keuting na'. Saec' meuh nang sa' la vang hk'o' mun' na' mae' nang veng na' ce ku duih', ce ku un' duing nyu cu' ui' peue yeuh ku' suksak. ¹³ Ce sok un' cang pun ku' kaw htawhkam ka map' buih tang' ce hk'a' pang ui' na'. ¹⁴ Saec' yeuh sa' nhaw', rap ui' ri ti ui' faee' Peucawo' ce a' ta' a' ya e' na' mae' hot' ui' 'hk'a' ka ritroe aen' na' ku' lah' peue meuh ritroe

† Nang htawm Seunga' na' ngon' tem' a ri yeuhki' 24:6-8 "Punta kaw ye taws' a' mu eun hot' ritroe ye na', ye mheut' ri ti eun. ⁷ Daecti po' suik' Li' sis' eun cu kaw' reng ri eun rim' ri ti eun hk'ai' dak ti' ye, hawc' ko', eun kah ye ing' yeuh a' mu eun na' nanggal' mi."

seubu ti muk na'. Yum' ui' ku' to' ri ri leukah' ritroe na' mae' ku' tem' ri nang htawm ce peue suip leukah' Eun Peucawo' na' gawm' euc' ka. ¹⁵Seun' peue aen' keutui' hpum' ce a hk'a' naee Peucawo' Eun peue leupaws seumeu' na' mae' peue rai na' kaw ce tang kuh' im' bae' na', ui' ku' keutui' hpum' a yeut. ¹⁶Kop awn' na punta kaw a un' kue' map' tang' ri hk'a' pang ka hpum' cang yawng ui' na' nanggal' Eun Peucawo' na' mae' nanggal' ce peue na', ui' co' ca' ri yeuh a yeut.

¹⁷Hawc' ka pun' hpawn' neum na', punta kaw ui' teum' kawm peue hk'o' tukyak ceucat ui' na' ce mae' kaw ui' tan ku' tan na', ui' huk' nang veng Yeru' salaem na'. ¹⁸Yam nyu ce buih yeuh ui' keutit' nang nya hk'o' mun' keuting na', ui' yeuh ritroe yeuh ri seunga' na' hawc'. Peue cum heun' na' ce hkuin' ut' mae' ui', ku' suksak na' ui' ku' hkuin' yeuh a. ¹⁹Daecti peue Yu' da ut' kuing' Asa' na' ce ku' ut' mawn'. Ce lawn kue' a' mu kaw tang' ri hk'a' pang ui' ko', ce htuk' ri ut' nanggal' mi maen'. ²⁰Lheu' awn' na, peue ut' maen' na' ce htuk' ri lah' ku' kleuc' kue' hk'a' naee ui' na' yam cawng ui' nanggal' ce muk peue hk'om kan' na'. ²¹A lawn un' meuh yawo leukah' klawng ui' ri lah' yam cawng ui' nanggal' pe' ui' lah', 'Seunyaen', pun ui' ri hkam' hk'a' taws' a' mu nanggal' pe' na' kopti meuh a yum' ui' hk'a' tang kuh' im' na'' ko', pe' hkuin' kaw kue' ku' kaw tang' a' mu ri ui' saec' ti ceu."

²²Kopti cawo' Felis' yawng eun lawng "hk'a' ka ritroe aen' na" meulamlam ri na', eun kah ce sat yam ka taws' a' mu na'. Eun lah', "Yam po' suik' keuting Li'si' as' na' eun ing' rot na', ui' na' koe taws' a' mu aen' na deut." ²³Cawo' Felis' eun kah po' suik' na' eun ko' kawm Paw' lu eun. Daecti ku' sum' yeuh eun ti ri ceu na' ce kah eun yeuh a. Ce ku' kah a' mawo eun na' ce cang teum' kawm eun ri ku' lo' eun na' yeut.

²⁴Hawc' ka lal' loe' seunyi na', cawo' Felis' eun mae' beun' eun muis Dusilas' na' ka va puri ing'. Beun' eun na' ka meuh peue Yu' da. Cawo' Felis' eun klawng Paw' lu eun ing' hk'eup' ka. Ka leuceng Paw' lu ris eun lawng hk'a' yum' hk'a' naee Yesu' Hkrit Eun na'. ²⁵Yam Paw' lu ris eun lawng hk'a' leupaws seumeu', lawng pe tu' ri na' mae' lawng yam taws' a' mu kaw ing' na', cawo' Felis' eun lhat'. Eun lah', "Cu a peunaw' reu', kaw mi cang ing' hawc'. Yam na' a kue' yam ka, ui' na' koe tang klawng mi heul' maen' bae." ²⁶Yam awn' na kopti keutui' hpum' eun Paw' lu na' eun kaw cang mhun' ri ri leumuil na', eun klawng ri u Paw' lu eun tam' teuk.

²⁷Hawc' pon a heul' lal' neum na', Pawsias' Fetas' eun ing' meuh cawo', eun ten cawo' Felis' eun. Daecti cawo' Felis' eun sum' kah peue Yu' da na' ce nyu ri htuk' hpum' ri, eun tae' Paw' lu eun ut' nang htawng' na'.

Yeuh a' mu nanggal' cawo' Fetas'

25 Hawc' cawo' Fetas' rot eun nang kuing' awn' na' pun loe' seunyi na', eun kuh' neum veng Kae' sari' na' eun huk' nang veng Yeru' salaem. ²Peue jhawp' rit keuting mae' ro' kan ce peue Yu' da na' ce ing' tang' a' mu eun Paw' lu na' ri cawo' Fetas' eun. ³Ce hk'o' hk'ang cawo' Fetas' eun tuil' Paw' lu eun huk' nang veng Yeru' salaem na', kopti raen ce ri kaw ko' toh Paw' lu eun lang' hk'a' na'. ⁴Cawo' Fetas' eun top' a, "Paw' lu kaw' hk'awng' eun ri nang veng Kae' sari'. Un' ling' ko', kaw ui' tang lih teh' yeut. ⁵Eun lawn kue' ku' kleuc' keunhaw' ko', pe' na' kah ro' kan pe' na' ce lih mae' ui' ngon', ce na' heul' tang' a' mu hk'a' pang eun teh'."

⁶Hawc' ut' eun mae' ce hk'ao kul' seunyi na', eun tang lih nang veng Kae' sari' na'. Hawc' ka na' ti seun- yi, eun mok' pang ten taws' a' mu na'. Eun kah ce heul' va Paw' lu eun ing' ri ti. ⁷Yam Paw' lu rot eun na', peue Yu' da lih neum veng Yeru' salaem na' ce cawng rop eun. Ce tang' a' mu reng na' hk'a' pang eun ri ku' un' kue' sa' hki' keunhaw' heun' ceu na'.

⁸Paw' lu eun kah' ku' lah' ce na'. Eun lah', "Ui' hkuin' yeuh ku' kleuc' ri leukah' ritroe ce peue Yu' da na', ri nya hk'o' mun' keuting na' mae' ri hkun' haw' hkam' Kae' sa eun saec' ti ceu."

⁹Kopti cawo' Fetas' sum' yeuh eun ku' htuk' hpum' ce peue Yu' da na', eun lah' a ri Paw' lu eun, "Na' mi huk' to' tam' a' mu ri aen' a nanggal' ui' nang veng Yeru' salaem na', lak' na' a htuk' hpum' mi aw?"

¹⁰Paw' lu eun top' a, "Maet' maen', buih cawng ui' nanggal' ten taws' a' mu eun hkun' haw' hkam' Kae' sa vang kaw ui' htuk' ri hkam' hk'a' taws' a' mu na' hawc'. Ui' hkuin' yeuh ku' kleuc' ri peue Yu' da na' ce saec' ti ceu, mi ku' yawng a meulamlam ri yeut. ¹¹A saec' yeuh sa' nhaw', ui' lawn yeuh tut kuing' ri kaw toh ri ti ri ceu ko', ui' hkuin' kaw laee plo' pleh' ri. Ui' na' hkam' ri yeum. Daecti a' mu ku' peue Yu' da tang' ce ri ui' na' a lawn un' kue' un' meuh neum ko', a' n- haw' hkuin' kaw cang ap ui' nang dak ti' ce. Hk'o' a' mu ui' aen' a heul' rot ri hkun' haw' hkam' Kae' sa eun."

¹²Hawc' cawo' Fetas' sa' lit eun mae' muk peue tuil' kamkuit ri na' ce na', eun lah', "Kopti hk'o' mi a' mu ri

na' heul' rot ri hkun' haw' hkam' Kae' sa eun na', mi kaw kah ri heul' ri hkun' haw' hkam' Kae' sa eun."

Fetas' hk'o' eun kamkuit ri hkun' haw' hkam' Akli' pa' eun

¹³Hawc' awn' na lal' loe' seunyi na', hkun' haw' hkam' Akli' pa' eun mae' awng' beun' eun muis Beunis' na' ka ing' glue ri cawo' Fetas' eun nang veng Kae' sari' na'. ¹⁴Kopti ut' ka mawn' heun' seunyi na', cawo' Fetas' eun lah' ris hkun' haw' hkam' eun mhawng' lawng eun Paw' lu na'. Eun lah', "Maen' na' kue' a peue htawng' ku' cawo' Felis' hk'awng' eun ri uin' ti peue. ¹⁵Yam ut' ui' nang veng Yeru' salaem na', peue jhawp' rit keuting mae' ro' kan nang kawt peue Yu' da na' ce tang' a' mu eun na' ri ui'. Ce hk'o' ui' taws' a' mu ri heun.

¹⁶Daecti ui' lah' a ri ce, 'A lawn meuh hot' ritroe ce peue Ro' ma na' ko', ku' tang' a' mu na' eun mae' ku' hkam' tang' peue a' mu na' eun ka lawn un' nang cu ri to' tam' puri tiduih' ko', e' hkuin' kaw cang ap ku' hkam' tang' peue a' mu na' eun.' ¹⁷Yam ing' rot ce ri ui' maen' na', ui' hkuin' hkawe ri. Daecti hawc' ka ti seunyi na', ui' tuh' sa' nam' vang taws' a' mu na'. Ui' kah ce heul' va peue awn' eun ing'. ¹⁸Yam yuk ce ri kuh' leukah' na', ce hkuin' tang' a' mu ku' kleuc' seun' ku' kuit ui' na' saec' ti ceu. ¹⁹Daecti ce htu' hting' eun ri lawng ritroe faee' ce na' mae' lawng Eun peue yeum hawc' ti peue Eun muis Yesu' ku' Paw' lu lah' eun Eun kawn' im' na'. ²⁰Un' laee yawng ui' kaw ri taws' a' mu ka lawng aen' na yeuh sa' nhaw'. Kop awn' na, ui' mhaing' eun ri sum' huk' htu' hting' eun a' mu tang' ce ri heun na' nang veng Yeru' salaem aw? ²¹Yam Paw' lu hk'o' eun hkun' haw' hkam' keuting na' eun taws' a' mu na' ri ti na', ui' kah ce puing hk'awng' eun rot yam na' eun heul' ri hkun' haw' hkam' Kae' sa eun."

²²Hawc' ko', hkun' haw' hkam' Akli' pa' eun lah' a ri cawo' Fetas' eun, "Ui' ku sum' mhawng' leukah' eun na' yeut." Cawo' Fetas' eun top' a, "Peunsa' na' mi pun ri mhawng' a."

²³Hawc' ka na' ti seunyi, hkun' haw' hkam' Akli' pa' eun mae' Beunis' na' ka yong' ri ti munhpung' ri lec nang hong' vang hk'om na' tiduih' mae' po' suik' keuting mae' ro' kan keuting nang veng na' ce. Cawo' Fetas' eun kah ce va Paw' lu eun ing' lec nang vang hk'om na'. ²⁴Yam awn' na, cawo' Fetas' eun lah', "Hkun' haw' hkam' Akli' pa' mae' peue hk'om maen' na' pe', pun pe' ri nyu peue aen' eun hawc'. Peue Yu' da na' ce gawm' euc' ce ing' hk'o' lawng eun peue aen'

a ri ui' nang veng Yeru' salaem na' mae' nang veng Kae' sari' aen' na. Ce klawng ri lah' peue aen' un' laee kuing' eun ri im'. ²⁵Ui' hkuin' nyu tut kuing' ri yeum yeuh eun saec' ti ceu. Kopti hk'o' eun a' mu ri na' heul' ri hkun' haw' hkam' keuting na' eun na', ui' kaw cus' eun heul' nang veng Ro' ma na', ui' kuit a deut hawc'. ²⁶Daecti ui' un' nang kue' ku' kaw tem' ri tuil' lawng eun na' meulamlam ri hkun' haw' hkam' keuting eun saec' ti ceu. Kop awn' na hk'a' naee vang hki' mhaing' e' eun na' punta kaw ui' cang pun ku' kaw tem' lawng eun na' ti ri ceu na', ui' va eun ing' nanggal' pe' peue heun' na', lheu' awn' na nanggal' mi hkun' haw' hkam' Akli' pa' na'. ²⁷Kopti e' lawn cus' peue htawng' heul', e' na' un' tem' lai tang' a' mu hk'a' pang eun meulamlam ri ko', kuit ui' a' na' un' cawp'."

Paw' lu leukah' eun nanggal' hkun' haw' hkam' Akli' pa'

26 Hawc' ko', hkun' haw' hkam' Akli' pa' eun lah' a ri Paw' lu eun, "Pun mi ahkvang kaw htu' hting' a' mu ri na' hawc'."

Kop awn' na, Paw' lu eun yuk ti' ri. Hawc' ko', eun tang' ri htu' hting' lah' a' mu ri na',

²"Hkun' haw' hkam' Akli' pa', kopti pun ui' ri kaw htu' hting' lah' lawng a' mu peue Yu' da na' tang' ce hk'a' pang ui' na' gawm' euc' nanggal' mi seunyaen' na', ui' sawn' a meuh yam htuk' lai ri ti. ³Kopti yawng mi ritroe ce peue Yu' da na' mae' lawng ku' htu' hting' ce puri na' meulamlam ri na' yeut. Kop awn' na, hk'o' mi yeun' hkam ri leuceng leukah' ui' na'.

⁴Peue Yu' da na' ce gawm' euc' yawng ce hk'a' a' yu im' ui' na' tang' neum yam meuh ui' nang aet' na' mae' tang' neum yam keut' ui' nang veng ui' na' mae' nang veng Yeru' salaem na' yeut. ⁵Yawng ce ui' na' ling' ka hawc'. Ce lawn sah paw' a ko', ce ku kaw cang hkam' sa' hki' lawng meuh ui' peue a' yu im' hk'a' naee ritroe faee' reng ye na'. Ui' meuh peue Hparisae'. ⁶Daecti maet' maen' pun ui' ri hkam' hk'a' taws' a' mu seunyaen' na', meuh a kopti keutui' hpum' ui' kati ku' Peucawo' tuil' Eun ri a' ta' a' ya e' na' ce. ⁷A meuh kati ku' peue ceu e' kul' leual' ceu na' keutui' hpum' e' a kaw meuh neumneum na'. E' co' ca' ri yeuh mhai' Eun Peucawo' gawm' sum' gawm' seunyi laleung. Hkun' haw' hkam', kopti meuh a ku' keutui' hpum' awn' a na', peue Yu' da na' ce tang' a' mu hk'a' pang ui'. ⁸Peucawo' cang yeuh Eun peue yeum na' ce tang kuh' im' na', a ci' meuh kop keun- haw', pe' vae' kuit a kaw un' cang meuh?

⁹ Saec' ui' ri, ui' ku tawn kuit kaw ri hkat' hkan muis Eun Yesu' peue veng Nasaraet' na' seun' ku' kaw ui' cang yeuh pun na' yeut. ¹⁰ Meuh a ku' tawn yeuh ui' nang veng Yeru' salaem na' yeut. Ui' cu ti' ca ce peue jhawp' rit keuting na', ui' mheut' ri seue' peue Eun Peucawo' na' ce nang htawng'. Yam kaw peue toh ce na', a ku htuk' hpum' ui' yeut. ¹¹ Punta kaw ui' keunhap' nokneh peue aen' ce na', ui' heul' nang sa' la vang hk'o' mun' na' ti duih' hawc' ti duih' heun' pok. Ui' tec' teng ce lah' ku' un' nawpsang ri Peucawo' ri na' Eun. Ui' seungeueng' nyu ce pereng ri nyawk' rot ri hot' ui' ri keunhap' nokneh ce rot nang veng kuing' tawk seubu na'.

¹² A kue' ti pok, ui' pun ti' ca mae' kan' ap ce peue jhawp' rit keuting na', ui' buih lih nang veng Damas' kas' na'. ¹³ Hkun' haw' hkam', yam meuh ka peunnyi keuting yam buih long ye hk'a' heul' na', ui' pun ri nyu ku' ceng' lih neum pang mao' na'. Ku' ceng' awn' a reng hk'ai' ceng' ka seunyi na'. A htawng' rop ui' mae' pu hot' ui' na' ce. ¹⁴ Ye cung' kus pang keute' na' gawm' euc' ri. Ui' pun ri mhawng' seng' leukah' na' lah' a ri ri ui'. A meuh leukah' Arame' †. A lah', 'Saw' lu, Saw' lu, a ci' meuh kop keunhaw' mi vae' keunhap' Ui'? Ham' tap alo Ui' na' ko', nyhap' ka.'

¹⁵ Hawc' ko', ui' mhaing' Eun, 'Cawo', Mi ci' meuh a' nhaw'?'

Cawo' Eun top' a, 'Meuh Ui' Yesu' ku' buih keunhap' mi na' Eun. ¹⁶ Maet' maen' kuh' cawng reu'. Tuil' Ui' mi nyu ri na' meuh a kopti punta kaw Ui' tang' mi meuh mhai' ri mae' kaw mi hkam' sa' hki' ri lawng Ui' ku' pun mi ri nyu hawc' na' mae' lawng ku' kawn' kaw Ui' yeuh mi nawk na'. ¹⁷ Ui' kaw tuil' mi pon nang dak ti' ce peue ceu mi na' mae' peue un' meuh peue ceu Yu' da na' ce. Ui' kaw cus' mi heul' ri ce. ¹⁸ Aen' a meuh punta kaw mi heul' blas' ngai' ce na', hpawt' ce hk'ai' vang duim' lawng na' ce na' tang ing' ri ku' ceng' na', hpawt' ce hk'ai' ti' ca ka Satan na' ce na' tang ing' ri Peucawo' Eun na', punta kaw ce pun hk'a' ploer' map' na', hawc' ko', ce na' pun ri ut' mae' muk ce peue pun ri saic' map' ri seunga' chak' ri kopti yum' ce Ui' na'.

¹⁹ Tang' neum yam awn' na, hkun' haw' hkam' Akli' pa', ui' un' ploer' pleh' ri ri limit lih neum kuing' pang mao' awn' na. ²⁰ Ui' la ri sangsawn' leukah' mun' ren' kawn na' ri peue veng Damas' kas' na' ce. Hawc' ka na', ui' sangsawn' a ri peue veng Yeru' salaem na', ri peue kuing' Yu' da mae' peue un' meuh peue ceu Yu' da na' ce yeut. Kaw ce kah ri taws' hpum' fuin map' ri,

tang hpawt' ri ing' ri Peucawo' Eun mae' yeuh peue nyu taws' ce hpum' ri hawc' na' ri kan' ku' yeuh ce na', ui' sangsawn' ce. ²¹ Kopti meuh a ceu nang aen' ce na', peue Yu' da na' ce mheut' ui' nang nya hk'o' mun' keuting na'. Ce co' ca' ri kaw toh ui'. ²² Daecti kopti Peucawo' teum' kawm Eun ui' rot seunyaen' na', ui' pun ri cawng ri hkam' sa' hki' ri peue aet' peue keuting na' pe' maen'. Ui' hkuin' lah' ku' seubu, ui' lah' yawo pal ku' peue suip leukah' Eun Peucawo' na' mae' ku' Mo' se lah' eun na'. ²³ Ce lah', 'Hkrit †† kaw Eun pun ri tukhka, Eun kaw yeuh peue Yu' da mae' peue un' meuh peue ceu Yu' da na' ce nyu ku' ceng'. Eun meuh peue tang kuh' im' nanggal' ri peue.'

²⁴ Yam Paw' lu lah' eun leukah' na' rot mawn' na', cawo' Fetas' eun klawng ri lah' laws' a, 'Paw' lu, ma' rat mi hawc'. Kopti rin mi cu' yi heun' na', a yeuh mi ma' rat.' ²⁵ Paw' lu eun top' a, 'Cawo' Fetas' munhpung' keuting, hpaw ui' ca' ma' rat. Ku' lah' ui' na' meuh a ku' neumneum, kue' a ri is' tita.

²⁶ Hkun' haw' hkam' Akli' pa' eun yawng lawng aen' na meulamlam ri, ui' cang lah' a ceng' saee'. Yum' neum ui' a, un' kue' a ku' kaw mo' ri ri ngai' eun hkun' haw' hkam' na', kopti ceu nang aen' ce un' meuh a ku' mo' mep ri yeuh. ²⁷ Hkun' haw' hkam' Akli' pa', yum' mi leukah' ce peue suip leukah' Eun Peucawo' na' aw? Yawng ui' yum' mi a yeut.'

²⁸ Hawc' ko', hkun' haw' hkam' Akli' pa' eun lah' a ri Paw' lu eun, 'Hk'a' naee ti yam yawo aen' na, kuit mi ri kaw cang sa' lit pun ui' meuh kon' Hkrit aw?'

²⁹ Paw' lu eun top' a, 'Yam na' a saec' na' ling' un' ling', hk'o' ui' mun' ri Peucawo' Eun. Hpaw a ca' meuh pun mi koe, a ku meuh pun ce peue pun ri mhawng' leukah' lah' ui' seunyaen' na' ce gawm' euc'. Kaw pe' pun ri meuh seun' ui' ri yeut, daecti a hkuin' meuh hkam' mawt ti ri mu' lhec' yeuhki' na'.'

³⁰ Yam awn' na, hkun' haw' hkam' eun yuk ri kuh', cawo' ka veng na' eun, Beunis' ka mae' peue mok' mawn' na' ce ku yuk ri kuh' tiduih'. ³¹ Hawc' puc ce ri heul' hk'ai' vang hk'om na', ce lah' ris a ri puri, 'Peue aen' eun hkuin' yeuh tut kuing' ri yeum na' mae' kuing' ri hk'awng' ri nang htawng' na' saec' ti ceu.'

³² Hkun' haw' hkam' Akli' pa' eun lah' a ri cawo' Fetas' eun, 'Peue aen' eun lawn na' un' hk'o' ri heul' ri hkun' haw' hkam' Kae' sa eun ko', e' na' cang ploer' eun yeut.'

† a' ko' Hebrae'

†† a' ko' Mesi' ya

Paw 'lu pawk eun reu heul ' nang veng Ro 'ma

27 Yam kaw ce cus ' ye pawk reu na ' heul ' nang ku-
ing ' It ' tali ce kuit a deut na ' , ce ku ap Paw 'lu eun
maee ' peue htawng ' seubu na ' ce nang ti ' eun po '
suik ' Muis Yu 'lis ' na ' . Eun ut ' nang tawp muis "Muk
Suik ' Hkun 'haw 'hkam ' Keuting" na ' .² Ye lec reu na '
ing ' neum veng Adrami 'ti 'um ' ku ' kaw buih heul ' ri ta
ka veng ut ' keunam ka ba mha ' seumut ' nang kuing '
Asa ' na ' ce. Hawc ' ko ' , reu na ' a yuk ri heul ' . Peue
Masido 'ni ' ku ' ing ' neum veng Hte ' salo 'ni ' muis Ari-
tahkas ' na ' eun ku ut ' maee ' ye yeut .

³Hawc ' ka na ' ti seunyi, ye tah ' ri nang veng Si 'don
na ' . Kopti Yu 'lis ' tuckyak eun ri Paw 'lu eun na ' , eun tu-
il ' ahkvang Paw 'lu kaw eun heul ' glue ri a ' mawo ri na '
ce. Aen ' a meuh punta kaw ce sok ri tuil ' ku ' Paw 'lu
kaw eun lo ' na ' .⁴ Tang ' neum mawn ' na ' , ye tang yuk
ri heul ' nang mha ' seumut ' na ' bae. Kopti guil ' na '
htuip a reu na ' , ye heul ' hk'a ' un ' guil ' hk'a ' tuh ka
kaw ' kuing ' Sai ' plas ' na ' .⁵ Hawc ' hpa ' ye keunam ka
ba mha ' seumut ' kuing ' Si 'li 'si ' na ' maee ' kuing '
Pamphi 'li ' na ' , ye heul ' keului ' ri nang veng Mi 'ra '
kuing ' Li 'si ' na ' .⁶ Po ' suik ' na ' eun nyu reu ing '
neum veng Alek ' sandrian kaw buih heul ' kuing ' It ' tali
na ' mawn ' . Eun kah ye lec a yeut .⁷ Ye koekoe heul ' he-
un ' seunyi. Ye heul ' rot nang veng Kani 'das ' na ' maee '
tuk maee ' yak ri. Kopti un ' cawp ' a sai ' guil ' na ' , ye
heul ' hk'a ' un ' guil ' hk'a ' col ka kaw ' Kret ' nang veng
Samone na ' .⁸ Ye heul ' maee ' tuk maee ' yak ri hot ' keu-
nam ka ba mha ' seumut ' na ' . Ye rot vang muis Vang
Tah ' Reu Ngam de veng Lasa ' na ' .

⁹Kopti yam na ' euc ' ka heun ' na ' , a ku meuh yam
hk'o ' lhat ' ri pawk reu kopti meuh a hawc ' ka yam eut '
ku ' hk'a na ' . Kop awn ' na, Paw 'lu eun tuil ' sati ce. Eun
lah ' a,¹⁰ "A 'mawo na ' pe, kuit ui ' a, e ' lawn pawk reu
na ' heul ' maet 'maen ' ko ' , reu na ' maee ' hk'eung e '
na ' kaw a pun ri lu nyawk ' . Lheu ' awn ' na ' a 'yu e ' na '
a ku kaw pun ri sum." ¹¹ Daecti po ' suik ' na ' eun un ' leu-
ceng leukah ' eun Paw 'lu na ' , eun leuceng leukah ' ka ca-
wo ' hpawt ' reu na ' maee ' cawo ' reu na ' , lheu '
leukah ' eun Paw 'lu na ' .¹² Kopti Vang Tah ' Reu Ngam
na ' un ' htuk ' a lai ri kaw tah ' reu yam kawt ' na ' . Pun-
ta kaw ye suip hk'a ' ri heul ' na ' , peue heun ' na ' ce kuit
a deut. Ce keutui ' hpum ' kaw ri heul ' rot nang veng
Hpi ' nis ' na ' , ce na ' tah ' ri keului ' reu ri na ' mawn '
yam kawt ' na ' . Veng Hpi ' nis ' na ' a meuh veng vang
tah ' reu ka kaw ' Kret ' na ' . A tang ' nha ' ri na ' ri hon '
hk'a ' tuh hk'a ' col ka hk'a ' lec seunyi na ' gawm ' lal '
plak ' ri.

Guil ' lomleng

¹³Yam guil ' hon ' hk'a ' col na ' jom a ri puing ' huk '
na ' , ce kuit a meuh seun ' ku ' sum ' kah ce meuh na '
hawc ' . Ce ol ' lhawk ' lhec ' vok ' ka reu na ' huk ' . Haw-
c ' ko ' , ce heul ' hot ' keunam ka ba mha ' seumut ' ka
kaw ' Kret ' na ' .¹⁴ Hawc ' ka na ' un ' ling ' , guil ' lom-
leng ku ' lah ' peue meuh guil ' ka hon ' hk'a ' tuh ka
hk'a ' lih seunyi na ' a puing ' reng ri ing ' neum hk'a '
bhen ' keute ' na ' .¹⁵ Kopti guil ' na ' htuipe a reu na ' a
un ' laee pe reng ka guil ' na ' , ye ku ploee ' reu na ' hot '
guil ' na ' heul ' .¹⁶ Yam buih heul ' ye hk'a ' col ka kaw '
aet ' muis Kaoda ' na ' , ye mhe ' ri mawt reu aet ' na '
maee ' tuk maee ' yak ri.¹⁷ Yam hawc ' ce ol ' ri po reu aet '
na ' pang reu keuting na ' , ce suit ' mu ' na ' hk'a ' ruim
keuteul ka reu keuting na ' . Ce mawt lhang ' ka na '
keutawn ' . Kopti lhat ' ce reu na ' cang heul ' hkam ' a
nang kaw ' sai keuting hk'a ' naee mha ' seumut ' ka veng
Sai 'tis ' na ' , ce lhut ' hpen ' keuting na ' lih. Ce tae ' reu
na ' hot ' guil ' na ' heul ' .¹⁸ Guil ' lomleng na ' a htuipe
reu na ' reng nyawk ' . Rot bae ti seunyi na ' , ye tang ' ri
hue ' ri tec hk'eung na ' ce nang mha ' seumut ' na ' .

¹⁹Yam rot a loe ' seunyi na ' , ce ku hue ' ri tec meun
hk'eung ka reu na ' .²⁰ Kopti un ' laee nyu ye ceng ' seunyi
maee ' ceng ' seumeueng ' na ' pun heun ' seunyi, maee '
guil ' lomleng na ' a un ' laee yut ' ri na ' , vang tisut ' ka
na ' ye un ' laee kue ' vang keutui ' hpum ' kaw ri a 'yu
im ' na ' saec ' peunae ' .

²¹Hawc ' un ' laee nyu ce ri som ' ling ' na ' , Paw 'lu eun
kuh ' cawng ri leukah ' nang ngon ' ce na ' , "A 'mawo na '
pe ' , htuk ' pe ' ri leuceng ku ' lah ' ui ' e ' na ' un ' htuk '
ri pucti heul ' hk'ai ' kaw ' Kret ' na ' . Pe ' lawn leuceng a
ko ' , e ' ku na ' un ' hk'eup ' ku ' lulaic aen ' na. ²² Daecti
maet 'maen ' hk'o ' pe ' tang ' hpum ' ri nhim ' nhim ' ,
kopti kaw pe ' un ' yeum saec ' ti peue. Reu na ' yawo kaw
a lu. ²³ Bul peunku ' , in ' hpom Eun Peucawo ' ui ' ku '
yeuh ui ' mhai ' Eun na ' ing ' cawng eun keunam ui '
na ' .²⁴ Eun lah ' , 'Paw 'lu, pawlaee lhat ' . Kaw mi pun ri
cawng ri leukah ' nanggal ' eun hkun 'haw 'hkam ' keut-
ing Kae 'sa na ' . Peucawo ' Eun kaw tuckyak ri mi. Eun kaw
yeuh a 'yu ce peue pawk reu maee ' mi na ' ce pon
gawm 'euc ' .²⁵ Kop awn ' na, hk'o ' pe ' tang ' hpum ' ri
nhim ' nhim ' , kopti yum ' ui ' Peucawo ' Eun. Ku ' lah '
Eun ri ui ' na ' a kaw meuh neum. ²⁶ Saec ' yeuh sa 'n-
haw ' , kaw e ' pun ri hkam ' nang kaw ' na ' ti ri duih ' ."

²⁷Na ' rot sum ' ka kul ' pun ' seunyi na ' , reu ye na ' a
kawn ' ut ' hk'a ' naee mha ' seumut ' Adria na ' . Yam rot a
hk'ao peunnuik ' na ' , peue yeuh kan ' nang reu na ' ce
yawng rot ye de bhen ' keute ' na ' hawc ' .²⁸ Yam keutec

ce ri nawk leuum ' na ' , ce pun ri yawng leuum ' na ' rui ' ka leual ' kul ' tawp ' . Hawc ' ka na ' ti hk'ao, ce tang keutec a bae ti pok. Ce pun ri yawng leuum ' na ' rui ' ka kul ' hpawn ' tawp ' .²⁹ Kopti lhat ' ce reu na ' cang heul ' hkuit ka seumu hk'a ' naee mha ' seumut ' na ' , ce ploeg ' lhawk ' lhec ' vok ' hk'a ' seuta ' ka reu na ' pun ' lhem ' . Hawc ' ko ' , punta kaw a ceng ' vaevae na ' , ce hk'o ' mun ' .³⁰ Peue yeuh kan ' hk'a ' naee reu na ' ce kuit ri kaw hk'uih ri tec reu keuting na ' . Ce guil ri ploeg ' lhawk ' lhec ' vok ' hk'a ' cing ' ka reu na ' . Daecti ce ra ri ploeg ' reu aet ' na ' nang mha ' seumut ' na ' .³¹ Paw ' lu eun lah ' a ri po ' suik ' na ' eun mae ' peue suik ' na ' ce, "Peue aen ' ce lawn un ' ut ' nang reu na ' ko ' , pe ' ku na ' un ' lawtpon yeut." ³² Kop awn ' na, peue suik ' na ' ce bhat ' mu ' mawt ka reu aet ' na ' , ce tae ' a hk'uic ' nang mha ' seumut ' na ' .

³³ Yam kaw a hk'aws ' ceng ' na ' , punta kaw ce hk'asom ' , Paw ' lu eun tuil ' reng ce gawm ' euc ' . Eun lah ' , "Kopti ko ' pe ' ri kuit nyhap ' kuit yak palkoe na ' , pe ' un ' laee hk'asom ' saec ' peunae ' pun kul ' pun ' seunyi hawc ' .³⁴ Maet ' maen ' , punta kaw pe ' a ' yu im ' na ' , hk'o ' pe ' hk'a ' ku ' ti ri ceu reu ' . Hk'a ' naee pe ' a hkuin ' kaw kue ' nang kaw pun ri sum huik ' ri ti nyeng yawo saec ' ti peue." ³⁵ Yam hawc ' eun lah ' ri a na ' , eun ti hkawomun ' na ' eun mun ' keuting ri Peucawo ' Eun nanggal ' ce na ' . Hawc ' ko ' , eun ves ri hk'a a .³⁶ Ce pun hpum ' ri gawm ' euc ' . Ce tang ' ri hk'a ku ' hk'a na ' .³⁷ Peue nang reu awn ' ye gawm ' euc ' , ye kue ' leual ' pak ' a ' reskul ' les peue. ³⁸ Hawc ' hk'a ce ri sak ' na ' , punta reu na ' kaw a seuyung ' na ' , ce ploeg ' gu ' hkawo- cing ' ri na ' nang mha ' seumut ' na ' .

Reu na ' lhu ' ka

³⁹ Yam ceng ' ka na ' , ce un ' pawn bhen ' keute ' awn ' na. Daecti ce pun ri nyu tak sai keunam ka ba mha ' seumut ' na ' . A lawn kaw cang ko ' , ce kuit ri kaw va reu na ' heul ' tah ' ri nang tak sai awn ' na. ⁴⁰ Ce bhat ' ri tec lhawk ' lhec ' vok ' ka reu na ' nang mha ' seumut ' na ' . Hk'a ' naee yam awn ' na, ce ku kah ' mu ' mawt seubal ' hk'a ' seuta ' ka reu na ' . Hawc ' ko ' , ce yuk hpen ' hk'a ' cing ' ka reu na ' huk ' , tuil ' guil ' na ' puing ' reu na ' heul ' ri keunam ka ba mha ' seumut ' na ' .⁴¹ Daecti reu na ' a duih ' buim ' keute ' nang puin ka mha ' seumut ' na ' , a hkam ' . Hk'a ' cing ' ka reu na ' a hkam ' nhen ' cen ' nyawk ' . A un ' laee cang cheun ' ri. Kopti ba mha ' seumut ' na ' dhim ' ka hk'a ' seuta ' ka reu na ' , reu na ' a lhu ' jah meuh glawk ' meuh hklip ' ri.

⁴² Punta peue htawng ' na ' kaw ce un ' cang lue ' hk'uih na ' , peue suik ' na ' ce kuit ri kaw toh ce. ⁴³ Daecti kopti

po ' suik ' keuting na ' sum ' teum ' kawm eun a ' yu eun Paw ' lu na ' , eun un ' kah ce yeuh seun ' ku ' kuit ce na ' . Eun kah ku ' cang lue ' na ' ce na ' yawt ' ri lue ' pucti heul ' keunam ka ba mha ' seumut ' na ' .⁴⁴ Peue seubu na ' ce ngon ' ce kop pen ' na ' , ngon ' ce kop hk'eung ka reu na ' heul ' . Kopti yeuh ce keutit ' na ' , ce sa ' pa sam ' ran heul ' rot keunam ka ba mha ' seumut ' na ' gawm ' euc ' ri.

Nang kaw ' Mawlta '

28 Hawc ' pun ye ri rot keunam ka ba mha ' seumut ' na ' mae ' sa ' pa sam ' ran ri na ' , ye pun ri yawng kaw ' awn ' muis a Mawlta ' .² Peue ut ' hk'a ' naee kaw ' awn ' ce tukyak ri ye nyawk ' . Kopti lhe ' ka a kawt ' , ce puing ' ngawl rap ri ti ye ku peue ri. ³ Paw ' lu eun seut ' ri cem chi ' a ' hk'am ' ti jem. Yam buih seue ' eun a nang ngawl na ' , kopti ngawl na ' kuc ' ka na ' , seueueng ' kue ' pit reng na ' a pucti blaws ri ing ' pawm ti ' eun na ' keutawn ' .⁴ Yam peue ut ' mawn ' na ' nyu ce seueueng ' na ' pawm a ri tuik ' ri ri ti ' eun Paw ' lu na ' , ce lah ' a ri puri, "Hkawn ' meuh eun taeng peue toh peue neum. Kopti eun saec ' pun ri pon neum mha ' seumut ' na ' , cawo ' leupaws seumeu ' na ' eun un ' kah eun a ' yu im ' ."

⁵ Paw ' lu eun raws ' seueueng ' na ' nang ngawl na ' , eun hkuin ' yeuh keunhaw ' .⁶ Ce kuit Paw ' lu eun kaw baet ri bui ' , a ' ko ' eun na ' keulawn ' cing ' kus yeum. Daecti ce saec ' ko ' ri nawk eun hawc ' ti hk'ao, ce nyu un ' yeuh eun keunhaw ' na ' , ce tang plin ' kamkuit ri na ' . Ce lah ' eun meuh peucawo ' .

⁷ Keunam mawn ' na ' , a kue ' bhen ' keute ' ti bhen ' . A meuh bhen ' keute ' eun Publi ' as ' . Eun meuh ro ' ka kaw ' awn ' na. Eun rap ri ti ye meulamlam ri, tuil ' ye hk'asom ' pun loe ' seunyi. ⁸ Kuing ' eun Publi ' as ' na ' eun peuyhat kawt ' . Eun ku sui ' sawt ' cet. Eun klae ' ri kluit ' kloe it ' . Paw ' lu eun heul ' glue ri heun. Hawc ' hk'o ' eun mun ' na ' , eun tang ' ti ' ri hk'a ' pang eun. Eun bai ' eun cuin. ⁹ Yam yeuh a keutit ' na ' , peue peuyhat seubu ut ' nang kaw ' awn ' a na ' ce ku ing ' , ce pun ri cuin. ¹⁰ Ce yumyam ' ti ye seucen. Yam rangraen ye ri pe ' - men kaw pawk reu na ' , ce ku ti ri ing ' tuil ' ku ' lo ' ye na ' ce ri ye.

Rot nang veng Ro ' ma

¹¹ Hawc ' pun a loe ' chi ' na ' , ye pawk reu ku ' ing ' keului ' ri yam kawt ' nang kaw ' awn ' na. Reu awn ' a ing ' neum veng Alek ' sandrian na ' . A kue ' ruprang kon ' seuklap ' meuh peucawo ' muis Kas ' teu ' mae ' Hpaw ' las ' ri cing ' ka reu na ' .¹² Ye tah ' ri keului ' ri

nang veng Sai 'ra 'kus ' na ' loe ' seunyi. ¹³ Neum teh ' na ' , ye heul ' rot nang veng Reyium ' na ' . Hawc ' ka na ' ti seunyi, guil ' hon ' hk'a ' col na ' a puing ' ri huk ' . Bae ti seunyi na ' , ye rot nang veng Poteoli ' . ¹⁴ Ye hk'eup ' nyu ec ' awng ' na ' ce teh ' ngon ' . Ce hk'o ' ye ut ' mae ' ti ti vung. Hawc ' ko ' , ye heul ' nang veng Ro ' ma na ' . ¹⁵ Yam ec ' awng ' ut ' nang veng Ro ' ma na ' pun ce ri mhawng ' ing ' rot ye na ' , ce heul ' rap ri ti ye rot nang keulas muis Ahpias ' na ' , rot ri nang nya it ' chec ' muis Nya Loe ' Lhang ' na ' . Yam Paw ' lu pun eun ri nyu ce na ' , eun mun ' keuting ri Peucawo ' Eun. Eun gawm pun kawl ' reng nang hpum ' ri. ¹⁶ Yam rot ye nang veng Ro ' ma na ' , Paw ' lu eun pun ahkvang ut ' koe meun mae ' peue suik ' ko ' kawn eun ti peue na ' eun.

Paw ' lu sangsawn ' eun leukah ' mun ' nang veng Ro ' ma

¹⁷ Hawc ' pun a loe ' seunyi na ' , Paw ' lu eun klawng ro ' kan ce peue Yu ' da ut ' teh ' na ' ce ing ' hk'om puri. Yam ing ' rot ce euc ' na ' , Paw ' lu eun lah ' a ri ce, "Ec ' awng ' na ' pe ' , ui ' saec ' un ' yeuh ku ' kleuc ' ke-unhaw ' ri peue ceu e ' na ' ce mae ' ritroe ce a ' ta ' a ' ya e ' na ' , daecti peue Yu ' da na ' ce mheut ' ui ' nang veng Yeru ' salaem na ' , ce ap ui ' ri peue Ro ' ma na ' ce. ¹⁸ Yam hawc ' ce hki ' mhaing ' ri ui ' na ' , kopti un ' pun ui ' ri yeuh ku ' kleuc ' kaw kuing ' ri yeum na ' , ce sum ' ploe ' ui ' . ¹⁹ Daecti yam peue Yu ' da na ' ham ' ce a na ' , ui ' pun ri hk'o ' a ' mu ui ' na ' heul ' rot ri hkun ' haw ' hkam ' Kae ' sa eun. Ui ' hkuin ' caee ri sum ' tang ' a ' mu hk'a ' - pang peue ceu ec ' awng ' ri na ' ce. ²⁰ Kopti lawng awn ' na , ui ' klawng ri u pe ' . Kopti meuh a ku ' keutui ' hpum ' ce peue I ' sarela ' na ' , ui ' pun ri hkam ' mawt ti ri mu ' lhec ' na ' ."

²¹ Ce top ' a, "Ye hkuin ' duing pun lai ris lawng mi neum kuing ' Yu ' da na ' . Ec ' awng ' ing ' neum teh ' na ' ce ku un ' duing lah ' ris lawng mi ku ' un ' chak ' na ' saec ' ti peue yeut. ²² Daecti ye ku sum ' mhawng ' kamkuit mi na ' , kopti yawng ye peue ut ' ku duih ' na ' tang ' ce map ' ri muk ritroe aen ' na. "

²³ Ce hpawt ' seunyi kaw ri hk'eup ' Paw ' lu eun na ' . Peue heun ' na ' ce ing ' cu ri vang ut ' eun Paw ' lu na ' . Tang ' neum peunngup rot ri hk'a ' pul na ' , Paw ' lu eun lah ' ce mhawng ' a meulamlam ri mae ' hkam ' sa ' hki ' lawng kuing ' Eun Peucawo ' na ' ri ce. Eun co ' ca ' ri yeuh ce yum ' Yesu ' Eun ri cu eun htawm leukah ' ritroe eun Mo ' se na ' mae ' htawm ce peue suip leukah ' Eun Peucawo ' na ' . ²⁴ Leukah ' lah ' eun na ' ngon ' ce yum ' a, daecti ngon ' ce un ' yum ' a. ²⁵ Hk'a ' naee muk ce na ' , ce un ' maen puri. Ce baet ri pucti heul ' ti peue hawc ' ti peue yam Paw ' lu lah ' eun leukah ' yeuh keutit ' na ' , "Meuh ka neum seun ' ku ' Cit ' seunga ' chak ' na ' cu ka I ' saya ' ku ' meuh peue suip leukah ' Eun Peucawo ' lah ' a ri a ' ta ' a ' ya pe ' na ' ce yeuh keutit ' na ' ,

²⁶ "Heul ' lah ' a ri peue ceu aen ' ce yeuh keutit ' , "Pe ' saec ' na ' pun ri mhawng ' gawm mhawng ' a, daecti pe ' hkuin ' kaw duing ceng ' ri ka.

Pe ' saec ' na ' pun ri nyu gawm nyu a, daecti pe ' hkuin ' kaw duing yawng a."

²⁷ Kopti hpum ' ce peue ceu aen ' cen ' ka. Yhuk ' ce na ' a un ' leuceng. Ngai ' ce na ' a ku yep ri. A lawn un ' yeuh keutit ' ko ' , ce kaw pun ri nyu ri ngai ' ri na ' , mhawng ' ri yhuk ' ri na ' , yawng ri hpum ' ri na ' , hpawt ' ce ri ing ' na ' .

Hawc ' ko ' , Ui ' kaw bai ' ce cuin. †

²⁸ Kop awn ' na, ui ' sum ' kah pe ' yawng hk'a ' htut lawtpon Eun Peucawo ' na ' puin ' a ri heul ' ri peue un ' meuh peue ceu Yu ' da na ' ce hawc ' . Ce ku kaw leuceng a yeut." ²⁹ ††

³⁰ Paw ' lu eun ut ' nang nya hkat ri na ' lal ' neum nuk. Eun rap ri ti peue ing ' ri ti na ' ce gawm ' euc ' . ³¹ Eun hpum ' hat ' han ' sangsawn ' lawng kuing ' Eun Peuca- wo ' na ' mae ' lawng Eun Cawo ' Yesu ' Hkrit na ' . A hkuin ' kue ' nang ham ' eun saec ' ti peue.

† I ' saya ' 6:9, 10 †† Hawc ' Paw ' lu lah ' eun a yeuh keutit ' na ' , peue Yu ' da na ' ce pucti heul ' htu ' htung ' meun puri reng nyawk ' .

Ro'ma

¹ Htawm ti ok' aen' na ko', meuh ui' Paw' lu meuh peue caee Eun Yesu' Hkrit. Peucawo' Eun klawng ui' meuh peue caee Eun Yesu' mae' gvah ri uin' ui' meuh pun leukah' mun' ren' kawn Eun Peucawo' na'.² A meuh leukah' mun' ren' kawn ku' Peucawo' yeuh Eun kati ri tang' neum yamla ka na' ri suip Eun ri cu peue suip leukah' Eun na' ce hk'a' naee htawm Seunga' na'.³ Leukah' mun' ren' kawn aen' a to' ri ri Kon' ai' Eun Peucawo' na' Eun. Hk'a' to' Eun nham' keune na' ko', Eun meuh ceucat eun hkun' haw' hkam' Davit'.⁴ Hk'a' to' Eun Cit' seunga' chak' na' ko', Eun pun ri pao' ri meuh Kon' ai' Eun Peucawo' ri ti' ca na' ri tang kuh' im' Eun hk'ai' vang yeum na'. Eun meuh Yesu' Hkrit Cawo' Peucawo' e'.⁵ Punta kaw e' lah' ris peue un' meuh peue ceu Yu' da na' ce ing' yum' Eun mae' leuceng ri ti Eun na', kopti meuh a Heun ri mae' punta muis Eun na', e' pun ri rap ri ti mun' sin' na' mae' pun ri meuh peue caee Eun Yesu' na'.⁶ Pe' ku pawng' ri mae' muk peue pun ri klawng ri meuh peue Eun Yesu' Hkrit na' ce yeut.

⁷ Ui' tem' ri tuil' htawm ti ok' aen' a ri peue ut' nang veng Ro'ma ku' Peucawo' leumeus' Eun mae' ku' pun ri klawng ri meuh peue Eun na' ce ku peue.

Kah mun' sin' mae' hk'a' kuit nyawk' kuit sam' ran cumyen' lih neum Kuing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

Paw' lu sum' heul' eun nang veng Ro'ma

⁸ Nanggal' ka na', mun' keuting ui' ri Peucawo' ui' Eun ri Yesu' Hkrit Eun pun pe' gawm' euc' kopti hk'a' yum' pe' na' laws' seutuin seutan ka hk'a' pang bhen' keute' na' ku duih' heul' na'.⁹ Peucawo' Cawo' yeuh ui' mhai' Eun sut' hk'a' naee hpum' ri hk'a' naee vang pao' ui' leukah' mun' ren' kawn lawng Eun Kon' ai' Eun na', pen' hkam' Eun sa' hki' ka kuit rot ui' ri pe' laleung¹⁰ hk'a' naee leukah' hk'o' mun' ui' ku pok na'. Hk'o' ui' mun', a lawn cawp' alo Eun Peucawo' ko', kah ui' pun yam kaw ing' ri pe' na'.

¹¹ Punta kaw ui' gvah ri tuil' lapsawng' hk'a' civit na' ri pe' punta kaw yeuh pe' kaw' reng keuting na', ui' sum' ing' hk'eup' nyu pe'.¹² Aen' a meuh punta pe' ri mae' ui' ri kaw e' tuil' kaw' reng puri ri hk'a' yum' e' gawm' hk'a' mawn' hk'a' maen' na'.¹³ Ec' awng' na' pe', punta kaw ui' heul' vuic pli' ku' seumal hk'a' naee pe' seun' heul' vuic ui' hk'a' naee peue ceu seubu na', ui' sum' kah pe' yawng rangraen ui' ri kaw ing' ri pe' heun' pok hawc' (daecti rot maet' maen', a kaw' meung kue' ri ku' ham' tap).

¹⁴ Gawm' peue Helasa' na' ce, a' ko' peue un' meuh peue Helasa' na' ce, mae' gawm' peue kue' cu' yi na' ce, a' ko' peue un' kue' cu' yi na' ce, ui' kue' beus ri ce.¹⁵ Kop awn' na, saec' meuh peue ut' nang veng Ro' ma na' pe', ui' hpum' huk' nyawk' ri kaw ui' pao' leukah' mun' ren' kawn na' ri pe' yeut.

¹⁶ Un' kaic ui' ri leukah' mun' ren' kawn na'. Kopti leukah' mun' ren' kawn na' meuh a ti' ca Eun Peucawo' punta peue yum' na' kaw ce pun hk'a' htut lawtpon na' ku peue ri na'. Peue Yu' da na' pun ce a nanggal', hawc' ka na' peue un' meuh peue ceu Yu' da na' ce ku pun a.¹⁷ Kopti hk'a' naee leukah' mun' ren' kawn na' hk'a' leupaws seumeu' neum Peucawo' Eun na' kaw a pun ri tuh' ri pucti lih. Hk'a' leupaws seumeu' na' ing' a neum hk'a' yum' na' palkoe. Seun' tem' a ri uin' ri hk'a' naee htawm Seunga' na', "Peue leupaws seumeu' na' ce kaw a' yu im' ri hk'a' yum' na'."†

Hk'a' seungeueng' Eun Peucawo' ri peue bhen' keute'

¹⁸ Peucawo' yeuh Eun hk'a' seungeueng' ri na' lih neum kuing' pang mao' na' ri ku' un' leupaws seumeu' mae' ku' rai gawm' euc' ce peue ku' cu' ku' rai ri na' kuipkang' hk'a' neumneum na'.¹⁹ Kopti ku' cang yawng ce lawng Eun Peucawo' na' a pucti lih glih' - gleueng' ri ce, kopti Peucawo' tuh' Eun ce nyu ceu nang aen' ce glih' gleueng' hawc' na'.²⁰ Kopti tang' neum yam bhen' keute' na' pun a ri hpanpleng' ri na', ti' ca cot' cu mae' kue' meuh Eun ku' peue un' cang nyu peue na' e' pun ri nyu a glih' gleueng' ri neum ku' hpanpleng' Eun na' hawc'. Kop awn' na, peue na' peue

† Habaku' 2:4

un' laee kue' ku' kaw htu' hting' lah' ri un' yawng Peucawo' Eun.

²¹ Kopti ce saec' yawng Peucawo' Eun, ce un' tuil' munhpung' kuing' hpaw mae' meuh Eun Peucawo' na'. Ce ku un' mun' keuting ri Heun, lheu' awn' na ce sawm kuit ku' un' kue' mun' un' kue' peuehot' na'. Hpum' nga' suisa ce na' a duim' lawng heul'. ²² Ce saec' lah' ri kue' cu' yi, ce meuh peue nga' suisa. ²³ Ce ti munhpung' Eun Peucawo' Cawo' un' cang lulaic heul' na' leuploh' a ri ruphtu ku' pleng' ri hot' ruprang peue ku' kaw pun ri yeum, ruprang sim', ruprang sat' muilmal sat' leun ri mae' ruprang sat' seubu na'.

²⁴ Kop awn' na, Peucawo' Eun tae' ce yeuh map' hkuit' nawng' tang' hot' hpum' ta' nha' rai ce na', yeuh ku' hk'o' kaic ri tu' ri na' ri puri. ²⁵ Ce ti hk'a' neumneum Eun Peucawo' na', ce leuploh' a ri hk'a' chi' lai na'. Ce faee' yeuh mhai' ka ku' Peucawo' hpanpleng' Eun na' tang' Peucawo' Cawo' hpanpleng' Cawo' htuk' ri suk' seun' cot' cu na' Eun. Amin.

²⁶ Kop awn' na, Peucawo' Eun tae' ce hk'a' naee ta' nha' ku' hk'o' kaic na'. Saec' beun' na' ce yeuh ku' un' htuk' ce ri yeuh na'. Ce meuh beun' taw' beun' it' tiduih'. ²⁷ Saec' meuh me na' ce ku yeuh seun' awn' a yeut. Ce yut' hk'a' sum' it' mae' beun' na', ce sum' it' mae' me. Me taw' me na' ce it' tiduih' yeuh ku' hk'o' kaic na' ri puri. Ce pun hk'a' ciyang na' kuing' hpaw mae' ku' kleuc' yeuh ri na' hawc'.

²⁸ Lheu' awn' na, kopti un' nyu ce ngos ka yawng ce Peucawo' Eun na', Peucawo' Eun tae' ce kue' hpum' rai na', Eun tae' ce yeuh ku' un' kuing' un' hpaw na'. ²⁹ Hk'a' naee ce na' a nuknhen' ri ku' un' leupaws seumeu', ku' rai, law' hpa mae' hpum' hk'aw' jeuk na' ku ceu. Ce nuknhen' ri hk'a' hkoe' mang', hk'a' toh peue, hk'a' kleuc' leumeul, hk'a' cop' long chi' lai mae' hk'a' kuit rai na'. Ce ren' mae' leukah' cok' cec', ³⁰ peusah' nyoe, nyu Peucawo' Eun pereng ri, leukah' hpa' rai, leukah' mhawng' ri hk'o' cuin mae' tang' tu' ri lhung' keuting. Ce kuit ri nawk hk'a' hk'u' kaw ri yeuh ku' rai na'. Ce sawng' un' leuceng makuing' ri. ³¹ Ce meuh peue mhuik' mhuik', un' kue' kati, un' kue' hk'a' leumeus' keus mae' un' cang tukyak. ³² Ce saec' yawng ritroe hk'a' leupaws seumeu' Eun Peucawo' na' lah' ka peue yeuh ceu nang aen' a na' kuing' ce ri kaw yeum na' ko', ce kaw' meung suip ri yeuh ceu nang aen' ce heul' palkoe na' a hkuin' nang hk'o', daecti ce kaw' ren' mae' peue yeuh ceu nang aen' a na' ce yeut.

Hk'a' taws' a' mu leupaws seumeu' Eun Peucawo'

² Kop awn' na, peue taws' a' mu ri peue na' pe', pe' hkuin' kaw kue' ku' htu' hting' kopti pe' lawn taws' a' mu na' yeuh sa' nhaw' ri peue ko', tang taws' pe' a yeuhko' ri ti meun yeut. Kopti pe' saec' na' meuh nang taws' a' mu ko', pe' ku kaw' yeuhko' yeut. ² E' ku tup yawng Peucawo' taws' Eun a' mu na' hot' ku' meuh neumneum na' ri peue yeuh ku' yeuhko' na' ce. ³ Kop awn' na, gup meuh pe' peue yawo pe' taws' a' mu na' ri peue daecti pe' kaw' buih yeuh ri seun' ku' yeuh ce na', pe' hteum' ri kaw pon hk'a' taws' a' mu ciyang Eun Peucawo' na' aw? ⁴ A' ko', kaw' un' nawpsang pe' hk'a' tukyak, hk'a' yeun' hkam mae' hk'a' kuit lang' htonnuk Eun Peucawo' na' aw? Hk'a' tukyak Eun Peucawo' na' va ka pe' kaw tang taws' hpum' fuin map' ri na', un' yawng pe' a aw?

⁵ Daecti kopti hpum' cen' un' taws' hpum' fuin pe' map' ri na', pe' buih ro hk'a' seungeueng' Eun Peucawo' na' ri tu' ri na' meun pun seunyi seungeueng' Eun Peucawo' yam yeuh Eun hk'a' taws' a' mu leupaws seumeu' ri na' pucti lih na'. ⁶ Peucawo' "kaw Eun tuil' a kuing' hpaw hot' mae' ku' sawng' sawng' yeuh peue na'." ⁷ Pun ce peue co' ca' ri yeuh ku' chak', hot' ri sok munhpung' lhung' keuting mae' hot' ri sok a' yu cot' cu na' ce ko', Peucawo' Eun kaw tuil' cit' tip a' yu tip cot' cu na' ri ce. ⁸ Daecti peue sok mun' pun tu' ri meun, peue un' hot' ri yeuh hk'a' neumneum na' mae' peue hot' ri yeuh hk'a' rai na' kaw ce pun ri rap ri ti hk'a' seungeueng' na' mae' hk'a' ciyang Eun Peucawo' na'. ⁹ Hk'a' tukhka na' mae' hk'a' kuit teuk na' kaw a rot ri peue yeuh ku' rai na' ce ku peue. Rot ri peue ceu Yu' da na' ce nanggal', hawc' ko' ri peue un' meuh peue ceu Yu' da na' ce. ¹⁰ Daecti hk'a' munhpung' lhung' keuting na' mae' hk'a' kuit nyawk' kuit sam' ran cumyen' na' kaw a rot ri peue yeuh ku' chak' na' ce ku peue. Rot ri peue ceu Yu' da na' ce nanggal', hawc' ko' ri peue un' meuh peue ceu Yu' da na' ce.

¹¹ Kopti Peucawo' un' keue' Eun ri buh peue.

¹² Peue un' kue' leukah' ritroe ce yeuh map' gawm' euc' ri na' kaw ce pun ri lulaic kopti un' to' ri ri leukah' ritroe na'. Peue ut' hk'a' ruim leukah' ritroe ce yeuh map' gawm' euc' ri na', kaw ce pun ri hkam' hk'a' taws' a' mu na' hot' leukah' ritroe na'. ¹³ Kopti peue leupaws seumeu' nanggal' Eun Peucawo' na' ce hkuin' meuh peue pun ri mhawng' leukah' ritroe na', daecti peue hot' ri yeuh leukah' ritroe na' ce palkoe Peucawo' sawn' Eun ce meuh peue leupaws seumeu'. ¹⁴ Yam

peue un' meuh peue ceu Yu'da ku'un' kue' leukah' ritroe na' yawng ce ri yeuh ku' kue' hk'a' naee leukah' ritroe na', ce saec' na' un' kue' leukah' ritroe, ce meuh leukah' ritroe ri meun. ¹⁵ Kopti ritroe ka leukah' ritroe na' tem' a ri hk'a' naee hpum' ce na', ce yeuh a pucti lih. Saec' meuh hpum' cang yawng ce na' a ku hkam' sa' hki' ka. Ku' cawp' un' cawp' na', kamkuit ce na' lah' meun ka a ri tu' ce na'. ¹⁶ Ceu nang aen' ce kaw a meuh pucti lih hk'a' naee seunyi yam Peucawo' kaw Eun taws' a' mu ri ku' mo' ri hk'a' naee peue na' ri cu Eun Yesu' Hkrit Eun hot' seun' ku' lah' ri hk'a' naee leukah' mun' ren' kaw n' pao' ui' na'.

Peue Yu'da na' ce mae' leukah' ritroe

¹⁷ Lah' meun mi ri meuh peue Yu'da. Mi puing leukah' ritroe na'. Mi mhawng' ri hk'o' cuin lah' ri yawng Peucawo' Eun. ¹⁸ Kopti pun mi ri rin leukah' ritroe na', mi yawng alo Eun na' mae' yawng ku' cawp' na'. ¹⁹ Nhen' nghos' nyawk' mi mae' yum' mi meuh ri nang teuk' va peue ngai' lec' na' ce mae' mi meuh nang til' ku' ceng' na' ri peue ut' hk'a' naee hk'a' duim' lawng na' ce. ²⁰ Kopti kue' mi cu' yi mae' mi yawng hk'a' neumneum gawm' euc' ka hk'a' naee leukah' ritroe na', mi hteum' ri meuh nang sangsawn' peue nga' o' na' ce mae' nang sangsawn' kon' nyom na' ce. ²¹ Kop awn' na, cawo' sangsawn' peue na' mi, un' sangsawn' mi tu' ri na' meun aw? Mi sangsawn' leukah' mun' un' kah peue rabawk', mi kawn' rabawk' aw? ²² Cawo' lah' pawlaee len' cu na' mi, kawn' len' cu mi aw? Peue jeuk ruphtu na' mi, con' mi nya hk'o' mun' keuting na' aw? ²³ Peue puing leukah' ritroe na' mi hpum' keuting mae' ka na' mi, kawn' yeuh mi munhpung' Eun Peucawo' na' lu ri kleuc' mi leukah' ritroe na' aw? ²⁴ Seun' tem' a ri hk'a' naee htawm Seunga' na', "Muis Eun Peucawo' na' pun a ri hkam' hk'a' un' nawpsang na' hk'a' naee muk ce peue un' meuh peue ceu Yu'da na' meuh a kopti pe' ri." †

²⁵ Mi lawn rok' sa' leukah' ritroe na' ko', hk'a' ton' duing' hak' na' kue' a ngos yeut. Daecti mi lawn kleuc' leukah' ritroe na' ko', seun' mi nang un' nang pun ri lec' hk'a' naee vang ton' duing' hak' na' ko'. ²⁶ Peue un' pun ri ton' duing' hak' ri na' ce lawn hot' ri yeuh ku' lah' ka leukah' ritroe na' ko', Peucawo' sawn' Eun ce seun' pun ce ri ton' duing' hak' ri na' ko', un' meuh ka aw? ²⁷ Peue ce saec' na' un' pun ri ton' duing' hak' hk'a' nham' keune ri na' daecti ce leuceng ri ti leukah' ritroe na' ko', kawn' kaw ce tang' map' ri peue kue' leukah' ritroe tem' ri uin' ri, pun ri ton' du-

ing' hak' ri na' daecti yeuh kleuc' ri leukah' ritroe na' pe'.

²⁸ Taengtaeng peue Yu'da na' hpaw ce ca' meuh peue Yu'da hk'a' nok ri koe. Saec' meuh ton' duing' hak' na', a ku hkuin' meuh ton' duing' hak' hk'a' nok ri mae' hk'a' nham' keune ri na' koe. ²⁹ Daecti taengtaeng peue Yu'da na', ce kaw kah ri meuh peue Yu'da hk'a' naee ri. Taengtaeng ton' duing' hak' na' a meuh ton' duing' hak' hk'a' naee hpum' ri ri cit' seunga' na', a hkuin' meuh ton' duing' hak' ri ritroe tem' ri meuh tu' htawm na'. Peue yeuh keutit' na' pun ce hk'a' suk' seun' na' a hkuin' ing' neum peue, daecti a ing' neum Peucawo' Eun.

Hk'a' kati keutawn' Eun Peucawo'

3 Kop awn' na, meuh peue ceu Yu'da na' a ci' kue' mun' lheu' peue un' meuh peue ceu Yu'da na' yeuh sa' nhaw'? A' ko', ton' duing' hak' na' a ci' kue' mun' yeuh sa' nhaw'? ² Ku hk'a' ku ceu na' kue' a mun' heun' yeut. Mun' nanggal' keuhti na' a meuh pun ce ri rok' sa' leukah' Eun Peucawo' na'.

³ Peue ngon' ce lawn un' kati keutawn' ko', ce ci' na' yeuh sa' nhaw'? Kopti un' kati keutawn' ce na', a yeuh kati Eun Peucawo' na' lu aw? ⁴ A hkuin' meuh, peue saec' meuh nang chi' lai ku peue ri, daecti Peucawo' kati keutawn' Eun neumneum. Seun' tem' a ri uin' ri nang htawm Seunga' na',

"Leukah' Mi na' cawp' ka na' puc a ri lih hk'a' naee vang leukah' Mi na',

leukah' taws' a' mu Mi na' pe ka." ††

⁵ Daecti hk'a' un' leupaws seumeu' e' na' a lawn yeuh hk'a' leupaws seumeu' Eun Peucawo' na' gawm pucti lih ko', a ci' kaw lah' ri yeuh sa' nhaw'? Peucawo' yeuh Eun hk'a' seungeueng' ri na' lih rot hk'a' pang e' na', kaw e' lah' Eun meuh mae' hk'a' mawn' hk'a' maen' aw? (Aen' a, lah' ui' a hot' seun' hk'a' peue na' htu' hting' ce puri na' ko'.) ⁶ A hkuin' yeuh keutit'. Kopti a lawn yeuh keutit' ko', Peucawo' Eun ci' kaw cang taws' a' mu ri bhen' keute' na' yeuh sa' nhaw'? ⁷ Peue ngon' na' peue cang htu' hting' lah', "Hk'a' kati un' keutawn' ui' na' a lawn yeuh hk'a' kati keutawn' Eun Peucawo' na' gawm pucti lih ko', kopti yeuh a munhpung' Eun na' huk' hawn' na', a ci' meuh kop keunhaw' ui' vae' kawn' pun ri hkam' hk'a' taws' a' mu lah' ui' meuh peue map' na'? ⁸ A ci' meuh kop keunhaw' ce vae' un' lah', 'Punta ku' chak' na' kaw a keut' kue' na', pawh e' yeuh ku' rai na' pawh.' Ngon' peue saesawm' lah' ui' lah' a yeuh keutit'."

† I' saya' 52:5; Yesahkela' 36:22

†† Suk' seun' 51:4

Peue lah' a yeuh keutit' na' kuing' ce ri pun hk'a' ciyang na'.

Un' kue' a peue leupaws seumeu' saec' ti peue

⁹ Kop awn' na, e' ci' kaw lah' a yeuh sa' nhaw'? Peue Yu' da na' e', chak' e' hk'ai' peue seubu na' ce aw? Un' meuh. Tawn seuji e' pe' nyu a hawc', gawm' peue Yu' da mae' peue un' meuh peue ceu Yu' da na' ut' peue hk'a' ruim ti' ca ka map' na' seun' puri gawm' euc' yeut.¹⁰ Seun' tem' a ri uin' ri nang htawm Seunga' na',

"A hkuin' kue' peue leupaws seumeu' saec' ti peue, un' kue' a saec' ti peue.

¹¹ A hkuin' kue' peue leuceng pun saec' ti peue.

A hkuin' kue' peue hot' ri sok Peucawo' Eun saec' ti peue.

¹² Peue eung' kui' ri ri Peucawo' Eun gawm' euc'.

Ce keut' ri meuh peue un' kue' ngos.

A hkuin' kue' nang yeuh ku' chak' saec' ti peue, ti peue yawo a hkuin' kue'."†

¹³ "Hk'ung' ce na' a meuh keutui' leumuic tuh' ri na'.

Dak' ce na' a cang chi' lai."‡

"Pit ka seueung' sa' hao' na' a pom ri ri hoeng' ce na'."‡

¹⁴ "Moeng ce na' a nuknhen' ri leukah' jha' na' mae' leukah' seueum' seue' na'."‡

¹⁵ "Cung ce na' a hpai' vae' ri yeuh peue yeum.

¹⁶ Ce yeuh hk'a' lulaic na' mae' hk'a' kuit nyhap' kuit yak na' hot' hk'a' heul' ri na' ce.

¹⁷ Hk'a' ka hk'a' kuit nyawk' kuit sam' ran cumyen' na' ce hkuin' yawng a."‡

¹⁸ "Ce hkuin' kue' hk'a' lhat' til ri Peucawo' Eun na' hk'a' nae' kamkuit ri."‡‡

¹⁹ Yawng e' ritroe lah' ri hk'a' nae' leukah' ritroe na' lah' a ri ri peue ut' hk'a' ruim leukah' ritroe na' ce. Aen' a meuh punta kaw a dop moeng ce peue gawm' euc' na' yeuh ce un' lae' kue' ku' kaw htu' ht- ing' na' mae' punta kaw a yeuh peue bhen' keute' gawm' euc' na' peue pun ri ut' hk'a' ruim ka hk'a' taws' a' mu Eun Peucawo' na'.²⁰ Kopti meuh a hot' ri yeuh leukah' ritroe na', a' nhaw' hkuin' pun ri meuh peue leupaws seumeu' nanggal' Eun Peucawo' saec' ti peue. Kopti leukah' ritroe na' gup meuh a ku' tuh' e' yawng kue' e' map' na' yeuhko'.

Leupaws seumeu' ri hk'a' yum'

²¹ Daecti maet' maen', pun e' ri nyu a hawc' hk'a' leu- paws seumeu' lih neum Peucawo' Eun na' ut' a hk'a' - pang ka leukah' ritroe na'. A meuh hk'a' leupaws se- umeu' ku' htawm leukah' ritroe na' mae' htawm ce peue suip leukah' Eun Peucawo' na' hkam' a sa' hki' ka na'.²² Hk'a' leupaws seumeu' lih neum Peucawo' Eun aen' cu a hk'a' yum' hk'a' nae' Yesu' Hkrit Eun na' a lih rot ri peue yum' na' ce gawm' euc'. Peue gawm' euc' na' peue hkuin' chat puri,²³ kopti yeuh peue map' na' ku peue, peue hk'uic' hk'ai' munhpung' Eun Peucawo' na'.²⁴ Kopti meuh a mun' Eun Peucawo' na', Eun sawn' e' meuh peue leupaws seumeu' ri hk'a' htut lawtpon lih neum Yesu' Hkrit Eun na' hk'a' nae' vang un' ti Eun ngos ka.²⁵ Peucawo' yeuh Eun Yesu' Eun meuh ku' tan saic' ri tec map' ri peue kue' hk'a' yum' hk'a' nae' nham' Eun Yesu' na' ce. Peucawo' yeuh Eun ku' yeuhki' na' meuh a punta kaw Eun yeuh hk'a' leu- paws seumeu' ri na' pucti lih. Kopti meuh a hk'a' hpum' yeun' hkam Eun na', Eun hkuin' ciyang map' yeuh peue nanggal' na'.²⁶ Yeuh Eun ku' yeuhki' na' meuh a punta kaw Eun yeuh hk'a' leupaws seumeu' cu maet' maen' Eun na' pucti lih na'. Aen' a meuh tuh' Eun meuh ri Cawo' leupaws seumeu' na' mae' Eun ku kah peue kue' hk'a' yum' hk'a' nae' Yesu' Eun na' ce meuh peue leupaws seumeu' yeut na'.

²⁷ Kop awn' na, e' ci' kue' keunhaw' e' mhawng' ri hk'o' cuin mae' ka? A hkuin' kue'. E' mhawng' ri hk'o' cuin mae' keunhaw'? Mhawng' e' ri hk'o' cuin mae' roksa' e' leukah' ritroe na' aw? A hkuin' meuh, daecti mhawng' e' ri hk'o' cuin mae' hk'a' yum' na'.

²⁸ Kopti pun e' ri nyu peue na' leupaws seumeu' peue kopti meuh a hk'a' yum' na', a hkuin' meuh kopti hot' ri yeuh leukah' ritroe na'.²⁹ Peucawo' meuh Eun Peuca- wo' ce peue Yu' da na' palkoe aw? Eun ku meuh Peuca- wo' ce peue un' meuh peue ceu Yu' da na' yeut, un' meuh ka aw? Meuh ka yeut, Eun ku meuh Peucawo' ce peue un' meuh peue ceu Yu' da na' yeut.³⁰ Kopti kue' a Peucawo' ti peue koe yawo na', Eun sawn' peue pun ri ton' duing' hak' ri na' ce meuh peue leupaws seumeu' ri hk'a' yum' na'. Eun ku sawn' peue un' pun ri ton' duing' hak' ri na' ce meuh peue leupaws seumeu' ri hk'a' yum' ti ceu awn' a yeut.³¹ A lawn yeuh keutit' ko', yeuh e' leukah' ritroe na' hk'o' hk'awng' ri hk'a' yum' aen' a aw? A hkuin' meuh, daecti gawm yuk e' leukah' ritroe na'.

† Suk'seun' 14:1-3; 53:1-3; Tuil' cu' yi 7:20 †† Suk'seun' 5:9 ‡ Suk'se- un' 140:3 ‡† Suk'seun' 10:7 ‡‡ I' saya' 59:7, 8 ‡‡† Suk'seun' 36:1

Abraham leupaws seumeu' eun ri hk'a' yum' na'

4 Yeuh keutit' ko', e' ci' kaw lah' lawng eun Abraham a'ta' keuting e' na' yeuh sa' nhaw'?² Neumneum ka na ko', Abraham eun lawn na' leupaws seumeu' ri ku' yeuh eun na' ko', eun kaw lheu' ri ku' mhawng' ri hk'o' cuin. Daecti nanggal' Eun Peucawo' na' a hkuin' yeuh keutit'.³ Nang htawm Seunga' na' a ci' lah' a yeuh sa' nhaw'? A lah', "Abraham yum' eun Peucawo' Eun. Kopti meuh a hk'a' yum' eun na', Peucawo' Eun sawn' eun meuh peue leupaws seumeu' na'."†

⁴ Ngos reng pun eun peue yeuh kan' na' a hkuin' sawn' ri meuh lapsawng', daecti meuh a ngos reng yeuh eun kan' na'.⁵ Daecti peue ti ri peue eun yum' Peucawo' Cawo' yeuh peue rai na' ce keut' ri meuh peue leupaws seumeu' na' Eun. Peue awn' eun saec' na' un' yeuh keunhaw' daecti kopti meuh a hk'a' yum' eun na', Peucawo' Eun sawn' eun meuh peue leupaws seumeu'.⁶ Davit' eun ku lah' a seun' awn' a yam lah' eun lawng hk'a' hpum' sam' ran ce peue ku' Peucawo' sawn' Eun ce meuh peue leupaws seumeu' ri hk'a' naee vang un' yeuh ce keunhaw' na'. Eun lah',

7 "Peue pun hk'a' ploer' map' ri ku' kleuc' yeuh ce na' mae' peue pun hk'a' ti ri tec map' ri na', kaw ce pun mun'.

⁸ Peue ku' Peucawo' un' laee sawn' Eun map' ce na', kaw ce pun mun'."††

⁹ Peue pun ri ton' duing' hak' ri na' ce palkoe pun ce mun' aen' a aw? A' ko', saec' meuh peue un' pun ri ton' duing' hak' ri na', kaw ce pun mun' aen' a yeut aw? Lah' ui' a heul' hawc', Peucawo' sawn' Eun hk'a' yum' eun Abraham na' meuh hk'a' leupaws seumeu' eun na'.¹⁰ Aen' a ci' meuh yamnhaw'? Meuh a nanggal' ka yam un' nang pun eun ri ton' duing' hak' ri na' aw, a' ko' meuh a hawc' ka yam pun eun ri ton' duing' hak' ri na' aw? A hkuin' meuh hawc' ka yam pun eun ri ton' duing' hak' ri na', daecti meuh a nanggal' ka yam un' nang pun eun ri ton' duing' hak' ri na' hawc'.

¹¹ Ton' eun duing' hak' ri na' meuh a het' ka ta' ra' ka hk'a' leupaws seumeu' pun eun ing' kopti kue' eun hk'a' yum' yam un' nang pun eun ri ton' duing' hak' ri na'. Kop awn' na, eun meuh a' kuiing' ce peue yum' hawc' daecti ce un' nang ton' duing' hak' ri na' ce punta Peucawo' Eun ku kaw sawn' ce meuh peue leupaws seumeu' na' yeut.¹² Eun ku meuh kuiing' ce peue ton' duing' hak' ri na' ce yeut. Peue aen' ce hkuin' ton' duing' hak' ri palkoe, daecti ce a' yu im' hot' hk'a' yum' ku' Abraham kue' eun tang' neum nang-

gal' ka yam un' nang lec eun hk'a' naee hk'a' ton' duing' hak' na'.

¹³ Peucawo' yeuh Eun kati ri kaw tuil' bhen' keute' na' meuh sin' ri Abraham eun mae' ceucat eun na' ce a hkuin' meuh kopti leuceng eun ri ti leukah' ritroe na', daecti a meuh kopti Peucawo' sawn' Eun eun meuh peue leupaws seumeu' ri hk'a' yum' na'.¹⁴ Kopti peue leuceng ri ti leukah' ritroe na' ce lawn kaw meuh peue pun sin' na' ko', hk'a' yum' na' a hkuin' kaw kue' ngos keunhaw', kati sat' ca' Eun Peucawo' na' a ku na' meuh ku' hk'o' hk'awng'.¹⁵ Kopti leukah' ritroe na' ti a hk'a' seungeueng' Eun Peucawo' na' lih rot. Tawngnhaw' na' a lawn un' kue' leukah' ritroe ko', mawn' na' a ku hkuin' kue' yeuh ku' kleuc' ri ritroe na' yeut.

¹⁶ Kop awn' na, punta kati sat' ca' Eun Peucawo' na' kaw a meuh hot' mun' na' heul' mae' punta ceucat eun Abraham na' ce ku peue kaw ce pun ri rap ri ti kati sat' ca' Eun Peucawo' na' neumneum na', kati sat' ca' Eun Peucawo' na' a ing' neum hk'a' yum' na'. A hkuin' meuh peue leuceng ri ti leukah' ritroe na' ce palkoe, daecti a ku meuh peue kue' hk'a' yum' seun' Abraham eun na' ce yeut. Abraham eun meuh kuiing' e' gawm' euc'.¹⁷ Hot' seun' ku' tem' a ri nang htawm Seunga' na', "Kah Ui' mi meuh kuiing' ce peue ceu gawm' euc' na'."‡ Abraham eun meuh kuiing' e' nanggal' to' nha' Eun Peucawo' Cawo' Abraham yum' eun Eun na'. Eun meuh Peucawo' Cawo' tuil' civit im' ri peue yeum na' ce mae' Cawo' cang yeuh ku' un' kue' a kue' na' Eun.

¹⁸ A saec' un' laee kue' vang keutui' hpum' saec' yawo peunae', Abraham eun ku kaw n' meung yum' ri kopti kue' eun vang keutui' hpum' na'. Eun pun ri meuh kuiing' ce peue ceu heun' ceu na' seun' Peucawo' lah' Eun a ri heun hawc' na', "Ceucat mi na' kaw ce heun' nyawk'."‡†† Yam pun eun ri hk'eup' lawng ku' meuh neumneum ka lawng ka tu' eun na' seun' a pun a ri yeum hawc' ko' kopti a' yu eun na' rot a hk'ao ri tipak' neum na', mae' yam pun eun ri hk'eup' lawng ku' meuh neumneum Sara' ka meuh peue tan' ka un' cang kue' kon' na', hk'a' yum' eun na' a hkuin' yawm' lih.²⁰ Eun hkuin' keuyuih' fuii' fai' kangkae ri kati Eun Peucawo' na', daecti eun gawm kaw' reng keuting hk'a' naee hk'a' yum' na'. Eun tuil' munhpung' ri Peucawo' Eun.²¹ Eun yum' nyawk' Peucawo' kue' Eun ti' ca kaw cang yeuh kati yeuh ri na' htonnuk na'.²² A meuh kopti awn' a hawc', "Peucawo' Eun sawn' eun meuh peue leupaws seumeu'."‡²³ Leukah' lah', "Peucawo' Eun sawn' eun meuh peue leupaws seumeu' " aen' a ko', a hkuin'

† Yamla 15:6, 22†† Suk' seun' 32:1, 2

‡ Yamla 17:5‡† Yamla 15:5

tem' ri uin' ri meuh pun heun palkoe,²⁴ daecti a ku meuh pun ku' Peucawo' sawn' Eun meuh peue leupaws seumeu' ku' yum' Cawo' yeuh Peucawo' Yesu' e' na' Eun tang kuh' im' hk'ai' vang yeum ri na' e'.²⁵ Yesu' pun Eun ri ap ri yeum kopti meuh a map' e' na'. Hawc' ko', Eun tang kuh' im' punta kaw e' meuh peue leupaws seumeu' na'.

Hk'a' kuit nyawk' kuit sam' ran cumyen' mae' hk'a' ren' kawn suk' seun'

5 Kopti pun e' ri sawn' ri meuh peue leupaws seumeu' ri hk'a' yum' na' hawc' na', e' kue' hk'a' kuit nyawk' kuit sam' ran cumyen' na' mae' Peucawo' Eun ri Yesu' Hkrit Eun.² Eun va e' ing' cawng hk'a' ruim rum ka mun' aen' a ri hk'a' yum' na'. E' kue' hk'a' ren' kawn suk' seun' na' hk'a' naee hk'a' keutui' hpum' kaw pun ri pawng' ri mae' munhpung' Eun Peucawo' na'.³ Lheu' awn' na, e' ku ren' kawn suk' seun' hk'a' naee hk'a' tukhka ri na' yeut, kopti yawng e' hk'a' tukhka na' yeuh a hk'a' yeun' hkam na' keut' kue'.⁴ Hk'a' yeun' hkam na' a yeuh meuh e' peue Peucawo' cang lo' Eun e' na' pucti lih. Aen' a yeuh e' kue' hk'a' keutui' hpum'.⁵ Hk'a' keutui' hpum' na' a yeuh hpum' e' na' un' cang lu, kopti Peucawo' buit Eun hk'a' leumeus' keus ri na' ri e' ri Cit' seunga' chak' ku' Peucawo' tuil' Eun a ri e' hawc' na'.

⁶ Yam kaw' reng kloe e' na', Hkrit Eun hkam' ri yeum pun peue map' hk'a' naee yam ka na' cawp' ka na'.⁷ Peue hkam' ri yeum pun peue leupaws seumeu' na' un' chae' kue' ka, a tup na' chak' cang kue' nang kaw hkam' ri yeum pun peue chak' nyawk' na'.⁸ Daecti Peucawo' tuh' Eun e' nyu hk'a' leumeus' keus meun ri na' ri cus' Eun Hkrit Eun lih yeum pun e' yam kawn' buih meuh e' peue map' na'.

⁹ E' pun ri meuh peue leupaws seumeu' ri nham' Eun Hkrit na' hawc', lheu' awn' na, e' kaw pun ri lawtpon hk'a' seungeueng' Eun Peucawo' na' ri Hkrit Eun neumneum.¹⁰ Kopti yam buih meuh e' ransu Eun Peucawo' na', e' lawn tang htuk' lung Eun ri hk'a' yeum Eun Kon' ai' Eun na' ko', lheu' awn' na kopti htuk' lung e' Peucawo' Eun hawc' na', e' kaw pun hk'a' htut lawtpon na' ri hk'a' tang kuh' im' Eun na' neumneum.¹¹ A hkuin' kaw nang yeuh keutit' koe, daecti e' ku ren' kawn suk' seun' hk'a' naee Peucawo' Eun kopti Cawo' e' Yesu' Hkrit yeuh Eun e' htuk' lung Peucawo' Eun hawc' na'.

Hk'a' yeum na' ing' a neum Adam eun, hk'a' civit na' a ing' neum Hkrit Eun

¹² Kop awn' na, seun' meuh a kopti Adam eun ti peue na' map' na' a ing' lec pang bhen' keute' na', map' na' a ti hk'a' yeum na' ing'. Kopti peue na' yeuh peue map' na' ku peue ri, hk'a' yeum na' a ing' rot ri peue gawm' euc'.¹³ Neumneum ka na' ko', tang' neum yam leukah' ritroe na' un' nang kue' ka na', map' na' kue' a pang bhen' keute' na' hawc'. Daecti yam leukah' ritroe na' un' nang kue' ka na', map' na' a hkuin' nang sawn' ri meuh map'.¹⁴ A saec' yeuh sa' n-haw', tang' neum cu eun Adam na' rot ti cu eun Mo' se na', hk'a' yeum na' a u' peung hk'a' pang peue gawm' euc' na' peue, peue saec' na' un' yeuh ku' kleuc' ri leukah' tuil' Eun Peucawo' na' seun' ku' Adam yeuh eun na'. Adam meuh eun het' Eun Yesu' Hkrit Cawo' ku' kaw ing' hot' na' Eun.

¹⁵ Daecti lapsawng' chak' Peucawo' tuil' Eun na' chat nyawk' a map' eun Adam na'. Kopti peue heun' na' ce lawn pun ri yeum kopti ku' kleuc' yeuh eun Adam ti peue yawo na', lheu' awn' na, mun' mae' lapsawng' Eun Peucawo' ri mun' Eun Yesu' Hkrit ti peue yawo na', a ci' na' pe lhae' heul' ri peue heun' na' peue a' neng.¹⁶ Lapsawng' Eun Peucawo' na' chat nyawk' a hk'ai' pli' ka map' eun Adam ti peue na'. Hk'a' taws' a' mu na' keut' kue' a hawc' ka yam Adam yeuh eun map' ti pok yawo na'. A yeuh hk'a' ciyang na' ing' rot. Daecti lapsawng' tuil' Eun Peucawo' na' keut' kue' a hawc' ka yam peue na' yeuh peue ku' kleuc' heun' pok na'. A yeuh peue na' peue meuh peue leupaws seumeu'.¹⁷ Kopti, kop meuh a ku' kleuc' yeuh eun Adam ti peue yawo na' peue pun ri yeum ku peue ri seun' Adam eun, lheu' awn' na, peue pun ri rap ri ti mun' na' mae' lapsawng' ka hk'a' leupaws seumeu' Eun Peucawo' ku' mhe' Eun ri uin' a htonnuk veh na', kaw ce pun ri a' yu im' mae' Peucawo' Eun kop meuh a peue ti peue yawo na' Eun, peue aen' a meuh Yesu' Hkrit Eun.

¹⁸ Kop awn' na, ku' kleuc' yeuh eun Adam ti pok yawo na' seun' yeuh a peue gawm' euc' na' peue pun ri hkam' hk'a' ciyang na' ko', hk'a' leupaws seumeu' yeuh Eun Yesu' Hkrit ti pok yawo na' a ku yeuh peue gawm' euc' na' peue pun ri sawn' ri meuh peue leupaws seumeu' na' yeut. Hk'a' sawn' peue meuh peue leupaws seumeu' aen' a ko', a ti ri ing' tuil' civit ri peue gawm' euc' aen' ce.¹⁹ Seun' kopti meuh a peue ti peue yawo na' un' leuceng eun ri ti na' a yeuh peue heun' na' peue meuh peue map' na', seun' awn' na, kopti meuh a peue ti peue yawo na' leuceng Eun ri ti na'

a ku yeuh peue heun ' na ' peue meuh peue leupaws seumeu ' yeut.

²⁰ Punta ku ' kleuc ' na ' kaw a gawm kue ' heun ' na ' , leukah ' ritroe na ' a bae a. Daecti tawngnhaw ' na ' a lawn gawm kue ' map ' na ' heun ' ko ' , mun ' na ' a ku kaw jaen gawm kue ' lheu ' awn ' na. ²¹ Seun ' map ' na ' yeuh a peue yeum na ' , mun ' na ' a ku yeuh peue meuh peue leupaws seumeu ' mae ' a ' yu im ' cot ' cu ri Cawo ' e ' Yesu ' Hkrit Eun.

Yeum hk'a ' naee map ' na ' daecti civit im ' hk'a ' naee Hkrit Eun

6 Yeuh keutit ' ko ' , e ' ci ' kaw lah ' a yeuh sa ' nhaw ' ? Punta mun ' na ' kaw a gawm kue ' heun ' na ' , kaw e ' htuk ' ri suip ri yeuh map ' na ' bae aw? ² Pawlae kah a yeuh keutit ' . Yeum e ' nang map ' na ' hawc ' . E ' ci ' kaw tang suip ri a ' yu im ' hk'a ' naee map ' na ' yeuh sa ' nhaw ' ? ³ Peue rap ri ti hk'a ' cum ' ing ' lec hk'a ' naee Yesu ' Hkrit Eun na ' e ' gawm ' euc ' , e ' ku rap ri ti hk'a ' cum ' ing ' lec hk'a ' naee hk'a ' yeum Eun na ' hawc ' , un ' yawng pe ' a aw? ⁴ Kop awn ' na, punta saec ' tu ' e ' na ' kaw a pun a ' yu hk'u ' seun ' Peucawo ' kah Eun Hkrit Eun tang kuh ' im ' hk'ai ' vang yeum ri munh-pung ' Eun A ' kuiing ' na ' , e ' pun ri puing ' ri mae ' Heun hawc ' ri rap e ' ri ti hk'a ' cum ' ing ' lec hk'a ' naee hk'a ' yeum Eun na ' .

⁵ Kopti e ' lawn pun ri yeum mae ' Heun ko ' , e ' ku kaw pun ri tang kuh ' im ' mae ' Heun neumneum. ⁶ Kopti yawng e ' punta tu ' ka map ' e ' na ' kaw a pun ri lulaic heul ' na ' , mae ' punta kaw e ' un ' laee suip ri meuh mhai ' ka map ' na ' , jawngkui ' tu ' hk'im ' e ' na ' a pun ri tawk ' ri mae ' Heun hawc ' . ⁷ Kopti a ' nhaw ' lawn yeum heul ' ko ' , un ' laee cang yeuh eun map ' na ' .

⁸ E ' lawn yeum mae ' Hkrit Eun hawc ' ko ' , e ' yum ' kaw ri a ' yu im ' mae ' Heun. ⁹ Kopti yawng e ' Hkrit pun Eun ri kuh ' im ' hk'ai ' vang yeum ri na ' , Eun hkuin ' kaw laee yeum bae. Hk'a ' yeum na ' a hkuin ' kaw laee suip ri kue ' ti ' ca hk'a ' pang Heun. ¹⁰ Pun Eun ri yeum na ' , yeum Eun pun peue map ' na ' peue ti pok yawo a hk'o ' , daecti pun Eun ri a ' yu im ' na ' , a ' yu im ' Eun ri Peucawo ' Eun.

¹¹ Seun ' awn ' na, sawn ' meun pe ' yeum ri map ' na ' mae ' sawn ' meun pe ' a ' yu im ' pun Peucawo ' Eun hk'a ' naee Yesu ' Hkrit Eun reu ' . ¹² Kop awn ' na, pawlae tuil ' map ' na ' u ' peung tu ' cang yeum pe ' ku ' kaw cu ' pe ' yawm ' ri hot ' ri yeuh hk'a ' ta ' nha ' rai ka jawngkui ' tu ' pe ' na ' . ¹³ Pawlae ap hk'eung ka tu ' pe ' na ' ri map ' na ' . Map ' na ' kaw a yeuh a meuh hk'eung ka ku ' rai na ' . Daecti tan jawngkui ' tu ' pe ' na ' ri Peu-

cawo ' Cawo ' yeuh pe ' tang kuh ' im ' hk'ai ' vang yeum na ' Eun reu ' . Tan hk'eung ka tu ' pe ' na ' ri Heun, kah a meuh hk'eung ka hk'a ' leupaws seumeu ' na ' reu ' .

¹⁴ Map ' na ' kaw a un ' laee suip ri meuh cawo ' pe ' heul ' bae, kopti hpaw pe ' ca ' laee ut ' hk'a ' ruim ka leukah ' ritroe na ' , daecti ut ' pe ' hk'a ' ruim ka mun ' na ' .

Mhai ' ka hk'a ' leupaws seumeu '

¹⁵ Yeuh keutit ' ko ' , a ci ' kaw tang yeuh sa ' nhaw ' ? Kopti un ' laee ut ' e ' hk'a ' ruim ka leukah ' ritroe na ' , daecti e ' ut ' hk'a ' ruim ka mun ' na ' , e ' kaw yeuh map ' na ' aw? Pawlae kah a yeuh keutit ' . ¹⁶ Un ' yawng pe ' a aw, pe ' lawn yawm ' ri leuceng leukah ' a ' nhaw ' ko ' , meuh pe ' mhai ' eun hkawn ' a? Meuh pe ' mhai ' ka map ' ku ' va pe ' heul ' ri hk'a ' yeum na ' aw, a ' ko ' meuh pe ' mhai ' ka hk'a ' leuceng ri ti ku ' va pe ' heul ' ri hk'a ' leupaws seumeu ' na ' aw? ¹⁷ Daecti mun ' keuting ri Peucawo ' Eun. Pe ' saec ' na ' tawn meuh mhai ' ka map ' na ' , pe ' ku yum ' leukah ' sangsawn ' tuil ' ri ri pe ' na ' sut ' hpum ' ri. ¹⁸ Pun pe ' ri rap ri ti hk'a ' lawtpon hk'ai ' map ' na ' , pe ' keut ' ri meuh mhai ' ka hk'a ' leupaws seumeu ' na ' hawc ' .

¹⁹ Lah ' ui ' a ri pe ' yeuh keutit ' na ' meuh a kopti meuh pe ' peue kaw ' reng kloe na ' . Nanggal ' aen ' na, seun ' tawn tuil ' pe ' hk'eung ka tu ' ri na ' meuh mhai ' ka ku ' hk'aw ' jeuk na ' mae ' ku ' rai ku ' gawm baet ri heun ' un ' cang sut ' un ' cang euc ' na ' ko ' , maet ' maen ' , kah hk'eung awn ' a meuh mhai ' ka hk'a ' leupaws seumeu ' na ' reu ' punta kaw pe ' keut ' ri seunga ' chak ' na ' .

²⁰ Yam meuh pe ' mhai ' ka map ' na ' , un ' pun pe ' ri ut ' hk'a ' ruim ka hk'a ' leupaws seumeu ' na ' . ²¹ Yam awn ' na, pe ' ci ' pun mun ' keunhaw ' ri ceu nang awn ' na. Maet ' maen ' , meuh a ku ' hk'o ' kaic pun pe ' . Vang tisut ' ka ceu nang aen ' a meuh a hk'a ' yeum na ' . ²² Daecti maet ' maen ' , pun pe ' ri lawtpon hk'ai ' map ' na ' , pe ' pun ri meuh mhai ' Eun Peucawo ' hawc ' . Pe ' pun ri saic ' ri seunga ' chak ' . Vang tisut ' ka na ' , pe ' kaw pun cit ' tip a ' yu tip cot ' cu na ' . ²³ Kopti ngos reng ka map ' na ' meuh a hk'a ' yeum na ' . Daecti lapsawng ' lih neum Peucawo ' Eun na ' a meuh cit ' tip a ' yu tip cot ' cu hk'a ' naee Yesu ' Hkrit Cawo ' meuh Peucawo ' e ' na ' Eun.

Leukah ' leupong ' lawng hpo ' me

7 Ec ' awng ' na ' pe ' , un ' yawng pe ' a aw, leukah ' ritroe na ' kue ' a ti ' ca hk'a ' pang peue cu yam kaw ' na ' a ' yu im ' peue na ' palkoe? Mhaing ' ui ' a yeuhki ' na ' kopti buih leukah ' ui ' mae ' peue yawng leukah ' ritroe na ' pe ' . ² U ' hpama ri, hot ' seun ' leukah ' ritroe

na' ko', beun' ti ri is' me na' cu yam me eun na' kawn' a' yu im' eun na', beun' awn' eun to' ri ri me ri na' eun. Daecti me eun na' eun lawn yeum heul' ko', beun' na' eun un' lae ut' hk'a' ruim ka ritroe meuh hpo' me na'.³ Kop awn' na, yam me eun na' un' nang yeum eun na' eun lawn ti ri is' me seubu ko', eun kaw pun ri meuh peue len' cu. Daecti me eun na' eun lawn yeum heul' hawc' ko', beun' na' eun pon ritroe awn' na. Eun saec' na' ti ri is' me seubu ko', eun un' lae meuh nang len' cu.

⁴Kop awn' na ec' awng' ui' na' pe', saec' pe' ri yeum pe' hk'ai' leukah' ritroe na' kopti Hkrit yeum Eun pun pe' na'. Aen' a meuh punta kaw pe' un' lae pun ri meuh is' ka leukah' ritroe na' daecti meuh pe' is' Eun Hkrit Cawo' tang kuh' im' hk'ai' vang yeum ri na' Eun. Aen' a meuh punta kaw e' tan pli' ri na' ri Peucawo' Eun na'.⁵ Kopti nanggal' aen' a na', a' yu im' e' hot' hk'a' nham' keune na'. Leukah' ritroe na' a kah' e' yeuh ku' rai na'. Pli' ka ku' rai na' a yeuh e' yeum.⁶ Daecti maet' maen' kopti yeum e' ri hk'ah' ku' tawn mawt ka e' nanggal' hawc' na', e' pun ri pon hk'ai' leukah' ritroe na' hawc'. Aen' meuh a punta kaw e' yeuh mhai' ka hot' hk'a' hk'u' hot' Cit' seunga' na'. A hkuin' lae meuh hot' hk'a' hk'im' hot' leukah' ritroe tem' ri na'.

Ham' tap map'

⁷Yeuh keutit' ko', e' ci' kaw htuk' ri lah' a yeuh sa' nhaw'? Leukah' ritroe na' meuh a map' aw? Un' meuh. Neumneum ka na' ko', a lawn un' kue' leukah' ritroe na' ko', map' na' a meuh keunhaw' na' ui' hkuin' kaw yawng a. Kopti leukah' ritroe na' a lawn un' lah', "Pawlae ta' nha' law' hpa", †ko', ui' hkuin' kaw yawng ta' nha' law' hpa na' meuh a keunhaw'.⁸ Daecti map' na' a cu leukah' ritroe na' a yeuh ta' nha' law' hpa ku ceu na' keut' kue' hk'a' naee ui' na'. Kopti a lawn un' kue' leukah' ritroe na' ko', map' na' yeum ka.⁹ Nanggal' aen' na, ui' hkuin' nang yawng leukah' ritroe na'. Ui' hteum' hpum' ri na' chak'. Daecti yam yawng ui' leukah' ritroe na', ui' yawng meuh ri peue map', ui' kaw pun ri yeum.¹⁰ Hteum' ui' leukah' ritroe na' ti hk'a' a' yu im' na' lih, daecti neumneum ka na' ko', a vae' ti hk'a' yeum na' lih ri ui'.¹¹ Kopti map' na' cu a leukah' ritroe na' a ing' cop' ui' yeuh ku' kleuc' na'. Map' na' a yeuh ui' yeum ri leukah' ritroe awn' na.¹² Kop awn' na, leukah' ritroe na' a seunga' chak'. Saec' meuh ritroe na' a ku seunga' chak', leu-paws seumeu', a chak'.

† Pucti heul' 20:17; Saw'n' leukah' mun' 5:21

¹³Yeuh keutit' ko', ku' chak' na' yeuh ka ui' yeum aw? Un' meuh. Daecti map' na' a cu ku' chak' na' a yeuh ui' yeum. Aen' meuh a punta leukah' ritroe na' kaw a tuil' ui' nyu map' na' rai nyawk' ka na'.

¹⁴Yawng e' leukah' ritroe na' lih a neum Cit' seunga' na'. Daecti ui' gup meuh yawo peue. Ui' pun ri paing' ri meuh mhai' ka map' na'.¹⁵ Ui' hkuin' yawng ku' yeuh meun ri na', kopti un' yeuh ui' ku' sum' yeuh ri na'. Daecti ui' hpawt' ri yeuh ku' pereng ri na'.¹⁶ Ui' lawn yeuh ku' un' sum' yeuh ri na' ko', ui' ku sahpaw' leukah' ritroe na' chak'.¹⁷ Kop awn' na ui' hkuin' meuh nang yeuh meun a, daecti map' ut' hk'a' naee ui' na' meuh a nang yeuh a.¹⁸ Yawng ui' hk'a' naee tu' ui' na' un' kue' a ku' chak' na' saec' ti ceu, awn' a meuh hk'a' nham' keune ui' na'. Kopti ui' saec' sum' yeuh ku' chak' na', ui' hkuin' yeuh a.¹⁹ Kopti un' yeuh ui' ku' chak' sum' yeuh ui' na', daecti ku' rai ku' un' sum' yeuh ui' na' ui' hpawt' ri yeuh a laleung.²⁰ Ui' lawn yeuh ku' un' sum' yeuh ui' na' ko', a hkuin' meuh ku' tu' ui' na' yeuh meun ka. Daecti map' ut' hk'a' naee tu' ui' na' a meuh nang yeuh a.

²¹Kop awn' na pun ui' ri nyu ritroe ti ceu, yam sum' yeuh ui' ku' chak' na', ku' rai na' a ku' ut' mae' ui' mawn' hawc'.²² Kopti vang rui' ka hpum' ui' na', ren' ui' mae' leukah' ritroe Eun Peucawo' na'.²³ Daecti ui' pun ri nyu ritroe seubu ut' a hk'a' naee ui' na' bae' keuhti, ritroe awn' a ham' tap ritroe ut' hk'a' naee hpum' ui' na'. A yeuh ui' meuh peue htawng' ka ritroe ka map' ku' ut' hk'a' naee tu' ui' na'.²⁴ A ci' yeuh keunhaw' ui' vae' meuh peue hk'o' sum' tukyak yeuhki'. A' nhaw' ci' kaw cang teum' kawm ui' pon hk'ai' tu' ka hk'a' yeum aen' a pun?²⁵ Mun' keuting ri Peucawo' Eun. Pun ui' ri pon ri Yesu' Hkrit Peucawo' e' na' Eun.

Kop awn' na hk'a' civit na' ko', ui' meuh mhai' ka ritroe Eun Peucawo' na'. Daecti hk'a' nham' keune na' ko', ui' meuh mhai' ka ritroe ka map' na'.

A' yu hk'a' Cit' seunga'

8 Kop awn' na, maet' maen' a hkuin' kue' hk'a' ciyang ri peue ut' hk'a' naee Yesu' Hkrit Eun na' ce.
²Kopti meuh a Yesu' Hkrit Eun na', ritroe ka Cit' seunga' ka a' yu na' a plo' pe' hk'ai' ritroe ka map' na' mae' ritroe ka hk'a' yeum na'.³ Kopti hk'a' nham' keune na' yeuh a leukah' ritroe na' kaw' reng kloe na' ku' leukah' ritroe na' yeuh un' pun ka na' Peucawo' Eun yeuh a hawc' ri cus' Eun Kon' ai' ri na' Eun lih seun' peue map' na' punta kaw Eun meuh ku' tan htut map' na'. Kopti yeuh a ki' na', Eun pun ri taws' a' mu

ciyang map' ce peue map' na'.⁴ Yeuh Eun keutit' na' meuh a punta ritroe leupaws seumeu' ka leukah' ritroe na' kaw a htonnuk hk'a' naee peue un' a'yu im' hot' hk'a' nham' keune daecti a'yu im' hot' hk'a' Cit' seunga' na' e'.

⁵Peue a'yu im' hot' hk'a' nham' keune na' tang' ce hpum' ri na' ri ku' sum' is' ce hk'a' nham' keune na'. Daecti peue a'yu im' hot' hk'a' Cit' seunga' na' ce tang' hpum' ri na' ri ku' sum' is' ka Cit' seunga' na'.⁶Hpum' ce peue map' na' va ka ce heul' lec hk'a' yeum na'. Daecti hpum' Cit' seunga' u' peung ka na' va ka ce heul' lec hk'a' a'yu na' mae' hk'a' kuit nyawk' kuit sam' ran cumyen' na'.⁷Hpum' nuknhen' ri map' na' meuh a ransu Eun Peucawo'. A un' yawm' ri ut' hk'a' ruim ka leukah' ritroe Eun Peucawo' na', a ku un' cang ut' ri ka yeut.⁸Peue hk'a' nham' keune na' u' peung ka na' ce hkuin' cang meuh peue htuk' hpum' Eun Peucawo'.

⁹Daecti Cit' seunga' Eun Peucawo' na' a lawn ut' hk'a' naee pe' ko', pe' hkuin' pun hk'a' u' peung ka hk'a' nham' keune na', daecti pe' pun hk'a' u' peung ka hk'a' Cit' seunga' na'. A'nhaw' lawn un' kue' Cit' seunga' Eun Hkrit na' ko', hkawn' un' meuh eun is' Eun Hkrit.¹⁰Daecti Hkrit Eun lawn ut' hk'a' naee pe' ko', tu' pe' na' a saec' na' yeum kopti meuh a map' na' ko', daecti civit pe' na' a kaw pun ri a'yu im' kopti meuh a hk'a' leupaws seumeu' na'.¹¹Cit' seunga' Eun Cawo' Cawo' yeuh Yesu' Eun tang kuh' im' na' a lawn ut' hk'a' naee pe' ko', Cawo' Cawo' yeuh Hkrit Eun tang kuh' im' na' Eun kaw tuil' civit na' ri tu' kaw kah ri yeum pe' na'. Eun tuil' civit awn' a ri hk'a' naee cu Eun Cit' seunga' ut' hk'a' naee pe' na'.

¹²Kop awn' na ec' awng' na' pe', kue' e' ku' ma. Daecti a hkuin' meuh ku' ma kaw pun ri a'yu im' hot' hk'a' nham' keune na'.¹³Kopti pe' lawn a'yu im' hot' hk'a' nham' keune na' ko', pe' kaw pun ri yeum. Daecti pe' lawn cu Cit' seunga' na' toh kan' rai yeuh pe' ri tu' ri na' ko', pe' kaw pun ri a'yu im'.

¹⁴Kopti Cit' seunga' Eun Peucawo' na' a lawn teuk' va a'nhaw' ko', hkawn' meuh eun kon' Eun Peucawo'.¹⁵Pe' hkuin' pun cit' ku' kah pe' meuh mhai' ka hk'a' lhat' ruing na' bae, daecti pun pe' Cit' seunga' ku' yeuh pe' meuh kon' Eun Peucawo' na'. E' klawng Eun, "Aba', A'kuiing'." ¹⁶Cit' seunga' na' mae' civit e' na' a htawhkam lah' meuh e' kon' Eun Peucawo' na'.¹⁷Maet' maen' e' lawn meuh kon' Eun hawc' ko', e' ku meuh nang hk'a' sin'. Meuh nang hk'a' sin' Eun Peucawo' na' mae' meuh nang hk'a' sin' tiduih' mae' Hkrit Eun yeut. E' lawn pun ri hkam' hk'a' tukhka na' mae'

Hkrit Eun tiduih' ko', e' ku kaw pun ri pawng' ri mae' munhpung' Eun na' mae' Heun.

Munhpung' kaw ing' hk'a' nanggal'

¹⁸Nyu ui' hk'a' tukhka e' yam maet' maen' na' a hkuin' kaw nang keuteul munhpung' kaw tuil' e' nyu a na'.¹⁹Ku' Peucawo' hpanpleng' Eun gawm' euc' na' punta Peucawo' kaw Eun tuh' a nyu a'nhaw' ci' meuh kon' Eun Peucawo' na', a buih ko' ri nawk a.²⁰Kopti ku' Peucawo' hpanpleng' Eun na' pun a ri hkam' ri yeuh hk'a' keutui' hpum' ri na' kleuc'. A hkuin' meuh hot' alo ka meun, daecti a meuh hot' alo Eun Cawo' u' peung pleng' a meuh yeuhko' na' Eun. Hk'a' naee vang keutui' hpum' ²¹ku' hpanpleng' aen' kaw a pun ri pon hk'ai' hk'a' lulaic ku' mawt a ri na' mae' kaw a pun ri ti ri ing' hk'a' naee hk'a' lawtpon ce kon' Eun Peucawo' na'.

²²Yawng e' ku' Peucawo' hpanpleng' Eun na' buih nyel ka seun' keuteul sui' kaw keut' kon' na' rot yam maet' maen' na'.²³A hkuin' meuh awn' a palkoe, saec' e' ri ku' meuh peue pun pli' nanggal' ka Cit' seunga' na' e' ku nyel hk'a' naee hpum' ri yam buih ko' e' kaw ri meuh kon' Eun na'. Aen' a meuh tu' e' na' pun a hk'a' htut lawtpon na'.²⁴Kopti hk'a' naee hk'a' keutui' hpum' aen' na, e' pun hk'a' htut lawtpon na' hawc'. Hk'a' keutui' hpum' cang nyu e' na' a hkuin' meuh hk'a' keutui' hpum'. A ci' kue' a'nhaw' ku' pun eun ri nyu hawc' na', eun tang keutui' hpum' a? ²⁵Daecti e' lawn keutui' hpum' ku' un' nang nyu ri na' ko', e' kaw ko' ceu nang awn' a hk'a' naee hk'a' yeun' hkam ri na'.

²⁶Seun' awn' na, Cit' seunga' na' a teum' kawm e' yam kaw' reng kloe e' na'. E' kaw htuk' ri hk'o' mun' hk'o' keunhaw' na', hpaw e' ca' yawng a, daecti Cit' seunga' na' a hk'o' meun a tang' e'. A nyel hk'o' mae' leukah' un' cang lah' vangdoh' ri na'.²⁷Peuca-wo' Cawo' caet ri nawk hpum' e' na' yawng Eun vang keutui' hpum' ka Cit' seunga' na', kopti Cit' seunga' na' hk'o' a mun' tang' peue Eun Peucawo' na' ce hot' seun' alo Eun Peucawo' na'.

Jaen meuh cawo' pe

²⁸Yawng e' Peucawo' yeuh Eun ku' chak' na' hk'a' naee ku ceu pun peue ku' hk'o' ce leumeus' Eun na' ce. Peue aen' ce meuh peue ku' Peucawo' klawng Eun ri ti hot' seun' alo Eun na'.²⁹Kopti punta Kon' ai' Eun na' kaw Eun meuh kon' nanggal' hk'a' naee ec' awng' heun' peue na' ce, peue leuk Eun ri uin' tang' neum nang-

gal' na' Eun tang' ri uin' ce meuh seun' Kon' ai' ri ko'.³⁰ Peue tang' Eun ri uin' tang' neum nanggal' na', Eun ku klawng ce yeut. Peue Peucawo' klawng Eun na', Eun ku sawn' ce meuh peue leupaws seumeu'. Peue pun ri sawn' ri meuh peue leupaws seumeu' na' Eun ku kaw tuil' ce is' munhpung' na' yeut.

³¹Yeuh keutit' ko', e' ci' kaw lah' a yeuh sa' nhaw'? Peucawo' Eun lawn ut' hk'a' e' ko', a' nhaw' ci' kaw cang ham' tap e' pun? ³²Cawo' ku' un' lae mang' Kon' ai' ri ti peue na', daecti Eun tuil' Kon' ai' ri na' Eun ri e' na', Eun kawn' kaw un' cang tuil' ku ceu na' mae' Kon' ai' na' Eun tiduih' ri e' aw? ³³A' nhaw' ci' kaw cang tang' a' mu ri peue Peucawo' leuk Eun ri ti na' ce? Saec' tu' Eun Peucawo' na', sawn' Eun e' meuh peue leupaws seumeu', ³⁴a' nhaw' ci' kaw cang tang' a' mu ri e' bae? Yesu' Hkrit Cawo' pun ri yeum na', mae' lheu' awn' na' Peucawo' Eun yeuh Eun tang kuh' im' hawc' na', maet' maen' Eun mok' hk'a' ti' a' tawm' Eun Peucawo'. Eun ku buih hk'o' mun' tang' e'. ³⁵A' nhaw' ci' kaw cang ti e' gah' hk'ai' hk'a' leumeus' keus Eun Hkrit na' pun, hk'a' tukhka, hk'a' nyhap', hk'a' keunhap' nokneh, hk'a' ngeup' ri, un' kue' hk'ohk'eung, hk'a' hk'o' lhat' mae' moeng leungawng aen' ce aw? ³⁶Seun' tem' a ri hk'a' nae' htawm Seunga' na',

“Kopti meuh a Mi ri, e' pun ri hkam' hk'a' yeum na' gawm' seunyi.

E' pun ri sawn' ri meuh kon' yung' kaw ti ri heul' toh ri na'.”[†]

³⁷A hkuin' yeuh keutit', daecti hk'a' nae' ceu nang aen' ce, jaen meuh e' nang pe a ri ri Cawo' leumeus' e' na' Eun. ³⁸Kopti yum' ui' a neumneum, hk'a' yeum a' ko' hk'a' a' yu im', in' hpom a' ko' seuca' rai, maet' maen', a' ko' hk'a' nanggal', saec' meuh ti' ca keunhaw' na', ³⁹vang lhung', a' ko' vang rui', saec' meuh ku' Peucawo' hpanpleng' Eun ku ceu na' ce kaw un' cang ti e' gah' pun hk'ai' hk'a' leumeus' keus Eun Peucawo' ku' kue' hk'a' nae' Yesu' Hkrit Cawo' Peucawo' e' na' Eun na'.

Peucawo' leuk Eun ri ti peue I' sarela'

9 Lah' ui' leukah' neumneum na' hk'a' nae' Hkrit Eun, ui' hkuin' chi' lai. Hpum' cang yawng ui' na' meuh a sa' hki' ui' hk'a' nae' Cit' seunga' chak' na'.² Kuit nyhap' nyawk' ui'. Hk'a' nae' hpum' ui' na' a' kuc' ha' ron laleung.³ Kopti sum' kah ui' a' lawn kaw cang ko', kah tu' ui' na' hkam' hk'a' jha' na' meun mae' hkam' hk'a' peut' deut hk'ai' Hkrit Eun na' pun

ec' awng' ku' meuh peue ceu ui' na' ce.⁴ A meuh peue I' sarela' na' ce. Ce pun ri meuh kon' Eun Peucawo', pun ri rap ri ti munhpung', kati sat' ca', leukah' ritroe, ritroe hk'o' mun' hk'a' nae' nya hk'o' mun' keuting na' mae' kati sat' ca' Eun na' gawm' euc'.⁵ A' ta' keuting ce na' meuh ce peue keuting. Saec' meuh yam Hkrit meuh Eun peue na', Eun ku suip' ceucat ce na' ing'. Hkrit Cawo' meuh Peucawo' hk'a' pang ku ceu gawm' euc' na' pun Eun hk'a' suk' seun' na' cot' cu ri. Amin.

⁶Daecti a hkuin' to' ri meuh leukah' Eun Peucawo' na' lu ka. Kopti a hkuin' to' ri meuh peue suip' ceucat peue I' sarela' ku peue na' meuh ce peue Eun Peucawo' gawm' euc'.⁷ A hkuin' to' ri meuh peue suip' ceucat Eun Abraham ku peue na' meuh ce kon' hk'i Eun Abraham gawm' euc'. Kopti nang htawm Seunga' na' lah', “Ceucat mi na' sawn' a ri neum ceucat eun I' cak' na' ce palkoe.”^{††} Ku' sum' lah' ka na', kon' Eun Peucawo' na' hpaw ce ca' ing' neum hk'a' nham' keune na', daecti meuh kon' hot' leukah' kati sat' ca' Eun Peucawo' na' sawn' ce ri meuh ceucat eun Abraham.⁹ Kopti leukah' kati sat' ca' na' a lah', “Yam hpawt' ri na' a' lawn rot ko', Ui' kaw tang ing'. Sara' eun kaw keut' kon' me ti peue.”[‡]

¹⁰A hkuin' nang meuh awn' a palkoe. Daecti Rebae' ka mae' I' cak' ku' meuh a' ta' keuting e' na' ka kue' kon' seuklap'.¹¹ Daecti nanggal' ka yam kon' seuklap' na' un' nang keut' ka na', a' ko' nanggal' ka yam un' nang yeuh ka ku' chak' na', a' ko' ku' un' chak' na', punta alo Eun Peucawo' leuk Eun ri ti peue na' kaw a' suip' ri ut' na',¹² a hkuin' meuh kopti yeuh a ri daecti a meuh kopti Cawo' leuk ri ti na' Eun, Eun lah' a ri Rebae' ka ka, “Nang ec' na' kaw eun yeuh mhai' eun nang awng' na'.”^{†††} Hot' seun' ku' tem' ri uin' ri nang htawm Seunga' na', “Leumeus' Ui' Yakop' eun, daecti Ui' ces ri E' saw' eun.”^{‡‡}

¹⁴Yeuh keutit' ko', e' ci' kaw lah' a yeuh sa' nhaw'? Peucawo' un' leupaws seumeu' Eun aw? Un' meuh.

¹⁵Kopti lah' Eun a ri Mo' se eun,

“Ui' sum' yeuh mun' ri a' nhaw' ko', yeuh Ui' a ri hkawn' eun.

Ui' sum' tuckyak ri a' nhaw' ko', Ui' tuckyak ri hkawn' eun.”^{‡‡‡}

¹⁶Kop awn' na, ceu nang aen' ce a hkuin' meuh kopti hk'a' sum' pun mae' hk'a' co' ca' ri yeuh peue na'. Daecti meuh a kopti hk'a' tuckyak Eun Peucawo' na'.

¹⁷Kopti hk'a' nae' htawm Seunga' na' Peucawo' lah'

[†] Suk' seun' 44:22

^{††} Yamla 21:12 [‡] Yamla 18:10, 14 ^{†††} Yamla 25:23 ^{‡‡} Malahki' 1:2, 3 ^{‡‡‡} Pucti heul' 33:19

Eun a ri hkun 'haw 'hkam 'Hparaw 'eun, "Yuk Ui ' mi yeuh mi keuting na ' meuh a punta kaw Ui ' yeuh ti 'ca ri na ' pucti lih neum mi ri mae ' meuh a punta muis Ui ' na ' kaw a laws ' heul ' pang bhen ' keute ' na ' hk'awp ' na '." ¹⁸ Kop awn ' na, Peucawo ' Eun sum ' tukyak ri a ' n-haw ' ko ', Eun tukyak ri heun. Eun sum ' yeuh a 'nhaw ' hpum ' cen ' ko ', Eun ku yeuh hpum ' eun hkawn ' a cen '.

Hpum ' seungeueng ' mae ' hpum ' tukyak Eun Peuca-wo '

¹⁹ Pe ' ri ngon ' ti ri peue na ' pe ' cang mhaing ' ui ', "Yeuh keutit ' ko ', a ci ' yeuh keunhaw ' Peucawo ' Eun vae ' kaw n ' tang ' map ' ri e ' ? A 'nhaw ' ci ' kaw cang ham ' tap alo Eun na ' pun?" ²⁰ Daecti peue na ' pe ' , pe ' ci ' meuh a 'nhaw ' pe ' vae ' htu 'hting ' top ' leukah ' Eun Peucawo ' na ' pun? Ku ' pun ri pleng ' ri na ' kaw a lah ' a ri cawo ' pleng ' ri na ' Eun, "A ci ' yeuh keunhaw ' mi vae ' pleng ' ui ' yeuhki ' " [†], meuh a ku ' htuk ' ri lah ' aw? ²¹ Cawo ' pleng ' keutong ' keute ' na ' eun, tuic ' ti deng ' na ' un ' kue ' eun ahkvang kaw pleng ' a meuh hk'eung chak ' ngam kue ' munhpung ' na ' mae ' hk'eung lo ' caee un ' kue ' munhpung ' na ' aw?

²² Seun ' awn ' na, Peucawo ' Eun lawn sum ' yeuh hk'a ' seungeueng ' ri na ' mae ' sum ' kah ti 'ca ri na ' pucti lih glih 'gleueng ' ko ', daecti Eun lawn yeun 'hkam a pun peue ku ' rangraen Eun ri uin ' ri kaw yeuh ce lulaic na ' ce ko ', e ' ci ' kaw lah ' a yeuh sa 'nhaw ' ? ²³ Punta kaw Eun yeuh munhpung ' htonnuk ri na ' pucti lih ri peue pun ri rap ri ti hk'a ' tukyak Eun ri peue rangraen Eun ri uin ' ce pun munhpung ' ri tang ' neum nanggal ' na ' Eun lawn yeuh keutit ' ko ', e ' ci ' kaw lah ' a yeuh sa 'nhaw ' ?

²⁴ Saec ' meuh e ' ri, e ' ku meuh peue klawng Eun ri ti yeut. A hkuin ' meuh pal peue ceu Yu ' da na ' ce koe, daecti a ku meuh peue un ' meuh peue ceu Yu ' da na ' ce yeut.

²⁵ Seun ' lah ' Eun a hk'a ' naee htawm Ho ' se na ' ,

"Kaw Ui ' klawng peue un ' meuh peue ceu Ui ' na ' ce meuh 'peue ceu ri'.

Klawng peue un ' leumeus ' Ui ' na ' ce meuh 'peue leumeus ' ri'." [‡]

²⁶ mae ' ,

"Ceun aen ' ce a kaw keut ' meuh teh ' vang lah ' Ui ' a ri ce,

'Hpaw pe ' ca ' meuh peue ceu Ui ' ' na ' .

Ce kaw pun muis meuh ri, 'kon ' Eun Peucawo ' Cawo ' a 'yu im ' na ' Eun.' " ^{††}

²⁷ I ' saya ' eun klawng ri lah ' lawng ce peue ceu I ' sare-la ' na '

yeuh keutit ' , "Peue ceu I ' sarela ' na ' ce saec ' heun ' seun ' sai keunam ka mha ' seumut ' na ' ko ' , daecti ce vang yawo nang kaw pun ri rap hk'a ' htut lawtpon na ' peunaeng ' .

²⁸ Kopti Peucawo ' kaw Eun ti leukah ' lah ' ri na ' hawc ' ri bhen ' keute ' na ' vaevae.' " ^{‡‡}

²⁹ A seun ' ku ' I ' saya ' lah ' eun tang ' neum nanggal ' na ' ko ' . Eun lah ' ,

"Peucawo ' Cawo ' ti 'ca keuting na '

Eun lawn un ' uin ' un ' vang ceucat pun e ' ko ' , e ' kaw pun ri lulaic heul ' seun ' veng So ' dom na ' mae '

seun ' veng Gomorah na ' ko ' ." ^{‡‡‡}

Peue I ' sarela ' na ' un ' yum ' ce

³⁰ Yeuh keutit ' ko ' , e ' ci ' kaw lah ' a yeuh sa 'nhaw ' ? Saec ' meuh peue un ' meuh peue ceu Yu ' da ku ' un ' hot ' ri sok hk'a ' leupaws seumeu ' na ' , pun ce hk'a ' leupaws seumeu ' na ' hawc ' . Aen ' a meuh hk'a ' leupaws seumeu ' ri hk'a ' yum ' na ' . ³¹ Daecti saec ' meuh peue I ' sarela ' ku ' hot ' ri sok leukah ' ritroe ka hk'a ' leupaws seumeu ' na ' ce hkuin ' pun. ³² A ci ' meuh kop keunhaw ' , ce vae ' un ' pun a? Meuh a kopti un ' hot ' ce ri sok a ri hk'a ' yum ' na ' . Daecti ce yeuh a seun ' kaw ri pun a ri ku ' yeuh ri na ' . Ce seuduih ri "seumu seuduih" na ' ³³ hot ' seun ' ku ' tem ' a ri hk'a ' naee htawm Seun-ga ' na ' ,

"Keue ' reu ' , uin ' Ui ' seumu pang gong Yi ' on na ' ti meul ' . A kaw yeuh peue seuduih ri ri ti.

A kaw yeuh ce htang ' meul gawm ' euc ' .

Peue yum ' Peucawo ' Eun na ' ce hkuin ' kaw pun ri ka-ic." ^{‡‡‡}

10 Ec ' awng ' na ' pe ' , ku ' sum ' is ' ui ' nang hpum ' ri na ' mae ' leukah ' hk'o ' ui ' mun ' ri Peucawo ' Eun pun peue I ' sarela ' na ' ce na ' meuh a kah ce pun hk'a ' htut lawtpon na ' gawm ' euc ' ri na ' . ² Kopti hpum ' huk ' ce pun Peucawo ' Eun na ' , ui ' kaw cang meuh sa ' hki ' ka pun. Daecti hpum ' huk ' ce aen ' ce hkuin ' yeuh a mae ' yawng ri a. ³ Kopti un ' yawng ce hk'a ' leupaws seumeu ' lih neum Peucawo ' Eun na ' . Ce sawng ' yeuh hk'a ' leupaws seumeu ' ri na ' meun. Kop awn ' na, ce un ' rap ri ti hk'a ' leupaws seumeu ' Eun Peucawo ' na ' . ⁴ Punta peue yum ' na ' kaw peue kue ' hk'a ' leupaws seumeu ' na ' ku peue ri, Hkrit Eun meuh vang tisut ' ka leukah ' ritroe na ' .

⁵ Mo ' se lah ' eun lawng hk'a ' leupaws seumeu ' ka leukah ' ritroe na ' yeuhki ' , "A 'nhaw ' lawn yeuh ceu nang aen ' ce ko ' , kaw eun a 'yu im ' ri ceu nang aen ' ce." ^{†††}

† Pucti heul ' 9:16 †† I ' saya ' 29:16; 45:9 ‡ Ho ' se 2:23 †† Ho ' se 1:10

‡‡ I ' saya ' 10:22, 23 ‡‡† I ' saya ' 1:9 ‡‡‡ I ' saya ' 8:14, 28:16

⁶Daecti eun lah' lawng hk'a' leupaws seumeu' ka hk'a' yum' na' yeuhki', "Pawlae kuit a yeuh keutit' nang hpum' ri, 'A'nhaw' ci' kaw huk' nang kuing' pang mao' na'?"^{††} (A meuh klawng Hkrit Eun lih na'.)

⁷"A'ko', 'A'nhaw' ci' kaw lih vang rui' na'?"[‡] (A meuh klawng Hkrit Eun kuh' huk' hk'ai' hk'a' yeum ri na'.)⁸Daecti hk'a' leupaws seumeu' na' a ci' lah' ri yeuh sa'nhaw'? A lah', "Leukah' aen' ut' a keunam pe', a ut' ri moeng mae' ut' ri hpum' pe' na'."^{††} A meuh leukah' hk'a' yum' buih pao' e' na' yeut.⁹Aen' na ko', moeng pe' na' a lawn rap ri ti Yesu' meuh Eun Peucawo' na' mae' hpum' pe' na' a yum' Peucawo' yeuh Eun Yesu' Eun tang kuh' im' hk'ai' vang yeum ri na' ko', pe' ku kaw pun ri rap ri ti hk'a' htut lawtpon na' yeut.¹⁰Kopti meuh a yum' pe' ri hpum' ri na', Eun sawn' pe' meuh peue leupaws seumeu'. Mae' kopti meuh a rap pe' ri ti ri moeng ri na', Eun yeuh pe' lawtpon.¹¹Hot' seun' ku' lah' ka nang htawm Seunga' na', "Peue yum' hk'a' naee Heun na', peue hkuin' kaw pun ri rap ri ti hk'a' hk'o' kaic na'."^{†††} Kopti peue ceu Yu'da, a'ko' peue un' meuh peue ceu Yu'da na' un' chat ce puri. Peucawo' ti ton' yawo na' meuh Eun Peucawo' ce peue gawm' euc' na'. Eun nap mun' htonnuk ri na' ri peue klawng Eun na' ce gawm' euc'.¹³Kopti, peue klawng muis Eun Peucawo' na' peue gawm' euc', kaw ce pun ri rap ri ti hk'a' htut lawtpon na'.^{†††}

¹⁴Daecti peue un' nang yum' na', ce ci' kaw cang klawng Eun yeuh sa'nhaw'? Peue un' nang duing mhawng' lawng Eun na', ce ci' kaw cang yum' yeuh sa'nhaw'? A lawn un' kue' peue heul' lah' ce mhawng' lawng Eun na' ko', ce ci' kaw pun ri mhawng' a yeuh sa'nhaw'?¹⁵A lawn un' kue' peue cus' ri heul' ko', a'nhaw' ci' kaw cang heul' lah' a yeuh sa'nhaw'? Hot' seun' ku' tem' a ri hk'a' naee htawm Seunga' na', "Cung ce peue ti leukah' mun' ren' kawn ing' na', a ci' pe' hk'o' nawk a' neng?"^{†††}

¹⁶Daecti a hkuin' caee ri meuh peue I'sarela' na' kaw ce yawm' ri rap ri ti leukah' mun' ren' kawn na' gawm' euc' ri. Kopti I'saya' lah' eun ri uin' a, "Cawo', a'nhaw' ci' kaw yum' leukah' e' na'?"^{†††} Kop awn' na, hk'a' yum' na' ing' a neum pun ri mhawng' lawng ka na'. Lawng pun ri mhawng' na' a meuh leukah' Eun Hkrit na'.¹⁸Daecti ui' cheu ri mhaing' ri nawk, "Un' pun ce ri mhawng' a aw?" Pun ce ri mhawng' a neum yeut seun' lah' a ri hk'a' naee htawm Seunga' na'.

"Seng' ce na' puc a ri heul' hk'awp' bhen' keute' na'.

Leukah' ce na' a heul' rot ri vang sut' ka bhen' keute' na'."^{††}

¹⁹Ui' cheu ri tang mhaing' bae ti pok,

"Peue I'sarela' na' un' leuceng pun ce a aw?" Mo' se lah' eun a tang' neum nanggal' na',

"Ui' kaw yeuh pe' mang' peue un' meuh peue ceu Yu'da na' ce. Ui' kaw yeuh pe' seungeueng' ri cu ui' peue nga' suisa na' ce."^{†††}

²⁰I'saya' eun hpum' hat' han' lah' a ri peue un' meuh peue ceu Yu'da na' ce,

"Peue un' hot' ri sok ui' na', nyu ce ui'.

Tuh' ui' peue un' hot' ri mhaing' sok ui' na', ce nyu ri."^{††}

²¹Daecti eun lah' lawng ce peue I'sarela' na' yeuhki',

"Nyat' ui' ti' ri na' gawm' seunyi

ri peue un' leuceng hpum' cen' na' ce."^{†††}

Peue I'sarela' kawn' vang na' ce

11 Yeuh keutit' ko' kaw ui' mhaing', "Peucawo' tecla Eun peue ceu ri na' ce hawc' aw?" Un' meuh, Saec' ui' ri, ui' ku meuh peue I'sarela' ceucat eun Abraham neum kon' hk'i eun Benyamin.²Peucawo' Eun hkuin' tecla peue ceu ri ku' leuk Eun ri uin' tang' neum nanggal' na' ce. Un' yawng pe' ton htawm Seunga' lawng ku' E'li'ya tang' eun peue I'sarela' na' ce ri Peucawo' Eun na' aw? Eun lah',³"Cawo', toh ce peue suip leukah' Mi na' ce. Ce lhu' ri tec vang dum ri tan Mi na'. A vang yawo ui' ri koe. Ce ku buih co'ca' ri sok ri kaw toh ui' yeut."^{†††} Daecti Peucawo' Eun ci' top' a ri heun yeuh sa'nhaw'? Eun lah', "Leuk Ui' ri uin' peue un' seukluin ri faee' ruphtu Bala' a' res heng' peue na' ce meuh punta Ui'."^{†††} Seun' awn' na saec' meuh yam maet' maen' na', a ku kawn' kue' peue Peucawo' cu Eun mun' ri Eun leuk ri uin' na' ce yeut.⁶Eun lawn cu mun' ri na' leuk a ko', hpaw a ca' laee meuh kopti hk'a' yeuh a na'. Kopti a lawn meuh kopti hk'a' yeuh na' ko', mun' na' hpaw a ca' kaw laee meuh mun'.

⁷Yeuh keutit' ko', yeuh sa'nhaw'? Peue I'sarela' na' ce hkuin' pun hk'a' leupaws seumeu' ku' hot' ce ri sok na'. Daecti peue Peucawo' leuk Eun ri ti na' ce pun a. Nang seubu lheu' hkaen' ce na' ce hpum' cen'.⁸Hot' seun' ku' tem' a ri hk'a' naee htawm Seunga' na', "Peucawo' Eun tuil' ce is' hpum' kuit kvai, ngai' un' cang nyu

† Fae' 18:5†† Sawn' leukah' mun' 30:12‡ Sawn' leukah' mun' 30:13‡† Sawn' leukah' mun' 30:14‡† I'saya' 28:16‡†† Yaw' la' 2:32‡†† I'saya' 52:7§ I'saya' 53:1

§† Suk' seun' 19:4§†† Sawn' leukah' mun' 32:21§† I'saya' 65:1§†† I'saya' 65:2§† 1Hkun' haw' hkam' 19:10,14§† 1Hkun' haw' hkam' 19:18

maee' yhuk' un' cang mhawng' na' rot seunyaen'." †

⁹ Davit' eun ku lah',

"Kah hpuin' som' ce na' meuh hk'ai maee' saee' pan, meuh seumu vang seuduih ri htang' meul na' maee' meuh hk'a' ciyang pun ce na' reu'.

¹⁰ Punta kaw ce un' cang nyu na', kah ngai' ce na' duim' lawng heul'.

Kah pang kui' ce na' gaw' cot' cu ce." ††

Peue ceu seubu na' pun ce hk'a' htut lawtpon

¹¹ Kaw ui' mhaing' bae, peue I' sarela' na' htang' meul ce a hk'o' ce un' laee cang kuh' aw? A hkuin' meuh. Daecti kopti yeuh ce ku' kleuc' na', punta Peucawo' kaw Eun yeuh peue I' sarela' na' ce hkoe' - mang' na', hk'a' htut lawtpon na' a ing' rot ri peue un' meuh peue ceu Yu' da na' ce. ¹² Daecti ku' kleuc' yeuh ce na' a lawn na' meuh hk'a' htonnuk pun bhen' keute' na' gawm' euc' ko', maee' ku' pun ce ri sum na' a lawn na' meuh hk'a' htonnuk pun peue un' meuh peue ceu Yu' da na' ce ko', hk'a' htonnuk ce peue I' sarela' na' a ci' na' pe gawm ti hk'a' htonnuk lheu' awn' a ing' a' neng?

¹³ Buih leukah' ui' maee' peue un' meuh peue ceu Yu' da na' pe'. Meuh ui' peue caee Eun Yesu' pun peue un' meuh peue ceu Yu' da na' pe'. Ui' sawn' kan' ri aen' a kue' a' ye' keuting. ¹⁴ Keutui' hpum' ui' ri kaw yeuh peue ceu ui' na' ce mang' pe' maee' ui' kaw teum' kawm ce ngon' ce na' pun ri lawtpon na'. ¹⁵ Kopti hk'a' Peucawo' tecla Eun ce na' a lawn na' yeuh bhen' keute' na' tang htuk' lung Peucawo' Eun ko', hk'a' Peucawo' tang rap Eun ri ti ce bae na' a jaen na' chak' nyawk'. Awn' a meuh hk'a' tang kuh' im' hk'ai' vang yeum na'. ¹⁶ Hkawomun' tan ri ri Peucawo' Eun ti deng' aet' na' a lawn seunga' chak' ko', deng' keuting ka na' a ku na' seunga' chak' euc'. Res ka na' a lawn seunga' chak' ko', kak' ka na' ce a ku na' seunga' chak' yeut.

¹⁷ Kak' ka sanlon na' pun a ri taws' ri tec ri ngon', hawc' ko' a ti kak' ka sanlon hk'i na' pe' ing' kap' to' a tang' ku' taws' ri tec ri na' ce. Pe' tawl' pun ri hk'a' ku' hk'a' neum res ka kleum' sanlon na'. ¹⁸ Kop awn' na, pe' na' pawlaee hpum' keuting hk'a' pang kak' pun ri taws' ri na' ce. Pe' lawn hpum' keuting ko', yeuh pe' pawn a, hpaw pe' ca' kawm ri yuk res na', daecti res na' kawm a ri yuk pe' ri. ¹⁹ Hawc' ko', na' pe' cang lah' a yeuh keutit', "Punta kaw ye pun ri kap' to' ri ri kleum' na', kak' awn' ce pun ri taws' ri tec ri." ²⁰ Cawp' ka

yeut, pun ce ri taws' ri tec ri na' meuh a kopti un' yum' ce na'. Daecti pun pe' ri ut' na' meuh a kopti yum' pe' na'. Pawlaee hpum' keuting, daecti lhat' reu'. ²¹ Kopti Peucawo' Eun lawn un' uin' kak' hk'im' na' ko', Eun ku kaw un' uin' pe' ri yeut.

²² Kop awn' na, kuit ri mhawng' hk'a' tukyak Eun Peucawo' na' gawm' hk'a' reng Eun na' reu'. Eun yeuh reng ri peue htang' meul na' ce, daecti pe' lawn ut' hk'a' naee hk'a' tukyak Eun na' ko', Eun ku kaw tukyak ri pe'. A lawn un' yeuh keutit' ko', Eun na' taws' ri tec pe' yeut. ²³ Peue I' sarela' na' ce lawn tang ing' yum' Peucawo' Eun bae ko', Peucawo' Eun kaw ti ce ing' kap' to' ri ri kleum' na'. Kopti Peucawo' cang ti Eun ce ing' kap' to' ce ri kleum' na' bae. ²⁴ Vang tisut' ka na', pe' saec' na' pun ri taws' ri neum kleum' ka sanlon hk'i na' pe' na' kap' to' ri maee' kleum' ka sanlon yung' na' pun ko', kak' ka sanlon yung' na' a tang ing' kap' to' ri ri kleum' hk'im' ri na' ko', a ci' na' pe sam' ran a' neng?

Peue I' sarela' na' kaw ce lawtpon gawm' euc'

²⁵ Ec' awng' na' pe', punta kaw pe' un' hpum' keuting maee' tu' ri meun na', ui' sum' kah pe' leuceng pun ku' vangdoh' rui' aen' a. Aen' a meuh peue I' sarela' na' ngon' kaw ce hpum' cen' rot ti peue un' meuh peue ceu Yu' da na' kaw ce ing' lec nuk ca' lang' ri na'. ²⁶ Yam awn' na, peue I' sarela' na' ce kaw pun hk'a' htut lawtpon na' gawm' euc' ri hot' seun' ku' tem' a ri hk'a' naee htawm Seunga' na', a lah'

"Cawo' htut na' kaw Eun pucti lih neum gong Yi' on na'.

Eun kaw ti ri tec ku' rai na' hk'ai' ceucat eun Yakop' na' ce.

²⁷ Aen' a meuh kati sat' ca' yeuh Ui' ri ce yam ti Ui' ri tec map' ce na'." ‡

²⁸ A lawn meuh hk'a' leukah' mun' ren' kawn na' ko', punta kaw pe' pun mun' na', meuh ce ransu Eun Peucawo'. A lawn meuh hk'a' leuk ri ti na' ko', kopti meuh a a' ta' keuting ce na' ce, ce meuh peue Peucawo' leumeus' Eun ce. ²⁹ Kopti lapsawng' Eun Peucawo' na' maee' hk'a' klawng Eun ri ti na' un' laee leuploh' plin' a ri. ³⁰ Seun' a saec' pe' ri tawn un' leuceng pe' Peucawo' Eun nanggal' aen' a na', maet' maen' pe' pun hk'a' tukyak Eun na' kopti meuh a hk'a' un' leuceng ce na'. ³¹ Seun' awn' na, saec' meuh ce ri maet' maen', ce hkuin' yum'. Aen' a meuh punta kaw ce pun hk'a' tukyak na' kopti Peucawo' tukyak Eun ri pe' na'. ³² Kop-

† Sawn' leukah' mun' 29:4; I' saya' 29:10 †† Suk' seun' 69:22, 23

‡ I' saya' 59:20, 21; 27:9; Yerami' 31:33, 34

ti Peucawo' tae' Eun peue un' leuceng leukah' ri na' a meuh punta kaw Eun tukyak ri peue gawm' euc' na'.

Cai suk' seun'

³³O', peuyha' cu' yi meuneum Eun Peucawo' na' mae' hk'a' cang yawng Eun na' rui' nyawk' ka.

Hk'a' caet ri nawk mae' hk'a' keutec ri nawk Eun na' un' cang kuitdoh' ri ka.

Hk'a' Eun na' un' cang sok ri nyu a.

³⁴"A'nhaw' ci' kaw cang yawng hpum' Eun Peucawo' na'?"

A'ko', a'nhaw' ci' meuh nang tuil' kamkuit Eun na'?"†

³⁵"A'nhaw' ci' duing tuil' ku' ti ri ceu ri Peucawo' Eun,

Peucawo' Eun kaw kah ri sai' a?"‡

³⁶Kopti ku ceu na' lih a neum Heun. Eun yeuh a, a meuh pun Heun.

Kah munhpung' na' kue' ri Heun cot' cu ri reu'. Amin.

Ku' tan a'yu im'

12 Kop awn' na ec' awng' na' pe', yam kuit e' ri nawk hk'a' tukyak Eun Peucawo' na', ui' hk'o' pe' tan tu' pe' na' meun ri Peucawo' Eun meuh ku' tan a'yu im' seunga' chak' ku' hit' hpum' Eun Peucawo' na'. Aen' a meuh hk'a' faee' ri civit pe' na'.

²Pawlaee a'yu im' hot' seun' peue bhen' keute' cu maet' maen' na' ce, daecti rap ri ti hk'a' leuploh' civit hpum' ri hk'u' na'. Yeuh keutit' ko', pe' kaw cang caet ri nawk htawhkam ceu nanghaw' na' a ci' meuh alo Eun Peucawo' na'. Pe' kaw cang yawng keunhaw' na' chak' ka, keunhaw' na' htuk' a hpum' Eun, keunhaw' na' a ci' chak' nyawk' hk'ai' peue.

Lapsawng' tuil' Eun Peucawo'

³Kopti meuh a mun' tuil' ri ri ui' na', ui' hk'o' ri lah' a ri pe' ku peue, pawlaee sawng' hteum' pe' keuting lheu' ku' buih meuh pe' na'. Daecti hk'a' naee kue' pe' sati na', sawng' kuit yawo pal htan Peucawo' tuil' Eun ri pe' na' reu'. ⁴E' ri ku peue, jawngkui' tu' e' na' meuh a keuhti yawo, daecti hk'eung hk'a' naee ka na' a kue' heun' ceu. Kan' ka hk'eung awn' ce, a hkuin' seun' puri. ⁵Seun' awn' na ko', hk'a' naee Hkrit Eun e' saec' na' meuh heun' peue ko', e' hk'on' ri meuh yawo jawngkui' tu' keuhti, daecti hk'eung na' keuhti hawc' keuhti a meuh is' puri gawm' euc'. ⁶E' ri ti peue

hawc' ti peue, e' kue' lapsawng' Peucawo' tuil' Eun ri e' hot' mun' tuil' Eun ri e' na' a hkuin' seun' puri. A'nhaw' lawn pun lapsawng' suip ri lah' leukah' Eun Peucawo' na' ko', kah eun lo' lapsawng' aen' a hot' kaw' reng ka hk'a' yum' kue' eun na' reu'. ⁷A'nhaw' lawn pun lapsawng' yeuh mhai' na' ko', kah eun yeuh mhai' na' reu'. A'nhaw' lawn pun lapsawng' hk'a' sangsawn' na' ko', kah eun sangsawn' reu'. ⁸A'nhaw' lawn pun lapsawng' tuil' kaw' reng na' ko', kah eun tuil' kaw' reng reu'. A'nhaw' lawn pun lapsawng' hk'a' teum' kawm ku' lo' peue na' ko', kah eun tuil' ri hk'a' naee hpum' vah ri na' reu'. A'nhaw' lawn pun lapsawng' meuh ro' kan na' ko', kah eun seue' hpum' ri u' peung reu'. A'nhaw' lawn pun lapsawng' tuh' hk'a' tukyak ri peue na' ko', kah eun ren' kawn yeuh a reu'.

Hk'a' leumeus' keus

⁹Leumeus' sut' hpum' ri reu'. Jeuk ku' rai na' reu'. Jhawp' ku' chak' na' reu'. ¹⁰Leumeus' puri seun' ec' awng' reu'. Tuil' puri is' munhpung' hk'a' naee sawn' peue chak' lheu' mi ri na' reu'. ¹¹Pawlaee va hpum' huk' ri na' yop, daecti rok' sa' hpum' huk' ri hk'a' civit pe' na' yeuh kan' Eun Peucawo' na' reu'. ¹²Ren' kawn hk'a' naee vang keutui' hpum' na' reu'. Yeun' hkam hk'a' tukhka' na' reu'. Kati keutawn' hk'a' naee hk'o' mun' na' reu'. ¹³Gvah ri tuil' ri peue Eun Peucawo' ku' cuthkuin' na' ce reu'. Yeuh ri kue' hpum' vahveung rap ri ti chec' leu na' ce reu'.

¹⁴Nap mun' ri peue keunhap' nokneh pe' na' ce reu'. Nap mun', pawlaee jha'. Nap mun' palkoe reu'.

¹⁵Ren' kawn mae' peue ren' kawn na' ce reu'. Kuit nyhap' mae' peue kuit nyhap' na' ce reu'. ¹⁶Yeuh hpum' ri meuh ti meul' ut' tiduih' reu'. Pawlaee va ri kue' hpum' lhung' hpum' keuting na', daecti yeuh a' mawo mae' peue htan tem un' kue' munhpung' na' ce reu'. Pawlaee mhawng' ri hk'o' cuin.

¹⁷Pawlaee yeuh ri top' ku' rai na' ri peue yeuh ku' rai ri pe' na' ce. Peus hpum' ri yeuh ku' nyu peue meuh ku' chak' ku' cawp' na' reu'. ¹⁸A lawn kaw cang ko', ut' a ri pe' yawo, yeuh ri ut' cumyen' tiduih' reu'.

¹⁹A' mawo na' pe', ku' kleuc' yeuh peue ri pe' na', pawlaee yeuh ri top' a. Daecti tae' Peucawo' Eun yeuh hk'a' seungeueng' ri na' pucti lih reu'. Kopti Peucawo' lah' Eun a hk'a' naee htawm Seunga' na', "Yeuh ri top' na' meuh a kan' Ui', Ui' kaw yeuh ri top' a."²⁰Nang htawm Seunga' ton seubu na' a lah',

† I' saya' 40:13 †† Yaw' ba' 41:11

‡ Saw' leukah' mun' 32:35

“Ransu mi na' eun lawn sum' som' ko', tuil' eun som' reu'.

Eun lawn sum' nyui leuum' ko', tuil' eun nyui reu'.
Yeuh keutit' na' ko', mi kaw bae guh ngawl ha' pang cing' eun na'.”†

‡ Pawlaee va ku' rai na' pe pe', daecti yeuh ku' chak' na' pe ku' rai na' reu'.

Yawm' ri ut' hk'a' ruim ce cawo' u' peung na'

13 Yawm' ri ut' hk'a' ruim ce cawo' kue' an' nya u' peung na' ce ku peue ri, kopti a lawn un' meuh an' nya Peucawo' tang' Eun ri uin' na' ko', a' nhaw' hkuin' kue' an' nya na' saec' ti peue. Peue kue' an' nya na' meuh ce ku' Peucawo' tang' Eun ri uin'.² Kop awn' na, peue fuin cawo' kue' an' nya na' eun ko', eun ku buih fuin ku' yeuh Eun Peucawo' na' yeut. Peue yeuh keutit' na' eun ko', kaw eun ti hk'a' taws' a' mu na' ing' ri ti meun.³ Kopti cawo' u' peung kuing' na' hpaw ce ca' meuh ku' hk'o' lhat' pun peue yeuh ku' cawp' na' ce. Daecti ce hk'o' lhat' pun peue yeuh ku' kleuc' na' ce. Sum' pon pe' hk'a' lhat' ri peue kue' an' nya na' ce aw? Yeuh keutit' ko', yeuh ku' cawp' na' reu', kaw ce suk' seun' pe'.⁴ Kopti punta kaw pe' ut' sam' ran na', ce meuh mhai' Eun Peucawo'. Daecti pe' lawn yeuh ku' kleuc' na' ko', lhat' reu'. Kopti hpaw ce ca' jhawp' leungawng na' hk'o' hk'awng'. Meuh ce mhai' Eun Peucawo'. Ce ti hk'a' ciyang Eun Peucawo' na' lih ri peue yeuh ku' kleuc' na' ce.⁵ Kop awn' na, pe' kaw kah ri yawm' ri ut' hk'a' ruim ce peue kue' an' nya na'. A hkuin' meuh kopti lhat' ri hk'a' ciyang na' palkoe, daecti a ku meuh kopti hpum' cang yawng pe' na' yeut.

⁶ Kopti meuh a aen' a na', pe' seue' hkawn' ka, kopti peue kue' an' nya na' meuh ce mhai' Eun Peucawo' na'. Ce yeuh kan' u' peung kuing' na'.⁷ Sai' ku' ma ma pe' ri peue ku peue na' ce reu'. Pe' lawn un' nang seue' hkawn' na' ko', seue' a reu'. Peue kuing' ri yumyam' na', yumyam' ri ce reu'. Peue kuing' ri pun munhpung' na', tuil' munhpung' ce reu'.

Leumeus' puri kopti seunyi awn' kaw a hk'aws' rot hawc'

⁸ A lawn un' meuh yawo hk'a' leumeus' keus puri na' ko', pawlaee va ri kue' ku' ma ri a' nhaw' saec' ti peue. Kopti a' nhaw' lawn leumeus' peue ut' keunam caonao' ri na' ce ko', yeuh eun leukah' ritroe na' htonnuk hawc'.⁹ Leukah' ritroe ku' lah', “Pawlaee len' cu,

pawlaee toh peue, pawlaee rabawk' peue, pawlaee se' dai' is' peue”†† na', mae' leukah' ritroe seubu na' ce ku ut' hk'a' naee leukah' ritroe aen' a hawc'. A meuh, “Leumeus' peue ut' keunam caonao' mi na' ce seun' leumeus' mi tu' ri na' meun yeut reu'.”‡‡ Hk'a' leumeus' keus na' hpaw a ca' yeuh peue ut' keunam caonao' na' ce sui'. Kop awn' na, peue kue' hk'a' leumeus' keus na' pun eun ri yeuh leukah' ritroe na' htonnuk hawc'.

‡‡ Yeuh ceu nang aen' ce ri yawng pe' yam maet' maen' na' a ci' meuh yam keunhaw' na' reu'. Rot a yam kaw pe' hk'awn' hk'ai' it' ri na' hawc', kopti maet' maen' hk'a' htut lawtpon na' gawm baet a ri de e' hk'ai' yamla e' ri yum' na' hawc'.¹² Yam peunsum' na' kaw a hk'aws' euc', a kaw hk'aws' rot yam peunnyi na' hawc'. Kop awn' na, kah e' hpuic' ri tec ku' yeuh ka hk'a' duim' lawng na', cuip' hk'eung an' nya ka ku' ceng' na' pawh.¹³ Kah e' yeuh ku' kuing' hpaw mae' ut' e' hk'a' naee yam ka peunnyi na', pawlaee yeuh ku' ren' kawn pon lheu', pawlaee yuic' ri plai', pawlaee yeuh ri hkuit' nawng' tang', pawlaee kleuc' leumeul puri, pawlaee gvah muk gvah cum puri mae' pawlaee hkoe' mang' puri.¹⁴ Daecti, yong' tu' pe' na' ri Cawo' Yesu' Hkrit Eun reu'. Punta kaw pe' yeuh ri htonnuk ri hk'a' ta' nha' ka hk'a' nham' keune na' yeuh sa' n-haw' na', pawlaee kuit a.

Peue kaw' reng kloee mae' kaw' reng keuting

14 Rap ri ti peue kaw' reng kloee hk'a' naee hk'a' yum' na' ce reu'. Pawlaee taws' a' mu ri ce ri lawng kamkuit un' seun' puri na'.² Ngon' ti ri peue yum' eun ku' hk'a' na' cang hk'a' a ri ku ceu. Daecti peue hk'a' yum' kaw' reng kloee na' eun hk'a' yawo pal tui' lha'.³ Peue hk'a' ku' hk'a' ku ceu na' eun, pawlaee ri hkamram ku' un' hk'a' na' eun. Ku' un' hk'a' na' eun, pawlaee tang' map' ri ku' hk'a' na' eun. Kopti Peucawo' rap Eun ri ti ka hawc'.⁴ Mi ci' meuh a' nhaw', mi vae' taws' a' mu ri mhai' eun peue seubu na' eun. Hkawn' eun saec' pun ku' chak' na' un' lah', lulaic heul' na' un' lah', ut' a ri Cawo' eun na' Eun. Kopti Peucawo' cang yeuh Eun eun pun ku' chak' na', eun kaw pun a neumneum.

⁵ Ngon' ti ri peue eun tang' seunyi ti ri seunyi na' keuting hk'ai' seunyi seubu na'. Daecti ku' seubu ti peue na' eun sawn' seunyi ku seunyi na' seun' puri. Pe' ri ku peue, sawng' sawng' jhawp' kamkuit pe' na' meun reu'.⁶ A' nhaw' lawn tang' seunyi ti ri seunyi na' keuting hk'ai' seunyi seubu na' ko', tang' eun a punta tuil'

† Leukah' rui' 25:21, 22

†† Pucti heul' 20:13-15, 17; Sawn' leukah' mun' 5:17-19, 21‡ Fae' 19:18

munhpung' ri Peucawo' Eun. A' nhaw' lawn hk'a keune ko', hk'a eun a punta tuil' munhpung' ri Peucawo' Eun kopti mun' keuting eun ri Peucawo' Eun na'. Peue un' hk'a na' eun ko', un' hk'a eun a punta tuil' munhpung' ri Peucawo' Eun. Eun mun' keuting ri Peucawo' Eun.
⁷Kopti hpaw e' ca' kue' nang a' yu im' pun yawo tu' ri meun palkoe na' saec' ti peue. E' ku hkuin' kue' nang yeum pun yawo tu' ri meun palkoe na' saec' ti peue yeut. ⁸E' saec' a' yu im', e' ku a' yu im' pun Peucawo' Eun. E' saec' yeum, e' ku yeum pun Peucawo' Eun. Kop awn' na, e' saec' na' im', e' saec' na' yeum, meuh e' is' Eun Peucawo'.

⁹Kopti meuh a ceu nang aen' a na', punta kaw Eun meuh Peucawo' ce peue yeum mae' peue im' na', Hkrit Eun yeum, Eun tang kuh' im'. ¹⁰Yeuh a keutit' na', kopti kaw e' kah ri cawng nanggal' ka ten taws' a' mu Eun Peucawo' na' gawm' euc' e'. A ci' meuh kop keunhaw' pe' vae' taws' a' mu ri ec' awng' ri na' ce? A ci' meuh kop keunhaw' pe' vae' ri hkamram ec' awng' ri na' ce? ¹¹Hot' seun' ku' tem' a ri nang htawm Seunga' na',

“Cawo' Peucawo' Eun lah', 'Seun' a' yu im' Ui' neumneum na',

peue na' kaw peue seukluin ri nanggal' Ui' ku peue, dak' na' a kaw lah' hk'a' taws' hpum' na' ri Peucawo' Eun ku dak'.”†

¹²Kop awn' na, e' kaw pun ri lah' lawng tu' meun ri na' ri Peucawo' Eun.

¹³Kop awn' na, pawlaee taws' a' mu ri puri. Daecti htuk' e' ri kuit a deut hpaw e' ca' kaw laee yeuh ku' kaw yeuh ec' awng' na' ce seuduih leuveul' ri na' mae' un' laee va ri yeuh ku' kang' hk'a' ce na', a jaen na' chak'. ¹⁴Ku' yawng ui' neumneum hk'a' naee Cawo' Yesu' Eun na' ko', taengtaeng ku' hk'a' na' meun ko' ca' kue' a ku' un' seunga' chak'. Daecti a' nhaw' lawn sawn' ceu nangnhaw' na' un' seunga' chak' ko', ceu nang awn' a ku' meuh ku' un' seunga' chak' pun heun. ¹⁵Kopti ec' awng' pe' na' ce lawn hpum' un' sam' ran kopti meuh a ku' hk'a' pe' na' ko', pe' ku hkuin' laee suip ri hot' ri yeuh hk'a' ka hk'a' leumeus' keus na'. Pawlaee kah ku' hk'a' pe' na' yeuh ec' awng' ku' Hkrit pun Eun ri yeum pun ce na' ce lulaic reu'. ¹⁶Pawlaee kah peue lah' ku' kuit mi chak' na' meuh ku' rai. ¹⁷Kopti kuing' Eun Peucawo' na' hpaw a ca' meuh lawng ku' nyui ku' hk'a, daecti a meuh hk'a' leupaws seumeu', hk'a' kuit nyawk' kuit sam' ran cumyen' mae' hk'a' ren' kawn hk'a' naee Cit' seunga' chak' na'. ¹⁸A' nhaw' lawn yeuh mhai' Eun Hkrit

hk'a' naee ceu nang aen' ce ko', hit' eun hpum' Eun Peucawo'. Eun ku hit' hpum' peue yeut.

¹⁹Kop awn' na, kah e' yeuh ku' kaw yeuh e' ut' sam' ran cumyen' na' ri puri mae' kah e' yeuh ri huk' hawn' hk'a' naee hk'a' yum' na' ri puri reu'.

²⁰Pawlaee yeuh kan' Eun Peucawo' na' lulaic kopti meuh a ku' hk'a' na'. Meuh ka neum, ku' hk'a' na' hpaw a ca' to' ri un' chak', daecti a' nhaw' lawn yeuh peue seubu na' peue yeuh ku' kleuc' ri kop ku' hk'a' ri na' ko', hkawn' eun ku' kue' hk'a' kleuc' yeut. ²¹Kopti meuh a hk'a' e' keune, a' ko' nyui e' plai', a' ko' yeuh e' ku' ti ri ceu a yeuh ec' awng' e' na' ce seuduih leuveul' ri ko', ceu nang aen' ce un' mak' ri yeuh a, a jaen na' chak'.

²²Ku' yum' mi lawng ceu nang aen' ce na' rokxa' a nang seuna' pa' Peucawo' na' reu'. Peue un' tang' map' ri ti meun ri lawng ku' htawhkam eun meuh ku' cawp' hawc' na', kah eun pun mun'. ²³A' nhaw' lawn kawn' kue' hk'a' kangkae eun hk'a' ko', eun ku' kue' hk'a' kleuc' kopti un' hk'a' eun a hot' hk'a' yum' ri na'. Saec' na' yeuh ceu nangnhaw' na', a lawn un' yeuh ri lih neum hk'a' yum' na' ko', meuh a map' gawm' euc' ri.

15 Peue kue' hk'a' yum' kaw' reng keuting na' e', htuk' e' ri yeun' hkam ri peue kue' hk'a' yum' kaw' reng aet' na' ce. E' htuk' ri un' hot' ri yeuh ku' htuk' hpum' ri na' meun. ²E' ri ku peue, yeuh ku' hit' hpum' ce peue ut' keunam caonao' na' ce reu', punta kaw a kue' mun' pun ce na', ce na' go' ri huk' hk'a' naee hk'a' yum' na'. ³Kopti saec' meuh Hkrit Eun, Eun ku un' yeuh ku' htuk' hpum' ri na'. Hot' seun' ku' tem' a ri nang htawm Seunga' na', “Leukah' un' nawp-sang ce peue un' nawpsang Mi na' rot a hk'a' pang ui'.”
^{††4}Kopti punta kaw e' kue' hk'a' keutui' hpum' ri hk'a' yeun' hkam na' mae' ri hk'a' tuil' kaw' reng neum htawm Seunga' na', leukah' tem' ri yam pon heul' hawc' na' a tem' ri punta kaw a sangsawn' e'.

⁵Hk'o' Peucawo' Cawo' tuil' hk'a' yeun' hkam na' mae' hk'a' kaw' reng na' Eun, kah Eun yeuh pe' hot' Yesu' Hkrit Eun ri meuh pe' hpum' ti meul' na' reu'.

⁶A meuh punta kaw pe' pun ri tuil' munhpung' ri Peucawo' na' Eun ri moeng mae' ri hpum' ti meul' pe' na'. Eun meuh kuiing' Eun Yesu' Hkrit Cawo' Peucawo' e' na' Eun.

⁷Kop awn' na, punta Peucawo' kaw Eun pun munhpung' ri na', kah pe' rap ri ti pu ri ti peue hawc' ti peue seun' Hkrit rap Eun ri ti pe' na' reu'. ⁸Kopti ui' lah' a ri pe', Hkrit lih Eun seun' meuh ri mhai' ce peue ceu Yu' -

† I' saya' 45:23

†† Suk' seun' 69:9

da na' punta kaw Eun yeuh e' nyu hk'a' keutawn' ka kati Eun Peucawo' ku' Peucawo' yeuh Eun ri a'ta' keuting ce⁹ punta peue un' meuh peue ceu Yu'da na' kaw ce tuil' munhpung' ri Peucawo' Eun kopti meuh a hk'a' tuckyak Eun na'. Hot' seun' ku' tem' a ri nang htawm Seunga' na',

“Kop awn' na, ui' kaw suk' seun' Mi nang ngon' ce peue un' meuh peue ceu Yu'da na'.

Ui' kaw cai suk' seun' muis Mi na'.”†

¹⁰ Ku' seubu ti ton na' a lah',

“Peue un' meuh peue ceu Yu'da na' pe', ren' kawn mae' peue Eun Peucawo' na' ce tiduih' reu'.”‡

¹¹ Ku' seubu ti ton na' a ku lah',

“Peue un' meuh peue ceu Yu'da na' pe', suk' seun' Peucawo' Eun reu'.

Peue ceu gawm' euc' na' pe', cai suk' seun' Eun reu'.”‡

¹² I' saya' eun ku lah',

“Res eun Yesae' na' a kaw pucti lih,

Eun kaw pucti lih punta kaw Eun u' peung peue ceu gawm' euc' na',

peue un' meuh peue ceu Yu'da na' ce kaw kue' hk'a' keutui' hpum' hk'a' naee Heun.”‡

¹³ Punta kaw pe' htonnuk ri hk'a' keutui' hpum' ri ti'ca ka Cit' seunga' chak' na', kah Peucawo' Cawo' keutui' hpum' pe' Eun na' Eun yeuh pe' htonnuk ri hk'a' ren' kawn na' mae' hk'a' kuit nyawk' kuit sam' ran cumyen' na' kopti han' pe' mae' Heun na' reu'.

Paw' lu sangsawn' eun leukah' mun' ri peue un' meuh peue ceu Yu'da na' ce

¹⁴ Ec' awng' na' pe', yum' ui' htonnuk pe' ri ku' chak' na', htonnuk pe' ri cu' yi na' mae' cang sangsawn' pe' puri pun na'. ¹⁵ Hat' han' ui' ri tem' lawng ku' ti ri ceu ri pe' na' seun' punta kaw ui' deun' sati pe' ri lawng ceu nang aen' ce bae na' a meuh kopti mun' tuil' Eun Peucawo' ri ui' na'. ¹⁶ Eun kah ui' meuh mhai' Eun Yesu' Hkrit, kah ui' heul' ri peue un' meuh peue ceu Yu'da na' ce. Eun kah ui' yeuh kan' ce peue jhawp' rit, a meuh heul' pao' leukah' mun' ren' kawn Eun Peucawo' na' ri punta peue un' meuh peue ceu Yu'da na' kaw ce keut' ri meuh ku' tan ku' Peucawo' rap Eun ri ti pun na', a meuh ku' pun ri saic' ri seunga' chak' ri Cit' seunga' chak' na'.

¹⁷ Kop awn' na hk'a' naee Yesu' Hkrit Eun, ui' cang mhawng' ri hk'o' cuin ri ku' yeuh ui' mhai' pun Peucawo' Eun na'. ¹⁸ Daecti a lawn un' meuh yawo ku' Yesu'

Hkrit kah Eun ui' yeuh palkoe na' ko', ui' hkuin' kaw hat' ri mhawng' ri hk'o' cuin mae' ku' seubu na' saec' ti ceu. Eun kah ui' va peue un' meuh peue ceu Yu'da na' ce ing' yum' Peucawo' Eun ri ku' lah' ku' yeuh ui' ¹⁹ ri ti'ca ka het' keuting mae' ti'ca ka ku' hk'o' am' ri ti'ca ka Cit' seunga' chak' na'. Rot ti pun ui' ri pao' leukah' mun' ren' kawn Eun Hkrit na' htonnuk ku' duih' na' hk'awp' tang' neum veng Yeru' salaem na' rot ti veng I' li' ri' hkum' na'. ²⁰ Neumneum ka na' ko', tang' ui' hpum' ri kaw heul' pao' leukah' mun' ren' kawn na' vang peue un' nang duing mhawng' lawng Eun Hkrit na' ku' duih'. Aen' meuh a punta kaw ui' un' pun ri go' hk'a' pang ka kleum' vang peue seubu na' uin' ce na'. ²¹ Hot' seun' ku' tem' a ri nang htawm Seunga' na',

“Peue un' duing kue' nang ris lawng Eun na', kaw eun pun ri nyu.

Peue un' duing mhawng' na', kaw eun leuceng pun a.”‡

²² Heul' pao' leukah' mun' ren' kawn na' meuh a ku' hko' ka ui' laleung na', a yeuh ui' un' cang ing' ri pe'.

Paw' lu rangraen Eun hk'a' kaw ri heul' kuing' Ro'ma

²³ Daecti maet' maen', nang kuing' aen' ce a hkuin' laee kue' vang kaw ui' kah ri yeuh kan' na' mae' kopti sum' heul' ui' ri pe' neum ling' neum seungai hawc' na', ²⁴ ui' raen hk'a' kan' kaw ri heul' ri pe' yam heul' ui' nang kuing' Sapen na'. Ui' keutui' hpum' kaw ri heul' glue ri pe' yam hpai ui' hk'a' na'. Yam hawc' e' ren' kawn hk'a' nyum hk'a' munkvaen ri tiduih' ti cu' hkao' na', ui' ku' keutui' hpum' pe' na' teum' kawm ui' heul' rot teh'. ²⁵ Daecti maet' maen', ui' buih heul' nang veng Yeru' salaem punta kaw ui' teum' kawm peue Eun Peucawo' ut' teh' na' ce. ²⁶ Kopti ec' awng' ut' nang kuing' Masido' ni' mae' kuing' Ahkaiya' na' ren' kawn ro ce paec tan ri tuil' a ri peue Eun Peucawo' ku' hk'o' tuckyak ut' nang veng Yeru' salaem na' ce. ²⁷ Ce ren' kawn sum' yeuh ku' yeuhki' na'. Neumneum ka na' ko', kue' ce ku' ma ri ec' awng' awn' ce yeut. Kopti peue un' meuh peue ceu Yu'da na' ce lawn pun ri pawng' ri lec' hk'a' naee mun' hk'a' civit ce peue ceu Yu'da na' ko', ce ku' kue' ku' ma ri peue ceu Yu'da na' ce. Ce na' htuk' ri gvah mun' hk'a' vahtu' ri na' ri ec' awng' awn' ce. ²⁸ Kop awn' na, yam hawc' ui' kan' aen' ce na' mae' hawc' yawng ui' ec' awng' aen' pun ce paec tan na' meulamlam ri na', ui' kaw heul' nang kuing' Sapen, ui' na' ba' ri veh glue ri pe'

† 2 Samoela' 22:50; Suk' seun' 18:49†† Saw' leukah' mun' 32:43
‡ Suk' seun' 117:1†† I' saya' 11:10

‡‡ I' saya' 52:15

lang' hk'a' ri. ²⁹Yawng ui' yam ing' ui' ri pe' na', ui' kaw ing' mae' mun' htonnuk Eun Hkrit na'.

³⁰Ec' awng' na' pe', meuh a kopti Cawo' e' Yesu' Hkrit Eun na' mae' hk'a' leumeus' keus ka Cit' seung' na' ui' hk'o' pe' pawng' ui' mae' ku' hko' ka ui' na' ri hk'o' mun' pun ui' ri Peucawo' Eun reu'.

³¹Hk'o' pe' hk'o' mun' kah ui' pun ri rap ri ti hk'a' teum' kawm kah ui' sa' pa sam' ran hk'ai' peue un' yum' ut' nang kuing' Yu' da na' ce, mae' hk'o' pe' hk'o' mun' kah peue Eun Peucawo' ut' nang veng Yeru' salaem na' rap ce ri ti hk'a' teum' kawm ui' na'.

³²Aen' meuh a punta kaw ui' ren' kawng' ri pe' hot' alo Eun Peucawo' na' mae' punta kaw ui' hpum' sam' ran mae' pe' na'. ³³Kah Peucawo' hk'a' ut' sam' ran cumyen' na' Eun ut' mae' pe' reu'. Amin.

Leukah' tisut'

16 Bu' ui' Febi meuh awng' beun' ye ku' meuh nang teum' kawm muk kon' Hkrit hk'a' naee veng Kechel na' eun heul' ri pe'. ²Ui' tawm' pe' na' rap ri ti eun hk'a' naee Peucawo' Eun kuing' hpaw mae' meuh eun peue Eun Peucawo' na' mae' teum' kawm eun hot' seun' ku' lo' eun na' reu'. Kopti pun eun ri teum' kawm peue heun' na' ce mae' eun ku' teum' kawm ui' ri yeut.

³Pli' si' la' mae' Ahkio' la' ku' yeuh kan' mae' ui' hk'a' naee Yesu' Hkrit Eun na' lah' ka mhawng' leunyeng ui' ri ka. ⁴Punta kaw ui' pun ri pon na', ka hkuin' laee mang' a' yu ri. A hkuin' meuh ui' ri koe, daecti muk kon' Hkrit un' meuh peue ceu Yu' da na' ce ku kuit rot ri mun' ka yeut.

⁵Muk kon' Hkrit hk'om puri nang nya ka na' lah' ce mhawng' leunyeng ui' ri ce.

E' penetas' a' mawo leumeus' ui' ku' meuh nang ing' yum' Hkrit Eun nanggal' nang kuing' Asa' na' lah' eun mhawng' leunyeng ui' ri heun.

⁶Mari' ku' sae' caee' yeuh kan' pun pe' na' lah' eun mhawng' leunyeng ui' ri heun.

⁷Andronikas' mae' Yu' nias' ec' awng' ui' ku' tawn ut' nang htawng' mae' ui' na' lah' ka mhawng' leunyeng ui' ri ka. Ka meuh nang muis chak' hk'a' naee muk ce peue caee Eun Yesu' na' ce. Ka ing' yum' Hkrit Eun nanggal' yam un' nang yum' ui' na'.

⁸Ampliatas' ku' meuh peue leumeus' ui' eun hk'a' naee Peucawo' Eun na' lah' eun mhawng' leunyeng ui' ri heun.

⁹Eubanas' ku' meuh a' mawo e' yeuh kan' hk'a' naee Hkrit Eun tiduih' na' mae' Satahkis' a' mawo leumeus' ui' na' lah' ka mhawng' leunyeng ui' ri ka.

¹⁰Apelles' ku' pun ri hkam' hk'a' cop' long hawc' eun pun ri rap ri ti hk'a' htawhkam hk'a' naee Hkrit Eun na' lah' eun mhawng' leunyeng ui' ri heun. Peue ut' nang nya eun Aris' tobulas' na' lah' ce mhawng' leunyeng ui' ri ce.

¹¹Herodion ec' awng' ui' na' lah' eun mhawng' leunyeng ui' ri heun.

Peue nya peue hk'ul' eun Nasisas' ku' ut' hk'a' naee Peucawo' Eun na' lah' ce mhawng' leunyeng ui' ri ce.

¹²Trifena mae' Trifosa beun' ku' sae' caee' yeuh kan' hk'a' naee Peucawo' Eun na' lah' ka mhawng' leunyeng ui' ri ka.

Peusis' a' mawo leumeus' ui' na' lah' eun mhawng' leunyeng ui' ri heun. Eun meuh beun' seubu ku' sae' caee' yeuh kan' hk'a' naee Peucawo' Eun.

¹³Ru' fas' ku' leuk ri uin' ri hk'a' naee Peucawo' Eun na' lah' eun mhawng' leunyeng ui' ri heun. Ma eun na' seun' ka ma ui' ko'.

¹⁴Asihkiotas', Hplekon', Heumes', Patrobas', Heumas' mae' ec' awng' ut' mae' ce na' lah' ce mhawng' leunyeng ui' ri ce.

¹⁵Hpi' lolokas', Yu' lia, Nere' as', awng' beun' eun Nere' as' na' eun, Olipas' mae' peue Eun Peucawo' ku' ut' mae' ce na' lah' ce mhawng' leunyeng ui' ri ce.

¹⁶Yam hk'eup' puri na', gloh' ti' puri hk'a' naee vang seunga' chak' na' reu'.

Muk kon' Hkrit Eun Hkrit na' ce tawm' a' ce lah' ri leunyeng ri pe'.

¹⁷Ec' awng' na' pe', hk'o' ui' pe' uin' sati ri ri peue yeuh pe' gvah muk gvah cum yeuh pe' seuduih' leuveul' ri na' ce. Aen' meuh a' ku' hkat' hkan leukah' sangsawn' pun pe' ri rin na' ce. Ut' seungai ce peue awn' na' reu'. ¹⁸Kopti peue awn' hpaw ce ca' yeuh mhai' Eun Cawo' Hkrit e' na' Eun. Daecti yeuh ce pun pal yawo ta' nha' ri na' meun. Ce cop' long peue cang cu ku' yeuh peue na' ce ri leukah' munngawn na'. ¹⁹Peue gawm' euc' na' pun ce ri mhawng' lawng hk'a' yum' pe' na' hawc'. Saec' ui' ri, ui' ku' ren' kawng' hk'a' naee pe' nyawk'. Daecti ui' sum' kah pe' heng' laet' hk'a' naee hk'a' chak' na', sum' kah pe' na' nga' ri hk'a' naee hk'a' rai na'.

²⁰ Un' ling' ko', Peucawo' ka hk'a' kuit nyawk' kuit sam' ran cumyen' na' kaw Eun toc' tec' Satan na' hk'a' ruim dak cung pe'.

Kah mun' sin' Eun Cawo' e' Yesu' na' kue' ri pe' reu'.

²¹ Ti' mo' se a' mawo yeuh kan' mae' ui', Lusias', Jesan' mae' Sosipahteu' ec' awng' ui' na' ce tawm' a lah' ri leunyeng ri pe'.

²² Meuh ui' Teutias' cawo' tem' htawm aen' a hot' seun' ku' Paw' lu lah' eun a, eun kah ui' tem' a na'. Ui' ku bu' leukah' leunyeng ri pe' hk'a' naee Peucawo' Eun.

²³ Gaias' ku' hpum' vah hpum' hk'o' ren' rap ri ti ui' mae' rap ri ti muk kon' Hkrit maen' na' eun ku tawm' a lah' ri leunyeng ri pe'.

E' ratas' cawo' roksa' leumuil ka veng aen' a na' eun mae' Hkeotas' ec' awng' ui' na' ka tawm' a lah' ri leunyeng ri pe'.[†]

²⁵ Maet' maen', ri Peucawo' Cawo' cang yeuh pe' cawng keutawn' ri leukah' mun' ren' kawn ui' na' mae' ri hk'a' pao' lawng Eun Yesu' Hkrit na' hot' ku' yeuh Eun e' nawk vangdoh' rui' ka ku' mo' ri tang' neum yam na' un' nang tang' a ri ²⁶ daecti maet' maen' Eun tuh' e' nyu yawng a glih' gleueng' ri htawm Seunga' tem' ce peue suip leukah' Eun Peucawo' na' ce hot' seun' leukah' tuil' Eun Peucawo' cot' cu na' Eun punta peue ceu gawm' euc' na' kaw ce pun ri yum' pun ri leuceng Eun na', ²⁷ ri Peucawo' Cawo' kue' cu' yi nyawk' ti peue yawo na' Eun, hk'o' munhpung' na' kue' ri Heun cot' cu ri Yesu' Hkrit Eun na' reu'. Amin.

[†] Nang htawm Seunga' seubu na' kue' nambat aet' 24. A lah', "Kah mun' sin' Eun Cawo' e' Yesu' na' kue' ri pe' ku peue ri reu'. Amin."

1 Kaw'rinhtu'

¹ Htawm ti ok' aen' na ko', meuh ui' Paw' lu ku' Peucawo' klawng Eun ui' meuh peue caee Eun Yesu' Hkrit hot' alo Eun Peucawo' na' mae' Sos' htenes' ec' awng' ui' na' ya.

² Ya tem' ri tuil' a ri muk kon' Hkrit Eun Peucawo' ut' nang veng Kaw'rinhtu' na' pe'. Pe' pun ri saic' ri se-unga' chak' hk'a' naee Yesu' Hkrit Eun mae' pe' pun ri klawng ri meuh peue Eun Peucawo' tiduih' mae' peue klawng muis Eun Yesu' Hkrit Cawo' ut' ku duih' na' ce. Yesu' Hkrit Eun meuh Peucawo' ce mae' Peuca-wo' e'.

³ Kah mun' sin' mae' hk'a' kuit nyawk' kuit sam' ran cumyen' lih neum Kuiing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

Mun' keuting ri Peucawo' Eun

⁴ Kopti meuh a mun' sin' Eun Peucawo' tuil' Eun a ri pe' hk'a' naee Yesu' Hkrit Eun na', ui' mun' keuting ri Peucawo' Eun pun pe' laleung. ⁵ Kopti hk'a' naee Yesu' Hkrit Eun na' pun pe' ri huk' hawn' hk'a' naee ku ceu na'. A meuh hk'a' naee hk'a' leukah' leupong pe' gawm' euc' mae' hk'a' peuyha' cu' yi pe' ku ceu na'. ⁶ Aen' a meuh kopti leukah' hkam' ui' sa' hki' lawng Eun Hkrit na' pun a ri keutawn' hk'a' naee pe' hawc' na'. ⁷ Kop awn' na yam buih ko' pe' yam Cawo' e' Yesu' Hkrit kaw Eun tang pucti lih na', pe' hkuin' kaw laee deut ri lapsawng' hk'a' civit na' saec' ti ceu. ⁸ Punta kaw pe' un' laee kue' vang ri hk'a' naee seunyi Eun Cawo' e' Yesu' Hkrit na', Eun kaw yeuh pe' keutawn' rot hk'a' naee seunyi tisut' na'. ⁹ Peucawo' kati keutawn' Eun. Eun klawng pe' ing' pawng' ri yeuh a' mawo Eun Kon' ai' ri Cawo' e' Yesu' Hkrit na' Eun.

Gvah muk gvah cum puri hk'a' naee muk kon' Hkrit

¹⁰ Ec' awng' na' pe', ui' hk'o' hk'ang pe' hk'a' naee muis Eun Cawo' e' Yesu' Hkrit na'. Kah pe' cawp' -maen puri. Pawlaee kah hk'a' naee muk pe' na' kue' hk'a' gvah muk gvah cum puri na'. Daecti kah pe' meuh

hpum' ti meul' kamkuit ti nyeng na' reu'. ¹¹ Ec' awng' ui' na' pe', peue nya ka Hkalo' e na' ce ngon' ris ce ui' mhawng' hk'a' naee muk pe' na' kue' pe' hk'a' htu' hting' puri heun' pok. ¹² Ku' sum' lah' ui' na' ko', ngon' lah' pe', "Hot' ui' Paw' lu eun", ngon' pe' lah', "Hot' ui' Apaw' lu eun", ngon' pe' lah', "Hot' ui' Petru' † eun", peue seubu ngon' na' pe' lah', "Hot' ui' Hkrit Eun."

¹³ Hkrit pun Eun ri gvah ri meuh heun' peue hawc' aw? Paw' lu pun eun ri tawk' ri yeum pang kleum' rawng' tawp' pun pe' aw? Hkam' pe' hk'a' cum' na' hk'a' naee muis eun Paw' lu aw? ¹⁴ Mun' keuting ui' ri Peucawo' Eun kopti a lawn un' meuh yawo tuil' ui' hk'a' cum' na' ri Hkris' pas' mae' Gaias' ka ko', ui' hkuin' pun ri tuil' hk'a' cum' na' ri pe' saec' ti peue. ¹⁵ Kop awn' na, a' nhaw' hkuin' kaw cang lah' ri rap ri ti hk'a' cum' na' hk'a' naee muis ui' na' saec' ti peue. ¹⁶ (Meuh, ui' ku tawn tuil' hk'a' cum' na' ri peue nya peue hk'ul' eun Satehpanas' na' ce yeut. Lheu' awn' a ko', ui' ci' tawn tuil' hk'a' cum' na' ri a' nhaw' bae na' ui' hkuin' laee pawn a.) ¹⁷ Kopti Hkrit hpaw Eun ca' cus' ui' punta kaw ui' tuil' hk'a' cum' na', daecti punta kaw ui' sangsawn' leukah' mun' ren' kawn na'. A hkuin' meuh sangsawn' a hot' hk'a' leukah' teo' nyum ka cu' yi ce peue na' meuh a kopti lhat' ri ti' ca ka kleum' rawng' tawp' Eun Hkrit na' kaw a yawm' lih na'.

Hkrit meuh Eun cu' yi mae' ti' ca Eun Peucawo'

¹⁸ Peue buih kaw lulaic heul' na' nyu ce lawng ka kleum' rawng' tawp' na' meuh lawng ku' nga'. Daecti pun peue buih kaw lawtpon na' e' nyu a meuh lawng ti' ca Eun Peucawo'. ¹⁹ Kopti tem' a ri lah' ri nang htawm Seunga' na',

"Kaw Ui' yeuh cu' yi ce peue kue' cu' yi na' lu.

Ui' kaw yeuh hk'a' heng' laet' ce peue heng' laet' na' rai' heul'." ††

²⁰ Nang kue' cu' yi na' ce ci' ut' tawngnhaw'? Nang yawng htawm na' ce ci' ut' tawngnhaw'? Nang htu' ht-ing' puri lawng cu' yi peue cu yam maet' maen' na' ce

† Nang htawm Seunga' na' ngon' a lah' "Kefas'". †† I' saya' 29:14

ci' ut' tawngnhaw' ? Peucawo' yeuh Eun cu' yi ka bhen' keute' na' nga' heul'.²¹ Kopti Peucawo' kue' Eun cu' yi heun' nyawk' na', peue bhen' keute' na' peue hkuin' cang yawng lawng Eun na' ri cu' yi ri na'. Peucawo' nyu Eun a hit' hpum' ri kaw Eun teum' kawm peue yum' na' ce lawtpon ri leukah' mun' nga' ku' sangsawn' e' na'.²² Peue Yu' da na' hk'o' ce ri nyu het' keuting. Peue Helasa' na' ce hot' ri sok cu' yi na'.

²³ Daecti e' sangsawn' leukah' mun' lawng Eun Hkrit Cawo' pun ri tawk' ri yeum pang kleum' rawng' tawp' na' Eun. Lawng aen' a meuh ku' seuduih leuveul' pun peue Yu' da na' ce. A meuh ku' nga' pun peue un' meuh peue ceu Yu' da na' ce.²⁴ Daecti pun ce peue Peucawo' klawng Eun ri ti gawm' peue Yu' da mae' peue Helasa' na' ce ko', Hkrit Eun meuh ti' ca mae' cu' yi Eun Peucawo' na'.²⁵ Kopti hk'a' nga' Eun Peucawo' na' kawm' heng' laet' a lheu' hk'ai' cu' yi ce peue na'. Hk'a' kaw' reng kloe Eun Peucawo' na' a kawm' reng keuting lheu' hk'ai' kaw' reng ce peue na'.

²⁶ Ec' awng' na' pe', yam Peucawo' klawng Eun ri ti pe' na', pe' ci' meuh peue yeuh sa' nhaw' na' kuit ri nawk a reu'. Hk'a' naee pe' ri, nang heng' laet' hk'eup' htan peuyha' cu' yi peue tang' peue ri uin' na' hpaw pe' ca' to' ri kue' heun' peue, nang kue' ti' ca na' pe' ku' hkuin' kue' heun' peue, saec' meuh nang keut' neum peue htan lhung' na' pe' ku' hkuin' kue' heun' peue yeut.²⁷ Daecti punta peue heng' laet' na' kaw ce pun ri kaic na', Peucawo' Eun leuk ri ti ku' bhen' keute' na' sawn' ka a meuh ku' nga' na'. Punta peue kaw' reng keuting na' kaw ce pun ri kaic na', Peucawo' Eun leuk ri ti ku' bhen' keute' na' sawn' ka a meuh ku' kaw' reng kloe na'.²⁸ Punta Peucawo' kaw Eun yeuh ku' bhen' keute' na' sawn' ka a meuh vahtu' hk'il' leumuil na' lulaic heul' na', Eun leuk ri ti ku' bhen' keute' na' sawn' ka a meuh ku' tem nyawk', meuh ku' un' nawpsang ka na' mae' meuh ku' un' kue' peue-hot' na'.²⁹ Aen' meuh a punta a' nhaw' hkuin' kaw laee cang mhawng' ri hk'o' cuin nanggal' Eun Peucawo' na'.³⁰ Kopti meuh a Peucawo' Eun, pe' pun ri ut' hk'a' naee Yesu' Hkrit Cawo' meuh cu' yi neum Peucawo' Eun pun e' na' Eun. Aen' a meuh hk'a' leupaws seumeu', hk'a' seunga' chak' mae' hk'a' htut lawtpon e' na'.³¹ Kop awn' na, seun' ku' tem' a ri nang htawm Seunga' na', "A' nhaw' lawn sum' mhawng' ri hk'o' cuin ko', mhawng' ri hk'o' cuin hk'a' naee Peucawo' Eun reu'."†

2 Ec' awng' na' pe', yam ing' ui' ri pe' na', ui' hkuin' to' ri ing' pao' lawng leukah' sa' hki' Eun Peucawo' na' ri pe' ri leukah' munngawn na', a' ko' ri

leukah' kue' cu' yi keuting na'.² Kopti yam kawm' ut' ui' mae' pe' na', tang' ui' hpum' ri a lawn un' meuh yawo lawng Eun Yesu' Hkrit na' mae' lawng hkam' Eun ri yeum pang kleum' rawng' tawp' na' ko', ui' hkuin' yawng ku' seubu na' saec' ti ceu.³ Ing' ui' ri pe' mae' kaw' reng kloe lhat' keuyuing' ruing ri nyawk'.⁴ Leukah' ui' na' mae' leukah' mun' sangsawn' ui' na' hpaw a ca' meuh leukah' ol' ri ti hpum' pe' na' ri cu' yi na', daecti meuh a ku' kaw yeuh ti' ca ka Cit' seunga' chak' na' pucti lih.⁵ Aen' meuh a punta hk'a' yum' pe' na' kaw a un' cu' yi ce peue na', daecti a kaw cu' ti' ca Eun Peucawo' na'.

Cu' yi lih neum Cit' seunga'

⁶ Saec' yeuh sa' nhaw', lah' e' leukah' cu' yi na' ri peue heng' keuting na' ce hawc'. A hkuin' meuh cu' yi ce peue cu aen' na, a ku' hkuin' meuh cu' yi ce cawo' u' peung cu maet' maen' ku' kaw lulaic heul' na' ce.⁷ Daecti e' lah' lawng cu' yi vangdoh' rui' Eun Peucawo' na'. A meuh cu' yi ku' Peucawo' hkvat' mo' Eun ri uin' a pun munhpung' e' tang' neum yam bhen' keute' na' un' nang pun a ri hpanpleng' ri na'.⁸ Cawo' u' peung cu yam maet' maen' na' ce hkuin' kue' nang leuceng pun cu' yi aen' a saec' ti peue. Kopti ce lawn na' leuceng pun a ko', ce hkuin' kaw duing tawk' Cawo' munhpung' keuting na' Eun pang kleum' rawng' tawp' na'.⁹ Seun' ku' tem' a ri nang htawm Seunga' na', "Ku' un' duing nyu ri ngai' ri na', ku' un' duing mhawng' ri yhuk' ri na' mae' ku' un' duing kuit rot ri ka nang hpum' ri na' meuh a ku' Peucawo' rangraen Eun ri uin' pun peue ku' ce leumeus' Eun na' ce."††¹⁰ Daecti Peucawo' Eun tuh' e' nyu ceu nang aen' ce ri Cit' seunga' ri na'.

Cit' seunga' na' eo' sok a ri nyu ku' ceu na'. Saec' meuh ku' vangdoh' rui' Eun Peucawo' na', a ku' sok ri nyu a yeut.¹¹ Seun' kamkuit eun peue na' a' nhaw' hkuin' yawng a, a lawn un' meuh yawo cit' eun na' meun ko', kamkuit Eun Peucawo' na' a' nhaw' ku' hkuin' yawng a, a lawn un' meuh yawo Cit' seunga' Eun na' meun ko'.¹² Punta kaw e' leuceng pun ku' Peucawo' tuil' Eun ri e' a un' laee kue' vang sut' vang euc' na', hpaw e' ca' pun ri rap ri ti cit' ka bhen' keute' na', daecti pun e' ri rap ri ti Cit' seunga' lih neum Peucawo' Eun na'.¹³ Yam lah' e' lawng aen' ce na', e' hkuin' lah' leukah' lih neum cu' yi peue na', daecti lah' e' leukah' ku' Cit' seunga' tuil' ka ri e' na'. Aen' a meuh lah' e' lawng ka Cit' seunga' na' ri peue kue'

† Yerami' 9:24

†† I' saya' 64:4

Cit' seunga' na' ce.¹⁴ Peue un' kue' Cit' seunga' na' ce hkuin' cang rap ri ti ku' lih neum Cit' seunga' Eun Peucawo' na' pun, kopti nyu ce a meuh ku' nga' na'. Ce hkuin' cang leuceng ceu nang aen' ce pun, kopti punta kaw ce cang leuceng ceu nang aen' ce pun na', a kah ri lo' hk'a' hkvét' gvah hk'a' civit na'.¹⁵ Peue ut' hk'a' - naee hk'a' civit na' cang caet eun ri nawk ku ceu na' pun, daecti a' nhaw' hkuin' cang caet ri nawk lawng eun na' pun.

¹⁶ "Kopti a' nhaw' ci' yawng hpum' Eun Peucawo' na' ?

A' nhaw' ci' kaw cang sangsawn' Peucawo' Eun?" †
Daecti e' ri, kue' e' hpum' Eun Hkrit na'.

Gvah muk gvah cum puri hk'a' naee muk kon' Hkrit

3 Ec' awng' na' pe', ui' hkuin' kaw cang leukah' mae' pe' seun' leukah' ui' mae' peue ut' hk'a' naee hk'a' civit na' ce, daecti ui' kaw kah ri leukah' mae' pe' seun' leukah' ui' mae' peue ut' hk'a' naee hk'a' nham' keune na' ce mae' seun' meuh pe' o' ngak hk'a' naee Hkrit Eun na'.² Uii' ui' pe' ri leuum' pui na'. Ui' hkuin' uii' pe' ri ku' hk'a' cen' na' kopti nanggal' aen' na un' nang hueng' pe' ku' hk'a' cen' na'. Neumneum ka na' ko', pe' ta hkuin' nang hueng' a rot maet' maen'.³ Kawn' ut' pe' hk'a' - naee hk'a' nham' keune na', kopti hk'a' naee muk pe' na' kawn' kue' pe' hk'a' hkoé' mang' na' mae' hk'a' kleuc' leumeul puri na'. Kopti meuh a awn' a na', pe' kawn' ut' hk'a' naee hk'a' nham' keune na', un' meuh ka aw? Pe' kawn' yeuh seun' peue sum' hpap na' ce, un' meuh ka aw? ⁴ Kopti pe' ri ti ri peue yam lah' eun, "Meuh ui' ta' pae' eun Paw' lu", ngon' ti ri peue eun lah', "Meuh ui' tapae' eun Apaw' lu", kawn' meuh pe' peue sum' hpap yawo, un' meuh ka aw?

⁵ Apaw' lu eun ci' meuh a' nhaw' ? Paw' lu eun ci' meuh a' nhaw' ? Gum meuh ya mhai' va pe' ing' yum' hot' beus ku' Peucawo' sawng' tuil' Eun ri ya na'.

⁶ Meuh ui' nang jheum' a, Apaw' lu eun meuh nang lhuik' a. Daecti Peucawo' Eun meuh nang yeuh a keuting.⁷ Kop awn' na, nang jheum' na' eun a' ko' nang lhuik' na' eun ka hkuin' a' ye' keuting. Daecti Peucawo' Cawo' yeuh a keuting na' a' ye' keuting Eun.

⁸ Nang jheum' na' eun mae' nang lhuik' na' eun vang keutui' hpum' ka na' meuh a keuhti. Ka kaw pun lapsawng' na' hot' seun' kan' ku' sawng' yeuh ka na'.

⁹ Kopti meuh ya nang yeuh kan' Eun Peucawo' na' tiduih'. Pe' ri, pe' meuh mal' Eun Peucawo' mae' pe' meuh nya Eun Peucawo' na'.

¹⁰ Kopti meuh a mun' Peucawo' tuil' Eun ri ui' na', ui' pun ri tang' kleum' ka nya na' hawc' seun' a meuh ui' nang chanan pleng' nya ko'. Peue seubu na' ce ing' go' hk'a' pang ka kleum' awn' na huk'. Daecti a kaw go' ri yeuh sa' nhaw' na' sawng' uin' sati ri reu'.

¹¹ Kopti a lawn un' meuh yawo kleum' tang' ri uin' ri hawc' awn' na ko', a' nhaw' hkuin' kaw cang ing' tang' a is' kleum' seubu na' bae. Kleum' tang' ri uin' ri awn' a meuh Yesu' Hkrit Eun.¹² A' nhaw' lawn go' kleum' awn' a huk' ri hk'il', leumuil, seumu seng', hku', plawng', a' ko' peung,¹³ kan' ku' yeuh eun na' a kaw pucti lih glih' gleueng'. Kopti hk'a' naee seunyi awn' na, kan' ku' yeuh eun na' a kaw tuh' ri glih' - gleueng' ri ngawl na'. Ngawl na' a kaw caet ri nawk kan' ku' yeuh peue na' ti peue hawc' ti peue.¹⁴ Ku' go' eun huk' na' a lawn keutawn' ko', eun kaw pun lapsawng' ri na' meun.¹⁵ Ku' go' eun na' a lawn ha' hk'ue euc' ko', eun kaw sum lapsawng' ri na', daecti tu' eun na' a kaw lawtpon. Daecti a kaw seun' lawtpon hk'ai' ngawl na' ko'.

¹⁶ Un' yawng pe' a aw? Meuh pe' nya hk'o' mun' Eun Peucawo', Cit' seunga' Eun Peucawo' na' a ut' hk'a' - naee pe'.¹⁷ A' nhaw' lawn yeuh nya hk'o' mun' Eun Peucawo' na' lu ko', Peucawo' Eun kaw yeuh hkawn' eun lu. Kopti nya hk'o' mun' Eun Peucawo' na' seunga' chak' ka. Pe' ri, pe' meuh nya hk'o' mun' awn' a.

¹⁸ Pawlaee chi' lai tu' ri na' meun. Hk'a' naee pe' ri ti ri peue, a' nhaw' lawn mhawng' ri heng' laet' hot' htan cu maet' maen' na' ko', punta kaw eun meuh peue heng' laet' na', kaw eun kah ri meuh "peue nga'".¹⁹ Kopti cu' yi ka bhen' keute' aen' meuh a ku' nga' ri sai' ngai' Eun Peucawo', hot' seun' ku' tem' a ri hk'a' - naee htawm Seunga' na' ko', "Peucawo' mheut' Eun ri ti peue heng' laet' na' ce ri hk'a' vok' ce na' meun."

²⁰ Hk'a' naee htawm Seunga' ton seubu na' a ku' tem' ri, "Peucawo' yawng Eun kamkuit ce peue heng' laet' na' meuh a ku' hk'o' hk'awng'".²¹ Kop awn' na, pawlaee mhawng' ri hk'o' cuin ri yuk peue lhung' na' bae. Ku' ceu gawm' euc' na' meuh a is' pe'.²² Paw' lu eun, a' ko' Apaw' lu eun, a' ko' Petru' eun, a' ko' bhen' keute' na', a' ko' a' yu na', a' ko' hk'a' yeum na', a' ko' cu yam maet' maen' na', a' ko' hk'a' nanggal' na', a' ko' aen' ce gawm' euc' meuh a is' pe'.²³ Pe' meuh is' Eun Hkrit, Hkrit Eun meuh is' Eun Peucawo'.

Peue caee Eun Hkrit

4 Kop awn' na, peue na' htuk' ri sawn' e' meuh mhai' Eun Hkrit. Peue na' htuk' ri sawn' e' meuh

† I' saya' 40:13

†† Yaw' ba' 5:13 ‡ Suk' seun' 94:11

nang rokxa' ku' rui' Eun Peucawo' na'.²Peue rokxa' na' kah eun ri yeuh meuh ri peue kati keutawn' na' pucti lih.³Pe' ri, a' ko' a sum' na' meuh a' nhaw', pe' lawn taws' a' mu ri ui' ko', ui' hkuin' seue' a nang hpum' ri. Neumneum ka na' ko', saec' meuh tu' ui' na' meun, ui' hkuin' taws' a' mu ri ti.⁴Hpum' cang yawng ui' na' hpaw a ca' tang' ui' yeuh ku' kleuc'. Daecti ceu nang aen' ce a hkuin' to' ri lah' ui' cawp'. Cawo' Peucawo' kaw Eun meuh nang taws' a' mu ui'.⁵Kop awn' na pawlaee nang kuit a deut nanggal' yam ka na' un' nang rot ka na', ko' a rot ri yam Peucawo' kaw Eun lih rot na' reu'. Peucawo' kaw Eun hue' ku' mo' ri vang duim' lawng na' lih vang ceng' na'. Eun kaw tuh' kamkuit ut' nang hpum' peue na' pucti lih. Yam awn' na, peue kaw pun ri rap ri ti hk'a' Peucawo' suk' seun' Eun ri na' kuing' hpaw mae' ku' yeuh ri na' ku peue ri.

⁶Ec' awng' na' pe', lah' ui' pe' mhawng' lawng ui' na' mae' lawng eun Apaw' lu na' meuh a punta kaw a kue' peuehot' pun pe'. Aen' a meuh punta kaw pe' rin ri ti vangdoh' ka ku' lah' ka nang htawm Seunga' na' ri ya. A lah', "Pawlaee yeuh a pon lheu' ku' tem' a ri uin' ri na'." Yeuh a keutit' na' ko', pe' hkuin' kaw laee tang' ti peue eun lhung' tang' ti peue eun tem.⁷Kopti a' nhaw' ci' pleng' pe' chat peue ri? Ku' kue' pe' na' pun pe' a neum Peucawo' Eun. Ku' kue' pe' na' a lawn meuh ku' pun pe' neum Peucawo' Eun ko', a ci' yeuh keunhaw' pe' vae' mhawng' ri hk'o' cuin seun' un' pun pe' a neum Peucawo' Eun ko'?

⁸Pe' caee' koe kue' ku' lo' ri na' ku ceu ka euc' hawc' aw'? Pe' caee' koe meuneum hawc' aw'? Ya saec' un' pa' pe', pe' ku caee' koe meuh cawo' hawc' aw'? Punta kaw ya meuh cawo' tiduih' mae' pe' na', ui' ca' lak' sum' kah pe' meuh cawo' neumneum.⁹Kopti nyu ui' Peucawo' Eun uin' peue caee Eun Hkrit na' ya vang tisut' ka na' seun' peue kaw pun ri yeum eun hawc' taws' a' mu ri na' eun ko'. Ya meuh ku' hk'o' sum' keunyas ri sa' hpahta' ku ceu na', ri in' hpom na' ce mae' ri peue na' ce.¹⁰Ya meuh peue nga' pun Hkrit Eun, daecti pe' meuh peue heng' laet' hk'a' naee Hkrit Eun. Ya kaw' reng kloe, pe' kaw' reng keuting. Pe' kue' munhpung', ya un' kue' munhpung'.¹¹Rot maet' maen', ya ngeup' ku' hk'a, sum' nyui leuum', cut hk'ohk'eung, pun ri hkam' hk'a' ta' faet' na' mae' un' kue' vang ut'.¹²Ya yeuh kan' seucen ri ti' ri na' meun. Yam pun ya ri hkam' hk'a' jha' na', ya nap mun'. Yam pun ya ri hkam' hk'a' keunhap' nokneh na', ya yeun' hkam a.¹³Yam pun ya ri hkam' tang' peue ku' kleuc' ri ti na', ya lah' ris ce mhawng' a hk'a' naee hpum' onawn' ri. Rot maet' maen', ya seun' ku'

hk'aw' jeuk ka bhen' keute' na'. Ya meuh hpam' ka lok na'.

¹⁴A hkuin' caee meuh sum' kah ui' pe' kaic, ui' tem' a yeuhki'. Daecti punta kaw ui' tuil' sati pe' seun' meuh pe' kon' leumeus' ui' na'.¹⁵Pe' saec' na' kue' nang sangsawn' lawng Eun Hkrit na' ri pe' hk'o' timhuin' peue ko', daecti kue' pe' kuing' ti peue. Kopti hk'a' naee Yesu' Hkrit Eun, pun ui' ri meuh kuing' pe' ri leukah' mun' ren' kaw na'.¹⁶Kop awn' na, ui' hk'o' pe' hot' ri yeuh seun' ku' yeuh ui' na'.¹⁷Meuh a kopti awn' na, ui' cus' Ti' mo' se kon' leumeus' ui' ku' kati keutawn' hk'a' naee Peucawo' Eun na' eun heul' ri pe'. Aen' a meuh punta kaw eun tuil' sati pe' ri kaw pe' kuit rot ri hk'a' a' yu im' ui' hk'a' naee Yesu' Hkrit Eun na'. A' yu im' ui' hot' seun' ku' sangsawn' ui' ri muk kon' Hkrit ku duih' na' ce.

¹⁸Peue hk'a' naee pe' na' ce ngon', ce mhawng' ri hk'o' cuin seun' kaw ui' un' laee ing' ri pe' ko'.

¹⁹Daecti a lawn cawp' alo Eun Peucawo' ko', un' ling' na' ui' tang ing' ri pe'. Yam awn' na, a hkuin' kaw meuh kaw ui' pun ri yawng ku' lah' ce peue hpum' keuting awn' na palkoe, daecti ui' ku kaw pun ri yawng ti' ca kue' ce na' yeut.²⁰Kopti kuing' Eun Peucawo' na' un' meuh a lawng leukah', daecti a meuh lawng ti' ca.

²¹Pe' ci' nyu keunhaw' a htuk' hpum' ri. Sum' kah pe' ui' ti hku' ta' veut ing' aw, a' ko' ing' mae' hk'a' leumeus' keus mae' hpum' onawn' ri aw?

Ra ri tec peue hkuit' nawng' tang'

5 Pun ui' ri mhawng' lawng peue hk'a' naee pe' na' yeuh eun ku' kleuc' hkuit' nawng' tang' ku' peue un' yum' na' ce ku hkuin' duing yeuh a na'. Peue tit' eun ti beun' eun kuing' ri na' eun meuh beun' ri.²A saee' meuh htan' aen' na, pe' vae' kaw' meung mhawng' ri hk'o' cuin. Htuk' pe' ri hpum' lu un' mak' laee yeuh a' mawo eun peue yeuh keutit' na' eun, un' meuh ka aw?³Tu' ui' na' a saec' un' ut' mae' pe', daecti hpum' ui' na' ut' a mae' pe' yeut. Pun ui' ri taws' a' mu ri peue yeuh keutit' na' eun seun' ut' ui' mae' pe' ko'.⁴Yam hk'om pe' puri hk'a' naee muis Eun Cawo' e' Yesu' na', hpum' ui' na' mae' ti' ca Eun Cawo' e' Yesu' na' a ku ut' mae' pe' yeut.⁵Punta civit eun peue awn' kaw a pun hk'a' htut lawtpon na' hk'a' naee seunyi Eun Cawo' e' Yesu' na', ap Satan na' yeuh hk'a' nham' keune eun na' lulaic reu'.

⁶Mhawng' pe' ri hk'o' cuin na' a hkuin' chak'. Yeuh map' yeuhki' na' seun' a paeng na' ko'. Paeng kue' peunae' jhaec' na' cang yeuh a hkawomun' na' bing' gawm' meul' ri.⁷Punta kaw pe' pun ri meuh hkawom-

un' hk'u' un' kue' paeng seun' ku' buih meuh pe' na', saic' ri tec paeng hk'im' na' reu'. Kopti Hkrit Cawo' meuh kon'yung' aet' ka pawe vel nya e' na' pun Eun ri hkam' ri tan ri hawc' na'.⁸ Kop awn' na, pawlaee kah e' jhawp' pawe aen' na ri paeng hk'im' ku' meuh paeng ka ku' rai ku' hk'aw' jeuk na', daecti kah e' jhawp' a ri hkawomun' un' kue' paeng ku' meuh hkawomun' ka hk'a' seunga' chak' mae' hk'a' neumneum na' reu'.

⁹Ui' tem' htawm ri pe' un' kah pe' yeuh a' mawo ce peue hkuit' nawng' tang' na' ce.¹⁰Daecti hpaw ui' ca' lah' peue bhen' keute' hkuit' nawng' tang' na' ce, a' ko' peue law' hpa keuting chi' lai ri hk'a, a' ko' peue fae' ruphtu na' ce. Yeuh keutit' na' ko', pe' ku kaw pun ri pucti heul' hk'ai' bhen' keute' aen' na yeut.

¹¹Daecti ku' tem' ui' ri pe' maet' maen' na' punta kaw ui' lah' a ri pe' un' kah pe' yeuh a' mawo ce peue lah' meun ri meuh ec' awng' daecti ce kaw' yeuh hk'a' hkuit' nawng' tang' na', a' ko' kaw' law' hpa keuting, kaw' fae' ruphtu na', a' ko' kaw' ren' mae' saesawm' peue na', yuic' ri plai', a' ko' chi' lai ri hk'a peue na'. Peue yeuh keutit' na' ce ko', saec' meuh som' yawo mae' ce na', pawlaee som'.

¹²Kan' taws' a' mu ri peue ut' hk'a' nok ce muk kon' Hkrit na' ce, hpaw a ca' meuh kan' ui'. Kaw pe' pun ri taws' a' mu ri peue ut' hk'a' naee muk pe' na' ce, un' meuh ka aw?¹³Peucawo' kaw Eun taws' a' mu ri peue ut' hk'a' nok ce muk kon' Hkrit na' ce. Nang htawm Seunga' na' a lah', "Ra ri tec peue rai na' ce pucti heul' hk'ai' muk pe' na' reu'."†

A' mu hk'a' naee muk ce peue yum' na'

6 Hk'a' naee muk pe' na' ngon' pe' lawn yeuh a' mu ri puri ko', hat' pe' ri yeuh a' nanggal' ce peue un' leupaws seumeu' na', pe' un' yeuh a' nanggal' ce peue Eun Peucawo' na' aw?²Un' yawng pe' peue Eun Peucawo' na' kaw ce taws' a' mu ri peue bhen' keute' na' ce aw? Pe' lawn na' meuh nang taws' a' mu ri peue bhen' keute' na' ce ko', kaw pe' un' cang taws' a' mu aet' aet' aen' ce aw?³Un' yawng pe' kaw e' taws' a' mu ce in' hpom na' aw? Yeuh keutit' ko', e' jaen kaw cang taws' a' mu ri lawng ka a' yu aen' na.⁴Kop awn' na, pe' lawn yeuh a' mu ri puri lawng aen' na ko', kaw pe' tang' peue muk kon' Hkrit sawn' pe' eun meuh nang un' kue' munhpung' na' eun meuh nang taws' a' mu ri pe' aw?⁵Lah' ui' a yeuh keutit' na' meuh a punta kaw pe' kaic ri ti meun. Hk'a' naee pe' ri, un' kue' pe' nang kue' cu' yi kaw cang taws' a' mu ri

ec' awng' ku' yeuh a' mu ri puri na' ka aw?⁶Daecti ec' awng' na' heul' taws' ka a' mu ri na' nanggal' ce peue un' yum' na' ce aw?

⁷Neumneum ka na' ko', yeuh pe' a' mu ri puri hk'a' naee muk pe' na' vangdoh' ka na' meuh pe' nang sum hawc'. A ci' meuh kop keunhaw' pe' vae' un' yawm' ri hkam' hk'a' hkvi peue ri na'? A ci' meuh kop keunhaw' pe' vae' un' yawm' ri hkam' hk'a' chi' lai peue ri hk'a ri na'?⁸Daecti meuh pe' nang chi' lai ri hk'a peue meun, meuh nang hkvi peue meun. Pe' yeuh ceu nang aen' ce ri ec' awng' ri na' ce.

⁹Un' yawng pe' peue rai na' kaw ce un' pun ri lec hk'a' naee kuing' Eun Peucawo' na' aw? Pawlaee va ri kleuc' hk'a' ri. Peue hkuit' nawng' tang', a' ko' peue fae' ruphtu, a' ko' peue len' cu, a' ko' me paing' ri, a' ko' me it' mae' me beun' it' mae' beun',¹⁰a' ko' peue ra, a' ko' peue law' hpa keuting, a' ko' peue yuic' ri plai', a' ko' peue saesawm' peue, a' ko' peue chi' lai ri hk'a peue na' kaw ce un' pun ri lec hk'a' naee kuing' Eun Peucawo' na'.¹¹Pe' ri ngon', pe' ku tawn meuh peue yeuh keutit' yeut. Daecti pun pe' ri saic', pun pe' ri yeuh ri seunga' hawc'. Pe' pun ri sawn' ri meuh peue leupaws seumeu' hk'a' naee muis Eun Cawo' Yesu' Hkrit mae' hk'a' naee Cit' seunga' Eun Peucawo' e' na' Eun hawc'.

Tuil' munhpung' Eun Peucawo' na' ri tu' pe' na'

¹²Pun ui' ahkvang kaw yeuh ku ceu na' pun, daecti ku ceu na' ce a' hkuin' pe' kue' mun' gawm' euc'. Pun ui' ahkvang kaw yeuh ku ceu na' pun, daecti ui' hkuin' yawm' ri meuh mhai' ka saec' ti ceu.¹³Ku' hk'a na' meuh a pun ka keuteul na', keuteul na' a meuh pun ka ku' hk'a na', daecti Peucawo' Eun kaw yeuh a lulaic heul' gawm' lal' ceu ka. Jawngkui' tu' na' a hkuin' meuh pun ka hk'a' hkuit' nawng' tang' na', daecti meuh a pun Eun Cawo' Yesu'. Cawo' Yesu' Eun ku meuh pun jawngkui' tu' na'.¹⁴Seun' Peucawo' yeuh Eun Yesu' Eun tang kuh' im' na', Eun ku kaw yeuh e' tang kuh' im' ri ti' ca ri na' yeut.¹⁵Un' yawng pe' tu' ri na' meuh a hk'eung ka tu' Eun Hkrit na' aw? Yeuh keutit' ko', ui' kaw htuk' ri ti hk'eung Eun Hkrit na' heul' pawng' a meuh yawo keuhti mae' beun' paing' ri na' ce aw? Un' htuk' ri meuh.¹⁶Un' yawng pe' peue it' mae' beun' paing' tu' ri na' meuh eun jawngkui' tu' keuhti yawo mae' beun' awn' eun aw? Kopti nang htawm Seunga' na' tem' a ri, "Kaw ka meuh yawo jawngkui' tu' keuhti."^{††}Daecti peue pawng' tu' meun

† Sawn' leukah' mun' 17:7; 19:19; 21:21; 22:21, 24; 24:7

†† Yamla 2:24

ri na' meuh keuh ti mae' Cawo' Yesu' Eun na' meuh ce cit' keuh ti yawo mae' Yesu' Eun.

¹⁸ Vel hk'a' hkuit' nawng' tang' na' reu'. Map' seubu yeuh peue gawm' euc' na' meuh a map' hk'a' nok ka jawngkui' tu' na'. Daecti peue yeuh map' ka hk'a' hkuit' nawng' tang' na' a meuh yeuh eun map' ri jawngkui' tu' ri na' meun. ¹⁹ Un' yawng pe' jawngkui' tu' pe' na' meuh a nya hk'o' mun' ka Cit' seunga' chak' ku' ut' hk'a' naee pe' ku' pun pe' ri rap ri ti neum Peucawo' Eun na' aw? Hpaw pe' ca' meuh cawo' ka jawngkui' tu' ri na' meun. ²⁰ Peucawo' leuvae Eun ri ti pe' ri ngos heun' nyawk' na' hawc'. Kop awn' na, tuil' munhpung' ri Peucawo' Eun ri jawngkui' tu' pe' na' reu'.

Ti beun' ti me

7 Sum' tem' ui' ri top' lai tuil' pe' ri ui' na' yeuhki', me na' eun lawn na' un' klawo' beun' ko', na' a chak'. ² Daecti kopti lheu' a ri hk'a' hkuit' - nawng' tang' na', me na' ce htuk' ri sawng' ti ri is' beun' ku peue ri. Beun' na' ce ku htuk' ri sawng' ti ri is' me ku peue ri. ³ Me na' eun htuk' ri yeuh ku' htuk' eun ri yeuh ri beun' ri na' eun htonnuk. Seun' awn' na, beun' na' eun ku na' htuk' ri yeuh ku' htuk' eun ri yeuh ri me ri na' eun htonnuk yeut. ⁴ Jawngkui' tu' eun beun' na' a hkuin' meuh is' heun palkoe, daecti a ku meuh is' eun me eun na' yeut. Seun' awn' na, jawngkui' tu' eun me na' a ku hkuin' meuh is' heun palkoe, daecti a ku meuh is' eun beun' eun na' yeut. ⁵ A lawn un' meuh yawo hk'o' mun' kam' jawngkui' tu' ri sahpaw' ri un' it' tiduih' ti vut ti yam na' ko', pawlaee ham' hk'a' it' tiduih' na. Punta Satan na' kaw a un' cang cop' long ri pun pe' yeuh ku' kleuc' na' kopti un' pe pe' tu' ri na', hawc' kam' pe' jawngkui' tu' ri na', tang it' tiduih' reu'. ⁶ Lah' ui' a yeuhki' na', meuh a tuil' ui' ahkvang ka, a hkuin' meuh tuil' ui' leukah'. ⁷ Sum' kah ui' peue seun' ui' ri gawm' euc', daecti lapsawng' pun e' ri Peucawo' Eun na' ti peue hawc' ti peue un' seun' a puri. Ti peue eun pun lapsawng' aen' na, ku' seubu ti peue na' eun pun lapsawng' teh' a.

⁸ Pun nang un' nang ti ri is' beun' is' me na' mae' peue seunao na' pe', lah' ui' pe' na' un' ti ri is' beun' seun' ui' ri a na' chak'. ⁹ Daecti pe' lawn un' cang pe tu' ri na' meun ko', pe' na' htuk' ri ti ri is' beun' is' me, kopti ti ri is' beun' is' me na' a jaen na' chak' hk'ai' hpum' ha' ron pe' ri kopti hkuit' nawng' tang' pe' na'.

¹⁰ Pun peue ti ri is' beun' is' me na' pe', tuil' ui' leukah' ri pe' (a hkuin' meuh leukah' tuil' ui', a meuh

leukah' tuil' Eun Peucawo'), beun' na' pawlaee hk'ak-cak' me ri. ¹¹ Daecti eun lawn hk'akcak' me ri na' eun ko', eun hkuin' kaw kah ri ti ri is' me hk'u'. Un' meuh ko', eun kaw kah ri ti me hk'im' ri na' eun. Saec' meuh me na', eun ku hkuin' kaw kah ri tec beun' ri na' eun.

¹² Ui' lah' a ri peue seubu na' ce (a hkuin' meuh leukah' Eun Peucawo'), ec' awng' ti ri peue beun' eun na' eun lawn un' meuh kon' Hkrit daecti eun kue' hpum' sum' ut' mae' me ri na' eun ko', me na' eun hkuin' kaw kah ri tec beun' awn' eun. ¹³ Saec' meuh beun' na' me eun na' eun lawn un' meuh kon' Hkrit daecti eun kue' hpum' sum' ut' mae' beun' ri na' eun ko', beun' na' eun hkuin' kaw kah ri tec me awn' eun. ¹⁴ Kopti me un' meuh kon' Hkrit na' pun eun ri saic' ri seunga' chak' ri beun' ri na' eun hawc' na'. Beun' un' meuh kon' Hkrit na' eun ku pun ri saic' ri seunga' chak' ri me meuh kon' Hkrit na' eun hawc'. A lawn un' yeuh keutit' ko', kon' ka na' ce kaw meuh peue hk'aw' jeuk. Daecti kon' aen' seunga' chak' ce hawc'.

¹⁵ Daecti peue un' meuh kon' Hkrit na' eun lawn hk'ak-cak' heul' ko', tae' eun reu'. Aen' a ko', beun' meuh kon' Hkrit a' ko' me meuh kon' Hkrit na' eun hkuin' kaw laee pun ri hkam' ri mawt ri mae' peue un' meuh kon' Hkrit na' eun bae. Peucawo' klawng Eun e' ut' hk'a' naee hk'a' cumyen' na'. ¹⁶ Beun' na' pe', un' yawng pe' kaw ri cang teum' kawm me ri na' ce pun hk'a' htut lawtpon na' aw? Me na' pe', un' yawng pe' kaw ri cang teum' kawm beun' ri na' ce pun hk'a' htut lawtpon na' aw?

¹⁷ Saec' yeuh sa' nhaw', pe' ri ti peue hawc' ti peue a' yu im' hot' seun' ku' tawn meuh pe' na' mae' seun' ku' Peucawo' sum' kah Eun pe' meuh yam klawng Eun ri ti pe' na' reu'. Aen' meuh a ritroe tang' ui' ri uin' a ri muk kon' Hkrit gawm' euc' na' ce. ¹⁸ Me ti ri peue na' eun lawn pun hk'a' Peucawo' klawng Eun ri ti ri yam hawc' eun ton' duing' hak' ri na' ko', htuk' eun ri un' yeuh roe ka ton' duing' hak' na' rai'. Me ti ri peue na' eun lawn pun hk'a' Peucawo' klawng Eun ri ti ri yam un' nang ton' eun duing' hak' ri na' ko', htuk' eun ri un' ton' duing' hak' ri na'. ¹⁹ Kopti a' ye' keuting ka na' hpaw a ca' ut' ri ton' duing' hak' ri, a' ko' un' ton' duing' hak' ri na'. Daecti ut' a ri rok' sa' e' leukah' tuil' Eun Peucawo' na'. ²⁰ Pe' ri ti peue hawc' ti peue cu ri meuh seun' ku' meuh pe' yam Peucawo' klawng Eun ri ti pe' na' reu'. ²¹ Yam Peucawo' klawng Eun ri ti pe' na' meuh pe' mhai' aw? Hpaw a ca' yeuh keunhaw'. Daecti pe' lawn kaw cang yeuh meun ri meuh peue pon ko', yeuh a reu'. ²² Kopti ku' Peucawo' klawng

Eun ri ti eun yam kaw'n' buih meuh eun mhai' na', meuh eun peue pon Eun Peucawo'. Seun' awn' na, peue meuh peue pon yam Peucawo' klawng Eun ri ti ri na' meuh eun mhai' Eun Hkrit. ²³ Hkrit leuvaee Eun ri ti mi ri ngos he-un' nyawk' na'. Pawlaee meuh mhai' ce peue na' bae. ²⁴ Ec' awng' na' pe', yam Peucawo' klawng eun ri ti pe' na' pe' lawn meuh yeuh sa' nhaw' ko', cu ri meuh yeuhko' reu'.

Peue un' nang ti ri is' beun' is' me

²⁵ Pun ce peue un' nang sang' nya ri na', hpaw ui' ca' pun leukah' neum Peucawo' Eun. Daecti kaw ui' tuil' kamkuit pe' ri hk'a' naee meuh ui' peue pun ri rap ri ti hk'a' tukyak Eun Peucawo' na' Eun tuil' ui' meuh peue hk'o' yum'. ²⁶ Kopti meuh a hk'a' tukhka buih meuh maet' maen' na', ui' kuit pe' na' htuk' ri meuh seun' ku' buih meuh pe' maet' maen' na', a na' chak'. ²⁷ Kue' mi beun' hawc' aw? Pawlaee sok hk'a' kaw ri tec beun' ri na' eun. Un' nang ti mi ri is' beun' aw? Pawlaee sok ri is' beun'. ²⁸ Daecti ti mi ri is' beun' na', a hkuin' to' meuh map'. Beun' un' nang sang' nya ri na' ce saec' na' ti ri is' me ko', a ku hkuin' to' meuh map'. Daecti peue ti ri is' beun' is' me na' kaw ce lheu' ri ku' kuit nyhap' heun' ceu hk'a' naee vang a' yu im' ce na'. Ui' sum' kah pe' lawtpon hk'ai' ceu nang aen' ce.

²⁹ Ec' awng' na' pe', vangdoh' ka ku' sum' lah' ui' na' meuh a yam na' dot' ka hawc'. Tang' neum maet' maen' na', peue kue' beun' na' htuk' ce ri a' yu im' seun' meuh ri nang un' kue' beun' ko'. ³⁰ Peue mhong' mhil' na' yeuh ri a' yu im' seun' un' mhong' mhil' ri ko'. Peue ren' kaw'n na' yeuh ri a' yu im' seun' un' ren' kaw'n ri ko'. Peue leuvaee na' yeuh ri a' yu im' seun' un' meuh ri cawo' ko'. ³¹ Peue lo' hk'eung ka bhen' keute' na' yeuh ri a' yu im' seun' un' pun ri ri lo' a htonnuk ko'. Kopti ku' buih meuh ka bhen' keute' na' buih pon ka heul'.

³² Sum' kah ui' pe' lawtpon hk'ai' ku' kuit nyhap' kuit yak na'. Peue un' ti ri is' beun' na' katcin ce ri kan' Eun Peucawo' na'. Ce htalikawm' hkam' ri yeuh ku' kaw htuk' hpum' Eun Peucawo' na'. ³³ Daecti peue ti ri is' beun' hawc' na' katcin ce ri kan' ka bhen' keute' na'. Ce htalikawm' hkam' ri yeuh ku' kaw htuk' hpum' ce beun' ri na'. ³⁴ Ku' peus ce hpum' ri ri ka na' a gvah ri meuh lal' hk'a'. Beun' un' nang ti ri is' me na' katcin ce ri kan' Eun Peucawo' na'. Ce htalikawm' hkam' ri tan tu' meun ri na' ri Peucawo' Eun gawm' jawngkui' tu' mae' civit ri na'. Daecti peue ti ri is' me hawc' na' katcin ce ri kan' ka bhen' keute' na'.

Ce htalikawm' hkam' ri yeuh ku' kaw htuk' hpum' ce me ri na'. ³⁵ Lah' ui' a yeuhki' na' meuh a pun ku' peuehot' pun pe'. A hkuin' to' ri meuh taws' ui' a ri pe'. Daecti meuh a punta kaw pe' cang a' yu im' hk'a' naee hk'a' cawp' na' ri sawng' tan pe' tu' meun ri na' ri Peucawo' Eun na' ri un' gvah pe' hpum' ri na' meuh lal' hk'a' na'.

³⁶ Me ti ri peue eun lawn kue' kon' hk'ih' yeuh kati ri kaw ti eun daecti eun lawn lhat' na' ri cang yeuh ku' un' htuk' ri yeuh ri kon' hk'ih' ri na' eun mae' eun hpum' ha' ron ri hk'a' leumeus' keus ri na' mae' na' ri cang yeuh ku' ti ri ceu ko', kah eun ti kon' hk'ih' awn' eun. Kah eun yeuh ku' sum' yeuh ri na' reu'. Aen' a hkuin' kue' map'. ³⁷ Daecti eun lawn tang' hpum' ri keutawn' kaw un' lo' ri yeuh ku' ti ri ceu, cang eut' hpum' ri pun mae' eun tang' hpum' ri kaw tae' kon' hk'ih' awn' eun suip ri meuh ku' tang' ri kati ri heun' heul' ko', yeuh eun ku' cawp' na' hawc'. ³⁸ Kop awn' na, me ti kon' hk'ih' tang' eun kati ri kaw ti eun na' yeuh eun ku' cawp' na'. Daecti eun lawn un' ti ri is' ko', a jaen na' chak'.

³⁹ Cu yam me na' kaw'n a' yu im' eun na', beun' eun na' eun kaw kah ri ut' mae' heun. Daecti me na' eun lawn yeum heul' ko', beun' awn' eun sum' ti a' nhaw' eun kaw cang ti a hot' seun' alo ka hpum' ri na' yeut. Daecti me awn' eun kaw kah ri meuh peue yum' Peucawo' Eun. ⁴⁰ Seun' ku' kuit ui' na' ko', beun' awn' eun lawn ut' koe meun ko', eun jaen kaw ren' kaw'n. Lah' ui' ceu nang aen' ce na' kuit ui' Cit' seunga' Eun Peucawo' na' a ku ut' mae' ui'.

Ku' hk'a tan ri ruphtu

8 Lawng ka ku' hk'a tan ri ruphtu na' yeuh a ki'.

Yawng e' kue' ri cu' yi gawm' euc' ri. Cu' yi na' yeuh ka e' hpum' lhung' hpum' keuting. Daecti hk'a' leumeus' keus na' a yeuh e' teum' kawm' puri. ² Peue ti ri peue eun lawn hteum' ri yawng ku' ti ri ceu na' hawc' ko', hpaw eun ca nang yawng ku' kuing' hpaw eun ri yawng na'. ³ Daecti peue leumeus' Peucawo' Eun na' eun ko', Peucawo' Eun ku yawng hkawn' eun yeut.

⁴ Kop awn' na, lawng ka hk'a ku' hk'a tan ri ruphtu na' yeuh a ki'. Yawng e' ruphtu na' meuh a ku' un' kue' peuehot' pang bhen' keute' aen' na. E' yawng Peucawo' kue' Eun ti ton' koe. ⁵ Kopti ku' klawng peue meuh peucawo' na' a saec' kue' heun' nang kuing' pang mao' na', a ko' pang bhen' keute' na' (neumneum ka na' ko', "peucawo'" mae' "cawo'" na' kue' a heun'), ⁶ daecti pun e' na', kue' a Peucawo' ti ton' koe. Eun meuh A' kuing'. Eun hpanpleng' ku ceu

gawm' euc' na'. A'yu im' e' na' a meuh pun Heun. A kue' Cawo' ti ton' koe, Eun meuh Yesu' Hkrit Eun. Peucawo' Eun hpanpleng' ku ceu gawm' euc' na' ri cu Eun Yesu' Hkrit Eun. E' kue' meuh kopti Heun ri.

⁷Daecti hpaw a ca' meuh peue ku peue nang yawng lawng aen' na. Peue ngon' na' hteum' peue ruphtu na' a'yu im' neum. Kop awn' na yam hk'a ce ku' hk'a tan ri ruphtu na', ce hteum' a meuh ku' hk'a tan ri peucawo' neumneum na'. Kopti hpum' cang yawng ce na' kaw' reng kloe ka, a yeuh ce hk'aw' jeuk. ⁸Ku' hk'a na' hpaw a ca' meuh ku' kaw yeuh e' gawm de Peucawo' Eun. E' lawn un' hk'a a ko', a hkuin' kaw yeuh e' gawm yawm' lih. E' lawn hk'a a ko', a hkuin' kaw yeuh e' gawm chak' huk'.

⁹Daecti uin' sati ri reu'. Pawlaee kah ku' cang yeuh pun e' na' meuh meul' seumu seuduih ce ec' awng' kaw' reng kloe e' na' ce. ¹⁰Kopti peue kaw' reng kloe ri hpum' cang yawng ri na' ce lawn nyu ku' meuh peue yawng lawng aen' a na' mok' pe' ri hk'a ku' hk'a hk'a' naee nya ka ruphtu na' ko', ce ku na' hpum' huk' ri hk'a ku' hk'a tan ri ruphtu na', un' meuh ka aw? ¹¹Kop awn' na kopti meuh a cu' yi pe' na', a yeuh ec' awng' kaw' reng kloe ku' Hkrit hkam' Eun ri yeum pun ce na' ce lulaic heul'. ¹²Yam yeuh pe' map' na' ri ec' awng' ri na' ce yeuhki' na' mae' yeuh pe' ku' kleuc' ri hpum' cang yawng kaw' reng kloe ce na', pe' ku yeuh map' na' ri Hkrit Eun yeut. ¹³Kop awn' na ku' hk'a ui' na' a lawn yeuh ec' awng' na' ce hk'ui' hk'a' naee map' na' ko', punta kaw ui' un' laee meuh ku' yeuh ce htang' meul na', ui' hkuin' kaw laee pawn' keune na' bae.

Ku' peue caee Eun Yesu' kaw ce cang yeuh na'

⁹ Un' meuh ui' peue pon aw? Un' meuh ui' peue caee Eun Yesu' aw? Un' pun ui' ri nyu Cawo' e' Yesu' Eun aw? Un' meuh pe' pli' ka kan' yeuh ui' hk'a' naee Peucawo' Eun na' aw? ²Ui' saec' na' un' meuh peue caee Eun Yesu' pun peue seubu na' ce ko', daecti pun pe' na' meuh ui' taeng peue caee Eun Yesu'. Kopti meuh pe' ta' ra' ka hk'a' meuh ui' peue caee Eun Yesu' na' hk'a' naee Peucawo' Eun na'.

³A'nhaw' lawn ing' taws' a' mu ui' ko', ku' kaw ui' kah' nha' ri na' kue' a yeuhki'. ⁴Un' kue' e' ahk'vang kaw hk'asom' aw? ⁵Un' kue' e' ahk'vang kaw va beun' ri meuh kon' Hkrit na' ce hot' ri seun' peue caee seubu Eun Yesu', awng' Eun Yesu' mae' Petru' na' ce yeut aw? ⁶A'ko' meuh a Banabas' ya koe aw nang kah ri yeuh kan' pun kaw a'yu im' na'?

⁷A'nhaw' ci' hk'a ku' chin ri eun yeuh suik'? A'nhaw' ci' sang' val pli' bui eun un' pun ri hk'a pli' sang' ri neum val awn' na? A'nhaw' ci' uii' tu' hkawng' eun un' pun ri nyui leuum' pui ka? ⁸Lah' ui' a yeuhki' na' a hot' kamkuit ce peue na' aw? Hk'a' naee leukah' ritroe na' un' lah' ka a seun' aen' na aw? ⁹Kopti leukah' ritroe eun Mo' se na' a lah', "Pawlaee chui' moeng ka a' moe yam buih chok' chec' a ngho' na'." [†]Yam Peucawo' lah' Eun a yeuh keutit' na', kuit Eun pun ka a' moe na' aw? ¹⁰Un' lah' Eun a ri e' aw? Meuh, leukah' aen' tem' a ri pun e'. Kopti yam peue htaee' na cap' ngho' na', ce ku keutui' hpum' kaw ri pun hkawn' ka ku' vuic ku' cap' ri na'. ¹¹Ya lawn puin' ku' seumal ka hk'a' civit na' hk'a' naee pe' ya na' tang hk'o' ri vuic a ri pe' ko', na' pe' nyu a pon lheu' aw? ¹²Peue seubu na' ce lawn kue' ahk'vang kaw pun ri rap ri ti hk'a' teum' kawm pe' na' ko', ya jaen na' kue' ahk'vang ka lheu' ce ri, un' meuh ka aw?

Daecti ya hkuin' lo' ahk'vang awn' na. Lheu' awn' na, punta kaw a un' meuh ku' ham' tap leukah' mun' ren' kawn lawng Eun Hkrit na', ya yeun' hkam a ku ceu ka. ¹³Un' yawng pe' peue yeuh kan' hk'a' naee nya hk'o' mun' keuting na' pun ce ri hk'a ku' hk'a ka nya hk'o' mun' keuting na' aw'? Mae', un' yawng pe' peue yeuh mhai' nang ten dum ri tan na' pun ce bun ka ku' tan na' aw? ¹⁴Seun' awn' na, Yesu' tuil' Eun leukah' lah', "Peue sangsawn' leukah' mun' ren' kawn na' htuk' ce ri pun ku' kaw uii' a'yu ri na' ri leukah' mun' ren' kawn na' yeut."

¹⁵Daecti ui' hkuin' duing lo' ahk'vang aen' ce. Tem' ui' a yeuhki' na' a hkuin' meuh keutui' hpum' ui' pe' kaw yeuh a ri ui'. Kaw ui' hkam' yawo ri yeum na' a jaen na' chak' hk'ai' kah ui' peue ti ri peue eun yeuh ku' mhawng' ui' ri hk'o' cuin aen' ce lulaic heul' na'. ¹⁶Daecti yam sangsawn' ui' leukah' mun' ren' kawn na', a hkuin' kue' ku' yeuh ui' mhawng' ri hk'o' cuin kopti kaw ui' kah ri sangsawn' a na'. Ui' lawn un' sangsawn' leukah' mun' ren' kawn na' ko', kaw ui' pun ri hkam' hk'a' jha' na'. ¹⁷Ui' lawn peus hpum' ri sangsawn' leukah' mun' ren' kawn na' ko', ui' kaw pun lapsawng'. Daecti ui' lawn yeuh a mae' un' peus ri hpum' ri ko', gup meuh ui' nang yeuh a hot' yawo beus ka na'. ¹⁸Yeuh keutit' na', ui' ci' kaw pun lapsawng' keunhaw'? Punta kaw ui' un' lo' ahk'vang ku' htuk' ui' ri pun ri leukah' mun' ren' kawn na' htonnuk na', yam sangsawn' ui' leukah' mun' ren' kawn na', ui' sangsawn' a mae' un' ti ri ngos reng ri.

† Sawn' leukah' mun' 25:4

¹⁹Ui' saec' na' meuh peue pon un' ut' hk'a' ruim a' nhaw' ko', punta kaw ui' cang va peue ing' yum' Peucawo' Eun heun' seun' cang va ui' na', ui' yawm' meun ri meuh mhai' peue gawm' euc'. ²⁰Pun peue Yu' da na' ce, punta kaw ui' cang va ce ing' yum' Peucawo' Eun na', ui' ku seun' peue Yu' da na' ce yeut. Pun peue ut' hk'a' ruim ka leukah' ritroe na' ce, punta kaw ui' cang va ce ing' yum' Peucawo' Eun na', ui' ku seun' peue ut' hk'a' ruim ka leukah' ritroe na' ce yeut (ui' ri meun, ui' saec' na' un' ut' hk'a' ruim ka leukah' ritroe na'). ²¹Pun peue un' kue' leukah' ritroe na' ce, punta kaw ui' cang va ce ing' yum' Peucawo' Eun na', ui' ku seun' peue un' kue' leukah' ritroe na' ce yeut (ui' saec' na' un' pon ritroe Eun Peucawo' na', daecti ut' ui' hk'a' ruim ka leukah' ritroe Eun Hkrit na'). ²²Pun peue kaw' reng kloe na' ce, punta kaw ui' cang va ce ing' yum' Peucawo' Eun na', ui' ku seun' peue kaw' reng kloe na' ce yeut. Punta kaw ui' cang teum' kawm peue ti ri peue na' eun pun ri rap ri ti hk'a' htut lawtpon na' ri ku hk'a' ku ceu na' pun, ui' meuh mae' peue ku ceu gawm' euc' na' ce. ²³Yeuh ui' ceu nang aen' ce ku ceu na' meuh a kopti nyu ui' leukah' mun' ren' kaw na' mae' meuh a punta kaw ui' pun ri pawng' ri mae' mun' ka leukah' mun' ren' kaw na'. ²⁴Peue keutec hk'uih hk'a' naee vang keutec hk'uih na' hk'uih ce ku peue ri, daecti ku' pun lapsawng' na' eun meuh yawo ti peue, un' yawng pe' a aw? Punta kaw pe' pun lapsawng' na', hk'uih reu'. ²⁵Peue keutec hk'uih na' ce ku peue, kah ce ri sae' cae' hkvuik' ri nyawk'. Yeuh ce keutit' na' a meuh punta kaw ce pun lapsawng' un' keutawn' na'. Daecti yeuh e' punta kaw ri pun lapsawng' keutawn' cot' cu na'. ²⁶Kop awn' na, a hkuin' meuh hk'uih ui' hk'a' naee vang un' kue' ui' vang kaw rot na'. A hkuin' meuh dhawc' ui' vawo seun' peue hkvuik' ri dhawc' na' ce. ²⁷Daecti punta yam hawc' ui' sangsawn' ri leukah' mun' ren' kaw na' ri peue na' kaw ui' un' meuh nang un' kuing' ri pun lapsawng' na', ui' hkvuik' meun ri kaw u' peung tu' ri na' pun.

Tuil' sati ri kaw un' hot' ri yeuh seun' ku' yeuh ce a' - ta' a' ya ce peue I' sarela' na'

10 Ec' awng' na' pe', sum' kah ui' pe' yawng lawng ka ku' meuh neum ri a' ta' a' ya e' na' ce. Yam ut' ce nang vang hk'oh' hk'oeng' na', Peucawo' tuil' Eun putum' na' kang' ruim ce, mae' ce pun ri hpa' mha' seumut' na' heul' ku peue ri. ²Ce pun ri ing' lec hk'a' naee Mo' se eun ri rap ce ri ti hk'a' cum' na' hk'a' naee putum' na' mae' hk'a' naee mha' seumut' na' ku peue ri. ³Ce pun ri hk'a' ku' hk'a' civit seun' puri na'

ku peue ri. ⁴Ce pun ri nyui leuum' civit seun' puri na' ku peue ri. Ce pun ri nyui leuum' civit lih neum seumu civit ku' a hot' ce heul' na'. Meul' seumu awn' a meuh Hkrit Eun. ⁵A saec' yeuh sa' nhaw', Peucawo' Eun nyu ce un' htuk' hpum' ri hk'a' heun'. A' ta' a' ya awn' ce pun ri yeum buba ri nang vang hk'oh' hk'oeng' na'.

⁶Ceu nang aen' puc a ri meuh na' meuh a punta kaw a tuil' sati un' kah hpum' e' na' ren' mae' ku' rai na' seun' peue awn' ce. ⁷Pawlaee fae' ruphtu na' seun' ce ri ngon' fae' ce a na' seun' tem' a ri nang htawm Seunga' na', "Peue na' mok' ce ri nyui plai' hk'asom'. Ce kuh' ren' kaw na' cha ri lomlom." ⁸E' na' htuk' ri un' yeuh ku' kleuc' hk'a' hkuin' nawng' tang' na' seun' peue ngon' na' yeuh ce a. Hawc' ka na', ce yeum lal' mhuin' loe' heng' peue hk'a' naee ti seunyi na'. ⁹E' na' htuk' ri un' cheu ri nawk Peucawo' Eun seun' peue ngon' na' yeuh ce a. Hawc' ka na', seueueng' na' a tok' ce yeum. ¹⁰E' na' htuk' ri un' buicbuic seun' peue ngon' na' yeuh ce a. Hawc' ka na', in' hpom ka hk'a' yeum na' eun toh ce.

¹¹Ceu nang aen' puc a ri meuh ri ce na' meuh a punta kaw a tuil' sati e' ku' ut' hk'a' naee cu yam tisut' na' e'. A pun ri tem' ri hk'a' naee htawm Seunga' na'. ¹²Kop awn' na, pe' lawn kuit meun ri cawng keutawn' meulamlam ri hawc' ko', punta kaw pe' un' cang htang' meul na', uin' sati ri meulamlam ri reu'. ¹³Hk'a' cop' long pon lheu' hk'ai' ku' tawn hk'eup' peue na' a hkuin' kaw laee kue' ri pe'. Peucawo' kati keutawn' Eun. Eun hkuin' kaw tae' pe' hk'eup' ku' cop' long kaw pe' hkam' un' pe na'. Daecti yam hkam' pe' ku' cop' long na', punta kaw pe' cang keutawn' hk'a' ruim ka hk'a' cop' long na' pun, Eun kaw tuil' pe' is' hk'a' kaw pucti heul' na' yeut.

Hk'a' ku' hk'a' tan ri ruphtu mae' hk'a' pawe Eun Cawo'

¹⁴Kop awn' na peue leumeus' ui' na' pe', vel hk'a' fae' ruphtu na' reu'. ¹⁵Lah' ui' a ri peue cang kuit ri mhawng' na' ce. Pe' na' caet ri nawk ku' lah' ui' na' meun reu'. ¹⁶Kaw' leuum' pli' bui ku' hk'o' e' mun' e' mun' keuting ri Peucawo' Eun na' yeuh ka e' pawng' ri hk'a' naee nham' Eun Hkrit na', un' meuh ka aw? Hkawomun' ku' ves e' na' yeuh ka e' pawng' ri hk'a' naee jawngkui' tu' Eun Hkrit na', un' meuh ka aw? ¹⁷Kopti meuh a hkawomun' ti meul' na' e' meuh jawngkui' tu' keuhti yawo, kopti ruim e' ri hk'a' hkawomun' ti meul' awn' a na'.

¹⁸Kuit ri nawk ku' yeuh ce peue I' sarela' na' reu'. Peue hk'a' ku' tan hawc' tan ri na' pun ce ri pawng' ri

mae' ten dum ri tan na', un' meuh ka aw? ¹⁹ Vangdoh' ka ku' sum' lah' ui' na' meuh a ruphtu na' mae' ku' tan na' kue' a a'ye' keuting aw? ²⁰ Un' meuh, daecti vangdoh' ka ku' sum' lah' ui' na' meuh a ku' tan ce peue un' meuh kon' Hkrit na' tan ce a ri seuca' na', hpaw ce ca' tan a ri Peucawo' Eun. Ui' hkuin' sum' kah pe' pawng' ri mae' seuca' na'. ²¹ Nyui pe' kaw' Eun Cawo' Yesu' na' pe' ku nyui kaw' ka seuca' na', a hkuin' kaw cang. Hk'a pe' ri hpuin' Eun Cawo' Yesu' na' pe' ku hk'a ri hpuin' ka seuca' na', a hkuin' kaw cang. ²² Kaw e' cu' ci' yeuh Cawo' Yesu' Eun hkoe' - mang' aw? Kawl' reng keuting e' hk'ai' Heun aw?

Ku' peue yum' na' cang yeuh ce

²³ Tem' pe' lai ri ui' pe' lah', "Cang yeuh e' ku ceu na' gawm' euc'." Daecti ui' lah' a ri pe', ku' yeuh e' ku ceu na' a hkuin' kue' peuehot' gawm' euc'. Cang yeuh e' ku ceu na' gawm' euc'. Daecti ku' yeuh e' ku ceu na' a hkuin' yeuh ri tuil' hk'a' huk' hawn' na' gawm' euc'. ²⁴ Un' htuk' e' ri keue' ri ku' kaw sawng' kue' peuehot' pun tu' ri na', daecti keue' ri ku' kaw kue' peuehot' pun peue seubu na' ce reu'.

²⁵ Ku' paing' ri nang keulas paing' keune na' cang hk'a pe' a gawm' euc' ka. Pawlae hki' keung ri kaw a cawp' un' cawp' na'. ²⁶ Kopti bhen' keute' na' mae' ku' kue' hk'a' pang ka bhen' keute' na' ce gawm' euc' meuh a is' Eun Peucawo'. †

²⁷ Peue un' yum' ti ri peue na' eun lawn klawng pe' heul' hk'asom' mae' ti pe' ku sum' heul' ko', hk'a ku' hk'a bang' ri nanggal' pe' na' reu'. Pawlae hki' keung ri kaw a cawp' un' cawp' na'. ²⁸ Daecti peue ti ri peue eun lawn lah', "Aen' meuh a ku' hk'a tan ri ruphtu hawc' na'" ko', kopti meuh a ku' lah' a ri mi na' eun mae' kopti meuh a hpum' cang yawng na', pawlae hk'a a. ²⁹ Hpum' cang yawng lah' ui' na' a hkuin' meuh is' pe' na', daecti meuh a hpum' cang yawng eun ku' lah' a ri pe' na' eun. A ci' meuh kop keunhaw' hpum' cang yawng ce peue seubu na' a vae' ing' ham' tap ku' cang yeuh pun ui' na'? ³⁰ Ui' lawn hk'a a hk'a' naee mun' keuting ui' ri Peucawo' Eun ko', a ci' yeuh keunhaw' eun vae' tawk ui' kopti ku' mun' keuting ui' ri Peucawo' Eun hawc' na'?

³¹ Kop awn' na, yam hk'a pe', yam nyui pe', a'ko' yam yeuh pe' ku' ti ri ceu na', yeuh a punta kaw a tuil' munhpung' Eun Peucawo' na' reu'. ³² Pawlae yeuh ri meuh kleum' ka vang seuduih leuveul' ce peue Yu' da na', a'ko' peue Helasa' na', a'ko' peue kon' Hkrit Eun Peucawo' na' ce. ³³ Daecti yeuh seun' ku' yeuh ui'

na' reu'. Co' ca' ui' ri yeuh ku' yeuh ui' ku ceu na' kaw a htuk' hpum' peue gawm' euc' na'. Kopti hpaw ui' ca' sok ri yeuh ku' kaw kue' peuehot' pun tu' ri na' meun, daecti punta peue gawm' euc' na' kaw ce pun ri rap ri ti hk'a' htut lawtpon na', ui' sok ri yeuh ku' kaw kue' peuehot' pun ce na'.

11 Hot' ri yeuh seun' ku' yeuh ui' na' seun' hot' ui' ri yeuh ku' yeuh Eun Hkrit na' reu'.

Ku' kuing' ri yeuh yam hk'o' mun' mae' yam sangsawn' leukah' mun' ren' kawn na'

² Suk' seun' ui' pe' kopti un' pil pe' leukah' sangsawn' ui' na', pe' jhawp' a ku ceu ka hot' seun' ku' sangsawn' ui' ri pe' na'.

³ Daecti sum' kah ui' pe' pawn Hkrit meuh Eun cing' ce me na' ce ku peue ri, me na' eun meuh cing' eun beun' na', Peucawo' Eun meuh cing' Eun Hkrit. ⁴ Me ku peue na' yam hk'o' ce mun' na', a'ko' yam sangsawn' ce leukah' mun' ren' kawn na' ce lawn chuip' cing' ri na' ri hpen' ko', yeuh ce ku' hpa' rai ri cing' ri na'.

⁵ Beun' ku peue na' yam hk'o' ce mun' na', a'ko' yam sangsawn' ce leukah' mun' ren' kawn na' ce lawn un' chuip' cing' ri na' ri hpen' ko', yeuh ce ku' hpa' rai ri cing' ri na' seun' kon' ce cing' ri na' ko'. ⁶ Beun' na' ce lawn un' chuip' cing' ri na' ri hpen' ko', ce na' htuk' ri cip' ri tec huik' ri na'. Daecti kopti cip' huik' ri, a'ko' kon' cing' ri na' meuh a ku' hk'o' kaic pun ce na', ce na' htuk' ri chuip' cing' ri na' ri hpen'. ⁷ Me na' kopti meuh ce ruprang munhpung' Eun Peucawo' na', ce na' htuk' ri un' chuip' cing' ri na' ri hpen'. Daecti beun' na' ce meuh munhpung' ce me na'. ⁸ Kopti me na' hpaw eun ca' hpanpleng' eun ri neum beun', beun' na' hpanpleng' eun ri neum me. ⁹ Me na' hpaw eun ca' hpanpleng' ri pun beun'. Beun' na' hpanpleng' eun ri pun me. ¹⁰ Kop awn' na, kopti meuh a in' hpom na' ce, punta beun' na' kaw ce yeuh ut' ri hk'a' ruim ti' ca ce me na' pucti lih na', ce na' htuk' ri chuip' cing' ri na' ri hpen'.

¹¹ A saec' yeuh sa' nhaw', hk'a' naee Cawo' Yesu' Eun, beun' na' kah ce ri puing me, me na' ce ku kah ri puing beun'. ¹² Kopti beun' na' ing' ce neum me na', me na' ce ku keut' lih neum beun' yeut. Daecti ku ceu gawm' euc' na' ing' a neum Peucawo' Eun. ¹³ Yam beun' na' hk'o' ce mun' ri Peucawo' Eun na', htuk' ce ri chuip' cing' ri na' aw, un' htuk' ce ri chuip' a aw, kuit pe' nawk a meun reu'? ¹⁴ Me na' eun lawn leuvang' huik' ri na' ko', meuh a ku' hk'o' kaic pun heun na', hpum' cang yawng pe' na' un' sawn' a pe' ri ka aw?

¹⁵ Daecti beun' kue' huik' lang' na' meuh a munh-

† Suk' seun' 24:1

pung' ce kopti Peucawo' tuil' Eun ce is' huik' lang' na' meuh a punta kaw a chuip' cing' ce na'.¹⁶ A'nhaw' lawn sum' htu' hting' lawng aen' a ko', ya ri mae' muk kon' Hkrit Eun Peucawo' na' e' hkuin' kue' ritroe seubu.

Lawng hk'a pawe Eun Cawo'

¹⁷Yam hk'om pe' puri hk'o' mun' na', hpaw ui' ca' kaw cang suk' seun' pe' kopti hk'om pe' puri hk'o' mun' na' pun pe' hk'a' un' chak' na' heun' hk'ai' ku' chak' na'.¹⁸ Keuhti ka na', pun ui' ri mhawng' yam hk'om pe' puri hk'a' naee muk kon' Hkrit na', pe' gvah muk gvah cum puri. Ui' yum' lawng ku' pun ui' ri mhawng' awn' ngon' meuh a neumneum yeut.¹⁹ Punta hk'a' naee pe' na' a'nhaw' ci' meuh peue Peucawo' htawhkam Eun na' punta kaw a pucti lih glih' gleueng' na', a ca' lak' koe kaw kue' hk'a' gvah muk gvah cum puri na' aw?²⁰ Yam hk'om pe' puri na', hpaw pe' ca' hk'a' pawe Eun Cawo' na'.²¹ Kopti un' laee ko' pe' puri pe' sawng' hk'a' is' a'nhaw' is' nang awn' na'. Ngon' pe' sum' som', ngon' pe' yuic' ri leuum' pli' bui na'.²² Un' kue' pe' nyahk'ul' vang kaw pe' mok' ri hk'asom' aw? A' ko', yeuh pe' ku' un' nawpsang ri muk kon' Hkrit Eun Peucawo' na' ce ri yeuh pe' peue hk'o' tukyak na' ce kaic aw? Ui' ci' kaw htuk' ri lah' a yeuh sa'nhaw' ri pe'? Kaw pe' kah ui' suk' seun' ri kopti ceu nang aen' ce aw? A' hkuin' kaw duing yeuh keutit'.

²³Kopti ku' sangsawn' ui' pe' ri ka na' pun ui' a neum Cawo' Yesu' Eun. Aen' a, bul yam fuin peue Cawo' Yesu' Eun na' Eun ti hkawomun' na'.²⁴ Hawc' Eun mun' keuting ri Peucawo' Eun na', Eun ves hkawomun' na' Eun lah', "Aen' meuh a tu' Ui' tuil' Ui' a ri pe'. Yeuh aen' a meuh ku' kaw kuit rot ri Ui' reu'."

²⁵Hawc' hk'a' ce hkawomun' na', Eun tang yeuh seun' awn' na. Eun ti kawk' na' Eun lah', "Aen' meuh a kati sat' ca' hk'u' ri nham' Ui'. Yam nyui pe' a ku pok ka na', yeuh aen' a meuh ku' kaw kuit rot ri Ui' reu'."

²⁶Kopti yam hk'a' pe' hkawomun' aen' a mae' yam nyui pe' kaw' aen' a ku pok ka na', meuh a pao' pe' lawng hk'a' yeum Eun Cawo' Yesu' na' rot ti yam na' Eun tang lih na'.

²⁷Kop awn' na, a'nhaw' lawn hk'a' hkawomun' na' mae' nyui kaw' Eun Cawo' Yesu' na' mae' un' nawpsang ri Heun ko', hkawn' eun ku yeuh ku' kleuc' ri tu' mae' nham' Eun Cawo' Yesu' na'.²⁸ Kop awn' na, nanggal' ka kaw e' hk'a' hkawomun' na' mae' nyui kaw' aen' a na', htuk' e' ri sawng' caet ri nawk tu' ri na' meun.²⁹ Kopti a'nhaw' lawn hk'a' a mae' nyui a

hk'a' naee un' kuit eun ri nawk tu' Eun Cawo' Yesu' na' ko', hkawn' eun ku hk'a' ku nyui ku' kaw yeuh eun pun hk'a' taws' a' mu ciyang na'.³⁰ Kopti meuh a ceu nang aen' ce na', pe' ri heun' peue pe' kaw' reng kloe sui' peuyhat, ngon' pe' yeum.³¹ Daecti e' lawn sawng' caet ri nawk tu' ri na' meun ko', e' hkuin' kaw laee pun hk'a' taws' a' mu na'.³² Yam Cawo' Yesu' tawm' ram Eun ri e' na', ta' faet' sawn' Eun e' punta kaw e' un' pun ri hkam' hk'a' ciyang na' mae' peue bhen' keute' na' ce tiduih' na'.

³³Kop awn' na ec' awng' ui' na' pe', yam hk'om pe' puri kaw hk'a' pawe Eun Cawo' na', ko' puri ti peue hawc' ti peue reu'.³⁴ Punta yam ing' hk'om pe' puri na' pe' ku na' un' pun ri hkam' hk'a' taws' a' mu ciyang na', a'nhaw' lawn sum' som' ko', eun na' htuk' ri som' ti nya ri.

Yam na' ui' tang ing' rot ri pe' na', ui' na' koe tang tuil' hk'a' sangsawn' seubu na' ri pe' bae.

Lapsawng' ka hk'a' civit

12 Ec' awng' na' pe', sum' kah ui' pe' yawng lawng lapsawng' ka hk'a' civit na'.² Pe' ku yawng yam kaw' meuh pe' peue un' yum' Peucawo' Eun na' pun pe' ri hkam' hk'a' va peue pe' long hk'a' kleuc' heul' fae' ruphtu ku' un' cang leukah' na'.³ Kop awn' na, ui' sum' kah pe' yawng a, hpaw a ca' kue' a'nhaw' eun na' cu Cit' seunga' Eun Peucawo' na' eun na' lah', "Kah Yesu' Eun pun ri hkam' hk'a' jha' na' reu'." Mae' hpaw a ca' kue' a'nhaw' eun na' un' cu Cit' seunga' chak' na' eun na' lah', "Yesu' meuh Eun Cawo'."

⁴Lapsawng' na' kue' a heun' ceu, daecti Cit' seunga' ku' meuh nang tuil' a na' Eun meuh yawo ti ton'.

⁵Kan' yeuh mhai' na' kue' a heun' ceu, daecti Cawo' yeuh e' mhai' Eun na' Eun meuh yawo ti ton'.⁶ Kan' na' kue' a heun' ceu, daecti Peucawo' Cawo' yeuh kan' hk'a' naee e' na' Eun meuh yawo ti ton'.

⁷Lapsawng' ka Cit' seunga' na' tuil' a ri ri peue ku peue punta kaw a kue' mun' pun peue gawm' euc' na'.

⁸Ti peue eun ko' Cit' seunga' na' a tuil' eun is' leukah' kue' cu' yi na'. Ku' seubu ti peue na' eun ko', Cit' seunga' ti ton' awn' a tuil' eun is' leukah' cang yeuh peue yawng na'.⁹ Ku' seubu ti peue na' eun ko', Cit' seunga' ti ton' awn' a tuil' eun is' lapsawng' cang bai' peue cuin na'.

¹⁰Ku' seubu ti peue na' eun ko', a tuil' eun is' ti' ca cang yeuh ku' hk'o' am' na'. Ku' seubu ti peue na' eun ko', a tuil' eun is' hk'a' cang sangsawn' leukah' mun'

ren'kawn na'. Ku' seubu ti peue na' eun ko', a tuil' eun is' hk'a' cang gvah cit' na' ce. Ku' seubu ti peue na' eun ko', a tuil' eun is' hk'a' cang lah' leukah' un' duing mhawng' na'. Ku' seubu ti peue na' eun ko', a tuil' eun is' hk'a' cang ti vangdoh' ka leukah' un' duing mhawng' na'.¹¹ Ceu nang aen' ce gawm' euc' a meuh kan' yeuh ka Cit' seunga' ti ton' koe na'. A tuil' ceu nang aen' ce ri peue ku peue na' ce hot' seun' ku' tang' a ri uin' na' ko'.

Jawngkui' tu' keuhti na' kue' a hk'eung heun'

¹²Jawngkui' tu' na' a saec' pawng' ri mae' hk'eung heun' hk'eung na', a meuh yawo jawngkui' tu' keuhti. Hk'eung na' a saec' kue' heun' hk'eung, a pawng' ri meuh yawo jawngkui' tu' keuhti. Hkrit Eun ku seun' awn' a yeut.¹³ Kopti e' ri gawm' euc' pun e' ri rap ri ti hk'a' cum' na' e' pawng' ri meuh yawo jawngkui' tu' keuhti ri Cit' seunga' keuhti na'. E' saec' na' meuh peue Yu' da, a' ko' peue Helasa', meuh peue meuh mhai', a' ko' peue pon, e' ri gawm' euc', pun e' ri rap ri ti Cit' seunga' keuhti awn' na.

¹⁴Jawngkui' tu' na' hpaw a ca' pawng' ri mae' hk'eung keuhti na' palkoe, daecti a pawng' ri mae' hk'eung heun' ceu na'.¹⁵ Cung na' a lawn lah', "Kopti un' meuh ui' ti' na', ui' hkuin' meuh hk'eung ka jawngkui' tu' na'." Kopti lah' ka a yeuh keutit' na', a hkuin' to' ri yeuh ri un' laee meuh hk'eung ka jawngkui' tu' na'.¹⁶ Yhuk' na' a lawn lah', "Kopti un' meuh ui' ngai' na', ui' hkuin' meuh hk'eung ka jawngkui' tu' na'." Kopti lah' ka a yeuh keutit' na', a hkuin' to' ri yeuh ri un' laee meuh hk'eung ka jawngkui' tu' na'.¹⁷ Jawngkui' tu' na' gawm' euc' a lawn meuh pal ngai' ko', a ci' kaw kue' hk'a' cang mhawng' na' tawngnhaw' ri na'? Jawngkui' tu' na' gawm' euc' a lawn meuh pal yhuk' ko', a ci' kaw kue' hk'a' cang mhawng' saeo' na' tawngnhaw' ri na'?

¹⁸ Daecti neumneum ka na' ko', Peucawo' rangraen Eun ri uin' hk'eung ku ceu na' ut' ri jawngkui' tu' na' hot' vang cawp' ka alo Eun na'.¹⁹ Gawm' euc' ka a lawn meuh yawo hk'eung na' keuhti ko', tu' na' a ci' kaw kue' tawngnhaw'?²⁰ Seun' awn' na, a kue' hk'eung na' heun' ceu, daecti a kue' yawo jawngkui' tu' keuhti.

²¹ Ngai' na' a hkuin' kaw cang lah' a ri ti' na', "Hpaw ui' ca' lo' mi." Cing' na' a hkuin' kaw cang lah' a ri cung na', "Hpaw ui' ca' lo' mi."²² Neumneum ka na' ko', hk'eung ku' nyu e' kaw' reng kloee hk'a' naee jawngkui' tu' ri na' a lawn un' kue' a hkuin' kaw pun.²³ Hk'eung ku' nyu e' un' chae' kue' munhpung' na' e' jaen kaw yeuh a gawm' kue' munhpung' heun'.

Hk'eung ku' un' chae' sum' nyu e' na', e' jaen kaw yeuh a gawm' hk'o' nawk.²⁴ Daecti hk'eung ku' nyu e' hk'o' nawk ri is' ut' hawc' na' a hkuin' kaw laee lo' ri mhe' ri. Daecti Peucawo' pawng' Eun hk'eung ku' ceu ka jawngkui' tu' na' tiduih'. Hk'eung ku' un' kue' munhpung' na' Eun yeuh a gawm' kue' munhpung' heun'.²⁵ Aen' meuh a punta hk'a' taic' jah hk'ai' puri na' kaw a un' kue' hk'a' naee jawngkui' tu' na'. Daecti aen' a meuh punta hk'eung ti ceu hawc' ti ceu na' kaw a kuit pun puri na'.²⁶ Hk'eung na' a lawn sui' ti ceu ko', hk'eung ku' ceu na' a ku kaw sui' gawm' euc' ri. Hk'eung na' a lawn kue' munhpung' ti ceu ko', hk'eung ku' ceu na' a ku kaw ren'kawn mae' ka.

²⁷ Meuh pe' jawngkui' tu' Eun Hkrit. Pe' ri ti peue hawc' ti peue pe' meuh hk'eung ka jawngkui' tu' awn' a.²⁸ Hk'a' naee muk kon' Hkrit na' Peucawo' tang' Eun ri uin' peue caee Eun Yesu' na' ce nanggal'. Lal' muk ti muk na' Eun tang' ri uin' peue sangsawn' leukah' mun' ren'kawn na' ce. Loe' muk ti muk na' Eun tang' ri uin' peue sangsawn' na' ce. Hawc' ka na' Eun tang' ri uin' peue yeuh ku' hk'o' am', peue kue' lapsawng' cang bai' peue peuyhat na' ce cuin, peue cang teum' kawm' peue, peue kue' lapsawng' meuh ro' kan mae' peue cang lah' leukah' un' duing mhawng' na' ce.²⁹ Meuh peue nang meuh peue caee Eun Yesu' ku peue ri aw? Meuh peue sangsawn' leukah' mun' ren'kawn ku peue ri aw? Meuh peue nang sangsawn' ku peue ri aw? Meuh peue nang yeuh ku' hk'o' am' ku peue ri aw?³⁰ Meuh peue nang pun lapsawng' cang bai' peue peuyhat na' ce cuin ku peue ri aw? Meuh peue nang cang lah' leukah' un' duing' mhawng' na' ku peue ri aw? Meuh peue nang cang ti vangdoh' ka leukah' un' duing' mhawng' na' ku peue ri aw?³¹ Daecti htuk' pe' ri kue' hpum' sum' is' lapsawng' ku' chak' hk'ai' aen' a na' ku peue ri.

Hk'a' leumeus' keus

Maet' maen', kaw ui' tuil' pe' nawk hk'a' chak' hk'ai' peue na'.

13 Ui' saec' na' cang lah' leukah' ce peue na' mae' leukah' ce in' hpom ku' un' duing mhawng' ui' na' daecti ui' lawn un' kue' hk'a' leumeus' keus na' ko', gup seun' ui' seng' laws' ka mong' mong', a' ko' chawm' chae' na' ko'.² Ui' saec' na' kue' lapsawng' ka sangsawn' leukah' mun' ren'kawn na', a' ko' ui' cang yawng ku' vangdoh' rui' ka leukah' mo' ri na', a' ko' ui' kue' cu' yi na' gawm' euc', a' ko' ui' kue' hk'a' yum' cang kah gong na' ce sat' ri pun na' daecti ui' lawn un' kue' hk'a'

leumeus' keus na' ko', ui' hkuin' kue' ngos saec' peunae'.³Ui' saec' na' yawm' ri tan hk'eung ri na' gawm' euc' ri peue hk'o' tukyak na' ce, a' ko' ui' yawm' ri sum tu' ri na' heul' dum a hk'a' naee ngawl na', daecti ui' lawn un' kue' hk'a' leumeus' keus na' ko', ui' hkuin' pun mun' na' saec' peunae'.

⁴Hk'a' leumeus' keus na' cang yeun' hkam ling', cang tukyak. Hk'a' leumeus' keus na' un' hkoe' mang', un' mhawng' ri hk'o' cuin, un' kue' hpum' lhung' hpum' keuting.⁵Hk'a' leumeus' keus na' un' yeuh ku' un' nawpsang, un' kuit pun tu' ri meun koe, un' hpum' dot', un' cang kue' hpum' ri peue.⁶Hk'a' leumeus' keus na' un' ren' mae' ku' kleuc', daecti ren' mae' ku' meuh neum na'.⁷Hk'a' leumeus' keus na' cang yeun' hkam ku ceu, yum' laleung, keutui' hpum' laleung mae' yeun' hkam ri hk'a' ku ceu na'.

⁸Saec' meuh hk'a' sangsawn' leukah' mun' ren' kawn na' a kaw yut' ri, saec' meuh hk'a' lah' leukah' un' duing mhawng' na' a kaw yen', saec' meuh cu' yi cang yawng na' a kaw sut', daecti hk'a' leumeus' keus na' a hkuin' kaw cang lulaic heul'.⁹Kopti cu' yi cang yawng e' na' a hkuin' htonnuk, hk'a' sangsawn' leukah' mun' e' na' a ku hkuin' htonnuk yeut.¹⁰Daecti yam hk'a' htonnuk na' rot ka na', hk'a' un' htonnuk na' a kaw rai' heul'.¹¹Yam kawn' buih meuh ui' kon' nyom na', ui' leukah' seun' kon' nyom, ui' kuit seun' kon' nyom, ui' a' cang' seun' kon' nyom. Daecti yam keuting meuh ui' nang heng' na', ui' tecla hk'a' yeuh ce kon' nyom na'.¹²Maet' maen' seun' a nom' e' vaen un' hkaem na' ko', daecti yam awn' a ko', kaw e' pun ri nyu buh Eun Peucawo' na' glih' - gliueng'. Maet' maen' cu' yi ui' na' a hkuin' nang htonnuk, daecti yam awn' a ko', ui' kaw yawng glih' - gliueng' seun' Peucawo' yawng Eun ui' na'.

¹³Kop awn' na, maet' maen' kue' a loe' ceu. Aen' ce a meuh hk'a' yum', hk'a' keutui' hpum' mae' hk'a' leumeus' keus na'. Daecti hk'a' leumeus' keus na' a keuting hk'ai' ce.

Lapsawng' cang sangsawn' leukah' mun' ren' kawn mae' lapsawng' cang lah' leukah' un' duing mhawng'

14 A' yu im' hk'a' naee hk'a' leumeus' keus na' mae' sae' caee' hot' ri sok lapsawng' ka hk'a' civit na' ce reu'. Jaen hot' ri sok lapsawng' cang sangsawn' leukah' mun' ren' kawn na' reu'.²Kopti peue lah' leukah' un' duing mhawng' na' hpaw ce ca' leukah' mae' peue, daecti leukah' ce mae' Peucawo' Eun. Kopti a' nhaw' hkuin' leuceng pun ku' lah' ce na'

saec' ti peue, daecti lah' ce lawng vangdoh' rui' ka hk'a' Cit' seunga' na'.³Daecti peue sangsawn' leukah' mun' ren' kawn na' leukah' ce mae' peue. A yeuh peue huk' hawn', kue' kaw' reng, hpum' sam' ran.⁴Peue lah' leukah' un' duing mhawng' na' yeuh a ce huk' hawn' meun koe. Daecti peue sangsawn' leukah' mun' ren' kawn na' yeuh a muk kon' Hkrit na' ce huk' hawn'.⁵Sum' kah ui' pe' cang lah' leukah' un' duing mhawng' pe' na'. Daecti lheu' awn' na, ui' sum' kah pe' cang sangsawn' leukah' mun' ren' kawn na', kopti peue cang lah' leukah' un' duing mhawng' na' ce lawn un' cang ti vangdoh' ka na' lih punta muk kon' Hkrit kaw ce pun ri rap ri ti hk'a' huk' hawn' na' ko', peue cang sangsawn' leukah' mun' ren' kawn na' keuting ce hk'ai' peue cang lah' leukah' un' duing mhawng' na' ce.

⁶Ec' awng' na' pe', ui' saec' na' ing' lah' leukah' un' duing mhawng' na' ri pe' daecti ui' lawn un' lah' leukah' Peucawo' tuh' Eun ri tuil' na', a' ko' leukah' cu' yi na', a' ko' leukah' sangsawn' leukah' mun' ren' kawn na', a' ko' leukah' sangsawn' na' ko', a ci' kaw kue' mun' keunhaw' pun pe'?'⁷Saec' meuh ku' un' kue' a' yu na', pi', a' ko' ting', a lawn un' hot' not na' meulamlam ri ko', a' nhaw' ci' kaw yawng hot' a not nangnhaw' na'?'⁸Pi' tae' rae' suik' na' a lawn un' seng' hkaem ko', a' nhaw' ci' kaw rangraen ri kaw peueng' suik' na'.⁹Pe' ku seun' awn' na yeut. Pe' lawn lah' leukah' leuceng un' pun peue na' ko', a' nhaw' ci' kaw leuceng pun ku' buih lah' pe' na' yeuh sa' nhaw'? Gup seun' a leukah' pe' mae' vawo na' ko'.¹⁰Pang bhen' keute' aen' kue' a leukah' na' heun' ceu. Leukah' un' kue' vangdoh' na' a hkuin' kue' saec' ti ceu.¹¹Daecti ui' lawn un' leuceng pun vangdoh' ka leukah' awn' a ko', ku' leukah' na' eun mae' ui' ri ya sawng' sawng' meuh peue ceu chat puri.¹²Kop awn' na saec' meuh pe' ri, kopti buih hot' pe' ri sok lapsawng' ka Cit' seunga' na', co' ca' ri sok lapsawng' ku' kaw yeuh muk kon' Hkrit na' ce huk' hawn' na' reu'.

¹³Kopti meuh a ceu nang aen' a na', a' nhaw' lawn cang lah' leukah' un' duing' mhawng' na' ko', htuk' eun ri hk'o' mun' punta kaw eun cang ti vangdoh' ka ku' lah' ri na' lih.¹⁴Kopti ui' lawn hk'o' mun' lah' leukah' un' duing mhawng' na' ko', cit' ui' na' a saec' na' hk'o' mun', daecti hpum' ui' na' a hkuin' pun mun'.¹⁵Yeuh keutit' ko', ui' ci' na' htuk' ri yeuh sa' nhaw'? Kaw ui' hk'o' mun' ri cit' ri na', daecti ui' ku kaw hk'o' mun' ri hpum' ri na' yeut. Ui' kaw cai suk' seun' ri cit' ri na', daecti ui' ku kaw cai suk' seun'

ri hpum' ri na' yeut.¹⁶ Kopti pe' lawn suk' seun' Peuca-
wo' Eun ri cit' ri na' palkoe ko', peue un' leuceng pun
na' kopti un' leuceng pun ce ku' lah' pe' na', ce ci'
kaw cang lah' "Amin" ri yam hk'o' pe' leukah' mun'
keuting na' yeuh sa' nhaw' ?¹⁷ Pe' saec' na' lah'
leukah' mun' keuting hk'o' leuceng nyawk' na', daecti
a hkuin' cang yeuh peue seubu na' ce huk' hawn'.

¹⁸ Kopti cang lah' ui' leukah' un' duing mhawng' na
heun' hk'ai' pe' na', ui' mun' keuting ri Peucawo'
Eun.¹⁹ Daecti hk'a' naee muk kon' Hkrit na', lah' ui'
leukah' leuceng pun ku' kaw cang teum' kawm peue
hpawn' moeng na' a na' chak' hk'ai' lah' ui' leukah'
un' duing mhawng' timhuin' moeng na'.

²⁰ Ec' awng' na' pe', pawlaee kah kamkuit pe' na' se-
un' kon' nyom. Hk'a' rai pe' na' yeuh ri meuh seun'
o' ngak reu'. Daecti kamkuit pe' na' yeuh ri meuh seun'
nang heng' reu'.²¹ Seun' tem' a ri uin' ri nang htawm
Seunga' na',

Peucawo' Eun lah',

"Kaw Ui' cu peue ceu seubu na' ce

maee' cu Ui' hoeng' ce peue ceu seubu na'

Ui' kaw leukah' maee' peue aen' ce.

Daecti ce hkuin' kaw leuceng Ui'."†

²² Kop awn' na, hk'a' lah' leukah' un' duing
mhawng' na' a hkuin' meuh het' pun ce peue yum'
na', daecti a meuh het' pun ce peue un' yum' na'.
Daecti hk'a' sangsawn' leukah' mun' ren' kawn na' a
hkuin' meuh pun ce peue un' yum' na', daecti a meuh
pun ce peue yum' na'.²³ Kop awn' na, yam muk kon'
Hkrit hk'om pe' puri na', pe' lawn lah' leukah' un' du-
ing mhawng' na' gawm' euc' ri ko', peue un' leuceng
pun na', a' ko' peue un' yum' na' ti ri peue eun lawn
lhon' ri ing' lec vang hk'om pe' puri na' ko', kaw eun
un' lah' ma' rat pe' heul' hawc' aw?²⁴ Daecti pe' lawn
buih sangsawn' leukah' mun' na' gawm' euc' ri ko',
peue un' yum' na', a' ko' peue un' leuceng pun na'
eun lawn lhon' ri ing' lec ko', ku' pun eun ri mhawng'
na' a kaw yeuh eun pawn meuh eun peue map' na'
maee' a kaw yeuh eun sum' leuploh' hk'a' a' yu im' ri
na' yeut.²⁵ Ku' mo' ri hk'a' naee hpum' eun na' a kaw
pucti lih glih' gleueng'. Hawc' ko', eun kaw seukluin ri
faee' Peucawo' Eun. Eun kaw lah', "Peucawo' ut' Eun
maee' pe' neumneum."

Hk'a' hk'om puri faee' hklel' hklawc'

²⁶ Ec' awng' na' pe', e' ci' kaw lah' a yeuh sa' n-
haw' ? Yam hk'om pe' puri na' ngon' pe' lah' seng'
cai, ngon' pe' sangsawn' leukah' mun', ngon' pe'

tuh' ri tuil' leukah', ngon' pe' lah' leukah' un' duing
mhawng', ngon' pe' ti vangdoh' ka leukah' un' duing
mhawng' na' pucti lih. Punta kaw a yeuh muk kon'
Hkrit na' ce huk' hawn' na', kah pe' yeuh ceu nang
aen' ce ku' ceu ka reu'.²⁷ A lawn kue' peue kaw lah'
leukah' un' duing mhawng' na' ko', kah ce lah' yawo
a lal' peue, vang heun' ka loe' peue. Kah ce lah' a ti peue
hawc' ti peue. A kaw kah ri kue' nang ti vangdoh' ka na'
lih ti ri peue.²⁸ Daecti a lawn un' kue' nang ti vangdoh'
ka na' lih ko', kah peue awn' ce ut' dit' ti vang hk'om
na' reu'. Kah ce lah' a ri ti meun mae' lah' a ri Peuca-
wo' Eun.

²⁹ Pun ce peue sangsawn' leukah' mun' ren' kawn na'
kah ce lah' a lal' loe' peue. Kah peue seubu na' ce kuit ri
mhawng' ku' lah' ce na' meulamlam ri.³⁰ Peue mok'
mawn' na' ce ti ri peue eun lawn pun ri rap ri ti hk'a'
Cit' seunga' na' tuh' ka eun nyu na' ko', kah ku' buih
sangsawn' na' eun dit' ti reu'.³¹ Kopti kaw pe' pan'
pun puri lah' leukah' sangsawn' na' ti peue hawc' ti
peue, aen' a meuh punta peue gawm' euc' na' kaw ce
pun ri rap ri ti leukah' sangsawn' na' maee' hk'a' tuil'
kaw' reng na'.³² Cit' ce peue sangsawn' leukah' mun'
ren' kawn na' kah a ri ut' hk'a' ruim ka hk'a' u' peung
ce peue sangsawn' leukah' mun' ren' kawn na'.³³ Kopti
Peucawo' hpaw Eun ca' meuh Cawo' ka ku' hpam' h-
pim' na'. Meuh Eun Cawo' ka hk'a' cumyen' na'.

Seun' ku' muk kon' Hkrit na' yeuh ce hk'a' naee vang
hk'om ce puri na' ko',³⁴ beun' na' htuk' ce ri dit' ti
hk'a' naee muk kon' Hkrit na'. Hpaw ce ca' pun ahkvang
kaw leukah', daecti kaw ce kah ri onawn' rap ri ti a hot'
seun' ku' lah' ka hk'a' naee leukah' ritroe na'.³⁵ Ce
lawn sum' yawng ku' ti ri ceu ko', ce na' htuk' ri
mhaing' me ri na' ce ti nya ri. Beun' leukah' hk'a' naee
vang hk'om na' meuh a ku' hk'o' kaic.

³⁶ Leukah' Eun Peucawo' na' puc a ri neum pe' ri
nanggal' aw? A' ko' rot a ri pe' palkoe aw?³⁷ A' nhaw'
lawn sawn' meun ri meuh peue suip leukah' Eun Peuca-
wo' na', a' ko' sawn' meun ri ut' hk'a' ka Cit' seun-
ga' na' ko', eun na' htuk' ri yawm' ri rap ri ti leukah'
tem' ui' ri pe' aen' meuh a leukah' tuil' Eun Peuca-
wo'.³⁸ Daecti a' nhaw' lawn tecla a ko', eun kaw pun ri
hkam' hk'a' tecla na' yeut.

³⁹ Kop awn' na ec' awng' ui' na' pe', yeuh ri hpum'
huk' ri sangsawn' leukah' mun' ren' kawn na' reu'.
Pawlaee ham' tap hk'a' lah' leukah' un' duing
mhawng' na'.⁴⁰ Daecti htuk' ri yeuh ku' ceu na' hot'
ku' kuing' a ri meuh na' hot' glak' hot' htan ka na'
reu'.

† I' saya' 28:11, 12

Yesu' Hkrit tang kuh' im' Eun

15 Ec'awng' na' pe', sum' tuil' ui' sati pe' ri kuit rot ri leukah' mun' ren' kawng sangsawn' ui' a ri pe' ku' pun pe' ri rap ri ti a hawc' pe' yum' keutawn' hk'a' naee ka na'.² Pe' lawn jhawp' leukah' mun' ren' kawng aen' a keutawn' seupit ko', pe' kaw lawtpon ri leukah' mun' ren' kawng aen' a. A lawn un' yeuh keutit' ko', hk'a' yum' pe' na' meuh a ku' hk'o' hk'awng'.

³ Kopti lawng ku' pun ui' ri rap ri ti ui' sangsawn' pe' ri ka aen' meuh a ku' a ye' keuting hk'ai' peue. A meuh lawng Hkrit pun Eun ri yeum kopti meuh a map' e' na' hot' seun' ku' tem' a ri hk'a' naee htawm Seunga' na'.

⁴ Eun pun ri hkam' hk'a' puing' ri na'. Hawc' ka loe' seunyi na', Eun pun ri tang kuh' im' hot' seun' ku' tem' a ri hk'a' naee htawm Seunga' na'.⁵ Hawc' tuil' Eun Petru' † eun nyu tu' ri na', Eun ku tuil' peue caee ri kul' leual' peue na' ce nyu ri yeut.⁶ Hawc' awn' na, Eun tang tuil' ec'awng' hpawn' pak' peue pai' na' ce nyu ri na' tiduih'. Peue awn' ce saec' yeum heul' ngon', daecti maet' maen' ce kawng' a' yu im' hk'a' heun'.

⁷ Hawc' awn' na, Eun tuil' Yakop' eun nyu ri. Hawc' ko', Eun tuil' peue caee ri na' ce nyu ri gawm' euc'.

⁸ Vang tisut' ka na', ui' saec' na' seun' o' ngak un' nang hk'o' keut' ui' keut' na' ko', Eun ku tuil' ui' nyu ri yeut.

⁹ Kopti hk'a' naee muk ce peue caee Eun Yesu' na' meuh ui' peue aet' hk'ai' peue. Kopti tawn keunhap' ui' muk kon' Hkrit Eun Peucawo' na' ce, ui' hkuin' ku' ing' ri meuh peue caee Eun Yesu'.¹⁰ Daecti kopti meuh a mun' Eun Peucawo' na', ui' ku lak' meuh yeuhki'. Mun' Eun Peucawo' kue' ri ui' na' a hkuin' meuh ku' hk'o' hk'awng'. Ui' yeuh kan' heun' hk'ai' peue caee Eun Yesu' na' ce gawm' euc'. Daecti ui' hkuin' yeuh meun a, mun' Eun Peucawo' ku' kue' hk'a' naee ui' na' a yeuh a.¹¹ Kop awn' na, ui' ri un' lah' ce ri un' lah', ye sangsawn' yawo lawng ku' ti ceu awn' na, pe' ku pun ri yum' lawng awn' na hawc'.

Hk'a' tang kuh' im' hk'ai' vang yeum

¹² Ye lawn sangsawn' lah' Hkrit pun Eun ri rap ri ti hk'a' tang kuh' im' Eun hk'ai' vang yeum ri na' hawc' ko', a ci' yeuh keunhaw' ngon' pe' vaae' kawng' meung lah' ri hk'a' tang kuh' im' na' un' kue' ?¹³ A lawn un' kue' hk'a' tang kuh' im' hk'ai' vang yeum na' ko', Hkrit Eun ku hkuin' kaw pun ri tang kuh' im'.

† Leukah' Helasa' ka na' a lah' Kefas'. Kefas' na' a meuh muis seubu eun Petru' na'.

¹⁴ Hkrit Eun lawn un' pun ri tang kuh' im' ko', leukah' mun' sangsawn' e' na' a hkuin' kaw kue' mun'.

Hk'a' yum' e' na' a ku hkuin' kaw kue' mun' yeut.

¹⁵ Lheu' awn' na, meuh a kopti hkam' e' sa' hki' ka lawng Peucawo' yeuh Eun Hkrit Eun tang kuh' im' na', e' ku na' meuh nang hkam' sa' hki' chi' lai lawng Eun Peucawo' na'. Daecti peue yeum na' ce lawn un' pun ri tang kuh' im' ko', Peucawo' Eun ku hkuin' kaw yeuh Hkrit Eun tang kuh' im'.¹⁶ Kopti Peucawo' Eun lawn un' yeuh peue yeum na' ce tang kuh' im' ko', Eun ku na' un' yeuh Hkrit Eun tang kuh' im' yeut.¹⁷ Hkrit Eun lawn na' un' pun ri tang kuh' im' ko', hk'a' yum' pe' na' a hkuin' kaw kue' mun'. Pe' ku na' kawng' ut' hk'a' naee map' ri na' meun.¹⁸ Lheu' awn' na, peue pun ri yeum hk'a' naee Hkrit Eun na' ce ku na' lulaic heul' yeut.¹⁹ E' lawn kue' vang keutui' hpum' hk'a' naee Hkrit Eun yam kawng' a' yu im' e' maet' maen' na' palkoe yawo ko', e' kaw meuh peue kue' vang tuckyak peue hk'ai' peue gawm' euc'.

²⁰ Daecti neumneum ka na' ko', Hkrit pun Eun ri tang kuh' im' hk'ai' vang yeum ri na' hawc'. Eun meuh pli' nanggal' hk'a' naee peue pun ri yeum heul' hawc' na' ce gawm' euc'.²¹ Kopti seun' hk'a' yeum na' keut' kue' a kopti meuh a peue ti peue na' eun na', hk'a' tang kuh' im' hk'ai' vang yeum na' a ku keut' kue' kopti meuh a peue ti peue na' Eun yeut.²² Kopti seun' peue gawm' euc' na' pun e' ri yeum kopti meuh a Adam eun na', peue gawm' euc' na' e' kaw pun civit na' kopti meuh a Hkrit Eun.²³ Daecti e' kaw sawng' kah ri ko' yam ri na' ti peue hawc' ti peue. Hkrit Eun meuh nang kuh' im' nanggal'. Hawc' ka na' yam na' Eun tang lih na', peue Eun na' ce kaw tang kuh' im'.²⁴ Hawc' awn' na yam hawc' Eun yeuh ri cawo' u' peung, cawo' an' nya keuting maae' cawo' ti' ca keuting na' ce lulaic gawm' euc' na', Eun kaw ap kuing' na' ri A' kuing' Eun, yam awn' na a kaw rot yam tisut' na'.²⁵ Kopti Hkrit kaw Eun kah ri u' peung kuing' na' rot ti yam yeuh Eun ransu ri na' ce ut' hk'a' ruim ka dak cung ri na' gawm' euc' na'.²⁶ Ransu tisut' ku' Hkrit kaw Eun sawm ri yeuh a lulaic na' a meuh hk'a' yeum na'.²⁷ Kopti hk'a' naee htawm Seunga' na' lah', "Peucawo' yeuh Eun ku ceu na' ce ut' hk'a' ruim ka dak cung Eun na'."^{††} Yam lah' Eun, "Ku ceu na'" ut' ce hk'a' ruim ka dak cung Eun na', a hkuin' pa' Peucawo' Eun na' e' yawng a glih' gleueng' kopti meuh Eun Cawo' yeuh ku ceu na' ce ut' hk'a' ruim ka dak cung Eun Hkrit na'.²⁸ Yam Peucawo' hawc' Eun yeuh ri ceu nang aen' ce na', Kon' ai' Eun ku ut' hk'a' ruim ka hk'a' u' peung Eun Peucawo'

†† Suk' seun' 8:6

Cawo' yeuh ku ceu na' ce ut' hk'a' ruim ri na' Eun.
Aen' a meuh punta Peucawo' kaw Eun ut' hk'a' pang ku
ceu gawm' euc' na'.

²⁹Yeuh keutit' ko', a lawn un' kue' hk'a' tang kuh' im' hk'ai' vang yeum na' ko', peue rap ri ti hk'a' cum' pun peue yeum na' ce ci' kaw yeuh sa' nhaw'? Peue yeum na' ce lawn un' tang kuh' im' ko', a ci' meuh kop keunhaw' a vae' kaw'n' kue' peue rap ri ti hk'a' cum' pun peue yeum na' ce? ³⁰A ci' meuh kop keunhaw', e' vae' kah ri hkam' ku' hk'o' lhat' na' lalung? ³¹Ec' awng' na' pe', pun ui' ri yeum ku seunyi. Mhawng' ui' ri hk'o' cuin ri pe' ri ku' Yesu' Hkrit Cawo' e' na' yeuh Eun ri pe' na'. ³²Ui' saec' na' klaee' sat' hk'i nang veng E' fe' su' na', daecti Peucawo' Eun lawn un' yeuh peue yeum na' ce tang kuh' im' ko', a ci' kaw kue' mun' keunhaw' pun ui'?

“E' hk'asom' pawh,

kopti peunsa' kaw e' yeum.” †

³³Pawlaee kah peue yeuh pe' kleuc' hk'a' ri. Yeuh a' ma-wo mae' peue un' chak' na' ko', yeuh a ritroe chak' na' lu. ³⁴Kuit ri nawk hk'a' leupaws seumeu' na' reu'. Pawlaee tang yeuh map' na' bae. Kopti peue ngon' na' un' yawng ce lawng Eun Peucawo' na'. Lah' ui' a yeuhki' na' meuh a punta kaw a yeuh pe' kaic.

Jawngkui' tang kuh' im'

³⁵Daecti peue ti ri peue na' eun cang mhaing', “Peue yeum na' eun ci' kaw tang cang kuh' im' yeuh sa' nhaw'? Yam tang kuh' im' eun na', jawngkui' tu' eun na' a ci' kaw yeuh sa' nhaw'?” ³⁶Peue suisa na' mi, ku' seumal puin' mi na' a lawn un' nang yeum ko', a hkuin' kaw cang kaws puc ri. ³⁷Yam puin' mi na', seumal sa' li, a' ko' seumal ku' seubu na', hpaw mi ca' puin' kleum' ka, puin' mi pal seumal ka. ³⁸Daecti Peucawo' Eun tuil' kleum' ka na' hot' seun' ku' tang' Eun ri uin' na'. Eun tuil' ruprang kleum' ka na' hot' seun' ceu ka ku' seumal na'. ³⁹Keune gawm' euc' na' a hkuin' seun' puri. Keune peue na' a meuh ri is' ti ceu, keune sat' na' a meuh ri is' ti ceu, keune sim' na' a meuh ri is' ti ceu, keune ka' na' a meuh ri is' ti ceu. ⁴⁰Saec' meuh jawngkui' tu' na' a ku' kue' jawngkui' tu' hk'a' kuing' pang mao' mae' jawngkui' tu' hk'a' bhen' keute' na' yeut. Daecti munhpung' ka jawngkui' tu' hk'a' kuing' pang mao' na' a meuh ri is' ti ceu. Munhpung' ka jawngkui' tu' hk'a' bhen' keute' na' a meuh ri is' ti ceu. ⁴¹Munhpung' ka seunyi na' a meuh ri is' ti ceu. Munhpung' ka a' chi' na' meuh ri is' ti ceu. Munhpung' ka seumeueng' na' a meuh ri is' ti ceu.

Neumneum ka na' ko', munhpung' ka seumeueng' na' ti meul' hawc' ti meul' a ku sawng' chat puri.

⁴²Hk'a' tang kuh' im' ce peue na' a ku seun' awn' a yeut. Jawngkui' tu' puin' ri na' a kaw seueum' lhu' jah heul', daecti civit tang kuh' im' na' a kaw im' cot' cu ri. ⁴³Ku' puin' ri na' a hkuin' kue' munhpung', daecti ku' tang kuh' im' na' a kue' munhpung' na' htonnuk. Ku' puin' ri na' a kaw' reng kloe, daecti ku' tang kuh' im' na' a kaw' reng keuting. ⁴⁴Ku' puin' ri na' a meuh jawngkui' tu', daecti ku' tang kuh' im' na' a meuh cit'.

A lawn kue' jawngkui' tu' ko', a ku' kue' jawngkui' cit' yeut. ⁴⁵Kop awn' na, kue' a ku' tem' ri yeuhki', “Adam la ri meuh peue nanggal' na' a' yu im' eun.” †† Adam ing' hot' na' meuh Eun cit', Eun meuh Cawo' tuil' hk'a' a' yu im'. ⁴⁶Jawngkui' cit' na' hpaw a ca' ing' nanggal'. Jawngkui' tu' na' ing' a nanggal'. Jawngkui' cit' na' a kaw'n' ing' hot'. ⁴⁷Peue nanggal' na' ing' eun neum keute' ka bhen' keute' na', daecti peue ing' hot' na' Eun lih neum kuing' pang mao'.

⁴⁸Peue ka keute' na' eun lawn yeuh sa' nhaw' ko', peue bhen' keute' na' ce ku yeuhko' yeut. Peue ka kuing' pang mao' na' Eun lawn yeuh sa' nhaw' ko', peue kuing' pang mao' na' ce ku yeuhko' yeut. ⁴⁹Seun' keut' e' ri pucti lih e' seun' ruprang eun peue bhen' keute' na' eun ko', e' ku kaw kue' ruprang Eun peue kuing' pang mao' na' Eun yeut.

⁵⁰Ec' awng' na' pe', kaw ui' lah' a ri pe' yeuhki', nham' keune na' a hkuin' kaw cang rap ri ti sin' ka kuing' Eun Peucawo' na'. Ku' cang seueum' heul' na' a hkuin' kaw cang rap ri ti sin' ka ku' un' cang seueum' heul' na'. ⁵¹Leuceng a reu', kaw ui' lah' leukah' vanguardoh' rui' na' ri pe'. Hpaw e' ca' kaw pun ri yeum gawm' euc', daecti kaw e' pun ri leuploh' plin' ri ⁵²hk'a' naee ti jep ngai' na' yam pi' tae' rae' na' sawm a ri puing' ri na'. Kopti seng' ka pi' tae' rae' na' kaw a laws', peue yeum na' ce kaw pun ri tang kuh' im' hk'a' naee kaw ce un' laee cang seueum' heul' na'. E' ku kaw pun ri leuploh' plin' ri yeut. ⁵³Kopti ku' cang seueum' heul' na' a kaw pun ri cuip' hk'eung ku' un' cang seueum' heul' na'. Ku' cang yeum na' a kaw pun ri cuip' hk'eung ku' un' cang yeum na'. ⁵⁴Yam ku' cang seueum' heul' na' cuip' hk'eung a ku' un' cang seueum' heul' na' mae' yam ku' cang yeum na' cuip' hk'eung ka ku' un' cang yeum na', leukah' tem' ri uin' ri na' kaw a meuh neumneum. Aen' a meuh, “hk'a' pe na' gleun a hk'a' yeum na'.” †

† I' saya' 22:13

†† Yamla 2:7 ‡ I' saya' 25:8

⁵⁵“O', hk'a' yeum, hk'a' pe mi na' a ci' ut' tawngn-haw'?”

O', hk'a' yeum, pit mi na' a ci' ut' tawngnhaw'?”†
⁵⁶Pit ka hk'a' yeum na' meuh a map' na'. Ti' ca ka map' na' meuh a leukah' ritroe na'.⁵⁷Daecti mun' keuting ri Peucawo' Eun. Tuil' Mi hk'a' pe na' ri ye ri Yesu' Hkrit Cawo' ye na' Eun.

⁵⁸Kop awn' na ec'awng' leumeus' ui' na' pe', cawng keutawn', pawlae va ri keuyuih' fuii' fai'. Saec' yamnhaw', sae' caee' yeuh kan' Eun Peucawo' na' htonnuk reu'. Kopti tup yawng pe' kan' ku' yeuh pe' hk'a' naee Heun na' kaw a un' meuh ku' hk'o' hk'awng' na'.

Hk'on' ro paec tan pun peue Eun Peucawo' na' ce

16 Lawng hk'on' ro paec tan pun peue Eun Peucawo' na' ce na', kah pe' yeuh a seun' ku' lah' ui' ri muk kon' Hkrit ut' nang kuing' Galati' na' ce reu'.
²Yam na' ui' ing' rot na' punta kaw pe' un' lae pun ri gal' ri hk'on' ro paec tan na', seunyi Sin' na' ku sin', kah pe' bai hk'on' ro ri rokxa' paec tan kuing' hpaw mae' mun' ku' sawng' sawng' pun pe' na' tiduih' reu'.³Yam ing' rot ui' na', ui' na' tem' lai kaw meuh sa' hki' ka tuil' a ri peue ku' nyu pe' htuk' hpum' ri pe' leuk ce meuh nang kaw huk' tuil' lai na' mae' paec tan pe' na' nang veng Yeru' salaem na'.⁴Ui' lawn kaw kah ri huk' ko', ui' ku' na' huk' mae' ce yeut.

Leukah' hk'o' hk'ang eun Paw' lu

⁵Kopti kaw ui' kah ri hpa' kuing' Masido' ni' na', yam hawc' hpa' ui' kuing' Masido' ni' na', ui' kaw tang ing' rot ri pe'.⁶Ui' saec' na' heul' hk'a' nhaw' un' lah' punta kaw pe' teum' kawm hk'a' suip ui' ri kaw heul' na', na' ui' chak' cang ut' mae' pe' ti cu hkao' rot ti yam kawt' na' pon ka na'.⁷Maet' maen', ui' kaw hpa' heul' ui' na' nyu pe' ti vut ti yam yawo na' ui' hkuin' sum' kah a yeuh keutit'. Daecti a lawn cawp' alo Eun Peucawo' ko', kuit ui' ri na' ut' mae' pe' ti cu hkao'.⁸Daecti ui' kaw suip ri ut' nang veng E' fe' su' na' rot ti yam pawe Peteko' te na' rot ka na'.
⁹Kopti punta kan' ku' yeuh ui' maen' na' kaw a kue' pli' heun' na', leuva' ka na' tah' a ri vah hawc'. Daecti peue ham' tap ui' na' ce ku' kue' heun'.

¹⁰Ti' mo' se eun lawn ing' ri pe' ko' kopti eun ku' yeuh kan' Eun Peucawo' na' seun' ui' ri na', ui' kaw hk'o' pe' na' rap ri ti eun un' va eun kue' ku' hki' keung yam

ut' eun mae' pe' na'.¹¹Kop awn' na, a' nhaw' pawlae va ri un' sum' rap ri ti eun. Daecti punta kaw eun tang ing' ri ui' na', teum' kawm eun cang suip hk'a' ri na' heul' hk'a' naee hk'a' kuit nyawk' kuit sam' ran cumyen' na' reu'. Buih ko' ui' eun mae' ec'awng' na' ce.

¹²Ec'awng' ui' Apaw' lu eun ko', ui' saec' na' co' ca' ri kaw kah eun heul' ri pe' mae' ec'awng' na' ce tiduih' ko', daecti maet' maen' eun hkuin' nang sum' heul'. Eun lawn kue' yam kaw heul' ko', eun na' heul' ri pe' yeut.

¹³Kah pe' na' yeuh ri pawn kui' ri, keutawn' hk'a' naee hk'a' yum' ri na', yeuh hpum' ri hat' han' mae' kaw' reng keuting ri reu'.¹⁴Ku' yeuh pe' gawm' euc' na' yeuh a hk'a' naee hk'a' leumeus' keus na' reu'.

¹⁵Lawng peue nya peue hk'ul' eun Satehpanas' na' meuh ce kon' Hkrit nang kuing' Ahkaiya' na' nanggal' peue na' mae' lawng tan ce tu' ri na' ce yeuh mhai' ce peue Eun Peucawo' na', pe' ku' yawng a yeut. Ec'awng' na' pe', kaw ui' hk'o' pe'¹⁶yawm' ri leuceng ri ti leukah' ce peue awn' ce mae' leukah' ce peue yeuh kan' mae' ce na' ce reu'.¹⁷Yam Satehpanas', Fawtu-natas' mae' Ahkaias' ing' rot ce na', ui' ren' kawn nyawk' kopti ku' un' yeuh pun pe' ri ui' na', yeuh pun ce a na'.¹⁸Ce yeuh hpum' ui' na' mae' hpum' pe' na' ren' kawn. Hkopyawm' ri ri peue yeuhki' na' ce reu'.

Leukah' tisut'

¹⁹Muk kon' Hkrit ut' hk'a' naee kuing' Asa' na' ce ku tawm' a ce lah' ri leunyeng ri pe'. Ahkio' la' eun mae' Pli' si' la' eun mae' muk kon' Hkrit ku' hk'om puri nang nya ka Ahkio' la' mae' Pli' si' la' na' ce ku tawm' a ce lah' ri leunyeng ri pe' hk'a' naee Peucawo' Eun.²⁰Ec'awng' gawm' euc' na' ce ku tawm' a ce lah' ri leunyeng ri pe'. Yam hk'eup' puri na', gloh' ti' puri hk'a' naee vang seunga' chak' na' reu'.

²¹Leukah' tisut' aen' na, ui' ri, meuh ui' Paw' lu. Ui' tem' a ri ti' ri na' meun.

²²A' nhaw' lawn un' leumeus' Peucawo' Eun ko', kah eun pun ri hkam' hk'a' jha' na' reu'. Peucawo', lih reu'.

²³Kah mun' sin' Eun Cawo' Yesu' na' kue' ri pe' reu'.

²⁴Kah hk'a' leumeus' keus ui' na' kue' ri pe' gawm' euc' hk'a' naee Yesu' Hkrit Eun reu'.

† Haw' se 13:14

2 Kaw'rinhtu'

¹ Htawm ti ok' aen' na ko', meuh ui' Paw' lu meuh peue caee Eun Yesu' Hkrit hot' alo Eun Peucawo' na' mae' Ti' mo' se awng' ui' na' ya.

Ya tem' ri tuil' a ri muk kon' Hkrit Eun Peucawo' ut' nang veng Kaw'rinhtu' na' mae' peue Eun Peucawo' ut' nang kuing' Ahkaiya' na' pe' gawm' euc'.

² Kah mun' sin' mae' hk'a' kuit nyawk' kuit sam' ran cumyen' lih neum Kuing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

Peucawo' Cawo' yeuh hk'a' kuit nyawk' kuit sam' ran ku ceu gawm' euc' na' Eun

³ Suk' seun' Peucawo' meuh Kuing' Eun Cawo' Yesu' Hkrit e' na' Eun. Eun meuh Kuing' ka hk'a' tuckyak na' mae' Eun meuh Peucawo' Cawo' yeuh hk'a' kuit nyawk' kuit sam' ran ka ku ceu gawm' euc' na'. ⁴ Punta kaw e' cang yeuh peue pun ri hkam' hk'a' tukhka na' ce kuit nyawk' kuit sam' ran ri cu e' hk'a' kuit nyawk' kuit sam' ran pun e' ri rap ri ti neum Peucawo' Eun na', Eun yeuh e' kuit nyawk' kuit sam' ran hk'a' naee hk'a' tukhka gawm' euc' e' na'. ⁵ Kopti hk'a' tukhka e' hk'a' naee Hkrit Eun na' a lawn gawm heun' ko', hk'a' yeuh hk'a' kuit nyawk' kuit sam' ran e' na' a ku kaw baet ri heun' kopti Hkrit Eun yeut. ⁶ Ya lawn pun ri hkam' hk'a' tukhka na' ko', a meuh punta kaw pe' pun hk'a' kuit nyawk' kuit sam' ran mae' hk'a' htut lawtpon na'. Ya lawn pun hk'a' kuit nyawk' kuit sam' ran na' ko', a ku meuh punta kaw pe' pun hk'a' kuit nyawk' kuit sam' ran na' yeut. A kaw yeuh pe' cang yeun' hkam' hk'a' tukhka na' seun' pun ya ri hkam' a na'. ⁷ Keutui' hpum' ya pe' na' keutawn' seupit, kopti yawng ya pe' lawn pun ri pawng' ri hk'a' naee hk'a' tukhka ya na' a neng ko', pe' ku na' pun ri pawng' ri hk'a' naee hk'a' kuit nyawk' kuit sam' ran ya na' peunaw' yeut.

⁸ Ec' awng' na' pe', sum' kah ya pe' yawng lawng hk'a' tukhka pun ya ri hkam' nang kuing' Asa' na'. Ya pun ri hkam' hk'a' geut' nuic na' rot ti kaw ya hkam'

un' laee pun a. Ya hteum' a' yu ri na' kaw un' laee lawtpon. ⁹ Neumneum ka na' ko', hteum' ya ri rot htan kaw yeum na' hawc'. Daecti meuh a yeuhki' na' a meuh punta kaw ya un' papuing jawngkui' tu' ri na' meun, daecti ya papuing Peucawo' Cawo' yeuh peue yeum ce tang kuh' im' na' Eun. ¹⁰ Eun yeuh ya lawtpon hk'ai' htan kaw yeum na'. Eun ku kaw' kaw tang teum' kawm ya bae' yeut. Ya keutui' hpum' Eun kaw suip ri teum' kawm ya heul' bae' seun' teum' kawm pe' ya ri leukah' hk'o' mun' pe' na'. Yeuh keutit' na', kopti meuh a ya ri, peue heun' na' peue kaw mun' keuting ri Peucawo' Eun. Aen' a meuh hk'a' tuckyak Eun Peucawo' tuil' Eun a ri ya, a meuh hk'a' top' Eun leukah' hk'o' mun' ce peue heun' na'.

Paw' lu plin' eun hk'a' kan'

¹² Ku' cang mhawng' ya ri hk'o' cuin na' meuh a hpum' cang yawng ya na' hkam' a sa' hki' a' yu im' ya pang bhen' keute' na' ri hk'a' seunga' chak' na' mae' ri nang puin ka hpum' lih neum Peucawo' Eun na'. Lheu' awn' na' a meuh hk'a' naee vang yeuh ya a' mawo pe' na'. Ya hkuin' a' yu im' hot' cu' yi ka bhen' keute' na', daecti a' yu im' ya hot' mun' Eun Peucawo' na'. ¹³ Kopti hpaw ya ca' tem' ri tuil' ku' kaw pe' lip un' pun leuceng un' pun na' ri pe'. Keutui' hpum' ya ¹⁴ kopti leuceng pun pe' ku' ti ri ceu na' hawc' na', pe' ku na' leuceng pun a meulamlam ri hk'a' naee seunyi Eun Cawo' Yesu' na' seun' mhawng' ya ri hk'o' cuin hk'a' naee pe' ri na', pe' ku na' cang mhawng' ri hk'o' cuin hk'a' naee ya ri pun yeut.

¹⁵ Kopti yum' ui' lawng aen' ce meulamlam ri na', punta kaw pe' pun mun' na' lal' pun na', ui' raen hk'a' kan' kaw ri ing' pleh glue ri pe' nanggal'. ¹⁶ Ui' raen hk'a' kan' na' yeuhki', yam heul' ui' kuing' Masido' ni' na', ui' na' ing' ba' ri veh pleh glue ri pe', hk'a' keutah ing' ui' neum kuing' Masido' ni' na' ui' ku na' tang ing' ba' ri veh pleh glue ri pe' bae. Hawc' ka na', pe' na' ing' tuil' ui' nang kuing' Yu' da. ¹⁷ Yam raen ui' hk'a' kan' yeuhki' na', un' yeuh ui' a rot nang puin ka hpum' ri na' aw? Ui' raen hk'a' kan' na' seun'

ku' yeuh ce peue bhen' keute' na', "ing' ui'" mae' "un' ing' ui'", ui' lah' ri tec hk'o' hk'awng' a aw?

¹⁸ Daecti Peucawo' Eun ci' kati keutawn' yeuh sa' n-haw' na' ko', leukah' ui' na' "ing' ui'" mae' "un' ing' ui'" na', hpaw ui' ca' lah' ri tec hk'o' hk'awng' a. ¹⁹ Kopti Kon' ai' Eun Peucawo' Yesu' Hkrit ku' ui' ri, Silas' mae' Ti' mo' se pao' ris ye lawng Eun na' ri pe' na' Heun ri, "meuh neum" mae' "un' meuh neum" na' a hkuin' cang meuh. Daecti hk'a' naee Heun ri na', saec' yamnhaw' "meuh a neum". ²⁰ Kopti Peucawo' Eun saec' na' yeuh kati ri na' heun' heun' a' neng ko', kati aen' ce "a meuh neum" gawm' euc' hk'a' naee Hkrit Eun. Kop awn' na, punta kaw e' tuil' munhpung' ri Peucawo' Eun na', e' lah' "Amin" ri cu e' Yesu' Eun na'. ²¹ Peucawo' yeuh Eun ye ri mae' pe' ri e' keutawn' hk'a' naee Hkrit Eun. Eun leuk ri ti e'. ²² Eun tawk' ta' ra' ri e', a meuh sa' hki' ka meuh Eun Cawo' e' na'. Punta kaw a htawhkam ku' kaw ing' na', Eun tuil' Cit' seunga' ri na' hk'a' naee hpum' e' na'.

²³ Hk'o' ui' Peucawo' Eun meuh sa' hki' ka ri ti un' laee ing' ba' ui' ri veh nang veng Kaw'rinhtu' na' a meuh kopti un' sum' kah ui' pe' kuit nyhap' na'. ²⁴ Hpaw ya ca' meuh cawo' u' peung hk'a' yum' pe' na'. Daecti punta kaw pe' pun ri rap hk'a' ren' kawn na', ya reurao yeuh kan' na' mae' pe', kopti hk'a' yum' pe' na' keutawn' ka na'.

2 Kop awn' na, ui' kuit a deut kaw ui' un' laee ing' ba' ri veh yeuh pe' kuit nyhap' bae ti pok. ² Kopti ui' lawn yeuh pe' kuit nyhap' ko', a ci' kaw vang a' n-haw' yeuh ui' ren' kawn? Vang a pal ku' yeuh ui' pe' kuit nyhap' na' pe' palkoe. ³ Tem' ui' ri tuil' htawm ri pe' yeuhki' na' a meuh punta yam tang ing' rot ui' ri pe' na' peue htuk' ri yeuh ui' ren' kawn awn' kaw ce un' cang yeuh ui' hpum' lu na'. Ui' yum' hk'a' ren' kawn ui' na' a ku meuh hk'a' ren' kawn pe' na' yeut. ⁴ Kopti tem' ui' ri tuil' htawm ri pe' hk'a' naee vang kuit nyhap' hpum' sui' nyawk' ui' na' mae' leuum' ngai' peuc' ri na', a hkuin' meuh punta kaw ui' yeuh pe' kuit nyhap', daecti a meuh punta kaw ui' yeuh pe' yawng leumeus' ui' pe' pe' a' neng na'.

Ploe' map' nang yeuh ku' kleuc'

⁵ Peue ti ri peue eun lawn yeuh map' na' yeuh peue kuit nyhap' ko', hpaw eun ca' yeuh ui' kuit nyhap', daecti koe yeuh eun pe' kuit nyhap' hk'o' ri gawm' euc'. (Lah' ui' koe hk'o' a ri na' a meuh kopti un' sum' lah' reng ui' a ri heun na'.) ⁶ Hk'a' naee pe' hk'a' heun' ciyang pe' eun na' hk'o' ka hawc'. ⁷ Kop awn' na, pun-

ta kaw eun un' laee gawm kuit nyhap' na', pe' na' htuk' ri ploe' map' eun, yeuh eun kuit nyawk' kuit sam' ran. ⁸ Kop awn' na, ui' hk'o' hk'ang pe' yeuh eun yawng leumeus' pe' eun neumneum na'. ⁹ Tem' ui' ri tuil' htawm ri pe' na' meuh a kopti punta kaw ui' caet ri nawk tup leuceng pe' ri ti leukah' ui' na' ku moeng ka aw. ¹⁰ Pe' lawn ploe' map' a' n-haw' ko', ui' ku kaw ploe' map' eun hkawn' a yeut. Ui' lawn ploe' map' na' ti ri ceu ko', ploe' ui' a kopti meuh a pe' ri nang-gal' Eun Hkrit na'. ¹¹ Aen' meuh a punta Satan na' kaw a un' cang pe' e' na', kopti yawng e' kamkuit vok' ka na'.

Paw' lu hpum' un' sam' ran eun nang veng Tro' as'

¹² Punta kaw ui' heul' sangsawn' leukah' mun' ren' kawn lawng Eun Hkrit na', yam rot ui' nang veng Tro' as' na', ui' pun ri yawng Peucawo' tuh' Eun hk'a' kaw ui' yeuh kan' na' hawc'. ¹³ Daecti kopti un' pun ui' ri hk'eup' Ti' tas' awng' ui' na' eun teh' na', hpaw ui' ca' laee kue' hk'a' kuit nyawk' kuit sam' ran cumyen' hk'a' naee hpum' ri na'. Kop awn' na, ui' gah' hk'ai' ec' awng' na' ce, ui' ing' nang kuing' Masido' ni' na'.

Meuh cawo' pe' hk'a' naee Hkrit Eun

¹⁴ Daecti ya mun' keuting ri Peucawo' Cawo' teuk' va e' hk'a' naee vang pe' na' hk'a' naee Hkrit Eun laleung. Eun yeuh ai' hom' ka cu' yi ri na' muit' heul' ku duih' ri cu Eun e' na'. ¹⁵ Kopti meuh e' ai' hom' Eun Hkrit ku' tan Eun ri Peucawo' Eun na' hk'a' naee muk ce peue rang ri kaw pun hk'a' htut lawtpon na' mae' muk ce peue rang ri kaw pun hk'a' lulaic heul' na' ce. ¹⁶ A meuh ai' ka hk'a' yeum na' pun ku' ti muk na' ce, daecti pun ku' ti muk na' ce a meuh ai' ka hk'a' civit na'. A' n-haw' ci' kaw kuing' ri yeuh kan' yeuhki' na'? ¹⁷ Kopti hpaw ya ca' seun' peue heun' na' ce. Ce ri, heul' paing' ce ri hk'a' leukah' Eun Peucawo' na'. Daecti ya ri, ya sangsawn' a ri cu ya Hkrit Eun na' seun' meuh ya peue kati keutawn' na', seun' meuh ya peue lih neum Peucawo' Eun na' mae' seun' meuh ya peue ut' nang-gal' Eun Peucawo' na'.

Peue yeuh kan' ka kati sat' ca' hk'u'

3 Ya ri, buih suk' seun' meun ya tu' ri na' bae aw? A' ko' seun' ya peue seubu ku' lo' htawm htawhkam neum pe' ri na', a' ko' htawm htawhkam kaw heul' ri pe' na' aw? ² Pe' ri, meuh pe' htawm ya. A tem' ri ri meul' bhum' ya na'. Peue gawm' euc' na' peue pun ri yawng pun ri lip a. ³ Meuh pe' htawm Eun

† 1 Kaw'rinhtu' 5:1

Hkrit na', pe' yeuh a pucti lih hawc'. Aen' a meuh pli' ka kan' ku' yeuh ya na'. A hkuin' tem' ri ri lamuik', daecti a tem' ri ri Cit' seunga' Eun Peucawo' Cawo' a'yu im' na' Eun. A hkuin' tem' ri pang meul' seumu na', daecti a tem' ri ri meul' bhum' peue na'.

⁴Ya yum' a neumneum yeuhki' hk'a' naee Hkrit Eun nanggal' Eun Peucawo' na'. ⁵Kopti ara chanan ya na' ya yeuh ceu nang aen' ce pucti lih na', a hkuin' yeuh keutit'. Daecti ara chanan ya na' lih a neum Peucawo' Eun. ⁶Eun tuil' ya ara chanan kaw ya meuh peue yeuh kan' ka kati sat' ca' hk'u' na'. Aen' a hkuin' meuh kati sat' ca' ka tu' htawm ka leukah' ritroe tem' ri na', daecti a meuh kati sat' ca' ka Cit' seunga' na'. Kopti leukah' ritroe na' toh a'yu, daecti Cit' seunga' na' a tuil' civit na'.

Munhpung' ka kati sat' ca' hk'u'

⁷Ritroe cang yeuh peue yeum ku' tem' ri tawk' ri ri glawk' seumu na' munhpung' ka na' a ceng' til' pucti. A yeuh buh Eun Mo' se na' ceng'. Ceng' awn' a saec' na' baet ti yop heul' ko', daecti peue I' sarela' na' ce un' cang keue' ri buh eun Mo' se na'. ⁸Kop awn' na, ku' ceng' ka munhpung' ka Cit' seunga' na' a ci' na' pe ceng' hk'ai' awn' a a' neng? ⁹Kop awn' na, ku' ceng' ka munhpung' ka hk'a' taws' a' mu kaw pun hk'a' ciyang na' a lawn reng htan' awn' a ko', ku' ceng' ka munhpung' ka hk'a' leupaws seumeu' na' a ci' na' pe reng hk'ai' awn' a a' neng? ¹⁰Neumneum ka na' ko', kopti meuh a ku' ceng' reng nyawk' ka munhpung' maet' maen' na' a yeuh ku' ceng' ka munhpung' nanggal' na' yop heul' hawc'. ¹¹Kopti, ku' yop heul' na' a lawn kue' ceng' ka munhpung' na' ko', ku' keutawn' cot' cu na' a ci' na' pe kue' ceng' ka munhpung' na' lheu' awn' a a' neng?

¹²Kop awn' na, kopti kue' ya vang keutui' hpum' yeuhki' na', ya hpum' hat' han'. ¹³Ya hkuin' seun' Mo' se eun. Mo' se eun ko', punta peue I' sarela' na' kaw ce un' pun ri nyu ku' ceng' ka munhpung' eun na' baet a ri yop heul' na', eun kang' buh ri na' ri hpen' na'. ¹⁴Daecti hpum' ce na' cen' ka, kopti yam lip ce htawm Seunga' hk'im' na', hpen' kang' buh ti glawk' awn' a kawn' kue' rot seunyaen'. A hkuin' nang tuh' ri. Kopti hk'a' naee Hkrit Eun palkoe, hpen' awn' a cang ti ri tec ri pun. ¹⁵Rot seunyaen', yam lip ce leukah' ritroe eun Mo' se na', hpen' awn' a kawn' cu ri kang' hpum' ce na'. ¹⁶Daecti a' nhaw' lawn hpawt' ri ing' ri Cawo' Eun ko', hpen' awn' a kaw pun ri tuh' ri tec ri. ¹⁷Cawo' na' meuh Eun Cit' seunga' na'. Cit' seunga' Eun Cawo' na' a lawn ut' tawngnhaw' ko', mawn' na' a pun

hk'a' lawtpon na'. ¹⁸E' ri gawm' euc', e' hkuin' laee pun ri kang' buh ri na'. E' buih til' ku' ceng' ka munhpung' Eun Cawo' na'. E' pun ri plin' ri baet ri seun' Cawo' Eun ri pun e' munhpung' Eun na' ti htan hawc' ti htan. Ceu nang aen' ce a lih neum Cawo' ku' meuh Cit' seunga' na' Eun.

4 Kop awn' na, kopti pun ya kan' aen' a ri neum hk'a' tukyak Eun Peucawo' na', ya hkuin' hpum' lu. ²Ya tecla hk'a' hpum' vok' sa' pali ku' hk'o' kaic na' gawm' euc'. Ya hkuin' lo' hk'a' vok' hk'a' chi' lai na'. Ya hkuin' hpawt' ri keutah leukah' Eun Peucawo' na'. Daecti ya sangsawn' hk'a' neumneum na' nanggal' Eun Peucawo'. Aen' a meuh punta kaw peue yawng meuh ya peue hk'o' yum' pun. ³Leukah' mun' ren' kawn ya na' a lawn pun ri kuip ri ko', a pun ri kuip ri pun peue kaw lu-laic heul' na' ce. ⁴Punta peue un' yum' na' kaw ce un' cang nyu ku' ceng' ka leukah' mun' ren' kawn munhpung' keuting Eun Hkrit Cawo' meuh ruprang Eun Peucawo' na', peucawo' ka cu maet' maen' na' a yeuh hpum' ce na' ngai' fec'. ⁵Kopti hpaw ya ca' sangsawn' lawng ka tu' meun ya na', daecti ya sangsawn' lawng Eun Yesu' Hkrit meuh Eun Peucawo' na' mae' lawng meuh meun ya mhai' pe' kopti meuh a Yesu' Eun na'. ⁶Kopti Peucawo' aen' lah' Eun, "Kah ku' ceng' na' pucti lih hk'ai' hk'a' duim' lawng na' reu'" †, Eun kah ku' ceng' ri na' til' hk'a' naee hpum' ya na' punta kaw ya kue' ku' ceng' ka cu' yi cang yawng munhpung' Eun Peucawo' ku' pucti lih neum buh Eun Hkrit na'.

⁷Daecti ya ri seun' ya keutong' keute'. Leukah' Eun Peucawo' na' a seun' hk'eung ngos heun' mo' ri hk'a' naee keutong' keute' na'. Ti' ca keuting na' lih a neum Peucawo' Eun, hpaw a ca' lih neum tu' ya na' meun. ⁸Ya saec' na' pun ri hkam' hk'a' nuic peue ri ku hon' ku duih' na' ko', daecti a hkuin' nang rot ti bet' nyai' ya. Ya saec' na' kuit un' doh', daecti a hkuin' nang rot ti htan kuit teuk ya. ⁹Ya saec' na' pun ri hkam' hk'a' ke-unhap' nokneh peue ri na' ko', daecti a hkuin' nang rot ti htan pun ri hkam' hk'a' tecla peue ya na'. Ya saec' na' pun ri hkam' hk'a' peum' peue ri cang' kus na' ko', daecti a hkuin' nang rot ti htan lulaic ya na'. ¹⁰Punta a'yu Eun Yesu' na' kaw a pucti lih neum jawngkui' tu' ya na' yeut na', ya peus hk'a' yeum Eun na' laleung. ¹¹Kopti peue a'yu im' ya ri na' pun ya ri ap ri ri hk'a' yeum Eun na' laleung. Aen' a meuh punta a'yu Eun na' kaw a pucti lih neum jawngkui' tu' cang yeum ya na'. ¹²Kop awn' na, hk'a' yeum na' a buih yeuh kan' hk'a' naee ya. Daecti hk'a' a'yu im' na' a buih yeuh kan' hk'a' naee pe'.

† Yamla 1:3

¹³Tem' a ri nang htawm Seunga' na' yeuhki', "Kopti yum' ui', ui' leukah'."† Kopti kue' ya hk'a' yum' se-un' aen' a na', ya leukah'. ¹⁴Yawng ya Cawo' yeuh Cawo' Yesu' Eun tang kuh' im' na' kaw Eun yeuh ya tang kuh' im' mae' Cawo' Yesu' Eun. Eun kaw va ya ing' ri nanggal' Eun na' mae' pe' tiduih'. ¹⁵Ceu nang aen' ce gawm' euc' a meuh ku' peuehot' pun pe'. Aen' a meuh punta peue yawng mun' Eun Peucawo' na' kaw peue gawm heun' na'. A kaw yeuh hk'a' mun' keuting ri Peucawo' Eun na' gawm heun'. A meuh ku' tuil' munhpung' ri Peucawo' Eun na'.

¹⁶Kop awn' na, ya hkuin' hpum' lu. Hk'a' nham' ke-une hk'a' nok ya na' a saec' na' buih baet ti yawm' lih na' ko', daecti hk'a' civit hk'a' nae ya na' a buih baet ri huk' hawn' hk'u' ku seunyi. ¹⁷Kopti hk'a' tukhka leng seuyung' pun ya ri hkam' ti vut ti yam aen' a na' kaw a yeuh ya pun ri rap munhpung' cot' cu ku' keuting nyawk' nyaec' hk'ai' ceu nang aen' ce na'. ¹⁸Kopti hpaw ya ca' keue' ri ku' cang nyu ri na', daecti keue' ya ri ku' un' cang nyu ri na'. Kopti ku' cang nyu ya na' kue' a ti vut ti yam yawo, daecti ku' un' cang nyu ya na' a kue' cot' cu ri.

5 Yawng e' tup' ka bhen' keute' ku' ut' e' hk'a' nae ka aen' a lawn pun ri lulaic heul' ko', kaw n' kue' e' nya Peucawo' tuil' Eun. A meuh nya cot' cu hk'a' nae kuing' pang mao' na'. A hkuin' caee meuh ku' pleng' ri ri ti' peue. ²Yam buih ut' e' pang bhen' keute' na', kopti sum' cuip' hk'eung e' nya ka kuing' pang mao' na', e' nyel. ³E' lawn pun ri cuip' a ko', e' hkuin' kaw lae ut' gung' gang'. ⁴Yam kaw n' buih ut' e' nang tup' aen' a na', e' peus beus seucen, e' nyel. A meuh kopti un' sum' ut' gung' gang' e' na', daecti sum' cuip' hk'eung e' nya ka kuing' pang mao' na'. Aen' a meuh punta a' yu im' cot' cu na' kaw a gleun jawngkui' tu' kaw pun ri yeum e' na'. ⁵Peucawo' meuh Eun Cawo' yeuh ceu nang aen' ce meuh gawm' euc'. Punta ceu nang aen' kaw a meuh neum na', Eun tuil' Cit' seunga' ri na' meuh sa' hki' ka hawc'.

⁶Kop awn' na, saec' meuh yamnhaw' e' hpum' keutawn'. Yawng e' yam kaw n' ut' e' hk'a' nae jawngkui' tu' ri aen' a na', ut' e' seungai Peucawo' Eun. ⁷A' yu im' e' ri hk'a' yum' na'. Hpaw e' ca' a' yu im' ri ku' cang nyu na'. ⁸E' hpum' keutawn'. E' jaen sum' ut' mae' Peucawo' Eun heun' hk'ai' ut' e' hk'a' nae jawngkui' tu' ri aen' na. ⁹Kop awn' na, e' saec' na' ut' hk'a' nae jawngkui' tu' ri na', a' ko' gah' hk'ai' ka na', e' co' ca' ri kaw meuh peue hit' hpum' Eun Peucawo'. ¹⁰Kopti e' ri gawm' euc', punta

kaw e' pun ri rap ku' kuing' hpaw mae' ku' yeuh e' yam kaw n' ut' e' hk'a' nae jawngkui' tu' ri aen' a na', ku' meuh ku' chak' yeuh e' na', a' ko' ku' un' chak' yeuh e' na', e' kaw kah ri ing' nanggal' ka tenceo' taws' a' mu Eun Hkrit na' ku peue ri.

Kan' yeuh hk'a' htuk' lung Peucawo' Eun

¹¹Kopti yawng ya ri lhat' til ri Peucawo' Eun na', ya sae' caee' sangsawn' peue. Ya ci' meuh peue yeuh sa' n-haw' na' Peucawo' yawng Eun a glih' gleueng'. Ui' ku kuit rot ri hpum' cang yawng pe' na' na' yawng a yeut. ¹²Lah' ya a yeuh keutit' na' ko', ya hkuin' to' ri tang suk' seun' tu' ri na' meun nanggal' pe' bae. Daecti punta kaw pe' ti hk'a' mhawng' ya ri hk'o' cuin na' pe' na' cang heul' top' leukah' ce peue mhawng' ri hk'o' cuin mae' ku' cang nyu na' tang' ku' kue' hk'a' nae hpum' na' pun na'. ¹³Ya lawn ma' rat ko', ma' rat ya pun Peucawo' Eun. Ya lawn chak' ngam ko', chak' ngam ya pun pe' ri. ¹⁴Hk'a' leumeus' keus Eun Hkrit na' u' peung ka e'. Kopti yawng e' peue ti peue na' pun Eun ri hkam' ri yeum pun peue gawm' euc' na', kop awn' na, peue gawm' euc' na' peue yeum hawc'. ¹⁵Kopti pun Eun ri yeum pun peue gawm' euc' na', peue kaw n' a' yu im' na' peue na' un' htuk' ri suip ri a' yu im' pun tu' ri na' meun, daecti peue na' htuk' ri a' yu im' pun Cawo' ku' pun ri sum a' yu ri hawc' ko' Eun tang kuh' im' pun peue na' Eun.

¹⁶Kop awn' na, tang' neum maet' maen' na' heul', ya hkuin' kaw lae tawk lah' a' nhaw' hot' seun' hk'a' yeuh ce peue bhen' keute' na'. Nanggal' aen' na ya saec' na' tawn tawk lah' Hkrit Eun hot' seun' hk'a' yeuh ce peue bhen' keute' na' ko', daecti maet' maen' ya hkuin' kaw lae yeuh a bae. ¹⁷Kop awn' na, a' nhaw' lawn ut' hk'a' nae Hkrit Eun ko', keut' eun ri meuh peue pun ri pleng' ri meuh peue hk'u' hawc'. Ku' hk'im' na' a rai' heul', a tang meuh ku' hk'u' gawm' euc' ri. ¹⁸Ceu nang aen' ce gawm' euc' lih a neum Peucawo' Eun. Eun yeuh e' htuk' lung ri ri cu Eun Hkrit Eun. Eun tuil' kan' kaw yeuh peue htuk' lung ri na' ri ya. ¹⁹Aen' a meuh Peucawo' yeuh Eun peue bhen' keute' na' peue tang htuk' lung ri ri cu Eun Hkrit Eun na'. Eun hkuin' mawt map' peue na'. Eun tuil' ya heul' sangsawn' lawng kaw peue htuk' lung ri na'. ²⁰Kop awn' na, ya meuh nang tang' tu' Eun Hkrit. Peucawo' Eun klawng ri ti pe' ri cu Eun ya ri na'. Hk'a' nae muis Eun Hkrit na', ya hk'o' pe' na' tang htuk' lung Peucawo' Eun reu'. ²¹Peucawo' yeuh Eun Hkrit ku' un' kue' map' na' Eun kue' map' na' kopti e' ri. Aen' a

† Suk' seun' 116:10

meuh punta hk'a' naee Hkrit Eun, kaw e' pun ri meuh peue leupaws seumeu' Eun Peucawo' na'.

6 Hk'a' naee vang meuh e' peue yeuh kan' Eun Peucawo' na' ya hk'o' hk'ang a ri pe', pawlaee yeuh mun' Eun Peucawo' pun pe' ri rap ri ti na' meuh ku' hk'o' hk'awng'.² Kopti Peucawo' lah' Eun, "Hk'a' naee yam htuk' a hpum' Ui' na', leuceng Ui' leukah' mi na'.

Hk'a' naee seunyi ka hk'a' htut lawtpon na', Ui' teum' kawm mi."[†]

Ya lah' a ri pe', maet' maen' na' meuh a yam htuk' hpum' Eun Peucawo'. Seunyaen' na' meuh a seunyi ka hk'a' htut lawtpon na'.

Hk'a' tukhka Paw'lu pun eun ri hkam'

³ Punta kaw peue un' cang chaw hkamram kan' ku' yeuh ya na', ya hkuin' yeuh ku' seuduih leuveul' a' n-haw' saec' ti peue. ⁴ Daecti punta kaw peue yawng meuh ya peue yeuh kan' Eun Peucawo' na', ya yeuh ku' hk'a' ku' ceu na' hk'a' naee hk'a' yeun' hkam, hk'a' tukhka na' mae' hk'a' nyhap' na'. ⁵ Ya ku' pun ri hkam' hk'a' ta' faet', pun ri lec htawng', pun ri hkam' hk'a' suksak yeuh ce peue kuing' na'. Ya yeuh kan' katcin, jal it' ri mae' ngeup' ri. ⁶ Ya rokxa' hk'a' seunga' chak', hk'a' cang yawng, hk'a' kuit lang' na' mae' hk'a' cang tukyak ri na'. Cit' seunga' chak' na' a ut' mae' ya. Hk'a' leumeus' keus ya na' a meuh hk'a' leumeus' keus neumneum. ⁷ Ya lah' ku' neumneum. Ti' ca Eun Peucawo' na' a yeuh kan' hk'a' naee ya. Ya jhawp' hk'eung an' nya ka hk'a' leupaws seumeu' na' hk'a' ti' a' tawm' mae' hk'a' ti' a' ve' ri. ⁸ Ya saec' na' pun un' pun munhpung' ri, a' ko' ya saec' na' pun hk'a' suk' seun', a' ko' hk'a' chaw hkamram peue ri na' ko', ya kaw lah' ku' neumneum ka lawng ya na' laleung. Daecti ngon' peue lah' ya un' yeuh keutit'. ⁹ Ya saec' na' meuh peue peue yawng ya gawm' euc' ri ko', daecti peue yeuh ri seun' un' yawng ri ya ko'. Ya saec' na' seun' peue buih yeum na' ko', daecti ya kawm' a' yu im'. Ya saec' na' pun ri hkam' hk'a' ciyang peue ri na' ko', daecti a' hkuin' nang hk'o' ya yeum. ¹⁰ Ya saec' na' pun ri hkam' hk'a' tukhka na' ko', daecti ya ren' kawn laleung. Ya saec' na' hk'o' tukyak na' ko', daecti ya yeuh peue meuneum heun' peue. Ya saec' meuh peue un' kue' keunhaw' na' ko', daecti ku' ceu na' meuh a is' ya.

¹¹ Peue Kaw'rinhtu' ec' awng' na' pe', lah' seumeu' ya a ri pe', tuh' ya hpum' ri vahveung ri pe'. ¹² Hpaw ya ca' sawng' hpum' leumeus' ri na' ri pe', daecti sawng' pe' hpum' leumeus' ri na' ri ya. ¹³ Kaw ya lah' a

ri pe' seun' lah' ya a ri kon' ri na' ce na'. Hk'o' pe' tuh' hpum' ri na' vahveung ri ya reu'.

Pawlaee peus aec' tiduih' mae' peue un' yum'

¹⁴ Pawlaee peus aec' tiduih' mae' peue un' yum' na' ce, kopti hk'a' leupaws seumeu' na' a ci' kaw cang pawng' ri mae' hk'a' un' leupaws seumeu' na' yeuh sa' nhaw'? Ku' ceng' na' a ci' kaw cang to' ri mae' ku' duim' lawng na' yeuh sa' nhaw'? ¹⁵ Hkrit Eun ci' kaw cang to' ri mae' Belial eun yeuh sa' nhaw'? Peue yum' mae' peue un' yum' na' ce ci' kue' ku' to' ri ri puri keunhaw'? ¹⁶ Nya hk'o' mun' Eun Peucawo' na' a ci' kaw cang hkawmaen ruphtu na' yeuh sa' nhaw'? Kopti meuh e' nya hk'o' mun' Eun Peucawo' Cawo' a' yu im' na' Eun. Seun' Peucawo' lah' Eun, "Kaw Ui' ut' mae' ce, Ui' kaw heul' mae' ce. Ui' kaw meuh Peucawo' ce, ce ku' kaw meuh peue ceu Ui'."^{††}

¹⁷ Peucawo' Eun ku' lah' a hk'a' naee htawm Seunga' ton ku' seubu na',

"Pucti heul' hk'ai' ce, hkvat' ri sawng' ut' reu'.

Pawlaee paic' ku' un' chak' un' seunga' na', hawc' ko', Ui' kaw rap ri ti pe'."[‡]

¹⁸ "Kaw Ui' meuh Kuiing' pe', pe' kaw meuh kon' beun' kon' me Ui'.

Peucawo' ti' ca keuting na' Eun lah' a yeuhki'."^{††}

7 A' mawo leumeus' na' pe', kopti pun e' leukah' kati yeuhki' na' hawc' na', kah e' saic' meun ri tec ku' yeuh jawngkui' tu' mae' civit e' hk'aw' jeuk na' reu'. Yeuh hk'a' seunga' chak' na' htonnuk ri hk'a' lhat' til ri Peucawo' Eun na' reu'.

Paw'lu ren' kawn eun

² Hk'o' pe' tah' hpum' ri na' rap ri ti ya. Hpaw ya ca' yeuh ku' kleuc' ri a' nhaw'. Hpaw ya ca' yeuh a' nhaw' lulaic' heul'. Hpaw ya ca' chi' lai ri hk'a' a' nhaw'. ³ Lah' ui' a yeuhki' na' a hkuin' to' ri meuh sum' tang' ui' map' ri pe'. Daecti tawn lah' ui' a ri pe' nanggal' aen' a yeut, ut' pe' hk'a' naee hpum' ya a hk'o' a rot ti htan kaw ya cu ri yeum yawo mae' pe' a ku' na' pun na'. ⁴ Yum' ui' pe' meulamlam ri. Ui' mhawng' ri hk'o' cuin nyawk' kopti pe' ri. Ui' pun kaw' reng ri nyawk'. Hk'a' naee hk'a' tukhka ya na' gawm' euc', ui' ku' kawm' kue' hk'a' ren' kawn na' htonnuk.

⁵ Kopti yam rot ya nang kuing' Masido' ni' na', ya hkuin' pun ri keului' ri saec' peunae'. Hk'a' tukhka na' kue' a rop ya. Hk'a' nok na' a kue' hk'a' kleuc'

† I' saya' 49:8

†† Fae' 26:12; Yerami' 32:38; Yesahkela' 37:27‡ I' saya' 52:11; Yesahkela' 20:34, 41‡‡ 2 Samoela' 7:8, 14

puri, hk'a' naee na' a kue' ku' hk'o' lhat'. ⁶Daecti Peucawo' Cawo' cang yeuh peue hpum' lu ce tang kuit sam' ran na' Eun yeuh ya kuit sam' ran ri cus' Eun Ti' - tas' eun heul' ri ya. ⁷Ya hkuin' kuit sam' ran ri Ti' tas' heul' rot eun na' palkoe, daecti a ku meuh kopti hk'a' kuit sam' ran tuil' pe' ri Ti' tas' eun na' yeut. Eun lah' a ri ya, lah' pe' lah' ri sum' nyu ya, pe' hki' keung ri ya pe' heul' kuit nyhap'. Aen' ce a yeuh ui' gawm ren' kawn nyawk'.

⁸Htawm tem' ui' ri tuil' ri pe' na' a saec' na' yeuh pe' hpum' lu na' ko', daecti ui' hkuin' hpum' lu. Nanggal' aen' na, ui' saec' na' tawn hpum' lu, maet' maen' ui' hkuin' laee hpum' lu. Pun ui' ri yawng htawm aen' yeuh a pe' hpum' lu yawo ti vut ti yam.

⁹Maet' maen' na' ren' kawn ui'. A hkuin' meuh kopti yeuh ui' pe' hpum' lu na', daecti meuh a kopti hk'a' hpum' lu awn' yeuh a pe' tang taws' hpum' fuin map' ri na', kopti hpum' lu pe' hot' alo Eun Peucawo' na'. Kop awn' na, ya hkuin' pun ri yeuh ku' sui' ri pe'.

¹⁰Kopti hk'a' hpum' lu hot' alo Eun Peucawo' na' yeuh a peue tang taws' hpum' fuin map' ri na', a va peue ing' ri hk'a' htut lawtpon na'. A hkuin' meuh ku' hpum' lu. Daecti hk'a' hpum' lu ka bhen' keute' na' a va peue heul' ri hk'a' yeum na'. ¹¹Hk'a' hpum' lu hot' alo Eun Peucawo' na' a ci' yeuh keunhaw' na' pucti lih hk'a' - naee pe' na' kuit ri nawk a reu', a meuh kue' pe' hpum' co' ca', lah' meun tu' ri leupaws seumeu', hk'a' seungeueng' ri peue yeuh map' na' ce, hk'a' pawn kui' ri, hk'a' keutui' hpum', hk'a' peus hpum' ri mae' hk'a' tang yeuh ri top' na'. Un' laee yeuh kleuc' pe' ri ceu nang aen' ce na' †, pe' htawhkam meun a ri ti hawc'. ¹²Kop awn' na, tem' ui' htawm ri pe' na' a hkuin' meuh pun peue yeuh ku' kleuc', a' ko' pun peue pun ri hkam' ku' kleuc' na' ce. Daecti a meuh punta pe' ci' pe ti a' ye' ya a' neng na', kaw pe' pun ri yawng a nanggal' Eun Peucawo' na'. ¹³Kopti meuh a ceu nang aen' ce na', ya pun kaw' reng ri.

Lheu' si' pun ya kaw' reng ri na', ya ku jaen ren' kawn nyawk' kopti pun ya ri nyu Ti' tas' eun ci' pe ren' kawn a' neng kopti baee pe' kaw' reng ka civit eun na'. ¹⁴Ui' lah' eun mhawng' lawng mhawng' ui' ri hk'o' cuin mae' pe' na', hpaw pe' ca' yeuh ui' kaic. Seun' ku' lah' ya ri pe' ku ceu na' meuh a ku' meuh neum na', ku' mhawng' ya ri hk'o' cuin mae' pe' ri Ti' tas' eun na' a ku meuh ku' neumneum yeut, a pucti lih glih' gleueng' hawc'. ¹⁵Yam Ti' tas' kuit rot eun ri lawng hk'a' cang leuceng pe' ri ti na' mae' lawng hk'a' rap pe' ri ti eun mae' lhat' keuyuing' ri na', eun

jaen gawm leumeus' pe' heun' nyawk'. ¹⁶Kopti cang yum' pun pe' hk'a' naee ku ceu na', ui' ren' kawn.

Tiptan mae' hpum' vahveung ri

8 Ec' awng' na' pe', Peucawo' Eun ci' nap mun' ri muk kon' Hkrit nang kuing' Masido' ni' na' ce yeuh sa' nhaw' na', ya sum' kah pe' yawng a. ²Yam pun ce ri hkam' hk'a' cop' long ku' kuit nyhap' reng nyawk' na', hk'a' ren' kawn htonnuk ce na' mae' hk'a' hk'o' tukyak nyawk' ce na' nuk veh bah ka a keut' ri meuh hk'a' tiptan heun' heun' na'. ³Kopti ui' ku pen' hkam' sa' hki' ka tiptan ce hot' seun' ku' yeuh pun ce na'. Neumneum ka na' ko', kawn' tang tiptan ce lheu' ku' yeuh pun ce na' mae' kue' ce cetana na'. ⁴Ce sae' cae' hk'o' a ri ya hk'o' ri pawng' ri mae' kan' teum' kawm muk kon' Hkrit na' ce. ⁵Ce kawn' yeuh a lheu' ku' keutui' hpum' ya na'. Ce sawng' tan tu' ri na' meun ri Peucawo' Eun nanggal'. Hawc' ko', ce tan tu' ri na' ri ya hot' seun' alo Eun Peucawo' na'. ⁶Kop awn' na, ya tuil' kaw' reng eun Ti' tas' ku' meuh nang tang' ri yeuh kan' teum' kawm aen' a mae' pe' na' eun kah eun heul' suip ri teum' kawm pe' yeuh a hawc'. ⁷Seun' ara pe' ri ku hk'a' ku ceu na', hk'a' yum', a' ko' hk'a' leukah' leupong, a' ko' hk'a' cu' yi, a' ko' hk'a' co' ca', a' ko' hk'a' leumeus' pe' ya na', yeuh ri ara ri kan' teum' kawm aen' a yeut reu'.

⁸Lah' ui' a yeuhki' na' hpaw ui' ca' to' ri tuil' leukah' tec' teng pe', daecti sum' caet ui' ri nawk hk'a' leumeus' keus sut' hpum' pe' na' ri keutec ui' pe' mae' hk'a' co' ca' ce peue seubu na'. ⁹Kopti yawng pe' mun' Eun Cawo' Yesu' Hkrit e' na' hawc'. Eun saec' na' meuneum ko', Eun yawm' ri hk'o' tukyak pun pe'. Aen' a meuh punta kaw pe' pun ri meuneum kopti hk'a' hk'o' tukyak Eun na'.

¹⁰Kaw ui' tuil' kamkuit chak' to' ri ri lawng aen' a na' ri pe'. Neum lawn na', meuh pe' muk tang' ri yeuh kan' tiptan na' nanggal' peue a hkuin' meuh awn' a koe, daecti pe' ku meuh muk kue' hpum' sum' tiptan na' nanggal' peue yeut. ¹¹Maet' maen' na', heul' yeuh a hawc' euc' hot' seun' hpum' huk' sum' tiptan pe' na' hot' htan yeuh pun pe' a na' reu'. ¹²Kopti pe' lawn kue' hpum' sum' tiptan na' ko', Peucawo' kaw Eun nyu a hit' hpum' ri rap ri ti a hot' seun' ku' kue' pe' na', a hkuin' kaw meuh hot' seun' ku' un' kue' pe' na'.

¹³Hpaw a ca' to' ri meuh yeuh ui' beus peue na' seuyung', ui' tawl' yeuh beus pe' na' seucen. Daecti sum' kah ui' a keuteul puri. ¹⁴Yam kue' pe' htonnuk na', htuk' pe' ri teum' kawm peue cuthkuin' na' ce.

† 1 Kaw'rinhtu' 5:1

Aen' a meuh punta yam na' ce kue' htonnuk ce na' tang cang teum' kawm hk'a' cuthkuin' pe' na'. A na' keuteul puri,¹⁵ hot' seun' ku' tem' ri nang htawm Seunga' na', "Peue seut' ri ti heun' na' a hkuin' laee kue' nang lheu' ka. Peue seut' ri ti leng na' ce hkuin' laee kue' ku' cuthkuin'."[†]

Cus' Ti'tas' eun heul' nang veng Kaw'rinhtu'

¹⁶Mun' keuting ui' ri Peucawo' Cawo' tuil' Ti'tas' eun kue' hpum' kuit nyhap' pun pe' seun' ui' ri kue' ui' yeut na'.¹⁷Kopti meuh a leuceng eun leukah' hk'o' hk'ang ya na' palkoe a hkuin' meuh, daecti lak' kuit meun eun ri sum' heul' ri pe' nyawk'.¹⁸Ya ku cus' ec'awng' ti peue na' eun heul' mae' Ti'tas' eun yeut. Eun meuh peue muis laws' hk'a' naee kan' sangsawn' leukah' mun' ren' kawm na' hk'a' naee muk kon' Hkrit na' ce.¹⁹Lheu' awn' na, muk kon' Hkrit na' ce leuk ec'awng' awn' eun heul' mae' ya yam pin' ya paec tan heul' nang veng Yeru' salaem na'. Yeuh ya kan' pin' ri heul' tuil' paec tan aen' a ko', a meuh punta kaw ya tuil' munhpung' Eun Peucawo' na' mae' punta kaw a yeuh hpum' sum' teum' kawm ya na' pucti lih glih' - gleueng' na'.²⁰Ya hkuin' sum' kah' a'nhaw' chaw hkamram ri hk'a' naee vang gvah ya ri tuil' paec tan heun' aen' a na'.²¹Kopti ya hkuin' sum' yeuh ku' cawp' na' nanggal' Eun Peucawo' na' palkoe, daecti ya ku sum' yeuh ku' cawp' na' nanggal' ce peue na' yeut.

²²Ya ku cus' ec'awng' seubu ti peue na' eun heul' mae' ka yeut. Ec'awng' ku' ti peue awn' meuh eun peue ren' seuyung' seuyah' hk'a' naee hk'a' heun' ceu na', ya ku caet ti nawk eun heun' pok hawc'. Maet' - maen', kopti tah' eun hpum' ri ri pe' na', eun jaen gawm ren' seuyung' seuyah' nyawk'.²³Pun Ti'tas' eun rit', meuh eun pu yeuh kan' mae' ui' pun pe'. Pun ec'awng' aen' ka ko', ka meuh peue cus' ce muk kon' Hkrit na'. Ka meuh munhpung' Eun Hkrit.²⁴Kop awn' na, tuh' ka nyu hk'a' leumeus' keus pe' na' mae' hk'a' mhawng' ya ri hk'o' cuin mae' pe' na' reu'. Yeuh keutit' na', muk kon' Hkrit na' ce ku kaw pun ri nyu a yeut.

9 Lawng hk'a' teum' kawm peue Eun Peucawo' na' ce ko', hpaw ui' ca' kaw laee lo' ri tem' lai ri pe'.

²Kopti yawng ui' kue' pe' hpum' sum' teum' kawm peue na'. Ui' ku lah' ri mhawng' ri hk'o' cuin mae' ka ri peue Masido' ni' maen' na' ce. Ui' lah' ce mhawng' peue Ahkaiya' na' rangraen pe' ri kaw teum' kawm peue tang' neum lawn na' hawc'. Hk'a' hpum' huk' pe' aen' a ku yeuh ce hpum' huk' hk'a' heun' yeut.³Daecti

cus' ui' ec'awng' aen' ce heul' ri pe' na' a meuh punta hk'a' mhawng' ui' ri hk'o' cuin mae' pe' na' kaw a un' meuh ku' hk'o' hk'awng' na'. Daecti a kaw meuh punta kaw pe' rangraen ri meulamlam ri hot' seun' ku' lah' ui' ri pe' hawc' na'.⁴Kopti peue Masido' ni' na' ce lawn cang caw ri hot' ui' ing', ce na' nyu un' rangraen pe' ri hot' seun' ku' mhawng' ui' ri hk'o' cuin mae' pe' na' ko', pe' hkuin' kaw pun ri kaic koe, saec' meuh ya ri, ya ku kaw pun ri kaic yeut.⁵Kop awn' na, kuit ui' kaw ui' kah ri cus' ec'awng' awn' ce bai heul' ri pe' nanggal' ui'. Aen' a meuh punta kaw pe' bai rangraen ri uin' paec tan na' hot' seun' yeuh pe' kati ri hawc' na'. A kaw meuh paec tan tan ri mae' hpum' vahveung ri, a hkuin' kaw meuh tan mae' meuh a hk'a' tec' teng.

⁶Yeuh ri pawn a, peue puin' leng na' pun ce ri vuic leng. Peue puin' heun' na' ce pun ri vuic heun'.⁷Pe' ri ku peue, htuk' pe' ri tan hot' seun' ku' kuit pe' deut hk'a' naee hpum' ri na'. Pawlaee yeuh a mae' hkoe' - mang' ri a, a'ko' mae' meuh a hk'a' tec' teng na'. Kopti Peucawo' leumeus' Eun peue ren' kawm tiptan na' peue.⁸Peucawo' Eun cang tuil' mun' htonnuk ku ceu na' ri pe'. Aen' a meuh punta kaw pe' kue' ku' lo' ku ceu na' htonnuk laleung na', mae' a ku kaw kue' ku' lo' ri hk'a' naee vang yeuh pe' kan' chak' ku ceu na' htonnuk.⁹Aen' a meuh hot' seun' ku' tem' ri hk'a' - naee htawm Seunga' na',

"Gvah eun ri tuil' ri peue hk'o' tukyak na' ce.

Hk'a' leupaws seumeu' eun na' a keutawn' cot' cu."^{††}
¹⁰Maet' maen', Peucawo' Cawo' tuil' ku' seumal na' ri nang puin' ku' seumal, Cawo' tuil' ku' hk'a' na' ri peue na' Eun ku kaw yeuh ku' puin' pe' na' baet ri gawm heun', Eun ku kaw yeuh pli' ka hk'a' leupaws seumeu' pe' na' baet ri gawm huk' hawn'.¹¹Punta kaw pe' cang teum' kawm peue laleung na', Eun kaw yeuh pe' me-uneum ri ku hk'a' ku ceu na'. Kopti meuh a hk'a' teum' kawm pe' peue ri cu pe' ya na', peue kaw mun' keuting ri Peucawo' Eun.

¹²Kopti kan' teum' kawm peue ku' buih yeuh pe' aen' a ko', hpaw a ca' teum' kawm peue Eun Peucawo' ku' cuthkuin' na' ce palkoe, daecti a ku yeuh hk'a' mun' keuting ri Peucawo' Eun na' pucti lih heun' heun' yeut.
¹³Pe' ci' meuh peue yeuh sa'nhaw' na' kaw peue yawng a hk'a' naee kan' teum' kawm pe' peue aen' na. Kopti meuh a kan' teum' kawm aen' na mae' kopti yum' pe', pe' leuceng ri ti hot' ri yeuh leukah' mun' ren' kawm Eun Hkrit na' mae' kopti teum' kawm pe' ce bae peue seubu gawm' euc' na' peue mae' hpum'

† Pucti heul' 16:18

†† Suk' seun' 112:9

vahveung ri na', peue kaw suk' seun' Peucawo' Eun.
¹⁴Kopti Peucawo' nap Eun mun' heun' keuting ri pe' na', ce kaw keutui' hpum' pe' nyawk', hk'o' mun' pun pe'.¹⁵Kopti Peucawo' tuil' Eun lapsawng' un' laee pe lah' na', mun' keuting ri Heun reu'.

Paw'lu lah' eun leukah' to'tam' ku' kaw ing' yeuh kan' eun lu na'

10 Ui' ri, meuh ui' Paw'lu. Ui' hk'o' hk'ang a ri pe' hk'a' naee hpum' onawn' Eun Hkrit na'. Yam ut' ui' mae' pe' na', lah' pe' ui' hpum' onawn'. Daecti yam ut' ui' seungai pe' na', pe' lah' ui' hpum' hat' han'.²Yam ing' rot ui' ri pe' na', ui' hk'o' a ri pe', pawlaee kah ui' yeuh hpum' hat' han' ri na' hot' seun' ku' kuit ui' ri kaw yeuh a ri peue ngon' ku' hteum' pe' ya a'yu im' hot' hk'a' a'yu im' ka bhen' keute' na' pe' na'.³Kopti ya saec' ut' pang bhen' keute' na' ko', daecti ya hkuin' peue'ng' suik' hot' seun' hk'a' peue'ng' suik' ka bhen' keute' na'.⁴Hk'eung an' nya ya na' a hkuin' meuh hk'eung an' nya ka bhen' keute' na', daecti a meuh hk'eung an' nya kue' ti'ca Eun Peucawo'. A cang yeuh tawp na' ce lhu' jah heul'.⁵Ya yeuh ku' htu' hting' na' mae' ku' ham' tap hk'a' kaw cang yawng cu' yi Eun Peucawo' na' ce lhu' jah heul'. Ya tec' teng kamkuit ku kamkuit na' yawm' ri leuceng ri ti leukah' Eun Hkrit na'.⁶Yam hawc' pe' leuceng ri ti a htonnuk na' ko', ya rangraen ri kaw ciyang peue un' leuceng ri ti na' ce hawc'.

⁷Keue' pe' ri hk'a' nok ka na' palkoe. A'nhaw' lawn na' sawn' meun ri meuh peue Eun Hkrit ko', eun ku na' htuk' ri caet ri nawk meuh ya peue Eun Hkrit seun' heun ri yeut na'.⁸Kopti ti'ca ku' Peucawo' tuil' Eun ri ui' punta kaw ui' yeuh pe' huk' hawn' na' a hkuin' meuh punta kaw ui' yeuh pe' lulaic na', ui' saec' na' ca ri mhawng' ri hk'o' cuin mae' ka hk'a' heun' ko', ui' hkuin' kaic ri ka.⁹Tem' ui' htawm yeuhki' na', hpaw a ca' meuh kopti sum' yeuh ui' pe' lhat' na'.¹⁰Kopti peue ngon' na' lah' ce, "Htawm eun Paw'lu na' a saec' na' seucen reng, mae' a ti'ca keuting nyawk' na' ko', daecti yam ut' eun mae' e' na', kawl' reng kloe eun. Leukah' eun na' a hkuin' chae' cang lo' ri."¹¹Kah peue awn' ce yawng a yeuhki' reu', htawm ui' na' a lawn lah' a yeuh sa'nhaw' yam un' ut' ui' na' ko', yam ing' ui' na' ui' ku kaw yeuh seun' awn' a yeut.

¹²Hpaw ya ca' hat' ri keutec tu' ri na' mae' peue ngon' ku' suk' seun' meun tu' ri na' ce. Yam sawng' keutec meun ce tu' ri na' mae' puri na', ce meuh peue un' kue' cu' yi.¹³Hpaw ya ca' kaw mhawng' ri hk'o' cuin pon lheu', daecti kaw ya mhawng' ri

hk'o' cuin yawo pal mae' ku' Peucawo' hkvet' Eun ri uin' pun ya na'. Saec' pe' ri, pe' ku pawng' ri mae' vang hkvet' ri awn' a yeut.¹⁴Hpaw ya ca' mhawng' ri hk'o' cuin pon lheu', meuh a kopti ti ya leukah' mun' ren' kawn Eun Hkrit na' ing' ri pe' na'. Daecti ya lawn un' ing' ri pe' ko', na' ya mhawng' ri hk'o' cuin pon lheu' yeut.¹⁵Hpaw ya ca' mhawng' ri hk'o' cuin pon lheu'. Hpaw ya ca' mhawng' ri hk'o' cuin mae' kan' ku' yeuh ce peue seubu na'. Daecti keutui' hpum' ya yam hk'a' yum' pe' na' a keuting huk' hawn' na', kan' ya na' a ku na' jaen gawm vahveung heul' hk'a' naee pe' ri yeut.¹⁶Aen' a meuh punta kaw ya pun ri sangsawn' leukah' mun' ren' kawn na' pon vang ut' pe' na' heul'. Ya hkuin' sum' mhawng' ri hk'o' cuin mae' kan' ku' yeuh nang kuing' peue seubu na'.¹⁷Daecti "A'nhaw' lawn sum' mhawng' ri hk'o' cuin ko', mhawng' ri hk'o' cuin mae' Peucawo' Eun reu'."¹⁸Kopti peue suk' seun' tu' ri meun na' eun ko', hpaw eun ca' meuh peue kue' munhpung', daecti peue kue' munhpung' na' meuh eun peue ku' Peucawo' suk' seun' Eun na' eun.

Paw'lu mae' peue caee caec' Eun Yesu' na' ce

11 Ui' sum' hk'o' pe' yeun' hkam ri leuceng hk'a' nga' suisa ui' na'. Daecti neumneum ka na' ko', pe' ku buih leuceng a hawc'.²Ui' hki' keung ri pe' seun' Peucawo' hki' keung Eun ri pe' na' yeut. Kopti punta kaw ui' tan pe' ri Hkrit Eun seun' meuh pe' kon' hk'ih' plot' lon seunga' chak' na', ui' yeuh kati ri hawc' kaw kah pe' ti yawo ri is' me ti peue na' Eun.³Daecti seun' seueueng' na' cop' long ka E'va eun ri hk'a' chi' lai ri na', ui' hki' keung ri saec' meuh hpum' pe' na' a na' cang pun ri cop' long ri kleuc' heul' hk'ai' hk'a' kati keutawn' na' mae' hk'ai' hk'a' seunga' chak' kue' pe' hk'a' naee Hkrit Eun na'.⁴Kopti a'nhaw' lawn ing' sangsawn' pe' ri lawng eun Yesu' seubu a chat ku' sangsawn' ya ri pe' na', a'ko' pe' lawn rap ri ti cit' seunga' seubu a chat ku' pun pe' ri rap ri ti a hawc' na', a'ko' rap pe' ri ti leukah' mun' ren' kawn seubu a chat ku' pun pe' ri rap ri ti a hawc' na' ko', pe' yeun' hkam rap ri ti sam' ran a.⁵Daecti kuit ui' ri un' chaw hk'ai' "peue caee ara" awn' ce.⁶Ui' saec' na' un' ara ri leukah' ko', daecti kue' ui' cu' yi. Ya yeuh pe' nawk a glih' gleueng' ku hk'a' ka hawc'.⁷Tang' ui' tu' ri na' tem, ui' yuk pe' ri lhung' ri sangsawn' ui' pe' ri leukah' mun' ren' kawn Eun Peucawo' na' ui' un' laee sawn' ngos ka na', ui' kleuc' aw?⁸Punta kaw ui' yeuh mhai' pe' na', ui' con' muk

kon' Hkrit seubu na' ce ri rap ui' ri ti leumuil tan ce na'.
⁹Yam ut' ui' mae' pe' ui' lo' ku' ti ri ceu na', ui' hkuin' yeuh a meuh beus ri a'nhaw' saec' ti peue. Kopti ec' awng' ing' neum kuing' Masido' ni' na' teum' kawm ce ku' lo' ui' na' ce. Kop awn' na punta kaw ui' un' meuh beus ri pe' na', ui' uin' sati ri. Ui' ku kaw yeuh a ko' heul' hk'a' nanggal' ka yeut.¹⁰ Seun' hk'a' neumneum Eun Hkrit na' kue' a hk'a' naee ui' na', a'nhaw' hkuin' kaw cang ham' tap ui' un' kah ui' lah' leukah' mhawng' ui' ri hk'o' cuin ri lawng aen' a hk'a' naee kuing' Ahkaiya' na' saec' ti peue.¹¹ A ci' meuh kop keunhaw' ? Meuh a kopti un' leumeus' ui' pe' na' aw? Peucawo' yawng Eun leumeus' ui' pe' yeut.¹² Punta peue ngon' na' kaw ce un' laee pun ri lah' ri mhawng' ri hk'o' cuin mae' ku' yeuh ce na' seun' a is' ya na', ui' kaw tang suip ri yeuh ku' buih yeuh ui' maet' maen' na' heul' yeut.

¹³Kopti peue awn' meuh ce peue caee caec' Eun Yesu'. Ce meuh nang yeuh kan' cang chi' lai. Ce meuh peue guil ri meuh peue caee Eun Yesu'.¹⁴ Ku' yeuhki' na', a hkuin' meuh ku' hk'o' am'. Saec' meuh Satan na', a cang guil ri yeuh ri meuh in' hpom ka ku' ceng' na' yeut.¹⁵ Kop awn' na, peue caee ka Satan na' ce lawn guil ri yeuh ri meuh peue caee ka hk'a' leupaws seumeu' na' ko', a hkuin' meuh ku' hk'o' am'. Vang tisut' ce na' kaw a kuing' hpaw mae' ku' yeuh ce na' yeut.

Paw'lu mhawng' eun ri hk'o' cuin mae' ku' tukhka ri na'

¹⁶Kaw ui' tang lah' a bae ti pok, pawlaee hteum' ui' meuh peue suisa. Daecti pe' lawn hteum' a yeuhki' ko', punta kaw ui' cang mhawng' ri hk'o' cuin peunaeng' na', hk'o' pe' rap ri ti ui' seun' rap pe' ri ti peue nga' suisa na' ko'.¹⁷ (Yeuh ui' hpum' ri hat' han' ui' mhawng' ri hk'o' cuin lah' a yeuhki' na', hpaw ui' ca' lah' a hot' hk'a' Eun Peucawo' na', daecti lah' ui' a seun' meuh ui' peue nga' suisa na' ko'.)¹⁸ Seun' peue heun' na' mhawng' ce ri hk'o' cuin hot' hk'a' nham' keune na' ko', ui' ku kaw hk'o' ri mhawng' ri hk'o' cuin peunaeng' yeut.¹⁹ Kopti ren' kawm pe' ye-un' hkam ri leuceng ri ti leukah' ce peue nga' suisa aen' ce na', hteum' pe' ri heng' laet' nyawk' aw? ²⁰Neumneum ka na' ko', peue ku' ce yeuh pe' meuh mhai' ri na', peue yeuh ri hk'a' ri pe' na', peue chi' lai ri hk'a' pe' na', peue tang' tu' ri lhung' keuting na' mae' peue dah beh pe' na' pe' yeun' hkam ri ce.²¹ Yam ui' ri un' yeuh ui' ku' sui' ri pe' seun' ku' yeuh ce ri pe' na', hteum' pe' ui' yeuh ku' hk'o' kaic aw?

A'nhaw' lawn hat' ri mhawng' ri hk'o' cuin mae' lawng ku' ti ri ceu na' ko', ui' lah' a seun' meuh ui' peue nga' suisa na' ko', ui' ku hat' ri mhawng' ri hk'o' cuin ri lawng awn' a yeut.²² Meuh ce peue Hebrae' aw? Ui' ku meuh yeut. Meuh ce peue I' sarela' aw? Ui' ku meuh yeut. Meuh ce ceucat eun Abraham aw? Ui' ku meuh yeut.²³ Meuh ce mhai' Eun Hkrit aw? (Lah' ui' a yeuhki' na' a seun' meuh ui' peue ma' rat ko'.) Ui' ku jaen meuh lheu' ce ri yeut. Ui' yeuh kan' heun' hk'ai' ce ri. Ui' tawn pun ri lec' htawng' heun' hk'ai' ce ri. Ui' pun ri hkam' hk'a' ta' faet' reng nyawk' na' lheu' ce ri. Ui' pun ri keucu hk'eup' hk'a' daee yeum na' heun' hk'ai' ce ri.²⁴ Ui' tawn pun ri hkam' peue Yu' da na' ta' faet' ce ri leuoe' kul' seudim' ti' na' hpawn' pok.²⁵ Ui' pun ri hkam' hk'a' peum' peue ri a' ngeul' chi' na' loe' pok, dhim' peue ri seumu na' ti pok, reu cum' na' loe' pok, pun ri pu pang hak' ka mha' seumut' na' ti sum' pai' ti seunyi.²⁶ Ui' kah ri long hk'a' heul' ti duih' hawc' ti duih' laleung. Ui' pun ri hk'eup' ku' hk'o' lhat' nang leuum', hk'eup' ku' hk'o' lhat' ri peue con', hk'eup' ku' hk'o' lhat' ri peue kuing' ui' na' ce, hk'eup' ku' hk'o' lhat' ri peue un' meuh peue ceu Yu' da na' ce, hk'eup' ku' hk'o' lhat' hk'a' naee veng, hk'eup' ku' hk'o' lhat' nang hk'i, hk'eup' ku' hk'o' lhat' nang mha' seumut' na' mae' hk'eup' ku' hk'o' lhat' ri peue guil ri meuh ec' awng' ui' na' ce.²⁷ Ui' kah ri yeuh kan' nyhap' kan' tal, un' pun ri it' ri sak' laleung, pun ri ngeup' ri, keucu un' pun ri hk'a' un' pun ri nyui mae' pun ri hkam' kawt' ut' gung' gang'.²⁸ Lheu' awn' na, hk'a' kuit nyhap' kuit yak ui' pun muk kon' Hkrit na' ce a geut' teng' ui' ku seunyi.²⁹ A'nhaw' lawn kaw' reng kloe ko', un' kaw' reng kloe ui' aw? A'nhaw' lawn pun ri hkam' hk'a' kleuc' hk'a' ri yeuh map' na' ko', un' kleh' ui' aw?³⁰ Ui' lawn kaw kah ri mhawng' ri hk'o' cuin ko', kaw ui' mhawng' ri hk'o' cuin ri lawng hk'a' kaw' reng kloe ri na'.³¹ Peucawo' Cawo' kuing' ri suk' seun' cot' cu Eun meuh a' kuing' Eun Cawo' Yesu' e' na' yawng Eun un' chi' lai ui'.³² Punta kaw peue mheut' ri ti ui' hk'a' naee veng Damas' kas' na', cawo' ka veng eun hkun' haw' hkam' Aretas' na' eun kah peue suik' ri na' ce kawm veng Damas' kas' na' rop hk'awp'.³³ Daecti kopti seue' peue ui' nang a' hk'uip' peue ruic' ui' hk'ai' hpa' pong' ka hkui veng na', ui' pun ri pon hk'ai' dak ti' eun cawo' veng na'.

Limit mae' hkawm' hk'a' nham' keune eun Paw'lu

12 Ca' ui' lak' kaw kah ri suip ri mhawng' ri hk'o' cuin. A saec' na' un' kue' peuehot' ko', ui'

ca' lak' kaw ris lawng limit mae' ku' Cawo' Peucawo' tuh' Eun ui' nyu na' ce.² Yam pon heul' hawc' kul' pun' neum na', yawng ui' peue ut' hk'a' naee Hkrit Eun ti peue na' pun eun ri yuk ri huk' nang kuing' pang mao' na' rot loe' htan ti htan ka na'. (Ui' hkuin' yawng huk' eun gawm' tu' ri na', a' ko' huk' eun cit' ri na' palkoe. Peucawo' Eun yawng a.)³ Ui' yawng hkawn' pun eun ri yuk ri huk' hk'a' naee kuing' Paradi' su' na'. (Ui' hkuin' yawng huk' eun gawm' tu' ri na', a' ko' huk' eun cit' ri na' palkoe. Peucawo' Eun yawng a.)⁴ Eun pun ri mhawng' leukah' un' cang ris pun un' cang kah peue ris a na'.⁵ Ui' ca' lak' kaw mhawng' ri hk'o' cuin mae' hkawn' eun. A lawn un' meuh yawo lawng hk'a' kaw' reng kloe ui' na' ce ko', ui' hkuin' kaw mhawng' ri hk'o' cuin mae' tu' ri na'.⁶ Ui' lawn sum' mhawng' ri hk'o' cuin ko', ui' hkuin' kaw va ri meuh peue suisa, kopti kaw ui' lah' ku' neum-neum na'. Daecti punta kaw peue un' cang suk' seun' ui' pon lheu' hk'ai' ku' lah' ku' yeuh ui' na', ui' ca' lak' kaw mhawng' ri hk'o' cuin mae' tu' ri na'.

⁷Kopti meuh a ku' chak' nyawk' pun ui' ri nyu na' punta kaw ui' un' yuk tu' ri na' keuting pon lheu' na', Peucawo' Eun yeuh hk'a' naee keune ui' na' kue' hkawm'. Hkawm' awn' a meuh peue caee ka Satan na'. Punta kaw ui' un' yuk tu' ri na' keuting pon lheu' na', a ko' ri keunhap' nokneh ui'.⁸ Punta hkawm' aen' kaw a pucti lih hk'ai' ui' na', ui' hk'o' hk'ang a ri Peucawo' Eun hton loe' pok hawc'.⁹ Daecti Eun lah' a ri ui', "Punta ti' ca Ui' na' kaw a pucti lih htonnuk hk'a' naee hk'a' kaw' reng kloe mi na', mun' Ui' na' kue' a htonnuk pun mi." Kop awn' na, punta ti' ca Eun Hkrit na' kaw a kah ri kue' hk'a' naee ui' na', ui' mhawng' ri hk'o' cuin mae' hk'a' kaw' reng kloe ri na' hk'a' naee hk'a' ren' kaw na'.¹⁰ Kop awn' na kopti meuh a Hkrit Eun na', ui' ren' kaw na' hk'a' naee hk'a' kaw' reng kloe, hk'a' naee hk'a' chaw hkamram peue ri, hk'a' naee hk'a' tukhka, hk'a' naee hk'a' keunhap' nokneh peue ri na' mae' hk'a' naee hk'a' hk'o' tuckyak na'. Kopti yam kaw' reng kloe ui' na', ui' kaw' reng keuting.

Paw' lu kuit nyhap' eun pun ec' awng' veng Kaw' rinhtu'

¹¹Yeuh meun ui' ri meuh peue nga' suisa hawc', daecti meuh pe' nang cu' ci' ui' meuh yeuhki'. Htuk' pe' ri suk' seun' ui'. Kopti ui' saec' na' un' ara, daecti hpaw ui' ca' chaw hk'ai' "peue caee ara" awn' ce saec' peunae'.¹² Ku' peue caee Eun Yesu' htuk' ce ri kue' na' ui' co' ca' ri yeuh pe' nawk a hawc' ri yeuh ui' het' keuting, ku' hk'o' am' na' mae' kan' kue' ti' ca na'.¹³ A

lawn un' meuh yawo un' duing meuh ui' beus ri pe' na' ko', hpaw pe' ca' yawm' hk'ai' muk kon' Hkrit seubu na' ce. Hk'o' pe' ploee' map' ui' ri ku' kleuc' aen' a reu'.

¹⁴Maet' maen' rangraen ui' ri kaw tang heul' glue ri pe' na', a na' meuh loe' pok ti pok. Ui' hkuin' kaw yeuh ri meuh beus ri pe'. Kopti ku' sum' is' ui' na' meuh a tu' pe' na', hpaw a ca' meuh hk'il' leumuil pe' na'. Kon' na' htuk' ce ri hk'on' ro vahtu' pun makui-ing' ri na' ce aw? Un' meuh, makuiing' na' htuk' ce ri hk'on' ro pun kon' ri na' ce.¹⁵ Kop awn' na, ren' ui' mae' kaw ri tuil' pe' is' ku' kue' ri na' gawm' euc' mae' jawngkui' tu' ui' na'. Ui' lawn gawm baet ri leumeus' pe' heun' ko', kaw pe' baet ri leumeus' ui' leng aw?¹⁶ Yam pon heul' hawc' na', yawng pe' un' pun ui' ri meuh beus ri pe' yeut. Daecti ngon' pe' lah' ui' cop' ri ti pe' mae' hk'a' vok' na'.¹⁷ Chi' lai ui' ri ti pe' ri cus' ui' peue ti peue eun heul' ri pe' aw?

¹⁸Hk'o' ui' Ti' tas' eun heul' ri pe'. Ui' ku' cus' ec' awng' ti peue na' eun heul' mae' heun yeut. Ti' -tas' hkuin' eun tawp un' duing chi' lai ri ti ku' ti ri ceu ri pe' aw? Yeuh ya kan' na' hk'a' naee hpum' ya na' seun' a puri na', un' meuh ka aw? Ya hot' yawo hk'a' ti' hk'a' na', un' meuh ka aw?

¹⁹Yam pon heul' hawc' na' ce na', hteum' pe' ya lah' leukah' kah' nha' ri meun aw? Neumneum ka na' ko', leukah' ya nanggal' to' nha' Eun Peucawo' seun' peue ut' hk'a' naee Hkrit Eun na' ko'. Peue leumeus' ui' na' pe', ku' yeuh ya na' ce ku' ceu ka meuh a punta kaw pe' keuting huk' hawn' na'.²⁰ Kopti hki' keung ui' ri yam na' ui' ing' rot ri pe' na', pe' na' cang ra ri un' seun' ku' kuit ui', ui' ku' na' cang ra ri un' seun' ku' kuit pe'. Ui' hki' keung ri na' pe' cang ra ri kleuc' leumeul puri, hkoe' mang' puri, seungeueng' peulel ri puri, hk'acak' puri, peusah' nyoe puri, ra ri is' puri, hpum' lhung' hpum' keuting ri puri mae' yeuh ku' klu' klu' hkawo' hkawo' na'.²¹ Ui' hki' keung ri yam na' ui' tang ing' rot ri pe' baee ti pok na', Peucawo' ui' na' kaw Eun nuic ui' tem nanggal' to' nha' pe'. Ui' kaw pun ri hpum' lu nyawk' kopti peue heun' peue na' yeuh ce map', ce un' taws' hpum' fuin map' ri tec ku' hk'aw' jeuk, hk'a' len' cu na' mae' hk'a' hkuit' -nawng' tang' ku' buih yeuh ce na'.

13 Kaw ui' tang heul' glue ri pe' pok aen' a na' meuh a loe' pok ti pok. Hk'a' naee vang yeuh a' mu ri puri na', kah a ri kue' nang meuh sa' hki' ka lal' loe' peue.¹² Yam ing' glue ui' ri pe' lal' pok ti pok na', tuil'

† Sawn' leukah' mun' 19:15. Paw' lu lah' eun leukah' ritroe aen' a na', a meuh kopti sum' tuh' eun peue nyu hot' ri ri yeuh seun' ku' lah' ka leukah'

ui' ri uin' sati ri pe' hawc'. Maet' maen' yam un' ut' ui' mae' pe' na', ui' lah' a ri pe' baee, peue yeuh map' nanggal' aen' a na' ce a saec' meuh a'nhaw' hpaw ui' ca' kaw laee vel ce³ kopti meuh a sum' nyu pe' sa' hki' ka lah' ui' Peucawo' Eun cu ui' Eun lah' leukah' ri na'. Hkrit hpaw Eun ca' kaw' reng kloe ri ku' kaw Eun yeuh ri pe' na'. Daecti ti' ca keuting Eun hk'a' -naee muk pe' na'.⁴ Hkrit Eun saec' na' pun ri tawk' ri yeum pang kleum' rawng' tawp' na' hk'a' naee hk'a' kaw' reng kloe ri ko', daecti maet' maen' a' yu im' Eun ri ti' ca Eun Peucawo' na'. Seun' awn' na, ya saec' na' kaw' reng kloe hk'a' naee Hkrit Eun na' ko', daecti punta kaw ya yeuh mhai' pe' na', ya kaw a' yu im' mae' Hkrit Eun hk'a' naee ti' ca Eun Peucawo' na'.

⁵ Pe' ci' cawng keutawn' un' keutawn' hk'a' naee hk'a' yum' ri na' sawng' caet ri nawk tu' ri na' meun reu'. Pe' lawn lawt pun hk'a' caet ri nawk na' ko', kaw pe' hkaem ri Yesu' Hkrit ut' Eun hk'a' naee ri. Daecti pe' lawn un' lawt pun hk'a' caet ri nawk na' ko', Yesu' Hkrit hpaw Eun ca' ut' hk'a' naee pe'.⁶ Ui' ku yum' kaw pe' yawng lawt pun ya hk'a' caet ri nawk aen' a yeut.⁷ Punta kaw pe' un' yeuh ku' kleuc' na', ya hk'o' mun' ri Peucawo' Eun. Aen' a hkuin' meuh punta kaw peue pun ri nyu lawt pun ya hk'a' caet ri nawk na' hawc' na'. Daecti a meuh punta ya saec' na' seun' lawt un' pun ya hk'a' caet ri nawk na' ko', pe' kaw yeuh ku'

ritroe na'. Eun deun' peue yeuh map' na' ce loe' pok hawc'. Maet' maen', raen eun ri kaw ciyang peue un' taws' hpum' fuin map' ri na' ce.

cawp' na'.⁸ Kopti hpaw ya ca' cang yeuh ku' kaw ham' tap ku' neumneum na', daecti yeuh ya pun ku' neumneum na' palkoe.⁹ Ya saec' na' kaw' reng kloe kopti kaw' reng keuting pe' na' ko', ya ren' kaw'n. Punta kaw pe' htonnuk na', ya hk'o' mun' pun pe'.¹⁰ Kop awn' na, ui' tem' ri tuil' lawng aen' a ri pe' yam un' ut' ui' mae' pe' na'. Aen' a meuh punta yam ing' rot ui' ri pe' na', kaw ui' un' lo' an' nya Peucawo' tuil' Eun ri ui' na' reng ri pe' na'. An' nya aen' a meuh punta kaw a yeuh pe' huk' hawn', hpaw a ca' meuh punta kaw a yeuh pe' lulaic heul' na'.

Leukah' tisut'

¹¹ Vang tisut' ka na', ec' awng' na' pe', sang' am' la pe'. Sawng' yeuh meun ri htonnuk reu'. Leuceng leukah' hk'o' hk'ang ui' na' reu'. Yeuh hpum' ri meuh ti meul' reu'. Ut' hk'a' naee hk'a' cumyen' na' reu'. Peucawo' ka hk'a' leumeus' keus mae' hk'a' cumyen' na' kaw Eun ut' mae' pe'.

¹² Yam hk'eup' puri na', gloh' ti' puri hk'a' naee vang seunga' chak' na' reu'.¹³ Peue Eun Peucawo' na' ce ku peue, ce lah' ri leunyeng ri pe'.

¹⁴ Kah mun' sin' Eun Cawo' Yesu' Hkrit, hk'a' leumeus' keus Eun Peucawo' na' mae' hk'a' yeuh a' -mawo puri is' ka Cit' seunga' chak' na' kue' ri pe' gawm' euc' pe' reu'.

Galati

1 Htawm ti ok' aen' na ko', meuh ui' Paw' lu meuh peue caee Eun Yesu' mae' ec' awng' ut' mae' ui' na' ce,

ye tem' ri tuil' a ri muk kon' Hkrit ut' nang kuing' Galati' na' pe'.

² Meuh ui' peue caee Eun Hkrit na' hpaw a ca' meuh peue leuk peue ri ti ui', a' ko' tang' peue ri uin' ui', daecti meuh a Yesu' Hkrit Eun mae' Kuing' Peucawo' Cawo' yeuh Yesu' Eun tang kuh' im' na' leuk Ka ri ti ui'.

³ Kah mun' sin' mae' hk'a' kuit nyawk' kuit sam' ran cumyen' lih neum Kuing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'. ⁴ Punta kaw e' lawtpon cu yam sa' hkat' rai maet' maen' aen' a na', Hkrit Eun yawm' ri sum tu' ri na' pun map' e' na' hot' seun' alo Eun Kuing' Peucawo' e' na'. ⁵ Kah munhpung' na' kue' ri Peucawo' Eun cot' cu ri reu'. Amin.

Un' kue' leukah' mun' ren' kawn seubu

⁶ Mawo ui' ri tecla pe' Peucawo' Cawo' klawng ri ti pe' ri mun' Eun Hkrit na' Eun vae' nyawk', hawc' ko' pe' hpawt' ri rap ri ti leukah' mun' ren' kawn seubu na', Ui' am' nyawk' ri ka. ⁷ Leukah' mun' ren' kawn seubu na' hpaw a ca' kue'. Daecti peue ngon' na' buih yeuh peue ku' suksak ri pe'. Ce sum' yeuh leukah' mun' ren' kawn Eun Hkrit na' vok'. ⁸ Saec' meuh ye ri, a' ko' in' hpom pang mao' na' ce a' nhaw' lawn sangsawn' leukah' mun' ren' kawn seubu na' lheu' hk'ai' leukah' mun' ren' kawn pun ye ri sangsawn' ri pe' hawc' na' ko', kah peue awn' eun pun ri hkam' hk'a' jha' na' cot' cu ri reu'. ⁹ Seun' tawn lah' ye a ri pe' na', maet' maen', ui' kaw tang lah' a bae. A' nhaw' lawn sangsawn' leukah' mun' ren' kawn seubu na' lheu' hk'ai' leukah' mun' ren' kawn pun pe' ri rap ri ti hawc' na' ko', kah peue awn' eun pun ri hkam' hk'a' jha' na' cot' cu ri reu'.

¹⁰ Lah' ui' a yeuhki' na', buih yeuh ui' ku' kaw htuk' hpum' peue aw, a' ko' ku' kaw htuk' hpum' Eun Peucawo' aw? A' ko', buih co' ca' ui' ku' kaw hit' hpum'

peue na' aw? Ui' lawn buih co' ca' ri yeuh ku' kaw hit' hpum' peue na' ko', hpaw ui' ca' meuh mhai' Eun Hkrit.

Peucawo' leuk Eun ri ti Paw' lu eun

¹¹ Ec' awng' na' pe', sum' kah ui' pe' yawng leukah' mun' ren' kawn sangsawn' ui' na' hpaw a ca' meuh lawng ku' peue pleng' peue a pucti lih. ¹² Hpaw ui' ca' pun ri rap a neum peue ti ri peue, a' ko' a hkuin' kue' nang ing' sangsawn' ui' ri ka. Daecti pun ui' ri rap leukah' mun' ren' kawn aen' a ri Yesu' Hkrit tuh' Eun ui' nyu a.

¹³ Kopti tawn mhawng' pe' lawng a' yu im' ui' yam kaw' ut' ui' hk'a' naee ritroe ce peue Yu' da na' yeut. Ui' keunhap' nokneh muk kon' Hkrit Eun Peucawo' na' ce reng nyawk'. Ui' co' ca' ri kaw yeuh ce lulaic heul' euc'. ¹⁴ Yam ut' ui' hk'a' naee ritroe ce peue Yu' da na', ui' ca' ri htan lhung' hk'ai' caicum pu ui' na' ce heun' peue. Ui' jhawp' ri ti ritroe ce a' ta' a' ya ui' na' ce reng nyawk' lheu' hk'ai' pu ui' na' ce. ¹⁵ Daecti yam Peucawo' leuk Eun ri ti ui' tang' neum yam kaw' ut' ui' nang keuteul ka ma ui' na', mae' klawng Eun ri ti ui' ri mun' Eun na', a htuk' hpum' Eun ri ¹⁶ kaw Eun tuil' ui' nyu Kon' ai' ri na' Eun. Aen' a meuh punta kaw Eun kah ui' sangsawn' lawng Eun Kon' ai' na' ri peue un' meuh peue ceu Yu' da na' ce. Ui' hkuin' duing sa' lit a ri peue saec' ti peue. ¹⁷ Lheu' awn' na, ui' hkuin' duing huk' hk'eup' peue meuh peue caee Eun Yesu' nanggal' ui' na' ce nang veng Yeru' salaem na'. Daecti ui' keulawn' seumeu' heul' nang kuing' Arap' na'. Hawc' ko', ui' keutah ing' nang veng Damas' kas' na'.

¹⁸ Hawc' awn' na loe' neum na', ui' huk' glue ri Petru' † eun nang veng Yeru' salaem. Ui' ut' mae' heun pun kul' hpawn' seunyi. ¹⁹ Peue caee Eun Yesu' na' ce ui' hkuin' nyu ku' seubu na' ce. Ui' nyu yawo Yakop' awng' Eun Yesu' na' eun. ²⁰ Lawng ka ku' tem' ui' ri tuil' ri pe' aen' un' meuh a ku' chi' lai na', ui' htawhkam a nanggal' Eun Peucawo'. ²¹ Hawc' awn' na, ui' heul' nang kuing' Su' ri' mae' kuing' Si' li' si'

† Leukah' Helasa' na' lah' a Kefas'

na'.²² Yam awn' na, muk kon' Hkrit ut' nang kuing' Yu'da na' ce hkuin' nang duing nyu buh ui'.²³ Ce kaw'n tawn pun ri mhawng' yawo lawng ka, "Peue tawn keunhap' e' nanggal' aen' a na' eun, maet' maen' buih sangsawn' eun lawng hk'a' yum' ku' tawn co' ca' eun ri yeuh a lulaic na'."²⁴ Kopti meuh a ui' ri na', ce suk' seun' Peucawo' Eun.

Peue caee Eun Yesu' na' rap ce ri ti Paw' lu eun

2 Hawc' awn' na kul' pun' neum na', Banabas' ya tang huk' nang veng Yeru' salaem na' bae ti pok. Ya ku va Ti' tas' eun huk' mae' ti.² Huk' ui' nung' na' ui' hot' hk'a' Peucawo' tuh' Eun ri ui' na'. Ui' ris ku' rup seun' ro' na' ce mhawng' a koe lawng sangsawn' ui' leukah' mun' ren' kaw'n na' ri peue un' meuh peue ceu Yu'da na' ce. Hpaw ui' ca' sum' kah kan' ku' yeuh ui' hawc' na' mae' kan' ku' buih yeuh ui' maet' - maen' na' meuh ku' hk'o' hk'awng'.³ Ti' tas' ku' hot' ui' heul' na' eun saec' na' meuh peue Helasa' ko', peue caee Eun Yesu' na' ce hkuin' tec' teng kah eun ton' duing' hak' ri.⁴ Daecti peue guil ri meuh ec' awng' na' ce sum' kah Ti' tas' eun ton' duing' hak' ri. Peue aen' ce ra ri ing' lec' hk'a' naee muk e' na'. Ce ing' htom' jem' lawng hk'a' pon kue' e' hk'a' naee Yesu' Hkrit Eun na'. Ce sum' kah e' meuh mhai'.⁵ Daecti punta hk'a' neumneum ka leukah' mun' ren' kaw'n na' kaw a suip ri ut' hk'a' naee pe' heul' na', ui' hkuin' yawm' ri leuceng leukah' ce na' saec' peunae'.

⁶ Peue rup seun' ro' a' ye' keuting na' ce hkuin' bobae ku' lah' ui' na'. Ce saec' na' meuh peue yeuh sa' nhaw' ko', a hkuin' kue' a' ye' keunhaw' pun ui'. Peucawo' hpaw Eun ca' keue' ri ku' hk'a' nok na'.⁷ Lheu' si' un' bobae ce ku' lah' ui' na', ce pun ri nyu yawng Peucawo' tuil' Eun ui' heul' sangsawn' leukah' mun' ren' kaw'n na' ri peue un' meuh peue ceu Yu'da na' ce seun' tuil' Eun Petru' eun heul' sangsawn' leukah' mun' ren' kaw'n na' ri peue ceu Yu'da na' ce na'.⁸ Kopti Peucawo' Cawo' cus' Petru' meuh peue caee Eun Yesu' Eun heul' yeuh kan' ri peue ceu Yu'da na' Eun, Eun ku' cus' ui' meuh peue caee Eun Yesu' ui' heul' yeuh kan' ri peue un' meuh peue ceu Yu'da na' ce yeut.⁹ Yakop', Petru' maee' Yo' han ce meuh kleum' a' ye' keuting na' yam pun ce ri nyu yawng mun' Peucawo' tuil' Eun ri ui' na', ce gloh' ti' a' tawm' ya Banabas' na'. Aen' a meuh het' ka reum e' puri yeuh kan'

† Leukah' Helasa' na' lah', peue un' ton' duing hak' ri †† Leukah' Helasa' na' lah', peue pun ri ton' duing hak' ri. A seun' nambat aet' 8 mae' 9 ‡ Leukah' Helasa' na' lah' a Kefas', a seun' nambat aet' 11 mae' 14

tiduih' na'. E' sahpaw' ya heul' ri peue un' meuh peue ceu Yu'da na' ce. Ce ri, ce heul' ri peue ceu Yu'da na' ce.¹⁰ Ce hk'o' yawo ya na' kuit rot ri peue hk'o' tukyak na' ce laleung. Ceu nang aen' a ku meuh ku' peus ui' hpum' ri ri ka yeut.

Paw' lu ram eun ri Petru' eun

¹¹ Yam Petru' ing' rot eun nang veng Anhti' ok na', kop- ti yeuh eun ku' kleuc' na' glih' g'leueng' na', ui' ram ri heun ri to' nha' ya na'.¹² Kopti nanggal' ka yam peue eun Yakop' na' un' nang ing' rot ce ngon' na', Petru' eun tawn som' mae' peue un' meuh peue ceu Yu'da na' ce heun' pok. Daecti yam ing' rot ce na', kopti Petru' lhat' eun ri peue ton' duing' hak' ri na' ce na', eun hton' ri gah' hk'ai' peue un' meuh peue ceu Yu'da na' ce.¹³ Saec' meuh peue Yu'da seubu na' ce ku' guil ri hot' ri yeuh seun' ku' yeuh eun na'. Banabas' eun ku' hk'i' a, eun kleuc' hk'a' ri hot' ri yeuh seun' ce ri yeut.

¹⁴ Yam pun ui' ri nyu un' laee hot' ce hk'a' neumneum ka leukah' mun' ren' kaw'n na', ui' lah' a ri Petru' eun nanggal' to' nha' ce na' gawm' euc', "Meuh mi peue Yu'da, daecti mi a' yu im' seun' meuh ri peue un' meuh peue Yu'da na' ce, mi hkuin' a' yu im' seun' meuh ri peue ceu Yu'da na'. A ci' meuh kop keunhaw' mi vae' tec' teng peue un' meuh peue ceu Yu'da na' ce hot' ri yeuh ritroe ce peue Yu'da na'?"

¹⁵ Meuh e' peue Yu'da tang' neum yam keut' ri na'. E' hkuin' meuh peue map' peue un' meuh peue ceu Yu'da na' ce.¹⁶ Yawng e' hpaw a ca' kue' nang pun ri meuh peue leupaws seumeu' na' kopti hot' peue ri yeuh leukah' ritroe na' saec' ti peue, daecti pun peue ri meuh peue leupaws seumeu' na' kopti yum' peue Yesu' Hkrit Eun na' palkoe. Kop awn' na, punta kaw e' pun ri meuh peue leupaws seumeu' na' kopti yum' e' Hkrit Eun na', a hkuin' meuh kopti hot' e' ri yeuh leukah' ritroe na', e' yum' Yesu' Hkrit Eun. Kopti, hpaw a ca' kue' nang pun ri meuh peue leupaws seumeu' na' kopti hot' peue ri yeuh leukah' ritroe na' saec' ti peue.

¹⁷ E' lawn hot' ri sok hk'a' Peucawo' kaw Eun sawn' e' meuh peue leupaws seumeu' na' kopti Hkrit Eun na' ko', meuh e' peue map' na' a kaw pucti lih glih' - g'leueng'. Awn' a sum' lah' Hkrit meuh Eun Cawo' tu- il' kaw' reng kaw e' yeuh map' na' aw? Uih', hpaw a ca' yeuh keutit'.¹⁸ Ui' lawn tang pleng' hk'u' ku' yeuh ui' lulaic na' bae ko', meuh ui' nang yeuh ku' kleuc' ri leukah' ritroe na' a kaw pucti lih glih' g'leueng'.

¹⁹ Hk'a' naee cu ui' leukah' ritroe na', ui' pun ri yeum hk'ai' leukah' ritroe na' hawc'. Aen' a meuh punta kaw ui' pun ri a' yu im' pun Peucawo' Eun na'.²⁰ Pun ui' ri

hkam' hk'a' tawk' ri na' mae' Hkrit Eun hawc'. Ui' hkuin' laee suip ri kue' a' yu, daecti a meuh Hkrit kue' Eun a' yu hk'a' naee ui'. A' yu im' ui' hk'a' naee jawngkui' tu' ri aen' a na' ko', ui' a' yu im' ri hk'a' yum' ui' hk'a' naee Kon' ai' Eun Peucawo' Cawo' leumeus' ui' mae' Cawo' pun ri sum tu' ri pun ui' na' Eun.²¹ Hpaw ui' ca' tecla mun' Eun Peucawo' na', kopti hk'a' leupaws seumeu' na' a lawn ing' neum leukah' ritroe na' ko', Hkrit pun Eun ri yeum na', a na' meuh ku' hk'o' hk'awng'.

Kopti hk'a' yum' aw, a' ko' kopti hot' ri yeuh leukah' ritroe aw?

3 Peue Galati' nga' suisa na' pe', a' nhaw' ci' cop' pe' kleuc' hk'a' ri? Pun pe' ri nyu Yesu' Hkrit pun Eun ri hkam' ri yeum pang kleum' rawng' tawp' na' glih' gleueng' tam' ngai' ri hawc'.² Sum' mhaing' ui' pe' ti moeng yawo. Pun pe' Cit' seunga' na' ri kopti hot' pe' ri yeuh leukah' ritroe na' aw, a' ko' kopti yum' pe' ku' pun pe' ri mhawng' na' aw?³ A ci' yeuh keunhaw' pe' vae' nga' suisa nyawk' yeuhko'? Yam tang' pe' a na', tang' pe' a ri Cit' seunga' na', maet' maen' pe' kaw yeuh a hawc' ri hk'a' nham' keune na' aw?⁴ Pun pe' ri hkam' hk'a' tukhka na' htan' aen' a na' kaw a meuh ku' hk'o' hk'awng' aw? Ceu nang aen' kaw a meuh ku' hk'o' hk'awng' neumneum aw?⁵ Peucawo' tuil' Eun Cit' seunga' na' ri pe' na' mae' yeuh Eun ku' hk'o' am' na' pucti lih hk'a' naee pe' na' meuh a kopti hot' pe' ri yeuh leukah' ritroe na' aw, a' ko' meuh a kopti yum' pe' ku' pun pe' ri mhawng' na' aw?

⁶ Saec' meuh Abraham eun, kopti yum' eun Peucawo' Eun na', Peucawo' Eun sawn' eun meuh peue leupaws seumeu'.¹⁷ Kop awn' na, peue yum' na' meuh ce kon' hk'i Eun Abraham, yeuh ri yawng a reu'.⁸ Peucawo' sawn' Eun peue un' meuh peue ceu Yu' da na' ce meuh peue leupaws seumeu' kopti hk'a' yum' na', htawm Seunga' na' a yawng a tang' neum nanggal' na' hawc'. Peucawo' Eun lah' leukah' mun' ren' kawn na' ri Abraham eun tang' neum nanggal' na'. Eun lah', "Peue ceu gawm' euc' na' kaw ce pun ri rap mun' na' kopti mi ri."¹⁹ Kop awn' na, peue yum' na' ce pun mun' na' tiduih' mae' Abraham eun. Eun meuh peue ka hk'a' yum' na'.

¹⁰ Peue papuing hot' ri yeuh leukah' ritroe na' peue gawm' euc', pun ce ri hkam' hk'a' jha' na'. Kopti hk'a' naee htawm Seunga' na' tem' a, "Peue un' hot' ri yeuh ku' tem' ri hk'a' naee leukah' ritroe na' ku moeng

na', pun ce ri hkam' hk'a' jha' na'." ¹¹ Pun e' ri nyu a glih' gleueng', kopti meuh a leukah' ritroe na' a' nhaw' hkuin' kaw cang pun ri meuh peue leupaws seumeu' nanggal' Eun Peucawo' na' saec' ti peue. Kopti, peue leupaws seumeu' na' kaw ce a' yu im' hk'a' naee hk'a' yum' na'.¹² Leukah' ritroe na' hpaw a ca' tang' ri hk'a' pang kleum' ka hk'a' yum' na'. Daecti, peue hot' ri yeuh leukah' ritroe na' kaw ce a' yu im' hk'a' naee leukah' ritroe na'.¹³ Daecti Hkrit teum' kawm htut Eun e' lawtpon hk'ai' hk'a' jha' ka leukah' ritroe na' ri yawm' Eun ri hkam' hk'a' jha' na' pun e'. Kopti hk'a' naee htawm Seunga' na' tem' a, "A' nhaw' lawn pun ri tawk' ri pang kleum' hku' na' ko', pun Eun ri hkam' hk'a' jha' na' hawc'."¹⁴ Hkrit teum' kawm htut Eun e' lawtpon na' a meuh punta kopti mun' ku' Yesu' Hkrit tuil' Eun a ri Abraham eun na' kaw a rot ri peue un' meuh peue ceu Yu' da na' ce. Punta kopti meuh a hk'a' yum' na', e' kaw pun ri rap Cit' seunga' na' hot' seun' kati yeuh Eun Peucawo' na'.

Leukah' ritroe mae' kati sat' ca'

¹⁵ Ec' awng' na' pe', kaw ui' ti lawng ka ku' meuh ku' yeuh peue keuyuit na' meuh leukah' u' hpama ri pe' ti lawng. Seun' peue na' peue lawn pun ri yeuh kati sat' ca' ri puri hawc' ko', a' nhaw' hkuin' laee cang yeuh a lu, a' ko' hkuin' laee cang bae a.¹⁶ Peucawo' Eun yeuh kati sat' ca' ri Abraham eun mae' ceucat eun na'. Nang htawm Seunga' na' a hkuin' lah', "ceucat eun na' ce", aen' a sum' lah' peue heun' peue. Daecti nang htawm Seunga' na' a lah', "ceucat mi"¹⁷, aen' a sum' lah' yawo peue ti peue. Peue awn' a meuh Hkrit Eun.¹⁷ Vangdoh' ka ku' sum' lah' ui' na' yeuh a ki', leukah' ritroe ku' ing' hk'a' kui' ka pun' pak' loe' kul' neum na' a hkuin' cang yeuh kati sat' ca' ku' Peucawo' tang' Eun ri uin' hawc' tang' neum yamla ka na' lu.¹⁸ Kopti hk'a' rap ri ti sin' na' a lawn to' ri ri leukah' ritroe na' ko', a hkuin' kaw laee to' ri ri kati sat' ca' na' bae. Daecti Peucawo' tuil' Eun sin' na' ri Abraham eun ri kati sat' ca' na'.

¹⁹ Yeuh keutit' ko', leukah' ritroe na' a ci' meuh pun keunhaw'? Punta hk'a' kleuc' na' kaw a pun ri nyu ri na', leukah' ritroe na' a bae a. Leukah' ritroe na' kaw a kue' heul' rot ri Ceucat ku' pun ri rap kati sat' ca' na' lih rot Eun. Peucawo' cu Eun in' hpom na' ce tuil' leukah' ritroe na' nang dak ti' eun nang seuna' na'.²⁰ A saec' yeuh sa' nhaw', nang seuna' na' hpaw eun ca'

† Yamla 15:6 †† Yamla 12:3; 18:18; 22:18

‡ Sawn' leukah' mun' 27:26 †† Habaku' 2:4 ††† Fae' 18:5 ††† Sawn' leukah' mun' 21:23 ††† Yamla 12:7; 13:15; 24:7

meuh peue hk'a ' ti plak ' koe, daecti Peucawo ' Eun meuh yawo ti plak ' .

²¹Yeuh keutit ' ko ' , leukah ' ritroe na ' eung ' a kui ' ri ri kati sat ' ca ' Eun Peucawo ' na ' aw? Uih ' , hpaw a ca ' yeuh keutit ' saec ' peunae ' . Kopti leukah ' ritroe tuil ' ri na ' a lawn meuh ku ' yeuh civit im ' ko ' , hk'a ' leupaws seumeu ' na ' a ku kaw cang keut ' kue ' ri neum leukah ' ritroe na ' yeut. ²²Daecti htawm Seunga ' na ' a lah ' , punta kati sat ' ca ' Eun Peucawo ' na ' kaw a pun ri tuil ' ri ri peue kue ' hk'a ' yum ' hk'a ' naee Yesu ' Hkrit Eun na ' ce gawm ' euc ' na ' , peue gawm ' euc ' na ' peue ut ' hk'a ' ruim ti ' ca ka map ' na ' .

²³Yam hk'a ' yum ' awn ' un ' nang ing ' rot ka na ' , e ' pun ri hk'awng ' ri ut ' hk'a ' ruim ka leukah ' ritroe na ' . E ' pun ri hk'awng ' ri rot ti yam hk'a ' yum ' na ' puc a ri lih na ' . ²⁴Kop awn ' na , punta kaw e ' pun ri meuh peue leupaws seumeu ' ri hk'a ' yum ' na ' , leukah ' ritroe na ' a u ' peung e ' rot ti yam Hkrit lih rot Eun na ' . ²⁵Maet ' - maen ' , hk'a ' yum ' na ' ing ' rot ka hawc ' , e ' hkuin ' laee suip ri ut ' hk'a ' ruim vang u ' peung ka leukah ' ritroe na ' baee.

Kon ' hk'i Eun Peucawo '

²⁶Kopti meuh a hk'a ' yum ' pe ' hk'a ' naee Yesu ' Hkrit Eun na ' , pe ' meuh kon ' hk'i Eun Peucawo ' gawm ' euc ' ri. ²⁷Kopti pun pe ' ri rap ri ti hk'a ' cum ' na ' hk'a ' naee Hkrit Eun hawc ' na ' , pe ' cuip ' jawngkui ' tu ' ri na ' ri Hkrit Eun hawc ' . ²⁸Kopti pe ' ri gawm ' euc ' meuh pe ' ti peue yawo hk'a ' naee Yesu ' Hkrit Eun, pe ' hkuin ' laee kue ' peue Yu ' da , a ' ko ' peue Helasa ' , mhai ' , a ' ko ' peue pon , me , a ' ko ' beun ' . ²⁹Pe ' lawn meuh peue Eun Hkrit ko ' , pe ' ku meuh ceucat eun Abraham, meuh nang hk'a sin ' hot ' kati sat ' ca ' na ' yeut.

4 Ku ' sum ' lah ' ui ' na ' yeuh a ki ' , nang hk'a sin ' na ' eun saec ' na ' meuh cawo ' ka sin ' na ' gawm ' euc ' ka , daecti cu yam kawn ' buih meuh eun kon ' nyom na ' , eun hkuin ' chat hk'ai ' mhai ' na ' eun. ²Eun kawn ' buih ut ' hk'a ' ruim hk'a ' u ' peung eun cawo ' u ' peung mae ' cawo ' roksa ' hk'eung na ' rot ti yam kuiing ' na ' sawn ' tang ' eun ri uin ' yam na ' . ³Seun ' awn ' na , yam kawn ' buih meuh e ' kon ' nyom aet ' na ' , e ' pun ri meuh mhai ' ut ' hk'a ' ruim hk'a ' u ' peung ka ritroe bhen ' keute ' na ' ce. ⁴Daecti yam tang ' ri uin ' na ' rot ka hawc ' na ' ko ' , Peucawo ' Eun cus ' Kon ' ai ' ri na ' Eun lih keut ' ri beun ' na ' eun. Eun keut ' hk'a ' ruim ka leukah ' ritroe na ' . ⁵Aen ' a meuh punta kaw Eun teum ' kawm htut peue ut ' hk'a ' ruim ka leukah ' ritroe na ' ce lawtpon na ' . A meuh punta peue aen ' kaw ce meuh kon ' Eun Peucawo ' na ' . ⁶Kopti meuh

pe ' kon ' hk'i Eun na ' , Peucawo ' Eun tuil ' Cit ' seunga ' Eun Kon ' ai ' ri na ' nang hpum ' e ' na ' . Cit ' seunga ' na ' a klawng ri lah ' , "Aba ' , A ' kuiing ' ." ⁷Kop awn ' na , pe ' hkuin ' laee meuh mhai ' baee , daecti pe ' meuh kon ' hk'i. Peucawo ' Eun yeuh pe ' meuh nang hk'a sin ' .

Paw ' lu kuit nyhap ' eun pun muk kon ' Hkrit Galati '

⁸Yam un ' nang yawng pe ' Peucawo ' Eun nanggal ' aen ' a na ' , pe ' meuh mhai ' ka peucawo ' seubu ku ' un ' meuh peucawo ' neumneum na ' ce. ⁹Daecti maet ' - maen ' yawng pe ' Peucawo ' Eun hawc ' , neumneum ka na ' ko ' , Peucawo ' yawng Eun pe ' ri. A ci ' yeuh keunhaw ' pe ' vae ' kawn ' tang sum ' hpawt ' ri ing ' ri ku ' kawl ' reng kloe ku ' hk'o ' tukyak na ' ? Tang sum ' meuh pe ' mhai ' ka ceu nang awn ' ce baee aw? ¹⁰Pe ' vae ' meung kam ' ri seunyi , chi ' , meuyam na ' mae ' neum na ' . ¹¹Kuit nyhap ' ui ' ri ku ' sae ' caee ' ui ' ri yeuh pun pe ' na ' , na ' a cang meuh ku ' hk'o ' hk'awng ' .

¹²Ec ' awng ' na ' pe ' , hk'o ' hk'ang ui ' pe ' seun ' ui ' ri kopti seun ' ui ' pe ' ri hawc ' na ' . Pe ' hkuin ' duing yeuh ku ' kleuc ' ri ui ' saec ' ti ceu. ¹³Pe ' ku yawng la ui ' ri sangsawn ' leukah ' mun ' ren ' kawn ri pe ' na ' meuh a kopti peuyhat ui ' na ' . ¹⁴Peuyhat ui ' aen ' a saec ' na ' meuh ku ' nyhap ' pun pe ' ko ' , pe ' hkuin ' chaw hkamram ui ' , a ' ko ' hkuin ' kleh ' ri ui ' . Daecti pe ' rap ri ti ui ' seun ' meuh ui ' in ' hpom Eun Peucawo ' na ' eun ko ' , a ' ko ' seun ' meuh ui ' Yesu ' Hkrit Eun ko ' . ¹⁵Hpum ' hk'a ' cang ren ' kawn pe ' na ' a ci ' rai ' heul ' hk'a ' nhaw ' ? A lawn meuh ku ' cang ka ko ' , na ' pe ' koc ri tuil ' ngai ' ri na ' ri ui ' hawc ' , pen ' hkam ' ui ' sa ' hk-i ' ka yeut. ¹⁶Maet ' maen ' , kopti lah ' ui ' ku ' neumneum na ' ri pe ' na ' , ui ' keut ' ri meuh ransu pe ' na ' hawc ' aw?

¹⁷Peue awn ' ce saec ' na ' sae ' caee ' ri yeuh ku ' htuk ' hpum ' pe ' na ' , daecti ce hkuin ' yeuh a mae ' keutui ' hpum ' ri ku ' chak ' na ' . Punta kaw pe ' hpum ' mae ' ce na ' , ce sum ' kah pe ' pucti heul ' hk'ai ' ye. ¹⁸Sae ' - caee ' ri yeuh a mae ' keutui ' hpum ' ri ku ' chak ' na ' ko ' , saec ' yamnhaw ' a ku chak ' . A hkuin ' meuh yeuh a mae ' yam ut ' ui ' mae ' pe ' na ' palkoe. ¹⁹Kon ' leumeus ' ui ' na ' pe ' , kaw ui ' kah ri suip ri sui ' baee seun ' sui ' awng ' na ' rot ti yam Hkrit kaw Eun kue ' hk'a ' naee pe ' na ' . ²⁰Kopti kue ' ui ' ku ' kangkae ri pe ' na ' , maet ' maen ' ui ' sum ' ut ' mae ' pe ' . Ui ' sum ' plin ' leukah ' reng lah ' ri na ' .

Haga' mae' Sara'

²¹Peue sum' ut' hk'a' ruim ka leukah' ritroe na' pe', un' mhawng' pe' ku' lah' ka leukah' ritroe na' aw? Lah' ui' mhawng' a reu'. ²²Nang htawm Seunga' na' a lah', "Abraham kue' eun kon' me lal' peue. Ku' ti peue na' eun keut' neum beun' mhai', ku' ti peue na' eun keut' neum beun' ku' un' meuh mhai'. ²³Kon' keut' neum beun' mhai' na' eun keut' hot' alo ka hk'a' nham' keune na', daecti kon' keut' neum beun' ku' un' meuh mhai' na' eun keut' hot' kati sat' ca' Eun Peucawo' na'."

²⁴Lawng aen' seun' a leukah' leupong' ko', beun' lal' peue na' a meuh kati sat' ca' lal' ceu na'. Kati sat' ca' ku' ti ceu na' a ing' neum gong Si' nai na'. A meuh Haga' eun keut' kon' mhai'. ²⁵Haga' na' ka meuh gong Si' nai kue' nang veng Arap' na'. A sum' lah' veng Yeru' salaem cu maet' maen' na'. Aen' a meuh kopti ka ri mae' kon' hk'i ka na' meuh ce mhai' na'. ²⁶Daecti veng Yeru' salaem ka kuing' pang mao' na' meuh a ma e'. A hkuin' meuh ku' meuh mhai' na'. ²⁷Kopti nang htawm Seunga' na' tem' a ri yeuhki',

"Beun' tan', ren' kawn reu'.

Beun' un' duing kue' kon',
ta' ul' ri klawng reu'.

Beun' un' duing sui' awng',
kopti beun' un' kue' me na'

kue' eun kon' hk'i heun' hk'ai' beun' kue' me na' ce." †

²⁸Ec' awng' na' pe', meuh pe' kon' ka kati sat' ca' na' seun' I' cak' eun ko'. ²⁹Leumah', kon' keut' hot' alo ka hk'a' nham' keune na' keunhap' eun kon' keut' hot' ti' ca ka Cit' seunga' na' eun. Saec' meuh maet' maen' a ku meuh seun' awn' a yeut. ³⁰Daecti nang htawm Seunga' na' a ci' lah' a yeuh sa' nhaw'? A lah', "Ra ri tec beun' meuh mhai' na' ka mae' kon' ka na' eun hk'uih reu'. Kopti kon' ka beun' meuh mhai' na' kaw eun un' cang pun ri hk'a' sin' mae' kon' ka beun' un' meuh mhai' na' eun." †³¹Kop awn' na ec' awng' na' pe', hpaw e' ca' meuh kon' ka beun' meuh mhai' na' ka, daecti meuh e' kon' ka beun' un' meuh mhai' na' ka.

Pun ri pon hk'a' nae Hkrit Eun

5 Punta kaw e' pun ri pon na', Hkrit Eun yeuh e' pon hawc'. Kop awn' na, ut' keutawn' seupit reu'. Pawlae peus aec' ka mhai' na' bae.

† I' saya' 54:1†† Yamla 21:10

²Leuceng a, ui' ri, meuh ui' Paw' lu. Ui' lah' a ri pe', pe' lawn yawm' ri ton' duing' hak' ri na' ko', Hkrit Eun hkuin' kaw kue' ngos pun pe' saec' peunae'. ³Kaw ui' lah' a ri peue yawm' ri ton' duing' hak' ri na' ce bae. Ce lawn yeuh keutit' ko', ce ku na' kah ri hot' ri yeuh leukah' ritroe na' gawm' euc' ka. ⁴Peue sum' meuh peue leupaws seumeu' ri cu pe' leukah' ritroe na' pe', gah' pe' hk'ai' Hkrit Eun. Pe' hk'ui' hk'ai' mun' Eun Peucawo' na' hawc'. ⁵Kopti meuh a hk'a' yum' na', e' keutui' hpum' kaw e' pun ri rap ri ti hk'a' leupaws seumeu' na' ri neum Cit' seunga' na' hot' seun' ku' keutui' hpum' e' na'. ⁶Kopti hk'a' nae Yesu' Hkrit Eun na', ton' duing' hak' ri, a' ko' un' ton' ri na' a hkuin' lae kue' ngos saec' peunae'. Ku' kue' a' ye' keuting ti ceu yawo na' meuh a hk'a' yum' ku' yeuh ri pucti lih hk'a' nae hk'a' leumeus' keus na'.

⁷Ku' buih yeuh pe' nanggal' aen' a na' chak' ka hawc', a' nhaw' ci' ham' tap yeuh pe' un' lae leuceng ri ti hk'a' neumneum na'? ⁸Peue yeuh keutit' ri pe' na' hpaw eun ca' lih neum Peucawo' Cawo' klawng ri ti pe' na' Eun. ⁹"Ku' sangsawn' kleuc' aen' seun' a paeng kue' peunae' jhaec' na' yeuh a hkawomun' na' bing' gawm' meul' ri na'." ¹⁰Yum' ui' a hk'a' nae Peucawo' Eun neum, hpaw pe' ca' kaw yawm' ri rap ri ti kamkuit seubu na'. Peue ing' yeuh ku' suksak ri pe' na' eun ko', a saec' na' meuh a' nhaw', kaw eun pun ri hkam' hk'a' ciyang na'. ¹¹Ec' awng' na' pe', ui' lawn kawn' sangsawn' lah' hk'a' kah ri ton' duing' hak' ri na' ko', a ci' meuh kop keunhaw' ui' vae' kawn' pun ri hkam' hk'a' keunhap' nokneh na'? Ui' lawn na' sangsawn' lah' kah ri ton' duing' hak' ri na' ko', hk'a' sangsawn' lawng kleum' rawng' tawp' na' hpaw a ca' kaw lae kue' hk'a' ham' tap na'. ¹²Sum' kah ui' peue yeuh hpum' pe' suksak na' ce tawn' tu' ri na' meun.

¹³Ec' awng' na' pe', punta kaw pe' pun ri pon na', Peucawo' klawng Eun ri ti pe'. Daecti, pawlae lo' hk'a' pon pe' na' hot' ri yeuh alo ka hk'a' nham' keune ri na' heul'. Daecti, yeuh mhai' puri ti peue hawc' ti peue ri hk'a' leumeus' keus na' reu'. ¹⁴Kopti, seucic ka leukah' ritroe gawm' euc' na' meuh a, "Leumeus' peue ut' keunam caonao' mi na' ce seun' leumeus' mi tu' ri na' yeut reu'." ¹⁵Daecti pe' lawn kaw ri hk'a' keune puri meun ko', uin' sati ri reu', na' pe' cang lulaic gawm' euc' ri.

‡ Fae' 19:18

Pli' ka Cit' seunga' na' mae' kan' ka hk'a' nham' keune

¹⁶ Kop awn' na, ui' lah' a ri pe', a' yu im' hot' hk'a' Cit' seunga' na' heul' reu'. Pawlae a' yu im' hot' alo ka hk'a' nham' keune na'. ¹⁷ Kopti, alo ka hk'a' nham' keune na' to' tam' a alo ka hk'a' Cit' seunga' na', saec' meuh alo ka hk'a' Cit' seunga' na' a ku to' tam' alo ka hk'a' nham' keune na' yeut. Ku' lal' ceu aen' a meuh ransu ri puri. A yeuh pe' un' cang yeuh ku' sum' yeuh ri na'. ¹⁸ Daecti Cit' seunga' na' a lawn teuk' va pe' heul' ko', pe' hkuin' laee ut' hk'a' ruim ka leukah' ritroe na'.

¹⁹ Kan' ka hk'a' nham' keune na' pun a ri nyu ri glih' - gleueng'. A meuh yeuh ku' kleuc' hk'a' hkuin' nawng' - tang', yeuh ku' hk'aw' jeuk, leukah' hkuin', ²⁰ faee' ruphtu, yeuh kahta', ces ri puri, kleuc' leumeul puri, sum' is' is' peue, seungeueng' peulel ri puri, hpum' lhung' hpum' keuting, htu' hting' puri, gvah muk gvah cum puri, ²¹ hkoe' mang' puri, yuic' ri plai', yeuh hk'a' ren' kawn pon lheu' mae' ku' seubu seun' aen' a na' ce. Seun' tawn tuil' ui' sati pe' na', ui' kaw tang tuil' sati pe', peue yeuh seun' ceu nang aen' ce na' peue hkuin' kaw pun ri rap ri ti kuing' Eun Peucawo' na' meuh sin' ri.

²² Daecti pli' ka Cit' seunga' na' a meuh hk'a' leumeus' keus, hk'a' ren' kawn, hk'a' kuit nyawk' kuit sam' ran cumyen', hk'a' yeun' hkam, hk'a' cang tuckyak, hk'a' chak', hk'a' kati keutawn', ²³ hpum' onawn', hk'a' cang pe tu' ri na' meun. Leukah' ritroe na' ti moeng yawo a hkuin' ham' tap ceu nang aen' ce. ²⁴ Peue ut' hk'a' Eun Yesu' Hkrit na' tawk' ce alo ta' nha' ka hk'a' nham' keune ri na' pang kleum' rawng' tawp' na' hawc'. ²⁵ E' lawn a' yu im' hk'a' naee Cit' seunga' na' ko', a' yu im' hot' Cit' seunga' na' reu'. ²⁶ Pawlae va ri hpum' lhung' hpum' keuting, pawlae va ri yeuh puri seungeueng' ri puri mae' pawlae hkoe' mang' puri.

Yeuh ku' chak' ri peue gawm' euc'

6 Ec' awng' na' pe', pe' lawn pun ri nyu peue ti ri peue na' yeuh eun map' ti ri ceu ko', punta kaw eun tang a' yu im' cawp' hk'a' ri na', peue ut' hk'a' Cit' seunga' na' pe', pe' na' htuk' ri teum' kawm eun hk'a' naee hpum' onawn' ri na'. Daecti saec' pe' ri, punta kaw pe' un' cang hk'eup' hk'a' cop' long na' yeut na', sawng' uin' sati ri reu'. ² Teum' puri peus beus puri na' reu'. Yeuh pe' keutit' na', buih hot' pe' ri yeuh leukah' ritroe Eun Hkrit na'. ³ A' nhaw' eun

hkuin' meuh peue kue' a' ye' keuting daecti eun lawn kuit meun tu' ri na' meuh peue kue' a' ye' keuting ko', chi' lai eun tu' ri na' meun. ⁴ Peue ku peue sawng' caet ri nawk kan' ku' yeuh ri na' meun reu'. Yeuh keutit' na', eun saec' un' heul' keutec ri mae' peue seubu na' peue, eun kaw kue' ku' mhawng' ri hk'o' cuin meun. ⁵ Kopti peue gawm' euc' na' kah peue ri sawng' sawng' peus beus ri na' meun.

⁶ Peue pun ri rap ri ti leukah' sangsawn' na' eun gvah ri tuil' ku' chak' na' ri cawo' sangsawn' ri na' eun reu'.

⁷ Pawlae chi' lai tu' ri na' meun. Pe' hkuin' kaw cang chi' lai Peucawo' Eun. A' nhaw' lawn puin' keunhaw' ko', kaw eun vuic nang awn'. ⁸ A' nhaw' lawn puin' hot' hk'a' nham' keune ri na' meun ko', eun kaw pun ri vuic hk'a' lulaic na' neum hk'a' nham' keune awn' na. Daecti a' nhaw' lawn puin' hot' hk'a' Cit' seunga' na' ko', eun kaw pun ri vuic hk'a' a' yu im' cot' cu na' neum Cit' seunga' na'. ⁹ Pawlae kaw l' reng kloe ri hk'a' naee vang yeuh ku' chak' na', kopti e' lawn un' hpum' keuceum ko', e' kaw pun ri vuic yam cawp' a yam ri na'. ¹⁰ Kop awn' na, yam kue' e' yam na', yeuh ku' chak' na' ri peue gawm' euc' reu'. Lheu' awn' na, jaen yeuh a ri peue nya peue hk'ul' ku' kue' hk'a' yum' na' ce.

A hkuin' meuh hk'a' ton' duing' hak', daecti rap ri ti hk'a' hpanpleng' hk'u'

¹¹ Keue', tu' htawm tem' ui' ri ti ri, ui' tuil' a ri pe' na' a ci' pe tu' keuting a' neng.

¹² Peue sum' yeuh ku' ngam na' ri pal hk'a' nok ri na' ce tec' teng kah pe' ton' duing' hak' ri. Aen' a meuh punta tu' meun ce na' kaw ce un' pun ri hkam' hk'a' keunhap' nokneh na' kopti sangsawn' ce lawng ka kleum' rawng' tawp' Eun Hkrit na'. ¹³ Saec' meuh peue pun ri rap ri ton' duing' hak' ri hawc' na' ce ku hkuin' hot' ri yeuh leukah' ritroe na'. Daecti, punta kaw ce cang mhawng' ri hk'o' cuin mae' hot' pe' ri yeuh ku' lah' ce na', ce sum' kah pe' ton' duing' hak' ri na'. ¹⁴ Daecti pon hk'ai' lawng ka kleum' rawng' tawp' Eun Yesu' Hkrit Cawo' e' na' Eun na', ui' hkuin' kaw laee mhawng' ri hk'o' cuin mae' keunhaw' na'. Kopti meuh a kleum' rawng' tawp' awn' na, ku' kue' hk'a' pang bhen' keute' gawm' euc' na' a yeum hk'ai' ui' hawc', ui' ku yeum hk'ai' ku' kue' hk'a' pang bhen' keute' gawm' euc' na' hawc'. ¹⁵ Ton' duing' hak' ri na', a' ko' un' ton' ri na' a hkuin' kue' peuehot' keunhaw'. Daecti hk'a' tang pleng' hk'u' na' a kue' peuehot'. ¹⁶ Kah hk'a' kuit' nyawk' kuit sam' ran

cumyen' na' mae' hk'a' tuckyak na' kue' ri peue hot' ri yeuh ritroe aen' a na' ce reu'. Kah a kue' ri peue I' sarela' Eun Peucawo' na' ce.

¹⁷Tang' neum maet' maen' na', hk'o' a' nhaw' pawlaee ing' suksak ui'. Kopti kue' ui' roe mhai' Eun Yesu' na' ri jawngkui' tu' ui' na' hawc'.

¹⁸Ec' awng' na' pe', kah mun' sin' Eun Yesu' Hkrit Cawo' e' na' kue' ri civit pe' na' reu'. Amin.

E'fe'su'

1 Meuh ui' Paw' lu meuh peue caee Eun Yesu' Hkrit hot' alo Eun Peucawo' na'.

Ui' tem' ri tuil' htawm ti ok' aen' a ri peue Eun Peucawo' ut' nang veng E'fe'su' ku' kati keutawn' hk'a' naee Yesu' Hkrit Eun na' pe'.

²Kah mun' sin' mae' hk'a' kuit nyawk' kuit sam' ran cumyen' lih neum Kuiing' Peucawo' e' na' Eun mae' neum Cawo' Yesu' Hkrit Eun na' kue' ri pe' reu'.

Mun' hk'a' civit hk'a' naee Yesu' Hkrit Eun na'

³Suk' seun' Kuiing' Peucawo' Eun Cawo' Yesu' Hkrit e' ku' tuil' mun' hk'a' civit na' ku' ceu ri e' hk'a' naee Yesu' Hkrit Eun nang kuing' pang mao' na'. ⁴Kopti yeuh Eun e' seunga' chak' un' kue' vang ri hk'a' naee sai' ngai' Eun na', Eun leuk ri ti e' hk'a' naee Hkrit Eun tang' neum nanggal' yam bhen' keute' na' un' nang hpanpleng' a ri na'. Hk'a' naee hk'a' leumeus' keus na', ⁵tang' neum nanggal' ka na' Eun hkvet' ri uin' e' kaw meuh kon' ri ri Yesu' Hkrit Eun hot' ku' htuk' hpum' mae' alo Eun na', ⁶punta kaw e' suk' seun' Peucawo' tuil' Eun mun' keuting lhung' na' ri e' hk'o' hk'awng' htonnuk na' ri ku' leumeus' nyawk' Eun na'. ⁷Hk'a' naee Hkrit Eun, e' pun hk'a' htut lawtpon na' ri nham' Eun na'. E' pun hk'a' ploee' map' na' hot' mun' htonnuk Eun Peucawo' ⁸ku' tuil' Eun ri e' htonnuk na' ri cu' yi mae' hk'a' cang yawng gawm' euc' na'. ⁹Eun yeuh e' yawng alo rui' nyawk' Eun na' hot' ku' htuk' hpum' keutui' hpum' Eun hk'a' naee Hkrit Eun na'. ¹⁰Alo rui' nyawk' Eun na' meuh a, a lawn rot yam ka na', Peucawo' Eun kaw ti ri cu' hk'on' ku' kue' pang mao' mae' pang bhen' keute' na' ku' ceu ka hk'a' ruim Hkrit Eun.

¹¹Hk'a' naee Hkrit Eun, e' pun hk'a' leuk ri meuh nang rap ri ti sin' na' hot' hk'a' kan' Peucawo' mhe' Eun ri uin' nanggal' hawc' na'. Eun yeuh ku' ceu gawm' euc' na' meuh hot' vang keutui' hpum' ka alo ri na', ¹²punta ku' meuh muk nanggal' keutui' hpum' Hkrit Eun na' kaw e' suk' seun' munhpung' Eun Peucawo' na'.

¹³Yam pun pe' ri mhawng' leukah' leupaws seumeu' ku' meuh leukah' mun' ren' kaw ka hk'a' htut lawtpon pe' na', pe' ku' pun ri pawng' ri hk'a' naee Hkrit Eun yeut. Yam yum' pe' na', pe' pun ri tawk' ri ri ta' ra' na' hk'a' naee Heun. Ta' ra' na' a meuh Cit' seunga' chak' ku' Peucawo' yeuh Eun ri uin' kati na'.

¹⁴Cit' seunga' chak' na' a meuh nang htawhkam e' kaw meuh nang rap ri ti sin' ri na' rot ti yam peue Eun Peucawo' na' kaw ce' pun hk'a' htut lawtpon na'. Aen' meuh a pun ku' kaw suk' seun' munhpung' Eun na'.

Leukah' hk'o' mun' eun Paw' lu

¹⁵Kop awn' na, tang' neum yam pun ui' ri mhawng' lawng hk'a' yum' pe' hk'a' naee Cawo' Yesu' Eun na' mae' lawng hk'a' leumeus' keus pe' ri peue Eun Peucawo' na' ce' ku' peue na', ¹⁶ui' un' laee keului' mun' keuting ri Peucawo' Eun na' kopti pe' ri, ui' keutui' hpum' pe' hk'a' naee vang hk'o' ui' mun' na'. ¹⁷Hk'o' ui' a ri Peucawo' Eun Cawo' Yesu' Hkrit e' ku' meuh A' kuiing' munhpung' keuting na' Eun kah pe' kue' cit' seunga' ka cu' yi na' mae' cit' seunga' ka tuh' ri tuil' na', punta kaw pe' gawm yawng Eun heun' na'.

¹⁸Ui' ku' hk'o' hpum' pe' na' ceng', punta kaw pe' yawng vang keutui' hpum' ka klawng Eun ri ti pe' na', punta kaw pe' yawng mun' sin' Eun na' a ci' pe' meuneum a' neng pun peue Eun na' ce', ¹⁹mae' punta kaw pe' yawng ti' ca keuting un' laee kue' ku' kaw keutec ri mae' ka pun peue yum' na' e'. Ti' ca aen' a meuh seun' kan' kaw' reng keuting Eun ²⁰ku' yeuh ri hk'a' naee Hkrit Eun yam yeuh Eun Hkrit Eun tang' kuh' im' hk'ai' vang yeum ri na' mae' kah Eun mok' hk'a' a' tawm' ri nang kuing' pang mao'. ²¹Eun u' peung hk'a' pang cawo' u' peung, cawo' kue' ti' ca keuting, cawo' kaw' reng keuting, cawo' u' peung kuing' gawm' euc' mae' muis lah' ri pucti lih na' gawm' euc'. A hkuin' meuh pal cu' aen' a koe, daecti a ku' meuh cu' hk'a' cat na' yeut. ²²Peucawo' Eun kah ku' ceu gawm' euc' na' ut' hk'a' ruim cung Eun Hkrit na'. Eun tang' Eun meuh Cawo' hk'a' pang ku' ceu gawm' euc' na' pun muk kon' Hkrit na' ce'. ²³Muk kon' Hkrit na' meuh ce' jawngkui'

tu' Eun Hkrit. Ce htonnuk ri Hkrit Cawo' yeuh ku ceu a htonnuk na' Eun.

A'yu im' hk'a' naee Hkrit Eun

2 Pun pe' ri yeum hawc' kopti ku' kleuc' yeuh pe' na' mae' map' ²ku' tawn yeuh pe' yam a'yu im' pe' hot' hk'a' ka bhen' keute' aen' na mae' hot' hk'a' ka cawo' ang' kat' ku' meuh cit' buih yeuh kan' hk'a' naee peue un' leuceng ri ti leukah' Eun Peucawo' na' ce. ³Leumah', e' ri gawm' euc' e' tawn ut' hk'a' naee peue un' leuceng ri ti leukah' Eun Peucawo' na' ce yeuh ri kaw pun hk'a' ta' nha' ka nham' keune ri na', hot' ri yeuh ku' kuit ku' sum' is' ri na' htonnuk. Kopti meuh e' peue na', e' ku kuing' mae' hk'a' se-ungeueng' Eun Peucawo' na' seun' peue seubu na' ce. ⁴Daecti Peucawo' Cawo' htonnuk ri hk'a' tukyak na' kopti leumeus' Eun e' nyawk' na', ⁵e' saec' na' pun ri yeum hk'a' naee map' na' hawc' ko', Eun yeuh e' a'yu im' mae' Hkrit Eun. Pe' pun hk'a' htut lawtpon na' kopti meuh a mun' Eun Peucawo' na'. ⁶Peucawo' Eun yeuh e' kuh' im' mae' Hkrit Eun. Hk'a' naee Eun Hkrit na', Peucawo' Eun kah e' mok' nang kuing' pang mao' na' mae' Yesu' Hkrit Eun, ⁷punta hk'a' nanggal' ka na' kaw Eun tuh' peue nyu mun' sin' htonnuk un' laee kue' ku' kaw keutec ri mae' ka na'. Eun tuh' e' nyu a ri cu Eun hk'a' tukyak Eun ri e' na' hk'a' naee Yesu' Hkrit Eun. ⁸Kopti meuh a mun' Eun Peucawo' na', pe' pun hk'a' htut lawtpon na' ri hk'a' yum' pe' na'. Hk'a' htut aen' na, pe' hkuin' pun a ri yeuh meun pe' a, daecti a meuh lapsawng' lih neum Peucawo' Eun, ⁹a hkuin' meuh hk'a' htut lawtpon yeuh pe' ri pun, punta a'nhaw' hkuin' kaw cang yeuh a meuh seure' ri kop a saec' ti peue. ¹⁰Kopti meuh e' kan' pleng' Eun Peucawo' hk'a' naee Yesu' Hkrit Eun, punta kaw e' yeuh kan' chak' ku' Peucawo' mhe' Eun ri uin' pun e' tang' neum leumah' na'.

Meuh jawngkui' tu' keuhti hk'a' naee Hkrit Eun

¹¹Kop awn' na, kuit rot ri leumah' un' meuh pe' peue ceu Yu' da na' reu'. Peue ceu Yu' da na' sawn' meun ce ri meuh "muk peue ton' duing' hak'" (ton' duing' hak' ri awn' meuh a ku' yeuh hk'a' nham' keune yeuh peue ri ti' ri) na' ce ko', sawn' ce pe' meuh "muk peue un' ton' duing' hak' ri". ¹²Kuit rot ri yam awn' na pe' hk'akcak' Hkrit Eun. Pe' hkuin' pawng' ri mae' peue ceu I' sarela' na' ce. Pe' un' meuh peue ceu Yu' da ut' hk'a' nok ka kati sat' ca' tang' Eun Peucawo' na'. Pe' un' kue' vang keutui' hpum', pe' ut' nang lok na' se-

un' un' kue' a Peucawo' ko'. ¹³Daecti maet' maen' hk'a' naee Yesu' Hkrit Eun, pe' saec' na' ut' seungai leumah', pe' ing' rot de kopti meuh a nham' Eun Hkrit na' hawc'.

¹⁴Kopti meuh meun Eun hk'a' kuit nyawk' kuit sam' ran cumyen' e' na', Eun yeuh peue lal' muk na' ce meuh ti muk, Eun lhu' ri tec dal ka ces ri puri na' ¹⁵ri yeuh Eun leukah' ritroe ce peue Yu' da ri ku' kah ri yeuh heun' ceu na' lhu' gawm' euc' ri tu' ri na'. Vang keutui' hpum' Eun na' a meuh punta kaw Eun ti ri tec ku' lal' muk na' pleng' a meuh muk hk'u' ti muk hk'a' naee ri. Kopti yeuh a ki' na', a kue' hk'a' kuit nyawk' kuit sam' ran cumyen' na'. ¹⁶Yesu' yeuh Eun peue lal' muk na' ce tang' htuk' lung Peucawo' Eun ri kleum' rawng' tawp' na' ce meuh yawo jawngkui' tu' keuhti. Eun cu kleum' rawng' tawp' na' yeuh hk'a' ransu ka na' rai' euc'. ¹⁷Eun ing' sangsawn' hk'a' kuit nyawk' kuit sam' ran cumyen' na' ri peue un' meuh peue ceu Yu' da ut' seungai na' pe' mae' ri peue ceu Yu' da ut' de na' ce. ¹⁸Kopti meuh ka Heun ri, peue lal' muk na' e' cang ing' rot mae' A' kuiing' Eun ri Cit' seunga' ti ton' na' eun.

¹⁹Kop awn' na, hpaw pe' ca' laee meuh peue un' meuh peue ceu Yu' da peue leuvok un' duing' nyu na' bae, daecti meuh pe' peue ceu Eun Peucawo' mae' peue ceu Eun na' ce tiduih'. Pe' ku meuh muk peue nya peue hk'ul' Eun Peucawo'. ²⁰Pe' meuh nya Eun pun ri pleng' ri hk'a' pang kleum' ka peue caee Eun Yesu' mae' peue suip leukah' Eun Peucawo' ku' Yesu' Hkrit meuh Eun seumu a' ye' keuting hk'ai' peue nang ce' ka nya na'. ²¹Hk'a' naee Heun, nya na' a to' ri ri puri gawm' euc'. A go' ri meuh nya hk'o' mun' seunga' chak' hk'a' naee Peucawo' Eun. ²²Hk'a' naee Heun, pe' ku pun ri hkam' pleng' ri tiduih' kaw meuh vang ut' Eun Peucawo' ri Cit' seunga' Eun na'.

Paw' lu yeuh eun kan' pun peue un' meuh peue ceu Yu' da na' ce

3 Kop awn' na, ui' ri, meuh ui' Paw' lu ku' pun ri ut' nang htawng' pun Yesu' Hkrit Eun pun peue un' meuh peue ceu Yu' da na' pe'.

²Neumneum ka na' ko', pun pe' ri mhawng' lawng mun' Eun Peucawo' Cawo' tuil' ui' yeuh kan' mun' Eun pun pe' na' hawc'. ³A meuh vangdoh' rui' ku' tuh' Eun ui' nyu seun' ku' tawn tem' ui' peunaeng' na'. ⁴Yam lip pe' a na', pe' na' leuceng pun ku' yawng ui' lawng vangdoh' rui' Eun Hkrit na'. ⁵Cu leumah' na' ko', Eun hkuin' tuh' peue nyu a seun' maet' maen' cu Eun Cit' seunga' na' Eun tuh' peue caee se-

unga' Eun Yesu' mae' peue seunga' suip leukah' Eun Peucawo' na' ce nyu a na'.⁶ Ku' vangdoh' rui' aen' a meuh kopti meuh a leukah' mun' ren' kawn na' peue un' meuh peue ceu Yu' da na' ce pun ri hk'a sin' tiduih' mae' peue ceu Yu' da na' ce. Ce pun ri pawng' ri meuh hk'eung hk'a' naee jawngkui' tu' keuhti na', mae' pun ri pawng' ri hk'a' naee kati sat' ca' na' hk'a' naee Yesu' Hkrit Eun.

⁷Pun ui' ri meuh mhai' ka leukah' mun' ren' kawn na' ri lapsawng' mun' Eun Peucawo' tuil' Eun ri ui' ri kan' yeuh ka ti' ca Eun na'.⁸ Peue aet' hk'ai' peue hk'a' naee peue Eun Peucawo' na', ui' saec' na' tem hk'ai' heun, Peucawo' Eun tuil' mun' aen' na ri ui'. Aen' a meuh pun ui' ri sangsawn' peue un' meuh peue ceu Yu' da na' pe' ri hk'a' meuneum tuil' Eun Hkrit Cawo' sok un' pun na',⁹ mae' pun ui' ri tuh' peue gawm' euc' na' peue nyu ku' vangdoh' rui' na' glih' - gleueng', a meuh ku' mo' ri hk'a' naee Peucawo' Cawo' hpanpleng' ku ceu na' Eun tang' neum cu leumah' na'.¹⁰ Vang keutui' hpum' Eun na', punta maet' maen' cawo' u' peung mae' cawo' kue' ti' ca hk'a' naee kuing' pang mao' na' kaw ce nyu peuyha' cu' yi rui' nyawk' Eun Peucawo' na' ri muk kon' Hkrit na' ce
¹¹hot' vang keutui' hpum' cot' cu Eun ku' yeuh Eun htonnuk hk'a' naee Cawo' Yesu' Hkrit e' na' Eun.
¹²Kopti meuh a Heun ri mae' hk'a' yum' e' Eun na', e' pun ri ing' lec hk'a' naee Peucawo' Eun ri hpum' hat' han' un' lhat' ri.¹³ Kop awn' na, kopti meuh a hk'a' tukhka ui' pun pe' na', ui' hk'o' pe' na' pawlaee hpum' lu, meuh a munhpung' pe'.

Hk'o' mun' pun peue E'fe'su'

¹⁴Kop awn' na, ui' seukluin ri hk'o' mun' nanggal' Eun A' kuing' ¹⁵Cawo' meuh kuing' peue ceu nang kuing' pang mao' mae' pang bhen' keute' gawm' euc' na'.¹⁶ Hk'o' ui' mun' ri munhpung' htonnuk Eun na', kah Eun yeuh pe' kaw' reng keuting ri ti' ca ri Cit' seunga' Eun ku' ut' hk'a' naee pe' na',¹⁷ punta Hkrit kaw Eun ut' hk'a' naee pe' kopti hk'a' yum' pe' na'. Mae' ui' hk'o' mun', yam res pe' na' lec a rui' na' mae' keutawn' pe' hk'a' naee hk'a' leumeus' keus na' hawc' na',¹⁸ hk'a' leumeus' keus Eun Hkrit na' a ci' pe vah, pe lang', pe lhung' mae' pe rui' a' neng na', tu' pe' na' mae' peue Eun Peucawo' na' ce gawm' euc' pe' kaw cang pun ri yawng a.¹⁹ Pe' ku kaw leuceng ri pun hk'a' leumeus' keus aen' ut' a hk'a' pang ka peuyha' cu' yi na', punta kaw pe' htonnuk ri hk'a' htonnuk Eun Peucawo' na' gawm' euc' na'.

²⁰Maet' maen', suk' seun' Peucawo' Cawo' cang yeuh ri tuil' ku' hk'o' e' na' lheu' ku' hk'o' ku' kuit e' na' hot' ti' ca Eun ku' yeuh kan' hk'a' naee e' na'.
²¹Kah munhpung' na' kue' ri Heun hk'a' naee muk kon' Hkrit na' ce mae' hk'a' naee Yesu' Hkrit Eun ku' cu suip ri heul' cot' cu ri reu'. Amin.

Meuh hpum' ti meul' kop Cit' seunga'

4 Kop awn' na, meuh ui' nang pun ri ut' nang htawng' kopti yeuh ui' mhai' Eun Peucawo' na'. Hk'o' ui' pe' a' yu im' kuing' hpaw mae' hk'a' klawng Eun Peucawo' pun pe' ri rap ri ti na' reu'.² Yeuh hpum' ri tem onawn' hk'a' naee ku ceu na', eut' hpum' yeun' hkam ri puri hk'a' naee hk'a' leumeus' keus na' reu'.³ Hpum' meuh ti meul' hk'a' - naee Cit' seunga' na' co' ca' ri rokxa' a hk'a' naee ku hk'a' ku ceu na', cu hk'a' kuit nyawk' kuit sam' ran cumyen' na' meuh mu' mawt a reu'.⁴ Kue' a jawngkui' tu' keuhti koe mae' Cit' seunga' ti ton' koe seun' klawng Eun pe' ing' lec hk'a' keutui' hpum' keuhti koe na',⁵ kue' a Cawo' ti ton' koe, hk'a' yum' keuhti koe, hk'a' cum' keuhti koe.⁶ A kue' Peucawo' Cawo' meuh Kuing' peue gawm' euc' na' ti ton' koe, Eun ut' hk'a' pang peue gawm' euc', yeuh kan' hk'a' naee peue gawm' euc' mae' ut' hk'a' naee peue gawm' euc'.

⁷Daecti lapsawng' Eun na' Eun tuil' a ri e' ti peue hawc' ti peue hot' seun' ku' Hkrit gvah Eun ri tuil' a na'.⁸ Kop awn' na nang htawm Seunga' na' lah' ka yeuhki',

“Yam huk' Eun vang lhung' na',

Eun ku va mhai' pun Eun vang peueng' suik' na' ce heul'.

Eun tuil' lapsawng' ri peue.”†

⁹(Vangdoh' ka “huk' Eun” lah' ka na', sum' lah' ka Eun ku lih vang tem ka bhen' keute' na'.¹⁰ Punta kaw Eun bae sa' pahta' ri ku' kue' pang mao' pang bhen' keute' na' htonnuk na', Ku' lih na' meuh a Ku' huk' pang lhung' hk'a' pang kuing' pang mao' gawm' euc' na' Eun hawc'.¹¹ Eun tuil' peue ngon' na' ce meuh peue caee Eun Yesu', ngon' ce meuh nang suip leukah' Eun Peucawo', ngon' ce meuh nang sangsawn' leukah' mun' ren' kawn, ngon' ce meuh seura' kon' Hkrit mae' seura'.¹² Aen' ce meuh a punta kaw rangraen peue Eun Peucawo' na' ce pun kan' mhai' na', punta tu' Eun Hkrit na' kaw a gawm baet ri keuting huk' ¹³rot ti kaw a rot ti meuh e' nham' keune keuhti gawm' euc' hk'a' naee hk'a' yum' na' mae' hk'a' naee hk'a'

† Suk' seun' 68:18

yawng e' Kon' ai' Peucawo' na' Eun na', rot ti meuh e' nang heng' keuting htonnuk ri hk'a' htonnuk Eun Hkrit na'.

¹⁴Kop awn' na, e' hkuin' kaw laee meuh kon' nyom. Ba leuum' na' a hkuin' kaw laee cang dhim' e' heul' ing', guil' ka hk'a' sangsawn' na' mae' hk'a' vok' chi' lai geup' peue na' a hkuin' kaw laee cang puing' e' heul' ing'. ¹⁵Daecti kopti lah' e' ku' neumneum na' hk'a' naee hk'a' leumeus' keus na', e' kaw keuting huk' hawn' hk'a' naee ku ceu lec hk'a' naee Hkrit Cawo' meuh cing' na' Eun. ¹⁶Neum Heun ri, jawngkui' tu' ku' to' ghok' ri ri puri ri seunak ku nyeng na' gawm' euc' a keuting huk' hawn' mae' gawm baet ri keuting huk' meun hk'a' naee hk'a' leumeus' keus na' yam hk'eung ti ceu hawc' ti ceu awn' buih sawng' yeuh ce kan' ri na'.

A'yu im' kuing' hpaw mae' meuh kon' ka ku' ceng'

¹⁷Kop awn' na, kaw ui' lah' ri htawhkam a ri pe' hk'a' naee Cawo' Eun yeuhki', tang' neum maet' - maen' na' heul', pe' na' pawlaee a'yu im' seun' peue un' yum' Peucawo' Eun na' ce. Kuit ce pal ku' un' kue' mun' na'. ¹⁸Kopti un' yawng ce kopti hpum' cen' ce na', hk'a' cang yawng ce na' a duim' lawng heul'. Ce seungai hk'a' a'yu im' Eun Peucawo' na'. ¹⁹Ce un' kue' hpum' cang kuit ri yawng. Ce plo' tu' ri na' sa' sa' hot' hk'a' hkuit' nawng' tang' na'. Ce klu' klu' hkawo' hkawo' ri hk'a' naee ku' un' seunga' chak' ku ceu na' ri hk'a' ta' nha' ri na' un' laee sut' un' laee hawc'.

²⁰Daecti ing' yawng pe' Hkrit Eun na' hpaw a ca' meuh ku' yeuh keutit'. ²¹Pun pe' ri mhawng' lawng Eun na' mae' pun pe' ri rap ri ti leukah' sangsawn' hk'a' - naee Heun hot' ku' neumneum kue' hk'a' naee Yesu' Eun na', meuh ka neum. ²²Ku' to' ri hk'a' a'yu im' hk'im' pe' na', pun pe' ri rap ri ti leukah' sangsawn' hk'a' kaw pe' tecla jawngkui' tu' hk'im' pe' ku' buih pun ri hkam' ku' kaw yeuh pe' lulaic heul' ri ta' nha' cop' long meun na' hawc', ²³punta kaw pe' pun ri hkam' hk'a' mhe' ri leuploh' kamkuit pe' na' meuh hk'a' tang' hpum' hk'u' na', ²⁴mae' punta kaw pe' cuip' jawngkui' tu' hk'u' ku' Peucawo' hpanpleng' Eun seun' ti ri na' hk'a' naee hk'a' leupaws seumeu' na' mae' hk'a' seunga' chak' neumneum na'.

²⁵Kop awn' na, pe' na' kah ri tecla leukah' chi' lai na' mae' lah' ku' meuh neum na' ri peue ut' keunam caonao' pe' na' ce, kopti gawm' euc' e' meuh e' hk'eung hk'a' naee jawngkui' tu' keuiti na'. ²⁶Yam seungeueng' peulel pe' na', pawlaee va ri yeuh map'. †

† Suk' seun' 4:4

Pawlaee va hk'a' seungeueng' peulel pe' na' rot ti seun- yi na' lec ka. ²⁷Pawlaee tuil' yam na' ri Satan na'. ²⁸Pe' lawn tawn rabawk' peue ko', pawlaee va ri rabawk' bae, daecti yeuh kan' na'. Lo' ti' ri na' meun yeuh ku' kue' mun', punta na' a cang caw ri kue' ku' ti ri ceu gvah ri tuil' ri peue lo' na' ce.

²⁹Pawlaee va leukah' ku' un' htuk' ri lah' na' pucti lih hk'ai' moeng pe' na', daecti lah' yawo pal leukah' kue' mun' punta ku' kaw yeuh peue huk' hawn' hot' ku' lo' peue na'. Na' a cang kue' mun' pun peue mhawng' a na' ce. ³⁰Pawlaee va ri yeuh Cit' seunga' chak' Eun Peucawo' na' hpum' lu. Pun pe' ri tawk' ta' ra' ri Cit' seunga' aen' na hawc' pun seunyi ka hk'a' htut lawtpon na'. ³¹Hpum' sic' sawng' na' gawm' euc', hk'a' seungeueng' peulel, hk'a' kue' hpum' ri peue, hk'a' kleuc' leumeul, hk'a' htangh- teum' mae' ku' pereng ku ceu na', tecla a reu'. ³²Yeuh ku' chak' na' ri puri, tukyak ri puri reu'. Ploe' map' puri seun' Peucawo' plo' Eun map' pe' na' hk'a' - naee Hkrit Eun na'.

Yeuh ri kuing' hpaw mae' meuh kon' Eun

5 Kop awn' na, pe' na' hot' ri yeuh seun' ku' yeuh Eun Peucawo' na', yeuh ri kuing' hpaw mae' meuh pe' kon' leumeus' Eun reu'. ²A'yu im' hk'a' - naee hk'a' leumeus' keus na' seun' Hkrit leumeus' Eun e' ku' peue na' reu'. Eun tuil' meun tu' ri na' meuh se- un' ku' tan kue' ai' hom' mae' seun' ku' dum ri tan ri Peucawo' Eun na' pun e'.

³Daecti lawng hk'a' hkuit' nawng' tang' na', a'ko' lawng ku' un' seunga' chak' na' ku' ceu, a'ko' lawng law' hpa ta' nha' na' pawlaee yeuh a hk'a' naee pe' saec' yawo peunae', kopti meuh a ku' un' kuing' mae' peue seunga' chak' Eun Peucawo' na' ce.

⁴Leukah' hkuit', leukah' munkvaen un' kue' peue- hot', a'ko' leukah' hk'o' sum' keunyas un' htuk' ri lah' na' pe' ku' na' pawlaee lah' ris a, daecti ta ri lah' mun' keuting ri Peucawo' Eun na' chak' ka. ⁵Peue hkuit' nawng' tang', peue un' seunga' chak', a'ko' peue law' hpa keuting na' kaw ce un' pun ri rap ri ti sin' hk'a' naee kuing' Eun Hkrit na' mae' Peucawo' Eun na' pe' cang yawng a meulamlam ri. Peue law' hpa keut- ing na' meuh ce peue fae' ruphtu na'. ⁶Pawlaee kah a'nhaw' cop' long pe' ri leukah' un' kue' peuehot' na', kopti kop meuh a ceu nang awn' ce, Peucawo' Eun kaw ciyang peue un' leuceng ri ti leukah' Eun na' ce.

⁷Kop awn' na, pawlaee yeuh a' mawo ce peue awn' na.

⁸Kopti nanggal' aen' na ut' pe' hk'a' naee hk'a' duim' lawng na', daecti maet' maen' pe' ut' hk'a' naee

ceng' Eun Peucawo' na'. Yeuh ri a'yu im' seun' kon' ku' ceng' na' reu'.⁹ Kopti pli' ka ku' ceng' na' meuh a hk'a' chak', hk'a' leupaws seumeu' mae' hk'a' neumneum na' gawm' euc'.¹⁰ Ku' htuk' hpum' Eun Peucawo' na' a ci' meuh keunhaw', sok ri yeuh ri nyu a reu'.¹¹ Pawlaee heul' pawng' ri mae' kan' ka ku' duim' lawng ku' un' kue' pli' na', daecti tuh' vang kleuc' ka na' pucti lih na' a jaen chak'.¹² Kopti pal yawo lah' a rot ri ku' peue un' yum' na' ra ce ri yeuh na' a hk'o' kaic.¹³ Daecti ku' tuh' ri pucti lih ku' ceu ri ku' ceng' na' a kaw pun ri nyu ri glih' gleueng'.¹⁴ Kopti ku' ceng' na' yeuh a ku' ceu na' pun ri nyu ri glih' gleueng'. Kop awn' na, lah' a ri yeuhki',
 "Peue buih it' na', hk'awn' reu'.

Tang kuh' im' hk'ai' vang yeum ri na' reu'.
 Hkrit kaw Eun til' ku' ceng' ri mi."

¹⁵ Kop awn' na, uin' sati ri meulamlam ri hk'a' naee vang a'yu im' ri na' reu'. Pawlaee va ri a'yu im' seun' peue un' kue' cu'yi na' ce, daecti yeuh ri a'yu im' seun' peue kue' cu'yi na' ce reu'.¹⁶ Kopti sa' hkat' yam maet' maen' na' meuh a sa' hkat' rai na', yeuh ri cang lo' yam na' ku' yam ka reu'.¹⁷ Kop awn' na pawlaee va ri nga' suisa, daecti alo Eun Cawo' na' a yeuh sa' nhaw' na' yeuh ri yawng a reu'.¹⁸ Pawlaee va ri yuic' ri leuum' pli' bui ku' kaw yeuh peue lulaic na', daecti yeuh ri htonnuk ri Cit' seunga' na' reu'.¹⁹ U puri ri seng' suk' seun', seng' htawm cai suk' seun' na' mae' seng' cai hk'a' civit na' reu'. Cai suk' seun' Cawo' Eun rot ti nang puin ka hpum' ri na' reu'.²⁰ Hk'a' naee muis Eun Cawo' e' Yesu' Hkrit na', mun' keuting ri Kuing' Peucawo' Eun pun ku' ceu na' lalung reu'.

²¹ Yeuh ri leuceng leukah' puri hk'a' naee hkopyawm' yumyam' Hkrit Eun na' reu'.

Hpo' me

²² Beun' na' pe', leuceng ri ti leukah' ce me ri na' seun' leuceng pe' ri ti leukah' Eun Peucawo' na' reu'.

²³ Kopti me na' meuh eun cing' eun beun' na' seun' Hkrit meuh Eun cing' ce muk kon' Hkrit na'. Hkrit Eun ku' meuh Cawo' teum' kawm htut muk kon' Hkrit ku' meuh jawngkui' tu' Eun na' ce lawtpon yeut.²⁴ Muk kon' Hkrit na' ce ci' leuceng ri ti leukah' Eun Hkrit na' yeuh sa' nhaw' na', beun' na' eun ku' htuk' ri leuceng ri ti leukah' eun me ri na' ku' ceu seun' awn' na yeut.

²⁵ Me na' pe', leumeus' beun' pe' na' ce seun' Hkrit leumeus' Eun muk kon' Hkrit ri na' ce reu'. Eun tuil' tu' ri na' ri ce²⁶ punta kaw Eun yeuh muk kon' Hkrit na' ce seunga' chak' ri saic' ce ri leuum' neum leukah' ri na',²⁷ mae' punta kaw Eun kue' muk kon' Hkrit seun-

ga' seungawm plot' lon un' kue' vang cat a' ko' vang mhai' na', daecti seunga' chak' un' laee kue' vang ri.
²⁸ Seun' awn' na, me na' ce htuk' ri leumeus' beun' ri na' ce seun' sawng' leumeus' ce jawngkui' tu' ri na'. A' nhaw' lawn leumeus' beun' ri ko', leumeus' eun tu' ri na' yeut.²⁹ Hpaw a ca' kue' nang ces ri tu' ri na' saec' ti peue, pal peue nang rok sa' uii' ru tu' ri na' seun' Hkrit yeuh Eun a ri muk kon' Hkrit ri na' ce na'.
³⁰ Kopti meuh e' hk'eung ka jawngkui' tu' Eun na'.
³¹ Nang htawm Seunga' na' lah', "Kop awn' na, me na' eun kaw gah' hk'ai' makuiing' ri ka. Eun heul' kui' ri mae' beun' ri na' eun. Ka kaw meuh nham' keune keuhti."³² Lawng aen' meuh a ku' vangdoh' rui' nyawk', daecti buih lah' Ui' lawng Eun Hkrit mae' muk kon' Hkrit na' ce.³³ A saec' yeuh sa' nhaw', pe' ri ku' peue, pe' na' htuk' ri leumeus' beun' ri na' ce seun' leumeus' pe' tu' ri na' yeut. Beun' na' ce ku' htuk' ri hkopyawm' ri me ri na' ce.

Kon' mae' makuiing'

6 Kon' na' pe', leuceng ri ti leukah' ce makuiing' pe' na' hk'a' naee Peucawo' Eun reu', kopti aen' meuh a ku' cawp' nyawk'.² "Hkopyawm' yumyam' ri makuiing' pe' ka reu'." Aen' a ku' meuh leukah' ritroe nanggal' ku' Peucawo' yeuh Eun kati sat' ca' ri ti moeng na' yeut. Aen' a meuh,³ "Punta kaw mi pun ri ut' cumyen' mae' a'yu lang' pang bhen' keute' na'."††
⁴ Makuiing' na' pe', pawlaee va ri yeuh kon' pe' na' ce seungeueng', daecti uii' ce, hkviuk' guil ce mae' sangsawn' ce hot' seun' ku' Peucawo' sum' is' Eun na' reu'.

Mhai' mae' cawo'

⁵ Mhai' na' pe', leuceng ri ti leukah' ce cawo' hk'a' bhen' keute' pe' na' mae' hk'a' hkopyawm' yumyam', hk'a' lhat' til' na' mae' vang tisut' ka hpum' ri na' seun' leuceng pe' ri ti leukah' Eun Hkrit na' reu'.⁶ Punta kaw a htuk' hpum' eun cawo' pe' na', leuceng ri ti leukah' eun na' nanggal' to' nha' eun na' palkoe, a hkuin' meuh. Daecti yeuh a seun' meuh ri mhai' Eun Hkrit na', hot' ri yeuh alo Eun Peucawo' na' pucti lih neum hpum' ri na' reu'.⁷ Ren' kawm yeuh mhai' na' seun' buih yeuh a pun Peucawo' Eun na' reu', a hkuin' meuh yeuh a pun peue.⁸ Kopti tup yawng pe' Peucawo' kaw Eun tuil' lapsawng' ri naee a ri ku' chak' yeuh peue na' ku' peue ri, a saec' na' meuh nang meuh mhai', a' ko' nang un' meuh mhai'.

† Yamla 2:24 †† Sawm' leukah' mun' 5:16

⁹ Cawo' na' pe', yeuh a seun' awn' a ri mhai' pe' na' ce reu'. Pawlae glhat' ce, kopti tup yawng pe' Cawo' ku' meuh Cawo' pe' mae' Cawo' ce na' ut' Eun nang kuing' pang mao' na'. Eun hkuin' meuh mae' hk'a' mawn' hk'a' maen'.

Hk'eung an' nya Eun Peucawo'

¹⁰ Vang tisut' ka na', yeuh ri kaw' reng keuting hk'a' - nae Peucawo' Eun mae' hk'a' nae ti' ca keuting Eun na' reu'. ¹¹ Punta kaw pe' cang cawng keutawn' peue'ng' ri pe hk'a' kan' cop' long ka Satan na' pun, cuip' hk'eung an' nya Eun Peucawo' na' gawm' cum ka reu'. ¹² Kopti hpaw e' ca' peue'ng' hk'a' nham' keune na', daecti peue'ng' e' cawo' u' peue'ng' na' ce, cawo' ti' ca keuting na' ce, ti' ca ka hk'a' duim' lawng ka bhen' keute' aen' a na' ce mae' cit' rai ut' nang ang' kat' na' ce. ¹³ Kop awn' na, punta kaw pe' cang cawng keutawn' hkam' pe yam seunyi rai awn' rot ka na' pun na', cuip' hk'eung an' nya Eun Peucawo' na' gawm' cum ka reu'. Hawc' hk'eup' pe' ku ceu gawm' euc' na' heul' na', pe' ku na' kawn' cawng keutawn' pun. ¹⁴ Kop awn' na yeuh ri cawng keutawn' reu', ri mawt pe' nyawng ri na' ri sae' caet' ka ku' neumneum na', ri cuip' pe' hk'o hpa' la ka hk'a' leupaws seumeu' na', ¹⁵ mae' ri cuip' pe' jhaep' ka ku' kaw yeuh pe' rangraen ri kaw sangsawn' leukah' mun' ren' kawn ka hk'a' cumyen' na'. ¹⁶ Lheu' awn' na, jhawp' hpa' la ka hk'a' yum' ku' kaw pe' cang kang' pun tae ak' ngawl ka seuca' rai na' gawm' euc' ka reu'. ¹⁷ Cuip' cui' maw lhec' ka hk'a' htut lawtpon na' mae' jhawp' leungawng ka Cit' seunga' na' reu'. Leungawng awn' meuh a leukah' Eun Peucawo' na'.

¹⁸ Hk'o' mun' hk'a' nae Cit' seunga' na' ri leukah' hk'o' mun' na' mae' leukah' hk'o' hk'ang ku ceu na' laleung reu'. Hk'a' nae vang kuit rot ri ceu nang aen' ce hk'a' nae hpum' ri na', yeuh ri pawn kui' ri hk'o' mun' pun peue Eun Peucawo' na' ce laleung reu'.

¹⁹ Punta yam leukah' ui' yamnhaw' na' Peucawo' kaw Eun tuil' leukah' ri na' kah ui' tuh' vangdoh' rui' ka leukah' mun' ren' kawn na' hk'a' nae vang hat' han' na', pe' ku na' hk'o' mun' pun ui' reu'. ²⁰ Kopti kop meuh a leukah' mun' ren' kawn aen' na, ui' pun ri meuh peue cae pun ri mawt ri ri mu' lhec' na'. Punta kaw ui' sangsawn' leukah' mun' ren' kawn na' ri hpum' hat' han' ri hot' seun' ku' htuk' ui' ri kaw yeuh na' ce na', hk'o' mun' pun ui' reu'.

Leukah' tisut'

²¹ Saec' pe' ri punta kaw pe' yawng yeuh ui' sa' n-haw' na' mae' buih yeuh ui' keunhaw' na', awng' leumeus' ui' Tai' hki' kas' ku' meuh mhai' kati keutawn' hk'a' nae Peucawo' Eun na', kaw eun ris pe' mhawng' ku ceu gawm' euc' na'. ²² Kaw ui' cus' eun heul' ri pe' na' meuh a kopti vang keutui' hpum' aen' na. A meuh punta kaw pe' yawng yeuh ye sa' nhaw' na' mae' punta kaw eun tuil' kaw' reng pe' na'.

²³ Kah hk'a' kuit nyawk' kuit sam' ran cumyen' na' mae' hk'a' leumeus' keus hk'a' nae hk'a' yum' neum Kuiing' Peucawo' Eun mae' Cawo' Yesu' Hkrit Eun na' kue' ri ec' awng' na' pe' reu'. ²⁴ Kah mun' sin' na' kue' ri peue leumeus' Cawo' e' Yesu' Hkrit na' Eun ri hk'a' leumeus' keus un' lae cang sut' cang euc' na' ce gawm' euc' reu'.

Hpi 'li 'pi '

1 Htawm ti ok ' aen ' na ko ', meuh a ku ' Paw ' lu
maee ' Ti ' mo ' se meuh ya mhai ' Eun Yesu ' Hkrit,

ya tem ' ri tuil ' a ri peue veng Hpi ' li ' pi ' ku ' meuh
peue Eun Peucawo ' hk'a ' naee Yesu ' Hkrit Eun na ' pe '
gawm ' euc ', ri ro ' kan maee ' nang nom ' nawk muk
kon ' Hkrit na ' ce.

2 Kah mun ' sin ' maee ' hk'a ' kuit nyawk ' kuit
sam ' ran cumyen ' lih neum Kuiing ' Peucawo ' e ' na '
Eun maee ' neum Cawo ' Yesu ' Hkrit Eun na ' kue ' ri pe '
reu ' .

Hk'o ' mun ' pun muk kon ' Hkrit Hpi ' li ' pi '

3 Mun ' keuting ui ' ri Peucawo ' Eun yam kuit rot ui ' ri
pe ' ku pok na ' . 4 Yam hk'o ' ui ' mun ' pun pe '
gawm ' euc ' ku pok na ' , ui ' hk'o ' a maee ' hk'a '
ren ' kawn ri laleung, 5 kopti pe ' ku pun ri pawng ' ri
maee ' ui ' hk'a ' naee vang sangsawn ' leukah ' mun '
ren ' kawn na ' tang ' neum seunyi yamla a ri na ' rot
maet ' maen ' na ' . 6 Peucawo ' la ri yeuh kan ' chak '
hk'a ' naee pe ' na ' kaw Eun suip ri yeuh kan ' aen ' a
htonnuke rot ti seunyi yam Yesu ' Hkrit tang lih Eun na ' rot
ka na ' , ui ' yum ' a neum.

7 Yum ' ui ' pe ' gawm ' euc ' yeuhki ' na ' cawp ' ka,
kopti ut ' pe ' hk'a ' naee hpum ' ui ' na ' . Kopti yam buih
pun ui ' ri hkam ' hk'a ' hk'awng ' ri na ' , a ' ko ' yam
leukah ' htu ' hting ' htawhkam ui ' leukah ' mun '
ren ' kawn na ' , pe ' ku pun ri pawng ' ri maee ' ui ' hk'a '
naee kan ' ku ' Peucawo ' tuil ' Eun a ri ui ' ri mun ' Eun
na ' . 8 Ui ' ci ' pe keutui ' hpum ' pe ' gawm ' euc ' ri a '
neng na ' , Peucawo ' pen ' hkam ' Eun sa ' hki ' ka pun
ui ' . Leumeus ' ui ' pe ' gawm ' euc ' ri hk'a '
leumeus ' keus Eun Yesu ' Hkrit na ' .

9 Hk'o ' ui ' mun ' kah hk'a ' leumeus ' keus pe ' na '
gawm baet ri heun ' vah keuting hk'a ' naee peuyha '
cu ' yi maee ' hk'a ' leuceng pun ku ' neumneum na ' ,
10 punta kaw pe ' cang gvah ku ' chak ' hk'ai ' peue na ' a
ci ' meuh keunhaw ' na ' , maee ' punta kaw pe ' pun ri se-
unga ' chak ' un ' laee kue ' vang ri rot ti yam seunyi Eun
Hkrit na ' rot ka na ' , 11 maee ' punta kaw pe ' kue ' pli ' ka

hk'a ' leupaws seumeu ' lih neum Yesu ' Hkrit Eun na '
htonnuke na ' . Aen ' a meuh punta kaw tuil ' hk'a ' munh-
pung ' maee ' hk'a ' suk ' seun ' Peucawo ' Eun na ' .

Hk'a ' hk'awng ' Paw ' lu pun Eun ri hkam ' na ' yeuh a leukah ' mun ' ren ' kawn na ' puin ' ri heul '

12 Ec ' awng ' na ' pe ' , maet ' maen ' ku ' sum ' kah ui '
pe ' yawng na ' , neumneum ka na ' ko ' , ku ' meuh ri ui '
na ' hawe a lak ' meuh ku ' yeuh leukah ' mun '
ren ' kawn na ' puin ' ri heul ' . 13 Tang ' neum peue suik '
roksa ' nya haw ' eun hkun ' haw ' hkam ' na ' ce rot ti
peue seubu gawm ' euc ' na ' ce ku pun ri nyu a glih ' -
gleueng ' pun ui ' ri hkam ' ri hk'awng ' ri na ' htawng '
na ' meuh a pun Hkrit Eun. 14 Kopti meuh a hk'a '
hk'awng ' pun ui ' ri hkam ' na ' , yeuh a ec ' awng ' hk'a '
naee Peucawo ' Eun na ' ce hk'a ' heun ' na ' ce gawm pun
kaw ' reng ri hpum ' hat ' han ' un ' lhat ' ri ris leukah '
Eun Peucawo ' na ' .

15 Meuh a neum, peue ngon ' na ' pao ' ce lawng Eun
Hkrit na ' maee ' hkoe ' mang ' ri maee ' sum ' keutec
hkeng puri na ' . Daecti ku ' seubu na ' ce ngon ' , ce pao ' a
maee ' keutui ' hpum ' ri ku ' chak ' na ' . 16 Peue awn ' ce
yeuh a maee ' hk'a ' leumeus ' keus ri yawng ce Peucawo '
mhe ' Eun ri uin ' peue kaw mheut ' ui ' kopti kawn ' ui '
leukah ' mun ' ren ' kawn na ' . 17 Daecti muk nanggal ' na '
ce pao ' lawng Eun Hkrit na ' maee ' hk'a ' sum ' lhung '
sum ' keuting ri pun tu ' ri na ' . Ce un ' yeuh a maee '
meuh a ku ' lih neum hpum ' ri na ' , daecti ce yeuh a
maee ' keutui ' hpum ' ce kaw ri yeuh ui ' tukhka yam
buih pun ui ' ri hkam ' hk'a ' hk'awng ' ri na ' . 18 Daecti a
ci ' kaw yeuh keunhaw ' ? Ce saec ' na ' pao ' a maee '
hk'a ' tang ' hpum ' un ' cawp ' ri na ' , a ' ko ' cawp ' ri
na ' , daecti vang a ' ye ' keuting ka na ' pun ce ri pao '
lawng Eun Hkrit na ' . Kopti meuh a ceu nang aen ' a , ui '
ren ' kawn. Ui ' ku kawn ' kaw ren ' kawn hk'a ' nanggal '
ka na ' heul ' , 19 kopti yawng ui ' meuh a kopti leukah '
hk'o ' mun ' pe ' na ' maee ' meuh a kopti hk'a '
teum ' kawm ka Cit ' seunga ' Eun Yesu ' Hkrit na ' , ku '
pun ri meuh ri ui ' na ' a kaw pon ui ' heul ' . 20 Yum ' ui '
maee ' keutui ' hpum ' ui ' ri kaw un ' laee yeuh ku '
hk'o ' kaic na ' saec ' ti ceu, daecti kaw ui ' kue ' hk'a '

hat'han'na'htonuk punta maet'maen'Hkrit kaw Eun pun ri rap ri ti munhpung'na'kopti meuh a jawngkui'tu'ui'na'seun'ku'tawn pun Eun laleung na',ui'saec'na'a'yum',a'ko'kaw ri yeum un'lah'.²¹Kopti pun ui'na'ko',pun ui'ri a'yum'na' meuh a pun Eun Hkrit, kaw ri pun ri yeum na'ko',a jaen na'chak'nyawk'.²²Ui'lawn na'kawn'suip ri a'yum' hk'a'naee jawngkui'tu'ri aen'na'ko',ui'na'yueh kan'kaw kue'pli'na'.Daecti ui'un'yawng kaw ri leuk ri ti hk'a'nanghawn'na'a na'chak'nyawk'rika.²³Ui'kawn'kangkae hk'a'naee hpum'ri kopti hk'a'lal' hk'a'aen'na.Hpum'ui'na'ti hk'a'ka'na'sum'ing'ut'ui'maee'Hkrit Eun,a jaen na'chak'.²⁴Daecti ui'saec'na'kawn'pun ri a'yum'na',a jaen kue'mun'pun pe'.²⁵Yam yawng ui'aen'a meulamlam ri na',ui'yawng kaw ri tang suip ri a'yum'ut'maee'pe'heul',punta kaw pe'huk'hawn'maee'ren'kawn hk'a'naee hk'a'yum'na'.²⁶Yam na'ui'pun ri tang ing'glue ri pe'na'ko',pe'kaw ren'kawn htonnuk hk'a'naee Yesu'Hkrit Eun kopti meuh a ui'ri na'.

²⁷A saec'na'yueh sa'nhaw'ko',yueh ri kuing'hpaw maee'leukah'mun'ren'kawn Eun Hkrit na'reu'.Hawc'ko',ui'saec'na'ing'ri pe',a'ko'pun ri mhawng'yawo lawng pe'na'un'lah',ui'kaw yawng cawng keutawn'meuh pe'hpum'ti meul',seun'peue ti peue pe'tuik'peueng'punta hk'a'yum'ka leukah'mun'ren'kawn na'.²⁸Un'lhat'ri peue to'tam'pe'na'ce na',kaw a meuh het'pun ce ri nyu kaw ce pun ri lulaic,daecti pe'kaw pun ri lawtpon ri Peucawo'Eun.

²⁹Kopti Peucawo'tuil'Eun pe'kaw yum'Hkrit Eun palkoe na'a hkuin'meuh,daecti Eun ku kah pe'pun ri hkam'ku'tukha na'pun Heun yeut.³⁰Kopti saec'pe'ri,buih pun pe'ri hpa'ku'ham'tap na'seun'ku'tawn nyu pe' hk'eup'ui'ana'.Saec'meuh maet'maen',pe'ku pun ri mhawng'kawn'buih ham'tap ui'a yeut.

Tang'hpum'ri onawn'seun'Hkrit Eun

2 Pe'lawn pun kaw'rang ri ri meuh pe'ti jawngkui'tu'maee'Hkrit Eun,pe'na'pun ri rap ri ti hk'a'seueul'hpum'ri neum hk'a'leumeus'keus Eun na',pun ri yeuh a'mawo maee'Cit'seunga'na'maee'pun ri rap ri ti hk'a'onawn'maee' hk'a'tukyak na'ko',²kah pe'yueh ui'ren'kawn htonnuk ri kue'pe'kamkuit ti hk'a',hk'a'leumeus'keus keuhti, hpum'ti meul'maee'vang keutui'hpum'keuhti na'reu'.³Pawlaee yeuh ri sum'lhung'sum'keuting,pawlaee kuit yawo pun tu'ri na'palkoe,daecti yeuh a hk'a'naee hpum'onawn'ri,sawn'peue ri chak' hk'ai'tu'pe'

na'reu'.⁴Pe'ri ti peue hawc'ti peue,htuk'pe'ri un'sok pal ku'kaw kue'mun'pun pe'na',daecti pe'ku na'htuk'ri kuit ku'kaw kue'mun'pun peue na'reu'.⁵Htuk'pe'ri kue' hk'a'tang'hpum'seun'Yesu'Hkrit Eun.

⁶Eun saec'na'meuh seun'Peucawo'Eun,daecti Eun hkuin'jhawp'seun'htan Eun Peucawo'na'.

⁷Daecti Eun hpuic'ri uin'an'nya ri na',Eun lih hkam'ri meuh seun'mhai',lih keut'ri meuh peue.

⁸Yam lih meuh Eun peue na',Eun yeuh hpum'ri tem.Eun saec'na'yeum pang kleum'rawng'tawp'na',Eun yawm'ri leuceng ri ti leukah'Eun Peucawo'na'.

⁹Kop awn'na,Peucawo'Eun yuk Eun huk'lhung'ri vang munhpung'lhung' hk'ai'peue na'.

Eun tuil'muis hk'a'pang ka muis seubu gawm'euc'na'ri Heun,

¹⁰punta ku'a'yum'nang kuing'pang mao',pang bhen'keute'na'maee' hk'a'ruim ka bhen'keute'na'

kaw ce seukluin ri maee'muis Eun Yesu'na',

¹¹maee'punta dak'ku dak'na'kaw a rap ri ti Yesu'Hkrit meuh Eun Peucawo'na'

punta kaw ce tuil'munhpung'ri A'kuiing'Peucawo'Eun na'.

Ceng'seun'seumeueng'

¹²Kop awn'na a'mawo leumeus'ui'na'pe',seun'leuceng pe'ri ti leukah'ui'na'ing'laleung na',a hkuin'caee meuh yam ut'ui'maee'pe'na'palkoe,daecti pe'na'htuk'ri jaen gawm leuceng a heun' hk'ai'yam un'laee ut'ui'maee'pe'na',kah pe'suip ri yeuh a heul' hk'a'naee hk'a'lhat'ruing na'rot ti pun pe' hk'a'htut lawtpon na'reu'.¹³Kopti Peucawo'meuh Eun Cawo'yueh kan' hk'a'naee pe'na'.Eun kah pe'kue'hpum'sum'yueh a hot' hk'a'keutui'hpum'chak'Eun na'.

¹⁴⁻¹⁵Punta kaw pe'un'laee kue'vang ri na'maee'kaw pe'kue' hk'a'seunga'chak'na'seun'meuh pe'kon' hk'i Eun Peucawo'un'laee kue'vang ri hk'a'naee peue chi'lai ri hk'a'na'ce na',kah pe'yueh ku ceu na' hk'a'naee vang un'vuinvaw pe',a'ko'un'htu'hting'puri na'reu'.Htuk'pe'ri til'ku'ceng'na'nang ngon'ce peue map'na'seun'seumeueng'na'til'a pang mao'na'ko'.¹⁶Punta hteo'ui'ri na'maee'yueh ui'kan'na'un'meuh a ku' hk'o' hk'awng'na'

maee' punta kaw ui' cang yeuh a meuh seure' ri pun hk'a' naee seunyi yam Hkrit tang lih Eun na', tuil' leukah' a' yu im' na' ri peue map' na' ce reu'.¹⁷ Daecti ui' saec' na' pun ri buit ri hk'uic' seun' leuum' ku' tan na' hk'a' pang ku' tan na' maee' hk'a' pang kan' mhai' yeuh pe' hk'a' naee hk'a' yum' pe' na' ko', ui' ren' kawm maee' ren' kawm maee' pe' gawm' euc' tiduih'.¹⁸ Kop awn' na, pe' ku na' htuk' ri ren' kawm maee' ren' kawm maee' ui' tiduih' yeut.

Ti' mo' se eun maee' E' pahpawditas' eun

¹⁹ Punta hpum' ui' na' kaw a sam' ran yam pun ui' ri mhawng' lawng pe' na', ui' keutui' hpum' a hk'a' - naee Cawo' Yesu' Eun, un' ling', ui' kaw cus' Ti' - mo' se eun heul' ri pe'.²⁰ Ui' hkuin' kue' nang seubu cang kuit ri mhawng' ku' nyhap' ku' sam' ran pe' na' seun' Ti' mo' se eun saec' ti peue.²¹ Kopti peue na' sawng' sawng' sok ce mun' pun tu' ri na', ce un' kuit pun Yesu' Hkrit Eun.²² Daecti Ti' mo' se eun ci' pe meuh peue ritroe chak' a' neng na', pe' ku yawng a. Eun yeuh mhai' maee' ui' hk'a' naee vang pao' leukah' mun' ren' kawm na' seun' kon' na' yeuh eun mhai' eun kui- ing' ri na'.²³ Kop awn' na, yam yawng ui' lawng ku' to' ri ri ui' na' kaw a hawc' yeuh sa' nhaw' na', ui' keutui' hpum' kuit ri kaw keulawn' cus' eun heul' ri pe'.²⁴ Yawng ui' a meulamlam ri hk'a' naee Cawo' Peucawo' Eun na', un' ling', kaw ui' ing' ri pe' tam' tu' ri na'.

²⁵ Daecti kuit ui' ri kaw htuk' ri cus' E' pahpawditas' eun keutah ing' ri pe'. Eun meuh ec' awng' ui', meuh a' mawo yeuh kan' tiduih' maee' ui' maee' meuh peue suik' tiduih' maee' ui'. Eun ku meuh peue cus' pe' eun heul' teum' kawm ku' lo' ui' na'.²⁶ Eun leunyeng nyawk' ri pe', eun hpum' un' sam' ran, kopti pun pe' ri mhawng' lawng peuyhat eun na'.²⁷ Neumneum ka na' ko', peuyhat eun kaw hk'aws' yeum, daecti Peucawo' Eun tukyak ri heun. A hkuin' meuh heun ri koe, daecti punta kaw ui' un' laee kuit nyhap' hk'a' pang ka hk'a' kuit nyhap' na', Eun ku tukyak ri ui' yeut.²⁸ Kop awn' na, punta kaw pe' ren' kawm maee' tang pun pe' ri nyu eun bae na', maee' punta hk'a' kuit nyhap' ui' na' kaw a yawm' na', ui' cus' eun ing' ri pe' vaeveae.²⁹ Kah pe' rap ri ti eun hk'a' naee Peucawo' Eun ri hk'a' ren' kawm nyawk' na' maee' tuil' munhpung' ri peue yeuhki' na' ce reu',³⁰ kopti daee yeum eun pun kan' Eun Hkrit na'. Eun ti im' yeum ri teum' kawm ui' hk'a' - naee ku' yeuh un' pun pe' na'.

Pawlaee papuing hk'a' nham' keune na'

³ Ec' awng' na' pe', leukah' tisut' ka na', ren' kawm hk'a' naee Peucawo' Eun reu'. Gawm tem' ui' lawng ka ku' tawn tem' ui' ri pe' na' bae na', a hkuin' meuh ku' nyhap' pun ui'. A ku kaw meuh ku' kang' ru kum pe' meun.

² Uin' sati ri ri muk so' teh' ce, peue yeuh kan' rai na' ce maee' ri peue pes' ri tec keune ri na' ce reu'.³ Kopti meuh e' peue ton' duing' hak' neumneum na'. E' faee' Peucawo' Eun ri Cit' seunga' Eun na'. E' ti seure' ri hk'a' naee Yesu' Hkrit Eun. E' un' papuing hk'a' nham' keune na',⁴ ui' saec' na' kaw kue' vang keutui' hpum' cang papuing a.

A' nhaw' lawn kuit ri kue' vang keutui' hpum' kaw ri papuing ri hk'a' nham' keune na' ko', ui' jaen kue' a heun' hk'ai' heun.⁵ Hawc' keut' ui' a pun seudi' seun- yi na', ui' rap ri ti hk'a' ton' duing' hak' ri na'. Ui' meuh peue I' sarela' ceucat eun Benyamin †. Ui' meuh taengtaeng peue Hebrae'. Hk'a' naee hk'a' leukah' ritroe na' ko', ui' meuh peue Hparisae'.⁶ Hk'a' naee hk'a' reng ri hk'a' hpasa na' ko', ui' tawn keunhap' muk kon' Hkrit na' ce. Hk'a' naee hk'a' leupaws seumeu' na' hot' leukah' ritroe na' ko', ui' hkuin' laee kue' vang ri.

⁷ Daecti a sum' meuh keunhaw' na' ku' tawn meuh ku' a' ye' keuting ri ui' na', maet' maen' kopti meuh a Hkrit Eun na', ui' sawn' a meuh ku' sum.⁸ Lheu' awn' na, ku ceu na' yam keutec a ri maee' ku' keuting pun ui' ri yawng Yesu' Hkrit Cawo' ui' na' Eun na', ui' nyu ku ceu na' meuh ku' un' kue' ngos. Ui' tecla ku ceu gawm' euc' na' ce pun Heun. Punta kaw ui' pun Hkrit Eun na' maee' ut' hk'a' naee Heun na', ceu nang awn' ce ui' sawn' a meuh hpam'.⁹ Tu' ui' na' meun ko', ui' hkuin' kue' hk'a' leupaws seumeu' pun ri neum leukah' ritroe na', ui' kue' yawo pal hk'a' leupaws se- umeu' pun ri neum hk'a' yum' ui' Hkrit Eun na'. A meuh hk'a' leupaws seumeu' lih neum Peucawo' Eun, pun a ri neum hk'a' yum' na'.¹⁰ Sum' yawng ui' Hkrit Eun na' maee' sum' cheu ti' ca kuh' im' Eun na'. Ui' sum' seun' Heun ri hk'a' naee hk'a' pun ri hk'eup' hk'a' tukhka na' maee' hk'a' pun ri yeum na',¹¹ punta ti hk'a' un' meuh ko' ti hk'a' na', ui' kaw tang kuh' im' yeut.

† Hkun' haw' hkam' nanggal' ce peue I' sarela' na' ing' eun neum ceu- cat eun Benyamin na'.

Tawk' cim' ri heul' vang pe na'

¹²Pun ui' aen' ce gawm' euc' hawc' na', a' ko' pun ui' ri hkam' ri mhe' ri meuh peue chak' htonnuk hawc' na', a' hkuin' meuh. Daecti punta kaw ui' seubut ri ti ku' Yesu' Hkrit uin' Eun ui' kaw seun' Heun ri na', ui' tawk' cim' ri heul'. ¹³Ec' awng' na' pe', hpaw ui' ca' sawn' meun ri seubut ri pun aen' ce hawc', daecti yeuh ui' ti ceu. Awn' a ko', pil ku' pon heul' hawc' na', hawc' ko', nguih tu' ri na' heul' ri ku' kue' hk'a' nanggal' na'. ¹⁴Punta hk'a' kaw ui' pun ri huk' nang kuing' pang mao' na' kopti meuh a ku' Yesu' Hkrit yeuh Eun na' kaw a meuh lapsawng' pun ui' na', ui' kaw tawk' cim' ri heul' vang pe na'.

¹⁵Peue keuting hk'a' naee hk'a' civit ri ku' peue na' e', htuk' e' ri kue' kamkuit yeuhki'. Mi lawn kuit ku' ti ri ceu na' a un' seun' aen' a ko', Peucawo' kaw Eun yeuh mi leuceng pun a ceng' saee'. ¹⁶Kah yawo e' a' yu im' kuing' hpaw mae' hot' ku' yeuh rot e' na'.

¹⁷Ec' awng' na' pe', pawng' puri hot' ri yeuh seun' ku' yeuh ui' na' mae' hot' ri yeuh seun' peue a' yu im' hot' ku' tuil' ye ri pe' na' ce reu'. ¹⁸Kopti seun' ku' tawn tuil' ui' sati pe' laleung leumah' na', maet' maen' ui' ku' tuil' sati pe' mae' leuum' ngai' ri, kue' a nang a' yu im' seun' meuh ce ransu ka kleum' rawng' tawp' Eun Hkrit na' heun' peue. ¹⁹Hk'a' tisut' ce na' kaw a meuh hk'a' lulaic. Peucawo' ce na' meuh a keuteul ce na'. Ce mhawng' ri hk'o' cuin mae' ku' htuk' ce ri kaic na'. Ce ta' hpum' ri na' ri ku' to' ri hk'a' bhen' keute' na'. ²⁰Daecti e' ri meuh e' peue kuing' pang mao'. E' buih ko' Cawo' htut lih neum kuing' pang mao' meuh Cawo' Yesu' Hkrit na' Eun.

²¹Hk'a' naee cu Eun ti' ca ku' cang yeuh ku' ceu gawm' euc' na' ut' hk'a' ruim ti' ca Eun na', Eun kaw plin' jawngkui' tu' tem nyawk' e' na' meuh seun' jawngkui' tu' kue' munhpung' keuting Eun na'.

4 Kop awn' na, ec' awng' leumeus' mae' keutui' hpum' ui' ri pe' ku' meuh hk'a' ren' kawn kuit sam' ran mae' meuh cui' maw hk'il' ui' na' pe', a' mawo leumeus' ui' na' pe', htuk' pe' ri cawng keutawn' hk'a' naee Peucawo' Eun seun' awn' a.

²Hk'o' hk'ang ui' a ri Yuodia mae' Sintiche pa', kah pa' htuk' lung puri hk'a' naee Peucawo' Eun.

³Hk'o' hk'ang ui' a ri peue ku' meuh a' mawo pun ri peus beus hk'a' naee vang kati keutawn' tiduih' mae' ui' na' pe', kah pe' teum' kawm beun' na' ka. Meuh ka peue yeuh kan' pun leukah' mun' ren' kawn na' tiduih' mae' ui' mae' Hkremen mae' peue seubu ku' meuh a' mawo yeuh kan' mae' ui' na' ye. Peue

awn' ce kue' muis hk'a' naee htawm a' yu im' na' yeut.

Tuil' sati

⁴Ren' kawn hk'a' naee Peucawo' Eun laleung reu'. Ui' kaw tang lah' a bae' ti pok, ren' kawn reu'. ⁵Yeuh hpum' onawn' pe' na' glih' gleueng' ri peue gawm' euc' reu'. Un' ling', Cawo' Yesu' na' Eun lih rot. ⁶Pawlaee hki' keung ri keunhaw' na' saec' ti ceu, daecti hk'o' ku' ceu na' ri Peucawo' Eun ri hk'o' mun', hk'o' hk'ang mae' mun' keuting na'. ⁷Hawc' ko', hk'a' kuit nyawk' kuit sam' ran cumyen' Eun Peucawo' ku' un' kuit rot pe' ri ka na' kaw a rok' sa' hpum' pe' na' mae' kamkuit pe' na' hk'a' naee Yesu' Hkrit Eun.

⁸Ec' awng' na' pe', leukah' tisut' na', ku' meuh neumneum, ku' kuing' ri suk' seun', ku' cawp', ku' seunga' chak', ku' hk'o' leumeus' mae' ku' hk'o' suk' seun' na' kuit ri mhawng' lawng aen' ce reu'. Ceu nang aen' ce meuh a ku' chak' kuing' ri suk' seun' na', kuit ri nawk a reu'. ⁹Ku' pun pe' ri rin, pun pe' ri rap, pun pe' ri mhawng' mae' pun pe' ri nyu ri ui' na' ce na', ti ri yeuh a reu'. Hawc' ko', Peucawo' ka hk'a' kuit nyawk' kuit sam' ran cumyen' na' Eun kaw ut' mae' pe'.

Mun' keuting ri peue Hpi'li'pi' tuil' lapsawng' na' ce

¹⁰Ren' kawn nyawk' ui' hk'a' naee Peucawo' Eun, kopti vang tisut' ka na' tang kuit nyhap' pe' pun ui' bae' na'. Neumneum ka na' ko', kuit nyhap' pe' pun ui' laleung, daecti a un' kue' yam kaw pe' yeuh a puc tu' hkeul' ri na'. ¹¹Lah' ui' a yeuhki' na', a hkuin' meuh kopti buih lo' ui'. Kopti a saec' na' yeuh sa' n-haw' ko', rin ui' ri ti hk'a' hit' hpum' ri ku' kue' meun ui' na' hawc'. ¹²Yam cutyawm' na' a yeuh sa' n-haw' na' ui' yawng a. Yam kue' paipeng na' a yeuh sa' nhaw' na', ui' ku' yawng a yeut. Saec' na' hk'a' ri sak', a' ko' ngeup' ri, saec' na' meuneum a' ko' hk'o' tuckyak, a saec' na' yeuh sa' nhaw' ko', rin ui' ri ti ku' vangdoh' mo' ka hk'a' hit' hpum' ri ku' kue' meun ui' na' hawc'. ¹³Ui' cang yeuh ku' ceu gawm' euc' na' ri Hkrit Cawo' tuil' kaw' reng ui' na' Eun.

¹⁴Daecti yam pun ui' ri tukhka na', pe' gvah ri tuil' ui' is' na', a chak' nyawk'. ¹⁵Lheu' awn' na, seun' peue Hpi'li'pi' na' yawng pe' a hawc' na', yam la ui' ri sangsawn' leukah' mun' ren' kawn pok nanggal' yam suip ui' ri pucti neum kuing' pe' Masido' ni' na', a hkuin' kue' muk kon' Hkrit teum' kawm ui' ri ku' cai' saec' ti muk, a kue' pal pe' ri koe. ¹⁶Saec' meuh yam kawn' ut' ui' nang veng Hte' salo' ni' na', yam lo' ui'

na', pe' ku bu' ku' lo' ui' na' ti pok hawc' ti pok.
¹⁷Lah' ui' a yeuhki' na' a hkuin' to' ri meuh sum' is'
 ui' lapsawng', daecti sum' kah ui' pe' pun hk'a' nap
 mun' na' kopti meuh a hk'a' tukyak pe' na'.¹⁸ Pun ui'
 ri rap ri ti lapsawng' ku' bu' pe' ri E' pahpawdita' eun
 na' hawc'. Neumneum ka na' ko', ui' pun a lheu'
 hk'ai' ku' lo' ri na'. Ceu nang aen' ce a meuh ku' tan
 hom'. A meuh ku' tan Peucawo' rap Eun ri ti, a hit' ri
 hpum' Eun.

¹⁹Kopti meuh a Yesu' Hkrit Eun na', Peucawo' ui' na'
 Eun kaw tuil' ku' lo' pe' na' ku ceu ka ri pe' ri hk'a'
 meuneum nyawk' Eun na'.²⁰ Kah munhpung' na' kue'

ri A' kuiing' Peucawo' e' na' Eun cot' cu ri reu'. Amin.

Leukah' tisut'

²¹Peue Eun Peucawo' hk'a' naee Yesu' Hkrit Eun na' ce
 ku peue, lah' ce mhawng' keutui' hpum' ui' ce.
 Ec' awng' ut' mae' ui' na' ce ku tawm' a ce lah' ri le-
 unyeng ri pe'.²² Peue Eun Peucawo' na' ce ku peue,
 lheu' awn' na peue ut' nang haw' eun Kae' sa na' ce ku
 lah' ri leunyeng ri pe' yeut.

²³Kah mun' Eun Cawo' Yesu' Hkrit na' kue' ri civit
 pe' na' reu'.

Kaw'law'sae'

¹ Htawm ti ok' aen' na ko', meuh ui' Paw'lu meuh peue caee Eun Yesu' Hkrit hot' alo Eun Peucawo' na' mae' Ti' mo' se awng' ui' na' ya,

² ya tem' ri tuil' a ri ec' awng' ku' meuh peue Eun Peucawo' ut' nang veng Kaw'law'sae' ku' kati keutawn' hk'a' naee Hkrit Eun na' pe'.

Kah mun' sin' mae' hk'a' kuit nyawk' kuit sam' ran cumyen' lih neum Kuing' Peucawo' e' na' Eun † na' kue' ri pe' reu'.

Leukah' hk'o' mun' eun Paw'lu

³ Yam hk'o' ya mun' pun pe' na', ya mun' keuting ri Kuing' Peucawo' Eun Cawo' Yesu' Hkrit e' na' Eun laleung. ⁴ Kopti pun ya ri mhawng' lawng hk'a' yum' pe' hk'a' naee Yesu' Hkrit Eun na' mae' lawng hk'a' leumeus' keus pe' peue Eun Peucawo' na' ce na'. ⁵ A meuh hk'a' yum' mae' hk'a' leumeus' keus pucti lih neum hk'a' keutui' hpum' ku' rok' sa' ri uin' ri pun pe' nang kuing' pang mao' ku' pun pe' ri mhawng' ing' hawc' hk'a' naee leukah' neumneum ku' meuh leukah' mun' ren' kawn ⁶ ku' ing' rot ri pe' na'. Leukah' mun' ren' kawn aen' a buih pli' mae' huk' hawn' pang bhen' keute' na' hk'awp' seun' buih meuh a hk'a' naee pe' na' tang' neum seunyi pun pe' ri mhawng' leukah' mun' ren' kawn na' mae' leuceng pun pe' mun' Eun Peucawo' na' hot' ku' neumneum gawm' euc' kue' hk'a' naee leukah' mun' ren' kawn aen' na. ⁷ Pun pe' ri rin ri ti leukah' mun' ren' kawn na' ri E' pafas' ku' meuh a' mawo leumeus' yeuh mhai' tiduih' mae' ya na' eun. Eun meuh nang yeuh mhai' kati keutawn' ri Hkrit Eun pun ye ††. ⁸ Eun ku ris ya mhawng' lawng hk'a' leumeus' keus pe' hk'a' naee Cit' seunga' na' yeut.

⁹ Kop awn' na, tang' neum seunyi yam pun ya ri mhawng' lawng pe' na', ya hk'o' mun' pun pe' un' laee deut. Kah Peucawo' Eun yeuh pe' htonnuk ri cu' yi ka alo Eun na' ri cu' yi mae' hk'a' cang yawng ka hk'a' civit na' reu'. ¹⁰ Hk'o' ya mun' yeuhki' na' meuh a

punta kaw pe' a' yu im' kuing' hpaw mae' meuh pe' peue Eun Peucawo' na' mae' punta kaw pe' hit' hpum' Eun ri hk'a' ku' ceu na' mae' meuh a punta kaw pe' kue' pli' hk'a' naee kan' chak' ku' ceu na', huk' hawn' hk'a' naee cu' yi yawng Peucawo' Eun na', ¹¹ kaw' reng keuting ri cu kaw' reng Eun na' gawm' euc' hot' ti' ca kue' munhpung' Eun na' punta kaw pe' cang yeun' hkam nyawk' mae' ren' kawn kuit nyawk' kuit sam' ran ¹² mun' keuting ri A' kuiing' Cawo' yeuh Eun pe' kuing' hpaw mae' kaw pe' pun ri rap ri ti sin' tiduih' mae' peue Eun hk'a' naee kuing' ka ku' ceng' na'. ¹³ Kopti teum' kawm Eun e' pon hk'ai' kuing' ka hk'a' duim' lawng na', mae' va e' lec kuing' Eun Kon' ai' leumeus' Eun na'. ¹⁴ Hk'a' naee Kon' ai' awn' Eun, e' pun ri rap ri ti hk'a' htut lawtpon ‡ na', hk'a' htut lawtpon na' a meuh hk'a' ploee' map' na'.

Hkrit keuting Eun hk'ai' peue

¹⁵ Kon' ai' meuh Eun ruprang Eun Peucawo' Cawo' nyu un' pun na' meuh Eun Kon' ai' hk'a' pang ka ku' hpanpleng' ri na' ku' ceu ka. ¹⁶ Kopti meuh a Heun ri, ku' ceu na' a pun ri hpanpleng' ri gawm' ku' kue' pang mao' na' mae' pang bhen' keute' na', gawm' ku' cang nyu ri na' mae' ku' un' cang nyu ri na', cawo' u' peung ten na' ce, a' ko' cawo' ti' ca keuting na' ce, a' ko' cawo' u' peung na' ce, a' ko' cawo' an' nya keuting na' ce. Ku' ceu gawm' euc' na' Eun hpanpleng' a, a meuh pun Heun. ¹⁷ Eun a' yu im' tang' neum nangg' ka yam keunhaw' na' un' nang kue' ka na'. Hk'a' naee Heun na', ku' ceu gawm' euc' na' a cawp' - maen hkaw puri. ¹⁸ Eun meuh cing' ka jawngkui' tu', cing' ce muk kon' Hkrit na'. Punta kaw Eun meuh Cawo' tisut' hk'a' pang ku' ceu na', Eun meuh vang la ri tang' na' mae' Eun meuh nang kuh' im' hk'ai' vang yeum na' nangg'. ¹⁹ Kopti ku' htonnuk kue' hk'a' naee Peucawo' Eun na' gawm' euc' a ku' kue' hk'a' naee Kon' ai' na' Eun yeut. ²⁰ Ku' kue' pang bhen' keute' na' mae' ku' kue' hk'a' naee kuing' pang mao' na' gawm' euc' kaw a tang' htuk' lung Eun kopti meuh a

† Nang htawm Seunga' na' ngon' a lah', "Kuing' Peucawo' Eun mae' Cawo' Yesu' Hkrit e' na' Eun." †† Nang htawm Seunga' na' ngon' a lah', "pe'".

‡ Nang htawm Seunga' na' ngon' a lah', "Pun ri rap ri ti hk'a' htut lawtpon na' ri nham' Eun na'."

Kon' ai' Eun na', a hit' ri hpum' Eun. Hk'a' kuit nyawk' kuit sam' ran cumyen' aen' kue' a neum nham' Eun Kon' ai' ku' bah lih neum kleum' rawng' tawp' na'.

²¹Nanggal' aen' na tawn hk'akcak' pe' Peucawo' Eun, pe' meuh ransu ri Heun hk'a' naee hpum' ri kopti yeuh pe' ku' rai na'. ²²Daecti maet' maen', punta kaw Eun ap tu' pe' na' meuh peue seunga' chak' un' kue' vang ri, un' kue' vang tang' map' nanggal' Eun na', Eun tang yeuh pe' htuk' lung cawp' maen ri ri jawngkui' tu' Eun Hkrit ri hk'a' yeum Eun na'. ²³A saec' yeuh sa' nhaw', pe' kaw kah ri a' yu im' hot' hk'a' yum' pe' na', cawng keutawn' un' fuii' fai' hk'ai' hk'a' keutui' hpum' kue' hk'a' naee leukah' mun' ren' kawn na'. Aen' a meuh leukah' mun' ren' kawn pun pe' ri mhawng', pun pe' ri pao' a ri ku' a' yu im' ku' ceu ku' pun ri hpanpleng' ri ut' hk'a' ruim ka kuing' pang mao' na'. Ui' ri, meuh ui' Paw' lu. Ui' meuh mhai' ka leukah' mun' ren' kawn aen' na.

Paw' lu sae' caee' co' ca' eun ri yeuh kan' pun muk kon' Hkrit

²⁴Maet' maen', ren' kawn ui' mae' ku' pun ui' ri hkam' hk'a' tukhka pun pe' na'. Ku' tukhka Hkrit pun Eun ri hkam' ku' kawn' vang na', buih seue' ui' a htonnuk hk'a' naee tu' ri na' pun jawngkui' tu' Eun na'. Jawngkui' tu' Eun na' meuh a muk kon' Hkrit na' ce. ²⁵Keut' ui' ri meuh mhai' ce muk kon' Hkrit na' hot' ku' Peucawo' kah Eun ui' pao' leukah' ri na' htonnuk ri pe'. ²⁶Leumah' ti cu hawc' ti cu na', leukah' Eun Peucawo' aen' a meuh leukah' mo' vangdoh' rui' ri na', daecti maet' maen' Eun tuh' peue ri na' ce nyu a hawc'. ²⁷Peucawo' sum' kah Eun peue ri na' ce yawng sum' tuil' Eun peue un' meuh peue ceu Yu' da na' ce yawng leukah' vangdoh' rui' ri na'. Leukah' vangdoh' rui' Eun na' a meuh Hkrit ut' Eun hk'a' naee pe' † na', a meuh hk'a' keutui' hpum' kaw pe' pun ri rap ri ti munhpung' tiduih' mae' Heun na'.

²⁸Punta kaw e' ap peue ku peue na' peue meuh peue chak' htonnuk hk'a' naee Hkrit Eun na', e' pao' lawng Eun na', e' sangsawn' tuil' sati peue ku peue na' ce ri cu' yi na' gawm' euc'. ²⁹Pun vang keutui' hpum' aen' a na', ui' sae' caee' co' ca' ri yeuh kan' ri cu ui' kaw' reng Eun na' gawm' euc' ku' buih yeuh kan' ti' ca reng hk'a' naee ui' na'.

2 Ui' ci' pe co' ca' ri pun pe', pun ec' awng' veng Laodisia mae' pun peue un' duing nyu ui' na' ce

† Pe' lah' ka na', lah' a peue un' meuh peue ceu Yu' da ku' yum' Peuca-wo' Eun na' ce.

gawm' euc' a' neng na', ui' sum' kah pe' yawng a. ²Vang keutui' hpum' ui' na' meuh a tuil' kaw' reng ce na', kah ce tuil' kaw' reng puri hk'a' naee hpum' ri, htuk' lung puri hk'a' naee hk'a' leumeus' keus na' mae' kaw ce yawng hk'a' leuceng ri pun htonnuk na'. Ceu nang aen' a meuh punta kaw ce pun ri yawng vang-
doh' rui' Eun Peucawo' na', meuh a Hkrit Eun. ³Dom' ka peuyha' cu' yi mae' hk'a' cang yawng gawm' euc' na' mo' a ri hk'a' naee Hkrit Eun. ⁴Lah' ui' a yeuhki' na' meuh a punta a' nhaw' kaw peue un' cang cop' ri pun pe' ri leukah' hk'o' sum' yum' na'. ⁵Kopti tu' ui' na' a saec' na' un' ut' mae' pe' ko', daecti hpum' ui' na' a ut' mae' pe'. Pun ui' ri nyu ut' pe' cawp' hk'a' cawp' hk'ong' ri na' mae' yum' keutawn' pe' hk'a' naee Hkrit Eun na', ui' ren' kawn.

Hk'a' htonnuk hk'a' naee Hkrit Eun

⁶Kop awn' na, kopti pun pe' ri rap ri ti Yesu' Hkrit meuh Eun Peucawo' ri hawc' na', a' yu im' heul' hk'a' naee Heun, ⁷jheum' res ri na' mae' yeuh ri keut-
ing huk' hawn' hk'a' naee Heun, yeuh ri kaw' reng keut-
ing hk'a' naee hk'a' yum' hot' seun' ku' pun pe' ri rin
ri ti na', mae' yeuh ri nukveh ri leukah' mun' keuting
na' reu'.

⁸Uin' sati ri meulamlam ri reu', pawlae kah a' nhaw' ing' mheut' ri ti pe' meuh mhai' ri ri leukah' cu' yi ku' un' kue' vangdoh' na' mae' ku' chi' lai na'. Leukah' awn' meuh a ritroe yeuh peue ing' ti cu hawc' ti cu hot' kleum' ka bhen' keute' aen' na, a hkuin' to' ri ri Hkrit Eun.

⁹Kopti ruprang Eun Peucawo' na' gawm' euc' kue' a htonnuk hk'a' naee jawngkui' tu' Eun Hkrit na'. ¹⁰Pun pe' ri rap ri ti hk'a' htonnuk na' hk'a' naee Hkrit Eun. Eun meuh cing' hk'a' pang ce cawo' u' peung mae' ca-
wo' an' nya keuting ku peue na' ce. ¹¹Pe' ku pun ri rap ri ti hk'a' ton' duing' hak' ri na' hk'a' naee Heun. A meuh hk'a' raws' ri tec map' †† na'. A hkuin' meuh hk'a' ton' duing' hak' yeuh peue ri ti' ri, daecti a meuh ku' yeuh Eun Hkrit. ¹²Pe' ku pun ri puing' ri mae' Heun hk'a' -
naee rap pe' ri ti hk'a' cum' na'. Eun yeuh pe' tang kuh' im' mae' ti ri hk'a' yum' pe' hk'a' naee ti' ca Eun Peucawo' Cawo' yeuh Hkrit Eun tang kuh' im' na' Eun.

¹³Yam yeum pe' hk'a' naee map' ri na' mae' hk'a' -
naee map' † ka un' pun ri rap ri ti hk'a' ton' duing' hak' na', Peucawo' yeuh Eun pe' a' yu im' mae' Hkrit Eun tiduih'. Eun ploee' ri tec map' e' na' gawm' euc' ka. ¹⁴Eun yeuh htawm yeuh kati sat' ca' ku' mawt e' ri

†† A' ko' hk'a' nham' keune † A' ko' hk'a' nham' keune

ritroe ku' ham'tap to'tam'e' na' ce meuh ku' hk'o' hk'awng'. Eun ti ri tawk' ri tec htawm aen' na pang kleum' rawng'tawp' na'.¹⁵ Eun ku ti cawo' u' peung mae' cawo' an' nya keuting na' ce hk'uic'. Eun pya ce nanggal' peue heun' na' mae' Eun pe ce ri kleum' rawng'tawp' na'.

¹⁶Kop awn' na, pawlae kah a'nhaw' taws' a' mu ri pe' ri ku' hk'a, ku' som' pe', a' ko' lawng pawe to' ri hk'a' ritroe na', a meuh pawe hk'eng chi', a' ko' pawe seunyi Sin' na'.¹⁷ Ceu nang aen' gup meuh a' lawng ka ku' kawng' kawng' hk'a' kui' na'. Daecti hk'a' neum-neum na' sok ri nyu a hk'a' naee Hkrit Eun.¹⁸ Pawlae kah peue sawng' guil ri meuh peue hpum' onawn' fae' in' hpom na' ce ing' yeuh pe' un' cang rap ri ti lapsawng' na'. Peue awn' meunui' meunui' ce lah' ris lawng ku' nyu ce na'. Ce hpum' keuting ri kamkuit ku' un' kue' peuehot' hot' hpum' ka hk'a' nham' keune ri na'.¹⁹ Ce seun' jawngkui' tu' un' to' ri ri Cawo' ku' meuh cing' na' Eun ko'. Cawo' aen' Eun meuh Cawo' yeuh jawngkui' tu' gawm' euc' na' to' ri ri puri ri jhawng' na' mae' seunak na'. A yeuh jawngkui' tu' awn' a keuting huk' hawn' hot' seun' ku' Peucawo' kah Eun a keuting huk' hawn' na'.

²⁰Kopti pun pe' ri yeum mae' Hkrit Eun, pe' pun ri pon hk'ai' kleum' ka ritroe ka bhen' keute' na' hawc' na', a ci' meuh kop keunhaw' pe' vae' kawng' meung ut' ri hk'a' ruim ka ritroe na' seun' kawng' meuh pe' is' ka bhen' keute' na'?²¹ U' hpama ri, ritroe na' lah', "pawlae ti, pawlae cim, pawlae paic'".²² Ritroe aen' ce peue lawn yeuh a hawc' ko', kaw a yeng ri lulaic rai' heul' meun, kopti tang' a ri uin' ri hk'a' pang ka leukah' tuil' leukah' sangsawn' peue na'.²³ Neum-neum ka na' ko', ritroe aen' seun' a kue' a cu' yi ko', ce fae' hk'o' mun' hot' ku' tang' ce ri uin' na', ce guil ri onawn' mae' keunhap' nokneh tu' ri na' meun. Ceu nang aen' ce a hkuin' kue' mun' pun kaw u' peung hk'a' ta' nha' nham' keune na' saec' peunae'.

A'yu im' hk'a' naee hk'a' seunga' chak'

3 Kopti pun pe' ri tang kuh' im' mae' Hkrit Eun hawc' na', kah hpum' pe' na' kuit yawo pal ku' ut' pang lhung' vang Hkrit ut' Eun hk'a' ti' a' tawm' Eun Peucawo' na' reu'.² Kah kamkuit pe' na' kuit yawo pal ku' ut' pang lhung' na' reu', un' mak' kuit ku' hk'a' bhen' keute' na'.³ Kopti yeum pe' hawc', daecti maet' maen' civit pe' na' a mo' ri mae' Hkrit Eun hk'a' naee Peucawo' Eun.⁴ Yam Hkrit Cawo' meuh Cawo' civit pe' na' tang puc Eun ri lih na', yam awn' na

pe' ku kaw pucti lih mae' Heun hk'a' naee munhpung' na' yeut.

⁵Kop awn' na, toh ri tec hk'a' ta' nha' bhen' keute' pe' na' reu', meuh a hk'a' hkuit' nawng' tang', hk'a' un' seunga' chak', kuh' nga, kue' hpum' sum' yeuh ku' rai mae' law' hpa keuting, law' hpa keuting na' sawn' a ri meuh hk'a' fae' ruphtu na'.⁶ Kopti meuh a ceu nang aen' ce na', hk'a' seungeueng' Eun Peucawo' na' a buih ing'††.⁷ Nanggal' aen' na, pe' ku tawn' a' yu im' hk'a' naee hk'a' aen' na yeut.⁸ Daecti maet' maen', pe' na' htuk' ri tecla ceu nang aen' ce hk'ai' tu' ri na' gawm' euc' ka, a meuh hk'a' seungeueng' peulel, hpum' ha' hpum' vae, sum' kah peue sui', lah' ku' un' muis un' tuing ri peue mae' lah' leukah' seueum' seue' na' pucti lih hk'ai' moeng ri na'.⁹ Pawlae chi' lai puri, kopti raws' pe' ri tec tu' hk'im' ri na' mae' ku' yeuh hk'im' pe' na' tiduih' hawc',¹⁰ mae' cuip' pe' jawngkui' tu' hk'u' ku' buih hpanpleng' hk'u' ri hot' seun' ruprang Eun Cawo' hpanpleng' na', a meuh punta kaw pe' gawm baet ti yawng Eun heun' na'.¹¹ Kop awn' na, a hkuin' kue' peue Helasa', a' ko' peue Yu' da, peue ton' duing' hak' ri, a' ko' peue un' ton' duing' hak' ri, peue ceu seubu, peue nang hk'i‡, peue meuh mhai', a' ko' peue un' meuh mhai'. Daecti Hkrit meuh Eun ku ceu, Eun ut' hk'a' naee peue ku peue.

¹²Kop awn' na kopti meuh pe' peue Peucawo' leuk Eun ri uin', meuh peue seunga' chak' mae' meuh peue Peucawo' leumeus' Eun na', cuip' hk'eung hk'a' cang tuckyak, hk'a' teum' kawm peue, hk'a' hpum' onawn', hk'a' hpum' nyom' jom mae' hk'a' cang yeun' hkam na' reu'.¹³ Yeun' hkam ri puri reu'. Pe' saec' na' kue' hpum' ri puri kopti keunhaw' na' un' lah', ploe' map' pu pe' reu'. Ploe' map' pu pe' seun' Peucawo' ploe' Eun map' pe' hawc' na' reu'.¹⁴ Cuip' hk'eung hk'a' leumeus' keus na' kang' ku' chak' aen' ce gawm' euc' reu'. Hk'a' leumeus' keus na' mawt a ceu nang aen' ce htonnuk meuh yawo keuhti.

¹⁵Punta kaw pe' pun ri rap ri ti hk'a' kuit nyawk' kuit sam' ran cumyen' Eun Hkrit na' kopti Peucawo' klawng' Eun ri ti pe' meuh yawo jawngkui' tu' keuhti na', kah hk'a' kuit nyawk' kuit sam' ran cumyen' aen' a u' peung hpum' pe' na' reu'. Yeuh ri kue' hpum' mun' keuting na' reu'.¹⁶ Yam sangsawn' mae' tuil' pe' sati ri cu' yi gawm' euc' na', mae' yam cai pe' seng' leukah' suk' seun', htawm suk' seun' mae' seng' htawm hk'a' civit hk'a' naee kuit rot ri mun' Eun Peuca-wo' na', kah leukah' Eun Hkrit na' kue' htonnuk

† Nang htawm Seunga' na' ngon', a lah', "e"

†† Nang htawm Seunga' na' ngon', a lah', "a buih ing' ri peue lheu' leukah' Eun Peucawo' na' ce."‡ A' ko' peue Si' hti'

hk'a'naee pe' reu'.¹⁷ Pe' saec' na' yeuh ceu nangn-haw' na' un' lah', leukah' leupong, a' ko' yeuh kan', yeuh a hk'a'naee muis Eun Cawo' Yesu' na' gawm'euc' ka, mun' keuting ri A'kuiing' Peucawo' Eun ri Yesu' Eun reu'.

Ku' nyahk'ul' kon' Hkrit kuing' ce ri yeuh

¹⁸ Beun' na' pe', yawm' ri leuceng ri ti leukah' ce me ri na' reu'. Aen' cawp' maen a hk'a'naee Peucawo' Eun.

¹⁹ Me na' pe', leumeus' beun' ri na' ce reu'. Pawlaee yeuh ku' reng ri ce.

²⁰ Kon' na' pe', leuceng ri ti leukah' ce makuiing' pe' na' ku' ceu ka reu'. Kopti ceu nang aen' ce htuk' a hpum' Eun Peucawo'.

²¹ A'kuiing' na' pe', pawlaee yeuh kon' pe' na' ce hpum' sui'. Kopti kaw ce cang hpum' aet'.

²² Mhai' na' pe', leuceng ri ti leukah' ce ro' cawo' hk'a' bhen' keute' pe' na' ku' ceu ka reu'. Punta kaw a htuk' hpum' ce na', pawlaee kah a meuh nanggal' to' nha' ce na' palkoe. Daecti yeuh a ri hk'a'naee pun ka hpum' ri na' mae' ri hk'a' lhat' til ri Peucawo' Eun na' reu'.²³ Pe' saec' na' yeuh ceu nangn-haw' na', yeuh a ri sut' ka hpum' ri na' seun' yeuh pe' a ri Peucawo' Eun na' reu', pawlaee kah a seun' yeuh pe' a ri peue na'.²⁴ Kopti tup yawng pe' kaw ri pun sin' ku' meuh lapsawng' na' ri Peucawo' Eun. Hkrit aen' meuh Eun ku' buih yeuh pe' mhai' Eun na'.²⁵ A'nhaw' lawn yeuh ku' kleuc' na' ko', eun kaw pun ri rap ri ti tut ka na' hot' ku' kleuc' yeuh ri na'. Peucawo' hpaw Eun ca' keue' ri buh peue.

4 Cawo' na' pe', yeuh ku' chak' mae' ku' leu-paws seumeu' na' ri mhai' pe' na' ce reu'. Kopti tup yawng pe' kue' ri Cawo' ut' nang kuing' pang mao' yeut.

Bae leukah' sangsawn'

² Saec' yamnhaw', hk'o' mun' reu'. Yam hk'o' pe' mun' na', yeuh ri pawn kui' ri mae' kue' hpum' mun' keuting ri Peucawo' Eun reu'.³ Punta kaw ye cang ris leukah' vangdoh' rui' Eun Hkrit ku' pun ui' ri hkam' hk'a' hk'awng' ri pun a na', hk'o' mun' pun ye reu', kah Peucawo' Eun tah' leuva' ka ku' buih sangsawn' ye na'.⁴ Punta kaw ui' cang pao' lawng awn' a glih' gleueng' hot' seun' ku' kuing' ui' ri yeuh na', hk'o' mun' pun ui' reu'.⁵ Yeuh ri kue' cu' yi' lo' a yeuh peue hk'a' nok na' ce cang meuh kon' Hkrit reu'. Lo' yam pun pe' ku' yam na' kue' mun' htonnuk reu'.⁶ Kah

leukah' lah' pe' laleung na' kue' mun' htonnuk reu'. Punta kaw pe' cang yawng ku' kaw ri top' leukah' peue na' yeuh sa'nhaw' na', hkawo' a is' cis yeuh a kue' rasa' reu'.

Leukah' tisut'

⁷ Tai' hki' kas' eun kaw ris pe' mhawng' lawng ui' na' gawm'euc' ka ri pe'. Eun meuh awng' leumeus' ui'. Eun meuh nang kati keutawn' yeuh kan' Eun Peucawo' mae' meuh a' mawo nang yeuh kan' Eun Peucawo' tiduih' mae' ui'.⁸ Punta kaw pe' yawng lawng ui' na' † mae' kaw eun tuil' kaw' reng pe' na', ui' rangraen ri kaw cus' eun heul' ri pe'.⁹ Eun kaw heul' meuh mae' Onesimas' ku' meuh awng' kati keutawn' leumeus' ui' na' eun. Eun ku' meuh peue hk'a'naee pe' ti peue. Ka kaw ris pe' mhawng' lawng ka ku' kue' ku' meuh maen' na' gawm'euc' ka.

¹⁰ Aritahkas' meuh a' mawo mae' ui' nang htawng' na' eun mae' Maku' eun ka ku' tawm' a ka lah' ri leunyeng ri pe'. Maku' mae' Banabas' ka meuh kon' ec' kon' awng'. (Ui' ku' tawn lah' a ri pe' hawc', Maku' eun lawn ing' ri pe' ko', rap ri ti eun meulamlam ri reu'.)¹¹ Yesu' ku' muis seubu eun a meuh Yutas' na' eun ku' tawm' a eun lah' ri leunyeng ri pe'. Hk'a'naee ce muk a' mawo yeuh kan' pun kuing' Eun Peucawo' mae' ui' na' ce, a kue' yawo peue loe' peue awn' meuh ce peue ceu Yu' da. Ce tuil' kaw' reng ui' nyawk'.¹² E' pafas' meuh peue hk'a'naee pe' ku' meuh mhai' Eun Yesu' Hkrit na' eun ku' tawm' a eun lah' ri leunyeng ri pe'. Punta kaw pe' cawng keutawn', keuting hk'a'naee hk'a' civit na' mae' hpum' keutawn' htonnuk hk'a'naee alo Eun Peucawo' na' gawm'euc' ka, eun hk'o' mun' pun pe' laleung.¹³ Lawng sae' caee' yeuh eun kan' reng pun pe' na' mae' pun peue veng Laodisia mae' peue veng Hierapolis' na' ce, ui' ku' cang hkam' sa' hki' ka yeut.¹⁴ Lu' ka seura' bai' ku' meuh a' mawo leumeus' e' na' eun mae' Demas' na' eun ka ku' tawm' a ka lah' ri leunyeng ri pe'.¹⁵ Ec' awng' ut' nang veng Laodisia na' ce, mae' Numfa' ka mae' muk kon' Hkrit hk'om puri nang nya ka Numfa' na' ce, hk'o' pe' lah' ce mhawng' leunyeng ui' ri ce.

¹⁶ Pe' lawn hawc' lip htawm aen' a ko', pe' ku' na' tang tuil' muk kon' Hkrit Laodisia na' ce lip a. Saec' meuh htawm ing' neum veng Laodisia na', pe' ku' na' lip a yeut.

¹⁷ Lah' a ri Ahki' pas' eun, "Yeuh kan' pun mi hk'a'naee Peucawo' Eun na' rot ti hawc' htonnuk ka reu'."

† Nang htawm Seunga' na' ngon', a lah', "punta kaw eun yawng lawng pe' na'"

¹⁸Ui' ri, meuh ui' Paw'lu. Ui' tem' leukah' keutui' hpum' aen' na ri ti' ri na' meun. Kuit rot ri mu' lhec' ui' na'. Kah mun' sin' na' kue' ri pe' reu'.

1 Hte'salo'ni'

1 Htawm ti ok' aen' na ko', meuh a ku' Paw' lu, Silas' mae' Ti' mo' se tem' ye ri tuil' a ri muk kon' Hkrit Hte'salo'ni' na' pe' ri hk'a' naee Kuing' Peucawo' mae' Cawo' Yesu' Hkrit Eun.

Kah mun' sin' mae' hk'a' kuit nyawk' kuit sam' ran cumyen' na' kue' ri pe' reu'.

Hk'a' yum' ce muk kon' Hkrit Hte'salo'ni' na' seutu in seutan laws' ka

²Yam hk'o' ye mun' ku pok ka na', ye hk'o' mun' pun pe', mun' keuting ri Peucawo' Eun pun pe' laeung.

³Nanggal' Eun Kuing' Peucawo' e' na' saec' meuh yamnhaw' ye kuit rot ri kan' ku' yeuh pe' hk'a' naee hk'a' yum' na', ri kan' kacin yeuh pe' hk'a' naee hk'a' leumeus' keus na' mae' ri hk'a' yeun' hkam pe' hk'a' naee keutui' hpum' pe' Cawo' e' Yesu' Hkrit Eun na'.

⁴Ec' awng' Peucawo' leumeus' Eun na' pe', yawng ye Peucawo' leuk Eun ri ti pe'. ⁵Kopti leukah' mun' ren' kawn sangsawn' ye na' rot a ri pe' a hkuin' caee ri meuh leukah' palkoe, daecti a rot ri pe' ri ti' ca, ri Cit' seunga' chak' mae' ri hk'a' yum' keutawn' nyawk' na'. Yam ut' ye mae' pe' na', punta kaw a kue' mun' pun pe' na' ye ci' a' yu im' mae' pe' yeuh sa' nhaw' na' pe' ku yawng a yeut. ⁶Pe' hot' ri yeuh ku' yeuh ye na' mae' ku' yeuh Eun Peucawo' na' yeut. Pe' saec' pun ri hkam' ku' tukhka nyawk' na', pe' ku rap ri ti leukah' mun' ren' kawn na' mae' hk'a' ren' kawn ku' Cit' seunga' chak' na' tuil' ka ri pe' na'. ⁷Kop awn' na, pe' na' keut' ri meuh vang rin ri ti pun ce peue yum' ut' nang kuing' Masido' ni' mae' kuing' Ahkaiya' na' ce gawm' euc'. ⁸Leukah' mun' Eun Peucawo' ku' pucti lih neum pe' na' a hkuin' caee laws' heul' nang kuing' Masido' ni' mae' kuing' Ahkaiya' na' palkoe. Daecti hk'a' yum' pe' Peucawo' Eun na' a seutu in seutan laws' heul' ku duih' ka. Kop awn' na, ye hkuin' laee kue' ku' lah' ri lawng aen' na' ⁹kopti pe' ci' rap ri ti ye yeuh sa' nhaw' na' peue awn' lah' ris ce a. Pe' ci' hpawt' ri tec ruphtu na' yeuh sa' nhaw' punta kaw pe' ing' yeuh kan' Eun taengtaeng Peucawo' Ca-

wo' a' yu im' na', ¹⁰mae' punta kaw pe' ko' Kon' ai' ku' kaw lih neum kuing' pang mao' ku' Peucawo' yeuh Eun Eun tang kuh' im' hk'ai' vang yeum ri na' Eun, ce ku ris a yeut. Eun meuh Yesu' Cawo' kaw teum' kawm e' lawtpon hk'ai' hk'a' seungeueng' Eun Peucawo' kaw ing' rot na' Eun.

Kan' Paw' lu yeuh eun nang veng Hte'salo'ni'

2 Ec' awng' na' pe', pe' ku yawng ing' ye ri pe' na' un' meuh a ku' hk'o' hk'awng'. ²Seun' yawng pe', nanggal' aen' ce pun ye ri hkam' ku' tukhka mae' ku' un' nawpsang nang veng Hpi' li' pi' na'. Daecti kopti Peucawo' e' na' teum' kawm Eun ye na', ye saec' pun ri hkam' ku' ham' tap na' a' neng, ye hpum' hat' han' sangsawn' leukah' mun' ren' kawn Eun Peucawo' na' ri pe'. ³Kopti leukah' sangsawn' ye na' a hkuin' laee ing' neum vang keutui' hpum' kleuc', a' ko' vang keutui' hpum' hk'aw' jeuk. Ye ku un' co' ca' ri cop' pe'.

⁴Daecti ye sangsawn' a hot' seun' ku' Peucawo' kah Eun ye sangsawn' na', kopti leuk Eun ri ti ye mae' kah Eun ye sangsawn' leukah' mun' ren' kawn na' ri pe'. Ye hkuin' co' ca' ri yeuh ku' kaw hit' hpum' peue, daecti ye co' ca' ri yeuh ku' kaw hit' hpum' Eun Peucawo' Cawo' caet ri nawk hpum' e' na' Eun. ⁵Pe' ku yawng punta kaw ye yeuh peue ren' mae' ti ye yeuh a na', un' duing yeuh ye a. Ye ku un' duing mo' ta' nha' ri na'. Peucawo' Eun ku kaw cang meuh sa' hki' ka.

⁶Hk'a' kaw peue suk' seun' ye na', a saec' meuh mae' pe' mae' peue na', ye hkuin' duing hot' ri sok a.

A lawn meuh htan meuh ye peue caee Eun Hkrit na' ko', ye saec' kah pe' yeuh keunhaw' a ku kaw cang. ⁷Daecti yam ut' ye mae' pe' na', ye hpum' onawn' seun' ma na' rok sa' ka o' ngak na' eun ko'. ⁸Leumeus' ye pe' nyawk' na', ye ren' kawn tuil' pal leukah' mun' ren' kawn Eun Peucawo' na' ri pe' a hkuin' nang hk'o', saec' meuh a' yu ye na' ye ku sum' tuil' a yeut, kopti keut' pe' ri meuh peue leumeus' ye pe' nyawk' hawc'. ⁹Ec' awng' na' pe', yawng ye kuit rot pun pe' ri kan' cin tukhka yeuh ye a' neng na' yeut. Yam sangsawn' ye leukah' mun' ren' kawn Eun Peucawo' ri pe' na', pun-

ta kaw a un' meuh beus ri pe' saec' ti peue na', ye yeuh kan' gawm' sum' gawm' seunyi.

¹⁰Yam ut' ye mae' peue yum' na' pe', meuh ye peue seunga' chak', leupaws seumeu' mae' un' kue' vang ri na' pe' a' neng na', pe' ri mae' Peucawo' Eun ku kaw cang meuh sa' hki' ka yeut. ¹¹Kopti tup yawng pe' a, yeuh ye ri pe' seun' kuiing' na' yeuh eun ri kon' ri na' ce ko'. ¹²Ye tuil' kaw' reng pe', seueul' hpum' pe' mae' kah pe' a' yu im' kuing' hpaw mae' Peucawo' Cawo' klawng pe' ing' lec nang kuing' ri mae' munhpung' ri na' Eun.

¹³Ye mun' keuting ri Peucawo' Eun laleung kopti yam rap pe' ri ti leukah' mun' Eun Peucawo' sangsawn' ye ri pe' na', pe' hkuin' rap ri ti a seun' meuh a leukah' peue, daecti pe' rap ri ti a hot' meuh a leukah' neum-neum na'. A meuh leukah' Eun Peucawo'. A yeuh kan' hk'a' naee peue yum' na' pe'. ¹⁴Ec' awng' na' pe', pe' ku seun' muk kon' Hkrit Eun Peucawo' ut' hk'a' naee Yesu' Hkrit Eun ut' nang kuing' Yu' da na' ce ko'. Pe' pun ri hkam' ku' tukhka neum peue kuing' pe' na' ce, a ku seun' muk kon' Hkrit awn' pun ce ri hkam' ku' tukhka neum peue Yu' da na' ce na'. ¹⁵Ce toh Cawo' Yesu' Eun mae' toh peue suip leukah' Eun Peucawo' na' ce. Ce ra ri tec e'. Ce yeuh Peucawo' Eun hpum' un' sam' ran. Ce meuh ransu ri peue gawm' euc' ¹⁶ri ham' - tap ce kaw e' un' cang sangsawn' peue un' meuh peue ceu Yu' da na' ce kaw pun hk'a' htut lawtpon na'. Kopti yeuh ce keutit' na', ce baet ri yeuh map' na' nuknhen' ri. Vang tisut' ka na', hk'a' seungeueng' Eun Peucawo' na' a kaw rot hk'a' pang ce.

Paw' lu sum' heul' glue eun ri muk kon' Hkrit Hte' salo' ni' na' ce

¹⁷Ec' awng' na' pe', yam pun ye ri hk'akcak' pe' ti vut ti yam na' (hk'akcak' e' tu' ri yawo, hpum' e' a hkuin' hk'akcak' puri), kopti tang sum' hk'eup' nyu ye pe' nyawk' na', ye sae' caee' co' ca' ri kaw tang hk'eup' nyu pe' bae. ¹⁸Ye sum' ing' ri pe' nyawk' neumneum. Lheu' awn' na, ui' ri, meuh ui' Paw' lu. Ui' jaen sum' ing' ri pe' ti pok hawc' ti pok, daecti Satan na' a ham' ye. ¹⁹Kopti yam Cawo' e' Yesu' na' Eun tang lih na', vang keutui' hpum' ye, vang ren' kawn ye, mae' cui' - maw hk'il' ku' kaw ye pun munhpung' ri nanggal' Eun na', a ci' meuh keunhaw' ? Meuh ka pe' ri hawc', un' meuh ka aw? ²⁰Kopti meuh pe' munhpung' mae' hk'a' ren' kawn ye neumneum.

Paw' lu mae' Silas' cus' ka Ti' mo' se eun heul' nang veng Hte' salo' ni'

3 Kop awn' na yam eut' un' pun ye a na', ye kuit ri kaw tec ya nang veng Ehten na' a na' chak', ye kuit a deut. ²Ya cus' Ti' mo' se ku' meuh awng' ya na' eun heul' ri pe'. Hk'a' naee vang sangsawn' leukah' mun' ren' kawn Eun Hkrit na', eun ku meuh a' mawo nang yeuh kan' mhai' Eun Peucawo' mae' ya tiduih'. Ya cus' eun heul' tuil' kaw' reng pe' punta kaw pe' kue' kaw' reng hk'a' naee hk'a' yum' na', ³mae' punta kaw pe' un' kue' nang keyuih' fuii' fai' hk'a' naee ku' tukhka aen' ce saec' ti peue na'. Peucawo' rangraen Eun ri tang' pe' kaw hkam' ceu nang aen' ce na' pe' ku yawng a meulamlam ri yeut. ⁴Saec' meuh yam ut' ye mae' pe' na' ye lah' e' kaw pun ri hkam' ku' tukhka na', a ku seun' ku' lah' ye na' neum, pe' ku yawng a yeut. ⁵Kop awn' na, yam eut' un' pun ui' a na', ui' cus' Ti' mo' se eun heul' nom' nawk hk'a' yum' pe' na'. Lhat' ui' ku' cop' na' cang heul' cop' long a pe' ri ku' ti ri ceu. Kan' ku' co' ca' ye ri yeuh na' a na' cang meuh ku' hk'o' hk'awng'.

Ti' mo' se lah' eun kan' chak' ri Paw' lu

⁶Daecti maet' maen' Ti' mo' se tang ing' rot eun hawc'. Eun ing' ris ya mhawng' leukah' ren' kawn lawng hk'a' yum' mae' hk'a' leumeus' keus pe' na'. Eun ku lah' ya mhawng' lawng kuit rot pe' ri ku' chak' yeuh ye laleung na' mae' lawng seun' sum' nyu ye pe' na' pe' ku tang sum' nyu ye yeut. ⁷Ec' awng' na' pe', yam pun ye ri hkam' ku' tukhka keunhap' nokneh na' gawm' euc', ye pun kaw' reng ri kopti meuh a hk'a' yum' pe' na'. ⁸Kopti cawng keutawn' pe' hk'a' naee Peucawo' Eun na', maet' maen' ye a' yu im' neum-neum. ⁹Kopti meuh ka pe' ri, ye kue' hk'a' ren' kawn nanggal' Eun Peucawo' heun'. Yam kuit ye hk'a' ren' kawn aen' ce gawm' euc' na', ye mun' keuting ri Peucawo' Eun nyawk'. ¹⁰Punta kaw ye tang hk'eup' nyu pe' bae vang un' nuk ka hk'a' yum' pe' na', ye sae' - caee' hk'o' mun' gawm' sum' gawm' seunyi.

¹¹Maet' maen', kah Kuing' Peucawo' Eun mae' Cawo' Yesu' Eun mhe' hk'a' kaw e' tang hk'eup' nyu puri na' reu'. ¹²Kah Peucawo' Eun yeuh hk'a' leumeus' keus pe' na' nukveh hk'a' pang pe' ti peue hawc' ti peue mae' hk'a' pang peue seubu na' ce gawm' euc' seun' leumeus' ye pe' na' reu'. ¹³Punta kaw pe' seunga' chak' un' laee kue' vang ri nanggal' Eun Kuing' Peucawo' yam Cawo' Yesu' e' na' na'

Eun tang lih mae' peue seunga' chak' ri na' ce gawm' euc' na', kah Peucawo' Eun yeuh hpum' pe' na' kue' kawl' reng nhim' reu'.

A'yu im' hit' hpum' Eun Peucawo'

⁴ Ec' awng' na' pe', leukah' tisut' na', pe' kaw htuk' ri a'yu im' hit' hpum' Eun Peucawo' yeuh sa' nhaw' na', ye sangsawn' pe' ri ka hawc'. Neum-neum ka na' ko', pe' ku lak' yeuh a hawc'. Daecti maet' maen', hk'a' naee Cawo' Yesu' Eun, ye sum' hk'o' hk'ang tuil' kawl' reng pe' gawm yeuh a lheu' awn' na. ² Kopti tup yawng pe' leukah' sangsawn' tuil' ye ri pe' ri ti' ca Eun Cawo' Yesu' na'.

³ Kaw pe' pun ri saic' ri seunga' chak' na' cawp' a alo Eun Peucawo'. Kop awn' na, pe' kaw pun ri vel hk'a' hkuit' nawng' tang' na'. ⁴ Pe' ri ku peue, sawng' ut' mae' beun' ri na' ce meulamlam ri hk'a' naee vang seunga' chak' na' mae' vang hkopyawm' yumyam' na' reu'. ⁵ Pawlaee va ri hot' hk'a' hkuit' nawng' tang' na' seun' ku' yeuh ce peue un' yawng Peucawo' Eun na'. ⁶ Pawlaee kah a' nhaw' yeuh pon yeuh lheu', yeuh kleuc' ceu nang aen' ce ri ec' awng' ri na' ce saec' ti peue. Peucawo' kaw Eun ciyang peue yeuh map' yeuhki' na' peue seun' ku' tawn lah' tawn tuil' ye sati pe' na'. ⁷ Kopti Peucawo' hpaw Eun ca' klawng' e' kaw meuh peue un' seunga' chak', daecti kah Eun e' a'yu im' hk'a' naee vang seunga' chak' na'. ⁸ Kop awn' na, a' n-haw' lawn tecla leukah' sangsawn' aen' na ko', eun hkuin' tecla peue, daecti tecla eun Peucawo' Cawo' tuil' Cit' seunga' chak' ri na' ri e' na' Eun.

⁹ Lawng hk'a' leumeus' keus pe' ec' awng' na', ye hkuin' kaw lo' ri tem' a ri pe'. Kopti kaw pe' leumeus' puri na', Peucawo' sangsawn' Eun pe' hawc'. ¹⁰ Neum-neum ka na' ko', pe' ku leumeus' ec' awng' ut' nang kuing' Masido' ni' na' ce gawm' euc'. Daecti ec' awng' na' pe', ye sum' hk'o' pe' na' gawm baet ri leumeus' ec' awng' na' ce heun' heun'.

¹¹ Pe' na' yeuh ri a'yu im' ut' cumyen', sawng' yeuh kan' ri mae' yeuh kan' ri ti' ri na' seun' ku' lah' ye ri pe' na', ¹² punta hk'a' a'yu im' pe' ku seunyi na' kaw a meuh hk'a' yumyam' ce peue ut' hk'a' nok na' mae' kaw pe' un' lo' ri cu a' nhaw' na'.

Peucawo' kaw Eun tang lih

¹³ Ec' awng' na' pe', ye sum' kah pe' yawng lawng neumneum ce peue yeum heul' hawc' na' mae' un' sum' kah pe' kuit nyhap' seun' peue seubu ku' un' kue' vang keutui' hpum' na' ce. ¹⁴ Yesu' yeum Eun

hawc' Eun tang kuh' im' na', yum' e' a. Kop awn' na, peue yeum hk'a' naee Yesu' Eun na' Peucawo' Eun kaw tang yeuh ce kuh' im' mae' Yesu' Eun na', e' ku yum' a yeut. ¹⁵ Lah' ye a hot' leukah' lah' meun Eun Peucawo' na' ri pe', peue kaw n' a'yu im' kaw n' vang rot ti yam Cawo' Peucawo' tang lih Eun na' e', neum, e' hkuin' kaw pukal' nanggal' ce peue yeum heul' hawc' na' ce. ¹⁶ Kopti Cawo' Peucawo' kaw Eun lih neum kuing' pang mao' na' mae' leukah' tuil' Eun seng' laws' nyawk' na', mae' seng' eun ro' keuting ce in' hpom ti peue na', mae' seng' pi' tae' rae' Eun Peucawo' na'. Yam awn' na, peue yeum hk'a' naee Hkrit Eun na' ce kaw tang kuh' im' nanggal'. ¹⁷ Hawc' ko', punta kaw e' huk' hk'eup' Cawo' Peucawo' Eun nang vawo na' mae' punta kaw e' ut' mae' Heun cot' cu ri na', ku' kaw n' a'yu im' kaw n' vang na' e', e' na' pun ri yuk ri huk' mae' peue awn' ce pang putum' na' tiduih'. ¹⁸ Kop awn' na, tuil' kawl' reng pu pe' ri lawng aen' na ti peue hawc' ti peue reu'.

⁵ Ec' awng' na' pe', ye hkuin' kaw lo' ri tem' ri tuil' lawng ka sa' hkat' meuyam na' ri pe', ² kopti seunyi Eun Cawo' Peucawo' na' kaw a rot seun' peue con' ing' rot ce peunsum' na' ko', pe' ku yawng a meulamlam ri. ³ Yam lah' peue a ri puri, "Kuing' na' a cumyen', a sa' pa sam' ran", yam awn' na, ku' lulaic na' a kaw keulawn' rot hk'a' pang ce seun' ku' sui' na' rot a ri beun' sui' awng' na' eun ko'. Peue awn' ce hkuin' kaw laee lawtpon.

⁴ Daecti ec' awng' na' pe', kopti un' ut' pe' vang duim' lawng na', seunyi meuyam awn' a hkuin' kaw yeuh pe' lhat' ruing seun' peue con' ing' ce na'. ⁵ Pe' ri gawm' euc', meuh pe' peue ut' hk'a' naee ku' ceng' na' mae' hk'a' naee peunnyi na'. E' un' meuh peue ut' hk'a' naee peunsum' na' mae' hk'a' naee ku' duim' lawng na'. ⁶ Kop awn' na, pawlaee va ri seun' peue seubu ku' buih pun ri it' na' ce. Daecti kah ri hk'awn' sawng' u' peung tu' ri na'. ⁷ Kopti, peue pun ri it' na', it' ce peunsum'. Peue yuic' ri plai' na', ce ku yuic' peunsum'. ⁸ Daecti kopti meuh e' peue ut' hk'a' peunnyi na', e' na' sawng' u' peung tu' ri na' pawh. Cuip' hk'a' yum' na' mae' hk'a' leumeus' keus na' meuh hpa' la ri nuk' ri na'. Cuip' hk'a' keutui' hpum' ka hk'a' htut lawtpon na' meuh cui' maw lhac' ri ti. ⁹ Kopti Peucawo' hpaw Eun ca' hkvat' ti uin' e' kaw hk'eup' hk'a' seungeueng' peulel ri na'. Daecti Eun hkvat' ti uin' e' kaw pun hk'a' htut lawtpon na' ri Cawo' Yesu' Hkrit e' na' Eun. ¹⁰ Yam tang lih Eun na', e' saec' im' e' saec' yeum, punta kaw e' pun ri ut' tiduih' mae' Heun na', Eun pun ri yeum pun e'. ¹¹ Kop awn'

na, tuil' kawl' reng puri yeuh puri huk' hawn' keutawn' seupit seun' ku' buih yeuh pe' na' reu'.

Leukah' sangsawn' tisut'

¹² Ec' awng' na' pe', peue yeuh kan' reng hk'a' naee pe' na' ce, peue u' peung rokxa' pe' hk'a' naee Cawo' Peucawo' Eun na' ce mae' peue tuil' sati pe' na' ce, maet' maen' ye hk'o' pe' hkopyawm' ri ce. ¹³ Kopti meuh a kan' ku' yeuh ce na', leumeus' ce, tang' ce keuting lhung' hkopyawm' ri ce reu'. Yeuh ri kuit nyawk' kuit sam' ran cumyen' ut' tiduih' reu'.

¹⁴ Ec' awng' na' pe', ye hk'o' pe' tuil' sati ce peue keunah na', tuil' kawl' reng ce peue hpum' keuceum na', teum' kawm peue kawl' reng kloea' ce, eut' hpum' yeun' hkam ri peue gawm' euc' reu'. ¹⁵ Keue' meulam lam ri, pawlaee kah a' nhaw' yeuh ri top' ku' rai na' ri yeuh ku' rai na'. Daecti, co' ca' ri yeuh ku' chak' na' ri puri gawm' peue seubu gawm' euc' na' ce laleung reu'.

¹⁶ Saec' yamnhaw', ren' kawn reu'. ¹⁷ Saec' yamnhaw', hk'o' mun' reu'. ¹⁸ A saec' na' yeuh sa' nhaw',

mun' keuting ri Peucawo' Eun reu'. Kopti ceu nang aen' ce meuh ka alo Eun Peucawo' pun pe' hk'a' naee Yesu' Hkrit Eun.

¹⁹ Pawlaee juit' ngawl ka Cit' seunga' na' awh.

²⁰ Pawlaee un' nawpsang leukah' tamnai Eun Peucawo' na' awh. ²¹ Caet ri nawk ku ceu na' ce reu'. Jhawp' ku' chak' na' reu'. ²² Vel ku' rai na' ku ceu ka reu'.

²³ Kah Peucawo' Cawo' hk'a' kuit nyawk' kuit sam' ran cumyen' na' Eun saic' pe' seunga' chak' meun reu'. Yam Cawo' e' Yesu' Hkrit tang lih Eun na', kah jawngkui' tu', hpum' mae' cit' civit pe' na' un' laee kue' vang ri reu'. ²⁴ Cawo' klawng pe' na' kati keutawn' Eun. Eun kaw yeuh ku' lah' ri na'.

²⁵ Ec' awng' na' pe', hk'o' mun' pun ye awh. ²⁶ Yam hk'eup' puri na', gloh' ti' puri hk'a' naee vang seunga' chak' na' reu'. ²⁷ Tawm' ye leukah' ri pe' nanggal' Eun Peucawo', lip ec' awng' gawm' euc' na' ce mhawng' htawm aen' a reu'.

²⁸ Kah mun' sin' Eun Cawo' Yesu' Hkrit e' na' kue' ri pe' reu'.

2 Hte'salo'ni'

1 Htawm ti ok' aen' na ko', meuh a ku' Paw' lu,
Silas' mae' Ti' mo' se

tem' ye ri tuil' a ri muk kon' Hkrit Hte'salo'ni' na'
pe' ri hk'a' naee Kuing' Peucawo' e' na' Eun mae'
Cawo' Yesu' Hkrit Eun.

²Kah mun' sin' mae' hk'a' kuit nyawk' kuit
sam' ran cumyen' lih neum Kuing' Peucawo' e' na'
Eun mae' neum Cawo' Yesu' Hkrit Eun na' kue' ri pe'
reu'.

Hk'a' taws' a' mu yam Yesu' lih Eun

³Ec' awng' na' pe', htuk' ye ri mun' keuting ri Peuca-
wo' Eun pun pe' laleung. Yeuh keutit' na', a na' cawp'.
Kopti hk'a' yum' pe' na' baet a ri keuting heun' na',
hk'a' leumeus' keus pe' puri na' a ku baet ri keuting he-
un' yeut. ⁴Kop awn' na, ye suk' seun' pe' nanggal' ce
muk kon' Hkrit Eun Peucawo' na' kopti meuh a hk'a'
yeun' hkam pe' na' mae' hk'a' yum' pe' na' ri ku'
buih hk'eup' pe' ku' keunhap' nokneh na' mae' ku'
cop' long heun' ceu maet' maen' na'.

⁵Aen' ce gawm' euc' meuh a sa' hki' ka hk'a' taws'
a' mu Eun Peucawo' na' cawp' ka na'. Kop awn' na,
pe' na' pun hk'a' sawn' ri meuh peue kuing' hpaw
mae' kuing' Eun Peucawo' ku' hkam' pe' ri tukhka
rap ri ti pun kuing' awn' a na'. ⁶Peucawo' leupaws se-
umeu' Eun. Eun kaw tang keutah ri tuil' ku' tukhka na'
ri peue yeuh pe' tukhka na' ce. ⁷Eun ku kaw hpot' peue
pun ri hkam' ku' tukhka na' pe' mae' ye ri yeut. Ceu
nang aen' ce a kaw keut' kue' yam Cawo' Yesu' puc
Eun ri lih neum kuing' pang mao' hk'a' naee reung
ngawl ceng' nyawk' na' mae' in' hpom kue' ti' ca
keuting Eun na' ce tiduih'. ⁸Eun kaw ciyang peue un'
yawng Peucawo' Eun na' ce mae' peue un' rap ri ti
leukah' mun' ren' kawn Eun Cawo' Yesu' e' na' Eun.
⁹Ce kaw pun ri hkam' hk'a' ciyang ri ku' lulaic na'
cot' cu ri. Ce kaw pun ri hkam' hk'a' hk'acak' hk'ai'
nanggal' Eun Peucawo' na' mae' hk'ai' munhpung'
ka ti' ca Eun na'. ¹⁰Seunyi yam awn' na, punta kaw Eun ti
munhpung' ri mae' peue ri na' ce na', mae' punta

kaw a meuh ku' hk'o' am' pun peue yum' na' ce ku
peue, Eun kaw lih. Kopti yum' pe' sa' hki' hkam' ye ri
pe' na', pe' ku pawng' muk awn' ce yeut.

¹¹Hk'a' naee vang kuit ye ri nawk ceu nang aen' ce na',
ye hk'o' mun' pun pe' laleung, un' laee deut. Kah Peu-
cawo' e' na' Eun sawn' pe' kuing' mae' hk'a'
klawng Eun ri ti pe' na'. Kah ku' chak' keutui' hpum'
pe' ku ceu na' mae' ku' yeuh pe' pucti lih neum hk'a'
yum' pe' ku ceu na' htonnuk ri ti' ca Eun na' reu'.

¹²Punta muis Eun Cawo' Yesu' e' na' kaw a pun munh-
pung' suk' seun' hk'a' naee pe' na' mae' punta kaw
pe' pun munhpung' ri hk'a' naee Heun hot' mun' Eun
Peucawo' na' mae' Cawo' Yesu' Hkrit e' na' Eun
na', ye hk'o' mun' yeuhki'.

Peue fuin kaw eun pucti

2 Lawng Cawo' e' Yesu' Hkrit kaw Eun tang lih na'
mae' lawng kaw Eun hk'on' ro e' gawm' euc' ri
ut' mae' Heun na', ec' awng' na' pe', ye hk'o' a ri
pe' ²pawlaee keuyuih' fuii' fai' sam' ran, a' ko' ku'
tamnai peue, ku' lah' ku' ris peue, a' ko' htawm cu
muis ye peue tem' lawng ka seunyi yam Eun Peucawo'
na' lih rot ka hawc' na', pawlaee tuin' tung ri ka.
³Pawlaee tuil' peue ing' long ri nawk pe' ri keunhaw'
na' saec' ti ceu. Kopti cu yam fuin Peucawo' Eun na'
mae' peue fuin ku' tang' ri uin' eun kaw lulaic heul'
na' a lawn un' nang pucti lih ko', seunyi yam Eun Peuca-
wo' na' a hkuin' kaw nang rot. ⁴Punta peue awn' kaw
eun tang' meun tu' ri na' u' peung nya hk'o' mun'
keuting Eun Peucawo' na' mae' punta kaw eun pao'
meun ri meuh Peucawo' na', eun kaw to' tam' ku' lah'
peue meuh Peucawo' na' mae' ku' fae' peue na' ku
ceu ka. Eun kaw tang' tu' ri na' keuting lhung' meun.

⁵Yam kawn' ut' ui' mae' pe' na', ui' tawn ris pe'
mhawng' lawng aen' na, un' laee pawn pe' a aw? ⁶Peue
awn' punta kaw eun pucti yam cawp' a yam eun na',
a' nhaw' ci' ol' eun hton' ri, pe' ku yawng a maet'-
maen' hawc'. ⁷Kopti ti' ca geup' eun peue fuin awn'
buih yeuh a kan' hawc'. Daecti Cawo' ko' ri ol' eun
hton' ri maet' maen' na' Eun kaw suip ri ol' eun hton'
ri rot ri yam na' Eun pun ri rap ri huk' hk'ai' hk'a' awn'

na. ⁸Yam awn' na, peue fuin awn' eun kaw pun ri ploer' ri pucti lih. Cawo' Yesu' Eun kaw yeuh eun cung' kus ri guil' lih hk'ai' moeng ri na'. Eun kaw yeuh eun lulaic ri ku' ceng' ka yam tang lih ri na'. ⁹Peue fuin awn' kaw eun pucti ri ti' ca ka Satan na'. Eun kaw yeuh ku' hk'o' am' mae' het' keuting un' meuh nang neum ka na' heun' ceu. ¹⁰Punta kaw eun cop' long ri ti peue kaw lulaic heul' na' ce na', eun ku kaw yeuh ri tuil' ce nyu ku' rai na' ce ku ceu. Ce kaw lulaic kopti un' leumeus' ce hk'a' leupaws seumeu' ku' kaw va ce heul' ri hk'a' htut lawtpon na'. ¹¹Kop awn' na, punta kaw ce yum' leukah' chi' lai na', ¹²mae' punta peue un' yum' hk'a' leupaws seumeu' daecti ce ren' mae' ku' rai na' ku peue ri ce kaw pun hk'a' taws' a' mu na', Peucawo' Eun cus' hpum' kuit kleuc' na' ri ce.

Cawng keutawn'

¹³Ec' awng' Peucawo' leumeus' Eun na' pe', mun' keuting ye ri Peucawo' Eun pun pe' lalung. Kopti tang' neum yamla ka na', Peucawo' leuk Eun ri ti pe' kaw pun hk'a' htut lawtpon na' ri saic' pe' seunga' chak' ri Cit' seunga' na' mae' ri yum' pe' hk'a' leupaws seumeu' na'. ¹⁴Punta kaw pe' pawng' ri hk'a' naee munhpung' Eun Yesu' Hkrit e' na', Eun klawng pe' ri leukah' mun' ren' kaw lah' ye pe' mhawng' na' hawc'. ¹⁵Kop awn' na ec' awng' na' pe', cawng keutawn' reu'. Leukah' sangsawn' lah' ye ri moeng ri ri pe' na', a' ko' ri htawm tem' ye ri pe' na' jhawp' a keutawn' reu'.

¹⁶Kah tu' Eun Cawo' Yesu' Hkrit na' mae' Kuing' Peucawo' e' ku' leumeus' e' mae' ku' cu mun' ri na' tuil' kaw' reng cot' cu na' mae' hk'a' keutui' hpum' chak' ri e' na', ¹⁷tuil' kaw' reng mae' yeuh pe' kaw' reng keuting reu'. Aen' a meuh punta kaw pe' yeuh ku' chak' na' mae' lah' leukah' chak' ku ceu na'.

Hk'o' mun' pun ye

3 Ec' awng' na' pe', leukah' tisut' na', punta leukah' mun' ren' kaw Eun Peucawo' na' kaw a laws' heul' vaevae meuh ku' yumyam' seun' meuh a hk'a' naee pe' ri na', hk'o' mun' pun ye reu'. ²Punta kaw ye pon hk'ai' dak ti' ce peue rai na', hk'o' mun' pun ye yeut. Kopti peue hkuin' kaw duing kue' hk'a' yum' gawm' euc'. ³Daecti Peucawo' kati keutawn' Eun. Eun kaw bae kaw' reng pe' na' keuting mae' rok' sa' pe' pon hk'ai' peue rai na' ce. ⁴Buih hot' pe' ri

yeuh leukah' tuil' ye ri pe' na' mae' kaw pe' tang suip ri yeuh a seun' awn' a heul' na', ye yum' a hk'a' naee Peucawo' Eun neumneum. ⁵Kah Peucawo' Eun teuk' va pe' heul' lec hk'a' naee hk'a' leumeus' keus Eun na' mae' hk'a' naee hpum' keutawn' seupit Eun Hkrit na' reu'.

Tawm' ram ri peue keunah

⁶Ec' awng' na' pe', hk'a' naee muis Eun Cawo' Yesu' Hkrit na', ye kaw tuil' leukah' ri pe', ut' seungai ce ec' awng' keunah na' mae' peue un' a' yu im' hot' leukah' sangsawn' ku peue na' ce reu'. ⁷Kopti ku' yeuh ye na' tup yawng pe' kaw ri htuk' ri hot' ri yeuh a yeut. Yam ut' ye mae' pe' na', ye hkuin' duing keunah. ⁸Ye hkuin' duing hk'a' hk'o' hk'awng' hkawn' hkaen' a' n-haw'. Daecti punta kaw a un' meuh beus pun pe' saec' ti peue na', ye ti kaw' reng ri yeuh kan' gawm' sum' gawm' seunyi. ⁹Yeuh ye ku' yeuhki' na' a hkuin' meuh kopti un' kuing' ye ri rap ri ti hk'a' teum' kawm pe' ye na'. Daecti punta kaw ye meuh vang hot' rin ri ti pun pe' na', ye yeuh a. ¹⁰Kopti yam ut' ye mae' pe' na', ye tang' ri uin' ritroe yeuhki', "A' nhaw' lawn un' yeuh kan' ko', eun htuk' ri un' mak' ri som'."

¹¹Pun ye ri mhawng' peue hk'a' naee pe' na' ce ngon', ce keunah. Ce un' yeuh kan'. Ce eo' ri klawo' suksak lawng ku' yeuh peue. ¹²Hk'a' naee Cawo' Yesu' Hkrit Eun, ye kaw tuil' leukah' ri peue yeuh keutit' na' ce sawng' dit' ti yeuh ri hk'a' uii' tu' ri na' meun reu'. ¹³Saec' ec' awng' na' pe', pawlaee va kaw' reng ri keuceum ri yeuh ku' leupaws seumeu' na'.

¹⁴A' nhaw' lawn un' leuceng ri ti leukah' tem' ye nang htawm aen' na ko', yeuh ri pawn eun reu'. Punta kaw eun kaic, pawlaee yeuh a' mawo eun. ¹⁵Daecti pawlaee sawn' eun meuh ransu, sawn' eun seun' ec' awng' ko', tuil' sati eun reu'.

Leukah' tisut'

¹⁶Kah Peucawo' Cawo' hk'a' kuit nyawk' kuit sam' ran cumyen' na' Eun tuil' hk'a' kuit nyawk' kuit sam' ran cumyen' na' ri pe' ku ceu ku yam reu'. Kah Eun ut' mae' pe' gawm' euc'. ¹⁷Ui' ri, meuh ui' Paw' lu. Ui' tem' leukah' tisut' aen' na ri ti' ri na' meun. Aen' a meuh ca' mai' ka htawm ui' na' ku ok' ka. A meuh a' cang' lamlam tem' ui' htawm.

¹⁸Kah mun' sin' Eun Cawo' Yesu' Hkrit e' na' kue' ri pe' reu'.

1 Ti'mo'se

¹ Htawm ti ok' aen' na ko', meuh ui' Paw' lu meuh peue caee Eun Yesu' Hkrit kopti meuh a leukah' tuil' Eun Peucawo' Cawo' teum' kawm htut e' lawtpon na' mae' Yesu' Hkrit Cawo' meuh vang keutui' hpum' e' na' Eun,

² ui' tem' ri tuil' a ri Ti'mo'se ku' meuh kon' ui' neumneum hk'a' naee hk'a' yum' na' mi.

Kah mun' sin', hk'a' tukyak mae' hk'a' kuit nyawk' kuit sam' ran cumyen' lih neum Kuing' Peucawo' mae' neum Cawo' Yesu' Hkrit e' na' kue' ri mi reu'.

Uin' sati ri peue guil leukah' ritroe un' cawp' na' ce

³ Seun' ku' tawn lah' ui' ri mi yam kaw ui' heul' nang kuing' Masido' ni' na', ui' kah mi suip ri kuit' nang veng E' fe' su' na' punta kaw mi tuil' leukah' un' laee kah peue sangsawn' leukah' hk'a' yum' un' cawp' ngon' na' ce suip ri sangsawn' a bae' na', ⁴ mae' un' laee kah peue cui' cam' leukah' apom leumah' na' mae' leukah' ceucat lah' ri suip ri ing' un' kue' vang sut' vang euc' na'. Aen' ce meuh a ku' yeuh peue htuh' ting' puri, a hkuin' meuh ku' kaw yuk kan' Eun Peucawo' ku' pucti lih neum hk'a' yum' na'. ⁵ Vang keutui' hpum' ka leukah' tuil' mi ri ce na' a meuh hk'a' leumeus' keus ku' lih neum hpum' seunga' seungawm, hpum' cang yawng mae' hk'a' yum' caetcaet na'. ⁶ Peue ngon' na' tecla peue ceu nang aen' ce. Ce hpawt' ri lah' lawng ku' un' kue' mun' na' ri puri. ⁷ Ce sum' meuh peue guil leukah' ritroe na', daecti ce un' yawng ku' buih lah' ri na' mae' ku' buih hkam' htawhkam ce na'.

⁸ Peue lawn lo' leukah' ritroe na' cawp' hk'a' ri heul' ko', yawng e' leukah' ritroe na' chak' ka. ⁹ E' jaen yawng leukah' ritroe na' un' tang' a ri uin' ri pun ce peue leupaws seumeu' na', daecti tang' a ri uin' ri pun peue un' hot' ritroe, pun peue kleuc' ritroe, pun peue un' yawng Peucawo' Eun, pun peue map', pun peue un' seunga' chak', pun peue un' kue' satsana, pun peue toh makuiing' ri, pun peue toh peue, ¹⁰ pun peue len' cu, pun me taw' me pleh puri, pun peue paing' peue, pun peue

cang chi' lai, pun peue hkam' sa' hki' ku' un' kue' un' meuh mae' pun ku' seubu ham' tap leukah' leupaws seumeu' na'. ¹¹ Ceu nang aen' ce a cawp' maen leukah' mun' ren' kawm munhpung' keuting Eun Peucawo' mun' keuting na'. Leukah' mun' ren' kawm aen' a ap ri ri ui'.

Mun' Peucawo' tuil' Eun ri Paw' lu eun

¹² Mun' keuting ri Cawo' e' Yesu' Hkrit Cawo' tuil' kaw' reng ui' na' Eun. Kopti sawn' Eun ui' kati keutawn', Eun uin' ui' yeuh mhai' ri. ¹³ Ui' saec' tawn lah' ku' un' nawpsang Eun ko', keunhap' nokneh peue yum' Eun na' ce mae' yeuh ku' lheu' reng ce nanggal' aen' na, daecti kopti yeuh ui' a mae' un' nang yum' un' nang yawng ri a, Eun tukyak ri ui'. ¹⁴ Mun' Eun Peucawo' e' Yesu' Hkrit na' mae' hk'a' yum', hk'a' leumeus' keus kue' hk'a' naee Eun na' a buit ri lih nuknhen' ri ui'.

¹⁵ Punta Yesu' Hkrit kaw Eun teum' kawm htut peue map' na' peue lawtpon na', Eun lih pang bhen' keute' na'. Leukah' aen' a meuh leukah' hk'o' yum' nyawk', htuk' ri un' laee kangkae rap ri ti a. Hk'a' naee peue map' na' ce gawm' euc', meuh ui' peue map' keuting hk'ai' ce. ¹⁶ Daecti punta Yesu' Hkrit kaw Eun tuil' peue kaw yum' Eun, rap ri ti cit' tip a' yu tip cot' cu na' kaw ce nyu hpum' cang yeun' hkam un' laee sut' un' laee euc' ri na', ui' saec' na' map' keuting hk'ai' peue ko', Eun tukyak ri ui'. ¹⁷ Maet' maen', kah munhpung' cot' cu na' kue' hk'a' pang Hkun' haw' hkam' cot' cu, un' cang lulaic, peue un' cang nyu peue, meuh Peucawo' ti ton' na' Eun reu'. Amin.

¹⁸ Kon' ui' Ti'mo'se, kah ui' mi yeuh keutit' na' a cawp' maen leukah' ku' tawn tamnai lawng mi na'. Mi lawn hot' ri yeuh a heul' ko', mi kaw kaw' reng keuting ri peuing' suik'. ¹⁹ Jhawp' hk'a' yum' na' mae' hpum' cang yawng na' reu'. Kopti ngon' tecla peue a, hk'a' yum' ce na' a cum' rai' heul'. ²⁰ Peue aen' ka, ka meuh Himeneas' mae' Alek' sando'. Punta kaw ka rin ri ti lawng ku' kaw un' lah' ku' un' nawpsang Peucawo' Eun na', ui' ap ka nang dak ti' ka Satan na' hawc'.

Sawn' lawng hk'o' mun'

2 Kop awn' na nanggal' ka na', ui' sum' kah mi hk'o' mun', hk'o' hk'ang, mun' keuting ri Peuca-wo' Eun pun peue gawm' euc'. 2Punta kaw e' cang kuit nyawk' kuit sam' ran ut' cumyen' hk'a' naee vang hkopyawm' ri Peucawo' Eun na' mae' vang a' yu im' chak' ri na', ui' sum' kah mi hk'o' mun', hk'o' hk'ang, suk' seun' Peucawo' Eun pun hkun' haw' hkam' mae' peue kue' an' nya na' ce yeut. 3Yeuh keutit' na' chak' ka. A htuk' hpum' Eun Peucawo' Cawo' teum' kawm htut e' lawtpon 4ku' sum' kah peue gawm' euc' peue pun hk'a' htut lawtpon na' mae' sum' kah peue yawng lawng ku' leupaws seumeu' na' Eun. 5Kopti Peucawo' kue' Eun ti ton' yawo, saec' meuh nang seuna' Eun Peucawo' ri peue e' na' a kue' ti ton'. Eun meuh Yesu' Hkrit meuh peue na' Eun. 6Eun hkam' ri sum tu' ri na' meuh ngos ka kaw Eun teum' kawm htut peue gawm' euc' na' peue lawtpon na'. Eun tuil' sa' hki' aen' a lih yam cawp' a yam ri na'. 7Kop awn' na, punta kaw ui' hkam' sa' hki' ka lawng awn' na, Peucawo' Eun leuk ri uin' ui' meuh peue sangsawn' leukah' mun', meuh peue caee Eun Yesu'. Buih lah' ui' ku' neum, hpaw ui' ca' chi' lai. Peucawo' Eun leuk ri uin' ui' meuh peue sangsawn' hk'a' yum' neumneum na' ri peue un' meuh peue ceu Yu' da na' ce.

8Sum' kah ui' me ut' ku duih' na' ce yuk ti' seunga' chak' ri hk'o' mun' mae' un' kue' ri hk'a' se-ungeueng' peulel mae' un' kue' ri hk'a' htu' hting' puri.

9Saec' meuh beun' na' ce, ui' sum' kah ce na' cuip' hk'eung buih hpaw mae' ti hk'a' naee vang tang' ce hpum' ri nyom' jom tem yeuh a kuing' kon. Ui' hkuin' sum' kah ce glaing' huik' ri cuip' hk'eung hk'il', hk'eung saeng' mae' hk'eung ngos heun' na'. 10Daecti sum' kah ui' ce cuip' ku' chak' na' kuing' mae' lah' ce ri meuh beun' hkopyawm' ri Peucawo' Eun na'.

11Beun' na' ce htuk' ri dit' ti rin ri ti hk'a' naee vang tang' ce hpum' nyom' jom tem ri na'. 12Beun' na' kaw ce sangsawn' peue mae' kue' ti' ca an' nya hk'a' pang me na' ce, ui' hkuin' tuil' ahkvang ka. Ce kaw kah ri ut' dit' ti. 13Kopti Peucawo' hpanpleng' Eun Adam eun nanggal', hawc' ko' Eun kawn' hpanpleng' E' va eun. 14Lheu' awn' na, ku' leuceng ku' cop' long na' a un' meuh Adam eun, daecti a meuh beun' na' eun. Eun keut' ri meuh peue map'. 15Daecti beun' na' ce lawn suip' ri ut' hk'a' naee hk'a' yum', hk'a' leumeus' keus na' mae' hk'a' seunga' chak' na' kuing' kon ko', ce kaw pun ri pon kopti keut' ce kon' na'. †

Nang rokxa' muk kon' Hkrit

3 "A' nhaw' lawn tang' hpum' ri kaw meuh nang rokxa' muk kon' Hkrit ko', eun sum' yeuh kan' kue' munhpung' na'." Leukah' aen' a meuh neum-neum. 2Nang rokxa' muk kon' Hkrit na' kaw eun kah ri meuh peue un' kue' vang ri peue ri, kue' yawo beun' ti peue †, cang uin' sati ri, cang eut' hpum' ri, meuh nang kuing' ri hkopyawm', cang rap ri ti chec', cang sangsawn' peue seubu, 3un' nyui ri yuic' ri plai', un' kla-wo' peue daecti hpum' onawn', un' ceuk kleuc' klaee' peue, un' leumeus' hk'il' leumuil. 4Eun kaw kah ri u' peung pe nyahk'ul' ri meulamlam, kon' hk'i eun na' ce kaw kah ri leuceng hkopyawm' kuing' kon ri heun. 5(A' nhaw' lawn un' cang u' peung pe nyahk'ul' ri me-un ko', eun ci' kaw cang rokxa' muk kon' Hkrit Eun Peucawo' na' ce yeuh sa' nhaw'?) 6Eun kaw un' kah ri meuh nang kawm' yum' hk'u', a lawn un' yeuh keutit' ko', na' eun cang mhawng' ri hk'o' cuin, eun na' pun ri hkam' hk'a' taws' a' mu na' seun' seuca' rai na'. 7Punta kaw eun un' cang pun ri hkam' hk'a' ri peue ri mae' un' hk'uic' nang hk'ai tung' ka seuca' rai na', eun kaw kah ri meuh peue kue' muis chak' nanggal' ce peue hk'a' nok muk kon' Hkrit na'.

Nang teum' kawm muk kon' Hkrit

8Saec' meuh nang teum' kawm muk kon' Hkrit na' ce kaw kah ri meuh nang kuing' ri hkopyawm', hpum' leupaws seumeu', un' nyui ri yuic' ri plai', hpum' leupaws seumeu' ri hk'il' leumuil. 9Ce kaw kah ri jhawp' vang rui' neumneum ka hk'a' yum' na' ri hpum' cang yawng na' meulamlam ri. 10Caet ri nawk ce nanggal', ce lawn un' kue' vang ri peue ri ko', koe kah ce meuh nang teum' kawm muk kon' Hkrit na' reu'.

11Seun' awn' na, beun' ce na' ‡ ce kaw kah ri meuh be-un' kuing' ri hkopyawm', un' cang peusah' nyoe peue, cang uin' sati ri, yum' pun hk'a' naee ku ceu.

12Nang teum' kawm muk kon' Hkrit na' ce kaw kah ri kue' yawo beun' ti peue †, kah ri u' peung pe kon' hk'i nyahk'ul' ri meulamlam ri. 13Peue cang teum' kawm pun peue meulamlam na' ce kaw pun munhpung' ri heun'. Ce kaw pun kaw' reng hk'a' yum' ri Yesu' Hkrit Eun na' heun' bae.

14Un' ling' ui' saec' kuit kaw ri ing' ri mi, daecti ui' lawn un' ing' ri mi vaeveae ko', punta 15kaw mi pun ri yawng ku' kaw htuk' ri yeuh ce peue nya peue hk'ul'

† Kon' lah' ka na' lah' a Yesu' Hkrit Eun. †† A' ko' kati keutawn' mae' beun' ri ‡ A' ko' beun' yeuh kan' muk kon' Hkrit †† A' ko' kati keutawn' mae' beun' ri

Eun Peucawo' na', ui' bai tem' ri tuil' leukah' sangsawn' aen' na ri mi. Peue nya peue hk'ul' awn' ce meuh muk kon' Hkrit Eun Peucawo' Cawo' a'yu im' na'. Muk kon' Hkrit na' a meuh kleum' rawng' mae' kleum' ka ku' leupaws seumeu' na'.¹⁶ Vang rui' neum-neum ka hk'a' yum' e' na' keuting a hk'ai' leukah' mhaing' na' ce gawm' euc'.

Aen' a meuh, Peucawo' puc Eun ri lih meuh tu' peue, Cit' seunga' na' a tuh' e' nyu hk'a' leupaws seumeu' Eun na' hawc', in' hpom na' ce nyu Eun, a kue' peue sangsawn' lawng Eun na' ri peue ceu ku ceu, peue bhen' keute' na' peue yum' Eun, Peucawo' Eun yuk Eun huk' nang munhpung' ri.

Leukah' tamnai lawng kaw peue tecla hk'a' yum' na'

4 Cit' seunga' na' lah' ka a glih' gleueng' yeuhki', a lawn rot ti seunyi ko' kaw peue tecla hk'a' yum' na'. Peue kaw hot' cit' cang chi' lai na' mae' leukah' sangsawn' ka seuca' na'.² Leukah' sangsawn' awn' a lih neum peue cang chi' lai, peue leukah' seunga' hpum' vok' ku' hpum' cang yawng ce yeum ka heul' na'.³ Ce un' kah peue ti puri meuh beun' me puri, ku' hk'a' ti ri ceu ku' Peucawo' hpanpleng' Eun ri tuil' ri peue yum' Eun mae' peue yawng ku' leupaws seumeu' na' ce hk'a' a hk'a' naee mun' keuting ri Peucawo' Eun na', ce un' kah peue hk'a' a.⁴ Kopti ku' Peucawo' hpanpleng' Eun na' chak' a ku ceu ri. Peue lawn rap ri ti a hk'a' naee mun' keuting ri Peucawo' Eun ko', un' lo' ri kam' a saec' ti ceu.⁵ Kopti pun a ri saic' ri seunga' ri leukah' Eun Peucawo' mae' leukah' hk'o' mun' na' hawc'.

Mhai' chak' Eun Yesu' Hkrit

⁶ Mi lawn sangsawn' ec' awng' na' ce ri lawng aen' na meulamlam ri ko', mi kaw meuh mhai' chak' Eun Yesu' Hkrit, mi kaw huk' hawn' hk'a' naee hk'a' leupaws seumeu' ka hk'a' yum' na' mae' leukah' sangsawn' chak' hot' mi ri yeuh na'.⁷ Pawlaee leuceng leukah' apom un' hkopyawm' Peucawo' Eun na' apom ris ka a'ya na', daecti hk'ui' ri cang hkopyawm' ri Peucawo' Eun reu'.⁸ Hk'ui' ri yeuh nham' keune ri kue' kaw' reng na' kue' a mun' yeut, daecti hk'ui' ri hkopyawm' ri Peucawo' Eun na' a jaen kue' mun' hk'a' naee ku ceu. Kopti kaw a teum' kawm e' kue' a'yu hk'u' hk'a' naee civit cat aen' na mae' civit cat na' na'.

⁹ Leukah' aen' a meuh leukah' hk'o' yum' nyawk', htuk' ri un' laee kangkae rap ri ti a.¹⁰ Htalikawm' hkam' e' ri sae' caee' yeuh kan' na' kopti meuh a keutui' hpum' e' Peucawo' Cawo' a'yu im' na' Eun. Eun meuh Cawo' teum' kawm htut peue gawm' euc' peue lawtpon na', Eun jaen meuh Cawo' teum' kawm htut peue yum' Eun na' ce lawtpon.

¹¹ Sangsawn' peue ri ceu nang aen' ce meulamlam ri reu'.¹² Pawlaee uin' peue chaw hkamram ri meuh mi nang aet' na', daecti vang leukah' mi, vang yeuh mi kan', vang hk'a' leumeus' keus mi, hk'a' yum' mi mae' vang seunga' chak' mi na', yeuh mi meuh vang hot' rin ce peue yum' na'.¹³ Rot ti yam na' ui' ing' rot, sae' caee' ri lip htawm Seunga' vang hk'o' mun', tuil' kaw' reng mae' sangsawn' peue.¹⁴ Pawlaee vel lap-sawng' Peucawo' tuil' Eun ri mi ri leukah' ce peue suip leukah' Eun Peucawo' yam muk ro' kan nang kawt na' tang' ce ti' ri hk'a' pang mi na'.

¹⁵ Punta kaw peue cang nyu vang huk' hawn' mi na', sae' caee' co' ca' ri yeuh kan' aen' na.¹⁶ Uin' sati ri hk'a' a'yu im' mi na' mae' ku' sangsawn' mi na' meulamlam ri. Yeuh a laleung. Mi lawn yeuh keutit' ko', mi na' cang teum' kawm htut tu' ri na' mae' peue pun ri mhawng' leukah' mi na' ce lawtpon.

Ku' htuk' ri yeuh ri peue

5 Pawlaee tup is' a' ta' kawt na' ce nyawk', daecti hk'o' hk'ang a ri ce seun' meuh ce kuiing' mi ko'. Me kaw' aet' hk'ai' mi na' ce yeuh a ri ce seun' meuh ce awng' me mi ko'.² A'ya kawt na' ce yeuh a ri ce seun' meuh ce ma mi ko'. Beun' kaw' aet' hk'ai' mi na' ce, yeuh a ri ce hk'a' naee hpum' seunga' chak' mi na' seun' meuh ce awng' beun' mi ko'.

³ Teum' kawm a'ya seunao un' kue' nang rok' na' ce meulamlam ri.⁴ Daecti a'ya seunao na' ka lawn kue' kon' un' lah', lhan' un' lah', nanggal' ka na' ce kaw kah ri rin ri yeuh ku' cawp' alo Eun Peucawo' na' ri rok' ce nyahk'ul' ri na' mae' top' ce kun makuiing' a' ta' a'ya ri na'. Kopti yeuh keutit' na', htuk' a hpum' Eun Peucawo'.⁵ A'ya seunao un' kue' nang teum' kawm ut' koe na' ka keutui' hpum' ka Peucawo' Eun. Punta Peucawo' kaw Eun teum' kawm ka na', ka sae' caee' hk'o' mun' hk'o' hk'ang a ri Heun gawm' sum' gawm' seunyi.⁶ Daecti a'ya seunao ut' pal mae' ku' ren' kaw' na', ka saec' na' kaw' a'yu im' ko', a seun' yeum ka hawc'.⁷ Punta kaw peue un' cang chaw hkamram ce na', sangsawn' lawng aen' na ri ce yeut.

⁸ A'nhaw' lawn un' rok' ec' awng' ri, lheu' awn' na un' rok' peue nya peue hk'ul' ri ko', eun meuh peue

tecla hk'a' yum' na' hawc'. Eun rai nyawk' hk'ai' peue un' yum' na' ce.

⁹A'ya seunao htuk' ri lec nang ca' lang' a'ya seunao pun ku' teum' kawm na', kaw ce kah ri meuh peue yeuh ki', kah ri a'yu leskul' neum pai', mae' tawn kue' ya-wo me ti peue †, mae' ¹⁰kue' muis laws' hk'a' naee yeuh kan' chak' na', u' hpama ri ko', roksa' kon' hk'i ri, cang rap ri ti chec', hkuc' cung ce peue Eun Peucawo' na', teum' kawm nang tukhka mae' tan tu' ri yeuh kan' chak' ku ceu.

¹¹Saec' meuh a'ya seunao kawm' nhum' na' ce, paw nang seue' ce lec nang ca' lang'. Kopti yam alo jawngkui' tu' ku' sum' yeuh ce na' a lawn keuting hk'ai' alo jawngkui' tu' tan ce ri Hkrit Eun na' ko', ce na' tang sum' is' me bae. ¹²Kop awn' na, kopti un' hot' ce kati yeuh ri nanggal' na', ce kaw pun ri hkam' hk'a' ciyang na'. ¹³Lheu' awn' na, ce na' meuh peue ke-unah eo' ri ti nya hawc' ti nya. Keunah koe a hkuin' nang hk'o', ce na' eo' ri cuk' cic' suksak peue, lah' ku' un' htuk' ri lah' na'. ¹⁴Kop awn' na, ui' sum' tuil' kaw' reng ce a'ya seunao kawm' nhum' na' ce na' ti ri is' me bae, kue' kon' hk'i, roksa' nyahk'ul' ri. Yeuh keutit' ko', ransu na' ce na' un' cang chaw hkamram ce. ¹⁵Kopti maet' maen', a'ya seunao na' ce ngon' kleuc' ce hk'a' ri, ce hpawt' ri hot' Satan na' heul' hawc'.

¹⁶Beun' yum' ti peue na' eun lawn kue' a'ya seunao nang nyahk'ul' ri ko', teum' kawm ce. Pawlaee kah a meuh beus ri muk kon' Hkrit, kopti muk kon' Hkrit na' kaw ce cang teum' kawm a'ya seunao seubu ku' htuk' ri teum' kawm neumneum na' ce.

¹⁷Ro' kan nang kawt yeuh kan' muk kon' Hkrit meulamlam ri na' ce, lheu' awn' na nang yeuh kan' sangsawn' leukah' mun' mae' kan' sangsawn' na' ce htuk' ri pun munhpung' ri lal' pun. ¹⁸Kopti nang htawm Seunga' na' lah' ka, "Pawlaee chuip' moeng ka a' moe buih chok' chec' ngho' na'", †† mae' "Nang yeuh kan' na' ce htuk' ri pun ngos yeuh ri kan'." ¹⁹A lawn un' kue' peue hkam' sa' hki' hk'o' lal' loe' peue ko', pawlaee rap ri ti leukah' tang' peue map' ri ro' kan nang kawt na' ce. ²⁰Peue yeuh map' na' punta peue seubu na' kaw ce un' cang hot' rin ri ti ce na', sangsawn' ce nanggal' ce peue heun' na' reu'.

²¹Tuil' ui' leukah' aen' na ri mi nanggal' Eun Peucawo', nanggal' Eun Yesu' Hkrit mae' nanggal' ce in' h-pom ku' Peucawo' leuk Eun na' ce. Jhawp' leukah'

sangsawn' aen' na ri un' meuh mi hk'a' mawn' hk'a' -maen', pawlaee yeuh a mae' keue' mi ri buh peue.

²²Paw nang pao ri tang' ti' ri tuil' an' nya na'. Pawlaee va map' ce peue seubu na' ceu' mi. Yeuh tu' mi seunga' chak'.

²³Tang' neum maet' maen' na', pawlaee nyui leuum' na' palkoe. Kopti keuteul sui' keucu peuyhat mi na', nyui leuum' pli' bui na' aet' aet' yeut.

²⁴Map' ce peue ngon' na' puc a ri glih' gleueng', peue kaw yawng kaw ce hkam' hk'a' taws' a' mu na'. Daecti map' ce peue ngon' na' a kaw pucti hot'. ²⁵Seun' awn' na, yeuh ku' chak' na' kaw a pucti glih' gleueng'. A saec' na' un' nang glih' maet' maen' ko', a hkuin' kaw mo' ri pun.

6 Punta kaw peue un' cang lah' ku' un' nawpsang ri muis Eun Peucawo' na' mae' ku' sangsawn' e' na', ku' leuvae peue meuh mhai' na' ce htuk' ri hkopyawm' ri cawo' ri na' ce meulamlam ri. ²Mhai' ku' cawo' ce na' meuh ce peue yum' na', kopti meuh ce ec' awng', ce htuk' ri un' va hk'a' hkopyawm' ce ri cawo' ri na' cutyawm'. Ce jaen htuk' ri yeuh mhai' chak' lheu' awn' na, kopti ku' pun mun' kop ku' yeuh ce mhai' na' ko', meuh a peue yum' ku' mhai' na' leumeus' ce na' ce. Aen' meuh ce ku' htuk' mi ri sangsawn', kah peue hot' ri yeuh a.

Leumeus' leumuil

³A'nhaw' lawn sangsawn' leukah' hk'a' yum' un' cawp' na' mae' leukah' un' hkaw leukah' cawp' -maen sangsawn' Eun Cawo' e' Yesu' Hkrit na' mae' leukah' sangsawn' Eun Peucawo' na' ko', ⁴eun meuh peue hpum' keuting pil kui' ri un' leuceng pun keunhaw'. Eun sae' caee' htu' hting' peue ri leukah' le-upong, a yeuh hkoe' mang' puri, rutrim' puri, peusah' nyoe puri, htanghteum' puri ⁵mae' un' htuk' un' lung ce peue hpum' hk'aw' jeuk na' pucti lih. Ce meuh peue un' kue' hk'a' leupaws seumeu'. Ce hteum' yeuh kan' Eun Peucawo' na' meuh hk'a' kaw sok ri pun nammaet leumuil na'.

⁶Daecti peue yeuh kan' Eun Peucawo' mae' nyu ku' kue' ri hit' hpum' ri na', meuh a nammaet keuting.

⁷Kopti yam ing' e' pang bhen' keute' na', ing' e' tu' seurak' ri. Yam puc e' ri heul' hk'ai' ka na', e' ku un' cang ti keunhaw' hot' ri heul'. ⁸E' lawn kue' ku' hk'a' ku' som' mae' hk'ohk'eung ko', a hit' hpum' e'.

⁹Peue sum' meuneum na' hk'uic' ce hk'a' naee ku' cop' long mae' saee' pan ka ta' nha' nga' suisa hk'o' l-hat' ku' kaw ol' peue hk'uic' hk'a' naee vang lulaic na'.

¹⁰Kopti leumeus' leumuil na' meuh a kleum' ka ku' rai

† A'ko' kati keutawn' mae' me ri †† Sawm' leukah' mun' 25:4

‡ Lu' ka 10:7

na' gawm'euc' ka. Kopti leumeus' leumuil na', peue ngon' na' peue kleuc' hk'a' ka hk'a' yum' na', ce sawt' meun ri ri ku' kuit nyhap' heun' ceu na'.

Peueng' suik' pun hk'a' yum'

¹¹Peue Eun Peucawo' na' mi vel ceu nang aen' ce reu'. Daecti sok mi hot' ku' leupaws seumeu', hkopyawm' Peucawo' Eun, hk'a' yum', hk'a' leumeus' keus, ye-un' hkam, mae' hpum' onawn' na'. ¹²Peueng' suik' chak' pun hk'a' yum' na'. Cit' tip a' yu tip cot' cu ku' Peucawo' klawng Eun ri kah mi rap ri ti yam hkam' mi sa' hki' chak' nanggal' ce peue meuh sa' hki' heun' peue na', jhawp' a meulamlam ri reu'. ¹³Nanggal' Eun Peucawo' Cawo' tuil' a' yu ri ku ceu na' Eun mae' nanggal' Eun Yesu' Hkrit Cawo' hkam' sa' hki' chak' nanggal' eun cawo' Pontias' Pi' lat na' Eun, ui' kaw tuil' leukah' ri mi, ¹⁴rot ti yam Cawo' e' Yesu' Hkrit tang puc Eun ri lih na', rokxa' leukah' tuil' Eun aen' ce meulamlam ri, pawlaee va a kue' vang kleuc' ku' lah' ku' ris. ¹⁵Yam ka Yesu' kaw Eun tang pucti lih na', kaw a meuh hk'a' naee yam Eun Peucawo'. Peucawo' meuh Eun Cawo' kuing' ri suk' seun'. Heun ri koe meuh Eun

Cawo' u' peung. Eun meuh Hkun' haw' hkam' hk'a' pang hkun' haw' hkam', Cawo' hk'a' pang cawo'. ¹⁶Heun ri koe a' yu im' Eun cot' cu. Eun ut' hk'a' naee ku' ceng' ku' a' nhaw' un' cang lec ka na'. Heun ri ko', a' nhaw' hkuin' duing nyu hkuin' cang nyu Eun. Kah Eun kue' munhpung' ti' ca cot' cu ri reu'. Amin.

¹⁷Tuil' leukah' ri peue meuneum ut' nang lok maet' maen' na' ce. Un' kah ce hpum' keuting mhawng' ri keutui' hpum' vahtu' hk'il' leumuil cang lulaic na', daecti kah ce keutui' hpum' Peucawo' Cawo' mhe' ri uin' ku ceu gawm'euc' a meuh ku' ren' kawn pun e' na' Eun. ¹⁸Kah ce yeuh ku' chak', meuneum ri yeuh ku' chak', hpum' vahveung gvah puri reu'. ¹⁹Yeuh keutit' na' ko', meuh a sawng' yeuh ri rokxa' hk'il' leumuil pun tu' ri meun nang kuing' pang mao'. Punta kaw ce pun a' yu neumneum na', a meuh kleum' keutawn' pun cu hk'a' cat na'.

²⁰Ti'mo'se, rokxa' ku' ap ri ri mi na' meulamlam ri. Vel leukah' rishk'i un' kue' mun' na' mae' kamkuit kleuc' hteum' ri pun cu' yi na'. ²¹Peue ngon' na' kopti rap ce ri ti kamkuit aen' a na', ce kleuc' hk'a' ka hk'a' yum' na'. Kah mun' sin' Eun Peucawo' a kue' ri pe'.

2 Ti'mo'se

1 Htawm ti ok' aen' na ko', meuh ui' Paw' lu meuh peue caee Eun Yesu' Hkrit kop alo Eun Peucawo' hot' kati a'yu im' hk'a' naee Yesu' Hkrit Eun na',
²ui' tem' ri tuil' a ri Ti'mo'se ku' meuh kon' leumeus' ui' na' mi.

Kah mun' sin', hk'a' tulyak mae' hk'a' kuit nyawk' kuit sam' ran cumyen' lih neum Kuing' Peucawo' mae' neum Cawo' Yesu' Hkrit e' na' kue' ri mi reu'.

Tuil' kaw' reng kaw kati keutawn'

³Yam hk'o' ui' mun' ui' kuit rot ri mi ku sum' ku seunyi na', ui' mun' keuting ri Peucawo' Cawo' yeuh ui' mhai' Eun ri hpum' cang yawng seunga' chak' ui' na' seun' ku' a' ta' a' ya ui' yeuh ce na'.⁴Yam keutui' hpum' ui' leuum' ngai' mi na', punta kaw ui' ren' kawn kuit sam' ran htonnuk na', ui' sum' nyu mi.
⁵Keutui' hpum' ui' hk'a' yum' caetcaet mi ku' kue' hk'a' naee a' ya mi Lo' is' ka mae' ma mi Yu' nis' ka tang' neum leumah' na'. Saec' meuh maet' maen', ui' ku yawng kue' a' hk'a' naee mi ri yeut.⁶Kop awn' na kaw ui' tuil' sati mi, yeuh lapsawng' Eun Peucawo' kue' hk'a' naee mi ri tang' ui' ti' ri hk'a' pang mi na' huk' hawn' reung seun' ngawl na' reu'.⁷Kopti Peucawo' hpaw Eun ca' tuil' hpum' chi' yan' ri e', daecti Eun tuil' hpum' kue' ti' ca, hpum' leumeus' keus mae' hpum' u' peung pe tu' ri na' ri e'.

⁸Kop awn' na, pawlaee kaic ri hkam' e' sa' hki' lawng Eun Peucawo' e' na' mae' pawlaee kaic ri ui' ku' pun ui' ri hk'awng' ri nang htawng' pun Heun na'. Daecti hkam' ku' tukhka na' pun leukah' mun' ren' kawn na' ri ti' ca Eun Peucawo' na' mae' ui' tiduih' reu'.
⁹Heun ri, teum' kawm htut Eun e' lawtpon. Eun klawng e' lec hk'a' naee a'yu seunga' chak' na'. A hkuin' meuh kopti yeuh e' a, daecti meuh a kopti alo mae' mun' Eun na'. Mun' aen' a' tuil' ri ri e' hk'a' naee Yesu' Hkrit Eun tang' neum yamla ri na' hawc',¹⁰ daecti maet' maen' e' pun ri nyu mun' Eun Peucawo' na' glih' gleueng' ri Yesu' Hkrit Cawo' teum' kawm htut e' lawtpon na' lih Eun na'. Eun yeuh hk'a' yeum na' lu, Eun ti a'yu mae' ku' un' cang lulaic na' ing' ri ku'

ceng' na' ri leukah' mun' ren' kawn na'.¹¹Kopti meuh a leukah' mun' ren' kawn aen' na, Eun tang' ri uin' ui' meuh nang sangsawn' leukah' mun', peue caee Eun Yesu' mae' meuh seura'.¹²Meuh a kopti aen' a na', ui' pun ri tukhka yeuhki'. Daecti ui' un' kaic, kopti yawng ui' Cawo' yum' ri na' Eun. Ui' yum' kaw Eun rokxa' ku' ap ui' ri Heun na' rot ti seunyi Yesu' Hkrit kaw Eun lih na'.

¹³Roksa' leukah' sangsawn' chak' pun mi ri mhawng' ri ui' na' ri hk'a' yum' na' mae' hk'a' leumeus' keus kue' hk'a' naee Yesu' Hkrit Eun na' reu'.¹⁴Cu Cit' seunga' chak' ut' hk'a' naee e' na', rokxa' ku' chak' ap ri ri mi na' meulamlam ri reu'.

¹⁵Mi ku yawng peue ut' nang kuing' Asa' na' tecla ce ui' gawm' euc'. Hpigelas' mae' Hemogenes' ka ku pawng' ce.

¹⁶Kah hk'a' tulyak Eun Peucawo' na' kue' nang nyahk'ul' eun Onesihporas' na', kopti ren' eun ri yeuh ui' kuit sam' ran. Eun un' kaic ri beus ui' mu' lhac' na'.¹⁷Yam rot eun nang veng Ro' ma na', eun sae' caee' eo' sok ri yeuh ri nyu ui'.¹⁸Kah Peucawo' Eun tuil' hk'a' tulyak ri na' ri heun hk'a' naee seunyi Yesu' Hkrit kaw Eun lih na' reu'. Yam ut' ui' nang veng E' fe' su' na' eun ci' pe teum' kawm ui' a' neng na', mi ku yawng a meulamlam ri.

Peue suik' chak' Eun Yesu'

2 Kop awn' na kon' ui' na' mi, kue' kaw' reng hk'a' naee mun' sin' kue' hk'a' naee Eun Yesu' Hkrit na' reu'.²Ku' pun mi ri mhawng' ri ui' nanggal' ce peue meuh sa' hki' heun' peue na', ap a ri ku' yum' pun mi ku' cang sangsawn' peue seubu na' ce reu'.
³Hkam' ri ti ku' tukhka mae' ui' seun' peue suik' chak' Eun Yesu' Hkrit na' reu'.⁴Peue yeuh kan' suik' na' eun ko', eun hkuin' laee pawng' pa' kan' peue kuing'. Eun sum' yeuh ku' hit' hpum' eun po' suik' ri na'.⁵Seun' awn' na, peue keutec hk'uih na' eun lawn un' hk'uih cawp' ritroe ka ko', eun hkuin' pun lapsawng' pe na'.⁶Peue sang' ri hk'a' htalikawm' ri na' eun htuk' ri pun ku' sang' ri na' nanggal' peue.⁷Kuit ri mhawng' ku' lah' ui' na', kopti Peucawo' kaw Eun tu-

il'cu'yi kaw mi cang yawng ceu nang aen' ce gawm'euc'na'ri mi.

⁸Kuit rot ri Yesu' Hkrit Cawo' tang kuh'im' hk'ai' vang yeum ri Cawo' meuh nang suip' ceucat eun hkun'haw'hkam' Davit' na' Eun reu'. Aen' meuh a leukah' mun'ren'kawn sangsawn' ui' na' hawc'.
⁹Kopti meuh a leukah' mun'ren'kawn aen' a na', ui' buih pun ri hkam' ku' tukhka rot ti mawt peue ui' ri mu' lhec' seun' peue rai ko'. Daecti a'nhaw' hkuin' cang mawt leukah' Eun Peucawo' na' ri mu' lhec'.
¹⁰Kop awn' na punta peue pun ri leuk ri ti na' kaw ce pun hk'a' htut lawtpon kue' hk'a' naee Eun Yesu' Hkrit na' ri munhpung' cot'cu na', ui' yeun' hkam ku ceu gawm'euc'na' ce.

¹¹Leukah' kawn' kaw lah' ri aen' a meuh leukah' hk'o'yum'nyawk'.

E' lawn yeum mae' Heun ko',
e'ku na' a'yu im' mae' Heun.

¹²E' lawn cang yeun' hkam ko',
e'ku na' pun ri u'peung mae' Heun.
E' lawn tecla Eun ko',
Eun ku na' tecla e'.

¹³E' saec' kati un' keutawn',
Heun ri Eun kati keutawn',
kopti un' cang tecla Eun tu' ri na' meun.

Nang yeuh kan' htuk' hpum' Eun Peucawo'

¹⁴Punta kaw ce kuit ri nawk lawng aen' a na', tuil' sati ce laleung reu'. Tuil' sati ce nanggal' Eun Peucawo', pawlaee kah ce htu'hting' puri ri leukah' un' kue' mun'ku' cang yeuh peue pun ri mhawng' a na' ce lu yawo na'.
¹⁵Punta kaw mi meuh peue Peucawo' htawhkam pun Eun na', sae'caee' co'ca' ri yeuh a reu'. Kah mi meuh nang yeuh kan' un' cang kaic, mae' kah mi cang lo' leukah' leupaws seumeu' na' cawp'-cawp'.
¹⁶Vel leukah' un' kue' mun' un' hkopyawm' ri Peucawo' Eun na' reu'. Kopti leukah' awn' gawm yeuh a peue hk'uic' tem.
¹⁷Ku' sangsawn' ce na' a gawm som' ri keuting seun' peuyhat kaensa'† na' ko'. Hime-neas' mae' Hpi' letas' ka ut' hk'a' naee ce.
¹⁸Ka kleuc' hk'a' leupaws seumeu' na' heul'. Ka lah' hk'a' tang kuh'im' na' sut' ka hawc'. Ka yeuh hk'a' yum' ce peue na' lu ngon'.
¹⁹Daecti kleum' keutawn' Eun Peucawo' na' a jheum' ri keutawn', a pun ri tawk' ta'ra' ri leukah' yeuhki', "Peucawo' yawng Eun peue ri na' ce"
†, mae' "Peue peus muis Eun Peucawo' na' peue gawm'euc', hk'uih hk'ai' ku' rai na' reu'."

† "kaensa", (leukah' Kula na' a lah' "cancer") na' nyhap' a ri bai', peue cang yeum ri ka. †† Nang hk'i 16:5

²⁰Nang nya keuting ti lhang' na' a hkuin' kue' hk'eung hk'il' hk'eung leumuil na' palkoe, daecti a ku kue' hk'eung hku' mae' hk'eung keute'. Hk'eung na' ngon', a lo' ri vang kue' munhpung', ngon' a lo' ri vang un' kue' munhpung'.
²¹A'nhaw' lawn saic' ri tec meun ku' un' kue' ngos nang tu' ri na' ko', eun kaw pun ri meuh hk'eung kue' munhpung', pun hk'a' saic' ri seunga' chak' na'. Eun kaw kue' mun' pun cawo' ri na' eun. Cawo' na' eun kaw rangraen ri uin' eun pun yeuh kan' chak' na' gawm'euc' ka.

²²Vel ta'nha' hk'a' nham' keune kon' hk'ih' seula na' reu'. Hot' ri sok hk'a' leupaws seumeu', hk'a' yum', hk'a' leumeus' keus mae' hk'a' ren' kawn kuit sam' ran na' mae' peue klawng Peucawo' Eun ri hpum' seunga' chak' ri na' ce tiduih' reu'.
²³Pawlaee pawng' nang htu'hting' nga' puri ri ku' un' kue' peuehot' na' ce, kopti tup yawng mi ku' yeuh keutit' na' yeuh a peue kleuc' puri.
²⁴Mhai' Eun Peucawo' na' un' kah ri meuh nang kleuc' peue, daecti kah ri meuh peue hpum' onawn' ri peue gawm'euc', cang sangsawn' peue, cang yeun' hkam.
²⁵Hk'a' naee vang keutui' hpum' eun na', punta peue to'tam' eun na' Peucawo' kaw Eun yeuh ce taws' hpum' fuin map' ri yawng ku' leupaws seumeu' na'.
²⁶Lheu' awn' na, punta peue aen' kaw ce pawn sati ri mae' kaw ce pon saee' pan ka seuca' rai ku' mheut' ka ce kaw meuh mhai' ri na', eun kaw kah ri tang' hpum' ri onawn' cang lah' cang ris ri peue to'tam' ri na' ce. ‡

Seunyi sa' hkat' tisut'

3 Yeuh ri pawn a, seunyi sa' hkat' tisut' na' ku' tukhka na' kaw a keut' kue'.
²Peue na' peue kaw sawng' leumeus' tu' ri, leumeus' leumuil, tang' tu' ri keuting, mhawng' ri hk'o'cuin, un' nawpsang peue, un' leuceng leukah' makuiing' ri, un' yawng mun'kun, un' seunga' chak',
³un' kue' hk'a' leumeus' keus, un' cang plo' map', ren' mae' ris leukah' nyoe, un' pe tu' ri, peue sa'hao', un' leumeus' ku' chak',
⁴cang fuin peue, hpum' ha' hpum' vae, hpum' keuting un' leuceng peue, leumeus' ku' ren' kawn na' lheu' Peucawo' Eun,
⁵yum' Peucawo' Eun hk'a' nok ri yawo, daecti ce tecla ti'ca Eun na'. Pawlaee va ri yeuh a' mawo ce peue yeuh keutit' na' ce awh.

⁶Ce ri ngon', ce guil ri meuh peue chak' lec nang nya peue na'. Ce u'peung beun' un' heng' laet' map' heun' ku' hot' ta'nha' hk'aw' jeuk ka bhen' keute' ku ceu na' ce.
⁷Beun' aen' ce tup rin laleung, daecti ce

‡ Nang htawm Seunga' na' ngon', leukah' duing' ka nambat aet' 26 na' kue' a hk'a' naee nambat aet' 25 na'.

hkuin' cang pawn ku' leupaws seumeu' na'.⁸ Seun' Yannes' mae' Yambles' to'tam' ka Mo'se eun na',[†] peue awn' ce ku to'tam' ku' leupaws seumeu' na'. Kamkuit ce na' a hk'aw' jeuk, hk'a' yum' ce na' a ku hkuin' meuh hk'a' yum' neumneum.⁹ Daecti ce hkuin' kaw cang yeuh keutit' ling', kopti hk'a' un' heng' laet' ce na' kaw a pucti lih glih' gleueng' nanggal' peue gawm' euc' seun' ku' lal' peue awn' ka.

Paw' lu can' eun Ti'mo'se eun

¹⁰ Daecti mi pun ri yawng ku' sangsawn' ui' na' ce gawm' euc', hk'a' a' yu im' ui', vang keutui' hpum' ui', hk'a' yum' ui', hk'a' yeun' hkam, hk'a' leumeus' keus, hk'a' hpum' keutawn',¹¹ ku' keunhap' nokneh mae' ku' tukhka ui' na' ce. Mi pun ri yawng ku' keunhap' peue ui' nang veng Anhti' ok, veng I' kaw' ni' mae' veng Lis' tra' na', daecti Peucawo' Eun yeuh ui' pon ceu nang awn' ce gawm' euc'.
¹² Neumneum ka na' ko', a' nhaw' lawn sum' a' yu im' hot' Peucawo' Eun hk'a' naee Yesu' Hkrit Eun ko', eun kaw pun ri hkam' ku' keunhap' nokneh na'.¹³ Peue rai mae' peue cang chi' lai na' baet ce ri yawm' lih peucuil. Ce chi' lai peue, peue tang chi' lai ce.¹⁴ Daecti mi ri, ku' pun mi ri rin pun ri yum' na' suip a heul' reu', kopti mi rin a ri a' nhaw' mi ku yawng ce yeut.¹⁵ Mi ku yawng tang' neum yam meuh mi kon' nyom na' yawng mi htawm Seunga' ku' cang tuil' cu' yi kaw mi pun hk'a' htut lawtpon ri yum' mi Yesu' Hkrit Eun na'.¹⁶ Htawm Seunga' na' gawm' euc' ka kue' a kopti Peucawo' yeuh Eun peue kuit doh' ri ka. A kue' peuehot' pun sangsawn', tuil' sati, mhe' ku' kleuc' mae' hk'vui' ri yeuh ku' leupaws seumeu' na'.¹⁷ A rangraen peue Eun Peucawo' na' kaw ce rangraen ri kaw yeuh kan' chak' na' ku ceu ka.

4 Nanggal' Eun Peucawo' mae' nanggal' Eun Yesu' Hkrit Cawo' kaw taws' a' mu ri peue im' mae' peue yeum na' Eun, kuit rot ri lawng kaw Eun tang lih mae' kuit rot ri kuing' Eun na', ui' tuil' leukah' ri mi yeuhki',² sangsawn' leukah' mun' ren' kawn na' reu', a saec' cawp' yam ri un' cawp' yam ri rangraen ri reu', hk'a' naee yeun' hkam na' mae' hk'a' naee sangsawn' meulamlam na' mhe' ku' un' cawp' na', tuil' sati, tuil' kaw' reng peue reu'.³ Kopti kaw a rot yam un' sum' leuceng peue leukah' leupaws seumeu' na'. Ce kaw klawng ri cu seura' na' ce heun' heun'. Ku' sum' mhawng' ce na', ce kaw kah ce lah' ri mhawng' a.⁴ Ce hkuin' kaw leuceng leukah' leupaws seumeu' na', ce kaw hpawt' ri leuceng leukah' apom na' heul'.⁵ Daecti

a saec' yeuh sa' nhaw' uin' sati mi reu', yeun' hkam ku' tukhka na' reu', yeuh kan' nang sangsawn' leukah' mun' ren' kawn na' reu', yeuh kan' mi na' hawc' ku ceu ka reu'.

⁶ Kopti yam kaw ui' yeum na' kaw a hk'aws' rot hawc', a' yu ui' na' pun a ri hkam' ri bah ri seun' leuum' ku' tan na'.⁷ Hawc' ui' sae' caee' peueng' ri suik' hawc'. Keutec hk'uih na' ui' hk'uih rot tisut' ka hawc'. Ui' yum' rot tisut' ka hawc'.⁸ Maet' maen' cui' maw hk'il' leupaws seumeu' na' ko' ka ui' hawc'. Peucawo' Cawo' taws' a' mu leupaws seumeu' na' Eun kaw tuil' cui' maw hk'il' awn' a meuh lapsawng' ri ui' hk'a' naee seunyi awn' na. A hkuin' kaw meuh ui' ri koe, daecti Eun ku kaw tuil' a ri peue ren' kawn mae' kaw Eun tang lih na' ce ku peue yeut.

Paw' lu ris eun Ti'mo'se eun mhawng' lawng ri

⁹ Co' ca' mi ing' rot ri ui' vaeavae awh.¹⁰ Kopti Demas' leumeus' eun bhen' keute' cu maet' maen' aen' a na', eun tecla ui'. Eun heul' nang veng Hte' salo' ni' hawc'. Kah ui' Hkre' sens' eun heul' nang kuing' Galati', Ti' tas' eun heul' nang kuing' Dalmati' hawc'.
¹¹ Lu' ka ut' eun mae' ui' koe. Mi ku na' va Maku' eun ing', kopti cang teum' kawm eun ui' nyawk' vang yeuh ui' kan' mun' na'.¹² Kah ui' Tai' hki' kas' eun heul' nang veng E' fe' su' hawc'.¹³ Yam ing' mi na', hk'o dal' hk'ah' ui' ri Hka' pas' eun nang veng Tro' as' na' mae' bawl' htawm na' ce, lheu' awn' na htawm tem' ri ri hak' na', ti ce ing' awh.
¹⁴ Alek' sando' ku' meuh a' ta' lhec' na' yeuh eun ui' sui' nyawk'. Peucawo' Eun kaw tang top' ku' yeuh eun na' ri heun.¹⁵ Mi ku na' uin' sati ri ri heun meulamlam, kopti ham' tap eun leukah' sangsawn' e' na' reng nyawk'.

¹⁶ Yamla ui' ri hkam' hk'a' taws' a' mu na', a' nhaw' hkuin' ut' hk'a' ui' saec' ti peue. Ce tecla ui' gawm' euc' ri. Pawlaee tang' map' hk'a' pang ce.
¹⁷ Meuh a kop ui' ri punta leukah' mun' ren' kawn na' kaw a pucti heul' htonnuk, mae' peue un' meuh peue ceu Yu' da na' kaw ce mhawng' lawng aen' na gawm' euc' ri na', Peucawo' Eun ut' hk'a' ui', Eun tuil' kaw' reng ui'. Eun ku ti ui' pon hk'ai' moeng ka leu- vai sangsi' na'.¹⁸ Peucawo' Eun kaw yeuh ui' pon hk'ai' ku' rai na' ku ceu. Eun ku kaw ti ui' sa' pa sam' ran ing' lec nang kuing' pang mao' ri na'. Kah munhpung' na' kue' ri Heun cot' cu ri reu'. Amin.

[†] Pucti heul' 7:11

Leukah' tisut'

¹⁹ Pli'si'la', Ahkio'la' †ka mae'e' peue nya ce Onesih-poras' na' ce, lah' ce mhawng' leunyeng ui' ri ce.

²⁰ E'ratas' kawn' ut' eun nang veng Kaw'rinhtu'.

Trofimas' peuyhat eun, ui' hk'ah' eun nang veng Mele-

† Peue caee 18; Pli'si'la' meuh ka beun' eun Ahkio'la'

tas'. ²¹ Yam un' nang rot ka yam kawt' na', co'ca' mi ing' rot maen' awh. Yu'bu'las', Pudens, Li'nas', Hkaodi' mae'e' ec'awng' na' ce gawm'euc' ce ku tawm' a ce lah' ri leunyeng ri mi.

²² Kah Peucawo' Eun ut' hk'a'naee cit' mi na' reu'. Kah mun' sin' Eun na' kue' ri pe' reu'.

Ti'tas'

1 Htawm ti ok' aen' na ko', meuh ui' Paw' lu meuh mhai' Eun Peucawo' mae' peue caee Eun Yesu' Hkrit pun hk'a' yum' ce peue Peucawo' leuk Eun ri ti na' mae' pun cu' yi kaw yawng ku' leupaws seumeu' Eun Peucawo' na',² hk'a' yum' mae' cu' yi aen' a tang' kleum' ri ri keutui' hpum' cit' tip a' yu tip cot' cu na'. A meuh ku' Peucawo' un' cang chi' lai na' yeuh Eun kati ri tang' neum yam na' un' nang kue' ka na'.³ Yam rot a yam tang' Eun ri uin' na', Eun kaw yeuh peue na' ce yawng leukah' ri na' ri ku' sangsawn' uin' Eun ri ui' na' hot' seun' leukah' tuil' Eun Cawo' teum' kawm htut e' lawtpon na' Eun.

⁴Ui' tem' ri tuil' htawm aen' a ri Ti'tas' ku' meuh kon' ui' neumneum hk'a' naee hk'a' yum' seun' puri na' mi.

Kah mun' sin' mae' hk'a' kuit nyawk' kuit sam' ran cumyen' lih neum Kuing' Peucawo' mae' neum Cawo' Yesu' Hkrit Cawo' teum' kawm htut e' lawtpon na' kue' ri mi reu'.

Kan' ku' yeuh Ti'tas' nang kaw' Kret'

⁵Hk'ah' ui' ri uin' mi ut' nang kaw' Kret' na' meuh a punta kaw mi suip kan' un' nang hawc' na' ce mae' kaw mi leuk ri uin' ro' kan nang kawt muk kon' Hkrit ku veng seun' leukah' ku' tawm' ui' ri uin' na'.⁶ Ro' kan nang kawt aen' ce kaw kah ri meuh peue un' kue' vang ri, kah ri meuh peue kue' yawo beun' ti peue. Kon' ce na' ce kaw kah ri meuh peue yum' mae' kah ri meuh peue un' uin' peue lah' ri meuh peue eo' kleuc' peue mae' un' uin' peue lah' ri meuh peue lheu' leukah'.⁷ Kopti ro' kan nang kawt muk kon' Hkrit na' ap ce ri yeuh kan' Eun Peucawo' na', ce kaw kah ri meuh peue un' kue' vang ri, un' kah ri meuh peue yeuh alo ri, un' kah ri meuh peue hpum' dot', un' kah ri meuh peue nyui ri yuic' ri plai', un' kah ri meuh peue kleuc' peue klaee' peue, mae' un' kah ri meuh peue hpum' un' leupaws seumeu' ri hk'il' leumuil.⁸ Daecti kah ri meuh peue cang rap ri ti chec', leumeus' ku' chak', pawn sati ri, meuh peue leupaws seumeu', seunga' chak' mae' cang eut'

hpum' ri.⁹ Punta kaw ce cang tuil' kaw' reng peue seubu ri leukah' leupaws seumeu' na' mae' kaw ce cang htu' hting' pe peue to' tam' leukah' sangsawn' awn' a na', ce kaw kah ri jhawp' ri hot' leukah' sangsawn' hk'o' yum' ku' tawn rin ce hawc' na' keutawn'.

¹⁰Kopti peue un' leuceng leukah' na' kue' peue heun'. Ce meuh peue eo' lah' ku' un' meuh na'. Punta kaw peue yum' a na', ce lah' a. Peue aen' ce ko', a kue' hk'a' naee muk ce peue ton' duing' hak' na' heun'.

¹¹Kah ri yeuh ce dit' ti. Kopti sangsawn' ce ku' un' htuk' ri sangsawn' na', a gawm yeuh nyahk'ul' na' ce lu heul' heun'. Ku' sangsawn' awn' a meuh punta kaw ce pun leumuil na'.¹² Saec' meuh peue tamnai hk'a' naee ce ti peue na' eun, eun ku lah', "Saec' yamnhaw', peue kaw' Kret' na' meuh ce peue cang chi' lai, ce seun' sat' hk'i rai na', ce hk'a' pon hk'a' lheu', ce keunah."¹³ Leukah' aen' a meuh a neumneum. Kop awn' na, sangsawn' ce rengreng punta hk'a' yum' ce na' kaw a cawp',¹⁴ mae' kaw ce un' leuceng leukah' apom ce peue Yu' da na' mae' kaw ce un' leuceng ritroe ce peue tecla ku' leupaws seumeu' na'.¹⁵ Pun ce peue hpum' seunga' na', ku ceu na' seunga' ka. Daecti pun ce peue hpum' hk'aw' jeuk mae' peue un' yum' na', a hkuin' kue' ku' seunga' na' saec' ti ceu. Neumneum ka na' ko', kamkuit mae' hpum' cang yawng ce na' a ku hk'aw' jeuk yeut.¹⁶ Ce saec' lah' ri yawng Peucawo' Eun, daecti ku' yeuh ce na' a tecla Eun. Ce meuh peue hk'aw' jeuk, peue un' cang leuceng ri ti mae' un' kuing' ri yeuh kan' chak' na' ku ceu ka.

Ku' sangsawn' cawp'

2 Mi kaw kah ri sangsawn' a hot' seun' leukah' leupaws seumeu' na'.² Sangsawn' a' ta' kawt na' ce meuh peue cang yawng tu' ri, kaw peue cang hkopyawm' ri ce, ce na' cang eut' hpum' ri, kue' kaw' reng hk'a' naee hk'a' yum', hk'a' naee hk'a' leumeus' keus na' mae' hk'a' naee vang cang yeun' hkam na' reu'.

³Seun' awn' na, sangsawn' a' ya kawt na' ce ri a' yu im' hk'a' naee hkopyawm' ri Peucawo' Eun, un' va ri saesawm' peue mae' un' va ri kue' yin plai'. Daecti kah ri cang sangsawn' ku' chak' na'.⁴ A lawn yeuh keu-

tit' ko', ce kaw cang sangsawn' a'ya aet' na' ce ri cang leumeus' me ri mae' kon' ri na' ce,⁵ cang eut' hpum' ri, meuh peue seunga', cang rokxa' nyahk'ul' ri, hpum' chak' cang tukyak mae' cang leuceng leukah' me ri. Ce lawn yeuh keutit' ko', peue hkuin' kaw lah' ku' un' nawpsang ri leukah' Eun Peucawo' na'.

⁶Seun' awn' na, tuil' kaw' reng ce me a'yu kaw n' nhum' na' kaw ce cang eut' hpum' ri.⁷Cu ku' chak' yeuh mi ku ceu na' meuh vang hot' rin ce ri ti. Vang sangsawn' mi na', kah hpum' seumeu' hpum' nhim' mi na' pucti lih.⁸Punta ku' sangsawn' mi na' kaw a un' kue' vang ri peue a na', sangsawn' a hk'a' naee vang leupaws seumeu' na' reu'. Yeuh keutit' ko', peue ham' tap e' na' ce kaw kaic, ce na' un' laee kue' vang ri e'.

⁹Sangsawn' mhai' na' ce leuceng leukah' cawo' ri na' ku ceu, co' ca' ri yeuh ku' htuk' hpum' cawo' ri, un' va ri htu' hting' cawo' ri¹⁰ mae' un' va ri rabawk' eun, daecti yeuh eun nyu meuh ri peue hk'o' yum' neum-neum. Yeuh keutit' na' ko', ce kaw yeuh leukah' sangsawn' lawng Eun Peucawo' Cawo' teum' kawm htut e' lawtpon na' lec hk'a' naee hpum' ce cawo' ri na'.

¹¹Kopti mun' Eun Peucawo' cang htut na' puc a ri lih ri peue gawm' euc' hawc'.¹²A sangsawn' e' tecla ku' un' chak' na' mae' ku' ta' nha' ka bhen' keute' na'. A ku sangsawn' e' a'yu im' eut' hpum' ri hk'a' naee cu cat aen' na, meuh peue leupaws seumeu' mae' a'yu im' hot' Peucawo' Eun.¹³Hk'a' naee cu cat aen' na, ko' e' vang keutui' hpum' mun' htonnuk na'. Vang keutui' hpum' mun' htonnuk awn' a meuh munhpung' Eun Yesu' Hkrit Cawo' meuh Peucawo' Cawo' htut keuting e' na' kaw a pucti lih na'.¹⁴Tuil' Eun tu' ri na' ri e' meun, a meuh punta kaw Eun teum' kawm htut e' lawtpon hk'ai' ku' rai na' ce gawm' euc', saic' ri uin' e' seunga' pun Eun, kah e' meuh peue Eun koe mae' kah e' seuyung' seuyah' yeuh ku' chak' na'.

¹⁵Kop awn' na, kaw mi pun ri sangsawn' lawng aen' ce. Lo' ti' ca mi na' gawm' euc' ka tuil' kaw' reng mae' tuil' sati peue reu'. Pawlaee uin' peue chaw hkamram mi.

Yeuh ku' chak'

3 Tuil' sati ri kaw peue ut' hk'a' ruim cawo' yeuh kan' kuing' mae' nang kue' an' nya na' ce. Kah peue leuceng leukah' ce na' mae' rangraen ri kaw yeuh ku' chak' na',² pawlaee peusah' nyoe peue, leumeus' hk'a' cumyen' na', yeuh ri yawng hpum' peue, yeuh ri hpum' onawn' ri peue gawm' euc' reu'.

³Kopti nanggal' aen' na e' ku tawn meuh peue nga' suisa, un' cang leuceng ri ti, kleuc' hk'a' ri, ta' nha',

hot' hk'a' ren' kaw n' ku ceu. E' a'yu im' hk'a' naee ku' rai na', hkoe' mang' puri, pereng puri mae' ces ri puri.⁴Daecti yam hk'a' tukyak mae' hk'a' leumeus' keus Eun Peucawo' Cawo' teum' kawm htut e' lawtpon na' puc a ri lih na',⁵Eun kaw teum' kawm htut e' lawtpon. Aen' a hkuin' meuh kopti yeuh e' ku' leupaws seumeu' na', daecti a meuh kopti hk'a' tukyak Eun na'. Eun teum' kawm htut e' lawtpon ri hk'a' saic' seunga' ka tang keut' hk'u' na' mae' hk'a' tang hpanpleng' hk'u' e' hk'a' naee Cit' seunga' chak' na'.⁶Eun buit Cit' seunga' chak' na' ri e' htonnuk ri Yesu' Hkrit Cawo' teum' kawm htut e' lawtpon na' Eun.⁷Aen' a meuh punta yam pun e' ri sawn' ri meuh peue leupaws seumeu' na', e' kaw keut' ri meuh peue suip' sin', kue' vang keutui' hpum' cit' tip a'yu tip cot' cu na'.⁸Leukah' lah' ri ing' aen' a meuh leukah' hk'o' yum' nyawk'. Punta peue yum' Peucawo' Eun na' kaw ce co' ca' ri yeuh ku' chak' na', mi na' sangsawn' lawng aen' a ri ce meulamlam ri reu'. Ceu nang aen' ce meuh a ku' chak', a kue' peuehot' pun peue gawm' euc'.

⁹Daecti vel un' htuk' un' lung nga' o' ri puri kop lawng ceuhkeu' na' mae' htu' hting' puri, kleuc' leumeul puri kop lawng leukah' ritroe na' ce reu'. Kopti ceu nang aen' ce un' kue' a peuehot', a un' kue' ngos.¹⁰Tuil' sati eun peue yeuh peue gvah muk gvah cum puri na' eun nanggal' ti pok, hawc' ko' tang tuil' sati eun lal' pok ti pok. Hawc' ka na', pawlaee yeuh a' mawo eun bae.¹¹Peue yeuh keutit' na' meuh eun peue un' seun' peue ri, eun lheu' ri map', ku' yeuh eun na' a lak' taws' a' mu ri heun meun, mi pen' yawng a meulamlam ri.

Leukah' tisut'

¹²Atemas' eun un' lah' Tai' hki' kas' eun un' lah', yam cus' ui' eun ing' rot ri mi na', co' ca' mi ing' hk'eup' ui' nang veng Ni' hko' polis' na' vaeveae aw. Kopti kuit ui' ri kaw ut' nang veng awn' a rot ti yam kawt' na' pon ka.¹³Yam Yenas' ku' meuh peue yeuh kan' ritroe kuing' mae' Apaw' lu long ka hk'a' na', hk'o' mi teum' kawm ka seun' ku' yeuh pun mi na', pawlaee va ka kue' ku' cuthkuin' saec' ti ceu.¹⁴Peue e' na' ce htuk' ri rin lawng tan tu' ri yeuh ku' chak' na', punta kaw ce cang tuil' ku' lo' peue vang a'yu im' ri ku seunyi na' mae' kaw ce un' cang meuh peue un' pli' na'.

¹⁵Peue ut' mae' ui' na' ce ku peue, ce ku tawm' a ce lah' ri leunyeng ri mi. Peue leumeus' e' hk'a' naee hk'a' yum' na' ce, lah' ce mhawng' leunyeng ui' ri ce. Kah

mun' sin' Eun Peucawo' na' kue' ri pe' gawm' euc'
reu'.

Hpi'le'mon

Htawm tem'ri tuil'ri Hpi'le'mon Eun

1 Htawm ti ok'aen'na ko', meuh ui' Paw'lu ku' pun ri ut' nang htawng' pun Yesu' Hkrit Eun, awng'e' Ti'mo'se,

ya tem'ri tuil'a ri Hpi'le'mon ku' meuh a'mawo leumeus'ya na'mi,² ri Ahpia ku' meuh awng'beun'e'na'ka, ri Ahki'pas'ku' peung'suik'mae'ui'na'mi mae'muk kon'Hkrit hk'om puri nang nya mi na'pe'.

³Kah mun'sin'mae' hk'a' kuit nyawk' kuit sam'ran cumyen' lih neum Kuing' Peucawo'e'na' Eun mae'neum Cawo' Yesu' Hkrit Eun na' kue'ri pe'reu'.

Hk'a'yum' hk'a'leumeus'keus eun Hpi'le'mon

^{4,5}Kopti pun ui'ri mhawng' hk'a'yum' mi Cawo' Yesu' Hkrit Eun na' mae' hk'a'leumeus'keus mi peue Eun Peucawo'na'ce gawm'euc'na', saec'meuh yamnhaw'yam hk'o'ui'mun'pun mi na', ui'mun'keuting ri Peucawo'Eun laleung.⁶ Punta kaw mi gawm yawng ku'chak'kue'e' hk'a'naee Hkrit Eun na'ku ceu ka na', ui' hk'o'mun'pun kaw mi un'kaw' reng aet'gvah hk'a'yum' mi na'ri peue.⁷ Awng'ui'na'mi, hk'a'leumeus'keus mi na'yeh ka ui'kue'kaw' reng ren'kawn kuit sam'ran nyawk', kopti yeh mi peue Eun Peucawo'na'ce hpum'sam'ran na'.

Paw'lu hk'o'hk'ang eun pun Onesimas'eun

⁸Kop awn'na hk'a'naee Hkrit Eun ui'saec'na'hat'ri tawm' leukah'ku'htuk'mi ri yeh na'ri mi ko',⁹ daecti hk'a'naee vang hk'a'leumeus'keus na'ui' hk'o'a ri mi. Ui'meuh Paw'lu, meuh peue kawt. Maet'maen'ui'ku meuh peue htawng'pun Yesu'Hkrit Eun.¹⁰ Pun kon'ui' Onesimas'†eun, ui' hk'o'hk'ang a ri mi. Keut'eun ri meuh kon'ui'yam buih ut'ui'nang htawng'na'.¹¹ Nanggal'aen'na, eun saec'na'un'

ku'ku'peuehot'pun mi ko', daecti maet'maen'eun ku'ku'peuehot'pun mi mae'pun ui'yeut.

¹²Kaw ui'tang cus'ku'meuh meul'bhum'ui'na'eun keutah ing'ri mi.¹³ Punta kaw eun teum'kawm ui'tang'mi ri yam buih ut'ui'nang htawng'pun leukah'mun'ren'kawn na', ui'saec'kawn'sum'kah eun ut'mae'ti,¹⁴ daecti cu un'nang pun ui'ahkvang ka ri mi na', ui'hkuin'nang sum'yeh keunhaw'. Punta ku'tuil'mi ku ceu na'kaw a meuh ku'sahpaw'mi ri tuil'na', a kaw un'meuh ku'tec'teng na'.¹⁵ Hk'akcak'eun mi ti vut ti yam na', na'a chak'meuh kaw eun ut'mae'mi cot'cu na',¹⁶ a hkuin'laee meuh htan mhai', daecti a chak'hk'ai'mhai'na', a meuh ec'awng'leumeus'. Heun ri, leumeus'ui'eun nyawk', jaen kaw mi leumeus'eun lheu'ui'ri, leumeus'hk'a'naee meuh eun peue mae'meuh eun ec'awng'hk'a'naee Peucawo'Eun na'.

¹⁷Kop awn'na, mi lawn sawn'ui'meuh a'mawo cum ri ko', hk'o'mi rap ri ti eun seun'kaw mi rap ri ti ui'ri na'yeut.¹⁸ Eun lawn yeh ku'kleuc'ri mi, a'ko'kue'ku'ma ti ri ceu ri mi ko', sawn'ri ti a ri ui'reu'.¹⁹ Ui'ri, meuh ui'Paw'lu. Ui'tem'htawm aen'na ri ti'ri meun. Kaw ui'sai'ku'ma awn'a ri mi, ku'ma'yu ma mi ri ui'na'ui'hkuin'kaw lah'a rot ri ka.²⁰ Awng', sum'pun ui'ku'kue'peuehot'mae'mi ngon'hk'a'naee Peucawo'Eun. Kah hpum'ui'a sam'ran cumyen'hk'a'naee Hkrit Eun reu'.²¹ Kopti yum'ui'kaw mi leuceng leukah'ui'na', ui'tem'ri bu'htawm ri mi. Yawng ui'kaw mi yeh a lheu'hk'ai'ku'hk'o'ui'na'yeut.

²²Ti ceu ka na', hk'o'mi rangraen hkawng vang it'pun ui'. Kopti na'ui'lih hk'ai'htawng', ui'keutui'hpum'ri na'tanging'ri pe'seun'hk'o'pe'mun'na'.

²³E'pafas', a'mawo ui'ku'meuh peue htawng'hk'a'naee Yesu'Hkrit Eun na', tawm'eun a eun lah'ri leunyeng ri mi.²⁴ Ku'yeh kan'mae'ui'Maku', Ari-tahkas', Demas'mae'Lu'ka ce ku tawm'a ce lah'ri leunyeng ri mi.

²⁵Kah mun'sin'Eun Cawo' Yesu'Hkrit na' kue'hk'a'naee hpum'pe'reu'.

† Vangdoh'ka Onesimas'na'a meuh "kue'ku'peuehot'".

Hebrae'

Kon' ai' Peucawo' na' keuting Eun hk'ai' in' hpom na' ce

1 Leumah' Peucawo' leukah' Eun mae' a' ta' a' ya e' na' ce ri cu Eun peue suip leukah' ri na' ce heun' hk'a' heun' pok. 2 Daecti hk'a' naee meuyam tisut' aen' na, Eun leukah' mae' e' ri cu Eun Kon' ai' ri ku' tang' Eun ri uin' Eun meuh nang kaw suip ri u' peung ku ceu gawm' euc' na' Eun. Eun cu Kon' ai' ri na' Eun hpanpleng' sa' pahta' na' gawm' euc' ka. 3 Kon' ai' na' meuh Eun ceng' ka munhpung' Eun Peucawo' na'. Hk'a' ku ceu na' Eun seun' Peucawo' Eun. Eun rokxa' ku ceu gawm' euc' na' ri leukah' ti' ca keuting ri na'. Hawc' saic' Eun ri tec map' peue na', Eun mok' hk'a' ti' a' tawm' Eun Cawo' ti' ca keuting ka kuing' pang mao' na' Eun. 4 Kop awn' na, Kon' ai' na' keuting Eun hk'ai' in' hpom na' ce, kopti muis pun Eun ri rap ri ti na' lhung' a' hk'ai' muis ce in' hpom na'.

5 Kopti Peucawo' tawn lah' Eun,
"Meuh Mi Kon' ai' Ui',
seunyaen' Ui' meuh Kuing' Mi hawc'" †,
a' ko'

"Kaw Ui' meuh Kuing' Eun,
Eun kaw meuh Kon' ai' Ui'."

Daecti Eun hkuin' duing lah' a' yeuh keutit' ri in' hpom na' ce saec' ti peue. 6 Lheu' awn' na, yam tuil' Eun Kon' ai' ri na' Eun lih pang bhen' keute' na', Eun lah',
"Kah in' hpom Peucawo' na' ce faee' Eun gawm' euc' reu'." ††

7 Peucawo' Eun lah' lawng ce in' hpom na' yeuh keutit',
"Ui' yeuh in' hpom ri na' ce meuh guil',
yeuh mhai' ri na' ce meuh piu' ka ngawl na'." ‡

8 Daecti Eun lah' lawng Eun Kon' ai' na' yeuh keutit',
"Peucawo', tenceo' Mi na' kaw a keutawn' cot' cu ri.
Mi kaw u' peung kuing' ri na' ri hku' ji ka hk'a' leupaws seumeu' na'.

9 Mi leumeus' ku' leupaws seumeu' na', Mi ces ri ku' rai na'.

Kop awn' na, Peucawo' Cawo' Mi na', Eun tang' Mi hk'a' pang a' mawo Mi na' ce

ri lhuik' Mi ri lamawn ka hk'a' ren' kaw na'." ††

10 Hawc' ko', Peucawo' Eun tang lah' a' ri Kon' ai' ri na' Eun,

"Peucawo', tang' neum yamla ri na' hpanpleng' Mi bhen' keute' na',

mao' na' a' meuh laimui Mi.

11 Ceu nang awn' ce kaw lulaic heul', daecti Mi kaw keutawn' seupit.

Ceu nang awn' ce kaw baet ri hk'im' heul' seun' hk'eung na' ko'.

12 Mi kaw bawl' ceu nang awn' a' huk' seun' bawl' hk'o dal' na'. Ceu nang awn' a' kaw pun ri leuploh' ri seun' hk'eung na', daecti Mi kaw keutawn' seupit. Chi' neum Mi na' a' hkuin' kaw laee sut'." ††

13 Peucawo' tawn lah' Eun,

"Mok' hk'a' a' tawm' Ui' na'
rot ti yeuh Ui' ransu Mi na'
ce meuh vang tang' cung Mi." †††

Eun hkuin' duing lah' a' yeuh keutit' ri in' hpom na' ce saec' ti peue.

14 In' hpom gawm' euc' na' meuh ce cit' ku' Peucawo' cus' Eun ce heul' yeuh mhai' ce peue kaw pun ri rap ri ti hk'a' htut lawtpon na' meuh sin' ri na' ce, un' meuh ka aw?

Tuil' sati kaw ti lawng pun ri mhawng' na' seucen

2 Kop awn' na punta kaw e' un' cang seungai leukah' aen' ce heul' na', e' na' htuk' ri gawm ti ku' pun e' ri mhawng' leuceng na' seucen. 2 Kopti leukah' ku' Peucawo' kah Eun in' hpom ce lah' na' a' lawn meuh ku' neum, mae' peue yeuh ku' kleuc' un' leuceng ri ti leukah' awn' a' na' ce lawn kaw pun hk'a' ciyang na' kuing' mae' ku' yeuh ce na' ko', 3 e' lawn un' rap ri ti hk'a' htut lawtpon keuting seun' aen' na ko', e' ci' kaw cang pon yeuh sa' nhaw'? Tang' neum yamla ka na', Peucawo' pao' meun Eun lawng hk'a' htut lawtpon aen' na. Peue pun ri mhawng' a' ri Heun na' ce tang htawhka' a' ri e'. 4 Saec' meuh Peucawo'

† Suk' seun' 2:7; 2 Samoela' 7:14; 1 Rasavang 17:13 †† Saw' leukah' mun' 32:43 ‡ Suk' seun' 10:4:4

†† Suk' seun' 45:6, 7 ††† Suk' seun' 102:25-27 †††† Suk' seun' 101:1

Eun meun, Eun ku htawhkam a ri yeuh Eun het' keuting, ku' hk'o' am', lo' ti' ca ri yeuh heun' ceu mae' tuil' Eun lapsawng' Cit' seunga' chak' na' hot' alo Eun na'.

Cawo' teuk' va heul' ri hk'a' htut

⁵Ku' buih lah' e' lawng bhen' keute' kaw'n' kaw in-g' na', Peucawo' Eun hkuin' kaw tuil' in' hpom na' ce u' peung a. ⁶Daecti peue ti peue hkam' eun sa' hki' nang htawm Seunga' na' ti duih' yeuh keutit',

"Peue na' Eun ci' meuh a' nhaw', Mi vae' kuit rot ri Heun?

Kon' ai' peue na' Eun ci' meuh a' nhaw', Mi vae' keung ri Heun?

⁷Mi hpanpleng' Eun tem hk'ai' in' hpom na' ce peunaeng' ti vut ti yam †.

Mi tuil' Eun cuip' munhpung' na' seun' cui' maw hk'il' na' ko'.

⁸Mi yeuh ku ceu gawm' euc' na' ce ut' hk'a' ruim ka dak cung Eun na'." ††

Lah' ku ceu gawm' euc' na' ut' hk'a' ruim ka ti' ca Eun na' ko', Peucawo' Eun hkuin' laee uin' a kue' ku' un' ut' hk'a' ruim ka ti' ca Eun na' saec' ti ceu. Daecti saec' meuh maet' maen' na', e' hkuin' nang nyu ku ceu gawm' euc' na' ut' a hk'a' ruim ka ti' ca Eun na'.

⁹Daecti e' pun ri nyu Yesu' ku' Peucawo' uin' Eun tem hk'ai' in' hpom na' ce peunae' ti vut ti yam na' Eun, maet' maen' Eun pun ri cuip' munhpung' na' seun' cui' maw hk'il' na' hawc', kopti pun Eun ri hkam' ku' tukhka na' ri pun Eun ri yeum na'. Kopti meuh a mun' Eun Peucawo' na', Eun pun ri cim hk'a' yeum na' pun peue ku peue.

¹⁰Ku ceu na' meuh a is' Eun Peucawo', ku ceu gawm' euc' na' Eun hpanpleng' a ri ti' ca ri na'. Kop awn' na, yam yeuh Eun Yesu' Eun htonnuk ri hkam' Eun hk'a' tukhka na', cawp' ka. Yesu' Eun va kon' Eun Peucawo' heun' peue na' ce ing' pun hk'a' htut lawtpon na' mae' ing' pawng' ri hk'a' nae' munhpung' Eun na'. ¹¹Cawo' ku' yeuh peue seunga' chak' na' Eun mae' peue yeuh Eun seunga' chak' na' ce ing' meuh peue nya peue hk'ul' ti nya. Kop awn' na, Yesu' Eun un' kaic ri kaw ri klawng ce meuh ec' awng' ri. ¹²Eun lah', "Kaw Ui' ris ec' awng' ri na' ce mhawng' muis Mi na'.

Ui' kaw cai suk' seun' Mi nanggal' ka vang hk'om na'." ‡

¹³Eun suip ri lah',

"Kaw Ui' han' mae' Heun." †† Hawc' ko',

† A'ko', tem hk'ai' in' hpom na' ce peunaeng'. †† Suk' seun' 8:4-6

‡ Suk' seun' 22:22 †† I' saya' 8:17

Eun tang lah',

"Ui' ri mae' kon' hk'i Peucawo' tuil' Eun ri Ui' na' ut' ye maen' hawc'." ††

¹⁴Kopti kon' hk'i na' peus ce nham' keune ri na', Eun ku ing' peus nham' keune na' mae' ce yeut. Punta kop-ti meuh a hkam' Eun ri yeum na', Eun kaw cang yeuh seuca' cawo' u' peung ti' ca ka hk'a' yeum na' lulaic heul', ¹⁵mae' punta kaw Eun plo' peue meuh mhai' vang a' yu im' ri kopti meuh a lhat' ce ri hk'a' yeum na'. ¹⁶Kopti neumneum ka na' ko', hpaw Eun ca' kaw lih teum' kawm in' hpom na' ce, daecti lih teum' kawm Eun ceucat eun Abraham na' ce. ¹⁷Kop awn' na punta kaw Eun meuh peue jhawp' rit keuting htonnuk ri hk'a' cang tukyak na' mae' kati keutawn' hk'a' nae' yeuh mhai' Eun Peucawo' na' mae' punta kaw Eun saic' ri tec map' ce peue na', Eun kaw kah ri seun' ec' awng' ri na' ce hk'a' nae' hk'a' ku ceu na'. ¹⁸Kopti yam hk'eup' Eun ku' cop' long na', Eun pun ri hkam' hk'a' tukhka na' meun. Kop awn' na, Eun cang teum' kawm peue buih hk'eup' ku' cop' long na' ce yeut.

Yesu' kue' Eun munhpung' keuting hk'ai' Mo' se eun

³Kop awn' na ec' awng' seunga' chak' ku' pun ri pawng' ri klawng ri neum kuing' pang mao' mae' ye tiduih' na' pe', kuit rot yawo ri Yesu' ku' meuh peue cae' meuh peue jhawp' rit keuting yum' e' na' Eun laleung reu'. ²Seun' Mo' se kati keutawn' eun ri ku' to' ri nya Eun Peucawo' ku ceu ka na', Yesu' Eun ku kati keutawn' ri Peucawo' Cawo' tang' ri uin' Eun na' Eun. ³Seun' cawo' pleng' nya na' kue' eun munhpung' heun' hk'ai' lhang' ka nya na', Yesu' Eun ku kuing' ri pun munhpung' heun' hk'ai' Mo' se eun na' a pucti glih' gleueng'. ⁴Kopti nya ku lhang' na' kue' ka cawo' pleng', Peucawo' Eun meuh Cawo' hpanpleng' ku ceu na' ce. ⁵Mo' se kati keutawn' eun ri hk'a' yeuh eun kan' mhai' ka nya Eun Peucawo' na' ku ceu ka. A meuh sa' hki' ka leukah' kaw lah' ri hk'a' nanggal' na'. ⁶Daecti Hkrit kati keutawn' Eun ri meuh ri Kon' ai' Cawo' u' peung nya Eun Peucawo' na'. E' lawn keutawn' hk'a' nae' hk'a' hat' han' ri na' mae' hk'a' nae' vang keutui' hpum' ti fung ri na' ko', e' ku meuh nya Eun yeut.

Tuil' sati ri lawng hk'a' un' yum'

⁷Kop awn' na, hot' ku' lah' ka Cit' seunga' chak' na',

†† I' saya' 8:18

“Seunyaen', pe' lawn pun ri mhawng' leukah' Eun na' ko',

⁸ pawlaee yeuh hpum' ri cen' seun' yam fuin,

yam long ri nawk nang vang hk'oh' hk'oeng' na'.

⁹ Teh' na', a'ta' a'ya pe' na' long ce ri nawk Ui', ce pun ri nyu ku' yeuh Ui' na' un' htawt' un' deut pun pun' kul' neum.

¹⁰ Kop awn' na, Ui' seungeueng' ri peue cu awn' ce. Ui' lah', 'Hpum' ce na' a kleuc' hk'a' ri laleung, ce un' yawng hk'a' Ui' na'.

¹¹ Kop awn' na, Ui' hkam' a hk'a' naee seungeueng' ri, 'Ce hkuin' kaw laee kue' seunyi kaw lec hk'a' keului' Ui' na'.'[†]

¹² Ec' awng' na' pe', punta hpum' rai map' na' kaw a un' cang kue' hk'a' naee hpum' pe' na' mae' punta kaw pe' un' yum' hawc' ko' hpawt' ri tec hk'a' Eun Peucawo' Cawo' a'yu im' na' saec' ti peue na', uin' sati ri reu'. ¹³ Punta hk'a' naee pe' na' kaw pe' un' cang lheu' leukah' kopti meuh a hk'a' cu' ka map' na' saec' ti peue na', tuil' kaw' reng puri ku seunyi keuyuit rot ti kaw' lah' pe' "Seunyaen'" na' reu'. ¹⁴ E' lawn hpum' keutawn' tang' ri kleum' ka rot vang tisut' ka na' ko', e' pun ri pawng' ri mae' Hkrit Eun. ¹⁵ Seun' tawn lah' a ri,

“Seunyaen', pe' lawn pun ri mhawng' leukah' Eun na' ko',

pawlaee yeuh hpum' ri cen' seun' yam fuin na'." ^{††}

¹⁶ A ci' meuh a'nhaw' ku' pun ri mhawng', daecti ce kaw' fuin ri na'? Meuh a peue Mo'se teuk' va eun ce pucti neum kuing' E'ji'tu' na' ce, un' meuh ka aw? ¹⁷ A ci' meuh a'nhaw' ku' seungeueng' Eun ri ce pun pun' kul' neum na'? Meuh a peue yeuh map' tec tu' yeum ri nang vang hk'oh' hk'oeng' na' ce, un' meuh ka aw? ¹⁸ A ci' meuh a'nhaw' ku' Peucawo' tang' Eun kati ri ce na' a lawn un' meuh peue yum' Eun na' ce ko', ce kaw un' laee pun ri lec hk'a' keului' Eun na'? ¹⁹ Kop awn' na, e' pun ri nyu peue awn' un' cang lec ce a, kopti un' yum' ce na'.

Seunyi keului' ri cumyen' pun ce peue Eun Peucawo'

4 Kop awn' na, kopti kati kaw lec hk'a' keului' Eun na' kaw' kue' ka na', kah e' uin' sati ri meuh lamlam ri un' kah a'nhaw' chat hk'a' keului' aen' na saec' ti peue. ² Kopti pun e' ri mhawng' leukah' mun' ren' kaw' na' seun' peue awn' ce yeut. Daecti leukah' pun ce ri mhawng' na' un' kue' a mun' pun ce, kopti

peue pun ri mhawng' awn' un' yum' ce ku' lah' Eun Peucawo' na'. ³ Maet' maen' peue yum' na' e', pun e' ri lec hk'a' keului' na' hot' seun' ku' lah' Eun Peuca-wo' na' yeuhki',

“Kop awn' na, Ui' hkam' a hk'a' naee seungeueng' ri, 'Ce hkuin' kaw laee kue' seunyi kaw lec hk'a' keului' Ui' na'.'[‡]

Eun saec' hawc' kan' ri na' tang' neum yam hpanpleng' Eun bhen' keute' na'. ⁴ Kopti ton ku' seubu na' lah' Eun lawng ka seunyi a' res na' yeuhki', “Nang seun-ya' res na', Peucawo' keului' Eun kan' ri na' gawm' euc'." ⁵ Lah' Eun a hk'a' tuh na', “Ce hkuin' kaw laee kue' seunyi kaw lec hk'a' keului' Ui' na'." ^{##}

⁶ Punta peue ngon' na' kaw ce pun ri lec hk'a' keului' na', kaw' kaw a kue' hk'a' ka. Peue tawn mhawng' leukah' mun' ren' kaw' nanggal' aen' a na' ce un' pun ri lec, kopti un' yum' ce. ⁷ Kop awn' na, Peucawo' Eun tang' ri uin' seunyi ka na' baee, a lah', “Seun-yaen'". Hawc' awn' na ling' lang' na', Eun cu Davit' eun seun' ku' tawn lah' ri uin' ri nanggal' na' yeuhki',

“Seunyaen', pe' lawn pun ri mhawng' leukah' Eun na' ko',

pawlaee yeuh hpum' ri cen'." ^{##†}

⁸ Kopti Yaw'su' eun lawn na' tuil' ce lec hk'a' keului' na' hawc' ko', hk'a' kui' ka na' Peucawo' Eun ku na' un' laee lah' a rot ti seunyi seubu ti seunyi na'. ⁹ Kop awn' na, seunyi ka hk'a' keului' pun peue Eun Peuca-wo' na' ce a kaw' kue'. ¹⁰ Kopti peue pun ri lec hk'a' keului' Eun Peucawo' na' ce kaw pun ri keului' ri hk'ai' kan' ri na' seun' Peucawo' keului' Eun kan' ri na' ko'. ¹¹ Kop awn' na, punta a'nhaw' kaw a un' hot' ri yeuh seun' ku' yeuh ce peue un' yum' na' saec' ti peue na', kah e' co' ca' ri lec hk'a' keului' awn' a ri hk'a' ku ceu na' reu'.

¹² Kopti leukah' Eun Peucawo' na' a'yu im' ka mae' ti' ca keuting ka. A lawm hk'ai' leungawng lawm lal' plak' na' ku hten' ka. Saec' meuh hpum' mae' civit, seuang' jhawng' mae' gawl nang seuang' na' a sawt' a roc'. A nyu yawng kamkuit mae' a' cang' ka hpum' na'. ¹³ Ku' hpanpleng' Eun na' a hkuin' kue' ku' cang mo' ri ri sai' ngai' Eun na' saec' ti ceu. Ku ceu na' a kaw tuh' ri glih' gleueng' pucti mae' ngai' Eun Cawo' ku' kaw e' kah ri ris Eun mhawng' na'.

[†] Suk'seun' 95:7-11^{††} Suk'seun' 95:7, 8

[‡] Suk'seun' 95:11^{‡†} Yamla 2:2^{‡‡} Suk'seun' 95:11^{‡‡‡} Suk'seun' 95:7, 8

Yesu', Peue jhawp' rit keuting

¹⁴Kopti kue' e' peue jhawp' rit keuting nang keuting nyawk' ku' tawn lec kuing' pang mao' hawc' na', Eun meuh Yesu' Kon' ai' Eun Peucawo', kah e' jhawp' hk'a' yum' ku' pao' e' hawc' na' keutawn' pawh.

¹⁵Kopti kue' e' peue jhawp' rit keuting Eun un' cang tukyak un' cang nyu vang kaw' reng kloe e' na' ce, a hkuin' yeuh keutit'. Daecti kue' e' peue jhawp' rit keuting Eun pun ri hkam' hk'a' cop' long na' ku ceu se-un' hkam' e' a na', daecti Eun hkuin' kue' map'.

¹⁶Kop awn' na, punta yam lo' e' na' kaw e' pun ri rap ri ti hk'a' tukyak Eun na' mae' pun ri hk'eup' mun' sin' Eun ku' kaw a teum' kawm e' na', kah e' sat ri ing' de tenceo' ka mun' sin' Eun na' ri hpum' keutawn' ri na' pawh.

5 Peue jhawp' rit keuting na' ce ku peue leuk ce ri neum peue na' ce. Ce pun ri tang' ri uin' ri meuh nang kaw yeuh kan' to' ri Peucawo' Eun pun peue. Ce tan lapsawng' mae' hk'eung tan na' pun map' na'.

²Peue jhawp' rit keuting na' kopti ce ku kaw' reng kloe yeut, ce kaw kah ri tukyak ri peue un' yawng mae' peue kleuc' hk'a' ri na' ce. ³Kop awn' na, peue jhawp' rit keuting na' ce ku kaw kah ri tan ku' tan pun map' ri na' meun seun' map' ce peue seubu na' yeut.

⁴A'nhaw' hkuin' cang yeng ri ti an' nya kue' munhpung' aen' a meuh is' ti. Eun kaw kah ri meuh ku' Peucawo' klawng Eun ri ti na' seun' Aron rap eun ri ti na'.

⁵Kop awn' na, saec' meuh Hkrit Eun hkuin' tang' tu' ri na' lhung' keuting ri rap Eun ri ti munhpung' ka meuh peue jhawp' rit keuting na'. Daecti Peucawo' Eun lah' a ri Heun,

“Meuh Mi Kon' ai' Ui'.

Seunyaen', meuh Ui' Kuing' Mi hawc'.”††

⁶Ton seubu na' Eun lah',

“Meuh Mi peue jhawp' rit cot' cu

seun' Melhkisedek' eun ko'.”‡

⁷Yam Yesu' ut' Eun pang bhen' keute' na', Eun tan leukah' hk'o' mun' mae' leukah' hk'o' hk'ang ri na' ri seng' laws' ri mae' leuum' ngai' hk'uic' ri na' ri Peucawo' Cawo' cang teum' kawm Eun pon hk'a' yeum na' Eun. Kopti Yesu' leuceng Eun ri ti Peucawo' Eun hk'a' nae' vang hkopyawm' yumyam' ri na', Peucawo' Eun leuceng leukah' Eun na'. ⁸Eun saec' na' meuh Kon' ai', Eun ku rin ri pun kaw leuceng ri ti na' ri hk'a' tukhka hk'eup' ri na'. ⁹Kopti Peucawo' yeuh Eun Yesu' Eun htonnuk hawc' na', Yesu' Eun ku meuh Cawo' htut cot' cu pun ce peue leuceng ri ti Eun na' ce gawm' euc'.

† A'ko' tuil' Ui' Mi keut' hawc'. †† Suk' seun' 2:7‡ Suk' seun' 110:4

¹⁰Peucawo' Eun tang' ri uin' Eun meuh peue jhawp' rit keuting seun' Melhkisedek' eun ko'.

Tuil' sati kaw un' kleuc' hk'a' ri

¹¹Lheu' ui' ri ku' kaw lah' ri lawng aen' na, daecti kopti yak rin pe' ri pun a na', a nyhap' ri ris pe' mhawng' a nyawk'. ¹²Neumneum ka na' ko', ling' lang' a peunaw' hawc' na' htuk' pe' ri meuh seura' hawc'. Daecti kaw' kaw pe' lo' peue sangsawn' lawng kleum' ka leukah' neumneum Eun Peucawo' gawm' euc' na' ri pe' bae. Htuk' pe' ri kaw' nyui leuum' pui, un' meuh ku' hk'a' cen' na'. ¹³A'nhaw' lawn kaw' nyui leuum' pui na' ko', kaw' meuh eun o' ngak. Eun un' nang hueng' lawng sangsawn' ka leukah' leupaws seumeu' na'. ¹⁴Daecti ku' hk'a' cen' na' meuh ka pun ce nang keuting ku' hk'vuk' ri gvah ku' chak' ku' un' chak' na' ri tu' ri na' meun laleung na' ce.

6 Kop awn' na, kah e' hk'ah' kleum' ka leukah' sangsawn' lawng Eun Hkrit na' heul', e' na' lec htan ce nang keuting na' pawh. Lawng taws' hpum' fuin map' yeuh e' lec hk'a' yeum na' un' lah', lawng yum' Peucawo' Eun na' un' lah', ²lawng sangsawn' lawng rap ri ti hk'a' cum' na' un' lah', lawng tang' ti' ri na' un' lah', lawng tang kuh' im' na' mae' lawng taws' a' mu cot' cu na' un' lah', pawlae kah ui' gawm tang' kleum' ka na'. ³Peucawo' Eun lawn tuil' ahkvang ka na' ko', e' na' heul' hk'a' nanggal' pawh.

⁴Pun peue tawn leuceng pun a ceng' saec' na', peue tawn cim lapsawng' ka kuing' pang mao' na', peue tawn pawng' ri mae' Cit' seunga' chak' na', ⁵peue tawn cim leukah' chak' nyawk' Eun Peucawo' na' mae' tawn cim ti' ca kaw ing' cu nanggal' na', ⁶ce lawn kaw' kleuc' hk'a' ri heul' ko', a hkuin' kaw lae' cang tang ti ce ing' taws' hpum' fuin map' ri na' bae. Kopti ku' kleuc' ce na' tang tawk' a Kon' ai' Eun Peucawo' na' Eun pang kleum' rawng' tawp' na' bae ti pok. Ce yeuh ku' hk'o' kaic na' ri Heun nanggal' peue.

⁷Bhen' keute' ren' ri pun leuum' lhe' a cumcah laleung a tuil' pli' ku' seumal kue' mun' ri peue sang' na', pun a mun' neum Peucawo' Eun. ⁸Daecti bhen' keute' kaws kleum' kat' mae' bang' kat' na' un' kue' a ngos. A kaw hk'aws' hk'eup' hk'a' jha' na'. Vang tisut' ka na', a kaw hkam' hk'a' dum ti tec ri na'.

⁹A' mawo leumeus' ui' na' pe', ui' saec' na' lah' a yeuhki' ko', yawng ui' a neum ku' chak' lheu' awn' a na' kaw' kue' a pun pe'. A meuh ku' to' ri lawng hk'a' htut lawtpon na'. ¹⁰Peucawo' leupaws seumeu' Eun. Eun un' pil kan' ku' yeuh pe' na' mae' hk'a'

leumeus 'keus yeuh pe' Eun nyu na'. Awn 'a ko', a meuh hk'a' teum 'kawm pe' peue ceu Eun na', pe' na' suip ri teum 'kawm ce heul' baee. ¹¹Ku' sum 'is' ui' na' ko', punta ku' keutui' hpum' pe' na' kaw a meuh neumneum pe' kaw yawng a meuh lamlam ri na', pe' na' co' ca' ri yeuh ku' yeuh ri aen' a pucti lih rot tisut' ka ku peue ri reu'. ¹²Un' sum 'kah ui' pe' meuh peue keunah, daecti sum 'kah ui' pe' na' hot' rin ri ti neum peue cu hk'a' yum' ri na' mae' hk'a' yeun' hkam ri na' ce pun ri rap ri ti sin' hot' kati Eun peucawo' na' ce na'.

Kati Eun Peucawo' na' meuh ka neum

¹³Yam Peucawo' tuil' Eun kati ri Abraham eun na', kopti un' laee kue' Eun nang keuting hk'ai' ti kaw hkam' kati na', Peucawo' Eun cu tu' ri na' meun, Eun hkam' kati na'. ¹⁴Eun lah', "Kaw Ui' nap mun' na' ri mi neumneum. Ui' kaw kah mi kue' kon' hk'i ceucat heun' heun'." ¹⁵Kop awn' na, kopti Abraham yeun' hkam ko' eun na', eun pun ri rap ri ti hot' ku' Peucawo' yeuh Eun kati ri na'.

¹⁶Peue na' cu peue nang keuting hk'ai' ti, peue hkam' kati na'. Leukah' hkam' kati na' htawhkam a ku' lah' na' mae' a geut' leukah' htu' hting' puri na'. ¹⁷Kopti Peucawo' sum' kah Eun peue kaw pun ri rap ri ti sin' kati tang' Eun ri uin' na' ce yawng ku' keutui' hpum' ri na' un' leuploh' plin' a ri glih' gleueng' na', Eun htawhkam kati ri na' ri leukah' hkam' kati ri na'. ¹⁸Peucawo' yeuh Eun ki' na' meuh a punta peue hk'uih ing' jhawp' hk'a' keutui' hpum' tuil' Eun na' kaw e' kue' kaw' reng keuting nyawk' ri leukah' kati mae' leukah' hkam' kati un' cang leuploh' plin' ri kopti Peucawo' un' cang chi' lai Eun na'. ¹⁹Hk'a' keutui' hpum' kue' e' na' meuh a lhawk' lhac' vok' keutawn' un' laee cang yuing' yang' ka hpum' e' na'. Hk'a' keutui' hpum' aen' a lec hk'a' naee hkawng seunga' hk'a' kui' ka hpen' kang' na'. ²⁰Punta kaw e' cang lec a na', Yesu' Eun lec a tang' e' nanggal' e' hawc'. Eun keut' ri meuh peue jhawp' rit keuting cot' cu seun' Melhkisedek' eun ko'.

Melhkisedek' peue jhawp' rit

7 Melhkisedek' aen' meuh eun hkun' haw' hkam' ce veng Salem na'. Eun ku meuh peue jhawp' rit Eun Peucawo' Cawo' lhung' hk'ai' peue na'. Yam Abraham peueng' pe eun hkun' haw' hkam' na' ce hawc' eun keutah ing' na', Melhkisedek' eun hk'eup' Abraham

eun. Eun nap mun' ri heun. ²Hk'eung Abraham pun eun na' gawm' euc' ka, eun tan a kul' pun ti pun ri heun. Vangdoh' ka muis Melhkisedek' na' lah', "hkun' haw' hkam' ka hk'a' leupaws seumeu'" na'. Vangdoh' ka "Hkun' haw' hkam' ce veng Salem" na' lah', "hkun' haw' hkam' ka hk'a' cumyen'" na'. ³Makuiing' eun ka ci' meuh a' nhaw', eun ci' ing' neum ceucat a' nhaw' mae' a' yu eun na' a ci' tang' ri yamnhaw', a ci' sut' yamnhaw' na', a un' kue' htawm tem' ri uin' ka. Melhkisedek' eun meuh peue jhawp' rit seun' Kon' ai' Eun Peucawo' na' Eun cot' cu ri ko'.

⁴Melhkisedek' eun ci' pe keuting a' neng, kuit ri mhawng' a reu'. Saec' meuh Abraham a' ta' keuting e' na' eun ku tan hk'eung rim' eun ri pun ing' na' kul' pun ti pun ri heun. ⁵Leukah' ritroe na' tem' a ri kah ceucat peue Levi' ku' meuh peue jhawp' rit na' ce meuh nang rap ri ti kul' pun ti pun na' ri peue I' sarela' ku' meuh ec' awng' ce na' ce. Ec' awng' ce na' ce saec' to' ri ing' neum ceucat eun Abraham na'. ⁶Daecti Melhkisedek' aen' eun saec' na' un' to' ri ing' neum ceucat eun Levi' na', daecti eun pun kul' pun ti pun na' ri Abraham eun. Eun ku nap mun' ri Abraham ku' pun ri rap ri ti kati Eun Peucawo' na' eun. ⁷Hpaw a ca' kue' ku' kangkae, peue keuting na' eun ca' lak' nap mun' ri peue aet' na' eun. ⁸Peue jhawp' rit rap ri ti kul' pun ti pun na' kopti meuh ce peue na', ce kaw pun ri yeum. Daecti Melhkisedek' rap eun ri ti kul' pun ti pun na' htawm Seunga' na' a lah' eun kaw' na' a' yu im'. ⁹A ku lah' ti hk'a' ka na', Levi' ku' pun ri rap ri ti kul' pun ti pun na' cu eun Abraham eun, eun tuil' kul' pun ti pun na' ri Melhkisedek' eun. ¹⁰Kopti yam Melhkisedek' hk'eup' eun Abraham eun na', Levi' eun hkuin' nang keut', eun kaw' ut' hk'a' naee a' ta' keuting ri Abraham eun.

Yesu' seun' Eun Melhkisedek' eun

¹¹Ritroe peue jhawp' rit tuil' ce peue I' sarela' na', peue na' peue lawn na' cang ing' rot hk'a' naee hk'a' htonnuk Eun Peucawo' na' ri hot' ritroe peue jhawp' rit ce Levi' na' ko', a ci' meuh kop keunhaw' peue vae' kaw' lo' Peue jhawp' rit seubu Eun na' hot' seun' Melhkisedek' eun, un' hot' seun' Aron na' eun? ¹²Kopti hk'a' kaw meuh peue jhawp' rit na' a lawn plin' ri ko', leukah' ritroe na' a ku na' plin' ri yeut. ¹³Cawo' lah' a rot ri lawng aen' a na' Eun ko', ing' Eun neum ceucat seubu na'. Peue ing' neum ceucat aen' a na', a hkuin' nang duing kue' nang yeuh mhai' keunam ka vang dum ri tan na' saec' ti peue. ¹⁴Kopti pun e' ri nyu a glih' -

gleueng', Peucawo' e' na' suip Eun ri lih neum ceucat ce Yu' dah na'. Ceucat aen' na Mo' se eun un' nang duing lah' lawng peue jhawp' rit na' rot ri ka.¹⁵ Ku' lah' e' rot ri ka na' e' kaw gawm nyu a glih' gleueng', peue jhawp' rit seubu seun' Melhkisedek' na' Eun lawn tang pucti lih ko',¹⁶ meuh Eun peue jhawp' rit na' ri cu Eun hot' ritroe ce ceucat ri na', a hkuin' meuh, daecti meuh Eun peue jhawp' rit na' ri cu Eun ti' ca ka civit ku' un' cang lulaic na'.¹⁷ Hot' ku' lah' ri na',

"Meuh Mi peue jhawp' rit cot' cu seun' Melhkisedek' eun ko'."†

¹⁸Leukah' ritroe hk'im' na' pun a ri tec ri kopti kaw' reng kloe ka, a un' lae kue' a' co'.¹⁹ (Kopti leukah' ritroe na' un' cang yeuh a keunhaw' na' htonnuk saec' ti ceu.) Hk'a' keutui' hpum' chak' lheu' ku' cang teum' kawm e' sat ri ing' de Peucawo' Eun na' pun a ri tuil' ri hawc'.

²⁰Peucawo' Eun ku htawhkam lawng aen' na ri leukah' hkam' sa' hki' na'. Peue seubu na' ce keut' ri meuh peue jhawp' rit na' ri un' kue' ce leukah' hkam' sa' hki' na' saec' ti moeng,²¹ daecti Yesu' pun Eun ri meuh peue jhawp' rit na' ri leukah' hkam' sa' hki' yam Peucawo' lah' Eun a ri Heun,

"Peucawo' hkam' Eun sa' hki' hawc',
Eun hkuin' kaw lae leuploh' hpum' ri na',
'Kaw Mi meuh peue jhawp' rit cot' cu.'"††

²²Kopti meuh a leukah' hkam' sa' hki' aen' a na', Yesu' Eun meuh Cawo' htawhkam ka kati chak' nyawk' Eun Peucawo' na'.

²³Peue jhawp' rit ceucat Levi' na' suip ce ri yeuh kan' jhawp' rit na' ti cu hawc' ti cu heun' peue ing', kopti hk'a' yeum na' ham' tap ka ce un' cang yeuh kan' aen' na cot' cu.²⁴ Daecti kopti Yesu' a' yu im' Eun cot' cu ri na', Eun cang meuh peue jhawp' rit na' cot' cu.²⁵ Kop awn' na, peue cu Eun ce ing' ri Peucawo' Eun na' ce, Eun cang teum' kawm ce cot' cu, kopti a' yu im' Eun laleung na'. Eun hk'o' hk'ang pun ce.

²⁶Meuh ka peue jhawp' rit keuting yeuhki' na' Eun hawc', cang teum' kawm Eun ku' lo' e' na'. Eun meuh peue jhawp' rit seunga' chak', un' kue' vang ri, un' kue' ku' kleuc', hkvat' hkvawn peue map', pun hk'a' suk' seun' yuk ri lhung' hk'ai' kuing' pang mao' na'.²⁷ Yesu' Eun hkuin' lo' tan ku' tan na' ku seunyi seun' peue jhawp' rit keuting ku' seubu na' ce. Ce kah ri tan ku' tan na' pun map' ri na' meun nanggal', hawc' ko' ce kawn' tan ku' tan pun map' ce peue seubu na'. Yesu' tan Eun tu' ri na' meun meuh ku' tan pun map' ce peue gawm' euc' na' ti pok yawo a hk'o' hawc'.²⁸ Leukah'

ritroe na' tang' a ri uin' peue kaw' reng kloe na' ce meuh peue jhawp' rit keuting, daecti leukah' kati Eun Peucawo' ku' ing' hot' ka leukah' ritroe na' a tang' ri uin' Kon' ai' ku' htonnuk cot' cu na' Eun meuh Peue jhawp' rit keuting.

Peue Jhawp' rit keuting ka kati sat' ca' hk'u'

8 Lawng ku' lah' e' na' yeuh a ki', kue' e' peue jhawp' rit keuting yeuhki' hawc'. Eun mok' hk'a' ti' a' tawm' ka tenceo' Eun Cawo' ti' ca keuting nang kuing' pang mao' na'.² Eun yeuh kan' hk'a' naee vang hk'o' mun' seunga' ku' meuh tup' neumneum ku' Peucawo' tang' Eun na', a hkuin' meuh ku' tang' peue.

³Peue jhawp' rit keuting na' ce ku peue, pun ce ri tang' ri uin' ri tan lapsawng' mae' ku' tan na'. Kop awn' na, saec' meuh Peue jhawp' rit keuting awn' Eun ku kah ri kue' ku' tan yeut.⁴ Eun lawn ut' pang bhen' keute' na' ko', Eun hkuin' kaw pun ri meuh peue jhawp' rit. Kopti kue' a ri is' nang kaw tan ku' tan hot' leukah' ritroe tang' a ri uin' na' hawc'.⁵ Peue jhawp' rit awn' ce yeuh kan' hk'a' naee vang hk'o' mun' seunga' ku' pleng' ri seun' ruprang mae' a' lawng ka ku' kue' nang kuing' pang mao' na'. Kop awn' na, yam Mo' se kaw eun pleng' tup' vang hk'o' mun' na', Peucawo' Eun deun' sati eun "Pleng' a seun' ku' tuh' Ui' mi nyu pang gong na' ku ceu ka reu'."⁶ Daecti kan' Yesu' pun Eun ri rap ri ti na' a keuting hk'ai' kan' ce na'. Seun' awn' na, kati sat' ca' ku' Yesu' meuh Eun nang seuna' na' a ku keuting hk'ai' kati sat' ca' hk'im' na', a tang' ri pang kleum' ka kati sat' ca' chak' lheu' awn' na.

⁷Kopti kati sat' ca' nanggal' na' a lawn un' kue' vang ri ko', un' lae lo' ri sok kati sat' ca' ku' seubu na' bae.⁸ Daecti Peucawo' nyu Eun vang ri ka na'. Eun lah' a ri peue na' ce,

"Peucawo' pao' Eun yam awn' kaw a rot.

A meuh yam kaw Ui' tang' kati sat' ca' hk'u' ri peue ceu I' sarela' na' ce mae' peue ceu Yu' dah na' ce.

⁹A un' meuh kati sat' ca' tang' Ui' ri a' ta' a' ya ce yam teuk' Ui' ti' ce pucti heul' hk'ai' kuing' E' ji' tu' na', kopti un' keutawn' ce ri kati sat' ca' Ui' na' mae' Ui' hpawt' ri tec ce,

Peucawo' Eun pao' a yeuh keutit'.

¹⁰Aen' meuh a kati sat' ca' hk'u' kaw Ui' tang' ri peue ceu I' sarela' na' ce

† Suk' seun' 110:4 †† Suk' seun' 110:4

‡ Pucti heul' 25:40

yam kawn' kaw ing' na', Peucawo' Eun pao' a yeuh keutit'.

Ui' kaw seue' leukah' ritroe ri na' hk'a' naee hpum' ce na'.

Ui' kaw tem' a nang meul' bhum' ce na'.

Ui' kaw meuh Peucawo' ce,

ce ku kaw meuh peue Ui' yeut.

¹¹“Yawng Peucawo' Eun reu'”, peue hkuin' kaw laee suip ri sangsawn' peue ut' keunam caonao',

a'ko' ec' awng' ri na' ce,

kopti kaw ce yawng Ui' ku peue ri gawm'

nang aet' hk'ai' peue na' ce mae' nang keuting hk'ai' peue na' ce.

¹²Kopti kaw Ui' plo' map' rai ce na'

mae' Ui' kaw un' laee kuit rot ri map' ce na' bae.”†

¹³Eun lah' kati sat'ca' aen' a meuh “kati sat'ca' hk'u'”. Eun yeuh kati sat'ca' nanggal' na' meuh nang hk'im' ka. Ku' hk'im' na' un' ling', a kaw rai'.

Vang hk'o' mun' ka bhen' keute'

⁹ Kati sat'ca' nanggal' na' a kue' ritroe ka hk'a' hk'o' mun' na' mae' vang hk'o' mun' ka bhen' keute' na'.²Tup' nya hk'o' mun' na' pun a ri pleng' ri. Hkawng nanggal' na' a kue' bin' ngawl, kue' hpuin' mae' a kue' hkawomun' tan ri na'. Hkawng aen' a lah' ri meuh vang seunga' chak'.³Hk'a' naee ka hpen' kang' lal' hkawng ti hkawng na' a lah' ri meuh vang seunga' chak' nyawk' hk'ai' peue.⁴Hk'a' naee hkawng aen' a kue' ten hk'il' vang dum ri tan ku' hom' na' mae' a kue' teuk kati sat'ca' a kop ri ri hk'il' na'. Hk'a' naee ka teuk na' a kue' htam hk'il' seue' pli' mana', kue' hku'ji gluh' glom' eun Aron na'†† mae' a kue' glawk' seumu ka leukah' ritroe kul' moeng na'.⁵Hk'a' pang ka teuk na' a kue' ruprang ka hkerup' Eun Cawo' munhpung' keuting na'. Hk'ec' ka hkerup' na' a glas ri kuip hpa' ka teuk ku' meuh vang saic' ri tec map' na'‡. Daecti maet' maen', e' hkuin' kaw nang cang lah' lawng aen' a htonnuk.

⁶Aen' ce yam hawc' rangraen a ri gawm' euc' na', peue jhawp' rit na' ce lec ri yeuh kan' hk'a' naee hkawng hk'a' nok na' keuyuit.⁷Daecti peue jhawp' rit keuting na' eun koe, cang lec eun lal' hkawng ti hkawng ka na' neum ka ti pok. Eun kah ri ti ri heul' tan nham' pun tu' ri na' mae' pun map' yeuh peue yam un' pawn peue kui' ri na' ⁸Cit' seunga' chak' na' tuh' ka e' nyu cu yam tup' nanggal' na' kawn' kue' ka na', a hkuin' kue' hk'a' kaw ing' lec hk'a' naee hkawng seun-

ga' chak' nyawk' hk'ai' peue na'.⁹Aen' ce a meuh ruprang ka cu maet' maen' na'. Ku' sum' lah' ka na', lapsawng' na' mae' ku' tan awn' a hkuin' cang saic' hpum' cang yawng ce peue hk'o' mun' na'.¹⁰Ceu nang aen' ce a meuh yawo ku' hk'a, ku' nyui mae' ku' saic' hot' ritroe na'. A meuh hk'a' ka ku' yeuh hk'a' nok na', cu yam ku' hk'u'‡ na' un' nang rot ka na'.

Nham' Eun Hkrit meuh a ku' dum ri tan hk'u'

¹¹Yam Hkrit lih meuh Eun peue jhawp' rit keuting ka ku' chak' ku' ceu ku' rot maet' maen' hawc' na', Eun ing' lec hk'a' naee ka tup' chak' nyawk' htonnuk nyawk' lheu' ku' hk'im' na'. A hkuin' meuh ku' peue pleng' peue a ri ti' ri, a ku' hkuin' meuh is' ka bhen' keute' na'.¹²Eun hkuin' lec a ri nham' ka a'pe na', a'ko' nham' ka a' moe na'. Daecti Eun lec vang seunga' chak' nyawk' hk'ai' peue na' ri nham' ri na' meun. Eun yeuh a ki' ti pok yawo a hk'o', a ku' pun hk'a' htut lawtpon hk'ai' map' cot' cu na' ing'.¹³Nham' ka a'pe, nham' ka a' moe‡‡ a'ko' peuluing ka a' moe seuyang‡‡‡ ku' rawt' a ri peue un' seunga' chak' hot' ritroe na' ce, a saic' ri tec ku' un' seunga' chak' ut' hk'a' nok na'.¹⁴Lheu' awn' na, nham' Eun Hkrit ku' un' laee kue' vang ri ku' tan meun Eun ri Peucawo' Eun Cit' seunga' cot' cu Eun na', a jaen saic' ri tec ku' yeuh e' heul' ri hk'a' yeum na' hk'ai' hpum' cang yawng e' na', punta kaw e' cang yeuh mhai' Eun Peucawo' Cawo' a'yu im' na' Eun.

¹⁵Kop awn' na, punta peue Peucawo' klawng Eun ri ti na' kaw ce pun ri rap ri ti sin' cot' cu ku' yeuh Eun kati na', Hkrit Eun meuh nang seuna' ka kati sat'ca' hk'u' na'. Kopti punta Hkrit kaw Eun plo' map' yeuh ce hk'a' ruim ka kati sat'ca' nanggal' na', Eun pun ri sum a'yu ri meuh ngos ka hk'a' htut lawtpon na'.

¹⁶A lawn kue' licmat tem' ri uin' ri kaw tuil' sin' ko', kah ri yeuh ri yawng cawo' pleng' licmat na' yeum eun hawc'.¹⁷Kopti licmat kaw tuil' sin' na' kaw a cang lo' ri hawc' cawo' ka na' yeum eun na'. Yam cawo' ka na' kawn' a'yu im' eun na', licmat kaw tuil' sin' na' a hkuin' kaw nang cang lo' ri.¹⁸Kop awn' na kati sat'ca' nanggal' na' kaw a cang lo' ri na', a kah ri kue' nham'.¹⁹Yam Mo' se hawc' eun pao' ri peue gawm' euc' na' ce mhawng' leukah' ritroe ku' ceu na', eun ti ri hkawo' nham' ka kon' a' moe mae' nham' ka a'pe na' mae' leuum' na'. Hawc' ko', eun cup huik' seurak' ka kon' yung' na' mae' kak' ka yuim husop na' hk'a' - naee nham' na', eun rawt' a ri bawl' htawm na' mae'

† Yerami' 31:31-34†† Nang hk'i'17:8-10‡ Pucti heul' 25:16†† Ngon' a lah' a meuh vang mok' tuckyak.

‡‡ Ku' hk'u' lah' ka na', meuh a leukah' kati sat'ca' hk'u' Eun Yesu' na'.‡‡‡ Fae' 16:15-16‡‡‡ Nang hk'i'19:9,17-19

ri peue gawm' euc' na' ce.²⁰ Eun lah', "Aen' meuh a nham' ka kati sat' ca' ku' Peucawo' tuil' Eun leukah' ri pe', kah pe' roksa' a na'."†²¹ Seun' awn' na, eun ku rawt' nham' na' ri tup' mae' ri hk'eung lo' ri hk'a' - naee vang yeuh kan' ritroe na' ce gawm' euc'.²² Neumneum ka na' ko', leukah' ritroe na' tem' a ri kah ri saic' ku ceu na' ri nham' na'. A lawn un' kue' hk'a' nham' peuc' na', hk'a' plo' map' na' a ku un' kue'.

Yesu' tan Eun tu' ri ti pok yawo pun ku ceu na'

²³ Kop awn' na, ku' pleng' ri seun' ruprang ka ku' kue' nang kuing' pang mao' na' kah ri saic' a ri ku' tan aen' ce. Daecti is' ka kuing' pang mao' na' meun kah ri saic' a ri ku' tan chak' lheu' awn' na.²⁴ Kopti Hkrit hpaw Eun ca' lec nang nya hk'o' mun' pleng' peue ku' pleng' ri seun' ruprang ka ku' neumneum na', Eun seumeu' lec nang kuing' pang mao' na'. Maet' maen', ut' Eun nanggal' Eun Peucawo' pun e' gawm' euc' hawc'.²⁵ Peue jhawp' rit keuting na' ti eun nham' ku' un' meuh nham' eun meun na' lec vang seunga' chak' nyawk' hk'ai' peue na' ku neum. Daecti Hkrit Eun hkuin' lec nang kuing' pang mao' na' pun kaw Eun tan tu' ri na' ti pok hawc' ti pok seun' peue jhawp' rit keuting na' eun.²⁶ A lawn yeuh keutit' ko', Hkrit na' Eun chak' pun ri hkam' hk'a' tukhka na' heun' pok tang' neum yam hpanpleng' bhen' keute' na'. Daecti punta kaw Eun ti ri tec map' na' gawm' euc' ri tan Eun tu' ri na' meun meuh ku' tan na', maet' maen' puc Eun ri lih cu hk'a' naee yam tisut' na' ti pok yawo a hk'o'.²⁷ A seun' peue na' pun peue ri hkam' hk'a' tang' ri uin' ri kaw yeum ti pok yawo na' yeut, hawc' ka na' peue kaw pun ri hkam' hk'a' taws' a' mu na'.²⁸ Hkrit Eun ku tan tu' ri na' meun ti pok yawo punta kaw Eun saic' ri tec map' ce peue heun' na'. Eun kaw tang lih bae lal' pok ti pok. A hkuin' kaw laee meuh punta kaw Eun lih peus map' na', daecti a meuh punta kaw Eun lih tuil' hk'a' htut lawtpon na' ri peue buih ko' Eun na' ce.

10 Leukah' ritroe na' gup meuh ka a' lawng ka ku' chak' kaw ing' rot na', hpaw a ca' meuh ku' neumneum. Kop awn' na, ku' tan tan ce ku neum a un' laee kue' vang sut' vang hawc' na', a hkuin' cang yeuh peue ing' hk'o' mun' na' ce htonnuk.² Kopti a lawn cang yeuh pun a ko', na' ce un' laee suip ri tan ku' tan na' bae, un' meuh ka aw? Kopti peue ing' hk'o' mun' na' kaw ce pun ri saic' ri seunga' ti pok yawo a hk'o'. Ce hkuin' kaw laee hki' keung ri map' ri na' heul' bae.
³ Daecti ku' tan awn' meuh a ku' tuil' sati ka kuit rot ri

map' ri ku neum na'.⁴ Kopti nham' ka a' moe mae' nham' ka a' pe na' un' cang ti a ri tec map' na' pun.

⁵ Kop awn' na yam Hkrit lih Eun pang bhen' keute' na', Eun lah',

"Peucawo', hpaw Mi ca' sum' is' ku' dum ri tan na' mae' ku' tan na',

daecti rangraen Mi ri uin' jawngkui' tu' pun Ui' keuhti hawc'.

⁶ Hpaw Mi ca' ren' mae' ku' dum ri tan na' mae' ku' tan htut hk'ai' map' na'.

⁷ Hawc' ko', Ui' lah', 'Ut' Ui' maen', hk'a' naee bawl' htawm na' tem' a ri uin' lawng Ui' na'.

Peucawo', punta kaw Ui' yeuh hot' ku' keutui' hpum' Mi na', Ui' lih hawc'.'"^{††}

⁸ Nanggal' ka na' Yesu' Eun lah', "Peucawo', hpaw Mi ca' sum' is' ku' dum ri tan na' mae' ku' tan na'. Ku' dum ri tan na' mae' ku' tan htut hk'ai' map' na' Mi ku un' ren' mae' ka." (Hk'a' naee leukah' ritroe na' a saec' lah' a yeuhki'.)⁹ Hawc' ko', Eun tang lah', "Ut' Ui' maen', punta kaw Ui' yeuh hot' ku' keutui' hpum' Mi na', Ui' lih hawc'." Punta Yesu' kaw Eun tang' ku' nambat leual' na', Eun tecla ku' nambat keuhti na'.¹⁰ Kopti meuh a alo Eun Peucawo' aen' a na', e' pun hk'a' saic' ri seunga' chak' na' ri Yesu' Hkrit tan Eun tu' ri na' meuh ku' tan na' ti pok yawo a hk'o' hawc'.

¹¹ Ti seunyi hawc' ti seunyi, peue jhawp' rit na' ce ku peue ce cawng ri yeuh kan' mun' ri na'. Ti pok hawc' ti pok, ce gawm tan ku' tan ri laleung ku' un' cang saic' ri tec map' awn' na.¹² Daecti yam Yesu' hawc' Eun tan ku' tan pun saic' ri tec map' na' pun cot' cu na' ti pok yawo na', Eun mok' hk'a' ti' a' tawm' Eun Peucawo' na'.¹³ Tang' ri seunyi awn' na ing', Eun ko' a rot ti ransu Eun na' kaw ce pun ri meuh vang tang' cang Eun na'.¹⁴ Kopti meuh a kop hk'a' tan yeuh Eun ti pok yawo na' a yeuh peue rap ri ti hk'a' saic' ri seunga' na' ce htonnuk cot' cu ri.

¹⁵ Saec' meuh Cit' seunga' chak' na' a ku hkam' sa' hki' ka lawng aen' na ri e' yeut. Peucawo' lah' Eun leukah' nanggal' na',

¹⁶ "Aen' meuh a kati sat' ca' yeuh Ui' ri ce.

Hawc' ka yam awn' na, Peucawo' lah' Eun a yeuhki', 'Kaw Ui' seue' leukah' ritroe ri na' hk'a' naee meul' bhum' ce na'.

Ui' kaw tem' leukah' ritroe awn' na hk'a' pang hpum' kamkuit ce na'.'"[‡]

¹⁷ Hawc' ko', Eun tang lah' a bae,

"Hpaw Ui' ca' kaw laee kuit rot ri map'

† Pucti heul' 24:8

†† Suk' seun' 40:6-8 ‡ Yerami' 31:33

maee' ku' kleuc' yeuh ce na'."†
¹⁸ Peucawo' Eun lawn ploer map' na' hawc' ko', a un' laee lo' ku' tan ploer map' na' bae.

Kah e' sat ri ing' de Peucawo' Eun

¹⁹ Kop awn' na ec' awng' na' pe', kopti kue' e' hpum' keutawn' kaw pun ri lec vang seunga' chak' nyawk' hk'ai' peue na' ri cu e' nham' Eun Yesu' na',
²⁰ ri cu e' hk'a' hk'u' kue' civit im' ku' tah' hpen' kang' e' hpa' lec a ing' na', a meuh tu' Eun Yesu' na',
²¹ maee' kopti kue' e' Peue jhawp' rit keuting hk'ai' peue hk'a' naee nya Eun Peucawo' na',
²² pawh, kah e' sat ri ing' de Peucawo' Eun ri tisut' ka hpum' ri na' maee' hpum' hat' han' htonnuk ri hk'a' yum' na' ri hpum' pun ri rap ri ti hk'a' rawt' ri ri nham' punta kaw a saic' hpum' cang yawng ri kuit ku' kleuc' yeuh meun ri na' seunga' na' maee' punta tu' e' na' kaw a pun hk'a' saic' ri seunga' ri leuum' seunga' chak' na'.
²³ Kah e' jhawp' hk'a' keutui' hpum' rap e' ri ti na' keutawn' pawh. Kopti Cawo' tuil' kati na' kati keutawn' Eun na'.
²⁴ Maee' punta kaw e' kue' hk'a' leumeus' keus na' maee' yeuh ku' chak' na' e' ci' kaw tuil' kaw' reng puri yeuh sa' nhaw' na', kah e' kuit ti nawk a pawh.
²⁵ Pawlaee va hk'om puri na' rang' ram seun' peue seubu ngon' na' yeuh ce a rang' ram laeung na'. Daecti e' na' gawm tuil' kaw' reng puri. Yam nyu pe' yam ka na' kaw a hk'aws' rot na', gawm yeuh a lheu' awn' na reu'.
²⁶ E' saec' na' yawng ku' leupaws seumeu' na', daecti e' lawn kawn' tang' nha' ri suip ri yeuh map' na' ko', a hkuin' kaw laee kue' ku' tan saic' ri tec map' na' bae saec' ti ceu.
²⁷ A kue' yawo ko' ri lhat' ri hk'a' taws' a' mu na' maee' ngawl kuc' nyawk' ku' kaw dum ri tec ransu Eun Peucawo' na'.
²⁸ A' nhaw' lawn yeuh ku' kleuc' ri leukah' ritroe eun Mo' se na' a lawn kue' nang hkam' sa' hki' lal' loe' peue ko', eun kaw pun ri yeum ri un' laee tukyak peue ri ti.
²⁹ Peue jap' buin un' nawpsang Kon' ai' Eun Peucawo', eun sawn' nham' kati sat' ca' ku' saic' eun seunga' chak' na' un' kue' ti' ca maee' eun jap' buin un' nawpsang Cit' seunga' ka mun' sin' na' ko', pe' ci' kuit eun ci' na' kaw pe pun ri hkam' hk'a' ciyang na' lheu' awn' na a' neng?
³⁰ Kopti yawng e' Cawo' lah' a yeuh keutit' na' Eun, "Yeuh ri top' na' meuh a kan' Ui'. Ui' kaw tang yeuh ri top' a."
³¹ Eun ku tang lah', "Peucawo' kaw Eun taws' a' mu ri peue ri na' ce."
³² Pun ri hk'uaic' hk'a' naee

† Yerami' 31:34 †† Sawn' leukah' mun' 32:35 ‡ Sawn' leukah' mun' 32:36; Suk' seun' 135:14

nang dak ti' Eun Peucawo' Cawo' a' yu im' na' hk'o' l' hat' nyawk' ka.

Yeun' hkam yam pun ri hkam' ku' tukhka na'

³² Kuit rot ti seunyi meuyam pon heul' hawc' hk'a' kui' ka pun pe' ku' ceng' yam cawng keutawn' seupit pe' yam pun pe' ri hkam' hk'a' to' tam' reng nyawk' hk'a' naee vang tukhka na' reu'.
³³ Ngon' ti ri pok, pun pe' ri hkam' ku' hk'o' kaic na' nanggal' peue maee' pun pe' ri hkam' hk'a' keunhap' nokneh na'. Ngon' ti ri pok, pe' ku' pun ri peus a tiduih' maee' peue pun ri hkam' ku' yeuh keutit' na' ce yeut.
³⁴ Tukyak pe' ri peue ut' nang htawng' na' ce. Yam rim' peue ri ti vah-tu' hk'il' leumuil pe' na', pe' kaw'n' ren' kaw'n' rap ri ti a, kopti yawng pe' kue' ri vahtu' hk'il' leumuil chak' keutawn' cot' cu lheu' awn' na.

³⁵ Kop awn' na, pawlaee tecla hpum' keutawn' pe' na', kaw a meuh lapsawng' keuting na'.
³⁶ Pe' na' kah ri yeun' hkam. Kopti pe' lawn yeuh hot' alo Eun Peucawo' na' ko', pe' kaw pun ri rap ri ti ku' Peucawo' yeuh Eun kati ri na'.
³⁷ Kopti hk'a' naee ti yam yawo na', "Cawo' buih ing' na' kaw Eun ing', Eun hkuin' kaw tawn hot'.

³⁸ Daecti peue leupaws seumeu' Ui' na' a' yu im' eun hk'a' naee hk'a' yum' na'.
 Eun lawn yawm' hk'uaic' ko',
 eun hkuin' kaw hit' ti hpum' Ui'." ††

³⁹ E' hkuin' meuh peue yawm' hk'uaic' na' maee' peue pun ri hkam' hk'a' yeuh ri lulaic na', daecti meuh e' peue yum' na' maee' peue pun ri rap ri ti hk'a' htut lawtpon na'.

Hk'a' naee hk'a' yum' na'

¹¹ Hk'a' yum' na' meuh a yawng e' ku' keutui' hpum' ri na' meuh a neumneum na' maee' yawng e' ku' un' nyu ri na' meuh a neumneum na'.
² Kopti meuh a hk'a' yum' aen' na, peue leumah' na' Peucawo' Eun htawhkam ce.

³ Kopti meuh a hk'a' yum' na', e' leuceng pun Peucawo' hpanpleng' Eun sa' pahta' na' ri leukah' Eun na'.
 Kop awn' na, ku' pun e' ri nyu na' ce a hkuin' keut' neum ku' pun e' ri nyu ri ngai' ri na'.

⁴ Kopti meuh a hk'a' yum' na', Abela' eun tan ku' tan chak' hk'ai' is' eun Kai' na' na' ri Peucawo' Eun. Kopti meuh a hk'a' yum' na', Abela' eun pun ri rap ri ti hk'a' suk' seun' lah' eun meuh peue leupaws seumeu' na' yam Peucawo' htawhkam Eun ku' tan eun na'.

†† Habaku' 2:3, 4

⁵Kopti meuh a hk'a' yum' na', E' nawk' eun pun ri rap ri ti hk'a' ti ri huk' punta kaw eun un' laee pun ri hkam' hk'a' yeum na'. A' nhaw' hkuin' laee nyu eun saec' ti peue, kopti Peucawo' ti Eun eun huk' hawc' na'. Kopti nanggal' ka yam un' nang ti eun ri huk' na', pun eun ri rap ri ti hk'a' suk' seun' lah' eun meuh peue hit' hpum' Eun Peucawo' na'. ⁶Hk'a' yum' na' a lawn un' kue' ko', kaw yeuh ku' hit' ti hpum' Eun Peucawo' na' un' cang meuh ka. Kopti peue ing' ri Peucawo' Eun na', kaw ce kah ri yum' Peucawo' kaw n' a' yu im' Eun na' mae' kaw ce kah ri yum' peue sok Eun meulamlam na' kaw Eun tuil' lapsawng' ri ce na'.

⁷Kopti meuh a hk'a' yum' na', yam No' ah pun eun ri rap ri ti leukah' tuil' sati lawng ku' un' nang nyu eun na', hk'a' naee hk'a' lhat' til eun ri Peucawo' Eun na' eun pleng' reu keuting punta kaw a teum' kawm nyahk'ul' ce lawtpon na'. Kopti meuh a hk'a' yum' eun na', eun taws' a' mu ri peue bhen' keute' na' mae' eun pun ri meuh kleum' ka hk'a' leupaws seumeu' ing' neum hk'a' yum' na'.

⁸Kopti meuh a hk'a' yum' na', yam Abraham pun eun ri rap ri ti hk'a' klawng eun kaw heul' ri vang kaw eun pun mun' sin' hk'a' nanggal' ka na', eun ku leuceng ri ti a. Eun saec' na' un' yawng vang kaw ri heul' na', eun pucti heul'. ⁹Kopti meuh a hk'a' yum' na', eun ut' hk'a' naee kuing' kati sat' ca' Eun Peucawo' na' seun' peue leuvok ut' nang kuing' peue seubu na'. Eun ku ut' nang tup' seun' I' cak' mae' Yakop' ku' meuh peue del' ri suip kati sat' ca' na' ing' mae' heun tiduih' na' ka. ¹⁰Kopti keutui' hpum' eun veng ku' tang' ri hk'a' pang kleum' ku' Peucawo' meuh Eun nang kuit nang pleng' a na'.

¹¹Kopti meuh a hk'a' yum' na', Abraham eun saec' na' kawt nyawk', saec' meuh tu' eun Sara' na' eun meuh peue tan', ka tang cang kue' kon', kopti sawn' ka †Cawo' tuil' kati sat' ca' na' Eun kati keutawn' na'.

¹²Kop awn' na, kon' hk'i heun' heun' seun' seumeueng' pang mao' na' mae' sai keunam mha' seumut' mhin' un' laee euc' na' ce keut' neum a' ta' seun' nang yeum hawc' ti peue aen' eun.

¹³Peue aen' ce gawm' euc' yeum ce yam a' yu im' ri na' hk'a' naee hk'a' yum' na'. Ce hkuin' pun ri rap ri ti ku' Peucawo' yeuh Eun kati na', ce nyu a rangraen ri kaw n' kaw rap ri ti yawo a vang seungai na'. Ce sawn' meun ri meuh peue leuvok un' duing nyu pang bhen' keute' na'. ¹⁴Pun e' ri nyu peue lah' a yeuh keutit' na' buih sok ce kuing' ku' kaw ce pun a meuh is' ti na'. ¹⁵Ce

lawn keutui' hpum' kuing' puc ce ri ing' neum a na' ko', ce ku kue' yam kaw keutah ing' ri ka. ¹⁶Daecti ce hot' ri sok kuing' chak' lheu' awn' a na', a meuh kuing' pang mao' na'. Kop awn' na, Peucawo' Eun un' kaic ri yam klawng ce Eun meuh Peucawo' ri na'. Kopti mhe' Eun kuing' pun ce ti bhen' hawc' na'.

¹⁷Kopti meuh a hk'a' yum' na', yam Peucawo' long Eun ri nawk Abraham eun na', Abraham eun ku tan I' cak' eun meuh ku' tan. Peue rap ri ti leukah' kati Eun Peucawo' awn' eun rangraen ri kaw tan kon' ai' ti peue koe ri na' eun. ¹⁸Peucawo' Eun saec' lah' a ri heun, "Ceucat mi na' kaw ce suip ri to' ri lih neum I' cak' eun."

¹⁹Abraham yum' eun Peucawo' cang yeuh Eun peue yeum na' ce tang kuh' im'. Lah' leukah' leupong' ka ko', tang pun eun I' cak' eun keutah hk'ai' vang yeum na'.

²⁰Kopti meuh a hk'a' yum' na', I' cak' eun nap mun' ri Yakop' mae' E' saw' ka pun hk'a' a' yu im' heul' hk'a' nanggal' ri na'.

²¹Kopti meuh a hk'a' yum' na', yam Yakop' kaw eun hk'aws' yeum na', eun nap mun' ri kon' me eun Yo' saep ku peue na' †ce, eun kawm ri ri duing' ka hku' ji ri na' eun hk'o' mun'.

²²Kopti meuh a hk'a' yum' na', yam Yo' saep kaw eun hk'aws' yeum na', eun ris lawng peue I' sarela' na' kaw ce pucti heul' hk'ai' kuing' E' ji' tu' na'. Eun tawm' ri uin' lawng ka seuang' ri na'.

²³Kopti meuh a hk'a' yum' na', hawc' Mo' se keut' eun na', makuiing' eun ka mo' eun loe' chi'. Kopti nyu ka chat eun hk'ai' kon' nyom aet' seubu na' ce. Ka un' lhat' ri leukah' tuil' eun hkun' haw' hkam' na'.

²⁴Kopti meuh a hk'a' yum' na', yam Mo' se keuting eun na', eun un' rap ri meuh kon' ka kon' beun' eun hkun' haw' hkam' Hparaw' na'. ²⁵Eun leuk ri ti kaw pun ri hkam' hk'a' keunhap' nokneh na' mae' peue ceu Eun Peucawo' na' ce tiduih' tang' hk'a' ren' kaw n' ti vut ti yam hk'a' naee map' na'. ²⁶Hkam' ri ti ku' lulaic na' pun Hkrit Eun na', sawn' eun a ngos heun' hk'ai' vahtu' hk'il' leumuil ka kuing' E' ji' tu' na'. Kopti keue' eun ri lapsawng' ku' kaw ri pun hk'a' nanggal' na'. ²⁷Kopti meuh a hk'a' yum' na', eun pucti heul' hk'ai' kuing' E' ji' tu' na' mae' un' lhat' eun ri hk'a' seungeueng' eun hkun' haw' hkam' na'. Eun eut' hpum' co' ca' ri kopti nyu eun Peucawo' Cawo' peue nyu un' pun peue na' Eun. ²⁸Kopti meuh a hk'a' yum' na', punta ku' toh kon' ai' na' kaw ce un' cang ing' paic' kon' ai' ce peue I' sarela' na', eun jhawp' pawe vel nya na' mae' kan' rawt' nham' na'.

† A' ko' Kopti meuh a hk'a' yum' na', Sara' ka saec' na' kawt nyawk' ko', ka tang cang kue' kon', kopti sawn' ka.

†† Yamla 21:12 ‡ Yamla 48:1-20

²⁹ Kopti meuh a hk'a' yum' na', peue I' sarela' na' ce hpa' mha' seumut' Seurak' na' heul' seun' long ce pang bhen' keute' hk'oh' na'. Daecti yam peue E'ji' - tu' na' ce ku co' ca' ri hpa' a heul' na', ce cum' yeum euc'.

³⁰ Kopti meuh a hk'a' yum' na', yam peue I' sarela' na' hawc' vet ce hkui ka veng Yeri' hko' na' a' res seun- yi na', hkui veng na' a lhu' jah hk'uic' euc'.

³¹ Kopti meuh a hk'a' yum' na', Raha' beun' paing' tu' ri na', kopti rap ka ri ti peue htom' jem' na' ka, ka un' pun ri hkam' hk'a' toh ri na' mae' peue veng Yeri' hko' ku' un' yum' na' ce.

³² Ui' ci' kaw' kaw htuk' ri lah' keunhaw' na' bae? Ui' hkuin' laee kue' yam kaw ris lawng ce Gi' de' on, Barak', Samson, Yehpata', Davit', Samoela' mae' lawng ce peue suip leukah' Eun Peucawo' na' ce. ³³ Kopti meuh a hk'a' yum' na', peue awn' ce pe kuing' na', tu- il' hk'a' leupaws seumeu' na', pun ri rap ri ti ku' Peu- cawo' yeuh Eun kati ri na', dop moeng ka leuvai sangsi' na', ³⁴ juit' pe ngawl reng nyawk' na', pun ri pon moeng ka leungawng na', hk'a' kaw' reng kloea' a keut' ri meuh hk'a' kaw' reng keuting, keut' ri meuh peue ara ri peueng' suik', ruipeu' tec peue suik' kuing' taw' seubu na' ce. ³⁵ Beun' na' ce tang pun peue leumeus' ri na' ce hk'ai' vang yeum na'. Ku' seubu na' ce pun ri hkam' hk'a' keunhap' nokneh na'. Punta kaw ce pun hk'a' kuh' im' chak' lheu' awn' a na', ce un' yawm' ri rap ri ti hk'a' htut lawtpon na'. ³⁶ Ngon' ce pun ri hkam' hk'a' lah' ri pleh keunyas ta' faet' na'. Ngon' ce pun ri hkam' seue' saw' lhec' seue' ri nang htawng' na'.

³⁷ Ngon' ce pun ri hkam' dhim' peue ri seumu rot ti yeum ri. Ngon' ce pun ri hkam' leu ri deut meuh lal' ton. Ngon' ce pun ri yeum kopti moeng ka leungawng na'. Ngon' ce pun ri hk'o' tukyak hkam' hk'a' keunhap' nokneh, hk'a' un' nawpsang peue ri, ce pun ri cuip' ya- wo hak' a' pe mae' hak' kon' yung' na' pucti heul' ti duih' hawc' ti duih'. ³⁸ Bhen' keute' na' a hkuin' nang kuing' mae' ngos ce peue awn' na. Ce heul' eo' ri ut' nang vang hk'oh' hk'oeng', nang leuang', nang keutui' leuang', a' ko' nang keutui' keute' na'.

³⁹ Peue awn' ce gawm' euc' ce pun ri rap ri ti hk'a' suk' seun' na' ri hk'a' yum' ri na'. Daecti ce un' nang kue' nang pun ri rap ri ti ku' Peucawo' yeuh Eun ri uin' kati ri na' saec' ti peue. ⁴⁰ Punta kaw ce pun ri rap ri ti ku' htonnuk na' mae' e' tiduih' koe na', Peucawo' Eun rangraen ri uin' ku' chak' lheu' awn' a na' pun ce.

12 Kop awn' na, kopti kue' e' muk nang hkam' sa' hki' vet e' rop nuknhen' htan' awn' a hawc' na', kah e' ti ri tec ku' ol' yat e' na' mae' map'

ghok' ghek' ri keutawn' pit e' na' ce gawm' euc' ka. Kah e' eut' hpum' yeun' hkam ri hteo' ri hot' hk'a' rangraen ri uin' ri pun e' na' pawh. ² Kah e' mung' Yesu' Cawo' ku' u' peung hk'a' yum' e' na' mae' Cawo' yeuh hk'a' yum' e' na' htonnuk na' Eun. Kopti meuh a hk'a' ren' kaw' ut' nangg' Eun na', Eun hkam' ri rap ri ti kleum' rawng' tawp' na' mae' Eun un' uin' ku' hk'o' kaic ka kleum' rawng' tawp' na' nang hpum' ri. Eun pun ri mok' hk'a' a' tawm' ka tenceo' Eun Peucawo' na'. ³ Punta kaw pe' un' pun ri kaw' reng kloea' hpum' aet' na', pe' na' kuit rot ri Ca- wo' ku' pun ri hkam' hk'a' to' tam' ce peue map' na' Eun reu'.

Peucawo' ta' faet' sangsawn' Eun kon' ri na' ce

⁴ Hk'a' naee vang to' tam' pe' map' na', pe' hkuin' nang duing lhaw' ri rot ti nham' pe' peuc' ka. ⁵ Pil pe' leukah' tuil' kaw' reng pe' seun' kuing' na' sang- sawn' eun kon' me ri na'. A lah', "Kon' ai', pawlaee tecla ku' Peucawo' ta' faet' sang- sawn' Eun na'.

Pawlaee hpum' aet' ri yam ram Eun ri mi na'.

⁶ Kopti Peucawo' ta' faet' sangsawn' Eun peue leumeus' ri na' ce,

Eun tawm' ram ri peue sawn' Eun meuh kon' me ri na' ce."†

⁷ Saw' ku' nyhap' na' meuh hk'a' ta' faet' sang- sawn' Eun na', yeun' hkam a reu'. Peucawo' yeuh Eun a ri mi seun' kuing' na' yeuh eun a ri kon' ai' ri na' eun. Kopti kon' me nangh' na' eun ku' kuing' eun un' duing ta' faet' sangsawn' eun na' ? ⁸ Pe' lawn un' pun ri hkam' hk'a' ta' faet' sangsawn' na' ko', (pun peue ri hkam' hk'a' ta' faet' sangsawn' na' ku' peue ri) meuh pe' kon' jang', pe' un' meuh kon' chin. ⁹ Lheu' awn' na, ku' peue e', kue' e' ri is' kuing' meuh peue nang ta' faet' sangsawn' ri. E' ku' hkopyawm' ce ri ku' yeuh ce na'. E' htuk' ri leuceng Kuing' hk'a' civit e' na' Eun mae' a' yu im' ri lheu' awn' na pe a' neng?

¹⁰ Kuing' e' na' ta' faet' sangsawn' eun e' ti vut ti yam hot' seun' ku' chak' hk'ai' peue kuit eun na'. Daecti Peucawo' ta' faet' sangsawn' Eun e' pun ku' chak' e' na' mae' punta kaw e' pun ri pawng' ri mae' hk'a' seunga' chak' Eun na'. ¹¹ Hk'a' naee yam awn' na, a hkuin' kue' hk'a' ta' faet' sangsawn' ku' yeuh hpum' e' sam' ran na', a kue' yawo pal ku' yeuh e' sui' na'. Daecti hawc' ka na', a kaw kue' hk'a' leupaws seumeu' na' mae' hk'a' kuit nyawk' kuit sam' ran cumyen'

† Leukah' rui' 3:11, 12

na' ri peue pun ri hk'vui' ri hk'am' hk'a' ta' faet' sang-sawn' awn' ce.

¹² Kop awn' na, yeuh ti' kaw' reng kloe na' mae' ngai' ngong kaw' reng keuceum na' kue' kaw' reng keuting reu'. ¹³ "Yeuh hk'a' na' hpeng pun cung pe' na'", [†] punta peue cung chuing' na' kaw ce un' laee chuing', daecti kaw ce cuin na'.

Tuil' sati ri kaw un' tecla Peucawo' Eun

¹⁴ Co' ca' ri yeuh ri pun ri ren' kaw' cumyen' ut' mae' peue seubu na' ce mae' yeuh ri meuh peue seunga' chak' reu'. Kopti a lawn un' kue' hk'a' seunga' chak' na' ko', a' nhaw' hkuin' cang pun ri nyu Peucawo' Eun saec' ti peue. ¹⁵ Uin' sati ri reu', a' nhaw' pawlaee va mun' Eun Peucawo' na' sum saec' ti peue. Pawlaee kah res sawng' yeuh hk'a' suksak na' mae' yeuh map' a pit peue heun' na' gluh' pucti. ¹⁶ Uin' sati ri reu', a' nhaw' pawlaee va ri hkuit' nawng' tang', a' ko' un' ut' hk'a' naee hk'a' Eun Peucawo' na' se-un' E' saw' paing' eun an' nya kon' ai' ri na' hk'ai' uip' ti hk'ap yawo na' ko'. ¹⁷ Yawng pe' a yeut, hawc' ka na' yam E' saw' sum' pun eun ri rap ri ti mun' aen' a na', eun un' pun a. Eun saec' leuum' ngai' peuc' sok mun' awn' na, daecti eun hkuin' laee cang mhe' cang plin' a.

Gong hk'o' lhat' mae' gong ren' kaw' n

¹⁸ Pe' hkuin' pun ri ing' ri gong cang paic' ri na' mae' ngawl buih ha' gong na', hkuin' pun ri ing' ri hk'a' duim' lawng, duim' lawng kawc mae' guil' keuting na'. ¹⁹ Pe' hkuin' pun ri ing' ri seng' pi' tae' rae' buih laws' na', a' ko' seng' leukah' Eun Peucawo' ku' peue pun ri mhawng' a na' ce hk'o' hk'ang a un' laee lah' a ri ce bae na'. ²⁰ Kopti hk'am' un' pun ce leukah' tuil' ri awn' na, a lah', "Saec' meuh sat' heul' tuih gong awn' na, a kaw pun ri hk'am' hk'a' dhim' ri yeum ri seumu na'." ^{††} Ku' pun ri nyu ri awn' a hk'o' lhat' nyawk', a hk'o' Mo' se eun lah', "Ui' ri lhat' keuyuing' ui'." [‡]

²² Daecti ing' rot pe' pang gong Yi' on na' hawc', rot ri veng keuting Eun Peucawo' Cawo' a' yu im' na', a meuh veng Yeru' salaem ka kuing' pang mao' na'. Pe' ing' rot ri vang in' hpom muk heun' nyawk' na' ren' kaw' hk'om ce puri na', ²³ rot ri muk kon' Hkrit ce kon' ai' ku' kue' muis tem' ri nang kuing' pang mao' na' ce. Pe' ing' rot ri Peucawo' Cawo' taws' a' mu ri peue gawm' euc' na' Eun, rot ri civit ce peue leupaws se-

umeu' ku' pun ri rap ri yeuh ri htonnuk hawc' na' ce, ²⁴ rot ri Yesu' Cawo' meuh nang seuna' ka kati sat' ca' hk'u' na' Eun, rot ri nham' rawt' ku' lah' a rot ri ku' chak' hk'ai' nham' eun Abela' na'.

²⁵ Uin' sati ri reu', pawlaee lheu' leukah' Eun Cawo' buih leukah' na'. Yam lheu' ce leukah' Eun Cawo' buih leukah' pang bhen' keute' na', ce lawn hk'uih un' pon ko', e' lawn hk'uih ri Cawo' ram ri e' neum kuing' pang mao' na' Eun ko', e' ci' kaw pe jaen un' cang pon lheu' ce ri a' neng? ²⁶ Yam awn' na, leukah' Eun na' a rui' rah' bhen' keute' na', daecti maet' maen' Eun yeuh kati ri, "Ui' hkuin' kaw laee rui' rah' bhen' keute' aen' na koe bae ti pok, daecti Ui' ku kaw rui' rah' kuing' pang mao' na' yeut." ^{†††} "Bae ti pok" sum' lah' ka na' ko', punta kaw a kaw' nang yawo ku' un' cang fuii' fai' ri na' palkoe na', ku' hpanpleng' ri cang fuii' fai' ri na' a kaw hk'am' hk'a' lulaic na' heul'.

²⁸ Kop awn' na, kopti kaw e' hk'aws' pun kuing' un' cang fuii' fai' na', kah e' mun' keuting suk' seun' Peucawo' Eun ri hk'a' hkopyawm' lhat' e' ri Heun na', ²⁹ kopti "Peucawo' meuh Eun ngawl ha' ri tec reng nyawk' na'." [‡]

Kan' htuk' hpum' Peucawo'

13 Leumeus' puri laleung seun' ec' awng' na' ce reu'. ² Pawlaee pil kaw ri rap ri ti chec' un' duing nyu na' ce. Kopti kop meuh a yeuh keutit' na', peue ngon' na' ce tawn pun ri rap ri ti in' hpom na' ce mae' un' yawng ri. ³ Kuit rot ri peue pun ri hk'awng' ri nang htawng' na' ce sawn' a seun' buih pun pe' ri hk'awng' ri mae' ce tiduih' na' reu'. Kuit rot ri peue pun ri hk'am' hk'a' keunhap' nokneh na' ce sawn' a seun' buih pun pe' ri hk'am' a na' yeut reu'.

⁴ Kah pen' vel ti puri na' meuh ku' hkopyawm' pun peue gawm' euc' mae' kah vang it' ti puri na' seunga' chak' reu'. Kopti Peucawo' kaw Eun taws' a' mu ciyang ri peue jang' mae' peue hkuit' nawng' tang' na' ce.

⁵ Roksa' hk'a' a' yu pe' na' un' va leumeus' hk'il' leumuil na' mae' sawng' nyu ku' kue' pe' na' hit' ti hpum' pe' na' reu'. Kopti Peucawo' lah' Eun a, "Kaw Ui' un' duing tecla mi, un' duing hk'akcak' mi." ^{†††}

⁶ Kop awn' na, e' pen' lah' a hk'a' naee hpum' keutawn' ri,

"Peucawo' meuh Eun Cawo' teum' kawm ui', ui' hkuin' kaw laee lhat'.

Peue na' peue ci' kaw cang yeuh keunhaw' ri ui'?" ^{†††}

† Leukah' rui' 4:26 †† Pucti heul' 19:12, 13 ‡ Saw' leukah' mun' 9:19

†† Ha'gae' 2:6 ††† Saw' leukah' mun' 4:24 †††† Saw' leukah' mun' 31:6 †††† Suk' seun' 118:6, 7

⁷Kuit rot ri ro' pe' ku' lah' pe' mhawng' leukah' Eun Peucawo' na' ce reu'. Kuit ri nawk ku' pun ce hk'a' naee hk'a' a' yu im' ce na' mae' hot' ri yeuh hk'a' yum' ce na' reu'. ⁸Peunku', seunyaen' mae' cot' cu na' heul', Yesu' Hkrit seun' Eun hk'im' laleung.

⁹Pawlaee kleuc' hk'a' ri hot' ku' chat sangsawn' ku' ceu na'. Yeuh hpum' ri na' kaw' reng keuting ri mun' Eun Peucawo' na', chak' ka, hpaw a ca' meuh kopti ku' hk'a' hot' ritroe un' kue' mun' saec' peunae' pun peue hk'a' a na' ce na'. ¹⁰Kue' e' vang dum ri tan ku' peue yeuh kan' hk'a' naee tup' vang hk'o' mun' na' ce hkuin' kue' ahkvang kaw ti ri hk'a' ku' hk'a' ka vang dum ri tan awn' na.

¹¹Peue jhawp' rit keuting na' eun ti nham' ka sat' meuh ku' tan htut hk'ai' map' na' ce lec hk'a' naee vang seunga' chak' nyawk' hk'ai' peue na'. Daecti tu' ka sat' awn' ce ce ti ri heul' dum a hk'a' nok ka vang ut' ce na'. ¹²Yesu' Eun ku' seun' awn' na yeut. Punta kaw Eun saic' peue na' peue seunga' chak' ri nham' ri na', Eun pun ri tukhka hk'a' nok ka bawl' leuva' ka veng na'. ¹³Kop awn' na kah e' pucti heul' ri Heun hk'a' nok ka pang' vang ut' na', hkam' ri peus ku' hk'o' kaic na' seun' pun Eun ri peus a na'. ¹⁴Kopti maen' na' un' kue' a veng keutawn' cot' cu, daecti e' buih hot' ri sok veng kaw' kaw ing' rot na'.

¹⁵Kop awn' na hk'a' naee cu e' Yesu' Eun na', kah e' tan leukah' suk' seun' na' meuh ku' tan ri Peucawo' Eun laleung. Aen' a meuh tan pli' ka hoeng' lah' leukah' rap ri ti muis Eun na'. ¹⁶Pawlaee pil kaw ri yeuh ku' chak' na' mae' gvah ri tuil' peue is' na' awh. Kopti ku' tan yeuhki' na' hit' a ri hpum' Eun Peucawo'.

¹⁷Leuceng ri ti leukah' ce ro' pe' na', yawm' ri ut' hk'a' ruim vang u' peung ce na' reu'. Nom' nawk ce pe'

seun' meuh ce peue ris kan' ku' yeuh pe' na' ri Peucawo' Eun na'. Punta kaw ce cang ren' kaw' yeuh kan', ce na' un' cang yeuh a mae' kuit nyhap' kuit yak ri na', leuceng ri ti leukah' ce na' reu'. A lawn un' yeuh keutit' ko', kaw a un' kue' mun' pun pe' saec' peunae'.

¹⁸Hk'o' mun' pun ye reu'. Yawng ye kue' ri hpum' cang yawng seunga' chak' na' mae' sum' a' yu im' ye hk'a' naee kue' ri munhpung' ri hk'a' ku' ceu na' neumneum. ¹⁹Lheu' awn' na, sum' hk'o' hk'ang ui' pe' hk'o' mun' pun ui', kah ui' tang yao ing' rot ri pe'.

Leukah' tisut'

²⁰Peucawo' Cawo' kuit nyawk' kuit sam' ran Cawo' yeuh Cawo' go' muk kon' yung' keuting Eun Peucawo' Yesu' e' na' Eun tang kuh' im' ri nham' ka kati sat' - ca' cot' cu na' Eun, ²¹punta kaw pe' hot' ri yeuh alo Eun na', kah Eun yeuh pe' htonnuk ri ku' chak' ku' ceu na' mae' kah Eun yeuh kan' hk'a' naee pe' hot' ku' htuk' hpum' Eun na' ri Yesu' Hkrit Eun reu'. Kah munhpung' na' kue' ri Heun cot' cu ri reu'. Amin.

²²Ec' awng' na' pe', hk'o' ui' pe' yeun' hkam ri leuceng ri ti leukah' tuil' sati ui' na', kopti tem' ui' ri tuil' htawm do' neng' yawo na' ri pe'.

²³Sum' kah ui' pe' yawng awng' e' Ti' mo' se pun eun ri ploe' ri hawc'. Eun lawn yao ing' rot ko', ui' ku' na' ing' ri pe' mae' heun.

²⁴Ro' pe' na' ce mae' peue Eun Peucawo' na' ce gawm' euc', lah' ce mhawng' keutui' hpum' ui' ce. Peue kuing' It' tali na' ce ku' lah' ri keutui' hpum' pe' yeut.

²⁵Kah mun' sin' Eun Peucawo' na' kue' ri pe' gawm' euc' reu'.

Yakop'

1 Htawm ti ok' aen' na ko', meuh ui' Yakop' meuh mhai' Eun Peucawo' mae' mhai' Eun Yesu' Hkrit, ui' tem' ri tuil' a ri peue I'sarela' kul'leual' ceu puin' ri heul' ut' mae' peue ceu seubu na' pe'.

Hk'a' yum' mae' cu'yi

²Ec'awng' ui' na' pe', yam hk'eup' pe' ku' cop' long heun' ceu na', sawn' a meuh ku' ren' kawm reu'. ³Kopti tup yawng pe' ku' cop' long hk'a' yum' pe' na', yeuh a pe' gawm cang yeun' hkam. ⁴Punta kaw pe' keuting htonnuk un' lae cut yawm' saec' ti ceu na', yeun' hkam a rot tisut' ka reu'. ⁵Hk'a' naee pe' ti ri peue a'nhaw' lawn cu'yi un' nuk ko', hk'o' a ri Peucawo' Cawo' cang tuil' ri peue ri hpum' vah ri un' cang is' na' Eun reu', kaw eun pun a. ⁶Daecti yam hk'o' eun na', eun kaw kah ri yum', un' lae hpum' kuit teh' kuit nung'. Kopti a'nhaw' lawn kuit teh' kuit nung' ko', a seun' ba leuum' ka mha' seumut' na', a hot' guil' na' heul' heul' ing' ing'. ⁷Peue awn' eun ko', pawlae kuit kaw ri pun ku' ti ri ceu ri Peucawo' Eun. ⁸Meuh eun peue hpum' heun'. Eun hpum' un' keutawn' hk'a' naee ku' yeuh ri na' ce ku ceu ka.

⁹Ec'awng' meuh peue htan tem na' pe' htuk' ri nyu htan ut' ri na' lhung' hit' hpum' ri. ¹⁰Daecti peue meuneum na' ce htuk' ri nyu htan ut' ri na' tem hit' hpum' ri, kopti kaw ce pun ri rai' heul' seun' peutai rip na'. ¹¹Kopti yam seunyi na' puc a ri na', kuc' ka na' a tat' rip na' fit' hk'oh' heul', peutai ka na' a ku rum' hk'uic', ngam ka na' a rai' heul'. Seun' awn' na, peue meuneum na' ce kaw rai' heul' yam buih yeuh ce kan' ri na'.

Ku' cop' long

¹²Mun' keuting ri peue cang yeun' hkam yam hk'eup' eun ku' cop' long na', kopti hawc' eun hkam' pe ri ku' cop' long na', eun kaw pun cui' maw hk'il' civit ku' Peucawo' tuil' Eun kati ri peue leumeus' Eun na' ce.

¹³Yam hk'eup' pe' ku' cop' long na', pawlae lah' "Peucawo' Eun cop' long ri." Kopti ku' rai na' hpaw a ca' cang cop' long Peucawo' Eun. Peucawo' Eun ku

hkuin' cop' long a'nhaw' yeut, ¹⁴daecti ta' nha' rai ce na' meun a va ce heul' vang cop' long na'. ¹⁵Ta' nha' na' nyhel' a map' na' a keut' a. Map' na' a tawl' keuting, a keut' yeum na'.

¹⁶Ec'awng' leumeus' ui' na' pe', pawlae tuil' peue chi' lai Peucawo' Eun cop' long pe'. ¹⁷Lapsawng' chak' htonnuk na' gawm' euc' lih a neum pang lhung', neum A'kuiing' ka ku' ceng' pang mao' na' Eun. Eun hkuin' leuploh' plin' ri seun' a'lawng na' leuploh' plin' a ri. ¹⁸Punta kaw e' meuh pli' nanggal' ka ku' hpanpleng' Eun na' gawm' euc' ka, Eun leuk e' keut' ri meuh kon' ri ri leukah' leupaws seumeu' na'.

Leuceng ri hot' ri yeuh

¹⁹Ec'awng' leumeus' ui' na' pe', yeuh ri yawng lawng aen' na ku peue ri reu', yeuh ri hpai' ri leuceng, koekoe leukah', koekoe seungeueng'. ²⁰Kopti seungeueng' peulel peue na', un' cang yeuh ka a'yu leupaws seumeu' ku' htuk' hpum' Eun Peucawo' na' pucti lih. ²¹Kop awn' na, tec ku' hk'aw' jeuk gawm' euc' na' mae' ku' rai kue' heun' na' ce reu'. Hawc' ko', hk'a' naee hpum' onawn' pe' na', rap ri ti leukah' mun' ku' jheum' ri hk'a' naee pe' ku' cang teum' kawm htut civit pe' lawtpon pun na' reu'.

²²Pawlae leuceng hk'o' hk'awng' leukah' mun na' palkoe. Yeuh keutit' na', meuh a nang chi' lai tu' ri meun. Daecti hot' ri yeuh ku' lah' ka na' reu'. ²³A'nhaw' lawn pun ri mhawng' leukah' mun' ren' kawm na' daecti un' hot' ri yeuh a ko', seun' eun peue nom' buh ri nang vaen ko'. ²⁴Hawc' nom' eun ri na', eun pucti heul'. Buh eun na' a yeuh sa'nhaw', Eun keulawn' pil a. ²⁵Daecti a'nhaw' lawn kuit ri nawk leukah' ritroe htonnuk ku' tuil' hk'a' lawtpon na' hawc' ko' eun un' pil ku' mhawng' ri na' eun suip ri hot' ri yeuh a ko', eun kaw pun mun' ri ku' yeuh ri na'.

²⁶A'nhaw' lawn kuit ri tam' mun' tam' sin' ri reng meun daecti un' u' peung dak' ri pun meulamlam ko', eun chi' lai tu' ri meun. Tam' mun' tam' sin' eun na' a meuh ku' hk'o' hk'awng'. ²⁷Tam' mun' tam' sin' ku' Kuiing' Peucawo' e' rap Eun ri ti na' a meuh ku' seunga' chak' mae' ku' un' kue' vang ri na' meuh ka

roksa' kon' due' mae' a' ya seunao ku' pun ri hkam' ku' tukhka na', mae' roksa' tu' ri un' va ku' hk'aw' - jeuk ka bhen' keute' na' pit ri na'.

Pawlaee keue' ri buh peue

² Ec' awng' ui' na' pe', kopti meuh pe' peue yum' Cawo' Yesu' Hkrit munhpung' keuting e' na' Eun na', pawlaee keue' ri buh peue. ² U' hpama ri ko', peue cuip' plok' ti' hk'il' cuip' hk'eung chak' ngam na' eun ing' ri vang hk'om pe' na', mae' peue hk'o' tukyak cuip' hk'eung un' ngam na' eun ku ing' ri vang hk'om pe' na', ³ pe' lawn keue' ri ku' cuip' hk'eung chak' ngam na' eun, pe' ti eun seucen, pe' lah', "Mok' ri vang mok' chak' aen' na reu'", daecti pe' lah' a ri peue hk'o' tukyak na' eun, "Ing' cawng teh'", a' ko' "Ing' mok' keunam cung ui' na' reu'", ⁴ pe' gvah htan peue, pe' taws' a' mu ri peue mae' kamkuit un' leupaws seumeu' na', un' meuh ka aw?

⁵ Ec' awng' leumeus' ui' na' pe', leuceng a meulam-lam, Peucawo' leuk Eun ri ti peue bhen' keute' hk'o' - tukyak na' ce kaw meuh peue meuneum hk'a' naee hk'a' yum' na', mae' kaw ce rap ri ti sin' ka kuing' yeuh Eun kati ri peue leumeus' Eun na' ce, un' meuh ka aw? ⁶ Daecti pe' hpawt' ri ti peue hk'o' tukyak na' ce seuyung'. Peue meuneum na' meuh ce nang keunhap' pe', un' meuh ka aw? Un' meuh ka ce aw ku' teuk' yat pe' heul' taws' a' mu nang sa' nam' na' ? ⁷ Un' meuh ka peue awn' ce aw ku' un' nawpsang ri muis chak' Eun Peucawo' pe' na' ?

⁸ Pe' lawn yeuh a hot' leukah' ritroe Eun Peucawo' tem' ri nang htawm Seunga' lah' ri yeuh keutit' na', "Leumeus' peue ut' keunam caonao' mi na' ce seun' leumeus' mi tu' ri na' yeut reu'", † neumnem ka na' ko', ku' yeuh pe' na' cawp' ka hawc'. ⁹ Daecti pe' lawn keue' ri buh peue ko', yeuh pe' map'. Mae' meuh pe' peue yeuh kleuc' ri leukah' ritroe na', leukah' ritroe na' a ku taws' a deut hawc'. ¹⁰ Kopti a' n-haw' saec' hot' ri yeuh leukah' ritroe na' htonnuk gawm' euc' ka, daecti eun lawn yeuh kleuc' a ti ceu yawo ko', eun ku kleuc' a gawm' euc' ka. ¹¹ Kopti Peucawo' lah' Eun a, "Pawlaee len' cu", †† Eun ku lah', "Pawlaee toh peue." ‡ Kop awn' na mi saec' un' len' cu, daecti mi lawn toh peue ko', mi meuh peue yeuh kleuc' ri leukah' ritroe na'.

¹² Ku' lah' ku' yeuh pe' na' yeuh pe' cang tukyak se-un' meuh pe' peue kaw pun ri hkam' hk'a' taws' a' mu ri leukah' ritroe ku' tuil' hk'a' lawtpon na' reu'. ¹³ Kop-

ti peue un' cang tukyak na' kaw eun pun ri hkam' hk'a' taws' a' mu ka un' cang tukyak na'. Hk'a' cang tukyak na' pe a hk'a' taws' a' mu na'.

Hk'a' yum' mae' yeuh ku' chak'

¹⁴ Ec' awng' ui' na' pe', a' nhaw' saec' yum', daecti eun lawn un' yeuh keunhaw' na' pucti lih ko', a ci' kaw kue' peuehot' keunhaw' ? Hk'a' yum' awn' na, kaw a cang teum' kawm htut eun lawtpon pun aw? ¹⁵ U' hpama ri ko', ec' awng' ti ri peue eun lawn un' kue' hk'ohk'eung, un' kue' ku' hk'a' pun ti seunyi hawc' ti seunyi, ¹⁶ hk'a' naee pe' ri ti ri peue eun lawn lah' a ri he-un, "Kah mi kuit sam' ran ing' reu'. Yeuh tu' mi seueul' mae' hk'a' ri sak' reu'", daecti eun lawn un' tuil' ku' sum' lo' eun na' ri heun ko', a ci' kaw kue' peuehot' keunhaw' ? ¹⁷ Seun' awn' na, kue' yawo pal hk'a' yum', daecti un' yeuh keunhaw' a pucti lih ko', meuh a hk'a' yum' yeum.

¹⁸ Daecti pe' ri ti ri peue pe' kaw lah', "Kue' mi hk'a' yum', ui' kue' ku' yeuh pucti lih." Daecti kaw ui' lah' a ri pe', "Tuil' ui' nawk hk'a' yum' un' yeuh keunhaw' a pucti lih mi na' reu', kaw ui' tuil' mi nyu hk'a' yum' ui' na' ri ku' yeuh ui' pucti lih na'." ¹⁹ Yum' mi Peuca-wo' meuh Eun ti peue yawo na' chak' ka. Saec' meuh seuca' na' a ku yum' yeuhko' yeut. A lhat' keuyuing'.

²⁰ Peue un' cang kuit ri nawk na' pe', sum' nyu pe' sa' hki' ka hk'a' yum' ku' un' yeuh keunhaw' a pucti lih na' a un' kue' peuehot' † na' aw? ²¹ Peucawo' sawn' Eun a' ta' keuting e' Abraham eun meuh peue leupaws seumeu' na' meuh a kopti ku' yeuh eun pucti lih yam tan eun kon' ri I' cak' eun hk'a' pang vang dum ri tan ku' tan na', un' meuh ka aw? ²² Pun pe' ri nyu a hawc', hk'a' yum' eun na' mae' ku' yeuh eun pucti lih na' yeuh a kan' tiduih' hot' puri heul'. Hk'a' yum' eun na' a pun ri htonnuk ri kopti ku' yeuh eun pucti lih na'. ²³ "Kopti Abraham yum' eun Peucawo' Eun na', Peucawo' Eun sawn' eun meuh peue leupaws seumeu'", †† a htonnuk ri leukah' htawm Seunga' aen' na. Peue ku lah' eun meuh a' mawo Eun Peucawo' yeut. ²⁴ Kop awn' na pun pe' ri nyu a hawc', peue sawn' ri meuh peue leupaws seumeu' na' eun meuh a kopti ku' yeuh eun pucti lih na', a hkuin' meuh kopti hk'a' yum' eun na' palkoe.

²⁵ Seun' awn' na, saec' meuh Raha' beun' paing' tu' ri na' eun ku pun ri sawn' ri meuh peue leupaws seumeu' kopti meuh a ku' yeuh eun pucti lih na', un' meuh ka aw? Eun tuil' peue htom' jem' na' ka is' vang ut', cus' ka heul' hk'a' tawk seubu. ††† ²⁶ Seun' tu' na' a

† Fae' 19:18 †† Puc ri heul' 20:14; Sawn' leukah' mun' 5:18 ‡ Puc ri heul' 20:13; Sawn' leukah' mun' 7:17

†† Nang htawm Seunga' na' ngon', a lah', "a yeum" ††† Yamla 15:6 †††† Yaw' su' 2:1-22; 6:23

lawn un' kue' civit ko', a yeum, hk'a' yum' na' a lawn un' yeuh keunhaw' a pucti lih ko', a ku yeum yeut.

Dak'

3 Ec'awng' na' pe', pawlaee va ri meuh seura' heun' peue, kopti tup yawng pe' seura' na' kaw ce pun ri hkam' hk'a' taws' a' mu reng na' hk'ai' peue un' meuh seura' na' ce. ²E' ri ku peue yeuh kleuc' e' ri hk'a' heun' ceu. Peue un' duing kleuc' ri hk'a' leukah' leupong na' meuh eun peue htonnuk chak'. Eun cang u' peung pe tu' ri na' gawm' euc'.

³Punta kaw e' pe reng ka rawng na', e' klong moeng ka na' ri mu' lhec' na'. E' gloh' a, a heul' gawm' tu' ri hk'a' sum' kah e' a heul' na'. ⁴A' ko', keue' ri reu sanghpaw na' reu'. A saec' keuting, a saec' kah ri heul' mae' guil' keuting na', daecti a kue' seubal' aet' ri seuta' ka na'. Cawo' reu na' eun hpawt' seubal' aet' ri seuta' ka na', a heul' hk'a' sum' kah eun a heul' na'. ⁵Dak' na' a ku seun' awn' a yeut. A meuh hk'eung aet' hk'a' naee tu' e' na', daecti a cang eo' ri lah' leukah' lhung' leukah' keuting na' ce. Keue' reu', a' tep' ngawl aet' na' cang ha' ka hk'i keuting na'.

⁶Dak' na' seun' a ngawl. Dak' na' meuh a kuing' ka ku' rai ka hk'eung hk'a' naee ka jawngkui' tu' na'. A yeuh jawngkui' tu' na' hk'aw' jeuk gawm' euc' ri. A yeuh a' yu na' ha' gawm' euc', keutong' nyarok na' a ha' dak' na'.

⁷Sat' na' ku ceu, sim', sat' muilmal sat' leun ri na' mae' sat' ut' nang leuum' na' peue cang yeuh a o', peue ku yeuh a o' hawc'. ⁸Daecti a' nhaw' hkuin' cang yeuh dak' na' o' pun. Dak' na' a seun' sat' ku' un' cang ut' dit' ri. A kue' pit yeuh a' yu lu na' nuknhen'.

⁹Suk' seun' e' Peucawo' Eun mae' A' kuiing' e' na' Eun ri dak' ri na', peue Peucawo' hpanpleng' Eun seun' ruprang ri na' ce, e' ku lo' dak' ri na' jha' ce ri ka. ¹⁰Leukah' suk' seun' na' mae' leukah' jha' na' a pucti lih neum moeng ti keutui' na'. Ec'awng' ui' na' pe', pawlaee kah a yeuh keutit'. ¹¹Leuum' nyum na' mae' leuum' sawng' na' kaw a cang pucti lih neum ti keutui' yawo aw? ¹²Ec'awng' ui' na' pe', kleum' pli' keutui' na' cang pli' ka pli' sanlon aw? A' ko', nhul' pli' bui na' cang pli' ka pli' keutui' aw? Seun' awn' na' ko', keutui' ka leuum' sawng' na' a hkuin' cang lih leuum' nyum.

Cu' yi lih neum pang mao'

¹³Hk'a' naee pe' ri, a' nhaw' ci' heng' laet' cang yawng ri pe'? Kah eun yeuh a pucti lih hk'a' naee vang

a' yu im' chak' eun na' mae' hk'a' naee ku' yeuh eun ri hpum' onawn' ri ku' lih neum peuyha' cu' yi eun na' reu'. ¹⁴Daecti pe' lawn hpum' sui' kleh' klai' ri hkoe' mang' ri peue mae' kuit yawo pun tu' ri na' palkoe na' ko', pe' na' pawlaee suk' seun' meun ri kue' cu' yi mae' htu' hting' leukah' leupaws seumeu' na'.

¹⁵Cu' yi yeuhki' na' hpaw a ca' meuh cu' yi lih neum kuing' pang mao', daecti a meuh cu' yi ka bhen' keute', nham' keune mae' seuca' rai na'. ¹⁶Kopti tawngnhaw' na' a lawn kue' ku' hkoe' mang' peue mae' ku' kuit yawo pun tu' ri na' palkoe na' ko', mawn' na' a ku kue' ku' suksak mae' yeuh ku' rai ku ceu na'.

¹⁷Daecti cu' yi lih neum kuing' pang mao' na' ko', nanggal' ka na' seunga' chak', hawc' ko', leumeus' hk'a' cumyen', hpum' lec puri, leuceng leukah' puri, tuckyak ri puri mae' pli' chak' htonnuk, un' keue' ri buh peue mae' un' mo' hpum' ri. ¹⁸Hk'a' cumyen' na' a seun' ku' seumal. Peue puin' hk'a' cumyen' na' kaw eun pun ri vuic pli' leupaws seumeu' na'.

Yeuh a' mawo bhen' keute'

4 A ci' meuh kop keunhaw' hk'a' naee pe' ri, pe' vae' peue' suik' ri puri mae' kleuc' leumeul puri? Ceu nang aen' ce puc a ri lih neum kopti ta' nha' kue' hk'a' naee pe' na' peue' a puri na', un' meuh ka aw? ²Sum' is' pe', daecti pe' un' pun. Pe' toh peue, pe' sum' is' is' peue na'. Pe' un' pun ku' sum' is' ri na', pe' kleuc' leumeul puri, peue' suik' ri puri. Kopti un' hk'o' pe' ri Peucawo' Eun na', pe' un' kue'. ³Yam hk'o' pe' pe' un' pun na', meuh a kopti hk'o' kleuc' pe'. Pe' hk'o' pal pun ku' kaw hit' hpum' ri na'.

⁴Peue kati un' keutawn' ri Peucawo' Eun na' pe', a' nhaw' lawn yeuh a' mawo ka bhen' keute' na' ko', meuh eun ransu ri Peucawo' Eun, un' yawng pe' a aw? Kop awn' na, a' nhaw' lawn leuk ri yeuh a' mawo ka bhen' keute' na' ko', meuh eun ransu ri Peucawo' Eun yeut. ⁵Ku' tem' ri nang htawm Seunga' a lah', "Civit Peucawo' seue' Eun hk'a' naee e' na', sum' kah Eun a meuh is' ti palkoe", hteum' pe' a tem' ri hk'o' hk'awng' aw? ⁶Daecti Eun jaen tuil' mun' na' ri e' lheu' awn' na. Kop awn' na, nang htawm Seunga' na' a lah',

"Peucawo' ham' tap Eun peue hpum' lhung' hpum' keuting na' ce, daecti Eun tuil' mun' ri peue hpum' onawn' na' ce."

†

⁷Kop awn' na, sahpaw' ri ut' hk'a' ruim vang u' peung Eun Peucawo' na' reu'. Yeuh ri nhim' nhim' ham' tap seuca' rai na' reu', kaw a pucti hk'uuih hk'ai' pe'. ⁸Sat ri ing' keunam Eun Peucawo', Eun ku kaw sat ri ing' keunam mi yeut. Peue map' na' hkuc' ti' ri na' seunga' reu'. Peue hpum' heun' na' yeuh hpum' ri na' seunga' reu'. ⁹Kuit nyhap', pet yam nyel reu'. Keunyas na' leuploh' a meuh pet yam reu', kuit sam' ran na' leuploh' a meuh kuit nyhap' reu'. ¹⁰Tang' hpum' ri tem nanggal' Eun Peucawo' reu', kaw Eun yuk pe' huk' lhung'.

Tang' map' hk'a' pang peue

¹¹Ec' awng' na' pe', pawlae eo' peusah' nyoe puri. A' nhaw' lawn eo' peusah' nyoe, un' lah', taws' a' mu ri ec' awng' ri ko', eun ku peusah' nyoe, taws' a' mu ka leukah' ritroe na' yeut. Mi lawn taws' a' mu ka leukah' ritroe na' ko', un' meuh mi nang hot' ri yeuh leukah' ritroe na', daecti mi meuh nang taws' a' mu ka. ¹²Cawo' tuil' leukah' ritroe na' Eun mae' Cawo' taws' a' mu ka leukah' ritroe na' kue' a' ti peue koe. Eun meuh Cawo' cang teum' kawm cang htut mae' Cawo' cang yeuh ku' lu yeut. Daecti mi ri, mi ci' meuh a' nhaw', mi vae' kaw taws' a' mu ri peue ut' keunam caonao' ri na' ce?

Pawlae hpum' keuting ri hk'a' nanggal' ri

¹³Pe' ri ngon' lah' pe' a yeuh keutit', "Seunyaen' un' lah' peunsa' un' lah', kaw ye heul' nang veng awn' a, a' ko' veng teh' a. Ye na' ut' teh' ti neum, yeuh dang ka pun nammaet ka." Ku' lah' a yeuh keutit' na' pe', leuceng a reu'. ¹⁴Peunsa' na' a kaw yeuh sa' nhaw', a' yu pe' na' a ci' kaw yeuh sa' nhaw', hpaw pe' ca' yawng a. Gum seun' pe' putum' pucti ut' ti yam yawo a tang rai' heul' na' ko'. ¹⁵Lheu' hk'ai' lah' pe' a yeuh keutit' na', pe' na' htuk' ri lah' a yeuhki', "A lawn cawp' alo Eun Peucawo' ko', kaw ye a' yu im' punta kaw ye yeuh kan' awn' na kan' aen' na." ¹⁶Daecti ku' meuh pe' maet' maen' na', pe' buih mhawng' ri hk'o' cuin. Mhawng' ri hk'o' cuin yeuhki' na' gawm' euc' ka, meuh a ku' rai. ¹⁷Kop awn' na, a' nhaw' saec' yawng ku' chak' na' daecti eun lawn un' yeuh a ko', yeuh eun map' na'.

Tuil' sati ri peue meuneum na' ce

5 Peue meuneum na' pe', leuceng a reu'. Kopti ku' tukhka na' kaw a rot hk'a' pang pe' na', sae' caee' klawng ri yam reu'. ²Vahtu' hk'il' leumuil pe' na'

seueum' ka. Ruiing na' teun' ka hk'ohk'eung pe' na'. ³Leuho' na' hk'a ka hk'il' leumuil pe' na'. Leuho' awn' na meuh a sa' hki' ka ta' nha' pe' na'. A kaw hk'a keune pe' na' seun' ngawl na'. Ro pe' ri uin' vahtu' hk'il' leumuil pun seunyi tisut' na'. ⁴Keue' reu', ngos seunyi ce peue vuic ngho' nang na pe' pe' un' tuil' a euc' na', buih klawng a ri tang' a' mu ri pe'. Seng' klawng ce peue vuic ngho' na' a huk' lec yhuk' Eun Peucawo' Cawo' ti' ca keuting na' Eun hawc'. ⁵Pun pe' ri a' yu im' munkvaen sam' ran pang bhen' keute' na'. Pe' yeuh a rot ri ku' hit' hpum' ri na'. Pe' htu ri uii' tu' ri na' kleueng' rangraen ri ko' pun seunyi kaw pun ri toh ri yeum na'. ⁶Pe' taws' a' mu toh peue un' kue' ku' kleuc' ku' un' to' tam' pe' na' ce.

Yeun' hkam

⁷Kop awn' na ec' awng' na' pe', yeun' hkam a rot ti yam Yesu' Hkrit lih rot Eun reu'. Keue' ri peue sang' ri hk'a na' ce, ce ci' pe ko' pli' kue' ngos lih neum bhen' keute' na', mae' ce ci' pe yeun' hkam ri ko' yamla a ri lhe' na' heul' rot ti lhe' tisut' na' yeuh sa' nhaw'. ⁸Saec' meuh pe' ri, yeun' hkam a cawng keutawn', kop-ti kaw a hk'aws' rot yam Yesu' Hkrit lih Eun na'. ⁹Ec' awng' na' pe', punta kaw pe' un' pun ri hkam' hk'a' taws' a' mu na', pawlae tang' map' ri puri. Keue' reu', Cawo' taws' a' mu na' cawng Eun keunam leuva' na' hawc'.

¹⁰Ec' awng' na' pe', peue cu muis Eun Peucawo' meuh peue suip leukah' Eun na' yam hk'eup' ce ku' tukhka na' ce ci' yeun' hkam a yeuh sa' nhaw' na', hot' ri yeuh a reu'. ¹¹Seun' tup yawng pe' a, sawn' e' peue cang yeun' hkam na' ce mun' keuting. Pe' ku pun ri mhawng' lawng hk'a' yeun' hkam eun Yaw' ba' na' hawc'. [†]Vang tisut' ka na', Peucawo' Eun ci' yeuh sa' nhaw' ri heun, ^{††}pe' ku pun ri nyu a. Peucawo' kue' Eun hk'a' leumeus' keus mae' hk'a' cang tuckyak na' htonnuk.

¹²Ec' awng' na' pe', ku' a' ye' keuting hk'ai' ku ceu na' pawlae lah' leukah' hkam'. Mao', bhen' keute' mae' ku' seubu na' ce pawlae lah' leukah' hkam' a. A meuh neum ko', lah' a "meuh neum", a un' meuh ko', lah' a "un' meuh". A lawn un' yeuh keutit' ko', kaw pe' pun ri hkam' hk'a' taws' a' mu na'.

Hk'o' mun' hk'a' naee hk'a' yum'

¹³Hk'a' naee pe' ri, a' nhaw' lawn tukhka ko', kah eun hk'o' mun' reu'. A' nhaw' lawn ren' kawm ko', kah eun

[†] Yaw' ba' ^{††} Vang tisut' ka na', kopti Yaw' ba' yeun' hkam eun nyawk', Peucawo' Eun ku nap mun' ri heun heun' nyawk'.

lah' seng' htawm suk' seun' Peucawo' Eun reu' .
¹⁴Hk'a' naee pe' ri, a' nhaw' lawn sui' peuyhat ko', eun
 htuk' ri klawng ro' kan nang kawt muk kon' Hkrit na' ce
 heul' hk'o' mun' pun ri, pok lamawn ri heun hk'a' naee
 muis Eun Peucawo' na' .¹⁵Leukah' hk'o' mun' hk'a' -
 naee hk'a' yum' na' , yeuh ka peue peuyhat na' eun
 cuin. Peucawo' Eun yeuh eun cuin. Eun lawn kue' map'
 ko', Peucawo' Eun ku ploe' a yeut. ¹⁶Kop awn' na, punta
 kaw pe' pun ri bai' ri cuin na' , hk'o' pe' va puri ris
 map' ri na' ri puri mae' hk'o' mun' pun puri reu' .
 Leukah' hk'o' mun' ce peue leupaws seumeu' na' kue'
 a ti' ca, a yeuh ku' chak' na' pucti lih.

¹⁷E' li' ya peue suip leukah' Eun Peucawo' na' eun ku
 meuh peue seun' e' ri yeut. Punta kaw a un' lhe' na' ,
 eun sae' caee' hk'o' mun' ri. A ku un' laee lhe' peu'
 bhen' keute' na' pun loe' neum pai' les chi' .¹⁸Yam
 tang hk'o' eun mun' bae' na' , pang mao' na' a tuil'
 lhe' na' lih, bhen' keute' na' a kue' pli' kue' seukuk.

¹⁹Ec' awng' na' pe' , hk'a' naee pe' ri a' nhaw' lawn
 kleuc' hk'a' ka hk'a' leupaws seumeu' na' heul' daecti
 peue ti ri peue eun lawn tang va eun ing' ko' ,²⁰yeuh ri
 pawn eun, a' nhaw' lawn va peue map' kleuc' hk'a' ri
 heul' na' eun tang hpawt' ri ing' ko' , kaw eun htut eun
 hk'ai' hk'a' yeum na' , map' heun' eun na' a kaw pun
 ri ploe' ri.

1 Petru'

1 Htawm ti ok' aen' na ko', meuh ui' Petru' meuh peue caee Eun Yesu' Hkrit,

ui' tem' ri tuil' a ri peue Peucawo' leuk Eun ri uin' na' pe'. Meuh pe' peue taic' jah hk'uih heul' meuh seudes' ut' nang kuing' Pontas', kuing' Galati', kuing' Kapadosia, kuing' Asa' mae' kuing' Beti' ni' na'.² Punta kaw pe' leuceng ri ti Yesu' Hkrit Eun mae' nham' Eun na' kaw a rawt' pe' na', Kuing' Peucawo' Eun leuk ri ti pe' ri saic' pe' seunga' chak' ri Cit' seunga' na' hawc' seun' yawng Eun ri uin' a na'.

Kah mun' sin' mae' hk'a' kuit nyawk' kuit sam' ran cumyen' na' kue' ri pe' htonnuk reu'.

Vang keutui' hpum' cot' cu

³ Suk' seun' Peucawo' Kuing' Eun Cawo' Yesu' Hkrit e' na' Eun. Kopti meuh a hk'a' tukyak keuting Eun na', Eun yeuh e' tang keut' hk'u', kah e' lec hk'a' naee vang keutui' hpum' cot' cu na' ri hk'a' tang kuh' im' Eun Yesu' Hkrit na'.⁴ Eun kah e' lec hk'a' naee sin' un' cang lulaic, un' cang seueum' mae' un' cang rai' ku' rangraen ri uin' ri pun pe' nang kuing' pang mao' na'.

⁵ Kopti meuh a hk'a' yum' pe' na', Peucawo' Eun rokxa' pe' ri ti ca ri na' rot ti pun pe' hk'a' htut lawtpon ku' rangraen ri hawc' kaw pucti glih' gleueng' hk'a' naee seunyi tisut' na'.⁶ Maet' maen' pe' saec' na' pun ri hkam' ku' tukhka kopti ku' cop' long heun' ceu na' ti cu hkao', pe' ren' kawn nyawk'.⁷ Ceu nang aen' keut' kue' ka na' meuh a kopti punta kaw a htawhkam kue' pe' hk'a' yum' neumneum na'. Hk'a' yum' neumneum aen' a kawn' ngos heun' hk'ai' hk'il' ku' hk'o' a saec' saic' ri seungawm ri ngawl daecti a kawn' cang lulaic heul' na'. Hk'a' yum' aen' a kaw yeuh pe' pun munhpung', hk'a' suk' seun' mae' tang' ri lhung' keuting na' yam Yesu' Hkrit tang lih Eun na'.⁸ Pe' saec' na' un' duing nyu Eun, daecti pe' leumeus' Eun. Pe' saec' na' un' nyu Eun maet' maen', daecti pe' yum' Eun. Pe' kue' hk'a' ren' kawn keuting lah' un' laee euc' na' htonnuk.⁹ Kopti buih rap pe' ri ti

hk'a' htut lawtpon ka civit pe' ku' meuh vang keutui' hpum' ka hk'a' yum' pe' na'.

¹⁰ Peue suip leukah' Eun Peucawo' na' sok ce ri caet ri nyu hk'a' htut lawtpon aen' a meulamlam ri hawc'. Ce meuh nang tawn lah' lawng mun' Eun Peucawo' a kaw lih ri pe' na' ce.¹¹ Yam Cit' seunga' ut' hk'a' naee ce na' tamnai a ce mhawng' lawng hk'a' tukhka Eun Hkrit na' mae' lawng munhpung' kawn' kaw lih hot' na', lawng aen' a ci' kaw meuh yamnhaw', a ci' kaw meuh yeuh sa' nhaw' na' ce sok ri hot' ri caet a hawc'.¹² Peucawo' Eun tuh' ce nawk leukah' tamnai ce na' a hkuin' meuh pun ce, daecti a meuh pun pe'. Maet' maen' peue sangsawn' leukah' mun' ren' kawn na' ris ce pe' mhawng' ceu nang aen' ce ri Cit' seunga' chak' lih neum kuing' pang mao' na' hawc'. Saec' meuh in' hpom na' ce ku sum' yawng ceu nang aen' ce yeut.

Seunga' chak' reu'

¹³ Kop awn' na mhe' hpum' pe' meulamlam ri, yeuh ri cang eut' hpum' ri, keutui' hpum' mun' Eun Peucawo' ku' kaw Eun tuil' a ri pe' yam Yesu' Hkrit na' Eun tang lih na' reu'.¹⁴ Yeuh ri seun' kon' nyom cang leuceng ri ti na' ce reu'. Pawlaee a' yu im' hot' ku' rai ta' nha' tawn kue' pe' yam a' yu im' pe' yam un' nang yawng pe' na'.¹⁵ Daecti kah ku' yeuh pe' ku ceu na' seunga' chak' seun' Cawo' klawng pe' na' seunga' chak' Eun na' reu'.¹⁶ Kopti kue' a ku' tem' ri yeuh keutit', "Kah pe' seunga' chak' reu', kopti seunga' chak' Ui' na'."†

¹⁷ Kopti klawng pe' A' kuing' Cawo' un' meuh hk'a' mawn' hk'a' maen' taws' a' mu hot' kan' ku' yeuh peue na' Eun, a' yu im' hk'a' naee vang hkopyawm' lhat' ri seun' meuh pe' peue leuvok un' duing nyu ka bhen' keute' na' reu'.¹⁸ Kopti tup yawng pe' teum' kawm htut Eun pe' lawtpon hk'ai' hk'a' a' yu im' un' kue' mun' ku' suip ri ing' neum a' ta' a' ya pe' na' ce na'. Eun hkuin' htut pe' ri ku' cang lulaic heul' na', u' hpama ri ko' hk'il', a' ko' leumuil.¹⁹ Daecti htut Eun pe' ri nham' ngos heun' Eun Hkrit meuh Kon' yung' un' laee kue' vang cat vang ceul' vang ri

† Face' 11:44, 45; 19:2; 20:7

na'.²⁰ Peucawo' Eun leuk ri uin' Hkrit Eun tang' neum yam bhen' keute' na' un' nang hpanpleng' a ri, daecti Eun tuil' Hkrit Eun pucti yam tisut' aen' na pun pe'.

²¹ Kopti meuh a Hkrit Eun na' pe' yum' Peucawo' Ca-wo' yeuh Hkrit Eun tang kuh' im' tuil' munhpung' ri Heun na' Eun. Kop awn' na, hk'a' yum' mae' hk'a' keutui' hpum' pe' na' a kue' hk'a' naee Peucawo' Eun.

²² Punta kaw pe' leumeus' ec' awng' ri na' ce neum-neum na', maet' maen' yeuh pe' ri seunga' chak' me-un ri leuceng pe' ku' leupaws seumeu' na' hawc'. Kop awn' na, pe' na' leumeus' puri rot tisut' ka hpum' ri na' reu'.²³ Kopti tang keut' hk'u' pe' hawc', hpaw pe' ca' keut' neum seumal cang lulaic heul' na', daecti keut' pe' neum seumal un' cang lulaic heul' na'. A meuh leukah' Eun Peucawo' ku' a'yu im' mae' ku' keutawn' cot' cu na'.²⁴ Nang htawm Seunga' na' lah' ka a yeuh keutit',

"Peue ceu na' peue gawm' euc' seun' peue rip ko', munhpung' ce na' gawm' euc' a seun' peutai nang mal' na'.

Rip na' a fit' hk'oh', peutai na' a rum' hk'ui'c',

²⁵ daecti leukah' Eun Peucawo' na' a keutawn' cot' cu ri."[†]

Leukah' aen' a meuh leukah' mun' ren' kaw'n sang-sawn' pe'.

2 Kop awn' na, hpum' sum' yeuh peue lu, hpum' chi' lai ri hk'a, leukah' seunga' hpum' vok', hkoe' - mang' peue mae' peusah' nyoe peue na' ku ceu ka, tecla a hk'ai' tu' pe' na' reu'.² Sum' nyui leuum' pui civit seunga' chak' na' seun' o' ngak kaw'n' keut' na' ce reu'. Aen' na ko', a kaw yeuh pe' keuting hk'a' naee hk'a' htut lawtpon pe' na'.³ Maet' maen', pun pe' ri cim hk'a' chak' Eun Peucawo' na' hawc'.

Seumu a'yu im' mae' peue pun ri leuk ri ti ri

⁴ Ing' ri Hkrit Eun reu'. Meuh Eun seumu a'yu im'. Peue saec' na' tecla Eun, daecti Peucawo' Eun leuk ri ti Eun. Eun sawn' Eun ngos heun'.⁵ Saec' pe' ri, pe' kaw seun' seumu a'yu im' na', Peucawo' Eun na' ti ri pleng' pe' meuh nya hk'a' civit na'. Pe' ku na' pun ri meuh peue jhawp' rit seunga' chak', pe' kaw tan ku' tan. Kopti cu pe' Yesu' Hkrit Eun na', ku' tan pe' na' a htuk' hpum' Eun Peucawo'.⁶ Kopti tem' a ri nang htawm Seunga' na' yeuhki',

"Keue' reu', go' Ui' seumu pun ri leuk ri ti ri ti meul' na' nang gong Yi' on na', a meuh seumu ngos heun' nang ce' ka na'.

A' nhaw' lawn yum' Eun ko', eun hkuin' kaw duing kaic."^{††}

⁷ Kop awn' na, seumu aen' a ngos heun' pun peue yum' na' pe'. Daecti pun ce peue un' yum' na', seun' tem' a ri nang htawm Seunga' na',

"Seumu peue go' nya na' tec ce hawc' na', maet' maen' meuh a seumu ri kleum' nang ce' ka na' hawc'.[‡]

⁸ A meuh

seumu vang seuduih peue ri, a yeuh peue htang' meul."^{††}

Ce seuduih ri kopti un' leuceng ce leukah' aen' na. A hot' seun' ku' Peucawo' tang' Eun ri uin' a tang' neum nanggal' na' hawc'.

⁹ Daecti meuh pe' peue Peucawo' leuk Eun ri ti. Pe' meuh peue jhawp' rit keuting, meuh peue ceu seunga' chak', meuh kon' hk'i Eun Peucawo'. Ku' yeuh Eun aen' a meuh punta kaw pe' heul' pao' lawng kan' keuting Eun na'. Eun klawng pe' pucti hk'ai' vang duim' lawng na' ing' lec vang ceng' chak' Eun na'.¹⁰ Nanggal' ka na' un' meuh pe' peue Eun Peucawo', daecti maet' - maen' pe' meuh peue Eun hawc'. Nanggal' ka na' pe' un' pun hk'a' tukyak Eun na', daecti maet' maen' pe' pun ri rap ri ti hk'a' tukyak Eun na' hawc'.

¹¹ A' mawo leumeus' ui' meuh peue leuvok un' duing nyu pang bhen' keute' na' pe', hk'o' hk'ang ui' pe' tecla ta' nha' ku' to' tam' hk'a' civit pe' na'.¹² Yam ut' pe' hk'a' naee muk ce peue un' yum' Peucawo' Eun na', ce saec' na' peusah' nyoe lah' pe' yeuh ku' kleuc' na', punta kaw ce nyu ku' chak' yeuh pe' na' mae' kaw ce tuil' munhpung' ri Peucawo' Eun seunyi yam kaw Eun tang lih ri e' na', a'yu im' hot' hk'a' chak' na' reu'.

Leuceng leukah' ce cawo' u' peung pe' na'

¹³ Kopti meuh a Peucawo' Eun, yawm' ri ut' hk'a' ruim vang u' peung ce cawo' ku' leuk peue ri tang' ri uin' na' ce reu'. Ut' hk'a' ruim hkun' haw' hkam' cawo' an' nya keuting hk'ai' peue na' eun.¹⁴ Saec' meuh ca-wo' u' peung kuing' ku' hkun' haw' hkam' cus' eun ce lih punta kaw ce ciyang nang yeuh ku' kleuc' mae' suk' seun' nang yeuh ku' chak' na' ce, pe' ku na' ut' hk'a' ruim ce yeut reu'.¹⁵ Kopti yeuh pe' moeng ce peue un' cang kuit ri nawk na' leukah' cumyen' ri yeuh ku' chak' na', htuk' a hpum' Eun Peucawo'.¹⁶ A'yu im' seun' meuh pe' peue lawtpon na' reu'. Daecti pawlaee lo' hk'a' lawtpon pe' na' yeuh ku' rai na'. A'yu im' seun' meuh pe' mhai' Eun Peucawo' na' reu'.

† I' saya' 40:6-8

†† I' saya' 28:16‡ Suk' seun' 118:22‡† I' saya' 8:14

¹⁷Hkopyawm' ri peue gawm' euc' reu'. Leumeus' ec' awng' hk'a' naee Hkrit Eun na' ce reu'. Lhat' til ri Peucawo' Eun reu'. Hkopyawm' ri hkun' haw' hkam' na' ce reu'.

¹⁸Mhai' na' pe', leuceng ri ti leukah' ce cawo' pe' na' hk'a' naee vang hkopyawm' ri reu'. A hkuin' kaw meuh leuceng cawo' hpum' chak' hpum' onawn' na' ce palkoe, daecti a ku kaw meuh leuceng cawo' rai na' ce yeut. ¹⁹Kopti peue cang yeun' hkam ku' un' leupaws seumeu' na' ri kuit rot eun ri Peucawo' Eun na', meuh eun peue hk'o' suk' seun' nyawk'. ²⁰Pe' lawn pun ri hkam' hk'a' klaee' peue ri kopti yeuh pe' ku' kleuc' na', pe' saec' na' yeun' hkam a, pe' ci' kaw kue' vang hk'o' suk' seun' yeuh sa' nhaw'? Daecti pe' lawn hkam' ku' tukhka na' kopti yeuh pe' ku' chak' na' pe' yeun' hkam a ko', aen' meuh a ku' hk'o' suk' seun' nanggal' Eun Peucawo'. ²¹Meuh a aen' ce hawc' ku' Peucawo' klawng Eun ri ti pe' na', kopti saec' meuh Hkrit Eun ku pun ri hkam' ku' tukhka na' pun pe'. Eun yeuh ri uin' ku' kaw pe' hot' ri yeuh na' hawc', hot' dak cung Eun na' heul' reu'.

²²"Eun hkuin' duing yeuh map'.

Leukah' chi' lai na' a hkuin' duing pucti lih hk'ai' moeng Eun."†

²³Yam lah' peue ku' un' nawpsang ri Heun na', Eun hkuin' yeuh ri top' a ri keunhaw'. Yam pun Eun ri hkam' ku' tukhka na', Eun hkuin' gihat' ce. Daecti Eun ap tu' ri na' ri Peucawo' Cawo' taws' a' mu leupaws seumeu' na' Eun. ²⁴Punta yeum e' hk'a' naee map' ri na' e' kaw pun ri a' yu im' pun hk'a' leupaws seumeu' na', Eun peus map' e' na' ri tu' ri na' pang kleum' rawng' tawp' na'. Kopti meuh a vang sui' Eun na', pe' pun ri bai' ri cuin hawc'. ²⁵Kopti seun' pe' kon' yung' veung rai' heul' na', daecti maet' maen' pe' keutah ing' rot ri Cawo' go' Cawo' rokxa' civit pe' na' Eun hawc'.

Beun' mae' me

3 Seun' awn' na, beun' na' pe' yawm' ri leuceng leukah' ce me ri na' reu'. Punta me pe' na' ce ngon' ce saec' na' un' yum' leukah' Eun Peucawo' na', daecti kopti meuh a ku' yeuh ka beun' eun na' a cang yeuh me na' eun plin' hpum' ri. Saec' na' un' lah' keunhaw' ri heun, ²yam nyu eun hk'a' seunga' chak' pe' na' mae' hk'a' lhat' til pe' ri Peucawo' Eun vang a' yu im' pe' na', eun na' hpawt' ri yum'.

³Pawlaee kah hpaw ngam pe' na' glih' ri yong' pe' hk'a' nok tu' ri na', u' hpama ri ko', glaing' huik' ri,

cuip' hk'eung hk'il' hk'eung leumuil mae' cuip' hk'eung chak' ngam. ⁴Daecti kah a glih' lih neum hk'a' naee tu' ri na'. Aen' na a meuh hpaw ngam un' cang cuit' ka hpum' onawn' cang ut' cumyen' na'. Hpum' yeuhki' na' a ngos heun' hk'a' naee sai' ngai' Eun Peucawo'. ⁵Kopti ceu nang aen' ce beun' seunga' chak' leumah' ku' keutui' hpum' Peucawo' Eun na' tawn yeuh ce tu' ri na' hpaw ngam ri ka. Ce yawm' ri leuceng leukah' ce me ri na'. ⁶Seun' Sara', leuceng ka leukah' eun Abraham, ka klawng eun meuh cawo'. Pe' lawn yeuh ku' chak' na' un' laee lhat' ri ku' rai keunhaw' na' ce ko', pe' ku meuh kon' lhan' ka Sara' yeut.

⁷Seun' awn' na, me na' pe' ut' mae' beun' pe' na' ce hk'a' naee vang keue' nyu pe' ri ce na' reu'. Hkopyawm' ri ce kopti kaw' reng kloee' ce hk'ai' pe' na' mae' meuh ce peue pun ri rap ri ti sin' a' yu im' lap-sawng' mun' keuting lih neum Peucawo' Eun na' mae' pe' tiduih' na'. Pe' lawn yeuh keutit' ko', a hkuin' kaw laee kue' ku' ham' tap leukah' hk'o' mun' pe' na'.

Hkam' ku' tukhka kopti yeuh ku' chak'

⁸Leukah' tisut' ka na', tang' hpum' pe' meuh ti meul' gawm' euc' ri, keue' nyu ri puri, yeuh ri kue' hpum' onawn' mae' hpum' nyom' jom na' reu'. ⁹Pawlaee yeuh ri top' ku' rai na' ri ku' rai. Pawlaee top' peue is' pe' na' ce ri leukah' is', daecti pun aen' na nap mun' ri peue reu'. Kopti punta kaw pe' pun mun' meuh sin' ri pe' na', Peucawo' Eun klawng ri ti pe'.

¹⁰Kopti, a' nhaw' lawn leumeus' a' yu ri mae' sum' nyu seunyi yam ren' kaw na' ko', eun kaw kah ri rokxa' dak' ri na' un' va ri lah' ku' rai na'

mae' rokxa' hoeng' ri na' un' va ri lah' leukah' chi' lai na'.

¹¹Eun kaw kah ri keutah ri hk'ai' ku' rai na' eun na' yeuh ku' chak' na',

mae' eun ku kaw kah ri sok ri hot' ri yeuh hk'a' kuit nyawk' kuit sam' ran cumyen' na' yeut.

¹²Kopti Peucawo' ko' Eun ri nawk peue leupaws seumeu' na' ce ri ngai' ri na'.

Eun hpawt' ri leuceng seng' hk'o' mun' ce na' ri yhuk' ri na'.

Daecti Eun hpawt' buh ri na' hk'ai' ce peue yeuh ku' rai na', Eun ham' tap ce. ††

¹³Pe' lawn sae' caee' yeuh ku' chak' na' ko', a' n-haw' ci' kaw cang ing' yeuh pe' sui' lu? ¹⁴Daecti pe'

† I' saya' 53:9

†† Suk' seun' 34:12-16

lawn pun ri hkam' ku' tukhka na' kopti yeuh pe' ku' cawp' na' ko', Peucawo' kaw Eun nap mun' ri pe'. Pawlae lhat' ri ku' gihat' peue pe' na', pawlae tok' seupa ri ka.¹⁵ Daecti sawn' Hkrit Eun meuh Peucawo' ri nang hpum' pe' na' reu'. Peue lawn mhaing' pe' a ci' meuh kop keunhaw' pe' vae' kue' vang keutui' hpum' yeuhki' na' ko', pe' ci' kaw top' a ri peue gawm' euc' yeuh sa' nhaw' na', saec' meuh yamnhaw' rangraen ri uin' ri meulamlam reu'. Daecti top' a hk'a' naee vang hpum' onawn' hkopyawm' ri ri ce reu'.¹⁶ Punta peue peusah' nyoe ku' chak' yeuh pe' hk'a' naee Hkrit Eun na' kaw ce kaic ri peusah' nyoe ce ri pe' na', roksa' hpum' cang yawng pe' na' seunga' reu'.¹⁷ Kopti hk'a' naee vang cawp' alo Eun Peucawo' na' pe' lawn hkam' ku' tukhka na' kopti yeuh pe' ku' chak' na' ko', na' a chak' hk'ai' pun pe' ri hkam' ku' tukhka na' kopti yeuh pe' ku' rai na'.¹⁸ Kopti Hkrit yeum Eun na' meuh a punta saic' Eun ri tec map' na' gawm' euc' ti pok a hk'o'. Aen' na ko', peue leupaws seumeu' na' Eun pun ri hkam' ri yeum tang' peue un' leupaws seumeu' na' ce punta kaw Eun va ce ing' ri Peucawo' Eun na'. Tu' Eun na' a saec' yeum, daecti Eun tang kuh' im' hk'a' naee Cit' seunga' na'.¹⁹ Eun heul' sangsawn' leukah' mun' hk'a' naee Cit' seunga' na' ri cit' ku' pun ri hk'awng' ri na' ce yeut.²⁰ Cit' awn' ce meuh cit' ce peue leumah' ku' un' leuceng leukah' yam Peucawo' yeun' hkam ko' Eun ce hk'a' naee cu yam No' ah buih pleng' eun reu na'. Ku' Peucawo' teum' kawm Eun ce lawtpon hk'ai' leuum' na' nang reu na' ce hkuin' kue' a' neng, ce gup kue' yawo seudi' peue.²¹ Leuum' aen' na seumeu' a ri lah' rap ri ti hk'a' cum' ku' teum' kawm pe' lawtpon maet' maen' na' yeut. Rap ri ti hk'a' cum' na' hpaw a ca' meuh ku' saic' hk'at maeo pit tu' e' na', daecti a meuh sa' hki' yeuh e' kati ri Peucawo' Eun ri roksa' e' hpum' cang yawng na'. Rap ri ti hk'a' cum' na' teum' kawm a pe' lawtpon ri Yesu' Hkrit tang kuh' im' Eun na'.²² Eun huk' nang kuing' pang mao' hawc'. Maet' maen' mok' Eun hk'a' ti' a' tawm' Eun Peucawo'. In' hpom, cawo' kue' an' nya mae' cawo' kue' ti' ca na' ut' ce hk'a' ruim ti' ca Eun na'.

A' yu im' pun Peucawo' Eun

4 Kopti Hkrit pun Eun ri hkam' ku' tukhka ri tu' ri na' hawc' na', saec' meuh pe' ri, kah pe' kue' kamkuit seun' awn' na yeut reu'. Kopti peue pun ri hkam' ku' tukhka ri tu' ri na', kaw ce un' laee yeuh map' na' bae.² Peue awn' ce, vang kaw ce suip ri a' yu

im' pang bhen' keute' na', ce kaw un' laee a' yu im' hot' ku' ta' nha' rai ce peue na', daecti ce kaw a' yu im' hot' alo Eun Peucawo' na'.³ Kopti nanggal' aen' na, lo' pe' yam na' heul' heun' hawc' ri yeuh pe' seun' ku' peue un' yawng Peucawo' Eun na' leuk ce ri yeuh na'. Ceu nang aen' ce a meuh hk'a' hkuit' - nawng' tang', hot' ri yeuh alo hk'a' nham' keune, yuic' ri plai', nyui plai' yeuh pawe, hk'a' lheu' lonpon, mae' fae' ruphtu ku' hk'o' kleh' hk'o' keunah na'.⁴ Kopti maet' maen', un' laee pawng' pa' pe' hk'a' naee vang hk'a' lheu' lonpon ce na', ce am' ri pe'. Ce is' jha' pe'.⁵ Daecti ce kaw kah ri top' leukah' mhaing' Eun Cawo' taws' a' mu ku' rangraen ri kaw taws' a' mu ri peue im' peue yeum na' ce hawc'.⁶ Kop awn' na, leukah' mun' ren' kawn na' a ku pun ri sangsawn' ri ri peue yeum na' ce yeut. Punta hk'a' jawngkui' ce na' a saec' na' pun ri hkam' hk'a' taws' a' mu na' hot' kamkuit ce peue na' ko', daecti hk'a' civit ce na' a' yu im' hot' alo Eun Peucawo' na'.

⁷ Yam tisut' ka ku ceu gawm' euc' na' kaw a hk'aws' rot hawc'. Kop awn' na punta kaw pe' cang hk'o' mun' na', yeuh ri pawn kui' pawn sati ri mae' yeuh ri u' peung pe tu' ri na' reu'.⁸ Lheu' awn' na, leumeus' puri ti peue hawc' ti peue sut' hpum' ri, kopti hk'a' leumeus' keus na' cang ghui' ka map' heun' na' nyawk'.⁹ Rap ri ti puri meulamlam ri, pawlae vuin'vaw.¹⁰ Htuk' pe' ri yeuh mhai' peue ku peue ri hot' seun' lapsawng' pun pe' neum Peucawo' Eun na' reu'. Lapsawng' mun' Eun Peucawo' pun pe' heun' ceu na' sawn' a hkaem lo' a hk'a' naee vang kati keutawn' ri reu'.¹¹ Punta Peucawo' kaw Eun pun munhpung' ri hk'a' naee ku ceu ri Yesu' Hkrit Eun na', a' nhaw' lawn kaw leukah' ko', eun htuk' ri lah' a seun' meuh eun peue lah' leukah' Eun Peucawo' na' ko'. A' nhaw' lawn kaw yeuh mhai' ko', eun htuk' ri yeuh a hot' seun' kaw' reng Peucawo' tuil' Eun na'. Kah munhpung' ti' ca na' kue' ri Heun cot' cu ri reu'. Amin.

Pun ri hkam' ku' tukhka kopti meuh kon' Hkrit

¹² A' mawo leumeus' ui' na' pe', ku' cop' long sui' nyawk' pun pe' ri hkam' na' pawlae am' ri ka, pawlae nyu a seun' meuh a ku' hk'o' am' keut' kue' ri pe'.¹³ Daecti punta kaw pe' pun ri ren' kawn nyawk' yam munhpung' Eun Hkrit na' puc a ri lih na', ren' kawn mae' pun pe' ri hkam' ku' tukhka na' mae' Hkrit Eun reu'.¹⁴ Pe' lawn pun ri hkam' ku' un' nawpsang na' kopti meuh a muis Eun Hkrit na' ko', pe' kaw pun ri ren' kawn. Kopti Cit' seunga' munhpung' keuting Eun Peucawo' na' ut' a mae' pe' na'.¹⁵ Pe'

† I' saya' 8:12

lawn na' lhon' ri pun ri hkam' ku' tukhka na' ko', pawlaee kah pe' pun ri hkam' a kopti meuh a toh pe' peue, rabawk' peue, yeuh ku' kleuc' ku' meul na' mae' eo' ri klawo' suksak peue na' ce.¹⁶ Daecti pe' lawn pun ri hkam' ku' tukhka na' kopti meuh pe' kon' Hkrit na' ko', pawlaee kaic, daecti kopti klawng peue pe' meuh mae' muis Eun Hkrit na', suk' seun' Peucawo' Eun reu'.¹⁷ Kopti rot ka yam Peucawo' kaw Eun tang' ri taws' a' mu ri peue nya peue hk'ul' ri na' ce nanggal' hawc'. Eun kaw taws' a' mu ri peue nya ri na' ce nanggal'. Hk'a' taws' a' mu na' a lawn tang' ri taws' ri ri e' nanggal' ko', a ci' na' pe yeuh sa' nhaw' ri peue un' yum' leukah' mun' ren' kaw n Eun Peucawo' na' ce?

¹⁸ "Peue leupaws seumeu' na' kaw ce pun hk'a' htut lawtpon na' a lawn nyhap' ko', peue un' leupaws seumeu' na' mae' peue map' na' a ci' na' yeuh sa' nhaw' ri ce?"[†]

¹⁹ Kop awn' na, peue pun ri hkam' ku' tukhka hot' alo Eun Peucawo' na' ce htuk' ri ap civit ri na' ri Peucawo' ri Cawo' hpanpleng' kue' kati keutawn' na' Eun. Suip ri yeuh ku' chak' na' reu'.

Nang kawt mae' nang kaw n' nhum'

5 Ro' kan nang kawt hk'a' naee muk na' pe', meuh ui' nang kawt seun' pe' ri yeut, ui' ku meuh sa' hk'i' ka Hkrit pun Eun ri hkam' hk'a' tukhka na' ti peue yeut, ui' ku pawng' hk'a' naee munhpung' kaw n' kaw pucti lih Eun Hkrit na' yeut. Ui' sum' hk'o' a ri pe' yeuh keutit',² roksa' po' nawk kon' yung' Eun Peucawo' ut' hk'a' ruim vang roksa' pe' na' ce reu'. Pawlaee yeuh a kopti meuh a ku' htuk' ri kaw yeuh, daecti sah-paw' ri yeuh a hot' alo Eun Peucawo' Cawo' sum' kah Eun pe' yeuh na' reu'. Pawlaee yeuh a mae' sum' pun ri leumuil, daecti peus hpum' ri yeuh a reu'.³ Pawlaee cu an' nya ri na' lo' a hk'a' pang ce muk ap ri ri pe' na', daecti yeuh ri meuh vang hot' rin ri ti ce muk kon' yung' na' reu'.⁴ Yam Cawo' keuting go' kon' yung' na' puc Eun ri lih na', pe' na' pun cui' maw hk'il' kue' munhpung' ku' un' cang lulaic na'.

⁵ Seun' awn' na, nang kaw n' nhum' na' pe', leuceng leukah' ce nang kawt na' reu'. Pe' ri gawm' euc', tang' hpum' ri onawn' ri puri reu'. Kopti,

[†] Leukah' rui' 11:31

"Peucawo' ham' tap Eun peue mhawng' ri hk'o' cuin na' ce,

daecti Eun kaw nap mun' ri peue hpum' onawn' na' ce."^{††}

⁶ Kop awn' na, punta Peucawo' kaw Eun yuk pe' huk' yam cawp' a yam ri na', pe' na' tang' hpum' ri tem hk'a' ruim dak ti' ti' ca keuting Eun na' reu'.⁷ Kopti Peucawo' cang kuit nyhap' hki' keung Eun pun pe' na', ap tuil' ku' kuit nyhap' hki' keung pe' na' ri Heun gawm' euc' ka reu'.

⁸ Yeuh ri u' peung pe tu' ri mae' yeuh ri pawn kui' ri reu'. Kopti seuca' rai meuh ransu pe' na' lomlom a pe' seun' leuvai sangsi' heul' eo' ri sok sat' kaw ri kaw ri hk'a' na' ko'.⁹ Ham' tap seuca' rai na' reu'. Keutawn' seupit hk'a' naee hk'a' yum' na' reu'. Kopti saec' meuh ec' awng' pe' ut' pang bhen' keute' na', tup yawng pe' pun ce ri hkam' ku' tukhka seun' aen' a yeut.

¹⁰ Hawc' ka yam pun pe' ri hkam' ku' tukhka na' ti vut ti yam na', Peucawo' meuh Cawo' mun' gawm' euc' ku' klawng pe' ing' ri munhpung' cot' cu hk'a' naee Hkrit Eun na' Eun kaw yeuh pe' htonnuk, kue' kaw l' reng mae' yeuh pe' keutawn' seupit.¹¹ Kah ti' ca na' kue' ri Heun cot' cu ri reu'. Amin.

Leukah' tisut'

¹² Tem' ui' ri tuil' htawm ton neng' aen' a ri pe' hk'a' naee vang teum' kawm eun Silas' ku' sawn' ui' eun meuh ec' awng' kati keutawn' ui' na' eun. Ui' tem' ri kaw tuil' kaw l' reng pe' ri ka mae' kaw a meuh sa' hki' ka ceu nang aen' ce gawm' euc' meuh ka taeng-taeng mun' sin' Eun Peucawo' na'. Keutawn' seupit hk'a' naee mun' sin' aen' a reu'.

¹³ Muk kon' Hkrit ut' nang veng Babu' lon[‡] ku' pun ri leuk ri ti ri seun' pe' ri na' ce ku tawm' a, ce lah' ri leunyeng ri pe'. Maku' kon' me ui' na' eun ku tawm' a eun lah' ri leunyeng ri pe' yeut.¹⁴ Yam hk'eup' puri na', gloh' ti' puri hk'a' naee hk'a' leumeus' keus na' reu'. Kah hk'a' kuit nyawk' kuit sam' ran cumyen' na' kue' hk'a' naee peue ut' hk'a' naee Hkrit Eun na' pe' ku peue ri.

^{††} Leukah' rui' 3:34[‡] Veng aen' sum' lah' a ri veng Ro' ma na'.

2 Petru'

1 Htawm ti ok' aen' na ko', meuh ui' Si' mon Petru' meuh mhai' meuh peue caee Eun Yesu' Hkrit,

ui' tem' ri tuil' a ri peue pun ri rap ri ti hk'a' yum' ngos heun' na' ce seun' ui' ri pun ui' ri rap ri ti a hk'a' - naee hk'a' leupaws seumeu' Eun Yesu' Hkrit meuh Peucawo' Cawo' htut e' na' Eun.

²Kah mun' sin' mae' hk'a' kuit nyawk' kuit sam' ran cumyen' na' kue' hk'a' pang pe' htonnuk ri yawng pe' Peucawo' Eun mae' Yesu' Cawo' Peucawo' e' na' Eun reu'.

Tang' hpum' ri seun' Peucawo' Eun

³Ti' ca Eun Peucawo' na' tuil' a ku' lo' e' cang yeuh e' kaw a' yu im' hk'a' naee hk'a' Eun Peucawo' na' ku ceu ka hawc' ri yawng e' Cawo' klawng ri ti e' ri munhpung' mae' ku' chak' ri na' Eun. ⁴Eun cu awn' na, Eun tuil' kati keuting ngos heun' ri na' ri e'. Punta kopti meuh a kati aen' ce, pe' na' pun ri lec hk'a' naee ruprang Eun Peucawo' na' mae' pun ri pon hk'ai' ku' hk'aw' - jeuk ka bhen' keute' ku' lih neum ta' nha' rai na'.

⁵Kop awn' na, sae' caee' co' ca' ri bae' hk'a' yum' na' ri hk'a' chak' na', bae' hk'a' chak' na' ri cu' yi na', ⁶bae' cu' yi na' ri hk'a' pe' tu' ri na', bae' hk'a' pe' tu' ri na' ri hk'a' yeun' hkam na', bae' hk'a' yeun' hkam na' ri hk'a' a' yu im' hot' hk'a' Eun Peucawo' na', ⁷bae' hk'a' a' yu im' hot' hk'a' Eun Peucawo' na' ri hk'a' leumeus' keus ec' awng' ri na', bae' hk'a' leumeus' keus ec' awng' ri na' ri hk'a' leumeus' keus na' reu'. ⁸Kopti pe' lawn kue' ceu nang aen' ce lheu' heun' ko', a kaw yeuh pe' kue' mun', pli' heun' hk'a' naee yawng pe' Cawo' Yesu' Hkrit e' na' Eun. ⁹Daecti a' nhaw' lawn un' kue' ceu nang aen' ce ko', ce meuh peue sai' ngai' un' lang', peue ngai' fec'. Map' ce na' pun a ri saic' ri seunga' hawc' leumah' na' ce ku pil a yeut.

¹⁰Kop awn' na ec' awng' ui' na' pe', sae' caee' yeuh a kuing' hpaw mae' Peucawo' klawng leuk Eun ri ti pe' neumneum na' reu'. Kopti pe' lawn yeuh keutit' ko', pe' hkuin' kaw duing htang' meul saec' ti pok. ¹¹Pe'

kaw pun hk'a' ren' kawn rap ri ti ri lec hk'a' naee kuing' cot' cu Eun Yesu' Hkrit Cawo' Peucawo' Cawo' teum' kawm htut e' lawtpon na' Eun. ¹²Kop awn' na, pe' saec' na' yawng lawng aen' a, pe' jhawp' ku' leupaws seumeu' na' keutawn', daecti punta kaw pe' kuit rot ri ka na', ui' kaw sae' caee' tuil' sati pe' laleung.

¹³Ko' ui' ri sawl' pe' ri lawng aen' a cu yam kawn' a' yu im' ui' nang tu' ri na', ui' kuit a na' chak'.

¹⁴Kopti yawng ui' un' ling' ko' kaw ui' pun ri hk'ak' - cak' tu' ri aen' na hot' seun' ku' Cawo' e' Yesu' Hkrit tuh' Eun ui' nyu a glih' gleueng' hawc' na'. ¹⁵A saec' na' meuh yam hawc' yeum ui' heul' na' ko', punta kaw pe' cang kuit rot ri ceu nang aen' ce laleung na', ui' kaw co' ca' ri yeuh a ku hk'a' ka.

Munhpung' Eun Yesu'

¹⁶Yam lah' ye pe' mhawng' lawng ti' ca Eun Cawo' e' Yesu' Hkrit na' mae' lawng kaw Eun tang lih na', ye hkuin' yeng ri seukawp ri lah' yeuh a pucti lih. Daecti meuh ye sa' hki' nang pun ri nyu munhpung' keuting Eun na' ri ngai' ri na'. ¹⁷Kopti pun Eun ri rap ri ti munhpung' ri neum A' kuiing' Peucawo' Eun yam lah' Eun a ri Heun, "Peue aen' meuh Eun Kon' ai' leumeus' Ui'. Eun hit' ri hpum' Ui' nyawk'." ¹⁸Ye ku pun ri mhawng' leukah' awn' puc a ri lih neum kuing' pang mao' na' yam ut' ye mae' Heun pang gong seunga' chak' na'.

¹⁹Kop awn' na, e' jaen gawm yum' leukah' ce peue suip leukah' Eun Peucawo' na'. Pe' lawn ti leukah' ku' seun' ceng' hk'a' naee duim' yam un' nang ceng' ka na' mae' ku' seun' seumeueng' keuting peunngup cawo pucti hk'a' naee hpum' aen' na seucen ko', chak' ka.

²⁰Hk'a' pang gawm' euc' na', yeuh ri yawng leukah' tamnai hk'a' naee htawm Seunga' Eun Peucawo' na', a hkuin' kue' nang ing' neum kamkuit meun ce peue suip leukah' Eun Peucawo' na' saec' ti duih'. ²¹Kopti leukah' tamnai ce peue suip leukah' Eun Peucawo' na' a hkuin' ing' neum alo ce peue na', daecti leukah' lih neum Peucawo' Eun ku' Cit' seunga' chak' na' tuh' a hpum' ce ri ka na', ce lah' a.

† Mahtae 17:5; Maku' 9:7; Lu' ka 9:35

Peue guil ri meuh peue suip leukah' Eun Peucawo'

2 Seun' peue guil ri meuh peue suip leukah' Eun Peucawo' na' tawn puc ce ri hk'a' naee peue Yu' da na' ce, seura' sangsawn' ku' kleuc' na' ce ku kaw cang pucti hk'a' naee pe' ri yeut. Ce kaw ra ri ti ku' sangsawn' kleuc' cang yeuh ku' lulaic na' ing' lec hk'a' naee pe'. Ce yeuh a rot ti tecla ce Cawo' a'yu Cawo' teum' kawm htut ce lawtpon na' Eun, yeuh ce ki' na' lak' ti ce ku' lulaic na' ing' ri tu' ri na' meun vaeveae. ²Peue kaw hot' hk'a' hk'o' kaic ce na' heul' heun' peue. A yeuh muis ka hk'a' leupaws seumeu' na' lu. ³Kopti seura' sangsawn' ku' kleuc' na' law' hpa keuting ce na', punta kaw ce koc ri hk'a' pe' na', ce pleng' ku' un' kue' un' meuh na' pucti lih. Leukah' taws' a' mu ri ce na' tuik' a ri pang cing' ce na' ling' ka hawc', hk'a' lulaic na' buih ing' rot a de ce hawc'.

⁴Kopti Peucawo' Eun hkuin' laee uin' in' hpom yeuh map' na' ce, daecti Eun kaw nyon ce nang keutong' n- yarok nang htawng' duim' lawng na' rot ti seunyi yam taws' a' mu na'. ⁵Yam htum' Eun peue bhen' keute' un' leupaws seumeu' na' ce leumah', Eun hkuin' laee uin' bhen' keute' na'. Daecti Eun rokxa' No' ah ku' pao' leukah' leupaws seumeu' ri peue na' eun mae' peue seubu a' res peue na' ce. ⁶Punta Peucawo' kaw Eun tuh' e' nyu ku' kaw keut' kue' ri peue un' leupaws seumeu' na' ce na', Eun ciyang veng So' dom mae' veng Gomorah na' ri dum a meuh peuluing. ⁷Daecti Eun teum' kawm Law' ta ku' meuh peue leupaws seumeu' na' eun lawtpon. Eun pun ri hkam' hk'a' kuit nyhap' nyawk' na' kop meuh a a'yu im' ce peue un' hot' hk'a' mun' hk'a' sin' na'. ⁸(Kopti peue leupaws seumeu' awn' pun eun ri ut' mae' ce, eun pun ri nyu pun ri mhawng' ku' rai yeuh ce na' ku seunyi, a yeuh hpum' leupaws seumeu' eun na' pun ri hkam' hk'a' kuit nyhap' nyawk' na'.) ⁹Kopti yeuh a keutit' na', Peucawo' Eun ci' kaw teum' kawm peue leupaws seumeu' na' ce pon hk'ai' hk'a' cop' long na' yeuh sa' nhaw' na', Eun yawng a. Eun ci' kaw hk'awng', Eun ci' kaw suip ri ciyang peue un' leupaws seumeu' na' ce yeuh sa' n- haw' heul' rot ti yam seunyi kaw taws' a' mu na', Eun ku yawng a. ¹⁰Lheu' awn' na, peue cu alo ri hot' ta' n- ha' hk'a' nham' keune ri na' ce mae' peue un' sum' ut' hk'a' ruim ce cawo' kue' an' nya na' ce, Eun jaen kaw ciyang ce. Peue aen' ce meuh peue hpum' cen', mhawng' ri hk'o' cuin. Ce un' nawpsang un' lhat' til ri tivamut' tivana' na' ce. ¹¹Saec' meuh in' hpom kue' kaw' reng kue' ti' ca keuting hk'ai' ce na', yam tang' ce map' hk'a' pang ce tivamut' tivana' nanggal' Eun Peu-

cawo' na', ce hkuin' lah' ku' un' nawpsang ri ce.

¹²Daecti peue awn' ce un' nawpsang ku' un' yawng ce na'. Ce seun' sat' rai na', ce yeuh yawo ku' yawng ri na' heul'. Ce ing' keut' punta kaw ce pun ri hkam' ku' lulaic na'. Ce kaw pun ri lulaic seun' sat' rai na' neum- neum.

¹³Ku' rai yeuh ce na' a tang keutah ing' ri ce. A saec' meuh peunnyi keuting, ce ren' mae' yeuh ku' ren' kawm pon lheu' na'. Ce meuh vang cat vang bok. Ce yeuh hk'a' ren' kawm ri na' meun hk'a' naee pawe pe' na'. ¹⁴Hk'a' len' cu na' a nuknhen' sai' ngai' ce na'. Ce hkuin' laee keului' yeuh ri map' na'. Ce cop' long peue hpum' un' keutawn' na' ce. Ce ara ri ta' nha' na'. Ce meuh peue ceu pun hk'a' jha' na'. ¹⁵Ce tecla hk'a' leupaws seumeu' na', ce hk'uih hot' hk'a' eun Balam kon' eun Beol na'. Balam eun meuh peue ren' mae' ku' mhun' un' leupaws seumeu' na'. ¹⁶Daecti rawngla na' a is' eun. Rawngla na' a saec' meuh sat' un' cang leukah' ko', daecti a leukah' seun' peue. A ham' ku' ma' rat yeuh eun peue suip leukah' Eun Peuca- wo' na'.

¹⁷Peue awn' ce seun' keutui' leuum' hit' na' mae' putum' guil' puing' ka heul' na'. Vang duim' lawng na' rangraen a ri uin' ri pun ce hawc'. ¹⁸Kopti lah' ce leukah' lhung' leukah' keuting un' kue' peuehot' na'. Ce lo' ta' nha' nham' keune ce peue map' leupeul na', ce cop' long peue kawm' pucti lih hk'ai' muk ce peue a'yu im' rai na'. ¹⁹Ce tuil' kati ri peue awn' ce, "Hpaw pe' ca' kaw laee meuh mhai'", daecti tu' ce na' kawm' meuh ce mhai' ka ku' hk'aw' jeuk na'. Kopti keunhaw' na' a lawn u' peung a' nhaw' ko', hkawn' kaw eun meuh mhai' ka. ²⁰Ce saec' pun ri pon hk'ai' ku' hk'aw' - jeuk ka bhen' keute' na' ri yawng ce Yesu' Hkrit Cawo' Peucawo' Cawo' teum' kawm htut e' lawtpon na' Eun, daecti ce lawn tang ing' lec a bae' ko', yam hk'a' pai' ce na' a jaen kaw lheu' hk'ai' yamla ce ri na'. ²¹Ce lawn na' un' yawng hk'a' leupaws seumeu' na' ko', na' a chak' hk'ai' yawng ce a, hawc' ko' ce tang hpawt' ri eung' kui' ri ri leukah' ti' ca keuting seunga' chak' Eun Peucawo' ku' suip ri ing' rot ri ce na'. ²²Ce ri ko', seun' ce leukah' nang kawt lah' ri aen' a neumneum, "So' na' aw ka a tang hk'a' ri na', lic hawc' huim' peue na' a tang heul' luih ri bae'."

Seunyi Eun Peucawo'

3 A' mawo leumeus' ui' na' pe', htawm aen' meuh a htawm tem' ui' ri tuil' ri pe' lal' ok' ti ok'. Tem' ui' ri tuil' htawm lal' ok' aen' a ri pe' na' a meuh punta kaw a sawl' pe' kuit rot ri hk'a' leupaws se-

umeu' na'.²Ui' sum' kah pe' kuit rot ri leukah' lah' ce peue suip leukah' Eun Peucawo' seunga' chak' leumah' na' ce, mae' sum' kah pe' kuit rot ri leukah' Eun Peucawo' Cawo' teum' kawm htut e' lawtpon ku' cu Eun peue caee Eun Yesu' ce lah' a na'.

³Nanggal' ka na', kaw pe' htuk' ri yeuh ri yawng, cu yam vang tisut' na', kaw a kue' peue cang chaw hkam-ram peue mae' peue hot' ri yeuh hk'a' ta' nha' rai ka jawngkui' tu' ri na'.⁴Ce kaw lah', "Kati lah' ri uin' ri lah', 'Yesu' Eun kaw tang lih' na', ui' nawk a? Ling' ka hawc', tang' neum a' ta' a' ya e' na' yeum ce heul' na', ku ceu gawm' euc' na' a kaw n' meung seun' ri yam bhen' keute' na' tang' a ri hpanpleng' ri na'."

⁵Daecti ce guil ri pil lawng aen' na, tang' neum leumah' pang mao' na' kue' meuh a kopti leukah' Eun Peucawo' na'. Hawc' ko', bhen' keute' na' a lih neum leuum' na'. Leuum' na' a rop bhen' keute' na'.⁶Yam awn' na, leuum' na' a htum' bhen' keute' na', a yeuh bhen' keute' na' lulaic.⁷Kopti meuh a leukah' awn' a na', mao' mae' bhen' keute' maet' maen' na' a sawn' ri uin' ri meuh pun ku' kaw dum ri ri ngawl, meuh pun kaw ko' yam seunyi kaw taws' a' mu na' mae' meuh pun kaw yeuh peue un' leupaws seumeu' na' ce lulaic.

⁸Daecti a' mawo leumeus' ui' na' pe', pawlaee va ri pil a, yam ti seunyi Eun Peucawo' na' seun' a ti heng' neum, yam ti heng' neum Eun na' a seun' ti seunyi.

⁹Peucawo' hpaw Eun ca' yeuh kati ri na' kvai seun' ku' kuit peue ngon' na', daecti yeun' hkam Eun pun pe'. Kopti un' sum' kah Eun peue lulaic saec' ti peue, daecti Eun sum' kah peue taws' hpum' fuin map' ri ku peue.

¹⁰Seunyi Eun Peucawo' na' kaw a lih seun' peue con' ing' ce yam un' pawn peue kui' ri na'. Kuing' pang mao' na' a na' rai' mae' seng' laws' ri. Ku' kue' hk'a' naee keute' na' ce a na' pun ri dum ri ri ngawl. Bhen' keute' na' mae' ku' kue' hk'a' pang ka na' gawm' euc' a na' lulaic heul'.

¹¹Kopti ku ceu gawm' euc' na' kaw a lulaic yeuh keutit' na', pe' ci' kaw htuk' ri meuh peue yeuh sa' nhaw'?

Pe' kaw htuk' ri a' yu im' hk'a' naee hk'a' seunga' chak' ri mae' a' yu im' hot' hk'a' Eun Peucawo' ¹²yam sum' kah pe' seunyi Eun Peucawo' na' rot vae-vaee pe' buih ko' a na'. Seunyi yam awn' na, mao' na' a kaw lulaic ri ngawl na', ku' kue' hk'a' naee keute' na' a kaw naee ri kuc' ha' ka ngawl na'.¹³Daecti kopti Peucawo' jhawp' Eun kati ri na' keutawn' na', e' buih ko' mao' hk'u' mae' bhen' keute' hk'u' ku' meuh vang ut' ce peue leupaws seumeu' na'.

¹⁴Kop awn' na a' mawo leumeus' ui' na' pe', kopti buih ko' pe' ceu nang aen' ce na', co' ca' pe' yeuh Peucawo' Eun nyu pe' un' laee kue' vang ri, vang cutyawm' mae' kue' pe' hk'a' ren' kaw n' kuit sam' ran cumyen' hk'a' naee Heun na' reu'.¹⁵Kuit rot ri ka reu', hk'a' yeun' hkam Eun Peucawo' na' meuh a punta peue na' kaw peue pun hk'a' htut lawtpon na', se-un' awng' leumeus' e' Paw' lu eun ku tem' ri tuil' htawm ri pe' ri cu' yi Peucawo' tuil' Eun ri heun na'.

¹⁶Htawm Seunga' tem' eun na' ku ok' ka, tem' eun lawng seun' aen' a na' yeut. Hk'a' naee htawm eun na', a kue' lawng ku' nyhap' ri yawng na' ngon'. Peue un' yawng meulamlam ri un' keutawn' na' ce ko', ce hpawt' leukah' eun na' seun' hpawt' ce htawm Seunga' ton seubu na'. Ce ti hk'a' lulaic na' ing' ri ti meun.

¹⁷Kop awn' na a' mawo leumeus' ui' na' pe', kopti yawng pe' lawng aen' a hawc' na', punta kaw peue un' cang cop' long pe' kleuc' hk'a' ri heul' hot' peue un' hot' hk'a' mun' hk'a' sin' na' ce, mae' kaw pe' un' cang hk'uic' hk'ai' vang mok' keutawn' ri na', uin' sati ri reu'.¹⁸Daecti kah pe' huk' hawn' hk'a' naee mun' sin' Eun Yesu' Hkrit Cawo' Peucawo' Cawo' teum' kawm htut e' lawtpon na' Eun, mae' kah pe' gawm yawng Eun sae' caee' heun' reu'. Kah Eun kue' munhpung' maet' maen' rot ti cot' cu ri reu'. Amin.

1 Yo'han

Leukah' a'yu im'

1 Lawng leukah' a'yu im' kue' tang' neum yamla ri na' pao' ui' a ri pe'. A meuh leukah' pun e' ri mhawng', pun e' ri nyu a tam' ngai' ri, pun e' ri nawk a mae' pun e' ri paic' a ri ti' ri. ²A'yu aen' puc a ri lih hawc'. Pun ui' ri nyu a, pun ui' ri meuh sa' hki' ka mae' pao' ui' pe' yawng lawng cit' tip a'yu tip cot' cu aen' a hawc'. A ut' mae' A'kuiing' Eun, a puc-ti lih ri e' hawc'. ³Punta kaw pe' pun ri yeuh a' mawo ui' na', ui' pao' pe' yawng lawng ku' nyu ku' mhawng' ui' na'. Yeuh a' mawo ui' na' meuh a yeuh a' mawo mae' A'kuiing' mae' Kon' ai' Eun A'kuiing' Yesu' Hkrit Eun na'. ⁴Punta hk'a' ren' kaw n e' na' kaw a htonnuk, ui' tem' ri bu' htawm aen' na ri pe'.

A'yu im' hk'a' naee ku' ceng'

⁵Leukah' aen' na pun ui' ri mhawng' a ri Heun, ui' tang suip ti ris pe' mhawng' a. Peucawo' meuh Eun ku' ceng'. Hk'a' naee Eun na' a hkuin' kue' ku' duim' lawng na' saec' peunae'. ⁶E' saec' na' lah' ri yeuh a' mawo mae' Heun, daecti e' lawn kaw n' ut' hk'a' naee ku' duim' lawng na' ko', e' chi' lai, e' un' a'yu im' hk'a' naee ku' leupaws seumeu' na'. ⁷Daecti e' lawn a'yu im' hk'a' naee ku' ceng' na' seun' Peucawo' ut' Eun hk'a' naee ku' ceng' na', e' ku yeuh a' mawo puri. Nham' Eun Yesu' Hkrit kon' ai' Eun Peucawo' na' a saic' map' e' na' gawm' euc'.

⁸E' lawn lah' ri un' kue' map' ko', e' meuh peue chi' lai tu' ri na' meun. Hk'a' leupaws seumeu' na' a hkuin' kue' hk'a' naee e'. ⁹E' lawn hk'o' ri plo' map' ri ko', Eun kati keutawn' leupaws seumeu', Eun kaw plo' map' e'. Eun kaw saic' ri tec ku' un' leupaws seumeu' na' gawm' euc'. ¹⁰E' lawn lah' ri un' yeuh map' ko', yeuh e' Peucawo' Eun cang chi' lai. Leukah' Eun na' a un' kue' hk'a' naee a'yu e' na'.

Yesu' teum' kawm Eun e'

2 Kon' leumeus' ui' na' pe', punta kaw pe' un' yeuh map' na', ui' tem' ri bu' htawm aen' na ri pe'. Daecti a'nhaw' lawn yeuh map' na' ko', e' kue'

nang hk'o' a tang' e' ri A'kuiing' Eun. A meuh Yesu' Hkrit Cawo' leupaws seumeu' na' Eun. ²Eun meuh ku' tan saic' ri tec map' e' na'. A hkuin' meuh map' e' na' koe, a ku meuh map' peue bhen' keute' na' gawm' euc' yeut.

³E' lawn leuceng leukah' Eun na' ko', e' yawng yawng ri Eun meulamlam ri. ⁴A'nhaw' lawn lah', "Yawng ui' Eun", daecti eun lawn un' hot' ri yeuh ku' lah' Eun na' ko', hkawn' meuh eun nang chi' lai, ku' leupaws seumeu' na' a un' kue' hk'a' naee heun. ⁵Daecti a'nhaw' lawn leuceng leukah' Eun na' ko', hk'a' leumeus' keus Eun Peucawo' na' a htonnuk hk'a' naee heun. Kopti yeuh a keutit' na', e' yawng ut' ri hk'a' naee Heun. ⁶A'nhaw' lawn lah' ri ut' hk'a' naee Heun ko', eun htuk' ri a'yu im' seun' Yesu' Eun yeut.

Leukah' ritroe hk'u'

⁷A' mawo leumeus' ui' na' pe', hpaw ui' ca' to' ri tem' ri tuil' leukah' ritroe hk'u' na' ri pe', daecti a meuh leukah' ritroe hk'im' kue' ri pe' hawc' tang' neum yamla ka na'. Leukah' ritroe hk'im' awn' a meuh leukah' tawn mhawng' pe' na'. ⁸Daecti lah' ui' tem' leukah' ritroe hk'u' ri pe' a ku meuh. Pe' nyu leukah' ritroe aen' meuh a neumneum hk'a' naee Heun ri mae' hk'a' naee pe' ri, kopti ku' duim' lawng na' baet a ri rai' heul', ku' ceng' neum na' a ku buih ceng' hawc'.

⁹A'nhaw' saec' na' lah' ri ut' hk'a' naee ku' ceng' na', daecti eun lawn ces ri ec' awng' ri na' ce ko', kaw n' ut' eun hk'a' naee ku' duim' lawng na'. ¹⁰A'nhaw' lawn leumeus' ec' awng' ri na' ce ko', ut' eun hk'a' naee ku' ceng' na'. Hk'a' naee tu' eun na' a hkuin' kue' ku' yeuh eun seuduih ri. ¹¹Daecti a'nhaw' lawn ces ri ec' awng' ri na' ce ko', ut' eun hk'a' naee ku' duim' lawng na', eun lomlom hk'a' naee ku' duim' lawng na'. Kopti ku' duim' lawng na' yeuh ka eun ngai' fec', eun hkuin' yawng heul' ri tawngnhaw'.

¹²Kon' leumeus' ui' na' pe',

kopti pun pe' hk'a' plo' map' ri muis Eun Yesu' na' hawc', ui' tem' ri tuil' htawm ri pe'.

¹³A'kuiing' na' pe',

kopti yawng pe' Cawo' kue' tang' neum yamla ri na' Eun,
 ui' tem' ri tuil' htawm ri pe'.
 Nang nhum' na' pe',
 kopti pe pe' cawo' rai na' eun,
 ui' tem' ri tuil' htawm ri pe'.
 Kon' nyom na' pe',
 kopti yawng pe' A'kuiing' Eun na',
 ui' tem' ri tuil' htawm ri pe'.
¹⁴A'kuiing' na' pe',
 kopti yawng pe' Cawo' kue' tang' neum yamla ri na' Eun na',
 ui' tem' ri tuil' htawm ri pe'.
 Nang nhum' na' pe',
 kopti kaw' reng keuting pe',
 leukah' Eun Peucawo' na' a ut' hk'a' naee pe',
 pe' pe cawo' rai na' eun,
 ui' tem' ri tuil' htawm ri pe'.

Pawlaee leumeus' bhen' keute' na'

¹⁵Pawlaee leumeus' bhen' keute' na' mae' ku' kue' hk'a' pang ka na' ce. A'nhaw' lawn leumeus' bhen' keute' na' ko', hk'a' leumeus' keus Eun A'kuiing' na' a hkuin' kue' hk'a' naee heun. ¹⁶Kopti ku' kue' pang bhen' keute' na' gawm' euc', meuh ka ta' nha' ka hk'a' nham' keune na', ta' nha' ri ngai' na' mae' hpum' keuting ri ku' kue' ku' yeuh ri na', aen' ce a hkuin' lih neum A'kuiing' Eun daecti a lih neum bhen' keute' na'. ¹⁷Bhen' keute' na' mae' ta' nha' ka bhen' keute' na' baet a ri rai' heul', daecti peue hot' ri yeuh alo Eun Peucawo' na' ce kaw a' yu im' cot' cu ri.

Ransu Eun Hkrit

¹⁸Kon' leumeus' ui' na' pe', maet' maen' meuh a yam tisut' ka hawc'. Seun' pun pe' ri mhawng' ransu Eun Hkrit na' buih ing' ka na', saec' meuh maet' - maen' ransu Eun Hkrit na' a ing' heun' hawc'. Kop awn' na, e' yawng aen' ce meuh a yam tisut' ka hawc'. ¹⁹Peue awn' puc ce ri hk'ai' e' hawc'. Daecti neumneum ka na' ko', ce hkuin' meuh peue e'. Kopti ce lawn meuh peue e' ko', na' ce ut' mae' e' yeut. Daecti puc ce ri heul' na', ce tuil' e' nyu un' meuh ri peue e' saec' ti peue.

²⁰Daecti kopti pun pe' ri leuk ri uin' ri ri Cit' seunga' na' neum Eun Cawo' seunga' na' hawc', pe' yawng ku' meuh neum na' ku peue ri. ²¹Tem' ui' ri bu' htawm ri pe' na' hpaw a ca' meuh kopti un' yawng pe' ku' meuh neum na', daecti meuh a kopti yawng pe' a, mae'

kopti un' kue' a ku' chi' lai lih neum ku' meuh neum na' saec' ti ceu. ²²A'nhaw' ci' meuh peue cang chi' lai? Meuh a ku' un' rap ri ti Yesu' meuh Eun Hkrit na' eun. Peue yeuh keutit' na' meuh eun ransu Eun Hkrit. Eun tecla A'kuiing' Eun mae' Kon' ai' Eun. ²³Peue tecla Kon' ai' na' Eun, un' kue' eun A'kuiing'. Peue rap ri ti Kon' ai' na' Eun, eun ku' kue' A'kuiing' yeut.

²⁴Kah ku' pun pe' ri mhawng' tang' neum yamla ri na' kue' hk'a' naee pe' reu'. Ceu nang aen' ce lawn kue' hk'a' naee pe' ko', pe' ku' kaw ut' hk'a' naee Kon' ai' Eun mae' A'kuiing' Eun yeut. ²⁵Aen' ce a meuh kati tuil' Eun ri e'. A meuh cit' tip a' yu tip cot' cu na'.

²⁶Ui' tem' ri bu' htawm lawng ce peue co' ca' ri cop' pe' kleuc' hk'a' ri na' ri pe'. ²⁷Pe' ri ko', kopti pun pe' hk'a' leuk Eun ri ti hawc' na', pe' hkuin' kaw laee lo' peue sangsawn' ri. Daecti kopti hk'a' leuk Eun ri ti na' sangsawn' a pe' ri ku' ceu na' mae' hk'a' leuk Eun ri ti awn' meuh a ku' neumneum, a un' laee meuh ku' chi' lai na', pe' na' ut' hk'a' naee Eun hot' seun' hk'a' leuk Eun ri ti na' sangsawn' ka na' reu'.

²⁸Maet' maen', kon' leumeus' ui' na' pe', yam puc Eun ri lih na' punta kaw e' kue' hpum' hat' han' un' pun ri kaic nanggal' Eun na', ut' hk'a' naee Eun reu'.

²⁹Mi lawn yawng leupaws seumeu' Eun ko', mi ku' yawng peue yeuh ku' leupaws seumeu' na' keut' ce neum Heun ri ku' peue ri.

Kon' hk'i Eun Peucawo'

3 Peucawo' Eun ci' pe leumeus' e' a' neng na' kuit ti mhawng' a reu'. Eun lah' e' meuh kon' hk'i Eun Peucawo', e' ku' meuh a yeut. Peue bhen' keute' na' un' yawng ce e', kopti un' yawng ce Eun. ²A' mawo leumeus' ui' na' pe', maet' maen' meuh e' kon' hk'i Eun Peucawo' hawc'. Hk'a' nanggal' ka na' e' ci' kaw yeuh sa'nhaw' na', e' hkuin' yawng a. Daecti ku' yawng e' na' yam tang puc Eun ri lih na', e' kaw seun' Heun ri. Kopti Eun lawn yeuh sa'nhaw' ko', e' kaw nyu Eun yeuh sa'awn'. ³Peue keutui' hpum' a yeuhki' hk'a' naee Heun na' peue ku' peue, ce kaw yeuh tu' ri na' seunga' chak' seun' seunga' chak' Heun na'.

⁴Peue yeuh map' na' ce gawm' euc', yeuh ce ku' kleuc' ri leukah' ritroe na'. Neumneum ka na' ko', map' na' meuh a ku' yeuh ku' kleuc' ri leukah' ritroe na'. ⁵Daecti punta kaw Eun saic' ri tec map' e' na' Eun lih, mae' hk'a' naee Heun na' a hkuin' kue' map' na' pe' yawng a. ⁶Peue ut' hk'a' naee Heun na' ce a hkuin' laee kue' nang kaw' yeuh map' na' saec' ti peue. Peue kaw' yeuh map' na' un' nang pun ce ri nyu yawng Eun.

⁷Kon' leumeus' ui' na' pe', pawlaee tuil' peue cop' ri yeuh pe' kleuc' hk'a' ri. Peue yeuh ku' cawp' na' meuh ce peue leupaws seumeu' seun' leupaws seumeu' Heun na'. ⁸Peue yeuh map' na' ing' ce neum seuca' na', kopti tang' neum yamla ka na' seuca' na' yeuh a map' na'. Kon' ai' Eun Peucawo' lih Eun na' meuh a kop kaw Eun yeuh kan' ka seuca' na' lu. ⁹Peue keut' lih neum Peucawo' Eun na' ce a hkuin' laee kue' nang kaw' yeuh map' na' saec' ti peue, kopti a' yu hk'u' Eun Peucawo' na' kue' a hk'a' naee ce. Ce hkuin' kaw laee cang suip ri yeuh map' na', kopti keut' ce lih neum Peucawo' Eun na'. ¹⁰Meuh a kopti aen' a na', e' cang yawng a a' nhaw' ci' meuh kon' hk'i Eun Peucawo', a' nhaw' ci' meuh kon' hk'i ka seuca' na'. A' nhaw' lawn un' yeuh ku' cawp' mae' un' leumeus' ec' awng' ri na' ce ko', un' meuh eun kon' hk'i Eun Peucawo'.

Leumeus' puri

¹¹Pun pe' ri mhawng' leukah' aen' na tang' neum yamla ri na', "Kaw e' htuk' ri leumeus' puri." ¹²Pawlaee yeuh ri seun' Kai' na' ut' eun hk'a' seuca' rai na', eun toh awng' ri na' eun. A ci' meuh kop keunhaw', eun vae' toh awng' ri na' eun? Meuh a kopti ku' yeuh eun na' rai ka daecti ku' yeuh eun awng' eun na' a leupaws seumeu' na'. ¹³Ec' awng' na' pe', bhen' keute' na' a lawn ces ri pe' ko', pawlaee am'. ¹⁴Yawng e' pun e' ri pon vang yeum na' e' lec vang civit im' na' meuh a kop-ti leumeus' e' ec' awng' ri na' ce. A' nhaw' lawn un' kue' hk'a' leumeus' keus na' ko', kaw' ut' eun hk'a' naee vang yeum na'. ¹⁵A' nhaw' lawn ces ri ec' awng' ri na' ce ko', meuh eun nang toh peue. Yawng pe' peue toh peue na' un' kue' ce cit' tip a' yu tip cot' cu na' hk'a' naee Peucawo' Eun saec' ti peue.

¹⁶Meuh a kopti aen' a na', e' saec' mae' yawng hk'a' leumeus' keus na' a ci' meuh keunhaw', meuh a kopti Yesu' Hkrit tan Eun a' yu ri pun e' na'. Saec' e' ri e' htuk' ri tan a' yu ri na' pun ec' awng' ri na' ce yeut. ¹⁷A' nhaw' saec' na' kue' hk'il' leumuil eun saec' na' nyu ec' awng' ri na' hk'o' ce tuckyak, daecti eun lawn un' tuckyak ri ce ko', hk'a' leumeus' keus Eun Peucawo' na' a ci' kaw cang ut' hk'a' naee eun yeuh sa' nhaw'? ¹⁸Kon' leumeus' ui' na' pe', pawlaee leumeus' puri ri leukah' mae' ri moeng ri na' palkoe, daecti leumeus' puri ri ku' yeuh mae' ku' leupaws seumeu' na' reu'. ¹⁹Meuh a kopti aen' a na', e' cang yawng ut' ri hk'a' leupaws seumeu' na' mae' e' cang tang' hpum' ri cumyen' nanggal' Eun Peucawo' ²⁰saec' meuh yam hpum' e' na' tang' a map' ri tu' e' na', kopti Peuca-

wo' keuting Eun hk'ai' hpum' e' na' mae' Eun yawng ku' ceu na' gawm' euc'.

²¹A' mawo leumeus' ui' na' pe', hpum' e' na' a lawn un' tang' map' na' ri e' meun ko', e' kaw hpum' keutawn' ri nanggal' Eun Peucawo'. ²²E' kaw pun ku' hk'o' e' ri Heun na' ku' ceu ka, kopti leuceng e' ri ti leukah' tuil' Eun na' mae' yeuh e' ku' htuk' hpum' Eun na'. ²³Leukah' tuil' Eun na' ko' meuh a kah e' ri yum' muis Eun Yesu' Hkrit Kon' ai' Eun Peucawo' na', mae' kah e' leumeus' puri seun' leukah' tuil' Eun ri e' na'. ²⁴A' nhaw' lawn leuceng ri yeuh leukah' tuil' Eun na' ko', ut' eun hk'a' naee Peucawo' Eun, Peucawo' Eun ku' ut' hk'a' naee heun. Meuh a kopti aen' a na', e' cang yawng Peucawo' ut' Eun hk'a' naee e', e' yawng a yeuhki' ri Cit' seunga' tuil' Eun ri e' na'.

Caet ri nawk cit' na'

4 A' mawo leumeus' ui' na' pe', pawlaee yum' cit' na' ce gawm' euc' ka, daecti cit' awn' a ci' na' meuh nang lih neum Peucawo' Eun meuh un' meuh caet ri nawk a reu'. Kopti peue guil ri meuh peue suip leukah' Eun Peucawo' na' ing' ce pang bhen' keute' na' heun' hawc'. ²Cit' seunga' lih neum Peucawo' Eun na' a ci' yeuh sa' nhaw' kaw pe' cang yawng a yeuhki', meuh a cit' rap ri ti Yesu' Hkrit lih meuh Eun peue neum Peucawo' Eun na'. ³Daecti cit' un' rap ri ti Yesu' Hkrit Eun na' ce gawm' euc', un' meuh ce cit' lih neum Peucawo' Eun. Daecti ce meuh ransu Eun Hkrit. Seun' pun pe' ri mhawng' cit' aen' kaw ce ing' na', saec' meuh maet' maen' ce ku' ut' pang bhen' keute' na' hawc'.

⁴Kon' leumeus' ui' na' pe', meuh pe' peue ing' neum Peucawo' Eun, pe' pe' peue awn' ce hawc'. Kopti ku' ut' hk'a' naee pe' na' keuting Eun hk'ai' ku' ut' pang bhen' keute' na' ce. ⁵Peue awn' ce ko' ing' ce neum bhen' keute' na'. Kop awn' na, ce lah' leukah' to' ri ri bhen' keute' na', peue bhen' keute' na' ce ku' leuceng leukah' ce na'. ⁶E' ri ko', ing' e' neum Peucawo' Eun. A' nhaw' lawn yawng Peucawo' Eun ko', eun kaw leuceng leukah' e' na'. Daecti a' nhaw' lawn un' ing' neum Peucawo' Eun ko', eun kaw un' leuceng leukah' e' na'. Kop awn' na, cit' nangnhaw' a ci' meuh cit' leupaws seumeu' na' cit' nangnhaw' a ci' meuh cit' caec' na', e' ku' pun ri yawng a na'.

Peucawo' meuh Eun hk'a' leumeus' keus

⁷A' mawo leumeus' ui' na' pe', e' leumeus' puri pawh, kopti hk'a' leumeus' keus na' lih a neum Peuca-

wo' Eun. Peue cang leumeus' na' keut' ce neum Peuca-
wo' Eun, ce yawng Eun ku peue ri. ⁸Peue un' cang
leumeus' na' un' yawng ce Peucawo' Eun, kopti Peuca-
wo' meuh Eun hk'a' leumeus' keus na'. ⁹Meuh a kopti
aen' a na', e' saec' mae yawng Peucawo' leumeus'
Eun e' yeuh sa' nhaw' na', meuh a kopti punta kaw e'
pun civit ri kopti Kon' ai' Eun na', Eun cus' Kon' ai' ti
peue ri Eun lih pang bhen' keute' na'. ¹⁰Aen' na ko'
meuh a hk'a' leumeus' keus na'. Hpaw a ca' meuh
leumeus' e' Peucawo' Eun, daecti a meuh Peucawo'
leumeus' Eun e'. Punta Kon' ai' Eun na' kaw Eun meuh
ku' tan saic' map' e' na', Eun cus' Eun lih. ¹¹A' mawo
leumeus' ui' na' pe', Peucawo' Eun lawn leumeus' e'
htan' aen' na ko', e' ku htuk' ri leumeus' puri. ¹²A' n-
haw' hkuin' duing nyu Peucawo' Eun saec' ti peue,
daecti e' lawn leumeus' puri ko', Peucawo' Eun ku kaw
ut' hk'a' naee e', mae' hk'a' leumeus' keus Eun na' a
ku kaw htonnuk hk'a' naee e'.

¹³Ut' e' hk'a' naee Peucawo' Eun, Eun ku ut' hk'a' -
naee e' ri, e' pun ri yawng a, kopti tuil' Eun Cit' seun-
ga' ri ri e' na'. ¹⁴Pun e' ri nyu pun e' ri hkam' sa' hki'
ka A' kuiing' cus' Eun Kon' ai' ri na' Eun meuh Cawo'
htut ka bhen' keute' na'. ¹⁵A' nhaw' lawn rap ri ti Yesu'
meuh Eun Kon' ai' Eun Peucawo' ko', Peucawo' Eun ku
ut' hk'a' naee heun, eun ku ut' hk'a' naee Peucawo' Eun
yeut. ¹⁶Meuh a kopti aen' a na', e' pen' yawng pen'
tah' hpum' ri ri hk'a' leumeus' keus Eun Peucawo' ri e'
na'. Peucawo' meuh Eun hk'a' leumeus' keus na'. A' n-
haw' lawn ut' hk'a' naee hk'a' leumeus' keus na' ko',
eun ku ut' hk'a' naee Peucawo' Eun, Peucawo' Eun ku
ut' hk'a' naee heun yeut. ¹⁷Meuh a kopti aen' a na',
hk'a' leumeus' keus na' a htonnuk hk'a' naee e' punta
kaw e' kue' vang tah' hpum' yam seunyi taws' a' mu
na'. Kopti e' ku seun' Heun ri pang bhen' keute' aen'
na. ¹⁸Peue kue' hk'a' leumeus' keus na' un' laee lhat'
eun ri keunhaw', kopti hk'a' leumeus' keus htonnuk na'
yeuh a ku' hk'o' lhat' na' rai' heul'. Kopti hk'a' lhat'
na' ko' to' a ri ri hk'a' ciyang na'. Peue lhat' na' ce
ko', hk'a' leumeus' keus na' un' nang htonnuk a hk'a' -
naee ce.

¹⁹Leumeus' e' na' kopti leumeus' Eun e' nanggal'.
²⁰A' nhaw' saec' na' lah', "Leumeus' ui' Peucawo'
Eun", daecti eun lawn kawn' ces ri ec' awng' ri na' ce
ko', chi' lai eun. Kopti eun lawn un' leumeus'
ec' awng' nyu eun ri ngai' ri na' ce ko', eun hkuin' kaw
cang leumeus' Peucawo' un' nyu eun ri ngai' ri na'
Eun. ²¹Peucawo' Eun tuil' ri uin' leukah' ri e' yeuhki',
"Peue leumeus' Peucawo' Eun na', eun ku kaw pun ri
leumeus' ec' awng' ri na' ce yeut."

Hk'a' yum' pe bhen' keute'

⁵Peue yum' Yesu' meuh Eun Hkrit na' ce ku peue,
keut' ce neum Peucawo' Eun. Peue leumeus' A' kui-
ing' Eun na' ce ku peue, ce ku leumeus' Kon' Eun na'
Eun yeut. ²Meuh a kopti aen' a na', e' yawng leumeus'
e' peue meuh kon' Eun Peucawo' na' ce gawm' euc' ri
leumeus' e' Peucawo' Eun mae' hot' e' ri yeuh
leukah' tuil' Eun na' ce. ³Leumeus' Peucawo' Eun na'
meuh a hot' ri yeuh leukah' tuil' Eun na'. Leukah' tu-
il' Eun na' a hkuin' to' ri meuh ku' kaw yeuh un' pun.
⁴Kopti peue keut' neum Peucawo' Eun na' ce ku peue,
pe ce bhen' keute' na', mae' hk'a' yum' e' aen' na
pe a bhen' keute' na'. ⁵A' nhaw' ci' pe bhen' keute'
na'? Meuh a peue yum' Yesu' meuh Eun Kon' ai' Eun
Peucawo' na' ce palkoe.

Sa' hki' lawng Yesu'

⁶Yesu' Hkrit ing' Eun ri leuum' mae' nham'. Eun
hkuin' ing' ri leuum' palkoe, daecti Eun ing' ri leuum'
mae' nham' na'. Cit' seunga' na' a meuh sa' hki' ka,
kopti Cit' seunga' na' meuh a ku' neum. ⁷Kopti ku'
meuh sa' hki' ka na' kue' a loe' ceu. ⁸A meuh Cit' se-
unga', leuum' mae' nham'. Ku' loe' ceu aen' a caw-
p' maen puri. ⁹E' lawn rap ri ti sa' hki' ce peue na' ko',
sa' hki' Eun Peucawo' na' a jaen keuting hk'ai' awn'
na, kopti meuh a sa' hki' Eun Peucawo' lawng Eun Kon'
ai' na'. ¹⁰Peue yum' Kon' ai' Eun Peucawo' na' kue'
ce sa' hki' aen' a hk'a' naee hpum' ri. Peue un' yum'
na' ce lah' Peucawo' Eun chi' lai, kopti un' yum' ce
sa' hki' tuil' Eun Peucawo' lawng Eun Kon' ai' Eun
na'. ¹¹Sa' hki' aen' a meuh Peucawo' tuil' Eun cit' tip
a' yu tip cot' cu ri e' na'. A' yu aen' a kue' hk'a' naee
Eun Kon' ai' Eun na'. ¹²Peue kue' Kon' ai' Eun Peuca-
wo' na' kue' ce a' yu. Peue un' kue' Kon' ai' Eun na'
ce un' kue' a' yu.

Vang hk'on' leukah'

¹³Punta kaw pe' yawng pun ri cit' tip a' yu tip cot' cu
na' hawc' na', ui' tem' ri tuil' ceu nang aen' ce ri peue
yum' muis Eun Kon' ai' Eun Peucawo' na' pe'. ¹⁴Aen'
a meuh a vang tah' hpum' kue' e' yam na' e' ing'
nanggal' Eun Peucawo'. A meuh ku' e' lawn hk'o' ku'
cawp' alo Eun ti ri ceu ko', Eun kaw leuceng a. ¹⁵Mae'
e' lawn yawng leuceng Eun ku' hk'o' e' na' ko', yam
hk'o' e' ku' ti ri ceu ri Heun na' e' yawng kaw ri pun
ku' hk'o' e' na' ri Heun.

¹⁶A'nhaw' lawn nyu ec'awng' ri na' yeuh eun map' un' kuing' ri yeum ko', eun htuk' ri hk'o' mun'. Peucawo' Eun kaw tuil' a'yu ri peue yeuh map' awn' eun. Ku' sum' lah' ui' na' meuh a peue yeuh map' un' kuing' ri yeum na'. Map' kuing' ri yeum na' a ku kue'. Ui' hkuin' to' ri lah' hk'o' mun' pun peue yeuh map' yeuh keutit' na' ce. ¹⁷Ku' un' leupaws seumeu' na' gawm' euc' meuh a map'. Daecti map' un' kuing' ri yeum na' a ku kue' yeut.

¹⁸Yawng e' peue keut' neum Peucawo' Eun na', un' laee suip ce ri yeuh map'. Kon' ai' keut' neum Peucawo' Eun na' Eun kaw rok' sa' ce. Seuca' rai na' a hkuin'

laee cang yeuh keunhaw' ri ce. ¹⁹Yawng e' meuh ri kon' Eun Peucawo', mae' yawng e' bhen' keute' na' gawm' euc' ut' ka hk'a' ruim vang u' peung ka seuca' rai na'. ²⁰Punta kaw e' cang yawng Peucawo' neumneum na' Eun mae' kaw e' ut' hk'a' naee Heun lah' ka na' a meuh ut' e' hk'a' naee Kon' ai' Eun na' Eun Cawo' Yesu' Hkrit Eun, Eun meuh Peucawo' neumneum meuh cit' tip a'yu tip cot' cu, Kon' ai' Eun Peucawo' na' Eun lih tuil' e' is' hpum' cang yawng na' e' ku yawng a yeut.

²¹Kon' leumeus' ui' na' pe', pawlaee va ri ceu' ruphtu na' vel a reu'.

2 Yo 'han

1 Htawm ti ok ' aen ' na ko ' meuh ui ' ro ' kan nang kawt,

ui ' tem ' ri tuil ' a ri beun ' leuk ri uin ' ri na ' pa ' mae ' kon ' hk'i pa ' na ' pe '. Leumeus ' ui ' pe ' hk'a ' - nae hk'a ' leupaws seumeu ' na '. A hkuin ' meuh ui ' ri koe, daecti saec ' meuh peue yawng hk'a ' leupaws seumeu ' na ' ce gawm ' euc ' ce ku leumeus ' pe ' yeut.

²Kopti meuh a hk'a ' leupaws seumeu ' kue ' hk'a ' nae e ' ku ' kaw ut ' mae ' e ' cot ' cu na ' , ui ' leumeus ' pe ' .

³Kah mun ' sin ' , hk'a ' tulyak mae ' hk'a ' kuit nyawk ' kuit sam ' ran cumyen ' lih neum Kuing ' Peucawo ' Eun na ' mae ' neum Yesu ' Hkrit Cawo ' meuh Kon ' ai ' Eun A ' kuiing ' na ' ut ' mae ' e ' hk'a ' nae hk'a ' leupaws seumeu ' mae ' hk'a ' leumeus ' keus na ' reu ' .

A 'yu im ' hk'a ' nae hk'a ' leumeus ' keus

⁴Kopti pun ui ' ri nyu kon ' hk'i pa ' na ' ce ngon ' a 'yu im ' ce hot ' hk'a ' leupaws seumeu ' tuil ' Eun A ' kuiing ' ri e ' na ' , ui ' ren ' kawn nyawk ' . ⁵A ' ya beun ' leumeus ' ui ' na ' pa ' , maet ' maen ' hpaw ui ' ca ' to ' ri tem ' ri tuil ' leukah ' ritroe hk'u ' ri pa ' , daecti a meuh leukah ' ritroe kue ' ri e ' hawc ' tang ' neum yamla ka na ' . Awn ' a meuh kah e ' leumeus ' puri reu ' . ⁶Hk'a ' leumeus ' keus na ' a meuh a 'yu im ' hot ' leukah ' ritroe Eun ri leuceng ri ti ku ' pun pa ' ri mhawng ' tang ' neum yamla ka na ' .

Leukah ' ritroe Eun na ' meuh a 'yu im ' pa ' hk'a ' nae hk'a ' leumeus ' keus na ' .

⁷Peue chi ' lai un ' rap ri ti Yesu ' Hkrit lih keut ' Eun ri meuh peue na ' ing ' ce pang bhen ' keute ' na ' heun ' peue. Peue awn ' ce meuh peue cang chi ' lai, ce meuh ransu Eun Hkrit. ⁸Punta ku ' yeuh pe ' hawc ' na ' kaw a un ' cang rai ' heul ' mae ' punta kaw pe ' pun lapsawng ' htonnuk na ' , uin ' sati ri reu ' . ⁹A ' nhaw ' lawn yeuh pon yeuh lheu ' mae ' un ' suip ri hot ' ri yeuh ku ' sangsawn ' Eun Hkrit na ' ko ' , hpaw eun ca ' kue ' Peucawo ' . Daecti a ' nhaw ' lawn suip ri hot ' ri yeuh ku ' sangsawn ' Eun na ' ko ' , eun kue ' A ' kuiing ' mae ' Kon ' ai ' ka gawm ' al ' . ¹⁰A ' nhaw ' lawn ing ' ri pe ' eun un ' ti ku ' sangsawn ' aen ' na ing ' ko ' , pawlaee rap ri ti eun ing ' nang nya pe ' , a ' ko ' pawlaee rap ri ti eun. ¹¹A ' nhaw ' lawn rap ri ti eun ko ' , eun ku pa ' ku ' rai yeuh eun hkawn ' a yeut.

Leukah ' tisut '

¹²Ui ' saec ' na ' kawn ' kue ' ku ' sum ' tem ' ri bu ' ri pe ' heun ' ceu ko ' , daecti ui ' un ' sum ' tem ' a ri keunhat ' mae ' lamuik ' . Punta hk'a ' ren ' kawn kuit sam ' ran e ' na ' kaw a htonnuk, ui ' keutui ' hpum ' ri sum ' ing ' hk'eup ' nyu ri leukah ' mae ' pe ' .

¹³Awng ' beun ' pa ' ku ' Peucawo ' leuk Eun ka na ' , kon ' hk'i ka na ' ce ku tawm ' a ce lah ' ri leunyeng ri pa ' .

3 Yo 'han

HTAWM TEM ' YO ' HAN OK ' LEUOE '

1 Htawm ti ok ' aen ' na ko ' meuh ui ' ro ' kan nang kawt,

ui ' tem ' ri tuil ' a ri Gaias ' a ' mawo leumeus ' ui ' na ' mi. Leumeus ' ui ' mi hk'a ' naee vang leupaws seumeu ' na ' .

²A ' mawo leumeus ' ui ' na ' mi, seun ' civit mi na ' buih chak ' ka heul ' na ' ui ' hk'o ' mun ' pun kaw mi ut ' nyawk ' ut ' sam ' ran mae ' hk'a ' naee ku ceu mi na ' kaw a meulamlam ri. ³Yam ec ' awng ' na ' ing ' hkam ' ce sa ' hki ' lawng kati keutawn ' mi ri ku ' leupaws seumeu ' na ' mae ' suip mi ri a ' yu im ' hk'a ' naee ka na ' , ui ' ren ' kawn nyawk ' . ⁴Pun ui ' ri mhawng ' kon ' hk'i ui ' na ' suip ce ri a ' yu im ' hk'a ' naee ku ' leupaws seumeu ' na ' , ku ' yeuh ui ' ren ' kawn lheu ' awn ' a na ' a hkuin ' laee kue ' keunhaw ' saec ' ti ceu.

⁵A ' mawo leumeus ' ui ' na ' mi, mi saec ' na ' un ' yawng ec ' awng ' awn ' ce daecti mi kati keutawn ' ri ku ' yeuh mi ri ce na ' . ⁶Peue awn ' ce hkam ' sa ' hki ' lawng hk'a ' leumeus ' keus mi na ' nanggal ' ce muk kon ' Hkrit na ' hawc ' . Mi lawn teum ' kawm ce cang suip ri yeuh hot ' ku ' kuing ' hpaw mae ' munhpung ' Eun Peucawo ' na ' heul ' hk'a ' nanggal ' ko ' , chak ' ka. ⁷Ce saec ' na ' un ' pun ku ' teum ' kawm ce peue un ' meuh muk kon ' Hkrit na ' ko ' , daecti ce pucti heul ' pun Hkrit Eun. ⁸Kop awn ' na, punta kaw e ' cang yeuh kan ' pun ku ' leupaws

seumeu ' na ' tiduih ' na ' , e ' na ' htuk ' ri rap ri ti teum ' kawm peue yeuh keutit ' na ' ce.

⁹Tem ' ui ' ri bu ' htawm ri muk kon ' Hkrit na ' pe ' , daecti Diotrefes ' ku ' sum ' meuh peue keuting na ' eun un ' sum ' rap ri ti leukah ' e ' na ' . ¹⁰Kop awn ' na, ui ' lawn ing ' ri pe ' ko ' , ui ' na ' lah ' pe ' mhawng ' ku ' yeuh eun na ' . Eun peusah ' nyoe e ' . A hkuin ' nang hk'o ' , eun un ' rap ri ti ec ' awng ' na ' ce. Lheu ' awn ' na, peue sum ' rap ri ti na ' ce eun ham ' ce. Hawc ' ko ' , eun ra ce hk'uih hk'ai ' muk kon ' Hkrit na ' .

¹¹A ' mawo leumeus ' ui ' na ' mi, pawlaee hot ' ri yeuh ku ' rai na ' , daecti hot ' ri yeuh ku ' chak ' na ' reu ' . Peue yeuh ku ' chak ' na ' ing ' eun neum Peucawo ' Eun. Peue yeuh ku ' rai na ' eun un ' duing nyu Peucawo ' Eun.

¹²Peue gawm ' euc ' na ' suk ' seun ' ce Demetri ' as ' eun. Ku ' leupaws seumeu ' na ' a ku hkam ' sa ' hki ' eun yeut. Saec ' meuh ui ' ri ui ' ku suk ' seun ' eun. Mi ku yawng sa ' hki ' ui ' na ' meuh a neumneum.

Leukah ' tisut '

¹³Ui ' saec ' na ' kawn ' kue ' ku ' sum ' tem ' ri bu ' ri mi heun ' ceu, daecti ui ' un ' sum ' tem ' a ri pit ' mae ' lamuik ' . ¹⁴Un ' ling ' ko ' , ui ' keutui ' hpum ' ri kaw heul ' hk'eup ' mi, u mi.

¹⁵Kah hk'a ' kuit nyawk ' kuit sam ' ran cumyen ' na ' kue ' ri mi reu ' . A ' mawo ut ' maen ' na ' ce ku tawm ' a ce lah ' ri leunyeng ri mi. Lah ' a ' mawo ut ' mae ' mi na ' ce mhawng ' leunyeng ui ' ri ce ku peue ri yeut.

Yu'da

1 Htawm ti ok' aen' na ko', meuh ui' Yu'da meuh mhai' Eun Yesu' Hkrit meuh awng' eun Yakop',

ui' tem' ri tuil' a ri peue Peucawo' klawng Eun ri ti ku' Kuing' Peucawo' leumeus' Eun mae' ku' pun hk'a' Yesu' Hkrit rokxa' Eun na' pe'.

²Kah hk'a' tuckyak, hk'a' kuit nyawk' kuit sam' ran cumyen' mae' hk'a' leumeus' keus Eun Peucawo' na' kue' htonnuk ri pe' reu'.

Map' mae' hk'a' lulaic ce peue un' leupaws seumeu'

³A' mawo leumeus' ui' na' pe', ui' saec' na' sum' tem' ri tuil' lawng hk'a' htut lawtpon kue' e' seun' puri na' ri pe' nyawk', daecti ui' kuit pe' na' chak' ri lo' tem' ri tuil' kaw' reng peueng' suik' pun hk'a' yum' ku' un' cang leuploh' plin' ri ri peue Eun Peucawo' na' ce na'. ⁴Kopti peue ngon' na' ra ce ri ing' lec hk'a' naee muk pe' na'. Leukah' taws' a' mu ri peue awn' ce na' tem' a ri uin' ri ling' hawc'. Ce meuh peue un' leupaws seumeu', un' hkopyawm' ri Peucawo' Eun. Ce hpawt' mun' Eun na' meuh licmat ahkvang yeuh ku' un' leupaws seumeu' na'. Ce un' rap ri ti Yesu' Hkrit Cawo' meuh Cawo' a' yu ku' meuh Peucawo' e' ti peue yawo na' Eun.

⁵Pe' saec' na' yawng lawng aen' ce meulamlam ri ko', daecti ui' sum' kah pe' pawn a bae lawng Peucawo' ploe' Eun peue ri na' ce pucti heul' hk'ai' kuing' E'ji' tu' na'. Daecti hawc' awn' na, Eun tang yeuh peue un' yum' ri na' ce lu. ⁶Saec' meuh in' hpom ku' un' jhawp' ri ti an' nya tuil' Eun Peucawo' na' ce tecla vang ut' ri na', punta kaw ce ko' seunyi taws' a' mu keuting awn' na, Peucawo' Eun hk'awng' ri uin' ce vang duim' lawng na'. Eun mawt ce ri mu' lhec' cot' cu na'. ⁷Seun' awn' na, veng So' dom, veng Gomorah mae' veng caonao' na' ce un' pen' mak' tu' ri na' ce yeuh ku' un' leupaws seumeu', ce hkuit' nawng' tang' mae' me taw' me pleh puri. Veng awn' ce ko', a meuh sa' hki' pun ce peue kaw pun ri hkam' hk'a' ciyang ri nang ngawl cot' cu na'. ⁸Seun' awn' na, seura' caec' ku' it' ri leumu awn' ce yeuh tu' ri na' pit ku' hk'aw'

jeuk. Ce un' rap ri ti ti' ca Eun Peucawo' na'. Ce lah' ku' un' nawpsang ri cawo' ut' pang mao' na' ce.

⁹Saec' meuh Mi' hkela' ku' meuh ro' keuting ce in' hpom na' eun yam htu' hting' eun seuca' rai na' kopti lawng tu' yeum eun Mo' se na', eun un' hat' ri tang' a' mu, un' hat' ri lah' leukah' un' nawpsang ri seuca' rai na'. Eun lah' yawo, "Tae' Peucawo' Eun lak' yeuh ku' sum' yeuh Eun ri mi na' reu'." ¹⁰Daecti seura' caec' awn' ce htu' hting' lah' ku' un' nawpsang na' ri ku' un' yawng ce na'. Yeuh ce keutit' na', ce hot' ri yeuh ku' yawng meun ri na' seun' sat' un' cang kuit ri nawk na'. Meuh a kop yeuh ce keutit' na', a yeuh ce lulaic heul'.

¹¹Seura' caec' na' kaw ce pun ri hkam' hk'a' jha' na'. Hot' ce hk'a' long eun Kai' na' na' heul'. Kopti keue' ce ri pal vang kaw ri pun, ce pun ri lec vang kleuc' eun Balam na'. Ce kaw pun ri lulaic seun' Hkorah fuin eun Peucawo' Eun na'.

¹²Ce meuh peue yeuh pawe hk'a' leumeus' keus pe' na' bok. Ce hk'asom' tiduih' mae' pe' mae' un' ana' ri. Ce seun' nang go' kon' yung' un' kuit pun kon' yung' ri, kuit yawo pal pun tu' ri na' koe. Ce meuh putum' un' kue' lhe' ku' guil' puing' ka heul' na'. Ce meuh kleum' pli' saec' yam pli' ka a hkuin' pli'. Ce kaw pun ri hkam' ruic ri tec ri gawm' res ri na'. Ce kaw pun ri yeum lal' pok. ¹³Ce meuh ba leuum' mha' seumut' un' cawp' hk'a' ri hpo' lok bai hk'o' kaic ri na' pucti lih. Ce meuh seumeueng' heul' vok' vek' hk'a' ri. Vang duim' lawng na' a uin' ri meuh pun ce cot' cu.

Leukah' tamnai eun E' nawk'

¹⁴Tang' neum cu Adam na' rot a' res cu ri cu E' nawk' na', E' nawk' eun tamnai ri uin' lawng ce seura' caec' na' yeuhki', "Keue' reu', Peucawo' buih ing' Eun mae' peue seunga' chak' hk'o' mhuin' hk'o' saen' ri na' ce. ¹⁵Ing' Eun na' a meuh punta kaw Eun taws' a' mu ri peue gawm' euc' mae' punta peue un' hkopyawm' Eun na' ce gawm' euc' kaw ce kuit rot ri hk'a' un' leupaws seumeu' yeuh ce hk'a' naee hk'a' un' leupaws seumeu' na' mae' kuit rot ri leukah' un' chak' lah' ce ri Peucawo' Eun na'." ¹⁶Peue aen' ce cang vuin,

cang kockec ku' kleuc', hot' ri yeuh ku' ta' nha' rai ri na', cang suk' seun' tu' ri meun mae' cang yeuh ku' chak' suk' seun' peue mae' ku' kaw ri pun na'.

Leukah' tamnai ce peue caee Eun Yesu' Hkrit

¹⁷A' mawo leumeus' ui' na' pe', kuit rot ri leukah' tamnai lah' ce peue caee Eun Yesu' Hkrit na' reu'.

¹⁸Lah' ce a ri pe', "Seunyi tisut' na', peue cang cae' - mae' peue hot' ri yeuh hpum' ta' nha' ri na' a kaw kue'." ¹⁹Peue awn' ce meuh peue yeuh pe' taic' jah hk'ai' puri. Ce hot' ri yeuh yawo hpum' ta' nha' ri na' palkoe. Ce hkuin' kue' Cit' seunga' na'.

Tuil' sati mae' tuil' kaw' reng

²⁰Daecti a' mawo leumeus' ui' na' pe', yeuh puri huk' hawn' hk'a' naee hk'a' yum' seunga' chak' kue' pe' na' mae' hk'o' mun' hk'a' naee Cit' seunga' chak' na' reu'. ²¹Yam buih ko' pe' hk'a' tukyak Eun Yesu' Hkrit e' a kaw va pe' heul' ri cit' tip a' yu tip

cot' cu na', roksa' tu' pe' na' ut' hk'a' naee hk'a' leumeus' keus Eun Peucawo' na' reu'.

²²Tukyak ri peue kawn' kangkae na' ce reu'. ²³Teuk' peue ut' hk'a' naee ngawl na' ce pucti lih, yeuh ce pon reu'. Tukyak ri peue reu'. Daecti ces a rot ti hk'eung pit ku' ta' nha' hk'aw' jeuk na' reu'.

Leukah' suk' seun'

²⁴Suk' seun' Peucawo' Cawo' cang roksa' pe' un' va pe' htang' meul na' Eun. Eun va pe' heul' nanggal' ka vang kue' munhpung' Eun na' ri plot' lon na' mae' hk'a' ren' kawn keuting nyawk' na'. ²⁵Suk' seun' Peucawo' meuh yawo Peucawo' ti peue cang teum' kawm htut e' lawtpon na' Eun. Kah munhpung' keuting lhung', ti' ca mae' an' nya na' kue' ri Heun hk'a' naee Yesu' Hkrit Peucawo' e' na' Eun ku cu tang' neum leumah' rot maet' maen' heul' hk'a' nanggal' cot' cu ri reu'. Amin.

Htawm Tuh' ri tuil'

1 Punta Yesu' Hkrit kaw Eun tuh' ri tuil' mhai' ri na' ce nyu lawng ku' kaw hk'aws' kah ri meuh hk'a' nanggal' na' ce, Peucawo' Eun tuh' ri tuil' a ri Yesu' Hkrit Eun. Hawc' ko', Yesu' Eun cus' in' hpom ri na' eun heul' tuh' ri tuil' a ri Yo' han mhai' ri na' eun.² Se-un' Yo' han pun eun ri nyu leukah' Eun Peucawo' na' mae' leukah' hkam' sa' hki' Eun Yesu' Hkrit na', eun ku' hkam' sa' hki' ka na' ce.³ Mun' keuting ri peue lip leukah' tamnai aen' a na' ce reu'. Mun' keuting ri peue mhawng' leukah' aen' na hawc' ko' ce seue' a nang hpum' ri na' ce reu'. Kopti yam ka na' kaw a hk'aws' rot hawc'.

Htawm tem' ri tuil' ri muk kon' Hkrit a' res muk

⁴Htawm ti ok' aen' na ko', meuh ui' Yo' han,

ui' tem' ri tuil' a ri muk kon' Hkrit a' res muk ut' nang kuing' Asa' na' ce. Kah mun' sin' mae' hk'a' kuit nyawk' kuit sam' ran cumyen' lih neum Peucawo' Cawo' a' yu im' maet' maen', a' yu im' yam pon heul' na' mae' a' yu im' hk'a' nha' hk'a' nanggal' na', mae' lih neum cit' a' res cit' ut' nanggal' tenceo' Eun Peucawo' na',⁵ mae' lih neum Yesu' Hkrit Cawo' hkam' sa' hki' kati keutawn' ku' meuh Cawo' tang kuh' im' hk'ai' vang yeum ri nanggal' peue, Eun meuh Cawo' u' peung hk'a' pang hkun' haw' hkam' pang bhen' keute' na' ce gawm' euc' na' kue' ri pe' reu'.

Yesu' Hkrit leumeus' Eun e'. Eun yeuh e' pon map' ri ri nham' ri na'.⁶ Eun uin' e' meuh peue kuing' ri, mae' punta kaw e' yeuh mhai' Eun Peucawo' mae' yeuh mhai' Eun Kuing' Eun na', Eun uin' e' meuh peue jhawp' rit. Kah munhpung' mae' ti' ca na' kue' ri Heun cot' cu ri reu'. Amin.

⁷Keue' reu', buih lih Eun mae' putum' na'.

Ngai' na' a kaw nyu Eun ku ngai'.

Sac' meuh peue sawt' Yesu' Eun na' ce mae' peue ceu ut' pang bhen' keute' na' ce gawm' euc', ce kaw pun ri kleh' klai' kop Heun ri.

A kaw meuh yeuh keutit' neumneum. Amin.

⁸Cawo' Peucawo' lah' Eun, "Meuh ui' Alfa † mae' Omega. †† A' yu im' Ui' maet' maen' mae' yam pon heul' na' mae' hk'a' nha' hk'a' nanggal' na'. Ui' meuh Cawo' ti' ca keuting."

Yo' han nyu eun Kon' ai' peue Eun

⁹Meuh ui' Yo' han meuh ec' awng' meuh a' mawo pe'. Meuh ku' buih ruim ri hkam' ku' tukhka, buih ruim ri hkam' kuing' Eun Peucawo' mae' buih ruim ri hkam' ku' yeun' hkam' na' ce gawm' euc' mae' pe' tiduih' hk'a' naee Yesu' Hkrit Eun na'. Kopti sangsawn' ui' leukah' Eun Peucawo' na' mae' hkam' ui' sa' hk-i' lawng Eun Yesu' na', ui' pun ri hk'awng' ri nang kaw' Patmos' na'.¹⁰ Hk'a' naee seunyi Eun Peucawo' na', ui' ut' hk'a' naee Cit' seunga' na' ui' pun ri mhawng' seng' laws' seun' seng' pi' tae' rae' na' laws' ka hk'a' kui' ui' na'.¹¹ A lah', "Tem' ku' pun mi ri nyu na' nang bawl' htawm na' bu' a ri muk kon' Hkrit a' res muk na' ce reu'. Ce meuh muk kon' Hkrit E' fe' su', Sameuna', Peugama', Tiyatira, Sadis', Hpi' ladeufia mae' Laodisia."

¹²Yam hpawt' ui' ri keue' ri cawo' leukah' mae' ti na' Eun, ui' pun ri nyu bin' ngawl' hk'il' a' res bin'.

¹³Nang seuna' ka bin' ngawl' awn' ce, ui' pun ri nyu peue ti peue "Eun seun' Kon' ai' peue na' Eun".¹⁴ Eun cuip' hk'o' dal' a lih chuip' cung Eun na'. Eun mawt sae' caet' hk'il' ri nyawng ri na'.¹⁴ Cing' Eun na' mae' huik' Eun na' a paing seun' kuii' hpong', seun' seudap' ko'. Ngai' Eun na' a seun' kueng ngawl' na'.

¹⁵Cung Eun na' a seun' tong lhom' ri naee meuh leuum' ri nang peung' ri na'. Seng' leukah' Eun na' a seun' seng' leuum' dhim' ri hot' klong' na'.¹⁶ Eun jhawp' seumeueng' a' res meul' hk'a' ti' a' tawm' ri na'. Le-ungawng lawm lal' plak' lawm nyawk' na' a pucti lih neum moeng Eun na' ti hten'. Buh Eun na' a ceng' nyawk' seun' ceng' ka seunyi na'.

¹⁷Yam pun ui' ri nyu Eun na', ui' cung' kus keunam cung Eun na', ui' seun' peue yeum ko'. Hawc' ko', Eun

† Alfa na' meuh a tu' kleum' ka tu' htawm leukah' Helasa' na'.

†† Omega na' a meuh tu' tisut' ka tu' htawm leukah' Helasa' na'.

‡ Dayela' 7:13

tang' ti' a' tawm' ri na' hk'a' pang ui'. Eun lah', "Pawlaee lhat'. Meuh Ui' yamla na' mae' yam tisut' na'.¹⁸ Ui' meuh ku' a' yu im' na' Eun. Yeum Ui' hawc', daecti keue' reu', suip Ui' ri a' yu im' cot' cu ri. Hk'a' yeum na' mae' kuing' yeum na' Ui' jhawp' pakhkeuca' ka na'.

¹⁹Kop awn' na, ku' pun mi ri nyu hawc' na' ce, ku' buih meuh maet' maen' na' ce mae' ku' kaw meuh hk'a' nha' hk'a' nanggal' na' ce, tem' a reu'.²⁰ Ku' vangdoh' rui' sum' lah' ka seumeueng' a' res meul' pun mi ri nyu ri hk'a' ti' a' tawm' Ui' na' mae' bin' ngawl hk'il' a' res bin' na' sum' lah' ka a yeuh keutit', seumeueng' a' res meul' na' meuh a in' hpom ce muk kon' Hkrit a' res muk na', bin' ngawl a' res bin' na' meuh a muk kon' Hkrit a' res muk na' ce.

Htawm tem' ri tuil' ri muk kon' Hkrit E' fe' su'

2 Tem' ri tuil' htawm ri in' hpom ce muk kon' Hkrit E' fe' su' na' eun yeuh keutit',

'Cawo' jhawp' seumeueng' a' res meul' hk'a' ti' a' tawm' ri Eun ut' nang seuna' ka bin' ngawl a' res bin' na' Eun lah' a yeuh keutit',² "Yawng Ui' ku' yeuh mi na', hk'a' kactin mi na' mae' hk'a' yeun' hkam mi na'. Ui' yawng hkam' un' pe mi peue rai na' ce. Ui' yawng long mi ri nawk peue lah' ri meuh peue caee Eun Yesu' daecti ce un' meuh na' ce.

³Ui' yawng pun mi ri yeun' hkam, pun mi ri hkam' ku' tukhka kopti meuh a muis Ui' na', mi un' hpum' lu.

⁴Daecti Ui' kue' ku' kaw tawk mi ti ceu. Tecla pe' hk'a' leumeus' keus kue' pe' nanggal' aen' ce na' hawc'.⁵ Mi ci' pe' hk'uic' lih a' neng na' kuit rot ri ka reu'. Taws' hpum' fuin map' ri tang yeuh ku' tawn yeuh mi nanggal' aen' ce na' reu'. Mi lawn un' taws' hpum' fuin map' ri ko', kaw Ui' lih ri mi, lih hue' ri ti bin' ngawl mi na' hk'ai' vang po ka na'.

⁶Daecti mi tup kaw' kue' ku' chak' na' ti ceu, mi ces ri kan' yeuh ce muk Ni' hko' las' na'. Ui' ku ces ri ka yeut.

⁷Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A' n-haw' lawn pe ko', Ui' kaw tuil' ahkvang kaw eun pun ri hk'a' pli' ka kleum' hku' civit im' kue' nang Paradi' su' † Eun Peucawo' na'."

Htawm tem' ri tuil' ri muk kon' Hkrit Sameuna'

⁸Tem' ri tuil' htawm ri in' hpom ce muk kon' Hkrit Sameuna' na' eun yeuh keutit',

'Cawo' meuh kleum' yamla na' mae' yam tisut' ku' yeum hawc' Eun tang kuh' im' na' Eun lah' a yeuh keutit',⁹ "Yawng Ui' ku' tukhka ku' hk'o' -tukyak hkam' mi na'. Daecti mi ku kaw' meuneum. Ui' ku yawng ku' saesawm' ce mi peue lah' ri meuh peue ceu Yu' da daecti ce un' meuh, ce meuh sa' la vang hk'o' mun' ka Satan na'.¹⁰ Pawlaee lhat' ri ku' tukhka pun mi ri hkam' na' ce. Kaw Ui' lah' a ri mi, punta seuca' rai na' kaw a long ri nawk mi na', a kaw hk'awng' pe' ngon' nang htawng'. Mi kaw pun ri hkam' ku' keunhap' nokneh na' pun kul' seunyi. Mi saec' na' rot htan kaw ri yeum, kati keutawn' reu'. Kaw Ui' tuil' cui' maw hk'il' civit im' na' ri mi.

¹¹Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A' n-haw' lawn pe ko', eun hkuin' kaw pun ri hkam' ku' sui' ri hk'a' yeum lal' pok ti pok na'."

Htawm tem' ri tuil' ri muk kon' Hkrit Peugama'

¹²Tem' ri tuil' htawm ri in' hpom ce muk kon' Hkrit Peugama' na' eun yeuh keutit',

'Cawo' jhawp' leungawng lawm lal' plak' lawm nyawk' na' Eun lah' a yeuh keutit',¹³ "Yawng Ui' vang ut' mi na'. Meuh a vang u' peung ka Satan na'. A saec' yeuh sa' nhaw' jhawp' mi muis Ui' na' keutawn'. Saec' meuh yam Anhti' pas' ku' meuh nang hkam' sa' hki' kati keutawn' Ui' na' pun eun ri hkam' toh peue ri nang veng mi vang ut' ka Satan na', mi ri mi hkuin' tecla hk'a' yum' ri Ui' na'.

¹⁴Daecti Ui' kue' ku' kaw tawk mi ti ceu. Pe' ri ngon', pe' jhawp' ku' sangsawn' eun Balam na'. Balam eun sangsawn' Balak' eun heul' cop' peue I' sarela' na' ce yeuh map' ri kah ce hk'a' ku' hk'a' tan ri ruphtu na' mae' kah ce hkuit' nawng' tang' na'.

¹⁵Seun' awn' na, pe' ri ngon', pe' jhawp' ku' sangsawn' ce muk Ni' hko' las' na'.¹⁶ Kop awn' na, taws' hpum' fuin map' ri reu'. Mi lawn un' taws' hpum' fuin map' ri ko', un' ling' kaw Ui' lih ri mi, Ui' na' peueng' suik' ri ce ri leungawng lih hk'ai' moeng Ui' na'.

¹⁷Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'. A' n-haw' lawn pe ko', Ui' kaw tuil' pli' mana' mo' ri

na' mae' seumu paing tem' tu' muis hk'u' ri ka na' ri heun. A lawn un' meuh peue pun seumu awn' a na' eun ko', a' nhaw' hkuin' kaw yawng muis awn' na."

Htawm tem' ri tuil' ri muk kon' Hkrit Tiyatira

¹⁸ Tem' ri tuil' htawm ri in' hpom ce muk kon' Hkrit Tiyatira na' eun yeuh keutit',

'Kon' ai' Eun Peucawo' Cawo' ngai' Eun a seun' kueng ngawl, cung Eun a seun' tong lhom' ri naee meuh leuum' ri nang peung' ri na' Eun lah' a yeuh keutit',¹⁹ "Yawng Ui' ku' yeuh mi na', hk'a' leumeus' keus mi na', hk'a' yum' mi na', hk'a' yeuh mi mhai' na' mae' hk'a' yeun' hkam mi na'. Ui' yawng, maet' maen' yeuh mi ceu nang aen' ce lheu' hk'ai' nanggal' aen' na.

²⁰ Daecti Ui' kue' ku' kaw tawk mi ti ceu. Tae' mi Yesebela' ku' lah' meun ri meuh beun' suip leukah' Eun Peucawo' na' ka. Ku' sangsawn' ka na' a yeuh mhai' Ui' na' ce kleuc' hk'a' ri. Ka kah ce hkuit' - nawn' tang' mae' kah ce hk'a' ku' hk'a' tan ri ruphtu na'.²¹ Ui' saec' tuil' yam kaw ka taws' hpum' fuin map' ri hk'ai' hk'a' hkuit' nawn' tang' ka na' ko', daecti ka un' yeuh a.²² Kop awn' na, Ui' kaw nyon ri seue' ka nang vang it' tukhka nyhap' na'. Saec' meuh peue len' cu mae' beun' awn' ka na' ce, ce lawn un' nang taws' hpum' fuin map' ri hk'ai' hk'a' a' yu im' ka beun' awn' na ko', Ui' ku kaw tuil' ce hkam' ku' tukhka nyhap' nyawk' na'.²³ Ui' kaw toh kon' ka beun' awn' ce. Yeuh keutit' na', muk kon' Hkrit na' ce gawm' euc' ce kaw yawng meuh Ui' Cawo' cang yawng ku' kuit peue nang hpum' ri na'. Ui' kaw top' kun ka na' hot' ku' yeuh pe' na' ti peue hawc' ti peue.²⁴ Maet' maen', Ui' lah' a ri peue seubu ut' nang veng Tiyatira ku' un' jhawp' ku' sangsawn' ka beun' awn' a na' mae' peue un' pun ri rin ku' lah' peue meuh vangdoh' rui' ka Satan na' ce yeuh keutit', (Ui' hkuin' kaw laee po beus seubu hk'a' pang pe'.)²⁵ jhawp' yawo ku' kue' pe' na' meulamlam ri rot ti yam ing' rot Ui' na' reu'.

²⁶ A' nhaw' lawn pe mae' yeuh ku' sum' kah Ui' eun yeuh na' rot tisut' ka ko', Ui' kaw tuil' ti' ca u' peung peue ceu gawm' euc' na' ri heun seun' pun Ui' ti' ca u' peung neum Kuing' Ui' Eun na'.

²⁷ Eun kaw u' peung ce ri hku' ji lhec' na'.

Eun kaw peum' ce nyai' meuh glawk' ri †

seun' keutong' keute' na'.²⁸ Ui' ku kaw tuil' seumeueng' keuting peunngup cawo na' ri heun.²⁹ Peue kue' yhuk' na', leuceng leukah' ku' Cit' seunga' na' lah' ka ri muk kon' Hkrit na' ce reu'."

Htawm tem' ri tuil' ri muk kon' Hkrit Sadis'

³ Tem' ri tuil' htawm ri in' hpom ce muk kon' Hkrit Sadis' na' eun yeuh keutit',

'Cawo' jhawp' cit' Eun Peucawo' a' res cit' na' mae' seumeueng' a' res meul' na' Eun lah' a yeuh keutit', "Yawng Ui' ku' yeuh mi na'. Peue saec' na' suk' seun' a' yu im' mi na' ko', daecti yeum mi hawc'.² Kuh' reu', hk'a' yum' kaw n' vang mi a kaw hk'aws' yeum na' tuil' kaw l' reng ka reu'. Kopti kan' yeuh mi na' un' nang hit' a ri hpum' Eun Peucawo' Ui' na'.³ Kop awn' na, kuit rot ti ku' pun mi ri rap ri ti na' mae' ku' pun mi ri mhawng' na' reu'. Hot' ri yeuh a, taws' hpum' fuin map' ri reu'. Daecti mi lawn un' kuh' ko', kaw Ui' lih ri mi seun' peue con' ko'. Mi hkuin' kaw yawng kaw Ui' lih ri mi yamnhaw'.

⁴ Daecti nang veng Sadis' na' kaw n' kue' mi nang un' yeuh hk'eung ri hk'aw' jeuk ngon'. Ce kaw cuip' hk'eung paing ce na' long hk'a' mae' Ui', kopti kuing' ce ri yeuh keutit' na'.⁵ A' nhaw' lawn pe ko', eun kaw pun ri cuip' hk'eung paing seun' peue awn' ce yeut. Ui' hkuin' kaw duing juit' ri tec muis eun nang htawm civit im' na', daecti Ui' kaw htawhkam eun nanggal' Eun Kuing' Ui' na' mae' nanggal' ce in' hpom Eun na'.⁶ Peue kue' yhuk' na' leuceng leukah' ku' Cit' seunga' na' lah' ka ri muk kon' Hkrit na' ce reu'."

Htawm tem' ri tuil' ri muk kon' Hkrit Hpi' ladeufia

⁷ Tem' ri tuil' htawm ri in' hpom ce muk kon' Hkrit Hpi' ladeufia na' eun yeuh keutit',

'Cawo' seunga' chak' leupaws seumeu' ku' jhawp' pakhkeuca' eun Davit' na' Eun, ku' tah' Eun na' a' nhaw' hkuin' cang sawng' a, ku' sawng' Eun na' a' nhaw' hkuin' cang tah' a na' Eun lah' a yeuh keutit',⁸ "Yawng Ui' ku' yeuh mi na'. Keue' reu', tah' Ui' leuva' na' nanggal' mi hawc'. Leuva' awn' na' a' nhaw' hkuin' cang sawng' a. Yawng Ui' mi saec' kaw l' reng kloe, daecti mi hot' ri yeuh ku' lah' Ui' na' mae' un' tecla muis Ui' na'.⁹ Kaw Ui' yeuh peue ku' meuh sa' la vang hk'o' mun' ka Satan na' ce mae' peue ku' lah' ri meuh peue ceu Yu' da

† Suk' seun' 2:9

daecti ce un' meuh, ce meuh peue chi' lai na' ce ing' cung' kus keunam cung mi na'. Yeuh keutit' na', ce kaw pun ri yawng leumeus' Ui' mi.¹⁰ Kopti ye-un' hkam mi ri hot' leukah' tuil' Ui' na', yam ku' long ri nawk na' punta kaw a long ri nawk peue ut' pang bhen' keute' na' ce a rot pang bhen' keute' na' ku duih' na', Ui' ku kaw yeuh mi lawtpon hk'ai' cu ka na'.

¹¹Un' ling' kaw Ui' lih ri mi. Punta kaw peue un' cang rim' ri ti cui' maw hk'il' mi na' pun, jhawp' ku' kue' mi na' meulamlam ri reu'.¹²A'nhaw' lawn pe ko', kaw Ui' tang' eun meuh kleum' rawng' ka nya hk'o' mun' keuting Eun Peucawo' Ui' na' ti lhem'. Eun hkuin' kaw laee duing pucti heul' hk'ai' nya hk'o' mun' keuting na'. Ui' kaw tawk' muis Eun Peucawo' Ui' na' mae' muis ka veng hk'u' Eun Peucawo' Ui' na' hk'a' pang eun na'. Veng awn' a meuh veng Yeru' salaem hk'u' ku' Peucawo' Ui' buih bu' Eun lih neum kuing' pang mao' na'. Ui' ku kaw tawk' muis hk'u' ri na' hk'a' pang eun yeut.¹³Peue kue' yhuk' na' pe', leuceng leukah' ku' Cit' seunga' na' lah' ka ri muk kon' Hkrit na' ce reu'."

Htawm tem' ri tuil' ri muk kon' Hkrit Laodisia

¹⁴Tem' ri tuil' htawm ri in' hpom ce muk kon' Hkrit Laodisia na' eun yeuh keutit',

'Cawo' Amin'† ku' meuh Cawo' hkam' sa' hki' kati keutawn' leupaws seumeu' ku' u' peung ku' hpanpleng' Eun Peucawo' na' gawm' euc' na' Eun lah' a yeuh keutit',¹⁵"Yawng ui' ku' yeuh mi na'. Mi hkuin' kuc', hkuin' seucet. Sum' kah Ui' mi kaw kuc' mi na' saee' kuc', kaw seucet mi na' saee' seucet.¹⁶Kopti seueul' mi, mi hkuin' kuc' hkuin' seucet, Ui' kaw htueng' ri tec mi hk'ai' moeng ri na'."¹⁷Mi lah', "Meuneum ui', ui' pun hk'il' leumuil he-un' nyawk', ui' hkuin' kaw laee lo' keunhaw' bae." Daecti mi un' yawng tu' ri na' meuh a ku' tuckyak, hk'o' tuckyak, ngai' lec' mae' meuh tu' seurak' ri.¹⁸Kaw Ui' tuil' kamkuit mi, punta kaw mi meuneum, kaw mi leuvaee hk'o' paing cuip' a kang' ut' gung' gang' seurak' hk'o' kaic mi na', mae' kaw mi leuvaee bai' pok a ri ngai' ri na' mi na' cang nyu, ing' leuvaee hk'il' lhom' ri seunga' chak' ri ngawl na' ri Ui' reu'.

¹⁹Kaw Ui' ta' faet' sangsawn' ram ri peue leumeus' Ui' na' ce. Kop awn' na, tuin' tung hpum' huk'

taws' hpum' fuin map' ri reu'.²⁰Keue' reu', cawng Ui' keunam leuva' na', Ui' toe' a. A'nhaw' lawn mhawng' seng' Ui' na' tah' leuva' na' ko', Ui' kaw ing' lec ri hk'asom' mae' heun. Eun ku kaw hk'asom' mae' Ui' tiduih'.

²¹A'nhaw' lawn pe ko', Ui' kaw tuil' ahkvang kaw eun mok' mae' Ui' pang tenceo' Ui' na' seun' pe Ui', Ui' pun ri mok' mae' A'kuiing' Ui' Eun pang tenceo' Eun na' ko'.²²Peue kue' yhuk' na' pe', leuceng leukah' ku' Cit' seunga' na' lah' ka ri muk kon' Hkrit na' ce reu'."

Tenceo' ka kuing' pang mao'

4 Hawc' awn' na, ui' keue', ui' nyu leuva' ka kuing' pang mao' na' dah' ka nanggal' ui' na'. Seng' a seun' seng' pi'tae' rae' ku' pun ui' ri mhawng' nanggal' na' a lah' a ri ui', "Huk' maen' reu'. Kaw Ui' tuil' mi nyu ku' kaw kah ri meuh hk'a' nanggal' na'."²Ui' keulawn' ut' hk'a' naee Cit' seunga' na', tenceo' ka kuing' pang mao' na' a ut' nanggal' ui' na', a kue' peue mok' hk'a' pang ka ti peue.³Ku' mok' awn' Eun ceng' seun' ceng' ka seumu saeng' na'. Ceng' peuyongtong seun' seumu seng' seungal lawng na' a vong ri rop tenceo' awn' na.⁴Keunam ka tenceo' awn' na rop a kue' ten lal' kul' pun' ten. Nang kawt lal' kul' pun' peue na' ce mok' pang ten awn' na. Ce cuip' hk'eung paing, ce cuip' cui' maw hk'il' pang cing' ri na'.⁵Ceng' ka cak' cal' yhapypap na' mae' seng' neumhk'i ruingruing na' a lih neum tenceo' awn' na. Nanggal' ka tenceo' awn' na, a kue' bin' ngawl ceng' ruingruing a' res bin'. A meuh cit' Eun Peucawo' a' res cit' na'.⁶Nanggal' ka tenceo' na', a ku' kue' ku' seun' mha' seumut' ceo' seungawm seun' bles' ceo' na' ti ceu. Keunam nang ngon' ka tenceo' na' rop, a kue' ku' a' yu im' kue' ngai' hk'a' kui' hk'a' kal' ri rop pun' tu'.⁷Ku' nanggal' ti tu' na' a seun' leuvai sangsi'. Lal' tu' ti tu' na' a seun' a' moe. Loe' tu' ti tu' na' a buh seun' peue. Pun' tu' ti tu' na' a seun' klang' peul' eo' ri na'.⁸Ku' a' yu im' pun' tu' awn' na ku' tu' ka a kue' hk'ec' les hk'ec'. A kue' ngai' hk'awp' tu' ri na', saec' meuh ruim hk'ec' ka na' a ku' kue' ngai'. Gawm' sum' gawm' seunyi a un' laee keului' ri, a klawng ri lah' a yeuh keutit',

"Seunga' chak', seunga' chak', seunga' chak'.

Seunga' chak' na' meuh Eun Cawo' Peucawo' ti' ca keuting Cawo' a' yu im' yam pon heul', a' yu im' maet' maen' mae' Cawo' kaw lih hk'a' nha' hk'a' nanggal' na' Eun."

† "Amin" na' meuh a leukah' Hebrae'. Vangdoh' ka na' a lah', "meuh a neum, a keutawn'". A ku' meuh muis seubu Eun Yesu' Hkrit na' ti muis.

⁹Yam ku' a'yu im' pun' tu' awn' lah' a leukah' suk' seun', leukah' tuil' munhpung' mae' leukah' mun' keuting ri Cawo' mok' pang tenceo' Cawo' a'yu im' cot' cu na' Eun ku pok na', ¹⁰nang kawt lal' kul' pun' peue na' ce ku seukluin ri nghup' ri ri Cawo' mok' pang tenceo' na' Eun. Ce faee' Cawo' a'yu im' cot' cu na' Eun. Ce hpuic' ri uin' cui' maw hk'il' ri na' nanggal' ka tenceo' na'. Hawc' ko', ce lah',

¹¹“O', Peucawo', Peucawo' ye, kuing' Mi ri pun munhpung',

hk'a' hkopyawm' na' mae' ti' ca na',
kopti hpanpleng' Mi ku ceu gawm' euc' na'
mae' kopti meuh ka alo Mi na',
ceu nang aen' ce pun ri hpanpleng' ri, pun ri keut'
kue'.”

Bawl' htawm mae' Kon'yung'

5 Hawc' awn' na, ui' nyu bawl' htawm ri hk'a' ti' a' tawm' Eun ku' mok' pang tenceo' na'. Bawl' htawm awn' a tem' ri gawm' lal' plak'. A tawk' ri glihuip ri ri ta'ra' a' res ta'ra'. ²Hawc' ko', ui' pun ri nyu in' hpom ti' ca keuting na' klawng eun ri lah' seng' laws'. Eun lah', “A' nhaw' ci' kaw kuing' ri toh' ta'ra' na' mae' glas bawl' htawm aen' na?” ³Daecti peue ut' kuing' pang mao', ut' pang bhen' keute' mae' peue ut' hk'a' ruim ka bhen' keute' na', a hkuin' kue' nang kaw cang glas ri nawk hk'a' naee ka bawl' htawm na' saec' ti peue. ⁴Kopti un' kue' a nang kaw kuing' ri glas ri nawk hk'a' naee ka bawl' htawm na', ui' sae' caee' yam ri. ⁵Hawc' ka na', hk'a' naee muk ce nang kawt awn' ce ti peue eun lah' a ri ui', “Pawlaee yam. Keue' reu', leuvai sangsi' ce peue ceucat Yu' dah ku' meuh a' ta' keuting eun Davit' na' pe Eun hawc'. Eun cang glas bawl' htawm na' mae' cang toh' ta'ra' a' res ta'ra' na'.”

⁶Hawc' ka na', ui' pun ri nyu Kon'yung' ku' seun' sak toh ri hawc' na' cawng Eun nang ngon' ka tenceo' na'. Ku' a'yu im' pun' tu' na' mae' muk nang kawt na' ce rop Eun. Eun kue' reung' a' res reung' mae' ngai' a' res ngai'. Ngai' a' res ngai' na' a meuh cit' a' res Cit' Eun Peucawo' Cawo' cus' Eun heul' pang bhen' keute' na' ku duih' ka na'. ⁷Kon'yung' na' Eun ing' ti bawl' htawm ut' ri hk'a' ti' a' tawm' Eun ku' mok' pang tenceo' na'. ⁸Hawc' ti Eun bawl' htawm na', ku' a'yu im' pun' tu' na' mae' nang kawt lal' kul' pun' peue na' ce nghup' ri nanggal' Eun Kon'yung' na'. Ce jang' ting' mae' paen' hk'il' seuglong' kue' ten tu' hom' nuk na' ku peue ri. Ten tu'

hom' na' a meuh seng' hk'o' mun' ce peue Eun Peucawo' na'. ⁹Ce lah' seng' cai hk'u' na'. Ce lah',

“Kuing' Mi ri rap ri ti bawl' htawm na'
mae' toh' ta'ra' na' mae' glas htawm na',
kopti pun Mi ri hkam' toh' peue ri hawc'.

Mi leuvaee peue gawm' euc' na' peue neum peue ceu ku ceu, leukah' ku ceu, ceucat ku ceu mae' peue kuing' ku kuing' na' peue hk'ai' nham' ri na' ap ce ri Peucawo' Eun hawc'.

¹⁰Mi yeuh ce meuh peue kuing' mae' peue jhawp' rit yeuh mhai' Eun Peucawo' e' na' hawc'.

Ce kaw u' peung bhen' keute' na'.”

¹¹Hawc' ka na' ui' keue', ui' pun ri mhawng' seng' ce in' hpom hk'o' saen' hk'o' lan ri un' laee euc' mhin' ri na' ce. Ce rop tenceo' na' mae' ku' a'yu im' pun' tu' na' mae' muk nang kawt na' ce. ¹²Ce cai laws' lah',

“Kon'yung' pun ri hkam' toh' ri na',
kuing' Eun ri pun ti' ca, vahtu' hk'il' leumuil, cu' yi,
kaw' reng, hk'a' hkopyawm',
munhpung' mae' hk'a' suk' seun' na'.”

¹³Hawc' ka na', ui' pun ri mhawng' seng' ka ku' a'yu im' kuing' pang mao', pang bhen' keute', hk'a' ruim bhen' keute' na' mae' nang mha' seumut' na' ku ceu. A lah',

“Kah hk'a' suk' seun', hk'a' hkopyawm', munhpung'
na' mae' ti' ca na'

kue' ri Cawo' mok' pang tenceo' na' Eun mae'
Kon'yung' na' Eun
cot' cu ri reu'.”

¹⁴Ku' a'yu im' pun' tu' na' a lah', “Amin.” Muk nang kawt na' ce nghup' ri faee'.

Ta'ra' a' res ta'ra'

6 Ta'ra' a' res ta'ra' na' yam Kon'yung' na' toh' Eun ri glas ta'ra' nambat keuhti na', ui' keue' ri ka. Hawc' ko', ui' pun ri mhawng' seng' klawng ka ku' a'yu im' pun' tu' ti tu' na' klawng ka seng' seun' seng' neumhk'i na'. A lah', “Ing' reu'.” ²Ui' keue', ui' nyu rawng paing nanggal' ri na' ti tu'. Cawo' pawk ka na' eun jang' kong' htanu. Eun pun cui' maw hk'il' na'. Hawc' ko', eun pawk rawng na' pucti heul' seun' meuh eun nang peueng' suik' pe kaw heul' peueng' ri ti suik' ko'.

³Yam Kon'yung' na' toh' Eun ri glas ta'ra' nambat leual' na', ui' pun ri mhawng' ku' a'yu im' lal' tu' ti tu' na' lah' ka, “Ing' reu'.” ⁴Hawc' ko', rawng seubu ti tu' na' a pucti lih. A meuh rawng seurak' seun' ngawl' na'. Cawo' pawk ka na' eun pun ti' ca kaw ti hk'a' kuit

nyawk' kuit sam' ran cumyen' na' pucti lih hk'ai' bhen' keute' na', yeuh peue toh puri. Eun pun leungawng keuting ti hten'.

⁵Yam Kon'yung' na' toh' Eun ri glas ta'ra' nambat leue' na', ui' pun ri mhawng' ku' a'yu im' loe' tu' ti tu' na' lah' ka, "Ing' reu'." Ui' keue', ui' nyu rawng lawng nanggal' ri na' ti tu'. Cawo' pawk ka na' eun jang' jeum nang ti' ri na'. ⁶Hawc' ko', ui' pun ri mhawng' seng' a seun' lih a neum ku' a'yu im' pun' tu' na'. A lah', "Hk'a' nanggal' ka heul' na' kaw a kue' ut' ngeup', ngho' ti pawn na' kaw a caw ngos reng ti seunyi. [†]Hkawocung' loe' pawn na' kaw a caw ngos reng ti seunyi. Daecti pawlae yeuh lamawn na' mae' leuum' pli' bui na' lu."

⁷Yam Kon'yung' na' toh' Eun ri glas ta'ra' nambat pun' na', ui' pun ri mhawng' ku' a'yu im' pun' tu' ti tu' na' lah' ka, "Ing' reu'." ⁸Ui' keue', ui' nyu rawng leunga nanggal' ri na' ti tu'. Cawo' pawk ka na' eun muis Hk'a' Yeum. Kuing' yeum na' eun hot' ri tuihtuih eun ing'. Ka pun ti' ca kaw toh peue bhen' keute' na' peue pun' pun ti pun na' ri leungawng, ri ku' ut' ngeup' keuting, ri peuyhat a' nga na' mae' ri sat' rai ka pang bhen' keute' na'.

⁹Yam toh' Eun ri glas ta'ra' nambat hpawn' na', hk'a' ruim ka vang dum ri tan ku' tan na', ui' pun ri nyu civit ce peue ku' toh peue ce kop meuh a leukah' Eun Peucawo' na' mae' sa' hki' hkam' ce na'. ¹⁰Ce klawng ri lah' seng' laws' lah', "Cawo' keuting hk'a' pang gawm' euc', seunga' chak' leupaws seumeu' Mi. Kaw Mi taws' a' mu ri peue ut' pang bhen' keute' na' peue mae' kaw Mi top' ku' toh ye na' ce, a ci' kawn' kaw ling' a' neng?" ¹¹Hawc' ko', ce pun hk'o dal' paing na' hot' peue ri ti ri cum. Peucawo' Eun lah' a ri ce, "Puing ko' a rot ti yam ca' lang' ce peue yeuh mhai' na' mae' ec' awng' ce ku' toh peue ce seun' pe' ri na' htonnuk ka."

¹²Yam Kon'yung' na' toh' Eun ri glas ta'ra' nambat les na', ui' keue'. Ui' pun ri nyu in' san' keuting ka nyawk'. Seunyi na' a duim' lawng seun' htong' tai' keusang' maeo lawng na' ko', a' chi' hk'eng na' a seun' nham' na' ko', ¹³seumeueng' pang mao' na' a hk'uic' pang bhen' keute' na' seun' pli' keutuic' seukawk rum' hk'uic' hk'ai' kleum' ri yam guil' puing' ka na' ko', ¹⁴mao' na' a bawl' ri seun' bawl' htawm na' ko', gong na' ku meul' kaw' na' ku duih' a pun ri sat ri hk'ai' vang ut' ri na'.

¹⁵Hawc' ko', hkun' haw' hkam' pang bhen' keute', hkun' cawo', po' suik', peue meuneum, peue ti' ca keut-

[†] "ngos reng ti seunyi" na', leukah' Helasa' ka a lah', "ti denarian".

ing, peue meuh mhai' mae' peue un' meuh mhai' na' ce gawm' euc' ce eo' mo' ri nang keutui' htam mae' nang seuna' ka seumu pang gong na'. ¹⁶Ce klawng ri lah' a ri gong na' mae' seumu na', "Ruik' ghuim' ye, mo' ye hk'ai' buh Eun ku' mok' pang tenceo' na' mae' hk'ai' ku' seungeueng' Eun Kon'yung' na' reu'.

¹⁷Kopti rot a ri seunyi seungeueng' nyawk' Ka Cawo' lal' peue na' hawc'. A' nhaw' ci' kaw hkam' a pun?"

Peue 144,000 peue pun ri tawk' ta'ra'

⁷ Hawc' awn' na, ui' pun ri nyu in' hpom pun' peue ce cawng hot' hon' ka bhen' keute' pun' hon' na'. Ce jhawp' guil' pun' hon' na'. Ce un' tuil' a puing' bhen' keute', mha' seumut' mae' kleum' hku' na' ce saec' ti kleum'. ²Hawc' ko', ui' pun ri nyu in' hpom seubu puc eun ri lih neum hk'a' lih seunyi na' ti peue. Eun jhawp' ta'ra' Eun Peucawo' Cawo' a'yu im' na'. Eun klawng ri lah' laws' a ri in' hpom pun' peue ku' pun ti' ca kaw yeuh ku' lulaic ri bhen' keute' na' mae' mha' seumut' na' ce, ³"Cu yam un' nang tawk' ui' ta'ra' ri rel' ce mhai' Eun Peucawo' ye na' ce na', paw nang yeuh ku' lulaic ri bhen' keute', mha' seumut' na' mae' kleum' hku' na' ce." ⁴Hawc' ko', ui' pun ri mhawng' peue pun ri tawk' ta'ra' na' kue' ce 144,000 peue. Ce ing' neum peue ceu I' sarela' ku ceu na' ce,

⁵neum ceucat Yu' dah 12,000 peue,
neum ceucat Ru' ben 12,000 peue,
neum ceucat Ga' 12,000 peue,

⁶neum ceucat Acheu 12,000 peue,
neum ceucat Natali' 12,000 peue,
neum ceucat Manase 12,000 peue,

⁷neum ceucat Si' me' on 12,000 peue,
neum ceucat Levi' 12,000 peue,
neum ceucat I' sahka 12,000 peue,

⁸neum ceucat Yebulun 12,000 peue,
neum ceucat Yo' saep 12,000 peue,
neum ceucat Benjamin 12,000 peue.

Peue cuip' hk'o dal' paing muk heun'

⁹Hawc' awn' na, ui' keue', nanggal' ui' na' a kue' peue cum heun' un' lae euc' mhin' ce. Ce ing' neum kuing' na' ku kuing', neum peue ceu na' ku ceu, neum ceucat na' ku ceucat mae' neum leukah' na' ku ceu. Ce cawng nanggal' ka tenceo' mae' Kon'yung' na'. Ce cuip' hk'o dal' paing. Ce jang' kan lha' ka hkeung' na'.

¹⁰Ce klawng ri lah' seng' laws',

"Hk'a' htut na' lih a neum Peucawo' e'

Cawo' mok' pang tenceo' na' Eun mae' neum Kon'yung' na' Eun.”

¹¹Tenceo' na' mae' nang kawt na' ce mae' ku' a'yu im' pun' tu' na', in' hpom na' ce cawng ri rop a gawm' euc' ri. Ce seukluin ri nghup' buh ri na' nanggal' ka tenceo' na'. Ce fae' Peucawo' Eun. ¹²Ce lah', “Amin, kah leukah' suk' seun' na', munhpung' na', peuyha' cu'yi na', leukah' mun' keuting na', hk'a' yumyam' na', ti' ca na' mae' kaw' reng keuting na' kue' ri Peucawo' e' na' Eun cot' cu' ri reu'. Amin.”

¹³Hawc' ko', nang kawt na' eun mhaing' ui' ti peue, “Peue cuip' hk'o dal' paing aen' ce ci' meuh a' nhaw', ce ci' ing' neum tawngnhaw'?”

¹⁴Ui' top' a, “Cawo', yawng mi a.” Eun tang lah', “Peue aen' meuh ce peue ing' neum vang tukhka keuting ri. Ce pun ri saic' hk'o dal' ri na' seungawm paing nang nham' Eun Kon'yung' na' hawc'. ¹⁵Kop awn' na, ce ut' nanggal' tenceo' Eun Peucawo' na'.

Ce yeuh mhai' Eun gawm' sum' gawm' seunyi hk'a' nae' nya hk'o' mun' Eun na'.

Cawo' mok' pang tenceo' na' Eun kaw u' peung hk'a' pang ce na'.

¹⁶Ce hkuin' kaw laee sum' som' bae, hkuin' kaw laee sum' nyui leuum' bae. Kuc' reng na' mae' ha' ron na' ce hkuin' kaw laee pun ri hkam' a bae.

¹⁷Kopti Kon'yung' ut' nang ngon' ka tenceo' na', kaw Eun meuh Cawo' go' ce. Eun kaw va ce heul' ri keutui' leuum' civit im' na'.

Peucawo' Eun kaw ot' ri tec leuum' ngai' lih neum ngai' ce na' ku jam ka.”

Ta'ra' nambat a' res mae' keutong' hk'il'

8 Yam Kon'yung' na' toh' Eun ri glas ta'ra' nambat a' res na', kuing' pang mao' na' a dit' ti yen' hk'ao ri ti hkvai' nali.

²Ui' pun ri nyu in' hpom a' res peue na' cawng ce nanggal' Eun Peucawo'. Ce rap ri ti pi'tae'rae' a' res deul na'.

³In' hpom seubu na' eun ti keutong' hk'il' na' eun ing' cawng keunam vang dum ri tan ku' tan na'. Punta kaw eun dum ri tan ku' tan na' mae' leukah' hk'o' mun' ce peue Eun Peucawo' na' tiduih' nang vang dum ri tan meuh hk'il' nanggal' ka tenceo' na', eun pun ku' hom' na' heun'. ⁴Tu' ai' ka ku' hom' lih hk'ai' ti' eun in' hpom na' mae' leukah' hk'o' mun' ce peue

Eun Peucawo' na' a huk' tiduih' nanggal' Eun Peucawo' na'. ⁵Hawc' ka na', in' hpom awn' eun ti ri seue' ngawl ka vang dum ri tan na' hk'a' nae' keutong' na'. Hawc' ko', eun nyon a lih hk'a' pang ka bhen' keute' na'. A yeuh a neumhk'i reng, seng' ruingruing, cak' cal' ceng' yhapypap mae' a in' san'.

Pi'tae'rae' a' res deul

⁶Hawc' ko', in' hpom a' res peue kue' pi'tae'rae' a' res deul na' ce rangraen ri kaw puing' pi'tae'rae' ri na'.

⁷Yam in' hpom nanggal' ti peue na' puing' eun pi'tae'rae' ri na', a' hk'el' mae' ngawl hkawo' nham' na' a nyon ri lih hk'uic' pang bhen' keute' na'. Bhen' keute' na' loe' pun ti pun a pun ri ha', kleum' hku' na' loe' pun ti pun a pun ri ha', rip seungal na' a pun ri ha' gawm' euc' ka.

⁸Yam in' hpom lal' peue ti peue na' puing' eun pi'tae'rae' ri na', ku' ngawl ha' ka a seun' yawo gong keuting na' a nyon ri lih hk'uic' nang mha' seumut' na'. Mha' seumut' na' loe' pun ti pun a keut' ri meuh nham'. ⁹Ku' a'yu im' ut' nang mha' seumut' na' loe' pun ti pun a pun ri yeum, reu na' loe' pun ti pun a lulaic heul'.

¹⁰Yam in' hpom loe' peue ti peue na' puing' eun pi'tae'rae' ri na', seumeueng' keuting ha' reung seun' bin' ngawl na' a hk'uic' lih neum pang mao', a lih hk'uic' nang klong' loe' pun ti pun na' mae' keutui' leuum' na' ce. ¹¹Seumeueng' awn' a muis “Hku' sawng’”. A yeuh leuum' na' sawng' loe' pun ti pun. Kopti leuum' na' keut' a ri meuh leuum' sawng' na', peue nyui a na' peue yeum heun'.

¹²Yam in' hpom pun' peue ti peue na' puing' eun pi'tae'rae' ri na', seunyi, a' chi' mae' seumeueng' na' ce lulaic heul' loe' pun ti pun. A yeuh ku' ceng' ka peun-nyi mae' peunsum' na' duim' lawng loe' pun ti pun.

¹³Yam keue' ui' na', ui' pun ri nyu klang' keuting na' peul' a eo' nang ngon' ka mao' na'. A klawng ri lah' seng' laws', “Peue bhen' keute' na' pe', kaw pe' pun ri hkam' hk'a' jha' na', hk'a' jha' na', hk'a' jha' na', kopti seng' ka pi'tae'rae' ce in' hpom loe' peue na' kaw' kaw a ing' na'.”

9 Yam in' hpom hpawn' peue ti peue na' puing' eun pi'tae'rae' ri na', ui' pun ri nyu seumeueng' hk'uic' lih neum pang mao' na' lih a pang bhen' keute' ti meul'. Seumeueng' awn' a pun pakhkeuca' kaw tah' keutong' nyarok rui' na'. ²Yam tuh' a keutong' nyarok rui' na', tu' ngawl na' a nui ri pucti huk' seun' tu' ngawl dom' keuting neum keutong' nyarok na'. A

kang' seunyi na' mae' mao' na' duim' lawng.³ A' h-tul cum keuting na' a pucti lih neum tu' ngawl na'. A peul' lih pang bhen' keute' na'. A pun pit seun' pit ka keutam' tim' pang bhen' keute' na'.⁴ A pun leukah' un' va ri yeuh rip yuim, kleum' hku' mae' ku' lha' se-ungal ka pang bhen' keute' na' ce lu. Daecti a pun leukah' yeuh yawo peue un' pun ri tawk' ta' ra' Eun Peucawo' ri rel' ri na' ce sui'.⁵ A un' kue' ti' ca kaw toh ce. A pun yawo ahkvang kaw keunhap' ce hpawn' chi'. Hkam' hk'a' keunhap' awn' a seun' hkam' ku' huic' sui' ka keutam' tim' na'.⁶ Hk'a' naee yam awn' na, ce kaw klawng ri sok hk'a' yeum na', daecti ce hkuin' kaw sok ri nyu a. Ce saec' na' sum' yeum, daecti hk'a' yeum na' a kaw hk'uih heul' hk'ai' ce.

⁷A' htul awn' a seun' rawng peueng' suik' rangraen ri kaw heul' peueng' suik' na'. Cing' ce na' a cuip' ku' seun' cui' maw hk'il' ko', buh ce na' a seun' buh peue ko',⁸ huik' ce na' a seun' huik' beun' ko', rang' ce na' a seun' rang' ka leuvai sangsi' na' ko',⁹ hpa' la kang' nuk' ce na' a seun' hpa' la lhec' ko', seng' raws' ce hk'ec' ri na' a seun' seng' rawng peueng' suik' heun' heun' na' mae' a seun' seng' law ka rawng peueng' suik' na' hk'uih a heul' lec vang peueng' suik' na' ko'.¹⁰ Ce kue' seuta' kue' peutnuic seun' keutam' tim' na' ko'. Seuta' ce na' a kue' pit kaw keunhap' peue pun hpawn' chi' na'.

¹¹Hkun' haw' hkam' ce na' a meuh in' hpom ka keu-tong' nyarok rui' na' eun. Muis eun na' leukah' Hebrae' ka a meuh "Abadon", leukah' Helasa' ka a meuh "Apaw' liyon".[†]

¹²Ku' kuit nyhap' keuting nanggal' na' hawc' ka hawc'. Ku' kuit nyhap' lal' ceu na' a kaw' kaw ing' bae.

¹³Yam in' hpom les peue ti peue na' puing' eun pi' -tae' rae' ri na', ui' pun ri mhawng' seng' pucti lih neum nang ce' ka vang dum ri tan meuh hk'il' ut' nanggal' Eun Peucawo' na'.¹⁴ Seng' awn' a lah' ri ri in' hpom les peue ti peue kue' pi' tae' rae' na' eun, "Kah' ri plo' in' hpom pun' peue mawt ri keunam klong' ka Yufetis' na' ce reu'".¹⁵ Kop awn' na, in' hpom pun' peue ku' Peucawo' rangraen Eun ri uin' ce punta nali, seunyi, chi' neum aen' ce na' pun ce ri kah' ri plo' ri heul' toh peue bhen' keute' na' peue loe' pun ti pun.¹⁶ Ui' pun ri mhawng' peue suik' pawk rawng na' kue' ce lal' pak' lan peue.

¹⁷Rawng na' mae' peue pawk rawng pun ui' ri nyu ce nang limit na' ruprang ce na' kue' a yeuhki'. Peue pawk

rawng na' ce cuip' hpa' la kang' nuk' seurak' seun' ngawl, hpa' la lheun' mae' hpa' la seunil seun' mat na' ko'. Cing' ka rawng na' a seun' cing' ka leuvai sangsi' na'. A ru' piu' ngawl, tu' ngawl mae' mat na' lih hk'ai' moeng ri na'.¹⁸ Peue na' peue loe' pun ti pun peue pun ri yeum kopti ku' kuit nyhap' loe' ceu na', a meuh piu' ngawl, tu' ngawl mae' mat ru' ri lih hk'ai' moeng ka awn' na.¹⁹ Ku' hk'o' lhat' ka rawng na' a ut' ri moeng ka na' mae' seuta' ka na', kopti seuta' ka na' seun' a seueueng' kue' cing' heun' cing' na' ko'. A cu cing' ri na' a yeuh peue lu ri ka.

²⁰Peue un' nang yeum ri ku' keunhap' keuting aen' a na' ce, ce hkuin' nang taws' hpum' fuin map' ri ri kan' ku' yeuh ri na'. Ce hkuin' nang tecla faee' seuca' na' mae' faee' ruphtu ku' ti peue hk'il', leumuil, tong, seumu mae' hku' peue pleng' a na'. A meuh ruphtu a un' cang nyu, un' cang mhawng', un' cang long hk'a'.²¹ Ce ku' hkuin' nang taws' hpum' fuin map' ri tecla toh puri na', yeuh kahta' na', hkuin' nawng' tang' na' mae' rabawk' peue na', ce kaw' meung yeuh a.

In' hpom mae' bawl' htawm aet'

10 Hawc' awn' na, ui' pun ri nyu in' hpom seubu ti' ca keuting lih eun neum kuing' pang mao' na' ti peue. Putum' na' a ghuim' tu' eun na'. Hk'a' pang ka cing' eun na' a kue' peuyongtong. Buh eun na' a seun' seunyi na' ko', cing' eun na' a seun' kleum' rawng' buih ha' ri reung ngawl na' ko'.² Nang ti' eun na' a kue' bawl' htawm aet' a glas ri. Cing' a' tawm' eun na' a buin nang mha' seumut' na', cing' a' ve' eun na' a buin pang bhen' keute' na'.³ Eun klawng seng' laws' seun' seng' klawng ka leuvai sangsi' na' ko'. Yam klawng eun na', seng' neumhk'i a' res seng' na' a ku top' a.⁴ Yam neumhk'i a' res seng' na' laws' ka, ui' rangraen ri kaw tem' a na', ui' pun ri mhawng' seng' laws' neum kuing' pang mao' na' a lah', "Ku' lah' ka neumhk'i a' res seng' na' ri' a nang hpum' mi reu', pawlae' tem' a."

⁵Hawc' ko', in' hpom pun ui' ri nyu cawng eun ri bhen' keute' ri mha' seumut' na' yuk eun ti' a' tawm' ri na' huk' pang mao' na'.⁶ Eun hkam' sa' hki' hk'a' -naee vang cu ri Peucawo' a' yu im' cot' cu ku' hpan-pleng' kuing' pang mao' mae' ku' kue' hk'a' naee ka na' gawm' euc', ku' hpanpleng' bhen' keute' mae' ku' kue' hk'a' naee ka na' gawm' euc', ku' hpan-pleng' mha' seumut' mae' ku' kue' hk'a' naee ka na' gawm' euc'. Eun hkam' sa' hki' yeuh keutit', "Yam ka na' hpaw a ca' kaw lae' ling' bae.⁷ Daecti yam in' hpom a' res peue ti peue na' puing' eun pi' tae' rae' ri

[†] Vangdoh' ka "Abadon" mae' "Apaw' liyon" na' a lah', "nang yeuh ku' lulaic".

na', hk'a' kan' rui' Eun Peucawo' na' kaw a htonnuk seun' ku' pao' Eun ri peue suip leukah' ri ku' meuh mhai' Eun na' ce na'."

⁸Hawc' ko', seng' neum kuing' pang mao' na' a tang lah' a ri ui' bae, "Heul' ti bawl' htawm glas ri ri ti' eun in' hpom ku' cawng ri bhen' keute' ri mha' seumut' na' eun reu'."

⁹Kop awn' na, ui' heul' hk'o' bawl' htawm awn' a ri in' hpom na' eun. Eun lah' a ri ui', "Ti mi hk'a a reu'. Kaw a na nang keuteul mi na'. Daecti yam ut' a nang moeng mi na', a kaw teo' seun' leuum' cing' peuyhel' na'."¹⁰Ui' ti bawl' htawm aet' awn' a hk'ai' ti' eun in' hpom na', ui' hk'a a. Yam' ut' a nang moeng ui' na', a teo' seun' leuum' cing' peuyhel' na'. Daecti yam gleut ui' a lec keuteul ri na', a keut' ri na'.¹¹Hawc' ko', leukah' ti moeng na' a lah' ri ri ui', "Kaw mi kah ri lah' lawng peue ceu heun' ceu na', lawng kuing' heun' kuing' na', lawng leukah' heun' ceu na' mae' lawng hkun' haw' hkam' heun' peue na' bae."

Nang hkam' sa' hki' lal' peue

11 Hawc' awn' na, ui' pun mae'aw' ti lhem', ruprang ka na' a seun' ku' keutec na'. Ui' pun leukah' tawm' yeuh keutit', "Heul' keutec nya hk'o' mun' keuting Eun Peucawo' na' mae' vang dum ri tan ku' tan na', mae' peue hk'o' mun' mawn' na' ce ci' kue' a' neng peue na', mhin' ce reu'.²Daecti kang' hkung' hk'a' nok ka nya hk'o' mun' keuting na' pawlaee keutec a. Kopti ap a ri ri peue un' meuh peue ceu Yu' da na' ce hawc'. Ce kaw jap' buin veng seunga' chak' awn' a rot pun' kul' leual' chi'.³Ui' kaw tuil' ti' ca na' ri nang hkam' sa' hki' ui' lal' peue na' ka. Ka kaw cuip' hk'eung hpen' htong' tai' na', ka na' sang-sawn' leukah' mun' ren' kawn na' rot tiheng' lal' pak' leskul' seunyi."⁴Nang hkam' sa' hki' lal' peue aen' ka meuh kleum' sanlon lal' kleum' mae' bin' ngawl lal' bin' ut' nanggal' Eun Peucawo' bhen' keute' na'.⁵Ngawl na' a kaw ru' ri lih hk'ai' moeng ka na', a na' heul' ha' peue kaw ing' yeuh ka lu na' ce. Peue kaw ing' yeuh ka lu na' ce kaw pun ri yeum yeuh keutit'.⁶Ka kue' ti' ca kaw kang' mao' na' un' va a lhe' yam buih sangsawn' ka leukah' mun' ren' kawn na'. Ka ku kue' ti' ca yeuh leuum' na' meuh nham'. Ka saec' sum' yeuh ku' kuit nyhap' ku ceu na' lih ri bhen' keute' na' a' neng pok ka ku kue' ti' ca cang yeuh a yeut.

⁷Yam hawc' hkam' ka sa' hki' na', sat' rai pucti lih neum keutong' nyarok rui' na' a yeuh ka sui'. A kaw pe ka, toh ka yeum.⁸A uin' tu' yeum ka na' nang ngon' hk'a' ka veng keuting na'. Muis sa' leuhkok' ka veng

na' a muis veng So' dom mae' veng E' ji' tu'. Veng awn' a meuh veng vang Peucawo' e' na' pun Eun ri hkam' tawk' peue ri pang kleum' rawng' tawp' na'.

⁹Hk'a' naee loe' seunyi pai' hk'eung seunyi na' peue ing' neum peue ceu na' ku ceu, neum ceucat na' ku ceucat, neum leukah' na' ku ceu mae' neum kuing' na' ku kuing' peue kaw ing' cu ri nawk tu' yeum ka na'. Ce un' kah peue puing' tu' ka na'.¹⁰Peue bhen' keute' na' ce kaw nawk tu' yeum ka na' mae' ren' kawn ri. Ce kaw yeuh hk'a' ren' kawn munkvaen tuil' lapsawng' ri puri. Kopti peue suip leukah' Eun Peucawo' awn' keunhap' ka peue ut' pang bhen' keute' na' ce na'.

¹¹Daecti yam hawc' ka loe' seunyi pai' hk'eung seunyi na', Peucawo' Eun puing' cit' a' yu im' na' lec hk'a' naee tu' ka na'. Ka tawl' kuh' cawng. Peue pun ri nyu a na' ce lhat' nyawk'.¹²Hawc' ko', ce pun ri mhawng' seng' laws' lih neum kuing' pang mao' na' a lah' a ri ka, "Huk' maen' reu'." Hawc' ko', ka ku huk' nang putum' na' ka huk' nang kuing' pang mao' yam ransu ka na' buih nawk ce ka na'.

¹³Yam nali awn' na, a in' san' reng nyawk'. Veng awn' na kul' pun ti pun na' a lhu' jah. Peue yeum ri in' san' awn' na' res heng' peue. Peue lawt yeum ri na' ce lhat' nyawk'. Ce suk' seun' munhpung' Eun Peucawo' kuing' pang mao' na'.

¹⁴Ku' kuit nyhap' keuting lal' ceu ti ceu na' hawc' ka hawc'. Ku' kuit nyhap' keuting loe' ceu ti ceu na', un' ling', kaw a ing' rot.

Pi' tae' rae' a' res deul ti deul

¹⁵Yam in' hpom a' res peue ti peue na' puing' eun pi' tae' rae' ri na', a kue' seng' laws' nyawk' heun' seng' a laws' lih neum kuing' pang mao' na'. A lah', "Kuing' ka bhen' keute' na' keut' a ri meuh kuing' Eun Peucawo' e' na' mae' kuing' Eun Hkrit na' hawc'.

Eun kaw u' peung a cot' cu ri."

¹⁶Hawc' ko', nang kawt lal' kul' pun' peue sawng' mok' pang ten ri nanggal' Eun Peucawo' na' ce nghup' ri faee' Peucawo' Eun.¹⁷Ce lah',

"Kopti yeuh Mi ti' ca keuting Mi na' pucti lih na' mae' u' peung Mi kuing' na' hawc' na', ye mun' keuting ri Mi Cawo' Peucawo' ti' ca keuting, Cawo' a' yu im' maet' maen' mae' yam pon heul' hawc' na'.

¹⁸Peue bhen' keute' na' seungeueng' ce, daecti hk'a' seungeueng' Mi na' mae' yam awn' a ing' rot hawc'.

A meuh yam kaw Mi taws' a' mu ri peue yeum na' ce,

yam kaw Mi tuil' lapsawng' ri peue suip leukah' mun' ren' kawm meuh mhai' Mi na' ce, ri peue Mi na' ce mae' ri peue aet' peue keuting ku' hkopyawm' ri muis Mi na' ce.

A meuh yam kaw Mi yeuh ku' lulaic ri peue yeuh bhen' keute' a lu na' ce."

¹⁹Hawc' ko', nya hk'o' mun' keuting Eun Peucawo' nang kuing' pang mao' na' a tah' ri. Ui' pun ri nyu teuk kati sat' ca' hk'a' nae nya hk'o' mun' keuting na'. Hawc' ko', a cak' cal' ceng' yhapyhap, seng' ruingruing, seng' neumhk'i reng, in' san' mae' a' hk'el' reng nyawk'.

Beun' mae' peuyong

12 Hawc' awn' na, a kue' het' keuting hk'o' am' pucti lih nang kuing' pang mao' na'. A meuh beun' eun cuip' seunyi na' meuh hk'eung ri, a' chi' na' a ut' hk'a' ruim cung eun, eun cuip' seumeueng' kul' leual' meul' na' meuh cui' maw hk'il' ri cing' ri na'. ²Beun' awn' eun nyhel', eun aec' rak ri sui' awng' ri kopti kaw eun kue' kon' hawc' na'. ³Hawc' ko', a kue' het' keuting pucti lih nang kuing' pang mao' na' bae ti ceu. A meuh peuyong seurak' keuting ti tu'. A kue' cing' a' res cing' mae' reung' kul' reung'. Cing' ka na' a cuip' cui' maw hk'il'. ⁴Seuta' ka na' a ta' faet' seumeueng' kue' pang mao' na' hk'uic' pang bhen' keute' na' loe' pun ti pun. Punta peuyong na' kaw a ko' ri hk'a' kon' nyom na' eun mae' keut' eun na', a cawng nanggal' ka beun' kaw keut' kon' na' eun. ⁵Beun' awn' ka keut' kon' me. Eun kaw u' peung kuing' na' gawm' euc' ri hku' ji lhec' ri na'. Eun pucti lih yuk ri huk' ri Peucawo' Eun nang tenceo' Eun Peucawo' na'. ⁶Beun' awn' ka hk'uih heul' nang vang hk'oh' hk'oeng' vang Peucawo' mhe' Eun ri uin' pun ka na'. Teh' na', ka kaw pun ri rokxa' uii' ri tiheng' lal' pak' leskul' seunyi ri ka.

⁷Yam awn' na, a kue' suik' nang kuing' pang mao' na'. Mi' hkela' mae' in' hpom eun na' ce peueng' suik' ri peuyong na' mae' in' hpom ka na' ce. ⁸Muk ka hk'a' peuyong na' a sum, a pun ri ra ri hk'uih hk'ai' kuing' pang mao' na'. ⁹Peuyong keuting na' a pun ri fat' ri tec ri lih. Peuyong awn' a meuh seueueng' leumah' na', peue klawng a meuh seuca' rai, a' ko' meuh Satan. A cop' long peue bhen' keute' na' peue kleuc' hk'a' ri gawm' euc'. A pun ri fat' ri tec ri lih pang bhen' keute' na' mae' in' hpom ri na' ce tiduih'.

¹⁰Hawc' ko', ui' pun ri mhawng' seng' laws' nang kuing' pang mao' na'. A lah',

"Maet' maen', hk'a' htut lawtpon na', ti' ca na' mae' kuing' Eun Peucawo' e' na' mae' an' nya ti' ca Eun Hkrit na' rot ka hawc'. Kopti ku' tang' map' hk'a' pang ec' awng' e' nanggal' Eun Peucawo' gawm' sum' gawm' seunyi na'

pun a ri kue ri tec ri lih hawc'.

¹¹Ce pe ro' ka seuca' rai na' eun ri nham' Eun Kon' yung' na' mae' ri leukah' hkam' ce sa' hki' ri na' hawc'. Ce un' lhat' ri yeum, un' se' dai' a' yu ri.

¹²Kop awn' na, kuing' pang mao' na' mae' peue kuing' pang mao' na' ren' kawm reu'. Daecti bhen' keute' na' mae' mha' seumut' na' kaw a pun ri kuit nyhap' nyawk', kopti seuca' rai na' lih a ri pe' hawc'. Kopti yawng a yam ri na' un' lae kue' a ling' na', a seungeueng' nyawk'."

¹³Yam peuyong na' pun a ri nyu tu' ri na' pun a ri tec ri lih pang bhen' keute' na', a ruip beun' keut' kon' me na' ka. ¹⁴Punta beun' awn' kaw ka peul' heul' ri vang hk'oh' hk'oeng' vang rangraen ri pun ka na', ka pun hk'ec' ka klang' keuting na' lal' hk'ec'. Punta peuyong na' kaw a un' rot ri ka na', ka kaw pun ri rokxa' uii' ri teh' loe' neum huh'. ¹⁵Punta leuum' na' kaw a ngam' beun' na' ka hot' ri heul' na', peuyong na' a ru' leuum' na' lih hk'ai' moeng ri na' heun' heun' seun' klong' na'. ¹⁶Daecti bhen' keute' na' a teum' kawm beun' na' ka. A gvas ang' ri, a bip leuum' peuyong na' ru' ka na' hit'. ¹⁷Peuyong na' a seungeueng' nyawk' ri beun' na' ka. A heul' peueng' suik' ri kon' kawm' vang ka na' ce. Kon' awn' ce ko', ce meuh peue leuceng leukah' tuil' Eun Peucawo' na' mae' kati keutawn' ri sa' hki' lawng Eun Yesu' na'. Peuyong na' a cawng pang kaw' sai keunam mha' seumut' na'. †

Sat' rai pucti huk' neum mha' seumut'

13 Hawc' ko', ui' pun ri nyu sat' rai ti tu' puc a ri huk' neum mha' seumut' na'. A kue' cing' a' res cing' mae' reung' kul' reung'. Reung' ka na' a chuip' cui' maw hk'il' kul' meul'. Cing' ka na' a tem' tu' muis leukah' un' nawpsang Peucawo' Eun na'. ²Tu' ka sat' rai pun ui' ri nyu awn' a seun' leuvai awk' na', daecti cung ka na' a seun' cung hk'is' na', moeng ka na' a seun' moeng ka leuvai sangsi' na'. Peuyong na' a tuil' ten mae' ti' ca keuting ri na' ri sat' rai

† Nang htawm Seunga' na' ngon', ton aen' ut' a ri nambat keuting 13 na'.

awn' na.³ Cing' ka sat' rai na' ti cing' a kue' roe vang sui' hk'o' a kaw yeum, daecti a cuin hawc'. Peue bhen' keute' na' ce gawm' euc' ce hot' sat' rai na' mae' am' ri.⁴ Ce nghup' ri faee' peuyong na' kopti tuil' a ti' ca ri na' ri sat' rai na'. Saec' meuh sat' rai na', ce ku nghup' ri faee' a yeut. Ce mhaing' puri lah', "A' nhaw' ci' seun' sat' aen' na? A' nhaw' ci' kaw cang peueng' suik' ri ka?"

⁵ Sat' rai na' a pun ahkvang kaw lah' leukah' mhawng' ri hk'o' cuin na' mae' leukah' un' nawp-sang Peucawo' Eun na'. A pun ahkvang kaw a lo' ti' ca ri na' pun' kul' leual' chi'.⁶ A lah' leukah' un' hkopy-awm' ri Peucawo' Eun na'. A saesawm' muis Eun na', gawm' vang ut' Eun na', gawm' peue kuing' pang mao' na' ce.⁷ A pun ahkvang kaw peueng' suik' ri peue Eun Peucawo' na' ce mae' ahkvang meuh cawo' pe na'. A pun an' nya ti' ca hk'a' pang peue ceu na' peue ku ceu, ceucat na' ku ceucat, leukah' na' ku ceu mae' kuing' na' ku kuing'.⁸ Peue bhen' keute' gawm' euc' na' ce kaw faee' sat' rai awn' na. Peue awn' meuh ce peue un' kue' muis hk'a' naee htawm civit im' Eun Kon'yung' ku' pun ri hkam' toh peue ri tang' neum yam hpanpleng' bhen' keute' na' Eun.

⁹ Peue kue' yhuk' na', leuceng a reu'.

¹⁰ A' nhaw' lawn hteuk ri kaw pun ri hk'awng' ri ko', eun kaw pun ri hkam' a.

A' nhaw' lawn hteuk ri kaw yeum ri leungawng ko', eun kaw pun ri yeum ri leungawng.

Lawng aen' na, peue Eun Peucawo' na' ce kaw kah ri kue' hk'a' yeun' hkam na' mae' hk'a' kati keutawn' na'.

Sat' rai puc ri huk' neum bhen' keute'

¹¹ Hawc' ko', ui' nyu sat' rai seubu na' puc a ri huk' neum bhen' keute' na' ti tu'. A kue' reung' lal' reung' seun' reung' ka kon'yung' na' ko', daecti a leukah' seun' peuyong na'.¹² A tang' tu' ka sat' rai nanggal' na', a lo' ti' ca ka na' gawm' euc'. A yeuh bhen' keute' na' mae' peue bhen' keute' na' ce faee' sat' rai nanggal' ku' kue' roe vang sui' keuting cuin hawc' na'.¹³ A yeuh het' keuting hk'o' am' na' rot ti yeuh a ngawl neum kuing' pang mao' na' hk'uaic' lih pang bhen' keute' na' nanggal' to' nha' peue peue na'.¹⁴ Kopti meuh a het' keuting pun a ri rap ri ti' ca kaw yeuh a tang' tu' ka sat' rai nanggal' na', a cop' peue bhen' keute' na' peue. Punta kaw a meuh munhpung' pun sat' rai ku' a saec' pun ri mawk ri ri leungawng daecti a hkuin' nang yeum na', sat' rai lal' tu' ti tu' na' a kah peue na' peue pleng' ruphtu rup ka sat'

rai nanggal' na'.¹⁵ Punta ruphtu na' kaw a cang leukah' mae' kaw a cang yeuh peue un' yawm' ri faee' a na' ce yeum, a pun ti' ca kaw tuil' hk'a' ghuih' bhum' na' ri ruphtu na'.¹⁶ Saec' meuh peue aet' peue keuting, peue meuneum peue hk'o' tukyak mae' peue un' meuh mhai' peue meuh mhai' na' peue, a tec' teng kah peue rap ri ti vang mhai' ri hk'a' ti' a' tawm' ri na', a' ko' ri rel' ri na' ku peue ri.¹⁷ A' nhaw' lawn un' kue' vang mhai' ku' meuh muis ka sat' rai na', a' ko' nambat ka muis ka na' ko', ce hkuin' kaw cang leuvaee cang paing' hk'eung ri puri.

¹⁸ Lawng aen' na, kah ri lo' cu' yi. A' nhaw' lawn leuceng pun a ko', kah eun kuit ri nawk nambat ka sat' rai na' reu'. Kopti meuh a nambat eun peue ti peue na'. Nambat eun na' a meuh 666.

Kon'yung' mae' peue 144,000 peue

14 Hawc' awn' na, ui' keue'. Ui' pun ri nyu Kon'yung' na' cawng Eun mae' peue tisaen' pun' mhuin' pun' heng' peue na' ce pang gong Yi' on na'. Peue awn' ce tem' muis Eun Kon'yung' na' mae' muis Eun A' kuiing' na' ri rel' ri na'.² Hawc' ko', ui' pun ri mhawng' seng' laws' neum kuing' pang mao' na' a seun' seng' leuum' dhim' ri hot' klong' na' mae' seng' neumhk'i reng na'. Seng' pun ui' ri mhawng' na' a seun' seng' tet' ting' ce muk peue tet' ting' ri na'.³ Ce lah' seng' htawm hk'u' na' nanggal' ka tenceo' na', nanggal' ka ku' a' yu im' pun' tu' na' mae' nanggal' ce nang kawt na'. A lawn un' meuh peue tisaen' pun' mhuin' pun' heng' peue ku' htut ri neum bhen' keute' na' ce ko', a' nhaw' hkuin' cang lah' seng' htawm hk'u' awn' na saec' ti peue.⁴ Peue awn' ce meuh peue un' yeuh ku' hk'aw' jeuk ri beun', kopti rokxa' ce tu' ri seunga' chak' meun na'. Ce hot' Kon'yung' na' Eun ku duih'. Ce meuh peue Peucawo' htut Eun ce neum peue punta kaw ce meuh pli' nanggal' tan ri ri Peucawo' Eun na' mae' ri Kon'yung' na' Eun.⁵ Leukah' chi' lai na' a hkuin' lih hk'ai' moeng ce na'. Ce hkuin' kue' vang ri saec' ti ceu.

In' hpom loe' peue

⁶ Hawc' awn' na, ui' pun ri nyu in' hpom seubu na' peul' eun huk' nang vawo na' ti peue. Eun pao' leukah' mun' ren' kawn cot' cu na' ri peue kuing' na' ku kuing', peue ceu na' peue ku ceu, leukah' na' ku ceu mae' ceucat na' ku ceucat.⁷ Eun klawng ri lah' laws', "Lhat' til ri Peucawo' Eun, tuil' munhpung' Eun reu'. Kopti rot a yam taws' Eun a' mu hawc'. Fae' Peucawo'

Cawo' hpanpleng' kuing' pang mao', bhen' keute', mha' seumut' na' mae' keutui' leuum' na' Eun reu'."

⁸In' hpom lal' peue ti peue na' eun ing' hot'. Eun lah', "Lhu' jah ka hawc', veng keuting Babu' lon ku' yeuh peue yuic' ri leuum' pli' bui mae' len' cu na' pun a ri lhu' jah hawc'."

⁹In' hpom loe' peue ti peue na' eun tang ing' hot'. Eun klawng ri lah' laws' a, "A' nhaw' lawn faee' sat' rai na' mae' ruphtu rup ka na', mae' rap ri ti vang mhai' ka na' ri rel' ri, a' ko' ri ti' ri na' ko',¹⁰ eun kaw kah ri nyui leuum' pli' bui seungeueng' Eun Peucawo' ku' raeh ri lih nang kaw' seungeueng' Eun a un' laee hkawo' keunhaw' na'. Eun kaw pun ri hkam' hk'a' ciyang ri ngawl mat na' nanggal' ce in' hpom seunga' na' mae' nanggal' Eun Kon' yung' na'.¹¹ Tu' ngawl ka hk'a' ciyang hkam' eun na' a kaw nui ri huk' cot' cu. Peue faee' sat' rai na' mae' ruphtu rup ka na', a' ko' peue rap ri ti vang mhai' ka muis ka na', ce hkuin' kaw laee pun ri keului' ri gawm' sum' gawm' seunyi."

¹²Lawng aen' na, peue Eun Peucawo' ku' leuceng ri ti leukah' ritroe Eun na' mae' ku' kati keutawn' ri Yesu' Eun na' ce kaw kah ri kue' hk'a' yeun' hkam na'.

¹³Hawc' ko', ui' pun ri mhawng' seng' lih neum kuing' pang mao' na' a lah', "Tem' a yeuhki', 'Tang' neum maet' maen' na' hk'a' ren' kaw na' kaw a kue' ri peue sum a' yu ri pun Peucawo' Eun na' ce." Cit' seunga' na' a lah', "Cawp' ka hawc', ce kaw keului' yeuh kan' reng ri na' kopti kan' ku' yeuh ce na' kaw a hot' ce heul' na'."

Vuic bhen' keute' na'

¹⁴Ui' keue', ui' pun ri nyu putum' paing na' mae' peue ti peue "Eun seun' Kon' ai' peue na' Eun"[†] Eun mok' hk'a' pang ka putum' na'. Eun cuip' cui' maw hk'il' na' ri cing' ri na'. Nang ti' Eun na' a kue' guc' lawm nyawk' na'.¹⁵ Hawc' ko', in' hpom seubu na' eun pucti lih neum nya hk'o' mun' keuting na'. Eun klawng ri lah' laws' a ri ku' mok' pang putum' na' Eun, "Lo' guc' Mi na' vuic a reu', rot a yam vuic ka hawc', kopti pli' seukuk kaw vuic ka bhen' keute' na' keutuim ka hawc'."¹⁶ Kop awn' na, ku' mok' pang putum' na' Eun vuic guc' ri na' hk'a' pang bhen' keute' na', bhen' keute' na' a pun ri vuic ri.¹⁷ In' hpom seubu na' eun pucti neum nya hk'o' mun' keuting ka kuing' pang mao' na'. Eun ku' jhawp' guc' lawm nyawk' na' yeut.¹⁸ Hawc' ko', in' hpom seubu ku' meuh nang roksa' ngawl na' eun pucti lih neum vang dum ri tan ku' tan na'. Eun

klawng ri lah' laws' a ri ku' jhawp' guc' lawm nyawk' na' eun, "Ti guc' lawm nyawk' mi na' vuic ri ti seukuk ka pli' bui bhen' keute' na' reu', kopti pli' bui na' keutuim ka hawc'."¹⁹ In' hpom ku' jhawp' guc' na' eun ku' hko' guc' ri na' hk'a' pang bhen' keute' na', eun vuic ri ti pli' bui na'. Hawc' ko', eun nyon pli' bui na' hk'a' naee keutui' keuting a meuh vang bet' leuum' pli' bui seungeueng' Eun Peucawo' na'.²⁰ Ce kaw pun ri hkam' chok' chec' ri nang keutui' vang bet' leuum' pli' bui hk'a' nok ka veng na'. Nham' ce na' a nuk keutui' na' a bah pucti lih lhung' keuteul mu' lhec' klong moeng ka rawng na'. A nyhaee lhaee' heul' tiheng' lespak' satadi^{††}.

In' hpom a' res peue mae' ku' keunhap' keuting a' res ceu

¹⁵Ui' pun ri nyu het' keuting ku' hk'o' am' nyawk' seubu nang kuing' pang mao' na'. A meuh in' hpom a' res peue na' ce mae' ku' keunhap' keuting a' res ceu na'. Ku' keunhap' keuting awn' a meuh ku' keunhap' vang tisut' ka na', kopti hk'a' seungeueng' Eun Peucawo' na' kaw a euc' ri ku' keunhap' keuting awn' na'.² Ui' pun ri nyu ku' ti ceu a seun' mha' seumut' glawk' ceo' hkawo' ngawl na'. Peue pe sat' rai na', ruphtu rup ka na' mae' vang mhai' ka muis ka na' ce cawng keunam ka mha' seumut' na'. Ce jhawp' ting' ku' Peucawo' tuil' Eun ri ce na'.³ Ce lah' seng' htawm eun Mo' se ku' meuh mhai' Eun Peucawo' na' mae' seng' htawm Eun Kon' yung' na'. Ce lah', "Cawo' Peucawo', Peucawo' ti' ca keuting, kan' Mi na' keuting ka, a hk'o' am' nyawk'.

Cawo' Hkun' haw' hkam' ku cu,

hk'a' Mi na' leupaws seumeu' ka, a meuh ku' neum.

⁴Cawo' Peucawo', a' nhaw' ci' kaw un' lhat' til ri Mi?

A' nhaw' ci' kaw un' tuil' munhpung' ri muis Mi na'?

Kopti Mi ri palkoe seunga' chak' Mi.

Peue ceu gawm' euc' kaw peue ing' ri Mi,

peue kaw faee' Mi nanggal' Mi na',

kopti kan' leupaws seumeu' yeuh Mi na', puc a ri glih' gleueng' hawc'."

⁵Hawc' awn' na, ui' pun ri nyu nya hk'o' mun' keuting ka kuing' pang mao' na' tah' a ri. Nya hk'o' mun' keuting awn' a meuh tup' kati sat' ca' na'.⁶ In' hpom a' res peue ku' jhawp' ku' keunhap' keuting a' res ceu na' ce pucti lih neum nya hk'o' mun' keuting na'. Ce cuip' hk'o' hpen' linin seunga' seungung na'. Ce mawt

[†] Dayela' 7:13

^{††} 1,600 satadi na' a meuh hk'ao tipak' seudi' kul' lak', a' ko' hk'ao loe' pak' ki' lo'.

sae' hang hk'il' ri nuk' ri na'.⁷ Hawc' ko', ku' a' yu im' pun' tu' na' ku' ti tu' ka na' a ti ri tuil' paen' hk'il' seuglong' a' res meul' ku' seungeueng' Eun Peucawo' a' yu im' cot' cu na' nuk ka a na' ri in' hpom a' res peue na' ce.⁸ Hawc' ko', tu' ngawl lih neum munhpung' Eun Peucawo' na' mae' lih neum ti' ca Eun na' a nuk hk'a' naee ka nya hk'o' mun' keuting na'. Ku' keunhap' keuting a' res ceu ce in' hpom a' res peue na' a lawn un' nang hawc' ko', a' nhaw' hkuin' kaw cang ing' lec nang nya hk'o' mun' keuting na' saec' ti peue.

Paen' seuglong' ka seungeueng' Eun Peucawo' a' res meul'

16 Hawc' awn' na, ui' pun ri mhawng' seng' laws' na' puc a ri lih neum nya hk'o' mun' keuting na'. A lah' a ri in' hpom a' res peue na' ce, "Heul' bah ku' seungeueng' Eun Peucawo' ku' ut' hk'a' naee paen' seuglong' a' res meul' na' lih pang bhen' keute' na' reu'."

²In' hpom nanggal' ti peue na' eun heul' bah paen' seuglong' ri na' pang bhen' keute' na'. Vang sui' seueum' gvas hk'aw' jeuk ku' sui' nyawk' na' a keut' ri tu' ce peue kue' vang mhai' ka sat' rai na' mae' peue fae' ruphtu rup ka na' ce.

³In' hpom lal' peue ti peue na' eun bah paen' seuglong' ri na' nang mha' seumut' na'. Mha' seumut' na' a keut' ri meuh nham' seun' nham' ce peue yeum na' ko'. Ku' a' yu im' ut' hk'a' naee ka na' a ku yeum gawm' euc' ri.

⁴In' hpom loe' peue ti peue na' eun bah paen' seuglong' ri na' nang klong' na' mae' keutui' leuum' na' ce. Leuum' na' a keut' ri meuh nham'.⁵ Hawc' awn' na, ui' pun ri mhawng' in' hpom cawo' rok sa' leuum' na' lah' eun,

"Cawo' seunga' chak', Cawo' a' yu im' yam pon hawc' na' mae' yam maet' maen' na' Mi, taws' Mi a' mu hot' hk'a' leupaws seumeu' na' hawc'.

⁶Kopti yeuh ce nham' ce peue Mi na' mae' nham' ce peue suip leukah' Mi na' peuc' na',

Mi yeuh ce nyui nham' na', kuing' ce ri hkam' a yeuhki' hawc'."

⁷Hawc' ko', ui' pun ri mhawng' seng' htawhkam ka vang dum ri tan ku' tan na', a lah',

"Meuh, Cawo' Peucawo' ti' ca keuting,

a' mu taws' Mi na' meuh ka neum, a leupaws seumeu'."

⁸In' hpom pun' peue ti peue na' eun bah paen' seuglong' ri na' hk'a' pang seunyi na'. Seunyi na' a pun ti' ca kaw ha' peue.⁹ Kuc' ha' lok nyawk' na' a ha' ce. Ce is' jha' muis Eun Peucawo' Cawo' u' peung ku' keunhap' keuting aen' a na' Eun. Daecti ce un' yawm' ri taws' hpum' fuin map' ri map' ri na' mae' tuil' munhpung' Eun Peucawo' na'.

¹⁰In' hpom hpawn' peue ti peue na' eun bah paen' seuglong' ri na' hk'a' pang ten ka sat' rai na'. Kuing' ka sat' rai na' a hawc' lec vang duim' lawng na'. Peue na' ce cet dak' ri na' ri tukhka nyawk' ka.¹¹ Kopti meuh a hk'a' sui' ce na' mae' vang sui' seueum' gvas ce na', ce is' jha' Peucawo' kuing' pang mao' na' Eun. Daecti ce un' yawm' ri taws' hpum' fuin map' ri map' ri yeuh ce hawc' na'.

¹²In' hpom les peue ti peue na' eun bah paen' seuglong' ri na' nang klong' keuting muis Yufetis' na'. Leuum' ka klong' na' a hit' punta kaw rangraen mhe' hk'a' pun hkun' haw' hkam' ut' hk'a' lih seunyi na' ce.¹³ Hawc' ko', ui' pun ri nyu seuca' rai ruprang seun' a' ruk na' loe' tu' a pucti lih neum moeng ka peuyong na', moeng ka sat' rai na' mae' moeng eun peue guil ri meuh peue suip leukah' Eun Peucawo' na'.¹⁴ Ce meuh cit' ka seuca' rai ku' yeuh het' keuting heun' ceu na'. Ce pucti heul' hk'on' ro hkun' haw' hkam' pang bhen' keute' na' ce gawm' euc' punta kaw ce ing' peueng' suik' hk'a' naee seunyi keuting Eun Peucawo' ti' ca keuting na'.

¹⁵"Keue' reu', kaw Ui' lih seun' peue con' ku' ing' yam a' nhaw' un' pawn peue kui' ri na'. Peue un' it' eun cuip' hk'eung ri rangraen ri na', eun kaw pun ri ren' kaw n, kopti kaw eun un' pun ri long hk'a' ut' gung' gang' kaic ri peue."

¹⁶Hawc' ko', seuca' rai loe' tu' na' ce hk'on' ro hkun' haw' hkam' na' ce ing' hk'om puri vang leukah' Hebrae' lah' ka muis Amage' don na'.

¹⁷In' hpom a' res peue ti peue na' eun bah paen' seuglong' ri na' nang vawo na'. Seng' laws' nyawk' na' a laws' lih neum tenceo' Eun Peucawo' hk'a' naee nya hk'o' mun' keuting na', a lah', "Hawc' ka hawc'."

¹⁸Hawc' ko', a cak' cal' ceng' yhappyhap, seng' ruingruing, seng' neumhk'i reng mae' in' san' reng nyawk'. Tang' neum peue na' la peue ri kue' pang bhen' keute' na', a hkuin' nang duing kue' in' san' reng seun' awn' na saec' ti pok.¹⁹ Veng keuting na' a peutih meuh loe' glawk'. Veng keuting ka kuing' na' ce a lhu' jah heul'. Peucawo' Eun un' pil map' ka veng keuting Babu' lon na'. Eun tuil' a nyui kaw' ku' leuum' pli' bui seungeueng' nyawk' Eun na' nuknhen' ka na'.²⁰ Kaw'

na' ku kaw' mae' gong na' ku meul' a cum' rai' heul' euc'.² A' hk'el' keuting nyawk' na' a hk'uc' lih neum pang mao', a hk'uc' teng' peue. A' hk'el' ti meul' na' a kue' hk'ao ri hpawn' kul' ki' lo'. Kopti ku' keunhap' keuting ka a' hk'el' aen' reng nyawk' ka na', peue na' peue is' jha' Peucawo' Eun.

Beun' paing' tu' ri mae' sat' rai

17 In' hpom a' res peue kue' paen' seuglong' a' res meul' na' ce, ku' ti peue na' eun ing' lah' a ri ui', "Ing' maen', kaw ui' tuil' mi nawk hk'a' taws' a' mu ri beun' rai ri paing' tu' ri ku' mok' pang vang leuum' heun' duih' na' eun.³ Hkun' haw' hkam' pang bhen' keute' na' ce len' cu ri heun gawm' euc' ri. Peue bhen' keute' na' ce ku nyui ri yuic' ri leuum' pli' bui len' cu eun beun' awn' na."

³ Hawc' ko', in' hpom awn' eun tuil' ui' nyu limit. Eun cu Cit' seunga' na' eun va ui' heul' nang vang hk'oh' hk'oeng' na'. Teh' na', ui' pun ri nyu beun' ti peue eun mok' hk'a' pang ka sat' rai seurak' nyawk' na'. Sat' rai awn' a kue' muis lah' leukah' un' nawp-sang Peucawo' Eun na' hk'awp' tu' ri na'. A kue' cing' a' res cing' mae' reung' kul' reung'.⁴ Beun' awn' eun cuip' hk'eung hpen' yawtmong na' mae' hpen' seurak' nyawk' na'. Tu' eun na' a ceng' yhap-yhap ri hk'il', seumu seng' mae' seng' seukleu'† na'. Eun jhawp' kaw' hk'il' ku' hk'o' kleh' hk'o' keunah na' mae' ku' hk'aw' jeuk ka len' cu eun nuknhen' ka na'.⁵ Ri rel' eun na' a tem' ri yeuh keutit', "Vangdoh' rui' ka veng keuting Babu' lon na', ma ce beun' paing' tu' ri na' ce mae' ma ka ku' hk'o' kleh' hk'o' keunah ka bhen' keute' na' ce gawm' euc' na'."

⁶ Ui' pun ri nyu beun' awn' yuic' eun ri nham' ce peue Eun Peucawo' na' mae' nham' ce peue hkam' sa' hk'i' pun Yesu' Eun na'.

Yam nyu ui' eun na', ui' am' nyawk'.⁷ Hawc' ko', in' hpom awn' eun lah' a ri ui', "A ci' yeuh keunhaw' mi vae' am'? Kaw ui' ris mi mhawng' vangdoh' rui' eun beun' awn' na mae' sat' rai pawk eun ku' kue' cing' a' res cing', kue' reung' kul' reung' na'.⁸ Sat' rai pun mi ri nyu na', leumah' tawn kue' a' yu yeut, daecti maet' maen' a un' laee kue'. A kaw pucti huk' neum keutong' nyarok rui' na', hawc' ko' a kaw tang lec nang vang lulaic ri na'. Peue bhen' keute' ku' muis ce un' kue' a nang htawm a' yu im' tang' neum yam hpanpleng' bhen' keute' na', yam nyu ce sat' rai awn' na ce kaw am' ri ka. Kopti leumah' a tawn kue' a' yu,

† Seng' seukleu' na' ti peue a ri neum seukleu' ut' nang mha' seumut' na'. A ngos nyawk'.

maet' maen' a un' laee kue', daecti hk'a' nanggal' ka na' a kaw tang kue' a' yu bae.

⁹ Lawng aen' na, a kaw lo' cu' yi kuit ri nawk a. Cing' a' res cing' na' a meuh gong a' res meul' vang beun' awn' mok' eun na'.¹⁰ A ku meuh hkun' haw' hkam' a' res peue na' ce yeut. Ku' hpawn' peue na' yeum ce hawc'. Ku' ti peue na' eun kawn' a' yu im'. Ku' seubu ti peue na' eun un' nang ing' rot. Daecti yam na' eun ing' rot na', eun kaw ut' yawo ti cu hkao'.¹¹ Sat' rai ku' tawn kue' a' yu leumah' na' daecti maet' maen' a un' laee kue' na', a meuh hkun' haw' hkam' seudi' peue ti peue na' eun. Eun ku pawng' hk'a' naee muk ce hkun' haw' hkam' a' res peue na' yeut. Eun buih heul' lec nang vang lulaic ri na'.

¹² Reung' kul' reung' pun mi ri nyu na' a meuh hkun' haw' hkam' ku' un' nang u' peung kuing' ri na' kul' peue na' ce. Daecti ce kaw pun an' nya meuh hkun' haw' hkam' na' mae' sat' rai na' tiduih' ti nali.¹³ Ce kaw sahpaw' ri ap an' nya mae' ti' ca ri na' ri sat' rai na'.¹⁴ Ce kaw peueng' suik' ri Kon' yung' na' Eun. Daecti Kon' yung' na' Eun kaw peueng' pe ce, kop-ti meuh Eun Cawo' hk'a' pang cawo', Hkun' haw' hkam' hk'a' pang hkun' haw' hkam' gawm' euc' na'. Tapae' kati keutawn' ku' Peucawo' klawng Eun ri leuk ri uin' ce na' ce kaw ut' mae' He-un."

¹⁵ In' hpom na' eun tang lah' a ri ui', "Leuum' nyu mi beun' paing' tu' ri mok' eun hk'a' pang ka na', a meuh peue ceu, muk peue, kuing', mae' leukah' na' ce.

¹⁶ Sat' rai na' mae' reung' kul' reung' pun mi ri nyu na' a kaw ces ri beun' paing' tu' ri awn' eun. A kaw yeuh eun lu, uin' eun ut' tu' seurak' ri. A kaw hk'a' ke-une eun na', hawc' ko' a kaw dum eun ri ngawl na'.

¹⁷ Kopti Peucawo' yeuh Eun ce kuit doh' kaw ce hot' ri yeuh alo Eun Peucawo' na', yeuh ce sahpaw' ri ap ti' ca u' peung kuing' ce na' ri sat' rai na', rot ti kaw a hton-nuk leukah' Eun Peucawo' na'.¹⁸ Beun' pun mi ri nyu na' eun meuh veng keuting ku' u' peung hkun' haw' hkam' ka bhen' keute' na' ce."

Veng Babu' lon lhu' jah ka

18 Hawc' awn' na, ui' pun ri nyu in' hpom seubu na' lih eun neum kuing' pang mao' na' ti peue. Eun kue' ti' ca keuting. Munhpung' ku' ceng' eun na' a ceng' bhen' keute' na'.² Eun ta' ul' ri lah' laws', "Lhu' jah ka, veng keuting Babu' lon na' lhu' jah ka hawc'.

Veng keuting aen' a keut' ri meuh vang ut' seuca' hawc'.

A meuh vang ut' ka seuca' rai na'.

A meuh vang ut' ka sim' hk'aw' jeuk na' mae' sim' hk'o' kleh' hk'o' keunah na' ku ceu.

³Kopti peue ceu gawm' euc' na' nyui ce ri yuic' ri leu-um' pli' bui len' cu ka veng na'.

Hkun' haw' hkam' ka bhen' keute' na' ce len' cu ri veng na'.

Kopti meuh a yeuh pon yeuh lheu' ka veng na', peue ka hkai' ka bhen' keute' na' ce baet ri meuneum huk'."

⁴Hawc' ko', ui' pun ri mhawng' leukah' seubu neum kuing' pang mao' na', a lah',

"Peue Ui' na' pe', punta kaw pe' un' pun ri peus map' ka veng na',

mae' kaw pe' un' pun ri hkam' ku' keunhap' keuting ku' kaw meuh ri ka na',

pucti lih hk'ai' veng awn' a reu'.

⁵Kopti map' ka veng awn' jok' a ri huk' lhung' rot ri kuing' pang mao' na' hawc'.

Peucawo' Eun keutui' hpum' ku' kleuc' rai yeuh ka na' hawc'.

⁶Seun' ku' rai tawn tuil' ka ri peue na', tang tuil' a keutah ri ka reu'.

Ku' rai tawn yeuh ka na', tang tuil' a keutah ri ka lal' pun reu'.

Kawc' ku' tawn hkawo' ka ri tuil' peue nyui na', tang hkawo' a reng hk'ai' ka lal' pun reu'.

⁷Ku' yeuh pon yeuh lheu' ka ri tu' ri meun na' a lawn heun' a' neng ko',

kah ku' kuit nyhap' kleh' klai' na' kue' ri ka peunaw' yeut reu'.

A hpum' keuting lah' a nang hpum' ri na' meun,

'Mok' ui' ri meuh nang' haw' hkam'. Ui' hkuin' meuh a' ya seunao.

Ui' hkuin' kaw laee duing kue' seunyi kuit nyhap' na'.

⁸Kop awn' na, hk'a' naee ti seunyi na' yawo ku' keunhap' keuting heun' ceu na' a kaw peueng' ri ing' lec veng awn' na.

A meuh hk'a' yeum, hk'a' kuit nyhap' mae' hk'a' ut' ngeup'.

Veng na' a kaw pun ri ha' hk'ue ri ngawl na',

kopti Cawo' Peucawo' Cawo' taws' a' mu ka na' ti' -ca keuting Eun na'."

Peue loe' muk yam ri veng Babu' lon

⁹Yam hkun' haw' hkam' bhen' keute' ku' len' cu, yeuh ku' yeuh pon yeuh lheu' ri veng na' nyu ce tu' ngawl ka veng ha' na', ce kaw kleh' klai' yam ri veng

awn' na. ¹⁰Kopti lhat' ce ri ku' tukhka ka veng awn' a na', ce cawng vang seungai na', ce lah',

"O', veng keuting Babu' lon

veng ti' ca keuting, pun mi hk'a' jha' hawc',

pun mi hk'a' jha' hawc'.

Hk'a' naee ti nali na' yawo, hk'a' taws' a' mu Eun Peucawo' na' rot a ri mi hawc'."

¹¹Peue ka hkai' ka bhen' keute' na' ce kaw kleh' klai' yam ri veng awn' na, kopti kaw a un' laee kue' nang leu-vaee hk'eung ce na'. ¹²Hk'eung ce na' a meuh hk'il', leumuil, seumu seng', seng' seukleu', hpen' linin chak', hpen' yawtmong, hpen' nai', †hpen' seurak' nyawk', hku' hom' ku ceu, hk'eung ku ceu pleng' ri neum nga keusang' na', hku' ngos heun', tong, lhec', seumu paing, ¹³lho' cai' heung', hk'eung hom', ten tu' hom', hku' puis hom' muis Law' ban, leuum' pli' bui, lamawn hku' sanlon, hpun' moc', hkawocung', a' moe, kon' yung', rawng, law ka rawng, tu' peue mae' civit peue na'.

¹⁴Ce kaw lah', "Pli' ku' seumal sok mi na' pon a hk'ai' dak ti' mi heul' hawc'. Hk'a' meuneum na' mae' hk'eung yeuh mi sam' ran na' lu a gawm' euc' heul' hawc'. Mi hkuin' kaw laee pun ceu nang awn' ce keutah bae. ¹⁵Peue ka hkai' ku' pun ri meuneum kopti paing' ce hk'eung nang veng awn' a na' kopti lhat' ce ri ku' tukhka ka veng awn' na, ce cawng vang seungai na'. Ce kaw kleh' klai' yam ri veng awn' na. ¹⁶Ce lah',

"O' veng keuting, pun mi hk'a' jha' hawc', pun mi hk'a' jha' hawc'.

Chui' mi hk'eung hpen' linin chak', hpen' yawtmong mae' hpen' seurak' nyawk' na'.

Tu' mi na' a ceng' yhapyhap ri hk'il', seumu seng' mae' seng' seukleu' na'.

¹⁷Hk'a' naee ti nali na' yawo, hk'eung ngos heun' mi na' a lulaic' heul' hawc'."

Ro' ka reu na' ce ku peue, peue pawk reu, peue yeuh kan' nang reu mae' peue yeuh kan' uii' a' yu ri ri mha' seumut' na' ce gawm' euc' ce kaw cawng vang seungai na'. ¹⁸Yam nyu ce tu' ngawl ka veng ha' na', ce kaw klawng ri lah', "Tup duing kue' a veng seubu seun' veng keuting aen' na aw?" ¹⁹Ce kaw sawng' ghuim' cing' ri na' ri peuluung. Ce kaw kleh' klai' yam ri veng awn' na. Ce lah',

"O', veng keuting, pun mi hk'a' jha' hawc', pun mi hk'a' jha' hawc'.

Kopti meuh a hk'a' meuneum ka veng na',

cawo' reu nang mha' seumut' na' ce ku keut' ri meuneum ku peue ri.

† Hpen' nai' na' ti peue han' vaikong na' peue taing' a meuh hpen'.

Hk'a' naee ti nali na' yawo, mi pun ri lulaic heul' hawc'.

²⁰O', kuing' pang mao', cuinchang' ri veng aen' na reu'.

Peue Eun Peucawo', peue caee Eun Yesu' mae' peue suip leukah' Eun Peucawo' na' pe' ren' kawn reu'.

Peucawo' taws' Eun a' mu ri veng awn' a tang' pe' hawc'."

Veng Babu' lon rai' ka heul'

²¹Hawc' awn' na, in' hpom ti' ca keuting na' eun nyon seumu keuteul seumu maw' keuting na' nang mha' seu-mut' na'. Eun lah',

"Veng keuting Babu' lon na'

kaw a pun ri nyon ri tec ri reng seun' awn' na yeut.

A' nhaw' hkuin' kaw laee pun ri nyu a bae saec' ti peue.

²²A' nhaw' hkuin' kaw laee pun ri mhawng' seng' htawm ce peue tet' ting', peue puing' pi' mae' peue puing' pi' tae' rae' na' nang veng aen' na bae.

Hk'a' kan' na' ku ceu, a' nhaw' hkuin' kaw laee pun ri nyu

nang yeuh a nang veng aen' na bae.

A' nhaw' hkuin' kaw laee mhawng'

seng' maw' moc' nang veng aen' na bae.

²³A' hkuin' kaw laee kue'

ceng' ka kaw' ngawl na' nang veng aen' na bae.

A' nhaw' hkuin' kaw laee mhawng'

seng' kon' hk'ih' seula nang veng aen' na bae.

Peue ka hkai' mi na' meuh ce peue lhung' peue keuting pang bhen' keute' na'.

Lo' mi kahta' na' mi yeuh peue kleuc' hk'a' ri gawm' euc'.

²⁴Nham' ce peue suip leukah' Eun Peucawo' na', nham' ce peue Eun Peucawo' na'

mae' nham' ce peue pun ri hkam' toh peue ri pang bhen' keute' na' ce gawm' euc', pun ri nyu a nang veng awn' a."

Suk' seun' Peucawo' Eun

19 Hawc' awn' na, ui' pun ri mhawng' seng' laws' seun' seng' peue heun' nang kuing' pang mao' na'. A ta' ul' ri lah',

"Halelu' ya,†

hk'a' htut, munhpung' mae' ti' ca na' meuh a is' Eun Peucawo' e' na'.

²Kopti hk'a' taws' a' mu Eun na' a meuh neum mae' leupaws seumeu' na'.

Eun taws' a' mu ri beun' paing' tu' ri na' eun hawc'.

Beun' awn' yeuh eun bhen' keute' na' lu ri len' cu ri na'.

Peucawo' Eun yeuh beun' awn' eun sai' nham' ce mhai' ri na' hawc'."

³Hawc' ko', ce tang ta' ul' ri lah',

"Halelu' ya,

tu' ngawl ka veng awn' huk' a un' htawt' un' deut cot' cu ri."

⁴Nang kawt lal' kul' pun' peue mae' ku' a' yu im' pun' tu' na' ce nghup' ri faee' Peucawo' mok' pang tenceo' na' Eun. Ce klawng ri lah',

"Amin, Halelu' ya."

⁵Hawc' ko', seng' na' a laws' lih neum tenceo' na'. A lah',

"Peue meuh mhai' Eun Peucawo'

yumyam' Eun

peue aet' peue keuting na' ce gawm' euc',

suk' seun' Peucawo' e' na' Eun reu'."

⁶Hawc' ko', ui' tang pun ri mhawng' seng' laws' seun' seng' peue heun' na' mae' seun' seng' leuum' dhim' ri hot' klong' na' mae' seun' seng' neum hk'i reng na'. A ta' ul' ri lah',

"Halelu' ya,

kopti Peucawo' ti' ca keuting e' na' u' peung Eun.

⁷E' na' yeuh ri ren' kawn

mae' tuil' munhpung' Eun pawh,

kopti rot a yam Kon' yung' na' kaw Eun pen' hawc'

mae' kon' hk'ih' rangraen ri na' eun hawc'.

⁸Peucawo' tuil' Eun kon' hk'ih' na' eun cuip'

hk'eung hpen' linin chak', seunga' mae' yhapyhap na' hawc'."

(Vangdoh' ka hpen' linin chak' na' a meuh kan' leupaws seumeu' yeuh ce peue Eun Peucawo' na'.)

⁹Hawc' ko', in' hpom na' eun lah' a ri ui', "Tem' aen' a reu', 'Kah hk'a' ren' kawn na' kue' ri peue pun lhap' klawng eun ing' hk'a' chec' Eun Kon' yung' na' reu'.'" In' hpom na' eun tang lah' a bae, "Leukah' aen' meuh a taeng leukah' Eun Peucawo'."

¹⁰Yam awn' na, ui' nghup' ri kaw faee' eun mae' cung eun na'. Daecti eun lah' a ri ui', "Pawlaee yeuhko'. Meuh ui' mhai' Eun Peucawo' seun' mi ri mae' ec' awng' mi ku' jhawp' sa' hki' hkam' lawng Eun Yesu' na' yeut. Fae' Peucawo' Eun reu'. Kopti sa' hki' hkam' lawng Eun Yesu' na' meuh a meul' bhum' ka hk'a' sangsawn' leukah' mun' ren' kawn na'."

† Vangdoh' ka halelu' ya na' a meuh "suk' seun' Peucawo' Eun".

Cawo' pawk rawng paing

¹¹Ui' nyu kuing' pang mao' na' buih dah' ka. A kue' rawng paing ti tu' nanggal' ui' na'. Muis Eun Cawo' pawk ka na' a meuh Kati Keutawn' mae' Leupaws Seumeu'. Eun taws' a' mu mae' peue'ng' suik' ri hk'a' leupaws seumeu' na'. ¹²Ngai' Eun na' a seun' kueng ngawl na'. Hk'a' pang cing' Eun na' a kue' cui' maw hk'il' heun' meul'. A kue' muis tem' ri ri tu' Eun na'. A lawn un' meuh Heun ri, a' nhaw' hkuin' yawng muis awn' na saec' ti peue. ¹³Eun cuip' hk'o dal' cup ri nang nham' na'. Muis Eun na' a meuh Leukah' Eun Peucawo'. ¹⁴Muk suik' ka kuing' pang mao' na' ce hot' Eun heul'. Ce pawk rawng paing, ce cuip' hk'eung hpen' lin in chak' paing seunga' na'. ¹⁵Vaic lawm nyawk' na' a pucti lih hk'ai' moeng Eun na'. Eun ti vaic awn' na, Eun bhat' peue kuing' na' ce. Eun kaw u' peung ce ri hku' ji lhec' na'. [†]Eun kaw chok' chec' pli' bui na' hk'a' naee keutui' keuting a meuh vang bet' leuum' pli' bui seungeueng' Eun Peucawo' ti' ca keuting na'. ¹⁶Ri hk'o dal' mae' ri kleum' leuvang Eun na', a tem' muis Eun na' yeuhki',

“Hkun' haw' hkam' hk'a' pang hkun' haw' hkam' gawm' euc'. Cawo' hk'a' pang cawo' gawm' euc'.”

¹⁷Hawc' ko', ui' pun ri nyu in' hpom ti peue cawng eun hk'a' naee seunyi na' eun klawng ri lah' seng' laws' ri sim' peul' eo' nang vawo na'. Eun lah', “Ing' hk'om puri hk'a' naee pawe hk'asom' keuting Eun Peucawo' na' reu'. ¹⁸Punta kaw pe' pun ri hk'a' keune ce hkun' haw' hkam', keune ce po' suik' mae' peue suik', keune ka rawng mae' peue pawk ka na', keune ce peue gawm' euc' na' gawm' peue meuh mhai' na' mae' peue un' meuh mhai' na', mae' keune ce peue aet' peue keuting na'.”

¹⁹Hawc' awn' na ui' pun ri nyu sat' rai, hkun' haw' hkam' bhen' keute' na' ce mae' muk suik' ce na' ing' hk'om ce puri kaw peue'ng' Cawo' pawk rawng paing na' Eun mae' muk suik' Eun na' ce. ²⁰Daecti sat' rai na' mae' peue guil ri meuh peue suip leukah' Eun Peucawo' ku' yeuh het' hk'o' am' tang' sat' rai na' ka pun ri hkam' mheut' peue ri. Kopti meuh a het' hk'o' am' aen' a na', eun cop' long peue kue' vang mhai' ka sat' rai na', ce faee' ruphtu rup ka sat' rai na'. Sat' rai na' mae' peue guil ri meuh peue suip leukah' Eun Peucawo' na' ka pun ri hkam' nyon tu' im' ri na' hk'ue' nang glu ngawl mat na'. ²¹Peue kaw n' vang na' ce yeum ri vaic pucti lih hk'ai' moeng Eun Ca-

wo' pawk rawng paing na'. Hawc' ko', sim' na' ce cu ri hk'a' keune ce peue awn' a.

Yam tiheng' neum

20 Yam awn' na, ui' pun ri nyu in' hpom lih eun neum kuing' pang mao' na' ti peue. Eun jhawp' pakhkeuca' ka keutong' nyarok rui' na' mae' mu' lhec' keuting na' ri ti' ri na'. ²Eun mheut' ri mawt peuyong ku' meuh seueueng' leumah', meuh seuca', a' ko' meuh Satan na' rot tiheng' neum. ³A lawn un' nang nuk hk'o' tiheng' neum ko', punta kaw a un' cang cop' long peue bae' na', eun nyon a lih nang keutong' nyarok rui' na', eun sot saw' tawk' ta' ra' ri ka. A lawn nuk tiheng' neum ko', a kaw pun ri plo' ri ti cu hkao'.

⁴Ui' pun ri nyu ten na' ce. Peue mok' pang ten awn' ce meuh peue pun ti' ca kaw taws' a' mu na'. Hawc' ko', ui' pun ri nyu civit ce ku' taws' peue ngok ce na' kopti hkam' ce sa' hki' lawng Eun Yesu' na' mae' hkam' ce sa' hki' lawng leukah' Eun Peucawo' na'. Ce un' faee' sat' rai na', a' ko' ruphtu rup ka na'. Ce un' vang mhai' ka sat' rai na' ri rel' ri, a' ko' ri ti' ri. Peue awn' ce tang kuh' im'. Ce u' peung mae' Hkrit Eun tiduih' tiheng' neum. ⁵(Peue seubu yeum na' ce, a lawn un' nang nuk hk'o' tiheng' neum ko', ce kaw un' nang kuh' im'.) Aen' a meuh tang kuh' im' pok nanggal' na'. ⁶Peue pun ri pawng' ri hk'a' naee vang tang kuh' im' pok nanggal' aen' a na' ce mun' keuting, ce meuh peue seunga' chak'. Ti' ca ka hk'a' yeum lal' pok ti pok na' a kaw un' kue' hk'a' pang ce. Ce kaw meuh peue jhawp' rit Eun Peucawo' mae' peue jhawp' rit Eun Hkrit. Ce kaw u' peung mae' Heun tiduih' tiheng' neum.

Satan lulaic

⁷Yam tiheng' neum na' hawc' ka na', Satan na' a kaw pun ri plo' ri hk'ai' vang hk'awng' ri na'. ⁸A kaw heul' cop' long peue ut' pang bhen' keute' pun' hon' pun' ce' vang klawng ri meuh Gok mae' Makok na' hk'awp'. A hk'on' ro peue kaw ing' peue'ng' suik'. Peue awn' ce heun' seun' sai keunam mha' seumut' na'. ⁹Ce kaw ing' neum bhen' keute' na' ku hon'. Ce kaw ing' rop tawp ce peue Eun Peucawo' vang meuh veng leumeus' Eun na'. Daecti ngawl lih neum kuing' pang mao' na' a ha' hk'ue' ce gawm' euc'. ¹⁰Seuca' rai cop' long peue na' a pun ri hkam' nyon ri hk'ue' nang glu ngawl mat vang sat' rai na' mae' peue guil ri meuh peue suip leukah' Eun Peucawo' na' pun ka ri nyon ri ri ka nanggal' na'.

† Suk' seun' 2:9

Ce kaw pun ri hkam' hk'a' tukhka na' gawm' sum' gawm' seunyi cot' cu ri.

Taws' a' mu ri peue yeum

¹¹Hawc' awn' na, ui' pun ri nyu tenceo' keuting paing mae' Cawo' mok' hk'a' pang ka na' Eun. Yam puc Eun ri lih na', bhen' keute' mae' mao' na' a rai'. A hkuin' laee kue' vang ut' pun ku' lal' ceu aen' na.

¹²Hawc' ko', ui' pun ri nyu peue aet' peue keuting yeum heul' hawc' na' cawng ce nanggal' ka tenceo' na'. Htawm na' ce glas ri. Htawm seubu keuhti na' a ku glas ri, a meuh htawm civit im'. Peue yeum heul' hawc' na' pun ce ri hkam' hk'a' taws' a' mu na' hot' seun' ku' yeuh ri na' seun' ku' tem' ri nang htawm na' ce.

¹³Mha' seumut' na' a tang tuil' peue yeum hk'a' naee ri na' ce keutah. Hk'a' yeum na' mae' kuing' yeum na' a ku tang tuil' peue yeum hk'a' naee ri na' ce keutah. Peue ku peue na' pun peue ri hkam' hk'a' taws' a' mu na' hot' seun' ku' yeuh ri na'. ¹⁴Hawc' ko', hk'a' yeum na' mae' kuing' yeum na' a pun ri hkam' nyon ri hk'uic' nang glu ngawl na'. Glu ngawl awn' a meuh hk'a' yeum lal' pok ti pok na'. ¹⁵A'nhaw' lawn un' kue' muis tem' ri nang htawm civit im' na' ko', eun kaw pun ri hkam' nyon ri hk'uic' nang glu ngawl na'.

Kuing' pang mao' hk'u' mae' bhen' keute' hk'u'

21 Hawc' awn' na ui' pun ri nyu kuing' pang mao' hk'u' mae' bhen' keute' hk'u' na', kopti kuing' pang mao' nanggal' mae' bhen' keute' nanggal' na' rai' ka hawc'. Mha' seumut' na' a ku un' laee kue'.

²Ui' pun ri nyu veng seunga' chak'. A meuh veng Yeru' salaem hk'u' ku' Peucawo' tuil' Eun a lih neum kuing' pang mao' na'. Veng awn' a pun ri rangraen ri uin' ri seun' kon' hk'ih' kaw pen' mhe' yong' ri ngam ko' me ri na' eun na'. ³Hawc' ko', ui' pun ri mhawng' seng' laws' neum tenceo' na' a lah', "Maet' maen', vang ut' Eun Peucawo' na' lih ut' a mae' peue hawc'. Eun kaw ut' mae' ce. Ce kaw meuh peue Eun. Tu' Eun Peucawo' na' Eun kaw ut' mae' ce, meuh Peucawo' ce. ⁴Eun kaw ot' ri tec leuum' ngai' ce na' ku jam ka. A hkuin' kaw laee kue' hk'a' yeum, hk'a' kuit nyhap', pet yam a' ko' hk'a' sui' na' bae, kopti hk'a' ku' hk'im' na' pon ka heul' hawc'."

⁵Cawo' mok' pang tenceo' na' Eun lah', "Buih pleng' Ui' ku ceu na' meuh ku' hk'u'." Hawc' ko', Eun tang lah' a bae, "Tem' ceu nang aen' a reu', kopti leukah' aen' leupaws seumeu' ka, a meuh ku' neum."

⁶Hawc' ko', Eun lah' a ri ui', "Hawc' ka hawc'. Meuh Ui' Alfa mae' Omega. Meuh ui' kleum' ka mae' ngoc ka. A'nhaw' lawn sum' nyui leuum' ko', Ui' kaw tuil' eun nyui leuum' neum keutui' leuum' civit im' na', eun hkuin' kaw tuil' ngos ka. ⁷Peue pe na' eun kaw pun ri rap ri ti sin' aen' ce gawm' euc'. Ui' kaw meuh Peucawo' eun, eun kaw meuh kon' Ui'. ⁸Daecti peue cang lhat', peue un' yum', peue rai, peue toh peue, peue hkuit' nawng' tang', peue yeuh kahta', peue faee' ruph-tu mae' peue cang chi' lai na' ce gawm' euc' vang ut' ce na' a meuh glu ngawl mat na'. Aen' a meuh hk'a' yeum lal' pok ti pok na'."

Veng Yeru' salaem hk'u'

⁹Hawc' awn' na, in' hpom a' res peue kue' paen' seuglong' ku' keunhap' keuting a' res ceu na' ce, ku' ti peue na' eun ing' lah' a ri ui', "Ing' maen', kaw ui' tu-il' mi nawk kon' hk'ih' kaw meuh beun' Eun Kon' yung' na' eun." ¹⁰In' hpom na' eun va ui' hk'a' naee Cit' seunga' na' heul' ri gong keuting lhung' na'. Eun yeuh ui' nyu veng seunga' chak'. A meuh veng Yeru' salaem ku' Peucawo' tuil' Eun a lih neum kuing' pang mao' na'. ¹¹Veng awn' a ceng' yhapyhap ri munhpung' Eun Peucawo' na'. A ceng' seungung seun' ceng' ka seumu seng' ngos heun' na'. A seunga' seungawm seun' ceo' na'. ¹²Veng awn' a kue' hkui keuting lhung'. Leuva' hkui ka na' a kue' kul' leual' leuva'. In' hpom kul' leual' peue na' ce ut' ri leuva' na' keuhti na' ti peue. Pang cing' ka leuva' na' a tem' muis ce peue ceu I' sarela' kul' leual' ceu na'. ¹³Hk'a' lih seunyi ka na' a kue' loe' leuva', hk'a' tuh ka na' a kue' loe' leuva', hk'a' col ka na' a kue' loe' leuva', hk'a' lec seunyi ka na' a kue' loe' leuva'. ¹⁴Hkui veng na' kleum' ka na' a meuh seumu kul' leual' meul'. Hk'a' pang ka kleum' ka na' a tem' muis ce peue caee Eun Kon' yung' kul' leual' peue na' ce ri ka.

¹⁵Punta kaw eun keutec veng awn' na mae' leuva' ka hkui veng na' a ci' keuting a' neng na', in' hpom ku' leukah' mae' ui' na' eun jhawp' lhem' hk'il' ku' keutec na'. ¹⁶Veng awn' a kue' pun' ce' pun' nha'. Lung lang' lung neng' ka na' a keuteul puri. Yam in' hpom na' keutec eun veng na' ri ku' keutec ri na', a kue' timhuin' lal' heng' satadi †. Lung vah, lung lhung' mae' lung lang' ka na' a keuteul puri. ¹⁷Eun keutec lung leupeul †† ka hkui veng na' a kue' tipak' pun' kul' pun' sok'. In' hpom na' eun keutec a seun' peue keutec peue na'. ¹⁸Hkui veng na' a go' ri ri seumu seng' seurak'. Veng na' a pleng' ri neum hk'il' un' laee hkawo' keun-

† A meuh hk'ao 1,400 lak', a' ko' 2,200 ki' lo' †† A' ko' lung lhung'

haw' na'. A seunga' seungawm seun' ceo' na'.
¹⁹ Kleum' ka hkui veng na' a yong' ri ri seumu seng' ngos heun' heun' ceu na'. Kleum' keuhti ka na' a yong' ri ri seumu seng' seurak', kleum' leual' ka na' a yong' ri ri seumu seng' lheun', kleum' leuae' ka na' a yong' ri ri seumu seng' seungal puil', kleum' pun' ka na' a yong' ri ri seumu seng' seungal lawng,²⁰ kleum' hpawn' ka na' a yong' ri ri seumu seng' seurak' lai, kleum' les ka na' a yong' ri ri seumu seng' heun' hpi-u', kleum' a' res ka na' a yong' ri ri seumu seng' seungal pah', kleum' seudi' ka na' a yong' ri ri seumu seng' seungal hk'ao', kleum' seudim' ka na' a yong' ri ri seumu seng' lheun' hk'ao', kleum' kul' ka na' a yong' ri ri seumu seng' seungal kueng, kleum' kul' keuhti ka na' a yong' ri ri seumu seng' seurak' seunyl, kleum' kul' leual' ka na' a yong' ri ri seumu seng' yawtmong na'.²¹ Leuva' ka hkui veng kul' leual' leuva' na' a meuh seng' seukleu' kul' leual' meul'. Leuva' ti leuva' na' a meuh seng' seukleu' na' ti meul'. Hk'a' ka veng na' a pleng' ri neum hk'il' un' laee hkawo' keunhaw' na'. A seunga' seungawm seun' ceo' na'.

²² Ui' hkuin' nyu nya hk'o' mun' keuting na' hk'a' - naee veng awn' na, kopti Peucawo' Cawo' ti' ca keuting na' Eun mae' Kon' yung' na' meuh Ka nya hk'o' mun' keuting ka veng na'.²³ Veng awn' a hkuin' lo' ceng' ka seunyi na', a' ko' ceng' ka a' chi' na', kopti munhpung' Eun Peucawo' na' meuh a ku' ceng' ka veng na', mae' Kon' yung' na' Eun meuh kaw' ngawl ka veng na'.²⁴ Peue ceu na' ce kaw long hk'a' hk'a' naee ku' ceng' awn' na. Hkun' haw' hkam' bhen' keute' na' ce kaw sawng' ti munhpung' ri na' ing' lec veng awn' na.²⁵ Leuva' ka veng na' a hkuin' laee sawng' ri, kopti mawn' na' un' laee kue' a yam peunsum'.²⁶ Munhpung' mae' hk'a' yumyam' ce peue ku kuing' na' a kaw pun ri ti ri ing' lec veng awn' na.
²⁷ Ku' hk'aw' jeuk na', a' ko' peue yeuh ku' hk'o' kaic na', a' ko' peue cang chi' lai na' ce hkuin' kaw cang ing' lec veng awn' na. Daecti peue kue' muis nang htawm civit im' Eun Kon' yung' na' ce yawo ce kaw pun ri lec a.

22 Hawc' awn' na, in' hpom na' eun tuil' ui' nawk klong' kue' leuum' civit im' seunga' seungawm seun' ceo' na'. A lhaee' lih neum tenceo' Eun Peucawo' na' mae' tenceo' Eun Kon' yung' na'.² A lhaee' lec nang ngon' ka hk'a' keuting ka veng na'. Keunam hk'a' mawn' hk'a' maen' ka klong' na' a kue' kleum' hku' civit im'. A pli' pli' kul' leual' ceu, chi' ka ti pok. Lha' ka na' a meuh bai' yeuh peuyhat peue cuin'.³ A hkuin' laee kue' hk'a' jha' na' bae. Tenceo' Eun Peu-

cawo' na' mae' tenceo' Eun Kon' yung' na' a kaw uin' ri nang veng awn' na. Peue yeuh mhai' Eun na' ce kaw yeuh mhai' Eun.⁴ Ce kaw pun ri nyu buh Eun, muis Eun na' a kaw tawk' ri ri rel' ce na'.⁵ A hkuin' kaw laee kue' peunsum' na' bae. Ce hkuin' kaw laee lo' ceng' ka kaw' ngawl na', a' ko' ceng' ka seunyi na', kopti Cawo' Peucawo' kaw Eun tuil' ku' ceng' na' ri ce. Ce kaw u' peung a heul' cot' cu ri.

Hkrit kaw Eun lih

⁶ In' hpom na' eun lah' a ri ui', "Leukah' aen' leu-paws seumeu' ka, a meuh ku' neum. Cawo' Peucawo' cit' ce peue suip leukah' Eun Peucawo' na' cus' Eun in' hpom ri na' eun lih yeuh mhai' ri na' ce nyu ku' un' ling' a kaw kah ri keut' kue' na' ce.⁷ Keue' reu', un' ling' kaw Ui' lih. Mun' keuting ri peue leuceng ri ti leukah' tamnai tem' ri hk'a' naee htawm aen' a na' ce reu'."

⁸ Meuh ui' Yo' han ku' pun ri nyu pun ri mhawng' lawng aen' a na' eun. Hawc' pun ui' ri nyu pun ui' ri mhawng' lawng aen' a na', ui' nghup' ri kaw faee' in' hpom ku' yeuh ui' nyu a na' eun mae' cung eun na'.⁹ Daecti eun lah' a ri ui', "Pawlaee yeuhko'. Meuh ui' mhai' Eun Peucawo' seun' mi ri mae' ec' awng' mi ku' meuh peue suip leukah' Eun Peucawo' na' mae' peue rokxa' leukah' tem' ri hk'a' naee htawm aen' a na' ce yeut. Fae' Peucawo' Eun reu'."

¹⁰ Hawc' ko', eun tang lah' a ri ui', "Pawlaee tawk' ta' ra' ri leukah' ce peue suip leukah' Eun Peucawo' ku' tem' ri hk'a' naee htawm aen' na awh, kopti yam ka na' kaw a hk'aws' rot hawc'.¹¹ Peue yeuh ku' kleuc' na', tae' ce suip ri yeuh ku' kleuc' na' heul'. Peue yeuh ku' rai na', tae' ce suip ri yeuh ku' rai na' heul'. Peue yeuh ku' cawp' na', tae' ce suip ri yeuh ku' cawp' na' heul'. Peue seunga' chak' na', tae' ce suip ri rokxa' tu' ri na' seunga' chak' heul' reu'.

¹² Keue' reu', un' ling' kaw Ui' lih. Lapsawng' Ui' na' kue' a ri Ui'. Ui' kaw tuil' a kuing' hpaw mae' hot' ku' yeuh peue na' ku' peue ri.¹³ Meuh Ui' Alfa mae' Omega. Meuh ui' kleum' ka mae' ngoc ka. Meuh ui' kleum' yamla na' mae' yam tisut' na'.

¹⁴ Peue sawng' sak hk'ohk'eung ri na' punta kaw ce pun ri hk'a' pli' ka kleum' hku' civit im' na' mae' kaw ce pun ri lec leuva' na' ing' lec veng na', mun' keuting ri ce.¹⁵ Ku' ut' hk'a' nok ka veng na' a meuh so', a meuh peue yeuh kahta', peue hkuit' nawng' tang', peue toh

† Seumu seng' aen' ce a hkuin' koe duih' muis ka na'.

peue, peue faee' ruphtu maee' peue ren' maee' chi' lai yeuh ri hot' a na' ce ku peue.

¹⁶ Meuh Ui' Yesu'. Ui' cus' in' hpom ri na' eun lih hkam' sa' hki' lawng aen' ce ri pe' pun muk kon' Hkrit na' ce. Meuh Ui' res maee' ceucat eun Davit'. Ui' ku meuh seumeueng' keuting peunngup cawo ceng' nyawk' na' yeut."

¹⁷ Cit' seunga' maee' Kon' hk'ih' kaw pen' na' Ka lah', "Ing' maen'." Saec' meuh peue mhawng' a na' kah ce lah', "Ing' maen'." A' nhaw' lawn sum' nyui leuum' ko', kah eun ing' maen'. A' nhaw' lawn sum' pun ko', kah eun ing' ti lapsawng' un' tuil' ngos ri leuum' civit im' na' maen' reu'.

¹⁸ Tuil' Ui' sati ce peue pun ri mhawng' leukah' tamnai tem' ri nang htawm aen' a na' ce. A' nhaw' lawn bae a lheu' ko', Peucawo' Eun ku kaw bae ku' keunhap' keuting ku' tem' ri nang htawm aen' a na' ri heun.

¹⁹ A' nhaw' lawn ti leukah' tamnai tem' ri nang htawm aen' a yawm' ko', Peucawo' Eun ku kaw ti ku' htuk' eun ri kaw pun ri kleum' hku' civit im' na' maee' ri veng seunga' chak' ku' tem' ri nang htawm aen' a yawm' yeut. ²⁰ Cawo' hkam' sa' hki' ri lawng aen' ce na' Eun lah', "Un' ling' ko', kaw Ui' lih neumneum." Amin, Cawo' Yesu' lih reu'.

²¹ Kah mun' sin' Eun Cawo' Yesu' na' kue' ri peue Eun Peucawo' na' ce reu'.